

Pavitra Polle



Aheri Gondi: Besta Kabur (Bible)

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files dated 1 May 2025
856c9a76-2de1-5675-855a-28be9a349068

Contents

मत्तयाल	1
मरकुस	49
लुकाल	79
योहान	135
प्रेरितुलकुना कबाहक	172
रोम	218
1 कुरैति	240
2 कुरैति	258
गलातिया	270
इपीसि	278
पिलिपिया	286
कुलसि	292
1 तेसलोनि	297
2 तेसलोनि	302
1 तिमोति	305
2 तिमोति	311
तीतु	316
पिलेमोन	319
इब्रि	321
याकोब	339
1 पत्रु	344
2 पत्रु	350
1 योहान	354
2 योहान	360
3 योहान	361
यहुदा	363
पेन हूपिस्ता पोल्ले	365

मत्तयाल मत्तयाल रासतद बेसता कबुर

इद पुस्तकमता बारेमते गिचचो परिचयम

रासतोना पोरोल: मत्तयाल

रासता कालम: इसवि सन 50-60

इद पुस्तकम रासता मत्तयाल यहदि मनकल आंदुर. ईर रोमि सरकारनाहाटी कर वसुल कियुंदुर इंचि ईन यहदि लोकुल्लक ह्यसाकोंदुर. अथनागानि येसु सामि केयतस्के ओना पज्जो होंचि ओना सिस्सुड आतोर. यहदिल्लक पूसकियना सवालकुंक जवाब हियनाहाटी मत्तयाल इद पुस्तकमतुन रासतोर. इंका इद पुस्तकमतुन हदुवते, एनकटा कालमते पेनदा कबुरतोर वेहता बविस्यवानिगुडा येसु किरिस्तुना लोप्पो पुरागा आंतां इत्ता संगति मनाकु तेळियता. अचोने आयका स्वर्ग राज्येम इत्ते बतल, स्वर्ग राज्येमता रहिवासिनलेसी बल्हा पिस्सा परांतोम, अद बल्हा मनंता? इसौंटा सवालकुना जवाबगुडा येसु सामि बेस वेसुडिं वेहचि तेळियागोटता बारेमते रासि मंता.

बगा बतल मंता

येसुना पुटमळ आनि बेर्समळ 1:1-2:23

स्वर्ग राज्येमता बारेमते वेहमळ 3:1-7:29

गालिल्लते येसु सेवा कबळ सुख कीतोर 8:1-10:42

येसुना विरोद कियमळ आनि लोल्लिं आयमळ 11:1-13:52

गालिल्लते येसुना सेवा कबळ मारमळ 13:53-18:35

किरिस्तु येस्सलेम दांतोर 19:1-25:46

येसुंक तिप्पल्लक वासि, हासि मर्रा जीवाते तेदमळ 26:1-28:20

येसु सामिना पेदूदाल्लकुना तंतुल्लक

(लुकाल 3:23-38)

1 येसु किरिस्तुना* पेदूदाल्लकुना तंतुल्लक इल्हा मंतां. येसुना एनकटा मातिर-दादाल अन्नहाम आंदुर. अन्नहामुना तंतुनाल दाविद राजाल पुटतोर, दाविदुना तंतुनाले येसु सामि वातोर.

2 अन्नहामुंक इसाक पुटतोर, इसाकुना मर्रि याकोब, याकोबुना मर्क यहदल आनि ईना दादालोर-तम्मुहक.

3 यहदाना मर्क पेरस आनि जेराल, ईरा यावन पोरोल तामरि आंद. पेरसुना मर्रि हेसरोन, हेसरोनुना मर्रि अराम,

4 अरामुना मर्रि अमिनादाब, अमिनादाबुना मर्रि नहसोन, नहसोनिना मर्रि सलमोन,

5 सलमोनुना मर्रि बोआज, बोआजुना यावन पोरोल राहोबी आंद. बोवाज आनि ओना मुत्तो स्तुंक ओबेद पुटतोर. ओबेदुना

मर्रि यिस्सल,

6 यिस्साना मर्रि दाविद राजाल.

दाविदना मर्रि सुलेमान, सुलेमानना यावल मोदाला उरियाना मुत्तो मत्ता.

7 सुलेमानुंक रहोबाम पुटतोर. रहोबामुना मर्रि अबियेल, अबियेलुंक आस्थल पुटतोर.

8 आस्थना मर्रि येहोसपात, येहोसपातुना मर्रि योराम, योरामुना तंतुनाल उजियाल पुटतोर.

9 उजियाना मर्रि योताम आनि योतामुना मर्रि अहाज, अहाजना मर्रि हिजकियल.

10 हिजकियन हेंदाल मनसे पुटतोर, मनसेना मर्रि आमोन, आमोनुना मर्रि योसियाल.

11 इस्राएल लोकुल्लक गुलाम कीसि बेबिलोन देसेमते ओयनेके योसियांक येकोनियेल आनि इंका ईना तम्मुहक आतुर.

12 बेबिलोन ओता पजा येकोनियुंक सलितिएल पुटतोर, सलितिएलुन मर्रि जेस्बाबेल.

13 जेस्बाबेलुना मर्रि अबियुद, अबियुदुना मर्रि एलकिमु, एलकिमुंक अजिरल पुटतोर.

14 अजिरना मर्रि सादोक, सादोकुना मर्रि याकिम, याकिमुंक एलहदल पुटतोर.

15 एलहदुना मर्रि एलियाजर, एलियाजरना मर्रि मल्लन, मल्लानिकु याकोब पुटतोर.

16 याकोबुना मर्रि योसेप, योसेपुन मुत्तो मरियम. मरियम "किरिस्तु" इना येसु सामिन यावल आंद.

* 1:1 किरिस्तु इत्ते "अबिसेक आतोर" इंचि अर्तम. मनकन ओना पापाल्लुकुनाल पिसागोटनाहाटी पेन बोन अये अबिसेकम कीसि लोहतने, ओरि किरिस्तु आंद.

† 1:1 तंतुल्लक उंदे बंसम, पीळि.

17 ई परकारम अब्राहामुनगटाल दाविदुनदाका पडनालुं तंतुल्क. दाविदुनगटाल बेबिलोनेते गुलाम कीसि ओयानदाका पडनालुं तंतुल्क. अल्हे बेबिलोनेते यहूदिल्कुन गुलाम कीसि ओतागटाल अयते येसु किरिस्तु पुट्टनदाका पडनालुं तंतुल्क आतां.

येसुना पुटमळ (लकाल 2:1-7)

18 येसु किरिस्तुना पुटमळ इल्हा जर्गता. मरियमुन योसेपुंक तल्किस् एरां बोट्टु कीतुर. योसेप मरियमुन इट्टक मुन्नेने पवित्र आत्मातां हेंदाल मरियमुंकु पीर आता.

19 मरियमुन तल्कता योसेप न्यायमते ताकाना मनकल मत्तोर. अद पीटे मत्ता संगति ओन्क तेळियतस्के दान अंतोरा मुन्नेने बदनम कियामान्नि इन्कुत्तोर. अदुनहाटीं बोर्के तेळियाकोटा मरियमुन होळसना विचारम कीसेक मत्तोर.

20 गानि इल्हा विचारम कीसेक मनानेके पेनदा दूता^S कलाते वासि, “योसेपु, दाविदुन वंसमतोना, निमे मरियमुन नीवा मुत्तो इंचि ओप्कुनालय वेरियमा. बारित्ते दाना पीटे मनना पिंडेम पवित्र आत्माहेंदाल आसि मंता.

21 अद पेडन कनंता, ओर ओना लोकुल्कुन ओरा पापालुकुनाल पिसागोटंतोर. अदुनहाटीं ओना पोरोल येसु दोस्सा,” इंचि वेहता.

22 मुन्ने पेनदा कबुरतोर रासता पोल्ले निजम आयनाहाटीं आता. अद पोल्ले इल्हा मंता.

23 “हूळट, मरमिं आयवा पेगिडुक पीर आसि, वरोर मरिन कनांता.

ओना पोरोल इम्मानुएल दोस्सानु.”[☆]

इत्ते, “मनातोनि पेन मंता,” इंचि ई पोरोल्क अर्तम.

24 अस्के निद्रताल तेदतारित्ते योसेप पेनदा दूता वेहता परकारम कीतोर. ओर मरियमुन ओना मुत्तो इंचि स्विकारम कीतोर.

25 अयनागानि अद एर पूरानाल ओर दानतोनि मीडा हिल्लोर. ओर पेडन पोरोल येसु इंचि दोसतोर.

2

पंचगाल्क ह्ळानोर येसु सामिना काल्क मोळ्कालय वायमळ

1 येसु यहूदिया एरियाता बेतलहेम नाटे पुट्टस्के अगा हेरोद इनना राजाल राज्येम कीसेक मत्तोर. अदे कालमते पोळ्द पेयसनाहेंदाल बोरो पंचांगम ह्ळानोर येस्सलेम सहरते वातुर.

2 वासि राजांक कलियसि, “पूने-पूने पुटता यहूदिल्कुना राजाल बगा मंतोर? पोळ्द पेयसनाहेके ओर पुटताप मोमोट उंदि सुक्कातुन ह्ळतोम. ओना काल्क मोळ्कालय मोमोट वातोम,” इंचि राजन पूसकीतुर.

3 इद केंजसि हेरोद राजाल आनि येस्सलेम सहरअंता वेरिय्कुत्तुर.

4 अस्के हेरोद राजाल येस्सलेम सहरता पेदूदा पर्मांलोकुंन^{*} आनि अगाटा दर्मसास्त्रम कराहना गुस्कुन अंतोर्कुन केय्सि, “किरिस्तु बगा पुट्टनद मत्तोर?” इंचि पूसकीतोर.

5 अस्के ओर, “यहूदिया एरियाता बेतलहेम नाटेने,” इंचि वेहतुर.

6 एनकटा पेनदा कबुरतोर रासताप,

“ए यहूदिया एरियाता बूमिपोरों मंदना बेतलहेम नाटेनोरिता,

मिमेट मीवा नार, सिन्नादे इंचि इनकुन्मट.

बारित्ते नावा इम्नाएल देसेमता लोकुल्कुन कापाळनोर,

आ राजाल मीवा नाटेने पुट्टनद मंता.”[☆]

7 अस्के पोळ्द पेयसनाहेंदाल वाता पंचांगम ह्ळानोर्कुन हेरोद राजाल सपुडदाका कलियसि “सुक्का बद वेलाक दिसता?” इंचि पूस कीसि एरपाट कीकुत्तोर.

8 पजा “मिमेट होंचि आ पुटता पेडन बेस प्हकट आनि दिसतारित्ते नाकु वासि वेहट, अस्के ननागुडा होंचि ओना काल्क मोळ्ककन,” इंचि वेहचि ओर्कुन बेतलहेम नार लोहचीतोर.

9 पजा राजाल वेहता पोल्ले केंजसि आ पंचांगम ह्ळानोर अगटाल पेय्त्तुर. मुन्ने बद सुक्का दिस्सि मत्तानो अद सुक्का ओरा मुन्ने-मुन्ने होंचि आ पेडल मत्ता जेगा पोरिन आगुता.

10 आ सुक्कातुन ह्ळसि ओर्कु इरगा आनंदम आता. पंचांगम ह्ळानोर येसु पुट्टगा बेतलहेम नाटे होत्तुर.

‡ 1:18 पवित्र आत्मा पेनदा आत्मा, पेनदाहेंदाल दोर्कना आत्मा.

§ 1:20 पेनदा दूता पेनदा पोल्लेतुन बूमिपोरों पीसि वायना पेनदा दासिक्क.

☆ 1:23

यसायाह 7:14 * 2:4 पेदूदा पर्मांलोक इस् वेल्लेन मदि मनांतुर.

☆ 2:6 मीका 5:2

11 ओर लोता लोपपो होंचि आ पेडन तल्लुर मरियमनगा हळतुर. आ पेडाना कालकुनपोर्रो अरसि मोळकतुर. आयंका ओर जोरानाल बंगारम, गंदकम,† ऊदु इसंटा एक्को दराता वस्तुक तेंडसि ओन्क हीतुर. 12 आयंका “मल्लिस हेरोदनाहेके होनमत” इंचि पेन कलाते वेहताहेंका ओर इंकुंदि हरि पीसि ओरा देसेम पेय्छि होतुर.

येसुन पीसि इजिप्त देसेमते होनमळ

13 पंचांगम हळानोर होतारित्ते, योसेपुंक उंदि पेनदा दूता कलाते दिस्सि, “मिमे तेदा, पेडन आनि ओना तल्लुन पीसि इजिप्त देसेम पेय्छि होन. हेरोद राजाल पेडन हळ्कनाहाटी पष्कांतोर. अदुनहाटी नना नीकु मर्रा वेहनदाका अग्गेन मन्नु,” इंचि वेहता.

14 अस्के योसेप अदे नर्का पेडन आनि पेडाना तल्लुन पीकूंचि इजिप्त देसेमकु पेय्छि होतोर.

15 हेरोद राजाल हासोननदाका अग्गेन मत्तोर. “नना नावा मर्रिन इजिप्त देसेमताल केयतन”* इंचि वेल्लेन वर्सा मुन्ने पेनदा कबुरतोरारहेंदाल वेहामळ जर्गता, पोल्ले निजम आयगोम इंचि इंदता जर्गता.

हेरोद राजाल बेतलहेम नाटेना पिलाल्कुन हळ्कंतोर

16 आ पंचांगम हळना लोकुल्क ओन नाडहे कीतद एरपाट कीसि, हेरोद राजांक इरगा होंग वाता. आ पंचांगम हळानोरारहेंदाल आ पेडल पुटता वेला एका कीकूंचि मत्ताहेंका बेतलहेम आनि पकापीसि मत्ता नाटेने मनना रौंडु वर्सानोर, इंका रौंडु वर्साकन्ना सिन्नोर्क अंटीर मांडूसा पिलाल्कुन हळ्कट इंचि हेरोद राजाल आदेस हीतोर.

17 ई परकारम यिर्याह इनना एनकटा पेनदा कबुरतोर वेहता पेनदा पोल्ले निजम आता. अद पोल्ले इल्हा मत्ता:

18 “येचेलना पिलाल्क हासि होतुर, इंचि रामाह इनना नाटे दुक्कमते अळाना सप्पुड केंजावाता.

अद दाना पिलाल्कुनाहाटी अळसेके मत्ता,

बोर सम्मत किथिनागानि अद समत आयाहिल्ले.”*

योसेपना कुटुंबम इजिप्त देसेमताल मल्लिस वायमळ

19 कोन्नि रोजकुंक हेरोद राजाल हातोर. अस्के इजिप्तते मनना योसेपुनतोन कलाते पेनदा दूता वासि,

20 “तेदा, पेडन हळ्कालय हळ्सेके मत्तोर हातोर, अदुनहेंके निमे पेडन आनि ओना तल्लुन पीसि इस्त्राएल देसेमते मल्लिस होन,” इंचि इत्ता.

21 अस्के योसेपु पेडन आनि पेडाना तल्लुन पीसि इस्त्राएल देसेमते मल्लिस होतोर.

22 गानि यहुदिया एरियाता हेरोद राजाल हातारित्ते “ओना जेगाते ओना मर्रि अर्केलाल राजाल आतोर,” इंचि तेळियतारित्ते ओर अगा होनालासि वेरियतोर. आयंका कलाते पेन वेहताहेंका ओर गालिल एरियाते होतोर.

23 अगा ओर नासरेत इनना नाटे होंचि जेगा पीतोर. इंचि “ओन नासरेततोर इंतुर.” इल्हा पेनदा कबुरतोर मुन्नेने वेहचि मत्तद इंदके निजम आता.

3

बापतिस्मा हियना योहान

(मरकुस 1:2-8; लूकाल 3:1-17; योहान 1:6; 1:19-28)

1-2 अदे कालमते, पेनदा पोरोलते एते मुळ्हाचि बापतिस्मा* हियना योहान यहुदिया एरियाता बय्लि जेगाते वातोर. वासि, “स्वर्ग राज्येम दगेर्क एत्ता, मिमेट मनसु मासकुंदु,” इंचेके वरगोयसि वेहालय दल्यतोर.

3 एनकटा कालमते यसायाहल इनना पेनदा कबुरतोर, ई योहानुना बारिमते इल्हा वळ्किस्सि मत्तोर गदा:

“सामिनाहाटी हरि तयार कीम्टु, ओना हरि सवरगा कीम्टु,

इंचि केडाते केयानद उंदि अल्लिकर केंजावाता.”*

4 आ योहान लोटापेटा बुराते तयार कीता कपडिं केरसि तोल्दा पट्टा नडिक तासकुन्दुर. ओर गोल्लाबामां† आनि तेने इवे तिडि तिन्दुर.

5 येस्सलेम सहरताल, यहुदिया राज्येमता आन्नि जेगानाल आनि योर्दन बेरेटा सट्टु-मट्टुना जेगाता लोकुल्क योहानुनगा वातुर.

6 वासि ओरा पापाल्क ओय्कुचि ओनहेंदाल योर्दन बेरेटे बापतिस्मा येतकुत्तुर.

† 2:11 गंदकम इद उंदि एक्को दराता वस्तु अंद. * 2:15 होसे 11:1 * 2:18 यिर्याह 31:15 * 3:1-2 बापतिस्मा येसुन पोरोलते एर तुगमळ, उंदि दिन्सा, उंदि दंडकम. * 3:3 यसायाह 40:3 † 3:4 गोल्लाबामा उंदि पुडि (बूमिपोर्रो पिरकालम पेय्स्ता).

7 बापतिस्मा हियना जेगातगा वेल्लेन मंदि परिसिल्क, सद्किर्क^S वायानद ह्ळसि योहान ओर्कुन, “ए कट्टला तरासनसंतोरिटा, पेनदा होंगुनाल तपिचकुनालय बापतिस्मा येतट इंचि मीकु बोर वेहतुर?

8 अय्ते मरि, निजमे मीवा मनसु मार्सुकुत्तिर इंचि रूजुव कीसि हुप्सट.

9 वाट्टिटे, मोमोट अब्राहामुना वंसमतोरेम आंदुम, इंचि बस्केने इनकुनमट. नना मीकु निजम वेहांतन, पेन अब्राहामनाहाटी ई बंडानालगुडा पिलाल्क पुट्टिचि हिया परंता.

10 इंदके मराकुना हिचकुनगा मर्सु इरसि मंता. बव मराकुंक अय्ते बेसता पंडि हादोंगों, अवुन नर्किसि तडमिते वाटमळ जर्गता.

11 मिटे मीवा मनसु मार्सुकुत्ताहाटी नना मीकु एते मुळहाचि बापतिस्मा हीसेक मंतन. गानि नाकन्ना सक्तिमंतुड नावा पज्जोटाल वासंतोर. ओना हेरपुह्कुन इटाना लायकगुडा नना हिल्लेन. ओरे मीकु पवित्र आत्माते आनि तडमिते बापतिस्मा हीतोर.

12 ओना कय्दे हेती मंता. ओर ओना कडातुन बेस साप कीतारित्ते गोह्कुन त्रपाल्क पीसि गुम्मिते दोसंतोर, पोट्टुनबारे बस्केने पिस्वा तडमिते वाटसि बोळसंतोर,” इंचि इत्तोर.

योहान येसुकु बापतिस्मा हीतोर

(मरकुस 1:9-11; लूकाल 3:21-22; योहान 1:29-34)

13 पजा येसु, गालिल एरियाताल योर्दन बेरटगा, योहानुनाहेंदाल बापतिस्मा एतालय वातोर.

14 अस्के “नना नीवा कयदाल बापतिस्मा येतकुनगोम, गानि निमे नहगा वासि बापतिस्मा एतकुनमळा!” इंचि योहान येसुन आपालय ह्ळतोर.

15 अस्के येसु, “पेनदा इच्चागुडा मनम इल्हेन कियाना इंचि मंता. अदुनहाटी ई नीतिता दंडकम इल्हेने जर्गिकांटी,” इंचि इत्तोर. इल्हा योहान येसुकु बापतिस्मा हियालय तयार आतोर.

16 येसु बापतिस्मा एतसि एताल पलाते पेय्स्तस्के मब्बु बय्यारा आता. पेनदा आत्मा उंदि पावरेम पिट्टेतालेसी आसि येसुनपोरों रैयतद येसु ह्ळतोर.

17 अस्केन स्वर्गमत्ताल, “ईर ना पावरमगल्ला मरि आंदुर. ईर इत्ते नाकु बचचोनो संबरम,” इंचि उंदि अल्किर केंजावाता.

4

देय्यमताहेंदाल येसुना परिक्सा

(मरकुस 1:12-13; लूकाल 4:1-13)

1 पजा पेद्दा देय्यम येसुना पट्टु ह्ळगोम इंचि पेनदा आत्मा ओन बय्लि जेगाते ओता.

2 अगा येसु नल्यै रोजकु, नल्यै नर्का उपासम मत्तोर. अदुनहाटी येसुकु इरगा कर्वेस्ता.

3 अस्के आ पट्टु ह्ळानोर येसुनगा वासि, “ओक्कला निमे पेनदा मरिन आते ई बंडां हारि आरिं इंचि आदेस हीम,” इंचि इत्ता.

4 अस्के येसु इल्हा जवाब हीतोर,

“मनकल सिराप वाट्टि हारि तिचे पिस्सोर,

गानि पेनदा तोळ्दाल पेय्सना उंदि-उंदि पोल्लेताहेंदाल पिस्संतोर.

इल्हा दर्मसास्त्रमते रासि मंता.”[☆]

5 पजा आ पेद्दा देय्यम येसुन येस्सलेम इनना पवित्र सहरते ओसि, गुळि पोरो कोस्सक निल्हाचि इल्हा इत्ता.

6 “ओक्कला निमे पेनदा मरिन आते हिळ्ळु दुनका,

बारित्ते, नीकुन कापाळालय पेन दाना द्तांक आदेस हीता,

आनि आ द्तां वासि नीवा काल्कुंक देब्बां दल्ल्यामन्नि इंचि,

नीकुन पोरोट्टुद पोरेन अंदकुंतां,

इल्हा दर्मसास्त्रमते रासि मंता.”[☆]

7 अस्के येसु दान इल्हा इत्तोर,

“निमे सामि इनना नीवा पेनदा पट्टु ह्ळमा,

इल्हागुडा दर्मसास्त्रमते रासि मंता.”[☆]

‡ 3:7 परिसिल्क परिसिल्क इत्ते यहदिल्कुन लोम्पोटद उंदि जाति आंद, ईर तिरियसि पुटमळतुन नम्मंतुर. S 3:7 सद्किर्क सद्किर्क यहदिल्कुना लोम्पोटद उंदि जाति आंद. ईर म्साणा नियमते ताक्कदुर आनि तिरियसि पुटमळतुन नम्माकोदुर. ☆ 4:4 व्यवस्ताविवरन 8:3 ☆ 4:6 बजन संहिता 91:11-12

☆ 4:7 व्यवस्ताविवरन 6:16

8 पजा आ पेद्दा देय्यम येसुन उंदि एल्लु गूट्टापोरों ओसि ओन्क दुनियाता अन्नि राज्येल्क, अबुना पेद्दातनाल्क बोत्तिगा हूपिच्चि,

9 “निमे नावा मुन्ने वंगिसि, नावा काल्क मोळ्कानय्ते, अवंता बोत्तिगा नीके हीतन,” इंचि इत्ता.

10 अस्के,

“ए देय्यमतुना हब्बेर होन, बारित्ते निमे नीवा पेनदुने मोळ्कना,

सिराप दानादे सेवा कियना, इल्हा दर्मसास्त्रमते रासि मंता.”*

इंचि येसु दान इत्तोर.

11 अल्हा इत्तरित्ते पेद्दा देय्यम ओन होळसि होत्ता. अस्के ह्ळ्ळट! पेनदा दूतां वासि येसुना सेवा कीतां.

येसु गालिल एरियाते सेवा कबळ सुख कीतोर

12 योहानुन जेलते वाटतूर इंचि येसुक तेळिय्ताहेंका ओर गालिल एरियाता नासरेत नाटेने होत्तोर.

13 अगटाल नासरेत नाटेने आगाकौटा कपर्नाहूम इनना सहर होंचि मनालय दल्गतोर. आ सहर गालिल सेरवु पकापीसि मना नप्तालि आनि जबलुन इनना एरियांक दल्गिसि मंता.

14 ओर अगा मत्ताहाटी यसायाह इनना पेनदा कबुरतोनतोनि पेन वेहता पोल्ले निजम आता. आ पोल्ले इल्हा मत्ता,

15 “जबलुन आनि नप्तालि एरियाता सेरवुना हरदाहेंदाल,

योर्दन बैरटा हब्बेटा बाजूंक, यहूदि आयबोरा गालिल एरियाते,

16 बोर अय्ते लोकुल्क हीकटते उदिस मत्तुरो ओर पेद्दा वेलगुन ह्ळ्तूर.

आनि बोरपोरों अय्ते हामुरता नीडा अर्सि मत्तानो,

ओर अंतोरपोरों वेल्लु अरता.”*

17 अस्केटाल येसु इल्हा वेहालय सुख कीतोर, “स्वर्ग राज्येम दग्गेक एत्ता इंचि मिमेट मनसु मार्सकुंट.”

येसु सिस्युल्कुन पेरीतोर

(मरकुस 1:16-20)

18 येसु गालिल समुद्रम ओड्डु पीसि होननेके वरोर सिमोनून ओन पत्रुगुडा इन्दुतूर आनि ओना तम्मुर अंदरियन ह्ळ्तोर. ओर जिम्मां पिथ्यानोर आताहाटी, समुद्रमते ओल्लां वाटसि जिम्मां पीसेक मत्तूर.

19 ओर्कुन ह्ळसि, “नावा पज्जो वट, नना मीकुन मनकालोर्कुन नहगा थायानोर कीतन,” इंचि येसु इत्तोर.

20 अस्के ओर, बिराना ओरा ओल्लां अग्गेन होळसि ओना पज्जो होत्तूर.

21 अगटाल इंकिचो मुन्नेळ्क होत्तारित्ते येसु इव्वुर दादाल-तम्मून इत्ते जब्दिना मर्कु याकोब आनि ओना तम्मुर योहानुन ह्ळ्तोर. ओर ओना बाबोनतोनि डॉंगपोरों ओल्लां सवरिचनेके येसु ओर्कुन केयतोर.

22 अस्के ओर, बिराना ओरा बान आनि डॉंगगतून होळसि ओना पज्जो होत्तूर.

गालिल एरियाते येसु तिरियसेक कीता कबाहक

(लुकाल 6:17-19)

23 यहूदिल्लुकुना दर्मसास्त्रम कराहना लोतागा* येसु पेनदा पोल्लें कराहतोर. स्वर्ग राज्येम बारेमते बेसता कबुर वेहचेके, लोकुल्कना अन्नि तीरुकुना रोगाल्लुकुन, कमजोरिन बेस कीसेके गालिल एरियाते पूरा तिरियतोर.

24 येसु कियना कबळ पूरा सिरिया देसेमंता तेळियसि होत्ता. दानहाटी तीरतीराता रोगाल्लुकुनोर, नोपिनोर, देय्याल्क पीतोर, कुदेल रोगमतोर आनि लकवा बिमारतोर इंसटा लोकुल्कून ओनगा तल्लु. येसु ओर अंतोर्कुन बेस कीतोर.

25 गालिल एरिया, देकापोलिस एरिया, येस्सलेम सहर, यहूदिया एरिया आनि योर्दन बैरटा हब्बेटाल वाता लोकुल्कुना मंदा येसुना पज्जो होनालय दल्गतूर.

5

1 वेल्लेटूर लोकुल्कुना मंदातून ह्ळसि येसु गूट्टापोरों होंचि उदतोर. उदतस्के सिस्युल्क इंका ओना दग्गेरा वातूर.

2 अस्के येसु ओर्क इल्हा कराहलय दल्गतोर.

पेन बोर्क आसिर्वाद हीता?

(लुकाल 6:20-26)

* 4:10 थ्यक्स्ताविक्वन 6:13

* 4:16 यसायाह 9:1-2

* 4:23 दर्मसास्त्रम कराहना लोतागा यहूदिल्लुकुन येसुनो मोळ्काना लोन.

3 “बोर अय्ते आत्माताल गरिब* मंतुर पेन ओर्के आसिर्वाद† हीता, स्वर्ग राज्येम ओरदे आंद.

4 दुक्कमते मल्लोर्कुके पेन आसिर्वाद हीता, अद ओर्क दैरनेम हीता.

5 सादा सिंपल गुनम मल्लोर्कुके पेन आसिर्वाद हीता,
अद ई बूमि ओर्के हीसीता.

6 नीतिताहाटी कर्बु दूपा इनाका कस्टम कियानोर्कुके पेन आसिर्वाद हीता,
पेन ओर्के समादानम हीता.

7 दया कियानोर्कुनपोर्री पेन दया कीता,
पेन ओर्के आसिर्वाद हीता.

8 बोर ओना मनसु पेनदापोर्री ईरंतोर, पेन ओन्के आसिर्वाद हीता,
उंद रोजु ओर पेनदुन हळंतोर.

9 पगातोर्कुन उंदि कियानोर्कुके पेन आसिर्वाद हीता,
ओर्कुने पेनदा पिलाल्क इंचि इंतुर.

10 पेनदा सत्तेमते ताकनाहाटी तकलिप, दुक्कम अर्रानोर्कुके पेन आसिर्वाद हीता,
अद स्वर्ग राज्येम ओराहाटीगे मंता.”

11 “मिमेट नावा सिस्सुल्क आताहाटी लोक्कुल मीवा अपमानम कीतुर, तिप्पल्क कीतुर, मीवा विरोदमते बच्चुंगो आबद्दम पोल्लें वेहांतुर, अस्के मीक्कुगुडा पेन आसिर्वाद हीता.

12 मीकन्ना मुन्नेटा पेनदा कबूरतोर्कुनगुडा लोक्कुल इल्हेने तकलिप कीतुर. अदुनहाटी मिमेट कुसिते मंट, आनंदमते मंट. स्वर्गमते मीक्कु पेद्दा इनाम दोर्कता.”

होव्वोर आनि वेडसि पोर्रीटाल कराहता पोल्लें
(मरकुस 9:50; लुकाल 14:34-35)

13 मिमेट दुनियातोराहाटी होव्वोरतसंतोर आदिर. ओक्कला होव्वोर, होव्वोरलेसी ससि वायाकोटे अव्ते मर्रा बल्हा होव्वोर ससि तरा परांतोम? अस्के अद बता कबळ्ळक ओज्जो. अद पलाते पोहचियना कबळ्ळके ओज्जता, लोक्कुल दान जारसेके दांतुर.

14 गूट्टापोर्री मल्ला नार दिसाकोंटा मन्नो. अल्हेने मिमेट दुनियाताहाटी वेलगु आंदिर.

15 बोरे आथिर वेडसि निरिच्चि, दान गुल्ला हिळु ईर्र. एत्तुने उंदि दीसोडिपोर्री ईर्रंतुर. अस्के अद लोतोर अंतोर्कुके वेलगु हीता.

16 अदुनहाटी मीवा पिस्वर लोक्कुलुना मुन्ने इल्हा मनना गदा मीवा वेलगुनसोंटा बेसता कबाह्कुन हळसि वैरेतोर स्वर्गमता बाबानद कदर कियानुर.

दर्मसास्त्रमता बारेमते येसुना पोल्लें

17 नना मूसाना नियमतुन, पेनदा कबूरतोर रासतदुन रद्द कियालय वातन इनकुनमट्ट. नना दान रद्द कियालय आयो गानि अव्ते नावा बारेमते रासता पोल्लेन पुरागा कियालय वातन.

18 नना मीक्कु निजम वेहचेके मंतन, बूमि मब्वु नासडेम आथानदाका दर्मसास्त्रमतद उंदि सिन्ना गीता, पोल्लेगुडा रद्द आयो.

19 मिमेट अंतोर आदेस परकारम ताकना. बोरे आथिर पेनदा सिन्ने आदेसतुनगुडा पालन कियाकोंटा, अल्हेने वैरेतोन्कगुडा वेहानव्ते, ओर स्वर्ग राज्येमते सिन्नासि मन्तोर. गानि बोर अय्ते नियम परकारम ताकतोर आनि इंकावरोक दाना परकारम ताकालय वेहांतोर ओर स्वर्ग राज्येमते बच्चोनों पेद्दा आयानुर.

20 नना मीक्कु वेहासेक मंतन केंजट. दर्मसास्त्रम कराहना गुरूक‡ आनि परिसिल्लक ईरकन्ना मिमेट एक्को नीतिमंतुल्लक आयवा स्वर्ग राज्येमते नैगा पर्रिट.

होंगुना बारेमते येसु कराहता पोल्लें

21 मिमेट बोन हळ्ळकमट, बोर अय्ते हळ्ळकतोर ओन्क कोरटताल सिक्सा आंता इंचि मीवा एनकटा पेद्दाल्कुके पेन वेहतद मिमेट केंजसि मतिर.

* 5:3 आत्माताल गरिब बोर अय्ते ओना पिस्वरेते ओन्क पेनदा अन्नसम्म वेल्लेन मंता इचि एपाट कीतोर ओर आत्माताल गरिब. † 5:3 आसिर्वाद गावाले मलद पेनदुन तल्लसुकुल्लाहेंका दोर्कुते अद पेनदा आसिर्वाद आंद, इंतुर. ‡ 5:20 दर्मसास्त्रम कराहना गुरूक दर्मसास्त्रम कराहना गुरूक अनि तीरुकुना कराहना कबळ कीतुर. 1 राजा 4:3, 2 राजा 18:18

22 गानि नना मीकु वेहंतन गदा, बोर अथे ओना दंटातोनापोर्रो होंग आंतोर ओर पेनदा कोरटता सिक्सालायक आंतोर. अल्हेने बोर अथे ओना दंटातोना अपमानन कीतोर, ओर पेद्दाल्कुना कोरटता सिक्सालायक आंतोर. बोरन्ना अरे मुर्का इनानथे ओन्क देव्याल्क मनना अग्नि गुंडमता^S सिक्सा आयार.

23 दानहाटी निमे ओक्कला पेन गद्देतगा उपारम* वाटानेके नीवा दंटातोर नीवा पोरो होंग आसि मंतोर इंचि मति वायानथे,

24 निमे आ उपारमतन अग्ने होळसिसि मुन्ने दंटातोनाग होन. दंटातोना समत कीतारित्ते वासि उपारम वाटा.

25 नीवा पगातोर नीकुन कोरटते ओयानेके, निमे बिराना हरदेन ओन दोस्ती कीम. हिलाकोटे ओर नीकुन ओसि मजिस्टरंस्क अप्पजेपुनर. मजिस्टर पोलिसुंक अप्पजेपुनर, पोलिस ओसि नीकुन जेलने वाटानुर.

26 नना नीकु निजम वेहांतन, कोल्लक-कोल्ला दोहनदाका निमे अगटाल पेयसा परिंन.

बोगमतनम बारेमते येसु कराहता पोल्लें

27 बोगमतनम[†] कियमट इंचि एनकटा वेहतद मिमेट केंजसि मंतरि.

28 गानि नना मीकु वेहसेके गदा बोरन्ना आयिर, बदाना मुरतळता हेके पापि नदरते हूळानथे ओर ओना मनसुने दानतोनि बोगमतनम कीतापे.

29 अदुनहाटी तिना कळगिंटा पापम किया वेहते, दान तेंडसि पोहतेने नीकु बेस मंता. बारिल्ले पूरा मेंदुल नरकमते होननदानकन्ना उंदि कळ् होल्ले होन्नि.

30 अल्हेने ओक्कला नीवा तिना कय नीकुन पापम किया वेहते, दान नर्किसि पोहतेने बेस मंता. बारिल्ले नीवा पूरा मेंदुल नरकमते होननदानकन्ना मेंदुलता उंदि कय होल्ले होन्नि.

31 बोरन्ना ओना मुत्तोन होळसियाना मल्ले, दानकु ओर सोडसिट्टि हीसि होळसियिथिर, इल्हा मूसाना नियमते वेहचि मंता.*

32 गानि नना मीकु वेहासेक गदा, बोरन्ना ओना मुत्तोन बोगमतनमता कारनम तप्पा वेरे कारनमते होळसियानथे ओर दानतोनि बोगमतनम किया वेहांतोर. होळसीता मुत्तोनतोनि बोरन्ना मरमिं आयानथे ओरगुडा बोगमतनम कीतोर.

ओट्टु आनि पगाता बारेमते येसु कराहता पोल्लें

33 ओक्कला निमे ओट्टु तिनानथे, दान नेमुहमा, गानि निमे तित्ता ओट्टुन पेनदाहाटी पूरा कीम इल्हा मूसाना नियमते पेद्दाल्कुंक वेहतद मिमेट केंजतिर.

34 नना मीकु वेहासेक मंतन गदा, निमे ओट्टु तिनेने तिनामा. स्वर्गम पेनदा राजगद्दे आंद, इंचि निमे दाना ओट्टु तिनामा.

35 अल्हेने बूमि, पेन काल्क ईरना जेगा आंद, अदुनहाटी बूमि तोड इंचि दानदगुडा ओट्टु तिनामा. आनि येस्सलेम सहर पेद्दा महाराजानद इत्ते पेनदाद आंद, इंचि दानदगुडा ओट्टु तिनामा.

36 नीवा तल्लातद उंदिंका केल्लुन तेल्लगा हिलाकोटे नल्लगा किया परिंन, बारिल्ले अग्नि पेनदा कय्देन मंता, इंचि तल्लतदगुडा ओट्टु तिनामा.

37 दानहाटी नीवा वळ्कुमळ हो इत्ते हो, हिलाकोटे हिल्ले इत्ते हिल्ले इंचि मन्नि. नीवा पोल्लेतुन निजम कियालय ओट्टु तिनानथे अद देय्यमताहेंदाल वाता.

बदला एतुमा

(लूकाल 6:29-30)

38 कळदुकु बदला कळ्, पल्लदुकु बदला पल्लु तेंडाना इंचि मूसाना नियमते वेहता पोल्लेतुन मिमेट केंजतिर गदा.*

39 गानि नना मीकु वेहासेके मंतन गदा, मिमेट मीवा पगातोरकुंक एदुर तिरियमट्टु. ओक्कला बोरन्ना नीकुन तिना सेंपापोर्रो तंते निमे इंकुंदि सेंपागुडा तिरहा.

40 बोरन्ना नीपोर्रो केस कीसि नीवा कोट तेंडकुननथे ओन्क नीवा अंगिगुडा हीम.

41 अल्हेने बोरन्नागिंटा नीकुन उंदि कोसेड लक्कु सामान पीसि वांतिना, इंचि बल्लिम कियानथे, निमे आ मनकनतोनि रोंडु कोसकुना लक्कु होन.

42 बोरन्ना नीकुन बतलन्ना तल्लकते अद ओन्क हीम. उद्देरा तल्लिनागानि, हिल्ले इनमा.

अंतोरपोर्रो पावरम कीम्ट!

(लूकाल 6:27-28; 6:32-36)

43 "निमे नीवा दंटातोकुंन पावरम कीम, पगातोकुंन बारे हय्यसा," इंचि इत्तद मिमेट केंजतिर.*

^S 5:22 अग्नि गुंडम बस्केळक बगाबगा पोतना पिवां तडभि, नरकम. * 5:23 उपारम गद्देपोर्रो वाटना पलारम. † 5:27 बोगमतनम मुत्तो मुय्दो मननेके, मुय्दो मुत्तो मननेके वेरे मांडसातगा, मुरतळतगा होल्ले, अद बोगमतनम आंद. * 5:31 व्यवस्ताविकनेन 24:1 * 5:38 निर्गमन 21:24

* 5:43 लैव्यवस्ता 19:18

44 गानि नना मीकु वेहानद बतल इत्ते, मीवा पगातोरुंन पावरम कीम्टु. मीकुन तकलिप कियानोराहाटी मिमेट पारतना कीम्टु. अस्के मिमेट मीवा स्वर्गमते मनना बाबाना पिलाल्क आतिर.

45 बारित्ते सेडुडोर्क, बेसतोरुं इवुकिंका पोळ्दुनाहेंदाल वेलगु औरे हीतोर. अल्हेन पापिल्कुंक नीतिमंतुलकुंक पिर्मगुडा औरे हीतोर.

46 अयना मीकुन पावरम कियानोरुंने मिमेट पावरम कीते मीकु पेनदाहेंदाल बता इनाम दोर्कता? कर वसुल कियानोरगुडाः अल्हे कीतुर.

47 निमे ओक्कला नीवा दंतातोरुंनतोन बेस मत्ते, निमे वेंरे बतल बेस कीसतिन? यहुदि आयवोरगुडा अल्हे कीतुर.

48 अदुनहाटी स्वर्गमते मंदना मीवा पेनबाबाल बल्हा पुरागा मंतोर अल्हे मिमेटगुडा मंटु.

6

दर्म कियना बारेमते येसु कराहता पोल्लें

1 उसारते मंटु! मिमेट लोकुकुंक हुप्सनाहाटी नीति कबाहक कियमट. अल्हा कीते, स्वर्गमते मनना मीवा पेनबाबानहेंदाल मीकु बतले इनाम दोर्को.

2 अदुनहेंके मिमेट बोनकन्ना दर्म कियनेके डप हाटमट. बारित्ते अल्हा डोंगि लोकुकुल मिटिगुलुकुना जेगाते,* हरकुन पीसि ओर्कुन कदर कियगोम इंचि कीतुर. नना निजम वेहंतन, बोर अय्ते अल्हा कीतुरो ओर्कु ओरा इनाम दोर्कता.

3 मिमेट बोनकन्ना दर्म कियनेके मीवा तिना कय बतल कीतनो अद रोड्डा कय्दुक बिल्कुल तेळियामन्नि.

4 अल्हा कीते मिमेट कियना दर्म बोनकु तेळियाकोटा मनता, अद बतल आंदो मीवा पेनबाबांक एर्के मता. अदुन हळसे मीकु इनाम हीतोर.

पारतनाता बारेमते येसु कराहता पोल्लें
(लुकाल 11:2-4)

5 अल्हेने बस्के अय्ते मिमेट पारतना कीतिरो, अस्के डोंगि लोकुकुनलेसी कियमट. डोंगि लोकुकुल हरकुना मूलनपोर्रो, पंचादि कियना जेगाने नितिसि पारतनां कीतुर, अल्हा कीते वेल्ले लोकुकुल ओर्कुन हळतुर इंचि ओर्कु अनपिचंता. गानि नना मीकु निजम वेहंतन, ओरा इनाम ओर्कु दोर्कता.

6 गानि मिमेट पारतना कियना वेलाक लोता लोप्पोटा अरति होंचि तलपु वाटकुंचि बोर्के दिसुवा मीवा पेनबाबांक पारतना कीम्टु. अस्के मीवा पेनबाबाल मीकु अद पारतनाता जवाब हीतोर.

7 वेंरे जातितोर† पारतना कियनेके उंदे पोल्लेतुन वेल्लेन मल्कां वळकांतुर, अल्हा कीते पेन ओरद केंजंता इंचि ओर्के अनपिचंता.

8 गानि मिमेट ओरा लेह्का आयमट. बारित्ते मीकु बतल गावालोनो अद तलकका सुन्नेन पेनदुक एरपट मनंता.

9 अदुनहाटी मिमेट पारतना कियनेके इल्हा पारतना कीम्टु:

“ए स्वर्गमते मनना मावा पेनबाबा, नीवा पोरोलतुन अंतोर कदर कियिरकांटी.

10 निमेन मापोर्रो राज्येम कीम, स्वर्गमते नीवा इच्चा बल्हा पूरा आंतानो, अल्हेन ई बूमिपोर्रोगुडा आयिकीकांटी.

11 माकु रोजता तिडि इय्यालागुडा हीम,

12 माकु विरोदमते कीता तप्पुकुन मोमोट बल्हा माप कीतोमो, निमेगुडा मोमोट कीता तप्पुकुन माप कीम.

13 †माकुन पट्टुने अरुंकोटा कापाळा, सेड्डातनमताल माकुन पिसागोट्टा. बस्केळक राजाल निमेन आदिन.

अदुनहाटी ताकत आनि महिमा बस्केळक नीवदे आंद.” आमीन! §

14 मिमेट वेंरेतोर तप्पुकुन माप कीते, स्वर्गमते मनना पेनबाबालगुडा मीकुन माप कीतोर.

15 गानि उंदि वेलाते मिमेट मनकालोरा तप्पुकु मापि कियिकोट्टे स्वर्गमते मनना मीवा पेनबाबालगुडा मीकुन मापि किय्योर.

ओक्कापोट्टुना बारेमते येसु कराहता पोल्लें

‡ 5:46 कर वसुल कियानोर कर वसुल इत्ते गरपट्टि वसुल कियमद, अद जमानाते ई गरपट्टि वसुल कियानोर इरगा बदमास मल्लुर. * 6:2 मिटिगुलुकुना जेगाते दर्मासस्त्रम कराहना लोह्कन्ने. † 6:7 वेंरे जातितोर वेंरे हरदे ताकानोर, वेंरे पेनदुक मोळकानोर. ‡ 6:13 इद वचनम कोन्नि पांडु लिपिने हिल्ले.

§ 6:13 आमीन इत्ते अल्हेन आधि, सहमत मतन. इंचि अर्तम.

16 मिमेट बस्के ओक्कापोद्दु* मन्तितो अस्के मिमेट जिच्चरा मोकोम कीसि मनमट. डोंगि लोकुल्क अल्हेन कीतुर. ओर्कु अनपिचंता गदा जिच्चरा मोकोम कीसि मत्ते लोकुल्क ओर्कुन हळसि ईर ओक्कापोद्दु मंतुर इंचि इंतुर. गानि नना मीकु निजम वेहंतन, ओर्कु ओरा इनाम दोर्कुता.

17 अदुनहाटी मिमेट बस्के अय्ते ओक्कापोद्दु मन्तितो, अस्के तल्लाक निय होकसि मोकम नोर्राट.

18 अल्हा कीते ओक्कापोद्दु मत्तद बोर्के दिसो गानि बोर्के दिसुवा मीवा पेनबाबाल मात्रम ओक्का पोद्दुन हळांतोर. अदुनहेके मीकु इनाम हीतोर.

दनमता बारेमते येसु कराहता पोल्ले

(लुकाल 12:33-34; 11:34-36; 16:13)

19 मिमेट बूमिपोर्रो दनम जमा कीते अदुन सेदेल तिचि, सिलुम पीसि नासडेम आंता आनि दोंगाल्क दोसकुंचि ओतुर. अदुनहाटी ई बूमिते दनम जमा कियमट.

20 गानि मिमेट मीवाहाटी स्वर्गमते दनम जमा कीमट, अगा अबुन सेदेल तिन्नो, सिलुम पिच्यो, दोंगाल्कगुडा दोसकुंचि ओयुर.

21 बारिल्ले मीवा दनम बगा मत्ते अग्गेन मीवा मनसु मंता.

22 मीवा कळु मेंदुलता वेडसि आंदु. अदुनहाटी मीवा कळु बेस मत्ते, मीवा मेंदुलंता वेलगु मंता.

23 मीवा कळु बेस हिलाकोटे मीवा मेंदुलंता हीकटे मंता. दानहाटी मिमेटगिटा पेनदा वेलगुन हळाकोटे मीवा पिस्वरंता हीकटे मंता.

24 अल्हेन वरोर मनकल इच्चुर मालकुल्कुनगा सेवा किया पर्रोर. अल्हा सेवा कीते ओर वरोन बेस पावरम कीतोर, इंकावरोन हयसोर. हिलाकोटे वरोना पोल्ले बेस केंजंतोर इंकावरोना पोल्ले बारे केंजोर. इंचि मिमेट पेनदुन आनि दनमतुन उंदे मल्का सेवा किया परिर.

रंदि कियमट

(लुकाल 12:22-32)

25 अदुनहाटी नना मीकु वेहनद बतल इत्ते जीवा तिडिकन्ना मुक्केम, मेंदुल कपडीकन्ना मुक्केम आंदु. इंचि पिस्सनाहाटी तिनकोम बतल, उनकोम बतल, इंका मेंदुलताहैका केर्कोम बतल इंचेके रंदि कियमट.

26 आ पिट्टेनहेके हुळट, अव वीतों आनि कोय्यो, अचोने आयका गुम्मिने जमागुडा किय्यो, अय्नागानि मीवा स्वर्गमते मनना पेनबाबाल अबुंक तिडि हीतोर. मीकु अय्ते पेनदा मुन्ने पिट्टेकन्ना बच्चोने विलवा मंता इदु मीकु एर्के मंता.

27 अय्नागानि रंदि कीसि ओना आवसुन उंदि गंटा एक्को बेरसागोटतोर मीवा नड्डुम बोरन्ना मंतोरा?

28 मरि मिमेट केरना कपडिनहाटी रंदि बारि कीतिट? केडाते पूयाना आ पूतनहेके हुळट अव बल्हा बेसंसंतंगो! अव कबळ किय्यो, कपडि इंका कुट्टों.

29 गानि नना वेहानद बतल इत्ते, सुलेमान राजाल वेल्लेन सिरमंत मंचिगुडा ओना कपडि आ पूतानाल उंदि पूतातचोगुडा सोकु मनाहिल्लें.

30 ओरे विस्वासम तक्को लोक्किटा, जाडि इय्याला मंता, नाडि तडमिते वेसि दांता. अयना पेनबाबाल अबुंक इच्चो बेसता कपडि हीतोर, अय्ते अबुंकन्ना बेसता कपडि मीकु हिच्या पर्रोरा?

31 अदुनहाटी बतल तिदकोम, बतल उंडकोम, बतल केर्कोम इंचि रंदि कीसेक मनमट.

32 विस्वासम कियवोरगुडा इव गावाले इंचि तनलाळसेक मनांतुर. गानि मीकु इव अन्नि गावाले इंचि स्वर्गमते मनना मीवा पेनबाबांक एर्के मंता.

33 अदुनहाटी मिमेट मुन्ने स्वर्ग राज्यमतुन आनि पेनदा नीतितुन प्हकट, अस्के इव अन्निगुडा मीकु दोर्कनुं.

34 बस्केळक बद्दना बद्द रंदि मंता. इंचि नाडीता रंदि इयालेन कियमट. नाडीता रंदि नाडीताहाटी होळसीमट.

7

बैरेतोरपोर्रो तप्पु दोसना बारेमते येसुना विचाराल्क

(लुकाल 6:37-38; 6:41-42)

1 मिमेट बैरेतोरपोर्रो दोसेम दोसमट, अस्के मीपोर्रोगुडा पेन दोसेम दोस्सो.

* 6:16 ओक्कापोद्दु उपासम (12 गटनदाका बतले तिना-उनाकोटा पेनदा बक्विते मनमळ.)

2 मिमेट बल्हा दोसेम दोस्सतिरो, अल्हेने मीपोरोंगुडा पेन दोसेम दोस्संता. बद कोल्लाते मिमेट हीतिरो, अदे कोल्लाते मीकु हियमळ जर्गता.

3 अरे डोंगि मनका, नीवा कळ्दे अरता सिल्कुन तेंडका, नीवा दंटातोना कळ्दे अरता बुस्सितुन निमे बारि तेंडा हळतिन?

4 नीवा कळ्देन सिल्कु अर्सि मननेके, “नीवा कळ्दे अरता बुस्सितुन तेंडाहीम इंचि नीवा दंटातोना बल्हा इना परातिन?”

5 मोदाला नीवा कळ्दा सिल्कुन तेंडा. अस्के नीवा दंटातोना कळ्दा बुस्सितुन तेंडालय नीकु बेस दिस्सार.

6 पवित्र वस्तुक नय्कुन मुन्ने वाटमट, पद्दिना मुन्ने मुच्च्याल्क पोच्चुमट. अल्हा कीते पद्दिं अबुन काल्कुने जारांतां, नय्कु बारे मीपोरों अर्सि मीकुने कस्कांतां.

मीकु गावाले मत्तद पेनदुक वेहट

(लूकाल 11:9-13)

7 पेनदुन तल्कट मीकु हिय्यार, प्हकट मीकु दोकार, तल्पुन तनट तल्पु तेंडार.

8 बारित्ते बोर अयते तल्कंतोर ओन्क हियमळ जर्गता, बोर अयते प्हकंतोर ओन्क दोर्कता, बोर अयते तल्पुन तनंतोर ओनाहाटी तल्पु तेंडमळ जर्गता.

9 मीलोप्पो बोरन्ना मनकल मंतोरा, ओना मरिं हारि तल्कते बंडा हियानोर?

10 हिलाकोटे जिम्मा तल्कते तरास हियना मनकल मंतोरा? इल्हा बोरे किय्योर.

11 अयते मिमेट सेड्दोर्क आसिगुडा मीवा पिलाल्कुंक बेसतव हियना इंचि मीकु तेळियतस्के, स्वर्गमते मनना मीवा पेनबाबाल ओन तल्कानोर्कुंक वेल्लेन बेसतव हिय्योरा?

12 अदुनहाटी लोकल्क मीवातोनि बल्हा मनना इंचि मिमेट इनकुंतिरो, अल्हेन मिमेट ओरतोनि मंट. इदे पोल्ले मूसाना नियम आनि पेनदा कबुरतोर रासतदगुडा वेहंता.

स्वर्गम आनि नरकमकु होनना हरिं

(लूकाल 13:24)

13 नासडेमताहेके होनना हरिं, तल्पु नेर्वुंक नेरवु मंता, आ हरपीसि वेल्ले मंदि दांतुर. अदुनहाटी इर्कुटोम मत्ता हरपीसि होळियट.

14 पिस्वरताहेके होनना हरिं आनि तल्पु वेल्ले इर्कुटोम मंता. आ हरिं वेल्ले तक्को मदिक दोर्कता.

डोंगि कबुरतोरा बारेमते येसु वेहता पोल्ले

(लूकाल 6:43-44; 13:25-27)

15 आबद्दम कबुरतोरागटाल उसाते मंट. ओर मिहगा सादा गोर्रतालेसीं वांतुर गानि ओरा लोप्पो तोडेल्लिता* गुनम मंता.

16 ओर कियाना कबाहकुन हळसे ओर डोंगि कबुरतोर इंचि एरपाट कीतिर. बल्हा अयते हाहकुना जपिताल अंगुर पंडि हादों, हिलाकोटे ईरामुस्टी† मराकुनाल मरका पंडि हादों,

17 अल्हेन बेसता मराकु बेसता पंडि हादंतां, कराब मराकु कराब पंडि हादंतां.

18 बेसता मराकु कराब पंडि हादों कराब मराकु बेसता पंडि हादों.

19 बव मराकु बेसता पंडि हादों असोंटव अन्नि मराकुन नर्किसि तडमिते वाटंतुर.

20 इंचि डोंगि कबुरतोर्कुन मिमेट ओर कियाना कबाहकुन हळसे एरपाट कीकिट.

21 नाकुन सामि सामि इनानोर अंतोर स्वर्ग राज्येमते होळयुर. गानि स्वर्गमते मनना नावा पेनबाबाना मनसु मत्ताप बोर अयते ताकंतुर ओर स्वर्ग राज्येमते होळियंतुर.

22 नना न्यायम कियाना आकिर रोजुने वेल्लेटुर नहगा वासि, सामि मोमोट नीवा पोरोलते बविस्यवानि‡ कीतोम, नीवा पोरोलते देय्याल्क-बूताल्कुन पेचाहतोम, नीवा पोरोलते बच्चुंगो अद्बूतामाता कबाहक कीतोम, इंचेके इनानुर.

23 अस्के ओर्कुंन, ए सेड्दा कबाहक कियानोरिटा! नना मीकुन एरपाट किय्योन. मिमेट इगोटाल पेय्शि होंट इंचि इंतन.

तेल्चि मत्तोर आनि तेल्चि हिल्वा मनकल

(लूकाल 6:47-49)

24 अदुनहाटी नावा पोल्ले केंजसि दाना परकारम ताकाना हरेक मनकल, बंडा पुनादिपोरों लोन दोहकुता तेल्चिता मनकनलेसीं मंतोर.

* 7:15 तोडेल्लि उंदि केडा जिवासि पोरोल. † 7:16 ईरामुस्टी इद उंदि सेदु (कयमूल) पंडिना मरा आंद. ‡ दीना कायां सेदु (कयमूल, ओगंगर) मंतां.

‡ 7:22 बविस्यवानि मुन्ने जरानदुन वेहामळ इत्ते बविस्यवानि हळमळ.

25 पिर्न वाता, कम्मुड वाता, वळि-दुमारम वासि लोतुक दळिगना गानि अद कूला हिल्ले. बारित्ते अद लोता पुनादि बंडातोनि दोहाचि मंता.

26 गानि नावा पोर्ल्लें केंजसि, दाना परकारम ताकवा हरेक मनकल, उस्केते लोन दोहकृता तेल्चि हिल्वासंटोर आंदुर.

27 पिर्न वाता, कम्मुड वाता वळि-दुमारम वासि लोतुक दळगता अस्के अद लोन पूरा कूल्सि पाड आता, इंचि येसु इत्तोर.

28 येसु पेनदा पोर्ल्लें कराहमळ महातस्के ओना कराहमळतुन केंजसि लोकूल्क वेल्ले इचंत्रम आतुर.

29 बारित्ते येसु ओर्कु ओरा दर्मसास्त्रम कराहना गुल्कुनलेसी आयो गानि अदिकारम मत्ताप कराहतोर.

8

येसु वरोन बिमार मनकन बेस कीतोर

(मरकुस 1:40-45; लुकाल 5:12-16)

1 येसु गुट्टा पोर्रोटाल हिळु रेयतस्के वेल्लेन लोकूल्क ओना पज्जो-पज्जो वासेक मत्तुर.

2 हळ्हाट! अस्के वरोर कुस्टोरोगम* आता मनकल येसुनगा वासि ओना काल्कुनपोर्रो अर्सि, “सामि, निमे इन्कुल्ले नाकुन बेस क्रिया परातिन,” इंचि इत्तोर.

3 अस्के येसु कय मुन्नेळ्ळ कूसि ओन इट्टिस इल्हा इत्तोर, “निमे बेस आयगोम इंचि नावा मनसु मंता, बेस आम” इंचि इत्ता इन्मळे आ कुस्टोरोगम आसि मत्ता मनकल बेस आतोर.

4 पजा, “इगे जर्गंतद बोर्के वेहमा. गानि निमे होंचि मीवा पेर्माक† हुप्सा. कुस्टोरोगमताल निमे बेस आता गवाइ इंचि मूसाल वेहता मोक्कु हीम. अदुन हळसि निमे बेस आतिन इंचि लोकूल्क एरपाट आंता,” इंचि येसु ओन इत्तोर.

दरोगाना गट्टि विस्वासम

(लुकाल 7:1-10)

5 येसु कपर्नाहम सहर होतस्के ओनगा वरोर दरोगल‡ वासि,

6 “सामि, नावा जीतागाड लकवा बिमारते इरगा तकलिपने लोन मंतोर,” इंचि सहायमहाटी विनंति कीतोर.

7 अस्के, “नना वासि ओन बेस कीतन,” इंचि येसु दरोगन इत्तोर.

8-9 गानि आ दरोगल, “सामि, निमे नावा लोन वायानचचो पेदुदातनम नहगा हिल्ले. ननागुडा वरोर अदिकारिना कयदा हिळु कबळ कीतन; नावा कयदा हिळुगुडा सिपाइल्क मंतुर. नना अक्टेटाल वरोन ‘होन’ इत्ते ओर दांतोर, इंकावरोन ‘वा’ इत्ते ओर वांतोर. अचोने आय्का नावा दासुन, ‘इद कीम’ इत्ते ओर कीतोर. अदुनहाटी निमे सिराप उंदि पोल्ले इन, नावा जीतागाड बेस आंतोर.” इंचि येसुन इत्तोर.

10 इद केंजसि येसुंक वेल्ले इचंत्रम आता. अस्के ओना पज्जो ताकसेक मत्तोर्कुन इल्हा इत्तोर, “नना मीकु निजम वेहांतन, इस्त्राएल लोकूल्कुन लोप्पोगुडा इचंचोन विस्वासम मत्ता मनकल नाकु बग्गेन दोर्का हिल्लोर.

11 इंका नना मीकु वेहंतन गदा, वेल्लेटर लोकूल्क पोळ्द पेय्सनाहेंदाल, पोळ्द अरंनहेंदाल वासि, अब्राहाम, इसाक, याकोब§ इरंतोनि स्वर्ग राज्येमते उदुदानुर.

12 गानि बोर अय्ते, ‘मोमोट पेनदा संतानम आंदुम’ इनकुंतुरो, ओर्कुन मात्रम पेन पलाते हीकटते वाटसीता. अगा सिराप अळमळ, पल्कु कोर्कमळे मंता,” इंचि वेहतोर.

13 पजा येसु आ दरोगन, “निमे होन, नीवा विस्वासम बल्हा मंतनो अल्हेन नीकु जर्गता” इंचि इत्ता इनमडे ओना जीतागाड बेस आतोर.

येसु वेल्लेन मंदितुन बेस कीतोर

(मरकुस 1:29-34; लुकाल 4:38-41)

14 पजा येसु पन्नूना लोन वातस्के ओना पोरड एळकि वासि मीडिसि मत्तद हळ्त्तोर.

15 येसु दाना कयदुन इत्ता इट्टुडे एळकि रेयता. अस्के अद तेदसि येसुना सेवा क्रियालय दळगता.

16 पजा पोळ्द होंचि लोकूल्क देय्याल्क पीतोर्कुन वेल्लेन मंदितुन येसुनगा पीसि वातस्के ओर उंदि पोल्लेते देय्याल्कुन गेदमिसि, बिमार मत्ता अंतोर्कुन बेस कीतोर.

17 अद अल्हा बारि जर्गता इत्ते एनकटा बस्केनो यसायाह इन्ना पेनदा कब्रतोर वेहता पोल्ले पुरागा आयना इंचि जर्गता. यसायाल इल्हा वेहचि मत्तोर:

* 8:2 कुस्टोरोगम इद रोगम आतोर कय्क-काल्कुन वेलाक मोंडि-मोंडि आंता, इदुन मोंडि रोगम इंका इतुर. † 8:4 पेर्माक इर पेन आनि लोकूल्कुन नड्डुम मंचि कबळ क्रियाना मनकल आनि लोकूल्कुनहेंदाल पेनदुक मोक्कु इंका हीतोर. ‡ 8:5 दरोगल 100 मंदि सिपाइल्कुनपोर्रो वरोर अदिकारि मनांतोर ओन दरोगल इंतुर. § 8:11 अब्राहाम, इसाक, याकोब इ इस्त्राएल लोकूल्कुना पेदुदाल्क आंदुर.

“ओर मना रोगाल्कून तेंडसि पोहतोर मना बादन एतकुत्तोर.”*^१

येसुना सिस्स्युड आयना विचारम
(लकाल 9:57-60)

18 येसु ओना सुट्टु वेल्लेन मंदि मत्तद ह्ळसि ओना सिस्स्युल्कून मिमेट समुद्रमता हब्बेटा बाजूंक हॉट, इंचि आदेस हीतोर.
19 पजा वरोर दर्मसास्त्रम कराहना गुरु ओनगा वासि, “गुरु, निमे बगा दांतिनो अगा नना नीवा पज्जो वांतन.” इंचि इत्तोर.
20 अस्के येसु ओन इल्हा इत्तोर, “नक्काक बारे मनालय सौरिं मंतां, पिट्टेक मनालय गूडां मंतां, गानि मनकना रूपमते पुटतोन नाकु मात्रम तल्ला इर्रिलयगुडा जेगा हिल्ले.”

21 अस्के येसुना पज्जो वातोरव्हेटाल वरोर, “सामि, नाकुन मोदाला होनाहीम, नावा बाबाल हातास्के ओन गति कीसि वांतन.” इंचि येसुन इत्तोर.

22 गानि, “हिल्ले, निमे इंदकेन नावा पज्जो वा. बोर अये हाताप मंतुरो, ओरे ओरा हातोर गति किथ्यिर,”* इंचि येसु ओन इत्तोर.

येसु दुमारमतुन आपंतोर

(मरकुस 4:35-41; लकाल 8:22-25)

23 पजा येसु डोंगाते एककुतंका ओना सिस्स्युल्क इंका ओना पज्जेन एककुतुर.
24 अस्के समुद्रमते उंदि पेद्रुदा दुमारम वाता. आ दुमारम इचचो पेद्रुदेद मत्ता गदा, एता तळाने डोंगा मुळगालय दल्लगता. गानि येसु मात्रम आ डोंगाते मीडसि मतोर.

25 अस्के सिस्स्युल्क ओनगा होंचि ओन निद्रताल तेहाचि, “सामि, माकुन कापाळा, मनम नासडेम आसि होंचंतोम,” इंचि इत्तुर.

26 अस्के, “अरे विस्वासम तक्को लोकुरिटा, बारि वेरियंतिर?” इंचि येसु ओर्कुन इत्तोर. पजा तेदसि आ वळि-दुमारमतुन आनि समुद्रमतुन गदरिचतोर अयेत अव सांत आतां.

27 अद ह्ळसि सिस्स्युल्कुक पेद्रुदा इचंत्रम आता. अस्के ओर, “अरे ईर बसोंटा मनकल रो, वळि, समुद्रमगुडा ईना पोल्ले केंजंता!” इंचि इत्तुर.

येसु इव्वुर मनकालोर्कुन पीता देय्याल्कून गेदमंतोर

(मरकुस 5:1-20; लकाल 8:26-39)

28 पजा ओर समुद्रमता हब्बेटा बाजूंक मनना गदरेकरकुना एरियक एत्तुर. अस्के इव्वुर देय्याल्क पीता मनकालोर तापळन बोळ्ळाताहेंदाल* येसुनगा वातुर. ओर इरगा वेरियनाल मत्तुर इंचि ओर मत्ता हरदाहेके बोर ताकाकोंदुर.

29 ह्ळ्ळाट! ओर इव्वुर येसुनगा वासि, “पेनदा मर्रिना, मातोनि नीकु बता कबळ? इत्ता वेलाकन्ना मुन्नेन निमे माकु सिक्सा हियालय वातिना?” इंचि मोत्कुत्तुर.

30 ओर नित्तिसि मत्तगटाल इचचोन लक्कु पदिदना मंदा मेय्सेके मत्ता.

31 अस्के, “ओक्कला निमे माकुन इराव्हेटाल तेंडानयेत माकुन आ पदिदना मंदाते होनाहीम,” इंचि आ देय्याल्क येसुन विनंति कीतां.

32 अयेत ओर आ देय्याल्कून, “हॉट” इंचि इत्तोर, इत्तस्के आ देय्याल्क ओराव्हेटाल पेय्सि पदिदना मंदाते होलां. ह्ळ्ळाट! पजा आ पदिदना मंदा समुद्रम ओड्डुन पोरोटाल हिळतुक वितसि एते मुळ्ळिसि हासोत्तां.

33 अस्के आ पदिदं मेहानोर नाटे वित्सि होंचि अगा जर्गतद आनि आ देय्याल्क पीतोरद बतल आता अनि वेहतुर.

34 ह्ळ्ळाट! अस्के पूरा नाटेना लोकुकल येसुंक कलियालय वातुर. वासि ओर बस्के अयेत येसुन ह्ळ्ळतुरो अस्के, “मावा एरियाताल पेय्सि होन,” इंचि ओन विनंति कीतुर. बारित्ते पदिदं हाताहेंका अद नाटेनोरद वेल्लेन नुकसान आता.

9

वरोर कय्क-काल्क वायवा मनकन येसु बेस कीतोर

(मरकुस 2:1-12; लकाल 5:17-26)

1 येसु डोंगाते उदिस सेरवु दाटसि ओना सहर मल्सि वातोर.

2 ह्ळ्ळा! अस्के इचचुर लोकुकल वरोर लकवा बिमारतोन कट्टलते वाटसि येसुनगा तत्तुर. ओरा विस्वासमतुन ह्ळसि येसु लकवा बिमारतोन, “कोको, दैरनेम इर्रा. नीवा पापालक मापि आतां,” इंचि इत्तोर.

* 8:17 यसायाह 53:4 * 8:22 बोर अयेत हाताप मंतुरो, ओरे ओरा हातोर गति किथ्यिर इद पोल्ले विस्वासम कियवोकं संबंदित्तद आंद. येसुन विस्वासम कीतोर हासि मर्रा जीवते तेदत्त इंचि अर्तम. † 8:28 तापळन बोळ्ळा गदरेकर देसेमतोर हातोर्कुन सौरिं ईश्टुर.

3 अस्के ह्ळा, “ई मनकल पेनदा अपमानम कीसंतोर.” इंचि अगा मत्ता दर्मसास्त्रम कराहना गुस्लक ओर-ओरे गुसगुसा इनालाय दल्युतुर.

4 ओरा विचारालक एएपात कीसि येसु ओर्कुन इल्हा इतोर, “मी मनसुने मिमेट कराब विचारालक बारि कीतिर?

5 बद अलकगा मंता? बिमारतोन, ‘नीवा पापालक मापि आतां इंचि इनमळा, हिलाकॉटे तेदिस ताका इनमळा?’

6 गानि मनकना रूपमते पुटतोन नाकु बूमिपोर्रोटा पापालकुन माप कियना अदिकारम मंता इंचि मिमेट एएपात कियमळ गावाले,” इंचि इतोर. आ लकवा बिमारतोनगुडा “तेदसि कटुल पीसि लोन होन,” इंचि वेहतोर.

7 ओर तेदसि लोन होतोर.

8 अगा मत्ता लोकुकुक अद ह्ळसि वेरियसि इंचंन्रम आता. “इंचोर पेदूदा अदिकारम पेन मनकालोर्कुंक हीता,” इंचि आ पेनदा स्तुति कीतुर.

येसु मत्तयाल इनना मनकन केयंतोर

(मरकुस 2:13-17; लकाल 5:27-32)

9 आयंका येसु अगाटाल होननेके मत्तयाल इनना वरोर मनकल कर वसुल कियना नाकातागा उद्दिदसि मत्तद ह्ळतोर. ओन नावा पज्जो वा! इंचि इतस्के ओर तेदसि ओना पज्जो होतोर.

10 पजा येसु मत्तयाना लोन गाटो तिचेके मननेके वेल्लेटुर कर वसुल कियानोर आनि पापि लोकुकुक वासि येसु आनि ओना सिस्युलकुनतौनि गाटो तिनालाय उदतुर.

11 अदुन ह्ळसि, “मी गुरु कर वसुल कियानोरतौनि आनि पापि लोकुकुकनतौनि गाटो बारि तितोर?” इंचि परिसिल्लक ओना सिस्युलकुन पूसकीतुर.

12-13 अस्के येसु अद केंजसि ओर्कुन इल्हा इतोर, “बिमार हिल्लोर्कुंक डाक्टरना अब्सरम मननो गानि बिमार मत्तोर्कुंक डाक्टरना अब्सरम मंता. अदुनहाटी, मिमेट हॉट, हॉचि ‘नना कोरानद दया आंद, मोक्कु आयो,’ इंचि दर्मसास्त्रमते रासि मनना पोल्लेता अर्तमतुन तेळियागोटकुंट. बारित्ते नना नीतिमंतुल्लुकुन केयालय आयो गानि पापि लोकुकुकुन केयालय वातन,” इंचि इतोर.

ओक्कापोदुदुना बारेमते येसु कराहता पोल्लें

(मरकुस 2:18-22; लकाल 5:33-39)

14 आयंका बापतिस्मा हियना योहानुना सिस्युलक येसुनगा वासि, “गुरु, परिसिल्लक आनि मोमोट ऊके ओक्कापोदुदु मनंतोम गानि नीवा सिस्युलक बस्केने ओक्कापोदुदु मन्नु. अल्हा बारि?” इंचि पूसकीतुर.

15 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतौनि मननेके, ओर्कुं दुक्कम आयाना अब्सरम मंनता? मन्नो. गानि मरमिन पेडल ओरागाटाल लक्कु आयाना रोजकु वायनुं, अस्के ओर ओक्कापोदुदु मनानुर.”

16 पजा येसु ओर्कुं रोंडु सिन्ना वेसुडिं वेहतोर. “बोरे आयिर, पडना कपिड हर्तें दानकु पूना कपिडता गंडा अंटा वाट्सि कुट्टोर. अन्हा कुट्टानयते अंटा वाटता कपिड गंडा पडना कपिडतुन इकिचो हरहंता.

17 अल्हेने पूना अंगुर पानकमतुन पडना तोलपुकाति बोरे दोस्सुर. ओक्कला दोस्सानयते आ तोलपुकां पय्सि पानकम पोंगिस दांता आनि तोलपुकांगुडा नासडेम आंता. इंचि पूना अंगुर पानकम पूना तोलपुकातिन दोसंतुर. अस्के रोंडुगुडा बेस मंनतां.” इंचि वेहतोर.

यायिर इनानोना मिय्यड आनि कपिड होनना मुरतळ

(मरकुस 5:21-43; लकाल 8:40-56)

18 इव पोल्लें येसु ओरतौनि वळकसेके मननेकेन, दर्मसास्त्रम कराहना लोता वरोर अदिकारि अगा वासि, “नावा मिय्यड इंदकेने हाता गुरु, गानि निमे वासि दानपोर्रो कय इरते, दान्क मर्रा जीवा अरंता,” इंचि येसुना कालकुनपोर्रो अर्सि विनति कीतोर.

19 अस्के येसु तेदसि, ओना सिस्युलकुनतौनि आ अदिकारिन पज्जो होतोर.

20-21 होननेके पनैड वर्सानाल उंदेतीर कपिड आयना मुरतळ कलियता. कलियसि, “नना सिराप येसुना कपिडतुन इट्टिनगानि बेस आंतन,” इंचि दाना मनसुने इनकुत्ता. आनि पज्जोटाल वासि ओना कपिडता अंचुन इट्टा.

22 इट्टारित्ते येसु पज्जो मल्लिसि ह्ळसि, “दैरनेम इर्रा पेगिटुना, नीवा विस्वासमे नीकुन बेस कीता,” इंचि इतोर. अस्केने अद बेस आता.

23 पजा ओर दर्मसास्त्रम कराहना लोता अदिकारिना लोन होतस्के, हामुरता डोलकु-बाजें, लोकुकुक जमा आसि अळानद, मोलुकुनानद ह्ळतोर.

24 अस्के येसु ओर्कुन “पलाते हॉट पेगिड हाया हिल्ले, अद अयते मीडसि मंता.” इंचि इतोर. अस्के लोकुकुक येसुन कव्त्तुर.

25 अगा मल्ला लोकुकुलक पलाते पेयसतारित्ते, येसु पेगिड मल्ला अरति होळियसि दाना कयदुन पीतोर अस्के अद तेदसि उदुदुता.

26 अद पोल्ले पूरा एरिया अंता तेळियसि होल्ता.

येसु इव्वुर गुड्डिकुन आनि वरोन मूकन बेस कीतोर

27 येसु अगटाल पेय्सि होननेके, इव्वुर गुड्डोर्क ओना पज्जो-पज्जो होंचि, “ए दाविद राजाना वंसमतोना! निमे मापोरों दया कीम.” इंचि वरगेयतुर.

28 येसु लोता लोप्पो होळियतस्के ओर गुड्डिर ओनगा वातुर. अस्के येसु ओर्कुन, “नना बेस कीतन इंचि मीकु विस्वासम मंताना?” इत्तस्के, “हो सामि,” इंचि ओर इत्तुर.

29 “अल्हा अय्ते मीवा विस्वासम मल्लापे आयि,” इंचि येसु ओरा कळ्ळुकुन इतोर.

30 अस्केन ओरा कळ्ळुकु दिसालय दलगांतां. पजा येसु ओर्कु, “इद पोल्ले बोर्के तेळियामान्नि.” इंचि गट्टिगा हुकुम हीतोर.

31 गानि ओर अगटाल होंचि, ओना बारेमते पूरा एरिया अंता तेळियागोटतुर.

32 ओर इव्वुर अगटाल पेय्सि होननेके, लोकुकुलक वरोर देय्यम पीता मूकन येसुनगा तत्तुर.

33 येसु देय्यमतुन पेचहतोर, अस्के मुन्ने वळकुवा मूकल वळकालय दलगतोर. इदुन हळसि अंतोर लोकुकुलक इचंन्रमते, “इझ्राएल देसेमते इल्हा आतद बस्केने हळ्हा हिल्लोम,” इंचि इत्तुर.

34 गानि परिसिल्क, “ईर अय्ते देय्याल्लुकुना मुक्यना बलमते देय्याल्लक तेंडांतोर,” इंचि इत्तुर.

केदनायवा लोकुकुलकन हळसि येसुंक पापम अनपिस्ता

35 पजा येसु अगाटा दर्मसास्त्रम कराहना लोतागा पेनदा पोल्ले कराहतोर. स्वर्ग राज्येम बारेमते बेसता कबुर वेहचेके, लोकुकुलकना अन्नि तीरकुना रोगाल्लुकुन, कमजोरिन बेस कीसेके अन्नि सहरकुने, नाहकुने तिरियतोर.

36 तिरियनेके येसुन नदर लोकुकुलकनपोरों होत्ता. कोहानोर हिल्ला गोरें बल्हा तकाचि, सिल्लर-सिल्लर आसि मनांतगो अल्हा आ लोकुकुलक आसि मत्तुर, इंचि ओर्कुन हळसि येसुंक दया वाता.

37 अस्के ओर ओना सिस्सुल्लुकुन “पंटा वेल्लेने पंडुता, गानि बूतिनोर तक्को मंतुर.

38 अदुनहाटी पंटाता मालकुंक बूतिनोर्कुन पंटा कोय्यालय लोहा इंचि विनंति कीम्, ” इंचि वेहतोर.

10

येसु ओना सिस्सुल्लुकुन बेसता कबुर वेहालय लोहंतोर

(मरकुस 3:13-19; लूकाल 6:12-16)

1 येसु ओना पन्नेंड सिस्सुल्लुकुन दगोरा केय्सि, ओर्कु देय्याल्लक गेदमना अदिकारम हीतोर. अचोने आयका अन्नि तीरकुना रोगाल्लक, बादन बेस कियना अदिकारमगुडा हीतोर.

2 आ पन्नेंडु मंदि प्रेरितुल्लुकुना पोरोली इल्हा मंतां: मोदाला सिमोन (ओन पत्रुगुडा इत्तुर), ओना तम्मुर अंदरियल, जब्दिना इव्वुर मर्क याकोब, योहान,

3 पिल्लि, बरतलमय, तोमल, कर वसुल कियना मत्तयाल, अल्पिना मारि याकोब, तद्दि,

4 सिमोन कनानि, इस्कारियोत यहदल (ईर येसुन पीसि हीतोर).

5 ई पन्नेंड मंदि सिस्सुल्लुकुंक येसु इसौटा हुकुम हीसि लोहचीतोर: यहुदि आयवोरा नड्डुम होनमत, सामरिया लोकुकुलकना बद्दे नाटेने होळियमत.

6 दानकु बद्दुलु इझ्राएलता तप्पोत्ता आ गोरिनेहेके होंट.

7 मिमेट होनानेके, “स्वर्ग राज्येम दगोर्क एल्ता,” इंचि वेहासेक होंट.

8 रोगाल्लुकुन बेस कीम्, हातोर्कुंक जीवा अरहट, कुस्टरोगम आतोर्कुन बेस कीम्, देय्याल्लुकुन गेदमिसिम्. मीकु ई हक्कु पुक्कटते दोर्कुता इंचि मिमेट इंका इसौटा सेवा पुक्कटते कीम्.

9 होननेके मी नडिक बंगारम, एंडि, रागिता कोलतां इरमत.

10 जोरा ओयमत, एक्कोतव अंगि, हेरपुह्क ओयमत. दुड्डुगुडा ओयमत. बारित्ते कबळ कियनोंक ओना बूति ओन्क दोर्कमळ गावाले.

11 मिमेट मोदाला बद्द नाटे, बद्द सहरते अय्ते दांतिटो, अद्द नाटे वरोर बेसता मनकना बारेमते जाडा कीम्. मिमेट अगटाल पेय्सि होननाल ओना लोने मंडु.

12 मिमेट लोते होळियनेके, “साति मन्निकांटी,” इंचि होळियत.

13 ओक्कला आ लोन बेसतद आते मिमेट हीता सांति अगा मंता. गानि ओक्कला आ लोन बेसतद आयाकोंटे मिमेट हीता आ सांति मिहागेन वापस वांता.

14 बोर अय्ते मीकून लोपो वाया हिग्युरो मी पोल्ले केंजुरो अस्के ओना लोतालो मरि नाटेनालो पेयसनेके मिमेट मी कादा दुब्बा अगोन दुल्पिसि* पेयसत. ✨

15 नना मीकु निजम वेहासेक गदा, पेन न्यायम कियना रोजुने सदोम आनि गमोरा† सहरकुना परिस्तिती आ नाहकुंकन्ना बचचोरो बेस मंता. ✨

वायना कस्टालकुना बारेमते येसु वेहांतोर
(मरकुस 13:9-13; लूकाल 21:12-17)

16 हुळाट, तोडेल्लिन लोपो गॉरेन लोहताप नना मीकून लोहचंतन, इंचि मिमेट तरासुनलेसी जेगर्ता आनि पावरेम पिट्टेनलेसी इमानदार मंत.

17 मनकालोर मीकून पंचादितोरा कय्दे अप्पजेपनूर आनि दर्मसास्त्रम कराहना लोहकुने ओसि मीकून पोट्टे देब्बांगुडा तना परांतुर. इंचि मिमेट मनकालोरगटालगुडा जेगर्ता मंत.

18 नाहका मीकून ओर राज्यपाल आनि राजालोरा मुन्ने ओयानुर अस्के ओरा मुन्ने, विस्वासम कियवोरा मुन्ने नावा बारेमते मिमेट गवाइदार्क आकित.

19-20 वळकानोर मिमेट आयो मीलोपो मनना पेनबाबाना आत्मा आंद. अदुनहाटी मीकून बस्के अय्ते ओरा कय्दे अप्पजेपंतुरो अस्के अगा बतल वळकना, बतल वळकानायो इंचि रंदि कियमट. वेलापॉरेन मिमेट बतल वळकुगोमो अद मीकु पेन वेहंता.

21 कासा दादल-तम्मुहक पागां आसि हव्कालय अप्पजेपनूर. पिलाल्क ओरा तल्लुर-बाबॉक अड्डम तिरियसि ओर्कुन हव्का वेहांतुर.

22 नावा पोरोलताहका अंतोर लोकल्क मीकून हय्सुर. गानि बोर अय्ते आकिरदाका ओर्सकुंचेके ओण्के पीसि मनंतुर, ओर्के मुक्ति दोर्कता.

23 मीकून उंदि नाटे तकलिप हियानय्ते मिमेट इंकुंदि नाटे पोय्सि होंट. नना निजम वेहासेक मंतन, इस्राएलता अन्नि नाहकुने तिरियसि पेनदा बेसता कखुर वेहामळ मारवा मुन्नेने मनकना रूपमते पुटतोन नना वांतन.

पेनदुक वेरियट, लोकल्कुक आयो!
(लूकाल 12:2-7)

24 गुस्कुन्ना सिस्सुड पेदुदोड आयोर, अल्हेने मालकुंकन्ना जीतागाड पेदुदोड आयोर.

25 सिराप सिस्सुड गुस्नलेसी, जीतागाड मालकुनालेसी आयगोम अचोने सालु. ओक्कला लोता मालकुन नाकुने बेलजेबुल‡ इनानय्ते, लोते मनना मीवद अंतोरद बद गति आयार!

26 गानि ओर्कु मिमेट वेरियमट. मुच्चिसि मत्तव अन्नि पोल्ले बय्यर आंता, तेळियाकोंटा मत्तव अन्नि वस्तुक पलातुक वांता.

27 नना मीकु हीकटते वेहतवुन, मिमेट वेलगुने होंचि वेहत. नना मी केव्कुने वेहतवुन मिमेट येनागरांपोर्रो एक्किसि वेहत.

28 बोर अय्ते मीवा मैदुलतुन हव्का परांतुर गानि मी आत्मातुन हव्का पसर ओर्क मिमेट वेरियमट. गानि बोर अय्ते मैदुलतुन आनि आत्मातुन नरकमते वाट्टिस नासडेम किया परांतोर ओन्के वेरियट.

29 रोंडु कोळ्का पिट्टे रोंडु कोलांकु अम्मुड दांतां गदा! अय्नागानि पेनबाबाना इच्चा हिल्वा अबुनाल उंदिगुडा बूमिपोर्रो अर्रो.

30 मीवा तल्लाता उंदि-उंदि केल्लु लेक्किस मंता.

31 अदुनहाटी वेरियमट! पेनदा मुन्ने मिमेट वेल्लेन कोळ्का पिट्टेकन्ना बचचोरो विल्वा मत्तोर आदिर.

32 बोर अय्ते लोकल्कुना मुन्ने नाकुन एरपाट कीतन इंचि ओक्कुंतोरो, ओन ननागुडा स्वर्गमते मनना पेनबाबाना मुन्ने नावा सिस्सुड इंचि ओक्कुंतन.

33 गानि बोर अय्ते लोकल्कुना मुन्ने नाकुन एरपाट किय्योन इंतोरो, ननागुडा ओन नावा स्वर्गमते मनना पेनबाबाना मुन्ने एरपाट किय्योन इंतन.

येसु बारिक वातोर, अद वेहांतोर
(लूकाल 12:51-53; 14:26-27)

* 10:14 कादा दुब्बा अगोन दुल्पिसि संबंदम नेमाहमळ, पेन मीकून लक्कु कीता. ✨ 10:14 मरकुस 6:11; लूकाल 9:5 † 10:15 सदोम आनि गमोरा वेल्लेन वसां मुन्ने पेन इं सहरकुन नासडेम कीता. बारित्ते आ सहरकु वेल्लेन पापमते निडिस मत्ता. ✨ 10:15 उत्पत्ति 19:24-28 ‡ 10:25 बेलजेबुल इद अन्नि देय्याल्कुंकन्ना पेदुदा देय्यम पोरोल आंद. इद देय्याल्कुना मुक्कल आंद.

34-35 नना इद बूमिपोर्रो सांति हियालय वातन इंचि इनकुनमट. मरिनद बाबोनतोनि अर्राकौटा, मिय्याटद तल्लुनतोनि अर्राकौटा आनि कोळियाटद पोरळतोनि अर्राकौटा कियालय नना वातन. इंचि नना सांति हियालय आयो गानि ओकुंन वेरे-वेरे कियालय वातन.

36 मनकना पगातोर ओना लोतोरके आयानुर.

37 बोर अय्ते तल्लुर-बाबोन पोरो नाकन्ना एक्को पावरम कीतोर, ओर नावा सिस्सुड आयनलायक हिल्लोर. बोर अय्ते मियाहक-मर्कुन पोरो नाकन्ना एक्को पावरम कीतोर, ओरगुडा नावा सिस्सुड आयनलायक हिल्लोर.

38 बोर अय्ते ओना सतता क्रूस पीसि^S नावा पज्जो वायोन इंतोर, ओरगुडा नावा सिस्सुड आयनलायक हिल्लोर.

39 बोर अय्ते ओना जीवातुन पिसागोटालय हळांतोर, ओर ओना जीवातुन पोगोटकुंतोर. बोर ओना जीवातुन नावाहाटी पोगोटंतोर, ओन्क जीवा दोर्कता.

बोनकु इनाम दोर्कता?

(मरकुस 9:41)

40 बोर अय्ते मीकुन दग्गेरा कीतोर, ओर नाकुन दग्गेरा कीतापे. बोर अय्ते नाकुन दग्गेरा कीतोर, ओर नाकुन लोहता पेनदुनगुडा दग्गेरा कीतापे.

41 बोर अय्ते पेनदा कबुरतोन, कबुरतोर इंचि ओपुंकुंतोर ओन्क पेनदा कबुरतोंकु दोर्कना इनाम दोर्कता. नीतिमंतुन नीतिमंतुड इंचि बोर ओपुंकुंतोर ओन्क नीतिमंतुक दोर्कना इनाम दोर्कता.

42 ओक्कला बोरन्ना, ई सीदा-सादा सिस्सुल्कुना लोप्पोटाल वरोंकु, नावा सिस्सुड इंचि गिलासमेड सल्लाटेर उनालय हियानय्ते, नना मीक निजम वेहांतन, ओन्क तप्पाकौटा इनाम दोर्कता.

11

येसु आनि बापतिस्मा हियना योहान

1 येसु ओना पननेडु सिस्सुल्कुंक आदेस हीतारित्ते, अगटाल पेय्सि गालिल एरियाता नाहकुने प्रचार कियालय आनि पेनदा पोल्ले कराहलय होतोर.

2-3 बापतिस्मा हियना योहान जेलने मल्लस्के किरिस्तुना कबाहकुना बारेमते केंजतोर. अस्के ओर ओना सिस्सुल्कुंक इल्हा पूसकियालय येसुनहेके लोहतोर. “बोर अय्ते पिसागोटनोर वायानद मल्ला ओन निमेन ना? हिलाकौटे मोमोट इकावरोना एदुर हळमळा?”

4 येसु ओकुं इल्हा जवाब हीतोर. “बतल अय्ते मिमेट केंजसतिरो, हळसतिरो अवुन योहानुनगा होंचि वेहट.

5 गुड्डोर्क हळसंतुर, कुंटोर्क ताकसंतुर, कुस्टरोगम आतोर बेस आसंतुर, सेव्टोर्क केंजसंतुर, हातोर्कुंक जीवां अरसतां आनि गारिबोर्कुंक बारे बेसता कबुर एवसता.

6 बोर अय्ते नावा बारेमते अन्समन्स किय्योर, ओन्के आसिर्वाद दोर्कता,” इंचि इतोर.

7 योहानुना सिस्सुल्क अगटाल पेय्सि होल्लस्के, योहानुना बारेमते येसु लोक्कुंक इल्हा वेहालय दलगतोर, “मिमेट बख्लि जेगाते बतल हळालय होत्तिर? वळिक ऊंगना जाडितुना?

8 मिमेट बतल हळालय होंचि मत्तिर? मेल्लता कपडिं केर्ता मनकन हळालय होत्तिर? मेल्लता कपडिं केर्तानोर राजवाडाने मनांतुर.

9 अय्ते मरि मिमेट बतल हळालय होत्तिर? पेनदा कबुरतोन हळालय होत्तिर? हो. नना मीकु वेहासेक मंतन, मिमेट बोन अय्ते हळतिर ओर पेनदा कबुरतोनकन्ना बच्चोरो पेदुदा मंतोर.

10 ओना बारेमते पेन इल्हा वेहचि मल्ला. हळ! नना नीकन्ना मुन्नेने नावा कबुरतोन लोहंतन, ओर नीवाहाटी हर्रि तयार कीतोर. इंचि दर्मसास्त्रमते रासि मंता.”*

11 नना मीकु निजम वेहासेक मंतन, पुट्टोरान्नेटाल बापतिस्मा हियना योहानुंकन्ना पेदुदा बोर पुट्टा हिल्लुर. अय्नागानि स्वर्ग राज्यमते सिन्ना मनकलगुडा योहानुंकन्ना पेदुदोडे.

12 बापतिस्मा हियना योहानुना रोजकुनस्केटाल अय्ते इदवेरदाकागुडा लोक्कुल स्वर्गमते जबरदस्तिते होळियसेक मंतुर. गानि बदमास लोक्कुल मात्रम अड्डम तिरियसि आपालय हळसंतुर.

13 बारित्ते योहानुन दाका मूसाल आनि अंतोर पेनदा कबुरतोर स्वर्ग राज्यमता बारेमते बविस्यवानि कीसेक मत्तुर.

14 मिमेटगिटा अव बविस्यवानिन ओपकुनानय्ते, पेनदा कबुरतोर एलियाल वायनद मंता इंचि इत्तुर, ओर ई योहान आंदुर.

15 बोर्कु केंजालय केव्क मंतां ओर केंजट.

- 16 “गानि नना ई पीळिता लोकुकुकुन बोरा लोप्पो कल्पकन? मिमेट अथे बजारते उद्दिदिसि, वरोंक-वरोर केय्शि,
 17 मोमोट मीहाटी त्रीला उहकुतोम, गानि मिमेट एग्रा हिल्लिर. मोमोट दुक्कमता पाटां पारतोम, गानि मिमेट अळा हिल्लिर, इंचि इनना पिलालुकुनालेसी मंतिर.
 18 बारिल्ले योहान बतल तिनाकोटा उनाकोटा वातोर. अथना लोकुकुकु मात्रम ओन देय्यम पीता इनुंदुर.
 19 अल्हेन मनकना रूपमते पुटतोन नना तिचेके-उंचेके वातन गानि लोकुकुकु मात्रम, हुळाट, ईर बचचोर तितोर, बचचोर उंटोर? कर वसुल कियानोर आनि पापि लोकुकुकु ईना दंटातोर आंदुर, इत्तुर. गानि पेनदा बुद्दिदे सत्तेमतद आंद इंचि, दाना बुद्दिदेते ताकानोर कियाना कबाह्कुकुन पोर्पोटाल तेळियंता,” इंचि वेहतोर.

विस्वासम कियवोरा पिस्वर बेस मन्यो
 (लुकाल 10:13-15)

- 20 आयंका येसु बव नाहकुने एक्को अद्दूबूताल्क कीतोर, आ नाहकुना लोकुकुकु मनसु मार्सकुंचि पेनदाहेके तिरिया हिल्लिर. दानहाटी येसु आ नाहकुन पोर्पो दोसेम दोसतोर.
 21 “ए कोरजिना आनि बेतसेदा नाटेना लोकुरिटा, मीकु गोसा तप्पो! ओक्कला मिहगा बव अद्दूबूताल्क आतां, अवे गिंटा सूर, सिदोन नाहकुने आसि मत्ते अगाटा लोकुकुकु बिराना बोतां हुद्दिसि, मँदुल्क बूळ्दि होकसि, दुक्कमते मनसु मार्सकुंचि मन्नेर.
 22 गानि नना मीकु वेहासेक गदा, पेन न्यायम कियाना रोजुने सूर आनि सिदोनतुरा परिस्तिती मीकनना बचचोरो बेस मनंता.”
 23 “ए कपर्नाहूम सहरता लोकुरिटा, मिमेट स्वर्गमते दांतोम इनकुंचतिरा? मिमेट नरकमते दांतिर. ओक्कला मिहगा जर्गता अद्दूबूताल्क सदोम सहरते जर्गिसि मत्ते, अद सहर इदवेरादाका आगवड.
 24 गानि नना मीकु वेहासेक गदा, पेन न्यायम कियाना रोजुने सदोम सहरता परिस्तिती मीकनना बचचोरो बेस मनंता,” इंचि इत्तोर.

येसुन विस्वासम कीतोर्क सुकाल्क दोर्कतां
 (लुकाल 10:21,22)

- 25 आ वेलाते येसु इल्हा इत्तोर: “ए नावा बाबा, बुमि आनि स्वर्गमता सामि, तेल्विगल्लोर्क आनि समजदार लोकुकुकुनगटाल इव पोल्लें मक्किचि इरतिन, सादा-सिपल लोकुकुकुकुं बारे इव पोल्लें हुपिस्तिन, इंचि नना नीवा स्तुति कीसेक मंतन.
 26 हो बाबा! नीकु इदे बेस अनपिस्ताहाटी निमे इल्हा कीतिन.”
 27 मर्पा येसु लोकुकुकुनतोनि इल्हा वळकुतोर. “नावा बाबाल नाकु अन्नि अप्पजेपतोर. बाबान तप्पा मरिन बोरे एरपाट किय्युर, मरिन तप्पा बाबान बोरे एरपाट किय्युर. मरि ओना इस्टमताप बाबाना बारमते बोर्क अथे तेळियानाल वेहांतोर ओरे बाबान एरपाट कीतुर.”
 28 “अरे बर्वु कांजसि नेरबडता लोकुकुकुनिटा! मिमेट अंटोर नाहेके वट, नना मीकु आराम हीतन.
 29-30 ना कांडी मिमेट तेहाकुंचि नावातोनि करियट, नना बेस आनि सादा-सिपल मंतन. इंका नावा कांडी सवरगा मंता* नावा बर्वु अल्कगा मंता. इंचि मी आत्माकु सांति दोर्कता.”

12

नोमकेम रोजुना बारमते येसु कराहता पोल्लें
 (मरकुस 2:23-28; लुकाल 6:1-5)

- 1 उंदि नोमकेम रोजुने येसु आनि सिस्युल्क पोलाल्कुकुनाल होंचेके मत्तुर. अस्के सिस्युल्कुकुं कर्वेस्सि मत्ताहेके हेनकु नल्सि तिचेक मत्तुर.
 2 परिसिल्लक अदुन हळसि, “हळ्ळा! नोमकेम रोजुने बद कबळ अथे कियमळ नियम परकारम ओज्जोनो, अदे कबळ नीवा सिस्युल्क कीसंतुर,” इंचि येसुन इत्तुर.
 3 अस्के येसु ओर्कुन, “दाविदुकु आनि ओना दंटातोर्कुं कर्वेस्तस्के ओर बतल कीतोर, मिमेट हदवा हिल्लिरा?
 4 ओर पेनदा गुळिते होळियसि, पेनदुकु मोळकता हारिन अंटोर तित्तुर. अव हारि तिनमळ इते दर्मसास्त्रम परकारम विरोदमते मत्ता. अव हारि सिराप पेर्मालोर्क तप्पा इंका बोरे तिना पर्र.
 5 अचोने आयका पेर्मालोर्क नोमकेमता रोजु गुळिते कबळ कीतुर इत्ता संगति मूसाना नियमते मंता इद मीकु एर्के मंता. अल्हा कियमळ तप्पु आयो.

* 11:29-30 कांडी सवरगा मंता कराहमळ अल्कगा मंता.

6-8 नना कोरानद दया आंद, मोक्कु आयो, इंचि ✨ दर्मसास्त्रमते रासि मनना पोल्लेना अर्तम मीकु तेळियसि मत्ते ई दोसेम हिल्लोरपोरों मिमेट दोसेम दोस्सा कोन्नेर. नना वेहनद बतल इत्ते, गुळिकन्ना पेदूदोड वरोर इगे मंतोर. बारित्ते मनकना रूपमते पुटतोन नना, नोमकेमता रोजुना मालकगुडा आंदुन.” इंचि इत्तोर.

कय वत्सोत्ता मनकन येसु बेस कीतोर
(मरकुस 3:1-6; लूकाल 6:6-11)

9 येसु अगटाल पेय्सि यहूदिल्लुकुना दर्मसास्त्रम कराहना लोते होत्तोर.

10 अगा वरोर कय वत्सोत्ता मनकल मत्तोर. येसुन बल्हा तप्पुने पियना इंचि, “नियम परकारम, नोमकेम रोजुने बोनना बेस कियमळ बेसा, बेस आयोना?” इंचि परिसिल्लुक ओन पूसकीत्तुर.

11 अस्के येसु ओर्कुन इल्हा इत्तोर, “मिहागटाल बोनागन्ना उंदि गोरें मंता इनकुंट, अदगिंटा नोमकेम रोजुने पोक्काते अर्नान्ये दान तेंडिरा? तेंडांतरि!

12 इगे अय्ते, गोरेंकन्ना मनकना जीवाक बच्चोरो विलवा मंता! अदुनहाटीं दर्मसास्त्रम परकारम नोमकेम रोजुने बेस किया परांतरि,” इंचि इत्तोर.

13 अस्के येसु, “नीवा कय मुन्नेळ्ळक हहा,” इंचि कय वत्सोत्तोन इत्तोर. ओर कय मुन्नेळ्ळक हाहतस्के अद कय इंकुंटि कयदालेसीं बेस आता.

14 पजा परिसिल्लुक अगटाल पलाते पेय्स्तुर. पेय्सि, येसुन बल्हा हक्कना? इंचि येसुना विरोदमते वळ्ळुकुत्तुर.

येसु पेन पेर्कुत्ता सेवक आंदुर

15 ओर वळकानद कन्कुंचि येसु अगटाल पेय्सि होत्तोर. वेल्लेट्टर लोकुल्लक ओना पज्जो होत्तुर. अस्के येसु ओर्कुन अटोर्कुन बेस कीतोर.

16 पजा, “नावा बारेमते बोर्के बतले वेहमट इंचि अटोर्क हुकुम हीतोर.”

17 इत्ते यसायाह इनना पेनदा कबुरतोर इत्तव पोल्ले पूरा आयना इंचि येसु सामि इल्हा कीतोर.

18 यसयाना बविस्वयानि इल्हा मत्ता:

“ईर नावा सेवक आंदुर, ईन नना पेर्कुत्तन.

नना ईन पावरम कीतन ईना बारेमते कूस मंतन.

नना नावा पवित्र आत्मा ईना पोरो ईरंतन,

ईर नावा न्यायमतुन अन्नि जातिनोर्क वेहांतोर.

19 ईर बोनतोने तेरहानोर आयोर, जोरते वरगोयानोर आयोर,
हरकुन पीसि लोकुल्लुकुंक ईना अल्लिकर केंजा वायो.

20 नावा न्यायम गेल्सनाजेम ईर दुरसोत्ता बोंगुनगुडा उरहोर,
इंका पिरंना वेडसितुनगुडा पिरहोर.*

21 दानहाटीं अन्नि जातिनोर ईना पोरोलते आसेते मंदनुर.”✨

येसु आनि देय्याल्लुकुना मुक्थल

(मरकुस 3:20-30; लूकाल 11:14-23)

22 पजा वरोर देय्यम पीता गुडिड-मूकन लोकुल्लक येसुनगा तत्तुर. येसु ओन बेस कीतोर. अस्के आ मनकल हळालय-वळकालय दल्यतोर.

23 इदुन हळसि अगाटा अंतोर लोकुल्लक इचंत्रमते, “वरोर दाविद राजाना तंतुने पुट्टनोर मत्तोर, ओर ईर आयोर गदा?” इंचि इत्तुर.

24 गानि अगा मत्ता परिसिल्लुक दीन केंजसि, “ईर अय्ते बेलजेबुल इनना देय्याल्लुकुना मुक्थना बलमते देय्याल्लुक तेंडांतोर” इंचि इत्तुर.

25 परिसिल्लुकुना मनसुना विचारल्लुकुन एरपाट कीसि येसु ओर्कुन इल्हा इत्तोर, “बद राज्येम लोप्पो वरोना पोल्ले-वरोक अर्काकोट्टा आंता, अद राज्येम पाडासि दांता. अल्हेने लोते आयि, नाटे आयि वरोना पोल्ले-वरोक अर्काकोट्टे बतले नित्तापर्रीं.

26 अल्हेने देय्यम दाना दंटाता देय्याल्लुकुन पेचाहिचि गेदुमते, अबुना लोप्पेन अर्काकोट्टा आंता. अस्के अबुना राज्येम बल्हा नित्तंता?

✨ 12:6-8 होसे 6:6 * 12:20 इद वचनमता अर्तम बतल इत्ते, विस्वासमते कमजोर मत्तोर्कुन आनि परेसानते मत्तोर्कुन येसु होळ्ळसोर. गानि ओर्कु सहायम कीतोर. ✨ 12:21 यसायाह 42:1-4

27 मिमेट इत्ताप नना ओक्कला बेलजेबुलना सहायमते देय्याल्कुन गेदमंतन इन्कुटु. गानि मीवा लोकुल्कगुडा देय्याल्कुन गेदमंतुर, ओरगुडा देय्यमता सहायमतोने गेदमंतुरा? अदुनहाटी मीवा लोकुल्के मीवा न्यायम कीतुर.

28 गानि नना ओक्कला पेनदा आत्माता सहायमते देय्याल्कुन गेदमानय्ते, पेनदा राज्येम मीवा दमर्गेक एत्ता इंचि एपाट कीप्पु.

29 बोर आयिर, वरोर ताकतवर मनकना लोते होळियसि ओना सामानतुन दोंगा कियना इत्ते, मोदाला आ ताकतवर मनकन दोहचि वाटतेन, दोंगा किया परांतोर.

30 बोर अय्ते नावा दंताते मन्नोर, ओर नावा विरोदमते मंतोर, बोर अय्ते नाकु सहायम किय्योर, ओर नाहगटाल पायिचना कवळ कीतोर.”

31 नना मीकु वेहनद बतल इत्ते, मनकना अन्नि पापालकुन, ओर कीता अपमानमतुन पेन मापि किय्यार. गानि पवित्र आत्माता अपमानम कियानोन मात्रम पेन माप किय्यो.

32 अल्हेने मनकना रूपमते पुटतो नना कु विरोदमते बोर वळिकना, पेन ओना तप्पुकुन मापि किय्यार. गानि पवित्र आत्माकु विरोदमते वळकानोन मात्रम पेन माप किय्यो. इद कालमते आयि, वायना कालमते आयि, बस्केने माप किय्यो.

मरा आनि पंडि

(लूकाल 6:43-45)

33 पजा येसु परिसिल्कुनतोनि इल्हा वळकालय दल्युतोर. “केंजट, पंडितुन हळसे मिमेट मरातुन एपाट कीकिर, मरा बेसतद इत्ते दाना कायां इंका बेसतवे. अल्हेने मरा कराबतद इत्ते दाना कायां इंका कराबतवे.

34 ए कट्टला तरास पोरिह्कुनसंतोरिटा, मिमेट कराबतोर आसि, मीवा तोळ्दाल बेसतां पोल्ले बल्हा पेय्सनु? बारिल्ले मनसुने मनना पोल्लेगे तोळ्दाल पलाते पेय्सतां.

35 बेसता मनकल ओना मनसुने मनना बेसता पोल्लेगे पेच्हांतोर, अल्हेने कराब मनकल ओना मनसुने मनना कराब पोल्लेगे पेच्हांतोर.

36 इंका नना मीकु वेहानद बतल इत्ते, पज्जो-मुन्ने विचारम कियाका मीवा तोळ्दाल पेय्सता उंद-उंदि वाट्टि पोल्लेता लेक्का आकिर न्यायम कियाना¹ रोजु पेन मीवाहेंदाल एतार.

37 मी पोल्लेना पोर्रोटाळे मिमेट दोसेम हिल्लोरा लेक्काते वांतिर, इंका मिमेट वळकता पोल्लेना पोर्रोटाळे मीपोर्रो दोसेम दोसमळ जर्गता.” इंचि इत्तोर.

यहुदि लोकुल्क येसुना परिकसा हळंतुर

(मरकुस 8:11,12; लूकाल 11:29-32)

38 अस्के इच्चुर परिसिल्क आनि दर्मासत्रम कराहना गुस्ल्क येसुनगा वासि, “गुरु, नीवा कयदाल माकु उंदि चिन्ह हळना मंता,” इंचि इत्तुर.

39 अस्के येसु ओर्कुन इल्हा इत्तोर, “सेडुडोर्क आनि बोगमतनम कियाना पीळिता लोकुल्क, चिन्ह हप्सा इंतुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह हूपिचमळ जर्गो.

40 इत्ते योनाल बल्हा नर्का-पिय्यल मूड रोजकु पेद्दा जिम्माता पीटा लोप्पो मत्तोर, अल्हेने मनकना रूपमते पुटतो नना, नर्का-पिय्यल मूड रोजकु बूमिता पीटा लोप्पो मंतन.

41 योनाल वेहता कबुर केंजसि निनवे सहरतोर अय्ते ओरा मनसु मार्सकुत्तुर. गानि हुळाट, योनांकन्ना पेद्दोड इंदके मी मुन्ने नित्तिसि मंतोर. अय्नागानि मिमेट मनसु मार्सकुंचेके हिल्लिर. अदुनहाटी आकिर न्यायमता रोजुने निनवे सहरतोर नित्तिसि इद पीळिता लोकुल्कुनपोर्रो दोसेम दोस्सनुर.”

42 “अल्हेने सिबा देसेमता रानि सुलेमान राजाना तेल्विता पोल्ले केंजालय वैरे देसेमताल अगा वासि मत्ता. हुळाट, सुलेमानुंकन्ना पेद्दोड वरोर मी मुन्ने नित्तिसि मंतोर. अय्नागानि मिमेट नावा बुदिदता पोल्ले केंजसेक हिल्लिर. अदुनहाटी आकिर न्यायमता रोजुने आ रानि इद पीळिता लोकुल्कुनपोर्रो दोसेम दोस्सार.”

43 “उंदि देय्यम बस्के अय्ते वरोर मनकानाल पेय्सि दांता, अस्के अद आराम कियालय एर हिल्वा जेगा पहकंता, गानि दानक असंटा जेगा दोर्को.

44 अस्के अद देय्यम, ‘नना बद लोताल अय्ते पेय्सि वातानो, अदे लोते मर्रा मल्लिस दांतन,’ इन्कुंता. मर्रा अगा होंचि हळत्सके मुन्नेटा लोन रिक्कम आताप, मंचिगा ऊसताप दानकु बेस दिसंता.

¹ 12:36 आकिर न्यायम दुनिया मुळंगनेक मनम कीता कबाह्कुनद आकिरते उंदि न्यायम आंता.

45 अस्के अद देय्यम तिरियसि होंचि दानकन्ना एक्को सेड्डातव एडुं देय्याल्कुन पीसि वांता. पजा अंटव कलियसि अदे लोते मनालय दल्यंतां. इल्हा आ मनकना परिस्तिती मोदाटा परिस्तितीकन्ना एक्को कराब मनंता. इद कालमता लोकुल्कुना जीवाते पेनदा पोल्लेक जेगा हिलाकोटे इसोटा गोसे आयार," इचि इत्तोर.

येसुना निजम जीवातोर बोर?

(मरकुस 3:31-35; लुकाल 8:19-21)

46 मंदितोनि येसु वळ्कसेक मननेके ओना यावल, ओना तम्मुह्क वासि, ओनतोनि वळकानद मंता इंचि लोता पलाते नित्तिसि मत्तूर.

47 अस्के, "गुरु, नीवा यावल, नीवा तम्मुह्क नीतोनि वळकानद मंता इचि पलाते नित्तिसि मंतूर," इचि बोरो येसुंक वेहतोर.

48 अस्के, "बद ना यावल, बोर ना तम्मुह्क?" इंचि येसु ओन्क वेहता मनकन पूसकीतोर.

49 पजा ओना सिस्सुल्कुनहेके कय हुपिच्चि, "हुळाट, ईर ना यावल, ईर ना तम्मुह्क आंदूर.

50 बोर अयेते नावा स्वर्गमता बाबाल वेहताप ताकंतोर, ओरे नावा तम्मु, हेलड आनि यावनलेसी दग्गेटोर आंदूर," इचि येसु इत्तोर.

13

विज्जा तासानोना वेसुड

(मरकुस 4:1-9; लुकाल 8:4-8)

1 अदे रोजु येसु लोताल पेय्थि समुद्रम ओड्डुनगा होंचि उदतोर.

2 वेल्लेटूर लोकुल्क ओनगा जमा आताहेका ओर उंदि डोंगा एक्किस् उदतोर. लोकुल्क बारे ओना मुन्ने समुद्रम ओड्डुनपोरो नित्तिसि मत्तूर.

3 अस्के ओर वेल्लेन पोल्ले वेसुडिं वेहासेक कराहतोर.

अन्टेटाल उंदि वेसुडि इल्हा मंता: "केंजट, वरोर कास्तकारि मनकल विज्जां वीतालय पेय्स्तोर.

4 ओर वीतनेके इच्चुं विज्जां हरदगा अरतां, अस्के अवुन पिट्टें वासि पेर्सि तित्तां.

5 इच्चुं विज्जां बंडाना गेर्सिपोरो अरतां. अगा तोळि एक्को हिलुवादानकु आ विज्जां बिराने मोलियतां.

6 गानि हिह्क लोप्पोळ्क होनवाहेका पोळ्द पेय्स्तस्के मोल्कां वत्सि हासोत्तां.

7 इका इच्चुं विज्जां हाह्कुना पोदाने अरतां. हाह्कुना पोदां इरगा बेर्सि अव विज्जन बेसां हिया हिल्लें.

8 इच्चुं विज्जां बेसता जेगाते अरतां. बेस पंटा पेय्स्ता. अव उद-उंदि मोदोल्कु बगा मुपै अंताल्क, बगा अरवै अंताल्क,

बगा नूर अंताल्कुना पंटा पेय्स्ता.

9 बोर्कु केंजालय केक्क मंतां ओर केंजट."

वेसुडिं वेहचि वळकाना उददेसम

(मरकुस 4:10-12; लुकाल 8:9,10)

10 पजा सिस्सुल्क ओनगा वासि, "गुरु, निमे लोकुल्कुनतोनि वळकानेके वेसुडिं वेहासेक बारि वळकांतिन?" इचि पूसकीतूर.

11 येसु अस्के ओर्कु इल्हा वेहतोर. "मीक अयेते स्वर्ग राज्येमता बारेमता मर्ममतुन एप्राट कीकुनालय बुद्दि मंता, गानि ओर्कु हिल्ले.

12 बारित्ते, बोनगा अयेते मंता, ओन्क पेन इका हीता, अस्के ओन्क वेल्लेन आंता. गानि बोनगा अयेते हिल्ले, ओनागटाल मात्रम मत्तदुनगुडा पेन वापस एतकुन्नार.

13 ओर हळ्ळ अयेते हळ्ळतूर, गानि ओर्कु अद दिस अर्री. ओर केंजुड अयेते केंजांतूर, गानि ओर्कु केंजा वायो, अद ओर्कु तेळियोगुडा. अदुनहाटी नना वेसुडिं वेहासेक ओरतोनि वळकतन.

14 यसायाह इनानोर ओरा बारेमते रासतद पेनदा पोल्ले इंदके इल्हा निजम आता:

"मिमेट केंजातिर निजमे, गानि बस्केने अर्तम कीकुन्निर.

कळ्कुने हळ्ळतिर, गानि अद मीकु तोसो.

15 ओर कळ्कुने हळ्ळसि, केळ्कुने केंजसि,

मनसुनाल अर्तम कीकुंचि नाहेके तिरियतस्के ओर्कुन नना बेस कीकन.

इल्हा बस्केने जर्गामन्नि इचि ओरा मनसु गट्टि पडता,

केव्क बारे मंदोम आसि केंजा वायाकोटा आतां, कळ्ळुकुन बारे मुचकुतुर.”*

इद पोल्ले नावां केंजवोरा बारेमते निजम आता.

16 गानि मीबा कळ्ळु हुळतां, केव्क केंजतां इचि मिमेट आसिवांद दोर्कतोर आदिर.

17 नना मीकु निजम वेहांतन, इय्याला मिमेट बव हळसंतरो, केंजसंतरो, अबुन वेल्लेटुर पेनदा कबुरतोर आनि नीतिमतुल्लक हळालय, केंजालय तन्त्ताळुंदुर. गानि ओर्क हळालय, केंजालय दोर्काहिल्ले.

विज्जा तासानोना वेसुडिता अर्तम

(मरकुस 4:13-20; लकाल 8:11-15)

18 मिमेट इंदके विज्जां वीतानोना वेसुडिता अर्तम केंजट.

19 स्वर्ग राज्यमता बारेमता कबुरतुन केंजसि बोर दान अर्तम कीकुन्नोर, ओना मनसुने बतल अयते वीतिस मत्तनो अदुन देय्यम वासि इग्गिस ओता. आ लोक्कुल्ल इत्ते विज्जां अरता हर्दा जेगातसंतोर आंदुर.

20 बोर अयते पेनदा पोल्लेतुन केंजसि कूस आसि बिराना दान ओपुकंतोर, ओर इत्ते विज्जां अरता बंडाना गेर्से जेगातसंतोर आंदुर.

21 ओनालोप्पो पेनदा पोल्लेता हिहकु गट्टिट पळ्वाहाटी, ओर कोन्नि रोजके अव्टे निल्सि मनांतोर. पजा पेनदा पोल्लेताहाटी तिप्पल्लक, कस्टाल्लक वातरुके, विस्वासमताल ओर बिराना लक्कु आंतोर.

22 बोर अयते पेनदा पोल्लेतुन केंजांतोर गानि सम्सारमता रंदि, दनमता आस्ति, इसोटा विचाराल्लक ओर केंजता पोल्लेतुन ओनालोप्पो बेर्सा हिह्यो. अस्के अद पोल्लेताल बतल पायदा आयो. असंतोर इत्ते, विज्जां अरता हाहकुना पोदाना जेगातसंतोर आंदुर.

23 बोर अयते पेनदा पोल्लेतुन केंजसि, ओपुकुंचि तेळियागोटकुंतोर, ओर इत्ते विज्जां अरता बेसता जेगातसंतोर आंदुर. ओर बेस पायदा तरांतोर. बगा मुपै अंताल्लक, बगा अरवै अंताल्लक, बगा नूर अंताल्लक इल्ला पलांचंतोर.

हकोलिना वेसुडि

24 येसु इंकुंदि वेसुडि वेहतोर. बोर मनकल अयते ओना पोलमते गोहकुना बेस विज्जां वीततोर, आ मनकन लेहका स्वर्ग राज्यम मंता.

25 गानि अंतोर लोक्कुल्ल मीडतद हळसि ओना पगातोर वासि गोहकुने हकोलि* वीतिस होत्तोर.

26 पजा गोहकु मोलिगिसि पोदुटाक वासि मियतां, हकोलि इंका दिसतां.

27 अस्के नेदा मालकुनगा जीतागाहक वासि, “मालक, निमे अयते नीवा नेदे बेसता विज्जां वीत्सि मत्तिन गदा? मरि अगा हकोलि बेंदाल वातां?” इचि पूसकीतुर.

28 अस्के “इदु बोरो पगातोर कीता कबळ आंद.” इचि मालक इत्तोर. “अयते निमे बतल इतिन मरि, मोमोट होचि हकोलितुन पीक्सि पोहकोमा?” इचि जीतागाहक मालकुन पूसकीतुर.

29 अस्के मालक, “मान्नि, हकोलितुन पीकनेके गोहकुनगिंटा पीकिकिट!

30 कोताक वयनदाका अव रौडुगुडा कलियसे बेर्सिंकांटी. पजा कोताक वातरुके कोय्यानोर्कुंक नना, ‘मुन्ने हकोलिन कोय्सि, हेरकी दोहाचि अबुन बोडसि पोहट. पजा नावा गोहकुन जमा कीसि गुम्मिटे दोस्सट इंतन,’ इचि जीतागाहकुंकु वेहतोर.”

आवाल्लकुना पेळ्ता वेसुड

(मरकुस 4:30-32; लकाल 13:18,19)

31 पजा येसु ओर्कु इंकुंदि वेसुडि वेहतोर. “स्वर्ग राज्यम, आवाल्लकुना उंदि पेडेतसोंटद आंद. आ पेडेतुन बोरो वरोर मनकल ओसि, ओना तोटाते वीततोर.

32 आवाल्लकुना पेळे अन्नि पेडेकुंकुन्ना सिन्नागा मंता, गानि बेरस्तस्के अद तोटाते मनना अन्नि मराकुंकुन्ना पेदुदा मरा आंता. मळ्बुने परियना पिट्टे वासि दाना कोम्मांक गूडां दोहंतां.”

33 येसु पजा ओर्कु इंकुंदि वेसुडि वेहतोर. “स्वर्ग राज्यम पुल्लटा पिडितसोंटद आंद. बदो उंदि मुरतळ पुल्लटा इच्चुर पिडितुन मूड तव्वना पिडिते कल्पता. अयते मेल्लगा-मेल्लगा आ पूरा पिडिअंता पुल्लगा आता.”

34 इव अन्नि पोल्लें येसु लोक्कुल्लक वेसुडिनेन वेहतोर. वेसुडि वेहाका ओर्कु बतले वेहाकोंदुर.

35 बारिल्ले पेनदा कबुरतोरहेंदाल मुन्ने वेहचि मल्ला पोल्ले इंदके निजम आता, अद पोल्ले इल्ला मंता:

“नना नावा तोळ्दे वेसुडिं वेहंतन.

दुनिया पुदुत्तकेटाल मक्सि मत्ता पोल्लेन नना वळ्ळिसि वेहंतन.”*

* 13:15 यसायाह 6:9-10

* 13:25 हकोलि तोडंगा, इवना विज्जा बदना पंटाते अरंनये अद पंटातुन पाड कीस पोहंतां.

* 13:35 बजन

हकोलिना वेसुडता अर्तम

36 पजा येसु लोकलुकुन होळसिसि लोन होलतोर. अस्के सिस्युल्क ओनगा वासि, “गुरु, पोलमते वीतता हकोलिता वेसुडतुन माकु तेळियागोट्टिसि वेहा.” इत्तुर.

37 अस्के येसु ओर्कु इल्हा वेहतोर. “केंजट, बेसता विज्जां वीतानोर इत्ते मनकना रूपमते पुटतोन नना आंदुन.

38 पोलम इत्ते ई दुनिया आंदु. आनि बेसता विज्जां इत्ते पेनदुन ‘मावा राजाल’ इंचि विस्वासम कीतोर, हकोलि इत्ते देय्याल्कन पोल्लें केंजानोर आंदु.

39 हकोलि वीतता पगातोर इत्ते, देय्यम आंद. पंटा कोयना वेला इत्ते दुनिया मुंळगना आकिर वेला. कोय्यानोर इत्ते पेनदा दूतां आंद.

40 अस्के बल्हा हकोलितुन कोयसि, जमा कीसि तडमि दोसतुर, अल्हेने इद दुनिया मुंळगना आकिर वेलाते आयार.

41 बारित्ते अद वेलाते मनकना रूपमते पुटतोन नना, नावा दूतन लोहंतन. अव नावा राज्यमते मनना पापिकुंन आनि पापम किया वेहानोर्कुन अंतोर्कुन पेच्हासि,

42 बस्केने पिरिकोटा पोत्तना तडमि ते वाटसीतां. अगा बस्केळ्ळ अळमळ, किटुर-किटुर पल्कु कोर्कमळे मनंता.

43 अस्के नीतिमंतुल्क बोर अय्ते मंतुरो ओर ओरा पेनबाबाना राज्यमते पोळ्ळदुन लेहका मेसैके मनांतुर. बोर्कु केंजालय केळ्ळ मंतां ओर केंजट.”

पोलमते मकिस्ता दनमता वेसुड

44 स्वर्ग राज्येम बारमते इंकुंदि वेसुड वेहंतन केंजट. उंदि पोलमते दनम मक्किचि मत्ता. बोरो वरोर मनकल आ मक्किचि मत्ता दनमतुन हळतोर. आनि मरां अग्गेन मक्किचि इरगा कूस आसि लोन होलतोर. पजा ओर ओना लोन मत्तद-हिलवद अन्नि अमकुंचि वाता कोत्ताने अद पोलमतुन असकुत्तोर.

बेस मुच्च्याल्कुना वेसुड

45 स्वर्ग राज्येम बारमते इंकुंदि वेसुड वेहासेक केंजट. वरोर व्यापारि बेसता मुच्च्याल्क पहकसेक मत्तोर.

46 अय्ते ओन्क उंदि वेल्ले दराता मुच्येम दिसता, अस्के ओर लोन होंचि ओनगा मत्तद-हिलवद अन्नि अमकुंचि वाता कोत्ताने अद मुच्येमतुन असकुत्तोर.

ओल्लता वेसुड

47 “स्वर्ग राज्येम बारमते मरां उंदि वेसुड वेहासेक केंजट. उंदि ओल्लता मत्ता. अद ओल्लतातुन बेरेडते इस्सुरत्स्के अन्नि रकाल्कुना मीन्कु अरतां.

48 ओल्लामोड मीन्कु अरतस्के, मीन्कु पिय्यानोर दान ओड्डुंक इग्गुतुर बेसतवुन पेर्सि तोत्ति ते वाटतुर, अल्हेने कराबतवुन बारे पोहचीतुर.

49 इद दुनिया मुंळगना आकिर वेलातेगुडा अल्हेन आयार. पेनदा दूतां वासि, सेड्डोर्कुन नीतिमंतुल्कुनाल वेरे कीता.

50 कीसि ओर्कुन बस्केने पिरिकोटा पोत्तना तडमि ते वाटसीतां. अगा बस्केळ्ळ अळमळ, किटुर-किटुर पल्कु कोर्कमळे मनंता,” इंचि वेहतोर.

51 पजा “इव अन्नि पोल्लें मीकु तेळियतंगा?” इंचि येसु सिस्युल्कन पूसकीतोर. अस्के “हां गुरु, माकु तेळियतां,” इंचि ओर इत्तुर.

52 अस्के येसु “बोर मनकल अय्ते ओना कजानाताल पुनद-पळानद सोम्मून पलाते पेचहांतोर, आ मनकन लेहकने स्वर्ग राज्येमता सिस्युड मत्ता हरेक दर्मसास्त्रम कराहना गुरु मनांतोर, ओर यहदि लोकलुकुना पडाना आनि पूना बोदा रौडु इका करहा परांतोर.” इंचि ओर्कु वेहतोर.

येसु वापस ओना नार वांतोर

(मरकुस 6:1-6; लूकाल 4:16-30)

53 पजा इव वेसुडि वेहमळ महासि येसु अगटाल पेयसतोर.

54 ओना नार वासि अगटाल दर्मसास्त्रम कराहना लोते होंचि लोकलुकुंक पेनदा पोल्लें कराहलय दलगतोर. अस्के अव पोल्लें केंजसि अंतोर लोकलुक इचंत्रम आसि, “ईनकु इचचोर बुदिद, अदू बूताल्क कियना ताकत, बगटाल दोर्कता?

55 ईर अय्ते वडलना मरें गदा? ईना तल्लुर अय्ते मरियमे आंद, इका याकोब, योसेप, सिमोन, यहदल ईर अय्ते ईना तम्मुह्के आंदुर.

56 अचोने आयका ईना हेलाहकगुडा मना नड्डुमे मंतां. अय्ते मरि ईन्कु इवन्नि पोल्लें, कबाहक बोर हीतुर?” इंचि नाटेनोर वळ्ळकुनुंदुर.

57 अदुनहाटी ओर येसुनपोर्रो होंग आतुर.

अस्के येसु ओर्कुन इल्हा इतोर, “पेनदा कबुरतोंकु ओना नाटे, ओना लोते तप्पा दुनियांता कदर दोर्केता.” इतोर.

58 ओर विस्वासम कियवाहाटी अगा येसु वेल्ले अदुबतामाता कबाहक किया हिल्लोर.

14

बापतिस्मा हियना योहानुन हक्कंतुर

(मरकुस 6:14-29; लुकाल 9:7-9)

1 अद वेलाते गालिल एरियाता राजाल, हेरोद* इनानोर, येसुना बारेमते केंजतोर.

2 केंजसि “इं येसु इत्ते बापतिस्मा हियना योहान आंदुर. ओर हातोरारुटेताल मर्रां तेदतोर. अदुनहाटी ओर इंसंटा अदुबतामाता कबाहक कीसंतोर.” इंचि ओना सेवाकुल्लुकुं वेहतोर.

3-4 बारित्ते हेरोद राजाल ओना तम्मूर पिलिपुना मुत्तो हेरोदियान इरकुचि मत्तोर अस्के, “नीवा तम्मूना मुत्तोन निमे निहगा इरमळ नियम परकारम बेस आयो,” इंचि योहान हेरोद राजांक वेहचि मत्तोर. अदुनहाटी हेरोद राजाल योहानुंक बेडी वाटसि ओन जेलने वाटतोर.

5 अस्केटाल हेरोद राजाल योहानुन हक्कालय कोरसेके मत्तोर, गानि लोकुल्लुकुं योहानुन पेनदा कबुरतोर इंचि नम्मूदुर, अदुनहेके राजाल लोकुल्लुकुं वेरियसि योहानुन हक्काकौदुर.

6 गानि हेरोद राजाना पुटता रोजु मत्तस्के अगा हेरोदियाना मिथ्यड लोकुल्लुकुन मुन्ने एगरिसि ओन कूस कीता.

7 अस्के राजाल कूस आसि, “निमे बतल तलकतिन अद नीकु हीतन” इंचि ओट्टु तिचि वेहतोर.

8 अस्के अद दाना तल्लूर वेहता परकारम, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

9 इद केंजसि राजांक इरगा दुवकम वाता. गानि अगा मत्ता अंतोर हेडमितोराहाटी आनि तिल्ला ओट्टुहाटी, अद तलकतद दानक हीम्टु इंचि आदेस हीतोर.

10 जेलते मत्ता योहानुन हक्किसि ओना तल्ला कोय्सि तायलय मनकन लोहतोर.

11 अस्के योहानुना तल्ला गिन्नेते वाट्सि दानक हीते अद ओसि दाना यावांक हीता.

12 पजा योहानुना सिस्थुल्लुकुं ओना पीनगुन ओसि बोंदा दोसतुर. होंचि इद पोल्लेतुन येसुंक वेहतुर.

13 इद पोल्ले केंजसि येसु डोंगाते उदिसि बंदो अलग-सलग जेगाते पेय्सि होत्तोर.

येसु हेय्युं वेय्कुना मंदिक गाटो तासतोर

(मरकुस 6:30-44; लुकाल 9:10-17; योहान 6:1-14)

14 ओर होतद एरपाट आतारित्ते लोकुल्लुकुं ओरा नाहकुनाल ताक्सेक ओना पज्जो पेय्स्तुर. पजा येसु डोंगाताल रेय्तोर अस्के ओन्क अगा वेल्लेने मंदि दिसतुर. अत्ते येसुंक ओरपोर्रो दया वासि, ओरा रोगालुकुनंता बेस कीतोर.

15 पोळ्द होनना वेलाक सिस्थुल्लुकुं येसुनगा वासि, “मनम सुनसान जेगाते मंतोम, वेलागुडा बागेन आता. पोळ्द अर्राका मुन्नेन ईर दगेटो नाहकुने होंचि ओराहाटी तिनालय बतलन्ना अस्कुन्निर, ईरकुन लोहा,” इंचि इत्तुर.

16 अस्के “ओर्क बेके होनना अब्सरम हिल्ले, मिमेटे ओर्कु बतलन्ना तिनालय हीम्टु,” इंचि येसु इत्तोर.

17 अस्के सिस्थुल्लुकुं “महागा अत्ते सिराप हेय्युं हारि आनि रोंडु जिम्मां मंतां,” इंचि इत्तुर.

18 अस्के, “अत्ते अबुन नहागा पीसवटु,” इंचि येसु इत्तोर.

19 अगा मत्ता मंदितुन जाडि पोरो उदुदा वेहतोर. हेय्युं हारि, रोंडु जिम्मां पीसि पोरो हळसि पेनदुकुं दन्यवाद कीतोर. पजा हारिन तुकडां कीसि आ तुकडन सिस्थुल्लुकुं हीतोर. सिस्थुल्लुकुं बारे लोकुल्लुकुं हीतुर.

20 अस्के ओर अंतोर पीरनिंदा तित्तुर. अंतोर तिननेके मिगुल्ला हारिना तुकडां ओर जमा कीतुर अत्ते पेन्नेड तट्टां पेय्सतां.

21 तिल्ला मंदिताल हेय्युं वेय्कु मांडसे मत्तुर, इंका मुर्ताहक, पिलालुकुनद अत्ते लेक्के हिल्ले!

येसु एतापोर्रो ताकतोर

(मरकुस 6:45-52; योहान 6:16-21)

22 पजा अस्केन येसु अंतोर लोकुल्लुकुन साल्ला कियका मुन्नेन ओना सिस्थुल्लुकुन उंदि डोंगाते उपिचिचि ओनकन्ना मुन्नेन सेरवुना हब्बेटा बाजुंक दाटसि होनालय वेहतोर.

23 अंतोर लोकुल्लुकुन साल्ला कीता पजा, येसु वरोर पारतना कियालय गुट्टापोर्रो होत्तोर. पोळ्द होनिनागानि ओर वरोर अगा मत्तोर.

* 14:1 हेरोद गालिल एरियाता इं हेरोद राजाल अघाय मत्तयाल 2:16-18 वचनाल्लुकुने रासता हेरोद राजाना मर्रां आंदुर. आ हेरोद राजाल येसु पुटस्के हक्कालय हळतोर.

- 24 अद वेलाते सिस्युल्लुकुना डोंगा समुद्रम ओड्डुनाल वेल्लेन लक्कु होंचि मत्ता. अस्के ओर्क एदुर वळि वायालय दल्गताहेंका एता तडांक डोंगा डक्क-डिक्क आयालय दल्गता.
- 25 नर्कटां मूड-नाल्ल एगनेके येसु एता पोरोटाल ताकसेक ओरहेके वातोर.
- 26 ओर एता पोरोटाल ताकसेक वायानद हळसि, “देय्यम वासंता!” इंचि सिस्युल्लक वेरियसि वरगेयालय दल्गुतोर.
- 27 अस्के येसु बिराने ओर्कुन, “ननाने आंदुन, वेरियमट, दैरनेम इराट,” इंचि इत्तोर.
- 28 पजा पत्रु येसुन, “सामि, ओक्कला निमेने आयानय्ते नाकुन नीहेके एता पोरोटाल ताकसेक वायालय वेहा,” इंचि इत्तोर.
- 29 “अय्ते हीके वा,” इंचि येसु इत्तोर. अस्के पत्रु डोंगाताल रेय्शि एता पोरोटाल ताकसेक येसुनहेके होनालय दल्गुतोर.
- 30 गानि वळि वायानद हळसि, वेरियसि मुळगालय दल्गुतोर. अस्के “सामि, नाकुन पिसागोट्टा,” इंचि मोत्कुल्लतोर.
- 31 अस्के बिराना कय हाह्लिस येसु ओन पीसि, “अरे तक्को विस्वासमतोना, निमे नापोरो अनमानम बारि कीतिन?” इंचि इत्तोर.
- 32 पजा ओर इव्वुर डोंगा एकतस्के, वळि वायमळ आगुता.
- 33 अस्के, “सामि, निमे निजमे पेनदा मरिन” इंचि डोंगाते मत्तोर ओना काल्कुपोरो अरतुर.
- येसु वेल्लेन बिमारतोर्कुन बेस कीतोर
(मरकुस 6:53-56)
- 34 पजा ओर अद समुद्रम दाटसि गेनेसरेत इनना नाटे वातुर.
- 35 अगाटा लोकुल्लक येसुन एरपाट कीसि दग्गेर पट्टुकुनव अन्नि नाहकुंक कञ्जुर लोहचि बिमार मत्तोर्कुन अंतोर्कुन पीसि वातुर.
- 36 पजा “सिराप नीवा कप्पिडता अंचुन इट्टा हीम,” इंचि विनंति कियुंदुर. बोर-बोर अय्ते ओना अंचुन इट्टुरो, ओर अंतोर पुरागा बेस आतुर.

15

मनकना रिवाज्जुकुन्ना पेनदा पोल्ले पेदुदेदि
(मरकुस 7:1-23)

- 1-2 पजा येसुलेमताल इच्चुर परिसिल्लक आनि दर्मसास्त्रम कराहना गुल्लक येसुनगा वासि, “नीवा सिस्युल्लक पेदु दाल्लुकुना रीति-रिवाजुने बारि ताकुर? ओर तिनाका मुन्ने कय्क बारि नोर्र?” इंचि पुसकीतुर.
- 3 अस्के येसु ओर्क इल्हा जवाब हीतोर. “मिमेट अय्ते मीवां मुन्नेटा रीति-रिवाजुकुन ताकसालय पेनदा आदेसतुन होळसेक मतिर.
- 4 पेन अय्ते इत्ते गदा, निमे नीवा तल्लुर-बाबोना कदर कीम. अचोने अय्का बोर अय्ते तल्लुर-बाबोन रांगंतोर, ओन हक्कमळे गावाले इंचिगुडा पेन इत्ता.
- 5 गानि मिमेट अय्ते, बोरन्ना मनकल ओना तल्लुर-बाबोन, नना मीकु हियानद पूरा पेनदुके हीतन, दानहाटी मीवा सहायम किया परीन, इल्हा तल्लुर-बाबोना कदर इरना अक्सरम हिल्ले, इंचि कराहतिर.
- 6 इत्ते मिमेट मीवा रीति-रिवाजुकुनाहाटी पेनदा पोल्लेतुन होळसेक मतिर.
- 7 ओर डोंगिरिटा, यसायाह इनना पेनदा कञ्जुरतोर मीवसोंटा डोंगिरा बारेमते निजमे वेहतोर, ओर इत्ताप
- 8 इर लोकुल्लक सिराप तोळ्देने नावा कदर कीतुर, गानि इरा मनसु मात्रम नहागटाल बच्चोनो लक्कु मंता.
- 9 इर अंगडमे नावा आरादना कीसेके मनांतुर. बारित्ते ओराहाटी मनकालोर तयार कीता रीति-रिवाजके निजमतव, अवुना पालन कियमळे दर्मम इंचि कराहंतुर.”^{१०} इल्हा वेहतोर.
- 10 अस्के येसु लोकुल्लुकुन दग्गेर्क केय्शि इल्हा इत्तोर, “केंजट आनि अर्तम कीकुंद.
- 11 बतल अय्ते तोळ्दाल लोप्पो दांतनो अद मनकन हेळ्हो, गानि बद अय्ते तोळ्दाल पलाते वांता, अदे मनकन हेळ्हंता.” इंचि इत्तोर.
- 12 पजा सिस्युल्लक येसुनगा वासि, “निमे वेहतद केंजसि परिसिल्लक होंग आतुर इद नीकु तेळियतना?” इंचि पुसकीतुर.
- 13 अस्के येसु जवाबुने, “स्वर्गमते मनना नावा बानाहेंदाल वाटुवद बदे मोल्का आयि, दान पीकिस पोहमळ जर्गता.
- 14 ओरद होन्नि, ओर गुड्डोर्कुंक हरी हृप्सना गुड्डोर्क आंदुर. ओक्कला वरोर गुड्डिड मनकल इकावरोर गुड्डिड मनकंक हरी हृप्सालय होत्ते इव्वुरगुडा पोक्कातेन अरंतुर,” इत्तोर.
- 15 पजा पत्रु, “निमे वेहता इद वेसुडितद अर्तम बतल माकु वेहा,” इंचि इत्तोर.
- 16 अस्के येसु ओर्कुन इल्हा इत्तोर. “मीकु इंदकेगुडा तेळिया हिल्लेना?

- 17 बतल अध्ये तोळदाल पीटि दांता, अदंता पजा पलाते अरंता. इद मीकु इंकागुडा तेळियोना?
 18 गानि बतल अध्ये तोळदाल पलाते पेयसंता, अद मनसुनाल वांता, अदे मनकन हेळ्हंता.
 19 इत्ते कराब विचारालक, हळ्कमळ, बोगमतनम, व्यबिचारम, दोंगातनालक, आबदुम वळ्कमळ, अपमानम कियमळ
 इवनि पापि कबाहक मनसुनाले पलाते पेयसंतां.
 20 इवे पोल्ले मनकन हेळ्हंतां. गानि कय नोर्काकोटा तिनानध्ये मनकल हेळोरे.” इंचि वेहतोर.

वेरे जातिता मुरतळकु सहायम कीतोर
 (मरकुस 7:24-30)

- 21 पजा येसु अगटाल पेय्सि सू, सिदोन एरियाते होत्तोर.
 22 अस्के हळ्ळा! उंदि कनानि मुरतळ* येसुनगा वासि अळसेके, “सामि, दाविद राजाना वंसमतोना, नावा मिथ्यटन देय्यम पीसि वेल्ले तकलिपने मंता, नापोर्री दया कीम” इंचि मोल्कुनालय दल्गता.
 23 गानि येसु मात्रम बतले वळ्काकोटा सपुडदाका मत्तोर. अस्के सिस्युल्लक येसुनगा वासि, “आ मुरतळ मना पज्जो मोल्कुंचेके वासंता दान वापस लोहचीम.” इंचि विनंति कीतुर.
 24 अस्के येसु, “गानि नाकुन पेनबाबाल सिराप इस्राएलता तप्पोत्ता लोक्कुनाहाटी लोहचीतोर.” इंचि इत्तोर.
 25 अथना आ मुरतळ मरां येसुनगा वासि टोंगरां ऊनसि, “सामि नाकु सहायम कीम,” इंचि इत्ता.
 26 अस्के येसु, “पिलाल्कुना हारि तेंडकुंचि अवुन नय्कुंक वाटमळ बेस आयो,” इंचि जवाब हीतोर.
 27 अस्के आ मुरतळ, “अद निजमे सामि, गानि मालक तिननेके हिळु अरता अंटकुल्लुकन अध्ये नय्के तितां गदा!” इंचि येसुन इत्ता.
 28 अस्के “बाई नीवा विस्वासम गट्टिटिदि. इंचि नीवा इच्चा मत्ताप नीकु जर्गीकांटी,” इंचि येसु इत्तोर. अस्केन दाना मिथ्यड बेस आता.

बेसु नालुं वेय्कुंकना वेल्ले मंदिक गाटो दोसतोर
 (मरकुस 8:1-10)

- 29 पजा येसु अगटाल गालिलता सेरवुनहेके होत्तोर अगा उंदि गुट्टापोर्री एक्किंस उदुतोर.
 30 अस्के वेल्लेन मंदि लोक्कुलक ओनगा वातुर. वायनेके गुड्डोर्क, गुनोर्क, कुंटोर्क-तोंटोर्क, म्कालोर्क आनि इंका वेरे रोगाल्कुनोर्कुन पीसि ओनगा तायसि ओना काल्कुनगा इरतुर. येसु अंतोर्कुन बेस कीतोर.
 31 अस्के म्कालोर्क वळ्कालय दल्गुतुर, कुंटोर्क ताकालय दल्गुतुर, तोंटोर्क सवरगा आतुर, गुड्डोर्क हळ्ळालय दल्गुतुर. इवंता हळ्ळसि जमा आता लोक्कुलक इंचंनम आता, आनि इस्राएलता पेनदा स्तुति कीतुर.
 32 पजा येसु ओना सिस्युल्लुकन दगोर्क केय्सि, “ईर लोक्कुलक नहगा मूड रोजकुनाल मंतुर, ईरगा तिनालय बतल हिल्ले. ईरकुन उपसाम लोहुड बेस आयो. ओक्कला अल्हे लोहते कर्वेस्सि नड्डुम हरदे बगानना कूलाबडनुर. अदुनहाटी नाकु ई लोक्कुलकन हळ्ळसि पापम अनपिचंचंता,” इंचि इत्तोर.
 33 अस्के, “इच्चो वेल्ले लोक्कुलक हालानाल तिडि, ई उस्के बुमिते मनाकु बगा दोर्कार?” इंचि सिस्युल्लक येसुन इत्तुर.
 34 अस्के, “मिहगा बच्चु हारि मंतां?” इंचि येसु ओर्कुन पूसकीतस्के ओर “एडु हारि आनि इच्चु सिन्ने जिम्मां मंतां.” इंचि इत्तुर.
 35 अस्के येसु मंदितुन हिळु बूमिपोर्री उदूदा वेहतोर.
 36 पजा येसु आ एडु हारि आनि आ जिम्मान कय्दे पीसि पेनदुक दन्यवाद कीतोर. पजा अवुन तुकडां कीसि सिस्युल्लुकुना कय्दे हीतस्के सिस्युल्लक आ हारि तुकडन अगा मत्ता मंदिक त्सि हीतुर.
 37 अगा मत्तोर अंतोरगुडा पीरनिंदा तित्तुर. पजा मिगुल्ला हारि तुकडन जमा कीते अव एडु तट्टां आतां.
 38 अगा तित्तोरव्हे मुर्ताहक, पिलाल्कुन होळसि नालुं वेय्कुना मंदि मांडसे मत्तुर.
 39 पजा अगा मत्ता मंदितुन होनालय वेह्चि, ओर डोंगाते उदुदिसि मगदान इनना एरियाक होत्तोर.

16

यहदि पेददालक येसुना परिकसा हळमळ
 (मरकुस 8:11-13; लकाल 12:54-56)

- 1 परिसिल्लक आनि सदुर्किर्क येसुनगा वातुर. ओर येसुना पट्टु हळ्ळना उदूदेसमते “निमे पेनदा अदिकारम पीसि वातिन इंचि नममालय, स्वर्गमताल माकु उंदि चिन्ह हुप्सा,” इंचि इत्तुर.

* 15:22 कनानि मुरतळ इत्ते अद मुरतळ कनानि एरियाते मनुंदु. इंचि दान कनानि मुरतळ इत्तुर. इंका अद यहदि मुरतळ आयो.

- 2 अस्के येसु ओर्कु इल्हा जवाब हीतोर. “पोळ्द होंचि मब्बु एर्गा आयानयते मिमेट पिर् वायो इतिर,
 3 हक्केर्कु मब्बु एर्गा, गुमरा आयानयते, इय्याला वळि दुमारम वांता बारे मिमेट इतिर. मीकु मब्बुना रूपाल्कु एपाट किया वांता, गानि वेलाना चिन्हन हळसि अबुन मिमेट बारि एपाट कीसेक हिल्लिर.
 4 सेड्डोर्क आनि बोगमतनम कियाना पीळिता लोकुल्क चिन्ह हुप्सा इतुर. गानि योनाल इनना पेनदा कब्बुतोना चिन्ह तप्पा ओर्कु इक्कुदि चिन्ह हुपिचमळ जर्गो,” इंचि इत्तोर. आनि ओर्कुन होळसि होत्तोर.

येसु यहदिल्लुकुना बारेमते वेहांतोर
 (मार्कुस 8:14-21)

- 5 सिस्थुल्क समुद्रमता हब्बेर ओड्डुंक एव्तर, गानि ओर हारि ओयालय मंगतुर.
 6 पजा येसु ओर्कुन इल्हा इत्तोर, “परिसिल्क आनि सटुकिर्कुना पुल्लटा पिंडिता बारेमते जेगर्ता मंटु,” इत्तोर.
 7 अस्के, “मनम हारि तर्रांलय मर्गताहाटी ओर अल्हा इंतोर बारे,” इंचि ओर ओरे वळ्कुकुत्तुर.
 8 गानि येसु अदुन एपाट कीसि, “अरे विस्वासम तकको लोकुरिता, मनागा हारि हिल्लें इल्हा विचारम मिमेट बारि कीसेक मंतिट?
 9 इद्वेरादाकागुडा मीकु तेळिया हिल्लेना? हेय्युं हारिने, हेय्युं वेय्युकुना मंदि तित्तदगुडा मीकु मति हिल्लेना? तित्तारित्ते बच्चुं तट्टाना हारि मिमेट जमा कीतिर मीकु मति हिल्लेना?
 10 अचोने आयाका एडुं हारिनतोनि नालुं वेय्युकुना मंदि तित्तस्के, बच्चुं तट्टाना हारि जमा कीतिर मीकु मति हिल्लेना?
 11 नना वळ्कानद हारिना बारेमते आयो इंचि मीकु बल्हा तेळियसेक हिल्ले? नना बारे परिसिल्क आनि सटुकिर्कुना पुल्लटा पिंडिता बारेमते जेगर्ता मंटु इत्तन,” इंचि इत्तोर.
 12 अस्के ओर्कु, “हारिना होयता पिंडिता बारेमते उसारते मंटु,” इंचि वेहा हिल्लोर गानि परिसिल्क आनि सटुकिर्कुना कराहना बारेमते उसारते मनालय वेहतोर इंचि तेळियता.

येसे किरिस्तु आंदुर

(मार्कुस 8:27-30; लूकाल 9:18-21)

- 13 येसु कैसरिया पिलिपिया एरियाते होत्तारित्ते, “मनकना रूपमते पुटतोन नना बोन आंदुन इंचि लोकुल्क इंतुर?” इल्हा येसु सिस्थुल्कन पूसकीतोर.
 14 अस्के सिस्थुल्क इल्हा इतुर. “इच्चुर इंतुर निमे बापतिस्मा हियना योहानुन आदिन, इंका इच्चुर इंतुर निमे एलियाल आदिन, इंका बोरो इंतुर निमे थिर्मयाहन हिलाकोटे पेनदा कब्बुरतोर लोप्पोटाल बोरो वरोन आदिन,” इत्तुर.
 15 “अयते मरि, मिमेट, नना बोन आंदुन इतिर?” इंचि येसु ओर्कुन पूसकीतोर.
 16 “निमे जीवाते मनना पेनदा मरिन किरिस्तुन आदिन,” इंचि सिमोन पत्रु इतोर.
 17 अस्के येसु “योनाना मरि सिमोनु! नीकु आसिर्वाद दोर्कुता. बारित्ते, इद पोल्ले नीकु बोर मनकल वेहा हिल्लोर, गानि नावा स्वर्गमता बाबाल नीवा लोप्पोटाल वेहतोर.
 18 इदके नना नीवा पोरोल पत्रु* इंचि इरसंतन, बारित्ते इदे बंडापोर्रो नना नावा कलिसिया †निलाहंतन. दीन हामुरता ताकतगुडा कूल्हा पर्रो.
 19 नना नीकु स्वर्ग राज्येमता तालम कय्क‡ हीसंतन, निमे बूमिपोर्रो बदुन अयते दोहांतिने, अदुन स्वर्गमतेगुडा दोहमळ जर्गता. निमे बूमिपोर्रो बदुन अयते लेहांतिने, अदुन स्वर्गमतेगुडा लेहमळ जर्गता.” इंचि इत्तोर.
 20 पजा, “ननाने किरिस्तुन आंदुन इंचि मिमेट बोर्के वेहमट,” इंचि येसु ओर्क गट्टिगा हुकुम हीतोर.

येसु ओन्क वायना हामुरतुन वेहांतोर

(मार्कुस 8:31-9:1; लूकाल 9:22-27)

- 21 अस्केटाल येसु ओना सिस्थुल्कुक इल्हा वेहालय दलगतोर. “नाकु येस्सलेम होनापीता. अगा यहुदि पेदुदाल्क, पेदुदा पेर्मांलोर आनि दर्मासन्त्रम कराहना गुस्सुकुनाहेंदाल वेल्ले तिप्पल्क कीसि नाकुन हक्कानुर. मूडोव रोजुने नना मर्रा जीवाते तेदंतन,” इत्तोर.
 22 अस्के पत्रु ओन अलग ओसि, “अल्हा वळ्का मन्नि सामि! पेन दीन तपिचगोम. नीकु इल्हा बस्केने आयामन्नि,” इंचि ओन रांगतोर.
 23 गानि येसु पत्रुनहेके तिरियसि हळसि, “अरे देय्यम, नावा मुन्नेटाल पेय्शि होन. निमे मनकालोरा तेल्चिते वळ्कसतिन, पेनदा विचारमते वळ्कसेक हिल्लिन. निमे नावाहाटी उंदि आपत आदिन.” इंचि इत्तोर.

* 16:18 पत्रु इत्ते बंडा इंचि अर्तम. † 16:18 कलिसिया संगम, येसु सामिनपोर्रो विस्वासम कियना लोकुल्कना गुं. ‡ 16:19 तालम कय इने अदिकायम इंचि अर्तम.

24 अस्के येसु ओना सिस्स्युल्कुंक इल्हा वेहतेर. “ओक्कला बोरेन्ना मनकल नावा पज्जो वायना इत्ते, ओर ओना पूरा इस्टाल्क होळसिसि सतता कूस तेहकुंचि नावा पज्जो वायिर.

25 बोर अच्ये ओना जीवातुन पिसागोटालय ह्ळांतोर, ओना जीवा होन्नार. गानि बोर अच्ये नावाहाटी जीवा होनागोटतोर अद ओन्क दोकैता.

26 ओक्कला मनकल पूरा दुनियातुन संपलिच्चि ओना जीवातुन पोगोटकुत्ते ओन्क बता पायदा आंता? हिलाकोटे मनकल ओना जीवाहाटी बदला बतल हियायुर?

27 मनकना रूपमते पुटतोन नना नावा बाबाना महिमातेS दूतनतोनि वांतन, आ वेलाते बोरे मनकल आयिर, ओर कीता कबाहकुना परकारमे ओर्क इनाम हींतन.

28 नना मीकु निजम वेहांतन, इगो नित्तिसि मनानोरा लोप्पोटाल इच्चुर इल्हा मंतुर गदा, मनकना रूपमते पुटतोन नाकुन नावा राज्येमते वायनेके बदवेरदाका अच्ये ह्ळुर, अदवेरदाका ओर्कु हामुर वायो,” इंचि इत्तेर.

17

येसुना रूपम मारियंता

(मरकुस 9:2-13; ल्काल 9:28-36)

1 हांरं रोजकु आतारित्ते येसु पद्दुन, याकोबुन आनि ओना तम्मुर योहानुन पीकुंचि उंदि एत्तु गुट्टापोर्रो होत्तेर.

2 अगा ओरा मुन्ने ओना रूपम मारियंता. ओना मोकम पोळ्दुनलेसी मेसंता, ओना कपडिं वेल्लुनलेसी तेल्लगा आतां.

3 ह्ळाट! म्साळ आनि एलियाल अगा वासि येसुनतोनि वळ्ळानद ओर्कु दिसतुर.

4 अस्के पत्रु येसुन, “मनम इगो मनमळ बेस मंता सामि! नीवा मनसु मत्ते, उंदि नीहाटी, उंदि म्साणाहाटी, उंदि एलियानाहाटी इल्हा म्ळ गुडसैं वाटंतन,” इंचि इत्तेर.

5 पत्रु वळ्ळसेकेन मतेर, अस्केन उंदि तेल्ला मब्बु तेपें ओरापोर्रो नीडा कीता, आ मब्बुनाल उंदि इसंटा अल्किर केंजावाता, “इर नावा पावरमगल्ला मरि आंदुर, इनतोनि नना कूस मंतन, मिमेट इना पोल्लें केंजट.”

6 आ अल्किर केंजतस्के येसुनतोनि मत्ता सिस्स्युल्क वेरियसि बूमिपोर्रो मुसकिर कुच्चि अरतुर.

7 अस्के येसु ओरा दग्गेर वासि ओर्कुन इट्टेसि, “वेरियमत, तेदट” इत्तेर.

8 अस्के ओर तेदसि कळ्ळु विच्चि पोरो ह्ळते, ओर्कु येसुक तप्पा अगा बोरे दिसा हिल्लुर.

9 ओर गुट्टा पोर्टाल हिळ् रेय्नेके येसु सिस्स्युल्कुंक इल्हा आदेस हीतेर गदा, “मनकना रूपमते पुटतोन नना, हामुरताल मर्रां तेदनदाका, गुट्टापोर्रो मिमेट बतल अच्ये ह्ळतिरो अद बोर्के वेहमत,” इत्तेर.

10 अस्के सिस्स्युल्क, “मरि किरिस्तुंकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लक बारि इंतुर?” इंचि पूसकीतुर.

11 अस्के येसु इल्हा जवाब हीतेर, “एलियाल तप्पाकोटा वांतोर, वासि मोदाला बल्हा मत्ता अल्हे अन्निन कीतेर.

12 गानि नना मीकु वेहानद बतल इत्ते, एलियाल वासे मंतोर गानि ओन बोरे एरपाट किया हिल्लुर. अदुनहाटी लोकुल्क ओरा मनसुक वाताप ओनतोनि कीतुर. मनकना रूपमते पुटतोन ननागुडा ओराहेंदाल अल्हेन तकलिष्कु बोगाचना मंता.” इंचि वेहतेर.

13 येसु बापतिस्मा हियना योहानुना बारेमते वेहासेक मंतोर इंचि सिस्स्युल्कुंक अस्के तेळियता.

येसु देय्यम पीता पेडन बेस कीतेर

(मरकुस 9:14-29; ल्काल 9:37-43)

14 येसु आनि ओना सिस्स्युल्क लोकुल्कनगा वातस्के, वरोर मनकल येसुनगा वासि ओना मुन्ने टोंगरां ऊनसि,

15 “सामि! नावा मरिनपोर्रो दया कीम. ओन्क कुंदेल रोगम अरंता. अरतस्के ओर ऊके-ऊके तडमिटे आनि एते अरंतेर, ओन्क इरगा तिप्पल्क आसेक मंता.

16 नना ओन नीवा सिस्स्युल्कनगा तत्तन गानि ओर बेस किया पराहिल्लुर,” इंचि इत्तेर.

17 अस्के येसु ओर्कुन, “अरे विस्वासम तक्को आनि हरिं तप्ता पीळितोरिटा, नना बदवेरदाका मीतोनि मनकन? बदवेरदाका नना मीकुन सहन कीकन? ओन नाहैके तट्ट.” इंचि इत्तेर.

18 ओन तत्तस्के येसु आ पेडन पीता देय्यमतुन गदूदरिच्चि गेटुमतोर. अस्केटद अस्केन आ पेडल बेस आतेर.

19 पजा बोर हिल्वस्के सिस्स्युल्क येसुनगा वासि, “आ देय्यमतुन मोमोट बारि गेदमा परा हिल्लोम?” इंचि पूसकीतुर.

20 अस्के येसु ओर्कु इल्हा वेहतोर. “मीवद पेनदापोर्रो गट्टिगा विस्वासम हिल्ले. नना मीकु निजम वेहांतन, ओक्कला मीलोप्पो आवाल्कुना पेळेतचो विस्वासम मनिनागानि, ‘ई गुट्टातुन इग्गटाल अगा होन’ इंचि मिमेट वेहानयते अद होंदार. अस्के मिमेट अन्नि कबाहक किया परांतिर.

21 गानि इसंटा देय्याल्क सिराप पारतना आनि ओक्कापोद्दूक कीतेने दांतां,” इंचि येसु इत्तोर.*

ओना सतता हामुरता बोरमते वळकांतोर
(मरकुस 9:30-32; लूकाल 9:43-45)

22 ओर गालिलते वासि उंदि जेगाते जमा आतस्के येसु ओर्कुन इल्हा इत्तोर. “मनकना रूपमते पुटतोन नाकुन, लोकलकुना कय्दे दोर्कापीसि हियानद मंता.

23 ओर नाकु हक्कानुर गानि, मडोव रोजुने नाकु मरा जीवा अरार,” इत्तोर. इद केंजसि सिस्युल्कुंक इरगा दुक्कम अनपिस्ता.

24 अगटाल येसु कपर्नाहम नाटेंक वातस्के गुळिना कर वसुलि कियानोर पन्नगना वासि, “मीवा गुरु, गुळिता कर दोहोरा?” इंचि पूसकीतुर.

25 अस्के पत्रु, “आ दोहंतोर!” इंचि इत्तोर. ओर लोता लोपो होत्तोर, होंचि येसुक वेहाक मुन्नेन येसु, “सिमोनु, नीकु बतल अनपिचचेक मंता? ई दुनियाते मनना राजुकु जकात आयि कर आयि बोराहेंदाल एतंतुर, ओरा मर्कुन हेंदाला मरि इंका बोरन्ना वेंतोर हेंदाला?” इंचि पूसकीतुर.

26 अस्के पत्रु, “वेंतोर हेंदाल,” इंचि इत्तरित्तेन येसु ओन, “अय्ते मर्क पिरी मंतुर मरि!

27 अथना ओर्कुन नाराज कियामन्नि इंचि निमे गालम वाटालय होन्नु आनि मुन्ने अरता जिम्मातुन पीसि दाना तोळ्ळुन पर्हा, पर्हातारित्ते उंदि कल्दार दोर्कार. अद ओसि नावा आनि नीवा पोरोलते कर दोहासि हीम.” इंचि इत्तोर.

18

स्वर्ग राज्येमते पेहरोर बोर?

(मरकुस 9:33-37,42-48; लूकाल 9:46-48; 17:1-2)

1 आ वेलाते सिस्युल्क येसुनगा वासि, “स्वर्ग राज्येमते अंटोर्कना पेद्दा बोर?” इंचि पूसकीतुर.

2-3 अस्के येसु वरोर सिन्ना पेडन केप्सि, ओरा नड्डुम निलाहचि इल्हा वेहालय दलगुतोर. “नना निजम वेहांतन, मीवा गुनाल्कुन मार्सकुंचि मिमेट पेडनलेसी आयवा,* स्वर्ग राज्येमते बस्केने होना परिर.

4 दानहाटी बोर अय्ते ओनाद ओरे ई सिन्ना पेडन लेहका सादा-सिपल मनांतोर, ओरे स्वर्ग राज्येमते पेहरोर आंदुर.

5 बोर अय्ते नापोर्रो विस्वासम कियना ई सिन्ना पेडनसंतोन बेस हळांतोर, ओर नाकुन बेस हळतापे.

6 गानि नापोर्रो विस्वासम कियना ई सिन्ना पेडनसंतोन बोरन्ना पापमते अरहते, ओना बॉळगेक जोत्ता बंडा दोहाचि ओन समुदमते लोतु एते ओसि मुळहमळे बेस मंनता.

7 पापमते अरहना पोल्लें ई दुनियाते वेल्लेन मंतां. अवनहेंदाल दुनिया लोक्कुलकुन पापमते अरहता. अदुनहाटी ई दुनियाक बच्चोन गोसा वायार! पापमते अरहना पोल्लें अय्ते वायमळे गावाले, गानि अव बोनाहेंदाल अय्ते वांतांगो ओन्क बच्चोन गोसा वायार!”

8 ओक्कला नीवा कय आयि काल आयि नीकुन पापम किया वेहते दान नर्किसि पोहा. बारित्ते रोंडु कय्क, रोंडु काल्क मंचि बस्केळ्ळक पोत्सेके मनना तडमिता नरकमते होननदानकन्ना, अपंग हिलाकोट्टे कूटाल आसि पिस्वरते होनमळे नीहाटी बेस.

9 अल्हने, ओक्कला नीवा कळु नीकुन पापम किया वेहते दान तेंडसि पोहा. बारित्ते रोंडु कळ्ळक मंचि नरकमता तडमिते होननदानकन्ना गुड्डि आसि पिस्वरते होनमळे नीहाटी बेस मंनता.

10 हळ्ळाट, नावापोर्रो विस्वासम कीता ई सिन्नोरकुन बोने तेंडसि पोहमट्टु. नना वेहनद बतल इत्ते, ओरा पेनदा दूतां स्वर्गमते मनना नावा पेनबावांक बस्केळ्ळक कलियसेके मंनतां.

11 अचोने आयका मनकना रूपमते पुटतोन नना तप्सोत्तोर्कुन पिसागोटलय वातन.†

12 “ओक्कला वरोर मनकानगा नूर गोर्रें मंतां इनकुट्टु. अवुनाल उंदि गोर्रें तप्पिस होनानयते, कळमता टोबै तोम्मिद गोर्रें ओर अग्गेन होळसिसि, तप्सोत्ता आ उंदि गोर्रेंतुन पहकालय होन्नीरा? दांतोर.

13 नना निजम वेहांतन, ओक्कला ओन्क होत्ता गोर्रें दोर्कानयते, आ टोबै तोम्मिद तप्पिस होनवा गोर्रेंकन्ना, तप्सोत्ता आ उंदि गोर्रेंपोर्रो एक्को आनंदम आयानुर.

* 17:21 इद वचनम कोन्नि पांडु लिपिने हिल्ले. * 18:2-3 पेडनलेसी आयवा ओनद-ओर सिन्नागासि तिरियमड, सिन्ना पेडांक कदर मन्ने. † 18:11 इद वचनम कोन्नि पांडु लिपिने हिल्ले.

14 अल्हेने ई सिन्नोरकुनाल वरोर इंका नासडेम आयामान्नि इंचि स्वर्गमते मनना मीवा बाना मनसु मंता.”

तपसोत्तोरुक्क बतल वेहना?

15 ओक्कला तम्मूर आयि दादाल आयि नीवा विरोदमते पापम कियानय्ते, निमे वरोने ओनगा होंचि ओर कीता पापम ओन्क तेळियागोट्टिस वेहा. ओर ओक्कला नीवा पोल्ले केंजानय्ते निमे ओना मनसुन गेल्सताप.‡

16 उंदि वेला ओरगिंटा नीवा पोल्ले केंजुवस्के, वरोर-इव्वुरकुन नीवा पज्जो पीसि होन. बारिल्ले, अगा बतल जर्गतनो अदुन वेहालय ओर गवाइ मनांतुर.

17 ओक्कला ओर ओरा पोल्लेगुडा केंजाकुटे कलिसियातोरुक्क वेहा. कलिसियातोर वेहतदगुडा केंजाकुटे, ओर पेनदा मनकल आयोर इंचि इनकुन. हिलाकोटे कर वसुल कियानसंठोर इनकुन.

18 “नना मीकु निजम वेहांतन, मिमेट बूमिपोरों बदन अय्ते दोहतिरो, अदुन स्वर्गमतेगुडा दोहमळ जर्गता, मिमेट बूमिपोरों बदन अय्ते लेहातिरो, अदुन स्वर्गमतेगुडा लेहामळ जर्गता.‡

19 अचोने आयका नना वेहनद निजम बतल इत्ते, ई बूमिपोरों मीवा लोप्पोटाल बोर्नना इव्वुर उंदि आसि मीकु बतल अय्ते गावालेनो अद तल्कानय्ते स्वर्गमते मनना नावा पेनबाबाल तप्पाकोटा हीतोर.

20 बारिल्ले बगा अय्ते नावा पोरोलते इव्वुर-मुव्वुर उंदगा जमा आंतुरो, अगा ओरा नड्डुम नना मनांतन,” इंचि येसु इत्तोर.

वरोनद वरोर माप कियना

21 अस्के पन्नु येसुणा वासि, “सामि, वरोर तम्मूर आयि दादाल आयि नावा विरोदमते पापम कियानय्ते, नना ओन बच्चुं मल्कां मापि कीकन? एडुं मल्कंगा?” इंचि पूसकीतोर.

22 अस्के येसु ओन्क, “एडुंगे मल्कां आयो, ओर बच्चुं मल्कां तप्पु कियिनागानि ओन निमे माप कीसेक मन्नु,” इंचि वेहतोर.

23 पजा येसु इल्हा वेहालय दलग्तोर, स्वर्ग राज्ये वरोर राजन लेहका मंता. आ राजाल ओन्क बाकि मत्ता जीतागाह्कुना हेंदाल बाकी वसुल कियना इंचि विचारम कीतोर.

24 बस्के अय्ते ओर वसुल कियालय सुस्व कीतोर, अस्के वरोर लक्सेना बाकि मत्ता जीतागान राजानहेके तत्तुर.

25 आ जीतागानगा ओना मालकुना बाकि दोहालय बतले मनाहिल्ले. अस्के ओर ओन्क आदेस हीतोर गदा, “ओर ओना मुत्तो-पिलाल्क, लोन-दारा अचोने आयका ओनगा बतल अय्ते मंतनो अव अन्नि अम्मिसि, वाता कोलतानाल बाकि दोहिरकांटी,” इंचि वेहतोर.

26 अस्के आ जीतागाल राजाना काल्कुनपोरों अरिसि बात्मिलाडतोर, “राजा नाकु कोन्नि रोजकुना मुदत हीम, मेल्लगा-मेल्लगा नावा बाकि पुरागा दोहंतन,” इंचि इत्तोर.

27 अस्के आ मालकुं ओना जीतागानपोरों दया वासि ओना बाकि अंता पुरागा माप कीसि होळसीतोर.

28 पजा आ जीतागाल अगटाल पेय्सि होननेके ओन्क नूर रूपे बाकि मत्ता ओना दंटाता जीतागाल हरदे कलियतोर. अस्के ई मुन्नेटा जीतागाल आ जीतागाना बौळ्ये पीसि, “नाकु हियना कोलतां बस्के हीतिन? नाकु इंदकेटद इंदकेन हीम,” इंचि ओन इत्तोर.

29 पजा आ जीतागाल मुन्नेटा ओना दंटाता जीतागाना काल्कुना पोरो अरिसि विनंति कीसि, “निमे कोन्नि रोजकु ओप्के पीम, नना नीवा बाकी नीकु हीतन,” इंचि इत्तोर.

30 अयना ओर बतले केंजाकोटा, ओर बाकि दोहनाल ओन जेलने वाटसीतोर.

31 अस्के अगा जर्गतद ओना दंटाता जीतागाह्क इळतुर ओरुक्कु वेल्ले दुक्कम आता. ओरा मालकुनगा होंचि जर्गतव अंता वेहतुर.

32 अस्के मालक ओन केय्सि इत्तोर, “अरे तेळ्वि तक्को जीतागा, नीकु इच्चोरगुडा दया वाया हिल्लेना? निमे नावा काल्क पीसि विनंति कीतिन अय्ते नना नीवा पूरा बाकितुन माप कीतन.

33 नना बल्हा नीवा पोरो दया कीतनो अल्हेने निमे नीवा दंटाता जीतागाना पोरो दया कियना मत्तिन.”

34 इंचि मालक ओनपोरों होंग आसि ओन जेलने वाटसीतोर. ओना बाकि नेम्मनजेप ओन जेलनाल होळसा हिल्लोर.

35 इल्हेने मिमेटगुडा मीवा तम्मून आयि दादान आयि मनसुनाल मापि कियाकोटे ई राजाल बल्हा कीतोर अल्हेने नावा स्वर्गमते मनना बाबालगुडा मीकुन मापि कियोर.

‡ 18:15 इद वचनमते मनना पोल्ले सिराप विस्वासम कीतोराराहाटी रासतद अंद. ओरुंन माप कीता, मिमेट बोर्कुनना माप कियाकोटे पेनगुडा ओरुंन माप किय्यो.

§ 18:18 इद वचनता अर्तम बतल इत्ते, मिमेट बोर्कुनना माप कीते पेन

19

सोडसिट्टिता बारेमते येसु कराहता पोल्लें
(मरकुस 10:1-12)

1 इव अन्नि पोल्लें वेहामळ आतारित्ते येसु गालिल एरियाताल पेय्मि योर्दन बरेडता हब्बेर ओड्डुंक मनना यहूदिया एरियाते होतोर.

2 अस्के वेल्लेन मंदि ओना पज्जो होत्तुर. येसु ओर्कुन बिमारकुनाल बेस कीतोर.

3 अगा इच्चुर परिसिल्कगुडा वातुर. येसुना पट्ट हळना इंचि, “मूसाना नियम परकारम, बद कारनमताहाटी अयना मुत्तोन होळसिय्या वच्चा?” इंचि येसुन पूसकीतुर.

4 येसु इल्हा जवाब हीतोर, “बस्के अयते पेन मनकन कीतानो, अस्केन ओर्कुन मांडसा मुरतळ इल्हा इंचि कीता. इदु मिमेट हदवा हिल्लिरा? ☆

5 दीनाहाटी मांडसा यावन-बाबान होळसिसि, ओना मुत्तोन पीसि मनांतोर. ओर इच्चुर उंदे मेंदुल आसि मनांतुर.

6 अदुनहाटी ओर इच्चुर उंदे मेंदुल आसि मनांतुर. इल्हा पेने ओर्कुन कल्पताहाटी, मनकल वैरे कियानायो, ” इंचि इत्तोर.

7 इदु केंजसि, “अल्हा अयते मरि, मनकल ओना मुत्तोक सोडसिट्टि हीसि होळसिय्या आदेस मूसाल बारिक हीतोर?”

इंचि परिसिल्क मर्रा पूसकीतुर.

8 अस्के येसु ओर्कुन इल्हा इत्तोर. “मीवा मनसु बंडालेसी मत्ताहाटी मूसाल मुत्तोहकुन होळसिय्या वच्चु इत्तोर, गानि मुन्नेटाल इसोटा रिवाज मनाहिल्ले.

9 नना मीकु वेहासेक गदा, बोरन्ना ओना मुत्तोन बोगमतनमता कारनम तप्पा वैरे कारनमते होळसिसि इंकुंदानतोनि मरमि आयानयते, ओर बोगमतनम कीतोर.” इल्हा इत्तोर.

10 इदु केंजसि ओना सिस्युल्क ओन, “अयते मुत्तो मुय्दोन नड्डुम इंसटा लेक्का मत्ते मरमि आयाकोटोन सूटि,” इंचि इत्तुर.

11 येसु ओर्कु इल्हा समजास्तोर, “मिमेट इत्ता पोल्लेतुन ओप्कुनमळ अंतोर्क कुदुरो, गानि बोनकु अयते ई पोल्लेन पीसि ताकना ताकत पेन हीतनो ओरे ओप्कुना परांतोर.

12 बारित्ते बोरो-बोरो तल्लुक्का पीटाले आडिगुंलोर्क आसि पुटतोर मंतुर, मनकालोरा कयदालगुडा आडिगुंलोर्क आतुर मंतुर, आनि स्वर्ग राज्येमता हेंका इच्चुर मंदि मरमि आयाकोटा मंतुर. इंचि बोर्क अयते ई पोल्लें नचचंतंगो ओर इदुन ओपकुनिरकांटी.”

येसु पिलालकुंक आसिर्वाद हीतोर.

(मरकुस 10:13-16; लुकाल 18:15-17)

13 पजा इच्चुर लोकुल्क ओरा पिलालकुनपोर्री येसु कय इर्सि पारतना कियाना इंचि ओनगा पीसि वातुर, गानि सिस्युल्क ओर्कुन रांगतुर.

14 गानि येसु, “पिलालकुन नाहेके वायाहीम्ट, ओर्कुन आपमट. स्वर्ग राज्येम इंसटोरदे आंद,” इंचि इत्तोर.

15 पजा येसु पिलालकुनपोर्री कय इर्सि अगटाल पेय्मि होत्तोर.

दनवंतुड येसुन पूसकीतोर

(मरकुस 10:17-31; लुकाल 18:18-30)

16 वरोर मनकल येसुनगा वासि, “गुरु, बस्केळ्ळक पिस्सना पिस्वर गावाले मत्ते नना बव बेसता कबाहक कीते सरे?” इंचि पूसकीतोर.

17 अस्के येसु ओन इल्हा इत्तोर, “बेस इत्ते बतल, नाकुन बारि पूसकीतिन? बेसतद अयते सिराप पेन उंदे आंद. ओक्कला नीकु बस्केळ्ळक पिस्सना पिस्वर गावाले अनपिस्ते पेनदा आदेसकुना परकारम ताका,” इत्तोर.

18 “बव आदेसकु?” इंचि आ मनकल इत्तस्के, “बोने हक्कमा, बोगमतनम कियमा, दोंगातनम कियमा, आबद्दम गवाड हियमा,

19 नीवा तल्लुर-बाबाना कदर कीम. नीवद निमे बच्चोन पावरम कीतिनो, अचोने पावरम इंकावरोनगुडा कीम.” इंचि येसु वेहतोर.

20 अस्के, “नना अयते इव अन्नि कीसेकेन वातन, इंका नावा लोप्पो बतल तक्को मंता?” इंचि आ लेय्योड येसुन इत्तोर.

21 अस्के येसु इत्तोर. “ओक्कला नीकु सत्तेमते पुरागा आयानद मत्ते, होन, निहगा बतल अयते मंता अदुन पूरा अम्मिसि, गरिबोर्कुंक तृसि हीम. अस्के नीकु स्वर्गमते दनम दोर्कार. पजा नहगा वासि ना पज्जो ताका,” इत्तोर.

22 गानि ओनगा सोम्मु वेल्लेन मत्ताहाटी ई पोल्ले केंजसि लेय्योड सिम्मरा आसि पेय्मि होत्तोर.

- 23 अस्के येसु ओना सिस्स्युलुकुन इल्हा इत्तोर. “नना मीकु निजम वेहांतन, स्वर्ग राज्येमते सिरमंत मनकल होळियमळ इत्ते वेल्लेन कस्टम.
- 24 नना मर्रा वेहांतन, पेनदा राज्येमते सिरमंत मनकल होळियमळकनना लोटापेटा सूदि बोंगाताल होनमळ अल्कगा मंता,” इत्तोर.
- 25 इद केंजसि सिस्स्युलुकुंक वेल्लेन इचंन्रम आता. अदुनहाटी, “अय्ते मरि मुक्ति बोर्क दोर्का परंता?” इंचि पूसकीत्तुर.
- 26 अस्के येसु सिस्स्युलुकुनहेके ह्ळसि, “मनकालोरतोनि अय्ते इद आयापर्रा, गानि पेन मात्रम अन्नि किया परंता.” इंचि इत्तोर.
- 27 अस्के पत्रु येसुन इल्हा इत्तोर. “ह्ळ्हा, मोमोट अय्ते मत्तद-हिलवद अन्नि होळसिसि नीवा पज्जो वातोम. अय्ते माकु बतल दोर्कार?” इत्तोर.
- 28 “नना मीकु निजम वेहांतन, पूना दुनियाते, मनकना रूपमते पुटतोन नना नावा महिमाता राजगदूदेपोर्रा उदुदंतन, अस्के नावा पज्जो मनानोर मिमेटगुडा पन्नेड राजगदूदेन पोर्रा उदिदिसि, इन्नाएलना पन्नेड गोत्रालुकुनोरा न्यायम कीकिर.
- 29 अचोने आयका नावाहाटी बोर अय्ते लोन-दारातुन, दादल-तम्मूह्कुन, अक्कल-हेलाह्कुन, तल्लुर-बाबोन, पिलालुकुन, इंका बूमि-जेगान होळसीतुरो ओर्कु आ होळसीतुंक्नना नूर अंताल्क एक्को दोर्कार. इंका ओर बस्केळ्ळ पिस्सना पिस्वरता वारसदार आयानुर.
- 30 गानि मुन्ने मत्तोर वेल्लेटुर पज्जो आयानुर. पज्जोटोर मुन्ने आयानुर,” इंचि येसु ओन इत्तोर.

20

वरोर नेदा मालकुना वेसुड

- 1 येसु मर्रा इल्हा इत्तोर. नना मीकु स्वर्ग राज्येम बोरेमते उंदि वेसुड वेहंतन केंजट. वरोर मालक मत्तोर. ओर हक्केरेने तेदसि, ओना अंगुर बगिचाते कबळ कियालय बूतिनोराहाटी पलाते होत्तोर.
- 2 मनकंकटिकि उंदि रोजुना बूति हीतन इंचि करार कीसि, ओर्कुन अंगुर बगिचाते कबळ्ळ लोहोत्तोर.
- 3 जावोळ्द पोळ्द आतस्के आ नेदा मालक हाटुमते होंचि ह्ळत्तोर, अस्के रिक्म मनानोर इच्चुर मदि ओन्क दिसतुर.
- 4 मिमेटगुडा नावा अंगुर बगिचाते कबळ कियालय होंट. मीवा कबळलायक बूति मीकु हीतन, इंचि मालक ओर्क वेहोत्तोर. अल्हा इत्तारित्ते ओरगुडा बगिचाते कबळ कियालय होत्तुर.
- 5 आ मालक पियाटील आनि पोट्टेकु मर्रा हाटुमते होत्तोर. रोंडु मल्कां इंका बूतिनोर्कुन तच्चि बगिचाते कबळ कियालय वेहोत्तोर.
- 6 पोळ्द अर्रांलय गंटांमेड मत्तस्के आ मालक मर्रा उंदि मल्का हाटुमते होत्तोर, अस्के इंका इच्चुर मदि रिक्म मत्तोर्कुन ह्ळत्तोर. “मिमेट इगे पोळ्दमेड वट्टिदे बरि नित्तिसि मंतिर?” इंचि मालक ओर्कुन पूसकीत्तुर.
- 7 अस्के, “माकुन बोरे बूतिक केया हिल्लुर, दानहेके मोमोट नित्तिसि मंतांम दादा!” इंचि ओर इत्तुर. अस्के, “अल्हा अय्ते मिमेट इंका नावा अंगुर बगिचाते कबळ कियालय होंट,” इंचि आ मालक ओर्कुन वेहोत्तोर. अस्के ओर होत्तुर.
- 8 “पोळ्दु होत्तारित्ते अंटर बूतिनोर्कुन केप्सि, अंटोर्क बूति हीम, आकिर वातोर्कुंक मुन्ने हीम, मुन्ने वातोर्कुंक आकिर हीम,” इंचि मालक ओना जीतागानकु वेहोत्तोर.
- 9 पोळ्दु अर्रांलय गंटांमेड मत्तस्के बूतिक वातोर्, बूति एतालय होत्तुर, अस्के ओर्कु पोळ्दमेटा बूति दोर्कुता.
- 10 अदुन ह्ळसि “माकु वेल्लेन कोतां दोर्कनुं बारे,” इंचि हक्केरे वाता बूतिनोर इनकुत्तुर. गानि ओर्कु इंका अचोने बूति दोर्कुता.
- 11-12 आ बूति एततस्के ओर मालकुन इत्तुर, “ईर पज्जो वासि उंदि गंटा कबळ कीत्तुर, मोमोट अय्ते ईरकनना एक्को कस्टमते, एरना एदिदते कबळ कीतोम. गानि निमे माकु ओरा अचोने बूति हीतिन, इद माकु नच्चा हिल्ले,” इंचि गुल्गतुर.
- 13 “नना मीकु बतल अन्त्यायम किया हिल्लेन, नना मीकु उंदि रोजुना बूति हीतन इंचि इत्तस्के निमे ओष्कुतिन गदा?
- 14 अदुनहाटी निमे गुल्गाकोटा नीवा बूति पीसि होन. मीकु नना बचचोन बूति हीतन, अचोने बूति ईर आकिरते वातोर्क इंका हियना नावा मनसु मंता.
- 15 नना नावा कोत्तन नावा मनसु मताप कर्स कियना हक्कु नाकु हिल्लेना? नना बेस मनकन मत्ताहाटी निमे नापोर्रा बरि अळसंतिन?” इंचि ओरा अळ्टेडाल वरोन मनकन मालक इत्तोर.
- 16 इल्हा बोर अय्ते पज्जो मंतुर, ओर मुन्ने आयानुर, मुन्ने मत्तोर पज्जो आयानुर, इंचि वेहिच, येसु वेसुडि वेहमळ आपतोर्.
- येसु ओना हायना हामूरतुन मर्रा वेहांतोर्
(मरकुस 10:32-34; लूकाल 18:31-34)
- 17 येसु येस्सलेम होननेके, पन्नेडु सिस्स्युलुकुन उंदि बाजुंक ओसि,

18 “हृळाट, मनम येस्सलेम होंचंतोम, अगा होल्ता पजा मनकना रूपमते पुटतोन नाकुन पेद्दा पेर्मांलोकुंना आनि दर्मसास्त्रम काराहना गुस्कुना कय्दे पीसि हियायुर. ओर नाकु हामुर सिक्साता आदेस हियायुर.

19 पजा यहदि आयबोरा कय्दे अप्पजेपनुर, ओर नाकुन सिडांच्चुर, नापोर्रो उस्कायुर, पोट्टेटे तन्नायुर, पजा नाकुन कूसुनपोर्रो मोल्लां कोहकानुर. गानि मूडोव रोजुने नना मर्रा जीवाते तेदंतन,”* इंचि इत्तोर.

उंदि यावल येसुन विनति कीता
(मरकुस 10:35-45)

20 अचचोटेन जब्दिना मुल्लो दाना मर्क याकोब आनि योहानुन पीसि, येसुनगा वासि ओना काल्कुनपोर्रो अर्सि उंदि विनंति कीता.

21 “नीकु बतल गावाले?” इंचि येसु दान पूसकीतस्के, “निमे नीवा राज्यमते नावा इक्वुर मर्कुन, नीवा तिना बाजूंक वरोन, डेमा बाजूंक वरोन उद्ददाना आदेस हीम” इंचि अद इत्ता.

22 ज्वाबुने, “मिमेट बतल पूसकीसतिरो, अद मीक तेळियसेक हिल्ले. नना बव कस्टाल्क अय्ते बोगांचना मंता, अबुन मिमेट बोगांचा परकिटा?” इंचि येसु इत्तस्के, “हो, मोमोट तयार मंतोम,” इंचि ओर इत्तुर.

23 पजा येसु ओर्कुन इल्हा इत्तोर, “नना कस्टाल्क बोगांचताप मिमेट बोगांचा परकिट, निजमे! गानि राज्यम कियनेके, नावा तिना बाजूंक आनि नावा डेमा बाजूंक उपिचचना अदिकार नाक हिल्ले. अव जेगां बोराहाटी ना बाबाल तयार कीतोर, ओर अगा उद्दंतुर,” इत्तोर.

24 आ दादाल-तम्मुना पोल्लें केंजसि, अगा मत्ता कळमता पदि मंदि सिस्त्युल्क ओरापोर्रो होंग आतुर.

25 अस्के येसु सिस्त्युल्कन ओना दग्गेरा केय्सि, “यहदि आयबोरा राजालोर ओरा जीतागाहकुन, ओरा कय्दा हिळ्ळ इरालय हळंतुर, अल्हेने ई दुनियाता पेद्दा मनकालोरगुडा सिन्ना मनकालोरपोर्रो अदिकारम ताकसालय हळंतुर, इद मीकु एर्के.

26 गानि मिमेट मात्रम ओरालेसी कियानायो. मी लोपोटाल बोर अय्ते पेद्दा आयालय हळांतोर, ओर मीवा सेवा कियानोर आयापीता.

27 इंका मी लोपोटाल बोर अय्ते लीडर आंतन इतोर, ओर मीवा दासुड आयापीता.

28 बारित्ते मनकना रूपमते पुटतोन नना, सेवा कियोगोटकुनालय वाया हिल्लेन गानि वेरेतोर सेवा कियालय आनि वेल्लेटोर्कुन पापमताल पेचाहलय, ओराहाटी नावा जीवा हियालय वातन,” इत्तोर.

येसु इक्वुर गुड्डोर्कुन बेस कीतोर
(मरकुस 10:46-52; लूकाल 18:35-43)

29 येसु आनि ओना सिस्त्युल्क यरिहो सहरताल पेय्सि होननेके, ओना पज्जो लोकुकुना पेद्दा मंदा वाता.

30 अस्के हर्दा पक्काते इक्वुर गुड्डोर्क उद्दिदिसि मत्तुर. मावा मुन्नेटाल येसु होंचंतोर, इंचि ओर्कु एरपाट आतस्के ओर येसुन, “ए सामि, दाविद राजाना वंसमतोना! निमे मापोर्रो दया कीम,” इंचि वरगेयतुर.

31 अस्के, “चुपचाप मंटु” इंचि लोकुकुल्क आ गुड्डोर्कुन रांगतुर. गानि आ गुड्डोर्क मात्रम, लगांचि, “ए सामि, दाविद राजाना वंसमतोना, मापोर्रो दया कीम,” इंचि मोल्कुनालय दल्गुतुर.

32 अस्के येसु आगसि, ओर्कुन केय्सि इल्हा इत्तोर. “नना मीहाटी बतल कियना इंचि मीवा मनसु मंता?” इत्तोर.

33 अस्के ओर, “माकु दिस्सानाल मावा कळ्ळुन बेस कीम सामि!” इंचि येसुन इत्तुर.

34 येसुंक ओरापोर्रो दया वासि ओरा कळ्ळुन इत्तोर. इत्ता इट्टुडे ओरा कळ्ळुन बेस आसि, दिसालय दल्गतां. अस्के ओरगुडा येसुना पज्जो होत्तुर.

21

येसु येस्सलेमते होळियतोर
(मरकुस 11:1-11; लूकाल 19:28-38; योहान 12:12-19)

1 ओर अंतोर येस्सलेम सहता दग्गेरा जय्तुन मराकुना गुट्टापोर्रो मनना बैतपागे इनना नाटेना दग्गेरा एव्त्तुर. पजा येसु इक्वुर सिस्त्युल्कन केय्सि,

2 ओर्क इल्हा वेह्चि नाटे लोहतोर. “मी मुन्ने दिस्सना नाटे होंट, अगा एत्ता एव्वुडे मीकु उंदि दोहाचि मत्ता गाडदि आनि दाना पोर्दि दिसंता. अबुन लेहकुचि नहगा पीसि वटु.

3 ओक्कला अबुन पीसि वायनेके बोर्नना मीकुन बतलन्ना इत्ते, ‘सामिक इवुना अक्सरम मंता,’ इंचि वेहट. अस्के ओर अबुन बिराना ओम्टु इंचि इतोर.”

* 20:19 मर्रा जीवाते तेदंतन हासि अदे मेंदुलते मर्रा जीवा अरमळ.

- 4 एनकटा पेनदा कबुरतोर वेहता पोल्ले निजम आयगोम इंचि इल्हा जर्गता. अद पोल्ले इल्हा मंता:
- 5 “सियोनुना मिथ्यळ्क* वेहत गदा, हुळाट, मीवा राजाल मीहेके वासंतोर,
ओर सांत बुद्धिदतोनि, बर्बु कांजना गाडदि पोरिनपोर्रो उद्दिस वासंतोर.”*
- 6 अस्के सिस्वुल्क होंचि येसु वेहताप कीतुर.
- 7 सिस्वुल्क गाडदि आनि गाडदि पोरिन येसुनगा पीसि वातुर. पजा अबुनपोर्रो ओरॉ कपडिं तारतुर. तारतारित्ते येसु आ गाडदि पोरिनपोर्रो उद्दुतोर.
- 8 आ गदिते वेल्ले लोकुल्क येसुनहाटीं ओर केर्ता कपडिं तेंडसि हर्दे तारतुर. इंकिच्चुर अय्ते मराकुना कोम्मां नर्किसि हर्दे तारतुर.
- 9 अचोने आयका,
“दाविद राजाना मर्रिक होसन्ना!† पेनबाबाना अदिकार पीसि वायानोंक,
आसिर्वाद्द दोर्किर्कांटी! स्वर्गमता पेनबाबाना स्तुति आयिकांटी.”*
इल्हा वरगेयसेके येसुना पज्जो-मुन्ने लोकुल्कुना मंदा ताकसेक होंनुदुर.
- 10 येसु येस्सलेम सहरते होळियतोर, अस्के पूरा सहरअंता उंदे रोद्दा आता. “ईर बोर आंदुर?” इंचि अंतोर पूसकियुंदुर.
- 11 अस्के, “ईर गालिल एरियाता नासरेत नाटेना पेनदा कबुरतोर येसु आंदुर,” इंचि लोकुल्क वेहंदुर.

येसु गुळिते दांतोर

(मरकुस 11:15-19; लुकाल 19:45-48; योहान 2:13-22)

- 12 पजा येसु अगाटा गुळिते होंचि, अगा अम्मनोर्कुन, अस्सानोर्कुन अंतोर्कुन पेच्हाचि गेदुमतोर. अचोने आयका अगा मत्ता कोलांत अदला-बदला कियानोरा बल्लन पावरेल्क अम्मनोरा कुर्सिन मिडुहाचि वाटतोर.
- 13 पजा येसु ओर्कुन इल्हा इत्तोर. “नावा लोतुन, पारतना कियाना लोन इत्तुर, इंचि दर्मसास्त्रमते रासि मंता, गानि मिमेट दीन दोंगाल्क मक्कना जेगा कीर्तिर,” इत्तोर.
- 14 गुळिते येसुना गुड्डोर्क, कुंटोर्क वातुर, ओर्कुन अंतोर्कुन येसु बेस कीतोर.
- 15 गुळितगा येसु कीता पेद्दा-पेद्दा इंचंत्रमता कबाहक हळसि “दाविद राजाना मर्रिक होसन्ना” इंचि पिलाल्कुना मोल्कुन्नाडतुन केंजसि अगा मत्ता पेद्दा पेर्मांलोर दर्मसास्त्रम कराहना गुस्ल्क इरगा होंगुंक् वातुर.
- 16 अस्के ओर येसुन, “पिलाल्क नीकुन बतल इंचंतुर, अद निमे केंजतिना?” इंचि पूसकीतुर. अस्के येसु, “हो, केंजसंतन. ए पेनबाबा, निमे सिन्ना पिलाल्कुंक् आनि पाल उनना पिलाल्कुंक् स्तुति कियमळ कराहतिन,* इंचि दर्मसास्त्रमते रासि मंता. अद मिमेट बस्केने हदवा हिल्लिरा?” इंचि ओर्कुन इत्तोर.
- 17 पजा येसु ओर्कुन अग्गेन होळसि, सहरता पलाते बेतानि सहर होंचि, अद नर्का अग्गेन मत्तोर.

कायां हादवा अंजिर मराकु येसु सापनेम हीतोर

(मरकुस 11:12-14; 11:20-24)

- 18 हक्केरे येसु वापस सहरताहेके होननेके ओन्क कर्वेस्ता.
- 19 अस्के हर्दा पक्काते उंदि अंजिर मरातुन हळसि आ मरातगा होत्तोर. गानि आ मराकु आकि तप्या बतांगे मनाहिल्ले. अस्के, “इंका नीकु बस्केने कायां हादा मन्नि,” इंचि येसु आ मरातुन इत्तोर. अल्हा इत्ता इन्मळे आ मरा वातिसि होत्ता.
- 20 अल्हा आतद हळसि सिस्वुल्कुंक् इंचंत्रम आता. अस्के ओर, “अंजिर मरा इच्चोर बिराना बल्हा वातिसि होत्ता?” इंचि येसुन इत्तुर.
- 21 अस्के येसु ओर्कु इल्हा जवाब हीतोर. “नना मीकु निजम वेहांतन, ओक्कला मीकु बतले अनमानम हिलाकोटा पेनदापोर्रो विस्वासम मनानय्ते, नना बल्हा अंजिर मरातुन कीतनो अल्हा मिमेटगुडा किया परांतिर. अचोने आयो इद गुट्टातुन, ‘इंगेटाल तेदसि समुद्रमते होंचि अर्रा,’ इंचि इनानय्ते, अद होंचि समुद्रमते अर्रीता.
- 22 मिमेट विस्वासमतोनि पारतनाते बतल तल्किना अद मीकु दोर्कार,” इत्तोर.

पेद्दाल्क येसुना अदिकार तल्कतुर

(मरकुस 11:27-33; लुकाल 20:1-8)

* 21:5 सियोनुना मिथ्यळ्क इत्ते येस्सलेम सहरता रहिवासि. बारित्ते येस्सलेम सहर सियोन इन्ना गुट्टापोर्रो मंदा अतुनहाटीं येस्सलेम सहरता लोकुल्कुन सियोनुना मिथ्यड (रहिवासि) इंतुर. * 21:5 जकगीह 9:9 † 21:9 होसन्ना इद पोल्ले पेनदा स्तुति कियनाहाटीं यह्दि लोकुल्क वापर कीतुर. * 21:9 बजन संहिता 118:25-26 * 21:16 बजन संहिता 8:2

23 पजा येसु गुळिते होळियसि पेनदा पोल्ले कराहसेके मननेके, अगा पेद्दा पेर्मांलो ओर आनि यहूदिलकुना पेद्दाल्क ओनगा वातुर. वासि, “निमे ई कबाहक बद्द अदिकारमते कीसंतिन? नीकु ई अदिकारम बोर हीतोर?” इंचि पूसकीतुर.

24 अस्के येसु ओर्क इल्हा जवाब हीतोर. “ननागुडा मीकुन उंदि सवाल पूसकीतन, मिमेट जवाब हियानय्ते, नना बद्द अदिकारमते इव कबाहक कीसंतन इत्तद्द वेहंतन.

25 अय्ते वेहट, योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.

अस्के ओर ओर इल्हा वळ्ळुकुनालय दल्गतुर. “ओक्कला स्वर्गमताल दोर्कता इंचि मनम इनानय्ते, ‘योहानुन बारि विस्वासम किय्यिर?’ इंचि इनानुर.

26 ओक्कला मनकालोराहेंदाल दोर्कता इनानय्ते, लोकुलकुना वेंरे! बारिल्ते योहान पेनदा कबुरतोर आंदुर इंचि लोकुलक नम्मंतुर.”

27 अदुनहाटी ओर, “माक एर्का हिल्ले,” इंचि इत्तुर.

अस्के, “अल्हा अय्ते, इव कबाहक बद्द अदिकारमते कीसंतनो, ननागुडा मीकु वेहोन,” इंचि येसु इत्तोर.

इव्वुर मर्कुना वेसुडि

28 केंजट, नना उंदि सिन्ना वेसुड वेहंतन, दान केंजसि मिमेट बतल इनकुंतोर वेहट. वरोर मनकंक इव्वुर मर्क मत्तुर. उंदि मल्का आ मनकल ओना पेद्दा मरिनगा होंचि, “कोको, निमे इय्याला अंगुर बगिचाते होंचि कबळ कीम,” इंचि वेहतोर.

29 अस्के आ पेद्दा मरि “नना होनोन” इत्तोर गानि पज्जो ओर विचारम कीसि बगिचाते होत्तोर.

30 पजा आ मनकल ओना इकावरोर मरिनगा होंचि, “कोको, इय्याला निमे अंगुर बगिचाते होंचि कबळ कीम” इंचि वेहतोर. अस्के आ मरि, “सरे दांतन बाबा!” इत्तोर, गानि ओर होनन हिल्लोर.

31 अय्ते आ इव्वुर मर्कनाल बा मरि बाबोना पोल्ले केंजताप? इंचि येसु ओर्कुन पूसकीतोर. अस्के ओर, “पेद्दा मरि केंजतोर,” इंचि इत्तुर.

“नना निजम वेहंतन, बोगामोताहक आनि कर वसुल कियानोर मीकन्ना मुन्ने पेनदा राज्यमते दांतुर.

32 योहान मीकु सत्तेमता हरि हुप्सालय वातोर, ओन मिमेट नम्मा हिल्लिर. गानि बोगामोताहक, कर वसुल कियानोर बारे ओन नमत्तुर, इद मीकु एर्के. अय्नागानि मीवा मनसु बदलांचि योहानुन नम्मालय मिमेट तयार आया हिल्लिर,” इंचि येसु इत्तोर.

बटाइतोना वेसुडि

(मर्कुस 12:1-12; लूकाल 20:9-19)

33 पजा येसु इल्हा इत्तोर. केंजट, इंकुंदि वेसुडि वेहांतन, वरोर मनकल मत्तोर. ओर उंदि अंगुर तोटा कीतोर. आ तोटा सुट्टु गुरे दोहाचि तोटाता लोपेन अंगुर पंडिना पानकम तेंडालय उंदि पोक्का तव्बि गानगु तयार कीतोर. दाना दग्गैरेने कावेलहाटी उंदि मंडा वाटतोर. पजा तोटातुन वेंरेतोर्क बटाइक हीसि, वेंरे देसेम होत्तोर.

34 अंगुर पंडि कोय्याना वेला वाता, अस्के पालुनाहाटी ओना दासुल्लुकुन बटाइतोरहेके लोहतोर.

35 अस्के बटाइतोर दासुल्लुकुन दोर्कापीसि, वरोन तंतुर, वरोन हव्वुत्तुर, वरोनपोर्गे बारे बंडा हुक्त्तुर.

36 इद केंजसि बगिचाता मालक इका एक्को दासुल्लुकुन लोहतोर. ओरतोनिगुडा बटाइतोर मोदाला कीतापे कीतुर.

37 आकिरते, “नावा मरिन बेस कदर कियानुर,” इनकुंचि ओना मरिन ओरहेके लोहतोर.

38 गानि बटाइतोर, ओना मरि वायानद हळसि, “ईर अय्ते वारसदार आंदुर, दट ओन हव्विसि, ओना जायदाद मनम एतकुनकोम,” इंचि ओर ओर इनकुत्तुर.

39 पजा ओन दोर्कापीसि तोटाता पलाते ओसि हव्वुत्तुर.

40 अय्ते आ तोटाता मालक वायानय्ते, आ बटाइतोर्कुन बतल कियानुर?

41 ओर येसुन इत्तुर, “असोंटा दुस्टुल्लुकुन तंचि-तंचि हव्वकानुर आनि बोर अय्ते पंटा पेय्स्तस्के ओन्क वेलापोर्गे तूस हीतोर, ओन्क बटाइक हिय्यानुर,” इत्तुर.

42 पजा येसु ओर्कुन इल्हा इत्तोर. “मिमेट दर्मसास्त्रमते बस्केन हदवा हिल्लिरा? बद्द बंडातुन अय्ते मिस्त्रिक कबळक ओज्जो इंचि हय्सा हिल्लुर, अदे बंडा सेंकु मूलाता पुनादि बंडा आता. इद सामि कीता कबळ आंद, इद मना नदरते इचंनमाता कबळ आंद,” इत्तोर.*

43 “मिमेट निजम इत्तिर. केंजट, दाना अर्तम इल्हा मंता. पेन मीकु हियना स्वर्ग राज्यमतुन तेंडसि, मीवा जेगाते दाना पोल्लेपोर्गे तिरियना वेंरे जाति लोकुलकुंक हीता.

* 21:42 पुनादि बंडा लोन दोहकामुन्ने लोन गट्टिगा मननाहाटी लोतुक बंडातोनि पुनादि दोहांतुर. इो पुनादि बंडा येसु आंदुर.

* 21:42 बजन संहिता

- 44 बोर अय्ते इद बंडापोरोँ अरितुर, ओर तुकडां-तुकडां आयनुर, गानि अद बंडा बोरपोरोँ अय्ते अरता, ओर पिच्चि-पिच्चि आयानुर," इंचि इत्तोर.
- 45 पेद्दा पेर्मालोर्क आनि परिसिल्क येसु वेहता वेसुडि केंजसि, येसु ओरा बारेमतेन वळकसंतोर इंचि एपाट कीतुर.
- 46 पजा ओर येसुन दोर्का पियालय हळतुर, गानि लोकुल्लुकुन हळसि वेरियतुर. बारित्ते लोकुल्लुक येसुन पेनदा कबुरतोर आंदुर इंचि नमतुर.

22

मरमिना बोजनम वेसुड
(लूकाल 14:15-24)

- 1 येसु मसंदि मल्का, लोकुल्लुकुंक वेसुडि वेहासेक इल्हा वळकालय दलग्गोर.
- 2 स्वर्ग राज्येम वरोर राजानलेसीं मंता. ओर ओना मरिना मरमिंक उंदि कुळपु इरतोर.
- 3 आ कुळपुंकु बोर्कुन अय्ते केय्सि मत्तोर, ओर्कुन केय्सि तयालय, ओना दासुल्लुकुन लोहतोर. गानि ओर वायोम इंचि इत्तुर.
- 4 वायोम इंचि इत्तारित्ते, मर्रा इच्चुर दासुल्लुकुन राजाल इल्हा वेहट इंचि लोहतोर, "हळाट, मीहाटी नना कुळपु इरतन, बल्सता कुराँ आनि कौदा कोयतन, कुसिरगुडा वेसि तयार मंता. अदुनहाटी मिमेट गाटो तिनालय ताकट इंचि इंट," इत्तोर.
- 5-6 राजाल वेहिनागानि, राजाना पोल्लेता कदर क्रियाकोटा, इच्चुर ओरा पोलाल्लुकुनहेके होत्तुर, इच्चुर बारे ओरा कबळ दंदानहेके होत्तुर. इच्चुर बारे राजाना दासुल्लुकुन पीसि तंचि हळ्किसि पोहतुर.
- 7 अस्के राजांक इरगा होंग वाता. पजा राजाल ओना सिपाइल्लुकुन लोहचि, ओना दासुल्लुकुन हळ्कोर्कु हळ्किसि ओरा सहरकु तडमि दोस्सा वेहतोर.
- 8 पजा राजाल ओना दासुल्लुकुंक इल्हा वेहतोर. "मरमिना कुळपु तयार मंता. गानि केयता मनकालोर बेसटुर आयुर.
- 9 अदुनहाटी मिमेट हर्कुन पीसि, गल्लीं, बजारकुन पीसि होंचि दोर्कुंतोर अंटोर्कुन गाटो तिनालय केय्सि तटु," इंचि इत्तोर.
- 10 अस्के दासुल्लुक, हर्कु, गल्लीं पीसि होंचि बेसतोर, सेड्डोर अंटोर्कुन जमा कीसि तत्तुर. अस्के मरमिना लोते हेडमितुर निडिस होत्तुर.
- 11 अस्के वाता हेडमितोर्कुन राजाल हळतस्के, मरमिन लोप्पो मरमिन लायक बेसता कपडिं केस्वा* वरोर मनकल ओन्क दिसतोर.
- 12 अस्के राजाल ओन, "निमे मरमिन लोप्पो बेसता कपडिं केस्वा, मरमिना मंडाता† हिल्लु बल्हा वातिन?" इंचि ओन पूसकीतोर गानि आ मनकल बतले वळका हिल्लोर.
- 13 अस्के राजाल ओना जीतागाहकुन केय्सि, "ईना कय्क-कालक दोहचि, पलाते हीकटते पोहचीम्ट. अगा मनानोर अळसेके, वरगेयसेके, पल्लुकु कोर्कोसेक मनांतुर," इंचि इत्तोर.
- 14 पजा, "केयतोर वेल्लेट्टे मंतुर. गानि पेर्कुत्तोः मात्रम इच्चुरे मंतुर," इंचि येसु वेसुड वेहामळ आपतोर.

येसुन तप्पुने दोर्का पियालय परिसिल्कुना उपायाल्लुक
(मरकुस 12:13-17; लूकाल 20:20-26)

- 15 पजा परिसिल्क अगटाल पेय्सि उंदगा जमा आसि, येसुन बल्हा किसन्ना ओर वळकाना पोल्लेतेन ओना तप्पु दोर्का पियाना इंचि उपायम क्रियालय दलग्गुर.
- 16 परिसिल्क येसुन पसांचना उपायाल्लुक कीसि, ओरा इच्चुर सिस्युल्लुकुन हेरोद राजाना मनकालोरतोनि ओनाहेके लोहचीतुर. ओर येसुनगा होंचि इल्हा इत्तुर. "गुडु, निमे निजम वळ्कानोन, पेनदा हर्दा बारेमते सत्तेमते करहानोन आंदिन इंचि माक एपाट मंता. बोर बतल इनिनागानि दाना पिक्किरगुडा किच्यिन, निमे लोकुल्लुकुना मोकम हळसि वळ्किन, इदिका माकु एरके.‡
- 17 अय्ते माकु वेहा. नियम परकारम, कैसर§ राजांक कर दोहमळ न्यायमेना आयोना? नीवा विचारमते बतल मंता?" इत्तुर.
- 18 ओरा कोटे उपायाल्लुक येसुंक मुन्नेटाले एर्का मत्ताहाटी ओर ओर्कुन इल्हा इत्तोर. "ए डोंगिरिटा, बारि नावा पट्टु हळ्वांतर?
- 19 मिमेट कर दोहना कोलता नाकु हुप्सट," इत्तोर. अस्के आ लोकुल्लुक ओन्क उंदि एंडि बंडि हुपिस्तुर.

* 22:11 बेसता कपडिं केस्वा आत्यिक रीतिते बेस मनबोर, पडना पिस्वर होळसियबोर. † 22:12 मंडा इत्ते पदिर आंद. ‡ 22:16 इगे रोंडु पाटिं मंतां, उंदि परिसिल्कुना पाटिं इंकुदि हेरोद राजाना पाटिं. परिसिल्कुंक कैसर राजांक कर दोहमळ न्यायमेना, आयोना? गानि हेरोदना पाटिंतोर मात्रम कैसर राजांक कर दोहमळ गावाले इत्तुर. § 22:17 कैसर इद राजाना पोरोल आबो. रोम सरकारते अन्दिनकन्ना पेद्दा पदवि आंद.

- 20 हृपिस्तस्के, “इद एंडि बंडिपोर्रो बोना पोदुवा आनि पोरोल मंता?” इंचि येसु ओर्कुन पूसकीतस्के,
 21 “कैसर राजानद,” इंचि ओर इत्तुर. पजा येसु ओर्कु वेहतोर. “बद कैसर राजानद मंता, अद कैसर राजांक हीम्टु, बद अय्ते पेनदाद मंता, अद पेनदुक हीम्टु.” इत्तोर.
 22 येसुना पोल्ले केंजसि, ओर्कु इचंन्रम आता. पजा ओर अगटाल होत्तुर.

इच्चुर सदुकि लोकुकल्क येसुन पसांचंलय हळंतुर
 (मरकुस 12:18-27; लूकाल 20:27-40)

- 23 अदे रोजु इच्चुर सदुकिर येसुनगा वातुर (ईर हासि मर्रा जीवाते तेदमळतुन ईर नम्मुर.)
 24 वासि इल्हा सवाल पूसकीतुर, “गुरु, मूसाना नियम परकारम, वरोर मनकल पिलाल्क आयाका मुन्नेन हायानय्ते ओना मुत्तोतोन ओना तम्मुर मरमि आसि, हातोना वंसम बेसांगोदालय पिलाल्कुकन कना परांतोर.
 25 अय्ते महगा एडुर दादाल-तम्मूहक मल्लुर. पेदुदा दादाना मरमि आतां गानि पिलाल्क आयाका मुन्नेन ओर हातोर. पजा ओना मुत्तोतोन ओना तम्मुर मरमि आतोर.
 26 आ तम्मुरगुडा पिलाल्क आयाका मुन्नेन हातोर. पजा ओना पज्जोटोर दान मरमि आतोर ओरगुडा हातोर. इल्हा एडुरगुडा दानतोन मरमि आसि पिलाल्क आयाका मुन्नेन हातुर.
 27 अंतोर हाता पजा, आ मुरतळगुडा हाता.
 28 अय्ते हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते, ओर एडुरगुडा दान मरमि आसि मल्लुर,” इत्तुर.
 29 अस्के येसु ओर्कु इल्हा जवाब हीतोर. “मिमेट दर्मसास्त्रमतुन आनि पेनदा ताकततुन एरपाट किय्याका तप्पु अर्तम कीकुंचितिर.
 30 बारित्ते हातोर मर्रा जीवाते तेदानुर अस्के, ओर मरमि आयुर, मरमि कीसिगुडा हि्य्युर. गानि ओर स्वर्गमता पेनदा दूतनलेसी मनांतुर.
 31-32 गानि हातोर मर्रा जीवाते तेदानुर इंचि दर्मसास्त्रमते वेहचि मंता, अद बतल इत्ते, ‘नना अब्राहाम, इसाक आनि याकोबुना पेनदुन आंदुन,’* इंचि पेन इत्ता. अदुन हद्विसि दाना अर्तम बस्केने एरपाट किय्या हिल्लिरा? इंचि अद हातोर पेन आयो गानि जीवाते मनानोरा पेन आंद,” इल्हा येसु इत्तोर.
 33 येसु इच्चोन वळकतारित्ते, अगा मत्ता लोकुकल्क ओना पोल्ले केंजसि इचंन्रम आतुर.

अन्किन्ना पेदुदा पोल्ले बदुदु?
 (मरकुस 12:28-34; लूकाल 10:25-28)

- 34 येसु सदुकिर्कुन वळकाकौटा कीतोर इंचि परिसिल्लुकुंके तेळियतारित्ते ओर जमा आसि येसुनहेके वातुर.
 35 ओरा लोप्पो मूसाना नियम बेस तेळियतोर वरोर मल्लुर, ओर येसुना पट्टु हळालय,
 36 “गुरु, मूसाना नियम लोप्पो अन्किन्ना पेदुदा आदेस बद आंद?” इंचि येसुन सवाल पूसकीतोर.
 37 अस्के, “निमे नीवा सामि आता पेनदुन पूरा मनसुनाल, पूरा आत्माताल, पूरा बुदिदताल पावरम कीम.
 38 इदे अन्किन्ना पेदुदा आनि मोदोलता आदेस आंद.
 39 रोडो आदेस बतल इत्ते, नीवद निमे बच्चोन पावरम कीतितो, अचोने पावरम इंकावरोनगुडा कीम.
 40 इव रौडु आदेसकुना आदारम पोरिने मूसाना नियम आनि पेनदा कबुरतोर रासता पुस्तकाल्क मंतां.” इंचि येसु जवाब हीतोर.

येसु परिसिल्लुकुन सवाल पूसकीतोर
 (मरकुस 12:35-37; लूकाल 20:41-44)

- 41 पजा परिसिल्लुकु उंदगा जमा आसि मल्लुर, येसु ओर्कुन उंदि सवाल पूसकीतोर.
 42 “किरिस्तुना बारेमते मीवद बतल विचारम मंता? ओर बोना मर्रि आंदुर?” अस्के, “ओर दाविदना मर्रि आंदुर,” इंचि परिसिल्लुकु इत्तुर.
 43-44 अस्के येसु ओर्कुन इल्हा इत्तोर. “अय्ते, दाविद पवित्र आत्माते निडसि इल्हा इत्तोर. सामि नावा सामिन इत्तोर, बदवेरदाका अय्ते नीवा पगातोर्कुन नीवा काल्कुनगा तायोन, अदवेरदाका नावा तिना बाजुंक उद्विदिसि मन.*
 45 कुदुदु दाविद ओन सामि इंचि इत्तोर अय्ते ओर दाविदना मर्रि बल्हा आया परांतोर?” इत्तोर.

46 अस्के ओर बोरे येसुना पोल्लेक जवाब हिया पराहिल्लुर. आ रोजुनाल येसुन बद्दे सवाल पूसकियालय बोर्कु हिम्मत आयाहिल्ले.

23

दर्मसास्त्रम कराहना गुस्लुकु आनि परिसिल्लुकुना होंग
(मरकुस 12:38-40; लुकाल 11:37-52; 20:45-47)

- 1 सिस्स्यल्लुकुन आनि अगाटा मंदितुन हळसि येसु इत्तोर गदा,
- 2 “दर्मसास्त्रम कराहना गुस्लुकुं आनि परिसिल्लुकुं मूसाना नियम कराहना हक्कु मंता.
- 3-4 इंचि ओर तेहते तेदा पर्र्वा मोता दोहचि मनकालोरा हट्टनपोर्री इर्रुतुर गानि आ मोतातुन कांजसि ओयनेके वेलु दोस्सि आसरागुडा आयुर. अदुनहाटी ओर मीकु बतल-बतल वेहंतुरो अव अनि कीसेके ताकट्टु, गानि ओर कीताप मात्रम कियमट.”
- 5 ओर ओरा कबाहक लोकुकल हळना इंचि कीतुर. पेनदा पोल्लेन रासि, ताथिल्लुकुने निहचि पेद्दा-पेद्दा दुम्मं ओरा दंडा कयकुकं, कपर्क दोहकंतुर. ओरा कपडिना कोंगुल्लुकु जिल्लर-जल्लर होळसीतुर. लोकुकल ओर्कुन “सादु” इनागोम इंचि इल्ला कीतुर.*
- 6 अचोने आयाका दर्मसास्त्रम कराहना लोहकुने, कुळपुकुने पेद्दालक उद्दाना जेगाते उदमळ इत्ते ओर्क वेल्ले इस्टम.
- 7 हाट्टमकुने जोहार वेहागोटकुनमळ, मनकालोराहंदाल गुरु इंचि केया वेहकुनमळ ओर्कु बेस अनपिचंचता.
- 8 गानि मिमेट अंटोर दादालोर-नम्मूहक आदिर, मीवा अंटोरा गुरु वर्रोरे. अदुनहाटी मिमेट मीकून “गुरु” इंचि इनागोटकुनमट.
- 9 स्वर्गमते मनना पेने मीवा बाबाल आंदुर, अदुनहाटी इद बूमिंते मिमेट बोने “बाबा” इंचि इनमट.
- 10 अल्हेने मीकु वर्रोरे सामि मंतोर, ओर किरिस्तु आंदुर. अदुनहाटी मीकून बोरे “सामि” इंचि केया मनि.
- 11 गानि बोरे अयते पेनदा मुन्ने अंटोर्कन्ना पेद्दा आयालय हळांतोर, ओर अंटोरा सेवा कियानोर आयिर.
- 12 बोरे अयते, ओनद ओरे पेद्दा इनकुनानुर, पेने ओन सिन्ना किय्यार. अल्हेने बोरे अयते पेनदाहाटी सिन्ना आसि ताकांतोर, ओन पेने पेद्दा किय्यार.
- 13 अरे डोंगि परिसिल्लुकु आनि दर्मसास्त्रम कराहना गुस्लुकुनिटा, मीक गोसा तप्पो. स्वर्ग राज्यमते होनानोरा हर्रि मिमेट बंद कीतिर. मिमेट अयते होन्निर, होनानोर्कुनगुडा होन्ना हिथ्यिर.
- 14 अरे डोंगि दर्मसास्त्रम कराहना गुस्लुकु आनि परिसिल्लुकुनिटा, मीक गोसा तप्पो. मुंडामोस्ता मुर्ताहकुन मुळाहतिर. अल्हेने लोकुकुकुं हृप्सालय वेल्लेनजेम पारतना कीतिर. मिमेट डोंगिर्क आदिर! मीकु पेने एक्को सिक्सा हिय्यार.*
- 15 अरे डोंगि दर्मसास्त्रम कराहना गुस्लुकु आनि परिसिल्लुकुनिटा! वरोन मीवा मतमते थायालय मिमेट देसे-देसेम तिरियसि बूमि-मब्बु उंदि कीतिर. ओर मीलोप्पो वातस्के, मिमेट ओन मीकन्ना एक्को पापमते अरहचि नरकमते लोहतिट, दानहाटी मीकु बच्चोर पेद्दा गोसा वायार.
- 16 अरे, हर्रि हृप्संतोम इन्ना गुड्डिर्कनिटा! मिमेट इतिर गदा, बोरे अयते पेनदा गुळिता ओट्टु तितोर, ओन्क बतल आयो. गानि बोरे अयते गुळि लोप्पोटा बंगारमता ओट्टु तितोर, ओन्क मात्रम आ ओट्टु परकारम ताका पीता, इंचि इतिर. दानहाटी मीकु बच्चोर पेद्दा गोसा वायार.
- 17 अरे गुड्डिडर! बद्दे पेद्देदे, बंगारमा बंगारमतुन पवित्र कियना गुळिआ?
- 18 इंका इल्ला इतिर गदा, बोरेन्ना पेने गद्देता ओट्टु तिचि दान परकारम ताकाकोटे बतल आयो, गानि पेने गद्देपोर्री वाटाटा उपारमता ओट्टु बोरे अयते तितोर, ओन्क मात्रम आ ओट्टु परकारम ताका पीता.
- 19 अरे गुड्डिर्कनिटा! पेने गद्देदे पेद्देदे मरि पेने गद्देदे हेंदाल पवित्र आयना दानपोर्री वाटाटा उपारम पेद्देदेदा?
- 20 अदुनहेके बोरे पेने गद्देता ओट्टु तितोर, ओर पेने गद्देपोर्री मत्ता अन्निटवुना ओट्टु तित्तापे.
- 21 अल्हेने बोरे अयते गुळिता ओट्टु तितोर, ओर गुळिते मनना पेनदा ओट्टु इंका तितोर.
- 22 बोरे अयते स्वर्गमता ओट्टु तितोर, ओर पेनदा राजगद्दे आनि राजगद्देपोर्री उदिस मनानोन्द इंका ओट्टु तितोर.
- 23 अरे डोंगि दर्मसास्त्रम कराहना गुस्लुकु आनि परिसिल्लुकुनिटा, मीक गोसा तप्पो. बारित्ते मिमेट पुदिना, जिल्लकरा, सोप इसोटा पंटातालगुडा पदि त्सकुनाल उंदि त्स पेनेदुक हीतिर. गानि न्यायमते तिरियमळ, दया कियमळ, पेनदापोर्री विस्वासम इरमळ इसोटाव दर्मसास्त्रमता बेसता पोल्लेन मिमेट होळसीतिर. पदि त्सकुनाल उंदि त्स पेनेदुक हियमळ इद बेसे. गानि इद कीसेक-कीसेक अवनगुडा होळसाकोटा ताका मत्तिर.
- 24 हर्रि हृप्संतोम इन्ना गुड्डिर्कनिटा! मिमेट नुल्लेतुन बोरे वडा पीसि उंतिर गानि लोटापेटातुन बोरे हळवा अल्हे मिगांतिर.

* 23:5 व्यवस्ताविकरन 11:18; गिनति 15:37-41 * 23:14 इद वचनम कोन्नि पांडु लिपिने हिल्ले.

25 अरे डोंगि दर्मसास्त्रम कराहना गुस्लक आनि परिसिल्लकुनिटा, मीकु गोसा तप्पो. बारित्ते, मिमेट गिन्ने-गिलासकु सिराप लोकुकुकुं दिसालय पलाताल तोमसि साप कीतिर, गानि लोप्पो मात्रम मीवा कराब गुनालक, पापालक निडिस मंतां.

26 अरे गुड्डिड परिसिल्लकुनिटा! मुन्ने मीवा गिलासकु-गिन्नेन लोप्पोटाल तोमसि नोरॉट, अस्के अव पलातालगुडा बेस दिसंता.

27 अरे डोंगि दर्मसास्त्रम कराहना गुस्लक आनि परिसिल्लकुनिटा, मीकु गोसा तप्पो. बारित्ते मिमेट तेल्लटा सुन्ना होकता गोरिनसंतोर आंदिर. अव पलाताल हळ्ळलय सक्कगा दिसंतां, गानि लोप्पो हळ्ळे, पीनगुना बोक्कां कळियसि होंचि गब्बु पीसि मंतां.

28 अल्हेने मिमेट इंका पलाताल लोकुकुकुं पक्का नीतिमंतलुकुन लेहका दिसंतिर. गानि मीवा पीट लोप्पो नडेह कियना बुद्धिदे, पापमता कबाहक निडिस मंता.

29 अरे डोंगि दर्मसास्त्रम कराहना गुस्लक आनि परिसिल्लकुनिटा, मीकु गोसा तप्पो. बारित्ते, मिमेट पेनदा कबुरतोरहाटी गोरि दोहातिर आनि नीतिमंतलुकुना गोरिन सोक कीतिट.

30 अल्हा कीसि मिमेट इतिर, मोमोट पेद्दालुकुना कालमते मंचि मत्ते, पेनदा कबुरतोरकुं हक्कानेके, ओर्क सायता आया कोन्नेम.

31 इल्हा इंचि, “मोमोट पेनदा कबुरतोरकुं हक्कतोर वंसमतोरकुं आंदुम,” इंचि मीवद मिमेटे उल्टा गवाइ वेहकुतिर.

32 अत्ते मिमेट मीवा पेद्दालुकु सुक्क कीता पापमतुन पूरा कीम्टु.

33 ए तरासकुनसंतोरिटा! आनि नय तरास पोरिह्कुकुनसंतोरिटा! मिमेट बल्हा अथना नरकमते होनमळ तप्पो.

34 अदुनहाटी नना मीहेके पेनदा कबुरतोरकुं, बुद्धिमंतलुकुन आनि दर्मसास्त्रम कराहना गुस्लकुन लोहांतन. मिमेट ओराव्टेटाल इच्चुकुं हक्ककिर, इच्चुकुं कूसुंक वेलाड वाटकिर, इच्चुकुं मीवा दर्मसास्त्रम कराहना लोहकुने ओसि पोद्देते तनकिर, तंचि ओर्कुं नार-नार तिराह्चि तिप्पलक कीकिर.

35 दीनहेंदाल, नीतिमंतुड आता आबेलनगटाल अत्ते गुळि आनि गद्दे नड्डुम मिमेट हक्कता बर्काना मरिं जकर्याहनगडुक, बचट्टर नीतिमंतलुकुना नेत्तुर अत्ते ई बुचिपोर्रीं पोंगागोटमळ जर्गता, आ अंतोरा नेत्तुरता दोसेम पूरा मीपोर्रीं अररि.

36 नना मीकु निजम वेहांतन, इव अन्नि पोल्ले ई पीळितोरपोर्रीं अरंतां.

37 ए येस्सलेमतोरिटा, ए येस्सलेमतोरिटा! मिमेट पेनदा कबुरतोरकुं हक्कानोर आंदिर, इंका पेन मिहगा लोहचीतोर पोर्रीं मिमेट बंडां हुक्कानोर आंदिर. कोर्रें दाना पीसेन रेक्काना हिळ्ळ बल्हा जमा कीतते, अल्हेन ननागुडा मीवा पिलालुकुन जमा कियना इंचि बच्चुंगो मल्लां कोरतन. गानि मिमेट मात्रम कोराहिल्लिर.

38 हळ्ळा, इंदके मी लोतुन मीहाटी कुल्ला होळ्ळसमळ जर्गता. पूरा लोन बतल हिलाकोटा आंता.

39 नना मीकु वेहानद बतल इत्ते, “सामिना पोरोलते वायानोर आसिवांद दोर्कोतोर,” इंचि बदवेरदाका अत्ते मिमेट इन्निरो अदवेरदाका नाकुन मर्रां हळिर.

24

गुळि नासडेम आसि दुनिया मुंळगना बारेमते

(मरकुस 13:1-37; लुकाल 17:26-36; 21:5-33)

1 येसु गुळिताल पलाते पेय्शि होननेके, ओना सिस्सुलक ओन्क गुळिता बंगलां हुप्सालय ओनगा होत्तुर.

2 गानि येसु ओर्कु इल्हा जवाब हीतोर. “मिमेट इवन्निन हळ्ळसंतिर गदा! नना मीकु निजम वेहांतन, इव बंडां उंदानपोर्रीं उंदि मनाकोटा कूल्हाना वेला वायनद मंता,” इत्तोर.

3 आयंका येसु जय्युन मराकुना गुट्टपोर्रीं होंचि उदतोर. ओर ओटिगा मत्तद हळसि ओना सिस्सुलक ओनगा होंचि इल्हा इत्तुर, “इवन्नि गटनां बस्के जर्गनां माक वेहा. इंका निमे वायाना वेला आनि दुनिया मुंळगना आकिर वेला बस्के आंता इंचि मोमोट बव चिन्हां हळसि एरपाट कीकोम?” इत्तुर.

4 अस्के येसु ओर्कु इल्हा जवाब हीतोर. “मीकुन बोर पसांचकोटा मिमेट उसारते मंटु.

5 नावा पोरोल एतसेके बच्चुट्टो लोकुकुकुं वांतुर. वासि, ‘नाना केरिस्तुन आंदुन’ इंचि वेल्लेटोरकुं पसांचनुर.

6 मिमेट लडाईं आनि लडाईना पोल्लेना बारेमते केंजसि वेरियमट, अल्हा तप्पाकोटा आयानुगे. गानि दुनियाता आकिर वेला अस्केने वायो.

7 देसेमपोर्रीं देसेम, राज्येमपोर्रीं राज्येम लडाईं आयनुं, वेरें-वेरें जेगाने बूकपालक आयनुं, कर्वु अररि.

8 गानि इल्हा आयमळ इत्ते एर पूरालय नोप्पि सुक्क आताप आंद.”

9 “मिमेट नाकुन विस्वासम कीताहाटी लोकुकुकुं मीकुन तकलिप कियालय अदिकारिलुकुं अप्पजेपंतुर, अस्के ओर मीकुन हक्कतुर, नावा पोरोलताहेंका दुनियातोर बोरे मीकुन हय्युर.

10 आ वेलाते बच्चटुरो विस्वासम कियानोर ओरा विस्वासम होळसंतुर. वरोक-वरोर पगां आसि वरोक-वरोर हयसाकोटा आंतुर.

11 बच्चटुरो आबद्दम कबुरतोर, पेनदा कबुरतोरुंम इचेके वांतुर, लोकलुकुक सेड्डा हरिं हुपसंतुर.

12 पापालक एक्को आसि वेल्ले मंदिता पावरम इंका तक्को आसेक दांता.

13 गानि बोर अय्ते पेनदापोरौटा विस्वासमते आकिरदाका निल्सि मनंतोर, ओनके मुक्ति दोर्कार.

14 पेनदा राज्येमता बारेमता बेसता कबुर दुनियाता अन्नि देसेल्कुना लोकलुकुक उंदि गवाइ इंचि तेळियागोटसि वेहतस्के, इद दुनियाता आकिर आयार.”

15 दानिएल पोरोलता पेनदा कबुरतोर वेहताप, बोरे हयसवसोंटा नासडेम कियाना वस्तु, गुळि लोप्पो पवित्र जेगाते नित्तिसि मत्तद मिमेट हळकिर (हद्वानोर इदुन अर्तम कीकुटु.)

16 अस्के बोर अय्ते यहूदिया एरियाते मंतुरो, ओर गुट्टनहेके वित्तिर,

17 बोर अय्ते लोतपोरौ मंतोर, सामान पीसि वायालय लोप्पो होळियानायो,

18 बोर अय्ते नेलिने कबळ कीसेक मंतोर, कपडिं पीसि वायालय मल्सि लोन होनानायो.

19 अव रोजकुने पीट मत्ता मुर्ताहकुंक आनि सिन्ने मर्तल्लहकुंक वेल्लेन तकलिप वांता.

20 पीनि कालमते अल्हेने नोमकेम रोजुने ई वित्तना वेला वायामन्नि इंचि मिमेट पारतना कीम्ट.

21 बारिल्ले अद वेलाते इसोंटा तकलिप वायार गदा, दुनिया पुटतस्केटाल अय्ते इदवेरादाका, बस्केन वाया हिल्ले. मुन्नेगुडा बस्केन वायो.

22 ओक्कला पेन अव रोजकुन तक्को कियाकोटा मंचि मत्ते, बोरे पिसाकोन्नेर. गानि पेर्कुलता लोकलुकुनाहाटी पेन अव रोजकुन तक्को कियार.

23 अद वेलाते ओक्कला बोरन्ना मीकुन किरिस्तु इगो मंतोर, अगा मंतोर इनानय्ते, मिमेट ओर्कुन नम्ममुट.

24 बारिल्ले अव रोजकुने आबद्दम किरिस्तुल्क, पेनदा आबद्दम कबुरतोर वायानुर. आनि कुदुरते पेन पेर्कुलता लोकलुकुन पसांचलय पेद्दा-पेद्दा चिन्हां, इचंत्रमता कबाहक कीसि हुप्सानुर.

25 हुळाट! नना अय्ते इव पोल्ले मीक मुन्नेने वेहचीतन.

26 दानहाटी “किरिस्तु केडाते मंतोर” इंचि मीकु बोरन्ना वेहानय्ते, मिमेट अगा होनमट. इंका “किरिस्तु लोप्पोटा अरति मंतोर” इंचि मीकु वेहानय्ते मिमेट ओनापोरौ विस्वासम इरमट.

27 बारिल्ले बल्हा अय्ते पोळ्द पेयसनाहेके मेसति दाना वेलगु पोळ्द अरानगाहक दिसंता, मनकना रूपमते पुटतोन नना वायानस्केगुडा अल्हे आयार.

28 अल्हेने बगा अय्ते पीनगु मंन्ता अग्गेन गद्दलि जमा आंतां.

29 आ रोजकुना तकलिपकु मारता मास्डे,

“पोळ्दुंक हीकट मुच्चका वायार, वेळसि वेल्गु हियाकोटा आयार,

मब्बुनाल सुक्कां हिळु अरानुं, मब्बुने मनना अन्नि सक्तिन कदलिचमळ जर्गता.”*

30 पजा मनकना रूपमते पुटतोन नना वायाना चिन्ह स्वर्गमते दिस्सार, अस्के बूमि पोरोटोर अन्नि जातिना लोकलुक वेल्ले दुक्कम कियानुर. पजा मनकना रूपमते पुटतोन नना पेद्दा महिमा आनि ताकततोनि मब्बु तेर्पेनपोरौ उद्दिदिसि वायानेके लोकलुक हळानुर.

31 अस्के त्ताकोमता पेद्दा आवाजुनतोनि, नना नावा दून बूमिपोरौ लोहांतन. आ दूतां बूमिपोरौ नाल्ल मूलानाल, मब्बुना ई कोस्साताल अय्ते आ कोस्सादाका नना पेर्कुलता लोकलुकुन जमा कींतां.

32 इंदके अजिर मराताल उंदि पोल्ले करियट. अजिर मराता कोम्मांक इगुर बस्के अय्ते वांता, अस्के एद्दि कालम दग्गेरा एल्ता इंचि मिमेट एरपाट कीतिर.

33 इल्हा इव अन्नि गटांन जर्गनद हळसि, ओर दग्गेरा मंतोर, गल्मातगेन मंतोर इंचि मिमेट एरपाट कीतिर.

34 नना मीकु निजम वेहांतन, बदवेरदाका अय्ते इव अन्नि पोल्ले पुरागा आयोंगो, अदवेरदाका ई पीळि मुळ्गो.

35 इद बूमि, मब्बु नासडेम आसि होंदार, गानि नावा पोल्ले बस्केने नासडेम आयों.

36 अद रोजु, अद गळिया बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिराप पेनबाबांके तेळियंता.

37 नोहाना रोजकुने बल्हा जर्गतनो, मनकना रूपमते पुटतोन नना वायानस्केगुडा अल्हे जर्गां.

38 कम्मुड वासि नोहाल डोंगाते नैगनादाका लोकलुक तिचेके-उंचेके मरमि कीसेके, आसेके मत्तुर.

39 कम्मुड वासि ओर्कुन तंचि ओयनदाका ओर्कु तेळिया हिल्ले.

मनकना रूपमते पुटतोन नना वायानस्केगुडा अल्हे जर्गा.

40 आ वेलाते नेदे इव्वुर कबळ कीसेके मनानुर, ओराव्हेटाल वरोन तेहाकुंचि ओयमळ जर्गता, इंकावरोन अग्गेन होळसमळ जर्गता.

41 रौडु मुर्ताहक गटका नोरसेक मनंतां, उंदितुन ओयमळ जर्गता, इंकुंदितुन अग्गेन होळसमळ जर्गता.

42 बद रोजु मीवा सामि वायानुर अद मीकु एरपाट हिल्ले, अदुनहाटी मिमेट तेल्चिते मंड.

43 गानि मिमेट उंदि पोल्ले बेस तेळियागोटकुंद. अद बतल इत्ते, दौंगल नर्कटा बद वेलाक वांतोर इंचि ओक्कला लोता मालकुंक मुन्नेन तेळियसि मत्ते ओर तेल्चितेन मनांतोर आनि आ दौंगन लोते होळिया हिच्योर.

44 अल्हेने मिमेट इनकुनवा वेलाते मनकना रूपमते पुटतोन नना वांतन. अदुनहाटी मिमेटगुडा बेस तयारते मंड.

तेल्चि मत्ता सेवक बोर?

(लकाल 12:41-48)

45-46 मालक हिल्वस्के ओनगा कबळ कियानोर्कुंक वेलापोरौं गाटो-जावा दोस्सालय, वरोर बेस तेल्चिगल्लोड, विस्वासमलायक सेवक मालाकुंक गावाले. अय्ते असौंटा सेवक बोर मंतोर? बोर सेवक अय्ते, मालक मालिस वातस्के वेहता कबळ बरोबर कीसेक मनांतोर, ओर सेवक बेस आसिर्वाद दोर्कुंतोर आंद.

47 नना मीक निजम वेहांतन, मालक आ सेवाकुन ओना पूरा आस्ति-पास्तिनपोरौं अदिकारि इंचि इरंतोर.

48 गानि ओक्कला आ दुस्ट सेवक ओना मनसुने, “नावा मालक वायालय अय्ते इंका आल्सेमे मंता” इनकुंचि,

49 ओना दंटाता सेवाकुलकुन तन्नुड-गुदुदुड कियमळ, इरगा तिचि-उंचि बदमासि कियमळ सुख कीतोर इनकुन!

50 अस्के आ सेवक विचारमगुडा किय्योर असौंटा रोजुने, गळियाते ओना मालक वायानुर.

51 वासि, आ सेवाकुंक पेदुदा सिक्सा हीसि, ओन डौंगि लोक्कुलकुने कल्पानुर. अगा सिराप अळमळ, पल्कु कोर्कमळे मंनंता.

25

पदि लेय्यना वेसुड

1 येसु मर्रां उंदि वेसुड वेहालय सुख कीतोर. ओर इतोर, स्वर्ग राज्येम बारेमते नना उंदि वेसुड वेहंतन केंजट. पदि लेय्यां कंदिलि पीसि वरोर मरमिना पेडांक कलियालय होतां.

2 अवनगटाल हेय्युं तेल्चि हिल्वव मत्तां, हेय्युं बारे तेल्चितव मत्तां.

3 तेल्चि हिल्वा लेय्यां कंदिलि पीसि अय्ते होतां, गानि अबुनतोनि निय ओया हिल्लें.

4 तेल्चिता लेय्यां बारे कंदिलिनतोनि डब्बाने निय इंका पीसि होतां.

5 मरमिना पेडल वायालय आलसेम आताहेंके, अव निद्रु वासि मीडतां.

6 नड्डुम नर्का, “मरमिना पेडल वासेक मंतोर, ओन्क कलियालय दट,” इंचि लोल्लि केंजावाता.

7 अस्केने अव पदि लेय्यां बिराना तेदसि, कंदिलि तयार कीतां.

8 तेल्चि हिल्वा लेय्यां, तेल्चिता लेय्यान, “मिहगटा निय इचचुर माकु हीम्टु, मावा कंदिलि पिरालय आतां,” इंचि इत्तां.

9 गानि, “इद निय बोनकु इंचि बोनकु हालंता? इत्ते माकु इंका हालो, मीकु इंका हालो, अल्हा आयो गानि, मिमेट दुकानमते हौंचि मीवाहाटी निय अस्सि तदु,” इंचि तेल्चिता लेय्यां इत्तां.

10 अव निय अस्सालय दुकानमते होत्तस्के मरमिन पेडल एवतोर. तयारते मत्तव लेय्यां मरमिन पेडनतोनि मरमिंकु होतां, पज्जो तल्पु वाटसीतुर.

11 गडसेम मत्तारित्ते, दुकानमते होत्तव हेय्युं तेल्चि हिल्वा लेय्यां मरमिना लोन वासि, “सामि-सामि, मोमोट वातोम, तल्पु तेंडा!” इंचि केयालय दलगतां.

12 अस्के मरमिन पेडल, “मिमेट बोर आदिर? नना निजम वेहचंतन, मीकुन बिल्कुल एरपाट किय्योन,” इंचि लोप्पोटाल अबुन इतोर.

13 पजा येसु सिस्युलकुन इल्हा इतोर. “मनकना रूपमते पुटतोन नना वायानदगुडा इल्हे मंनंता. अद रोजुन आनि वेलातुन मिमेट बिल्कुल एरपाट किय्येर. अदुनहाटी मिमेट तेल्चिते मंड,” इतोर.

मुव्वुर सेवाकुलकुना वेसुडि

(लकाल 19:11-27)

14 पजा येसु इंकुंदि वेसुडि वेहतोर. स्वर्ग राज्येम वरोर मनकनलेसीं मंता, बोर अय्ते, पय्नेम होनाका मुन्ने ओना दासुलकुन केय्सि ओनगा मत्ता दनम ओर्कुं अप्पजेपतोर.

15 ओर ओरा उसारतनमतुन ह्ळसि, वरोंक बंगारमते निडसि मत्ता हेय्युं मुल्लें हीतोर, वरोंक रोंडु मुल्लें हीतोर. इंकावरोंक उंदि मुल्ले हीतोर. पजा ओर पय्नेम होतोर.

16 बोनकु अय्ते हेय्युं मुल्लें दोर्कतंगो ओर बिराने अब कोत्तन दंदाते दोसिस, इंका हेय्युं मुल्लेना कल्दार्क संपलिचोर.

17 अल्हेने रोंडु मुल्लें दोर्कतोर इंका दंदा कीसि, रोंडु मुल्लें एक्को संपलिचोर.

18 गानि उंदि मुल्ले दोर्कतोर बारे, लोन ओसि पोक्का तव्सि ओना मालक हीता मुल्लेतुन मक्किचि इरतोर.

19 वेल्लेन रोजकु आतारित्ते आ दासुल्कुना मालक मल्सि वासि, ओर हीता दनमता हिसाब तल्कतोर.

20 अस्के बोनकु हेय्युं मुल्लें दोर्किस मत्तां, ओर इंका एक्को हेय्युं मुल्लें तच्चि, “मालक, निमे नाकु बंगारमते निडसि मत्ता हेय्युं मुल्लें हीसि मत्तिन. ह्ळ्ळा, नना अब कोत्तना दंदा कीसि, इंका हेय्युं मुल्लें संपलिचत्तन,” इंचि इतोर.

21 अस्के मालक कूस आसि, “वा रे वा, निमे बेस विस्वासमलायक दासुन आदिन. इच्चोटा पोल्लेतगा निमे विस्वासमलायक मंतिन, अदुनहाटीं नना नीकु वेल्लेटोरपोरों अदिकारम हीतन. निमे लोप्पो होंचि मालकुनतौनि कूळसि कुसिते मन,” इतोर.

22 पजा बोनकु अय्ते रोंडु मुल्लें दोर्किस मत्तां, ओरगुडा मालकनगा वासि, “मालक, निमे नाकु बंगारमते निडसि मत्ता रोंडु मुल्लें हीसि मत्तिन. ह्ळ्ळा, अब कोत्तना दंदा कीसि, इंका रोंडु मुल्लें संपलिचत्तन,” इंचि इतोर.

23 अस्के मालक कूस आसि, “वा रे वा, निमे बेस विस्वासमलायक दासुन आदिन. इच्चोटा पोल्लेतगा निमे विस्वासमलायक मंतिन, अदुनहाटीं नना नीकु वेल्लेटोरपोरों अदिकारम हीतन. निमे लोप्पो होंचि मालकुनतौनि कूळसि कुसिते मन,” इतोर.

24 पजा उंदि मुल्ले दोर्कतोर मालकुनगा वासि, “मालक, निमे कळक मनकन आदिन, निमे वीतवगा कोय्यतिन, सल्लुवगा जमा कीतिन इंचि नाकु एरपाट.

25 अदुनहाटीं नना वेरियसि निमे हीता मुल्लेतुन ओसि पोक्का तव्सि मक्किचि इरतन. इदे, नीवा मुल्ले नीकु वापस हीसंतन,” इंचि इतोर.

26 गानि ओना मालक ओन्क इल्हा जवाब हीतोर. “निमे दुस्ट, लंडु दासुन आदिन. नना वीतवगा कोय्यानोन, सल्लुवगा जमा कियानोन इंचि नीकु एरपाटे मत्ता.

27 अय्ते निमे नावा दनमतुन बोर्कन्ना वड्डिक हिच्या मत्तिन. नना मल्सि वातस्के नावा दनमतुन वड्डितोनि एक्कुचि मन्नेन,” इतोर.

28 पजा मालक ओना दासुल्कुन केय्सि, “मिमेट ओनागटाल मुल्ले एतसि, पदि मुल्लें मत्तोनागा हीम्ट.

29 बारित्ते, बोनगा अय्ते पेनदा पोल्लेन तेल्लिचकुनना बुद्धिद मंता, पेन ओन्क इंका हीता. अस्के ओन्क वेल्लेन आंता. गानि बोनगा पेनदा पोल्लेन तेल्लिचकुनना बुद्धिद हिल्ले, ओनगा मत्ता बुद्धिदतुनगुडा पेन वापस एतकुन्नार.

30 अय्ते ई कबळ्ळक ओज्जुवा दासुन पलाते हीकटते पोहचीम्ट. अगा मननोर अळसेके, वरगेयसेके, किटुर-किटुर पल्कु कोर्कसेक मनांतुर,” इंचि मालक वेहतोर.

आकिरता न्यायम

31 मर्रां येसु इल्हा वळकालय दल्युतोर. बस्के अय्ते मनकना रूपमते पुटतोन नना नावा महिमाते राजाल आसि अनि दूतनतौनि वांतन, अस्के नावा अदिकारमते राजगदुदपोरों उदूदंतन.

32 पजा नावा मुन्ने दुनियाता अनि देसेल्कुना लोकुल्क जमा आयनुर. अस्के गोल्लल एटिनाल गोंरे बल्हा बैरे कीतोर, अल्हेने लोकुल्कन नना वरोनगाटाल वरोन बैरे कीतन.

33 अल्हा कीसि नना गोंरेन बारे तिना बाजूंक, एटिन बारे डेमा बाजूंक कीतन.

34 अस्के राजाल तिना बाजूनेर्कुन इनानुर, “वट, ना बाबाना आसिर्वाद मीकु दोर्कुता, मीवाहाटीं दुनिया पुटतस्केटाले राज्येम तयार कीसि मंता, दान एतट.

35 इद राज्येम मीवादे आंदु, बारित्ते नना कर्चुने मत्तस्के नाकु मिमेट तिनालय हीतिर, नाकु दूपातस्के उनालय एर हीतिर. नना मीकु एरपाट हिलाकुना गानि मीवा लोहकुने मनालय जेगा हीतिर.

36 नाकु केरालय कपडि हिल्वस्के मिमेट नाकु कपडि हीतिर, नना बिमारते मत्तस्के मिमेट नावा सेवा कीतिर. नना जेलने मत्तस्के मिमेट नाकु कलियालय वातिर.”

37 अस्के तिना बाजूंक मत्ता नीतिमंतुल्क ओन इनानुर, “सामि, नीकु कर्वेस्तद ह्ळसि बस्के तिनालय हीतोम? नीकु दूपातद ह्ळसि बस्के एर उनालय हीतोम?

38 निमे एरपाट हिलाकुना गानि बस्के नीकुन लोन ओसि मनालय जेगा हीतोम? नीकु कपडि हिलवद ह्ळसि बस्के कपडि केरालय हीतोम?

39 निमे बिमार मत्तस्के, जेलते मत्तस्के बस्के मोमोट नीकु कलियालय वातोम?"

40 अस्के राजाल, "नना मीकु निजम वेहासेक मंतन, इगे मत्ता नावा कदर हिल्लुवा विस्वासुल्लुकुनाल बोन वरोन बेस हळिना, नाकुन बेस हळतापे," इंचि ओर्कुन इनानुर.

41 पजा ओना डेमा बाञ्जुक मल्लोर्कुन, "सापनेमते मनानोरिटा, नहागटाल पेप्सि हॉट. देय्याल्लुकुना मुक्यानाहाटी आनि अवुना दूतनहाटी तयार कीता बस्केळ्ळक पोत्सेके मनना तडमिते होंचि अरंट.

42 बारित्ते नना कर्नुने मत्तस्के, नाकु तिनालय तिडि हिण्या हिल्लिर. नाकु दूपातस्के उनालय एर हिण्या हिल्लिर.

43 नना एएटा हिल्लवोन लेह्का मत्तस्के नाकु मीवा लोहकुने जेगा हिण्या हिल्लिर. नाकु कपडिं हिल्लवस्के मिमेट केरीलय कपडिं हिण्या हिल्लिर, नना बिमार मत्तस्के, जेलने मत्तस्के मिमेट नाकु कलियालय इंका वाया हिल्लिर, दानहाटी इदे मीवा सिक्सा आंद," इंचि सामि इनानुर.

44 अस्के ओर, "सामि, नीकुन मोमोट, कर्वेस्सि मत्तस्के, दूपातस्के, एएटा कियवस्के, कपडिं हिल्लवस्के, बिमार मत्तस्के आनि जेलने मत्तस्के हळसि बस्के सेवा किया हिल्लोम?" इंचि इनानुर.

45 अस्के राजाल ओर्कुन, "नना मीकु निजम वेहासेक मंतन, इगे मत्ता नावा कदर हिल्लुवा विस्वासुल्लुकुनाल बोन वरोनगुडा बेस हळकॉटो, अस्के नाकुनगुडा बेस हळवापो!" इंचि इनानुर.

46 पजा "ई सेड्डा लोकुल्लुकुं मारवा सिक्सा आंता. नीतिमंतुल्लुकुं कबरे बस्केळ्ळक पिस्सना पिस्वर दोर्कता," इंचि येसु इत्तोर.

26

यहदि पेदूदाल्क येसुन हळ्काना उपायाल्क कीतुर

(मरकुस 14:1-2; लुकाल 22:1-2; योहान 11:45-53)

1-2 इव अन्नि पोल्लें वेहमळ आतारित्ते येसु सिस्सुल्लुकुन इल्हा इत्तोर. "नाडि आयो मन्ने दाटसि होनना पंडुगु* मंता इंचि मीकु एएटा. मनकना रूपमते पुटतो न नाकुन कूसुनपोर्रो वेल्लाड वाटालय, पगातोरा कय्दे पीसि हियमळ जर्गता," इत्तोर.

3 अस्के कयपा इनाना पेदूदा पेर्माना मिदूदेते, पेदूदा पेर्मालोर आनि यहदिरा पेदूदाल्क जमा आतुर.

4 येसुन सप्पुडदाका दोर्कापीसि हळ्ककोम, इंचि ओर मीटिंगते उपायम कीतुर.

5 गानि "पंडुगु रोजकुना लोपोपे हळ्का मन्नि, अल्हा कीते लोकुल्लुकुं गडबड किया परांतुर," इंचि इन्कुत्तुर.

उंदि मुरतळ येसुनपोर्रो अत्तर निय वळियता

(मरकुस 14:3-11; योहान 12:1-8)

6 पजा येसु बेतानिया इनाना नाटे होंचि, कुस्टरोगम आसि मत्ता सिमोनिना लोन आगतोर.

7 अस्के उंदि मुरतळ वेल्ले दराता अत्तर निय उंदि गुगिति पीसि येसुनगा वाता. ओर गाटो तिनालय उदूदसि मत्तस्के अद मुरतळ आ नियदुन ओना तल्ला पोर्रोटाल वळियता.

8 अदुन हळसि अगा मत्ता सिस्सुल्लुकुं होंग वासि, "ई अत्तर नियदुन वट्टिदे बारि पोचीतिन?

9 इद अत्तर निय वेल्ले दराते अम्मिसि अब कोत्तां गरिबोर्कुं हिया वायवड गदा!" इंचि इत्तुर.

10 येसु ओर वळकानदुन एएटा कीसि इल्हा इत्तोर. "दान बारिक तकलिप कीसंतरि? अद नावाहाटी बेसता कबळे कीता.

11 गरिबोर्क अय्ते बस्केळ्ळक मिहगा मनांतुर, गानि नना बस्केळ्ळक मिहगा मनानोन आयोन.

12 नावा हामुर एत्ता इंचि नावा मेंदुल्लक अत्तर निय होकताप, अद इल्हा कीता.†

13 नना मीक निजम वेहांतन, पूरा दुनियाते, बगा-बगा पेनदा बेसता कबुर वेहमळ जर्गता, अगा ई मुरतदुन, आनि इद कीता कबळतुन मति कियानुर," इत्तोर.

14 पजा, पन्नेड सिस्सुल्लुकुनाल वरोर इस्कारियोत यहदुल मत्तोर. ओर पेदूदा पेर्मालोरगा होत्तोर.

15 होंचि, "नना मीक येसुन पीसि हीते, मिमेट नाकु बतल हीतिर?" इंचि इत्तोर. अस्के ओर ओन्क मुप्पे एंडि रूपे हीतुर.

16 अस्केटाल ओर येसुन पीसि हियालय मोका हळसेक मत्तोर.

येसुना आकिरता बोजनम

(मरकुस 14:12-26; लुकाल 22:7-23; योहान 13:21-30)

* 26:1-2 दाटसि होनना पंडुगु इञ्जित देसेमता गुलामगिरिताल यहदि लोकुल्लुकुन पेन पेचाहचि तत्ता मतिते, इद पंडुगु कीतुर. यहदि लोकुल्लुकुं बोरन्ना हाते, हातोना पीनङ्कु बेस गब्बु वायना वस्तुकुन पावडर कीसि होक्कुंर. इद ओरा रिवाज मत्ता.

† 26:12 अद कालमते

17 पुल्लगा आयवा पिडिता हारिना पंडुगुना मोदाटा रोञ्जु,‡ सिस्स्युल्क येसुनगा वासि, “गुरु, दाटसि होनना पंडुगुना गाटो तिनाना तयारि बगा कीकोम इंचि नीवा मनसु मंता?” इंचि इत्तुर.

18 अस्के येसु ओर्कुन इल्हा इत्तोर. “सहरते पलाना मनकानगा होंचि, नावा आकिर वेला दमगेरा एव्ता. नीवा लोन नना नावा सिस्स्युल्कुनतोनि दाटसि होनना पंडुगु कियालय वांतन इंचि मावा गुरु वेहतोर इल्हा ओन्क वेहट.” इत्तोर.

19 अस्के येसु वेहातापे सिस्स्युल्क होंचि, दाटसि होनना पंडुगुना गाटो तयार कीतुर.

20 पोळ्द होतारिते, येसु ओना पन्नेडु सिस्स्युल्कुनतोनि गाटो तिनालय उदतोर.

21 तिननेके येसु ओर्कुन, “हीके केंजट नना निजम वेहचंतन, मिहगटाल वरोर नाकुन पगातोरा कय्दे पीसि हीतोरा.” इंचि इत्तोर.

22 इदुन केंजसि ओर्कु वेल्लेन दुक्कम आता. अदुनहाटी, “ओन नना अय्ते आयोन गदा सामि?” इंचि वरोन पज्जो वरोर येसुन पसकीतुर.

23 अस्के, “नावातोनि गिन्नेते कलियसि तिनानोरे नाकुन पीसि हियनुर. ✧

24 दर्मसास्त्रमते रासि मत्ताप, मनकना रूपमते पुटतोन नना अय्ते दांतने. गानि बोनाहेंदाल अय्ते नाकुन पीसि हियमळ जर्गीता, आ मनकल पुट्टाकोटेन बेस आसि मनवळ,” इत्तोर.

25 अस्के येसुन पीसि हियना यहदल, “ओन नना अय्ते आयोन गदा गुरु?” इंचि पसकीत्सके, “निमे इत्तिन अल्हेने!” इंचि येसु इत्तोर.

26 गडसेम आतारित्ते ओर तिननेके, येसु हारितुन पीसि पेनदुक दन्यवाद कीतोरा. पजा हारितुन तुकडां कीसि ओना सिस्स्युल्कुंक हीसेक. “तिट्ट, इद नावा मेंदुल आंद,” इंचि इत्तोर.

27 इंका ओर अंगुर पडिना पानकमता गिलास कय्दे पीसि, पेनदुक दन्यवाद कीतोरा. पजा ओर्कु हीसि, “मिमेट अंटोर दीन अंटु.

28 बारित्ते इद पूना करारता नेत्तुर आंदु. वेल्लेट्टर लोकुल्कुना पापाल्क मापि कियालय पोंगसेक मंता.

29 नना मीक वेहांतन, नावा बाबाना राज्यमते पूना तरिकाते ई अंगुर पानकम उनाना रोञ्जुनदाका, मर्रा बस्केने अंगुर पानकम उन्नोन,” इंचि येसु इत्तोर.

30 पजा ओर, पेनदा स्तुति कियाना उंदि पाटा पारसि, जय्तुन मराकुना गुट्टापोर्रा होत्तुर.

पत्रु तपिचुकुनना बारमते येसु मुन्नेने वेहतोर

(मरकुस 14:27-31; लुकाल 22:31-34; योहान 13:36-38)

31 अस्के येसु ओर्कुन इल्हा इत्तोर. “इय्याला नर्कळ्ळक मिमेट अंटोर नाकुन होळसि वित्तंतित्त, बारित्ते, गोर्रै कोहानोन नना हळ्ळंतन, मंदता गोर्रै बैदव-हेके पायसि वित्तंतां. ✧ इंचि दर्मसास्त्रमते रासि मंता.

32 गानि नना हासि, मर्रा जीवाते तेदतंका, मीकनना मुन्ने गालिल एरियाते दांतन,” इत्तोर.

33 अस्के पत्रु, “अंटोर नीकुन होळसि होनिनागानि, नना नीकुन बस्केने होळसि होन्नोन गुरु,” इंचि येसुन इत्तोर.

34 “नना नीकु निजम वेहचंतन, इय्याला नर्कडकु गोगोड कूसाका मुन्ने निमे मूड मल्लां नाकुन एरपाट किच्च्योन इंतिन,” इंचि येसु पत्रुन इत्तोर.

35 गानि, “ओक्कला नाकु नीतोनि हामुर वायिना बेसे, नीकुन नना एरपाट किच्च्योन इंचि बस्केने इन्नोन,” इंचि पत्रु इत्तोर. अंटोर सिस्स्युल्कगुडा अल्हे इत्तुर.

गेतसेमनि जेगातगा येसु पारतना कीतोरा

(मरकुस 14:32-42; लुकाल 22:39-46)

36 येसु, ओना सिस्स्युल्कुनतोनि गेतसेमनि इनना जेगातगा एवत्सके, “नना इच्चुर मुन्ने होंचि पारतना कीसि वायनदाका मिमेट इग्गेने उद्दिदिसि मंटु,” इंचि इत्तोर.

37 पजा पत्रुन आनि जब्दिना इच्चुर मर्कुन पीसि ओनतोनि ओतोरा. अगा ओर वेल्ले दुक्कमते सिम्मरा आतोरा.

38 अस्के ओर्कुन, “नावा जीवा दांता बारे इत्ताप नाक वेल्ले दुक्कम आसेक मंता. मिमेट नातोनि इग्गेने आगसि तेल्लित्ते मंटु,” इंचि इत्तोर.

39 इच्चुर मुन्ने होंचि बोकबोर्ले अर्सि ओर इल्हा पारतना कियालय दल्लुगुतोरा, “ए बाबा, ओक्कला कुदुरते, नावा इद गोसा तपिसि होन्नि, गानि इद नावा विचारम मत्ताप आयो, नीवा विचारम मत्तापे आयि.”

‡ 26:17 पुल्लगा आयवा पिडिता हारिना पंडुगुना मोदाटा रोञ्जु पुल्लगा आयवा हारिना पंडुगुना मोदाटा रोञ्जु इत्ते दाटसि होनना पंडुगु. अरे रोञ्जु ओर दाटसि होनना पंडुगुना बोजनाल्कुनाहाटी तयारि कीतुर. ✧ 26:23 बजन संहिता 41:9 ✧ 26:31 जक्क्याह 13:7

40 पजा सिस्च्युलुकुनगा वासि हळ्वते ओर निद्रा होंचि मल्लुर. अस्के येसु पन्नू इल्हा इत्तोर. “मिमेट उंदि गंटामेडगुडा नातोनि तेल्चिते मंदा परीरा?

41 मिमेट पट्टने अर्राकौटा मननाहाटी तेल्चिते मंचि, पारतना कीसेके मंट. नना वेहताप कियालय मीवा आत्मा तयार मंता, गानि मीवा मेंदुल कमजोर मंता,” इत्तोर.

42 येसु मसंदि मल्लका होंचि, “नावा बाबा, नना इदुन उन्ने पीता इनानय्ते, नीवा विचारमे पूरा आयि,” इंचि पारतना कीतोर.

43 येसु मर्रा वासि हळ्वतस्के, ओर मंचि निद्रते मल्लुर.

44 ओर्कुन अगगेन होळसि येसु मर्रा पारतना कियालय होत्तोर. अस्केगुडा मुन्ने कीतापे पारतना कीतोर.

45 पजा सिस्च्युलुकुनगा वासि ओर्कुन इल्हा इत्तोर. “मिमेट इंदकेगुडा मीडसेक, आराम कीसेके मतिरा? हळ्वाट, मनकना रूपमते पुटतोन नाकुन पापिकुंना कय्दे पीसि हियना वेला एत्ता.

46 तेदाट, मनम दाकोम. नाकुन पीसि हियानोर दग्गेरेन एत्तोर,” इत्तोर.

येसुन पीतुर

(मरकुस 14:43-50; लुकाल 22:47-53; योहान 18:3-12)

47 येसु इव पोर्ल्ले इचेकेने मत्तोर, अचचोटेन पन्नेडु सिस्च्युलुकुना लोप्पोटोर वरोर यहदल इनानोर अगा वातोर. ओनातोनि पेद्दा पेर्मांतोर आनि यहुदि पेद्दाल्क लोहता, गुळि कावेल कियानोरा गेंग कसेहक, गुत्पां, पीसि वातुर.

48 येसुन पीसि हियानोर, “नना बोन अय्ते बुर्रांतो, ओरे येसु आंदुर, ओन दोर्का पीटु,” इंचि मुन्नेन ओर्क उंदि चिन्ह वेल्चि मत्तोर.

49 पजा यहदल बिराना येसुनगा होंचि, “जोहार गुरु” इंचि ओन बुरतोर.

50 अस्के येसु, “ना दंटातोना, निमे बद कबळ्ळक वातिन अद कीम,” इंचि इत्तस्के, अगा मल्ला मत्तोर मुन्नेळक वासि येसुनपोर्रा कय वाट्सि ओन दोर्का पीतुर.

51 अचचोटेन येसुनतोनि मत्तोरव्टे वरोनगा कसेर मल्ला, ओर दान तेंडसि पेद्दा पेर्माना वरोर दासुन हळ्कालय कसेरते हीतोर गानि, अद कसेर सिराप ओना केवदुन नेमाहकुंचि होल्ला.

52 अस्के येसु ओन, “नीवा कसेर नीवा नडिके मन्नि, बारित्ते कसेर पियानोर कसेरतेन हांतोर.

53 नना नावा बाबान तल्लिक्स मत्ते, उंदि गेंगुने वेय्कुना दूतां मनना पन्नेडु गेंगुल्लुकुन्ना बच्चुंगो वेय्कुना पेनदा दूतन नाकुन पिसागोटालय लोहचि मन्नेर, इद नीकु तेळियोना?

54 इल्हा आते दर्मसास्त्रमते नावा बारेमते रासता पोर्ल्ले बल्हा निजम आयनु? अव्टे इल्हा आयमळ गावाले, इंचि रासतद मंता,” इंचि येसु इत्तोर.

55 अस्के येसु मंदिदुन इल्हा इत्तोर. “वरोन दोंगन पिच्यालय वाताप मिमेट कसेहक, गुत्पां पीसि नाकुन पिच्यालय वातिरा? नना अय्ते रोजे गुळिते कराहसेक मीतीनि मनुंदुन, अस्के नाकुन पिया हिल्लिर.

56 गानि दर्मसास्त्रमते नावा बारेमते पेनदा कबुरतोर रासता पोर्ल्ले पूरा आयाना इंचि इल्हा जर्गता,” इत्तोर. पजा ओना सिस्च्युलुक अंतोर ओन होळसि तेगा विततुर.

पेद्दालुकुना मुन्ने येसुना जवाब

(मरकुस 14:53-65; लुकाल 22:54-55; 22:63-71; योहान 18:13-14; 18:19-24)

57 लोक्कलक येसुन पीसि कयपा इनना पेद्दा पेर्मानगा ओतुर. अगा दर्मसास्त्रम कराहना गुरूक आनि यहुदि पेद्दालुकु जमा आसि मल्लुर.

58 गानि पन्नू लक्कुटाले येसुना पज्जो-पज्जो पेद्दा पेर्माना दारादाका होत्तोर. अगा बतल आयार इंचि हळ्ळालय, दाराते होंचि कावेल कियानोरतोनि उदतोर.

59 पेद्दा पेर्मांतोर आनि पंचादितोर अंतोर येसुंक हामुरता सिक्सा हियानाहाटी ओना विरोदमते तप्पुड गवाइ प्हकतुर.

60-61 गानि बच्चुटुरो वासि ओना विरोदमते आबदुदम गवाइ हिच्यिना, ओर्कु उंदिगुडा तप्पु दोर्काहिल्ले. आकिरते इबुवर वासि, “पेनदा गुळितुन कूलाहचि दान मूड रोजकुने मर्रा दोहा परांतन इंचि ओर इत्तोर,” इसौटा गवाइ हीतुर.

62 अस्के पेद्दा पेर्मांल तेदसि, “इर नीकु विरोदमते बल्हा गवाइ हीसंतुर हळ्वा, निमे बतले जवाब हिच्यिना?” इंचि येसुन इत्तोर.

63 गानि येसु चुपचाप मत्तोर. अस्के पेद्दा पेर्मांल येसुन इल्हा इत्तोर. “जीवाते मनना पेनदा ओट्टु तिचि नीकुन पसकीसंतन, ओक्कला निमे पेनदा मर्रि, किरिस्तुन आते माक वेहा,” इत्तोर.

64 अस्के येसु ओन इल्हा इत्तोर. “निमे इत्तिन अद निजमे! गानि नना मीकु वेहांतन, इंका मुन्ने मिमेट मनकना रूपमते पुटतोन नाकुन ताकतवर पेनदा तिना बाजुंक उदुदिसि मत्तद आनि मब्बु तेपेनपोर्रा उदुदिसि वायानेके हळ्ळकिर,” इत्तोर.

65 अस्के, पेद्दा पेर्मल होंगेने ओना कपडिं हराहकुंचि, “ईर पेनदा अपमानम कीतोर. मनाकु इंका बतल गवाइ गावाले? ओना पोल्ले मिमेट केंजतिरे गदा!

66 अय्ते मिमेट बतल इतिर?” अस्के यहुदिल्क, “ओर हामुर सिक्सालायक मंतोर,” इंचि इत्तुर.

67 अस्के इच्चुर लोकुल्क येसुना तोड्डिं पोरो उस्किसि, ओन तंचि-गुदिदसि,

68 “ए किरिस्तु, नीकुन बोर तंतुर, माकु बविस्यवानि वेहा,” इंचि इत्तुर.

पत्रु येसुन एरपाट किय्योन इत्तोर

(मरकुस 14:66-72; लूकाल 22:56-62; योहान 18:15-18; 18:25-27)

69 हीके पत्रु पेद्दा पेर्माना दारातेने उदिस मत्तोर, अस्के उंदि दासि ओनगा वासि, “गालिल एरियाता येसुनतोनि निमे इंका मत्तिन गदा?” इंचि इत्ता.

70 अस्के पत्रु “निमे बतल इंचांतिनो नाकु तेळिया हिल्ले!” इंचि ओर अगा मत्तोरा अंतोर मुन्नेने इत्तोर.

71 आयंका ओर दाराताल पेय्सि गलमातागाहकु होत्तोर. अस्के इंकुंदि दासि ओन हळसि, “ईर इंका नासरेत नाटेना येसुनतोनि मत्तोर,” इंचि अगा मत्तोकुक वेहता.

72 अस्के पत्रु मरां उंदि मल्का, ओट्टु तिचि, “नना ओन बिल्कुल एरपाट किय्योन,” इंचि इत्तोर.

73 गडसेम मत्तारित्ते, अगा नित्तिसि मत्तोर इच्चुर लोकुल्क पत्रुनगा वासि, “निमे निजम ओना दंटातोने! नीवा वळकुड केंजसि निमे गालिल एरियातोने इंचि तेळियंता,” इंचि इत्तुर.

74 अस्के पत्रु, “नना ओट्टु तिचि वेहचंतन, नना आबद्दम वळकानयते पेन नाकुन तिन्नि, आ मनकन नना बिल्कुल एरपाट किय्योन,” इंचि इत्ता इनुडे गोगोड कूसता.

75 “इय्याला नर्कळक गोगोड कूसका मुन्ने, निमे नाकुन मूड मल्कां, एरपाट किय्योन इतिन” इंचि येसु पत्रुक मुन्ने वेह्लिचि मत्ता, पोल्ले मति वासि, ओर पलाते होंचि वेल्ले दुक्कमते इरगा अळतोर.

27

रोमि राज्यपाल पिलातुसना मुन्ने येसु

(मरकुस 15:1; लूकाल 23:1-2; योहान 18:28-32)

1 पंग आतारित्ते पेद्दा पेर्मालोर आनि यहुदि पेद्दाल्क अंतोर येसुन हळकना निरनायम कीतुर.

2 पजा ओन दोह्लिचि वाट्सि ओसि, पिलातुस राज्यपालुक अप्पजेपत्तुर.

यहुदल उरि दोस्सि हांतोर

(पेरितुल्कुना कबाहक 1:18-19)

3 येसुक हामुरता सिक्सा दोर्कता इंचि, येसुन पीसि हीता यहदांकु तेळियतारित्ते वेल्ले पस्तांचतोर. पजा ओर पेद्दा पेर्मालोकुक, यहुदि पेद्दालुकुक आ मुपै एंडि कल्दार्क मलाह्लिचि हीसेक,

4 “नना तपु हिल्ला मनकन हळ्कालय पीसि हीसि पापम कीतन” इंचि इत्तोर.

अस्के ओर, “माकु बतल किय्यना मंता? नीवद निमे हळकुन” इंचि इत्तुर.

5 अस्के यहुदल आ एंडि कल्दार्कुन गुळिते विसिरसि, अगाटाल पलाते होंचि उरि दोसकुत्तोर.

6 पेद्दा पेर्मालोक अव कोत्तन जमा कीसि, “वरोन हळ्कालय हीता कोत्तन, मना नियम परकारम दान पेटिते वाटा वायो,” इंचि इत्तुर.

7 दानहाटी ओर अव कोत्तनतोनि, येस्सलेमते बोरन्ना पलाताल वातोर हायानयते ओर्कुन बोदा दोसालय आंता, इंचि वरोन कुम्माना नेलि अस्तुर.

8 इंदके इंका आ नेदुन “नेत्तुर नेलि” इंचि इत्तुर.

9 अस्के थिर्मयाह इनना पेनदा कबुरतोर इत्ता पोल्ले निजम आता, अद इल्हा मत्ता: “इस्त्राएल लोकुल्क ओना दरा, मुपै एंडि कल्दार्क कीतुर, अव ओर तेंडकुत्तुर.

10 पेन नाकु वेहताप, आ मुपै एंडि कल्दार्कुनतोनि, कुम्माना नेलि अस्तुर.”*

पिलातुस येसुन पूसकीतोर

(मरकुस 15:2-15; लूकाल 23:3-5; 23:13-25; योहान 18:33-38)

* 27:10 थिर्मयाह 32:6-9; जकय्हा 11:12-13

11 पजा येसुन पिलातुस राज्यपालना मुन्ने निपिस्तस्के, राज्यपाल ओन, “निमे यहुदिल्कुना राजाना?” इंचि पूसकीतोर. अस्के “निमे इंचेकेने गदा,” इंचि येसु इतोर.

12 पेद्दा पर्मांतोर आनि यहुदि पेद्दाल्क ओनापोर्रो दोसेल्क दोसतुर. गानि येसु बतले जवाब हिया हिल्लोर.

13 अस्के पिलातुस येसुन, “ईर नीवा पोर्रो बचुंगो तप्युक दोस्सेक मंतुर, नीकु केंजा वासेक हिल्लेना?” इंचि इतोर.

14 गानि ओर उंदि पोल्ले इंका वळका हिल्लोर. अदुनहाटी पिलातुसुंक वेल्ले इंचंत्रम आता.

15 दाटसि होनना पंडुगुना रोजुने, लोकुल्कुनाहाटी बोन्नना वरोन कैदिन होळसनद राज्यपालना रिवाज मत्ता.

16 अद वेलाते अगा जेलने वरोर पोरोल पेय्त्ता “बरब्बल” इनना कैदि मत्तोर.

17 लोकुल्क अगा जमा आतारित्ते पिलातुस ओर्कुन, “नना बोन होळसकन इंचि मीवा मनसु मंता, बरब्बन होळसकना हिलाकोटे किरिस्तु इनना येसुना?” इंचि पूसकीतोर.

18 येसु तप्यु कियकोन्ना ओना कबाह्कुन ह्ळसि कळक पोतताहेकेन ओन तच्चि नाक अप्पजेपतुर इंचि पिलातुसुंक एरपाटे मत्ता.

19 अचोने आय्का पिलातुस न्यायम कियालय बस्के अय्ते गद्देपोर्रो उदतोर अस्के ओना मुत्तोनहेंदाल उंदि कबुर वाता, अद इल्हा मत्ता, “नाकु उंदि कला वाता, ओर तप्यु हिल्लुवा मनकल आंदुर. ओन निमे बतले कियमा. नना ओनाहाटी इय्याला पोद्दला दुक्कमते मत्तन.”

20 गानि हीके पेद्दा पर्मांतोर आनि पेद्दाल्क, बरब्बन होळसिसि येसुन हक्कना इंचि इनालय लोकुल्कुंक एक्किस्तुर.

21 राज्यपाल ओर्कुन, “नावा मुन्ने बरब्बल आनि येसु इव्वुर मंतुर, नना मीवाहाटी ईरा इव्वुरा लोप्पोटाल बोन होळसना इंचि मीवा मनसु मंता?” इंचि पूसकीतोर. अस्के ओर, “बरब्बन” होळसना इंचि इत्तुर.

22 “अय्ते मरि, ‘किरिस्तु’ इनना येसुन बतल कियना?” इंचि पिलातुस ओर्कुन पूसकीतोर. अस्के “ओन कूसुनपोर्रो मोल्लां कोहकिस हक्का,” इंचि इत्तुर.

23 “बारि, ओर बतल तप्यु कीतोर?” इंचि पिलातुस पूसकीतस्के, “ओन कूसुनपोर्रो मोल्लां कोहकिस हक्का” इंचि ओर जोरसे वरगेयतुर.

24 इचो वेल्ले लोकुल्कुना मुन्ने नावद बतले ताका पर्रो. ओर लोल्लि कीतुर इल्हा पिलातुस इनकुंचि, इच्चुर एर पीसि लोकुल्कुना मुन्ने कय्क नोर्सि, “ईना हामुटे नावद कय हिल्ले, मिमेटे दीना जबाबदारी मंतरि,” इंचि इतोर.

25 अस्के ओर अंतोर वरगेयसि, “ईना हामुटा जबाबदारी मावा पोर्रो आनि मावा पिलाल्कुना पोर्रेन मन्निकांटी,” इंचि इत्तुर.

26 अस्के पिलातुस, बरब्बन होळसिसि, येसुन बारे पोद्देटे तंचि, कूसुनपोर्रो मोल्लां कोहकिस हक्कालय सिपाइल्कुना कय्दे अप्पजेपतोर.

येसुन कूसुनपोर्रो वेलाड वाटंतुर

(मरकुस 15:16-32; लूकाल 23:11; 23:26-43; योहान 19:2-3; 19:17-27)

27 पजा सिपाइल्क येसुन पीसि राज्यपालना किल्लाते ओतुर. अगा सिपाइल्कुना पूरा गेंगुन केया वेहिचि ओना सुट्टु जमा कीतुर.

28 ओना कपडिं कुळाहिचि, ओन्क एर्रा रंगुना कोट केराहतुर.

29 हाहकुना वेलिता किरिस्टम कीसि ओना तल्लक दोसतुर, ओना तिना कय्दुक उंदि दुरसोत्ता कट्टे हीतुर. सिपाइल्क ओना मुन्ने टोंगरां ऊनसि, “यहुदिल्कुना राजांक बस्केने हामुर हिल्ले,” इंचि ओन इरगा कारेड्डाल्क कीतुर. ³⁰ आयंका ओर ओनपोर्रो उस्कतुर, ओनागटा कट्टे इगकुंचि अदे कट्टेटे ओना तल्लापोर्रो तंतुर.

31 ओन इरगा कारेड्डाल्क कीतारित्ते ओर केर्सि मत्ता कोट तेंडसि, ओना कपडिं ओन्के केराहतुर आनि कूसुनपोर्रो वेलाड वाटालय पलाते पीसि ओतुर.

32 येसुन पीसि पलाते होननेके, कुरेनि सहरतोर वरोर सिमोन इनना मनकल कलियतोर. सिपाइल्क ओन वेराहचि येसुना कूस कांजा वेहतुर.

33 आयंका ओर गोलगोता इत्ते, “तला बोसेम” इनना जेगातगा एवतारित्ते,

34 अंगुर पडिना पानकमते कयमुल* कल्पिसि येसुंक उनालय हीतुर, ओर दान नाकिसि ह्ळसि, उन्नोने इतोर.

35-37 अस्के ओन कूसुनपोर्रो वेलाड वाटतुर. वाटतारित्ते, “येसु, यहुदिल्कुना राजाल आंदुर,” इंचि उंदि ओना तप्यु हुप्सना बोर्ड रासि येसुना तल्लापोर्रो वेलाड वाटतुर. पजा सिपाइल्क सिट्टे वाट्सि ओना कपडिन पंचकुत्तुर. आनि ओना कावेल कीसेके अग्गेन उद्दिदिसि मत्तुर.

* 27:34 कयमुल सेदु इंचि अर्तम.

- 38 इंका इव्वुर दोंगालकुनगुडा ओना पक्का पीसि हीके वरोन हेके वरोन कूसुनपोरोँ मोल्लां कोहकतुर.
 39-40 हरि पीसि होनानोर-वायानोर तल्लां उपसेके, “ओ! गुळितुन कुलाह्चि मूड रोजकुने दोहानोन, ओक्कला निमे पेनदा मर्रिन आते, कूसताल रेप्सि निमे नीवा जीवातुन पिसागोटकुन,” इंचि कारेड्डाल्क कियंदुर.
 41 अचोने आयका पेद्दा पेर्मालोर, दर्मसास्त्रम कराहना गुम्ल्क आनि यहुदि पेद्दाल्कगुडा अल्हे कारेड्डाल्क कीतुर.
 42 अष्टेटाल इच्चुर, “ईर अय्ते इंकावरोन पिसागोटतोर गानि ओनद ओर पिसागोटकुना परसेके हिल्लोर. ईर इस्राएलतोर राजाल गदा! अय्ते कूसुनपोरोँटाल हिळ्ळ रेप्सि वाथिरकांटी, अस्केने मोमोट ईनपोरोँ विस्वासम ईरा परकोम,” इंचि इत्तुर.
 43 इंका इच्चुर बारे, “ओन्क अय्ते पेनदापोरोँ बरोसा मंता. इंका ओर, ‘नना पेनदा मर्रिन आंदुन,’ इंचि इत्तोर. अदुनहाटी इंदके पेनदा मनसु मत्ते ओन पिसागोट्टि,” इंचि इत्तुर.
 44 अल्हेने येसुना पक्काते कूसुंक वेलाड वाट्टिस मत्ता दोंगाल्कगुडा ओना अपमानम कीतुर.

येसुना हामुर

(मरकुस 15:33-41; लूकाल 23:44-49; योहान 19:28-30)

- 45 पजा पिय्यटा पन्नेड एगानस्केटाल अय्ते मूड एगनदाका पूरा बूमिअंता हीकट आता.
 46 दगोरा-दगोरा मूड एगनेके येसु अळसेके जोरसे वरगेयसि, “एलि, एलि, लमा सबकतनि.” इत्ते, “ना पेनदुना, ना पेनदुना निमे नाकुन बारि होळसीतिन?” इंचि इत्तोर.
 47 अस्के अगा नित्तिसि मत्तुर इच्चुर लोकुल्क, “ओर एलियान केयसंतोर बारे” इत्तुर.
 48 पजा ओराष्टेटाल वरोर मनकल वितसि होचि पुल्लटा अंगुर पंडिना पानकमते मुळाहता स्पंजां तत्तोर आनि दुड्डुना कोस्सक ताससि येसुना तोळ्ळुगा नाकालय हीतोर.
 49 अस्के कळमतोर, “जेरासेप आगाट, एलियाल ईन पिसागोटालय वांतोरा वायोरा हळकोम,” इंचि इत्तुर.
 50 येसु मसंदाम अळसेके जोरसे वरगेयसि जीवा होळस्तोर.
 51 हळ्ळाट! अस्केने गुळिता परदा, पोरोँटाल हिळ्ळदाका हर्सि रोंडु तुकडां आता, बूमि अदुलता, गुट्टां नैँ हीसि पैतां.
 52 पेनदा लोकुल्क बोर अय्ते हातुर ओराष्टेटाल वेल्ले मंदि जीवा अर्रिसि बोंदानाल मर्रा तेदतुर.
 53 येसु मर्रा जीवाते तेदत्सके, ओर अंतोर बोंदानाल पेप्सि येस्सलेम इनना पवित्र सहरते वेल्लेट्टुर लोकुल्कुक दिसतुर.
 54 अगा जर्गुता गटनां आनि बूमि अदुलतद हळ्ळसि, नूर मंदि सिपाइल्कुना पोरोँ मनना अदिकारि आनि येसुनगा कावेल कीसेक मत्ता सिपाइल्क वेल्ले वेरियतुर. वेरियसि, “ईर निजमे पेनदा मर्रि आंदुर” इंचि इत्तुर.
 55 येसुना सेवा कीसेक गालिल एरियाताल वातव वेल्लेने मुर्ताहक अगा लक्कुटाल हळ्ळसेक मत्तां.
 56 अळुने मरियम मगदलेनि, याकोब आनि योसेप ईरा यावल मरियम आनि जब्दिना मर्रुना यावल, इव अन्नि अगा मत्तां.

येसुना गति कियुड

(मरकुस 15:42-47; लूकाल 23:50-56; योहान 19:38-42)

- 57 आयंका पोळ्ळु होनना वेलाक अरिमताइ नाटेनाल वरोर योसेप इनना सिरमंत मनकल वातोर. ओर इंका येसुना सिस्युड मत्तोर.
 58 योसेप पिलातुसुनगा होचि, येसुना पीनगु गावाले इंचि इत्तोर. अस्के पिलातुस, “येसुना पीनगु, योसेपुंक हीम्टु,” इंचि सिपाइल्कुक आदेस हीतोर.
 59 योसेपु आ पीनगुन पूना कपडिते हुटतोर.
 60 बंडातुन तुल्हाचि ओनाहाटी तयार कीता पूना बोंदाते, येसुना पीनगुन इर्रिसि, बोंगाकु उंदि पेद्दा बंडातुन अड्डम दोसतोर. पजा अगटाल पेप्सि होत्तोर. 61 गानि मगदलेनि नाटेना मरियम आनि इंकुंदि मरियम इव बोंदा मुन्ने उदिस मत्तां.

येसुना बोंदक कावेल कियमळ

- 62 नोमकेमता मुन्नेटा रोजुने पेद्दा पेर्मालोर्क आनि परिसिल्क पिलातुसुंक कलियसि,
 63 “महाराज, आ बोंकिचचना मनकल जीवाते मननेके, ‘नना हासि मूड रोजकुंक मर्रा जीवाते तेदंतन’ इंचि इत्तोर, अद माकु मते मंता.
 64 दानहाटी मूड रोजकुनदाका ओना बोंदातगा कडक कावेल इर्रानद आदेस हीम. बारित्ते ओना सिस्युल्क बस्केनना वासि दोंगातनमते ओना पीनगुन ओयानूर आनि ‘येसु मर्रा जीवाते तेदतोर’ इंचि लोकुल्कुन बोंकिचानूर. इल्हा गिंटा आयानय्ते मुन्नेटकना इंका वेल्ले बेकार आंता,” इंचि वेहतुर.
 65 अस्के पिलातुस, “मिमेट सिपाइल्कुन ओम्टु, ओसि ओना बोंदातगा कडक कावेल ईरट,” इंचि वेहतोर.

66 अस्के ओर सिपाइलकुन ओसि येसुना बोंदातगा कडक कावेल इरतुर. बोंदक अड्डम दोसता बंडाकु सरकार सिक्का वाटसि अगा कावेल कीसेके मत्तुर.

28

येसु जीवाते तेदतोर

(मरकुस 16:1-10; लुकाल 24:1-12; योहान 20:1-10)

1 नोमकेम आतारित्ते इंकुंदि रोजु अथ्यारम पंग आयनेके मगदलेनि नाटेना मरियम आनि दाना दंटातद इंकुंदि मरियम, बोंदातुन हळालय होत्तां.

2 अस्के उंदि पेनदा दूता स्वर्गमतल अगा रेयताहाटी अगा पेद्दा बुकंप आता. पजा आ पेनदा दूता बोंदक अड्डम मत्ता बंडातुन तेंडसि, अदे बंडापोरों उद्दुता.

3 दाना रूपम पोळ्दुनालेसी जगा-जगा मेसेक मत्ता, दाना अंगि बारे बर्पलेहका तेल्लगा मत्ता.

4 दान हळसि कावेल कियानोर इरगा वेरियसि, गजा-गजा वनकुसेक, अल्हेने हाताप आतुर.

5 अस्के पेनदा दूता इल्हा इत्ता. “वेरियमट, कूसुनपोरों वेलाड वाट्सि हक्कता येसुन मिमेट प्हकसेक मतिट, इद नाकु एरपाटे मंता.

6 गानि ओर इग्गे हिल्लोर, ओर वेहताप मल्लि जीवाते तेदतोर. वट्ट, ओना पीनगु इरता जेगातुन हळ्ळाट.

7 इका बिराना होंचि ओना सिस्युल्लुकुं, ओर हामुरताल जीवाते तेदतोर, ओर मीकन्ना मुन्नेने गालिल एरियाते होंचेक मंतोर, अगा ओर मीकु दिस्सानुर, इंचि वेहट. बतल अथे नना मीकु वेहतन, अदुन मति इरॉट,” इंचि आ मुर्ताह्कुन इत्ता.

8 अस्के आ मुर्ताह्क वेंते, वेल्लेन आनंदमते, बोंदातगाटाल जटपेट पेय्सि ओना सिस्युल्लुकुं इद कबुर वेहालय विततां.

9 अरपाटल पेय्सि होननेके, येसु अवंक कलियसि अवुन, “बेस पिस्सट,” इंचि इत्तोर. पजा अव ओना दमगेर होंचि कालक मोळ्ळकांतां.

10 अस्के येसु अवुन, “वेरियमट होंट, नावा तम्मुह्कुं गालिल एरियाहेके होनालय वेहट, अग्गेन ओर नाकुन हळ्ळतुर,” इंचि इत्तोर.

कावेल कियानोरा आबद्दम गवाइ

11 अव सिस्युल्लुकुं वेहालय होंचेकेन मत्तां, अच्चोटेन बोंदातगा कावेल कीसेक मत्तोर इच्चुर सिपाइलक सहरते होत्तुर, होंचि अगा जर्गुतदंता पेद्दा पेर्मांलोकुक वेहतुर.

12 अस्के ओर यहुदि पेद्दालुकुं कलियसि उंदि उपायम कीतुर. सिपाइलुकुं वेल्लेन कोत्तां हीसि वेहतुर गदा,

13 “मोमोट निदते मननेके ओना सिस्युल्लुकुं नर्का वासि ओना पीनगुन दोंगातनमते ओतुर, इल्हा लोकुल्लुकुं वेहट.

14 ई पोल्ले गिटा राज्यपालना केव्दे अरान्यते मोमोट ओन समत कीसि मीकु पोल्ले वायकुंटा कीतोम,” इंचि इत्तुर.

15 अस्के ओर कोत्तां एतसि वेहताप कीतुर, ई पोल्ले यहुदिल्लुकुना लोप्पो इदवेरादाका इका इल्हे ताकसेक मंता.

येसु सिस्युल्लुकुनतोनि वळकांतोर

(मरकुस 16:14-18; लुकाल 24:36-49; योहान 20:19-23; प्रेरितुल्लुकुना कबाहक 1:6-8)

16 अद आतंका पदाकोंडु मंदि सिस्युल्लुकुं गालिल एरियाते येसु वेहता गुट्टापोरों होत्तुर.

17 अगा येसुन हळसि ओन मोळ्ळतुर. अथनागानि इच्चुर सिस्युल्लुकुं अनमानम मत्ता.

18 अस्के येसु ओरा दमगेर होंचि ओर्कुंन इल्हा इत्तोर. “स्वर्गमते आनि बूमिपोरोंटा अदिकारम अंता नाकु हीसि मंता.

19 अदुनहाटी मिमेट होंचि दुनियाता अनि देसेल्लुकुना लोकुल्लुकुन सिस्युल्लुकुं कीम्प्ट. ओकुं बाबाना पोरोलते, मर्रिना पोरोलते आनि पवित्र आत्माता पोरोलते बापतिस्मा हीम्प्ट.

20 नना मीकु हीता आदेस परकारम ओकुं ताकालय करहट, ई दुनिया मुळगना आकिर वेलादाका नना बस्केळ्ळक मीतोने मंनंतन,” इत्तोर.

मरकुस मरकुस रासता बेसता कबुर

इद पुस्तकमता बारेमते गिचचो परिचयम

रासतोना पोरोल: मरकुस

रासता कालम: इसवि सन 60-64

मरकुस येसुना वरोर सिस्युड मत्तोर. पेनदा मरिं येसु किरिस्तु लोकुकुनाहाटी बतल-बतल कीतोर, इवुना बारेमते ओर इद पुस्तकमते रासतोर. इद बेसता कबुर, असल अध्ये सामिन विस्वासम कियवोराहाटी रासतोर. अदुनहाटी येसु सामि कराहता पोल्लेकन्ना, ओर कीता इचंत्रमाता कबाहकनपोर्री एक्को जोर हीसि रासि मंता.

अस्के येसु सामि देय्यालक पीसि मत्ता बचट्टुकुनो ओरवेटाल देय्यालकन गेदमिसि, ओर्कुन बेस कीतोर. अल्हेने बचचुट्टो एळ्ळिकने, तकलिपकुने मत्तोर्कुन, गुड्डिकुन गनिर्कुन बेस कीतोर. येसु सामि लेक्का हिल्वचचुं अद्बतमातव आनि महिमातव कबाहकगुडा कीतोर. हेय्यं वेय्यकुना मंदिक हेय्यं हारिने पीरमेड गाटो दोसमळ, हातोर्कुन जीवा अरहमळ, एतपोर्री ताकमळ इल्हा वेल्लेने इचंत्रमाता कबाहक कीतोर.

असल येसु इगे बूमिपोर्री बल्हा पिसतोर, बतल-बतल कीतोर, कूसुन पोर्री मोल्लां कोह्विसि वेलाड वाटसि हळ्ळता पजा मूड रोजकुने बल्हा तेदतोर, मरं मल्सि स्वर्गमते होंचि पेनबाबाना पक्कते उद्दिंसि दुनियातुन बल्हा ताकिचेके मंतोर, इवन्नि इद पुस्तकम हदविते तेळियंता.

अदुनहाटी बो-बोर अयेते पेन पोर्री विस्वासम कीसि दान मोळ्ळंतुरो ओर्क बस्केळ्ळक पिससना पिस्वर दोर्कता इंचि इद पुस्तकमते रासि मंता.

बगा बतल मंता

बेसता कबुर सुस्व आयमळ 1:1-13

गालिलिते लोकुकुना नड्डुम येसु सेवा कबळ कीतोर 1:14-9:50

गालिलि एरियाताल येस्सलेमदाका येसुना सेवा कबळ 10:1-52

येस्सलेमते येसुना आकिर वारम 11:1-15:47

येसु हासि मरं जीवाते तेदमळ 16:1-8

येसु सिस्युलुकुनतोनि वळ्ळिसि स्वर्गमते होनमळ 16:9-20

बेसता कबुर सुस्व आयमळ

(मत्तयाल 3:1-11; लूकाल 3:2-16)

1 पेनदा मरिं, येसु किरिस्तुना बेसता कबुर इल्हा सुस्व आता.

2 तेदता कबुरतोर यसायाहना पुस्तकमते, “हळ्ळा! नना नीकन्ना मुन्नेने नावा कबुरतोन लोहंतन. ओर नीवाहाटी हरिं तयार कीतोर.” इंचि रासि मंता.*

3 वरोना अल्किर बय्लि जेगाते, “सामिनाहाटी हरिं तयार कीम्टु, ओना हरिं सवरगा कीम्टु,” इंचि केंजा वासेक मंता,* इल्हा बापतिस्मा हियना योहानुना बारेमतेन पेन वेहचि मत्ता.

बापतिस्मा हियना योहान

4 पेनदा कबुरतोर रासतापे बापतिस्मा हियना योहान बय्लि जेगाते वासि लोकुकुकुं इल्हा वेहालय दल्यतोर, “कीता पापालुकुन ओक्कुचि मनसु मार्सकुंचि बापतिस्मा येतानय्ते, पेन मीवा पापालुकुन मापि कीता.”

5 इद केंजसि पूरा यहूदिया राज्येमते, येस्सलेम सहरते मंदना लोकुकुकु ओनगा वातुर, वासि ओरा पापालुकु ओक्कुंचि, ओनहेंदाल योर्दन ब्रेटे बापतिस्मा येतकुत्तुर.

6 योहान लोटापेटा बूराते तयार कीता कपडिं केरसि तोल्दा पट्टा नडिक तासकुनुंदुर. ओर गोल्लाबामां आनि तेने इवे तिडि तिनुंदुर.

7 “नाकन्ना सक्तिमंतुड नावा पज्जोटाल वासंतोर. नना ओना मुन्ने वंगिसि, ओना बूटकुना नोंडेन लेहना लायकगुडा हिल्लेन.

8 नना मीक एतोनि बापतिस्मा हीतन गानि ओर मीक पवित्र आत्माते बापतिस्मा हियानुर,” इंचि योहान वेहुंदुर.

येसु बापतिस्मा येतमळ
(मत्तयाल 3:13-17; लूकाल 3:21-22)

9 अब रोजकुने येसु गालिल एरियाता नासरेत सहरताल वासि, योर्दन बेढेते योहानुनाहेदाल बापतिस्मा येतकुत्तोर.

10 येसु बस्के अयेते एताल पलाते वातोर, अस्केने मब्बु बैय्यरा आयानद आनि पवित्र आत्मा पावरेम पिट्टेलेसी ओनपोर्रो रैयानद हळतोर.

11 अचचोटैन मब्बुनाल, “निमे नावा पावरमगल्ला मरिन आदिन. नीहेदाल नना वेल्लेने कूस मंतन,” इंचि उंदि अल्किर कैजावाता.

पेनदा दूतां येसुना सेवा कियमळ
(मत्तयाल 4:1-11; लूकाल 4:1-13)

12 अद आता पजा पेनदा आत्मा बिराना येसुन बय्लि जेगाताहेके लोहता.

13 अगा नल्चै रोजकु केडा जिवरासिना नड्डुम मननेके, देय्यम येसुनगा वासि, ओना पट्ट हळता. पजा पेनदा दूतां वासि ओना सेवा कीतां.

येसु पेनदा पोल्ले वेहालय सुस्व कियमळ
(मत्तयाल 4:12-17; लूकाल 4:14-15)

14-15 हेरोद राजाल योहानुन जेलते वाटता पजा, येसु गालिल एरियाते वासि, “पेन इत्ता वेला पुरागा आसि, पेनदा राज्येम दगेर्के एत्ता. अदुनहाटी मिमेद मनसु मार्सकुचि पेनदा बेसता कबुरपोर्रो विस्वासम ईरट,” इंचि वेहालय दल्गतोर.

येसुना मोदाटा सिस्युल्लुकु
(मत्तयाल 4:18-22; लूकाल 5:1-11)

16 येसु गालिल समुद्रम ओइडु पीसि होननेके सिमोनन आनि ओना तम्मुर अंदरियन हळतोर. ओर जिम्मां पिय्यानोर आताहाटी, समुद्रमते ओल्लां वाटसि जिम्मां पीसेक मत्तोर.

17 अस्के, “नावा पज्जो वट, नना मीकुन मनकालोर्कुन नहगा तायानोर कीतन,” इंचि येसु ओर्कुन इत्तोर.

18 अस्के ओर, बिराना ओरा ओल्लां अग्गेन होळसि ओना पज्जो होत्तोर.

19 येसु इकिचो मुनेळ्ळक होत्तारिते जब्दिना मर्कु याकोब आनि ओना तम्मुर योहान डोंगाते ओल्लां सवरिचेंके हळतोर.

20 येसु ओर्कुन बिराना केयत्सके, ओर ओरा बाबाल जब्दिन आनि बूतिनोर्कुन अग्गेन डोंगाते होळसि ओना पज्जो होत्तोर.

येसु देय्यम पीतोन बेस कीतोर
(लूकाल 4:31-37)

21 ओर अंतोर कूळसि कपर्नाहम सहरते होत्तोर. अगा येसु नोमकेम रोजुने दर्मसास्त्रम कराहना लोते होचि पेनदा पोल्ले कराहलय दल्गतोर.

22 येसु पेनदा पोल्ले ओरा दर्मसास्त्रम कराहना गुस्लुकुनलेसी आयो गानि अदिकारम मत्ताप कराहतोर. अदुनहाटी ओना कराहमळतुन कैजसि लोकुलक वेल्ले इचंन्रम आतुर.

23 अदे दर्मसास्त्रम कराहना लोते वरोर देय्यम पीता मनकल मत्तोर.

24 ओर येसुन हळसि, “निमे बोन आदिनो नाक एरपाटे, निमे नासरेत सहरता येसुन, पेनदा पवित्र मनकन आदिन. मातोनि नीकु बाता कबळ? माकुन नासडेम किन्यालय वातिना?” इंचि वरगेयसि इत्तोर.

25 अद कैजसि, “निमे चुपचाप मन, ओनागटाल पलाते पेयसा,” इंचि येसु जोरसे गदरिचतोर.

26 अस्के आ देय्यम ओन गजा-गजा ऊपसि जोरसे वरगेयसेके ओना लोप्पोटाल पेय्सि होत्ता.

27 अदुन हळसि अगा मत्तोर अंतोर इचंन्रम आसि, वरोंक-वरोर इल्हा वळकालय दल्गतुर, “इद बसोंटा पोल्ले, इद अयेते पूना बोदा आं, ईर अदिकारमते देय्याल्लुकुन ओना लोप्पोटाल पेय्सि होटु इंचि आदेस हीतोर, अब ईना पोल्ले केजसेक मतां.”

28 इल्हा येसु अगा कीता गटनना बारेमते पूरा गालिल एरिया आनि सुट्टु-मट्टु मत्ता अन्नि नाहकुने तेळियसि होत्ता.

येसु वेल्लेटोर्कुन बेस कियमळ
(मत्तयाल 8:14-17; लूकाल 4:38-41)

29 येसु आनि ओना सिस्युल्लुकु सिमोन, अंदरियल, याकोब, योहान दर्मसास्त्रम कराहना लोताल बिराना पलाते पेय्सि सिमोन आनि अंदरियना लोन होत्तुर.

30 अगा सिमोनना पोरड एळकि वासि मीडसि मत्ता. इद पोल्ले अगा मत्तोर बोरो येसुकु वेहतुर.

31 येसु होचि दाना कय पीसि तेहतोर. अस्के दाना एळकि रेय्सि, अद ओरा सेवा कियालय दल्गता.

32 पजा पोळ्द होचि, लोकुलक बिमारते मत्तोर्कुन, देय्याल्लुकुन पीतोर्कुन अंतोर्कुन येसुनगा पीसि वातुर.

33 पूरा सहरतोर येसु मत्ता लोता गलमातगा जमा आतुर.

34 येसु तीरतीरकुना बिमार्क मत्तोर वेल्लेटोर्कुन बेस कीतोर, देय्याल्क पीसि मत्ता वेल्लेटोर्कुना देय्याल्कुन पेचाह्चि गेटुमतोर. अब ओन एरपाट कियुंदु, अदुनहाटी ओर अबुन वळ्का हिया हिल्लोर.

येसु वरोर पारतना कियमळ
(लकाल 4:42-44)

35 येसु इकुंदि रोज हक्केरेने बय-बय आयानेके तेदसि बोर हिल्वगा होंचि पारतना कीतोर.

36 सिमोन आनि ओना दंटातुर तेदता पजा येसुन पहकालय दलगतुर.

37 पह्किसि-पह्किसि दोर्किचि, “नीकुन अंतोर पह्कसेक मंतुर,” इंचि येसुन इलतुर.

38 अस्के येसु ओर्कुन इल्हा इत्तोर, “मनम पकापीसि मत्ता नाहकुने दाकोम, आ नाहकुने पेनदा पोर्लें वेहमळ गावाले. इद कबळताहाटीगे नना वातन.”

39 अल्हा ओर पूरा गालिल एरियाते तिरियसेके, ओरा दर्मसास्त्रम कराहना लोहकुने होंचि पेनदा पोर्लें वेहचेके, देय्याल्क पीसि मत्तोरगटाल देय्याल्कुन पेचाह्चि गेटुमसेके होत्तोर.

येसु कुस्ट रोगमतोन बेस कियमळ
(मत्तयाल 8:1-4; लकाल 5:12-16)

40 अल्हा होंचेके मननेके वरोर कुस्टरोगम आता मनकल येसुनगा वासि, ओना काल्कुनपोर्री अर्सि, “निमे इन्कुलते नाकुन बेस किया परातिन,” इंचि येसुन विनंति कीतोर.

41 येसुंक ओनपोर्री दया वाताहेका कय मुन्नेळ्क कीसि ओन इट्सि, “निमे बेस आयगोम इंचि नावा मनसु मंता. निमे बेस आम” इंचि इत्तोर.

42 इत्ता इनुडे ओना कुस्टरोगम होत्ता ओर बेस आतोर.

43-44 अस्के, “हळा! इगे जर्गतद बोर्के वेहमा. गानि निमे होंचि मीवा पेर्माक हुप्सा. कुस्टरोगमताल निमे बेस आता गवाइ इंचि मसाल वेहता मोक्कु हीम. अदुन हळसि निमे बेस आतिन इंचि लोकुकुंक एरपाट आंता,” इंचि येसु ओन्क गट्टिगा वेहतेर.

45 गानि आ मनकल अगटाल पेय्सि अद पोर्लें अंतोर्क वेहालय दलगतोर. अस्के, “अंतोर्क तेळियता, नाकुन हळसि लोकुल्क मंदांन-मंदां वांतुर,” इन्कुचि येसु कळमता नाहकुने होना हिल्लोर. ओर अल्किर हिल्वा जेगाते मत्तोर, अगागुडा लोकुल्क नालु-मूलानाल ओना जाडा पीसि होत्तुर.

2

लकवा बिमारतोन बेस कियमळ
(मत्तयाल 9:1-8; लकाल 5:17-26)

1 कोनि रोजकु आतारित्ते येसु कपर्नाहम सहरते मल्सि वातोर, ओर लोन मंतोर इंचि लोकुकुंक तेळियसि होत्ता.

2 अस्के लोतागा इचोर वेल्ले लोकुल्क जमा आतुर गदा, गल्माते नित्तालय जेगागुडा मनाहिल्ले. येसु ओर्कु पेनदा पोर्लें कराहतेर.

3 अद वेलाते नालुर मनकालोर वरोर लकवा बिमारतोन पीसि येसुनगा वातुर.

4 गानि वेल्ले गर्दि मत्ताहाटी ओर येसुनगा ओया पराहिल्लुर. अचते ओर लोतपोर्री कटुल पियानचो बोंगा कीसि लकवा बिमारतोन येसुनगा रहतुर.

5 येसु ओरा विस्वासमतुन हळसि, आ लकवा बिमारतोन, “कोको, नीवा पापाल्क मापि आतां,” इंचि इत्तोर.

6-7 अस्के अगा उट्टिदसि मत्तोर लोपोटाल इचुर दर्मसास्त्रम कराहना गुस्ल्क, “ईर इल्हा बारि वळ्कसंतोर? ईर पेनदा अपमानम कीतोर. पेन तप्पा इंका बोर पापाल्कुन मापि किया पर्र, ” इंचि ओर-ओर मनसुने विचारम कियालय दलगतुर.

8 ओर-ओर विचारम कियानद येसु ओना मनसुने बिराना एरपाट कीसि, “मी मनसुने मिमेट इसोंटा विचारम बारि कीतिर?

9 बद अल्कगा मंता? लकवा बिमारतोन, “नीवा पापाल्क मापि आतां इंचि इनमळा हिलाकोटे, नीवा कटुल तेहकुचि ताका इनमळ?” इंचि पूसकीतोर.

10 पजा, “गानि मनकना रूपते पुटतोन नाकु, ई बूमिपोर्रीटा पापाल्क मापि कियाना अदिकारम मंता इंचि मीक तेळियोना?” इंचि इत्तोर. पजा आ लकवा बिमारतोन,

11 “नना नीकु वेहासेके, तेदसि नीवा कटुल तेहकुचि लोन होन,” इंचि इत्तोर.

12 इत्ता इनुडे ओर तेदसि कटुल पीसि अंतोर मुन्नेटाल पेय्सि होत्तोर. अदुन हळसि अंतोर इचंनम आतुर. “इल्हा मोमोट बस्केने हळा हिल्लोम” इंचि पेनदा स्तुति कियालय दलगतुर.

येसु लेविन केयमळ

(मत्तयाल 9:9-13; लूकाल 5:27-32)

13 येसु मर्रा उंदि मल्का समुद्रम ओड्डुंक होतोर. वेल्लेटुर लोकुल्क ओनगा वातुर अस्के येसु ओर्कु पेनदा पोल्ले कराहलय दल्यतोर.

14 कराहमळ आतस्के अगटाल होननेके अल्पिना मर्री लेवि, कर वसूल कियना नाकातगा उद्दिसि मत्तद हळतोर. हळसि ओन, “नावा पज्जो वा,” इंचि इत्तस्के ओर तेदसि ओना पज्जो होतोर.

15 पजा येसु लेविना लोन गाटो तिचेके मननेके वेल्लेटुर कर वसूल कियानोर आनि पापि लोकुल्क वासि येसु आनि ओना सिस्युल्कनतोनि गाटो तिनालय उदतुर. ओरव्टे वेल्लेटुर येसुन विस्वासम कीतोर मत्तुर.

16 कर वसूल कियानोरतोनि आनि पापि लोकुल्कनतोनि येसु गाटो तिनाद परिस्लिक् आनि दर्मसास्त्रम कराहना गुस्लक हळतुर. हळसि, “कर वसूल कियानोरतोनि आनि पापि लोकुल्कनतोनि येसु गाटो बारि तितोर?” इंचि ओर येसुना सिस्युल्कन पूसकीतुर.

17 अद केंजसि येसु ओर्कुन इल्हा इतोर, “बिमार हिल्लोर्कुंक डाक्टरना अक्सरम मन्यो गानि बिमार मत्तोर्कुंक डाक्टरना अक्सरम मन्ता. नना नीतिमत्तुल्कन केयालय आयो गानि पापि लोकुल्कन केयालय वातन,” इंचि इतोर.

18 बापतिस्मा हियना योहानुना सिस्युल्क आनि परिस्लिक् ओक्कापोद्दु मनुंदुर. अयते इच्चुर लोकुल्क वासि, “योहानुना सिस्युल्क आनि परिस्लिक् ओक्कापोद्दु मनुंदुर. गानि नीवा सिस्युल्क मन्नु. अल्हा बारि?” इंचि येसुन पूसकीतुर.

19 अस्के येसु ओर्क इल्हा वेहतोर, “मरमिन पेडल मरमि वाता हेडमितोरतोनि मननेके ओर्कु ओक्कापोद्दुना अक्सरम मन्तना? मन्नो. बदवेरादाका मरमिन पेडल ओरतोनि मन्तोर अदवेरादाका ओर ओक्कापोद्दु मन्नु.

20 गानि मरमिन पेडल ओरागटाल लक्कु आयाना रोजकु वायनुं, अस्के ओर ओक्कापोद्दु मनुंदुर.”

21 “बोरे आयिर पडना कप्पिड हर्ते, दानकु पूना कप्पिडता गंडा अंटा वाटिसि कुट्टोर. ओक्कला ओर अल्हा कियानयते अंटा वाटता पूना कप्पिडता गंडा इगका होंचि पळाना कप्पिडतुन इंचिचो हरहंता.

22 अल्हेने पूना अंगुर पानकमतुन पळाना तोलपुर्कति बोरे दोस्सुर, अल्हा दोसते अद अंगुर पानकम, पळाना तोलपुर्कतुन हराह्चि पोंगिस दांता. आनि तोलपुर्कागुडा नासडेम आंता. अदुनहाटी पूना अंगुर पानकम, पूना तोलपुर्कतिन दोसंतुर,” इंचि येसु इतोर.

नोमकेम रोजुना मालक येसु आंदुर

(मत्तयाल 12:1-8; लूकाल 6:1-5)

23 उंदि नोमकेम रोजुने येसु आनि सिस्युल्क पोलाल्कनाल होंचेके मत्तुर, होननेके ओना सिस्युल्क हेनकु नत्सि तिचेक मत्तुर.

24 परिस्लिक् अदुन हळसि, “बद कबळ अयते नोमकेम रोजुने कियमळ नियम परकारम ओज्जोनो, अदे कबळ नीवा सिस्युल्क बारि कीसंतुर?” इंचि येसुन इत्तुर.

25 अस्के येसु ओर्कुन, “दाविदुंक आनि ओना दंतातोर्कुंक कर्वेस्तस्के ओर बतल कीतोर मिमेट हदवा हिल्लिरा?

26 अचियातार इनानोर पेद्दा पेर्मल मननेके दाविद पेनदा लोते होळियसि पेनदुक मोळकता हारिन तित्तोर, ओना दंतातोर्कुंकगुडा हीतोर. अव हारि तिन्मळ इत्ते दर्मसास्त्रम परकारम विरोदमते मत्ता. अव हारि सिराप पेर्मांलोकं तप्पा इंका बोरे तिना पर्सुर,” इंचि ओर्कुन इतोर.

27 मर्रा ओरतोनि, “नोमकेम रोजु मनकनाहाटी कीसि मंता, मनकल नोमकेम रोजुनाहाटी आयो.

28 अदुनहाटी मनकना रूपमते पुटतोन नना, नोमकेमता रोजुना मालकगुडा आंदुन,” इंचि येसु इतोर.

3

वतसि होत्ता कयदोन येसु बेस कियमळ

(मत्तयाल 12:9-14; लूकाल 6:6-11)

1 येसु मर्रा उंदि मल्का दर्मसास्त्रम कराहना लोते होतोर. अगा वरोर कय वत्सोत्ता मनकल मत्तोर.

2 नोमकेम रोजुने येसु ओन बेस कियानयते ओन तप्पुने पीकोम इंचि इच्चुर लोकुल्क हळसेक मत्तुर.

3 “अंतोरा मुन्ने वासि नित्ता,” इंचि येसु, कय वत्सोत्तोन इतोर.

4 पजा, “नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकोटे पिसागोटे मंचिदा, हळकते मंचिदा?” इंचि पूसकीतोर. गानि ओर चुपचाप मत्तुर.

5 ओर्के बोर्के जीवा नोय्यो इंचि कन्कुंचि येसुंक दुक्कम वासि, ओर अंटोरहेके होंगुने हळतोर. पजा, “नीवा कय मुन्नेळ्क हाहा, ” इंचि आ कय वत्सोतोन इतोर. ओर कय मुन्नेळ्क हाहातस्के ओना कय बेस आता.

6 पजा परिसिल्क अगटाल पलाते पेय्शि, हेरोद राजाना लोकुकुकुंक होंचि कलियतुर. कलियसि येसुन बल्हा हळ्कना? इंचि येसुना विरोदमते वळ्क्कुत्तुर.

वेल्लेटुर लोकुकुकु येसुना पज्जो वांतुर

7-8 येसु ओना सिस्युल्कन पीसि अगटाल पेय्शि समुद्रमहेके होतोर. येसु कियाना इंचंत्रमता कबाह्क केंजसि गालिल एरिया, यहूदिया एरिया, येरुसलेम सहर, इदुमिया एरिया, सू, सिदोन इनना सहरकुनाल, योर्दन बरेटा हब्बेटाल, आनि पकापीसि मत्ता नाहकुनाल वेल्लेटुर लोकुकुकु ओनगा वातुर.

9-10 बिमार मत्तोर्कुन वेल्लेटोर्कुन येसु बेस कीतोर. अदुनहाटी बिमार लोकुकुकु येसुन इट्टानाहाटी वरोंक-वरोर दोबसेके वासेक मत्तुर. ओरपोरो अर्राकॉटा लक्कु मंदना इंचि, “उंदि सिन्ना डोंगा नाहाटी तयार कीम्टु,” इंचि येसु ओना सिस्युल्कुकुंक वेहतोर.

11 देय्याल्क पीसि मत्ता लोकुकुकु येसुन बस्के अय्ते हळ्ळुदुरो अस्के, “निमे पेनदा मर्रिन!” इंचि वरगेयसि ओना मुन्ने हिळ्ळु अर्रंदुर.

12 गानि येसु मात्रम, “नावा बारेमते बोर्के बतले वेहमट,” इंचि आ देय्याल्कुकुंक गट्टिगा हुकुम हीतोर.

येसु पन्नेड मंदितुन सिस्युल्क इंचि निलाहमळ
(मत्तयाल 10:1-4; लूकाल 6:12-16)

13 पजा येसु गुट्टापोरो होतोर. आ मंदिताल येसु बोर्कुनय्ते कोरतोर, ओर्कुन ओनगा केयक्कुत्तोर.

14-15 ओर ओनतोन मनालय, पेनदा बेसता कबुर वेहनाहाटी लोहालय इंचि पन्नेड मंदितुन परेतोर. परसि ओर्कुं प्रेरितुल्क इंचि पोरोल दोसतोर. ओर्क देय्याल्क गेदमना अदिकारम हीसि निलाहतोर.

16 ओरा पोरोली इल्हा मंतां: सिमोन, इनकु येसु पत्रु इंचि पोरोल दोसतोर,

17 जब्दिना मर्क याकोब आनि ओना तम्मुर योहान. ईर इव्वुर्कुन बोनेर्गेस इंचि येसु पोरोल दोसतोर, इत्ते गर्जना कियानोर इंचि अर्तम.

18 अंदरियल, पिलिपु, बरतलमय, मत्तयाल, तोमल, अल्पिना मर्रि याकोब, तद्दि, सिमोन कनानि,

19 आनि येसुन दोकाते पीसि हियानोर इस्कारियोत नाटेना यहदल.

येसु आनि बेल्लेजुबल इनना देय्याल्कुना मुक्क्यल
(मत्तयाल 12:22-32; लूकाल 11:14-23)

20 पजा येसु उंदि लोन होतोर. अमागुडा इचोर वेल्ले मंदि जमा आतुर गदा, येसुंक, ओना सिस्युल्कुकुंक गाटो तिनलयगुडा वेला दोर्काहिल्ले.

21 येसु पिसा-पिसा कीसंतोर इंचि लोकुकुकुनहेदाल ओना लोतोर केंजसि ओन लोन तायालय होत्तुर.

22 येरुसलेमताल वाता दर्मसास्त्रम कराहना गुर्लुकु, येसु देय्याल्कुन गेदुमसेके इंचि, “ईना लोप्पो ‘बेलजेबुल’ इनना देय्याल्कुना मुक्क्यल होळियसि मंता, दाना बलमते ओर देय्याल्क तेंडांतोर,” इंचि इत्तुर.

23 अदुनहाटी येसु ओर्कुन दग्गोरा केय्शि ओर्कुं वेसुडिते वेहातोर. “देय्यम दाना देय्याल्कुन बल्हा तेंडा परांता?

24 ओक्कला, उंदि राज्यमते मनानोरा लोप्पो वरोनद-वरोंक अर्राकॉटे अद राज्यम निल्ला परांतना? बस्केने निल्ला पर्री.

25 अल्हेने उंदि लोता लोप्पो वरोनद-वरोंक अर्राकॉटे अद लोन गट्टिगा मन्ने.

26 अदुनहाटी देय्यम दाना दंटाता देय्याल्कुना विरोदमते निते, अबुना राज्यम बल्हा नित्तंता? नित्तापर्री, गानि नासडेम आंता.

27 बोरें आयिर! वरोर ताकतवर मनकना लोते होळियसि ओना सामानतुन दोंगा कियना इत्ते, मोदाला आ ताकतवर मनकन दोहचि वाटतेन दोंगा किया परांतोर.

28 नना मीक निजम वेहांतन, मनकालोरा अन्नि पापालुकुन, ओर कीता अपमानतुन पेन मापि किय्यार.

29 गानि पवित्र आत्माता अपमानम कीते, ओर बोरें आयिर, ओन्क बस्केने मापि हिल्ले. असोंटा तप्पु कीता लोकुकुकु बस्केळ्क पापमता दोसेमतेन मंन्तुर,” इंचि वेहतोर.

30 अल्हा बारि वेहतोर इत्ते, “ओनालोप्पो देय्यम मंता,” इंचि दर्मसास्त्रम कराहना गुर्लुकु ओन इत्तुर.

येसुना यावल आनि तम्मूह्क
(मत्तयाल 12:46-50; लूकाल 8:19-21)

31 पजा येसुना यावल, ओना तम्मूह्क ओर मत्ता लोतगा वातुर. ओर लोता पलाते नित्तिसि येसुन केयट इंचि लोहतुर.

32 लोकुकल्क येसुना सुट्टु उद्दिदिसि मत्तुर. अस्के, “नीवा यावल, नीवा तम्मुहक, हेलाहक पलाते एदुर ह्ळसेक मंतुर,” इंचि ओर वेहतुर.

33 अय्ते, “बद नावा यावल, बोर ना तम्मुहक?” इंचि येसु ओर्कुन इत्तोर.

34 अस्के ओना सुट्टु उद्दिदिसि मत्तोरहेके ह्ळसेक, “ईर नावा यावल, ईर ना तम्मुहक आंदुर.

35 बोर अय्ते पेनदा इच्चा परकारम तांकंतुरो ओरे नावा तम्मु, हेलड आनि यावनलेसी दग्गेटोर आंदुर,” इंचि वेहतोर.

4

विज्जां वीताना कास्तकरि मनकना वेसुडि
(मत्तयाल 13:1-9; लुकाल 8:4-8)

1 येसु मरुंदि मल्का गालिल समुद्रम ओड्डुङ्गना होंचि पेनदा पोल्ले कराहलय दल्गतोर. अस्के ओनगा वेल्लेटुर लोकुकल्क जमा आताहेंका ओर उंदि डोंगा एक्किस उदतोर. लोकुकल्क बारे बूमिपोरों नित्तिसि मत्तुर.

2 अस्के ओर वेल्लेन पोल्ले लोकुकुकुं वेसुडिं वेहासेक कराहतोर. उंदि वेसुडि इल्हा मत्ता.

3 “केंजट, वरोर कास्तकरि मनकल विज्जां वीताललय पेय्स्तोर.

4 ओर वीतनेके इच्चु विज्जां हरदगा अरतां, अस्के अबुन पिट्टें वासि पेर्सि तित्तां.

5 इच्चु विज्जां बंडाना गेर्सिपोरों अरतां. अगा तोळि एक्को हिलुवादानकु आ विज्जां बिराने मोलियतां. गानि हिहकु लोप्पोळ्क होनवाहेंका पोळ्द पेय्स्तस्के अव वत्सि हासोत्तां.

6 गानि हिहकु लोप्पोळ्क होनवाहाटी पोळ्द पेय्सि वेल्ले एद्दि आतस्के अव वतसि कर्विसि होत्तां.

7 इका इच्चु विज्जां हाहकुना पोदाने अरतां. हाहकुना पोदां इरगा बेर्सि, अव विज्जन बेर्सां हिया हिल्लें, अदुनहाटी पंटा पेय्सा हिल्ले.

8 इच्चु विज्जां बेसता जेगाते अरतां. अव बेस मोलियसि, बेर्सि बेस पंटा पेय्स्ता. बगा मुपै अंताल्क, बगा अरवै अंताल्क, बगा नूर अंताल्कुना पंटा पेय्स्ता,” इंचि वेसुडि महतोर.

9 पजा मरां ओर्कुन, “बोर्कु केंजालय केळ्क मंतां ओर केंजट,” इंचि येसु इत्तोर.

वेसुडिं वेह्चि वळ्काना कारनम येसु वेहंतोर
(मत्तयाल 13:10-17; लुकाल 8:9-10)

10 येसु वरोरे मत्तद ह्ळसि अगा मत्तोर लोप्पोटाल इच्चुर लोकुकल्क आनि ओना पन्नेड सिस्स्युल्कु ओनगा होंचि “ई वेसुडिता अर्तम वेहा,” इंचि येसुन इत्तुर.

11 येसु ओर्कुन, “मीक अय्ते पेनदा राज्येमता बारेमता मर्ममतुन एरपाट कीकुनालय बुद्दि मंता, गानि पलातोर्कुंके बारे इद मर्मम तेळियालय वेसुडिने वेहा पीता.”

12 बारित्ते,

“ओर ह्ळ्ळ अय्ते ह्ळंतुर, गानि अदुन एरपाट किय्युर.

केंजुड अय्ते केंजांतुर, गानि अद ओर्क तेळियो.

ओक्कला ओर एरपाट कीकुंचि मत्ते, तेळियागोटकुचि मत्ते,

पेनदागा मल्लिस वायेर, पेन ओर्कुन मापि कियवळ्क,”

इंचि इत्तोर.

कास्तकरि मनकना वेसुडिता अर्तम
(मत्तयाल 13:18-23; लुकाल 8:11-15)

13 मरां येसु ओर्कुन इल्हा इत्तोर. “मीक इद वेसुडिता अर्तम तेळिया हिल्लेना? इदे मीक तेळियाकर्गेटे इका वेरे वेसुडिं मीक बल्हा तेळियानुं?

14 इवे वीतानोर इत्ते पेनदा पोल्लेतुन वैरेतोर्क वेहानोर आंदुर.

15 इच्चुर लोकुकल्क विज्जां अरता हर्दा जेगातसंतोर आंदुर. ओर पेनदा पोल्लेतुन केंजांतुर, केंजतारित्ते देय्यम बिराना वासि ओर केंजतवुन तेंडसि पोहंता.

16 विज्जां अरता बंडाना गेर्सि जेगातसंतोर बोर इत्ते, बोर अय्ते पेनदा पोल्लेतुन केंजसि कुसिते बिराने ओप्कुंतुर.

17 गानि ओरा मनसुने पेनदा पोल्लेता हिहकु गट्टि पळ्वाहाटी कोन्नि रोजके विस्वासमते मनांतुर. पेनदा पोल्लेताहाटीं तिप्पल्क, कस्टाल्क वाते विस्वासमताल ओर बिराना लक्कु आंतुर.

18 विज्जां अरता हाहकुना पोदाना जेगातसंतोर बोर इत्ते, बोर अय्ते पेनदा पोल्ले केंजांतुर,

19 गानि सम्सारमता रंदि, दनमता आस्ति, दिसतवंता गावाले इत्ता मनसु, इवनि मत्ताहाटी पेनदा पोल्लेतुन ओनालोपो बेसां हिय्यो. पजा अद पोल्लेहेंदाल ओन्क बतल पायदा आयो.

20 बोर अय्ते पेनदा पोल्लेतुन केंजसि, ओण्कुचि बेस पायदा तरांतोर, ओर इत्ते, विज्जां अरता बेसता जेगातसंतोर आंदुर ओर मुपै अंताल्क, अरवै अंताल्क आनि नूर अंताल्क इल्हा पलांचंतोर,” इचि इत्तोर.

वेडसिता वेसुडि

(लुकाल 8:16-18)

21 येसु मसंदि वेसुडि वेहतोर. “बोरे आयिर वेडसि निरिच्चि गंजुना हिळु मुचोर, कटुल हिळुगुडा इर्रोर. गानि वेल्गु दिसगोम इंचि दान उंदि दीसोडिपोर्रो इरंतोर.

22 मक्किरस मत्तव अन्नि दिसि अर्राकौटा मन्नो, आनि मर्ममते मत्तव बवे पलाते अर्राकौटा मन्नो.

23 बोर्कु केंजालय केव्क मंतां ओर केंजट,” इचि येसु इत्तोर.

24 मरां येसु ओर्कुन इल्हा इत्तोर. “मिमेट बेस उसारते केंजट, बद कोल्लाते मिमेट हीतिरो, अदे कोल्लाते मीकु हियमळ जर्गता, इंका दानकन्ना एकगुडा हियमळ जर्गता.

25 बारित्ते, बोनगा अय्ते मंता, ओन्क पेन इंका हीता. गानि बोनगा अय्ते हिल्ले, ओनगा मत्तदुनगुडा पेन वापस एतकुन्नार,” इचि इत्तोर.

विज्जां बेर्समळ

26 मरां येसु इल्हा वेहतोर. “पेनदा राज्येम इल्हा मंता, वरोर मनकल ओना नेलिते विज्जां वीतंतोर.

27 ओर नर्कळ्ळक मीडंतोर, पोद्दुला तेल्चिते मनंतोर. अद विज्जा मोलियसि बेर्सेकेन दांता. अद विज्जा बल्हा मोलियता, बल्हा बेर्सेता इत्तद ओनकु तेळियो.

28 बूमि दानद अदे पंटातुन पंडागोटंता. अद बल्हा इत्ते मोदाला मोल्का मोलियंता, कर्रे बेर्सेता, पोद्दटक वांता, हेन्नु पेय्शि पेडेक निडंतां.

29 गानि बस्के अय्ते पेडेक मुदरंतां अस्के नेलिता मालक पंटा कोतक वाता इचि हेटेळ पीसि कोय्यंतोर.”

पेनदा राज्येम आवाल्कुना पेडेतसोंटद

(मत्तयाल 13:31-32,34-35; लुकाल 13:18-19)

30 मरां येसु ओर्कु इल्हा वेहतोर, “पेनदा राज्येम बल्हा मंता इचि वेहकन? बद वेसुडि वेह्चि तेल्पिचकन?

31 पेनदा राज्येम आवाल्कुना उंदि पेडेतसोंटद आंद. अद बूमिपोर्रो वीततस्के, अन्नि पेडेकुंक्नना सिन्ना पेडे मंता.

32 गानि अद बेर्सेतस्के अगा मनना अन्नि कुसिर कायाना मराकुंक्नना पेद्दा मरा आंता. दाना पंगां पोळ्गुंक-पोळ्गु बेर्शि, पिट्टे इंका नीडाते गूडां क्रिया परांतां,” इचि इत्तोर.

33 येसु इसोंटव बचचुंगो वेसुडि वेह्चि, ओर्क पेनदा पोल्ले तेळियानाल वेहंदुर.

34 वेसुडि वेहाका येसु ओर्कु बतले वेहाकौदुर. गानि सिराप ओना सिस्युल्क मत्तस्के अव वेसुडिना अर्तम ओर्क तेळियागोटिसि वेहंदुर.

येसु वळि दुमारमतुन आपंतोर

(मत्तयाल 8:23-27; लुकाल 8:22-25)

35 अद रोज पोळ्द होनना वेलाते, “मनम हब्बेटा बाजूंक दाकोम दट,” इचि येसु ओना सिस्युल्कुन इत्तोर.

36 ओना सिस्युल्क अगाटा मंदितुन अगोन होळसि, येसु उद्दिस मत्ता डोंगाते उद्दिस होनालय पेय्सतुर. ओरा पज्जो इकिचुं डोंगांगुडा पेय्सतां.

37 अस्के उंदि पेद्दा वळि-दुमारम वाता. पेद्दा-पेद्दा तळां डोंगाक दल्लिसि एर निंडालय दल्लता.

38 गानि येसु डोंगाता पज्जोटा बाजूंक होंचि मेत्तापोर्रो मीडसेक मत्तोर. अस्के सिस्युल्कु येसुन तेहचि, “गुस! मनम नासडेम आसि होनिनागानि नीकु बतल पिकिर हिल्लेना?” इचि इत्तुर.

39 अस्के ओर तेदसि, वळि-दुमारमतुन आनि समुद्रमतुन, “आगा, चुपचाप मन” इचि गदरिचंतोर, अस्के वळि-दुमारम मग्गिसि, अगा पूरा सांत आता.

40 अस्के येसु सिस्युल्कुन, “मिमेट बारि वेरियतिर? मीकु गिचचोगुडा विस्वासम हिल्लेना?” इचि इत्तोर.

41 ओर इरगा वेरियसि, “इर बोर आंदुर? वळि, समुद्रमगुडा इना पोल्ले केंजंता,” इंचेके ओर-ओरे वळ्ळकुकुत्तुर.

5

देय्यम पीतोन बेस कियमळ

(मत्तयाल 8:28-34; लूकाल 8:26-39)

- 1 अस्के ओर समुद्रमता हब्बेटा बाजूंक मनना गिरासेन इनना एरियक एव्तर.
- 2 येसु डोंगाताल रेयतस्के वरोर देय्यम पीता मनकल तापळन बोग्ळताहेंदाल वासि येसुंक कलियतोर.
- 3-4 ओन बच्चुंगो मल्कां बेडिने, गोल्सुकुने दोहाचि वाटतुर, गानि ओर बेडिन उराहचि पोहतोर, गोल्सुकुन नेम्हाचि पोहतोर. ओन बोर आपा पराहिल्लुर. ओर तापळानेन मनुंदुर, ओन बोर गोल्सुकुने दोहा पराकोंदुर.
- 5 ओर नर्का-पिय्यल तापळाने, गुट्टाने तिरियसेक वरगेयसेक मनुंदुर. ओनद ओर बंडाने कोहककुचि नोपि कीकुनुंदुर.
- 6 ओर लक्कुटाले येसुन ह्ळसि, विच्चि वासि ओना कालक मोळकतोर.
- 7-8 अस्के, “ओनागटाल पलाते पेय्या,” इंचि येसु आ मनकन पीता देय्यमतुन इत्तोर. अदुनहाटी ओर येसुन, “ए अन्निटकन्ना पेदू द पेनदा मरिं येसु, नातोनि नीकु बता कबळ? निमे नाकुन तकलिप किय्योन इंचि पेनदा ओट्टू तिचि वेहा,” इंचि जोरसे वरगेयसि इत्तोर.
- 9 मर्रा, “नीवा पोरोल बतल?” इंचि येसु पसकीतोर. अस्के ओनालोप्पो मत्ता देय्यम, “मोमोट वेल्लेन मंदा आसि मंतोम, इंचि नावा पोरोल ‘मंदा’ आंद,” इल्हा जवाब हीता.
- 10 ओनालोप्पो मत्ता देय्याल्क, “माकुन इद एरियाताल पलाते गेदुममा,” इंचि येसुन बच्चोरो विनंति कीतां.
- 11 अद वेलाते गुट्टा पक्काते पदिंदेना मंदा मेय्येके मत्ता.
- 12 पजा, “माकुन आ पदिंदेना मंदाते होनाहीम,” इंचि आ देय्याल्क येसुन विनंति कीतां.
- 13 अस्के येसु अवून होना वेहतोर अय्ते, आ देय्याल्क ओनागटाल पेय्यि पदिंदेना मंदाते होत्तां. अव पदिंदे रोंडु वेयकुनदाका मत्तां. पजा आ पदिंदेना मंदा समुद्रम ओड्डुन पोरोटाल हिळतुक वित्ति समुद्रमते मुळ्गिसि हासोत्तां.
- 14 अद ह्ळसि पदिंदे मेहानोर वित्ति होंचि, सहरते, पक्का पीसि मत्ता नाह्कुने अगा जर्गतद वेहतुर. अस्के आ देय्याल्क पीतोरद बतल आता इंचि लोकुल्क ह्ळालय अगा वातुर.
- 15 येसुनगा वासि ह्ळतुर अय्ते, देय्याल्क पीसि मत्ता मनकल पुरागा बेस आसि, कपडिं केरिं उदिंदिसि मत्तद ओर्क दिसतोर. अल्हा मत्तद ह्ळसि ओर्क वेरें दल्गता.
- 16 येसुना कबाह्कुन ह्ळतोर अगा बोर अय्ते मत्तुरो ओर, देय्याल्क पीसि मत्ता मनकल बल्हा बेस आतोर, पदिंदेक बल्हा-बतल आता इवन्नि पोल्ले लोकुल्क वेहतुर.
- 17 इवन्नि पोल्ले केंजसि, “निमे मा एरियाताल पेय्यि होन,” इंचि लोकुल्क येसुन विनंति कियालय दल्गतुर.
- 18 अस्के येसु होनालय डोंगाते उदसेके मननेके, देय्याल्कुनाल बेस आता मनकल वासि, “नाकुन नीवातोनि वाया हीम,” इंचि येसुन विनंति कीतोर.
- 19 गानि येसु ओप्कुन्ना हिल्लोर, “सामि नीपोरों दया कीसि नीहाटी बल्हा बतल कीतोर, लोन होंचि नीवा लोतोकुंक वेहा,” इंचि इत्तोर.
- 20 अय्ते ओर मनकल अगटाल देकापोलिस एरियाते होंचि, येसु ओनाहाटी बतल-बतल कीतोर अव अन्नि पोल्ले वेहालय दल्गतोर. अद केंजसि अंतोर इचंन्रम आतुर.

उंदि मुरतटुन बेस कियमळ

(मत्तयाल 9:18-26; लूकाल 8:40-56)

- 21 येसु डोंगाते उदिंदिसि समुद्रमता हब्बेटा ओड्डुंक मर्रा मल्लिस होत्तोर. ओन ह्ळसि वेल्लेटुर लोकुल्क ओनगा जमा आतुर. ओर समुद्रम ओड्डुनगा मत्तोर.
- 22 अस्के दर्मसास्त्रम कराहना लोता वरोर याईर पोरोलतोर अदिकारि येसुनगा वातोर. वासि ओना कालकुनपोरों अरिं,
- 23 “नावा सिन्ना मिथ्यड बेस हिलाका हायनाल आसि मंता. निमे वासि दानपोरों कय इरते, अद बेस आसि दाना जीवा पिस्संता,” इंचि विनंति कीतोर.
- 24 येसु आ अदिकारिनतोनि होत्तोर. ओना पज्जो वेल्लेन मंदि पेय्यि ओना सुट्टु वेल्ले गर्दि कीसि पोरोरों-पोरोरों अरीलय आयुंदुर.
- 25 आ गर्दिते पन्नेड वर्सानाल उंदेतीर कप्पिड आयना उंदि मुरतळ मत्ता.
- 26 अद वेल्लेटुर वैदकुल्कुंक हुपिस्ता. दानगा मत्ता कोत्तांता मार्ता गानि दाना बिमार बेस आयाका एककोने आसेके होत्ता. इल्हा अद वेल्लेने तकलिप बोगाचेक मत्ता.

27-28 अद मुरतळ येसुना बारेमते केंजसि मत्ता. दाना मनसुने, “नना सिराप येसुना कपिडतुन इट्टिनागानि बेस आंतन,” इंचि इनकुत्ता. अदुनहाटी गदिंते येसुना पज्जो वासि ओना कपिडतुन इट्टता.

29 इट्टा इट्टडे दाना कपिड आयमळ बंद आसि बिमार बेस आता इंचि दानकु अनपिस्ता.

30 अदे वेलाते येसुंक ओना लोप्पोटाल ताकत पेयसता इंचि अनपिस्ता. अस्के पज्जो मलिसि, “नावा कपडितुन बोर इट्टु?” इंचि येसु पूसकीतोर.

31 ओना सिस्थुल्कु ओन, “गदिंते लोकुल्क वरोनपोर्रो-वरोर अर्रांनद निमे हळसेक मचिगुडा, नावा कपडितुन बोर इट्टु?” इंचि पूसकीसेके मतिन,” इंचि इत्तोर.

32 गानि, “नाकुन बोरन्ना इटसि मंदगोम,” इंचि येसु अंतोरहेके हळसेक मत्तोर.

33 अस्के अद मुरतळकु, बेस आतद तेळियाहाटी, वेंक वनकुसेक येसुनगा वासि ओना कालकुना पोर्रो अरिं अगा जगंतद सत्तेम-सत्तेम वेहता.

34 अस्के येसु आ मुर्तादुन, “पेगिटुना, नीवा विस्वासमे नीकुन बेस कीता. इसोंटा बिमार मर्रा बस्केने वायो, सांतिते होन,” इंचि इत्तोर.

येसु हाता पेगिटुन जीवा अरहमळ

35 येसु अल्हा वळकसेक मननेके, दर्मसास्त्रम कराहना लोता आ अदिकारिना लोताल इच्चुर लोकुल्क वासि, “नीवा मिथ्यड हाता, इंदके गुन्न तकलिप कियमा,” इंचि वेहतुर.

36 ओर वळकानदुन केंजवाप कीसि येसु आ दर्मसास्त्रम कराहना लोता अदिकारिनतोनि, “निमे वेरियमा, विस्वासम इर्रा,” इंचि इत्तोर.

37 येसु अगटाल पेयसनेके पन्न, याकोबुन आनि याकोबुना तम्मुर योहानुन ओनतोनि पीकुत्तोर. ओर्क तप्पा बोने ओना पज्जो वाया हिाया हिल्लोर.

38 ओर दर्मसास्त्रम कराहना लोता अदिकारिना लोन होत्तस्के अगा लोकुल्क इरगा अळानद, मोत्कुनानद हळतोर.

39 अस्के येसु लोप्पो होळियसि, “मिमेटे अडमळ-मोत्कुनमळ बारि कीसेक मंतिर? अद पेगिळ हाया हिल्ले, मीडसि मंता,” इंचि इत्तोर.

40 अल्हा इत्तद केंजसि ओर येसुन कव्ठुर. गानि येसु ओर अंतोर्कुन पलाते लोहतोर. पेगिटा तल्लुर-बाबोन, ओनतोनि बो अये मत्तुर ओर्कुन पीकुंचि पेगिड मीडसि मत्ता अरति होत्तोर.

41 होंचि अद पेगिटा कयदुन पीसि, “तल्लिता कुम” इंचि इत्तोर. इत्ते, “पेगिटुना, नना वेहासेक, तेदा!” इंचि अर्तम.

42 अल्हा इत्ता इन्दे, आ पन्नेड वर्साना पेगिड तेदिस ताकालय दल्यता. अदुन हळसि, अगा मत्तोर वेल्लेन इचंन्रम आतुर.

43 “इगे जगंतद बोर्के तेळिया मनि” इंचि ओर्कु गट्टिगा हुकुम हीतोर. पजा “अद पेगिडक बतलन्ना तिनालय हीम्ट,” इंचि वेहतोर.

6

येसुन ओना संतम नाटेनोरे ओप्कुना हिल्लुर

(मत्तयाल 13:53-58; लुकाल 4:16-30)

1 येसु अगटाल पेयसि ओना सहरते होत्तोर, ओना सिस्थुल्कगुडा ओना पज्जो होत्तुर.

2 नोमकेम रोजुने दर्मसास्त्रम कराहना लोते होंचि पेनदा पोल्ले कराहसेक मत्तोर. वेल्लेटुर लोकुल्क अव पोल्ले केंजसि, “इर इचंचोर बेस बल्हा वेहासेक मंतोर? इंकु इचंचोर बुदुद बगाटाल वाता? इर अदूब्रतामाता कबाहक बल्हा कीसेक मंतोर?”

3 इर अये मरियमुना मर्रि वडलल आंदुर, याकोब, योसेस, सिमोन, यहूदल, ईरा दादल आंदुर. इगे मनातोनि उदुदिसि मानाव ओना हेलाहके आंदु,” इंचि इनालय दल्यतुर. अदुनहाटी ओर येसुन ओप्कुना हिल्लुर.

4 अस्के येसु ओर्कुन, “पेनदा कबुरतोंक ओना संतम नाटेने, ओना जीवातोरगा आनि ओना लोन होळसिसि, कळमतव अन्नि जेगाने मान-मर्यादा दोर्कता,” इंचि इत्तोर.

5 अगा येसु बतले अदूब्रतामाता कबाहक किया हिल्लोर, सिराप बिमार मत्तोर्कुन इचचुर्कुन इट्टिस बेस कीतोर.

6 येसुन ओर विस्वासम कियवाहाटी ओन्क इचंन्रम आता. पजा नार-नार होंचि पेनदा पोल्ले कराहसेके तिरियतोर.

येसु पन्नेड सिस्थुल्कुन लोहमळ

(मत्तयाल 10:1,5-15; लुकाल 9:1-6)

7 उंदि रोज येसु पन्नेड मदि सिस्थुल्कुन दग्गेरा केयतोर. ओर्कुन इच्चुर-इच्चुर दंटा कीसि, ओर्क देय्यालक गेदमना अदिकारम हीसि सेवा कियालय लोहतोर.

8-9 अदिकारम हीसि ओर्कु इल्हा वेहतोर, “मिमेट होननेके मीतोनि गाटो आयि, जोरा आयि, कोत्ताना संचि आयि, एककोतव अंगि आयि ओयमट. सिराप कय्दे दुइडु, काल्कुंक हेरपुह्क ओम्ट.

10 मिमेट बद लोन अय्दे दांतिटो, अगटाल पेयसनदाका अदे लोते मंट.

11 बोर अय्दे मीकुन ओपकुन्नु, मीवा पोल्ले केंजुर अगटाल पेयसननेके ओर्क विरोदमते गवाइलेसी मीवा काल्कुना दुम्प दुल्पट. नना मीक निजम वेहासेक मंतन, न्यायमता रोजुने आ नाटुक वाता गोसाकन्ना सदोम, गमोरा सहरकुंक वाथाना गोसा बच्चोरो तक्को मंन्ता,” इंचि वेहतोर.

12 अस्के सिस्युल्कु अगटाल होंचि, “मीवा पापाल्क ओपकुंचि, मनसु मासकुंटु” इंचि लोकुल्कुंक प्रचार कीतुर.

13 देय्याल्क पीतोरगटाल बच्चुंगो देय्याल्कुन गेदुमतर. बिमारते मत्तोकुंन निय होकसि बेस कीतुर.

हेरोद राजल येसुन बापतिस्मा हियना योहान इनकुंतोर
(मत्तयाल 14:1-12; लूकाल 9:7-9)

14 येसुना पोरोल अंतोर्क तेळियसि होत्ता. हेरोद राजालगुडा येसुना बारेमते केंजतोर. अस्के ओर इल्हा इत्तोर, “बापतिस्मा हियना योहान हातोरारवेटाल मर्रा तेदतोर. अदुनहाटी ओर इसंटा अद्बूतामाता कबाह्क कीसंतोर.”

15 अल्हेने इच्चुर बोरे, “पेनदा कबुरतोर एलियल आंदुर,” इंचिच्चुर बोरे, “एनकटा पेनदा कबुरतोर लोपोटाल बोरेन्ना वरोर मंदनुर,” इंचि इत्तुर.

16 गानि हेरोद राजाल इदुन केंजसि, “बापतिस्मा हियनना तल्ला नना कोय्यागोटतन, ओर हातोरारवेटाल मर्रा जीवाते तेदतोर,” इंचि इत्तोर.

17-18 बारित्ते, हेरोद राजाल ओना तम्मुर पिलिपुना मुत्तो हेरोदियान इरकुंचि मत्तोर. अय्दे योहान हेरोद राजानगा होंचि, “नीवा तम्मुना मुत्तोन निमे निहगा इरमळ नियम परकारम बेस आयो,” इंचि वेहुंदुर. अल्हा वेहातदान्कु हेरोदियनहाटी हेरोद राजाल सिपाइल्कुन लोहचि योहानुन जेलने वाटा वेहतोर.

19-20 अय्नागानि मोका दोर्कते योहानुन हव्कालय हेरोदियल ह्वुंदु, गानि अद हव्का पराहिल्ले. बारित्ते योहान नीतिमंतुड, पवित्र मनकल इंचि हेरोद राजाल वेरियुंदुर. अदुनहाटी ओर जेलते मननेके ओन्क बतल आयामन्नि इंचि ओन कापाळसि इरुंदुर. हेरोद राजाल योहानुना पोल्ले केंजसि परेसान आसिगुडा कुसिते केंजुंदुर.

21 उंदि रोज हेरोदियांक मोका दोर्कता. हेरोद राजाल ओना पुटता रोज मंता इंचि ओनगा मनना पेदुदाल्कुन, सिपाइल्कुना अदिकारिल्कुन आनि गालिल राज्यमता लीडकुंन बोजनमहाटी केयतोर.

22 अस्के हेरोदियाना मिथ्यड अगा वासि हेरोद राजाल अल्हेने हेळमितोरा मुन्ने एगरिसि ओर्कुन कूस कीता. अस्के राजाल आ पेगिटन केय्सि, “नीकु बतल गावाले नाकुन तल्का, नना अद हीतन,” इंचि इत्तोर.

23 अल्हेने, “नावा सगम राज्यमगुडा नीकु हियालय तयार मंतन,” इंचि ओट्टु तित्तोर.

24 अस्के अद पेगिळ दाना यावानगा पलाते होंचि, “बतल तल्ककन” इंचि पूसकीता. अस्के, “बापतिस्मा हियना योहानुना तल्ला तल्का,” इंचि दाना यावल वेहता.

25 गाबरते आ पेगिड हेरोद राजानगा बिराना लोपो होंचि, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

26 इद केंजसि राजांक इरगा दुक्कम वाता. गानि अगा मत्ता अंतोर हेडमितोराहाटी आनि तित्ता ओट्टुहाटी, दानकु हीतन इत्तद हिथ्योन इना पराहिल्लोर.

27 अस्के राजाल, जेलते मत्ता योहानुना तल्ला कोय्सि ता इंचि वरोर सिपाइंक बिराना आदेस हीसि लोहतोर.

28 आ सिपाइ जेलते होंचि, योहानुना तल्ला कोय्सि, उंदि गिन्नेते वाट्सि तच्चि पेगिड्क हीतोर, अस्के आ पेगिड अदुन दाना यावांक हीता.

29 इद पोल्ले योहानुना सिस्युल्कुंक तेळियता. अस्के ओर होंचि ओना पीनगुन ओसि बोदते इरतुर.

हेय्युं वेय्कुना मंदिक गाटो दोसमळ

(मत्तयाल 14:13-21; लूकाल 9:10-17; योहान 6:1-14)

30 नार-नार होंचि मत्ता येसुना प्रेरित्तुल्क, येसुनगा मत्सि वातुर. ओर होंचि लोकुल्कुंक बतल-बतल कीतुर, बतल-बतल काराहतर इवन्नि पोल्ले येसुंक वेहतुर.

31 ओरगा वायानुर-होनानुर लोकुल्क वेल्लेटुर मत्तुर, ओर्क गाटो तिनालयगुडा वेला दोर्काकौंदु, अदुनहाटी, “मीक अराम किया पीता, बोरे हिल्ला जेगातगा दाकोम दट,” इंचि येसु ओर्कुन इत्तोर.

32 अस्के ओर उंदि डौंगाते उदिदसि बोरे हिल्ला जेगाते होत्तुर.

33 गानि वेल्लेट्टर लोकुकलक ओर्कुन होननेके हळसि एरपाट कीतुर. अदुनहाटी अन्नि सहरकुनाल विच्चि वासि, ओर्कन्ना मुन्नेने अगा जमा आतुर.

34 येसु डोंगाताल रेयसि अद जेगातगा वेल्लेने मंदितुन हळतस्के, कोहानोर हिल्ला गोंरे बल्हा मनांतंगो ओर अल्हा आसि मत्तुर. अदुनहाटी ओनकु ओरपोरों दया वासि ओर ओर्क पेनदा पोल्ले कराहलय सुख कीतुर.

35-36 पोळ्द होनना वेलाक सिस्युलक येसुनगा वासि, “मनम सुनसान जेगाते मंतोम, वेलागुडा बागेन आता. लोकुकलुकन लोहचीम, ओर दगोटे नाहकुने होंचि, ओराहाटी तिनालय बतलन्ना अस्कंतुर,” इंचि इत्तुर.

37 गानि, “मिमेटे ओर्क हीम्ट,” इंचि ओर्कुन येसु इत्तोर. अस्के ओर इत्तुर गदा, “रोंडु नुहकुना दिनारकुनतोनि* अंतोराहाटी तिडि अस्सि तच्चि हियमळा बतला?” इंचि पूसकीतुर.

38 “मिहगा बच्चुं हारि मंतां, होंचि हळट,” इंचि येसु इत्तोर. ओर अवन हळसि, “हेय्युं हारि, रोंडु जिम्मां मंतां,” इंचि वेहतुर.

39 अस्के येसु, “अंतोर लोकुकलुकन पच्चाटा जाडि पोरो गूप-गूपुने उप्पट,” इंचि सिस्युलकुंक आदेस हीतोर.

40 ओर अंतोर गूप-गूपकुने उदतुर, उंदि गूपुने एबै, नूर इल्हा मत्तुर.

41 अस्के येसु अव हेय्युं हारि, रोंडु जिम्मां कय्दे पीसि, स्वर्गमताहेके हळसि पेनदुक दन्यवाद कीतोर. अवन तुकडें कीसि, “ओर्क पंचि हीम्ट” इंचि सिस्युलकुंक हीसीतोर. अल्हेने अव रोंडु जिम्मानगुडा तुकडां कीसि हीतोर.

42 ओर अंतोर पीरनिंडा तित्तुर.

43 तिनूड आतस्के मिगुल्ला हारिना आनि जिम्माना तुकडां जमा कीते पन्नेड तट्टां निडतां.

44 हारि तित्तोरव्टे, सिराप मांडसे हेय्युं वेय्कुना मंदि मत्तुर.

येसु एतपोरों ताकमळ

(मत्तयाल 14:22-33; योहान 6:16-21)

45 अद आता पजा येसु बिराना ओना सिस्युलुकन डोंगाते उपिच्चि, “मिमेट अंतोर समुद्रमता हब्बेटा बाजुक मंदना बेतसेदा सहरते नाकन्ना मुन्नेने होंट,” इंचि इत्तोर. अगा मत्ता लोकुकलुकन ओरा नाहकुनहेके होनालय सालां कीतोर.

46 ओर्कुन सालां कीता पजा, येसु पारतना कियालय गूट्टापोरों होत्तोर.

47 पोळ्द होत्ता पजा सिस्युलुकुना डोंगा नड्डुम समुद्रमते मत्ता, गानि येसु वरोंरे ओड्डुनपोरों मत्तोर.

48 समुद्रमते वळि-दुमारम डोंगाक एदुर तेदताहाटी सिस्युलुकुंक डोंगा ताकसालय तकलिप होंचेके मत्तद येसु हळतोर. हळसि, नर्कटां मड-नालुं एगाना वेलाते येसु सिस्युलुकुना डोंगातेके एतपोरों ताकसेक होत्तोर. ओर ओरगटाल मुन्ने पेय्शि होननदे मत्ता,

49-50 गानि येसु एतपोरों ताकानद हळसि देय्यम इंचि मोत्कुत्तुर, बारित्ते अंतोर ओन हळसि वेरियतुर. अस्के येसु, “वेरियमट! ननाने आंदुन. दैरनेमते मंट!” इंचि इत्तोर.

51 पजा सिस्युलुकुना डोंगाते येसु एककुता एककुडे वळि-दुमारम बंद आता. अद हळसि ओर्क वेल्ले इंचंत्रम आता.

52 बारित्ते मुन्ने हेय्युं वेय्कुना मंदि क गोटो दोसतद हळसि मत्तुर, अय्नागानि येसु सामिना बलमतुन ओर एरपाट किये हिल्लुर. ओरा मनसुक बंडालेसी आसि होत्तां.

बिमार मत्तोर्कुन येसु बेस कीतोर

(मत्तयाल 14:34-36)

53 पजा ओर अद समुद्रम दाटसि गेनेसरेत इनना नाटे एव्चि, अगा डोंगातुन आपतुर.

54 ओर डोंगाताल रेयनेकेन वेल्लेट्टर लोकुकलक हळसि येसुन एरपाट कीतुर.

55 पकापीसि मत्ता नाहकुने विच्चि होंचि बिमार मत्तोर्कुन कट्टलुकुने वाटसि येसु बगा मंतोर इंचि तेल्लिचकुंचि, अगा-अगा कांजसेक ओय्युंदुर.

56 येसु नाटेने, सहरते, नेलिने बद-बद जेगाते अय्ते होनुंदुरो, अगाटा बिमार मत्तोर्कुन चौकते तच्चि मीडिच्चि, “सिराप नीवा कपिडता अंचुन इट्टा हीम,” इंचि येसुन विनंति कियुंदुर. अल्हा बोर-बोर अय्ते ओना अंचुन इट्टुरो, ओर अंतोर पुरागा बेस आतुर.

* 6:37 दिनार इद कोत्ता अंद. उंदि दिनार इत्ते उंदि रोचुना बृत्तित्चो दाना विल्ला मनता.

7

पेट्रु दाल्कुना रीति-रिवाजता बारेमते कराहमळ
(मत्तयाल 15:1-9)

- 1 उंदि रोजु येस्सलेमताल इच्चुर परिसिल्क आनि दर्मसास्त्रम कराहना गुस्लक येसुनगा जमा आतुर.
- 2 येसुना इच्चुर सिस्स्युल्कु यहिदि लोकुल्कुना रीति-रिवाज परकारम सुदुद आयाकोटेन इत्ते, कय्क नोरकिने तिनानद ओर हळतुर.
- 3 बारित्ते, परिसिल्क आनि यहिदिल्क अंतोर पेट्रु दाल्कुना रीति-रिवाज मत्ताप कय नोरका तिन्नुर.
- 4 इंका ओर हाटुम होंचि वायना गानि एर तुंगाका तिन्नुर. अचोने आयका वाटिं, तालिं, रागिता बोळिं नोरमळ इसोंटव पेट्रु दाल्कुनाल ताकसेक वाता रीति-रिवाजकुन नोमंतुर.
- 5 अयते, “नीवा सिस्स्युल्क, पेट्रु दाल्कुना रीति-रिवाजुने बारि ताकुर, तिनाका मुने ओर कय्क बारि नोरर?” इंचि परिसिल्क आनि दर्मसास्त्रम कराहना गुस्लक येसुन पूसकीतुर.
- 6 अस्के येसु ओर्कुन इल्हा इत्तोर, “यसायाह इनना पेनदा कबुरतोर, मीवसोंटा डोंगिरा बारेमते निजमे बविस्यवानि कीतोर: ‘ईर लोकुल्क सिराप तोळ्दने नावा कदर कीतुर, गानि ईरा मनसु मात्रम नहागटाल बचचोने लक्कु मंता.
- 7 ईर अंगडमे नावा आरादना कीसेके मंतांतुर. बारित्ते, ओराहाटी मनकालोर तयार कीता रीति-रिवाजके निजमतव, अबुना पालन कियमळे दर्मम इंचि कराहंतुर,* इल्हा रासि मंता.
- 8 मिमेट पेन हीता आदेसतुन होळसि, मनकल तयार कीतव रीति-रिवाजकुन पीसि ताकसेक मंतिर,” इंचि इत्तोर.
- 9 मर्रा ओरतोनि, “मीवा रीति-रिवाजकुन पीसि ताकानाहाटी, पेनदा आदेसतुन लक्कु कियमळ मीक बेस अनपिचंता,” इंचि इत्तोर.
- 10 “निमे नीवा तल्लुर-बाबोना कदर कीम, बोर अयते तल्लुर-बाबोन रांगंतोर, ओन हळ्कमळे गावाले,” इंचि मूसाल इत्तोर.
- 11-12 गानि, “मिमेट अयते, बोरन्ना मनकल ओना तल्लुर-बाबोन, नना मीकु हियानद पेनदुक कोर्बान† इंचि हीतन इनानयते, मिमेट ओन ओना तल्लुर-बाबोना सेवा किया हिय्येर, इंचि कराहतिर.
- 13 इल्हा मिमेट तयार कीता, मीवा रीति-रिवाजकुनाहाटी पेनदा पोल्लेतुन होळसेक मंतिर. इल्हा इंका बचचुंगो कबाहक कीतिर,” इंचि वेहतोर.

मनकन हेळ्हना पोल्ले

- 14 मर्रादि मल्का येसु लोकुल्कुन दगर्क केय्सि, “मिमेट अंतोर नना वेहानद केंजट आनि अर्तम कीकुंदु,” इंचि वेहालय सुस्व कीतोर.
- 15-16 “पलाताल मनकना पीटे होनानव ओन हेळ्हे, गानि मनकना तोळ्दाल पलाते पेय्सना पोल्लेगे ओन हेळ्हांता,” इंचि वेहतोर. बोर्कु केंजालय केव्क मंतां ओर केंजट.†
- 17 पजा येसु लोकुल्कुन होळसिसि, सतता लोन होतोर. अस्के ओना सिस्स्युल्क ओर वेहता वेसुडिता अर्तम पूसकीतुर.
- 18 अस्के येसु ओर्कुन इल्हा इत्तोर. “पलाताल बतल अयते पीटे दांता, अद मनकन हेळ्हे इंचि मीकु इंकागुडा तेळियोना?”
- 19 पलाताल होनानद ओना मनसुने होन्नो गानि ओना पीटे दांता. पजा पलाते अर्ता,” अल्हा वेहिचि, तिनानव अन्नि तिंदिं तिनालय बेसतवे इत्तोर.
- 20 पजा ओर इल्हा वेहतोर, “मनकना लोपोटाल बतल अयते पलाते पेय्संता अदे मनकन हेळ्हांता.
- 21 बारित्ते मनकना मनसुनाल कराब विचाराल्क, बोगमतनम, दोंगातनाल्क, हळ्कमळ, व्यभिचारम,
- 22 आस्ति कियमळ, दुस्त गुनम, डोंगिगुनम, मेंदुलता आसे, कळ्क पोतमळ, अपमानम कियमळ, मर्रा आनि मुर्का गुनाल्क पलाते पेय्संतां.
- 23 इव अन्नि सेड्डा पोल्ले मनकना तोळ्दाल पलाते पेय्सि, मनकन हेळ्हांता,” इंचि वेहतोर.

यह्दि आयवा मुरतटा विस्वासम
(मत्तयाल 15:21-28)

- 24 पजा येसु अगटाल तेदसि सूर, सिदोन एरियाते होत्तोर. अगा मनानद बोनके तेळिया मनि इनकुचि, ओर उंदि लोन होंचि आगतोर. गानि मक्का परा हिल्लोर.
- 25-26 उंदि युनानि मुरतळ येसुना बारेमते केंजता. अद सिरिया देसेमता पोनिशिया इनना नाटे पुटतद आंद. दाना सिन्ना मियाटुन देय्यम पीसि मत्ताहाटी अद येसुनगा वासि, ओना काल्कुनपोर्री अरता. अर्रिं “देय्यमतुन पेच्हाचि गेटमा,” इंचि येसुन विनंति कीता.

* 7:7 यसायाह 29:13 † 7:11-12 कोर्बान पेनदुक मोक्कु हीता वस्तुकुन कोर्बान इंचि इन्दुर. † 7:15-16 इद वचनम कोन्नि पांडु लिपिने हिल्ले.

27 येसु अदुन, “पिलाल्क मोदाला पीरनिडा तिनिरकांटी, पिलाल्कुना हारि तेंडकुंकि नय्कुंक वाटमळ बेस आयो,” इंचि इत्तोर.

28 गानि आ मुरतळ, “निजमे सामि! पिलाल्क तिननेके हिळ्ळ अरता अंतकुल्कुन अय्ते नय्के तितां गदा!” इंचि येसुंक जवाव हीता.

29 अस्के, “निमे इल्हा इत्ताहाटी, नीवा मिथ्यटाल देय्यम पेय्मि होत्ता. निमे लोन होन,” इंचि येसु इत्तोर.

30 अद मुरतळ लोन हांचि हळत्सके, दाना मिथ्यड कटुलते मीडसि मंता, दानाल देय्यमगुडा पेय्मि होत्ता इंचि अद हळता.

पनकना-सेव्टि मनकन येसु बेस कियमळ

31 अद आता पजा येसु सूर एरियाताल मल्सि सिदोन होत्तोर. अगटाल देकापोलिस एरिया दाटसि गालिल समुद्रमतगा वातोर.

32 अस्के इच्चुर लोकुल्क, वरोर पनकना-सेव्टि मनकन येसुनगा पीसि वासि, “नीवा कय ईना पोरो ईरा,” इंचि विनंति कीतुर.

33 येसु आ पनकना-सेव्टि मनकन मंदिताल पक्कक ओसि, ओना केव्कुने सतता वेल्कु दोसतोर, आयंका आ वेल्कुना पोरो उस्किसि ओना नाल्केतुन इटतोर.

34 मब्बुनहेके हळसेक जोरसे नेस्किसि “एपता” इत्तोर. इत्ते कुल्ला आम इंचि अर्तम.

35 अस्केने ओना केव्क केंजा वायालय दल्यतां, ओना नाल्केगुडा मेसलिसि ओर साप वळ्कालय दल्यतोर.

36 इद पोल्ले बोर्के वेहमत इंचि येसु ओर्कुं गट्टिगा वेहतोर गानि लोकुल्कुंक ओर वेहतादानकनना एक्को वेहासेक होत्तोर.

37 केंजाता लोकुल्क अंतोर इचंत्रम आसि, “ओर बतलय्ते कीतोर, बेस कीतोर. सेव्टोर्कुंन केंजा वायानाल, म्कालोर्कुंन वळ्का वायानाल कीतोर,” इंचि इत्तुर.

8

नालुं वेय्कुना मंदिक येसु गाटो दोसंतोर

(मत्तयाल 15:32-39)

1 अव रोजकुने मरुंदि मल्का येसुनगा वेल्लेन लोकुल्क जमा आतुर. ओरगा तिनालय बतले मनाहिल्ले. अदुनहाटी येसु ओना सिस्युल्कुन दगेर्क केय्मि,

2 “ईर लोकुल्क नहगा मूड रोजकुनाल मंतुर, ईरगा तिनालय बतल हिल्ले. अदुनहाटी नाक ई लोकुल्कुन हळसि पापम अनपिचंता.

3 इच्चुर लोकुल्क वेल्ले लक्कटाल वातोर मंतुर. ननागिटा ईर्कुंन कर्चुंनि लोन लोहानय्ते, नड्डुम हर्दे बगानना क्वाबडनुर,” इंचि इत्तोर.

4 अस्के, “ई उस्के बूमिते इच्चो वेल्ले लोकुल्कुंक हालानाल तिडि बगाटाल तरा परकोम?” इंचि सिस्युल्क येसुंक जवाव हीतुर.

5 अस्के, “मिहगा बच्चुं हारि मंतां?” इंचि येसु ओर्कुंन पूसकीतस्के, ओर, “एडुं हारि मंतां” इंचि इत्तुर.

6 पजा येसु मंदितुन हिळ्ळ बूमिपोरो उद्दा वेहतोर. आ एडुं हारि पीसि पेनदुक दन्यवाद कीतोर. हारिन तुकडां कीसि, “ओर्क तूसि हीम्टु” इंचि सिस्युल्कुंक हीतोर. अस्के सिस्युल्कु मंदिकु तूसि हीतुर.

7 ओरगा इच्चुं सिन्ना जिमांगुडा मत्तां. येसु अबुनहाटीगुडा पेनदुक दन्यवाद कीसि “लोकुल्कुंक तूसि हीम्टु” इंचि सिस्युल्कुंक आदेस हीतोर.

8 अगा मत्तोर अंतोरगुडा पीरनिडा तित्तुर. पजा मिगुल्ला हारि तुकडन जमा कीते, अव एडुं तट्टां निडतां.

9-10 अगा तित्तोरव्ते दगेरा-दगेरा नालुं वेय्कुना लोकुल्क मत्तुर. ओर अंतोर्कुंन सालां कीसि, येसु बिराना ओना सिस्युल्कुनतोन उंदि डोंगाते उद्दिदिसि दलमनुता एरियाक होत्तोर.

परिसिल्क येसुना पट्ट हळत्तुर

(मत्तयाल 16:1-4; लूकाल 11:16,29)

11 पजा येसुना पट्ट हळता इंचि, “निमे पेनदा अदिकारम पीसि वातिन इंचि नम्मालय, स्वर्गमताल माकु उंदि चिन्ह ह्पसा,” इंचि परिसिल्क ओन पूसकियालय दल्यतुर.

12 अस्के येसु आत्माते जोरते नेस्किसि, “इद पीळितोर चिन्ह ह्पसा इंचि बारि इत्तुर? नना मीक निजम वेहंतन, इद पीळितोर्क बदे चिन्ह ह्पिचमळ जगो,” इंचि इत्तोर.

13 पजा ओर्कुंन अग्गेन होळसि, डोंगाते उद्दिदिसि समुद्रमता हब्बेता ओड्डुंक होत्तोर.

यहदिल्कुनाल जेगर्ता मंतु
(मत्तयाल 16:5-12)

14 सिस्युल्कु हारि ओयालय मरंगतुर. आनि ओरगा डोंगते उंदे हारि मत्ता.

15 अस्के येसु ओर्कुन इल्हा जेगर्ता कीतोर. “परिसिल्क आनि हेरोदना पुल्लटा पिडिता बारेमते जेगर्ता मंतु,” इत्तोर.

16 अद केंजसि, “मनागा अयते हारि हिल्लें,” इल्हा इंचेके सिस्युल्कु ओर-ओर वळ्ककृतुर.

17 येसु अदुन एरपाट कीसि, “हारि हिल्लें इल्हा विचारम मिमेट बारि कीसेक मतिट? इदवेरदाकागुडा मीकु तेळिया हिल्लेना? एरपाट कीसेक हिल्लिरा? मीवा मनसु बंडा आताना?”

18 मीक कळ्कु मंचिगुडा ह्ळा परसेक हिल्लिरा? केळ्क मंचिगुडा केंजा परसेक हिल्लिरा? मिमेट मति मर्गतिरा?

19 नना हेय्युं वेय्कुना मंदिहार्ती हेय्युं हारि उराहचि दोसतन, अस्के बच्चुं तट्टाना हारि मिमेट जमा कीसि निहतिर?” इंचि पूसकीतोर. अस्के, “पन्नेंड तट्टां” इंचि ओर जवाब हीतुर.

20 आनि “अल्हेने, एडुं हारिनतोनि नालुं वेय्कुना मंदि तिल्लस्के, बच्चुं तट्टाना हारि तुकडां जमा कीतिर?” इंचि येसु पूसकीतोर. अस्के, “एडुं तट्टां” इंचि ओर वेहतुर.

21 “अयते मीकु इकागुडा तेळियसेक हिल्लेना?” इंचि येसु इत्तोर.

येसु बेतसेदा नाटेना गुड्डिड मनकन बेस कीतोर

22 ओर बेतसेदा इनना नाटे एत्ता पजा इच्चुर लोकुल्क वरोर गुड्डिडन येसुनगा पीसि वासि, “निमे ईन इट्टा,” इंचि विनिंति कीतुर.

23 येसु आ गुड्डिडना कय पीसि नाटेना पलाते ओतोर. ओसि गुड्डिडना कळ्कुने उस्कतोर. पजा ओनपोरों कय इर्सि, “इंदके नीकु बतलन्ना दिस्सेक मंतना?” इंचि पूसकीतोर.

24 अस्के आ गुड्डिड मनकल पोरो ह्ळसि, “मनकालोर दिस्सेक मंतुर गानि ओर मराकु ताकताप मागुर-मागुर दिस्सेक मंतुर,” इंचि इत्तोर.

25 अस्के येसु मरा उंदि मल्का ओना कय्क, आ गुड्डिडना कळ्कुना पोरो इत्तोर. ओर उंदेतिर ह्ळता पजा नदर वाता. ओन्क अन्नि साप-साप दिसालय दलगतां.

26 अस्के, “निमे नाटे होळियाकोटा, सवरगा नीवा लोन होन,” इंचि येसु ओन लोहचीतोर.

येसुन “किरिस्तु” इंचि पत्रु ओप्कुंतोर

(मत्तयाल 16:13-20; लुक्काल 9:18-21)

27 येसु, ओना सिस्युल्क कैसरिया पिलिपि सहरता पकापीसि मत्ता नाहकुने होत्तुर. होननेके, “नना बोन आंदुन इंचि लोकुल्क इंतुर?” इंचि येसु सिस्युल्कुन पूसकीतोर.

28 अस्के सिस्युल्क इल्हा वेहतुर. “इच्चुर इंतुर निमे बापतिस्मा हियना योहानुन आंदिन, इंका इच्चुर इंतुर निमे एलियाल आंदिन, इंका बोरो इंतुर निमे पेनदा कबुरतोर लोप्पोटाल बोनो वरोन आंदिन,” इत्तुर.

29 “अयते, नना बोन आंदुन इंचि मिमेट इंचेके मतिट?” इंचि येसु ओर्कुन पूसकीतस्के, “निमे किरिस्तुन आंदिन,” इंचि पत्रु इत्तोर.

30 अस्के, “नावा बारेमते बोर्के वेहमट,” इंचि येसु ओर्क गट्टिगा वेहतोर.

येसु ओना हामूरता बारेमते वेहंतोर

(मत्तयाल 16:21-28; लुक्काल 9:22-27)

31 पजा ओना सिस्युल्कुंक इल्हा कराहलय दलगतोर. “यहूदि पेद्दाल्क, पेद्दा पेर्मांलोर आनि दर्मसास्त्रम कराहना गुस्कुनाहेंदाल मनकना रूपमते पुटतोन नाकु तिप्पल्क अर्रापीता. ओर ह्यसाकोटा आसि नाकुन हळ्कानुर. गानि नना हासि मूड रोजकुंक मरा जीवाते तेदंतन,” इत्तोर.

32-33 येसु इद पोल्लेतुन कुल्ला-कुल्ला वेहतोर. अयते पत्रु येसुन अलग ओसि रंगतोर. गानि येसु सिस्युल्कुनहेके तिरियसि ह्ळसि पत्रुन, “अरे देय्यम, नावा मुन्नेटाल पेय्से होन. निमे मनकालोरा तेळिते वळ्कसंतिन, पेनदा विचारमते वळ्कसेक हिल्लिन,” इंचि ओन रंगतोर.

34 पजा येसु ओना सिस्युल्कुन आनि लोकुल्कुन ओनहेके केय्से इल्हा वेहालय दलगतोर, “ओक्कला बोरन्ना मनकल नावा पज्जो वायना इत्ते, ओर ओना पूरा इस्टाल्क होळसिसि सतता कूस तेह्कुंचि नावा पज्जो वायिर.

35 बारित्ते, बोर अयते ओना जीवातुन पिसागोटालय ह्ळंतोर, ओर ओना जीवातुन पोगोटकुंतोर. गानि बोर अयते नाहाटीं आनि बेसता कबुरताहाटी जीवा हीतोर, ओर ओना जीवातुन कापाळकुंतोर.

36 ओक्कला मनकल पूरा दुनियातुन संपलिच्चि, ओना जीवातुन पोगोटकुत्ते ओन्क बता पायदा आंता?

37 हिलाकोटे मनकल ओना जीवाहाटी बदला बतल हियानुर?

38 बोगमतनमते, पापमते निडिस मलता इद पीळितोर नड्डुम बोर अथे नाकुन, नावा पोलेलेन वेहालय सिग्गु अरंतोर, मनकना रूपमते पुटतोन नना बस्के अथे पवित्र दूतनतोन, नावा बाबाना महिमाते वाकन, अस्के असोटा मनकन नावोर इनालय ननागुडा सिग्गु अरंतन,” इंचि वेहतोर.

9

1 मरां येसु ओर्कुन इल्हा इत्तोर. “नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, पेनदा राज्येमतन दाना ताकततोन वातद हळवा, ओर्कु हामुर वायो,” इत्तोर.

येसुना रूपम मारियमळ

(मल्लयाल 17:1-13; लुकाल 9:28-36)

2 हासं रोजकु आतारित्ते येसु पन्नुन, याकोबुन आनि योहानुन पीकुंचि उंदि एत्तु गुट्टापोर्रो इत्तोर. अगा ओरा मुन्ने ओना रूपम मारिया.

3 ओना कपडिं इच्चोर तेल्लगा मेर्येक मत्तां गदा, बूमि पोरोटोर बोर साकलल अच्चोर तेल्लगा आयनाल हुक्का परोर.

4 अस्के मूसाल आनि एलियाल* येसुनतोन वळकानद ओर हळतुर.

5-6 हळसि ओर इरगा वेरियतुर. अदुनहाटी पन्नु येसुनतोन बतल वळकना अद तेळियका, “गुद्द! मनम इग्गे मनमळ बेस मंता. उंदि नीहाटी, उंदि एलियानाहाटी, उंदि मूसानाहाटी मोमोट मूड हळसं वांटोम,” इंचि इत्तोर.

7 अस्केने उंदि मब्बु तेर्पे वासि ओर्कुन मुच्ता. आ मब्बुनाल, “ईर नावा पावरमगल्ला मरि आंदुर, ईना पोलेलें केंजट,” इंचि ओर्क अल्किर केंजावाता.

8 अस्के अचानक ओर नालुं-मूलां हळतुर गानि येसुक तप्पा अगा बोर दिसा हिल्लुर.

9 ओर गुट्टा पोरोटाल हिळु रेय्नेके, “मनकना रूपमते पुटतोन नना हामुरताल मरां तेदनदाका, गुट्टापोर्रो मिमेट बतल अथे हळतिरो अद बोर्के वेहमत,” इंचि येसु ओर्क गट्टिगा वेहतोर.

10 ओर अद पोलेलेतुन ओरा मनसुनेन इरतुर गानि “हातोराल लोप्पोटाल मरां जीवाते तेदमळ, इत्ते बतल?” इंचि ओर वरोंक-वरोर वळककुनालय दलगतुर.

11 पजा ओर येसुन, “किरिस्तुकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लक बारि इंतुर?” इंचि पूसकीतुर.

12 अस्के येसु ओर्क इल्हा वेहतोर. “एलियाल तप्पाकोटा मोदाला वांतोर. वासि मोदाला बल्हा मलता अल्हे अन्निन कीतोर. गानि मनकना रूपमते पुटतोन नाकु वेलेले तकलिप बोगांचा पीता, नाकुन हय्सुर इंचि दर्मसास्त्रमते बारि रासि मंता?

13 गानि नना मीकु वेहानद बतल इत्ते, एलियाल वासे मंतोर. ओना बारेमते दर्मसास्त्रमते बल्हा रासि मंता, अल्हेने लोकुलक ओरा मनसुक वाताप ओनतोन कीतुर,” इंचि येसु ओर्क वेहतोर.

देय्यम पीता पेडन येसु बेस कीतोर

(मल्लयाल 17:14-20; लुकाल 9:37-43)

14 पजा येसु आनि सिस्सुलुक, हिळु मत्ता सिस्सुलुकुनगा वासि हळतस्के, ओरा सुट्टु वेलेलेन लोकुलक जमा आसि मत्तुर. आनि दर्मसास्त्रम कराहना गुस्लक ओरतोन लोल्लि कीसेके मत्तुर.

15 अगा मत्ता लोकुलक येसुन हळसि इचंत्रमते अरतुर, पजा अंतोरगुडा बिराना विच्चि होंचि ओनक जोहार कीतुर.

16 अस्के येसु, “मिमेट ईरतोन बारि वदुकुंचेक मंतिट?” इंचि दर्मसास्त्रम कराहना गुस्लुकुन पूसकीतोर.

17 अस्के आ मंदिताल बोर वरोर येसुन, “गुद्द, ना मरिंक मूका-देय्यम पीता, ओन निहगा पीसि तत्तन.

18 देय्यम ओन बस्के अथे पीता, अस्के ओन अग्गेन हिळु हुक्कंता. ओना तोळ्दाल पोंगुर पेय्यंता. ओर करी-करी पल्लु कोर्कसेके अल्हेने गट्टिगा आंतोर. इद देय्यमतुन ओना लोप्पोटाल गेदमट इंचि नीवा सिस्सुलुकुंक वेहतन गानि ओरतोन आया पराहिल्ले,” इंचि वेहतोर.

19 अस्के येसु ओर्कुन, “अरे विस्वासम तक्को पीळितोरिता! नना बदवेरदाका मीतोन मनकन? बदवेरदाका नना मीकुन सहन कीकन? ओन नाहेंके पीसि वट,” इंचि इत्तोर.

20 ओर आ पेडन येसुनगा पीसि वातुर. देय्यम येसुन हळता-हळ्ळे, पेडन तेलहाचि हिळु अरहता. आ पेडल तोळ्दाल पोंगुर पेचाहसेके पोर्लालय दलगतोर.

* 9:4 मूसाल आनि एलियाल मूसाल आनि एलियाल पेनदा कबुरतोर आंदुर.

21-22 अस्के, “नी मरिंक इल्हा बस्केटाल आसेक मंता?” इंचि येसु पेडाना बाबोन पूसकीतोर. अय्ते ओर, “सिन्स्केटाले इल्हा आसेक मंता. बच्चुंगो मलकां तळमिते अरहचि, एते अरहचि हक्कालय हळता गानि निमे मापोर्रो दया वासि, माहाटी बतलन्ना सहायम क्रियापते कीम,” इंचि इत्तोर.

23 येसु ओन, “क्रियापते कीम, इत्ते बतल इत्ताप? पेनदापोर्रो विस्वासम क्रियानोर्क अन्नि आया परांतो,” इंचि इत्तोर.

24 अस्केने पेडाना बाबल कांडेर तेंडसेके, “नना विस्वासम कीतन सामि, नावा विस्वासम गाट्टिगा आयालय सहायम कीम” इंचि इत्तोर.

25 वेल्लेटुर लोकल्क विच्चि वासि गदि क्रियानद हळसि येसु आ देय्यमतुन, “सेव्दि-मूका देय्यमतुना, नना नीकु हुकुम हीतन, इंगटाल पलाते पेयसा, इन मर्रा बस्केने पियमा,” इंचि गदरिचतोर.

26 अस्के आ देय्यम ओन जोरसे तेल्हाचि, वरगेय्शि आ पेडाना लोप्पोटाल पेय्शि होत्ता. अस्के पेडल हातोनेलेसी आतोर. वेल्लेटुर लोकल्क ओन हातोर इत्तुर.

27 गानि येसु ओना कय पीसि तेहातस्के ओर तेदसि निल्लतोर.

28 पजा येसु लोन होतस्के बोरे हिल्वद हळसि सिस्युल्क येसुनगा वासि, “आ देय्यमतुन मोमोट बारि गेदमा परा हिल्लोम,” इंचि पूसकीतुर.

29 येसु ओर्कुन, “इसोटा देय्यमतुन सिराप पारतनातोने गेदमा परांतोम,” इंचि इत्तोर.

येसु ओना हामूरता बारमते वेहंतोर

(मत्तयाल 17:22-23; लूकाल 9:43-45)

30-31 पजा ओर अगटाल पेय्शि गालिल राज्यमताल होंचेक मत्तुर. ओर होनानद बोर्कन्ना तेळियमळ येसुक इस्टम मनाहिल्ले. बारित्ते येसु ओना सिस्युल्कुंक, “मनकना रूपमते पुटतोन नाकुन, वरोर दोकाते पीसि, लोकल्कुना कय्दे हीतोर. ओर नाकुन हक्कानुर गानि, मूड रोजकु आतंका नना मर्रा जीवाते तेदंतन,” इंचि कराहचेके मतोर.

32 गानि येसु वेहता पोल्ले ओर्क तेळिया हिल्ले. आनि ओन पूस क्रियालयगुडा ओर वेरियतुर.

अंतोर्कन्ना पेद्दा बोर इंचि येसु वेहमळ

(मत्तयाल 18:1-5; लूकाल 9:46-48)

33 ओर कपर्नाहूमते एवसि उदि लोते मत्तस्के, “हर्रि पीसि वायानेके मिमेट बतल वळ्कसेक वाटित?” इंचि येसु सिस्युल्कुन पूसकीतोर.

34 गानि “अंतोर्कन्ना पेद्दा बोर?” इंचि ओर वरोंक वरोर वळ्कसेक वातुर. अदुनहाटी ओर चुपचाप मत्तुर.

35 अस्के येसु उदिदिसि ओना पनेड सिस्युल्कुन केय्शि ओर्कुन इल्हा इत्तोर. “बोर अय्ते पेद्दा आंतन इनकुंतोर, ओर अंतोर्कन्ना सिन्नोड आसि अंतोरा सेवा क्रियानोर आयापीता,” इंचि ओर्क वेहतोर.

36 वेहचि, वरोर सिन्ना पेडन ओरा नड्डुम निलाहतोर. पजा ओन दग्गेरा पीकुचि ओर्कुन इल्हा इत्तोर.

37 “बोर अय्ते ई सिन्ना पेडनलेसी आसि मनानोन नावा पोरोलते ओप्कुंतुरो, ओर नाकुनगुडा ओप्कुंतुर. बोर अय्ते नाकुन ओप्कुंतुर ओर सिराप नाकुने आयो गानि नाकुन लोहतोनगुडा ओप्कुंतुर,” इंचि वेहतोर.

मनाकु विरोदमते हिल्वोर मनोरे आंदुर

(लूकाल 9:49-50)

38 अस्के योहान येसुन, “गुस! वरोर मनकल नीवा पोरोलते देय्याल्कुन पेचाहनेके मोमोट हळतोम, मालेसी ओर नी पज्जो ताकानोर आयोर. अदुनहाटी अल्हा क्रियमा इंचि मोमोट ओन आपतोम,” इत्तोर.

39 अस्के येसु ओन इल्हा इत्तोर. “बोर अय्ते ना पोरोलते अद्बतामाता कबाहक कीतोर, ओर नावा विरोदमते बिराना कराब वळ्का पर्रोर, अदुनहाटी ओन आपमत.

40 बारित्ते बोर अय्ते मनाकु विरोदमते हिल्लोर, ओर मना बाजुनोरे.

41 नना मीक निजम वेहांतन, मिमेट किरिस्तुना सिस्युल्क इंचि मीक बोरन्ना गिलासमेड एर उनालय हियानय्ते, ओन्क तपाकौटा इनाम दोर्कंता.

42 नापोर्रो विस्वासम क्रियना ई सिन्ना पेडानसंतोन बोरन्ना पापमते अरहते, ओना बौळगेक जोला बंडा दोहचि समुद्रमते दोब्बुतेने बेस मंन्ता.

43-44 ओक्कला नीवा कय नीकुन पापम क्रिया वेहते, दान नर्किसि पोहा. बारित्ते रौडु कय्क मंचि बस्केने पिर्रिकौटा बगाबगा पोत्तना तडमि मनना नरकमते होननदानकन्ना, तौटि कय आसि पिस्वते होनमळे नीहाटी बेस.†

† 9:43-44 इद वचनम कोनि पांडु लिपि हिल्ले.

45-46 अल्हेने, ओक्कला नीवा काल नीकून पापम किया वेहेते, दान नर्किसि पोहा. बारिल्ले रौडु काल्क मंचि नरकमते होननदानकन्ना, कृटाल आसि पिस्वरते होनमळे नीहाटी बेस मनंता.‡

47-48 अल्हेने, ओक्कला नीवा कळु नीकून पापम किया वेहेते, दान तेंडसि पोहा. बारिल्ले रौडु कळुकु मंचि नरकमते होननदानकन्ना, उंदि कळ्दडे पेनदा राज्येमते होनमळे नीहाटी बेस मनंता.

49 बारिल्ले हेरेक मनकन तळमितोनि होव्वोरलेसी कियमळ जर्गता.

50 होव्वोर बेसे मनंता गानि होव्वोर, होव्वोरलेसी र्सेस वायाकोटे अट्टे मरां बल्हा होव्वोर र्सेस तरा परांतोम? अल्हेने मिमेटगुडा होव्वोर र्सेसते बेस वरोक-वरोर कलियसि-मेलियसि सांतिते मंदना,” इंचि येसु वेहतोर.

10

सोडसिट्टेता बारेमते परिसिल्क पूसकीतुर

1 पजा येसु अगाटाल पेय्मि योर्दन बरेड दाट्टिस यहुदिया एरियाते होतोर. अगागुडा लोकुकल मंदानां मंदां ओनगा जमा आयालय दल्गतुर. अस्के येसु ओना अलवट परकारम ओर्क कराहलय दल्गतोर.

2 अगा इच्चुर परिसिल्कगुडा वातुर. वासि येसुना पट्टु हळानाहाटी ओन इल्हा पूसकीतुर. “नियम परकारम, वरोर मनकल ओना मुत्तोन होळसिय्या वच्चा?” इत्तुर.

3 अस्के येसु ओर्कुन, “मूसाल मीक बद्द आदेस हीतोर?” इंचि पूसकीतोर.

4 अय्ते, “वरोर मनकल सोडसिट्टे हीसि, मुत्तोन होळसियना इंचि मूसाना आदेस मंता,” इंचि ओर येसुन इत्तुर.

5 अस्के येसु ओर्कुन इल्हा इत्तोर. “मीवा मनसु बंडालेसी मत्ताहाटी मूसाल ई आदेसतुन मीकु रासतोर.

6 गानि बस्के अय्ते पेन ई दुनियातुन कीतानो, अस्केन ओर्कुन मांडसा मुरतळ इल्हा इंचि कीता.

7 अदुनहाटीगे मांडसा ओना यावन-बाबन होळसिसि, ओना मुत्तोनतोनि कलियसि मनंतोर.

8 ओर इच्चुर उंदे मेंदुल आसि मनांतुर. ओर वें-वें आयुर गानि उंदे मेंदुल आंतुर.

9 इल्हा पेने ओर्कुन कल्पताहाटी मनकल वें कियानायो,” इंचि वेहतोर.

10 पजा, येसु लोन मत्तस्के इदुना बारेमते सिस्युल्कु मरां उंदि मल्का ओन पूसकीतुर.

11 अस्के येसु ओर्कु इल्हा वेहतोर, “बोरन्ना ओना मुत्तोन होळसियन कारनम तप्या वें कारनमते होळसिसि इंकुंदानतोनि मरमि आयानय्ते, ओर मोदाटा मुत्तोन विरोदमते बोगमतनम कीताप आंतोर.

12 अल्हेने ओक्कला मुत्तो दाना मुय्दोन होळसिसि इंकावरोनतोनि मरमि आयानय्ते, अद्द बोगमतनम कीतद्द आंता.”

येसु सिन्ना पिलाल्कुंक आसिर्वाद्द हीतोर

13 उंदि रोज लोकुकल ओरा पिलाल्कुनपोर्री येसु कय इर्सि आसिर्वाद्द हियना इंचि ओनगा पीसि वातुर, गानि सिस्युल्कु ओर्कुन रांगतुर.

14 गानि येसु ओर रांगानद्द हळसि ओर्कुन इल्हा इत्तोर. “पिलाल्कुन नाहेके वायाहीम्ट, ओर्कुन आपमट. पेनदा राज्येम इंसंटोरदे आंद्द,

15 नना मीक निजम वेहंतन, बोरे आयिर पेनदा राज्येमतुन सिन्ना पिलाल्कुनालेसी आसि स्विकार किय्युर, ओर पेनदा राज्येमते बस्केने होळिया पर्र,” इंचि वेहतोर.

16 पजा आ पिलाल्कुन एक्कुचि, ओरा तल्लापोर्री कय इर्सि आसिर्वाद्द हीतोर.

सिरमंत मनकल पेनदा राज्येमते होनमळ वेल्ले कस्टम

17 येसु अगाटाल पेय्मि हर्रि पीसि होनेनेके, वरोर मनकल विच्चि वासि काल्कुनपोर्री अर्सि, “गुड, निमे बेसतोन आंदिन. बस्केळ्क पिस्सना पिस्वरता वारसदार आयानाहाटी नना बतल कीते बेस?” इंचि पूसकीतोर.

18 अस्के येसु ओन इल्हा इत्तोर, “नाकुन बारि बेसतोर इंतिन? बोरे बेसतोर आयोर, सिराप पेन उंदे बेसतद्द आंद्द.

19 नीकु पेनदा आदेसकु अय्ते एरपाटे मंता: बोने हळुकुमा, बोगमतनम किय्या, दोंगातनम किय्या, आबद्दम गवाइ हिय्या, इंकावरोन पसांचमा, नीवा तल्लुर-बाबोना कदर कीम,” इत्तोर.

20 अस्के, “गुड, नना अय्ते इवान्नि सिन्नास्केटाल कीसेकेन वातन,” इंचि ओर येसुन इत्तोर.

21 येसु ओनहेके हळतोर. पावरम अनपिच्चि, ओन इल्हा इत्तोर. “निहगा उंदि पोल्ले तक्को मंता. होन, निहगा बतल अय्ते मंता अदुन पूरा अम्मिसि, गरिबोर्कुंक त्ति सीम. अस्के नीकु स्वर्गमते दनम दोर्कार, पजा नहगा वासि ना पज्जे ताका,” इत्तोर.

‡ 9:45-46 इद्द वचनम कोनि पांडु लिपिने हिल्ले.

22 ओनागा सोम्मू वेल्लेन मलताहाटी, येसुना पोल्ले केंजसि ओना मोकम सिम्मरा आता. पजा दुक्कमते अगटाल पेय्सि होत्तोर.

23 अस्के येसु नाल्ल-मूलां हळसि सिस्स्युल्कुन इल्हा इत्तोर. “सिरमंतुल्क पेनदा राज्येमते होळियमळ इत्ते वेल्लेन कस्टम!” इत्तोर.

24-25 ओना पोल्लें केंजसि सिस्स्युल्क इंचत्रम आतुर. गानि येसु मरुंदि मल्का सिस्स्युल्कुन इल्हा इत्तोर, “पिलाल्कुनिटा! वरोर सिरमंत मनकल पेनदा राज्येमते होळियमळकन्ना लोटापेटा सुदि बोंगाताल होनमळ अल्कगा मंता,” इत्तोर.

26 इद केंजसि सिस्स्युल्कुंक वेल्लेन इंचत्रम आता. अस्के ओर-ओरे, “अल्हा अय्ते मुक्ति बोर्क दोर्का परीता?” इंचि वळकालय दल्यतुर.

27 अस्के येसु ओराहेके हळसि, “मनकालोरतोनि अय्ते इद आयापर्रो गानि पेनतोनि आंता. बारित्ते पेन अन्नि किया परीता,” इंचि इत्तोर.

28 अस्के पत्रु, “हळा, मोमोट अय्ते मल्लद-हिलवद अन्नि होळसिसि नीवा पज्जो वातोम,” इंचि येसुन इत्तोर.

29-30 येसु ओन, “नना निजम वेहांतन. बोरे आथिर नावाहाटी, बेसता कबुरताहाटी ओना लोन दारातुन, तम्मूह्क-दादालोर्कुन, अक्कल-हेलाह्कुन, तल्लुर-बाबोन, पिलाल्कुन, बूमि-जेगातुन होळसीतोर. ओन्क इंदकेने नूर अंताल्क एक्को लोन दारा, तम्मूह्क-दादालोर्क, अक्कल-हेलाह्क, तल्लुह्क, पिलाल्क, बूमि-जेगा दोर्कार. ओन्क कस्टाल्क वायानुं गानि वायाना कालमते ओन्क बस्केळ्क पिस्सना पिस्वर दोर्कका मन्ने.

31 गानि मुन्ने मल्लोर वेल्लेटुर पज्जो आयानुर, पज्जोटोर मुन्ने आयानुर,” इंचि वेहतोर.

येसु ओना हामुरता बारेमते मर्रा उंदि मल्का वेहंतोर

32-34 येसु आनि ओनतोनि मल्लोर येस्सलेमतेके होंचेके मल्लुर. येसु अंटोर्कन्ना मुन्ने मल्लोर. ओना सिस्स्युल्क इंचत्रमते मल्लुर, ओना पज्जो ताकापुर वेंते मल्लुर. अस्के येसु ओना पन्नेड सिस्स्युल्कुन बाजुंक ओसि, “हळाट, मनम येस्सलेम होंचतोम, अगा होत्ता पजा मनकना रूपमते पुटतोन नाकुन पेद्दा पेर्मालोर्कुना आनि दर्मसास्त्रम कराहना गुस्लकुना कय्दे पीसि हियानुर. ओर नाकु हामुर सिक्साता आदेस हीसि, यहदि आयबोरा कय्दे अप्पजेपनुर. अस्के ओर नाकुन सिडांचनुर, नापोर्रो उस्कानुर, पोटेत्ते तन्नानुर, हळ्कानुर. गानि मूड रोजकुंक नना मर्रा जीवाते तेदंतन,” इंचि मुन्ने जर्गना बारेमते सिस्स्युल्कुंक मर्रा वेहतोर.

याकोब, योहान येसुन विनंति कीतुर

35 पजा जब्दिना मर्क याकोब आनि योहान येसुंगा वासि, “गुरू, मोमोट बतल अय्ते तल्लकंतोम अदुन माहाटी निमे कियमळ गावाले इंचि मा मनसु मंता,” इंचि इत्तुर.

36 येसु ओर्कुन इल्हा इत्तोर. “मीहाटी नना बतल कियाना इंचि मीवा मनसु मंता,” इंचि पूसकीतोर.

37 अस्के ओर, “निमे नीवा महिमाते राज्येम कियनेके नीवा तिना बाजुंक वरोन, डेमा बाजुंक वरोन उद्दाहीम,” इंचि येसुन इत्तुर.

38 गानि येसु ओर्कुन, “मिमेट बतल पूसकीसंतितोर अद मीक तेळियसेक हिल्ले. नना बव कस्टाल्क अय्ते बोगांचना मंता, अबुन मिमेट बोगांचा परकिटा? हिलाकोटे नना बव बापतिस्मा एतंतनो, अद मिमेट एता परकिटा?” इंचि पूसकीतोर.

39 अस्के “हो, मोमोट तयार मंतोम,” इंचि ओर इत्तुर. अस्के येसु ओर्कुन इल्हा इत्तोर, “नना कस्टाल्क बोगांचताप मिमेट बोगांचा परकिट आनि नना एताना बापतिस्मा मिमेटगुडा एता परकिट.

40 गानि नावा तिना बाजुंक आनि नावा डेमा बाजुंक उपिच्चना अदिकार नाक हिल्ले. अव जेगां बोराहाटी अय्ते तयार कीसि मंतांगो, ओरे अगा उद्दंतुर,” इत्तोर.

41 ओर इत्ता पोल्लें केंजसि, अगा मलता कळमता पदि मंदि सिस्स्युल्क, याकोब, योहानुना पोर्रो होंग आतुर.

42 अस्के येसु सिस्स्युल्कुन ओना दमेरा केय्थि, “यहदि आयबोरा राजालोर ओरा जीतागाह्कुन, ओरा कय्दा हिळु इरालय हळंतुर, अल्हेने इ दुनियाता पेद्दा मनकालोरगुडा सिन्ना मनकालोरपोर्रो अदिकारम ताकसालय हळंतुर, इद मीक्कु एर्के.

43 गानि मिमेट मात्रम ओरालेसी कियानायो. मी लोपोटाल बोर अय्ते पेद्दा आयालय हळांतोर, ओर मीवा सेवा कियानोर आयापीता.

44 अल्हेने मी लोपोटाल बोर अय्ते लीडर आंतन इंतोर, ओर मीवा दासुड आयापीता.

45 बारित्ते मनकना रूपमते पुटतोनि नना सेवा कियागोटकुनालय वाया हिल्लेन गानि वेंतेतोर सेवा कियालय आनि वेल्लेटोर्कुन पापमताल पेचाहलय ओराहाटी नावा जीवा हियालय वातन,” इत्तोर.

गुडिड बरतलमयना कळकुंक नदर वायमळ

46 पजा येसु, ओना सिस्युल्कु यरिहो सहरते एत्तुर. अगटाल मर्रा पेयसनेके लोकुल्कुना पेद्दा मंदा ओरतोनि पेयसता. तिमाउसना मर्री बरतलमय इनानोर गुड्डिड बिचचागाड हर्दा पक्काते उदिदिसि मत्तोर.

47 नासरेत सहरता येसु इगोटाल होंचेके मंतोर इंचि ओन्क तेळियतस्के ओर, “येसु, दाविद राजाना वंसमतोना! नापोर्री दया कीम,” इंचि जोरसे वरगेयतोर.

48 अस्के वेल्लेटुर लोकुल्क ओन, “चुपचाप मन” इंचि रांगतुर, गानि, “दाविद राजाना वंसमतोना, नापोर्री दया कीम,” इंचि ओर जोरसे मोल्कुनालय दल्यतोर.

49 अस्के येसु आगसि, “ओन केयट,” इंचि इत्तोर. अस्के ओर आ गुड्डिडन केप्सि, “दैरनेम इर्रा, येसु नीकुन केयसंतोर तेदा,” इंचि इत्तुर.

50 अस्के ओर मुचकुंचि मत्ता कप्पिडतुन तेंडसि पोहचि बिराना तेदसि येसुनगा वातोर.

51 अस्के येसु ओन, “नना नीहाटी बतल कियना इंचि नी मनसु मंता?” इंचि पूसकीतोर. अस्के, “गुरु, नावा कळ्ळुकुना नदर दिस्सानाल कीम,” इंचि येसुन इत्तोर.

52 अय्ते येसु, “निमे होन, नीवा विस्वासमे नीकुन बेस कीता,” इंचि इत्तोर. अल्हा इत्ता इनुडे ओना कळ्ळुकुन नदर वासि ओरगुडा येसुना पज्जो होत्तोर.

11

येसु येस्सलेम होनमळ

1 पजा ओर अंतोर येस्सलेम सहरता दग्गेरा ज्यतुन मराकुना गुट्टापोर्री मनना बैतपागे आनि बैतानिया इनना नाहकुना दग्गेरा एत्तुर. पजा येसु ओना इक्कुर सिस्युल्कुन केप्सि,

2 ओर्क इल्हा वेह्चि नाटे लोहतोर. “मी मुन्ने दिस्सना नाटे होंट. अद नाटे होळियता होळयुळे, बस्केने बोरे उद्दुवद उंदि गाडदि पोरी दोह्चि मत्तद मीकु दिसंता, दान लेहकुंचि पीसि वट्ट.

3 ओक्कला अदुन पीसि वायनेके, इल्हा बारि कीसंतरि? इंचि बोरेन्ना पूसकीते, सामिक दीना अब्बरम मंता इंचि वेहट. अस्के ओर बिराना अदुन इग्गे लोहानुर,” इत्तोर.

4 येसु वेहताप ओर अद नाटे होत्तुर. अगा हर्दा पक्काते उंदि लोता तल्पुना दग्गेरा गाडदि पोरी दोहचि मत्तद ओर्क दिसता. अस्के अदुन लेहत्तुर.

5 अगा नित्तिसि मत्तुर इच्चुर लोकुल्क हळसि, “मिमेट बतल कीसंतरि? गाडदि पोरीन बारि लेहसंतरि?” इंचि पूसकीतुर.

6 ओर येसु वेहतापे ओर्क वेहतस्के, आ लोकुल्क ओर्कुन होना हीतुर.

7 ओर अद गाडदि पोरीन येसुनगा तच्चि, दानपोर्री ओरा कपडिं वाटतुर. अस्के येसु दानपोर्री उद्दोर.

8 वेल्लेटुर लोकुल्क ओर केर्ता कपडिं तेंडसि, येसु होनना हर्दे तारतुर. इंचिक्कुर लोकुल्क अय्ते नेलिने मत्ता मराकुना कोम्मां नकिंसि हर्दे तारतुर.

9-10 येसुना पज्जो-मुन्ने ताकाना लोकुल्क वरगेयसेके इल्हा इनुंदुर, “सामिना पोरोलते वायानोंक, पेनदा आसिर्वाद दोर्किकाटी, होसन्ना! होसन्ना! * दाविदनालेसी राज्यम कियालय वायानोंक, पेनदा आसिर्वाद दोर्किकाटी, स्वर्गमते मंदना पेनदुक दन्यवाद,” इंचि इत्तुर.

11 इल्हा येसु येस्सलेम सहरते होळियतोर. पजा गुळितगा होंचि, सुट्टु अन्नि वस्तुकुन तिरियसि हळतोर. पोळ्ळु होत्ता इंचि ओना पन्नेड सिस्युल्कुन पीसि बैतानिया नाटे होत्तोर.

पंडि हिल्ला अंजिर मरा

12 इंकुंदि रोजु येसु बैतानिया नाटेनाल वायनेके ओन्क कर्वेस्ता.

13 हरदाल इच्चुर लक्कु उंदि पचचटा अंजिर मरातुन हळसि, दानकु पंडिं मंतां बोरे इंचि आ मरातगा होत्तोर. गानि आ मराकु आकिं तप्पा बतांगे मनाहिल्लें. बारित्ते अद पंडिं हादाना वेला आयो.

14 अस्के येसु अद मरातुन, “इंदकेटाल नीवा पंडि बस्केने बोरे तिन्नु,” इंचि इत्तोर. अद पोल्लेतुन ओना सिस्युल्कु केंजतुर.

गुळितगा अम्मनोर्कुन येसु गेदमंतोर

* 11:9-10 होसन्ना इत्ते-पेनदुन तल्पुकुनमळ.

15 ओर येस्सलेम एव्हा पजा येसु गुळिते होतोर. अगा गुळिते बोर अये अम्मूमळ-अस्सुड कीसेक मत्तूर, ओर्कुन पलाते गेदुमतोर. अल्हेने कोत्तां अदला-बदला कियानोरा बल्लन आनि मोक्कु हियालय पावरेम पिट्टें अम्मनोर्कुना कुसिन मिळ्हाचि वातोर.

16 अल्हा कीसि गुळिताल बोने बदे वस्तु पीसि होनुळ-वायुळ किया हिया हिल्लोर.

17 पजा ओर्क इल्हा वेहालय दलगतोर. “नावा लोतुन दुनियाता अंटेर लोकुकल पारतना कियाना जेगा इनानूर, इंचि दर्मसास्त्रमते रासि हिल्लेना? गानि मिमेट दीन दोंगाल्क मक्कना जेगा कीतिर,” इत्तोर.

18 इल्हा अंटेर लोकुकल येसु वेहाना पोल्लें केंजसि इचंन्रम आयुंदुर. अदुनहाटीं पेर्मांलोर, दर्मसास्त्रम कराहना गुस्ल्लक येसुन हक्कालय हळुंदुर. गानि ओन अल्हा बतलन्ना कियालय ओर वेरियुंदुर.

19 पजा येसु, ओना सिस्स्युल्कु पोळ्दु होत्तारिते येस्सलेमताल पेय्शि होत्तूर.

वतसि होत्ता अंजिर मरा

20 इंकुंदि रोजु हक्केरेने मते येस्सलेमतके वायानेके ओर अद अंजिर मरातुन हळतूर, अस्के अद मरा हिह्कुनाल अये कोस्सादाका पूरा वतसि होंचि मत्ता.

21 येसु अद मरातुन इत्ता पोल्ले पत्रुंक मति वाता. अस्के ओर येसुन, “अद हळा गुस्† निमे सापनेम हीता अंजिर मरा वतसि होत्ता,” इंचि इत्तोर.

22-23 अस्के येसु ओर्कु इल्हा जवाब हीतोर. “मिमेट पेनदापोरों विस्वासम इर्माट. नना मीकु निजम वेहांतन, बोर्नना इद गुट्टातुन, ‘इगेटाल तेदसि समुद्रमते होंचि अर्रां’ इंचि बतले अनमानम हिलाकोटा विस्वासमते इनानये, अद होंचि अर्रां.

24 अदुनहाटीं नना मीकु वेहांतन, मिमेट विस्वासमतोनि पारतनाते बतल तल्किना, अद मीकु दोर्कता इंचि विस्वासम कीम्टु, अस्के अद मीवादे आंता.

25 अल्हेने मीवा मनसुनेगिंटा बोना पोर्नोना पगा मत्ते, मिमेट पारतना कियालय निततस्के मुन्ने ओन मापि कीम्टु. अस्के स्वर्गमते मंदना पेनबाबालगुडा मीवा तप्पुकुन मापि कीतोर.

26 मिमेटगिंटा इंकावरोना तप्पुकुन मापि कियाकोटे, स्वर्गमते मंदना पेनबाबालगुडा मीवा तप्पुकुन मापि किय्योर,” इंचि वेहतोर.‡

येसुना अदिकारमता बारेमते पूसकियमळ

27 ओर येस्सलेम सहरते मरां वातस्के, येसु गुळिते तिरियसेक मत्तोर. अस्के पेर्मांलोर, दर्मसास्त्रम कराहना गुस्ल्लक आनि यहुदि पेदुदाल्क येसुनगा वातूर. वासि,

28 “निमे ई कबाहक बद अदिकारमते कीसंतिन? नीकु ई कबाहक कियालय अदिकारम बोर हीतोर?” इंचि पूसकीतूर.

29 अस्के येसु ओर्कुन इत्तोर. “ननागुडा मीकुन उंदि सवाल पूसकीतन. मिमेट जवाब हियानये, नना बद अदिकारमते इव कबाहक कीसंतन इत्तद वेहंतन.

30 अये जवाब हीम्टु, योहानुक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.

31-32 अस्के, ओर-ओर इल्हा वळ्ळकुनालय दलगतूर, “ओक्कला स्वर्गमताल दोर्कता इंचि मनम इनानये, ‘मिमेट योहानुन बारि नाम्मिर’ इंचि इनानूर. ओक्कला मनम मनकालोराहेंदाल दोर्कता इनानये, लोकुकुना वेंरें! बारित्ते योहान निजमे पेनदा कब्रतोर इंचि ओर नम्मंतूर,” इत्तूर.

33 अदुनहाटीं ओर, “माक एर्का हिल्ले,” इंचि इत्तूर. अस्के, “अल्हा अये, इव कबाहक बद अदिकारमते कीसंतनो ननागुडा मीकु वेहोन,” इंचि येसु इत्तोर.

12

1 अस्के येसु ओर्कु उंदि वेसुडि वेहमळ सुस्व कीतोर, “वरोर मनकल अंगूर तोटा कीतोर. आ तोटा सुट्टु ग्रे दोहाचि तोटाता लोपेन अंगूर पंडिना पानकम तेंडालय उंदि पोक्का तस्सि, दाना दग्गेरेने काबेलहाटीं उंदि मंडा वाटतोर. पजा तोटातुन वेरेंतोर्क बटाइक हीसि, वेरे देसेम होत्तोर.

2 पजा बस्के अये अंगूर पंडिं कोय्याना वेला वाता, अस्के ओरागटाल पंडिना तूस एतालय ओना वरोर दासुन बटाइतोरहेके लोहतोर.

3 गानि बटाइतोर आ दासुन पीसि पक्का तंचि, उत्ता कय्के वापस लोहतूर.

4 पजा मालक इंकावरोन दासुन बटाइतोरहेके लोहतोर. आ बटाइतोर ओना तल्ला पयाहचि ओन कदर हिलाकोटा कीसि लोहतूर.

† 11:21 गुस् गुस्, रब्बी उंटे पोल्ले आंदूर. ‡ 11:26 इद वचनम कोन्नि पांडु तिपिने हिल्ले.

5 मालक मर्रा इंकावरोन दासुन ओरहेके लोहतोर, ओर ओन हक्कतुर. अस्के मालक इल्हा इंका वेल्लेन दासुल्कुन लोहतोर. गानि बटाइतोर इच्चुर्कुन तंतुर, इच्चुर्कुन बारे हक्कतुर.

6 आकिरते मालकनगा ओना पावरमगल्ला मर्री वरोरे मिगिल्सि मत्तोर. अस्के मालक, 'नावा मर्रीन बेस कदर कियानुर' इनकुंचि ओरहेके लोहतोर.

7 गानि बटाइतोर ओर वायानद ह्ळसि, 'ईर अय्ते वारसदार आंदुर. दट ओन मनम हक्ककोम, अस्के ओना जायदाद मनाक आयार,' इंचि वरोक-वरोर इत्तुर.

8 पजा ओन दोर्कापीसि हक्किसि, तोटाता पलाते ओसि पोहचीतुर.

9 इंदके अंगुर तोटाता मालक वासि ओर्कुन बतल कियानुर? ओर वासि बटाइतोर्कुन हक्किसि अद तोटातुन वेरेतोर्क अप्पजेपनुर," इत्तोर.

10-11 पजा येसु ओर्कुन इल्हा इत्तोर. "मिमेट दर्मसास्त्रमते बस्केन हदवा हिल्लिरा?

"बद बंडातुन अय्ते मिस्त्रिलक, कबळक ओज्जो इंचि हय्सा हिल्लुर,

अदे बंडा, सेंकु मूलाता पुनादि बंडा आता.

इद सामि कीता कबळ आंद, इद मना नदरते इंचत्रमाता कबळ आंद," इत्तोर.

12 पजा दर्मसास्त्रम करहाना गुरूक आनि पेद्दा पेर्मालोर्क, येसु वेहता वेसुडि कैजसि, "ईर मनाकुने इंचंतोर," इंचि एरपाट कीरतुर. अदुनहाटी ओर येसुन दोर्का पियालय ह्ळतुर. गानि लोक्कुना वेर्क ओन पिथ्याकेन होळसि होत्तुर.

कैसर राजांक कर दोहना बारेमते

13 पजा, येसुन ओना पोल्लेन लोपेन दोर्का पिथ्याना इंचि इच्चुर परिसिल्कुन आनि इच्चुर हेरोद राजाना मनकालोर्कुन येसुनगा लोहतुर.

14 ओर येसुनगा वासि इल्हा इत्तुर. "गुरु, निमे निजम वळकानोन आदिन, बोर बतल इनिनागानि दाना पिकिरगुडा किय्यिन, निमे लोक्कुना मोकम ह्ळसि वळ्ळिन, इंका पेनदा हर्दा बारेमते सत्तेमते कराहतिन इंचि माक एरपाट मंता. इंदके माकु वेहा, नियम परकारम, कैसर* राजांक कर दोहमळ न्यायमेना, आयोना?" इत्तुर.

15 येसु ओरा मनसुना कराब पिलान एरपाट कीसि, ओर्कुन इल्हा इत्तोर. "मिमेट बारि नावा पट्टु ह्ळंतिर? नाकु उंदि एंडि बंडि हुप्सट," इत्तोर.

16 ओर उंदि एंडि बंडि हुप्सि. अस्के येसु ओर्कुन इल्हा इत्तोर. "इद एंडि बंडिपोर्रो बोना पोदुवा आनि पोरोल मंता?" इत्तोर. "कैसर राजानद" इंचि ओर इत्तुर.

17 पजा येसु, "बद कैसर राजानद मंता, अद कैसर राजांक हीम्टु. बद अय्ते पेनदाद मंता, अद पेनदुक हीम्टु," इंचि ओर्कुन इत्तोर. अस्के ओना पोल्लेन कैजसि ओर वेल्लेने इंचत्रम आतुर.

सदुकिर येसुन पसांचालय ह्ळंतुर

18 इच्चुर सदुकिर येसुनगा वातुर (हासि मर्रा जीवाते तेदमळतुन ईर नम्मुर.) वासि इल्हा सवाल पूसकीतुर.

19 "गुरु, मूसाना नियम परकारम, वरोर मनकल पिलाल्क आयाका मुन्नेन हासि होंचि ओना मुत्तो मत्ते, दानतोनि ओना तम्मुर मर्रमि आसि, हातोना वंसमताहाटी पिलाल्क कनना इंचि रासि मंता.

20 अय्ते, एडुर दादाल-तम्मूक्क मत्तुर. ओरा लोप्पोटाल पेद्द दोड मर्रमि आतोर, गानि पिलाल्क आयाका मुन्नेन ओर हातोर.

21 हातस्के ओना पज्जोटोर दानतोनि मर्रमि आतोर, ओरगुडा पिलाल्क आयाका मुन्नेन हातोर. अल्हेने ओना पज्जोटोरगुडा दानतोनि मर्रमि आतोर, ओरगुडा पिलाल्क आयाका मुन्नेन हातोर.

22 इल्हा ओर एडुरगुडा दानतोनि मर्रमि आसि पिलाल्क आयाका मुन्नेन हातुर. आकिरते अद मुरतळगुडा हाता.

23 अय्ते हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मर्रमि आसि मत्तुर," इत्तुर.

24 अस्के येसु ओर्कुन इल्हा इत्तोर. "मिमेट दर्मसास्त्रमतुन आनि पेनदा ताकततुन एरपाट कियका दान मिमेट तप्पु अर्तम कीकुंचंतिर.

25 बारित्ते ओर हामुरताल जीवाते तेदानुर अस्के, ओर मर्रमि आयुर, मर्रमि कीसिगुडा हिथ्युर. गानि ओर स्वर्गमता पेनदा दूतनलेसी मनांतुर.

26 हातुर मर्रा जीवाते तेदाना बारेमते पेन, 'नना अब्राहामुना पेनदुन, इसाकुना पेनदुन आनि याकोबुना पेनदुन' इंचि दर्मसास्त्रमते पोल्तना पोदाता गटना जग्निके मूसांक वेहता, अदुन मिमेट हदवा हिल्लिरा?

* 12:14 कैसर इद राजाना पोरोल आयो. रोम सरकारते अन्टिकना पेद्दा पदवि आंद.

27 अद हातरो पेन आयो गानि जीवाते मत्तरो पेन आंद. मिमेट वेल्ले तपु कीसेक मंतिट,” इंचि इत्तोर.

अन्निकन्ना पेद्दा आदेस

28 ओर वदूरकुंचेक मत्तद केंजसि, अचोटेन वरोर दर्मसास्त्रम कराहना गुरु अगा वातोर. येसु ओर्क बेस जवाब हीतद हळसि, “गुरु, पेन हीता आदेसकुनाल मेन आदेस बद आंद?” इंचि पूसकीतोर.

29 अस्के येसु ओन्क इल्हा जवाब हीतोर. “ए इस्त्राएल! इद केंजा, अन्नि आदेसकुनाल इद मेन आदेस आंद: मावा पेने सामि आंदुर.

30 निमे नीवा सामि आता पेनदुन पूरा मनसुनाल, पूरा आत्माताल, पूरा बुद्दिदताल, पूरा ताकतताल पावरम कीम.

31 रौडो आदेस बद इत्ते, नीवद निमे बचचोन पावरम कीतिनो, अचोने पावरम इंकावरोनगुडा कीम. इव रौडुन होळसि वेंरे पेद्दा आदेस बद्दे हिल्ले,” इत्तोर.

32 अस्के दर्मसास्त्रम कराहना गुरु येसुन, “गुरु, निमे सत्तेम वळकतिन. पेन उंदे आंद, दान्क तपिचिचि इंकुदि पेन हिल्ले.

33 अदुनहाटी कमुर्बलि कियानदानकन्ना, मोक्कुल्लक हियनदानकन्ना पूरा मनसुनाल, पूरा आत्माताल, पूरा बुद्दिदताल, पूरा ताकतताल मनम पेनदुन पावरम कियमळे बेस आंद. अल्हेने मनद मनम पावरम कीतचोने इंकावरोनगुडा पावरम कियना.” इंचि इत्तोर.

34 अल्हा ओर तेल्चिते वेहतद केंजसि येसु ओन, “निमे पेनदा राज्येमकु वेल्ले लक्कु हिल्लिन,” इंचि इत्तोर. दाना पजा येसुन बद्दे सवाल पूसकियालय बोर्कु हिम्मत आयाहिल्ले.

किरिस्तु बोना मर्री आंदुर?

35 येसु गुळिते पेनदा पोर्ल्ले कराहनेके ओर्कुन इल्हा इत्तोर. “किरिस्तु दाविदना मर्री आंदुर, इंचि दर्मसास्त्रम कराहना गुस्लक बल्हा इना परांतुर?” इत्तोर.

36 इद पोर्ल्लेतुन कुद दाविद पवित्र आत्माते निंडसि इल्हा इत्तोर,

“बदवेरदाका अयते नीवा पगातोरकुन, नीवा काल्कुनगा तर्रोन,
अदवेरदाका नावा तिना बाजुंक उद्दिदसि मन,
इल्हा सामि, नावा सामिन इत्तोर.”

37 इल्हा दाविद ओन, सामि इंचि इत्तोर. अयते किरिस्तु दाविदना मर्री बल्हा आया परांतोर? इत्तोर. अगा मत्ता लोकुल्लक येसुना पोर्ल्ले बचचोरो गम्मतते केंजतुर.

दर्मसास्त्रम कराहना गुस्लकुनलेसी किया मनि

38 येसु ओर्क कराहसेके इल्हा इत्तोर. “दर्मसास्त्रम कराहना गुस्लकुनाल उसाते मंदु. पोर्रौटाल हिळ्ळदाका पोळ्ळु अंगिं केसिं तिरियमळ, हाटमकुने जोहार वेहागोटकुनमळ ओर्क बेस अनपिचंचता.

39 इंका दर्मसास्त्रम कराहना लोह्कुने, कुळ्पुकुने पेद्दाल्क उद्दुना जेगाते उदमळ इत्ते ओर्क वेल्ले इस्टम.

40 ईर मुंडामोस्ता मुर्ताह्कुन मुळहंतुर, लोकुल्लकुंक हुप्सालय वेल्लेनजेम पारतना कीतुर. गानि ईर्क मात्रम पेन अंतोर्कन्ना एक्को सिक्सा हियार,” इंचि इत्तोर.

मुंडामोस्ता मुरतळ रौडु कोत्तां वाटमळ

41 येसु गुळिते दान पेटीता मुन्ने उद्दिदसि, लोकुल्लक दान पेटीते कोत्तां वाटनद हळ्ळसेक मत्तोर. वेल्लेदुर सिरमंत लोकुल्लक वेल्लेने कोत्तां वाटतुर.

42 पजा मुंडामोस्ता उंदि गरिब मुरतळ वासि रौडु रागि कोत्तां वाटता. अबुना विलुवा वेल्ले तक्को मत्ता.

43-44 अस्के येसु ओना सिस्त्र्युल्लकन दग्गोरा केय्ति इल्हा इत्तोर. “नना मीक निजम वेहांतन, ई मुंडामोस्ता गरिब मुरतळे अंतोर्कन्ना एक्को दानम कीता. बारित्ते इग्गे सिरमंत लोकुल्लक ओरा दनमताल दानम कीतुर, गानि इद गरिब मुंडामोस्ता मुरतटगा रौडे रागि कोत्तां मत्तां. अद अबुनगुडा इत्ते दाना पिस्वरताहाटी इरतादानगुडा पेनदुक वाटसीता,” इत्तोर.

13

गुळि नासडेम आयाना बारेमते येसु वेहमळ

1 येसु गुळिताल पलाते पेय्ति वातसेक ओना सिस्त्र्युल्लकन वरोर सिस्त्र्युड येसुन, “गुरु, हळ्ळा! बचचोर पेद्दा बंडां, बचचोर बेसता बंगलां,” इंचि इत्तोर.

2 अस्के येसु ओन इल्हा इत्तोर. “बंडाने दोहतव पेद्दा-पेद्दा बंग्लां हळसेक मंतिन गदा, अव बंडां उंदानपोरों उंदि मनाकोंटा कुल्हाना वेला वायनद मंता,” इत्तोर.

3 येसु अगटाल पेधिस गुळिकु मुन्ने मंदना जयतुन मराकुना गुट्टापोरों होंचि उदतोर. ओर ओटिगा मत्तद हळसि, पत्र, याकोब, योहान आनि अंदरियल ओनगा होत्तुर.

4 होचि, “इवानि गटनां बस्के जर्गनुं माक वेहा. इंका इव गटनां जर्गना मंता इन्नेके माकु बतल चिन्ह दिस्सार?” इत्तुर.

5 अस्के येसु ओर्कु इल्हा वेहालय दलगतोर, “मीकुन बोर पसांचकोंटा मिमेट उसारते मंटु.

6 नावा पोरोल एतसेके बचुदुरो लोकुकल वांतुर. वासि, ‘ओन नाना आंदुं’ इंचि वेल्लेटोर्कुन पसांचनुं.

7 मिमेट लडाई आनि लडाईना पोलेलना बारेमते केंजसि वेरियमट, अल्हा तप्पाकोंटा आयानुं. गानि दुनियाता आकिर वेला अस्केने वायो.

8 देसैमपोरों देसैम, राज्येमपोरों राज्येम लडाई आयनुं, वरे-वरे जेगाने बूकपालक आयनुं, कर्वु अरार. गानि इल्हा आयमळ इत्ते एर पुरालय नोप्पि सुस्व आताप आंद.

9 गानि मिमेट उसारते मंटु. बारिल्ले मीकुन पंचादितोरा कय्दे अप्पजेपनुर आनि दर्मसास्त्रम कराहना लोहकुने ओसि तनानुर. पजा नावा बारेमते गवाइ वेहालय मीकुन राज्यपाल आनि राजालोरा मुन्ने निलाहनुर.

10 गानि दीनकन्ना मुन्ने अन्नि देसेलकुने तप्पाकोंटा पेनदा बेसता कबुर वेहमळ जर्गंगोम.

11 अद वेलाते मीकुन पीसि ओसि पुसकियानुर. अस्के अगा बतल वळकना, बतल वळकानायो इंचि मोदाले रंदि कियमट. वळकानोर मिमेट आयो गानि पवित्र आत्मा आंद. अदुनहाटी मीवा मनसुने बतल वळकागोम इंचि अनपिंचंतनो अदे वळकट.

12 इंका बल्हा जर्गता इत्ते, कासा तादल-तमुहक पगां आसि हळ्कालय अप्पजेपनुर. पिलात्क ओरा तल्लुर-बाबोंक अड्डम तिरियसि ओर्कुन हळ्का वेहांतुर.

13 नावा पोरोलताहेंका अंतोर लोकुकल मीकुन हय्सुर. गानि बोर अय्ते पेनदापोरोंटा विस्वासमते आकिरदाका निल्लिस मनंतोर, ओनके मुक्ति दोर्कार.

14 गानि बस्के अय्ते, बोर हय्सवसोंटा नासडेम कियाना वस्तु, गुळि लोप्पो बगा अय्ते मंदनायो अगा नित्तिसि मत्तद मिमेट हळकिर, अस्के बोर अय्ते यहुदिया एरियाते मंतुरो, ओर गुट्टनहेके वित्तिर (हदुवानोर इदुन अर्तम कीकुटु)

15 बोर अय्ते लोतपोरों मंतोर, बवे वस्तुक पीसि वायालय लोप्पो होळियानायो.

16 बोर अय्ते नेलिने कबळ कीसेक मंतोर, कपडिं पीसि वायालय मल्लिस लोन होनानायो.

17 अव रोजकुने पीट मत्ता मुर्ताहकुंक आनि सिन्ने मर्तल्लुहकुंक वेल्लेन तकलिप वांता.

18 अव तकलिपकु पीनि कालमते वायामान्नि इंचि पारतना कीम्टु.

19 बारिल्ले पेन कीता ई दुनिया पुटत्सकेटाल अय्ते इदवेरादाका बस्केन वायवसोंटा तकलिप अव रोजकुने वायाना मंता आनि मुन्नेगुडा असोंटा तकलिप बस्केने वायो.

20 ओक्कला सामि अव रोजकुन तकको कियाकोंटा मंचि मत्ते, बोर पिसाकोन्नेर. गानि बोर्कुनय्ते पेन पेरता, ओराहाटी अव रोजकुन तकको कीता.

21-22 अव रोजकुने आबद्दम किरिस्तुत्क, पेनदा आबद्दम कबुरतोर वायानुर. आनि कुदुरते पेन पेर्कुत्ता लोकुकुकुन पसांचलय चिन्हां, इचंत्रमता कबाहक कीसि हुप्सानुर. अदुनहाटी ओक्कला बोरन्ना मीकुन, ‘हुळाट, किरिस्तु इगे मंतोर, अगा मंतोर’ इनानय्ते मिमेट ओर्कुन नम्मूमट.

23 गानि मिमेट उसारते मंटु; इव अन्नि पोलेलें नना मीक मुन्नेने वेहचीतन.

24 गानि अव रोजकुने तकलिपकु मारतस्के पोळ्दुंक हीकट मुच्चका वायार, वेळसि वेल्गु हियाकोंटा आयार.

25 मब्बुनाल सुक्कां हिळु अरानुं, मब्बुने मनना अन्नि सक्तिन कदलिचमळ जर्गता.

26 अस्के मनकना रूपमते पुटतोन नना, पेद्दा बलम आनि महिमातोनि मब्बु तेर्पेनपोरों उद्दिदिसि वायानेके लोकुकल हळानुर.

27 अस्के नना नावा दून बूमिपोरों लोहांतन. आ दूतां बूमिपोरों नालुं मूलानाल, मब्बुना ई कोस्साताल अय्ते आ कोस्सादाका नना पेर्कुत्ता लोकुकुकुन जमा कीतां,” इत्तोर.

येसुना मल्लिस वायाना बारेमते वेहमळ

28 “अजिर मराताल उंदि पोलेले करियट. अजिर मराता कोम्मांक इग्गुर बस्के अय्ते वांता, अस्के एद्दि कालम दग्गेरा एल्ता इंचि मिमेट एरपाट कीतिर.

29 इल्हा इव अन्नि गटनां जर्गनद हळसि ओर दग्गेरा मंतोर, गल्मातगेन मंतोर इंचि मिमेट एरपाट कीतिर.

30 नना मीकु निजम वेहांतन, बदवेरदाका अय्ते इव अन्नि पोलेलें पुरागा आयोंगो, अदवेरदाका ई पीळि मुळ्गो.

31 इद बूमि, मब्बु नासडेम आसि होंदार, गानि नावा पोलेलें बस्केने नासडेम आयों.

अद वेला बोनके तेळियो

32 “अद रोजु आयि, अद गळिया आयि बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिराप पेनबाबांके तेळियंता.

33 अद वेला बस्के वांतानो मीक तेळियो. अदुनहाटी मिमेट तेल्चिते, उसारते मंटु.

34 इद वरोर मनकनलेसी मंता, बोर अय्ते पय्नेम होनाका मुन्ने, ओना जीतागाहकुन केप्सि, बोना कबळ ओनकु अप्पजेपसि, लोतुन कावेल कियानोन ‘तेल्चिते मन’ इंचि आदेस हीतोर.

35 लोता मालक पोळ्द होंचि वांतोरो, नळ्जाम नर्का वांतोरो, गोगोड कूसानेके वांतोरो, हक्केरे वांतोरो, बस्के वांतोरो मीक एरपाट हिल्ले. अदुनहाटी मिमेट तेल्चिते मंटु.

36 ओर अचानक वासि, मीकुन निद्र होंचि मत्तद ह्ळा मनि इंचि मिमेट तेल्चिते मंटु.

37 इद नना मीक वेहतन, अल्हेने अंतोर्कगुडा अदे वेहासेक मंतन. तेल्चिते मंटु,” इंचि येसु ओर्क वेहेतोर.

14

येसुन हक्कना पिलान कीतुर

(मत्तयाल 26:1-5; लूकाल 22:1-2; योहान 11:45-53)

1 रौडु रोजकुना पजा दाटसि होनना पंडुगु आनि पुल्लगा आयवा पिडिता हारिना पंडुगु आयाना मत्ता. अस्के येसुन सप्पुडदाका दोर्कापीसि हक्ककोम इंचि पेर्मांलोर्क, दर्मासास्त्रम कराहना गुस्लक पिलान कीसेक मत्तुर.

2 गानि, “पंडुगु रोजकुना लोप्पो हक्का मन्नि, अल्हा कीते लोकुलक गडबड किया परांतुर,” इंचि ओर इनकुत्तुर.

येसुना तल्लापोर्रो अत्तर निय बळियमळ

(मत्तयाल 26:6-13; योहान 12:1-8)

3 अद वेलाते येसु बेतानिया नाटे, मुन्ने कुस्टरोगम आसि मत्ता सिमोनुना लोते गाटो तिनालय उदिदेसि मत्तस्के, उंदि मुरतळ तेल्लाटा बंडा गुर्गिते जटामासि* मराताल तयार कीतद, वेल्ले दराता पिव्वर अत्तर निय पीसि वाता. अद गुर्गिता बुचचातुन पयाहचि येसुना तल्लापोर्रो बळियता.

4 अदुन ह्ळसि, अगा मत्तोर्क इचुर्कु होंग वासि, “इद अत्तर निय अट्टिदे बारि नासडेम कीतिन?

5 इदुन अम्मिसि मत्ते मूड न्हक्कुनना एक्को एंडि स्पे वायवहकु. अचुन गरिब लोकुलकुंक हियालय ओज्जुवाहक,” इंचि दान तेराहतुर.

6 गानि येसु ओर्कुन इल्हा इत्तोर. “दीन बतल इनमट, मिमेट दीन बारि तकलिप कीसंतिर? इद नावाहाटी बेसे कीता.

7 गरिब लोकुलक मीवातोनि बस्केळक मन्तुर, मिमेट बस्के इनकुत्ते अस्के ओर्क बेस किया परांतुर, गानि नना मीवातोनि बस्केळक मन्नेन.

8 नावा मेटुलतुन बोंदा दोस्साका मुन्नेने अद मुरतळ नाक निय होकता. अद किया परतचचोन कीता.

9 नना मीक निजम वेहांतन. पूरा दुनियाते बगा-बगा पेनदा बेसता कबुर वेहमळ जर्गता, अगा ई मुरतटुन आनि इद कीता कबळतुन मति कियानुर,” इत्तोर.

इस्कारियोत यहदल येसुन पीसि हियालय ह्ळांतोर

(मत्तयाल 26:14-16; लूकाल 22:3-6)

10 पजा, पन्नेड सिस्युलकुनाल वरोर इस्कारियोत यहदल मत्तोर. येसुन पीसि हियालय ओर पेद्दा पेर्मांलोरगा होतोर.

11 अद केंजसि ओर कूस आसि, ओन्क कोत्तां हीतोम इंचि ओप्कुत्तुर. अदुनहाटी ओर येसुन पीसि हियालय मोका ह्ळसेक मत्तोर.

सिस्युलकु पंडुगुना गाटो तयार कीतुर

(मत्तयाल 26:17-25; लूकाल 22:7-14,21-23; योहान 13:21-30)

12 पुल्लगा आयवा पिडिता हारिना पंडुगुना मोदाटा रोजु, दाटसि होनना पंडुगुना गोरें पोरिन मोक्कु हिंयंदुर. अदे रोजुने येसुना सिस्युलकु, “गुडु, दाटसि होनना पंडुगुना गाटो तिनना तयारि बगा कीकोम इंचि नीवा मनसु मंता?” इंचि ओन इत्तुर.

13 येसु ओना इव्वुर सिस्युलकुन केप्सि ओर्क इल्हा वेह्चि लोहतोर. “मिमेट सहरते होंट. अगा वरोर मनकल अळकाते एर पीसि होननेके कलियंतोर, ओना पज्जेन होंट.

* 14:3 जटामासि जटामासि पोरोलता उंदि सेट मरा.

14 ओर बद लोन अय्ते दांतोरो, अद लोता मालकुन, 'नना नावा सिस्युल्कुनतोनि कलियसि, दाटसि होनना पंडुगुना गाटो तिननाहाटी हेळमितोर आगाना अर्रा बगा मंता? इंचि गुरु पूसकीसंतोर,' इल्हा इंट.

15 अस्के ओर मीकु मिदू दे पोरोटा पेदूदा अर्रा सजांचि तयार कीसि मत्तद हुप्सानुर, अदे अररति पंडुगुना गाटो मनाहाटी तयार कीम्टु," इत्तोर.

16 सिस्युल्कु अगटाल पेय्सि सहरते होत्तस्के, ओर बल्हा वेहतोर अल्हेने अगा मत्ता, पजा ओर अग्गेन दाटसि होनना पंडुगुना गाटो तयार कीतुर.

17 पोळद होत्तारिते, येसु ओना पन्नेडु सिस्युल्कुनतोनि अगा वातोर.

18 ओर गाटो तिचेके मत्तुर अस्के येसु, "नना मीक निजम वेहसेक मंतन, मीवा लोप्पोटाल वरोर नाकुन पीसि हीतोर, ओर नावातोनि उद्दिदिसि गाटो तिचेके मंतोर," इंचि ओर्कुन इत्तोर. 19 अद केंजसि ओर्क वेल्लेन दुक्कम अनपिस्ता, ओर वरोन पज्जो वरोर, "ओन नना अय्ते आयोन गदा?" इंचि येसुन पूसकियालय दलगतुर.

20 अस्के येसु, "ओर पन्नेड मदिताल वरोर आंदुर, ओर नावातोनि गिन्नेते हारि मुळाह्चि तिनानोरे.

21 दर्मसास्त्रमते रासि मत्ताप, मनकना स्पमते पुटतोन नना अय्ते दांतने. गानि बोनाहेंदाल अय्ते नाकुन पीसि हियमळ जर्गता, आ मनकल पुट्टाकोटोन बेस आसि मनवळ," इत्तोर.

सिस्युल्कुनतोनि आकिर मल्का गाटो तिनमळ

(मत्तयाल 26:26-30; लूकाल 22:14-20; 1 कुरेंति 11:23-25)

22 अल्हा ओर तिचेके मनैकेने, येसु हारितुन येत्सि, पेनदुक दन्यवाद कीसि तुकडां कीतोर. अवुन सिस्युल्कुंक हीसि, "तिट, इद नावा मेंदुल आंद," इंचि इत्तोर.

23 मर्रा ओर, उंदि तालिते अंगुर पानकम येत्सि, पेनदुक दन्यवाद कीसि ओर्क हीतोर. अदुन ओर अंतोर उट्टूर.

24 पजा, "इद करारता नावा नेत्तुर आंद, इद नेत्तुर वेल्लेदोराहाटी पोंगागोटमळ जर्गता.

25 नना मीक निजम वेहांतन, पेनदा राज्यमते पूना तरिकाते अंगुर पानकम उनाना रोजुनदाका, मर्रा बस्केने अंगुर पानकम उन्नोन," इंचि वेहतोर.

26 पजा ओर, पेनदा स्तुति कियाना उंदि पाटा पारसि, ज्यतुन मराकुना गुट्टापोर्रा होत्तुर.

पत्रु आबदूदम वळकंतोर इंचि येसु वेहमळ

27 अस्के येसु ओर्कुन इल्हा इत्तोर. "गोर्रा कोहानोन नना हळकतन, मंदता गोर्रा बैदव-हेके पायसि वित्तंतां, इंचि दर्मसास्त्रमते रासि मंता. अदुनहाटी मिमेट अंतोर नाकुन होळसि वितकिर.

28 गानि, नना हासि मर्रा जीवाते तेदतंका, मीकन्ना मुन्ने गालिल एरियाते दांतन," इत्तोर.

29 अस्के पत्रु, "अंतोर नीकुन होळसि वित्तिना गानि नना नीकुन होळसि वित्तोन," इंचि येसुन इत्तोर.

30 अस्के येसु, "नना निजम वेहासेक मंतन, इय्याला नर्कळ्ळक रौंडु मल्कां गोगोड कूसाका मुन्ने, निमे नाकुन मूड मल्कां 'एरपाट किय्योन' इंचि इनकिन," इंचि ओन इत्तोर.

31 गानि पत्रु इंका जोसने, "ओक्कला नाकु नीतोनि हामुर वाथिना बेसे, नीकुन नना एरपाट किय्योन इंचि बस्केने इन्नोन," इंचि इत्तोर. अद केंजसि, कळमतोरगुडा पत्रु इत्तापे इत्तुर.

येसु गेत्सेमनितगा पारतना कियमळ

32 अगटाल ओर गेत्सेमनि इन्ना जेगाताग होत्तुर. अगा एवत्स्के, "नना पारतना कियानादाका इग्गेने उद्दिदिसि मंटु," इंचि ओना सिस्युल्कुन इत्तोर.

33 पजा पत्रुन, याकोबुन, योहानुन ओनतोनि ओतोर. येसु अद वेलाते वेल्ले दुक्कमते, सिम्मरा आतोर.

34 अस्के ओर्कुन, "नावा जीवा दांता बारे इत्ताप नाक वेल्ले दुक्कम आसेक मंता. मिमेट इग्गेने आगसि, तेल्विते मंटु," इंचि इत्तोर.

35 इच्चुर मुन्ने होंचि बोकबोर्ले अर्रि पारतना कीतोर, "आया परते इद तकलिपता वेला तप्पि होन्नि.

36 बाबा! नावा बाबा, नीतोनि अन्नि आया परांता, इद तकलिपता वाटितुन लक्कु कीम. गानि नावा इच्चा मत्ताप आयो, नीवा इच्चा मत्तापे आयि," इंचि इत्तोर.

37 पजा सिस्युल्कुनगा वासि हळते ओर निद्रा होंचि मत्तुर. अस्के येसु सिमोन पत्रुन इल्हा इत्तोर. "सिमोन, मंचिगा मीडसतिरा? उंदि गंटाडेडगुडा नातोनि तेल्विते मंदा परिना?

38 मिमेट पट्टुने अर्काकोटा मननाहाटी तेल्विते मंचि पारतना कीसेके मंटु, नना वेहताप कियालय मीवा आत्मा तयार मंता गानि मीवा मेंदुल कमजोर मंता," इत्तोर.

39 अस्के येसु मसंदि मल्का होंचि, मुन्ने कीतापे मर्रा पारतना कीतोर.

40 येसु मर्रा वासि हळतस्के, ओर मंचि निदते मत्तुर. येसुक बतल जवाब हियना ओर्क तेळिया हिल्ले.

41 येसु मडोब मल्का ओरगा होंचि ओर्कुन इल्हा इत्तोर. “मिमेट इंदकेगुडा मीडसेक, आराम कीसेके मंतरा? इद वेल्लेन आता, मनकना रूपमते पुटतोन नाकुन पापिकुना कय्दे पीसि हियना वेला एत्ता.

42 तेदाट, मनम दाकोम. नाकुन पीसि हियानोर दग्गेरेन एत्तोर,” इत्तोर.

येसुन पीसि हियमळ

(मत्तयाल 26:47-56; लकाल 22:47-53; योहान 18:3-12)

43 येसु वळकस्केन मंतोर, अचोटेन पन्नेंड सिस्स्यलुकुना लोप्पोटोर वरोर यहदल वातोर. ओनतोनि पेर्मालोर्क, दर्मसास्त्रम कराहना गुस्लक, यहदि पेद्दालक लोहचीता लोकलुकुना पेद्दा मंदा ओर कसेहक, दड्डुकु पीसि वातुर.

44 येसुन पीसि हियानोर, “नना बोन अयते बुरांतोन, ओर येसु आंदुर. ओन दोर्कापीसि जेगतति ओम्टु,” इंचि मुन्नेन ओर्क उंदि चिन्ह वेहचि मत्तोर.

45 अदुनहाटी ओर वाता वायुडे येसुनगा होंचि, “गुरु!” इंचि ओन बुरतोर.

46 अस्के ओर ओनापोर्रो कय वाटिस, ओन दोर्का पीतुर.

47 अचोटेन अगा दग्गेरा नित्तिसि मत्तोरामटाल वरोर ओना कसेर तेंडसि, पेद्दा पेर्माना वरोर दासुना केव नेम्मानाल हीतोर.

48 अस्के येसु ओर्कुन, “वरोन दोगन पिय्यालय वाताप मिमेट कसेहक, गुत्पां पीसि नाकुन पिय्यालय वातरा?

49 नना अयते रोजे गुळिते कराहसेक मीतोनि मसुंदुन, अस्के नाकुन पिया हिल्लिर. गानि दर्मसास्त्रमते नावा बारेमते रासता पोल्लें पूरा आयाना इंचि, इल्हा जर्गता,” इत्तोर.

50 पजा ओना सिस्स्यलक अंतोर ओन होळसि तेगा विततुर.

51 वरोर लेय्या मनकल ओना मंदुलक सिराप चादर हटकुंचि येसुना पज्जो होंचेके मत्तोर. लोकलक ओनगुडा पीतुर,

52 गानि ओर चादर होळसिसि कुळ्ळेंगे वीततोर.

यहदि पेद्दालुकुना मुन्ने येसुन निपिचमळ

(मत्तयाल 26:57-68; लकाल 22:54-55,63-71; योहान 18:13-14,19-24)

53 ओर येसुन पेद्दा पेर्माना लोन ओतुर. अगा अंतोर पेर्मालोर्क, यहदि पेद्दालक, दर्मसास्त्रम कराहना गुस्लक जमा आतुर.

54 गानि पत्र लक्कुटाले येसुना पज्जो-पज्जो पेद्दा पेर्माना दारादाका होत्तोर. अगा सिपाइलुकुनतोन तडमितगा सेका कासेक मत्तोर.

55 अगा पेद्दा पेर्मालोर आनि पंचादितोर अंतोर येसुक हामुरता सिक्सा हियानाहाटी, ओना विरोदमते तप्पुड गवाइ पहकतुर, गानि ओर्क उंदिगुडा तप्पुड गवाइ दोर्काहिल्ले.

56 बारित्ते येसुना विरोदमते वेल्लेटोर आबदुम गवाइ वेहतुर, गानि ओरा गवाइ वरोनद वरोंक कलिया हिल्ले.

57-58 अस्के इच्चुर लोकलक नित्तिसि, “मनकालोर दोहता गुळितुन क्ल्लाहचि, मूड रोजकुने मर्रा दोहंतन, गानि अद मनकालोर दोहतद आयो, इनानेके मोमोट केंजतोम,” इंचि येसुना विरोदमते गवाइ हीतुर.

59 गानि इवनेगुडा वरोना गवाइ वरोंक कलिया हिल्ले.

60 अस्के पेद्दा पेर्मल नड्डुम नित्तिसि, “इर नीकु विरोदमते बल्हा गवाइ हीसंतुर हळा, निमे बतले जवाब हिथ्यिना?” इंचि येसुन प्सकीतोर.

61 गानि ओर चुपचाप मत्तोर, बतले जवाब हिया हिल्लोर. अस्के मसंदि मल्का पेद्दा पेर्मल येसुन, “निमे कदरगल्ला पेनदा मर्रि किरिस्तुन आदिना?” इंचि प्सकीतोर.

62 अस्के येसु इत्तोर. “हो, ननाने आंदुन. आनि मनकना रूपमते पुटतोन नाकुन ताकतवर पेनदा तिना बाजुक उद्दिसि मत्तद आनि मरब्बु तेर्पेतोन वायानद मिमेट हळकिर,” इत्तोर.

63 अस्के पेद्दा पेर्मल ओना कपडिं हराहकुंचि, “मनाक इंका बतल गवाइ गावाले?

64 इर पेनदा अपमानम कीतद मिमेट केंजतिरे गदा! अयते मिमेट बतल इंतोर?” इंचि पेर्मल इत्तस्के, ओर अंतोर, “ओर हामुर सिक्सालायक मंतोर,” इंचि इत्तुर.

65 अस्के इच्चुर लोकलक येसुनपोर्रो उस्कतुर, इंका इच्चुर बारे ओना कळ्ळुन मुच्चिसि तंचेके, “निमे बविस्ववानि वेहानोनाते, नीकुन बोर तंतुर वेहा,” इंचि इत्तुर. अल्हैने कावेल कियानोरगुडा ओन सेपापोर्रो तंतुर.

येसुन एरपाट किर्योन इंचि पत्र इनमळ

- 66 अब अग्नि आयायनेके पत्रु हिल्लु दारते उद्दिदिस मत्तोर, अस्के पेद्दा पेर्मानिगा पासि कबळ कियानद उंदि मुरतळ वाता.
- 67 वासि, पत्रु तळमि सेका कासेक मत्तद हळसि, “निमेगुडा नासरेत नाटेना येसुनतोनि मत्तिन गदा!” इंचि इत्ता.
- 68 गानि पत्रु अद पोल्लेतुन ओप्कुना हिल्लोर. “निमे बतल इंचतिनी, नाक तेळियो, नना एरपाट किय्योन,” इंचि पलाता गलमातागा होत्तोर, अचचोटैन गोगोड कूसता.
- 69 अद पासि कबळ कियाना मुरतळ पत्रुन हळसि, “इर तप्पाकॉटा ओरा लोप्पोटोरे वरोर आंदुर,” इंचि अद मर्रा उंदि मल्का अगा नित्तिसि मननोरतोनि इत्ता.
- 70 गानि पत्रु मर्रा ओप्कुना हिल्लोर. गडसेम मत्तस्के अगा नित्तिसि मत्तोर पत्रुन, “निजमे, निमे ओरा लोप्पोटोने आंदिन, बारित्ते निमेगुडा गालिलि राज्येमतेन आंदिन,” इंचि इत्तुर.
- 71 अस्के पत्रु ओर्कुन, “नना ओट्टु तिचि वेहसेक मंतन, नावा पोल्ले आबद्दम आते नाकु सापनेम दल्गि! मिमेट बोना बारोते वळकसंतियो, आ मनकन नना निजम एरपाट किय्योन,” इंचि इत्तोर.
- 72 अल्हा इत्ता इनुडे गोगोड रॉडो मल्का कूसता. येसु पत्रुक मुन्नेने वेह्चि मत्तोर, “गोगोड रॉड मल्का कूसका मुन्ने, निमे नाकुन मड मल्का एरपाट किय्योन इतिन,” इंचि. आ पोल्ले पत्रुक मति वाता. अस्के वेल्ले दुक्कमते अळतोर.

15

येसुन पिलातुसना कय्दे अप्पजेपमळ

- 1 बल्हा अय्ते पंग आता अल्हा पेद्दा पेर्मालोर, यह्दि पेद्दाल्क, दर्मसास्त्रम कराहना गुस्लक आनि पूरा पंचादितोर उंदि निरनायम कीसि, येसुन दोह्चि वाट्सि ओसि, पिलातुस राज्यपालुक अप्पजेपतुर.
- 2 पजा पिलातुस, “निमे यह्दिल्लुकुना राजाना?” इंचि येसुन पूसकीतोर. “निमे इत्तापे” इंचि येसु जवाब हीतोर.
- 3 अस्के पेद्दा पेर्मालोर ओनापोर्रा वेल्लेन पोल्लेना दोसेल्क दोसतुर.
- 4 अदुनहाटी पिलातुस येसुन मर्रा पूसकीतोर, “हळा ओर नीवा पोर्रा बच्चुंगो तप्पुक दोस्सेक मंतुर, निमे बतले जवाब हिय्यिना?” इंचि इत्तोर.
- 5 गानि येसु बतले जवाब हिया हिल्लोर, इंचि पिलातुस इंचंनम आतोर.

येसुक हामुरता सिक्सा हियमळ

- 6 दाटसि होनना पंडुगुना रोजुने, लोकुल्लुकुक इस्टमातेन एटा वरोन जेलनाल होळिसियाना रिवाज मत्ता.
- 7 बरब्बल इनना वरोर मनकल ओना दंटातोरतोनि जेलने मत्तोर. ओर ओना दंटातोरतोनि कलियसि, बचुट्टोरो लोकुल्लुकुन हक्किसि मत्तोर.
- 8 लोकुल्लुक पिलातुसनागा वासि, “एटा मावाहाटी बल्हा कियिदिनो अल्हेने कीम,” इंचि इत्तुर.
- 9-10 पेर्मालोर्कुंके येसुनपोर्रा कळक पोताताहेकेन ओन तच्चि नाक अप्पजेपतुर इंचि पिलातुस एरपाट कीकुत्तोर. अदुनहाटी पिलातुस ओर्कुन, “मीवा बतल विचारम मंता, यह्दिल्लुकुना राजान मीहाटी होळसीकाना?” इंचि पूसकीतोर.
- 11 गानि पेर्मालोर्क, “मावाहाटी बरब्बने होळसीम इंचि मिमेट इंटु,” इल्हा लोकुल्लुकुन एक्किस्तर.
- 12 मर्रा पिलातुस ओर्कुन, “अय्ते मिमेट यह्दिल्लुकुना राजाल इंचि बोनय्ते इतिर, ओन नना बतल कीकन,” इंचि पूसकीतोर.
- 13 अस्के, “ओन कूसुनपोर्रा वेलाड वाटा!” इंचि ओर वरगेयतुर.
- 14 अस्के पिलातुस, “बारि, इर बतल तप्पु कीतोर?” इंचि ओर्कुन पूसकीतोर. गानि ओर इंका जोरते, “ओन कूसुनपोर्रा वेलाड वाटा!” इंचि वरगेयतुर.
- 15 पिलातुसुक लोकुल्लुकुन कूस कियाना मत्ता इंचि ओराहाटी बरब्बन होळसिसि येसुन बारे पोट्टे देब्बां तचि कूसुनपोर्रा वेलाड वाटालय सिपाइल्कुना कय्दे अप्पजेपतोर.

सिपाइल्क येसुन अपमानम कियमळ

(मत्तयाल 27:27-31; योहान 19:2-3)

- 16 पजा सिपाइल्क येसुन पीसि राज्यपालना पिरटोरियम इनना किल्लाते ओतुर. अगा सिपाइल्कुना पूरा गेंगुन केय्सि जमा कीतुर.
- 17 ओर येसुक नेडि पडि रंगुना कोट केराह्चि, हाहकुना वेलितुन किरिटम कीसि ओना तल्लक दोसतुर.
- 18 अस्के ओर, “यह्दिल्लुकुना राजांक जय!” इंचेके ओन्क जोहार कीतुर.
- 19 पजा ओर ओना तल्लापोर्रा दुड्डुने तंतुर, ओनपोर्रा उस्कतुर, ओर ओना मुन्ने वगिस जोहार कीतुर.

20 ओन इरगा कारेड्डालक कीतारित्ते, ओन्के केराहता नेडि पंडि रंगुना कोट तेंडसि, ओना कपडिं ओन्के केराहतुर. अस्के ओन कूसुनपोर्री वेलाड वाटालय पलाते ओतुर.

येसुन कूसुनपोर्री वेलाड वाटमळ

(मत्तयाल 27:32-44; लकाल 23:26-39; योहान 19:17-19)

21 सिपाइल्क येसुन पीसि पलाते होनेनेके, सिक्ंदर आनि स्पुसना बाबाल सिमोन इनानोर नेलिनाल अदे हर्रि पीसि वासेक मत्तोर. ओर कुरेनि सहरतोर मत्तोर. सिपाइल्क ओन वेराहचि येसुना कूस कांजा वेहतुर.

22 ओर गोलगोता इनना जागातगा येसुन पीसि वातुर. गोलगोता इत्ते तल्ला बोअसेम इंचि अर्तम.

23 अगा ओर, मूर* इनना मत्तु अंगुर पडिना पानकमते कल्पिसि येसुंक उनालय हीतुर, गानि ओर उना हिल्लोर.

24 अस्के ओन कूसुनपोर्री वेलाड वाटतुर. पजा ओना कपडिन बद बोअ एताना इंचि सिट्टिं वाट्टिस पंचकुत्तुर.

25 येसुन कूसुन पोर्री मोल्लाने कोहिकिसि वेलाड वाटतस्के हक्केटां तोम्मिद एगिस मत्तां.

26 ईर "यहूदिल्कुना राजाल" आंदुर इंचि, उंदि बल्लापोर्री कसूर रासि ओना तल्लातगा कूसुंक तासतुर.

27 येसुनतोनि इंका इव्वुर दोंगाल्कुन, तिना बाजूंक वरोन, डेमा बाजूंक वरोन कूसुंकुन पोर्री वेलाड वाटतुर.

28 इदुनहेंदाल दर्मसास्त्रमते रासि मत्ताप, "ओर दोंगाल्कुना लेक्काते वातोर"† इदु पोल्ले पूरा आता.†

29-30 अद हर्रि पीसि होनानोर-वायानोर तल्लां ऊपसेके, "ओ! गुळितुन क्लाहचि मूड रोजकुने दोहानोन, कूसुताल रेय्सि निमे नीवा जीवातुन पिसागोटकुन," इंचि अपमानम कियुंदुर.

31 अल्हेने पेर्मांलोक, दर्मसास्त्रम कराहना गुस्लकगुडा, "ओर इंकावरोन पिसागोटतोर गानि ओनद ओर पिसागोटकुना परसेके हिल्लोर.

32 इस्त्राएलतोर राजाल किरिस्तु कूसुनपोर्रीटाल हिळु रेय्सि वायिरकांटी, अस्के मोमोट हळसि, इनपोर्री विस्वासम ईरा परकोम," इंचेके ओना कारेड्डालक कीतुर. येसुना पक्काते कूसुंक वेलाड वाट्टिस मत्ता दोंगाल्कगुडा ओना अपमानम कीतुर.

येसुना हामूर

(मत्तयाल 27:45-56; लकाल 23:44-49; योहान 19:28-30)

33 अस्के पिथ्यटा पन्नेड एगानस्केटाल अय्ते, मूड एगनदाका पूरा बूमिअंता हीकट आता.

34 पिथ्यटा मूड एगनेके येसु अळसेके जोरसे वरगेयसि, "एलि, एलि, लमा सबकतनि?" इंचि इत्तोर. इत्ते, "ना पेनदुना, ना पेनदुना निमे नाकुन बारि होळसीतिन?" इंचि इत्तोर.

35 अस्के अगा नित्तिसि मत्तुर इचचुर लोकुल्क, "हूळट! ओर एलियान केयसंतोर," इंचि इत्तुर.

36 ओरा लोप्पोटाल वरोर विच्चि होंचि स्पंजतुन पुल्लाटा अंगुर पानकमते मुळ्हाचि, दुडुदु कोस्सक तासिसि ओनकु उनालय हीतोर. हीसि, "आगा! एलियाल ओन हिळु रेहालय वांतोरा वायोरा? हळकोम," इंचि इत्तोर.

37 अस्के येसु पेदुदा आवाजते वरगेयसि जीवा होळसीतोर.

38 अस्के गुळिता परदा पोर्रीटाल हिळुदाका हर्सि रोंडु तुकडां आता.

39 अस्के नूर मंदि सिपाइल्कुना पोर्री मनना अदिकारि येसुना कूसुता मुन्नेने नित्तिसि मत्तोर. ओर येसु वरगेयसेके जीवा होळसनद हळतोर, हळसि, "ईर निजमे पेनदा मरि आंदुर," इंचि इत्तोर.

40 अगा मगदलेनि नाटेना मरियम, सिन्ना याकोब, योसेसना यावल मरियम, सलोमि इव मुर्ताहकगुडा लक्कुटाले नित्तिसि हळसेक मत्तां.

41 येसु गालिल एरियाते मत्तस्के, इव मुर्ताहक ओना पज्जो होंचि सेवा कियुंदु. इवे आयाका ओना पज्जो येस्सलेमदाका वातव इंका वेल्लेन मुर्ताहक मत्तां.

येसुन बोदा दोसमळ

(मत्तयाल 27:57-61; लकाल 23:50-56; योहान 19:38-42)

42 नोमकेन रोजुना मुन्नेटा रोजु येसु हातोर, अद नोमकेमता तयारिता रोजु आंदु. अस्के पोळ्दु होंचि मत्ता.

43 अरिमताइ नाटेनोर योसेपु इनानोर वरोर मत्तोर. ओर यहूदिल्कुना पंचादिता वरोर मैबर मत्तोर. लोकुल्क ओन्के कदर हियुंदुर. ओर पेनदा राज्येम बस्के वायार इंचि एदुर हळसेक मनुंदुर. ओर दैरनेमते पिलातुसनागा होंचि, "येसुना पीनगुन नाक हीम," इंचि तल्कतोर.

* 15:23 मूर मूर इत्ते नोपि तक्को कियाना उंदि मत्तु. ✨ 15:28 यसायाह 53:12 † 15:28 इद वचनम कोन्नि पांडु लिपिने हिल्ले.

- 44 अस्के पिलातुस, “अरे! इच्चोन बिराना हातोराना” इंचि इचन्नम आतोर. पजा नूर मंदि सिपाइलकुना पोरॉ मनना अदिकारिन केय्सि, “येसु हातोराना?” इंचि पूसकीतोर.
- 45 येसु हातोर इंचि ओर अदिकारि वेहतस्के, ओना पीनगुन ओया परांतिन इंचि पिलातुस योसेपुन इत्तोर.
- 46 अस्के योसेपु उंदि पाना कपडि अस्तोर. येसुन कुसतगटाल हिळु रेहचि, अद कपडितुन हुटतोर. हुटसि, बंडातुन तुलाहचि तयार कीता बोंदाते दोसतोर. पजा दाना बोंगाकु उंदि पेदुदा बंडा अड्डम दोसतोर.‡
- 47 येसुन बोंदाते दोसता जेगातुन मगदलेनि नाटेना मरियम, योसेसुना यावल मरियम इव हळतां.

16

येसु मर्रा जीवाते तेदमळ

(मत्तयाल 28:1-8; लूकाल 24:1-12; योहान 20:1-10)

- 1 नोमकेमता रोजु मारतारित्ते, मगदलेनि नाटेना मरियम, याकोबुना यावल मरियम आनि सलोमि इव येसुना पीनगुंन हौकालय, गमागमा गब्बु वायानव वस्तुक अस्तां.
- 2 वारमता मोदाटा रोज अयतारम हक्केरेने पोळ्दु पेयसता पेयसुळे बोंदातगा होतां.
- 3 अव होननेके, “अद बोंदक अड्डम दोसता बंडातुन मनाहाटी बोर गुळाहनुर?” इंचि अबुनद अवे वळ्कसेक होतां.
- 4 अगा एवसि हळते, अच्चोन पेदुदा बंडा गूळसि मत्तद अवुंक दिसता.
- 5 अव बोंदाते होळियतस्के वरोर लेय्या मनकल तेल्लाटा कपडिं केसि तिना बाजूंक उदिदूस मत्तद हळसि अव वेरियतां.
- 6 ओर अबुन इल्हा इत्तोर. “वेरियमट, कुसुनपोरॉ वेलाड वाट्सि हळ्कता, आ नासरेत नाटेना येसुन मिमेट प्हकसेक मंतिट, ओर इग्गे हिल्लोर, जीवाते तेदतोर. इद हळ्याट, ओना पीनगु इरता जेगा.
- 7 ओर मीक वेहता परकारम, मीकन्ना मुन्नेने गालिल एरियाते होंचेक मंतोर, अदुनहाटी मिमेट होंचि ओना सिस्कुलुकुंक आनि पत्रुंक वेहाट, अगा ओर मीकु दिस्सानुर,” इत्तोर.
- 8 अव मुर्ताहक इरगा वेरियसि वनकालय दल्यातां. अदुनहाटी अव बोंदातगाटाल पलाते पेय्शि विच्चि, आ वेंक बोर्क बतल वेहा हिल्लें.

मगदलेनि नाटेना मरियमुंक येसु दिसंतोर

- 9 वारमता मोदाटा रोज इत्ते अयतारम रोज, येसु हामुरताल जीवाते तेदतोर. तेदता पजा मोट्टा मोदाला मगदलेनि नाटेना मरियमुंक दिसतोर. इदे मरियमुनगटाल एडुं देय्यालकुन येसु गेदमिस मत्तोर.
- 10 अद अगटाल पेय्शि, येसुनतोनि मत्ता सिस्कुलुकुनगा होता. ओर वेल्लेने दुक्कमते अळसेके मत्तुर, ओर्क येसुना बारमते वेहता.
- 11 येसु जीवाते तेदतोर, अद येसुन हळता इत्ता पोल्लेतुन ओर केंजतुर गानि विस्वासम किया हिल्लुर.
- 12 अद आता पजा, ओरा लोपपोटाल इव्वुर येस्सलेमताल उंदि नार होंचेके मननेके, ओर्क वेंरे रूपमते येसु दिसतोर.
- 13 ओर पज्जो मल्सि होंचि, कळमतोर्कुंक इद पोल्ले वेहतुर, गानि ओर ईरा पोल्लेन विस्वासम किया हिल्लुर.

येसु ओना सिस्कुलुकुनतोनि वळकंतोर

(मत्तयाल 28:16-20; लूकाल 24:36-49; योहान 20:19-23; प्रेरितुलुकुना कबाहक 1:6-8)

- 14 पजा पदाकौडु मंदि सिस्कुलुकु उदिदिसि गाटो तिचेके मननेके येसु ओर्क दिसतोर. “नना जीवाते तेदतन इंचि वेल्लेटुर मीक वेहिनागानि मिमेट बारि विस्वासम किया हिल्लिर? मीवा मनसुक बंडालेसी मारियातां,” इंचि तेराहतोर.
- 15 पजा ओर्कु इल्हा वेहतोर. “मिमेट होंचि दुनियाता अन्नि देसेलुकुना लोक्कुलुकुंक बेयता कबूर प्रचार कीम्ट.
- 16 बोर अय्ते विस्वासम कीसि, बापतिस्मा एतंतोर ओनके मुक्ति दोर्कता, गानि बोर अय्ते विस्वासम किय्योर, ओनकु पेन सिक्साता आदेस हिय्यार.
- 17 नाकुन विस्वासम किय्यानोनागा इव चिन्हां मंतां, ओर नावा पोरोलते देय्यालकुन गेदमानुर, वेंरे-वेंरे बासाने वळ्कानुर,
- 18 तरासकुन पियानुर, बदे विसम वस्तु उनिनागानि ओर्क बतल आयो, बिमार्क मत्तुरा पोरॉ ओरा कय्क इरते, ओर बेस आयानुर,” इंचि वेहतोर.

येसु स्वर्गमते होनमळ

(लूकाल 24:50-53; प्रेरितुलुकुना कबाहक 1:9-11)

‡ 15:46 अद कालमते गुट्टाकु सोंर तवसि इस्सुर. बोरना हाते अबने ओसि दोसुदुर.

19 येसु सामि ओना सिस्स्युल्कुनतोनि इव पोल्लें वेहता पजा, पेन ओन स्वर्गमते तेहकुत्ता. अस्के ओर दाना तिना बाजुंक उदूतोर.

20 पजा येसुना सिस्स्युल्कु नालुं-मूलां होंचि अन्नि जेगाने ओना बारेमते प्रचार कीत्त. सामि ओरतोनि मंचेके कबळ कियुंदुर. कबळ कियनेके जर्गना चिन्हाना हेंदाल सामि ओना पोल्ले निजम इंचि रूजुव कियुंदुर. आमेन.*

* 16:20 इद वचनम कोनि पांडु लिपिने हिल्ले.

लूकाल

लूकाल रासतद बेसता कबुर

इद पुस्तकमता बारेमते गिचचो परिचयम
 रासतोना पोरोलः डाक्टर लूका
 रासता कालमः इसवि सन 70

इद पुस्तकमतुन रासता लूकाल बेस डाक्टर मत्तोर. येसु तिरियसि स्वर्गमते होतस्के ई लूकाल पौलुसुनतोन कलियसि वेल्लेन वर्सनादाका येसु सामिना सेवते मत्तोर. येसु हासि मर्ग जीवाते तेदतका बचचोने वर्साकु ई पुस्तकमतुन लूकाल रासतोर. अद कालमते तियपिलुस इननोर वरोर सायाब मत्तोर, ओन्क येसु सामिना बारेमता निजम बेस तेळियना इंचि इद पुस्तकमतुन ओनाहाटी रासतोर. लूकाल रासतद इद पुस्तकम वेसुड आयो. गानि येसु निजमे मनकल आसि इद दुनियाते वातोर इत्तदुन हुपसंता. इद पुस्तकम रासमळ मारतारित्ते लूकाल पवित्र आत्माता कबाहक इना इंकुंदि पुस्तकम रासतोर.

लूकाल इद पुस्तकमहेंदाल बतल वेहांतोर इत्ते, लोकुकुकुन पेन वेल्लेन पावरम कीता, इंका लोकुकुकुन पिसागोटनाहाटी वरोन मिहगा लोहंतन इंचि अद वेल्लेन वर्सा मुन्ने वेहचि मत्ता. दीनाहाटीगे पेनदा मरि इत्ते येसु सामि लोकुकुकुन पिसागोटनोर आसि, इद दुनियाते वातोर. इचचोने आयका पेन अंतोर्कुन उंदाचचोने पावरम कीता. अन्टे दुनियाता नदरते सिन्ना जातितोर आयिर, मुर्ताहक आयिं, वैरे जातितोर आयिर, बोरन्ना आयिर अंतोरपोर्ती येसु सामि उंदाचचोने पावरम हुपिस्तोर. मिमेट लोकुकुल्क इद दुनियाते कदर दोर्किचकुनमळतुन होळसिसि पेनदुन बदवेरदाका अन्टे पहकिरो, अदवेरदाका मीकु पेन हियना पिस्वर दोर्को, मिमेट पेनदा राज्येते होळियागुडा परिं. बारित्ते बोर मनकल अन्टे सिना पिलाळुकुनालेसी सादा-सिंपल आयाना मनसु इर्गंतोर, असंतोनाहाटी पेनदा राज्येम मंता. हरिं तपि होतोरकुंन पहकालय आनि ओर्कुंन पिसागोटलय येसु सामि इद दुनियाते वातोर, इंचि लूकाल इद पुस्तकमते रासतोर.

बगा बतल मंता

जोहार आनि परिचयम 1:1-4

बापतिस्मा हियना योहान आनि येसुना पुटमळ, बेर्समळ 1:5-2:52

येसुना सेवा कबळता तयारि 3:1-4:13

गालिलते येसु सेवा कबळ सुख कीतोर 4:14-9:50

गालिल एरियाताल येस्सलेमदाका येसुना सेवा कबळ 9:51-19:27

येस्सलेमते येसुना सेवा कबाहक 19:28-21:38

येसु हासि तेदसि, स्वर्गमते होनमळ 22:1-24:53

लूकाल येसुना बारेमते रासंतोर

1-4 तियपिलुस सायाब,* मावा नड्डुम येसु कीता कबाहकुना बारेमते वेल्लेन लोकुकुल्क रासालय कोसिस कीतुर. बोर अन्टे जर्गुंता आ गटनन कळ्ळुने हळतुर आनि पेनदा बेसता कबुरतुन कराहतुर, ओरे माकु ई पोल्ले एव्विचि हीतुर. माकु एन्ता पोल्लेन ननागुडा बेस हदविसि, परमेरका कीसि तेळियागोटकुलतन. अदुनहाटी इव अन्नि पोल्लेन बेस उंदान पज्जो उंदि नीकु रासि लोहना इंचि नाकु अनपिस्ता. दीनहेंदाल निमे बतल अन्टे करियतिनो, अदे निजम इत्ता संगति नीकु तेळियंता.

जकरयाल आनि एलिसिबांक संतानम दोर्कना कबुर

5 यहुदिया एरियापोर्ती पेदुदा हेरोद राजाल राज्येम कियना कालमते, जकरयाह पोरोलता यहुदि जातितोर वरोर पेर्माल मत्तोर. ओर आबिया इना पेर्मालोरा गेंगुना मेबर मत्तोर.† जकरयाहनलेहका ओना मुत्तो एलिसिबालगुडा हास्न‡ इना पेर्माना वंसमतदे मत्ता.⋄

6 ओर इव्वुरगुडा पेनदा नदरते नीतिमंतुल्क मत्तुर आनि सामि वेहता अन्नि नियमकु आनि आदेसकुन पीसि दोसेम हिलाकोंटा ताकुंदुर.

7 गानि एलिसिबाल गोडमुरादि मत्ता. अल्हेने ओर इव्वुर वेल्लेन मातरालोर आसि मत्तुर अदुनहाटी ओर्कुं पिलाळक आया हिल्लुर.

* 1:1-4 तियपिलुस ईर वरोर पेदुदे सायाब आंदुर. तियपिलुस कुदुद इद पुस्तकमतुन रासालय लूकांक वेसतोर. † 1:5 ओर आबिया इना पेर्मालोरा गेंगुना मेबर मत्तोर दाविद राजाल इस्राएल इव्वै नालु गेंगुल्क तयार कीसि मत्तोर. अन्टे अबियाना गेंग एनमिदोव गेंग मत्ता. उंदि गेंगनोर एडादिक रौडु मलकां गुळिते वारममेळ कबळ कियंदुर. 1 इतिहास 24:10 ‡ 1:5 हास्न ईर मसाना दादाल आंदुर. अंतोर पेर्मालोर इना वंसमताल वातुर. ⋄ 1:5 निर्गम 29:9

8 बस्के अथे जकरयाना गेंगुनोरद येस्सलेम सहरते मनना गुळिते सेवा कियना वेला वाता, अस्के ओर अगा पेर्माळ इंचि पेनदा सेवा कीसेक मत्तोर.

9 पेर्माळोरा रिवाज मत्ताप सिट्टि वाटसि पेनदा गुळिते गुगलेम वाटालय जकरयाना पेरतुर.

10 ओर गुगलेम वाटना वेलाते पलाते जमा आता अंदोर लोकुकल्क पारतना कीसेक मत्तुर. §

11 अचचोटैन ओन्क उंदि पेनदा द्ता, गुगलेम वाटना गद्देता तिना बाजूंक नित्तिसि मत्तद दिसता.

12 जकर्याहल पेनदा द्तातुन हळसि उल्किसि अर्सि इरगा वेरियकुत्तोर.

13 पजा पेनदा द्ता ओन, “जकर्याह, वेरियमा. पेन नीवा पारतनातुन केंजता. नीवा मुत्तो एलिसिबाल नेला तपसि वरोर पेडन कनंता, निमे ओना पोरोल योहान* इंचि इरां.

14 पेडल पुटताहाटी नीकु अथे वेल्लेन कुसि आंता. अचोने आयका वेल्लेन लोकुकुकुं इका आनंदम आंता.

15 बारित्ते आ पेडल सामिना नदरते पेदू दोर आंतोर. ओर अंगुर पंडिना पानकम आसि इका वेरे बदे कल्लु उन्नोर. ✨ अचोने आयका यावाना पीटे मननास्केटाले ओर पेनदा पवित्र आत्माते निडसि मनंतोर.

16 मीवा वेल्लेन इम्राएल लोकुकुकुन ओर मीवा पेनदाहेके तिरहंतोर.

17 ओर, बाबुकुंनाना मनसुन मर्क-मियाहकुनहेके तिरहंतोर. पेनदा पोल्ले केंजबोकुंन नीतिमंतुकुना तेल्चि दोर्किचकुना वेहंतोर. सामि मीवा नड्डुम वायका मुन्ने सामिनाहाटी लोकुकुकुन तयार कियालय ई पेडल एलियाहना† मत्ता गुनम आनि ताकततोनि सामि वायना कबुरतुन सामि वायका मुन्नेन वेहांतोर,” इंचि इत्ता.

18 पजा, “नना अथे मातरन आतन. इका नावा मुत्तोगुडा वेल्लेन मातरि आता. अथे निमे इत्ता पोल्ले निजम आयार इंचि नाकु बल्हा तेळियार?” इंचि जकर्याहल पेनदा द्तातुन पूसकीतोर.

19 अस्के पेनदा द्ता, “निमे नाकुन बोर इनकुंचतिन? नना गब्रिएल‡ द्तातुन आंदुन. नना पेनदा मुन्ने नित्तिसि मनानदुन आंदुन. नीवातोनि वळकानाहाटी, इद बेसता कबुर वेहनाहाटी पेन नाकुन लोहता.

20 नना वेहता पोल्ले अथे वेला वातस्के निजम आयानुगे, अयना निमे नावा पोल्लेपोरॉ विस्वासम इरां हिल्लिन. अदुनहाटी नावा पोल्ले निजम आयानदाका नीकु वळका वायो, निमे मूकन आसि मनांतिन,” इंचि वेहता.

21 इदंता जर्गनिके पलाते नित्तिसि पारतना कीसेक मत्ता लोकुकल्क इंचंत्रम आसि, जकर्याहल गुळिता लोपो इचचोन आलसेम बारि कीसंतोर, इंचेके एदुर हळसेक मत्तुर.

22 पजा जकरयाल गुळिताल पलाते वातोर. गानि ओर लोकुकुकुनतोनि वळका पराहिल्लोर. अस्के लोकुकल्क, “गुळिता लोपो ईर बतलो दर्सनम हळतोर बारे! अदुनहाटी वळका पराका सय्यो कीसंतोर,” इंचि इनकुत्तुर.

23 इल्हा ओना सेवा कियना रोजकु मारतां, अस्के ओर ओना लोन होत्तोर.

24 कोनि रोजकु आता पज्जो, ओना मुत्तो एलिसिबाल नेला तपता. नेला तपतस्के अद हेय्युं नेल्कनदाका लोताल पलाते पेय्साकोटा लोपेन मत्ता.

25 अस्के अद, “नाकुन गोडमुरंद इंचि लोकुकल्क कव्वुदुर. गानि लोकुकुकुना नड्डुम नावा सिग्गु होनानायो इंचि सामि नाकु इल्हा सहायम कीतोर,” इंचि इत्ता.

येसु पुट्टना कबुर

26 एलिसिबाल नेला तपसि हांरं नेल्क आसंतां. अवे त्कुल्लुकुने पेन, गब्रिएल इनना दाना द्तातुन गालिल एरियाता नासरेत पोरोलता सहरते मनना,

27 उंदि मरमि आयवा पोरिनागा लोहता, आ पोरिन पोरोल मरियम. आ पोरिनद दाविद राजाना वंसमते पुटता योसेप इनना वरोर मनकनतोनि एरां बोट्टु आसि मत्ता. §

28 आ गब्रिएल द्ता दाना दग्गेर्क होंचि दानतोनि, “पेनदा आसिवांद दोर्कुता बाई, नीकु जोहार! पेन नीकु तोळ मंता,” इंचि इत्ता.

29 पेनदा द्ताता पोल्ले केंजसि मरियम वेल्लेन परेसान आता. ई जोहारता अर्तम बतल आयावचु, इंचि इंचंत्रमते अरता.

30 अस्के पेनदा द्ता दान, “मरियम, वेरियमा! पेन नीपोरॉ दया कीता.

31 केंजा! निमे नेला तपंतिन आनि वरोर मांडूसा पेडन कनांतिन. निमे ओना पोरोल येसु (इत्ते पेन पिसागोटता) इंचि दोस्सा.

§ 1:10 सिराप पेर्माळोकुंके गुळिते मनना पवित्र जेगाते होनना अदिकारम मत्ता. कळमातोर अंदोर पलाते पदिरिन हिळु नित्तिसि मनांतुर. * 1:13 योहान इत्ते पेन दया हूपिसता इंचि अर्तम. ✨ 1:15 गिनति 6:1-4 † 1:17 एलियाह ईर वरोर पेनदा कबुरतोर आंदुर. ई एलियाल येसु सामिकनना एनमिदि न्हुकुना वसॉ मुन्ने मत्तोर. ‡ 1:19 गब्रिएल इद पेनदा उंदि द्ता पोरोल आंद. इद द्ता हमेसा पेनदा दगोरा मंता. इद द्ताता बारमते दानिय्येल 8:9 ते मंता.

§ 1:27 दाविद राजाल हासि वेय वसॉ आतस्के पेनदा द्ता, मरियमुनतोनि वळकता.

32 ओन अंटोर 'अन्निटकन्ना पेद्दा पेनदा मरि' इंचि इनानुर, इल्हा ओर पेद्दा पोरोलता मनकल आयानुर. ओना वंसमता पेद्दा मनकल दाविद राजानलेसी पेन ओनगुडा राजाल कीता.

33 अचोने आयका ओर इस्राएल लोकुकुनपोर्री* राज्येम कीतोर. इंका ओना राज्येम बस्केने मारो," इंचि इत्ता.

34 अस्के मरियम पेनदा दूतातुन, "नावां अय्ते मरमि इंका आया हिल्लें, नाकु मुय्दोगुडा हिल्लोर. अय्ते मरि इद बल्हा निजम आयार?" इंचि पूसकीता.

35 अस्के पेनदा दूता इल्हा इत्ता, "पेनदा पवित्र आत्मा नीवा पोर्री वांता आनि अन्निटकन्ना पेद्दा पेनबाबाना ताकतहेदाल नीवा पोर्री उंदि नीडा अर्रता, अस्के निमे नेला तप्पतिन. दानहाटीं नीकु पुट्टना पेडल पवित्र मनांतोर, ओन 'पेनदा मरि' इंचि इंतुर.*

36 केंजा! नीवा जीवातद एलिसिबा मातिरगुडा नेला तप्पि मंता. अंटोर लोकुकल दान गोडमुर्रद इंचि इनुंदुर, गानि अद नेला तप्पि हांरं नेल्क आसंता.

37 पेन अन्नि कबाहक किया पर्रता, अद किया परवद बतले हिल्ले," इत्ता.

38 अस्के मरियम, "नना अय्ते पेनदा सेवा कियनदुन आंदुन, निमे इत्तापे नाकु जर्गिकांटी," इंचि इत्ता. पजा पेनदा दूता अगटाल पेय्मि होत्ता.

मरियम जकरयाल आनि एलिसिबानगा दांता

39 पजा अवे रोजकुने मरियम बतल कीता इत्ते, बिराना तयार आसि गाबरते गुट्टान लोप्पो मनना यहुदिया एरियाता उंदि नाटे होत्ता.†

40 नाटे एवतस्के अद जकरयाहना लोन होंचि एलिसिबांक जोहार कीता.

41 मरियम वळकुता पोल्लेतुन केंजसि एलिसिबाना पीटे मत्ता पिडेम मेसुलता, अस्के एलिसिबाल पवित्र आत्माते निडिस होत्ता.

42 निडिस होंचि अद पेद्दा आवाजते, "अन्नि मुरताहकुंनना निमे एकको आसिर्वाद दोर्कुता मुरताटुन आदिन मरियम! अल्हेने नीवा पीटे मनना पिडेमगुडा वेल्लेन आसिर्वाद दोर्कुतद आंद.

43 नावा सामिना यावल नाकु कलियालय वायमळ इत्ते गम्मत पोल्ले आयो. इच्चोर वेल्ले कदर नाकु बगाटाल दोर्कुता?

44 हळा! नीवा अल्किर केंजता केंजुडे नावा पीटे मत्ता पिडेम कुसिते मेसुलता.

45 इंका निमे पेन वेहता पोल्लेतुन निजम आयि इंचि विस्वासम कीतिन, अदुनहाटीं निमे वेल्लेन आसिर्वाद दोर्कुतदुन आदिन," इंचि एलिसिबाल इत्ता.

मरियम पेनदुन तल्सकुंता

46 पजा मरियम इल्हा इनालय दल्गता:

"नना नावा मनसुनाल पेनदुन तल्सकुंतन.

47 नाकुन पिसागोटना पेन नावा आत्माकु कुसि हीता.

48 नना दाना उंदि सिन्ना दासिदान आंदुन,

अयना पेन नावापोर्री दाना दया हुपिस्ता.

हळा! इंदकेटाल पीळि-पीळिना अंटोर लोकुकल,

नाकुन, 'पेनदा आसिर्वाद दोर्कुतद,' इंचि इनानुर.

49 बारित्ते अन्निटकन्ना पेद्दा पेन नावाहाटीं, पेद्दा-पेद्दा कबाहक कीता.

दानद पोरोल पवित्रमाता पोरोल आंद.

50 दानकु वेरियसि दाना कदर कीसेके ताकानोरपोर्री,

दाना दया पीळि-पीळिनदाका मंता.*

51 अद दाना ताकत हुपिस्ता, गर्रा मत्ता लोकुकुकुन,

ओरा विचाराल्कुन पीसि हिके-हेके पायिस्ता.

52 राज्येम कियानोर्कुन, ओरा राजगदुदे पोर्रीटाल अद हिळ्ळु रेहता.

कदर हिलवोर्कुन बारे पेद्दा कीता.

53 हिल्लोर्क गावाले मत्तव हींसि समादानम कीता.*

सिरमंत लोकुकुकुन बारे उल्ता कय्क लोहता.

* 1:33 इस्राएल लोकुकल ईर अंटोर लोकुकल याकोब इनना पेद्दा मनकना वंसमतोर आंदुर. * 1:35 यसायाह 7:14 † 1:39 नासरेत नार जकरयाना नाटुक 150 किलोमिटर लक्कु मत्ता. अद कालमते लोकुकल गाडदिन पोर्री उंदिदिसि, तास्केक होनुंदुर. * 1:50 बजन सहिता 103:17 * 1:53 बजन सहिता 107:9

54-55 अद मना एनकटा पेद्दालकुंक हीता पोल्ले परकारम,
 दाना सेवा कियना इस्राएल लोकुल्कुंक सहायम कीता.
 इत्ते अब्राहाम आनि ओना वंसमतोरपोर्रो, बस्केळ्ळक दया कियानदुन मति इरता,"
 इंचेके मरियम पाटा पारता.
 56 इल्हा मरियम एलिसिबानगा मूड नेलकु मत्ता. पजा दाना लोन अद होल्ता.

बापतिस्मा हियना योहानुना पुटमळ

57 एलिसिबांक नेलां निडिसि अद पेडन कंता.
 58 दानकु मरि पुटतोर इंचि दाना पक्का पीसि मत्ता लोहकुनोर्क, जीवातोरक तेळियता अस्के, पेन दानपोर्रो वेल्लेन दया कीता, इंचि दानातोनि अंटोरगुडा वेल्लेन कूस आतुर.
 59 आ पेडल एनमिदि रोजकुनोर आतस्के ओना कतना* कियनाहाटी ओर अंटोर वातुर. वासि आ सिन्ना पेडाना पोरोल ओना बाबोना पोरोल पोर्रोटाल जकर्याह इंचि दोस्सनद मत्ता.
 60 गानि पेडाना यावल मात्रम, "मन्नि, ई पेडन पोरोल 'योहान' इंचि दोसगोम," इत्ता.
 61 अस्के दान ओर अंटोर, "निजमे गानि, मीवा जीवातोर लोप्पो ई पोरोलतोर बोरे मनकल हिल्लोर गदा," इंचि इत्तुर.
 62 पजा ओर ओना बाबान सय्यो कीसि, "निमे ई पेडन पोरोल बतल इरौतन इंचि इनकुचतिन?" इंचि पूसकीतुर.
 63 अस्के आ पेडाना बाबाल रासालय उंदि पाटि तल्कतोर आनि, "ओना पोरोल योहान आंद" इंचि रासतोर. अस्के रासतदुन हूळसि अंटोर्क इंच्रम आता.
 64 अस्केन जकरयांक तोड्डि वाता. अस्के ओर वळ्ळसेक पेनदा स्तुति कियालय दल्गतोर.
 65 अगा पकापीसि मत्तोर अंटोर इरगा वेरियतुर. इद संगति यहूदिया एरियाता गुट्टन पीसि मत्ता नाहकुने तेळियसि होल्ता.
 66 ई संगति केंजता हरेक मनकल विचारम कीसि, "ई पेडल मुन्ने ताकसि बतल आयानुर?" इंचि इन्दुर. बारित्ते आ पेडन पोर्रो निजम पेनदा कय मत्ता.

जकरयाल पेनदुन तल्सकुंतोर

67 पजा आ पेडाना बाबो जकर्याहल पवित्र आत्माते निडिसि होंचि, इल्हा बविस्यवानि वेहालय दल्गतोर.
 68 "मावा इस्राएलतोर पेनदुन नना तल्सकुंतन, बारित्ते अद दाना लोकुल्कुंक,
 सहायम कियालय वासि ओर्कु मुक्ति हीता.
 69-70 पेन दाना पवित्र कबुरतोरहेंदाल वेल्ले वर्साना मुन्ने इत्ताप,
 अद मावाहाटी दाना सेवक दाविदना वंसमताल,
 वरोन वेल्लेन ताकत मत्ता मुक्ति हियानोन लोहचीता.
 71 मावा पगातोरगटाल आनि हयस्वोरगटाल माकु मुक्ति हीता.
 72 मावा एनकटा तादो-बाबुरापोर्रो दया कीतन इत्ता.
 ओरतोनि कीता पवित्र करारतुन बस्केने मति मरगोन इंचि इत्ता.
 73 ई करार मावा एनकटा पेद्दा मनकल, अब्राहामुनतोनि तित्ता ओट्टु आंद.
 74-75 अद करार इल्हा मत्ता गदा,
 मिमेट पिसतच्चुं रोजकु नीतिते आनि पवित्र मंचेके,
 वेरियाकोंटा नावा सेवा कियनाहाटी, नना मीकुन मीवा पगातोर कयदाल होळसीतन.
 76 ए नावा सिन्ना पेडा! इंदके नीकुन अन्तिकन्ना पेद्दा पेनदा कबुरतोर इंचि इत्तुर.
 बारित्ते निमे सामिना हर्नि तयार कियालय, ओना मुन्ने-मुन्ने ताकतिन.*
 77 मीवा पापालक मापि आतेने मीकु मुक्ति दोक्ता,
 इत्ता संगतितुन निमे ओना लोकुल्कुंक वेहांतिन.
 78 बारित्ते पेन दाना पेद्दा दया मनापोर्रो हृष्पिचि, स्वर्गमताल वरोर पोळ्दुनसंतोन लोहंता.
 79 हामुर इनना नीडा आनि पापमता हीकटते मनना मनापोर्रो,
 ओर वेल्लु अराहचि, मनाकुन सांतिता हर्दे ताकसंतोर." इंचि इत्तोर.
 80 इल्हा आ पेडल पेद्दा बेसंतोर. अल्हे आत्मातेगुडा बेस गाट्टेगा आतोर. ओर ओना इस्राएल लोकुल्कुंक पेनदा पोल्ले वेहना वेला एवनदाका ओर बय्लि जेगाने मत्तोर.

2

येसुना पुटूमळ

- 1 योहान पुटुतस्के, रोम सरकारता राजाल कैसर* अगस्तुस ओना कय हिळु मनना अन्नि देसेलकुना लोकुकुनद सिरगंति कियना इंचि आदेस हीतोर.†
- 2 कुरिनियुस इनना पोरोलतोर सिरिया एरियाता राज्यपाल मननेके ई सिरगंति आता. इदे मोट्टा मोदाटा सिरगंति आंद.
- 3 अय्ते सिरगंतिता आदेस दोर्कुतहेंके अंटोर लोकुकुल पोरोली रासागोटकुनालय बोना नाटे ओर होत्तुर.
- 4 अल्हेन योसेप दाविद राजाना वंसमतोर मत्तोर. अदुनहाटी ओर गालिल एरियाता नासरेत नाटेनाल यहूदिया एरियाता दाविद राजाना पुटता नार बेतलहेम इनना नाटेंक होत्तोर.‡
- 5 ओर सिरगंतिहाटी नार होनेनेके ओनतोनि एर्ग बोदट्टु आसि मत्ता मरियमुन पीसि होत्तोर. अस्के अद पीटि मत्ता.
- 6 ओर अगा मननेकेन दाना एरपुराना वेला वाता.
- 7 अद दाना तोल्सूर मरिन कंता. अगा ओर्कु अगालय बेस जेगा दोर्कुवाहेंके मरियम आ पेडन पेगुने हुटता, हुटसि कोळ्ळते कौदाक कुटार तासाना डालाते वाटसि इरता.

गॉरी मेहानोरतोनि पेनदा दूताता वळकुमळ

- 8 अय्ते अदे नर्का इच्चुर गॉरी मेहानोर नाटेना पलाते नेलिने ओर ओरा गॉरीना कावेल कीसेक मत्तुर.
- 9 अस्के अचानक ओरा मुन्ने उंदि पेनदा दूता वासि नितता. अस्के सामिना महिमाता वेल्गु ओरा सुट्टु एल्गता. अदुन हळसि गॉरी मेहानोर इरगा वेरियकुत्तुर.
- 10 अस्के पेनदा दूता ओर्कुन, “मिमेट वेरियमट. नना मीवाहाटी उंदि बेस कबुर पीसि वातन. इद कबुर अंटोर लोकुकुकुंक बेस आनंदम हीता.
- 11 इथ्याला दाविद राजाना नाटे, मीकुन पिसागोटनोर पुट्तोर, ओरे किरिस्तु§ सामि आंदुर.
- 12 ओन मिमेट एरपाट कियना चिन्ह बतल इत्ते, उंदि कोळ्ळते पेगुने हुटसि कौदांक कुटार तासाना डालाते वरोर सिन्ना पेडल मीकु दिस्सासुर,” इंचि इत्ता.
- 13 अल्हा इत्ता इन्मळे इंका वेल्लेन पेनदा दूतां वातां. वासि अगा मत्ता पेनदा दूतातोनि कलियसि पेनदुन तल्सकुचेके,
- 14 “स्वर्गमते पेनदा कदर आयि, बूमिपोरी अद पावरम कीता लोकुकुकुंक सांति दोर्किकांटी,” इंचि इनालय दल्गतां.
- 15 पजा पेनदा दूतां ओर्कुन होळसिसि स्वर्गमते मल्सि होत्तां. अस्के आ गॉरी मेहानोर वरोक-वरोर, “अय्ते ताकट! मनम बेतलहेम नाटे दाकोम. होंचि, सामि मनाकु वेहताप जर्गुता गटनातुन हळकोम,” इंचि इनालय दल्गुतुर.
- 16 पजा ओर अगटाल बिराना होंचि अगा मरियमुन, योसेपुन हळत्तुर. इंका अगा कोळ्ळते कौदांक कुटार तासाना डालाते सिन्ना पेडल मत्तदगुडा हळत्तुर.
- 17 हळसि, ओर्कु आ पेडाना बारेमते पेनदा दूता बतल वेहतानो, अद पोल्लेतुन आ गॉरी मेहानोर अंटोर्क वेहत्तुर.
- 18 ओर वेहता पोल्लेतुन केंजता हरेक मनकल इचंन्रमते अरतोर.
- 19-20 पजा आ गॉरी मेहानोर ओर्क पेनदा दूता बतल अय्ते वेहता, अल्हेन जर्गुतदुन केंजसि, हळसि ओर पेनदुन इरगा स्तुति कीसेके मल्सि होत्तुर. गानि मरियम मात्रम अव अन्नि पोल्लेन दाना मनसुने इरकुंचि इदुना अर्तम बतल मरि, इंचेके ऊके विचारम कीसेके मनुंद.

सामिना कय्दे येसुन अप्पजेपंतुर

- 21 अल्हा आ पेडल पुटसि एनमिदिद रोजकु आतस्के ओनाद कतना रिवाज कीतुर. मरियम नेला तप्पका मुन्नेन पेनदा दूता दानकु वेहता परकारम, आ पेडाना पोरोल “येसु” इंचि इरतुर.
- 22-24 पजा मूसाना नियम परकारम दाना सुदिदकरन कियाना वेला वातस्के ओर येस्सलेम गुळिते होत्तुर. होंचि “रोंडु पावरेल्क हिलाकौटे रोंडु गुव्वां अयना मोक्कु हियना.”* इंचि मूसाना नियमते रासि मत्ताप मोक्कु हीतुर. अल्हेने मूसाना

* 2:1 कैसर इद राजाना पोरोल आयो. रोम सरकारते अन्टिकन्ना पेदुदा पदवि आंद. † 2:1 कर वसुल कियनाहाटी राजाल सिरगंति कियालय आदेस हीतोर. ‡ 2:4 मीका 5:2 § 2:4 नासरेत नाटेनाल बेतलहेम नार वेल्लेन एल्तुने मंता. आनि दगोर-दगोर 150 किलोमिटर लक्कु मंता. § 2:11 किरिस्तु किरिस्तु इत्ते युनामि बासाते निय होकसि निलाहता वरोर मनकल इंचि अर्तम. यहूदि जातिते पैमान, राजान निलाहनेके ओर्कु निय होकसि निलाहंतुर. मनकन ओना पापमत्ता पिसागोटलय पेन बोन अय्ते निल्हाचि लोहता ओरे किरिस्तु. * 2:22-24 लैब्यक्ता 12:1-8ते वेहताप उंदि मुत्तळ मरिन कनानय्ते नल्पै रोजकुनदाका मुट्टुड मंता.

नियमते, “तोल्सर पेडन बस्केळक सामिक हियना.” इंचि वेहचि मंता. अदुनहाटी सामिना कय्दे येसुन अप्पजेपतुर. इल्हा ओर सामिना नियम परकारम मोक्कु हियालय येस्सलेम होतुर.

सिमोन येसुना बारेमते पेनदा पोल्ले वेहांतोर

25 अवे त्कुल्कुने येस्सलेमते सिमोन पोरोलतोर वरोर मनकल मनुंदुर. ओर नीतिमंतुड आनि पेनदा पोल्लेपोर्रो ताकानोर मत्तोर. इस्त्राएलता लोक्कुंक पेन बस्के सुकम-सांति हीतनो इंचेके ओर एदुर हळसेक मनुंदुर. ओनतोन पवित्र आत्मा मत्ता.

26 इंका पवित्र आत्मा, “बदवेरदाका अय्ते निमे, ‘पेन लोहना किरिस्तुन’ हळिन, अदवेरदाका नीकु हामुर वायो,” इंचि ओन्क वेहचि मत्ता.

27 पजा पवित्र आत्मा सिमोनुंक वेहताहेंका, योसेप आनि मरियम गुळितगा वाता रोजे ओरगुडा गुळितगा होतोर. मूसाना नियम परकारम दंडकालक कियनाहाटी पेडाना तल्लुर-बाबो पेडन अगा पीसि वातुर.

28 सिमोन आ पेडन ओरागटाल तेंडकुंचि एतकुत्तोर, एतकुंचि पेनदुन इल्हा स्तुति कियालय दल्युतोर:

29 “ए सामि, निमे नाकु हीता पोल्ले परकारम नीवा सेवक आता नना, इंदके सांतिते हाया परांतन.

30 बारित्ते निमे पेरकुत्ता पिसागोटनोन नना नावा कळ्कुन निंडा हळतन,

31 निमे ओन दुनियाता अंतोर लोक्कुंकुना मुन्ने पेर्कुत्तिन,

32 वेरे जातिनोर्क बेसता हरि हूपसना वेल्गु,

नीवा इस्त्राएल लोक्कुंकुंक पेनदाहेंदाल दोर्कुता पेदुदातनम ओरे आंदुर.”

33 सिमोन मातरल येसुना बारेमते वळकाना पोल्ले केंजसि, ओना यावल-बाबल इचंन्रमते अरतुर.

34 पजा सिमोन ओर्क आसिर्वाद हीसि, येसुना यावल मरियमुंक इल्हा वेहतोर: “हळा, इस्त्राएलते ई पेडनहेंदाल वेल्लेन मंदि लोक्कुंकुंक नस्टम जर्गार अल्हेने वेल्लेन मंदि लोक्कुंकुंक बेसगुडा जर्गार. ई पेडल इत्ते पेनदाद उंदि चिन्ह आंदुर. ई चिन्हातुन वेल्लेन मंदि पास्कानुर.

35 इदुनहेंदाल वेल्लेन मंदिता मनसुना विचारालक पलाते अरंनुं. गानि नीकु मात्रम उंदि कसेर नीवा गुडेटाल आरपार पेय्शि होत्ताचोन दुक्कम वायार.”

हन्नाल येसुना बारेमते अंतोर्क वेहांत

36 अगा पेनदा कन्नुर वेहना उंदि मातिर मनुंदु, दान पोरोल हन्ना. अद अस्सेर वंसमते पुटता पनुएल पोरोलतोना मिय्यड आंद. अद वेल्लेन मातिर आसि मत्ता. मरमि आता एडुं वर्सनिन दाना मुय्दो हासोत्तोर.

37 इल्हा अद मुंडामोससि एनबै नालु वर्सा आतां. अद रोज-रोज गुळिते वासेके मनुंदु. अद बस्केळक ओक्कापोदुदु मंचेके पेनदुक पारतना कियुंदु.

38 सिमोन मातरल योसेप आनि मरियमुनतोन वळकसेकेन मत्तोर, अस्केन अद ओरा दगेर्क वासि पेनदुक दन्यवाद कीता. पजा बोर लोक्कुंक अय्ते, पेन इस्त्राएल लोक्कुंकुन ओरा तिप्पलकुनाल बस्के पेच्चार इंचेक एदुर हळसेक मत्तुरो, आ अंतोर लोक्कुंकुंक आ पेडाना बारेमते अद वेहता.

39 इल्हा सामिना नियम परकारम कियानव अन्नि दंडकालक कियमळ मारतारित्ते योसेप आनि मरियम गालिल एरियाते मनना ओरा नासरेत इन्ना नाटोर्क मल्लिस होत्तुर.

40 पजा आ पेडल पेदुदा बेसंतोर. ओन्क पेन ताकत अल्हेने बुदिदगुडा बेस हीता. दाना दया ओनपोर्रो मत्ता.

येसु येस्सलेम सहरतेन आगांतोर

41 दाटसि होनना पंडुगुनाहाटी[†] येसुना यावल-बाबल एटा येस्सलेम सहर होनुंदुर.

42 अय्ते येसु पन्नेड वर्सानोर आतोर, अस्केगुडा एटा होत्ताप येसुन पीसि पंडुगुनाहाटी येस्सलेम होत्तुर.‡

43 पंडुगु मारतंका येसुना यावल-बाबल ओरा नार मल्लिस होनालय पेय्सतुर. गानि पेडल येसु मात्रम येस्सलेमतेन आगिसि मत्तोर. अथना इद संगति मात्रम ओना यावल-बाबांक बिल्कुल एरपाट आयाहिल्ले.

44 मनातोनि कलियसि ताकाना मंदितेन मंतोर बारे, इनकुंचि ओर इंकुंदि रोजमेड ताकसेक होत्तुर. पजा ओर ओरा जीवातोर्कुन, एरपाटोर्कुन पुसकीसेके पहकालय दल्युतुर.

[†] 2:41 दाटसि होनना पंडुगु इजिप्त देसेमता गुलामगिरिताल यहदि लोक्कुन पेन पेचाहचि तत्ता मतिते, इद पंडुगु कीतुर. गुलामगिरिताल पलाते अरता रोज इजिप्त देसेमता हरेक लोता पेदुदा मरिन पेनदा द्वा हळ्कता. गानि यहदिल्लुकुना लोतोर्कुनाल बोर हाया हिल्लुर. [‡] 2:42 यहदि जातितेर वरोर पेडल पन्नेड वर्सानोर आतस्के, ओन्क यहदि जातितेरा अन्नि रिवाजकु आनि मूसाना नियमकुना पालन किया पीता.

45 हीके-हेके पङ्क्तिसे हळतुर गानि येसु ओर्कु दिसा हिल्लोर. अदुनहाटीं ओर मर्रा ओन पहकसेक-पहकसेक येससलेम वापस होतुर.

46 मूड रोजकु आतस्के गळितगा येसु ओर्कु दिसतोर. अगा ओर यहदि गुल्लुकुनतोनि उद्दिदिसि ओरा पोल्ले केंजसेके इंका ओर्कुन सवालक पूसकीसेके मत्तोर.

47 येसुना उसारतनमतुन आनि जवाब हियानदुन हळसि अगा मत्तोर अंटोर इचंत्रमते अरतुर.

48 ओना यावल-बाबल गुडा ओन हळसि इचंत्रम आतुर. पजा ओना यावल ओन, “निमे मावातोनि इल्हा बारि कीतिन पेडा? नीवा बाबल, नना इरगा परेसान आसि नीकुन बगा-बगा पहकतोम नीकु एके ना?” इंचि पूसकीता.

49 अस्के येसु ओर्कुन, “मिमेट नाकुन बारिक पहकतिट? नना नावा बाबाना लोतेन मनमळ बेस इंचि मीकु तेळियोना?” इंचि इत्तोर.

50 गानि येसु वळकुता पोल्लेना अर्तम मात्रम ओना यावल-बाबांक तेळिया हिल्ले. S

51 पजा येसु ओना यावल-बाबानतोनि कलियसि नासरेत नार होत्तोर. तल्लुर-बाबो वेहता पोल्ले पोरिन ताकसेक मनुंदुर. ओना यावल इव अन्नि पोल्ले दाना मनसुने इरसि विचारम कीसेके मनुंदुर.

52 इल्हा येसु, बुद्दिदते, ताकतते बेससेके होत्तोर. इंका पेन आनि मनकालोरा नदरतेगुडा बेस ताकुंदुर.

3

योहान पेनदा पोल्लेन वेहांतोर

(मत्तयाल 3:1-6; मरकुस 1:1-5; योहान 1:19-28)

1 तिबेरियसु कैसर इनना वरोर राजाल पूरा रोम राज्येमपोर्रो पेट्टूदा राजाल मत्तोर. ओर राज्येम कियालय दल्लिसि पदिहेन वर्सा पूरा आतां. अवे त्कुल्लुकुने पुंतुस पिलातस इनानोर यहदिया एरियाता राज्यपाल मत्तोर. अंतियस हेरोद राजाल गालिल एरियाता राज्यपाल मत्तोर. इंका ओना तम्मुर पिलिप इतुरिया आनि तारकोनितिस इव एरियान पोर्रो राज्यपाल मत्तोर.* लिसानियास इनानोर बारे अबिलेन इनना एरियाता राज्यपाल मत्तोर.

2 अस्के हन्नाल आनि ओना हडे कयपाल इनानोर इव्वुर पेट्टूदा पेर्मांलोर मत्तुर. अवे त्कुल्लुकुने बतल आता इत्ते जकर्याहना मर्रि योहान बय्लि जेगाते मननेके ओनागा पेनदा वचनम एत्ता.

3 अस्के ओर योर्दन बेट्टा सुट्टु-मट्टुना एरियंता इल्हा वेहासेके तिरियुंदुर, “कीता पापालकुन ओक्कुचि मनसु मार्सकुचि बापतिस्मा येतानय्ते, पेन मीवा पापालकुन मापि कीता.”

4 इल्हा यसायाह इनना पेनदा कबुरतोर वेल्लेन वर्सा मुन्ने रासतद इंदके निजम आता. अद पोल्ले इल्हा मत्ता:

“बय्लि जेगाते केयानद उंदि अल्लिकर केंजा वांता,

सामि मीवा मनसुने वायनाहाटीं हर्रि तयार कीम्ट,

इंका ओना हर्कुन सवरगा कीम्ट.

5 इत्ते, अन्नि लोदिदें-लौंका निडमळ गावाले,

अन्नि गुट्टां-गट्टुक समानम आयमळ गावाले.

वंकर-डिकर मत्ता हर्कु अन्नि, सवरगा आयमळ गावाले.

उतार-बोगडा मत्ता हर्कुगुडा, समानम आयमळ गावाले.

6 अस्के अंटोर लोकुलक पेन मुक्ति हियानदुन हळंतुर.” ✨

योहान लोकुलुकुन तेरहंतोर

(मत्तयाल 3:7-12)

7 योहानुनाहेंदाल बापतिस्मा† येतानाहाटीं लोकुलक पेट्टूदा मंदांनां-मंदां वातुर. अस्के बापतिस्मा हियना योहान ओर्कुन, “ए कट्टला तरासनसंतोरिटा! पेनदा होंगुनाल तपिचकुनालय बापतिस्मा येतट इंचि मीकु बोर वेहतुर?

8 अय्ते मरि, निजमे मीवा मनसु मार्सकुत्तिर इंचि रूजुव कीसि हुप्सट. वट्टिदे, मोमोट अब्राहामुना वंसमतोरम आंतुम, इंचि बस्केने इनकुनमट. नना मीकु निजम वेहांतन, पेन अब्राहामनाहाटीं ई बंडानालगुडा पिलालक पुट्टिचि हिया परंता.

9 इंदके मराकुना हिट्टुकुनाग मर्रु इरसि मंता. बव मराकुन अय्ते बेसता पडिं हादोगों, अबुन नर्किसि तडमिते वाटमळ जर्गता,” इंचि इत्तोर.

S 2:50 स्वर्गमते मनना पेनबाबाना बारेमते येसु वळकुतोर, गानि ओना यावल-बाबांक मात्रम इद संगति तेळिया हिल्ले. * 3:1 अंतियस हेरोद राजाल आनि पिलिप इर इव्वुरगुडा लकाल 1:5 ने मनना पेट्टूदा हेरोद राजाना मर्कु मत्तुर. ✨ 3:6 यसायाह 40:3-5 † 3:7 योहानुनाहेंदाल बापतिस्मा योहानुना बापतिस्मा इत्ते, नावा पळाना पिस्वरतुन होळसि, पूना पिस्वर पिस्संतन इंचि हुसालय एते मुडगिसि तेदमळ.

10 “अय्ते इंदके मोमोट बतल कियना मरि?” इंचि आ लोकुकल योहानुन पूसकीतुर.

11 अस्के योहान, “बोनागा रौड अंगि मंतां, ओर ओनद उंदि अंगि, अंगि हिल्वोकु हियना आनि बोनागा अय्ते गाटो मंता, ओरगुडा हिल्वोकु त्स कीसि हियना,” इंचि वेहतोर.

12 बापतिस्मा येतनाहाटी अगा कर वसुल कियानोरगुडा वासि मत्तुर. ओर लोकुकुन वेल्लेन मुळाह्चि मत्तुर. ओरगुडा, “मोमोट बतल कीकोम गुरूजी?” इंचि पूसकीतुर.

13 अस्के योहान, “सरकार मीकुन बचचोन जमा कियालय वेहता, अचोने जमा कीम्पु, दानकन्ना एक्को जमा कियमट,” इंचि ओर्कु वेहतोर.

14 अस्के इच्चर सिपाइलकगुडा ओनागा वासि, “अय्ते मोमोट बतल कीकोम मरि?” इंचि पूसकीतुर. अस्के योहान ओर्क, “मीकु दोर्कना पगारतेन मिमेट कूस मंट, बोरेहेकटाले आयि बेदरिच्चि हिलाकोटे आबदुदम तप्पु दोस्सि कोलां येतमट,” इंचि वेहतोर.

15 पेन लोहना पिसागोटनोर बिरानेन वायानुर इंचेके लोकुकल बेस आसेते एदुर हळसेक मत्तुर. अदुनहाटी योहानुन हळसि, वायनद मत्ता किरिस्तु ईरे अय्ते आयोर गदा, इल्हा अंतोर ओरद-ओरे मनसुकुने इनकुनुंदुर.

16 अस्के योहान ओरा मनसुना विचारमतुन एरपाट कीसि ओर अंतोर्कुन, “नना अय्ते मीकु बापतिस्मा एततोने हीतन. गानि बोरे अय्ते वायानोर मंतोर, ओर नाकन्ना एक्को ताकततोर मंतोर. ओर केरसि मत्ता हेरपुह्कन इट्टना विलुवागुडा नाकु हिल्ले. ओर मीकु पवित्र आत्मा आनि तळमितोनि बापतिस्मा हीतोर.

17 ओना कय्दे हेती मंता. ओर ओना कडातुन बेस साप कीतारित्ते गोह्कन तुरपालक पीसि गुम्पिते दोसंतोर, पोट्टुनबावे बस्केने पिर्स्वा तडमिते वाटसि बोळसंतोर,” इंचि इल्लोर.

18 इल्हा योहान वेल्लेन पोर्ल्ले कराहसेक, ओर्क बेसता कबुर वेहुंदुर.

योहान येसुक बापतिस्मा हीतोर

(मत्तयाल 3:13-17; मरकुस 1:9-11)

19-20 पजा बतल आता इत्ते, गालिल एरियाता राजाल हेरोद, ओना तम्पुर पिलिपि पिस्सि मननेकेन ओना मुत्तो हेरोदियास इनानदान ओनागा तच्चि इरुकुत्तोर. हेरोद राजाल ओना अंगोनतोनि कीता पापम, इंका वेरे-वेरे वेल्लेन तप्पु कबाह्कनाहाटी हेरोद राजान योहान तेराहतोर. अदुनहाटी हेरोद राजाल योहानुन जेलने वाटसि, ओना तप्पुकुने इंकुंदि तप्पु कल्पकुत्तोर.*

21 योर्दन बेरेते योहान वेल्लेन लोकुकुकुं बापतिस्मा हीसेक मत्तोर. अस्के येसुगुडा अगा वासि योहानुना कय्दे बापतिस्मा एततोर. बापतिस्मा एततंका येसु पारतना कियनेके मबु अंता बैय्यरा आता.

22 अस्के पवित्र आत्मा पावरेम पिट्टे रूपमते वासि ओनपोरो रेयतस्के, स्वर्गमताल उंदि अल्लिकर इल्हा केंजावाता. “निमे नावा पावरमगल्ला मरिन आंदिन, नना नीकुन वेल्लेन जीवा कीतन, नीवा लोप्पो नना वेल्लेन आनंदमते मंतन.”

योसेपुना वंसम

(मत्तयाल 1:1-17)

23 येसु सेवा कियना कबळः सुख कीतस्के ओर दग्गेर-दग्गेरा मुपै वर्सानोर मत्तोर. लोकुकल येसुन, योसेपुना मरि इनकुनुंदुर. योसेप एलि पोरोलतोना मरि आंदुर.

24 एलिना बाना पोरोल मत्तातु, मत्तातुना बाना पोरोल लेवि, लेविना बाना पोरोल मल्लिक, मल्लिकना बाना पोरोल यान्ना, यान्नाना बाना पोरोल योसेपु.

25 योसेपुना बाना पोरोल मत्तियाल, मत्तियाना बाना पोरोल आमोस, आमोसुना बाना पोरोल नाहोम, नाहोमुना बाना पोरोल एस्लि, एस्लिना बाना पोरोल नागय्या.

26 नागय्याना बाना पोरोल मयातु, मयातुना बाना पोरोल मत्तियाल, मत्तियाना बाना पोरोल सिमय्या, सिमय्याना बाना पोरोल योसेकु, योसेकुना बाना पोरोल योदाल.

27 योदाना बाना पोरोल योहानन, योहानननुना बाना पोरोल रेसाल, रेसाना बाना पोरोल जेस्बाबेल, जेस्बाबेलना बाना पोरोल सलितिएल, सलितिएलना बाना पोरोल नेरी.

28 नेरीना बाना पोरोल मल्लिक, मल्लिकना बाना पोरोल अद्दि, अद्दिना बाना पोरोल कोसाम, कोसामुना बाना पोरोल एलमादामु, एलमादामुना बाना पोरोल एराल.

29 एरालना बाना पोरोल यहोसु, यहोसुना बाना पोरोल एलियाजर, एलियाजरना बाना पोरोल योरिमु, योरिमुना बाना पोरोल मत्तातु, मत्तातुना बाना पोरोल लेवि.

* 3:19-20 मत्तयाल 14:3; मरकुस 6:13 † 3:23 येसु सेवा कियना कबळ लोकुकुकुं पेनडा पोर्ल्ले कराहना कबळ.

30 लेविना बाना पोरोल सिमोन, सिमोनानु बाना पोरोल यहूदल, यहूदाना बाना पोरोल योसेपु, योसेपुना बाना पोरोल योनामु, योनामुना बाना पोरोल एलकिमु.

31 एलकिमुना बाना पोरोल मल्लयाल, मल्लयाना बाना पोरोल मिन्नाल, मिन्नाना बाना पोरोल मत्तातु, मत्तातुना बाना पोरोल नातानु, नातानुना बाबल दाविद राजाल.

32 दाविद राजाना बाना पोरोल थिस्सल, थिस्साना बाना पोरोल ओबेद, ओबेदुना बाना पोरोल बोआज, बोआजुना बाना पोरोल सलमोन, सलमोनानु बाना पोरोल नहसोन.

33 नहसोनानु बाना पोरोल अमिनादाब, अमिनादाबुना बाना पोरोल अदमिन, अदमिनानु बाना पोरोल अरनि, अरनिना बाना पोरोल हेसरोन, हेसरोनानु बाना पोरोल पेरस, पेरसना बाना पोरोल यहूदा.

34 यहूदाना बाना पोरोल याकोब, याकोबुना बाना पोरोल इसाक, इसाकुना बाना पोरोल अब्राहाम, अब्राहामुना बाना पोरोल तेराहाल, तेराहाना बाना पोरोल नाहोर.

35 नाहोसुना बाना पोरोल सस्रा, सस्रानु बाना पोरोल रेऊ, रेऊना बाना पोरोल पेलेग, पेलेगुना बाना पोरोल एबेराल, एबेरालना बाना पोरोल सेलाल.

36 सेलाना बाना पोरोल केनान, केनानुना बाना पोरोल अरपक्सद, अरपक्सदना बाना पोरोल सेमु, सेमुना बाना पोरोल नोहाल, नोहाना बाना पोरोल लामेक.

37 लामेकुना बाना पोरोल मतसेल, मतसेलना बाना पोरोल हनोक, हानोकुना बाना पोरोल यारेद, यारेदुना बाना पोरोल महलेल, महलेलना बाना पोरोल केनान.

38 केनानुना बाना पोरोल अनोस, अनोसुना बाना पोरोल सेतु, सेतुना बाना पोरोल आदाम, आदाम पेनदा मरिं मत्तोर.

4

पेद्रा देय्यम येसुना परिकसा येतता

(मत्तयाल 4:1-11; मरकुस 1:12-13)

1 पजा येसु योर्दन बॅरेटाल बापतिस्मा एतसि पवित्र आत्माते निडतस्के, पेनदा आत्मा ओन बय्लि जेगाते पीसि ओता.

2 अगा नल्यै रोजकुनदाका पेद्रा देय्यम ओना पट्ट हळता. अव रोजकुने येसु बतले तिना हिल्लोर. अदुनहाटी अव रोजकु मारतस्के येसुंक इरगा कर्वेता.

3 अस्के पेद्रा देय्यम ओनगा वासि, “ओक्कला निमे पेनदा मरिंन आते ई बंडां हारि आथिं ईचि आदेस हीम,” ईचि ओन इत्ता.

4 इत्तस्के,

“मनकल सिराप वाट्टि हारि तिचे पिस्सोर,

गानि पेनदा तोळ्दाल पेय्सना, उंदि-उंदि पोल्लेताहेंदाल पिस्संतोर.

इल्हा दर्मसास्त्रमते रासि मंता,”[☆] ईचि येसु दान्क जवाब हीतोर.

5 पजा पेद्रा देय्यम येसुन उंदि एत्तु जेगाते पीसि ओसि, उंदे मल्का दुनियाता अनि राज्येल्क हुपिस्ता.

6 हुपिचि, “इव अनि राज्येल्कुनपोर्रो अदिकारम आनि अबुना पेद्रादातनम नीकु हीतन. बारित्ते अव अनि राज्येल्क नाके हियमळ जर्गाता. नना इद अदिकारम बोन्क इत्ते ओन्क हिया परांतन.

7 अदुनहाटी, निमे नावा काल्क मोळकानय्ते इव अनि नीवागें आंतां,” ईचि पेद्रा देय्यम इत्ता.

8 अस्के,

“निमे नीवा पेनदुने मोळकना, सिराप दानादे सेवा कियना,[☆]

इल्हा दर्मसास्त्रमते रासि मंता,”

ईचि येसु दान इत्तोर.

9 आर्यका पेद्रा देय्यम येस्सलेमते मनना गुळितगा येसुन ओसि, गुळि पोरो कोस्सक निल्हाचि इल्हा इत्ता, ओक्कला निमे पेनदा मरिंन आते हिळु दुनका.

10 बारित्ते,

“नीकुन कापाळालय पेन दाना द्तांक आदेस हीता,

आनि आ द्तां वासि, नीवा काल्कुंक देब्बां दलगामनि ईचि,

नीकुन पोरोटद पोर्नि अंदकुंतां,

11 इल्हा दर्मसास्त्रमते रासि मंता.”[☆]

12 अस्के येसु दान्क इल्हा जवाब हीतोर.

“निमे सामि इनना नीवा पेनदा पट्टु हळमा, इल्हागुडा वेहतद मंता.”[✱]

13 इल्हा पेद्दा देय्यम अन्नि तीस्कुने येसुना पट्टु हळतारित्ते, दान्क इंकुंदि मोका दोर्कनदाका ओन होळसि होत्ता.

येसु सेवा कबळ सुम्ब कीतोर
(मत्तयाल 4:12-17; मरकुस 1:14-15)

14 पजा येसु पवित्र आत्माता ताकतते निडसि गालिल एरियाते वापस वातोर, अस्के गालिल एरियाता अन्नि नाहकुनोर ओना बारेमतेन वळकुंदुर.

15 येसु ओरा दर्मासास्त्रम कराहना लोहकुने होंचि पेनदा पोल्ले करहुंदुर. अंतोर ओन बेस कराहतोर इचि कदर हिय्युंदुर.

येसुन ओना नाटेनोर हय्या हिल्लुर
(मत्तयाल 13:53-58; मरकुस 6:1-6)

16 पजा येसु सिन्नास्केटाल बेसता नार नासरतेते होत्तोर. वारमता नोमकेम रोजुने ओना अलवट परकारम दर्मासास्त्रम कराहना लोते होंचि, दर्मासास्त्रम हदवालय निततोर.

17 अस्के यसायाह इनना पेनदा कबुरतोर रासता पुस्तकम ओन्क हीतुर. ओर आ पुस्तकमते उंदि पोल्ले दोर्किच्चि, इल्हा हदवालय सुम्ब कीतोर:

18 “पेनदा पवित्र सेवक इल्हा वेहचंतोर, पेनदा आत्मा नावापोरी वाता.

गरिबोर्कुंक बेसता कबुर वेहालय, पेन नाकुन अबिसेकम कीता.

दोहाचि वाटसि ओतोर्कुन, पेन होळसीता इंचि वेहालय,

गुड्डोर्कुन, मिमेट हळतिर इंचि वेहालय,

तकलिपते मनानोर्कुन, तकलिपताल तैडालय,

19 पेन दया कियना वेला एव्ता, इंचि वेहालय नाकुन लोहता.”[✱]

इल्हा रासि मत्तदुन हदुवतोर.

20 हदुवमळ आतारित्ते, पुस्तकमतुन बंद कीसि वरोर चपरासिक हीसि कराहलय येसु हिळु उदुतोर. आ दर्मासास्त्रम कराहना लोते मत्ता अंतोरा नदर ओनेहेकेन मत्ता.

21 अस्के, “इय्याला मिमेट केंजतव दर्मासास्त्रमता पोल्ले, मीवा मुन्ने नावा कयदाल पूरा आतां,” इंचि येसु ओर्कुन इत्तोर.

22 “ओर बेस वेहतोर, बेस-बेसतां पोल्ले ओना तोळ्दाल पेय्सुंदुं” इंचेके ओर अंतोर इचंत्रम आतुर. आसि ओर, “ईर अयते योसेपुना मर्रे गदा?” इंचि इत्तुर.

23 अस्के येसु ओर्कुन इल्हा इत्तोर, “ ‘मत्तु हियानोना! नीवद निमेने बेस कीस हप्सा,’ इंचि उंदि सात्रम मत्ताप, मिमेट इंका नाकुन तप्पाकोट्टा इंतिर, इत्ते, ‘कपर्नाहुमते निमे कीता अद्बूताल्कुना बारेमते मोमोट केंजतोम, अव अद्बूताल्क नीवा संतम नाटेनेगुडा कीम,’ इंचि इंतिर.

24 नना मीकु निजम वेहांतन, बारे पेनदा कबुरतोंक आयि, ओना नाटेनेन ओन्क कदर मनो.

25 अद बल्हा इत्ते, पेनदा कबुरतोर एलियाहना* कालमते बतल जर्गुता मीकु एर्कना? अस्के पूरा देसेमते मूड वर्सा हांन नेल्कुनदाका पिर्ब वाया हिल्ले, अदुनहाटी वेल्ले कर्बु अर्सि मत्ता. नना मीकु निजम वेहांतन, अद वेलाते इझाएल देसेमते वेल्लेने मुंडामोस्ता मुर्ताहक मत्तां.

26 गानि बदे मुंडामोस्ता मुरतटगा सहायम कियनाहाटी पेन एलियान लोहा हिल्ले. ओन सिराप सिदोन सहर दग्गेटा सारपत नाटेना वैरे जातिता मुंडामोस्ता मुरतटगा लोहता.[✱]

27 अल्हेने पेनदा कबुरतोर एलिसाना† कालमते इंका कुस्टरोगम आतोर इझाएल देसेमते वेल्लेटुरे मत्तुर. गानि ओराव्टेटाल वरोन इंका बेस कियालय पेन एलिसान लोहा हिल्ले. सिराप सिरिया देसेमता नामान इनानोने बेस कीतोर,[✱] इल्हा बारे पेनदा कबुरतोंक आयि, ओना नाटेनेन ओन्क कदर मनो,” इंचि वेहतोर.

28 इझाएल लोकुल्कुन होळसि, वैरे देसेमता लोकुल्कुन पेन सहायम कीता इंचि येसु वेहतस्के, दर्मासास्त्रम कराहना लोते उदिस मत्तोर अंतोर्क इरगा होंग वाता.

29 होंग वातस्के ओर तेदसि, येसुन ओरा नाटेनाल पलाते गुंजिस ओतुर. ओरा नार उंदि गुट्टापोरी मत्ता. येसुन गुट्टा पोरीटाल दोब्बिसि हियालय एत्तु मत्तगा ओतुर.

✱ 4:12 व्यवस्ताविवरन 6:16 ✱ 4:19 यसायाह 61:1-2; 58:6 * 4:25 एलियाह एलिया इनना पेनदा कबुरतोर येसुकुनना 850 वर्सां मुन्ने मत्तोर. ✱ 4:26 1 राजा 17 † 4:27 पेनदा कबुरतोर एलिसाना एलियाल होल्का ओना जेगाते एलिसा इनना पेनदा कबुरतोर पेनदा कबुर वेहना कबळ कियुंदुर. ✱ 4:27 2 राजा 5:1-14

30 गानि येसु ओरा नड्डुमताल पेय्मि होत्तोर.

देय्यम पीतोन येसु बेस कीतोर
(मरकुस 1:21-28)

31 अरगटाल येसु ओना सिस्थुल्कुनतोनि गालिल एरियाता कपर्नाहम[‡] नाटे होत्तोर. अगा वारमता नोमकेम रोजुननाड पेनदा पोल्ले कराहमळ सुख कीतोर.

32 ओर इच्छोन अदिकारमते करहुंदुर गदा, ओना कराहमळतुन केंजसि लोकुलक इचंत्रम आतुर.

33 अगा दर्मसास्त्रम कराहना लोते वरोर देय्यम पीता मनकन मत्तोर. ओर येसुन हळसि जोरते वरगोयसि केयतोर,

34 “ए नासरेत नाटेना येसु! मातोनि नीकु बाता कबळ? माकुन नासडेम कियालय वातिना? निमे बोन आंदिनो नाक एपाटे, निमे नासरेत सहरता येसुन, पेनदा पवित्र मनकन आंदिन,” इत्तोर.

35 अस्के येसु ओनालोपो मत्ता देय्यमतुन, “चुपचाप मन! ओनागटाल पलाते पेयसा,” इंचि गदरिचतोर. अस्के, अद ओन हिळु अरहचि, ओन्क बतले नोपि कियाकौटा, ओना लोपोटाल पेय्मि होत्ता.

36 अगा मतोर लोकुलक इचंत्रम आसि, वरौक-वरोर वळकालय दल्यतुर, “इद बसौटा पोल्ले आंदु? ओर अदिकारमते, ताकतते देय्याल्कुंक आदेस हीतोर, अव पेय्मि दांतां!” इंचि इत्तुर.

37 इल्हा येसुना पोल्ले सुट्टु-मट्टु मत्ता अन्नि नाहकुने तेळियसि होत्ता.

येसु उंदि बिमार मुरताटुन बेस कीतोर
(मत्तयाल 8:14-15; मरकुस 1:29-31)

38 येसु दर्मसास्त्रम कराहना लोताल पेय्मि सिमोन इननोना लोन होत्तोर. अगा सिमोनुना पोरळकु बागा एळकि वासि मत्ता. दाना एडकितुन बेस कियालय ओर येसुन विनंति कीतुर.

39 अस्के येसु दाना दग्गेरा नित्तिसि एडकितुन गदरिचतस्के दाना एळकि रेय्ता. पजा अद बिराना तेदसि, ओरा सेवा कियालय दल्यता.

येसुनाहेंदाल वेल्लेटुर बेस आतुर
(मत्तयाल 8:16-17; मरकुस 1:32-34)

40 पजा पोळद होनना वेलाक तीरतीरकुना बिमार्क मत्तोर्कुन लोकुलक ओनगा पीसि वातुर. अस्के येसु वरोन-वरोनपोरौ कय इरसि, ओर्कुन बेस कीतोर. §

41 वेल्लेटोर्कुन देय्याल्क पीसि मत्तां. अव देय्याल्कुन येसु गदुदरिचिचि पेचाहतोर. देय्याल्क ओरागटाल पेय्सनेके, येसु किरिस्तु आंदुर इंचि एपाट कीसि, “निमे पेनदा मरिन आंदिन” इंचेके जोरते वरगोयसेके पेय्सुंदु. गानि येसे किरिस्तु आंदुर इंचि अव एपाट कियुंदु इंचि येसु अवुन वळका हिया हिल्लोर.

येसु वेंरे-वेंरे नाहकुने दांतोर
(मरकुस 1:35-39)

42 पंगातस्के येसु, नाटुन होळसि बोरें हिल्वगा ओटिगा होत्तोर. गानि लोकुलक ओन पत्किसि-पत्किसि दोर्किचि, निमे माकुन होळसि होनमा इंचि आपालय हळतुर.

43 गानि येसु ओर्कुन इल्हा इत्तोर. “पेन मनकालोरगा राज्येम कियना बेसता कबुरतुन नाकु वेंरे नाहकुने इंका वेहा पीता. इदे कबळताहाटीं पेन नाकुन लोहता,” इत्तोर.

44 पजा येसु, यहुदिया एरियाते यहुदिल्कुना दर्मसास्त्रम कराहना लोहकुने हौचि पेनदा पोल्ले वेहुंदुर.

5

पनु याकोब आनि योहान येसुना पज्जो दांतुर
(मत्तयाल 4:18-22; मरकुस 1:16-20)

1 उंदि रोजु येसु गेनेसरेत* इनना समुद्रमताग नित्तिसि पेनदा पोल्ले वेहासेक मत्तोर. येसु ओड्डुनपोरौ नित्तिसि पेनदा पोल्ले वेहनेके, आ पोल्ले केंजालय अगा वेल्लेने लोकुलक ओना सुट्टु जमा आतुर.

2 अस्के येसु समुद्रम ओड्डुनगा रौडु डौंगन हळतोर. जिम्मां पियानोर डौंगानाल रेय्मि ओरा ओल्लां नोर्सेक मत्तुर.

‡ 4:31 कपर्नाहम कपर्नाहम नार नासरेत नाटुक मुपै कित्लोमिटर लक्कु मंता. अद गालिल सेरवुना ओड्डुनपोरौ मंता. § 4:40 नोमकेम रोजुने यहुदिल्कु बतले कबळ कियाकौदुर, पन्नेम होनाकौदुर. सनेम पोळद होतस्के नोमकेम रोज मासुंदु. अदुनहाटीं पोळद हौचि बिमारकुर्कुन येसुनगा तल्लुर. * 5:1 गेनेसरेत दीन गालिल इंचिगुडा इत्तुर.

3 येसु, अव डोंगानाल वरोर सिमोन पत्रु इननोना डोंगाते एकतोर. एकसि, अंतोर्क बेस केंजा वायना इंचि अद डोंगातुन ओड्डुनाल इच्चुर लक्कु ओसि निप्सा इंचि वेहतोर. ओर डोंगातुन लक्कु निपिस्ता पजा, येसु डोंगाते उदिदिसि लोकुल्लुकुंक पेनदा पोलेलें वेहालय दलगतोर.

4 पेनदा पोलेलें वेहमळ आता पजा, “डोंगातुन वेल्ले लोतु मल्लगा ओसि मिमेट ओल्लं मर्रा वाटट,” इंचि येसु सिमोननु इतोर.

5 अस्के, “गुः! मोमोट नर्का पल्लहीं तिप्पलक अरतोम, माकु उंदिका जिम्मा दोर्काहिल्ले, गानि निमे इंचेके मंतिन अदुनहाटी नना ओल्लं वाटंतन,” इंचि सिमोन इतोर.

6 पजा सिमोन आनि ओना दंटातुर येसु वेहताप कीतुर अय्ते वेल्लेने जिम्मां अर्सि ओरा ओल्लं हारंलय आतां.

7 ओल्लं हारंतां बारे इंचि वरे डोंगाते मल्ला ओरा दंटातोर्कुन आसरा आयालय सय्यें कीसि केयतस्के, ओर वासि रोंडु डोंगाने जिम्मां निहतुर, अस्के ओरां रोंडु डोंगा इंका मुळगालय आतां.

8-9 वेल्लेन जिम्मां अरतद हळसि, सिमोन पत्रु आनि ओना दंटातुर वेल्ले इंचंनम आतुर. अस्के सिमोन येसुना कालकुना पोरो अरसि, “सामि, नना पापि मनकन आंदुन, नीवा दग्गेरा मनना लायक हिल्लेन,” इंचि इतोर.

10 अल्हेने जब्दि इननोना मर्क याकोब, योहान, ईर सिमोन पत्रुना दंटातोरे आंदु, इंचंनम आतुर. अस्के, “निमे वेरिय्या, गानि इंदकेटाल निमे मनकालोर्कुन पीसि वायानोन आकिन,” इंचि येसु सिमोननु इतोर.

11 पजा ओर ओरा डोंगां ओड्डुंक तल्लुर. तच्चि अव अन्नि अग्गेन होळसि ओना पज्जो होल्लुर.

येसु कुस्ट रोगमतोन बेस कीतोर

(मल्लयाल 8:2-4; मरकुस 1:40-44)

12 उंदि रोज़ येसु उदि सहरते मल्लतोर. अगा वरोर मनकल कुस्टरोगमते पूरा निडसि मल्लतोर. ओर येसुन हळसि ओना कालकुनपोरो अर्सि, “सामि, निमे इन्कुल्ले नाकुन बेस किय्या परीतिन,” इंचि विरिति कीतोर.

13 अस्के येसु कय मुन्नेळ्ळ कीसि ओन इट्टिसि इल्ला इतोर, “निमे बेस आयगोम इंचि मनसु मंता, बेस आम,” इंचि इल्ला इन्मळे ओना कुस्टरोगम पुरागा होल्ला.

14 पजा, “इगे जर्गद बोनके वेहमा. गानि निमे होंचि मीवा पेर्माक हुप्सा. पजा मूसाल वेहता मोक्कु हीम. अस्के निमे बेस आतिन इंचि लोकुल्लुकुंक एरपाट आतां,”* इंचि येसु ओन्क गाट्टिगा वेहतोर.

15 निमे बोर्के वेहमा इंचि येसु वेहचि मल्लतोर गानि ओना पोलेले मुन्नेटकन्ना एकको लोकुल्लुकुंक तेळियसेक होल्ला. अदुनहाटी वेल्लेन लोकुल्लुकुं ओना पोलेलें केंजालय, बिमारकुनाल बेस आयालय ओना पज्जो-पज्जो वायुंदुर.

16 गानि येसु बारे हिल्लवाग अलग-सलग होंचि पारतना कियुंदुर.

येसु लकवा बिमारतोन बेस कीतोर

(मल्लयाल 9:1-8; मरकुस 2:1-12)

17 येसु उंदि रोज़ वरोर लोन पेनदा पोलेलें वेहनेके, अगा परिसिल्लक,[†] आनि दर्मसास्त्रम कराहना गुस्लक उदिस मल्लतुर. ओर गालिल आनि यहूदिया एरियाना अन्नि नाहकुनाल, अल्हेने येस्सलेम सहरताल वासि मल्लतुर. पेनदा ताकत येसु सामिगना मल्लाहेंके बिमारतोर्कुन बेस कियुंदुर.

18 हळ्ळा! अस्के इच्चुर लोकुल्लुकुं वरोर लकवा बिमारतोन कट्टलते वाटसि येसुनगा तल्लुर. तच्चि येसु उदिदिसि मल्लगा लोप्पो ओयालय हळल्लुर.

19 गानि अगा वेल्ले गर्दि मल्लाहाटी ओर लोता लोप्पो ओया पराहिल्लुर. अस्के ओर बतल कीतुर इल्ले लोतपोरो एकतुर, कट्टल पि्यानच्चो बोंगा कीसि येसु लोप्पो बगा अय्ते उदिस मल्लतोर ओन्क सवरगा आ लकवा बिमारतोन कट्टलक कट्टले ओना मुन्ने रेहल्लुर. 20 येसु, ओरा विस्वासमतुन हळसि, “कोको, नीवा पापालक मापि आतां,” इंचि लकवा बिमारतोन इतोर.

21 अस्के दर्मसास्त्रम कराहना गुस्लक आनि परिसिल्लक केंजसि, “पेनदा अपमानन कियानोर, ईर बोर आंदुर? पेनदुन होळसि इंका बारे पापालकुन मापि किय्या पर्र,” इंचि ओर-ओरे मनसुने विचारम कियालय दलगतुर.

22 येसु सामि, ओरा मनसुना विचारमतुन एरपाट कीसि, “मी मनसुने इंसोंटा विचारम बारि कीतिर?

23 बद अल्लका मंता? ई बिमारतोन, ‘नीवा पापालक मापि आतां’ इनमळ? हिलाकोटे, ‘तेदिस ताका’ इनमळ?

24 गानि मनकना रूपमते पुटतोन नाकु, ई बूमिपोरोटा पापालकुन मापि कियना अदिकारम मंता इंचि मीकु हुसंतन,” इतोर. इंचि, “नना नीकु वेहासेके, निमे तेदिसि कट्टल पीसि लोन होन,” इंचि लकवा बिमार आतोन इतोर.

* 5:14 लैव्यवस्ता 14:1-32 † 5:17 परिसिल्लक इल्ले इगे परिसिल्लकुना गेग्नोर मल्लतुर.

25 अस्के ओर बिराना अंटोरा मुन्ने तेदसि, बद्द कटुलते अय्ते ओर मीडिसि मल्लोर अद्द कटुल पीकुंचि, पेनदुन तल्सकुचुंकेके लोन होल्लोर.

26 अद्द ह्ळसि, अगा मल्लुर अंटोर वेल्लेन इचंन्रम आसि, पेनदुन तल्सकुनालय दल्गलुर. पजा वेरियसि, “इदवेरादाका मोमोट बस्केने इसॉटा इचंन्रम आयना कबाहक ह्ळ्हा हिल्लोम,” इंचि इनालय दल्गलुर.

कर वसुल कियना लेवि इनानोन येसु केयतोर
(मल्लयाल 9:9-13; मरकुस 2:14-17)

27 पजा येसु अगटाल होननेके, कर वसुल कियना नाकातगा लेविः पोरोलता वरोर कर वसुल कियानोन ह्ळ्तोर. ह्ळसि ओन, “नावा पज्जो वा,” इंचि इल्लस्के

28 ओर, ओनगा मल्लव अन्नि अगेन होळसि ओना पज्जो होल्लोर.

29 पजा लेवि येसुन ओना लोन केथि, उदि पेद्दा बोजनम हीतोर. अगा वेल्लेटुर कर वसुल कियानोर, इंका वेटोर लोक्कुल्ल येसुनतोन उद्विदसि गाटो तिचेके मल्लुर.

30 अस्के परिसिल्लक आनि ओरा दर्मसास्त्रम कराना गुस्ल्लक येसुना सिस्स्युल्लुकुनगा वासि, “कर वसुल कियानोरतोनिस आनि पापि लोक्कुल्लुकुनतोन मिमेट तिनुळ-उनुळ बारि तितिर,” इंचि गुल्लालय दल्गलुर.

31 अस्के येसु ओर्कु इल्हा जवाब हीतोर, “बिमार हिल्लोर्कुंक डाक्टरना अक्सरम मन्नो गानि बिमार मतोर्कुंक डाक्टरना अक्सरम मनंता.

32 नना नीतिमंल्लुकुन केयालय आयो गानि पापि लोक्कुल्लुकुन मनसु मार्सकुननाहाटी केयालय वातन,” इंचि इल्लोर.

ओक्कापोद्दुना बारेमते येसु करारहाता पोल्ले
(मल्लयाल 9:14-17; मरकुस 2:18-22)

33 पजा अगा मल्ला लोक्कुल्ल येसुन इल्हा पूसकीतुर, “योहानुना सिस्स्युल्लक अय्ते ऊके ओक्कापोद्दु मंनतुर, पारतनागुडा कीतुर. अल्लहेने परिसिल्लुकुना सिस्स्युल्लकगुडा कीतुर, गानि नीवा सिस्स्युल्लक अय्ते बस्केळ्ळक तिचेक-उंचेके मंनतुर. अल्लहा बारि?”

34 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतोनि मननेके, ओर्कुंन ओक्कापोद्दु मना वेहा परकिटा? वेहा परिर.

35 गानि मरमिन पेडल ओरागटाल लक्कु आयाना रोजकु वायनुं, अव रोजकुने ओर ओक्कापोद्दु मनानुर.”

36 पजा, येसु ओर्क इंकुदि वेसुडि वेहतोर. “बोरे आयिर, पूना कपिडतुन हराहिचे पळाना कपिडक अंटा वादिसि कुट्टोर. ओक्कला ओर अल्लहा कियानय्ते पूना कपिड अय्ते हेळसि दांते, अल्लहेने पूना कपिडता तुकडा पळाना कपिडक सोकगुडा दिस्सो.

37 अल्लहेने पूना अंगुर पानकमतुन, पळाना तोलपुर्कति बोरे दोस्सुर. अल्लहा दोसते अद्द अंगुर पानकम, पळाना तोलपुर्कतिन हराहिचे पोंगिस दांता. पजा आ तोलपुर्कगुडा नासडेम आंता.

38 अल्लहा कियवा पूना अंगुर पानकम पूना तोलपुर्कतिन दोसना. अस्के तोलपुर्कतिन हरहो.

39 बोरे आयिर, पळाना अंगुर पानकम उट्टारित्ते, पूना अंगुर पानकम गावाले इन्नोर. ओर पळाना अंगुर पानकमे बेस मंता इंचि वेहांतोर.”

6

नोमकेम रोजुना मालक येसु आंदुर
(मल्लयाल 12:1-8; मरकुस 2:23-28)

1 उदि नोमकेम रोजुने येसु पोलाल्लुकुना होंचेके मल्लोर. होननेके ओना सिस्स्युल्लक हेनकु उरहाचि कय्दे नल्लिस तिचेके होल्लुर.

2 इच्चुर परिसिल्लक अदुन ह्ळसि, “नोमकेम रोजुने बद्द कबळ अय्ते कियमळ नियम परकारम ओज्जोनो, अदे कबळ मिमेट बारि कीसंतरि?” इंचि येसुन पूसकीतुर.

3 अस्के येसु ओर्कुंन, “दाविदुंक आनि ओना दंतातोर्कुंक कर्वेस्तस्के ओर बतल कीतोर, मिमेट हद्दवा हिल्लिरा?

4 ओर पेनदा लोते होळियसि, पेनदुक मोळ्ळकता हारिन तिल्लोर, * ओना दंतातोर्कुंकगुडा हीतोर. * अव हारि तिनमळ इल्ले दर्मसास्त्रम परकारम विरोदमते मल्ला. अव हारि सिराप पेर्मालोर्क तप्पा इंका बोरे तिना पर्र, ” इंचि इल्लोर.

‡ 5:27 लेवि लेवि येसुना सिस्सुड आतोर, पजा इना पोरोल मल्लयाल इंचि अरता. मल्लयाल रासतद्द बेसता कन्नुर ईर रासतोर. § 5:30 कर वसुल कियानोर ईर रोम सरकारानाहाटी कर वसुल कियुदुर. आनि यहुदि लोक्कुल्लक रोम सरकारानाहाटी कबळ कियानोर्कुंन हय्साकीदुर. ✧ 6:4 लैयवस्ता 24:9 ✧ 6:4 1 सम्पल्ल 21:1-6

5 पजा, “मनकना रूपमते पुटतोन नना, नोमकेमता रोजुना मालकगुडा आंदुन,” इंचि येसु ओर्कुन इत्तोर.

नोमकेम रोजुने येसु वरोर मनकन बेस कीतोर
(मत्तयाल 12:9-14; मरकुस 3:1-6)

6 अल्हेने इंकुंदि नोमकेम रोजुने येसु दर्मसास्त्रम कराहना लोन होंचि कराहसेक मत्तोर. अगा वरोर तिना कय वत्सोत्ता मनकल मत्तोर.

7 अंद लोतगा इच्चुर दर्मसास्त्रम कराहना गुस्लक आनि परिसिलक मत्तुर. नोमकेम रोजुने येसु ओन बेस कीतोर किय्योरा? बेस कियानय्ते, नोमकेम रोजुने बल्हा बेस कीतोर इंचि तप्पुने पियालय हळसेक मत्तुर.*

8 गानि येसु मात्रम ओरा विचाराल्कन एरपाट कीसि, “तेदसि अंतोरा मुन्ने नित्ता,” इंचि कय वत्सोत्तोन इत्तोर, इत्तस्के ओर तेदसि मुन्ने वासि निततोर.

9 पजा येसु ओर्कुन इल्हा पूसकीतोर, “नना मीकुन उंदि पोल्ले पूसकीतन वेहाट. नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकॉटे उंदि जीवातुन पिसागोटते मंचिदा, नासडेम कियमळ मंचिदा? बद बेस” इत्तोर.

10 येसु अंतोरहेके हळतोर. पजा, “नीवा कय मुन्नेळक हहा,” इंचि आ कय वत्सोत्तोन इत्तोर. ओर कय मुन्नेळक हाहतस्के ओना कय बेस आता.

11 गानि परिसिलकुंक आनि दर्मसास्त्रम कराहना गुस्लकुंक होंग वासि, ओर पलाते पेय्स्तर. पेय्सि, येसुन बतल कीते सेरे? इंचि ओर-ओरे विचाराल्क कियालय दल्यातुर.

येसु पन्नेड मंदि प्रेरितुल्कन पेरतोर
(मत्तयाल 10:1-4; मरकुस 3:13-19)

12 पजा उंदि रोज पारतना कियालय येसु गुट्टापोर्रो होत्तोर. अगा ओर नर्का-पल्हिं पेनदुक पारतना कीतोर.

13 पंगातस्के ओना सिस्युल्कन अंतोर्कुन दगोर्क केय्सि ओराबेटाल पन्नेड मंदिंतुन पेरतोर. पेरसि ओर्कुं, प्रेरितुल्क इंचि पोरोल दोसतोर. येसु पन्नेड मंदिंतुन पेरकुत्तोर ओरे प्रेरितुल्क† इंचि पोरोल दोसतोर.

14 पन्नेड मंदि बोर-बोर इत्ते, सिमोन (ईन पत्र इंचि येसु पोरोल दोसतोर),* सिमोनानुना तम्मुर अंदरियल, जब्दिना मर्क याकोब आनि योहान, पिल्लिप, बरतलमय,

15 मत्तयाल (ईर कर वसुल कियना लेवि आंदुर, ईन मत्तयालगुडा इंतुर), तोमल, अल्पिना मरिं याकोब, सिमोन जिलोति‡

16 तद्दिदे यहदल (ईना बाना पोरोल याकोब) आनि इस्कारियोत नाटेना यहदल (ई यहदले आकिरते येसुन पगातोरा कय्दे पीसि हीतोर).

बिमार मत्तोर्कुन येसु बेस कीतोर
(मरकुस 3:7-12)

17 पजा येसु ओना सिस्युल्कनतोन गुट्टा पोरोटाल हिळ्ळ रेय्सि, सपाट जेगाते वासि निततोर. अगा ओना वेल्लेन मंदि सिस्युल्क मत्तुर. अचोने आयाका पूरा यहुदिया एरिया, येस्सलेम सहर, समुद्रम ओड्डु पीसि मत्ता सूर, सिदोन इनना सहरकुनाल वेल्लेटुर लोकुल्क ओनगा जमा आसि मत्तुर.

18 ओर अंतोर येसु वेहता पोल्लें केंजालय, बिमारकुनाल बेस आयालय वासि मत्तुर. बोर्कु अय्ते देय्याल्क पीसि मत्तंगो ओरगुडा वासि बेस आतुर.

19 ओनागटाल पेनदा ताकत वासि ओर अंतोर्कुन बेस कियुंदु. अदुनहाटी आ मंदि अंता ओन इट्टालय हळसेक मत्तुर.

पेन बोर्कुन बेस हळता?
(मत्तयाल 5:1-12)

20 पजा येसु ओना सिस्युल्कन हळसि इल्हा इत्तोर,

“मिमेट बोर अय्ते गरिब मंतिरो, पेन मीकु आसिर्वाद हीता,
पेनदा राज्येम मी असंतोरदे आंदु.

21 मिमेट बोर अय्ते इंदके कर्चुने मंतिट,

पेन मीकु आसिर्वाद हीता, मीवा करवु सल्लारंता.

बोर अय्ते इंदके अळसेके मंतिट, पेन मीकु आसिर्वाद हीता,

* 6:7 मनकन बेस कियमळ इद ईका उंदि कबळतेसी मंता इंचि परिसिलक इनुंदुर. अदुनहाटी नोमकेम रोजुने ओर बतले कियकोदुर. गानि पेनदा साम्भमते असोटा नियम रासि हिल्ले. † 6:13 प्रेरित इद पोरोल्क, पेन लोहचीतोर इंचि अर्तम. येसु पन्नेड मंदिंतुन पेरकुत्तोर ओरे प्रेरितुल्क आंदुर. * 6:14 योहान 1:42

‡ 6:15 जिलोति रोम सरकारता बिरोद कियना पारिंतोर.

वायना रोजकुने मिमेट कव्सेक मनंतिर.

22 मनकना रूपमते पुटता पेनदा मरिना सिस्युल्क आताहाटी,
बस्के अय्ते लोकुल्क मीकुन ह्यसाकोटा आंतुर, गेदमिसीतुर,
अपमानम कीतुर, मिमेट हेळसोत्तिर इंचि, मीवा पोरोल एताकोटा आंतुर,
अस्के मीकु पेन आसिवांद हीता.

23 ओरा एनकटा पेद्दाल्कगुडा मीकन्ना मुन्नेटा पेनदा कबुरतोर्कुन,
इल्हेने तकलिप कीतुर. अदुनहाटी ह्ळाट! मीक तकलिप वातरस्के,
मिमेट कुसिते एगारट, स्वर्गमते मीकु पेद्दा इनाम मंता.”
इंचि इत्तोर.

24 मर्गो येसु इल्हा इत्तोर,

“ए दनवंतुल्कुनिटा! मीकुन पेन बेस ह्ळो,
बारित्ते, मीकु सिराप इग्गटा सुकम-सांते दोर्कता.

25 इंदके पीरनिडा तिनना लोकुरिटा! मीकुन पेन बेस ह्ळो, मुन्ने मिमेट कवुने मंदकिर.

इंदके कव्वानोरिटा! मीकुन पेन बेस ह्ळो, वायना रोजकुने मिमेट दुक्कमते अळकिर.

26 इंदके अंटोराहेंदाल कदर दोर्किचुकुत्तोरिटा! मीकुन पेन बेस ह्ळो,
बारित्ते बोर अय्ते मीक कदर हीतुर, ओरा एनकटा पेद्दाल्कगुडा,
मुन्नेटा पेनदा आबद्दम कबुरतोर्क कदर हियुंदुर.

आ आबद्दम कबुरतोर्क दोर्कताप, मीकुगुडा सिक्सा दोर्कार.”

पगातोर्कुन पावरम कियना

(मत्तयाल 5:38-48; 7:12)

27 इंदके नावा पोल्लें केजानोरिटा! नना मीक वेहानद बतल इत्ते, मीवा पगातोर्कुन पावरम कीम्ट. मीकुन ह्यसवोर्कुन बेस ह्ळाट.

28 बोर अय्ते मीकु सापनेम हीतोर ओन्क आसिवांद हीम्ट. बोर अय्ते मीकुन सिडांचंतोर, ओनाहाटी पारतना कीम्ट.

29 बोरन्ना नीवा सेंपापोर्रो तंते ओनाहेके इंकुंदि सेंपागुडा तिरहा. बोरन्ना नीवा कोट तेंडकुत्ते, ओन नीवा अंगिगुडा ओया हीम.

30 बोरन्ना नीकुन बतलन्ना तल्कते, अद ओन्क हीम. बोरन्ना मिहागटाल बतलन्ना तेंडकुत्ते, अदुन वापस तल्कमट.

31 लोकुल्क मीवातोनि बल्हा मनना इंचि मिमेट इनकुंतिरो, अल्हेन मिमेट ओरतोनि मंटु.

32 मीकुन पावरम कियानोर्कुने मिमेट पावरम कीते, मीकु पेनदाहेंदाल बता पायदा दोर्कता? पापिर्कुगुडा ओर्कुन पावरम कियानोर्कुन पावरम कीतुर.

33 मीकुन बेस ह्ळानोर्कुंके मिमेट बेसता कबाहक कीसि हीते, मीकु पेनदाहेंदाल बतल पायदा दोर्कता? पापि लोकुल्कगुडा अल्हे कीतुर.

34 बोर वापस हीतुरो ओर्के बाकिक्क हीते, मीकु पेनदाहेंदाल बतल पायदा दोर्कता? पापि लोकुल्कगुडा वापस दोर्कतां इत्ता आसेते बाकिक्क हीतुर.

35 अल्हा कियकोटा मिमेट मीवा पगातोर्कुन पावरम कीसि ओर्कुन बेस ह्ळाट. बाकि वापस दोहंतोर इंचि आसे इर्गकोटा बाकि हीम्ट. अस्के पेन मीकु पेद्दा इनाम हियार, मिमेट अन्निटकन्ना पेद्दा पेनदा मर्क-मियाहक आकिट. बारित्ते, बोर अय्ते पेनदुन मति किय्युर आनि कराब मंतुर असोटा लोकुल्कुनपोर्रो इंका पेन दया कीता.

36 मीवा पेनबाबाल दया कियानोर आंतुर, अदुनहाटी मिमेटगुडा दया कियानोर आम्ट.

इंकावरोन पोर्रो तप्पु दोसमट

(मत्तयाल 7:1-5)

37 “मिमेट वेरेंतोपोर्रो दोसेम दोसमट, अस्के मीपोर्रोगुडा पेन दोसेम दोस्सो. मिमेट वेरेंतोर्कुन, ‘दोसिल्क,’ इंचि इनमट, अस्के पेन मीकुनगुडा ‘दोसिल्क,’ इंचि इन्ने. मिमेट वेरेंतोर्कुन मापि कीम्ट, अस्के मीकुनगुडा पेन मापि किय्यार.

38 अस्वरम मततोर्कुं बीसकेतनम कियकोटा हीम्ट, अस्के पेन मीकुगुडा हिय्यार. तव्वाते बेस निहचि, अदमिसि, कुदलिचि, पोंगानाल मीवा ओटिते वाटताप, पेन मीकु हिय्यार. बारित्ते, बद कोल्लताते मिमेट हीतिरो, अदे कोल्लताते मीकु हियमळ जर्गीता.✽”

39 मर्रा येसु ओर्क उंदि वेसुडि वेहेतोर: “वरोर गुड्डिड मनकल, इंकावरोर गुड्डिड मनकंक हर्रि ह्पसा परांतोरा? अल्हा कीते, ओर इब्बुरगुडा पोक्कातेन अरंतुर. ✱

40 सिस्स्युड ओना गुस्कन्ना पेद्दा आया परोर, गानि गुम्नां पूरा करियसि ओर गुम्नलेसी आंतोर.

41 “नीवा कळ्दे अरता सिल्कुन तेंडका, नीवा दंटातोना कळ्दे अरता बुस्सितुन निमे बारि तेंडा हळंतिन?

42 नीवा कळ्देन सिल्कु अरिं मननेके, नीवा कळ्दे अरता बुस्सितुन तेंडाहीम इंचि नीवा दंटातोना बल्हा इना परातिन? ए डोंगि मनका! मोदाला नीवा कळ्दा सिल्कुन तेंडा. अस्के नीवा दंटातोना कळ्दा बुस्सितुन तेंडालय नीकु बेस दिससार.”

रोडु तीरकुना पडिं

(मत्तयाल 7:16-20; 12:34-35)

43-44 “पंडितुन हळसे, मिमेट मरातुन एरपाट कीकिर. बेसता मराकु कराब पडिं हादों, कराब मराकु बेसता पडिं हादों. हाहकुना जप्पिताल अंगुर पडिं हादों हिलाकोटे इरामुस्टी मराकुनाल मरका पडिं हादों.

45 बारित्ते, मनसुने मनना पोल्लेगे तोळ्दाल पलाते पेयसंतां. अदुनहाटीं बेसता मनकल ओना मनसुने मनना बेसता पोल्लेगे पेच्हांतोर, अल्हैने कराब मनकल ओना मनसुने मनना कराब पोल्लेगे पेच्हांतोर.”

रोडु तीरकुना लोकलुक

(मत्तयाल 7:21-29)

46 “नना वेहता पोल्लेन केंजिर अयते नाकुन सामि सामि इंचि बारि इंतोर?

47 बोरे आयिर नहगा वासि, नावा पोल्ले केंजिसि, दाना परकारम ताकाना हरेक मनकल, ओर बसंतोर आंदुर वेहंतन केंजाट.

48 ओर बसंतोर इत्ते, लोन दोहनेके पायवा लोत तळ्विसि, बंडातोनि पुनादि दोहचि लोन दोहतेर. बस्के अयते कम्मूड वाता, एता तडां वासि लोतुक दल्यातां. अयनागानि अद लोन कूला हिल्ले. बारित्ते, अद लोन गट्टेगा दोहचि मत्ता.

49 गानि नावा पोल्ले केंजिसि दाना परकारम ताकवा मनकल बसंतोर इत्ते, लोन दोहनेके पुनादि दोहाकेन बुमिपोर्री लोन दोहतेर. बस्के अयते एता तडां वासि लोतुक दल्यातां. अस्के अद लोन पूरा कूत्सि पाड आता,” इंचि येसु ओर्कुन इत्तोर.

7

येसु वरोर अदिकारिना सेवाकुन बेस कीतेर

(मत्तयाल 8:5-13)

1 लोकलुकुक वेहना मत्ता अन्नि पोल्ले वेहतारित्ते येसु कपर्नाहूम होत्तोर.

2 अगा वरोर रोम सरकारता दरोगाल मत्तोर. ओना वरोर दासुड बिमारते हायनाल आसि मत्तोर. ओन दरोगाल बागा पावरम कियुंदुर.

3 आ दरोगाल येसुना बारेमते बस्के अयते केंजितोरो, अस्के इच्चुर यहुदि पेद् दाल्कुनतोनि, “मिमेट येसुनगा होंचि, ‘दरोगाना दासुड बागा बिमारते मंतोर, ओन बेस कियालय नीकुन वा इंचि वेहालय माकुन लोहतेर,’ इंचि वेहाट,” इत्तोर.

4-5 ओर येसुनगा वासि, “आ दरोगाल बेसतेर आंदुर, ओर मावा यहुदि लोकलुकुन पावरम कीतेर. ओर मावाहाटीं दर्मसास्त्रम कराहना लोन्गुडा दोहचीतेर, अदुनहाटीं निमे ओन्क सहायम कीम,” इंचि येसुन बतिमलाडसेके विनंति कीतेर.

6 अस्के येसु ओरतोनि पेयसतेर. ओर दरोगाना लोतुक दग्गेरा एवतस्के, ओर ओना दंटातोर्कुन येसुनहेके इल्हा वेहालय लोहतेर. “सामि, निमे तकलिप अरमा. निमे नावा लोन वायानचचो पेद् दातनम नहगा हिल्ले.*

7 अचोने आयका नना नीकु कलियाना लायकगुडा हिल्लेन. अदुनहाटीं निमे सिराप उंदि पोल्ले इन, नावा जीतागाड बेस आंतोर.

8 बारित्ते, ननागुडा वरोर अदिकारिना कयदा हिळु कबळ कीतन. नावा कयदा हिळुगुडा सिपाइल्क मंतुर. नना बोनना वरोन ‘होन’ इत्ते ओर दांतोर, इंकावरोन ‘वा’ इत्ते ओर वांतोर. इंका नावा दासुन, ‘इद कीम’ इत्ते ओर कीतेर.”

9 इद केंजिसि येसुंक वेल्ले इंचंन्रम आता. अस्के पज्जोळ्क तिरियसि, ओना पज्जो वासेक मत्ता मंदितुन इल्हा इत्तोर, “नना वेहानद केंजट, इम्पाएल लोकलुकुन लोप्पोगुडा इच्चोन विस्वासम मत्ता मनकल नाकु बगोन दोर्का हिल्लोर.”

10 येसु सामिनहेके लोहचीता दंटातेर मल्सि दरोगाना लोन वातस्के ओना दासुड बेस आसि दिसतेर.

येसु वरोर हाता मनकन जीवा अरहंतोर

11 पजा येसु नाईन इनना नाटेनहेके पेयसतेर. ओनतोनि ओना सिस्स्युल्क इंका वेलेटुर लोकलुक मत्तुर.

12 येसु नाटेने होळियाना गेटुना दग्गेक एवतेर, अचचोटेन वरोन हातोन बोंदा दोसालय ओसेके मत्तुर. हातोना यावल मुंडामोसि मत्ता. दानकु ईर वरोंरे मर्रि मत्तोर. नाटेनोर वेल्लेटुर लोकलुक दानतोनि पेयसतुर.

✱ 6:39 मत्तयाल 15:14 * 7:6 यहदिल्क वें जातितोरा लोहकुने होनाकोंदुर.

13 येसु सामिक दान हळसि दया वाता, अस्के “निमे अळमा बाई,” इंचि,

14 दगोरा होंचि पाडेतुन इतोर. अस्के पाडेतुन कांजानोर अग्गेन आगतुर. अस्के येसु, “पेडा तेदा!” इंचि हातोन इत्तोर.

†

15 इत्तस्के, आ हासोत्ता पेडल तेदिस उद्दिदिसि वळकालय दलगतोर. पजा येसु ओन ओना यावंक अप्पजेपतोर.

16 अगा मत्तोर अंतोर्क वें दलगता, ओर वेरियसि, “पेन दाना लोकुकुकुं सहायम कियालय वाता, मना नड्डुम दाना पेद्दा कबुरतोन लोहचीता,” इल्हा इंचेके पेनदुन तलसकुनालय दलगतुर.

17 येसुना इद पोल्ले यहूदिया एरिया आनि पक्का पीसि मत्ता अन्नि नाहकुने तेळियसि होत्ता.

योहान ओना सिस्युलुकुन येसुनहेके लोहंतोर

(मत्तयाल 11:2-6)

18-19 जर्गतव इव अन्नि पोल्लेना बारेमते, बापतिस्मा हियना योहान जेलने मननेके ओना सिस्युल्क होंचि ओन्क वेहतुर. अस्के ओर, ओना सिस्युलुकुनाल इवुकुंन केय्शि, “बोर अय्ते पिसागोटनोर वायानद मत्ता, ओन निमेन ना? हिलाकॉटे मोमोट इंकावरोना एदुर हळमळा?” इंचि पूसकियालय ओकुंन सामिनगा लोहतोर.

20 अस्के ओर सामिनगा वासि, “गुर, ‘बोर अय्ते पिसागोटनोर वायानद मत्ता, ओन निमेन ना? हिलाकॉटे मोमोट इंकावरोना एदुर हळमळा?’ इंचि नीकुन पूसकियालय, बापतिस्मा हियना योहान माकुन लोहतोर,” इंचि इत्तुर.

21 अस्केने येसु, बिमार मत्तोर्कुन, नोप्पिनोर्कुन, देय्याल्क पीसि मत्तोर्कुन इल्हा वेल्लेटोर्कुन बेस कीतोर, वेल्लेटुर गुड्डोर्कुना कळकु दिस्सानाल कीतोर.

22 पजा ओर्कु इल्हा जवाब हीतोर. “इंदके मिमेट बतल अय्ते हळतिर, केंजतिर अद होंचि योहानुंक वेहत. गुड्डोर्क हळसंतुर, कुंटोर्क ताकसंतुर, कुस्टरोगम आतोर बेस आसंतुर, सेव्ठोर्क केंजसंतुर, हातोर्कुंन जीवां अरसतां आनि गरिबोर्कुंन बारे बेसता कबुर एवसंता.

23 बोर अय्ते नावा बारेमते अन्समन्स किच्योर, ओन्के आसिर्वाद दोर्केता,” इंचि इत्तोर.

येसु योहानुना बारेमते वेहंतोर

(मत्तयाल 11:7-19)

24 योहानुना सिस्युल्क अगटाल पेय्शि होत्तस्के, योहानुना बारेमते लोकुकुकुंन येसु इल्हा वेहालय दलगतोर, “मिमेट बय्लि जेगाते बतल हळालय होत्तिर? वळिक उंगना जाडितुना?

25 हिलाकॉटे मिमेट बतल हळालय होंचि मत्तिर? मेत्तटा कपडि केर्ता मनकन हळालय होत्तिर? हळ्ळाट! मेत्तटा कपडि केर्तानोर आनि सिरमंतुल्क राजवाडाने मनांतुर, बय्लि जेगाते आयो!

26 अय्ते मरि मिमेट बतल हळालय होत्तिर? पेनदा कबुरतोन हळालय होत्तिर? हो! नना मीकु वेहासेक मंतन, मिमेट बोन अय्ते हळतिर ओर पेनदा कबुरतोनकन्ना बचचोर पेद्दा मंतोर.

27 ओना बारेमते पेन मुन्नेने इल्हा वेहचि मत्ता.

“हळ्ळा! नना नीकन्ना मुन्नेने नावा कबुरतोन लोहंतन,

निमे वायानाहाटी ओर हरिं तयार कीतोर.”*

इंचि दर्मसास्त्रमते रासि मंता.

28 “नना मीकु वेहानद बतल इत्ते, पुट्तोरारव्ठेटाल योहानुंकन्ना पेद्दा बारे हिल्लोर. अय्नागानि पेनदा राज्येमते सिन्ना मनकलगुडा योहानुंकन्ना पेद्दा दोडे,” इंचि वेहतोर.

29 अस्के वेल्लेटुर लोकुकुल आनि कर वसुल कियानोरगुडा येसु वेहता पोल्लेन केंजतुर. केंजसि, पेनदा हरिं नीतिता हरिं, इंचि इत्तुर. ओर्क अंतोर्क योहान मोदालेन पेनदा पोरोलते बापतिस्मा हीसि मत्तोर.

30 गानि परिसिल्क आनि मूसाना नियम बेस तेळियतोर बारे योहानुनाहेंदाल पेनदा पोरोलते बापतिस्मा एतुवा, पेन ओर्क हुपिस्ता हर्दे ताका हिल्लुर.

31-32 मर्रा येसु इल्हा वळकालय दलगतोर, “ई पीळिता लोकुकुल बोरासेसी मंतुर इंचि, ओर्कुंन बोरा लोपो कल्पकन? मिमेट अय्ते चौकुने उद्दिदिसि, वरोंक-वरोर केय्शि,

“मोमोट मीहाटी दुक्कमता पाटां पारतोम, अयना मिमेट अळा हिल्लिर.

मोमोट मीहाटी त्रीला उहकुतोम, गानि मिमेट एगरा हिल्लिर,

इंचि इनना पिलाल्कुनालेसी मंतिर.”

33 “अल्हेने बापतिस्मा हियना योहान एककोते एकको ओक्कापोद्दु मनुंदुर. अंगुर पंडिना पानकमगुडा उनाकोंदुर, अयना मिमेट ओन, देय्यम पीता इंचि इत्तिर.

34 गानि मनकना रूपमते पुटतो नना तिचेके-उंचेके वातन. गानि मिमेट मात्रम, ‘हूळट, ओर बचचोर तितोर, बचचोर उंटोर? कर वसुल कियानोर आनि पापि लोकुल्ल ओना दंटातोर आंदुर,’ इंचि नाकुन इंतितर.

35 गानि पेनदा बुद्धिदे नीतितद आंद इंचि, दाना बुद्धिदेते ताकानोर कियाना कबाहकुन पोर्णोटाल तेळियंता.”

पापि मुरतळ येसुना कालकुंक अत्तर निय होकता

36 उंदि मल्ला सिमोन इनना वरोर पारिसि मनकल ओना लोन गाटो तिनालय येसुन केयतोर. अस्के येसु ओना लोन होंचि गाटो तिनालय उदतोर.

37 हूळट! आ नाटने उंदि पापि मुरतळ मत्ता. येसु वरोर पारिसिन लोन गाटो तिचंतोर इंचि दान्क तेळियतस्के अद उंदि बंडाता गुर्गिते बेस गमागमा गब्बु वायना अत्तर निय पीसि वाता.

38 वासि येसुना पज्जो नित्तिसि अळसेके दाना कळ्ळुकुनाल पोगाना एरतोनि येसुना कालकुन नहालय दलगता. पजा दाना केल्लुकुनतोनि उसुमसेके, ओना कालकुन बुसके अत्तर निय होकुंदु. 39 अल्हा कियानद हळसि, बोर अयते येसुन केयतोरो आ पारिसि इल्हा इन्कुतोर गदा, “इद अयते पापि मुरतळ आंदु! ईर निजमे पेनदा कबुरतोर आसि मत्ते, ओन इट्टानद बसोटा मुरतळ आंद इंचि ओन्क तेळियसि मनवळ. पापि मुरतळ इटते मुट्टळ इंचि दान इट्टा हियाकोन्नेर,” इंचि ओर इनकुतोर.

40 अस्के येसु ओना मनसुन एरपाट कीसि, “सिमोन, नीकुन उंदि पोलेले पूसकियना मंता,” इंचि इत्तस्के ओर, “वेहा गुर्ज्जी,” इंचि इत्तोर.

41 अस्के येसु उंदि वेसुड वेहतोर, “इव्वुर मनकालोर वरोर सावकारनगटाल बाकि तेंडतुर, वरोर बारे हेय्यं नुह्कु, इंकावरोर बारे एव्वे एंडि बंदिं.

42 गानि ओर बाकि दोहा पराहिल्लुर. अदुनहाटी सावकार ओरा इव्वुरा बाकिंतुन मापि कीतोर. अयते इंदके ओरा इव्वुरा लोप्पोटाल सावकारन बोर एकको पावरम कीतोर, वेहा?” इंचि पूसकीतोर.

43 अस्के, “बोर अयते एकको बाकि मत्तोर, ओरे एकको पावरम कियानुर बारे,” इंचि सिमोन इत्तोर. इत्तस्के, “निमे बरोबर वेहतिन,” इंचि येसु ओन इत्तोर.

44 येसु मुरतटहेके तिरियसि सिमोन इल्हा इत्तोर, “निमे ई मुराटान हूळा. नना नीवा लोन वातन, निमे नावा काल्क नोराल्य एरगुडा हिट्ट्या हिल्लिन. गानि इद बारे दाना कांडेहकुनतोनि नावा काल्कन नाहचि, केल्लुकुने उसुमता. 5

45 निमे नाकुन बुर्सि जोहार किया हिल्लिन, गानि नना लोप्पो होळियतस्केटाल इद नावा काल्कन बुसके मंता.

46 निमे नावा तल्लक निय होकसि नाकु कदर हिया हिल्लिन, गानि इद नावा काल्कुंक वेल्लेन दराता अत्तर निय होकता.

47 अदुनहाटी नना नीकु वेहानद बतल इत्ते, दाना अन्नि पापाल्क मापि आतां इंचि अद वेल्लेन पावरम कीता, गानि बोनद इचुने पापम मापि आता, ओर इचुने पावरम कीतोर.”

48 पजा येसु, “नीवा पापाल्क मापि आतां,” इंचि आ मुरतटन इत्तोर.

49 अस्के, “ईर बोर आंदुर, ओनद ओर पेन इन्कुचि, पापाल्कन मापि कीतोर?” इल्हा ओनतोनि गाटो तिचेक उदिस मत्तुर अंतोर ओरद-ओरे वळ्ळुकुनालय दलगुत्तुर.

50 पजा, “निमे नावापोर्णे विस्वासम कीताहाटी पेन नीकु मुक्ति हीता, निमे सांतिते होन,” इंचि येसु आ मुरतटन इत्तोर.

8

इचुं मुर्ताहक येसुना पज्जो दांतां

1 पजा इल्हा जर्गुता गदा, येसु अन्नि सहरकुने, नाहकुने पेनदा राज्यमता बारेमता बेसता कबुर वेहासेके तिरियालय दलगतोर. ओनतोनि पन्नेड मंदि प्रेरितुल्ल मत्तुर.

2 अगा देय्याल्लुकुनाल, बिमारकुनाल बेस आतव इचुं मुर्ताहकगुडा ओरतोनि मत्तां. अव मुर्ताहकुनाल उंदि मगदलेनि नाटेनद मारियम पोरोलता मुरतळ मत्ता. येसु दानगटाल एडुं देय्याल्लुकुन पेचाहचि मत्तोर.

3 इंकुंदि मुरतळ योहानि इनानद, हेरोद राजाना दिवांजि कोजा इननोना मुत्तो मत्ता. अल्हेने सुसानल आनि वेल्लेन मुर्ताहकगुडा मत्तां. इवन्नि मुर्ताहक येसु आनि ओना सिस्युल्लुकुना सेवाताहाटी अबुना संतम कोत्तन कर्स कियुंदुं.

‡ 7:38 यहदिल्लक गाटो तिनालय उदतस्के ओर मडगदुदे वादिस उदुदुर. टेबलहेके वंगिसि, काल्कन गोडचुको पज्जोळ्ळक मल्हाचि उदुदुदुर. अदुनहाटी आ मुरतळ पज्जोळाल वासि येसुना काल्कन बुसके निय वळिय्यापार्ता. 7:44 यहदि रिवाजते, लोन बोर्नना वाते ओकुं काल्क नोराल्य एर हीसि बुल्गी बुरित्तुर.

विज्जां तासाना वेसुडि
(मत्तयाल 13:2-15; मरकुस 4:1-12)

4 अल्हेने उंदि रोजु बे-बेरे नाहकुनाल वेल्लेटुर लोकुल्क येसुनगा वासि जमा आसेक मत्तुर, अस्के येसु ओर्क उंदि वेसुड वेहतोर. अद इल्हा मत्ता.

5 “बरोर कास्तकारि मनकल विज्जां वीतालय पेय्तोर, विज्जां वीतनेके इच्चुं विज्जां हरदगा अरतां. अव विज्जन हर्षि पीसि होनानुर-वायानुर जारतुर, पजा अबुन पिट्टे वासि पेर्सि तित्तां.

6 इच्चुं विज्जां बंडाना जेगाते अर्सि अव मोलियतां. गानि अगा पदन दोर्कवाहाटी वत्सि हासोत्तां.

7 इच्चुं विज्जां हाहकुना पोदाने अरतां. अवुनतौनि हाहकुना पोदांगुडा बेर्सि अव विज्जन बेसां हिया हिल्लें.

8 इच्चुं विज्जां बेसता जेगाते अरतां. अव बेस मोलियसि नूर अंताल्कुना पंटा पेय्यता,” इंचि वेहचि, “बोर्कु केंजालय केव्क मंतां ओर केंजट,” इंचि जोरते इत्तोर.

9 “इं वेसुडिता अर्तम बतल गुफ?” इंचि ओना सिस्युल्कु पूसकीतुर.

10 अस्के येसु ओर्कुन इल्हा इत्तोर, “मीक अयते पेनदा राज्येमता बारेमता मर्ममतुन एपाट कीकुनालय बुद्धि मंता. गानि वेरेतोर्कुंक बारे वेसुडिने वेहांतुर. इल्हा कती

“ओर नावा कबाहकुन हळ्यांतुर, गानि अव कबाहकुन अर्तम कीकुन्नुर.

ओर केंजांतुर गानि तेळियागोटकुन्नुर.”*

विज्जां वीताना वेसुडिता अर्तम
(मत्तयाल 13:18-23; मरकुस 4:13-20)

11 “इद वेसुडिता अर्तम इल्हा मंता, विज्जां इत्ते पेनदा पोल्ले आंदु.

12 बोर अयते पेनदा पोल्लेतुन केंजतुर गानि, ओर विस्वासम कीसि ओर्कुं मुक्ति दोर्कामानि इंचि देय्यम वासि ओर केंजतवुन ओरा मनसुनाल तेंडसि पोहंता. असंतोर इत्ते, विज्जां अरता हर्दा जेगातसंतोर आंदुर.

13 विज्जां अरता बंडाना गेर्सि जेगातसंतोर बोर इत्ते, बोर अयते पेनदा पोल्लेतुन कुसिते केंजसि दान ओप्कुंतुर. गानि ओरा मनसुने पेनदा पोल्ले गट्टि पळ्वाहाटी, ओर कोन्नि रोजके विस्वासमते मनांतुर. पजा पट्टु हळना वेला वातस्के विस्वासमताल ओर लक्कु आंतुर.

14 विज्जां अरता हाहकुना पोदाना जेगातसंतोर बोर इत्ते, बोर अयते पेनदा पोल्ले केंजांतुर गानि विस्वासमते मननेके सम्सारमता रंदि, दनमता आस्ति, दुनियाता सुकाल्क इव अन्नि ओर्कुन पेनदा पोल्लेन लोप्पो बेसां हिय्यो. अदुनहाटी पेनदा पोल्लेनहेंदाल ओर्क बतल पायदा वायो.

15 गानि विज्जां अरता बेसता जेगातसंतोर बोर इत्ते, बोर अयते पेनदा पोल्लेन सत्तेम, बेस मनसुने केंजसि, अव पोल्लेन मनसुने ईरंतुर. पजा ओर्क बचचोन तकलिप वायना गानि ओपकेते बेसता कबाहक कीतुर, असंतोर इत्ते विज्जां अरता बेसता जेगातसंतोर आंदुर,” इंचि इत्तोर.

पेनदा पोल्ले वेलगु हीता
(मरकुस 4:21-25)

16 “बोरे आयिर वेडसि निरिचि गंजुना हिळ्ळ मुच्चोर, कट्टल हिळ्ळगुडा इरॉर. गानि लोप्पो होळियानोर्क बेस वेलगु दिसगोम इंचि दान उंदि दीसोडिपोरॉ इरंतोर.

17 अल्हेने मर्क्किस मत्तव अन्नि दिस्सि अर्कांटा मन्नो, आनि मर्ममते मत्तव बवे पलाते अर्कांटा मन्नो.

18 अदुनहाटी बेस मनसु तासि केंजट. बारित्ते, बोनगा अयते पेनदा पोल्लेन तेल्लिचकुनना बुद्धि मंता, पेन ओन्क इंका हीता. गानि बोनगा अयते पेनदा पोल्लेन तेल्लिचकुनना बुद्धि हिलाकोन्ना, मंता इनकुंतोर, अदुनगुडा पेन एतकुन्नार,” इंचि येसु ओर्कुं वेहतोर.

येसुना सिस्युल्के ओना निजम जीवातोर
(मत्तयाल 12:46-50; मरकुस 3:31-35)

19 अस्के येसुना यावल, ओना तम्मूहक ओनगा कलियालय वातुर. गानि गर्दि मत्ताहाटी ओर ओनकु कलिया पराहिल्लुर.

20 अदुनहाटी, “नीवा यावल, नीवा तम्मूहक नीकु कलियालय पलाते नित्तिसि मंतुर,” इंचि बोरो येसुंक वेहतोर.

21 अस्के, “बोर अयते पेनदा पोल्ले केंजसि अल्हेने ताकंतुरो, ओर्कुने नावा यावल, नावा तम्मुर इंतन,” इंचि येसु ओर्कुं इत्तोर.

येसु वळि-दुमारमतुन आपंतोर

(मत्तयाल 8:23-27; मरकुस 4:35-41)

22 उंदि रोज येसु ओना सिस्युल्कुनतोनि डोंगाते उद्दिस, “मनम समुद्रमता हब्बेटा बाजुंक दाकोम दट,” इंचि इत्तस्के ओर होनालय पेयसतुर.

23 ओर डोंगाते उद्दिस होननेके येसु निद्रा होलतोर. अस्के समुद्रमते पेद्रु वळि-दुमारम वाता. अदुनहेंदाल डोंगाते एर निडालय दल्लिसि, ओर वेल्ले दोकाते मत्तुर.

24 अस्के सिस्युल्क येसुनगा होंचि, “गुरु, गुरु मनम नासडेम आसि होंचंतोम,” इंचि इत्तुर. अस्के ओर तेदसि वळि-दुमारमतुन, एता तडान गदरिचतोर अय्ते वळि-दुमारम आगता, तडांगुडा दिसाकोटा आतां.

25 अस्के, “मिमेट नावापोरों विस्वासम बारि इरां हिल्लिर?” इंचि येसु ओर्कुन इत्तोर. गानि ओर इरगा वेरियसि, इचंत्रमते, “इर आदेस हीते इना पोल्ले वळि, एता तडांगुडा केंजतां, इर बोर आंदुर?” इंचि ओर ओर वळ्कुकत्तुर.

देय्यम पीता मनकन येसु बेस कीतोर

(मत्तयाल 8:28-34; मरकुस 5:1-20)

26 पजा ओर गिरासेन इनना वेंरे देसेमते एत्तुर, अद जेगा गालिल समुद्रमता हब्बेटा बाजुंक मत्ता.

27 येसु डोंगाताल बल्हा रेयतोर अल्हेने अद सहरतोर वरोर देय्याल्क पीसि मत्ता मनकल अगा वातोर. ओर वेल्लेने रोजकुनाल कपडिं केरीकोदुर, लोन मनाकोदुर, ओर तापळानेन मनुंदुर.

28-29 देय्यम ओन ऊके-ऊके पिय्युंदु, लोकुल्क ओन गोल्सुकुने दोहचि कावेल मनुंदुर. गानि ओर गोल्सुकुन नेम्हुंदुर, अस्के देय्यम ओन बोर हिल्वगा ओय्युंदु, येसु अद देय्यमतुन ओनागटाल पेय्शि होनालय आदेस हीतोर. अदुनहाटीं ओर येसुन हळसि, “ए अन्निकन्ना पेद्रु पेंनदा मरिं येसु, नातोनि नीकु बता कबळ? नाकु तकलिप हियमा इंचि नीकु विनंति कीतन,” इल्हा जोरसे वरगेयसि ओना मुन्ने अरतोर.

30 “नीवा पोरोल बतल?” इंचि येसु पूसकीतोर. ओनकु वेल्लेने देय्याल्क पीसि मत्ताहाटीं, “मोमोट वेल्लेन मंदा आसि मंतोम, इंचि नावा पोरोल मंदा आंद,” इंचि अव येसुन इत्ता.

31 पजा देय्याल्क येसुनतोनि, “माकुन नरकमता लोतु जेगाते होनना आदेस हियमा,” इंचि बचचोरो विनंति कीतां.

32 अगा गुर्टापोरों पद्दिना उंदि मंदा मेय्सेके मत्ता. “माकुन आ पद्दिना मंदा लोपो होनाहीम,” इंचि देय्याल्क येसुन विनंति कीतां, अस्के येसु अबुन पद्दिना मंदा लोपो होना हीतोर.

33 अस्के आ देय्याल्क मनकना लोप्टोताल पेय्शि पद्दिना मंदाते होंचि होळियतां. अस्के आ पूरा मंदा ओड्डुन पोरोटाल हिळ्त्तुक वित्ति सेरवुने मुळ्गिसि हासोत्तां.

34 पजा आ पद्दिं मेहानोर इल्हा आतद हळसि वित्ति होंचि अद सहरते अल्हेने पक्का पीसि मत्ता नाहकुने इद पोल्लेतुन वेहातुर.

35 बतल आता इंचि हळालय अगाटा लोकुल्क येसुनगा वातुर. अगा वासि हळतुर अय्ते, देय्याल्कुनाल इळबळता मनकल ओर बेस आसि, कपडिं केरिं येसुना काल्कुनगा उद्दिसि मत्तोर. अल्हा मत्तद हळसि ओर्क वेंरे दल्लगता.

36 येसुना कबाहकुन हळतोर अगा बोर अय्ते मत्तुरो ओर, देय्याल्क पीसि मत्ता मनकल बल्हा बेस आतोर इंचि लोकुल्कुंक वेहतुर.

37 अस्के गिरासेन एरियाता अंतोर लोकुल्क बागा वेरियसि, “निमे महागटाल पेय्शि होन,” इंचि येसुन विनंति कीतुर. अदुनहाटीं येसु, ओना सिस्युल्क होनालय डोंगाते उदतुर.

38 उदता पजा, “नाकुन नीवातोनि वाया हीम गुरु,” इंचि देय्याल्कुनाल बेस आता मनकल येसुन विनंति कीतोर. गानि येसु ओन,

39 “निमे लोन होंचि नीवाहाटीं पेन बतल कीता अद वेहा,” इंचि मल्हाचि लोहतोर. अस्के ओर मल्सि होंचि, येसु ओनाहाटीं बतल-बतल कीतोर अव अन्नि, सहरते अंतोर्क वेहाचेके तिरियतोर.

हासोत्ता पेगिटुन, बिमार मुरतटुन येसु बेस कीतोर

(मत्तयाल 9:18-26; मरकुस 5:21-43)

40 पजा येसु गालिल एरियाते मल्सि वातस्के ओन एदुर हळसेक मत्तोर वेल्लेटुर लोकुल्क कुसिते ओन्क कलियतुर.

41-42 अचचोटेन दर्मसास्त्रम कराहना लोता अदिकारि याईर इननोर अगा वातोर. ओन्क पनेंड वसानंद उंदि मिय्यड मत्ता, अद हायनाल आसि मत्ता. अदुनहाटीं ओर येसुना काल्कुनपोरों अरिं, “नावा लोन वा,” इंचि विनंति कीतोर. अस्के येसु आ अदिकारिनतोनि होनालय पेयसतोर. अगा ओना सुट्टु वेल्ले गर्दि मत्ताहेंके लोकुल्क दोब्बे-नूके कीसि येसुन इटसेक मत्तुर.

43 आ गर्दिते उंदि मुरतळ मत्ता, दानकु पन्नेड वर्सानाल उंदेतीर कप्पिड होनुंद, अद वेल्लेटुर वैदकुलकुंक हूपिच्चि दाना पूरा कोत्तां महता* गानि दान बोरे बेस किया पराहिल्लुर.

44 अद मुरतळ येसुना पज्जो वासि, सिराप ओना कप्पिडता अंचुन इट्ता अयते अस्केटद अस्केने दाना कप्पिड आयमळ बंद आता.

45 अस्के, “नाकुन बोर इट्तरु?” इंचि येसु पूसकीतोर. अगा मत्तुर अंतोर, “नना आयोन, नना आयोन,” इंचि इननेके, “अंतोर नीवा सुट्टु आसि दोब्बे-नूके कीसंतुर गुरु, बोरन्ना दल्लिसि मनासुर,” इंचि पत्रु इत्तोर.

46 गानि, “ना लोप्पोटाल ताकत पेयसता इंचि अनपिस्ता. बेस आयानाहाटी बोरो नाकुन इटतोर,” इंचि येसु इत्तोर.

47 पजा अद मुरतळ, “नना इटतद एरपाट कीतोर,” इनकुंचि वेंरेक वनकुसेक वासि ओना काल्कुना पोरौ अरिं, अगा अंतोर लोकुकुकुन मुन्ने अद येसुन बारि इट्ता अद बल्ला बिराना बेस आता इंचि वेहता.

48 अस्के, “पेगिट्टुना! नीवा विस्वासमे नीकुन बेस कीता. सांतिते होन,” इंचि येसु दान इत्तोर.

49 येसु अल्हा वळकसेक मननेके दर्मसास्त्रम कराहना लोता आ अदिकारिना लोताल बोरो वरोर वासि, “नीवा मिय्यड हाता, गुम्न लोन ओयालय तकलिप कीसि इंका बाता पायदा हिल्ले,” इंचि अदिकारिन इत्तोर.

50 अस्के अदुन केंजसि, “निमे वेरियमा, विस्वासम इरा! अद बेस आंता,” इंचि येसु आ अदिकारिक जवाब हीतोर.

51 येसु ओना लोन वातोर, वासि पेगिळ मत्ता अरंति बोर्कुने होळिया हिया हिल्लोर, सिराप पन्नन, योहानुन, याकोबुन आनि पेगिटा तल्लुर-बाबोन पीसि लोप्पो होळियतोर.

52 अंतोर पेगिटाहाटी अळमळ-मोत्कुनमळ कीसेके मत्तुर. गानि येसु ओर्कुन, “अळमट! अद हाया हिल्ले, मीडसि मंता,” इंचि इत्तोर.

53 अद पेगिळ हाता इंचि ओर अंतोर्क एरपाट मत्ता. अदुनहाटी येसु इत्ता पोल्ले केंजसि ओर कत्तुर.

54 पजा येसु आ पेगिटा कय पीसि, “पेगिट्टुना, तेदा!” इंचि केयतोर.

55 अस्केन दाना जीवा मल्लिसि वासि, अद बिराना तेदिस उदता. अद पेगिड्क बतलन्ना तिनालय हीम्टु इंचि येसु वेहतोर.

56 अद हळसि, दाना तल्लुर-बाबो इंचंन्रम आतुर. गानि, “इगे आता पोल्लेतुन बोर्के वेहमट्टु,” इंचि येसु ओर्कुं गट्टिगा हुकुम हीतोर.

9

येसु ओना पन्नेड सिस्स्युलुकुन सेवाताहाटी लोहतोर
(मत्तयाल 10:5-15; मरकुस 6:7-13)

1 येसु ओना पन्नेड सिस्स्युलुकुन केय्सि ओर्कि अन्नि देय्यालुकुन पेचाहनद, बिमार मत्तोर्कुन बेस कियना ताकत, अदिकारम हीतोर.

2 पजा येसु ओर्कुन, पेनदा राज्येम बारेमते बेसता कबुर वेहालय, बिमार मत्तोर्कुन बेस कियालय लोहतोर.

3 ओर्कुन लोहनेके इल्हा इत्तोर, “मिमेट सेवा कियालय होननेके मीवातोनि दुडुडु, जोरा आयि, गाटो आयि, कोत्तां, एककोतव अंगि ओयमट.

4 उंदि नाटे होत्तस्के मिमेट बद लोन अयते दांतिटो, अद नार होळसनदाका अदे लोते मंट.

5 बद नाटेना लोकुकुकु मीकुन मना हिच्युरो, अद नाटेनाल पेयसनेके ओर कीता तप्पुन हुप्पालय उंदि गवाडि लेहका मननाहाटी, मिमेट मीवा काल्कुना दुम्मु दुल्पिसि पेयसट” इंचि वेहतोर.

6 अस्के ओर अगटाल पेय्सि, नार-नार बेसता कबुर वेहासेके, बिमार मत्तोर्कुन बेस कीसेके होत्तुर.

हेरोद राजाल येसुनाहाटी विचारमते अरंतोर
(मत्तयाल 14:1-12; मरकुस 6:14-29)

7-8 पजा गालिलि एरियाता राजाल हेरोद, बस्के अयते येसु कियना कबाहकुना बारेमते केंजतोर ओस्के बतल जर्गसंता ओन्क बतले तेळिया हिल्ले. बारिते इच्चुर लोकुकुकु, “योहान हातोरान्टेटाल मर्रा तेदतोर,” इंचि इनुंदुर. इंका इच्चुर लोकुकुकु, “पेनदा कबुरतोर एलियल मर्रा वातोर,” इंचि इनुंदुर आनि इच्चुर लोकुकुकु बारे, “एनकटा पेनदा कबुरतोर लोप्पोटाल बोरो वरोर जीवाते तेदतोर,” इंचि इनुंदुर.

9 गानि, “नना अयते योहानुना तल्ला कोय्यागोटतन, इंदके इसौटा पोल्ले केंजसेक मतन, अयते ईर बोर आंदुर?” इंचि हेरोद राजाल ओन हळना विचारम कीतोर.

* 8:43 इद वचनम कोनि पांडु लिपिनि हिल्ले.

येसु हेय्युं वेय्कुना मंदिक गाटो दोसमळ

(मत्तयाल 14:13-21; मरकुस 6:30-44; योहान 6:1-14)

10 पजा प्रेरितुलक मल्सि वातस्के ओर बतल-बतल कीतुर अव अन्नि येसुक वेहतुर. वेहतस्के, येसु ओर्कुन लोकुकुनाल अलग कीसि बोर्के तेळियाकॉटा बेतसेदा इनना सहर पीसि ओतोर.

11 गानि येसु बगा मंतोर इंचि लोकुकुकुंक तेळियतस्के ओर ओन दोकबिटसि ओना पज्जो होत्तुर. अय्ते येसु कुसिते ओरतोनि कलियसि ओर्कु पेनदा राज्येमात बोरमते वेहतोर. पजा ओरागटाल बोर्के बेस आयानद मत्ता ओर्कुन बेस कीतोर.

12 पोळ्द होनना वेलाक पन्नेंडु सिस्युलक येसुंगा वासि, “मनम सुनसान जेगाते मंतोम, अदुनहाटी लोकुकुकुन लोहचीम, ओर दगोटा नाह्कुने, नेल्लिने होंचि तिनालय गाटो, मीडालय जेगा दोर्किचुकुतुर,” इंचि इत्तुर.

13 अस्के, “मिमेटे बतलन्ना ओर्क तिनालय हीम्ट,” इंचि येसु ओर्कुन इत्तोर. “महगा सिराप हेय्युं हारि, रोंडु जिम्मां मंतां, अबुन तप्पा बतले हिल्ले. मोमोट होंचि ई अंतोर लोकुकुकुनाहाटी गाटो अस्सि तायना इंचि निमे इंचेकेना?” इंचि ओर इत्तुर.

14 अगा दगोर-दगोरा हेय्युं वेय्कुना मंदि मांडसा मत्तुर. गानि येसु सिस्युलकुनतोनि, “ओर्कुन एवै-एवै मंदि कीसि उपसट,” इंचि इत्तोर.

15 येसु वेहताप ओर अंतोर्कुन उपिस्तुर.

16 पजा येसु हेय्युं हारि, रोंडु जिम्मां पीसि, स्वर्गमताहेके हळसि पेनदुक दन्यवाद कीसि अबुन तुकडां कीतोर. कीसि, “इबुन लोकुकुकुंक हीम्ट,” इंचि सिस्युलकुंक वेहतोर.

17 लोकुकुकुंक हीतस्के, ओर पीरनिंदा तिल्लुर. मिगुल्ला तुकडां जमा कीते अव पन्नेंड तट्टां निंडतां.

येसुए किरिस्तु आंदुर

(मत्तयाल 16:13-19; मरकुस 8:27-29)

18 उंदि रोज येसु वरोरे पारतना कीसेक मननेके, ओना सिस्युलकुगुडा ओनतोनि मत्तुर. अय्ते, “नना बोन आंदुन इंचि लोकुकुकुं इत्तुर?” इंचि येसु ओर्कुन पूसकीतोर.

19 अस्के ओर इल्हा जवाब हीतुर. “इच्चुर बारे नीकुन बापतिस्मा हियना योहान इंतुर. गानि इच्चुर बारे निमे एलियाल आंदिन इंतुर. इकिच्चुर बारे एनकटा पेनदा कबुरतोर लोप्योटाल बोरो वरोर जीवा अरतोर इंतुर,” इत्तुर.

20 “गानि मिमेटे बतल इतिर?” इंचि येसु सिस्युलकुन मर्रा पूसकीतोर. अस्के, “निमे पेन लोहता पिसागोटनोन किरिस्तुन आंदिन,” इंचि पन्न इत्तोर.

21 गानि, “इद पोल्ले मिमेटे बोर्के वेहमट,” इंचि येसु ओर्क गट्टिगा हुकुम हीतोर.

येसु ओना हामुरता बारेमते वेहांतोर

(मत्तयाल 16:20-28; मरकुस 8:30-9:1)

22 पजा ओर्क इल्हा वेहालय दलगतोर. “यहृदि पेद्दालक, पेद्दा पेर्मालोर आनि दर्मसास्त्रम कराहना गुरूकुनाहेंदाल मनकना रूपमते पुटतोन नाकु तिप्पलक अर्रापीता. ओर हयसाकॉटा आसि नाकुन हक्कानुर. गानि म्डोव रोजुने नना मर्रा जीवाते तेदंतन,” इत्तोर.

23 पजा येसु अंतोर लोकुकुकुन इल्हा इत्तोर. “ओक्कला बोरन्ना मनकल नावा पज्जो वायना इत्ते, ओर ओना पूरा इस्टालक होळसिसि, दररोज सतता क्रूस तेहकुंचि नावा पज्जो वायिर.

24 बोर ओना जीवातुन पिसागोटालय हळंतोर, ओर ओना जीवातुन पोगोटकुंतोर, ओन्क बस्केळक पिस्सना पिस्वर दोर्कतां गानि नावाहाटी बोर अय्ते जीवा हीतोर, ओन्क बस्केळक पिस्सना पिस्वर दोर्कतां.

25 ओक्कला मनकल पूरा दुनियातुन संपलिच्चि, जीवा पोगोटकुत्ते हिलाकॉटे नासडेम आते, ओन्क बता पायदा आंता?

26 बोर अय्ते नाकुन, नावा पोल्लेन वेहालय सिग्गु अरंतोर, मनकना रूपमते पुटतोन नना बस्के अय्ते नावा महिमाते,* नावा बाबाना महिमाते, पवित्र पेनदा दूताना महिमाते वांतन, अस्के असोटा मनकन नावोर इनालय ननागुडा सिग्गु अरंतन.

27 गानि, नना मीकु निजम वेहांतन, इग्गे नित्तिसि मनानोरा लोप्योटाल इच्चुर इल्हा मंतुर गदा, ओर पेनदा राज्येमतुन हळ्वा, ओर्कु हामुर वायो.”

मूसाल आनि एलियाल येसुनतोनि दिसमळ

(मत्तयाल 17:1-8; मरकुस 9:2-8)

28 इव पोल्लें वेह्चि एनमिदि रोजकु आतां बारे! येसु पन्नन, योहानुन, याकोबुन पीसि येसु गुर्टापोर्रे पारतना कियालय होत्तोर.

* 9:26 महिमा इगे महिमाता अर्तम तेल्लगा जगा-जगा मेर्समळ. ई मेर्समळ ओना पेद्दातनमतुन हस्पंत.

29 ओर पारतना कियानेकेन ओना रूपम मारियता. ओना कपडिं तेल्लगा मेसालिय दलगतां.

30-31 ह्ळट! अचानक येसुनगा मूसाल आनि एलियाल महिमाते वासि, येसुना हामुर येस्सलेमते बल्हा पूरा आंता, इचि वळकसेक मत्तुर.

32 पत्रु आनि ओना दंटातुर निद्रा होंचि मत्तुर. पजा ओर निद्रताल तेदतस्के येसुना महिमाता वेल्लुन ह्ळतुर. अचोने आयाका ओनतोनि इव्वुर मनकालोर नित्तिसि मत्तदगुडा ह्ळतुर.

33 पजा मूसाल आनि एलियाल येसुनगटाल होननेके, “गुरु, मनम इगो मनमळ बेस मंता. अय्ते मनम मूड डेरां वाटकोम. उंदि नीहाटी, उंदि मूसानाहाटी उंदि एलियानाहाटी,” इचि पत्रु येसुन इत्तोर. (ओर ई पोल्ले वळकानेके विचारम किय्याकोटिन वळकतोर.)

34 ओर ई पोल्ले वळकसेके मननेकेन उंदि मव्वु तेपे वासि ओर्कुन मुच्का होल्ता, अस्के ओर मुव्वुर वेरियतुर.

35 ओर्कु मव्वुनाल, “ईर नावा मरिं आंदुर, ईन नना पेर्कुत्तन, ईनां केंजट,” इचि पेनदा अल्किर केंजावाता.

36 अद अल्किर मग्तस्के ओर्क अगा येसु वरोरे दिसतोर. पजा ओर चुपचाप मत्तुर. अगा ह्ळतद आ रोजकुने ओर बोर्के वेहा हिल्लतुर.

देय्यम पीतोन येसु बेस कीतोर

(मत्तयाल 17:14-18; मरकुस 9:14-27)

37 इंकुंदि रोज ओर गुट्टा पोर्ोटाल हिळ रेयतस्के वेल्लेन लोकुकल येसुक कलियालय वातुर.

38 अस्के आ मंदिताल वरोर मनकल जोरते वरगोयसि, “गुरु, नना नीवा कालक मोळकंतन, नावा मरिनपोर्ो दया कीम, नाकु ओर वरोरे मरिं आंदुर.

39 ओन देय्यम पीतस्के ओर बागा वरगोयंतोर, ओना तोळ्दाल पोंगुर पेयसानाल ओन तेलहंता, अद ओन बस्केने होळसो, तकलिप कीसेकेने मंनंता.

40 अदनु गेदमालय नना नीवा सिस्युलुकुक विनंति कीतन, गानि ओरतोनि आया पराहिल्ले,” इचि इत्तोर.

41 अस्के येसु ओर्कुन, “अरे विस्वासम तवको आनि हरिं तत्ता पीळितोरिटा, नना बदवेरदाका मीतोनि मनकन? इंका बदवेरदाका नना मीकून सहन कीकन? नीवा मरिन इगो पीसि वा,” इचि आ मनकन इत्तोर.

42 आ पेडल येसुनहेके वायानेकेन देय्यम ओन हिळ अरहचि तेलहता. अस्के येसु आ देय्यमतुन गदरिचतोर. पजा पेडन बेस कीसि ओना बाबांक अप्पजेपतोर.

43 अस्के अंतोर लोकुकल पेनदा ताकततुन ह्ळसि इचंन्रम आतुर.

येसु ओना हामुरता बारेमते वेहतोर

(मत्तयाल 17:22-23; मरकुस 9:30-32)

येसु बतल अय्ते कीतोरो अद ह्ळसि अंतोर लोकुकल इचंन्रमते मननेके येसु ओना सिस्युलुकुन इल्हा इत्तोर,

44 “इंदके नना मीकु बतलय्ते वेहांतोनो, अव पोल्लेन मिमेट बेस केंजट. मनकना रूपमते पुटतोन नाकुन, लोकुकुना कय्दे पीसि हियानद मंता.”

45 गानि येसु वेहता पोल्ले ओर्क तेळिया हिल्ले. अद पोल्ले ओर्क तेळियामान्नि इचि मक्किचि मत्ता. आनि इदुना बारेमते ओन पूस कियालयगुडा ओर वेरियतुर.

अंतोर्कन्ना पेदुदा बोर?

(मत्तयाल 18:1-5; मरकुस 9:33-37)

46 पजा, “मनालोपो अंतोर्कन्ना पेदुदा बोर?” इदुना बारेमते सिस्युलुकुक ओर्क-ओर्के पोल्ले आतां.

47 गानि येसु ओरा मनसुना विचाराल्कुन एरपाट कीसि, वरोर सिन्ना पेडन ओना दग्गोरा निलाहतोर.

48 निल्लाचि, “बोर अय्ते ई सिना पेडनसंतोन नावा पोरोलते स्विकार कीतोर ओर नाकुन स्विकार कीतापे. अल्हेने बोर अय्ते नाकुन स्विकार कीतोर ओर नाकुन लोहता पेनदुन इंका स्विकार कीतोर. अदुनहाटी बोर अय्ते मीलोपो अंतोर्कन्ना सिन्ना मंतोर, ओर अंतोर्कन्ना पेदुदोड आंदुर,” इचि येसु ओर्कुन इत्तोर.†

मीकु विरोद कियवोर मीवोर आंद

(मरकुस 9:38-40)

49 अस्के, “गुरु, वरोर मनकल नीवा पोरोलते देय्याल्कुन पेचाहनेके मोमोट ह्ळतोम. मालेसीं ओर नी पज्जो ताकानोर आयोर, अदुनहाटी अल्हा कियमा इचि मोमोट ओन आपतोम,” इचि योहान जवाब हीतोर.

† 9:48 पेदुदाल्क वळकानेके सिन्ना पिताल्कुंक इलुवा मननो. ई सिन्ना पेडनसंटा इलुवा हिलुवा मनकल पेनदा नदरते पेदुदोड आंद.

50 इत्तस्के, “बोर अय्ते मीक विरोदमते हिल्लोर, ओर मीवोरे आंदुर, अदुनहाटी ओन आपमत,” इंचि येसु योहानुन वेहतोर.

सामरिया सहरते येसुक कदर दोर्का

51 येसु स्वर्गमते होनना रोजकु दगैरा वासेक मत्तां. अदुनहाटी ओर येस्सलेम होनालय गट्टि निरनायम कीतोर.

52 ओर पेयसका मुन्ने ओना कबुरतोर्कुन लोहतोर. ओर ओन्क जेगा तयार कियालय सामरिया लोकल्लुकुना उंदि नाटे एव्तर.

53 गानि येसु येस्सलेम होनालय पेयसतोर इंचि सामरि जातिता लोकल्लुक ओन अगा आगा हिया हिल्लुर.*

54 ओर्कुन अगा आगा हिया हिल्लुर अय्ते ओना सिस्स्युल्लुकु याकोब आनि योहान इल्हा इत्तुर, “सामि! ओर्कुन हक्कालय, मब्बुनाल तडमि अरि इंचि मोमोट आदेस हिथ्याना, इंचि नीवा विचारम मंताना?”

55 अस्के येसु ओरहेके तिरियसि ओर्कुन तेराहतोर.†

56 पजा ओर अगटाल वेरे नाटे होत्तुर.

येसुना पज्जो ताकमळ

57 ओर हरपीसि होंचेक मननेके बोरो वरोर मनकल येसुनगा वासि, “निमे बगा-बगा दांतिनो, अगा-अगा नना नीवा पज्जो वांतन,” इंचि इत्तोर.

58 अस्के येसु ओन इल्हा इत्तोर, “नक्कांक बारे मनालय सोंरे मंतां, पिट्टेक मनालय गडां मंतां, गानि मनकना रूपमते पुटतोन नाकु मात्रम तल्ला ईर्रीलयगुडा जेगा हिल्ले.”

59 पजा येसु इंकावरोन, “नावा पज्जो वा” इत्तोर. गानि, “सामि, नाकुन मोदाला होनाहीम, नावा बाबाल हातास्के ओन गति कीसि वांतन,” इंचि ओर येसुन इत्तोर.

60 अस्के येसु ओन इत्तोर, “बोर अय्ते हाताप मंतुरो, ओरे ओरा हातोर गति किथ्यिर. निमे मात्रम होंचि पेनदा राज्येम बारेमता बेसता कबुर वेहा.”

61 इंकावरोर मनकल इत्तोर, “नना नीवा पज्जो वांतन सामि, गानि मुन्ने नना लोन होंचि, नावा लोतोर्कुंक वेहचि वांतन.”

62 अस्के येसु ओन इत्तोर, “पज्जो वांतन इंचि पेयसि, मर्रा पजोळक मल्लिस ह्ळना मनकल पेनदा राज्येमता सेवा कियनालायक हिल्लोर,” इंचि इत्तोर.

10

येसु डेब्बे रोंड सिस्स्युल्लुकुन सेवाहाटी लोहातोर

1 अद आता पजा सामि, इंका डेब्बे रोंड मंदि सिस्स्युल्लुकुन पेरतोर. पेरसि, बव नाहकुने अय्ते ओन्क होनना मत्ता अव नाहकुने ओना सिस्स्युल्लुकुन इव्वुर-इव्वुर्कुन कीसि मुन्ने लोहातोर.

2 ओर्कुन लोहानेके इल्हा वेहातोर, “पंटा वेल्लेने पंडुता गानि बूतिनोर तक्को मंतुर. अदुनहाटी पंटाता मालकुंक बूतिनोर्कुन पंटा कोय्यालय लोहा इंचि विनंति कीम्ट.*

3 मिमेट होंट! ह्ळ्ळाट, तोडेल्लिन लोप्पो गोंरे पोरिहक्कुन लोहताप नना मीकुन लोहचंतन.†

4 मीवातोनि कोताना संचि, जोरा आयि, हेरपुहक आयि पियमट. हरिं पीसि होननेके बोर कलियते ओर्कुं जोहारगुडा वेहमट.†

5 मिमेट बद लोन अय्ते दांतिटो, मोदाला, ‘इद लोतुक सांति दोर्कि’ इंचि इंट.

6 अद लोते सांति गावाले इनना मनकल मत्ते अद सांति ओनगा दांता, गानि अगा गिंटा सांति गावाले इनना मनकल हिलाकोंटे आ सांति मिहागेन वापस वांता.

7 कबळ कियानोर्कु बूति दोर्किता. अदुनहाटी मिमेट बद लोन अय्ते दांतिटो अद लोतुर बतल हीतुरो अद तिचेक-उंचेके अदे लोते मंट, अलग-अलग लोहकुने मनमट.

8 मिमेट बद सहरते दांतिटो, अद सहरतोर मीकु बेस मान-मरयादा कीते, ओर मीक बतल तिनालय हीतुर अदे तिंट.

9 अगाटा बिमारतोर्कुन बेस कीसि, ‘पेनदा राज्येम दगैर्क एव्ता’ इंचि ओर्क वेहाट.

† 9:53 यहदि लोकल्लुक सामरि जातितीर्कुन इट्टुते म्दुट्टळ इत्तुर. अल्हेने सामरि जातितोर गेरजिम इनना गुट्टाटगा मोळ्कुंदुर, यहदि जातितोर बारे येस्सलेम गुळितागा मोळ्कुंदुर. अदुनहाटी सामरि जातितोर ओर्कुन अगा आगा हिया हिल्लुर. § 9:55 कोनि युनानि पुस्तकाल्लुकुने इल्हा रासि मंता: येसु ओर्कुन, “मिमेट

बद आत्माते मंतिट मीक तेळियोना? मननक पुटतोर मनकना आत्माना हक्कालय आबो गानि ओनकु मुक्ति हियालय वातोर,” इंचि इत्तोर. * 10:2 इद वचनता अर्तम बतल इत्ते, वेल्लेने लोकल्लुक येसु वेहता पोर्ले केंजालय तयार मंतुर, गानि ओर्कुं कराहलय, वेहालय मात्रम लोकल्लुक तक्को मंतुर. इगे पंटा इत्ते केंजना लोकल्लुक, पंटा मालक इत्ते पेनबाबाल आनि बूतिनोर इत्ते पेनदा पोर्ले कराहने. † 10:3 मलयाल 10:16 † 10:4 यहदि जातितोर बेकेनना पचेम होननेके नड्डुम हरेद बोर्नना एपाटनोर कलियायते वरोंक-वरोर उके-उके सुक-दुककाल्लुक वेहकुनुंदुर. अदुनहाटी सेवक होननेके अल्हा कीते अगेन वेला आंता इंचि येसु ओर्कुं इल्हा वेहातोर.

10-11 गानि मिमेट बदन्ना सहरते होतस्के ओर मीकून बेस मान-मरयादा कियार्कोटे, अगाटा हरकुने होंचि, 'मिमेट माकु मरयादा कियुवा विरोदमते, मावा काल्कुंक अंतता मीवा सहरता दुब्बागुडा मोमोट इगेन दुल्पसंतोम. अय्नागानि इद मतिते ईरंट, पेनदा राज्येम दगोर्क एल्ता,' इंचि ओर्क वेहात.

12 नना मीकु वेहासेक गदा, न्यायम कियना रोजुने, ✨ सदोम सहरता परिस्तिती आ नाहकुंकन्ना बचचोरो बेस मनंता," इंचि येसु ओर्क वेहातोर.

येसुना पोर्ल्लें केंजवोरा नाहकु
(मत्तयाल 11:20-24)

13 येसु मर्रा इतोर, "ए कोरजिना आनि बेतसेदा नाटेना लोकरिटा! मीकु गोसा तपो! ओक्कला मिहगा बव अद्बूताल्क आतां, अवे गिंटा सूर, सिदोन नाहकुने आसि मत्ते, अगाटा लोक्कुल्क बिराना बोतां हट्टिस, मेंदुल्क बूळिद होकसि उद्दिदसि दुक्कमते मनसु मार्सकुंचि मननेत.

14 गानि पेन न्यायम कियना रोजुने सूर आनि सिदोनतुरा परिस्तिती मीकन्ना बचचोरो बेस मनंता.

15 ए कपनहूम सहरता लोकरिटा! मिमेट स्वर्गमते दांतोम इनकुंचतिरा? मिमेट नरकमते दांतिर."

16 "सिस्युल्कुनिटा! बोर मीवा पोर्ल्लें केंजंतोरो, ओर नावा पोर्ल्लें केंजंतोर. बोर मीकून हय्सोर ओर नाकून हय्सोर. नाकून हय्सवोर नाकून लोहता पेनदुनगुडा हय्सोर," इंचि येसु वेहातोर.

येसुना सिस्युल्कु कूस आंतुर

17 पजा, येसु लोहता डेब्बै रोंडु मंदि सिस्युल्कु वेल्लेन कुसिते मल्सि वासि, "सामि, नीवा पोरोल्ले देय्याल्कगुडा मावा पोर्ल्लेतुन केंजतां," इंचि येसुक वेहातुर.

18 अस्के येसु ओर्कुन इल्हा इतोर, "नना पेद्दा देय्यमतुन मब्बुनाल पिळ्गुनेलेसी अरनेके हळतन.

19 केंजट, नना मीकु तरासकु, मिच्चोन जारानद आनि पगातोरा पूरा बलमतुन गेल्सानद अदिकारम हीतन. मीपोर्री बोरे अन्नायम किया पर्स.

20 अयना मीवा पोर्ल्ले देय्याल्क केंजतां इंचि कूस आयमट, गानि मीवा पोरोल स्वर्गमते रासि मंता इंचि कूस आम्टु," इंचि वेहातोर.

येसु पेनबाबांक दन्यवाद कीतोर
(मत्तयाल 11:25-27; 13:16-17)

21 अस्केने येसु पवित्र आत्माते निडसि कूस आसि इल्हा इतोर, "ए नावा बाबा, बूमि आनि स्वर्गमता सामि, तेल्विगल्लोर्क आनि समजदार लोक्कुल्कनगटाल इव पोर्ल्लें मक्किचि इरतिन, सादा-सिंपल लोक्कुल्क बारे इव पोर्ल्लें हुपिस्तिन, इंचि नना नीवा स्तुति कीसेक मंतन. हो बाबा! नीकु इदे बेस अनपिस्ताहाटी निमे इल्हा कीतिन.

22 नावा बाबाल नाकु अन्नि अप्पजेपतोर. बाबान तप्पा मर्रिन बोरे एरपाट किय्युर, मर्रिन तप्पा बाबान बोरे एरपाट किय्युर. मर्रि ओना इस्टमाताप बाबाना बारेमते बोर्क अय्ते तेळियानाल वेहांतोर ओरे बाबान एरपाट कीतुर," इंचि इतोर.

23 पजा ओर ओना सिस्युल्कुन पक्कक ओसि ओर्कुन इल्हा इतोर, "मिमेट हळानबुन हळना मीवा कळ्कु वेल्लेन आसिर्वाद दोर्कतव आंदुं,

24 बारित्ते नना मीकु वेहांतन, इय्याला मिमेट बव हळसंतितो, केंजसंतितो, अबुन वेल्लेटुर पेनदा कबुरतोर आनि राजालोर हळालय, केंजालय तन्ताळुंदुर. गानि ओर्क हळालय, केंजालय दोर्काहिल्ले," इंचि इतोर.

25 अचचोटेन मूसाना नियम बेस तेळियतोर वरोर गुरू निततोर. नित्तिसि येसुना पट्टु हळानाहाटी, "गुरू, बस्केळ्क पिस्सना पिस्वरता वारसदार आयानाहाटी नना बतल कीते बेस?" इंचि पूसकीतोर.

26 अस्के येसु ओन, "मूसाना नियमते बतल रासि मंता? दानहेंदाल नीकु बतल तेळियता?" इंचि इतोर.

27 इत्सके आ गुरू, "निमे नीवा सामि आतां पेनदुन पूरा मनसुनाल, पूरा आत्माताल, पूरा ताकतताल, पूरा बुद्धिताल पावरम कीम. अल्हेने नीवद निमे बच्चोन पावरम कीतिनो अचोने पावरम इंकावरोनगुडा कीम. इल्हा रासि मंता," इंचि जवाब हीतोर.

28 अस्के येसु ओन, "निमे बरोबर वेहातिन, अल्हेन निमेगुडा कीम, अस्के नीकु बस्केळ्क पिस्सना पिस्वर दोर्कता," इंचि इतोर.

29 ओर, नना नीतिमंतुन इंचि हुप्पालय, "नावा पक्कातोर इत्ते बोर आंदुर?" इंचि येसुन पूसकीतोर.

सामरि जातिता मनकना वेसुडि

30 अल्हा पूसकीतस्के येसू ओन्क उंदि वेसुड वेहातोर: “वरोर मनकल येस्सलेम सहरताल यरिहो इनना नार होंचेके मत्तोर. होननेके नड्डुम हरदे ओन दोंगाल्क पीतुर. ओर ओनगा मत्ता सामानतुन इग्गुकुत्तुर, कपडिं तेंडकुत्तुर. पजा ओन पक्का तंचि, डुक-डुक जीवा मननेके होळसि होत्तुर.”

31 “पजा बतल आता इत्ते, अदे हरपीसि वरोर पेर्माल होंचेक मत्तोर. आ पेर्माल हिळु अरसि मत्ता मनकन हळसि होरियसि होत्तोर.

32 ओर होतस्के वरोर लेवि जातिताः मनकल अदे हरिं पीसि वातोर. ओर इंका हिळु अरसि मत्ता मनकन हळसि होरियसि होत्तोर.

33 ओर होत्ता पजा, अदे हरिं पीसि वरोर सामरिया मनकलऽ अगा एवतोर. एवतस्के हिळु अरसि मत्ता मनकन हळसि ओनकु इरगा जीवा नोता.

34 ओर ओनगा वासि ओन्क देब्बां आतगा, अवुनपोरों निय, अंगुर पंडिना पानकम* होकसि पट्टि दोहतोर. दोहता पजा, आ सामरि मनकल हिळु अरसि मत्ता मनकन ओना गाड्दिपोरों वाटसि, उंदि लाजुने ओसि ओन बेस हळकुत्तोर.

35 इंकुंदि रोज लाजता मालकुंक रोंडु एंडि कोत्तां हीसि, ईन बेस हळा, ईनाहाटी एक्को कोत्तां कर्स आयानय्ते, नना मल्सि वातस्के अव नीकु हीतन इत्तोर.”

36 पजा येसू, “दोंगाल्कन कय्दे देब्बां तित्ता मनकंक मुञ्जुर मनकालोर कलियतुर. आ मुञ्जुर लोपो नीवा विचारमते ओना पक्कातोर बोर आंदुर?” इंचि ओन पूसकीतोर.

37 अस्के आ गुड, “बोर अय्ते ओन हळसि ओनपोरों दया कीतोर ओरे,” इंचि इत्तोर.

अस्के येसू, “होन, ओर कीताप निमेगुडा कीम,” इंचि ओन इत्तोर.

मरियम आनि मार्ता

38 पजा येसू, ओना सिस्स्युल्कु हरिं पीसि होननेके, उंदि नाटेनगा एवतुर. अगा उंदि मार्ता इनना सुरतळ मत्ता. अद येसुन दाना लोन ओसि बेस हळकुत्ता.

39 दान्क मरियम इनना उंदि हेलड मत्ता. अद सामिना काल्कुनगा उद्विदसि ओर वेहना पोल्ले बेस केंजसेक मत्ता.

40 गानि दाना अक्कल मार्ताल सेवा कीसि-कीसि, पूरा मोता दान पोरोने अरताप आता. अदुनहाटी अद येसुनगा वासि, “सामि, नावा हेलड पूरा कबळ नावा पोरोने वाटसि हीता, इद निमे हळसेक हिल्लिना? नाकु आसर आयालय दानकु वेहा,” इंचि इत्ता.

41 अस्के सामि दानकु इल्हा जवाब हीतोर. “मार्ता, निमे वेल्लेन कबाहकुना बारेमते विचारम कीसि गाबर आंतिन.

42 गानि असल उंदे कबळ कियना अवसरम मंता. मरियम आ बेस कबळतुन पेरकुत्ता. अदुनहाटी दानगटाल अद कबळतुन बोर इगुकुन्ना पस्स,” इत्तोर.

11

येसू कराहता पारतना (मत्तयाल 7:7-11)

1 उंदि मल्का येसू उंदि जेगाते पारतना कीसेक मत्तोर. पारतना आतंका ओना सिस्स्युल्कुनाल वरोर सिस्स्युड ओन, “सामि, योहान ओना सिस्स्युल्कुंक बल्हा पारतना कियमळ कराहतोरो, अल्हेन निमे माकुगुडा पारतना बल्हा कियमळो कराहा,” इंचि इत्तोर.

2 अस्के येसू ओर्कुन, मिमेट पारतना कियनेके इल्हा इंट,

“ए मावा पेनबाबा, नीवा पोरोलतुन अंतोर कदर कियिरकांटी.

निमेन मापोरों राज्येम कीम.

3 माकु रोजता तिडि इथ्यालागुडा हीम.

4 माकु विरोदमते कीता तप्पुकुन मोमोट बल्हा माप कीतोमो,

निमेगुडा मोमोट कीता तप्पुकुन माप कीम, माकुन पट्टुने अर्काकोटा कापाळा.”

तल्कते पेन हीता (मत्तयाल 6:9-13)

‡ 10:32 लेवि जाति लेवि जातिता मनकालोर गुळिते कबळ कीतुर.

§ 10:33 सामरिया मनकल सामरियाता एरियाता लोकूल्क सिन्ना जातिरोर इंचि

यहदिलक ओर्कुन इत्ते पट्टुड इन्तुर.

* 10:34 इसाएल लोकूल्क अंगुर पंडिना पानकमतुन उनाहाटी, देब्बां दलगागा होकनाहाटी कियुंदुर.

5-6 पजा येसु ओर्कु इल्हा वेहालय दल्यातोर. “मीवावटेताल बोरो वरोर, मीवा दंतातोनगा नडजाम नर्का होंचि, अरे दादा, नहगा इंदकेन वरोर दंटागाल वातोर. गानि ओन्क अट्टिस दोसालय नहगा बतले हिल्ले. अदुनहाटीं नाकु इच्चुं परिक बदल हीम, इंचि इतोर इनकुंदु!

7 अस्के आ दंटागाल लोपोटाले, नना नावा पिलाल्कुनतोनि मीडिसि मंतन, नना तेदेते ओरगुडा तेदांतुर, इंका तल्पुगुडा लोपोटाल गट्टिगा वाटतन. अदुनहाटीं नना इंदके तेदिस नीकु बतल हिया परोन. नाकुन वाटिदे परेसान कियमा, इंचि इतोर.

8 नना मीकु वेहानद बतल इत्ते, आ दंटागाल ‘नावा दंटागाल वातोर,’ इंचि तेदिस ओन्क परिक हिय्या हिल्लोर. गानि ओना दंटागाल ओन उंदेतीर, हीम-हीम इंचेके बातिमलाडताहाटीं ओर तेदिस ओन्क गावाले मत्ताचोन परिक तप्पाकोटा हीतोर.

9 अदुनहाटीं नना मीकु वेहचंतन पेनदुन तल्कसेक मंतु, मीकु हिय्यार. पहकसेक मंतु, मीकु दोर्कार. तल्पुन टोक-टोक कीसेक मंतु, मीवाहाटीं तल्पु तेंडार.

10 बारिते बोर अय्ते तल्कतोर ओन्क हियमळ जर्गीता. बोर अय्ते पहकतोर ओन्क दोर्कीता. बोर अय्ते तल्पुन तनंतोर ओनाहाटीं तल्पु तेंडमळ जर्गीता.

11-12 मीलोपो बोरन्ना बाबो मंतोरा ओना मरि, जिम्मा तल्कते ओन्क तरास हियानोर? * हिलाकोटे मेज तल्कते ओन्क मिचो हियानोर मीलोपो बोरन्ना बाबो मंतोरा? हिल्लोर.

13 अय्ते मिमेट सेडुडोर्क आसिगुडा मीवा पिलाल्कुंक बेसतद हियमळ तेळियतस्के, स्वर्गमते मनना पेनबाबाल, ओन तल्कानोर्कुंक पवित्र आत्मा बचचोन वेल्ले हियनुर?”

येसुना ताकत पेनदागटाल मंता

(मत्तयाल 12:22-30; मरकुस 3:20-27)

14 वरोर मनकन देय्यम पीताहाटीं ओर मुकल आसि मत्तोर. पजा येसु आ मनकानाल अद देय्यमतुन पेच्हाचि गेटुमतोर, अस्के आ मुकल वळकालय दल्यातोर. इदुन हळसि अगा मत्ता अंतोर लोक्कुंक वेल्लेन इंचंत्रम आता.

15 गानि अवटेताल इच्चुर मंदि, “बेलजेबुल इनना देय्याल्कुना मुखयना बलमते ओर देय्याल्क तेंडांतोर,” इंचि इनालय दल्लुतुर.

16 इंका इच्चुर बारे ओना पट्ट हळना इंचि ओनाहेंदाल स्वर्गमताल उंदि चिन्ह हुप्सा इत्तुर.

17 ओरा मनसुना विचाराल्कुन एरपाट कीसि येसु ओर्कुन इल्हा इत्तोर, “बद राज्येम लोपो वरोना पोल्ले-वरोंक अर्काकोटा आंता, अद राज्येम पाडासि दांता. अल्हेन उंदि लोते मनानोरा नड्डुम वरोनद वरोंक अर्काकोटा मत्ते अद लोनगुडा नासडेम आसि दांता.

18 मिमेट इत्तिर गदा, नना बेलजेबुल इनना देय्यमता सहायमतोनि देय्याल्क गेटुमतन इंचि. अल्हा अय्ते देय्यम दाना दंटाता देय्याल्कुना विरोदमते नितते, अवुना राज्येम बल्हा नितंता?

19 सर! मिमेट इत्ताप, नना बेलजेबुलना सहायमते देय्याल्कुन गेटमंतन इन्कुंदु. गानि मीवा लोक्कुंगुडा देय्याल्कुन गेटमंतुर, ओरगुडा देय्यमता सहायमतोने गेटमंतुरा? अदुनहाटीं मीवा लोक्कुंके मीवा न्यायम कीतुर.

20 गानि नना ओक्कला पेनदा बलमते देय्याल्कुन गेटमानय्ते, पेनदा राज्येम मीवा दगोर्क एंता इंचि एरपाट कीम्टु.”

21 “वरोर ताकतवर मनकल गोर्का, कसेहक, तुपाकी पीसि ओना लोता कावेल कीतेने, ओना लोता लोपो मनना अनि सामान बेस सांतिते मनंतां.

22 गानि ओनकन्ना एक्को ताकतवर मनकल वासि ओनतोनि लडाइ कीसि ओन ओळिचचानय्ते, बव गोर्का, कसेहकुन पोर्रो वेल्लेन वर्सानाल बरोसा इतोर, अबुन इग्कुंकि ओनगा मत्ता मालुन दोसकुंतोर. पजा अंतोर्कुंक पंचि हीतोर.”

23 “बोर अय्ते नावा दंटाते मन्नोर, ओर नावा विरोदमते मंतोर, बोर अय्ते नाकु सहायम किय्योर, ओर नाहगटाल पायिचना कबळ कीतोर.”

24 “उंदि देय्यम बस्के अय्ते वरोर मनकानाल पेय्सि दांता, अस्के अद आराम कियालय एर हिल्वा जेगा पहकंता. गानि दान्क असंटा जेगा दोर्को. अस्के अद देय्यम, नना बद लोताल अय्ते पेय्सि वातानो, अदे लोते मर्रा मल्लिस दांतन, इन्कुंता.

25 मर्रा अगा होंचि हळतस्के मुन्नेटा लोन रिक्कम आताप, मंचिगा ऊसताप दानकु बेस दिसंता.

26 अस्के अद देय्यम तिरियसि होंचि दानकन्ना एक्को सेडुडातव एडु देय्याल्कुन पीसि वांता. पजा अंतव कलियसि अदे लोते मनालय दल्यंतां. इल्हा आ मनकना परिस्तिती मोदाटा परिस्तितिकन्ना एक्को कराब मनंता.”

निजम आसिवांद

27 पजा बतल आता इत्ते, येसु इव पोल्ले वेहसेकेन मत्तोर, अचोटेन अगा मत्ता मंदिताल उंदि मुरतळ लगांचि, “नीकुन कंचि, पाल उहचि, बेरसागोटेता आ तल्लुर वेल्लेन आसिवांद दोर्कुंतद आंदु,” इंचि इत्ता.

* 11:11-12 इद वचनम कोनि पांडु लिपिने हिल्ले.

28 अस्के येसु, “गानि बोर अय्ते पेनदा वचनाल्क केंजसि अवुन पीसि ताकंतोरो ओर एक्को आसिर्वादि दोर्कुंतोर आंद,” इंचि इत्तोर.

लोकुल्क चिन्ह तल्कंतुर
(मत्तयाल 12:38-42; मरकुस 8:12)

29 वेल्लेन लोकुल्क जमा आयानद हळसि येसु इल्हा वळकालय दलगतोर: “इद पीळितोर कराब लोकुल्क आंदुर. अदुनहाटी चिन्ह हृप्सा इंचि पूस कीसंतुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह हृपिचमळ जर्गो.†

30 बल्हा योनाल निनवे सहरता लोकुल्कुनाहाटी चिन्ह आतोर, अल्हेन मनकना रूपमते पुटतोन नना, ई पीळितोरहाटी चिन्ह आंतन.

31 अल्हेने सिबा देसेमता रानि सुलेमान राजाना तेल्विता पोल्लें केंजालय बेरे देसेमताल अगा वासि मत्ता. हळटा, सुलेमानुक्नना पेद्रुदोड वरोर मी मुन्ने नित्तिसि मंतोर. अय्नागानि मिमेट नावा बुद्दिदेता पोल्लें केंजसेक हिल्लिर. अदुनहाटी आकिर न्यायमता रोजुने आ रानि इद पीळिता मनकालोरपोर्रो दोसेम दोस्सार.

32 योनाल वेहता कबुर केंजसि निनवे सहरतोर अय्ते ओरा मनसु मार्सकुत्तुर. गानि हळटा, योनांकनना पेद्रुदोड इंदके मी मुन्ने नित्तिसि मंतोर. अय्नागानि मिमेट मनसु मार्सकुचेके हिल्लिर. अदुनहाटी आकिर न्यायमता रोजुने निनवे सहरतोर नित्तिसि इद पीळिता लोकुल्कुनपोर्रो दोसेम दोस्सनुर.”

वेळसि आनि वेल्गु
(मत्तयाल 5:15; 6:22-23)

33 “बोरे आथिर वेडसि निरिचिचि दान गुल्ला हिळ्ळ मुच्चोर, साटुंकगुडा इर्रो. गानि लोप्पो होळियानोर्क बेस वेल्गु दिसगोम इंचि दान उंदि दीसोडिपोर्रो इर्रोतोर.

34 नीवा कळु नीवा मेंदुल्क वेडसिलेह्का आंदुं. नीवा कळु बेस मत्ते नीवा मेंदुलंता बेस वेल्गु मनंता. ओक्कला नीवा कळु बेस हिलाकोटे नीवा मेंदुलंता हीकटे मनंता.

35 अदुनहाटी नीवा लोप्पो मनना वेल्गु पिरसोन्नाकुंटा बेस कापाडकुन.

36 नीवा पूरा मेंदुल पुरागा वेल्गुने मत्ते, अद वेडसि एल्गुताप बेस एल्गुसेके मनंता आनि गिचचो मेंदुलगुडा हीकटते मननो.”

येसु परिसिल्कुनपोर्रो होंग आंतोर
(मत्तयाल 23:1-36; मरकुस 12:38-40; लकाल 20:45-47)

37 इल्हा येसु ओना वळकुमळ मारतस्के वरोर परिसि ओना लोन येसुन गाटो तिनालय केयतोर. अय्ते येसु ओना लोन होंचि लोप्पो होळियसि गाटो तिनालय उदतोर.

38 येसु यहदिल्लुकुना रिवाज परकारम तिनाका मुन्ने कय्कु नोरसि गाटो तिनालय उदुदा हिल्लोर. अदुन हळसि आ परिसिंक इचंत्रम आता.

39 अस्के सामि ओन इल्हा इत्तोर, “मिमेट परिसि लोकुल्क गिन्ने-गिलासकु सिराप लोकुल्कुंक दिसालय पलाताल तोमसि साप कीतिर, गानि लोप्पो मात्रम मीवा कराब गुनाल्क, वेल्लेन लालच निडसि मनंता.

40 अरे बुद्दिदे तक्को लोकुरिटा! पलाताल तयार कीता पेने लोप्पोटाल तयार कीता.

41 अदुनहाटी मिहगा बतल अय्ते मंतोन अदुन गरिब लोकुल्कुंक मनसुनाल हीम्ट. अस्के मीहाटी अग्नि साप मनंता.

42 अरे परिसिल्कुनिटा! मीकु गोसा तप्पो. बारित्ते मिमेट मीवा तोटाते पुटता पुदिना, इंका बेरे अग्नि पंटाता पदि त्सकुनाल उंदि त्स पेनदुक हीतिर. गानि न्यायमतुन आनि पेनदा पावरमतुन मात्रम मिमेट मति किथ्थिर. पदि त्सकुनाल उंदि त्स पेनदुक हियमळ इद बेसे. गानि इद कीसेक-कीसेक न्यायमतुन आनि पेनदा पावरमतुनगुडा होळसाकोटा ताका मत्तिर.

43 परिसिल्कुनिटा मीकु गोसा तप्पो, दर्मसास्त्रम कराहना लोहकुने पेद्रुदाल्क उदुदाना जेगा मीकु गावाले इनकुतिर. हाटुमकुने जोहार वेहागोटकुनमळ इत्ते वेल्ले इस्टम.

44 मीकु गोसा तप्पो. बारित्ते, अगा बोंदा मंता इंचि तेळियका लोकुल्क जारसेके दांतुर, मिमेट आ बोंदानसंतोर आंदिर.”

येसु आनि दर्मसास्त्रम कराहना गुरूल्क

45 अस्के दर्मसास्त्रम बेस तेळियतोर वरोर गुरू वासि येसुन, “गुरू, निमे इसोटा पोल्लें वळ्ळिसि मावदगुडा अपमानम कीसतिन,” इंचि इत्तोर.

† 11:29 योनाना उदाहरेन हीसि येसु ओन्क वायना हामुर, हासि मड रोजकु बोंदाते मनमळ आनि मूडो रोजुननाड मर्रा जीवाते तेदमळ्ळा बारमते वेहतोर.

46 अस्के येसु इल्हा इतोर. “अरे मूसाना नियम बेस तेळियतोरिटा, मीकु सिक्सा तप्पो. बारित्ते मिमेट लोकुल्कुनपोर्रो, तेहे तेदा पर्फवा मोता# तासंतिट, गानि मिमेट मात्रम अद मोतातुन तेहालय उंदि वेलुगुडा तासिर.

47 इंचि मीकु गोसा तप्पो. बारित्ते, मीवा एनकटा पेद्दाल्क हक्कता पेनदा कबुरतोराहाटी गोरि दोहातिर.

48 इल्हा कीसि, मीवा एनकटा पेद्दाल्कुने आनि ओर कीता कबाह्कुने मिमेट कलियसि मंतिर इत्ताप मिमेटे गवाइ मंतिर. बारित्ते मीवा एनकटा पेद्दाल्क पेनदा कबुरतोर्कन हक्कतुर, मिमेट बारे ओरा गोरि दोहचंतिर.

49 अचोने आयका पेन दाना बेस बुद्दिदेते मीवा बारेमते इल्हा वेहता, नना पेनदा कबुरतोर्कन आनि प्रेरितुल्कुन ओरगा तोहांतन. अस्के ओर, ओराव्टेटाल इच्चूर्कन हक्कानुर, इच्चूर्कन बारे इरगा तिप्पल्क कियानुर.”

50 “दीनहेंदाल, ई दुनिया पुटत्स्केटाल बच्चोन मंदि पेनदा कबुरतोरा नेत्तुर अयेतें पोगागोटमळ जर्गतनो, आ ओरा अंटोरा नेत्तुरता हिसाब ई पीळितोराहेंदाल एतमळ जर्गता.

51 इत्ते आबेलनगटाल अयेतें, गुळि आनि गद्दे नड्डुम हक्कता जकर्याहनगड्क. हां, नना मीकु निजम वेहांतन, ईर अंटोरा नेत्तुरता हिसाब ई पीळिता लोकुल्कुनहेंदाले एतमळ जर्गता.

52 अरे मूसाना नियम बेस तेळियतोरिटा, मीकु गोसा तप्पो. बारित्ते मिमेट पेनदा तेल्विता तालम कयदुन तेंडकुत्तिर. गानि मिमेट क्कद्दु अयेतें होळिया हिल्लिर, होळियानोर्कनगुडा आपिसि इरतिर.”

53 पजा येसु अगटाल होनालय पेयसतोर अस्के, परिसिर्क आनि दर्मसास्त्रम कराहना गुरूल्क ओन्क अड्डम तिरियसि, ओन रकारकाल्कुना सवालक पूस कीसि परेसान कियालय दल्गुतुर.

54 येसु बतलन्ना वळकते ओर वळकना पोल्लेने ओन दोर्का पियना विचारम ओरा मनसुने मत्ताहाटी ओर अल्हा कियालय दल्गुतुर.

12

परिसिल्लकुनलेसी आयमट

1 अचचोटेन अगा वेय्कुना मंदि जमा आसि, इरगा गर्दि आताहेंका वरोक वरोर जारसेके मत्तुर. अस्के येसु मोट्टा मोदाला ओना सिस्चुल्कुनतोनि इल्हा वळकालय दल्गतोर. “परिसिल्लक डोंगिकं आंदुर, ओरा पुल्लटा पिंडिता* बारेमते जेगता मंद.

2 मुच्चिसि मत्तव अन्नि पोल्ले बय्यर आंता, तेळियाकोटा मत्तव अन्नि वस्तुक पलातुक वांतां.

3 अदुनहाटी मिमेट हीकटते वळकता पोल्ले वेलगुने केंजमळ जर्गता. आनि लोता लोप्पाटा अरतिं होचि गुसागूसा वळकता पोल्ले येनागरापोर्रो एक्किसि वेहमळ जर्गता.”

सिराप पेनदुके वेरियट!

(मत्तयाल 10:28-31)

4 “इंचि नावा दंटातोरिटा, नना मीकु वेहानद बतल इत्ते, बोर अयेते मीवा मेंदुल्लुन हक्का परांतुर ओर्क मिमेट वेरियमट. ओर दानकन्ना एक्को बतल किया पसर.

5 मिमेट बोर्कु वेरियगोमो नना वेहांतन. मीकुन हक्कतंका नरकमते वाटना अदिकारम बोन्क अयेते मंतानो, मिमेट ओन्के वेरियट. नना वेहनद इदे.”

6 “हेय्युं कोळका पिट्टें रौंडु कोत्तांकु अम्मुड दांतां गदा! अयनागानि अव्टेटाल उंदि पिट्टेतुनगुडा पेन मति गर्गो.

7 मीवा तल्लाता उंदि-उंदि केल्लु लोकिसि मंता. अदुनहाटी वेरियमट! पेनदा मुन्ने मिमेट वेल्लेन कोळका पिट्टेंकन्ना बच्चोरो विल्ला मत्तोर आंदिर.”

येसुना पोरोल एतालय सिग्गु अरमट

(मत्तयाल 10:32-33; 12:32; 10:19-20)

8 “नना मीकु वेहांतन, बोर अयेते लोकुल्कुना मुन्ने नाकुन एरपाट कीतन इंचि ओप्कुंतोर, मनकना रूपमते पुटतोन ननागुडा ओन पेनदा दूताना मुन्ने, ‘एरपाट कीतन’ इंचि ओप्कुंतन.

9 गानि नना अयेते लोकुल्कुना मुन्ने नाकुन ‘एरपाट किय्योन’ इंतोर, ननागुडा ओन पेनदा दूताना मुन्ने ‘एरपाट किय्योन’ इंचि इंतन.

10 मनकना रूपमते पुटतोन नाकु विरोदमते बोर वळ्ळिकना, पेन ओना तप्पुकुन मापि किय्यार. गानि पवित्र आत्माता अपमानम कियानोना तप्पुकुंका मात्रम मापि हिल्ले.”

11:46 तेहेते तेदा पर्फवा मोता इगे, तेहेते तेदा पर्फवा मोता इत्ते यहदिल्लकुना वेल्लेन नियमकु आंदु. आ नियमकुना पालन कियमळ वेल्लेन कस्त्रम. दर्मसास्त्रम कराहना गुरूल्क लोकुल्कुंके वेल्लेन नियमकुना पालन कियालय वेहांतुर गानि लोकुल्कुंका मात्रम पालन कियालय सहायम किय्युर. * 12:1 पुल्लटा पिंडि इत्ते तोळ इत्ताप, बतल पुल्लगा कियानद मत्ते अये इच्चो पुल्लटा वस्तु वाटा पीता.

11-12 “मीकुन दर्मसास्त्रम कराहना लोहकुने, राज्येम कियानोरा मुन्ने इंका अदिकारिल्लुकुनगा प्सकियालय ओतास्के, अगा मिमेट बतल वळकुगोमो अद, पवित्र आत्मा मीकु अस्केन कराहंता. अदुनहाटी बतल वळकना, बतल वळकानायो इंचि रंदि कियमट.”

तेल्वि तकको सिरमंत मनकल

13 आ मंदिताल बोरो वरोर मनकल येसुन, “गुफ, नावा दादल नावा बाबाना अस्तिताल नाकु बतले हीसेक हिल्लोर, नावा पालुंक वायना आस्ति नाकु पंचि हीम इंचि निमे ओन्क वेहा,” इंचि इत्तोर.

14 अस्के येसु ओन, “अरे दादा! मीवा आस्ति पंचि हियालय नाकुन बोरन्ना ‘पेद्दा मनकल हिलाकोटे न्यायम कियानोर’ इंचि इत्तोर?” इंचि प्सकीतोर.

15 पजा येसु ओरतोनि, “बेस जेगर्ता मंचि, अन्नि लालचकुनाल मीवद मिमेटे लक्कु मंटु! बारित्ते मनकना पिस्वर वेल्लेन आस्ति मत्तेन बेस मनंता इंचि इनकुन्मट,” इंचि इत्तोर.

16 पजा येसु ओर्कु उंदि वेसुड वेहतोर: “वरोर वेल्लेन सिरमंत मनकल मत्तोर. उंदि मल्का बतल आता इत्ते, ओना नेदे इरगा पंटा पेयस्ता.

17 अस्के मनसुने ओनद ओरे, ‘पंटा अय्ते वेल्लेन पेयस्ता. गानि दीन इरालय मात्रम जेगा हिल्ले, बतल कीकन?’ इन्कुत्तोर.

18 मरा विचारम कीसि, ‘सरे! नना नावा पडना जेगातुन कुल्हाचि पेद्दागा कीतन. कीसि पूरा पंटातुन, सामानतुन अब्दे वाटसि इरतन.

19 पजा नना नावा जीवक, नीकु वेल्लेन वर्सानदाका हालानाल रूसि आता गाटो दोसतन, तिन्नु, उन्नु आनंदमते मन्नु, रंदि कियमा, इंचि वेहांतन,’ इंचि इत्तोर.

20 गानि पेन ओन, ‘अरे तेलिवि तकको मनका, इय्याला नर्कळके नीवा जीवा होनानय्ते निमे संपादिस्तादंता बोन्क आयार?’ इंचि इत्ता.

21 बच्चोर पेद्दा सिरमंत मनकल अयना ओर पेनदा मुन्ने सिरमंतुड आयोर, बारित्ते ओर ओनाहाटीगें आस्ति जमा कीतोर इंचि. ई वेसुडिते ई मनकना गति गुडा अल्हेन आता.”

रंदि कियामनि

(मत्तयाल 6:25-34)

22 पजा येसु ओना सिस्युल्लुकुंक इल्हा वेहालय दल्गतोर: “नना मीकु वेहनद बतल इत्ते, जीवा तिडिकन्ना मुक्केम, मेंदुल कपडीकन्ना मुक्केम आंदु. इंचि पिस्सनाहाटी तिनकोम बतल, उनकोम बतल, इंका मेंदुलताहेंका केर्कोम बतल इंचेके रंदि कियमट.

23 बारित्ते तिडिकन्ना पिस्वर मुक्केम, कपडीकन्ना मेंदुल मुक्केम.

24 आ काकाहकुन हुळट! अब वीतों आनि कोय्यो. अचोने आयका अवुनगा गुम्भि इंका हिल्लें. अयना पेन अवुन पोस कीसंता. अदुनहाटी मिमेट अय्ते आ पिट्टेंकन्ना बच्चोनो विलवा मत्तोर आंदिर.

25 रंदि कीसि ओना आवसुन उंदि गंटा एक्को बेरसागोटोर मीवा नड्डुम बोरन्ना मंतोरा? हिल्लोर.

26 इंसंटा सिन्ना-सिन्ना कबाहके मिमेट किया परिर. अय्ते इंका मिगुल्ला कबाहकुना बारेमते मिमेट रंदि बारि कीतिर?”

27 “आ पूतनहेके हुळट अब बल्हा बेर्ससंतांगो! अब कबळ किय्यो, कपडि इंका कुट्टों. नना वेहानद बतल इत्ते, सुलेमान राजाल वेल्लेन सिरमंत मंचिगुडा ओना कपडि आ पूतानाल उंदि पूतातच्चोगुडा सोकु मनाहिल्लें.

28 अय्ते जाडि इय्याला मंता, नाडि तडमिते वेसि दांता. अयना आ जाडिके पेनबाबाल इच्चोन बेसता कपडि हीतोर. अय्ते अवुंकन्ना बेसता कपडि मीकु हिय्या परौरा रो, विस्वासम तकको लोकुरिटा?

29 अदुनहाटी बतल तिदकोम, बतल उंडकोम इंचेके मिमेट रंदि कियमट. अल्हेने अवुन दोर्किच्चुनाहाटी गाबरगुडा आयमट.

30 दुनियातोर अंटोर लोकुल्ल इवुनाहाटीगें तनलाळसेक मनांतुर. गानि मीकु इव अन्नि गावाले इंचि मीवा पेनबाबांक एर्के मंता.

31 अदुनहाटी मिमेट मुन्ने स्वर्ग राज्येमतुन आनि पेनदा नीतितुन प्हकट. अस्के इव मीकु दोर्कंनु.”

आस्ति-पास्तिनपोरों विस्वासम इरमट

(मत्तयाल 6:19-21)

32 “अरे नावा सिस्युल्लुकुनिटा, ‘मीवा पेनबाबाल ओना राज्येमतुन मीकु हियालय वेल्लेन कुसिते तयार मंतोर. अदुनहाटी मोमोट वेल्ले मंदि हिल्लोम’ इंचि वेरियमट.

33 अरते मिमेट मिहगा मलता आस्तिनअंता अम्मिसि, गरिबोर्कुंक दान-दरुम कूसि, बरुकेने पडन आयाकॉटा मनना कोलताना संचितुन दोर्किचुकुंट. इंका मिमेट मीवाहाटी स्वर्गमते दनम जमा कीमट.† अगा बोर दोंगलगुडा वायोर, दानकु सेदेलगुडा पिश्यो.

34 बारिलते मीवा दनम बगा मलते अगनेन मीवा मनसु मंता.”

बस्केळकु तयार मंटु

(मलतयाल 24:42-51)

35-36 “मरमिना कुळपुने होंचि वायना मालकुन एदुर हळसेक मनना सेवाकुलकुनलेसी कबळ कियालय बस्केळक नडिकट्टु दोहचि तयार मंटु. अल्हे मीवा वेडसिन इंका बस्केळक एल्लिचचे इर्राट. अल्हा मलते बतल आंता इल्ले, मालक वासि तल्पुन तंता तन्मडे तल्पु तेंडालय अल्कगा मंता.

37 मालक वातस्के एदुर हळसेक तेल्लिते मलता सेवाकुलकु वेल्लेन आसिर्वाद दोर्कुंतोर आंदुर. नना मीकु निजम वेहासेक मंतन, मालक वासि अंतोर सेवाकुलकुन बेस उदुदा वेहांतोर. पजा नडिकट्टु दोहकुचि ओरे सेवाकुलकुना सेवा कियालय तयार आंतोर.

38 मालक बस्के वायिना, इल्ले नडजाम नर्का आयि हिलाकोटे नडजाम नर्का दाटसि होतंका आयि वातस्के, बोर सेवाकुलकु अरते तेल्लिते मनांतुरो आ सेवाकुलकु वेल्लेन आसिर्वाद दोर्कुंतोर आंदुर.

39 गानि मिमेट उंदि पोल्ले बेस तेळियागोट्टुकुंट. अद बतल इल्ले, दोंगल बद वेलाक वांतोर इंचि ओक्कला लोता मालकुंक मुन्नेन तेळियसि मलते ओर तेल्लितेन मनांतोर आनि आ दोंगन लोते होळिया हिश्योर.

40 अल्हेने मिमेट इनकुनवा वेलाके मनकना रूपमते पुटतोन नना वांतन. अदुनहाटी मिमेटगुडा बेस तयारते मंटु.”

दोका हिश्यवा सेवाकुनलेहका मंटु

(मलतयाल 24:45-51)

41 अस्के पवु, “सामि, निमे ई वेसुडिं सिराप मावाहाटीगे वेहचंतिना, हिलाकोटे अंतोर हाटीगा?” इंचि पूसकीतोर.

42 अस्के सामि इल्हा इतोर: “मालक हिल्लवस्के ओनगा कबळ कियानोर्कुंक वेलापोरीं गाटो-जावा दोम्सालय, वरोर बेस तेल्लिगल्लोड, विस्वासमलायक दिवांजि मालाकुंक गावाले. अरते असोंटा सेवक बोर मंतोर?

43 बोर सेवक अरते, मालक मल्लिसि वातस्के वेहता कबळ बरोबर कीसेक मनांतोर, ओरे सेवक बेस आसिर्वाद दोर्कुंतोर आंद.

44 नना मीक निजम वेहांतन. मालक आ सेवाकुन ओना पूरा आस्ति-पास्तिनपोरीं अदिकारि इंचि इरीतोर.

45 गानि ओक्कला आ सेवकुडु, ‘नावा मालक वायालय अरते आल्सेमे मंता,’ इनकुंचि कळमता दासि मुरतळ, मांडूसा सेवाकुलकुन तन्नुड-गुदुदुडु कियमळ, इरगा तिचि-उंचि बदमासिं कियमळ सुख कीतोर इनकुन!

46 अस्के आ सेवक विचारमगुडा किर्योर असोंटा रोजुने, गळियाते ओना मालक वायानुर. वासि, आ सेवाकुंक पेदुदा सिक्सा हीसि, ओन अविस्वासुलक मनना जेगाते वाटसीयनुर.”

47 “बा सेवक अरते, ओना मालाकुंक बतल गावालेनो तेळियसिगुडा, मालक वेहताप केंजाकॉटा, कियाकॉटा मनांतोर, आ सेवक मात्रम वेल्लेन देब्बा तितोर.

48 गानि तेळियका बदो कबळ कीसि देब्बाना पाल आता सेवाकुंक मात्रम तक्को देब्बां आंतां. पेन बोर्कु अरते बेसता कबळ कियनाहाटी वेल्लेन गुनम हीता ओगहेकटाल वेल्लेन लेक्का तलकंता. अल्हेने बोन्क अरते एक्को अप्पजेपता, ओनहेकटाल अप्पजेपता दानकन्ना एक्कोने तलकंता.”

येसुना पोल्ले पीसि ताकानोर्क तलकलिप वांता

(मलतयाल 10:34-36)

49 “नना ई बूमिते लोकुलकुनपोरीं तळमितसोंटा न्यायम कियालय वातन. अद इदकेन अंटुकुचि मलते बचचोनो बेस आयवड इंचि इनकुरतन.

50 गानि नाकु उंदि कस्टालकुना बापतिस्मा‡ एतानद मंता, अद एतनदाका नाकु तिप्पलक तपों.

51 नना इद बूमिपोरीं सांति हियालय वातन इंचि मिमेट इन्कुंचितिरा? हिल्ले. नना अदुनहाटी वाया हिल्लेन. गानि मीकुन वेरे-वेरे कियालय वातन इंचि नना मीकु वेहासेक मंतन.

52 इदकेटाल बदन्ना उंदि लोते हेय्युर मलते, ओरद ओर्के अर्राका इव्वुर उंदि पक्काक, मुव्वुर इंकुंदि पक्काक आसि वेरे आंतुर.

† 12:33 स्वर्गमते दनम जमा कीमट इल्ले मीवा दनमतुन पेनदा कबळहाटी आनि बेस कबळहाटी कर्क कीमटु इंचि अरतम. ‡ 12:50 कस्टालकुना बापतिस्मा इल्ले येसु ओक्क मुन्ने वायना हासुरता बोरमते वेहचंतोर. बारिलते बापतिस्मा येतनेके एते मुळगिसि तेदंतुर, अल्हेन येसुकु कस्टालकुने अरानद मंता.

53 अल्हेने मरिनद बाबोनतोनि-बाबोनद मरिनतोनि, मिथ्याटद तल्लुनतोनि-तल्लुनद मिथ्यळतोनि, कोळियाटद पोरळतोनि-पोराटद कोळियळतोनि अर्राकोटा आंता.”

वेलातुन एरपाट कियमळ
(मत्तयाल 16:2-3)

54 पजा ओर मंदिक इल्हा वेहतोर. “मब्बु तेर्पेन पोळ्द अर्रनहेके हळसि मिमेट, ‘अद हुळट, पिर्न वासेक मंता,’ इंचि वेहकुंतिर. अल्हेन आंतागुडा.

55 इंका होव्वोर वळि वायनद हळसि, ‘इंदके गर्मी’ अर्राता’ इंचि इंत्रि. अल्हे आंतागुडा.

56 अरे डोंगिरिता, मीकु बूमि, मब्बुना स्पाल्कु एरपाट किया वांता. गानि इद वेलाते बतल जर्गसंता इडुन मिमेट बारि एरपाट कीसेक हिल्लिर?”

पगातोन्तोनि बेस कलियसि मनना
(मत्तयाल 5:25-26)

57 “असल बेस न्यायम बद आंद, अद मीवद मिमेटे बारि निरनायम किया परसाहिल्लिर?

58 निमे नीवा पगातोन्तोनि कलियसि कोरटते मजिस्टरनगा होननेके हरदेन ओन्तोनि बेस संबंदम कल्पुकुन. अल्हा कियाकोटें नीकुन नीवा पगातोर कोरटते मजिस्टरंक अप्पजेपनुर. मजिस्टर नीकुन पोलिसुल्लुकंक अप्पजेपनुर, पोलिसुल्लुक ओसि नीकुन जेलने वाटानुर.

59 नना नीकु निजम वेहांतन, कोल्लक-कोला दोहनदाका निमे अगटाल पेयसा पर्रिन,” इंचि वेहतोर.

13

पापमताल मनसु मार्सकुंतु

1 अदे वेलाते अगा मत्ता लोकल्लुकुनाल इच्चुर लोकल्लुक वासि येसुंक, “गालिल एरियाता इच्चुर मनकालोर गुळितेन मोक्कु हीसेक मननेके पिलातुस ओना सिपाइल्लुकुन लोहचि ओर्कुन हळ्का वेहतोर. आ सिपाइल्लुक ओर्कुन गुळितेन हळ्कतुर. इल्हा पिलातुस ओरा नेत्तुरतुन मनम मोक्कु हियना नेत्तुरते कल्पतोर,” इंचि वेहतुर.

2 अस्के येसु ओर्कु इल्हा जवाब हीतोर, “गालिल एरियाताल वाता ई मनकालोर्कुंक इंसंटा हामुर वाता अयते, ई मनकालोर गालिल एरियाता वें मनकालोर्कुंकन्ना एक्को पापम कीतुर इंचि मिमेट इन्कुंचितिरा?

3 नना वेहासेक! अल्हा बिल्लुकुले आयो. गानि पापमताल मनसु मार्सकुंचि पेनदाहेके तिरियाकोटें मिमेटगुडा ओरालेसीगे हासि नासडेम आंतिर.

4 सरे इंदके वेहाट! सिलो इनना गोपुरम* क्लसि अरताहेंका पददेनमिदि मंदि मनकालोर हातुर. अयते ई गोपुरम क्लता वेलाते येस्सलेमते मत्ता वें मनकालोर्कुंकन्ना हासोत्ता ई पददेनमिदि मनकालोर एक्को तप्पु कीतुर इंचि इन्कुंचितिरा?

5 हिल्ले. नना मीकु वेहनद बतल इत्ते, पापमताल मनसु मार्सकुनाकुंटे मिमेट अंतोरगुडा ओरालेसीगे हासि नासडेम आंतिर.”

कबळक ओज्जुवा मरा

6 ओर्कु बेस तेळियनाहाटी पजा येसु इंकुंदि वेसुड वेहालय सुस्व कीतोर. “वरोर मनकल ओना अंगुर तोटाते उंदि अंजिर मरा वाटतोर. उंदि रोज अद मरा कायां हादतना, हादा हिल्लेना, इंचि हळ्वालय होतोर, गानि अदुंक कायां हादसि मनाहिल्लें.

7 अस्के आ मनकल ओना तोटाते कबळ कियना जीतागानुक, हळ्वा, ई अंजिर मरा कायां हादता बारे इंचि नना मूड वर्सानाल इगे दीन हळ्वालय वासंतन, गानि दीनकु बस्केने उंदि काया इंका नाकु दिसा हिल्ले. इंसंटा मरातुन ईर्सि बता पायदा? नर्किसि पोहा, इंचि वेहतोर.

8 अस्के आ जीतागाड, मालक, ई उंदि वर्सामेड मन्निकांटी. नना दीन सुट्टु तव्बि बेस एरवु वाटंतन.

9 अस्केनना हादते सरे, हिलाकोटें नर्किसि पोहा वच्चु,” इंचि इत्तोर.

नोमकेम रोजुननाड येसु उंदि मुरताटुन बेस कीतोर

10 उंदि नोमकेम रोजुननाड येसु उंदि दर्मसास्त्रम कराहना लोते कराहसेक मत्तोर.

11 देय्यम पीताहेंका पददेनमिदि वर्सानाल बिमार अर्सि मत्ता उंदि मुरतळ अगा मत्ता. दाना नळि वंकर आसि गूनि पेय्सि मत्ताहेंका दान्क बेस नित्ता वायाकोंदु.

12-13 येसु दान हळसि ओना दग्गेक केयतोर. केय्सि, “बाइ! निमे नीवा रोगमताल पलाते अरतिन,” इंचि, पजा दाना तल्लापोर्री कय इरतोर. कय इरता इरमळे अद बेस नित्तिसि पेनदुन तल्सकुनालय दल्लगा.

* 13:4 गोपुरम इत्ते उंदि एल्लुक एतु मत्ता मिद्दे आंद.

14 बिमार मत्ता मुर्ताटुन नोमकेम रोजुननाड येसु बेस कीताहेंका दर्मसास्त्रम कराहना लोता अदिकारिक इरगा होंगु वाता.† अस्के ओर लोकुकुकुन, “कबाहक कियालय उंदि वारमते हांरं रोजकु मंतां गदा! अयते आ रोजकुने वासि मिमेट मीवा बिमारकुनाल बेस आम्ट, गानि नोमकेम रोजुननाड वासि आयो,” इंचि इत्तोर.

15 अस्के सामि जवाबुने ओर्कुन, “अरे डोगि लोकुरिटा, नोमकेमनाडु मीवाब्टेटाल हरेक मनकल कौदातुन आयि गाडदितुन आयि लेहाकुंचि एर उहालय ओयिरा?

16 अयते पदुदेनमिदि वर्सानाल पेद्दा देय्यम पीसि मत्ता अब्राहामुना वंसमता ई मुरताटुन, नोमकेम रोजुननाड बेस कीते इव्ते तपु बतल मंता?” इंचि इत्तोर.

17 येसु वळ्ळुता ई पोल्ले केंजसि बोर लोकुकुलक अयते ओना विरोदमते मत्तुरो, ओर्क अंतोर्क सिग्गु वाता. गानि येसु कीता इचंत्रम आयना कबाहकुन हळसि लोकुकुलक मात्रम इरगा कूस आतुर.

पेनदा राज्येम बल्हा मंनता?

(मत्तयाल 13:31-33; मरकुस 4:30-32)

18 पजा येसु इल्हा वेहतोर. “पेनदा राज्येम बल्हा मंनता? नना दान बदनलेहका मंता इनकन?

19 पेनदा राज्येम आवालकुना उंदि पेडेत्सॉटद आंद. आ पेडेत्तुन बोरो वरोर मनकल ओसि ओना तोटाते वीततोर. अद मोलियसि, बेस्सिं पेद्दा मरा आता. अस्के परिखना पिट्टे दाना पंगांक गुडां दोहकुत्ता.”‡

20 येसु मरां इल्हा इत्तोर. “पेनदा राज्येमतुन नना बदनलेहका मंता इंचि इनकन?

21 अद पुल्लटा पिडितसॉटद आंद. बदो उंदि मुरतळ पुल्लटा इच्चुर पिडितुन मूड तव्वना पिडिते कल्पता. अस्के आ पिडिअंता पुल्लगा आता,” इंचि वेहतोर.

इर्कुटोम हर्हि

(मत्तयाल 7:13-14,21-23)

22 येसु येस्सलेम होनमैके वेल्लेन नाहकुने, सहरकुने होंचि अगाटा लोकुकुकुंक पेनदा पोल्ले कराहसेक होत्तोर.

23 अस्के बोरो वरोर मनकल येसुन, “सामि, पापमतल मुक्ति इच्चुर मंदिके दोर्कतना?” इंचि पुसकीतोर.

24 अस्के येसु ओन्क इल्हा वेहतोर. “मिमेट बस्केळ्ळ इर्कुटोम मत्ता हरदाल होळियालय इरगा कोसिस कीम्ट.§ नना वेहानद बतल इत्ते, आ हरदाल वेल्ले मंदि होळियालय हळ्ळंतुर गानि ओर होळिया पस्त्र.

25 लोता मालक तेदसि उंदि मल्का तल्पु वाटानय्ते मिमेट पलाते नित्तिसि तल्पुन टोक-टोक कीसेके, ‘सामि मावाहाटी तल्पु तेंडा,’ इंचि इंदकिर. गानि, ‘मिमेट बगाटाल वातिर? नना मीकुन एरपाट किय्योन,’ इंचि ओर मीकुन इंतोर.

26 अस्के मिमेट, ‘नीवातोनि कलियसि मोमोट तित्तोम, उट्टोम. इंका निमे मावा नाटे वासि माकु बजारकुने पेनदा पोल्ले कराहितन,’ इंचि इंदकिर.

27 गानि ओर मात्रम, ‘नना मीकु वेहासेक मिमेट बगाटाल वातिरो, बोर आंदिरो नना मीकुन एरपाट किय्योन. अरे सेड्डा कबाहक क्रियानोरिटा, मिमेट इगेटाल पेय्शि होंटु,’ ” इंचि इंतोर.

28 “पेनदा राज्येमते अब्राहाम, इसाक, याकोब अल्हेने पेनदा कब्रुरतोर अंतोर्कुन मिमेट हळ्ळंतुर, गानि मीकुन मात्रम अगाटाल, पेन पलाते हीकटते वाटसीता. अगा सिराप अळमळ, पल्कु कोर्कमळे मंनता.

29 अस्के उत्तर-दक्सिनताहेंदाल, पोळ्द पेयसनाहेंदाल, पोळ्द अर्रानाहेंदाल लोकुकुलक वासि, पेनदा राज्येमते उद्दानुर.

30 गानि हळ्ळट! मुन्ने मत्तोर इच्चुर पज्जो आयानुर आनि पज्जो मत्तोर इच्चुर मुन्ने आयानुर.”

येस्सलेमते येसुंक हामुर वांता

(मत्तयाल 23:37-39)

31 अच्चोटेन इच्चुर परिसिल्क वासि येसुन, “नीकुन अंतिपस हेरोद राजाल हव्कालय हळ्ळसंतोर, निमे इगेटाल बद्दना वेंरे जेगाते पेय्शि होन,” इंचि इत्तुर.

32 अस्के येसु ओर्क इल्हा वेहालय दलगतोर. सरे! मिमेट होंचि आ नक्काकु वेहट गदा, इय्याला नाडि नना देय्यालकुन पेचाहसि गेदमंतन, बेस हिलवोर्कुन बेस कीतन, मन्ने नावा कबाटुन महांतन.

33 अयना येस्सलेम सहरता पलाते वरोर पेनदा कब्रुरतोर्क हामुर वायमळ बेस आयो. अदुनहाटी इय्याला, नाडि, मन्ने नाकु ताकसेकेन मना पीता.

† 13:14 नोमकेम रोजुननाड बतले कबळ कियमळ हिल्ले. इंका उंदि मुर्ताटुन बेस कियमळगुडा ओर्कुं उंदि कबळ अनपिस्ता. अदुनहाटी आ अदिकारिक होंगु वाता.

‡ 13:19 इस्राएल देसेमते आवालकुना मरा पदि पटुकु एल्लु मंनता.

§ 13:24 येसु पेनदा राज्येमते होळियाना बारेमते वेहचंतोर. दीना अर्तम बतल इत्ते अगा होळियमळ वेल्लेन कस्त्रम.

34 ए येस्सलेमतोरिटा, ए येस्सलेमतोरिटा! मिमेट पेनदा कबुरतोरुंन हक्कानोर आदिर, इंका पेन मिहगा लोहचीतोर पोरोँ मिमेट बंडां हुक्कानोर आदिर. कोरुं दाना पीसेन रेक्काना हिळु बल्हा जमा कीतनोर, अल्हेन ननागुडा मीवा पिलाल्कुन जमा कियना इंचि बचचुंगो मल्कां कोरतन. गानि मिमेट मात्रम कोराहिल्लिर.

35 ह्ळा, मीवा लोन मीहाटी कुल्ला होळसमळ जर्गता. नना मीकु वेहानद बतल इत्ते, सामिना पोरोलते वायानोर आसिवांद दोर्कतोर इंचि बदवेरदाका अयते मिमेट इन्निरो अदवेरदाका नाकुन मरां ह्ळिर, इत्तोर.

14

येसु वरोर परिसिना लोन दांतोर

1 उदि नोमकेम रोजुननाड येसु परिसि अदिकारिल्लुकुनाल वरोर अदिकारिना लोन गाटो तिनालय होत्तोर. अगा मत्तोर अटोर लोक्कुक् येसन बदन्ना पोल्लेते दोर्कां पियालय ओनहेके बेस ह्ळसेक मत्तुर.

2 अगा येसुना मुन्ने वरोर काल्क-कय्क तोयाना बिमार मत्ता मनकल मत्तोर.

3 अस्के येसु, “नोमकेम रोजुननाड बिमार मत्तोर्कुंन बेस कियमळ दर्मसास्त्रम परकारम बेसा, बेस आयोना?” इंचि मसाना नियम बेस तेळियतोरुंन आनि परिसिल्लुकुन पूसकीतोर.

4 गानि ओर बतले वळकाकौटा चुपचाप मत्तुर. पजा येसु आ तोयसि मत्ता मनकनपोरोँ कय ताससि ओन बेस कीसि, अगटाल होना वेहतोर.

5 पजा, “मिहागटाल बोनादन्ना गाडदि आयि कौंदा आयि नोमकेम रोजुने कुहिते अरते, अदे रोजुने दान बिराना कुहिताल तेंडिरा?” इंचि येसु ओर्कुंन पूसकीतोर.

6 अयना ओर मात्रम येसुंक जवाब हिया पराहिल्लुर.

बस्केळक सिन्नागासि मनना

7 पजा अगा बोजनमहाटी वाता मनकालोर्कुं, पेद्दा मनकालोर उद्दाना जेगां पहकिसि उद्दालाय ह्ळुंदुर. अदुन ह्ळसि येसु ओर्कुं इल्हा वेहतोर.

8 “बोरन्ना मीकुन मरमिने गाटो तिनालय केयतस्के मिमेट हौंचि पेद्दा मनकालोर उद्दाना जेगाते उदमट. बारित्ते मीकुन बोर मनकल अयते केयतोर ओर मीकन्ना एक्को कदर मत्ता मनकनगुडा केय्सि मनानुर.

9 पजा मीकुन इव्वुर्कुंन केयता आ मनकल मिहगा वासि, “निमे उद्दिदिसि मनना जेगाते ईन उद्दाहीम” इंचि मीकुन अगटाल तेहानुर. अस्के मीवद सिग्गु हौंचि अटोर मुन्ने सिन्नाल्क उद्दाना जेगाते हौंचि हिळु उद्दा पीता.

10 अदुनहाटी बोरन्ना मीकुन गाटो तिनालय केयंतोर अस्के मिमेट हौंचि, सिन्नाल्क उद्दाना जेगाते हिळु उद्दिदिसि मंडु. बस्के अयते मीकुन केयता मनकल वासि मीकुन, “दादा, इगटाल तेदसि आ बेसता जेगाते हौंचि उद्दा,” इंचि वेहनुर अस्के मीवातोनि कलियसि गाटो तिनना अटोर हेडमितोर मुन्ने मीकु बेस कदर दोर्कां.

11 बारित्ते, बोर अयते ओनद ओरे ‘नना पेद्दान’ इंचि वेहकुंतोर, ओन पेन सिन्ना किय्यार आनि बोर अयते ‘नना सिन्नोन’ इंचि वेहकुंतोर, ओन पेन पेद्दा किय्यार.”

मीकु इनाम दोर्कता

12 पजा येसुन बोर अयते केयतोर ओ मनककगुडा येसु उदि पोल्ले वेहतोर. “निमे नर्का-पिय्यल बस्के बोजनम हिथ्यिना आ बोजनमते नीवा दंटागाहकुन, नीवा दादल-तम्पूहकुन, जीवातोर-हेडमितोरुंन, मीवा पक्का लोहकुना सिरमंत लोक्कुकुन केयुमा. ओर्कुंन केयते, निमे ओर्कुंन केयताप ओरगुडा नीकुन केयांतुर, इल्हा नीवा बाकि * तीरता.

13 ओर्कुंन केयनदानकन्ना निमे गरिबोर्कुंन, गुडोर्कुंन-गुनोर्कुंन, ताका परवोर्कुंन केया.

14 अस्के नीवा बाकि तीरसालय ओर नीकु बतल हिया परं. गानि पेनदा नदरते नीतिमंतल्क मत्तोर हासि मरां जीवाते तेदतस्के पेनदाहेदाल नीकु नीवा इनाम तप्पाकौटा दोर्कता.”

उदि पेद्दा बोजनमता वेसुड

15 येसु इत्ता आ पोल्लेतुन केंजसि, उद्दिदिसि गाटो तिनानोराव्टेटाल वरोर मनकल येसुन, “पेनदा राज्यमते उद्दिदिसि बोजनम कियना मनकल आसिवांद दोर्कतोर आंद,” इंचि इत्तोर.

16 अस्के येसु वेसुडिते इल्हा वळकालय दल्गतोर. वरोर मनकल पेद्दा कुळपु ईसि आ कुळपुं कु वेल्लेन मंदितुन केयतोर.

17 कुळपु तयार आतस्के, आन्नि तयारि आतां, बोर्कुंन अयते केयतोम आ मनकालोर्कुंन केय्सि तराहौट, इंचि आ मालाक ओना दासुन लोहतोर.

* 14:12 नम बाकि.

18 गानि ओर अंदोर इल्हा विनंति कियालय दलग्तर. मोदाला कलियतोर, नना उंदि पूना पोलम अस्तन, नाकु दान ह्छापीता, निमे बतल इनिना बेसे, नना वाया पर्रीन, नाकुन मापि कीम इत्तोर.

19 इंकावरोर, नना हेय्युं जोर्डिं कौंदां अस्तन, अव बल्हा कबळ कीतंगों नाकु अबुन ह्छापीता. नाकुन मापि कीम, नना वाया पर्रीन, इत्तोर.

20 मर्रा इंकावरोर, नना इंदकेन मरमि आतन, नना वाया पर्रीन, इत्तोर.

21 अस्के आ दासुड मल्लिस वासि जर्गुतद अंता ओना मालकुंक वेहतोर. अस्के मालकुंक इरगा होंग वाता. पजा ओर ओना दासुंक इल्हा वेहतोर. निमे बिराना सहरता हर्कुन पीसि, मूला-मूलाक होंचि गरिबोर्कुन, गुड्डोर-गूनेर्कुन, कुंठोर्कुन इगे केयकुंचि वा, इत्तोर.

22 अस्के दासुड मालक वेहतापे कीतोर. पजा मर्रा मल्लिस वासि मालकुंक इल्हा वेहतोर. मालक, निमे वेहतापे नना होंचि केय्पि ततन. अयनागानि इंका वेल्लेन जेगा भिगिल्लिस मंता, इत्तोर.

23 अस्के मालक दासुंक इल्हा वेहतोर. “निमे रोडकुन पीसि, हर्कुन पीसि होंचि लोकुकुन बतिमलाडसि पीसि वा. नावा लोन पुरागा निडिसि मनगोम अचोने.

24 नना मीकु निजम वेहचतन, नना मुन्ने केय्पि मत्ता वरोर मनकलगुडा नना हीता बोजनमता रसि ह्छा पसर, इंचि इत्तोर.”†

पिलान परकारम पिस्वर मनना

25-26 येसुनतौनि वेल्लेन मंदि लोकुकुलक ताकसि वासेके मत्तुर. अस्के येसु ओराहेके तिरियसि इल्हा वळकालय दलग्तर: “नहगा वांतन इंचि इनकुत्तोर बोरन्ना आयिर, ओर ओना यावन-बाबान, मुत्तो-पिलालकुन, तम्मुर-तादन, अक्कल-हेलाहकुन, इंका ओना जीवातुन एक्को पावमर कीते, ओर नावा सिस्सुड आया परोर.

27 अचोने आयका बोरे अय्ते ओना सतता कूस पीसि‡ नावा पज्जो वायोन इंतोर, ओरगुडा नावा सिस्सुड आया परोर.”

28 “मीवाव्टेडाल बोरन्ना आयिर, उंदि एत्तुंक एत्तु मिद्दे दोहंतन इनकुत्ते, ओर मोदाला आरामते उद्दिदिसि इद मिद्देतुन दोहालय बच्चोन वेल्ले कर्च वायार? इंका बतल-बतल अय्ते गावालोनो, अव अन्नि मंतंगां मरि हिल्लेंगां? इवुना बारेमते विचारम किय्योरा? कीतोर.

29-30 ओक्कला अल्हा कियाकोटे ओर पायवा अय्ते दोहंतोर गानि मिद्देता कबळ मात्रम पुरागा किया परोर. असंठस्के अदुन ह्छतोर अंतोर ओन कारेड्डालक कीसेके, अद ह्छट रो! ई मनकल मिद्दे दोहालय अय्ते सुस्व कीतोर गानि पुरागा दोहा पराहिल्लोर, इंचि इंतुर.”

31 “हिलाकोटे, ‘नना पदि वेय्कुना सिपाइलकुन पीसि इरवै वेय्कुना मंदि सिपाइलकुन गेल्सा परांतना?’ इंचि गिच्चचोगुडा विचारम कियाकोटा लडाइ कियालय दांतोर! असंतोर बोरन्ना राजाल मंतोरा?

32 ओक्कला अल्हा कीते आ राजाल बोनतौनि अय्ते लडाइ कियानद मंता, ओना सिपाइलक लक्कु मननेके इच्चोर विस्वासमता सिपाइलकुन एदुर लोहचि सांति-समादानम कियना विचारम कीतोर.

33 इल्हेने मीवाव्टेडाल बोरन्ना आयिर, मिहगा मत्तव अन्नि आस्ति-पास्तिन होळसोन इंतोर, ओर नावा सिस्सुड आया परोर.”

रसि हिल्लुवा होव्वोर

34 “होव्वोर बेसे मनंता गानि होव्वोर, होव्वोर रसि वायाकोटे, अव्ते मर्रा बल्हा होव्वोर रसि तरा परांतोम?

35 असंटा होव्वोर तोळिते कल्पालयगुडा ओज्जो, एरुवाहाटीगुडा ओज्जो. अद सिराप पलाते पोहचियालये ओज्जंता. बोर्कु केंजालय केव्क मंतां ओर केंजट.”

15

तप्सोत्ता गौंरता वेसुडि

1 उंदि रोज कर वसुल कियानुर आनि पापि लोकुकुल येसुना पोल्ले केंजालय ओनगा जमा आतुर.

2 जमा आतद ह्छसि, परिसिलकु आनि दर्मसास्त्रम कराहना गुस्लक येसुन, “ई मनकल पापि लोकुकुलक दमर्गेके केय्पि उपसंतोर अल्हेने ओरतौनि कलियसि गाटोगुडा तितोर,” इंचि गुल्गसेक इत्तुर.

3 ओर इनानद केंजसि येसु ओर्क उंदि वेसुडि वेहतोर.

4 “मी लोपेटाल वरोनगा नूर गौंरें मंतां इनकुंठ. अबुनाल उंदि गौंरें तप्पिस होनानय्ते, कळमता टौबै तोम्मिद गौंरें अग्गेन मंदा वाटसि, तप्सोत्ता आ उंदि गौंरें दोर्कनदाका दान पहकालय होन्नोरा?

† 14:24 इद वेसुडिते येसु बोजनम इत्ता मनकन पेनदालेसी ह्पसंतोर. आनि बोजनमतुन बारे पेनदा राज्यमलेक्का ह्पसंतोर. अरालय आनि हायालयगुडा तयार मनमळ.

‡ 14:27 कूस पीसि तकलिप

5 पजा अद गॉरे दोर्कतस्के, ओर वेल्लेन कूस आसि दान हट्टापोरों वाटकृचि पीसि वांतोर.

6 वासि, दंटातोरकुंन, लोता पक्कातोरकुंन केय्सि, 'नावा तप्पोत्ता गॉरे नाक दोर्कुता, नावातोन कलियसि आनंदम कीम्ट,' इंचि इंतोर.

7 नना मीक वेहांनद बतल इत्ते, बोर्क अय्ते मनसु मार्सकुनना अब्सरम हिल्ले, असोटा टोबे तोम्मिद मंदि नीतिमंतुलकुना बारेमते आयना आनंदमकन्ना, वरोर पापि मनकल मनसु मार्सकुल्ले ओनाहाटी स्वर्गमते बच्चोरो आनंदम आंता," इंचि वेहतोर.

कोत्ताना वेसुडि

8 "मर्रा उंदि वेसुडि वेहांतन केंजाट. उंदि मुरतटगा पदि एंडि कोत्तां मत्तां. आ पदि कोत्तानाल उंदि कोत्ता बगानो अरसि होत्ता. अस्के अद मुरतळ सिमलि निरिच्छि, लोनअंता हेय्सि आ कोत्ता दोर्कनदाका पहकंता.

9 पजा अद कोत्ता दोर्कतस्के, दाना दंटातवुन, लोता दग्गेटवुन केय्सि, 'नावद बगानो अरसोत्ता कोत्ता दोर्कुता, मिमेत नातोन कलियसि आनंदम कीम्ट,' इंचि इंता.

10 नना मीक वेहांतन, इदुनलेसीगे वरोर पापि मनकल ओना पापमताल मनसु मार्सकुल्ले ओनाहाटी स्वर्गमते पेन दाना दूतानतोन आनंदम कीता," इंचि इत्तोर.

लोताल पेय्सि होत्ता मर्रिना वेसुडि

11 येसु इंकुंदि वेसुडि वेहांतन. "वरोर मनकंक इव्वुर मर्क मत्तुर.

12 उंदि रोजु सिन्ना मर्रि ओना बाबोन, बाबा, संपत्तिताल बच्चोन नावा पालु मंता, अद नाकु पंचि हीम, इत्तोर. इत्तस्के ओना बाबो संपत्तितुन इव्वुर मर्कुक पंचि हीतोर."

13 "कोन्नि रोजकुना पजा, सिन्ना मर्रि ओना पालुक वाता संपत्तितुन बोत्तिगा पीकुंचि, बेकेनो लक्कु देसेम पेय्सि होत्तोर. अगा होंचि बोगम कबाहकुने ओना संपत्तितुन नासडेम कीतोर.

14 ओनगा मत्तव अंता मारतस्के आ देसेमते पेद्दा करवु अरता, ओनगा बतले हिलाकॉटा आता.

15 अदुनहाटी ओर आ देसेमता वरोर मनकनगा जीतम मत्तोर. आ मनकल ओना पोलालकुने पदिदें मेहालय ओन लोहचीतोर.*

16 पजा ओर पदिदें मेयाना मेतातुन तिचि पीर निहकन बारे इंचि इनकुंदुर, गानि अद मेता इंका ओनकु बारे हिथ्या हिल्लुर."

17 "अस्के ओनकु लोता मति वाता, नावा बाबानगा बच्चुरो जीतागाहक मंतुर, ओर तिल्ले मारवच्चोन गाटो अगा मंता, गानि नना बारे इगे कर्वुक हासेके मंतन.

18 नना ई देसेम होळसि, नावा बाबानगा मल्लि दांतन. होंचि, 'बाबा, स्वर्गमता पेन आनि नीकु विरोदमते नना पापम कीतन.

19 इंदके नना नीवा मर्रिन लायक हिल्लेन गानि निहगा नाकुन नीवा जीतागानलेसी ईरकुन इंचि इंतन,' इल्हा इंतन, इनकुत्तोर.

20 पजा ओर अगटाल ओना बाबोनहेके पेय्सतोर. पजा ओर ओना बाबाना लोतुक वेल्लेन लक्कु मत्तोर अस्के ओना बाबाल ओन हूळतोर. मर्रिन हूळसि बाबोंक वेल्ले पापम अनपिस्ता. अदुनहाटी ओर एदुर वितसि होंचि ओन चातिक अदमुकुंचि बुरतोर.

21 अस्के मर्रि बाबोन, 'बाबा, स्वर्गमता पेन आनि नीकु विरोदमते नना पापम कीतन. इंदके नना नीवा मर्रिन लायक हिल्लेन,' इत्तोर."

22 गानि बाबाल ओन लोन तच्छि, जीतागाहकुनतोन, बिराना होंचि बेसता कपडि तच्छि ईनकु केरहट, ईना वेलुंक उंदि मुद्दा दोस्सट, कालकुंक हेरपुहक केरहट.†

23 अल्हेने बेस बल्लसता कुर्रितुन तच्छि कोय्यट, अदुन तिचि मनम कूस आकोम.

24 बारित्ते, नावा मर्रि नहागटाल वेल्लेन लक्कु होंचि हासोत्ताप मत्तोर, इंदके ओर मल्लि वातोर. तप्सोंचि मत्तोर गानि इंदके दोर्कतोर, इंचि इत्तोर. इल्हा ओर कूस आयालय दलगुत्तुर.

पेद्दा मर्रि होंग आंतोर

25 "पजा बतल आता इत्ते, ओना पेद्दा मर्रि नेदहेके होंचि मत्तोर. ओर नेदाल लोन वायानेके लोता दग्गेरा एवतोर अस्के ओन्क पाटां पारानद, एगारनद अल्लिकर केंजावाता.

26 केंजा वातस्के ओर वरोन जीतागान केय्सि, लोन बतल जर्गुसंता? इंचि पूसकीतोर.

* 15:15 यहदि लोक्कु पदिदें मेहमळ इत्ते अटोर्कन्ना सिन्नातानम इनकुंदुर. अल्हेने पदिदन इटते, अबुना हब्विन तिल्ले मुट्टळ इंचुत्तुर. † 15:22 बाबो मर्रिंकु, ओना अदिकारम आनि कदरतुन मर्रा हीतोर. इदुन ह्युसालय वेलुंक मुद्दा दोसतोर, कालकुंक हेरपुहक केराहतोर.

27 अस्के आ जीतागाड, 'नीवा तम्मुर बेस मल्लिस वातोर. अदुनहाटी नीवा बाबाल, बेस बल्लसा कुरांतुन कोय्या वेहातोर,' इंचि इत्तोर."

28 "इद पोल्ले केंजसि पेद्दा मर्रिक इरगा होंग वाता. ओर लोप्पो होळियोन इंचि पलातेन मत्तोर. अस्के ओना बाबाल पलाते वासि, ओन समजांचलय दलगतोर.

29 गानि पेद्दा मर्रि बाबोन, इच्चु वसनाल नना नीवा सेवा कीसेके वातन, नीवद बद्दे आदेसतुन नना नेम्हा हिल्लेन. गानि नावा दंटातोरतोनि कलियसि कूस आयालय, नाकु निमे बस्केन उंदि एटि पोरीनगुडा हिया हिल्लिन.

30 गानि नीवा ई मर्रि, नीवा संपत्तितुन बोगम कबाहकुने पूरा नासडेम कीतोर, ओनाहाटी निमे बेस बल्लसा कुरांतुन कोय्या वेहतिन, इंचि इत्तोर."

31 "इत्तस्के ओना बाबाल, नावा पेडा, निमे बस्केळकु नावातोनि मनांतिन, नहगा बतल-बतल अय्ते मंता, अद अंता पूरा नीवादे आंद.

32 गानि ईर नीवा तम्मुर वेत्लेन लक्कु होंचि हासोत्ताप मत्तोर, इंदके पिस्सि मल्लिस वातोर. तप्सोंचि मत्तोर गानि इंदके दोर्कतोर. अदुनहाटी मनम कूस आयमळ गावाले इत्तोर." इल्हा वेहचि येसु वेसुडि वेहमळ महतोर.

16

उसार दिवांजि

1 पजा येसु सिस्थुलकुंकगुडा वेहालय दलगतोर: "वरोर सिरमंत मनकल मत्तोर. ओनगा वरोर दिवांजि मत्तोर. सिरमंत मनकानगा बोरो लोकुलक वासि, 'नीवा दिवांजि नीवा दनमतुन नासडेम कीसंतोर,' इंचि वेहातुर.

2 अस्के सिरमंत मनकल दिवांजिन केय्सि, 'नीवा बारेमते इल्हा बारि केंजसेक मंतन? इंदके नीकुन दिवांजि कबळते ईरा पर्रोन, निमे इच्चु रोञुक कीता कबाटद पूरा इसाब हीम,' इत्तोर.

3 इत्ता पजा आ दिवांजि, 'इंदके नना बतल कीकन? नावा मालक अय्ते नाकुन कबळ पोर्रीटाल तेंडसंतोर. इंदके नहगा कास्तकारि कबळ कियानचो बलम हिल्ले आनि बिचचम तलकालय नाकु सिग्गु वांता,' इंचि विचारम कियालय दलगतोर.

4 'नाकुन दिवांजिता कबाटाल तेंडिना गानि लोकुलक ओरा लोहकुने केयमळ गावाले इत्ते नना बतल कियगोमो अद नाकु तेळियता,' इंचि इनकुत्तोर.

5 इनकुंचि सिरमंत मनकंक बोर अय्ते बाकि मत्तुर, ओर्कुन वरोन-वरोन केयतोर, केय्सि वरोन पूसकीतोर, 'निमे मालकुंक बचचोन बाकि मंतिन?'

6 'नालुं वेय्कु लीटर्क जय्तुन निय बाकि मंतन,' इंचि इत्तोर. इत्तस्के दिवांजि ओन, 'इद पीम नीवा काता बुक आनि बिराना दीन रोंड वेय्कु लीटर्क रासा,' इंचि इत्तोर.

7 मर्रा इंकावरोन, 'निमे बचचोन बाकि मंतिन?' इत्तोर. ओर, 'नूर गिदुं दें गोहकु हियना मंतन,' इंचि इत्तोर. इत्तस्के ओन इंका, 'इद पीम नीवा काता बुक! इवने एनबै गिदुं दें रासा,' इंचि इत्तोर.

8 "पजा सेड्डा कबाहक कियाना दिवांजि तेल्विते कीता कबाहकुन आ सिरमंत मनकल हळसि, 'निमे उसार मंतिन' इंचि ओन इत्तोर. इल्हेने पेनदा लोकुलकुंकनना एकको, पेनदुन एरपाट किय्युवा दुनियाता लोकुलक वरोरक-वरोर हियमळ-एतमळते वेल्ले तेल्विते मनांतुर.

9 नना वेहानद बतल इत्ते, इद दुनियाते मिमेट संपलिच्ता दनमतुन कर्च कीसि, दंटातोर्कुन दोर्किचकुंट, बारित्ते अद दनम बस्के अय्ते मारंता अस्के, बस्केळक मनना लोहकुने मीक जेगा दोर्कीता.

10 "सिन्ना पोल्लेतेगुडा बोर अय्ते विस्वासमलायक मंतोर ओर पेद्दा पोल्लेतेगुडा विस्वासमलायक मंतोर. अल्हेने बोर अय्ते सिन्ना पोल्लेतेगुडा विस्वासमलायक हिल्लोर ओर पेद्दा पोल्लेतेगुडा विस्वासमलायक हिल्लोर.

11 अदुनहाटी ओक्कला मिमेट दुनियाते संपलिच्ता दनमतगा विस्वासमलायक हिलाकोटे, पेन दाना राज्येयता निजम दनमतुन मीवा कय्दे बल्हा हि्य्यार?

12 मनद आयवा दनमता बारेमते मिमेट विस्वासमलायक हिलाकोटे, बद दनमतुन अय्ते पेन मीक हीतन इंचंता, अद मीक बल्हा दोर्कार?

13 "वरोर जीतागाल इव्वुर मालकुलकुनगा सेवा किया पर्रोर. अल्हा सेवा कीते वरोन बेस पावरम कीतोर, इंकावरोन हयसोर, हिलाकोटे वरोना पोल्ले केंजंतोर, इंकावरोना पोल्ले बारे केंजोर. अल्हेने मिमेट पेनदुन आनि दनमतुन उंदे मल्का सेवा किया पर्रोर," इंचि वेहतोर.

पेनदा पोल्ले बस्केळक मंनंता

(मत्तयाल 5:31-32; 11:12-13; मरकुस 10:11-12)

14 येसु इव पोल्लें वेहनेके, अगा परिसिलक मत्तुर. ओर कोत्ताना पोर्रो बागा जीवा कियुंदुर. अदुनहाटी येसुना पोल्लें केंजसि ओन कारेड्डालक कीतुर.

15 पजा येसु ओर्कुन, “मिमिमे लोकुकुना मुन्ने, ‘मोमोट नीतिमंतुलकुम’ इतिर, गानि पेन मीवा मनसुन एरपाट कीता. बव पोल्लें अय्ते मनकना विचारमते कदरतव मंतां, अव पोल्लेन पेन बिल्कुल हय्यो.”

16 “बापतिस्मा हिथ्यना योहान वायानादाका, लोकुकुल मूसाना नियमकु आनि पेनदा कबुरतोर रासता पोल्लेन परकारम ताकुंदुर. दाना पजा, पेनदा राज्येमा बारेमते बेसता कबुर लोकुकुकुं वेहमळ जर्गसिक मंता. वेलेटुर लोकुकुल पेनदा राज्येमते जबरदास्तिते होळियसेक मंतुर.

17 ओक्कला बूमि, मब्बु नासडेम आसि होना परीता गानि दर्मसास्त्रमते रासतद उंदि सिन्ना पोल्लेगुडा नासडेम आयो.”

18 “बोरे आयिर, मुन्नेटा मुल्लोन होळसि, इंकुदानतोनि मरमि आयानय्ते, ओर बोगमतनम कीतोर. अल्हेने बोरे आयिर, मुय्देन होळसीता मुर्ताटुन मरमि आयानय्ते, ओरगुडा बोगमतनम कीतोर.”

सिरमंत मनकल आनि गरिब मनकल

19 इंकुदि पोल्ले केंजाट, बरोर सिरमंत मनकल मत्तोर. ओर, एक्को दराता नेडि पडिना रंगुना मलमल कपडि केर्सि रोज सुकमते, आनंदमते मनुंदुर.

20 गानि बरोर लाजर इनानोर गरिब मनकल मत्तोर. ओनकु मेंदुलंता पुनकु आसि मत्तां. ओन रोज सिरमंत मनकना गलमातगा बोरो तच्चि, होळसि होनुंदुर.

21 सिरमंत मनकल तिननेके हिळ अरतव मेल्कुलक तिचि पीर निहंतन इचि अगा हळसेक मनुंदुर. इंका ओना मेंदुलता पुनकुन नय्कु वासि नाकुंतुं.

22 उंदि रोज बतल आता इत्ते, आ गरिब मनकल हासोत्तोर. अस्के पेनदा दूतां वासि ओना जीवातुन स्वर्गमते पीसि ओसि, अब्राहामुना* पक्काते इरतां. कोन्नि रोजकुना पजा सिरमंत मनकल इंका हातोर. ओन बोदा दोसतुर.

23 सिरमंत मनकना जीवा नरकमते तकलिपेन तनलाळसेक मननेके वेल्ले लक्कुने ओनकु अब्राहाम दिसतोर.† ओना पक्काते लाजर मत्तोर.

24 अस्के ओर अब्राहामुन जोरसे केसि, “मावा एनकटा मातिर दादा, नावापोर्रो दया कीसि लाजसुन नावाहेके लोहचीम. नना तडमिमे तनलाळसेक मंतन. ओर वासि ओना वेल्दुन एते मुळाहचि नावा नाल्केतुन सल्लागा कियिरकांटी,” इचि इत्तोर.

25 अस्के अब्राहाम ओन, “हळा पेडा, निमे मति कीम, निमे पिस्सि मननेके नीकु बतल गावाले मत्ता अव अन्नि दोर्कतां, गानि लाजसुन मात्रम अव अन्नि सुकालक दोर्का हिल्लें. इंदके इगे ईनकु बतल तकलिपि हिल्ले गानि निमे मात्रम तडमिमे तनलाळसेक मंतन.

26 मरा उंदि पोल्ले बतल इत्ते, मीवा-मावा नड्डुम उंदि पेदुदा लोदुका मंता. अदुनहाटी मावाहेंदाल मीहेके बोर्नना वाकोम इत्ते वाया पसर, मिहगटाल बोर्नना मावाहेके वाकोम इन्ना गानि वाया पसर, इचि इत्तोर.

27 अस्के आ सिरमंत मनकल, ‘अल्हा अय्ते मातिर दादा, नना नीकु विनंति कीतन, लाजसुन नावा बाना लोन लोहचीम.

28 बारित्ते नाक हेय्युर तादहक-तम्मूहक मंतुर. ईर होंचि इव पोल्लें ओर्क वेहेते, ओर इस्रोटा तकलिपना जेगाताल तप्पानुर,’ इचि इत्तोर.

29 इत्तस्के अब्राहाम, ‘ओरगा मूसाल रासता नियमकु, पेनदा कबुरतोर रासता पुस्तकालक मंतां. अवुन हद्विसि, अल्हे केंजिर, अल्हे ताकिर,’ इत्तोर.

30 अस्के सिरमंत मनकल, ‘अल्हा आयो अब्राहाम दादा, हातोर लोप्योटाल बोर्नना होंचि ओर्क वेहेते, ओर पापालकुनाल मनसु मार्सकुंतुर,’ इचि इत्तोर.

31 अस्के अब्राहाम, मूसाल रासता नियमकु, पेनदा कबुरतोर रासता पोल्लेन बोर् अय्ते केंजुर, ओर्कु वेहालय हाता मनकल जीवा अरसि होंचि वेहाना गानि ओर केंजुर,” इचि ओन इत्तोर.

17

माप कियमळ आनि विस्वासमता बारेमते कराहमळ
(मत्तयाल 18:6-7,21-22; मरकुस 9:42)

1 उंदि रोज येसु ओना सिस्सुलकुन इल्हा इत्तोर. “पापमते अरहना पोल्लें वायाका मननों, अव अय्ते वांतगे. गानि अव बोनाहेंदाल वांतांगो, ओन्क बच्चोन गोसा वायार!

* 16:22 अब्राहामएनकटा इस्राएलतोर वंसमते अब्राहाम इनानोर पेदुदा मनकल मत्तोर ओर पेनदा पोल्लेते ताकुंदुर. † 16:23 यहूदिकुना विचारमते, बोर् अय्ते सत्तेमते मंतुर, ओर हासोत्तारिले अब्राहामुना पक्काते दांतुर बोर् अय्ते सत्तेमते हिल्लुओर तिप्पलक मत्ता जेगाते दांतुर, अब्राहामुना पक्काते मत्तुर, तिप्पलकुना जेगाते मत्तुर ईर आकिर न्यायमदाका अगेन मंतुर.

2 नापोर्रो विस्वासम कियना ई सिन्ना पेडानसंतोन बोरन्ना पापमते अरहते, ओना बोंळगेक जोत्ता बंडा दोहाचि ओन समुद्रमते ओसि वाटतेने ओनाहाटी बेस मनंता.

3 अदुनहाटी मिमेट उसारते मंट्.

“मीवा दंटातोर पापम कीते ओन समजांचट्, ओर कीता पापमताल मनसु मार्सकुत्ते, ओन मापि कीम्ट्.

4 उंदि रोजुने ओर एडुं मलकां तपु कीते, एडुं मलकांगुडा ओर मिहगा वासि, नना तपु कीतन, इंदकेटाल इल्हा किय्योन, इंचि ओपुकुत्ते, ओन मापि कीम्ट्,” इंचि येसु वेहातोर.

5 इल्हा येसु वेहतद केंजसि, “मावा विस्वासमतनु बेसांगोटा सामि,” इंचि ओना प्रेरितुल्क इत्तर.

6 अस्के सामि ओकुंन इल्हा इत्तोर. “ओक्कला मीलोपो आवाल्कुना पेळेतचो विस्वासम मनिनागानि, मिमेट इद पेदुं दा ताडि मरातुन, ‘निमे नीवा हिहकुनतोनि पीकका वासि, समुद्रमते होंचि अर्सा,’ इंचि इत्ते अद मरा मीवा पोल्ले केंजंता,” इंचि इत्तोर.

जीतागाना जिम्मेदारि

7 येसु मर्रा इल्हा वेहातोर, “मिहगा बोनागाना वरोर जीतागाल मंतोर इनकुंट्, ओर नांगेल पूहाचि हिलाकोटे गोंरे मेहाचि, बस्के अय्ते ओना कबाटाल लोन वांतोर, अस्के, ओर वाता वायमळे, ‘गाटो तिनालय उदा,’ इंचि इतिरा? बस्केने इन्निर.

8 गानि, ‘नाहाटी गाटो अट्टा, बेर कपडि केरसि नाकु गाटो वाटसि हीम, नना तित्ता पजा निमे तितन’ इंचि इतिर.

9 निमे वेहता कबळ जीतागाल कीतोर इंचि ओन्क, दन्यवाद इंचि बस्केने हिथ्यिर.

10 अल्हेने मिमेट इंका पेन वेहता कबळ पूरा मारतस्के, ‘मोमोट मामुल जीतागाहकुम आंदुम, माक बद कबळ कियाना मत्ता अदे कबळतुन कीतोम’ इंचि इट्ट्,” इंचि येसु वेहातोर.

येसु मोंडिरोगमतोकुंन बेस कीतोर

11 पजा येसु येस्सलेम होनानेके सामरिया आनि गालिल एरियाना नड्डुमताल होंचेके मत्तोर.

12 अस्के बदो उंदि नाटेने होळियनेके कुस्टरोगम आतोर पदि मंदि, हर्दुक इच्चुर लबकु नित्तिसि मत्तुर.

13 ओर येसुन हळसि, “ए येसु, ए सामि! मावा पोरो दया कीम,” इंचि वरगेयतुर.*

14 येसु ओकुंन हळसि, “मिमेट होंचि, मीवा मेटुल पेर्मालोकुंक हुप्सट्,”[†] इंचि इत्तोर. इत्तस्के ओर होननेके-होननेकेन बेस आतुर.

15 अस्के ओरागटाल वरोर मनकल नना बेस आतन, इंचि हळसि पेनदुन जोर-जोरसे तलसकुंचेके येसुनगा मलिसि वातोर.

16 वासि ओना कालकुनपोर्रो अरसि ओन्क दन्यवाद कीतोर. ओर सामरिया मनकल मत्तोर, इत्ते सिन्ना जातितोर मत्तोर.

17 अस्के येसु, “पूरा पदि मंदि बेस आया हिल्लिरा? कळमता तोम्मिद मंदि बेके होत्तुर?

18 पेनदुन स्तुति कियालय, ई सामरि जातितोन होळसि, कळमतोर बेस आतोर बोरे वाया हिल्लिरा?” इंचि ओन इत्तोर.

19 मर्रा येसु, “तेदिस होन! निमे विस्वासम कीताहाटी बेस आतिन,” इंचि ओन इत्तोर.

पेनदा राज्येम वायमळ

(मत्तयाल 24:23,27,28,37-41)

20 “पेनदा राज्येम बस्के वांता?” इंचि उंदि मलका परिसिलकु येसुन पसकीतुर. अस्के येसु, “पेनदा राज्येम कळकुंक दिस्सेक वायो.

21 पेन मीवा नड्डुम राज्येम कीता. अदुनहाटी पेनदा राज्येम इगे मंता, अगा मंता इंचि लोकुल्क इन्नुर,” इंचि वेहातोर.

22 अद वेहता पजा सिस्युल्कुन इल्हा इत्तोर, “मनकना रूपमते पुटतोर वायाना रोजकुनाल उंदि रोजुन हळना विचारम कीतिर, गानि मिमेट हळ्वा पर्रिर इसोंटा वेला वायार.

23 अस्के, हळ्वाट! मनकना रूपमते पुटतोर इगे मंतोर, अगा मंतोर इंचि लोकुल्क इनानुर, गानि मिमेट अगा होनमट, ओरा पज्जो ताकमट.[‡]

24 बारित्ते मब्वुने उंदि बाजुंक मेरस्ते इंकुंदि बाजुंक बल्हा वेलगु अरंतनो, मनकना रूपमते पुटतोन नना वायानस्केगुडा अल्हे आयार.

25 गानि दानकन्ना मुन्ने नाकु बागा तकलिप वायार. इद पीळितोर नाकुन हय्सुर.”

26 नोहाना रोजकुने बल्हा जर्गता, अल्हेने मनकना रूपमते पुटतोन नना वायानस्के जर्गार.

* **17:13** यहदि लोकुल्क कुस्टरोगम आतोकुंन इट्टाकोदु, ओकुंन नाटेना फलाते ईर्दु. † **17:14** लैथ्यवस्ता 14:1-32 ‡ **17:14** कुस्टरोगम आतुर बोर अय्ते बेस आयुंदुर, ओर होंचि, मोमोट बेस आतोम, इंचि पेर्मालोकुंक हुपियुंदुर. पेर्मालोकुं ओकुंन मिमेट बेस आतिर इंचि इत्ते, ओर लोकुल्कने होंचि कलियुंदुर. ✧ **17:23** मरकुस 13:21

27 नोहाल डोंगाते नेंगनदाका लोकुकल्क तिचेके-उंचेके मत्तुर, मरमिं कीसेके, आसेके मत्तुर. अस्के पेद्दा कम्मुड वासि अंतोर्कुन मुळाहता.

28 लोतुना कालमतेगुडा अल्हेने आता. लोकुकल्क तिनुड, उनुळ, अस्सुड, अम्मुड, वीतुड लोहकु दोहडु कियुंदुर.

29 गानि लोतु सदोम सहरताल बस्के अथे पेयसतोर, अस्के मब्बुनाल तडमि डोगां अरसि अद नाटेनोर अंतोर्कुन नासडेम कीता.

30 अथे मनकना रूपमते पुटतोन नना वायाना रोजुनेगुडा अल्हे आयार.

31 अदुनहाटी अद रोज बोर अथे लोतपोर्रीं मंतोर, लोता लोप्पो मंदना सामानतुन पीसि वायालय हिळु रेयानायो. अल्हेने बोर अथे नेलिने कबळ कीसेक मंतोर, ओर मल्लिस वायानायो. ✧

32 लोतुना मुत्तो पेनदा पोल्ले केजवा, सदोम सहरतुन तिरियसि हळतस्के, दानकु बल्हा आता, अदुन मति कीम्टु. ✧

33 “बोर अथे ओना जीवातुन ई दुनियाते पिसागोटालय हळांतोर, ओर ओना जीवातुन पोगोटकुंतोर. बोर ओना जीवातुन नावाहाटी पोगोटकुंतोर, ओन्क बस्केळ्ळक पिस्सना पिस्वर दोर्कता. ✧

34 नना मीक वेहानद बतल इत्ते, अद नर्का उंदि कटुलते इव्वुर मनानुर. ओरावेटाल वरोन तेहाकुचि ओयमळ जर्गता, इंकावरोन अग्गेन होळसमळ जर्गता.

35 अल्हेने रौडु मुर्ताहक कूळसि गट्का नोरसेक मंतां, उंदिदुन ओयमळ जर्गता, इंकुंदिदुन अग्गेन होळसमळ जर्गता.

36 इव्वुर मनकालोर पोलमते मत्ते, पेन वरोन पीसि ओयार, वरोन बारे अग्गेन होळसिय्यार,” इंचि इत्तोर. ‡

37 अस्के सिस्युल्कु येसुन, “इव पोल्ले बगा आयानुं सामि?” इंचि पूसकीतुर. अस्के, “बगा अथे पीनगु मंता, अग्गेन गद्दालि जमा आंतां,” इंचि येसु इत्तोर.

18

पारतना कीसेकेने मंदना

1 पजा येसु ओना सिस्युल्कुन, “रोज पारतना कीसेके मंदांन, पारतना कियानाहाटी बस्केने पजोळ्ळक आयामनि,” इल्हा इंचि उंदि वेसुडि वेहातोर.

2 “उंदि नाटेने वरोर न्यायम कियाना पेद्दा मनकल मत्तोर. ओर पेनदुक वेरियाकौंदुर, लोकुकल्कुना पर्वा कियकौंदुर.

3 अदे नाटेने उंदि मुंडामोस्ता मुरतळ मत्ता. अद ओनगा रोज वासि, ‘नावापोर्रीं अन्यायम आता, नाकु न्यायम कियमळ गावाले,’ इंचि ओन इन्दु.

4 ओर वेल्लेने रोजकुनदाका दाना पोल्लेन केंजाकौंटा मत्तोर. गानि उंदि रोज ओर इल्हा विचारम कीतोर. ‘नना पेनदुक वेरियानोन आयोन, मनकालोर्कुना पर्वा कियानोन आयोन.

5 अथनागानि इद मुरतळ रोज वासि नाकुन परेसान कीसेक मंता. अदुनहाटी इंदके नना दीना न्यायम कीतन. हिलाकौंटे इद बस्केळ्ळे नाकुन परेसान किय्यार,’ इनकुत्तोर.”

6 मर्रां सामि इत्तोर, “सेड्डा मजिस्टर बतल इत्तोर, अद पोल्लेतुन मति कीम्टु.

7 पेन परेकुत्ता लोकुकल्क न्यायम आयामोम इंचि नर्का-पल्हे पेनदुन पारतना कीसेक मनांतुर, पेन ओर्क सहाय्यम कियालय आलसेम किय्यारा?

8 नना मीक वेहासेक मंतन, पेन ओरा न्यायम बिराना किय्यार. अथनागानि मनकना रूपमते पुटतोन नना मल्लिस वातस्के, इद बूमिते विस्वासम होळसाकौंटा पारतना कीसेक मनानोर दोर्कानुरा?” इंचि वेहतोर.

मनम पेनदा मुन्ने सिन्नागासि मनमळ गावाले

9 बोर अथे लोकुकल्क मोमोटे नीतिमंतुल्कुम इन्कुचि सतता पोर्रें बरोसा इर्रिं, इंकावरोन सिन्ना हळुंदुर, ओराहाटी इंका येसु उंदि वेसुडि वेहतोर.

10 इव्वुर मनकालोर गुळिते पारतना कियालय होत्तुर. ओरंटे वरोर बारे परिसि मनकल, इंकावरोर बारे कर वसुल कियानोर.

11 परिसि वेरे निल्लिसि पारतना कियालय दल्यतोर, ए पेनबाबा! नना इंका वरोनलेसी दौगन आयोन, इंकावरोन बौकिचानोन आयोन, बोगम कबाहक कियानोन आयोन, ई कर वसुल कियानोनलेसी लोकुकल्कुन मुळहानोन आयोन.

12 वारमकु रौडु मल्कां ओक्कापोद्दु मंनंतन, नावा कमयता पदि तसकुनाल उंदि तसगुडा नीकु हीतन, इंचि इत्तोर.

13 “गानि कर वसुल कियानोर लक्कु निततोर, ओनकु पोर्रा हळालयगुडा दैरेम आयाहिल्ले. ओर चातितुन तंचेके पारतना कीतोर, ‘ए पेनबाबा, नना पापि मनकन आंदुन, नावापोर्रीं दया कीम,’ इंचि इत्तोर.

14 नना मीक वेहांतन गदा, ओरा इव्वरा लोपोटाल कर वसुल कियानोरे पेनदा मुन्ने नीतिमंतुड आसि लोन होत्तोर. गानि परिसि नीतिमंतुड आयोर. बारित्ते, बोर ओनद ओरे नना पेदुदोन इंचि इनकुंतोर, पेन ओन सिन्न्गा कीता. अल्हेने बोर ओनद ओरे नना सिन्नोन इंचि इनकुंतोर, पेन ओन पेदुदा कीता," इल्हा वेहचि येसु सामि वेसुडितुन महतोर.

येसु सिन्ना पिलालकुंक आसिवांद हीतोर
(मत्तयाल 19:13-15; मरकुस 10:13-16)

15 उंदि रोजु लोक्कुल ओरा सिन्ना पिलालकुंक येसु आसिवांद हियाना इंचि पीसि वायालय दलगतुर. गानि सिस्स्युल्क हळसि ओर्कुन रांगतुर.

16 गानि येसु पिलालकुन केय्सि इत्तोर, "पिलालकुन नाहेके वायाहीम्ट, ओर्कुन आपमट. पेनदा राज्येम इंसंटोरदे आंद.

17 नना मीक निजम वेहांतन, बोरे आयिर ओरा मनसुने पेनदा राज्येमतुन सिन्ना पिलालकुनालेसी ओप्कुन्तुर, ओर पेनदा राज्येमते होळिया परंर," इंचि सिस्स्युल्कुंक वेहातोर.

सिरमंतुल्क आनि पेनदा राज्येम
(मत्तयाल 19:16-29; मरकुस 10:17-30)

18 पजा यहुदिल्कुना वरोर लीडर इल्हा इत्तोर, "गुफु, निमे बेसतोन आदिन. बस्केळ्क पिस्सना पिस्वरता वारसदार आयानाहाटी नना बतल कीते बेस?" इत्तोर.

19 अस्के येसु ओन इल्हा इत्तोर. "नाकुन बारि बेसतोर इंतिन? बोरे बेसतोर आयोर, सिराप पेन उंदे बेसतद आंद.

20 नीकु पेनदा आदेसकु अय्ते एपाटे मंता: बोगमतनम कियमा, बोने हळकुमा, दोंगतनम कियमा, आबदुदम गवाइ हियमा, तल्लुर-बाबोना कदर कीम,"* इत्तोर.

21 अस्के ओर, "नना अय्ते इव आन्नि सिन्नास्केटाल कीसेकेन वातन," इंचि ओर इत्तोर.

22 ओर इत्तद केंजसि येसु ओन इल्हा इत्तोर. "इंदकेगुडा निहगा उंदि पोल्ले तक्को मंता. निहगा बतल अय्ते मंता, अदुंतता पूरा अम्मिसि, गरिबोर्कुंक तुसि हीम. अस्के नीकु स्वर्गमते दनम दोकारं, पजा नहगा वासि ना पज्जो ताका," इत्तोर.

23 गानि येसुना पोल्ले केंजसि, ओन्क इरगा दुक्कम वाता. बारित्ते ओर वेल्लेन सिरमंत मत्तोर.

24 येसु ओर्कुन हळसि इल्हा इत्तोर. "सिरमंतुल्क पेनदा राज्येमते होळियमळ इत्ते वेल्लेन कस्टम.

25 वरोर सिरमंत मनकल पेनदा राज्येमते होळियमळकन्ना लोटापेटा सुदि बोंगाताल होनमळ अळकगा मंन्ता," इत्तोर.

26 अस्के बोरे अय्ते येसुना पोल्ले केंजसि, ओर, "अल्हा अय्ते मरि मुक्ति बोर्क दोर्का परंता?" इंचि इत्तुर.

27 अस्के, "मनकालोरतोनि आया परंखा पोल्ले, पेन कियमा परंता," इंचि येसु ओर्कुन इत्तोर.

28 अस्के पन्नु "हळा, मोमोट अय्ते लोन-दारा होळसिसि नीवा पज्जो वातोम," इंचि इत्तोर.

29 अस्के येसु इल्हा इत्तोर, "नना मीक निजम वेहांतन. पेनदा राज्येमताहाटी ओना लोन-दारातुन, मुत्तोन, तम्मुह्क-दादालोर्कुन, पिलालकुन, तल्लुर-बाबोने होळसीतोरो,

30 आ मनकंक इद कालमते होळसीतवुंकन्ना बच्चोरो एक्को संपत्ति, जीवातोर दोर्कानुर, अल्हेने वायाना कालमते बस्केळ्क पिस्सना पिस्वरगुडा दोर्कारं," इत्तोर.

येसु ओना हामुरता बारेमे वेहांतोर
(मत्तयाल 20:17-19; मरकुस 10:32-34)

31 पजा येसु ओना पन्नेड सिस्स्युल्कुन बाजुंक ओसि इल्हा इत्तोर, "हळाट, मनम येस्सलेम होंचेके मंतोम. मनकना रूपमते पुटतोन, ना बारेमते पेनदा कबुरतोर बतलय्ते रासतुर, अव पूरा आंतो.

32 अगा नाकुन यहुदि आयवोरा कय्दे अप्पजेपनुर, अस्के ओर नाकुन सिडांचनुर, अपमानम कियानुर, नापोर्रो उस्कानुर,

33 पोर्टेटे तन्नुड आतस्के हळकानुर. गानि म्डीव रोजुने नना मर्रा जीवाते तेदंतन," इंचि वेहतोर.

34 गानि ओना सिस्स्युल्कुंक मात्रम ओर वळ्कता पोल्ले तेळिया हिल्ले. अद पोल्ले ओराहाटी मर्ममते मत्ताहेके, ओर्क बतल अर्तम आयाहिल्ले.

वरोर गुड्डिन येसु बेस कीतोर
(मत्तयाल 20:29-34; मरकुस 10:46-52)

35 पजा येसु यरिहो सहरता दगैरा एत्तोर. अगा हर्दा पक्काते वरोर गुड्डि बिच्चागाड बिच्चम तल्कसेके उंदिदसि मत्तोर.

36 ओना पक्काताल लोक्कुलुना मंदा होनना सप्पुड केंजसि, "इगे बतल आसेके मंता," इंचि पूसकीतोर.

37 अस्के बोरो ओन, "नासरेत नाटेना येसु इग्गेटाल होंचंतोर," इंचि वेहतुर.

38 वेहतस्के, "येसु, दाविद राजाना वंसमतोना! नापोर्रो दया कीम," इंचि आ गुड्डि वरगेयतोर.

39 अस्के ओना मुन्नेटाल होनानोर अंदोर ओन, “चुपचाप मन,” इंचि रांगतुर. गानि, “दाविद राजाना वंसमतोना, नापोरों दया कीम,” इंचि जोरसे मोल्कुनालय दल्गतोर.

40 अस्के येसु आगसि, “ओन नहगा पीसि वट,” इंचि हुकुम कीतोर.

41 पजा ओन येसुनगा तत्तस्के, “नना नीहाटी बतल कियना इंचि नी मनसु मंता?” इंचि येसु ओन पूसकीतोर. अस्के, “सामि, नावा कळकुना नदर दिस्सानाल कीम,” इंचि आ गुड्डि इत्तोर.

42 पजा येसु ओन, “इंदकेटाल ह्वालय दल्गा, नीवा विस्वासमे नीकुन बेस कीता,” इंचि इत्तोर.

43 अल्हा इत्ता इन्दुडे ओना कळकुंन नदर वासि पेनदुन तल्सकुंके ओना पज्जो होत्तोर. अगा मत्ता लोकल्क अल्हा आतद ह्ळसि, ओरगुडा पेनदुन तल्सकुनालय दल्गतुर.

19

येसु जकय्याना लोन दांतोर

1 अल्हा आता पजा, येसु यरिहो नाटेनाल होंचेके मत्तोर.

2 अद नाटेने वरोर जकय्या पोरोलतोर कर वसुल कियानोरा पोरो अदिकारि मत्तोर. ओर बागा सिरमंत मत्तोर.

3 येसु बोर आंदुर ह्ळंतन इंचि ओर इनकुत्तोर, गानि अगा वेल्ले गर्दि मत्ताहाटी ह्ळा परा हिल्लोर. बारित्ते ओर पोटीट्टेगा मत्तोर.

4 अदुनहाटी ओर येसु होनना हर्दुक मुन्ने वितसि, ओन ह्वालय उंदि नेडि मरा पोरो एकतोर. 5 येसु अद मरातगा एवत्स्के पोरो ह्ळसि, “जकय्या, बिराना हिळ रेय्या! इय्याला नाकु नीवा लोने आगाना मंता,” इंचि इत्तोर.

6 इत्तारिते जकय्याल बिराना मराताल रेय्यि, कुसिते येसुन ओना लोन ओतोर.

7 येसु जकय्याना लोन होतद ह्ळसि लोकुल्क, “ईर पापि मनकना लोन हेडमि इंचि होत्तोर,” इल्हा गुल्गालय दल्गतुर.

8 पजा जकय्याल नित्तिसि सामिन, “सामि, नावा सम्सारमताल सगम गरिबोर्कुंक हीतन, नना बोनना मुळाहचि येततद मत्ते, येततादानकनना नालु अंताल्क एक्को मलाहचि हीतन,” इंचि इत्तोर.

9-10 अस्के येसु, “ताप्सि होत्ता पापि लोकुल्कन पहकिसि, ओर्कुन पिसागोटालय मनकना रूपमते पुटतोन नना वातन. अदुनहाटी ईरगुडा अब्राहामुना वंसमते पुटतोर आंदुर इंचि, इय्याला ईना लोतोर पापमताल पिस्तुर,” इंचि वेह्तोर.

पदि बंगारम बंडिना वेसुडि (मत्तयाल 25:14-30)

11 लोकुल्क ओर वेहाना पोल्लें केंजसेके मत्तुर. अगटाल येस्सलेम सहर दग्गेने मत्ता. इंदके येसु येस्सलेमते एवत्स्के ओर पेनदा राज्येम निलाहनुर इनकुंकेके मत्तुर. अदुनहाटी येसु ओर्क उंदि वेसुडि वेह्तोर.

12 “वरोर पेदुदा वंसमतोर मनकल मत्तोर, ओर राजाल आसि वायालय लक्कुटा देसेम होत्तोर.

13 होनाका मुन्ने ओना पदि दासुल्कन केय्पि, मनकंक पदि बंगारम बंडि हीसि, ‘नना मल्सि वायानादाका इव कोत्ताने मिमेट दंदा कीम्टु,’ इंचि इत्तोर.

14 “गानि नाटेना लोकुल्क ओन हयसाकोदुर, अदुनहाटी, ‘ओर मापोरों राज्येम कियमळ माकु इस्टम हिल्ले,’ इंचि पेदुदा राजांक वेहालय पेरतोर्कुन ओना पज्जेन लोहतुर.

15 पजा आ मनकल राजाल आसि मल्सि वातोर. ओर बोर्क अय्ते कोत्तां हीसि मत्तोर ओर दंदा कीसि बच्चोन कमय कीत्तोर ह्वाणानाहाटी आ दासुल्कन केया वेह्तोर.

16 मोदाटा दासुड वासि, ‘मालक, निमे हीता पदि बंडिनतोनि नना इंका पदि बंगारम बंडि कमय कीतन,’ इंचि इत्तोर.

17 अस्के राजाल, ‘निमे बेस कबळ कीतन, निमे बेसता दासुन आंदिन, निमे सिन्ना कबळतगागुडा विस्वासमलायक मत्तिन, अदुनहाटी पदि नाहकुन ताकसालय नीकु अदिकारम हीतन,’ इंचि इत्तोर.

18 अल्हेने रोंडो दासुडगुडा वासि, ‘सामि! निमे हीता बंडिनतोनि नना इंका हेय्युं बंडि कमय कीतन,’ इंचि इत्तोर.

19 अस्के राजाल ओनगुडा, ‘निमे हेय्युं नाहकुन पोरो अदिकारिन आकिन,’ इंचि इत्तोर.

20 पजा इंकावरोर दासुड वासि, ‘सामि! इद ह्ळा निमे हीता बंगारमता बंडि. इदुन नना पेग्ने दोहाचि मक्किचि इरतन.

21 बारित्ते निमे कळक मनकन आंदिन, अदुनहाटी नना वेरियतन. निमे बद अय्ते इरा हिल्लिन अदुन तेंडकुंतन, निमे वीतवगा कोय्यतन,’ इंचि इत्तोर.

22 अस्के राजाल ओन इल्हा इत्तोर, ‘अरे निमे लंडु दासुन आंदिन! नीवा तोळ्दाल पेयसता पोल्लेतेन नीवा न्यायम कीतन. नना कळक मनकन, नना बद अय्ते इरा हिल्लेन अदुन तेंडकुंतन, नना वीतवगा कोय्यतन इंचि नीकु एपाटे मत्ता.

23 अय्ते नना हीता कोत्तातुन बेंकेते बारि वाटा हिल्लिन? नना मल्लिस वातस्के नावा कोत्तां वड्डितोनि एत्कुचि मन्नेन,' इत्तोर.

24 पजा दग्गेरा निल्लिसि मत्तोर्कुन इल्हा इत्तोर. 'मिमेट ओनागटाल आ बंगारम बडितुन एतट. एतसि पदि बंगारम बडि मत्तोन्गा हीम्टु,' इत्तोर.

25 अस्के ओर, 'अय्ते सामि, ओन्गा पदि बंगारम कोत्तां मंता गदा,' इंचि इत्तुर.

26 नना मीक वेहंतन, बोन्गा अय्ते पेनदा पोल्लेन तेल्लिचकुनना बुदिदे मंता, पेन ओन्क इंका हीता, गानि बोन्गा पेनदा पोल्लेन तेल्लिचकुनना बुदिदे हिल्ले, ओन्गा मत्ता बुदिदेतुनगुडा पेन एतकुन्ना.

27 गानि, 'ई राज्येम कियामनि,' बोर पगातोर अय्ते इत्तुरो, ओर्कुन नावा मुन्ने तच्चि हक्कट, इंचि मालक इत्तोर," इल्हा वेहचि येसु वेसुडितुन महतोर.

येसु सामि येस्सलेमते होळियंतोर

(मत्तयाल 21:1-11; मरकुस 11:1-11; योहान 12:12-19)

28 इव पोल्लें वेहता पजा येसु लोक्कुनना मुन्ने-मुन्ने येस्सलेमताहेके ताक्सेके पेयसतोर.

29 होन्नेके ज्यतुन मराकुना गुट्टापोर्री मनना बैतपागे आनि बैतानिया इनना नाहकुना दग्गेरा एत्तोर. पजा येसु ओना इक्कुर सिस्युल्कन केय्सि,

30 ओर्क इल्हा वेहचि नाटे लोहतोर. "मी मुन्ने दिस्सना नाटे होंट. मिमेट अद नाटे होळियतस्के बस्केने बौर उद्दुवद उंदि गाडदि पोरि होहचि मत्तद मीकु दिसंता, दान लेहकुचि इग्गे पीसि वट.

31 ओक्कला अदुन पीसि वायनेके, 'दीन बारि लेहचतिर?' इंचि बोन्ना पूसकीते, 'सामिक दीना अब्सरम मंता' इंचि वेहट," इत्तोर.

32 बोर्कुन अय्ते लोहमळ जर्गता, ओर नाटे होतस्के येसु वेहतापे ओर्क दिसता.

33 पजा ओर गाडदि पोरिन लेहनेके, दाना मालकुलक हळसि, "मिमेट गाडदि पोरिन बारि लेहसतिर?" इंचि इत्तुर.

34 अस्के ओर, "सामिक दीना अब्सरम मंता," इंचि इत्तुर.

35 पजा गाडदि पोरिन येसुन्गा तत्तुर. तच्चि ओरा कपडिं दानपोर्री तारसि, येसुन दानपोर्री उपिस्तुर.

36 उद्दिदिसि होन्नेके ओन्क कदर हियानाहाटी लोक्कुल ओर केर्ता कपडिं टेंडसि हर्द तारतुर.

37 अल्हेने पजा ओर ज्यतुन मराकुना गुट्टा पोर्रीटाल हिळु रेयनेके ओना पज्जो वायाना ओना अंटेर सिस्युल्क ओर हळता अद्दूबतामाता कबाहकुनहाटी वेल्ले कुसिते जोर-जोरते पेनदुन इल्हा तल्सकुनालय दल्गत्तुर.

38 "पेनदा अदिकारम पीसि वायाना राजाल वेल्लेन आसिवांद दोर्कतोर आंद.*

पेनदाहेंदाल सांति वायि! पोर्रीटा पेद्दा पेनदा कदर आयि!"

इंचेके तल्सकुनालय दल्गत्तुर.

39 अस्के मंदिताल इच्चुर परिस्लिक् येसुन्गा वासि, "गू! नीवा सिस्युल्कन वरगेयमट इंचि गदरिच्चा," इंचि इत्तुर.

40 पजा येसु ओर्कुन, "नना मीक वेहंतन, ओक्कला ईरगिंटा चुपचाप मत्ते, इव बंडां वरगेयालय दल्गंतां," इंचि इत्तोर.

येस्सलेमतुन हळसि येसु अळंतोर

41 पजा येस्सलेम सहरता दग्गेरा एव्तस्के, अद सहरतुन हळसि येसु अळंतोर.

42 अळसेके, "सांति दोर्कना पोल्लें इय्याला मीकु तेळियसि मत्ते बेस आसि मनवळ, गानि इंदके अब पोल्लें मीवा कळ्ळुकुंकि दिस्सां.

43 मीवा पगातोर सुट्टु आसि मीकुन नालुं मूलानाल तकलिप कियानुर, असोटा वेला वायार.

44 मीवा पेन मीकुन पिसागोटालय मिहगा वाता वेलातुन एरपाट किया हिल्लिर. अदुनहाटी मीवा पगातोर मीकुन, मीवा पिलालकुन तोळिते कल्पानुर. पजा बंडां उंदानपोर्री उंदि इर्सिं दोहता गेरुतुन कूलाहचि समानम कियानुर," इत्तोर.

गुळिते अम्मनोर्कुन येसु गेदमंतोर

(मत्तयाल 21:12-17; मरकुस 11:15-19; योहान 2:13-16)

45 पजा येसु गुळिते होळियतोर, होळियसि अगा अम्मनोर्कुन गेदमालय दल्गत्तोर.

46 पजा येसु ओर्कुन इल्हा इत्तोर. "नावा लोतुन पारतना कियाना लोन इंतुर, इंचि दर्मसास्त्रमते रासि मंता.* गानि मिमेट दीन दोंगाल्क मक्कना जेगा कीतिर," इत्तोर.*

47 इल्हा येसु रोज गुळिते पेनदा पोल्ले कन्हंदुर. गानि पेद्दा पेर्मालोर्क, दर्मसास्त्रम कराहना गुर्लक, पेद्दा मनकालोर्क ओन हक्कालय हळंदुर.

48 गानि अंटर लोकलक वेल्ले कुसिते येसु वेहाना पोल्ले केंजंदुर. अदुनहाटी ओन बल्हा हक्कना ओर्क आटम आयाकौदु.

20

यहदि पेद्दालक येसुन पोल्ले पूसकीतुर
(मत्तयाल 21:23-27; मरकुस 11:27-33)

1 उंदि रोजु येसु लोकलकुक गुळिते कराहसेके, बेसता कबुर वेहासेके मत्तोर. अस्के पेद्दा पेर्मालोर, दर्मसास्त्रम कराहना गुर्लक, आनि यहदि पेद्दालक येसुनगा वातुर.

2 वासि, “निमे इव कबाहक बद अदिकारमते कीसंतिन?”* इव कबाहक कियालय नीकु अदिकारम बोर हीतोर? माक वेहा,” इंचि इत्तुर.

3 अस्के येसु ओर्क इल्हा जवाब हीतोर, “ननागुडा मीकुन उंदि सवाल पूसकीतन, अय्ते वेहाट,

4 योहानुक बापतिस्मा हियाना अदिकारम बगाटाल दोर्कता? स्वर्गमताला हिलाकौटे मनकालोराहेंदाल दोर्कतना?” इत्तोर.

5 अस्के, ओर-ओरे इल्हा वळकुकुत्तुर. “ओक्कला स्वर्गमताल दोर्कता इंचि मनम इनानय्ते, ‘मिमेट योहानुन बारि नम्मिर?’ इंचि इनानु.

6 ओक्कला मनम मनकालोराहेंदाल इनानय्ते, अंटर लोकलक मनापोर्रा बंडा हुक्कानुर, बारित्ते योहानुन पेनदा कबुरतोर इंचि ओर नमतुर,” इत्तुर.

7 अदुनहाटी ओर, “ओन्क अदिकारम बगाटाल दोर्कतनो माक एर्का हिल्ले,” इंचि इत्तुर.

8 “अल्हा अय्ते, इव कबाहक बद अदिकारमते कीसंतनो, ननागुडा मीकु वेहोन,” इंचि येसु इत्तोर.

पेनदा मरिनगुडा हक्कंतुर
(मत्तयाल 21:33-46; मरकुस 12:1-12)

9 पजा येसु लोकलकुक ई वेसुडि वेहालय दलगतोर. “वरोर मनकल उंदि अंगुर तोटा कीतोर. पजा वेरेतोर्क बटाइक हीसि वेल्लेन रोजकुनाहाटी वेरे देसेम होत्तोर.

10 पजा बस्के अय्ते अंगुर पंडि कोय्याना वेला वाता, अस्के ओरागटाल पंडिना तूस एतालय ओना वरोर दासुन बटाइतोरहेके लोहतोर. गानि बटाइतोर आ दासुन पीसि पक्का तंचि उत्ता कय्के वापस लोहतोर.

11 अस्के मालक इंकावरोन दासुन बटाइतोरहेके लोहतोर. आ बटाइतोर ओनगुडा पीसि तंचि कदर हिलाकौटा कीसि उत्ता कय्के वापस लोहतुर.

12 पजा मालक मडोव दासुन लोहतोर. ओनगुडा बटाइतोर नोप्पि आयनाल तंचि तोटाता पलाते दोब्बिसीतुर.

13 पजा तोटाता मालक, “नना बतल कीकन?” इंचि विचारम कीतोर. “सरे, इंदके नावा पावरमगल्ला मरिन लोहंतन, अस्के ओन हळिसनना कदर हिय्युरा?” इनकुचि ओना मरिन ओरहेके लोहतोर.

14 गानि बटाइतोर ओर वायानद हळसि, “ईर अय्ते वारसदार आंदुर, दट ओन मनम हक्ककोम, अस्के ओना जायदाद मनाक आया परंता,” इंचि वरोक-वरोर इत्तुर.

15 पजा ओर अगा वातस्के, ओन तोटाता पलाते ओसि हक्कतुर.

“इंदके अंगुर तोटाता मालक वासि ओर्कुन बतल कियानुर?

16 ओर वासि आ बटाइतोर्कुन हळिसि अद तोटातुन वेरेतोर्क बटाइक हिय्यानुर,” इत्तोर.

अद पोल्ले केंजसि, “अल्हा जगाकौटा पेन आपिकाटी,” इंचि अगा मत्तोर इत्तुर.

17 अस्के ओरहेके हळसि येसु ओर्कुन इल्हा इत्तोर. “बद बंडातुन अय्ते मिस्त्रिक कबळक ओज्जो इंचि हय्या हिल्लुर, अदे बंडा सेंकु मूलाता पुनादि बंडा आता.* इल्हा पेनदा पोल्ले रासि मंतां, इवना अर्तम बतल आंदु?

18 बोर अय्ते इद बंडापोर्रा अरंतुर, ओर तुकडां-तुकडां आयनुर, गानि अद बंडा बोरपोर्रा अय्ते अरंता, ओर पिच्चि-पिच्चि आयानुर,” इंचि इत्तोर.

19 येसु वेहता पोल्ले केंजसि, दर्मसास्त्रम कराहना गुर्लक आनि पेद्दा पेर्मालोर्क, “ईर मनाकुने इंचंतोर,” इंचि एरपाट कीतुर. अदे वेलाते ओन दोर्का पियालय हळतुर गानि लोकलकुकन हळसि वेरियतुर.

यहदि पेद्दा मनकालोरा उपायालक
(मत्तयाल 22:15-22; मरकुस 12:13-17)

* 20:2 लकाल 19:45,46पुरगा. ✪ 20:17 बजन संहिता 118:22

20 अस्के ओर, येसु बतलन्ना तप्पु वळ्ळकते ओन पीसि रोम सरकारता राज्यपालनगा ओकोम इंचि, ओनपोर्रो नदर इरतुर. इच्चुर्कुन नीतिमंत्लुकुनालेसी मंचि ओना आयडां गुंजालय येसुनगा लोहतुर.

21 आ आयडां गुंजानोर येसुनगा वासि इल्हा इत्तुर. “गुरु, निमे सत्तेम वळ्ळकानोन, निजम करहानोन आंदिन, बोने सिन्ना-पेट्टुदा हळिन. पेनदा हर्दा बारेमते सत्तेमते कराहंतिन इंचि माक एरपाटे मंता.

22 अय्ते नियम परकारम, कैसर राजांक मोमोट कर दोहमळ न्यायमेना, आयोना?†” इत्तुर.

23 येसु ओरा पिलान एरपाट कीतोर.

24 कीसि, “नाक उंदि एंडि बंडि ह्पस्ट, दानपोर्रो बोना पोट्टुवा आनि पोरोल मंता,” इंचि इत्तोर. अस्के “कैसर राजानद,” इंचि ओर इत्तुर.

25 अस्के, “कैससंक दोहना कर कैससंक दोहाट, पेनदुक हियानव पेनदुक हीम्टु,” इंचि येसु इत्तोर.

26 इल्हा लोकुकुना मुन्ने येसुन ओना पोल्लेने ओर पिथ्या पराहिल्लुर. गानि ओना पोल्ले केंजसि इचंत्रम आसि चुपचाप आतुर.

सदुकिर्कुना उपायाल्क

(मत्तयाल 22:23-33; मरकुस 12:18-27)

27 पजा इच्चुर सदुकिर्कुन इनाना लोकुकुलक येसुनगा वातुर. मनकल हासि मर्रा जीवाते तेदोर इंचि ईर नम्मंतुर.

28 वासि इल्हा सवाल पूसकीतुर. “गुरु, मूसाना नियम परकारम, वरोर मनकल पिलालक आयाका मुन्नेने हायानय्ते, ओना मुत्तोनतोनि ओना तम्मुर मरमि आसि, हातोना वंसम बेसांगोटालय पिलालकुकन कना परांतोर, इंचि मंता.

29 अय्ते, एडुर दादाल-तम्मुरक मत्तुर. ओरा लोप्पोटाल पेट्टुदोड मरमि आतोर, गानि पिलालक आयाका मुन्नेन ओर हातोर.

30 हासस्के ओना पज्जोटोर दान मरमि आतोर, ओरगुडा पिलालक आयाका मुन्नेन हातोर.

31 ओना पज्जोटोरगुडा दान मरमि आसि पिलालक आयाका मुन्नेन हातोर. इल्हा एडुरगुडा दानतोनि मरमि आसि, पिलालक आयाका मुन्नेन हातुर.

32 पजा आ मुरतळगुडा हाता.

33 अय्ते, हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मरमि आसि मत्तुर,” इत्तुर.

34 अस्के येसु इल्हा वेहतोर, “ई दुनियाता लोकुकुकुने मरमि आयमळ, मरमि कीसि हियमळ जर्गता.

35 गानि बोर अय्ते हामुरताल मर्रा जीवाते तेदनलायक मनंतुर आनि मर्रा जीवाते तेदमळतुन दोर्किचुकुंतुर, ओर वायाना कालमते बस्केने मरमि आयुर, मरमि कीसिगुडा हिथ्युर.

36 ओर पेनदा दूतनलेसी मनांतुर, बस्केने हाथुर. ओर हामुरताल मर्रा जीवाते तेदताहाटी, ओर पेनदा पिलालक आयानुर.

37-38 पोत्तना पोदाता बारेमते मूसाल बतल रासतोर मिमेट हदवा हिल्लिरा? अब्राहाम, इसाक, याकोब ईर वेल्लेन मुन्ने हासोत्तुर. अथना मूसाल पेनदुन अब्राहाम, इसाक, याकोब मोळ्ळकाना पेन इंचि इत्तोर. पेन हातोरद आयो गानि जीवाते मनानोरद आंद इंचि मनाकु एरपाट मंता. अद पेनदुन एरपाट कियानोरा अंतोरा जीवां पिसंतां. इल्हा हातोरगुडा जीवा अरंतुर इंचि मूसाल ह्पिस्तोर.” इंचि येसु इत्तोर.

39 येसु वेहता पोल्लेतुन केंजसि, “गुरु! निमे बेस वेहतिन,” इंचि इच्चुर दर्मसास्त्रम कराहना गुरूक इत्तुर.

40 पजा येसुन सवाल पूसकियालय बोर्के हिम्मत आयाहिल्ले.

पेन लोहता पिसागोटनोर

(मत्तयाल 22:41-46; मरकुस 12:35-37)

41 पजा येसु ओर्कुन इल्हा इत्तोर. “किरिस्तु दाविदना मर्रा आंदुर इंचि दर्मसास्त्रम कराहना गुरूक बल्हा इना परांतुर?

42-43 कुदुदु दाविदे ओना बजन संहिता पुस्तकमते इल्हा रासतोर.

‘सामि, नावा सामिनः इत्तोर, बदवेरदाका अय्ते नीवा पगातोर्कुन,

नीवा कालकुनगा तरॉन, अदवेरदाका नावा तिना बाचुंक उदिदिसि मन, इत्तोर.’*

44 इल्हा दाविद ओन, ‘सामि’ इंचि इत्तोर. अय्ते ओर दाविदना मर्रा बल्हा आया परांतोर?†”

दर्मसास्त्रम कराहना गुरूकुकुनलेसी किया मनि
(मत्तयाल 23:1-36; मरकुस 12:38-40)

† 20:22 रोमि लोकुकुल बोम्मा पूजे कियुंतुर, यहदि लोकुकुल बारे बोम्मा पूजे कियाकोदुर. अदुहहाटी कैसर राजांक कर दोहमळ इत्ते यहदि लोकुकुल पेनदा नियमते न्यायम आयो इन्दुर, कर दोहाकोटे कैसर राजांक विरोद आन्दुर. ‡ 20:42-43 सामि इगे सामि इत्ते पेन लोहना पिसागोटना किरिस्तुना बारेमते आंद.

* 20:42-43 बजन संहिता 110:1

45 अंतोर लोकुलक ओना पोल्लेतुन केंजसेके मननेके, येसु ओना सिस्स्युलुकुन इल्हा इतोर,

46 “दर्मसास्त्रम कराहना गुल्लुकुनाल उसारते मंट. पोर्रोटाएल हिळुदाका पोळ्गु अंगि केरिं तिरियमळ, हाटुमकुने जोहार वेहागोटकुनमळ ओर्क बेस अनपिचंचता. अल्हेने दर्मसास्त्रम कराहना लोहकुने, कुळपुकुने पेदुदालक उदुदाना जेगाते उदमळ इत्ते ओर्क वेल्ते इस्टम.

47 ईर मुंडामोस्ता मूर्ताहकुन मुळहंतुर, लोकुलकुंक हुप्सालय वेल्लेनजेम पारतना कीतुर. गानि ईर्क मात्रम पेन अंटोर्कन्ना एक्को सिक्सा हियार,” इचि इतोर.

21

पेनदुक नचचना दानम

(मरकुस 12:41-44)

1 पजा येसु इच्चुर लक्कु नदर वाटतोर अस्के सिरमंत लोकुलक दान पेडिते पेनदाहाटी कोत्तां वाटनेके ओन्क दिसतुर.

2 अस्के मुंडामोस्ता उंदि गरिब मुरतळगुडा दान पेडिते रौडु रागि कोत्तां वाटनेके येसु हळतोर.

3 अस्के येसु इल्हा इतोर. “नना निजम वेहांतन, इगो दान पेडिते कोत्तां वाटता अंतोर लोकुलकुंकन्ना ई मुंडामोस्ता गरिब मुरतळे एक्को दानम कीता.

4 इल्हा नना बारि वेहासेके इत्ते, अंतोर बारे ओरा दनमताल इच्चुरे दानम कीतुर. गानि इद मुरतळ मात्रम दान्क पिस्सनाहाटी इरतादानगुडा पेनदुक वाटसीता,” इतोर.

गुळि नासडेम आयना बारेमते येसु वळकांतोर

(मत्तयाल 24:1-9; मरकुस 13:1-13)

5 अस्के इच्चुर लोकुलक, “इद गुळिता बंडां हळ्याट बचचोन सोक मंतां! इंका पेनदाहाटी हीता सामानतोनि तयार कीता आ सिंगारम हळ्याट बचचोन बेस मंता,” इंचेके वळक्सेक मत्तुर.

6 अस्के येसु ओर्कुन, “इदके मिमेट हळना इव बंडां उंदानपोर्गे उंदि मनाकोटा कूलहाना वेला वायनद मंता,” इचि इतोर.

7 अस्के सिस्स्युलक, “गुर्, इव पोर्ल्ले बस्के जर्गनुं? इंका इव गटनां जर्गना मंता इन्नेके माकु बतल चिन्ह दिस्सार?” इचि येसुन पुसकीतुर.

8 अस्के येसु इल्हा इतोर. “मीकुन बोरन्ना पसांचनुर, उसारते मंट. नावा पोरोल एतसेके बचुटूरो लोकुलक वासि, ‘ओन ननाने आंदुन, इंतुर. इंका अद वेला दग्गेरा एत्ता,’ इचि इनानुर. असंतोरा पज्जो होनमट.

9 लडाई, जगडालुकुना बारेमते केंजसि वेरियमट. इव अय्ते तप्पाकोटा मोदाला जर्गनुंगे. गानि अचचोटेन आकिर वेला वायो.

10 “इंका देसेमपोर्गे देसेम, राज्येमपोर्गे राज्येम लडाई आयनुं.

11 पेदुदा बकपालक आयनुं, वेरे-वेरे जेगाने कर्वु अररि, तीरता रोगालक पुट्टानुं. मळ्बुने वेल्लेन वेरियनसोटा गटनां जर्गनुं, पेदुदा-पेदुदा चिन्हां दिस अररिनुं.

12 “गानि इवनि जर्गाका मुन्ने, मिमेट नावापोर्गे विस्वासम इरताहाटी यहुदिल्लुकु मीकुन दोर्कापीसि, वेल्लेन तकलिप कीसि मीवा न्यायम कियनाहाटी दर्मसास्त्रम कराहना लोहकुने ओयानुर, ओसि मीकुन जेलने वाटानुर. पजा मीवा इच्चुर पगातोर मीकुन राजालोरा आनि राज्यपालना मुन्ने ओयानुर.

13 दीनहैदाल मीकु नावा बारेमते गवाइ वेहालय हरि दोर्कार.

14 इचि मीवा न्यायम जर्गनेके बतल वळ्कना इंचेके मोदाले रंदि कियमट.

15 वेला वातस्के नना मीकु इसोटा पोर्ल्ले आनि बुदिदे हीतन गदा, मिमेट वळ्कानेके मीवा पगातोर केंजसि वळ्काकोटा आयानुर, इंका मीवा पोर्ल्लेक अड्डमगुडा वळ्का पराकोटा आयानुर.

16 अयना मीवा तल्लुर-बाबो, तम्मुहक-दादालोर, जीवातोर-हेळमितोर मीवा दंतातोर मीकुन पीसि पगातोर्कुंक हियानुर. अचोने आयका मीवाव्टेटाल इच्चुर्कुन हळ्कानुरगुडा.

17 नावा पोरोलताहेंका अंतोर लोकुलक मीकुन हय्सुर.

18 इदंता अयनागानि मीकुन बारे नासडेम किया पररि.

19 पेनदापोर्गेटा विस्वासमते आकिरदाका निल्लिस मत्ते, मिमेट मीवा जीवातुन कापाळ्कना परांतरि.

येस्सलेम नासडेम आयमळ

(मत्तयाल 24:15-21; मरकुस 13:14-19)

20 “हृळ्याट! सिपाइल्क येस्सलेम सुट्टु आतद मिमेट बस्के अय्ते हृळ्यांतिर, अस्के सहर नासडेम आयना वेला एव्ता इंचि इनकुंरु.

21 अस्के बोर अय्ते यहुदिया एरियाते मंतुरो ओर गुट्टनहेके वित्तट, बोर अय्ते सहरते मंतुरो ओर सहरता पलाते पेय्मि होनगोम अल्हेने नाटे मनना लोकुल्क सहरते होळिया मन्नि.

22 बारित्ते पेनदा पिलान परकारम अव सिक्सा हियना रोजुक आंदु. दर्मसास्त्रमते रासि मत्ता अन्नि पोल्लें पूरा आयना वेला आंदु.

23 अव रोजकुने पीटे मत्ता मूर्ताह्कुंक आनि सिन्ने मर्तल्लुह्कुंक* वेल्लेन तकलिप वांता. बारित्ते इद बूमिपोरें वेल्लेन तिप्पल्क वायाना मंता. आनि यहुदिल्लुकुनपोरें पेन दाना होंगुन हुपिचना मंता.

24 इच्चुर मनकालोर कसेह्कुने कोह्ककुंचि हायानुर, इक्किच्चुर मनकालोर्कुन बारे वेरे देसेमतोर्कुंक दोर्कापीसि हियनुर. पजा यहुदि आयवा लोकरा कालम मारनदाका, ओर येस्सलेमता लोकुल्कन ओरा कादा हिळु जासि इरानुर.

वेरियाकोटा दैरेनेमते मनना

(मत्तयाल 24:29-31; मरकुस 13:24-27)

25 “पोळ्दुनपोरें, वेळसिपोरें, सुक्कनपोरें चिन्हां दिस्सानुं. इंका बूमिपोरें समुद्रमता आवाज आनि अष्टे तेदाना पेद्दा तडाना सप्पुड कैजसि देसे-देसेल्लुकुना लोकुल्क इरगा वेरियानुर.

26 इरगा वेरियसि, इद दुनियाते वायाना तिप्पल्कना बारेमते विचारम कीसि, लोकुल्कना जीवा पेय्सोत्ताप आथार. बारित्ते मब्बुने मनना अन्नि सक्तिन कदलिचमळ जर्गता.

27 अस्के मनकना रूपमते पुटतोन नना, ताकत आनि पेद्दा महिमातोनि, मब्बु तेर्पेनपोरें वायानेंके लोकुल्क हृळानुर.

28 इल्हा जर्गमळ सुस्व आतस्के मिमेट अंतोर मीवा तल्ला तेह्चि पोरोळ्क हृळट. बारित्ते पेन मीकु मुक्ति हियाना वेला दग्गेर्क एवसेकेन मंता.”

येसुना पोल्ले बस्केळक मंनता

(मत्तयाल 24:32-35; मरकुस 13:28-31)

29 पजा येसु ओर्क उंदि वेसुडि वेहतोर. “अद अंजिर मरातुन आनि केडाते मत्तव अन्नि मराकुन हृळट.

30 अवुना आर्कि रात्तद हृळसि, एदिद कालम दग्गेरा एव्ता इंचि मीकु बिराना तेळियसि दांता.†

31 इल्हा इव अन्नि गटानां जर्गनद हृळसि, पेनदा राज्येम दग्गेर्क एव्ता इंचि मिमेट एरपाट कीतिर.

32 नना मीकु निजम वेहांतन, बदवेरदाका अय्ते इव अन्नि पोल्लें पुरागा आयोंगो, अदवेरदाका ई पीळि‡ मुळगो.

33 इद बूमि, मब्बु नासडेम आसि होंदार, गानि नावा पोल्लें बस्केने नासडेम आयों.”

उसारते मंटु

34 “अदुनहाटी मिमेट पाटिं कियुड, कल उनुड इंका इद दुनियाता रंदिनेन मीवा मनसु मनना आयो. गानि नना मर्रा वायना रोजु अचानक अरंनाना कोम्मालेह्का मीपोरें वासि अरंकोटा मीवद मिमेट जेगर्ता मंटु.

35 बारित्ते अद रोजु इद बूमिपोरें मनना अंतोर लोकुल्कनपोरें अल्हेन अरंनद मंता.

36 अदुनहाटी वेल्लेन उसारते मंचि, बव अय्ते गटानां जर्गनद मंता, अव अन्नि गटनानाल पिस्सनाहाटी ताकत दोर्कगोम इंचि बस्केळक पारतना कीसक मंटु. अल्हा मल्लिरित्ते, बस्के अय्ते मनकना रूपमते पुटतोन नना वांतन, अस्के नावा मुन्ने वेरियाकोटा नित्ता परकिट.”

37 इल्हा येसु हरेक रोजु पोद्दाला गुळिते कराहसेक मनुंदुर. गानि नर्कळ्क मात्रम सहरताल पलाते जयतुन इनना गुट्टातगा होंचि मनुंदुर.

38 हक्केर-हक्केरा अंतोर लोकुल्क तेदसि ओना पोल्लें केंजानाहाटी गुळितगा जमा आयुंदुर.

22

येसुन हळ्कना पिलान

(मत्तयाल 26:1-5; मरकुस 14:1-2; योहान 11:45-53)

1 पुल्लगा आयवा पिडिता हारिना पंडुगु दग्गेर्क एव्वि मत्ता. इद पंडुगुन दाटसि होनना पंडुगुगुडा इंतुर.*

* 21:23 मर्तल्लुह्कुंक इते सिन्ने पेडल मत्ता मुरतळ, पालु उहाना मुरतळ. † 21:30 मोदाटा बाइबलकुने इग्गुर इंचि रासि मंता. ‡ 21:32 ई पीळि

इगे दीना अर्तम यहुदि जातिता लोकुल्क इंचिगुडा इनकुनावच्चु. * 22:1 यहुदि लोकुल्क बस्केळक पुल्लटा पिडिता हारि कीतुर. ई वारमता मोदाटा रोजुन दाटसि होनना पंडुगु इंतुर. ई पंडुगुने मात्रम वारममेड पुल्लगा आयवा पिडिता हारि कीतुर.

2 अस्के पेद्दा पेर्माँलोर, दर्मासास्त्रम कराहना गुर्लक ईर अंतोर उंदगा कलियसि, येसुन बल्हा हक्कना? येसुन बल्हा सप्पुडदाका दोर्कापीसि हक्कोम, इंचि पिलानकु कियालय दल्गुत्तर. गानि लोक्लुकुं येसुनपोर्गे मत्ता विस्वासमतुन ह्ळसि ओर वेरियत्तर.

यहदल येसुन दोर्कापीसि हियाना आय्डा कीतोर
(मत्तयाल 26:14-16; मरकुस 14:10-11)

- 3 पजा येसुना पन्नेडु सिस्स्युल्कुनाल वरोर इस्कारियोत नाटेना यहदाना लोप्पो पेद्दा देय्यम होळियता. †
4 अस्के ओर पेद्दा पेर्माँलोरगा आनि गुळिता कावेल कियना अदिकारिलुकुं होंचि कलियतोर. कलियसि येसुन ओर बल्हा पीसि हिया परीतोर इदुना बारेमते, ओरतोनि वळ्ळकतोर.
5 यहदाना पोल्ले केजसि पेद्दा पेर्माँलोर आनि अदिकारिलुकुं वेल्लेन कूस आसि ओर, ओन्क कोलतां हीतोम, इंचि ओक्कुत्तर.
6 अदुनहाटी गर्दि हिल्वद ह्ळसि येसुन ओरा कय्दे पीसि हियालय मोका ह्ळसेक मनुंदुर.

सिस्स्युल्क पंडुगुना तयारि कीत्तर
(मत्तयाल 26:17-19; मरकुस 14:12-16)

- 7 पजा दाटसि होनना पंडुगु एव्ता. मूसाना नियम परकारम अद पंडुगुना मोदाटा रोजु उंदि गोरि पोरिना मोक्कु हियमळ मत्ता.
8 अदुनहाटी येसु, पत्रुन आनि योहाणुन, “मिमेट मुन्ने होंचि दाटसि होनना पंडुगुना गाटो तयार कीम्टु अस्के मनम तिनकोम,” इंचि ओर्कुंन लोहतोर.
9 अस्के, “मोमोट पंडुगुना गाटो तिनना तयारि बगा कीकोम इंचि नीवा मनसु मंता सामि?” इंचि ओर येसुन इत्तर.
10 अस्के येसु ओर्कुं इल्हा वेहतोर, “मिमेट सहरते होळियतस्के, मीक्कु वरोर मनकल अळकाते एर पीसि होननेके कलियंतोर. ओर बद लोन अय्ते दांतोर, अदे लोतागा मिमेटगुडा ओना पज्जो होटु.
11 अगा होत्तस्के, आ लोता मालाकुंक, ‘गुरु ओना सिस्स्युल्कुनतोनि कलियसि, दाटसि होनना पंडुगुना गाटो तिननाहाटी हेळमितोर आगाना अर्रा बगा मंता, इंचि गुरु पूसकीसंतोर,’ इंचि वेहाट.
12 अस्के ओर मीक्कु मिद्दे पोर्गेटा उंदि पेद्दा अर्रा सजांचि तयार कीसि मत्तद हुप्सानुर. अदे अरति मिमेट पंडुगुना गाटो तयार कीम्टु,” इत्तोर.
13 अस्के ओर होंचि हळत्तर अय्ते, ओर बल्हा वेहतोर अल्हेने अगा मत्ता. पजा ओर अग्गेन दाटसि होनना पंडुगुना गाटो तयार कीत्तर.

येसुना सिस्स्युल्कुनतोनि आकिर बोजनम
(मत्तयाल 26:20-30; मरकुस 14:17-21; 1 कुर्गेति 11:23-25)

- 14 दाटसि होनना पंडुगुना गाटो तिनना वेला एवतस्के, येसु ओना प्रेरितुल्कुनतोनि कलियसि गाटो तिनलय उदतोर.
15 उदतस्के येसु ओर्कुंन, “नाकु तिप्पल्क वायका मुन्ने मीवातोनि कलियसि ई दाटसि होनना पंडुगुना गाटो तिनना इंचि नाकु वेल्लेन आसे मत्ता.
16 नना मीक्कु वेहानद बतल इत्ते, इद पंडुगु बद पोल्लेतुन अय्ते हुप्संता, अद पोल्ले पेनदा राज्यमते पुरागा आयनदाका नना इद पंडुगुना गाटो तिन्नोन.”
17 पजा ओर अंगुर पंडिना पानकमतोनि निडिस मत्तद उंदि गिलास पीतोर आनि पेनदुक दन्यवाद कीसि अदुन ओना सिस्स्युल्कुंक हीतोर. हीसि, “इदेट, दीन मिमेट पंचकुंचि उंट.
18 नना मीक्कु वेहांतन, पेनदा राज्यम बदवेरदाका अय्ते वायोनो, अदवेरदाका, इय्याटाल नना अंगुर पानकम उन्नोन,” इंचि येसु इत्तोर.
19 पजा येसु उंदि हारितुन पीसि, पेनदुक दन्यवाद कीतोर. पजा आ हारितुन तुकडां कीसि ओना सिस्स्युल्कुंक पंचि हीसेक, “इद हारि इत्ते, मीवाहाटी मोक्कु आयना नावा मेंदुलता चिन्ह आंदु, नाकुन मति कियनाहाटी मिमेट इल्हेन कीसेक मंटु,” इंचि ओर्कुं वेहतोर.
20 पजा अंतोरा तिनमळ आतस्के, अंगुर पंडिना पानकमते निडिस मत्ता गिलासुन पीसि, “इद पानकम इत्ते मीवातोनि पेन कियना पूना करारता चिन्ह आंदु, नना मीवाहाटी नावा नेत्तरतुन पोंगागोटंतन, अस्के पेन दाना राज्यमतुन निलाहाता. ‡

† 22:3 यहदाना लोप्पो पेद्दा देय्यम होळियता दीना अर्तम यहदन्हैदाल देय्यम दाना कवळ कियमळ सुख कीता. ओना बुद्दिंते, मनसुने देय्यमता विचाराल्क वायमळ सुख आतां. ‡ 22:20 मूसाना कालमते पेन लोक्लुकुनतोनि करार कियनेके, जिक्वासिना मोक्कु हीसि अबुना नेत्तर लोक्लुकुनपोर्गे सल्लंदुर. अल्हा कीतस्के अद करार गट्टिगा आय्दु, (निर्गमन 24:6-8) अदुनहाटी येसु ओना नेत्तर पोंगागोटसि पूना करार कियानुर.

21 “अयना हिके केंजाट, नाकुन दोकाते पीसि हियानोरगुडा इंदके इगे नातोनि गाटो तिनालय उद्दिदिसि मंतोर.

22 मनकना रूपमते पुटतोन नना, नावा बारेमते बल्हा अयते रासि मंता, अल्हे दांतन. गानि बोनाहेंदाल अयते नाकुन पीसि हियमळ जर्गीता ओन्क बचचोर गोसा आथार,” इत्तोर.

23 येसु वेहतदुन केंजसि सिस्युल्क, “अल्हा कियानोर मना नड्डुम बोर मंतोर मरि?” इंचि ओरद-ओरे वळ्ळकुकुनालय दलगुत्तुर.

सेवाकुनलेसी मनना

24 पजा “मना नड्डुम अंतोर्कनना पेद्दा बोर मनना?” इत्ता पोल्लेहाटी सिस्युल्कुकु ओर्क-ओर्के पोल्ले आतां.S

25 अस्के येसु ओर्कुन इल्हा इत्तोर. “यहूदि आयवोरा राजालोर लोकुकुकुनपोर्री जबरदस्तिरे राज्ये मकीत्तुर. आनि ओरपोर्री अदिकारम ताकसालय हळानोर, ‘मोमोट लोकुकुकुन बेस सहायम कियानोरम,’ इंचि वेह्कुकुत्तुर.

26 गानि मिमेट ओरालेसी कियमट. मी लोपोटाल बोर अयते पेद्दा मंतोर, ओर अंतोर्कनना सिन्नोनलेसी आयना. अल्हेने बोर मीवा लीडर मंतोर ओर सेवाकुनलेसी आयना.✧

27 असल पेद्दा इत्ते बोर आंद? बोर अयते गाटो तिनालय उद्दंतोर ओरा? मरि उद्दुत्तोंकु गाटो वाटांतोर ओरा? गाटो तिनालय उद्दुत्तोंरे पेद्दोड आंद. गानि नना अयते मीवा नड्डुम गाटो वाटाना सेवाकुनलेसी मंतन.”

28 “मिमेट अयते नना तिप्पल्कुने मत्तस्केगुडा नावातोनि मत्तोर आंदिर.

29 अदुनहाटी नावा बाबाल बल्हा नाकु राज्ये कियना अदिकारम हीतोर, अल्हेने ननागुडा मीकु अदिकारम हीतन.

30 अद अदिकारम बद इत्ते, मिमेटगुडा नावा राज्येमते नावातोनि उद्दिदिसि तिनकिर, उनकिर. इंका राजगद्देन पोर्री उद्दिदिसि इस्त्राएलना पन्नेड गोत्राल्कुनोरा न्यायम कीकिर,” इंचि इत्तोर.

पत्रु तप्पिचुकुंतोर इंचि येसु वेहांतोर

(मत्तयाल 26:31-35; मरकुस 14:27-31; योहान 13:36-38)

31 येसु मर्रा सिमोन पत्रुन, “सिमोन, ए सिमोन हिके केंजा! मीकुन अंतोर्कुन वंजिन हेचाहताप हेचाहचि मी अंतोरा विस्वासमता पट्टु हळानाहाटी पेद्दा देय्यम पेनदुन अदिकारम तल्कता.

32 गानि निमे विस्वासमताल पजोळ्ळ होनाकोटा मनना इंचि नना नीवाहाटी पारतना कीतन. अयना निमे मर्रा विस्वासमते नाहेके तिरियत्तस्के नीवा दंताता विस्वासुल्कुना विस्वासमत्तुनगुडा गाट्टिगा कीम,” इंचि वेहतोर.

33 गानि सिमोन पत्रु मात्रम, “सामि! नीवातोनि कलियसि जेलुंक होनालय, हायालयगुडा नना तथार मंतन,” इंचि इत्तोर.

34 अस्के येसु पत्रुन, “पत्रु नना वेहानद केंजा! इय्याला नर्कळ्ळक मोदाटा गोगोड कूसाका मुन्ने निमे, ‘नना येसुन एपाट किय्योन,’ इंचि मूड मल्कां इनकिन,” इंचि इत्तोर.

तकलिप अर्शल्य तथार मंटु

35 पजा येसु ओना सिस्युल्कुन, “उंदि मल्का नना मीकुन कोत्तना पाकिट, जोरा इंका हेरपुहक हिलाकोटन लोहचि मत्तन. अस्के मीकु बतलनना तक्को होंचि मत्तना?” इंचि पसकीतोर. अस्के सिस्युल्कु, “हिल्ले, बतले तक्को होना हिल्ले,” इंचि इत्तुर.

36 पजा येसु ओर्कु इल्हा वेहतोर. “मिहगा बोरगन्ना कोत्तना पाकिट मत्ते, दान पज्जेन पीकुन्निर, इंका जोरागुडा पीकुन्निर. अल्हेने कसेर हिलवोऱ ओना कपडिं अम्मिसि उंदि कसेर असकुन्निर.

37 बारित्ते, नना वेहानद केंजाट! दर्मसास्त्रमते, ‘ओन तप्पु कीतोरव्ते कल्पतुर,’✧ इंचि नावा बारेमते रासि मत्ता. दर्मसास्त्रमते नावा बारेमते बतल अयते रासि मंता, अद इंदके नावातोनि निजम आयमळे गावाले,” इंचि वेहतोर.

38 अस्के सिस्युल्क, “इद हळा सामि, इव रोंडु कसेहक मंतां,” इंचि इत्तुर. इत्तस्के येसु, “सरे! आंतां,” इंचि इत्तोर.

जयतुन इनना गुट्टातगा येसु पारतना कियमळ

(मत्तयाल 26:36-46; मरकुस 14:32-42)

39 पजा अद लोताल पेय्सि ओना अलवट परकारम, जयतुन इनना गुट्टापोर्री होत्तोर. ओना पज्जो ओना सिस्युल्कगुडा होत्तुर.

40 अगा होत्तस्के येसु ओना सिस्युल्कुकु, “मिमेट पट्टुने अर्काकोटा मननाहाटी पारतना कीसेके मंटु,” इंचि इत्तोर.

41 पजा येसु ओरागटाल, इच्योन लक्कु होंचि टोंगरां ऊनसि इल्हा पारतना कियालय दलगुत्तोर:

§ 22:24 सिस्युल्कुना विचारमते येसु बिराने येसुलेमते एक्सि राजाल आंतोर, इंचि मत्ता. ओना राज्येमते सिन्डोड, पेद्दोड बोर इंचि ओर्क-ओर्के पोल्ले आतां.

✧ 22:26 मत्तयाल 20:25-26 ✧ 22:37 यसायाह 53:12

42 “ए पेनबाबा! ओककला नीवा इच्चा मते, नाकु वायाना ई तकलिपतुन नावा पोर्रोटाल तपिच्चा. अयना नावा इच्चा मत्ताप आयो गानि नीवा इच्चा बल्हा मंता अल्हे जर्गि,” इंचि इत्तोर.

43 अस्के अगा उंदि पेनदा दूता स्वर्गमताल वासि ओन्क ताकत हियालय दल्गता.

44 येसु वेल्लेन दुक्कमते निडिसि पेनदुक पारतना कीतोर. ओर अल्हा पारतना कियनेके ओना सेमटा, नेत्तुरलेसी आसि बोट्टुक-बोट्टुक बूमिपोर्रो अरसेक मत्ता.*

45 पारतना कियमळ मारतस्के, सिस्युल्कुनगा वासि हळते, ओर दुक्कमते तकांचि निद्रा होंचि मत्तुर.

46 अस्के येसु ओकुंन, “मिमेट बारि निद्रा होत्तिर? तेदत! तेदसि मिमेट पट्टुने अर्रीकोटा मननाहाटी पारतना कीसेके मंत्तु,” इंचि इत्तोर.

यहदल येसुन पीसि हीतोर

(मत्तयाल 26:47-56; मरकुस 14:43-50; योहान 18:3-11)

47 येसु इव पोलेल्ले वळकसेकेन मत्तोर. अचोटेन अगा उंदि लोकुल्कुना मंदा वाता. अद मंदातुन यहदल पीसि वातोर (ई यहदल येसुना पन्नेड सिस्युल्कुनाल वरोर आंद). तच्चि ओर येसुन बुरील्य ओना दमगेक होत्तोर.

48 अस्के येसु ओन, “यहदा, उंदि मुद्दु बुर्सि निमे मनकना रूपमते पुटतोन नाकुन दोर्कापीसि हियालय हळसंतिना?” इंचि इत्तोर.

49 येसुन पियानदुन हळसि कळमता सिस्युल्कु, “सामि, महागा कसेहक मंतां, मोमोट ईरकुन नक्कोमा?” इंचि पूसकीत्तुर.

50 अचोटेन ओरा लोपोटाल वरोर सिस्युड पेर्मालोरा लीडरना वरोर दासुन कसेटे हीतोर अय्ते ओना तिना केव नेमसोत्ता.

51 अस्के येसु, “मान्नि, अल्हा कियमट,” इत्तोर. इंचि ओना नेमसोत्ता केवदुन इटसि ओन बेस कीतोर.

52 पजा येसु, ओन्क विरोदमते तेदता पेद्दा पेर्मालोर्कुंन, गुळिता अदिकारिल्कुन आनि यहदिल्कुना पेद्दाल्कुन इल्हा इत्तोर. “वरोन दोगन पिथ्यालय वाताप मिमेट कसेहक, गुल्पां पीसि नाकुन पिथ्यालय वातिरा?

53 नना अय्ते रोज गुळितगा मीतोनि मनुंदुन, मिमेट अस्के नाकुन पिया हिल्लिर. अयना इद मीवा वेला आंदु, हीकटता राज्येम कियना वेला आंदु,” इंचि इत्तोर.

येसुन पत्रु एरपाट किय्योन इंतोर

(मत्तयाल 26:57-58; मरकुस 14:53-54,66-72; योहान 18:15-18,25-27)

54 पजा ओर येसुन दोर्कापीसि, अगटाल पेद्दा पेर्माना लोन ओत्तुर. पत्रुगुडा लक्कुटाले ओना पज्जो-पज्जो होंचेके मत्तोर.

55 पेद्दा पेर्माना दाराते तडमि माससि ओर अंतोर सुट्टु उदुदिसि मत्तुर. पत्रुगुडा ओरतोनि अगोन उदतोर.

56 पत्रु तळमिन्ना उदुदिसि मत्ताहेंके तळमि वेल्गु ओनपोर्रो अरसि उंदि दासि पोर्रिक ओर दिसतोर. अस्के आ दासि पोर्रिक पत्रुनहेके हळसेक, “ई मनकलगुडा येसुनतोनि मत्तोर,” इंचि इत्ता.

57 गानि पत्रु, “नना ओन एरपाट किय्योन बाई,” इंचि इत्तोर.

58 जेरासेप आतंका इंकावरोर मनकल पत्रुन हळसि, “निमेगुडा ओराबेट्टाल वरोन आंदिन गदा,” इंचि इत्तोर. अस्के पत्रु, “हिल्ले दादा, नना आयोन,” इंचि इत्तोर.

59 दमगेर-दमगेरा उंदि गंटा आता पजा, इंकावरोर मनकल, “ईर गालिल एरियाता मनकनलेसी वळकसंतोर, अदुनहाटी निजमे ईर येसुनतोनि मत्तोर,” इंचि इत्तोर.

60 अस्केगुडा पत्रु, “निमे बतल वळकसंतिन दादा! नना ओन असले एरपाट किय्योन,” इंचि इत्तोर. अल्हा इत्ता-इनुडे मोदाटा गोगोड कूसता.

61 अस्के सामि पत्रुनहेके तिरियसि हळतोर. अस्के, “इय्याला नर्कळक गोगोड कूसका मुन्ने निमे नाकुन मूड मल्कां एरपाट किय्योन इंतिन,” इंचि येसु मुन्नेने वेह्चि मत्ता पोलेले पत्रुंक मति वाता.

62 अस्के ओर पलाते होंचि इरगा अळतोर.

येसुन कारेड्डाल्क कीतुर

(मत्तयाल 26:67-68; मरकुस 14:65)

63 येसुन बोर अय्ते पीसि मत्तुरो ओर कारेड्डाल्क कीसेके इरगा तनालय दल्गत्तुर.

64 ओना कळकुंक कपिड गंडा दोह्चि, “इंदके नीकुन बोर तंतुर? माकु बक्विस्यवानि वेहा,” इंचि ओन पूसकीत्तुर.

65 अचोने आयका ओना अपमानम कियानाहाटी वेल्लेन पोलेल्ले इत्तुर.

* 22:44 इद वचनम कोन्नि पांडु तिपिने हिल्ले.

येसुन पंचादितगा ओतुर
(मत्तयाल 26:63-65; मरकुस 14:61-64)

66 गंगातस्के यहदि पेद्रू दालक उंदि पंचादि उपिस्तुर, अगा पेद्रू दा पेर्मालोर, दर्मसास्त्रम कराहना गुस्लक मत्तुर. अद पंचादिते येसुन पीसि तच्चि ओरा मुन्ने निलाहत्तुर.

67 पजा ओर येसुन, “ओक्कला निमे किरिस्तुन आते माक वेहा,” इंचि इत्तुर. गानि येसु, “ओक्कला नना वेहिनागानि मिमेट नम्मिर.

68 इका नना सवालक पूसकिथिनागानि मिमेट जवाबगुडा हिथ्यिर.

69 गानि इंदकेटाल, गडसेम मत्तंका मनकना रूपमते पुटतोन नना ताकतवर पेनदा तिना बाजूंक उदूदंतन,”* इत्तोर.

70 अस्के पंचादिते मत्ता अंतोर लोकुलक, “अयते निमे पेनदा मरिना?” इंचि इत्तुर. अस्के येसु, “मिमेट इनानद निजमे,” इंचि इत्तोर.

71 अस्के, “कुदूदु ओना तोळदाल ओर वेहतद मनम केंजतोम. अयते मनाक बतल गवाइ गावाले?” इंचि इत्तुर.

23

येसुन पिलातुस राज्यपालना मुन्ने निलाहंतुर

(मत्तयाल 27:1-2,11-14; मरकुस 15:1-5; योहान 18:28-38)

1 पजा पंचादिता अंतोर लोकुलक तेदसि येसुन अगटाल पिलातुस इनना राज्यपालनगा ओतुर.

2 ओसि, “ईर मावा यहदि लोकुलकुंक एकरेवुलक वेहचि ओर्कु तपुड हरि हूपानेके मोमोट हळतोम. इका कैसर राजांक कर दोहामानि इंचि वेहांतोर. अचोने आयका ओनद ओर, ‘नना किरिस्तुन, राजुन आंदुन,’ इल्हा वेहकुंतोर,” इंचि दोसेलक दोसालय दलग्गुतुर.

3 अस्के पिलातुस येसुन, “निमे यहदिलकुना राजुन आदिना?” इंचि पूसकीतोर. अयते, “निमेन इंचतिन गदा,” इंचि येसु इत्तोर.

4 अस्के पिलातुस पेद्रू दा पेर्मालोर्कुन आनि लोकुलकुन, “नाकु ई मनकनगा बतले तपु दिस्सेक हिल्ले,” इंचि इत्तोर.

5 गानि लोकुलक मात्रम पिलातुस राज्यपालना पोल्ले केंजाकोटा, “ईर पुरागा यहदि लोकुलकुना देसेमते ओना पोल्ले कराहचि अंतोर लोकुलकुंक एकरेवुलक वेहचंतोर. इद कबळ ईर गालिल एरियाते सुस्व कीसि इंदके इगोळदाका* एवतोर,” इंचेके इरगा लोल्लि कियालय दलग्गुतुर.

येसुन हेरोद राजानगा ओतुर

6 लोकुलक इनानदान केंजसि पिलातुस, “बतल, ई मनकल गालिल एरियातोर?” इंचि पूसकीतोर.

7 अव रोजकुने गालिल एरियापोर्री हेरोद अतिपस राजाल राज्येम कीसेके मत्तोर. येसु गालिल एरियातोर इंचि तेळियतस्के, पिलातुस ओन हेरोद राजानहेके लोहचीतोर. आ वेलाते हेरोद राजालगुडा येस्सलेम सहरतेन मत्तोर.

8 हेरोद अतिपस राजाल येसुना बारेमते केंजसि मत्तोर अदुनहाटी वेल्लेन वर्सानाल येसुन हळना आसेते मत्तोर. इका ओन्क येसुना कयदाल बतलन्ना चिन्ह हळानद मत्ता. अदुनहाटी येसुन हळसि हेरोद राजांक वेल्लेन कुसि आता.

9 अस्के ओर येसुन वेल्लेन सवालक पूसकीतोर. गानि येसु बतले जवाब हिया हिल्लोर.

10 पेद्रू दा पेर्मालोर आनि दर्मसास्त्रम कराहना गुस्लक मात्रम येसुनपोर्री ओरा मनसुक वाताप तपुक-दोसेलक दोस्सेक मत्तुर.

11 पजा हेरोदगुडा ओना सिपाइलकुनतोनि कलियसि येसुन कारेड्डालक कीसेके कत्तोर. येसुकु राजालोर केराना कपडिं केराहचि ओर मर्रा पिलातुसुनहेके लोहचीतोर.

12 अदे रोजु हेरोद अतिपस राजाल आनि पिलातुस ईर इव्वुर दंतातोर आतुर. दीनकन्ना मुन्ने ओर वरोंक वरोर विरोदमते मनुंदुर.

पिलातुस येसुकु हामुर सिक्सा हीतोर

(मत्तयाल 27:15-26; मरकुस 15:6-15; योहान 18:39-19:16)

13 पजा पिलातुस पेर्मालोर्कुन, राज्येम कियानोर्कुन आनि लोकुलकुन केयतोर.

14 केथि ओर्कुन इल्हा इत्तोर, “लोकुलकुंक एकरेवुलक वेहचि ओर्क तपुड हरि हूपिचचंतोर इंचि येसुन मिमेट इगे तत्तिर. नना मीवा मुन्नेन ईन बेस परमेरका कीसि पूसकीतन. मिमेट ईनपोर्री दोसता तपुक-दोसेलकुनाल उंदिगुडा नाकु ईना लोपो दिसा हिल्ले.

* 22:69 बजन सहिता 110:1 * 23:5 इगोळदाका इत्ते येस्सलेमदाका.

- 15 इंका हेरोद अंतपस राजांकगुडा ईना लोप्यो तप्पुक-दोसेल्क दोर्का हिल्लें. अदुनहाटीं ओर ईन मर्ना नाहेकेन तिराह्चि लोहतोर. ईन्कु हामूर सिक्सा हियनलायक ईर बतल तप्पु किया हिल्लोर.
- 16 अदुनहाटीं नना ईन पोटेटे देब्बां तंचि होळसीतन,” इंचि इत्तोर.
- 17 इद पंडुगुने एडादिक वरोन यहुदि मनकन जेलनाल होळसा पिय्युंदु. †
- 18 अस्के अंटोर लोकुल्क कलियसि उंदेतीर, “ई येसुक हामूर सिक्सा हीम, मावाहाटीं बरब्बन होळसीम,” इंचि इरगा वरगोयालय दल्यातूर.
- 19 (ई बरब्बल इनानोर सहरता मनकालोर्कुन सरकारता विरोदमते कीसि मत्तोर. इंका बचुटूरो लोकुल्कन हक्किसिगुडा मत्तोर. अदुनहाटीं ओन जेलने वाटसि मत्तूर.)
- 20 पिलातुसना मनसुने येसुन होळसियानद मत्ता, अदुनहाटीं ओर लोकुल्कुक इंकुदि मल्का विनंति कीतोर.
- 21 गानि लोकुल्क मात्रम, “ओन कूसुनपोर्नी मोल्लां कोह्किसि वेलाड वाटद, ओन कूसुनपोर्नी वेलाड वाटद,” इंचि इरगा मोल्कुंचेके मत्तूर.
- 22 अयना पिलातुस मूडो मल्का ओर्कुन, “बारि? ईर बतल तप्पु कीतोर? ईन्कु हामूर सिक्सा हियनलायक नाकु बतले तप्पु दोर्काहिल्ले. अदुनहाटीं नना ईन पोटेटे देब्बां तंचि होळसीतन,” इंचि इत्तोर.
- 23 गानि लोकुल्क मात्रम उंदेतीर, “येसुन कूसुनपोर्नी वेलाड वाटा,” इंचि इरगा मोल्कुंचेके मत्तूर. ओरा मोल्कुन्मळता मुन्ने पिलातुसनद उंदिका पोल्ले ताका हिल्ले.
- 24 अदुनहाटीं पिलातुस, लोकुल्कुना इच्चा परकारमे आयि, इंचि इत्तोर.
- 25 पजा सरकारता विरोद कीसि, लोकुल्कन हक्किसि जेलुंक होंचि मत्ता बरब्बन लोकुल्क तल्कताहेंका ओन होळसिया वेहतोर. येसुन बारे लोकुल्कुना इच्चा मत्ताप कीकुन्निर इंचि ओरा कय्दुक अपजपेतोर.

येसुन कूसुनपोर्नी वेलाड वाटमळ

(मत्तयाल 27:32-44; मरकुस 15:21-32; योहान 19:17-19,23-24)

- 26 सिपाइल्क येसुन पीसि होनेनेके, अचवोटेन कुरेनिः सहरतोर वरोर सिमोन इनना मनकल ओना सहरताल वासेके मत्तोर, ओर्क कलियतोर. अयते सिपाइल्क ओन दोर्कापीसि येसुना कूसुन कांजसेक येसुना पज्जो-पज्जो ताका वेहतूर.
- 27 अस्के लोकुल्कनद उंदि पेद्दा मंदा येसुना पज्जो होंचेके मत्ता. अद मंदाते इच्चुं मुर्ताहक इंका मत्तां, अव येसुनाहाटीं वेल्लेन बादते इरगा अळसेके मत्तां. S
- 28 अस्के येसु अवुनहेके तिरियसि अवुन इल्हा इत्तोर. “ए येस्सलेम सहरता मुरताहकुनिटा! मिमेट नावाहाटीं अळमट, गानि मीवा मर्क-मियाहक, मीवा सतताहाटीं अळट.
- 29 बारित्ते मुन्ने इसोंटा तकलिपता रोजकु वायानव मंतां गदा, अव रोजकुने, ‘गोडुहोता मुरतळके सुकम मंता, पिलाल्क आयवा मुरतळके सुकम मंता, बस्केने मरतल्लूर आयवा मुरतळके सुकम मंता,’ इंचेके लोकुल्क इनानूर.
- 30 इंका ओर, ‘मावा पोर्नी वासि अर्द,’ इंचि गुट्टान इनानूर आनि ‘माकुन पृळसट’ इंचि गुप्पन इनानूर. ✧
- 31 मरा पचचगा मननेकेन ईर लोकुल्क इल्हा कीसंतूर अयते, वत्सोत्ता मरातुन बल्हा कियनुरो?”* इंचि इत्तोर.
- 32 पेद्दा तप्पु कीता इंका इब्बुर मनकालोर्कुनगुडा हामूर सिक्सा हिट्यालय येसुनतोनि ओसेक मत्तूर.
- 33 पजा ओर “तला बोरसेम”† इनना जेगातगा एवतूर. एवतस्के येसुन कूसुनपोर्नी मोल्लां कोह्किसि वेलाड वाटतूर. अल्हेने पेद्दा तप्पु कीता आ इब्बुर मनकालोर्कुनगुडा येसुनतोनि ओना तिना बाजुंक वरोन, रोड्डा बाजुंक वरोन कूसुनपोर्नी वेलाड वाटतूर.
- 34 अस्के, “पेनबाबा, ईर बतल कीसंतुरो, अद ईरके तेळियो. अदुनहाटीं ईर्कुन मापि कीम,” इंचि येसु इत्तोर. ‡ पजा सिपाइल्क सिट्टिं वाट्टिस ओना कपडिन पंचकुत्तूर.
- 35 अगा जर्गनदुंता लोकुल्क नित्तिसि हळसेक मत्तूर. राज्येम कियानोरगुडा, “ईर अयते इंकावरोन पिसागोटतोर. अयते ईर ओक्कला पेन पेरता किरिस्तु आयानयते, ओना जीवातुन ओरे पिसागोटकुन्निर,” इंचि कारेड्डाल्क कियुंदूर.

† 23:17 इद वचनम कोनि पांडु लिपिने हिल्ले. ‡ 23:26 कुरेनि कुरेनि सहर येस्सलेम दगोटा उंदि देसेमते मंता. सिमोन पंडुगुनाहाटीं येस्सलेम वासि मत्तोर.

S 23:27 इद वचनम कोनि पांडु लिपिने हिल्ले. ✧ 23:30 होसे 10:8 * 23:31 असलते येसु इनानद बतल इत्ते, नना बतल तप्पु कियाकोन्ना नाकुन इल्हा कीसंतूर अयते मीवसोंटा तप्पु कीतीर्कुन बतल कियनुरो? येसु वेहता ई पोल्ले नल्थे वर्साना पज्जो जर्गनद मत्ता. इल्हा रोम सरकारता सिपाइल्क वासि येस्सलेमतुन नाशेडम कीतूर. † 23:33 “तला बोरसेम” इद जेगा तला बोरसेमलेक्का दिसंता बारे. अदुनहाटीं इद जेगाकु इल्हा पोरेल अरता. इदे जेगाते रोम सरकार तप्पु कीतीर्कुंक हामूर सिक्सा इत्ते कूसुंक वेलाड वाटना सिक्सा हिथुंदूर. ‡ 23:34 ए पेनबाबा इंचि येसु इत्ता पोल्ले मोदाटा कोनि युनानि पुस्तकाल्कुने हिल्ले.

36-37 सिपाइलकगुडा ओना दमगेर्क होंचि ओन कारेड्डालक कीसेके, पुल्लटा पंडिना पानकम उहचेके, “ओक्कला निमे यहदिल्लुकुना राजान आते, निमे नीवा जीवातुन पिसागोटकुन,” इंचि इत्तोर.

38 इंका ओना तल्लातगा पोरो, “इंर यहदिल्लुकुना राजाल आंदुर,” इंचि उंदि पाटि पोरो रासि कूसुंकर हिरकिस्तुर.

39 अगा येसुनतोनि वेलाड वाट्टिस मत्ता तप्पु कीता इक्कुर लोप्पोटाल वरोर, “निमे पेन लोहता किरिस्तुने गदा! अयते नीवद निमे पिसागोटकुचि माकुनगुडा पिसागोटा,” इंचि ओना अपमानम कीतोर.

40 गानि तप्पु कीता इंकावरोर मनकल बारे अल्हा इत्ता मनकन गदरिचि, “इंन्क दोर्कता सिक्से नीकुगुडा दोर्कता. अयना नीकु पेन इत्ते वेरें हिल्लेना रो?

41 मनम अयते तप्पु कीतोम इंचि न्यायम परकारम मनाकु सिक्सा दोर्कता. गानि इंर अयते बतले तप्पु किया हिल्लोर,” इंचि इत्तोर.

42 मर्रा येसुन, “येसु, निमे राजाल आतस्के नाकुन मति कीम,” इंचि इत्तोर.

43 अस्के येसु ओन, “नना नीकु निजम वेहचेके, निमे इय्यालेन नावातोनि स्वर्गमते मनकिन,” इंचि इत्तोर.

येसु जीवा होळसंतोर

(मत्तयाल 27:45-56; मरकुस 15:33-41; योहान 19:28-30)

44 अद वेलाक पिथ्यटा पन्नेंड एगानस्केटाल अयते मूड एगनदाका पूरा बूमिअंता हीकट आता.

45 पोळदुना वेल्गुगुडा दिसाकोटा आता. अस्के येस्सलेम सहरते मनना गुळिता लोप्पो पवित्र जेगा आनि अन्नि जेगांकन्ना एक्को पवित्र जेगाता नड्डुम मत्ता परदा, पोरोटाल हिळुदाका हर्सि रोंडु तुकडां आता. § 46 अस्के येसु, “ए पेनबाबा! नना नावा आत्मातुन नीवा कयदे अप्पजेपंतम,”* इंचि लगांचि वरगेयसि जीवा होळस्तोर.

47 नूर मंदि सिपाइलकुनपोरो मनना दरोगाल अगा जर्गतद हळसि, “इं मनकल निजमे नीतिमंतुड आंदुर,” इंचेके पेनदुन तलसकुत्तोर.

48 अगा हळालय जमा आता अंटोर लोकुकल अगा जर्गतदुनंता हळसि ओर ओरा चातिन तनकुंचेके मल्लिस होत्तुर.

49 गानि येसुन एरपाट कियानोर अंटोर आनि गालिल एरियाताल ओना पज्जो-पज्जो वातव मुर्ताहक इचचुर लक्कु नित्तिसि अगा जर्गतदुनंता हळसेक मत्तां.*

येसुन गति कियमळ

(मत्तयाल 27:57-61; मरकुस 15:42-47; योहान 19:38-42)

50-51 पज्जा अगा यहदिया एरियाता अरिमताइ नाटेनोर वरोर योसेप इना मनकल मत्तोर, ओर यहदिल्लुकुना पंचादिता मेंबर मत्तोर. अल्हेने ओर बेस नीतिमंतुड मत्तोर. पंचादिते येसुन हळकना बारेमते येतता निरनायम ओन्क इस्टम मनाहिल्ले. इस्राएल देसेमते पेन दाना राज्येम बस्के निलाहंता इंचि ओर एदूर हळसेक मत्तोर.

52 इ योसेप पिलातुसन्ना होंचि येसुना पीनगुन गति कियनाहाटी तलकतोर.

53 तल्लिसि येसुना पीनगुन कूसुनपोरोटाल हिळु रेहतोर. पज्जा एक्को दराता हामुर कपिडते ओना पीनगुन हुटतोर. अल्हा कीसि बंडातुन तुल्हाचि तयार कीता बोंदाते ओसि इरतोर. अद बोंदाते दीनकन्ना मुन्ने बोना पीनगुन इरा हिल्लुर.

54 आ रोजु नोमकेमताहाटी तयारि कियना रोज* आंदुर. जेरासेप अयते पोळद होंचि नोमकेम रोज होळियानदे मत्ता.

55 पेज्जा येसुनतोनि गालिल एरियाताल वाता मुर्ताहक पीनगुन ओयनेके बोंदातुन हळनाहाटी योसेपुना पज्जो होत्तां. इंका अव येसुना पीनगुन बोंदाते बल्हा इरतुर अदुनगुडा हळत्तां.

56 आयंका अव मुर्ताहक अगटाल तिरियसि होंचि बेस गमगाम्मा गब्बु वायना वस्तुक आनि अत्तर निय येसुना पीनगुंकर होकानाहाटी तयार कीतां. गानि वारमता नोमकेम रोजु होळियताहाटी, आदेस परकारम बद्दे कबळ कियामन्नि इंचि लोने मत्तां.

24

येसु मर्रा जीवाते तेदंतोर

(मत्तयाल 28:1-10; मरकुस 16:1-8; योहान 20:1-10)

§ 23:45 अद परदा मत्तस्के लोकुकल गुळि लोप्पोटा अनि जेगांकन्ना एक्को पवित्र जेगाता होना पराकोदुर. * 23:46 बबन सहिता 31:5

* 23:49 योहान 19:25 * 23:54 नोमकेमताहाटी तयारि कियना रोज यहदिल्लुकुना रिवाजते नोमकेम रोजुननाड बतले कबळ कियमळ हिल्ले. अट्टुळ-बोळसुळ बतले हिल्ले. अदुनहाटी ओर उंदि रोज मुन्नेन अनि तयार कीकुत्तुर. ओरा नोमकेम सुकरारम पोळद होंचि होळियसि स्नेरम पोळद होंचि मारंता.

1 पजा वारमता मोदाटा रोजु इत्ते अय्यारम हक्केरेन पोळ्द पेय्सका मुन्नेन, आ मुर्ताहक अव तयार कीता गमागमा गब्बु वायना वस्तुक पीसि येसुन इरता बोदातगा एवतां.

2 एवतस्के बोदाता हरदुक अड्डम ताससि मत्ता बंडा पक्काक दोब्बिसि मत्तदुन अव हळतां.

3 अस्के अव मुर्ताहक लोपोपो होळियसि हळतां अय्ये अवुंक अगा येसु सामिना पीनगु दिसा हिल्ले.

4 अव इदुना बारेमते इल्हा बल्हा आता इंचि विचारमते मननेकेन अचानक इव्वुर मनकालोर जगा-जगा मेर्सना कपडिं केर्सि अवुनगा वासि निलतुर.

5 अस्के अव इरगा वेरियसि तल्ला हिळ्ळ वराहचि दंडम दोस्तां. पजा ओर मनकालोर अवुन इल्हा इत्तुर. “जीवाते मनना मनकन हातोरव्टे बारि पहकसेक मंतिट?”

6-7 ओर इग्गे हिल्लोर, हामुरताल जीवाते तेदतोर. ओर मीवातोनि गालिल एरियाते मननेके मीकु, ‘मनकना रूपमते पुटतो नान्कुन पापि मनकालोरा कय्ये पीसि हियमळ जर्गार, पजा ओर नान्कुन कूसुनपोरों वेलाड वाटिसि हक्कानुर. गानि नना मूड रोजकुने मर्ना जीवाते तेदकन. इवनि निजम आयनुं,’ इंचि वेह्चि मत्तोर. इद मीकु मति हिल्लेना?” इंचि इत्तुर.

8 अस्के अव मुरताहकुक येसु मुन्ने वेहता पोल्ले मति वातां.

9 पजा अव मुर्ताहक बोदातगा हळता पोल्लेन बोदातगाटाल मल्सि होंचि पदाकोंडु प्रेरितुलुकुंक आनि अगा मत्ता कळमता अटोर सिस्सुलुकुंक वेहतां.

10 अव मुर्ताहकुने, मगदलेनि नाटेना मरियम, योहानि, याकोबुना यावल मरियम, इंका अवुनतोनि मत्ता मुर्ताहक. इवे मुर्ताहक अव हळतव, केंजतव अन्नि पोल्ले प्रेरितुलुकुंक वेहतां.

11 गानि प्रेरितुलुकुंक आ मुरताहकुना पोल्ले अट्टिगेन अनपिस्तां. अदुनहाटीं अवुना पोल्लेन ओर नम्मा हिल्लुर.

12 अयना पत्रु अगटाल तेदसि बोदातेके विततोर. अगा लोपोपो होळियसि हळते, सिराप येसुना पीनगुन हुटसि मत्ता कपडिं बल्हा मतव अल्हे अरसि मत्तद दिसता. अगा अल्हा हळसि इल्हा बल्हा आता इंचेके ओनद-ओर मनसुने विचारम कीसेके मल्सि लोन होतोर.

इमाउस नार होनना हरदे येसु दिसंतोर (मरकुस 16:12-13)

13 अदे रोजु येसुना सिस्सुलुकुनाल बोरो इव्वुर इमाउस इनना नार होंचेके मत्तुर. अद नार येस्सलेम सहरताल दग्गेर-दग्गेरा पदाकोंडु किलोमिटक लक्कु मंता.*

14 ओर इव्वुर येस्सलेमते जर्गता अन्नि गटनन बारेमते वळकसेक होंचेके मत्तुर.

15 ओर अव पोल्ले वळकसेके होंचेके मननेके येसु अचानक कुट्टु ओरगा वासि ओरतोनि कलियसि ताकालय दलगतोर.

16 गानि ओर बोरो आंदुर इंचि ओर्क इव्वुकुं एपाटा आयाकोंटा कियमळ जर्गता.

17 पजा येसु ओर्कुन, “मिमेट बव पोल्लेना बारेमते वळकसेक ताकसंतिर?” इंचि पूसकीतोर. अस्के ओर इव्वुर दुक्कमते अग्गेन निततुर.

18 पजा ओर इव्वुरगटाल वोर किलयुपास इननोर, “इव रोजकुने येस्सलेमते जर्गता गटनन बारेमते नीकु एपाटा हिल्लेना? पंडुगुंक वातोरव्टेटाल इव गटनां तेळियवोन निमे वरोने मंतिना?” इंचि जवाब हीतोर.

19 अस्के येसु, “बव पोल्ले आंदुं?” इंचि पूसकीतस्के ओर इल्हा वेहालय दलगतुर. “नासरेत नाटेना येसुना बारेमता पोल्ले आंदुं दादा. ओर इंसंटा मनकल मत्तोर गदा, ओर बतल वेहिना, बतल किथिना पेनदा ताकततोने कियुंदुर. ओर पेनदा कबुरतोर मत्तोर. लोकुलकगुडा ओन बेसतोर इंचि इनुंदुर.

20 गानि मावा पेद्रा पेर्माँलोर, अदिकारिल्व्क ओन्क हामुर सिक्सा हियमळ गावाले इंचि ओन पीसि पिलातुसना कय्ये हीतुर. पजा लोकुलक ओन कूसुनपोरों मोल्लां कोहिसि हक्कतुर.

21 गानि इस्राएल लोकुलकुन पगातोरा कयदाल ओर होळिसियानुर इंचि मोमोट आसे पळतोम. इव अन्नि गटनां हन्नेट रोजे जर्गतां.”

22 “अचोने आयका मावाव्टेटाल इच्चु मुर्ताहकगुडा माकुन इचंन्रमते अरहतां. अव इय्याला हक्केरेन बोदातगा होंचि मत्तां.

23 गानि अगा अवुंक येसुना पीनगु दिसा हिल्ले. अदुनहाटीं अव मल्सि वासि, माकु पेनदा द्तां दिसतां, अव माकु येसु जीवाते तेदतोर, इंचि वेहतां, इंचेके अव मुर्ताहक माकु वेहतां.

24 अवुना पोल्ले केंजसि मातोनि मत्तोर इच्चुर बोदातगा होंचि हळतुर. अय्ये अव मुर्ताहक बल्हा वेहतांगो अल्हेन मत्ता, येसु अगा मनाहिल्लोर,” इंचि वेहतोर.

* 24:13 इद वचनमते येसुना सिस्सुलुकुनाल इत्ते, सिराप ओना पन्नेड सिस्सुलुकुनाल इंचि आयो गानि येसु वेहताप ताकानोरव्टेटाल बोरो इव्वुर.

- 25 अस्के येसु ओर्कुन, “अरे बुद्धिद तक्को लोकुरिटा, पेनदा कबुरतोर मुन्ने वेहचि मत्ता पोल्लेन मिमेट बस्के नम्मतिर?
 26 पेन लोहता पिसागोटना किरिस्तु स्वर्गमता महिमाते होळियका मुन्ने ओर इवन्नि तकलिप बोगांचेपीता,” इंचि इत्तोर.
 27 पजा, मूसाना नियमते, अंटोर पेनदा कबुरतोर रासता पोल्लेने, अल्हेने दर्मसास्त्रमते ओना बारेमते बगा-बगा रासि मंतानो अब्नुनता येसु ओर्कु बेस तेळियानाल वेहतोर.
 28 पजा ओर्क होनना मत्ता नाटुक दगरे एवतुर. अस्के येसुक इकिचो मुन्नेळक होनानद मंता इत्ताप ओर्क अप्पिस्ता.
 29 अदनुहाटी ओर ओन, “इंदके पोळ्द होत्ता, इय्याला निमे इगोन महगा आगा दादा!” इंचि वेल्लेन विनंति कीतुर. अस्के येसु ओरगा मननाहाटी ओरतोनि लोप्पो होत्तोर.
 30 पजा येसु ओरतोनि कलियसि गाटो तिनालय उदतस्के, हारितुन पीसि पेनदक दन्यवाद कीतोर. पजा दान तुकडां कीसि ओर्क हियालय दल्गुतोर.
 31 अल्हा हारि तुकडां हियानेकेन ओरा इव्वुरा कळक जग्गरा आतां आनि ईर येसु आंदुर इंचि एरपाट कीतुर. गानि येसु ओर्क दिसाकोटा मायम आतोर.
 32 पजा ओर इव्वुर ओरद-ओरे, “हरपीसि मनातोनि वळकसेके ताकानेके ओर मनाकु दर्मसास्त्रमते रासि मत्ता पोल्लेना निजम अर्तमतुन बेस तेळियानाल वेहतोर. अस्के ओना पोल्लें केंजसि बचचोन बेस अनपिचचेक मत्ता!” इंचेके वळककुत्तुर.
 33 पजा ओर अगाटाल बिराना तेदसि मरां तिरियसि येस्सलेम होत्तुर. होत्तस्के अगा पदाकोडु मंदि प्रेरितुत्क अल्हेने कळमता लोकुलक उंदगा जमा आसि मत्तद ओर हळतुर.
 34 अस्के आ जमातोर, “हो, इद निजमे! येसु सामि जीवाते तेदतोर. ओर सिमोन पत्रुक दिसतोर,” इंचि वळकसेके मत्तुर.
 35 अस्के ओर इव्वुरगुडा हरपीसि होननेके बतल-बतल जर्गता, इंका येसु हारितुन उराहचि ओर्क हियनेके ओर येसुन बल्हा एरपाट कीतुर, इंदता अंटोर्क वेहतुर.

येसु ओना सिस्कुलुकुं दिसंतोर

(मत्तयाल 28:16-20; मरकुस 16:14-18; योहान 20:19-23; प्रेरितुलुकुना कबाहक 1:6-8)

- 36 ओर इव्वुर इव पोल्लें अंटोर्क वेहचेकेन मत्तुर, अचचोटेन येसु ओरा नड्डुम वासि निलतोर. निल्सि, “मीकु अंटोर्क सांति दोर्कि,” इंचि इत्तोर.
 37 अस्के ओर अंटोर, “मोमोट बूतमतुन हळसंतोम,” इन्कुचि इरगा वेरियतुर.
 38 गानि येसु ओर्कुन, “मिमेट इचचोन बारि वेरियतिर? मीवा मनसुने नावा बारेमते अनमानम बारि वाता?
 39 नावा कयक-कालुकुन हळ्हाट! नाकुन इट्टिस हळ्हाट, ननाने आंदुन! बूतमकु हळ्वि-बोक्कां मन्नो गानि नाकु मंतां,” इंचि इत्तोर.
 40 इल्हा वळकसेके येसु ओना कयक-कालुकुन ओर्क हुपिस्तोर.
 41 अस्के ओर वेल्लेन कुसिते, इल्हा बल्हा आता इंचेके इचंत्रम आसि ओर्क पुरागा विस्वासमगुडा आसेके मनाहिल्ले. येसु ओर्कुन अल्हा हळसि, “मिहगा बतलन्ना तिनालय मंतना?” इंचि पसकीतोर.
 42 अस्के ओर ओन्क उंदि बोळस्ता जिम्मा तुकडा हीतुर.
 43 पजा येसु अद तुकडातुन ओरा मुन्नेन तित्तोर.
 44 तित्तारित्ते येसु ओर्कु, “इव पोल्लें बव इत्ते, नाकुन हळ्वका मुन्ने नना मीवातोनि मत्तन, अस्के मीकु वेहतव आंदु, मूसाना नियमते, पेनदा कबुरतोर पुस्तकालुकुने आनि बजन संहिताने रासि मत्ता अनि पोल्लें निजम आयनदे मत्ता,” इंचि इत्तोर.
 45 पजा दर्मसास्त्रमते रासि मत्ता पोल्लें तेळियना इंचि येसु ओर्क तेल्वि हीतोर.
 46 हीसि ओर्कुन इल्हा इत्तोर. “दर्मसास्त्रमते रासि मत्ताप, किरिस्तुक वेल्लेन तकलिपकु वासि ओर हायानुर, पजा मूड रोजकुने मरा जीवाते तेदानुर इद अदे पोल्ले आंद.
 47 पापालक मापि आयनाहाटी मनसु मार्सकुनुळ अक्सरम मंता. इदे कबुरतुन येस्सलेमताल सुख कीसि, दुनियाता अनि देसेलुकुना लोकुलुकुं किरिस्तुना अदिकारमते वेहमळ जरगार.
 48 इव अनि पोल्लेंक मिमेटे गवाइ मतिर.
 49 इंका नावा पेनबाबाल हीतन इंचि पोल्ले हीता आ पवित्र आत्मातुन नना मिहगा लोहांतन. गानि बदवेरदाका अत्ते स्वर्गमताल पवित्र आत्माता ताकत मीपोरो रेयोनो, अदवेरदाका मिमेट इदे येस्सलेम सहरते मंडु,” इंचि इत्तोर.

येसुना स्वर्गमते तेदसि होनमळ

(मरकुस 16:19-20; प्रेरितुलुकुना कबाहक 1:9-12)

50 पजा येसु ओर्कुन येस्सलेम सहर दग्गेरा मनना बेतानि इनना नाटाहेके ओतोेर. ओसि ओर ओना कय तेहचि ओर्कु आसिर्वाद् हीतोेर.

51 ओर्क आसिर्वाद् हियानेकेन येसु ओरागटाल लक्कु आतोेर. पजा ओन पेन स्वर्गमते तेहाचि ओता.

52 अस्के ओर अंटोर येसुंक टोंगरां ऊनसि, मोळिकसि अगटाल वेल्लेन कुसिते येस्सलेम सहर मल्सि होत्तुर.

53 पजा ओर बस्केळक गुळिते जमा आसि पेनदा स्तुति कीसेके मनुंदुर.

योहान योहान रासता बेसता कबुर

इद पुस्तकमता बारेमते गिचचो परिचयम

रासतोना पोरोल: योहान

रासता कालम: इसवि सन 85-90

ई पुस्तकमते रासता मेन पोल्ले बतल इत्ते, येसुए पेनदा मरिं आंदुर. पेनदा आत्माता ताकततोनि इद दुनियातोकुंन ओरा पापालकुनाल पिसागोटलय, ओर इद दुनियाते मनकना रूपमते पुटतोर. बोर अय्ते येसुनपोर्रो विस्वासम इरंतोर, सिराप ओर स्वर्गमते दांतोर. इदे ई पुस्तकमता मेन पोल्ले आंद.

ई पोरोटा पोल्लेन रुजुव कियालय, येसु इद दुनियाते मननेके, लेक्का हिल्लुवा अद्बूतामाता चिन्हे, कबाहक कीसि हुपिस्तोर. अब्देटाल एतुन अंगुर पानकमते मारियागोटमळ, मुपै एनिमिदि वर्सानाल बिमारते मत्ता मनकन बेस कियमळ, पुटतस्केटाल गुड्डिड मत्तोनि दिस्सानाल कियमळ, हासोंचि मुग्गता लाजस्न जीवाते तेहमळ, हेय्युं वेय्कुना मंदिक गाटो तासमळ, समुद्रमता तळाने एतापोर्रो ताकमळ, इवन्नि मंतां.

आकिरते येसु उंदि मेन पोल्ले बतल वेहंतोर इत्ते, “मिमेत नावा पोरोल केंजसि विस्वासम कियकोन्ना, नना कीता कबाहकुन हळसि अयना नावा विस्वासम कीम्ट. अल्हा कीतिरिल्ले, मिमेत पेनबाबनतोनि स्वर्गमते मर्नतिर,” इंचि वेहतोर. नीकु दोर्कता पिस्वर नीवद आंद. अदुनहाटीं निरनायमगुडा नीवा कय्देन मंता. इंचि इद पुस्तकमत्तुन बेस हद्दिवेसि निरनायम येता. पेनदा सांति बस्केळक नीवातोनि मन्निकांटी!

बगा बतल मंता

मोदोल पोल्ले 1:1-18

येसु सेवा कबळ सुख कीतोर 1:19-51

लोकुकुना नड्डुम येसु सेवा कबळ सुख कीतोर 2:1-12:50

येस्सलेमते येसुना आकिर वारम 13:1-19:42

सामि मरा जीवाते तेदमळ आनि अंतोर्क दिसमळ 20:1-31

गालिल्लते मरुदि मल्का सामिना दिसमळ 21:1-25

पेनदा पोल्ले मनकना रूपमते वाता

1 बतले पुट्टका मुन्ने पोल्ले* मत्ता. आ पोल्ले पेनतोनि मत्ता. आ पोल्ले पेन आंद.

2 आ पोल्ले मुन्नेटाले पेनतोनि कलियसि मत्ता.

3 दुनियाते मननव अन्निटवुन, पेन अदुनहेंदाले पुटिस्ता. अदुन होळसि बतले तयार आयाहिल्ले.

4 अदुन लोपपो पिस्वर मत्ता. आ पिस्वरे अंतोर लोकुकुनाहाटीं वेलगु आता.

5 आ वेलगु हीकटते एल्यंता. हीकट वेलगुन बस्केने गेल्सा परो.

6 पेन बरोर कबुरतोनि लोहता, ओन पोरोल योहान.†

7 आ वेलगुना बारेमते ओर गवाइ वेहतस्के ओना पोल्ले केंजसि, अंतोर लोकुकुल आ वेलगुनपोर्रो विस्वासम कियना, इंचि ओर वेहालय वातोर.

8 आ वेलगु योहान आयोर. गानि लोकुकुकुल आ वेलगुना बारेमते गवाइ वेहालय योहान वातोर.

9 हरेक मनकंक निजमाता वेलगु हियानोर, इद दुनियाते वासेक मत्तोर.

10 ओर इद दुनियातेन मत्तोर. ओनाहेंदाले पेन ई दुनियातुन पुटिस्ता. गानि ई दुनिया ओन एरपाट किया हिल्ले.

11 ओर ओना लोकुकुनेन वातोर, गानि कुद्दु ओना लोकुकुके‡ ओन ओपुकुना हिल्लुर.

12 गानि बोर अय्ते ओन ओपुकुचि ओना पोरोल पोरो विस्वासम कीतुरो, ओर्क अंतोर्क पेनदा मर्क-मियाहक आयना अदिकारम ओर हीतोर.

13 पेनदा मर्क-मियाहक आयमळS इत्ते मनकना पीटाल, मनकना इच्चा मत्ताप पुटमळ, मुय्दोना इच्चा मत्ताप पुटमळ आयो. गानि पेने ओर्कुन दाना संतानम कीकुंता.

* 1:1 पोल्ले इगे किरिस्तु इंचि अर्तम. † 1:6 योहान इर बापतिस्मा हियना योहान आंदुर. येसुना प्रेरित आयोर. ‡ 1:11 ओना लोकुकुके यहूदि लोकुकुल.

S 1:13 पेनदा मर्क-मियाहक आयमळ पेन बस्के अय्ते दाना आत्मातुन मनकालोरागा इरता अस्के ओर दाना मर्क-मियाहक आंदुर.

14 आ पोल्ले मनकना रूपमते मारियता. अद कुर्पा, सत्तेमतोनि पुरागा निडिस मना नड्डुम जेगा आता. मोमोट महिमातुन हळतोम. अद महिमा बाबाना वरों मरिना महिमालेसी मत्ता.

15 ओना बारेमते योहान, “नावा पज्जोटाल बोर अये वायनद मत्तोर, ओर ईर आंदुर. ओर नाकन्ना वेल्लेन मुन्नेटाल मत्तोर इंचि नाकन्ना ओर वेल्लेन पेद्दोड,” इल्हा लोकुकुकुंक लगांचि मोक्कुचेके गवाइ वेहतोर.

16 ओर अन्नि तीरकुने पुरागा मत्ताहेका, ओनहेदाल मनाकु अंटोर्क कुर्पाता आसिर्वाद पोर्गे आसिर्वाद दोर्कता.

17 मूसाल इनानोनहेदाल पेन मनाकु नियमाल्क हीता. गानि कुर्पा, सत्तेम मनाकु येसु किरिस्तुनाहेदाल दोर्कता.

18 पेनदुन बस्केने बारे ह्वा हिल्लुर. गानि पेनबाबाना संकते मनना ओना वरों मरि, ओर मनाकु ओन* हुपिस्तोर.

येसुना बारेमते योहानुना गवाइ

(मत्तयाल 3:12; मरकुस 1:1-8; लूकाल 3:15-17)

19 “निमे बोन आदिन?” इंचि योहानुन पूसकियालय येस्सलेम सहरते मनना यहुदि पेद्दाल्क, इच्चुर पेर्मांलोकुंन आनि लेवि जातितोकुंन,† ओनगा लोहत्सके योहानुना गवाइ इल्हा मत्ता.

20 अस्के, “नना किरिस्तुन आयोन,” इंचि योहान पोल्ले मकसाकोटा कबुल कीतोर.

21 अस्के पेर्मांलोक आनि लेवि जातितोर, “अये निमे एलियन आदिना?” इंचि पूसकीत्सके, “नना एलियागुडा आयोन,” इंचि योहान इत्तोर. अस्के ओर, “हिलाकोटे निमे पेनदा कबुरतोना?” इंचि इत्तस्के, “नना पेनदा कबुरतोनिंका आयोन,” इंचि योहान इत्तोर.

22 पजा ओर लोकुकुंक ओन मर्रा, “अये मरि निमे बोन आदिन? माकुन लोहतोकुंक मोमोट होंचि बतल वेहकोम? अदुनहाटी नीवा बारेमते निमे बतल वेहकुंतिन, माकु वेहा,” इंचि पूसकीतुर.

23 अस्के, यसायाह इनना पेनदा कबुरतोर मुन्ने वेहताप, “सामिनाहाटी सवरटा हर्रि तयार कीम्टु, इंचि केडाते मोल्कनानोना अल्किरतुन ननाने आंदुन,” इंचि योहान ओर्क वेहतोर.

24-25 योहानुन पूसकियालय वाता परिसि लोकुकुंक, “निमे किरिस्तुन आयिन, एलियन आयिन, पेनदा कबुरतोनगुडा आयिन. असांत्सके निमे लोकुकुकुंक बारि बापतिस्मा हीसतिन?” इंचि योहानुन पूसकीतुर.

26 अस्के योहान, “नना अये बापतिस्मा एततोनि हीतन. गानि इगे मीवा नड्डुम वरोर नित्तिसि मंतोर, ओन मात्रम मिमेट एरपाट कियिरि.

27 नावा पज्जोटाल वायानोना कादा हेरपुमता नोंडे लेहना विल्लुवागुडा नाकु हिल्ले,” इंचि योहान जवाब हीतोर.

28 इवन्नि गटनां योर्दन बरेटा हब्बेर, पोळ्द पेय्सेनेके मनना बेतानि इनना नाटे जर्गतां. अगा योहान बापतिस्मा हियुंदुर.

येसु सामिण् पेनदा मरि

29 इंकुदि रोजु योहान, येसु ओनाहेके वायनद हळसि, “अद हुळाट, दुनियातुन पापमता सिक्साताल तप्सानाहाटी मोक्कु आयाना पेनदा गोंर पोरिनसंतोर!

30 नना दीनकन्ना मुन्ने वेहचि मत्तन गदा, नावा पज्जोटाल वरोर वायाना मंतोर इंचि! अद ईना बारेमतेन आंद. ओर नाकन्ना वेल्लेन मुन्नेटाल मत्तोर, अदुनहाटी ओर नाकन्ना पेद्दोड आंदुर.

31 ओर बोर आंदुर कुद्दु नाके तेळियो. गानि इष्मएलता लोकुकुकुंक ओर दिसगोम, इंचि नना एततोनि बापतिस्मा हियालय वातन,” इंचि योहान इत्तोर.

32-33 मर्रा योहान येसुना बारेमते इल्हा गवाइ वेहालय दल्यतोर, “नना कुद्दु ओन एरपाट कियाकोदुन. गानि एततोनि बापतिस्मा हियालय नाकुन लोहता पेने नाकु वेहचि मत्ता, ‘पवित्र आत्मा पावरेम पिट्टे लेहका आसि बोनपोर्गे अये रेयनेके निमे हळतिन, ओर लोकुकुकुंक पवित्र आत्माते बापतिस्मा हियानोर आंदुर,’ इंचि. पवित्र आत्मा पावरेम पिट्टे लेहका आसि स्वर्गमताल हिळ्ळु रेय्से, ओनपोर्गे वासि उदतद नना हळतन. 34 इदंता नना नावा कळ्ळुकुन निडा हळतन. अदुनहाटी, ‘ईर पेनदा मरि आंदुर,‡’ इंचि नना गवाइ हीसंतन,” इंचि योहान वेहतोर.

येसुना मोदाटा सिस्थुल्क

35 इंकुदि रोज योहान ओना सिस्थुल्कनाल इव्वुर सिस्थुल्कनतोनि नित्तिसि मत्तोर.

36 अस्के येसु ओना दग्गोटाल होननद हळसि, “हुळाट, पेनदा गोंर पोरि,” इंचि इत्तोर.

37 योहान इत्ता पोल्ले केजसि ओना इव्वुर सिस्थुल्क येसुना पज्जो होत्तुर.

* 1:18 ओन पेनदुन. † 1:19 लेवि जातितोकुंन ईर लेविना वंसमतोर आंदुर. ‡ लोकुकुंक पेनदा गुळिते साप-सपाइ, पेर्मांल कवाहक कीसेक मनांतुर.

‡ 1:34 ईर पेनदा मरि आंदुर पेन फेरतोर.

38 येसु पजोळक तिरियसि हळतोर अस्के ओर इव्वुर ओना पज्जो वायनद हळसि ओर्कुन, “मिमेट बतल पहकसंतिर?” इंचि पसकीतोर. अस्के ओर, “रब्बी! § निमे बगा मनांतिन?” इंचि इत्तोर.

39 अस्के येसु ओर्कुन, “वट हळकिर,” इत्तोर. ओर येसुनतोनि होंचि ओर मनना जेगातुन हळतुर. हळसि येसु मनना जेगातगा एवसि ओनतोनि अगेन मत्तुर. अस्के नुत्पेळतां नालुं एासेक मत्ता.

40 योहानुना पोल्ले केंजसि येसुना पज्जो होत्ता इव्वुर सिस्स्युल्कुनाल वरोन पोरोल अंदरियल. ई आंद्रेयल, सिमोन पत्रु इनानोना तम्मुर आंदुर.

41 आंद्रेयल अगटाल सवरगा ओना दादल सिमोन पत्रुक होंचि कलियतोर. कलियसि, “दादा मोमोट मेसय्यांक इत्ते किरिस्तुंक कलियतोम,” इंचि इत्तोर.

42 पजा आंद्रेयल ओना दादल सिमोन पत्रुन येसुनगा पीसि वातोर. येसु सिमोन हळसि, “निमे योहानुना मरि सिमोन आदिन. गानि इंदकेटाल नीकुन केपा इत्ते पत्रु इंचि केयानुर,” इंचि इत्तोर.

43 इंकुंदि रोज येसु गालिल राज्यमते होनना निरनायम एततोर. अस्के पिलिपुन कलियसि, “निमे ना पज्जो वा,” इंचि इत्तोर.

44 पिलिपु, अंदरियल आनि पत्रु ईर मुव्वुरगुडा बेतसेदा इनना सहरतोर आंदुर.

45 पजा पिलिपु होंचि नतेनलुंक कलियतोर. कलियसि, “बोना बारेमते अथे मसाल दर्मसास्त्रम रासतोर आनि पेनदा कखुरतोरगुडा रासतुर, ओर माकु दोकेतोर. ओर नासरेत नाटेना योसेप इनानोना मरि येसु आंदुर,” इंचि वेहतोर.

46 अस्के नतेनल, “अल्हाना! नासरेततालगुडा बेसता पोल्ले वाया परंतगा?” इंचि इत्तोर. अस्के पिलिपु, “अथे निमेन वासि हळा!” इंचि इत्तोर.

47 येसु नतेनलुन ओनहेके वायनद हळसि ओना बारेमते, “अद हुळाट, निजम इस्राएल मनकल. ओनालोप्पो बतले आबद्दम पोल्ले हिल्ले,” इंचि इत्तोर.

48 अद केंजसि नतेनल, “नना बसंटोन, बसंटोन आयोन नीकु बल्हा एर्का?” इंचि येसुन पूसकीतोर. अस्के येसु, “पिलिपु नीकुन केयाका मुन्ने, निमे अंजिर मरि हिल्लु मलिन. अस्केन नना नीकुन हळतन,” इंचि इत्तोर.

49 अस्के नतेनल, “रब्बी, निमे पेनदा मरिन आदिन, इस्राएलता राजान आदिन,” इंचि इत्तोर.

50 अस्के येसु, “नना नीकुन अंजिर मरि हिल्लु मन्नेकेन हळतन इंचि वेहताहेंका नाकुन नमुसतिना? इंका मुन्ने इंदुकन्ना पेद्दे-पेद्दे पोल्ले हळकिन,” इंचि जवाब हीतोर.

51 पजा, “हिंके केंजट, नना निजम-निजम वेहासेक! स्वर्गम बैय्यरा आयानद हळकिर, पेनदा दूतां मनकना रूपमते पुटतोना पोर्रा एक्कानदुन-रेयानदुन हळकिर,” ✧ इंचि ओर्क वेहतोर.

2

येसु एतुन अंगुर पानकम कीतोर

1 इद जर्गुता मूडोव रोचुननाड गालिल राज्येमता काना इनना नाटे मरमि मतां, आ मरमिने येसुना यावलगुडा मत्ता.

2 मरमिंकु येसुन, ओना सिस्स्युल्कुनगुडा केय्शि मत्तुर.

3 मरमिने अंगुर पानकम मारतस्के, येसुना यावल, “ओरागटा अंगुर पानकम मारसोत्ता कोको,” इंचि येसुन इत्ता.

4 अस्के येसु, “यावा! निमे नाकु बारि वेहचंतिन? नना बतलन्ना कियना वेला इंका वाया हिल्ले,” इंचि इत्तोर.

5 पजा येसुना यावल अगा मत्ता जीतागाह्कुन, “ईर मीकु बतल वेहतोर, मिमेट अदे कीम्टु,” इंचि इत्ता.

6 यहूदिल्लुकुना सुद्दिदेकरन कियाना रिवाज कियनाहाटी अगा बंडातोनि तयार कीतव हारुं पेरपुत्क मत्तां. आ उंद-उंदि पेरपु नूर (100) लीटर्कुना एर पियनलायक मत्ता.

7 “आ पेरपुल्कुने एर निहाट,” इंचि येसु आ जीतागाह्कुंक वेहतोर. अस्के ओर आ पेरपुल्क सीगा निंडानाल निहातुर.

8 अस्के येसु, “इंदके उंदि पेरपुनाल इच्चुर एर पीसि, ई कुळपु हियना पेद्दा मनकानगा ओम्टु,” इंचि आ जीतागाह्कुंक वेहतोर, अस्के ओर ओतुर.

9-10 पजा आ पेद्दा मनकल एतुन गिचचो उंचि हळतोर अथे, अद एर पुरागा अंगुर पानकम आसि मत्ता. इद पानकम बोर तत्तोर, बगाटाल वाता इतद आ पेद्दा मनकंक तेळिया हिल्ले गानि आ जीतागाह्कुंक मात्रम एर्का मत्ता. पजा आ पेद्दा मनकल मरमिना पेडन केय्शि, “अंतोर अथे पिव्वर अंगुर पानकम मोट्टा मोदाला हीतुर. लोकुल्क पीरनिडा उट्टारित्ते, पज्जोटाल सप्टटा पानकम हीतुर. गानि निमे अथे पिव्वर अंगुर पानकम इदवेरदाकागुडा मिगलिच्चि इरतिन,” इंचि इत्तोर.

11 इल्हा येसु गालिल राज्येमता काना नाटे इचंन्रम आयना कबळ कीसि, ओना महिमातुन हुपिस्तोर. इद ओना मोट्टा मोदाटा चिन्ह आंद. अदुनहाटी ओना सिस्स्युल्क ओन नम्मूतुर.

12 पजा येसु, ओना यावल, ओना तम्पुह्क, ओना सिस्स्युल्क अंटोर कलियसि कपर्नाहम इनना सहर होत्तुर. ओर अंटोर अग्गेन कोन्नि रोजुक आगतुर.

येसु गुळितगा दांतोर

(मत्तयाल 21:12-13; मरकुस 11:15-17; लूकाल 19:45-46)

13 यहदि लोकुकुनद दाटसि होनना पंडुगु* दग्गेर्क एवसि मत्ता. दानहाटी येसु येस्सलेम होत्तोर.

14 अगा होत्तस्के गुळिता लोप्पो, लोकुकुल्क पेनदुक मोक्कु हियालय कुरा, गोर, पावरेम पिट्टे अमसेक दिसतुर. अचोने आयका सरकार कोतां पेनदा गुळिते वाटालय कुदरो इंचि, आ कोतां बदलाचि यहदिल्कुना कोतां हियानोरगुडा अगा उदिदिस मत्तद येसु हळतोर.

15 हळसि, उंदि नोंडे नोटसि पोटे तयार कीसि, गुळिताल अंटोर्कुन गेदुमतोर. गोर, कुरंन गुळिताल पलाते गेदमिसि, कोतां बदलांचानोरा बल्लन बोर्ला वाटसि कोलतानंता लीकतोर.

16 पजा पावरेल्क अम्मानोर्कुन, “इवुन इगेटाल पलाते ओम्प्ट, नावा पेनबाबाना लोतुन हाटुमलेहका क्रियमट,” इंचि इत्तोर.

17 अगा जर्गतदुन हळसि, “नीवा लोता बारेमते नावा जीवा बागा तंलाडसंता,”* इंचि दर्मसास्त्रमते दाविद राजाल रासता पोल्ले ओना सिस्स्युल्कुंक मति वाता.

18 येसु अल्हा कीतदुन हळसि यहदि पेद्दाल्क ओनगा वासि, “इल्हा क्रियना अदिकारम नीकु मंता इंचि मोमोट नम्मनाहाटी निमे माकु बसोटा चिन्ह हुपसंतिन?” इंचि पूसकीतुर.

19 अस्के येसु, “इद गुळितुन कूल्हाट, नना मूड रोजकुने मरां निलाहंतन,” इंचि जवाब हीतोर.

20 अस्के यहदि पेद्दाल्क, “इदु गुळितुन दोहालय नल्पे हारं वर्सां दल्गतां. अयते निमे दीन मूड रोजकुने बल्हा निलाहंतिन?” इंचि पूसकीतुर.

21 गानि येसु मात्रम ओना सतता मेंदुलता गुळिता बारेमते वळकतोर.

22 येसु हासि मरां जीवाते तेदतस्के ओना सिस्स्युल्कुंक इद पोल्ले मति वाता. अस्के ओर दर्मसास्त्रमते रासि मत्तादुन आनि येसु वेहता पोल्लेन नम्मूतुर.

23 दाटसि होनना पंडुगुना वेलाते येसु येस्सलेम सहरते मत्ताहाटी, वेल्लेटोर लोकुकुल्क ओर कीता अद्बूताल्क हळसि, ओनपोरों विस्वासम इरतुर.

24-25 गानि अंटोर लोकुकुल्क बोर-बसंतोर इंचि येसुंक एरपाट मत्ताहेंका, ओरा बारेमते येसुंक बोर गवाइ वेहना अक्सरम हिल्ले. अदुनहाटी ओर बोर लोकुकुकुन नम्मा हिल्लोर.

3

मरां पुट्टुमळ

1 परिसि लोकुकुकुनाल* वरोर निकोदेमस इनना मनकल मत्तोर, ओर यहदिल्कुना लीडर मत्तोर.

2 ओर उंदि रोजु नकंटा वेलाक येसुंक वासि कलियतोर. कलियसि, “रब्बी,† निमे क्रियना ई अद्बूतामाता कबाहक पेनदा तोळ हिल्ला बोर क्रिया परोर. दीनहेंदाल निमे पेनदाहेंदाल वाता गुस्सनिचि मोमोट तेल्लिचकूत्तोम,” इंचि इत्तोर.

3 अस्के येसु ओन, “नना निजम-निजम वेहासेक, बोर आयिर, पूना रीतुने मरां पुट्टुवा, ओर पेनदा राज्येमतुन हळा परोर,” इंचि वेहतोर.

4 अस्के निकोदेमस, “गानि वरोर मातरल आता मनकल मरां बल्हा पुट्टा परंतोर? ओर ओना यावाना पीटे होळियसि मरां पुट्टा परांतोरा?” इंचि येसुन पूसकीतोर.

5 अस्के येसु ओन्क इल्हा वेहतोर: “नना निजम-निजम वेहासेक, वरोर मनकल एताल आनि पवित्र आत्माहेंदाल पुट्टुवद,* ओर पेनदा राज्येमते होळिया परोर.

6 मना मेंदुल अयते तल्लुर-बाबोनहेंदाल पुट्टा परंता, गानि आत्मा मात्रम सिराप पवित्र आत्माहेंदाले पुट्टा परंता.

7 अदुनहाटी, मीकु मरां पुट्टे पीता, इंचि नना मीकु वेहतद केंजसि निमे इचंन्रम आयमा.

* 2:13 दाटसि होनना पंडुगु इजिप्ट देसेमता गुलामगिरिताल यहदि लोकुकुकुन पेन पेचाहचि तत्ता मतिते, इद पंडुगु कीतुर. गुलामगिरिताल पलाते अरता रोजु इजिप्ट देसेमता हेरक लोता पेद्दा मरिन पेनदा द्वा हळ्कता. गानि यहदिल्कुना लोतोर्कुनाल बोर हाया हिल्लुर. * 2:17 बजन सहिता 69:9 * 3:1 परिसि लोकुकुल्क यहदिल्कुना उंदि गेगुना पोरोल आंद. इ गेगुना लोकुकुल्क मरां पुट्टुमळतुन नम्मंतुर. † 3:2 रब्बी इद इब्रानि पोल्ले आंद, गोंडिते दीना अर्तम गुस्स आंद. * 3:5 यहजेकल 36:25-28

8 बल्हा अय्ते वळि दान इस्टमाताप बेके इत्ते हेक्के विल्लता, दाना सप्पुडगुडा नीकु केंजा वांता, गानि अद बैदाल वासंता, बेके होंचंता इत्तद मात्रम नीकु तेळियो. अल्हेन पवित्र आत्माहेंदाल पुट्टा हरेक मनकलगुडा मनंतोर,” इंचि येसु वेहतोर.

9 गानि “इद बल्हा आया परंता?” इंचि निकोदेमस येसुन पसकीतोर.

10 अस्के येसु ओन्क इल्हा जवाब हीतोर, “निमे अय्ते इस्राएल लोकुकुंक कराहना पेदूदा गुप्पन आदिन. अयना इव पोल्लें नीकु तेळियोगां?

11 नना निजम-निजम वेहासेक, माकु तेळियता पोल्लेंगें मोमोट वेहांताम, कळ्ळुने हळ्ळता पोल्लेना गवाइ मोमोट मीकु वेहांताम. अयना मिमेट मावा गवाइतुन ओक्कुंचेक हिल्लिर.

12 नना मीकु इद दुनियाता पोल्लें वेहेतेने मिमेट नमसेक हिल्लिर. अय्ते नना स्वर्गमता बारेमता पोल्लें वेहेते मिमेट बल्हा नमंतिर?

13 मनकना रूपमते पुट्टोन नना स्वर्गमताल वातन. इंका नाकु तप्पा स्वर्गमते वेरे बोरें होना हिल्लुर.

14-15 नाकुन बोर अय्ते विस्वासम कीतोर, ओन्क बस्केळ्ळक पिस्सना पिस्वर दोर्कनाम इत्ते, मुसाल बल्हा बय्लि बूमिंते इत्तोळ्ळा तटासुन कोय्यापोरें वेलाड वाटसि मत्तोर, * अल्हेने मनकना रूपमते पुट्टोन नाकुनगुडा वेलाड वाटमळ जर्गागोम,” इंचि येसु इत्तोर.

16 पेन दुनियातोरुंक इच्चोन पावरम कीता गदा, दाना वरोरे मरिनगुडा ई दुनियातोरुणाहीटी हीता. ओन नम्मना हरेक मनकल नासडेम आयामनि गानि ओन्क बस्केळ्ळक पिस्सना पिस्वर दोर्कना इंचि अद अल्हा कीता.

17 पेन ई दुनियातोरुंक सिक्सा हिया वेहालय, दाना मरिन ई बूमिपोरें लोहा हिल्ले, गानि दुनियातोरुंक पिसागोटालय ओन लोहचीता.

18 ओन बोर अय्ते नमंतुरो, ओर्क ओर सिक्सा हिया वेहोर. गानि बोर अय्ते ओन नम्मुरो, पेनदा वरोरे मरिनपोरें विस्वासम कियवाहेंका ओर्क पेन मुन्नेन सिक्सा हीसि इरता.

19 पेन मुन्नेन बारि सिक्सा हीसि इरता इत्ते, पेनदाहेंदाल उंदि वेलगु दुनियाते वाता. गानि दुनियातोर ओरा तप्पुड कबाह्कनहेंका वेलगुने पिसनद होळसि हीकटते पिसमळतुने मेच्छुकुत्तुर.

20 तप्पुड हरदे ताकाना बोर मनकल आयि, ओर वेलगुन मेच्छुन्नोर. ओना तप्पुड कबाह्क बय्यर दिस अरंतां इंचि ओर वेलगुने वायोर.

21 गानि सत्तेम हरदे ताकाना मनकल, ओर कियना कबाह्क पेनदा सहायमते आसंतां इनकुचि अव अंतोर्क बय्यर दिस्सनाहाटी ओर वेलगुने वांतोर.

येसु आनि बापतिस्मा हियना योहान

22 ई पोल्लें मारतस्के, येसु, ओना सिस्सुल्कु अगटाल यहूदिया राज्यमते होत्तुर. होंचि अगाटा लोकुकुंक बापतिस्मा हीसिक कोन्नि रोजकु अगोन मत्तुर.

23 सल्लिम इनना नाटक दगैरा मनना एनोन पोरोलता जेगाते वेल्लेन एर मत्ताहेंका, योहानगुडा अगा बापतिस्मा हिंयुंदुर. लोकुकुल्क ओना कय्दे बापतिस्मा एतालय अगा वायुंदुर.

24 ई गटनां योहानुन जेलने वाटका मुन्नेने जरगता.

25 अस्के योहानुना सिस्सुल्क आनि वरोरे यहूदि मनकन नड्डुडम सुदिदकरन कियाना रिवाजता बारेमते रोंड-रोंड पोल्लें आतां.

26 दानहाटी योहानुना सिस्सुल्कु योहानुनगा वासि, “गुप्प, निमे योर्दन बैरेटा हब्बेरा मननेके नीवातोनि बोर अय्ते मत्तोर, निमे बोना बारेमते अय्ते गवाइ हीसि मत्तिने, ओर इंदके लोकुकुंक बापतिस्मा हीसंतोर. अंतोर लोकुकुल्क ओनहेकेन होंचंतुर,” इंचि वेहतुर.

27 अय्ते योहान ओर्क इल्हा जवाब हीतोर, “स्वर्गमताल पेन हियवद बोनेके बतल दोर्का परो.

28 नना किरिस्तुन आयोन. नना सिराप ओनाहाटी हरिं तयार कियालय मुन्ने वातोन आंदुन. नना वेहता पोल्लेंक मिमेट गवाइ मंतिर!

29 मरमिन पेडल मत्तागेन मरमिन पेगिड मन्ता. नना अय्ते मरमिन पेडाना पक्काते निलसि मनना ओना दंटागानसंतोन आंदुन. मरमिना पेडल बतलन्ना वेहेते अद केंजसि आ दंटागाल वेल्लेन कूस आंतोर. ननागुडा अल्हेन, लोकुकुल्क ओनगा होननद हळसि नना पुरागा कुसिते निडसोत्तन.

30 इंदके ओना कदर वेल्लेन बेसिंगोम, नावा कदर वेल्लेन तक्को आयगोम अचोने!” इंचि योहान वेहतोर.

31 बोर अत्ये पोर्रोँटाल वातोर, ओर अंतोर्कुँकन्ना पेदुदोड. बोर अत्ये इद दुनियाते पुटतोर, ओर इदे दुनियातोर आंदुर. अदुनहाटी ओर ई दुनियाते जरगानवुना बारेमतेन वळ्ळकंतोर. गानि बोर अत्ये स्वर्गमताल वातोर ओर अंतोर्कुँकन्ना पेदुदोड आंदुर.

32 ओर अगा बतल अत्ये हळतोर, केंजतोर अदुना बारेमतेन गवाइ वेहंतोर, गानि ओना गवाइतुन बोरे नम्मुर.

33 ओर वेहता गवाइतुन बोर अत्ये नम्मंतुरो, ओर अंतोर पेने सत्तेम इंचि पक्का कब्लुन कीतुर.

34 बोन अत्ये पेने लोहचीता, ओन पेने दाना आत्माते पुरागा निहता. अदुनहाटी ओर सिराप पेनदा पोल्लेगें वेहांतोर.

35 पेन बाबल ओना मर्रिन इरगा पावरम कीतोर, इंचि मर्रिना कयदुक अन्नि अप्पजेपतोर.

36 पेनदा मर्रिन बोर अत्ये नम्मंतुरो, ओर्क बस्केळ्ळक पिस्सना पिस्वर दोर्कता. गानि बोर अत्ये मर्रिना पोल्ले केजुरो, ओर्क बस्केळ्ळक पिस्सना पिस्वर अत्ये दोर्केन दोर्को, गानि ओनपोर्रोँ पेन होंग पीसि मंता.

4

सामरिया राज्येमता मुरतळ येसुक कलियता

1 येसु योहानुंकन्ना एकको मंदिक बापतिस्मा हीसंतोर, योहानुंकन्ना एकको मंदितुन ओना सिस्युल्क कीसंतोर, इंचि पारिसिल्लुकुंक तेळियता.

2 (निजम हळते, येसु कुदुदु बापतिस्मा हियाकोंदुर, ओना सिस्युल्क बापतिस्मा हियुंदुर.)

3 इद पोल्ले सामिक तेळियतस्के ओर यहुदिया राज्येमतुन होळसि, मर्रा गालिल राज्येम होनालय पेयस्तोर.

4 गानि इटके ओन्क सामरिया^{*} इन्ना राज्येमताल होनापीता.

5 इल्हा येसु सामरिया राज्येमते मनना सुकर इन्ना सहरते एवतोर. ई सुकर सहर, एनकटा यहुदिलकुना मातिर दादल याकोब ओना मर्रि योसेपुंक हीता जेगाक दग्गेरा मत्ता.

6 अगा याकोबुना कुहि मत्ता. वेल्लेन लवकुनाल ताकसि वाताहेका नेरबळसि येसु, आ कुहिता पक्काते उदुतोर. अस्केळ्ळक पियल आसि मत्ता.

7-8 अस्के तिननाहाटी बतलन्ना तरालय येसुना सिस्युल्क नाटेंक होंचि मत्तुर. अदे वेलाते उंदि सामरिया मुरतळ[†] एतुक वाता. अत्ये येसु, “उनालय नाकु इचचे एर हीम,” इंचि अद मुरतटुन तलकतोर.

9 अस्के अद मुरतळ, “निमे यहुदिन आसिगुडा, उंदि सामरिया मुरतटुन, उनालय एर हीम, इंचेके बल्हा तलकसंतिन?” इंचि इत्ता. (यहुदिलक सामरिया लोकलुकुनतोनि बदे संबंदम इर्कोंदुर. अदुनहाटी अद अल्हा इत्ता.)

10 अस्के येसु, “ओबकला निमे, पेनदा वरमतुन आनि उनालय एर हीम इंचि नीकुन तलकानोर बोर आंदुरो, एपाट कीसि मत्ते, निमेने कुदुदु नाकुन एर तल्लिस मन्नेन, अस्के नना नीकु पिस्वर हियना एर हीसि मन्नेन,” इंचि इत्तोर.

11 अस्के आ मुरतळ, “कुहि अत्ये वेल्लेन लोतु मंता महाराज. निहाग एर तोरालय बाल्टिगुडा हिल्ले. इसॉटस्के ई पिस्वर हियना एर नीकु बल्हा दोर्कार?

12 माकु ई कुहि मावा मातिर दादल याकोब हीतोर. ई कुहिता एर ओर कुदुदु उनुंदुर, इंका ओना मर्क, एटिं, गोळ्कु-गोदां उनुंदु. अत्ये निमे ओनकन्ना पेदुदोना?” इंचि प्पसकीता.

13 अत्ये येसु, “ई एतुन उन्ना हरेक मनकंक मर्रा तप्पाकोंटा दूपांता.

14 गानि नना हियना एतुन बोर अत्ये उंतोरो, ओन्क मर्रा बस्केने दूपायो. नना हीता एर ओनालोप्पो बस्केळ्ळक ऊरसेके मनना ऊटालेसी मारियसि, ओन्क बस्केळ्ळक पिस्सना पिस्वरतुन हिय्यार,” इंचि जवाब हीतोर.

15 अत्ये अद मुरतळ, “अल्हा अत्ये अद एर नाकु हीम महाराज! अद एतुन नना उट्टुनित्ते नाकु बस्केने दूपा आयो, नाकु मर्रा बस्केने एर ओयालय इचचोर लवकु वायना अवसरमगुडा मन्ने,” इंचि इत्ता.

16 अस्के येसु दान, “होन, होंचि नीवा मुय्दोन केय्सि तरा होन,” इंचि इत्तोर.

17 अस्के अद, “नाकु मुय्दो हिल्लोर,” इंचि इत्तस्के येसु, “निमे निजमे वेहतिन! नीकु मुय्दो हिल्लोर,” इंचि इत्तोर.

18 पजा येसु, “अद बल्हा इत्ते, नीकु हेय्युर मुय्दुर मत्तुर, निमे इंदके बोनतोनि अत्ये मंचंतिनो ओरगुडा नीवा मुय्दो आयोर. अदुनहाटी निमे निजम वेहतिन,” इंचि इत्तोर.

19 अस्के अद मुरतळ, “महाराज, नीवा पोल्लें केंजसि नाक अत्ये, निमे पेनदा कबुरतोन आंदिन इंचि नाकु तेळियता.

20 मावा एनकटा पेदुदालक इदे गुट्टापोर्रोँ मोळ्ळुंदुर. गानि मिमेट बारे, मोळ्ळकना असल जेगा येस्सलेमे आंदु इतिर,” इंचि अद मुरतळ येसुन इत्ता.

* 4:4 सामरिया इद उंदि राज्येम पोरोल आंदु. इद राज्येमते मनानोर्कुँन यहुदि लोकलुक सिन्नाग हळतुर, ओरा नीळगुडा यहुदिलक दादुर. † 4:7-8 सामरिया मुरतळ सामरिया एरियाते मनना मुरतटुन सामरि मुरतळ इत्तुर.

21 अस्के येसु दान्क इल्हा वेहतोर: “बाई नाकुन नम्मा! पेनबाबांक मोळ्कनाहाटी इद गुट्टातागा हिलाकोटे येस्सलेम सहर होनना अब्सरम हिल्ले, मिमेट बगानना मोळ्का परंतित, इसोंटा वेला मुन्ने वासेक मंता.

22 मिमेट सामरिया राज्येमतोर मीकु तेळियवादान मोळ्कंतिर. गानि मुक्ति यहूदिल्कुनाहेंदाले वासेक मंता. अदुनहाटी मोमोट यहूदिल्क अय्ते माकु तेळियतदुने मोळ्कंतोम.

23 गानि पेनदुन निजम मोळ्कानोर पेनदा सत्तेमनुन एपाट कीसि ओर पेनदा आत्माते मोळ्कना वेला मुन्ने वासेक मंता. आनि अद वेला एव्से मंतां. बारित्ते इल्हा मोळ्कानोकुंने पेन मेचकुंता.

24 पेन आत्मा रूपमते मंता. अदुनहाटी दान मोळ्कानोर अंतोरगुडा आत्माते, सत्तेमते मोळ्कना,” इंचि वेहतोर.

25 पजा अद मुरतळ, “किरिस्तु इनना मेसय्याल वासेक मंतोर इंचि नाकु एपाटे. ओर वातस्के माकु अंतोर्क अन्नि पोल्ले वेहानुर,” इंचि येसुन इत्ता.

26 अस्के, “नीतोनि वळ्कानोन, ननाने ओन आंदुन,” इंचि येसु इत्तोर.

27 अच्चेतेन अगा ओना सिस्युल्क वातुर. येसु उदि मुरतळतोनि वळ्कानद हळसि ओर्क वेल्ले इचंत्रम आता. अयनागानि बोर ओन, “नीकु बतल गावाले? दानतोनि निमे बारि वळ्कसतिन?” इंचिगुडा इना हिल्लुर.

28 अस्के अद मुरतळ अळकातुन अगोन होळसि नाटे होंचि लोकल्कुंक वेहता.

29 “इदवेरादाका नना कीतव अन्निना बारेमते वरोर मनकल वेहतोर. ओर किरिस्तु बारे, मिमेट वासि हळट!” इंचि नाटेनोकुंन इत्ता.

30 अस्के नाटेनोर नाटुन होळसि येसु मत्ता जेगातगा वातुर.

31 अद मुरतळ नाटे होतस्के, सिस्युल्क, “गिचचो तिन रब्बी!” इंचि येसुन विनंति कीतुर.

32 गानि येसु, “नहगा तिनालय इसंटा तिडि मंता गदा, अद तिडिता बारेमते मीकु बतले तेळियो,” इंचि सिस्युल्कुन इत्तोर.

33 अस्के सिस्युल्क, “गुम्नाहाटी बोरनना तिनालय बतलनना तत्तुरा?” इंचि ओरद-ओर वळ्ककुनालय दल्गतर.

34 अस्के येसु ओर्क इल्हा वेहतोर: “नाकुन लोहतोना इच्चा मत्ताप ताकमळ, ओर वेहता कबाहकुन पूरा कियमळ, इदे नावा तिडि आंद.

35 वंजि वीतता पजा, इंका नाल् नेल्क अय्ते वंजि कोताक वांता, इंचि मिमेट इंतोर. गानि नना वेहनद केंजट, कळ्क विच्चि पोलमतेके बेस हळट, पंटा कोताक वासि मंता.

36 पंटा कोय्यानोर बति दोर्किचकुंचेक मंतोर आनि बस्केळ्क पिस्सना पिस्वरताहाटी पलम जमा कीसेक मंतोर. दीनहेंदाल वीततोर, कोय्यानोर इव्वरगुडा कुसिते कलियसि मना परांतुर.

37 वरोर वीतंतोर, इंकावरोर कोय्यंतोर इनना वेसुड इगे निजम आंता.

38 बोरो बेरेतोर कस्टपळसि पंडिस्ता पंटातुन कोय्यालय नना मीकुन लोहतन. मिमेट कस्टपळा हिल्लिर, गानि ओर कीता कस्टमता पायदा मीकु दोर्कसंता,” इंचि येसु वेहतोर.

39 “नना कीतव अन्निना बारेमते वरोर मनकल नाकु वेहतोर,” इंचि वेहता, आ मुरतटा गवाइतुन केंजसि, अद नाटेना वेल्लेन मंदि सामरिया लोकल्क, येसुनपोरों विस्वासम इरतुर.

40 सामरिया लोकल्क येसुनगा वासि, “निमे महगा मन्नु,” इंचि विनंति कीताहेंके, येसु रोंड रोजकु अगा आगतोर.

41 येसु कराहता पोल्ले केंजसि इंका वेल्लेन लोकल्क ओन विस्वासम कीतुर.

42 “सिराप निमे वेहताहेंकेन मोमोट येसुन नम्मा हिल्लोम. इंदके कुदूदु मोमोटे ओना पोल्ले केंजसि, दुनियातोर्कुन पिसागोटना निजम किरिस्तु ईर आंदुर इंचि मोमोट विस्वासम कीतोम,” इंचि आ लोकल्क मुरतदुन इत्तुर.

सायाबुना मर्रिन येसु बेस कीतोर

(मत्तयाल 8:5-13; लूकाल 7:1-10)

43 रोंड रोजकु आतंका, येसु अगटाल गालिल राज्येमते होत्तोर.

44 पेनदा कब्रुतोंक ओना सतता देसेमते कदर दोर्को, इंचेके येसु मुन्नेने वेहचि मत्तोर.

45 दाटसि होनना पंडुगुनाहाटी गालिल राज्येमता लोकल्कगुडा येस्सलेम होंचि मत्तुर. अगा येसु कीतव अन्नि कबाहकुन ओर हळतुर. अदुनहाटी येसु गालिल राज्येमते वातस्के ओर अंतोर येसुन बेस दगोरा कीकत्तुर.

46 बज नाटे अय्ते येसु एतुन अंगुर पानकम कीतोर, अदे काना नाटे ओर मरां होत्तोर. गालिल राज्येमता कपर्नाहूम इनना नाटे, राजाना हिळ् कबळ कियाना वरोर सायाबुना मर्रि बिमार अरसि मत्तोर.

47 अय्ते यहूदिया राज्येमताल गालिल राज्येमते येसु वातोर इंचि ओन्क कब्रु तेळियताहेंका ओर येसुंक कलियालय होत्तोर. होंचि येसुना काल्कुनपोरों अरसि, “नावा मर्रि इरगा बिमार आसि हायनाल आसि मंतोर, निमे ओन बेस कियालय नातोनि ताका,” इंचि विनंति कीतोर.

48 अस्के येसु, “चिन्हां, इचंत्रमता कबाहक हळवद मिमेट नम्मनोर आयिर!” इंचि ओन इत्तोर.

49 आ सायाब, “ना मरिं हायका मुन्नेन निमे ताका सामि,” इंचि विनंति इत्तोर.

50 अस्के, “नीवा मरिं पिस्संतोर, निमे होन,” इंचि येसु ओन इत्तस्के, ओना पोल्लेतुन नम्मिसि ओर तिरियसि होत्तोर.

51 ओर हरिं पीसि होंचेकेन मत्तोर, नड्डुम हरदेने ओना जीतागाहक कलियसि, “सायाब, नीवा मरिं बेस आतोर,” इंचि वेहातुर.

52 अस्के “नावा मरिं बद वेलाक बेस आतोर?” इंचि ओर्कुन पूसकीतोर. “निन्ने पिच्यल उंद एगनेके ओना एळिक रेयता सायाब!” इंचि ओर वेहतुर.

53 अस्के आ सायाब ओर वेहतद केंजसि, बद वेलाते येसु, “नी मरिं पिस्संतोर,” इंचि इत्तोर, अदे वेलाते ओना मरिं बेस आतोर, इंचि ओन्क तेळियसोत्ता. अदुनहाटीं ओर, ओना लोतोर अंतोर येसुन नम्मकुत्तुर.

54 यहुदियाताल गालिलते वासि येसु कीतद इद रोंडो इचंनमायना चिन्हे आंद.

5

बेतसेदा सेरवुना ओड्डुंक मत्ता हेय्युं गुडसैं

1 पजा येसु यहुदिलकुना उंदि पंडुगुनाहाटीं येस्सलेम सहर होत्तोर.

2 येस्सलेम सहरते गोरें दरबाजा इनना जेगातगा उंदि सेरवु मंता, दान इन्नानि बासाते बेतेस्ता इंचि इंतुर. आ सेरवुना ओड्डुंक हेय्युं गुडसैं वाटसि मत्तां.

3-4 बढो उंदि वेलाते पेनदा दूता वासि अद एतुन लोपुंदु, अल्हा लोपतस्के, अद एते बोर मनकल अय्ते मुन्ने होळियंतोर ओर मनकल ओना बसोंटा बिमार अयना बेस आयुंद, अदुनहाटीं पेनदा दूता एतुन बस्के लोपार इंचि एदुर हळसेक गुड्डोर्कु, गूनेर्क, कुंतोर्क, लकवा बिमारतोर इल्हा वेल्लेन मंदि आ गुडसेने जेगा पीसि मनुदुर.*

5 अगा मत्तोरव्ते मुपै एनिमिदि वर्सानाल बिमार मत्ता वरोर मनकल मत्तोर.

6 ओर अगा मीडसि मत्तद येसु हळतोर. हळसि ओर वेल्लेन वर्सानाल कुक्कि पीसि मत्तद एपटा कसि ओनगा होत्तोर. होंचि ओन, “नीकु बिमारताल बेस आयानद मंतना?” इंचि पूसकीतोर.

7 अस्के आ मनकल, “नाकु बेस आयगोम इंचि मंता सामि! गानि बतल कीकन? एतुन लोपतस्के नाकुन आ एतगा ओयालय नहगा बोरे हिल्लुर. एतुन लोपतस्के मेल्लगा-मेल्लगा नना होननदाका बोरन्ना वरोर नाकन्ना मुन्नेन होळियंतोर,” इंचि वेहतोर.

8 अस्के येसु ओन, “अय्ते तेदा! तेदसि नीवा कटुल पीसि ताकसेक होन,” इंचि इत्तोर.

9 येसु ओन अल्हा इत्ता इन्मळे आ मनकल बेस आतोर. आसि, ओना कटुल पीसि ताकसेक होत्तोर. इद गटना यहुदिलकुना नोमकेम रोजुननाड जर्गता.

10 अदुनहाटीं बिमारताल बेस आता मनकन, “नोमकेम रोजुने निमे इल्हा कटुल तेहचि ताकमळ मावा दर्मसास्त्रम परकारम न्यायम आयो,” इंचि यहुदि पेदू दालक इत्तुर.

11 जवाबुने आ मनकल, “नाकुन बेस कीतोर, नाकुन नीवा कटुल पीसि ताकसि होन इत्तोर,” इंचि वेहतोर.

12 अस्के “नीकुन कटुल पीसि ताका इंचि वेहतोर, ओर बोर आंदुर?” इंचि यहुदि पेदू दालक ओन पूसकीतुर.

13 गानि अगा वेल्लेन मंदि मत्तुर, येसुगुडा अगटाल पेय्सि होत्तोर. अदुनहाटीं ओन बेस कीतोर बोर आंदुर इंचि, आ बेस आता मनकंनगुडा तेळिया हिल्ले.

14 इदंता आतंका येसु आ मनकंनगुडिते कलियसि, “हळा, निमे इंदके बेस आतिन! मर्रां पापि कबाहकुना जोलिक होन्मा. होत्तिनिन्ते दीनकन्ना एकको बिमार अरंतिन,” इंचि वेहतोर.

15 पजा आ मनकल यहुदिलकुना पेदू दालकुंक कलियसि, “नाकुन बिमारताल बेस कीतोर, येसु आंदुर,” इंचि वेहतोर.

16 येसु इसोंटा कबाहक नोमकेम रोजुननाड कीतोर इंचि यहुदि पेदू दालक येसुन तकलपि कियालय दल्गतुर.

17 अस्के येसु ओर्कुन, “ना बाबाल बस्केळक कबळ कीसेकेने मंनंतोर. अदुनहाटीं ननागुडा कबळ कीसेकेने मंनंतन,” इंचि इत्तोर.

18 येसु इल्हा इत्ताहेंका यहुदि पेदू दालक ओन हळ्कालय उंदे पट्टु पीतुर. बारित्ते नोमकेम रोजुने कबळ कियानायो इत्ता नियमतुन ओर हेळाहतोर. आनि पोरोंटाल, पेनदुन “ना बाबाल,” इंचि वेहचि “नना पेनदुक समानमतोन” इंचि ओनद ओरे वेहकुत्तोर.

येसुनगा पेनदा अदिकारम मंता

* 5:3-4 इद वचनम कोनि पांडु लिपिने हिल्ले.

19 अस्के येसु ओर्क इल्हा वेहतोर: “नना मीकु निजम-निजम वेहचंतन, मरिं ओनद-ओर बतले किय्योर. गानि बाबो बतल-बतल अये कीतोर, बाबो कियनदुन ह्ळसि मरिं अल्हेन कीतोर.

20 मरिंनपोर्रीं बाबोंक वेल्लेन पावरम मंता, अदुनहाटीं ओर कियानव अन्नि कबाहकून ओना मरिंंक हुपिचंचंतोर. वायना रोजकुने इव्कुन्ना पेदुदा-पेदुदा कबाहक कीसि मरिंंक हुपसना मंता. अस्के मिमेट ह्ळसि अंतोर इंचंत्रम आकिर.

21 बल्हा अये बाबो हातोर्कुन मरिं जीवाते तेहंतोर, अल्हेन मरिंगुडा ओन्क इस्टमातोर्कुन मरिं जीवाते तेहंतोर.

22-23 बाबोनद अंतोर कदर कीतुर. अल्हेने मरिंना कदरगुडा अंतोर लोकुल्क कियना इंचि बाबाल बोनेदे न्यायम कियाकोंटा, न्यायम कियना पूरा अदिकारम मरिंंक हीतोर. मरिंना कदर बोर किय्युरो, ओर मरिंन लोहचीता बाबाना कदरगुडा किय्युर.

24 नना निजम-निजम वेहासेक, बोर अये नना वेहना पोल्लेन केंजसि नाकुन लोहतोना पोर्रीं विस्वासम ईरंतोर, ओन्क बस्केळ्क पिस्सना पिस्वर दोर्कता. पेन ओन्क सिक्साता आदेस हिश्यो, ओर हामुरताल पेय्शि पिस्वरतुन संपादिचकुंतोर.

25 नना निजम-निजम वेहासेक, हासोत्तोरगुडा पेनदा मरिंना अल्किर केंजना वेला वासेक मंता. अद अये वासे मंता. बोर अये अद अल्किरतुन केंजांतुर, ओर्क पिस्वर दोर्कार.

26 बल्हा अये पेनबाबाल कुदुदु पिस्वरता मालक आंदुर, अल्हेन मरिंनगुडा पिस्वरता मालक कीतोर.

27 इचोने आयका, पेनबाबाना मरिं मनकना रूपमते पुटताहाटीं ओन्क लोकुल्कुना न्यायम कियना अदिकारम हीतोर.

28 मिमेट इदुन केंजसि इंचंत्रम आयमट. बारिल्ले मुन्ने इसोंटा वेला वायनद मंता गदा, हातोर अंतोर पेनदा मरिंना अल्किर केंजातुर.

29 पजा बोर अये बेस पुन्नेम कबाहक कीतुरो ओर अंतोर बस्केळ्क पिस्सना पिस्वरहाटीं मरिं जीवाते तेदानुर. आनि पापि कबाहक कीतोर बारे सिक्साताहाटीं मरिं जीवाते तेदानुर.

30 नावद नना बतले किया परींन. पेनबाबानाहेंदाल केंजतापे न्यायम कीतन. नना नावा इच्चातुन पूरा कियालय वाया हिल्लेन, नाकुन लोहचीता पेनबाबाना इच्चातुन पूरा कियालय वातन. अदुनहाटीं नना कियना न्यायम सत्तेम मंता.”

येसु गवाइ वेहांतोर

31 “नावा बारेमते ननाने गवाइ वेहकुत्ते, नावा गवाइ निजमतद आयो.

32 गानि नावा बारेमते गवाइ वेहालय इंकावरोर मंतोर. ओर वेहना गवाइ सत्तेम इंचि नाक एरपाट मंता.

33 मिमेट मीवा मनकालोर्कुन योहाननेके लोहतिर. ओर मीकु सत्तेमता गवाइ वेहतुर.

34 मीकु मुक्ति दोर्कगोम, इंचि इव पोल्लेन नना मीकु वेहासेक मंतन अचोने. गानि नावा बारेमते लोकुल्कुना गवाइता अक्सरम नाकु हिल्ले.

35 योहान वेडसिलेहका पोत्सि मीकु वेलगु हीतोर. मीकुगुडा गडसेमताहाटीं आ वेलगुने कूस मनालय बेस अनपिस्ता.

36 गानि योहानुना गवाइकुन्ना पेदुदा गवाइ नहगा मंता. बारिल्ले पूरा कियनाहाटीं पेनबाबाल नाकु हीता कबाहक आनि नना कियना कबाहक. इवे पेनबाबाल नाकुन लोहतोर इत्तादांकु गवाइ मंतां.

37 नाकुन लोहचीता पेनबाबाल कुदुदु नावा बारेमते गवाइ वेहतोर. गानि मिमेट बस्केने ओना अल्किर केंजा हिल्लिर, बस्केने ओना रूपमतुन ह्ळा हिल्लिर.

38 अचोने आयका ओर लोहतोना पोर्रीं मिमेट विस्वासम ईर्वाहेंका, ओर कराहता पोल्ले मीवा मनसुना लोपो मना परीं.

39 बस्केळ्क पिस्सना पिस्वर दर्मासास्त्रमहेंदाल दोर्कता इंचि मिमेट अये प्हकट, अदे दर्मासास्त्रम नावा बारेमते गवाइ वेहचंता.

40 अथना, बस्केळ्क पिस्सना पिस्वरहाटीं मिमेट नहगा वायालय ह्ळिर.

41 नना मनकालोर्गहेंदाल कदर कोरोन.

42 बारिल्ले मिमेट बसंतोर आंदिरो नाकु एरपाटे. मीलोपो पेनदाहाटीं पावरम हिल्ले.

43 नना नावा बाबाना पोरोल्ले वातन, गानि मिमेट नाकुन स्विकार किया हिल्लिर. गानि बोर्नना वेरेंतोर, ओना पोरोल्ले ओर वायानये मिमेट ओन स्विकार कीतिर.

44 मीवद मिमेटे कदर कीकुनमळ इत्ते मीकु वेल्लेन इस्टम. गानि पेनदाहेंदाल दोर्कना कदरतुन मात्रम बोरे पहका ह्ळिर. असोंटस्के मिमेट नापोर्रीं बल्हा विस्वासम किया परातिर?

45 बाबाना मुन्ने नना मीपोर्रीं तपु दोसतन इंचि इनकुन्मट. मिमेट अये म्साणा पोर्रीं आसे पडसि मनंतिर, आ म्साले मीवापोर्रीं तपु दोसंतोर.

46 मिमेटगिटा म्साण पोर्रीं विस्वासम कियानये, नावापोर्रीं इंका विस्वासम कीतिर, बारिल्ले म्साण नावा बारेमते रासतोर.

47 म्साण रासता पोल्लेन पोर्रींगुडा मीवा विस्वासम हिल्ले अये, नावा पोल्लेन मिमेट बल्हा नमकिर?” इंचि येसु इत्तोर.

6

येसु हेय्युं वेय्कुना मंदिक गाटो दोसमळ
(मत्तयाल 14:13-21; मरकुस 6:30-44; लूकाल 9:10-17)

- 1 अद आता पजा येसु गालिल इनना समुद्रमत्तु* दाटसि हब्बेर ओड्डुंकुं होतोर.
- 2 बिमार मत्तोर्कुन बेस कीसि येसु इंचत्रम आयाना कबाहक कीतोर. आ कबाहकुन ह्ळसि, वेल्लेन मंदि ओना पज्जो-पज्जो वासेक मत्तुर.
- 3 पजा येसु गुट्टापोर्रो एकसि, अगा ओना सिस्वुल्कुनतोनि उदूतोर.
- 4 अव रोजकुने यहूदिलकुना दाटसि होनना पंडुगु दगेर्क एवसि मत्ता.
- 5 पजा येसु अगाटाल ह्ळतोरय्ते, वेल्लेन मंदि ओनहेके वायनद ओन्क दिसतुर. अस्के, “ईरकु अंतोर्क तिनालय तिडि मनम बगाटाल अस्सि तरकोम?” इंचि पिलिपुन पूसकीतोर.
- 6 येसुक अन्नि एर्के मत्ता गानि पिलिपुना परिक्सा ह्ळालय, ओन इसाँटा सवाल पूसकीतोर.
- 7 अस्के पिलिपु, “ईराहाटी रौंड नुहकु एंडि स्पेना† हारि अस्सि तच्चि तासिना, वरो-वरोक उंद-उंदि मुक्कागुडा एव्वा परो,” इंचि जवाब इतोर.
- 8-9 अस्के येसुना सिस्वुल्कुनाल वरोर सिस्वुड, सिमोन पन्नूना तम्मुर अंदरियल‡ इनानोर, “इगे वरोर सिन्ने पेडानगा हेय्युं जोन्ना हारि, रौंड बोळ्स्ता जिम्मां मंतां, गानि इच्चा वेल्ले मंदिक इव बगा हालनू?” इंचि येसुन इतोर.
- 10 अस्के येसु, “अंतोर लोकुल्कुन उदूदालय वेहाट,” इंचि इतोर. अगा वेल्लेन पच्चाटा जाडि मत्ता. अगा उदतोरव्टेटाल दगेर-दगेर हेय्युं वेय्कुना मंदि मांडुसे मत्तुर.
- 11 पजा येसु आ हारिन कय्दे पीसि पेनदुक दन्यवाद कीतोर. पजा आ हारिन उदूतोर अंतोर्क वाटालय ओना सिस्वुल्कुंक हीतोर. जिम्मानगुडा अल्हेन कीतोर. अंतोर पीरनिंडा तित्तुर.
- 12 ओर अंतोर पीरनिंडा तित्तंका, “बतंगे उतंगा पोचमन्नि, मिगुलत्व अन्नि जमा कीम्तु,” इंचि येसु सिस्वुल्कुंक वेहतोर.
- 13 तिनालय लोकुल्कुंक हीता हेय्युं हारिनाल मयतव तुकडें जमा कीते, पनॅंड तट्टां निंडां.
- 14 येसु कीता इसाँटा अदू बत्तामाता चिन्हतुर ह्ळसि लोकुल्क, “निजमे! इद दुनियाते वरोर पेनदा कबुरतोर वायानोर मत्तोर, ओर ईर आंदुर,”* इंचि इनालय दल्यतुर.
- 15 पजा लोकुल्क ओन राजाल कियालय बल्हैना बल्मि कीतुर, इंचि ओन्क तेळियता. अदुनहाटी ओर वरोरे मरा गुट्टातेके पेय्सि होतोर.

येसु एतापोर्रो ताकंतोर
(मत्तयाल 14:22-27; मरकुस 6:45-52)

- 16 नुल्पेटा वेलाक येसुना सिस्वुल्क गालिल समुद्रमता ओड्डुंकुं होतुर.
- 17 हीकट अयनागानि येसु वायाहिल्लोर इंचि सिस्वुल्क उंदि डोंगाते उदूदिस समुद्रमता हब्बेटा बाजुंक मनना कपर्नाहूम इनना सहर होनालय पेय्त्तुर.
- 18 वळि इरगा वासेक मत्ताहैका समुद्रमते पेदूदा-पेदूदा तडां तेदसेक मत्तां.
- 19 ओरा डोंगा हेय्युं-हाइ किलोमिटर्क मुन्ने होत्ता बारे, अचानक येसु एतापोर्रो ताकसेके डोंगा दगेरा वायानद ओर ह्ळसि, इरगा वेरियतुर.
- 20 गानि येसु, “ननाने आंदुन! वेरियमट,” इंचि ओर्कुन इतोर.
- 21 इत्तारित्ते ओर कूस आसि, येसुन डोंगाते उपिचकुनालय तयार आतुर. अचोटेन ओर बगा अय्ते होनालय पेय्त्तुर अद जेगातगा ओरा डोंगा एवता.

लोकुल्क येसुन पहकंतुर

- 22-23 येसु सामि पेनदुक दन्यवाद कीसि, अंतोर्क हारि हीता जेगातगा ओन्क कलियालय लोकुल्क इंकुंदि रोजु पंगासि जमा आयलय दल्यतुर. अगा सिराप उंदे डोंगा मत्ता. अद डोंगाते अय्ते सिराप ओना सिस्वुल्के उदूदिस होतुर. येसु ओरतोनि होना हिल्लोर. इंचि आ लोकुल्कुंक एरपाटे मत्ता. गानि पज्जोटाल तिबेरिया नाटेनाल वैरे इच्चुं डोंगां अगा वासि मत्तां.
- 24 पजा आ लोकुल्क येसुन, ओना सिस्वुल्कुन पहकतुर, गानि ओर्क बारे दोर्का हिल्लुर. अदुनहाटी ओर लोकुल्क अगा मत्ता डोंगाते उदूदिस येसुन पहकालय कपर्नाहूम होतुर.

* 6:1 गालिल इनना समुद्रम इद उंदि पेदूदे सेरुवु आंद. † 6:7 रौंड नुहकु एंडि स्पे मना कोलना लेक्काते, वरोर क्लिगाना एनिमिदि नेल्कुना जीतमतच्चोन आंता. ‡ 6:8-9 अंदरियल ईर सिमोन पन्नूना तम्मुर आंदुर. * 6:14 ब्यवस्ताविवरन 18:15-18

पिस्वर हियना तिडि येसु आंदुर

25 पजा लोकुकल्क हब्बेर ओड्डु एवतांका येसुन अगा हळसि, “रब्बी! निमे इगे बस्के वातिन?” इंचि पूसकीतुर.

26 अस्के येसु इल्हा वळकालय दलगतोर: “नना निजम-निजम वेहासेक, नना कीता अद्बूतामाता चिन्हन हळसि मिमेट नाकुन प्हकसेक हिल्लिर. नना मीकु पीरनिडा तिडि तासतन इंचि नाकुन प्हकसंतिर.

27 हवसोननसोंटा तिडि पज्जो मिमेट होनमट. दानकु बदुल, बस्केळ्ळक पिस्सना पिस्वर हियानद, बस्केने हव्वाकोटा मनना तिडितुन प्हकट. अदुन हियना अदिकारमता सिक्का पेनबाबाल नापोरों वाटतोर, अदुनहाटी असोंटा तिडि, मनकना रूपमते पुटतोन नना, मीकु हिया परंतन.”

28 अस्के लोकुकल्क, “अथे पेनदा कबळ कियालय, मोमोट बतल कियाना?” इंचि येसुन पूसकीतुर.

29 पूसकीतस्के, “पेन बोन अथे लोहतनो, ओनपोरों मिमेट विस्वासम इरंट,” इंचि येसु जवाब हीतोर.

30-31 पजा लोकुकल्क, “मावा एनकटा पेद्दाल्क इजिप्त देसेमताल वायनेके बय्लि जेगातगा मन्ना इनना तिडि तित्तर. ओर्क तिनालय तिडि मूसाल स्वर्गमताल हीतोर, ✧ इंचि दर्मासात्रमते रासि मत्तापे ओर्क आ तिडि तिनालय दोर्कुता. अथे मोमोट नीपोरों विस्वासम इरल्य इंदके निमे माकु बसोंटा चिन्ह हुप्संतिन?” इंचि पूसकीतुर.

32 अस्के येसु, “नना निजम-निजम वेहासेक, स्वर्गमताल तिडितुन मीकु हीतोर मूसाल आयोर, नावा बाबाल हीतोर. इंदके नावा बाबाल स्वर्गमताल वायना आ निजमाता तिडितुन मीकु हीसंतोर.

33 बारित्ते पेनबाबाल स्वर्गमताल लोहतदे, इद दुनियातोरक पिस्वरतुन हीता. पेनबाबाल लोहचीता निजमाता तिडि अदे आंद,” इंचि वेहतोर.

34 अस्के लोकुकल्क, “अथे अद तिडितुन माकु बस्केळ्ळक हीम सामि,” इंचि इत्तर.

35 अस्के येसु ओर्क इल्हा वेहालय दलगतोर, “पिस्वर हियना तिडि ननाने आंदुन. नहगा बोर अथे वांतुर, ओर्क बस्केने करवेस्सो. बोर अथे नापोरों विस्वासम इरंतुर, ओर्क बस्केने द्वा आयो.

36 गानि नना मीकु मुन्नेन वेहताप, मिमेट नाकुन हळसिगुडा नावापोरों विस्वासम इरा हिल्लिर.

37 अथना बाबाल बोर-बोर्कुन अथे नाकु अप्पजेपंतोर, ओरे नहगा वांतुर. नहगा वायानोर्कुन नना बस्केने मलाहचि लोहोन.

38 बारित्ते नना नावा इच्चां पूरा कियालय स्वर्गमताल हिळ्ळ रेप्सि वाया हिल्लेन. नाकुन लोहतोना इच्चातुन पूरा कियालय नना वातन.

39 नाकुन लोहतोना इच्चा बतल इत्ते, नाकु अप्पजेपतोर्कुन वरोरगुडा तप्सोनाकोटा हळना आनि आकिरता रोजु ओर्कुन मरा जीवाते तेहना.

40 नावा बाबाना इच्चा बतल मंता इत्ते, मरिनेके हळसि ओनपोरों विस्वासम कियानोर अंतोर्क बस्केळ्ळक पिस्सना पिस्वर दोर्कना. अल्हा बोर अथे विस्वासम इरंतुरो, ओर्कुन नना आकिरता रोजुने मरा जीवाते तेहांतन,” इंचि येसु ओर्क वेहतोर.

41-42 “स्वर्गमताल रेयता तिडि ननाने आंदुन,” इंचि येसु इत्तस्के यहदि पेद्दाल्क ओरद ओरे येसुना बारेमते, “अरे! इर योसेप इनानोना मरि आयोरा! ईना तल्लुर-बाबो मनाकु एरपाट. अथे ईर, नना स्वर्गमताल वातोनांदुन, इंचि बल्हा इंचंतोर?” इंचेके गुल्गालय दलगतुर.

43 अस्के येसु ओर्कुन इल्हा इत्तोर, “मीवद मिमेटे गुल्गकुनमट.

44 नाकुन लोहचीता बाबाल, बोना मनसुने अथे नहगा वायना इच्चातुन पुटसंतोर, ओरे नहगा वांतुर. वरे बोरे वाया पसर. आकिर रोजुने नहगा वातोर्कुन ननाने जीवाते तेहांतन.

45 पेनदा कब्रतोरा पुस्तकाल्कुने, अंतोर लोकुकल्कुंक पेने कराहंता, ✧ इंचि रासि मंता. बोर अथे बाबाना पोल्ले केंजांतुर, करियांतुर, ओर अंतोर नहगा वांतुर.

46 पेनबाबान बोरे हळ्ळा हिल्लुर. नना अगटाल वातोनांदुन, ननाने हळतन.

47 नना निजम-निजम वेहासेक, नापोरों विस्वासम कीतोन्कु बस्केळ्ळक पिस्सना पिस्वर दोर्कते इनकुंद.

48 पिस्वर हियना तिडि ननाने आंद.

49 मीवा एनकटा पेद्दाल्क बय्लि बूमिते पेन अरहता मन्ना इनना तिडि तित्तर गानि हातुर.

50 गानि स्वर्गमताल हिळ्ळ वाता तिडितुन तित्तोर, बस्केने हायोर.

51 स्वर्गमताल वाता जीवाते मनना तिडि ननाने आंद. बोर अथे ई तिडितुन तित्तोर, ओर बस्केळ्ळक जीवातेन मनांतोर. ई तिडि ना मेंदुल आंद, नना इद मेंदुलतुन दुनियातोरा पिस्वरताहाटी हीतन,” इंचि इत्तोर.

52 इद केंजसि यहदिल्क, “ओर मनकल ओना मेंदुलतुन मनाकु तिनालय बल्हा हिया परंतोर आयो?” इंचि ओरद-ओरे वदुरकुनालय दलगतुर.

53 अस्के येसु, “हिंके केंजट, निजम नना वेहांतन. मिमेट, मनकना रूपमते पुट्तोना, मेंदुलतुन तिन्वा, ओना नेत्तुरतुन उन्वा, मीकु पिस्वर हिल्ले.

54 गानि बोर अय्ते नावा मेंदुलतुन तितुर, नावा नेत्तुरतुन उंटुर, ओर्क बस्केळ्ळक पिस्सना पिस्वर दोर्कता. आकिर रोजुने ओर्कुन नना जीवाते तेहांतन.

55 बारित्ते नावा मेंदुल निजमाता तिडि आनि नावा नेत्तुर निजमाता उनानद आंदु.

56 बोर अय्ते नावा मेंदुलतुन तितुर, नावा नेत्तुरतुन उंटुर, ओर नातोनि, नना ओरतोनि निलसि मनंतन.

57 नाकुन लोहता जीवाते मनना नावा बाबाना ताकततोनि, नना जीवाते मंतन. अल्हेन बोर अय्ते नावा मेंदुलतुन तितुर, ओर नाहेंदाल जीवाते मनांतुर.

58 स्वर्गमताल हिळ्ळ वाता निजम तिडि ननाने आंदुन. मीवा एनकटा पेदुदाल्क मन्ना इनना तिडि तिचिगुडा हातुर, गानि इद तिडितुन तिनानोर मात्रम बस्केळ्ळक जीवाते मनांतुर,” इंचि येसु ओर्क वेहतोर.

59 कपर्नाहूम सहरता दर्मसास्त्रम कराहना लोते, कराहनेके येसु इव पोल्लें वेहतोर.

वेल्लेटुर सिस्युल्क येसुन होळसीतुर

60 इव पोल्लें केंजसि, येसुना सिस्युल्कुनाल वेल्ले मंदि सिस्युल्क, “इव पोल्लें तेळियालय वेल्लेन कस्टम मंता, इवुन बोर केंजंतुर?” इंचि इनालय दल्गातुर.

61 सिस्युल्क गुल्गकुंचंतुर इंचि येसु एरपाट कीसि ओरतोनि इल्हा वळकालय दल्गातोर, “मीकु इव पोल्लें केंजसि, कस्टमासंतना?

62 अय्ते मनकना रूपमते पुटोतन नना, मुन्ने बगा मत्तन अगा मल्सि होननेके ह्ळानय्ते, अस्के मिमेट बतल इंदकिरो मरि?

63 मेंदुल पिस्वर हिया परो, दानकु बतल विल्वा हिल्ले. सिराप पेनदा आत्मे पिस्वर हीता. नना वेहना पोल्लेंगे आत्मा आनि पिस्वर आंद.

64 गानि मीलोपो इच्चुर नावा पोल्लेन नमवोरगुडा मंतुर,” इंचि इत्तोर. बारित्ते, ओन नम्मनोर बोर, ओन वेंरे लोकुकुक पीसि हियानोर बोर? इतद येसुंके मुन्नेटाले एर्का मंता.

65 पजा येसु, “नना मीकु वेहचि मत्तन गदा, बाबाल लोहवद बोरें नहगा वाया पस् इंचि. अदुनहाटीगे इव अन्नि पोल्लें नना मीकु वेहतन,” इंचि इत्तोर.

66 अस्केटाल वेल्लेटुर येसुना सिस्युल्क येसुन होळसि मल्सि होत्तुर, मर्रा बस्केने ओना पज्जो होना हिल्लुर.

67 अदुनहाटी येसु पन्नेड सिस्युल्कुन, “मिमेटगुडा मल्सि होनालय ह्ळसंतिरा?” इंचि प्सकीतोर.

68 अस्के सिमोन पत्रु, “सामि, मोमोट इंका बोनगा दाकोम? बस्केळ्ळक पिस्सना पिस्वर हियना पोल्लें अय्ते निहागेन मंता!

69 पेन लोहता पविन्न निमेन आंदिन इंचि मोमोट विस्वासम कीसि एरपाट कीतोम,” इंचि इत्तोर.

70 अस्के येसु, “मीकुन पन्नेड मंदितुन ननाने पेरतन, अघनागानि मी अत्ते वरोर देय्यम मंतोर,” इंचि सिस्युल्कुन इत्तोर.

71 येसु इद पोल्ले इस्कारियोत नाटेना सिमोनना मरि यहुदाना बारेमते वळ्ळकतोर. पन्नेड मंदि सिस्युल्कुनाल ओर वरोरे येसुन पज्जोताल दोकाते पीसि हियनोर मत्तोर.

7

येसुन ओना तम्मुहकगुडा नम्मुर

1 इद आता पजा, येसु गालिलतेन नार-नार तिरियसेक मत्तोर. यहुदि पेदुदाल्क ओन ह्ळकालय पोंचादोस्सि मत्ताहेंका ओर यहुदिया राज्यमते होना ह्ळ्हा हिल्लोर.

2 गानि अद वेलाते यहुदिल्लुकुना डेराना पंडुगु दगर्क एवसि मत्ता,

3 अदुनहाटी येसुना तम्मुहक येसुन, “निमे इगोताल यहुदिया होन. अस्केन निमे कियना अद्बूतामाता कबाहक नीवा सिस्युल्क ह्ळ्हा परांतुर.

4 बोर अय्ते ओना पोरोल दुनियाक तेळियागोम इंचि इंतोर, ओर बतले कबळ मक्किस् किच्योर. निमे निजमे इसोंटा अद्बूतामाता कबाहक कियानय्ते, दुनियातोर मुन्ने कीसि हुप्सा,” इंचि इत्तुर.

5 ओना तम्मुहकगुडा ओन नम्मा हिल्लुर, अदुनहाटी ओर अल्हा इत्तुर.

6 अस्के येसु, “मीकु अय्ते अन्नि वेलां मंचिये, मिमेट बस्के इत्ते अस्के अगा होना परांतुर. गानि नना अगा होनना वेला इंका एवा हिल्ले.

7 दुनियातोर मीकुन हय्साकोटा मना पस्. गानि नना दुनियातोर कबाहक बेसतव आयों इंचि दुनियातोर विरोदमते गवाइ हीतन, अदुनहाटी नाकुन दुनियातोर हय्सुर.

8 मिमेट पंडुगुंक होंटु. नना वायना वेला इंका एव्वा हिल्ले, अदुनहाटी इद पंडुगुंक नना वासेक हिल्लेन,” इंचि येसु ओर्क वेहतोर.

9 ओर्क इव पोर्ले वेहचि ओर गालिलतेन मत्तोर.

10 गानि ओना तम्मुहक पंडुगुंक होतंका, पञ्जोताल येसुगुडा अंतोर्क दिस्सेक आयो, गानि चुपचाप पंडुगुंक होत्तोर.

11 यहदि पेद्दाल्क पंडुगुणा, “ओर बगा मंतोर?” इंचेके ओन पहकालय दलग्गुत्तोर.

12 अद मंदिताल इच्चुर लोकुल्क बारे येसुना बारेमते, “ओर बेस मनकल आंदुर,” इंचि इंसुंदुर. इंचिक्चुर बारे, “हिल्ले रो! ओर लोकुल्कन गयबेत कीतोर,” इंचि गुसान्ना वळ्ळकुकुंदुर.

13 गानि यहदि पेद्दाल्कुना वेंर्क बारे लोकुल्क येसुना बारेमते कुल्ला-कुल्ला वळ्ळकाकौंदुर.

पंडुगु जर्मिके येसु कराहतोर

14 पञ्जा पंडुगु सुस्व आसि सगम पोळ्द आतंका, येसु गुळिते होंचि कराहलय दलग्गुत्तोर.

15 ओर कराहनदुन केंजसि यहदि पेद्दाल्क, “ई मनकल अय्ते बदे इस्कलते, बारे गुम्नगा होंचि करिया हिल्लोर. अयना इन्कु इच्चोने वेल्ले तेळिचि बगाटाल वाता?” इंचेके इचंन्रमते अरत्तुर.

16 अस्के येसु ओर्क इल्हा जवाब हीतोर, “नना कराहना पोर्ले नवां आयों, नाकुन लोहचीता पेनदव आंदुं.

17 मीवा लोपोटाल बारे आथिर, पेनदा इच्चा मत्ताप ताकतन इनकुनानय्ते, नना कराहना पोर्ले नहगटाल वासंतंगा हिलाकौंटे पेनदागटाल वासंतंगा, इंचि ओन्क तेळियंता.

18 बोर अय्ते ओना सतता पोर्ले कराहतोर, ओर ओना पोरोल्लुने पेद्ददा कियालय हळ्ळंतोर. गानि बोर अय्ते ओन लोहतोन्कु कदर दोर्कना इंचि इनकुंतोर, ओर सत्तेम मनकल आंदुर, ओनगा बतले आबद्दम हिल्ले.

19 मूसाल अय्ते मीकु दर्मासन्मत्तुन एव्विचि हीतोर. गानि मिहागटाल वरोरगुडा अव्वेटा नियमकुनपोर्ती ताकसेक हिल्लिर. अय्ते बारि नाकुन हव्कालय हळ्ळसंतिर?” इंचि येसु इत्तोर.

20 अस्के लोकुल्क, “नीकुन देय्यम पीताना बतला, अल्हा वळ्ळसंतिन! बोर नीकुन हव्कालय हळ्ळसंतुर?” इंचि येसुकुं जवाब हीत्तुर.

21 अय्ते येसु इल्हा वळ्ळकालय दलग्गुत्तोर, “नोमकेम रोजुननाड नना उदि अद्दूत्तामाता कबळ कीतदुन हळ्ळसि, मिमेट अंतोर वेल्लेन इचंन्रमते अरतिर.

22 कतना* कियना इंचि मीकु मूसाल वेहचि मत्तोर. असल निजम हळ्ळते, ई कतना रिवाज मूसाल सुस्व किया हिल्लोर. अद एनकाटा पेद्दाल्कुनगटाल वाता. मिमेट अय्ते कतना कियना वेला वातस्के, नोमकेम रोजुननाडगुडा मीवा मर्कुना कतना कीतिर.

23 मूसाना नियम तपानायो इंचि, नोमकेम रोजुननाड बोनादन्ना कतना कियना वेला वायानय्ते मिमेट ओना कतना किया वच्चु. गानि अदे नोमकेम रोजुने नना वरोर मनकन पुरागा बेस कीते, मीकु नापोर्ती होंग बारि वायना?

24 मोकोम हळ्ळसि न्यायम कियमट, निजम-निजम न्यायम कीम्पु,” इंचि येसु इत्तोर.

येसु बारे आंदुर?

25 अस्के येस्सलेमतोर इच्चुर लोकुल्क, “यहदि पेद्दाल्क बोन अय्ते हव्कालय हळ्ळसंतुर, ओर ई अय्ते आयोर गदा!

26 हळ्ळट, ओर लोकुल्कुना नड्डुम नित्तिसि बल्हा कुल्लम-कुल्ला वळ्ळसंतोर! अयनागानि ओन बारे बतल इंचेक हिल्लुर. ईर किरिस्तु इंचि, मना पेद्दाल्कगुडा निजम एरपाट कीत्तुर बारे!

27 किरिस्तु वायनेके ओर बगाटाल वांतोर, बोनके तेळियो. गानि ईर मनकल बगाटाल वातोर, मनाकु अंतोर्क एरपाटे मंता.” इंचि ओर वरोर-वरोर वळ्ळकालय दलग्गुत्तुर.

28 येसु गुळितगा कराहनेके इल्हा वळ्ळकालय दलग्गुत्तोर, “हो! नना बोन आंदुन, बगाटाल वातन इदंता मीकु एरपाटे मंता. गानि नावद ननेन इगे वाया हिल्लेन. नाकुन लोहतोर सत्तेमंतुड आंदुर, ओर बोर आंदुरो मीकु एरपाट हिल्ले.

29 गानि नना ओन एरपाट कीतन. बारित्ते ओर नाकुन लोहातोर, नना ओनागटाले इगे वातन,” इंचि लंगाचि वेहतोर.

30 पञ्जा यहदि पेद्दाल्क येसुन दोर्का पियालय हळ्ळतुर. गानि अस्केळ्ळ ओना वेला एव्वका मत्ता. अदुनहाटी वरोरगुडा ओन्क कय दोस्सा पराहिल्लोर.

31 अयना गुळितगा मत्ता मंदिताल वेल्लेटोर येसुन नमत्तुर. नम्मिसि, “किरिस्तु वातस्के, इनकन्ना एक्को अद्दूत्तम आयना कबाहक कियनुरा?” इंचि ओर वळ्ळकालय दलग्गुत्तुर.

* 7:22 कतना यहदि आनि मुसलमान लोकुल्कुनद इद उंदि रिवाज आंद. इद रिवाज परकारम उळ्ळकानगाटा कोस्सा तोलदुन कोय्यात्तुर. इसंटा रिवाज कीते पेनदातोमि करार कीताप इंचि ओर नम्मत्तुर.

यहदि पेद्दाल्क येसुन दोर्का पियालय ह्ळांतुर

32 लोकल्क येसुना बारेमते इसॉटा पोल्लें गुसा-गुसा वळ्कानेके परिसिल्क केंजतुर. केंजसि पेर्मालोक आनि परिसिल्क येसुन दोर्का पियानाहाटी गुळितगा कावेल कीसेक मत्ता सिपाइल्कुन लोहतुर.

33 अस्के येसु ओर्क, “इंका जेरसिप नना मीतोनि मनंतन, पजा नाकुन लोहतोनागा नना तिरियसि दांतन.

34 मिमेट नाकुन पहककिर, गानि मीकु दोर्कोन. इंका नना मनना जेगातगा मिमेट वाया परिर,” इंचि वेहतोर.

35 अल्हा वेहाटेलक, यहदि पेद्दाल्क ओरद-ओरे, “मनम पहकिना गानि दोर्काकोंटा ओर बगा दांतोर आयावच्चु? युनानि देसेमते होंचि, सिल्लर-सल्लर आसि मनना मना लोकल्कुकुंके पेनदा पोल्लें अय्ते करहोर गदा! हिलाकोटे युनानि लोकल्कुकुनगा दांतोरा?

36 ‘मिमेट नाकुन पहककिर, गानि मीकु दोर्कोन. इंका नना मनना जेगातगा मिमेट वाया परिर,’ इंचि इत्ता पोल्लेक अर्तम बतल आयावच्चु?” इंचेके वळ्ककुनालय दलग्गतुर.

येसुन नम्मूर्तेक पेनदा आत्मा दोर्कता

37 अद पंडुगुना आकिरता रोजुकु वेल्लेन विलुवा मनंता. अद रोजुने येसु नित्तिसि, “दूपातोर नहगा वासि उंडावच्चु.

38 दर्मसास्त्रमते रासि मत्ताप, नापोरों विस्वासम कीतोना लोप्पोटाल पिस्वर हियना एता बेरेहक पोंगनु,” इंचि लगांचि वेहतोर.

39 येसुनपोरों विस्वासम कीतीर्के पेनदा आत्मा दोर्कनद मत्ता. अदे आत्माता बारेमते वेहालय येसु इव पोल्लें वळ्कतोर. येसु हासि मर्रा महिमाते तेदानेदे मत्तोर. अदुनहाटी पेन अदवेरदाका अद आत्मातुन बोर्के हिथ्या हिल्ले.

40 इव पोल्लें केंजतोर इच्चुर लोकल्क, “निजमे! बोर पेनदा कबूरतोर अय्ते वायनद मत्तोर, ओर ईर आंदुर,” इंचि इत्तुर.

41 इंचिच्चुर बारे, “ओर किरिस्तु आंदुर,” इंचि इत्तुर. आनि इंचिच्चुर लोकल्क, “अरे! गालिल एरियाताल किरिस्तु वांतोरा?

42 ‘किरिस्तु दाविद राजाना बंसंमते पुट्रिसि, दाविद राजाल पुटता बेतलहेम नाटेनाले वांतोर,’ इंचि दर्मसास्त्रमते रासि हिल्लेना!” इंचि इत्तुर.

43 येसुना बारेमते लोकल्कुकुंके रकारकाल्कुना विचाराल्क मत्ताहेंका, लोकल्क ओरद ओर्के अर्काकोंटा आसि वेरे-वेरे आतुर.

44 इच्चुर ओन दोर्का पियालय ह्ळतुर, गानि बोर वरोरगुडा ओनपोरों कय वाटा पराहिल्लुर.

विस्वासम कियुवा यहदि पेद्दाल्क

45 गुळितगा कावेल कियानोर बोर अय्ते येसुन दोर्का पियालय होत्तुर, ओर उत्ता कय्के मल्सि वातुर. अस्के, “मिमेट ओन बारि पीसि तराहिल्लिर?” इंचि पेद्दा पेर्मालोर आनि परिसिल्क ओर्कुन पूसकीतुर.

46 अस्के आ कावेल कियानोर, “ओर वळ्कताप बारे मनकल बस्केने वळ्का हिल्लोर,” इंचि जवाब हीतुर.

47 पजा परिसिल्क ओर्कु इल्हा जवाब हीतुर. “ओर मीकुनगुडा पसांच्तोरा?

48 यहदि पेद्दाल्कुनाल आयि, परिसिल्कुनाल आयि, बोर वरोरन्ना ओन नम्मूर्ते मंतोरा? बारे हिल्लुर.

49 गानि येसुन बोर अय्ते नम्मूर्ते ओर्के मूसाना नियमकु तेळियों, ओर्के तप्पाकोंटा सापनेम दलगंता,” इत्तुर.

50 अगा निकोदेमस पोरोलतोर वरोर मत्तोर, ओर मुन्ने उंदि मल्का येसुंक कलियसि मत्तोर. ओरगुडा आ परिसिल्कुनाल वरोर आंदुर.

51 अय्ते ओर, “वरोर मनकंक मनम ओना गवाइ केंजाकोंटेने, ओर बतल कीतोर तेल्पिचकुनाकोंटेने मना दर्मसास्त्रमता नियमकुना परकारम, न्यायम किया परांतोमा?” इंचि ओर्कुन पूसकीतुर.

52 अय्ते ओर, “अरेय, निमेगुडा गालिल एरियातोना रो? होन! होंचि दर्मसास्त्रमते बेस पहकिसि हदवा, गालिलताल बारे पेनदा कबूरतोर वायोर इंचि रासि मंता,” इत्तुर.

बोगमतनम कीता मुरतटुन येसु मापि कीतोर

53 पजा ओर अंतोर ओरा-ओरा लोहकुने होत्तुर.

8

1 गानि येसु जय्तन मराकुना गुट्टटेके होत्तोर.

2 हक्केरेन मर्रा गुळितगा वातोर. वेल्लेन लोकल्क ओनगा जमा आतुर. येसु उद्विदस ओर्के कराहलय दलग्तोर.

† 7:32 परिसिल्क पेनदुन कस कियानाहाटी यहदि लोकल्कुना अनि नियमाल्कन आनि अनि रीति-रिवाजकुन कडक पालन किया पीता, इंचि ईर नम्मूर्ते. ईरगुडा यहदि लोकल्कुनाल उंदि मतमतोर आंदुर.

3-4 ओर्क कराहसेके मननेकेन, बोगमतनम कियनेके दोर्कता उंदि मुरतटुन, दर्मसास्त्रम कराहना गुस्त्क आनि परिसिल्क ओनगा पीसि तच्चि लोकुल्कुना मुन्ने निलाहतर. निल्हाचि, “गुरू, इद मुरतटुन बोगमतनम कियनेके मोमोट दोर्का पीतम.

5 इंसंटा मुरतटुन बंडाने तंचि हळ्कना इंचि मूसाना नियम मनाकु आदेस हीता. अय्ते दीना बारेमते निमे बतल इतिन मरि?” इंचि येसुन पूसकीतुर.

6 ओर वळ्कानेके बतलन्ना तप्पु कीते ओन दोर्का पियना उपायमते, ओर असोंटा सवाल पूसकीतुर. गानि येसु हिळ् वंगिसि बूमिपोर्री बतलो वेल्ने रासालय दल्गतोर.

7-8 ओर उंदे हट्टु पीताहाटी, येसु तेदसि ओर्कुन, “सरे! बंडाने तनाट. गानि मिहगटाल बोर अय्ते बस्केने पापम किया हिल्लोर, मुन्ने ओर दीन बंडाते तनना,” इंचि वेहतोर. पजा मर्रा वंगिसि बूमिपोर्री वेल्ने रासालय दल्गतोर.

9 दान तत्तोर अंतोर येसु इत्तदुन कैजसि, मोदाला मातरालोर आनि पज्जोटाल अंतोर वरोन पज्जो बरोर अगटाल पेय्शि होत्तुर. ओर अंतोर अगटाल होत्तस्के लोकुल्कुना नड्डुम सिराप येसु आनि आ मुरतळे मत्तुर.

10 पजा येसु इंकुंदि मल्का तेदसि, “बाई, नीकु सिक्साता आदेस हियानोर बेके होत्तुर? नीकु बोरे सिक्साता आदेस हिय्या हिल्लुर?” इंचि पूसकीतोर.

11 अस्के अद मुरतळ, “नाकु बोरे सिक्साता आदेस हिय्या हिल्लुर सामि!” इंचि इत्तस्के येसु, “ननागुडा नीकु सिक्साता आदेस हिय्योन. होन, इंका बस्केने पापम कियमा,” इंचि दान्क वेहतोर.*

येसु दुनियातोरक वेल्गु

12 पजा येसु, “नना दुनियातोरहाटी वेल्गु आंदुन. बोर अय्ते नावा पज्जो ताकंतोर, ओनगा पिस्वराताहेके ओयना वेळसि मनंता, अदुनहाटी ओर बस्केने हीकटते ताकोर,” इंचि वेहतोर.

13 अस्के परिसिल्क, “नीवा बारेमते निमेन गवाइ वेहकुंचंतिन, अदुनहाटी नीवा गवाइते सत्तेम हिल्ले,” इंचि येसुन इत्तुर.

14 अय्ते येसु ओर्क इल्हा जवाब हीतोर, “नावा बारेमते ननाने गवाइ वेहिनागानि, नावा गवाइ मात्रम सत्तेम आंद. बारित्ते, नना बगाटाल वातन, बगा दांतन, इत्तद नाक एरपाट मंता. गानि नना बगा वातन, बगा दांतन मीकु बतले एरपाट हिल्ले.

15 मिमेट मनकना बुद्दिदेते न्यायम कीतिर, गानि नना बोनदे न्यायम किय्योन.

16 ओक्कला नना न्यायम कियिनागानि नावा न्यायम निजम मनंता, बारित्ते नना वरोने हिल्लेन, नाकुन लोहचीता ना बाबाल नाक तोळ मंतोर.

17 इळ्वुरा गवाइ उंदि आते, अद गवाइ निजम मनंता इंचि मीवा मूसाना नियमतेन रासि मंता.

18 दीन परकारम, नावाहाटी नना वरोर गवाइ आनि नाकुन लोहचीता ना बाबल इंकावरोर गवाइ,” इंचि येसु इत्तोर.

19 इद कैजसि ओर, “नीवा बाबाल बगा मंतोर?” इंचि पूसकीतुर. अस्के येसु, “असल नना बोन, नावा बाबाल बोर? मीकु एरपाट हिल्ले. मिमेट नाकुन एरपाट कियानय्ते, ना बाबान इंका एरपाट कीतिर,” इंचि ओर्क वेहतोर.

20 येसु इव पोल्ले, गुळिता लोप्पो कोतां वाटना जेगातगा नित्तिसि कराहनेके वळ्कतोर. अय्नागानि ओन बोरे दोर्का पिया हिल्लुर. बारित्ते ओना वेला एव्वनंदे मत्ता.

येसुना पोल्ले यह्दि पेद्दाल्कुंक अर्तमायों

21 पजा इंकुंदि मल्का येसु ओर्कुन, “नना अय्ते होंचंतन. मिमेट नाकुन पहककिर. मिमेट मीवा पापाल्क मापि आयका मुन्नेन हाकिर. नना बगा अय्ते होंचंतन अगा मिमेट वाया परिर,” इत्तोर.

22 अस्के यह्दि पेद्दाल्क ओरद ओरे, “नना बगा अय्ते होंचंतन अगा मिमेट वाया परिर, इंचि बारि इंचंतोर मरि? ओक्कला ओना जीवातुन ओरे पोळागोटकुन्नोर गदा!” इंचि वळ्कालय दल्गतुर.

23 पजा येसु ओर्कुन, “मिमेट हिळ्त्तोर आंदिर, नना पोर्रोटोन आंदुन. मिमेट इद दुनियातोर आंदिर, गानि नना आयोन.

24 अदुनहाटीगे, मिमेट मीवा पापाल्क मापि आयका मुन्नेन हाकिर, इंचि नना इत्तन. ओन ननाने आंदुन इंचि विस्वासम कियकोंटे, मिमेट मीवा पापाल्क मापि आयका मुन्नेन हाकिर,” इंचि इत्तोर.

25 अस्के ओर, “अय्ते निमे बोन आंदिन मरि? माकु वेहा,” इंचि पूसकीतस्के येसु, “नना बोन इंचि मीकु मुन्नेटाल वेहचेके वातानो, नना ओने आंदुन.

26 मीवा बारेमते वळ्कालय, मीवा न्यायम कियालय, नहगा वेल्लेन पोल्ले मंता. गानि नाकुन लोहतोर सत्तेमंतुड आंदुर, इंचि नना सिराप ओनागटाल कैजता पोल्लेगें लोकुल्कुंक वेहचंतन,” इंचि इत्तोर.

27 गानि येसु ओना बाबाना बारेमते वेहतोर इंचि ओर्क इंकागुडा अर्तम आयाहिल्ले.

* 8:11 इव वचनल्क कोनि पांडु लिपिने हिल्ले.

28 अदुनहाटी येसु, “मनकना रूपमते पुटतोन नाकुन, बस्के अयते वेलाड वाटमळ जर्गंतनो, अस्के, ओन ननाने आंदुन इंचि, मीकु एरपाट आयार. अचोने आयका, नना सतागा बतले कीसेक हिल्लेन, गानि बव पोल्लें अयते बाबाल नाकु कराहतोरो, अवे पोल्लें नना वेहतन.

29 नाकुन लोहतोर नावा तोळ मंतोर. नना बस्केळ्ळक ओन्क कुसि हियना कबाहके कीतन, अदुनहाटी ओर नाकुन बस्केने ओटिंगा होळसोर,” इंचि वेहतोर.

30 ओना ई पोल्लें केंजतोर, वेल्लेटोरे ओन नम्मसुतुर.

पापमताल पलाते अरंना बारमते येसुना कराहमळ

31 पजा येसु, ओनपोरो विस्वासम कीता यहूदिल्लुकुनतोन, “मिमेट नना कराहता पोल्लें पीसि ताकानयते निजमे नावा सिस्युल्लक आंतर.

32 अस्के मिमेट सत्तेमतुन एरपाट कीकिर, आ सत्तेमे मीकुन होळसार,” इंचि इतोर.

33 अस्के ओर, “मोमोट अयते अब्राहामुना वंसमतोरम आंदुम, इदवेरदाका मोमोट इद बमिपोरो बोनेद कय हिळु दासुल्लक आसि मना हिल्लोम. अयते, अद सत्तेम मीकुन होळसार, इंचि निमे बल्हा इतिन?” इंचि येसुंक जवाब हीतुर.

34 अस्के येसु ओर्क इल्हा वेहतोर, “नना निजम-निजम वेहासेक, पापम कियना हरेक मनकल पापमता दासुडे.

35 वरोर दासि मनकल मालकुना लोतोरतोन बस्केळ्ळक मनोर, गानि मालकुना मरि मात्रम बस्केळ्ळक मनांतोर.

36 अदुनहाटी पेनदा मरि मीकुन पापमताल होळसीतेने, निजमते मिमेट पापमताल पलाते अरंतरि.

37 मिमेट अब्राहामुना वंसमतोर इंचि नाकु एके. अयनागानि नावा पोल्लेंक मीलोपो जेगा हिल्लुवाहेंका मीवा लोप्पोटाल इच्चुर नाकुन हक्कालय हळसंतरि.

38 नना नावा बाबानतोन मत्तस्के बतल अयते हळतनो, अदे मीकु वेहचंतन. आनि मिमेटगुडा मीवा बाबानहेंदाल केंजतद कीसंतरि,” इंचि इतोर.

39 अस्के ओर, “अब्राहाम मावा बाबाल आंदुर,” इंचि इतुर. पजा येसु, “हिल्ले! मिमेटगिंगा अब्राहामुना पिलाल्लक आसि मत्ते, ओर कीतापे मिमेटगुडा कीसि मननेर.

40 गानि नना पेनदागटाल केंजता सत्तेम पोल्लें मीकु वेहते, मिमेट नाकुने हक्कालय हळसंतरि. अब्राहाम अयते अल्हा कियि हिल्लोर.

41 मिमेट मीवा बाबाल कीताप कीसंतरि,” इंचि इतोर. अस्के ओर, “मोमोट बोगमतनम कीते पुट्टा हिल्लोम! माकु वरोर बाबाल मंतोर, ओर पेनबाबाले,” इंचि येसुन इतुर.

42 अस्के येसु ओर्कुन इल्हा इतोर, “पेन मीवा बाबाल आसि मत्ते मिमेट नाकुन पावरम कीसि मननेर. बारिल्ले नना पेनदागटाल वातन. इगे नावद ननेन वाया हिल्लेन. पेने नाकुन लोहता.

43 नना वेहानदुन मिमेट असल केंजिर, अदुनहाटीगे नावा पोल्लें मीकु अर्तम आयों.

44 मिमेट देय्यमता पिलाल्लक आदिर, देय्यमे मीवा बाबाल आंदुर. अदुनहाटी मीवा बाबाल कियना तप्पुड कबाहक कियमळ इत्ते मीकु वेल्लेन इस्टम. देय्यम मुन्नेटाले जीवां तिचेके वाता. अद सत्तेमतुन बस्केने हयसो. दानागा सत्तेम हिल्लेन हिल्ले. आबदुदम वळ्ळकमळे दाना गुनम आंदु, अदुनहाटी अद बस्केळ्ळक आबदुदमे वळ्ळकता, आबदुदमतुन पुट्टसंता.

45 अदुनहाटी नना मीकु सत्तेम वेहिनागानि मिमेट नाकुन नम्मिर.

46 नना बतलन्ना पापम कीतन इंचि मिहागटाल बोरन्ना हुप्सा परांतरि? नना निजम वेहचंतन, अयते मिमेट बारि नाकुन नमसेक हिल्लिर?

47 बोर अयते पेनदा मनकल, ओर पेनदा पोल्लें केंजतोर. गानि मिमेट पेनदा मनकालोर आयिर, अदुनहाटी मिमेट अव पोल्लेन केंजसेक हिल्लिर,” इंचि येसु इतोर.

येसु सतता बारमते आनि अब्राहामुना बारमते वळ्ळकंतोर

48 अस्के यहूदिल्लक, “निमे सामरियातोन आदिन, नीकुन देय्यम पीता, इंचि इनानयते, मोमोट इनानद निजमे गदा?” इंचि येसुन पूसकीतुर.

49 अस्के येसु ओर्क इल्हा जवाब हीतोर, “नाकुन देय्यम पिया हिल्ले. नना नावा बाबाना कदर कीतन, गानि मिमेट नावा कदर कीसेक हिल्लिर.

50 नाकु कदर दोर्कना इंचि नना बस्केने इनकुनोन, गानि नाकु कदर दोर्कना इंचि इनानोर वरोर मंतोर. ओर न्यायम कियानोर आंदुर.

† 8:48 सामरियातोन मुन्नेटा कालमते इच्चुर यहूदिल्लक यहूदि आयबोरतोन मरमि आतुर. ईर लोकल्लक यहूदिरि आनि यहूदि आयबोरि इक्का रीति-रिवाजिं पीसि ताकुंदुर. ओर ईरु पुटतोर अंतोर सामरिया एरियाते मनुंदुर. ईरकुन यहूदिल्लक सिन्ना जातिंतोर इंचि इट्टुर.

51 नना निजम-निजम वेहासेक, बोरे आथिर नना कराहता पोल्लेनपोर्रो ताकानय्ते, ओर बस्केने हामुरतुन ह्ळोर,” इंचि इत्तोर.

52 इदुन केंजसि यहूदिल्क, “नीकु निजमे देय्यम पीता इंचि इंदके माकु एपाट आता. अब्राहाम आनि पेनदा कबुरतोरगुडा हातुर, आनि निमे, ‘बोर आथिर, नना वेहता पोल्लेनपोर्रो ताकानय्ते, ओर बस्केने हामुरतुन ह्ळोर’ इंचि वेहातिन.

53 मावा एनकटा पेदुदा मातरल अब्राहामगुडा हातोर, निमे ओनकन्ना पेदुदोना? पेनदा कबुरतोरगुडा हातुर. नीवद निमे बोन आंदिन इंचि इनकुंचतिन?” इंचि येसुन पूसकीतुर.

54 येसु ओर्क इल्हा जवाब हीतोर, “नावद ननाने कदर कीकुल्ले, अद कदरक बतले विल्लुवा मननो. गानि बोन अय्ते मिमेट, ‘मावा पेन आंदुर’ इंचि इतिरो, ओरे नावा बाबाल आंदुर, ओरे नाकु कदर हीसंतोर.

55 गानि मिमेट ओन एपाट किथिर, नना ओन एपाट कीतन. ननागिंटा, ‘ओन नना एपाट किथ्योन,’ इंचि इनानय्ते, ननागुडा मीलेसी आबदुदम वळ्कानोन आंतन. गानि नना ओन एपाट कीतन, ओना पोल्लेनपोर्रो ताकंतन.

56 नना वायना रोजुन ह्ळंतन इत्ता आसेते, मीवा एनकटा पेदुदा मातरल अब्राहाम, कूस मत्तोर. पजा अद रोजुन ह्ळसि ओर वेल्लेन कूस आतोर,” इंचि इत्तोर.

57 पजा यहूदिल्क, “निमे अब्राहामुन ह्ळतिना? नीकु अय्ते एबै वसांगुडा हिल्लें!” इंचि येसुन पूसकीतुर.

58 अस्के येसु, “नना निजम-निजम वेहासेक, अब्राहाम मातरल पुट्टका मुन्नेटाले नना मत्तन,” इंचि इत्तोर.

59 इद पोल्ले पोर्रोटाल, ओन बंडाने तंचि ह्ळकना इंचि अंतोर बंडां परेतुर. गानि येसु ओर्क दिसाकोटा मक्किस् गुळिताल पेथ्मि होतोर.

9

पुटतस्केटाल कळ्क दिस्वोंक येसु दिस्सानाल कीतोर

1 हरपीसि होननेके-होननेके येसु, पुटतस्केटाल कळ्क दिसवोर वरोर मनकन ह्ळतोर.

2 अस्के सिस्युल्कु, “गुरु, ईर इल्हा गुड्डिगा पुट्टालय कारनम बतल आंद? ईर पापम कीताहेंका इल्हा पुट्टोरा मरि ईना तल्लुर-बाबो पापम कीताहेंकाना?” इंचि येसुन पूसकीतुर.

3 अस्के येसु ओर्क इल्हा जवाब हीतोर, “ईर पापम कीताहेंकानो मरि ईना तल्लुर-बाबो पापम कीताहेंकानो ईर गुड्डिगा पुट्टा हिल्लोर. गानि ईनाहेंदाल पेनदा ताकत दिस अरना इंचि ईर इल्हा गुड्डिगा पुटतोर.

4 नाकुन लोहतोना कबाह्कुन मनम, पोळ्द होनाका मुन्नेन महापीता. बोरे कबळ किया पस्स असोप्टद नर्का वायनद मंता.

5 गानि नना इद दुनियाते मत्तचोनजेम दुनियातोरहाटी नना वेळ्सी आसि मंनंतन,” इंचि वेहतोर.

6 पजा ओर बूमिपोर्रो उस्कतोर, उस्किसि आ उच्चुलतोनि बुर्दा तयार कीसि आ बुर्दातुन आ गुड्डोना कळ्कुंक होकतोर.

7 होकसि, “निमे सिलोम सेरचुनगा होंचि कळ्कुन नोर्कुन,” इंचि येसु आ गुड्डोन इत्तोर. अस्के ओर गुड्डि होंचि कळ्कुन नोरतस्के, ओना कळ्क दिसालय दल्गतां. अस्के ओर मल्सि वातोर.

8 पजा ओना पका पीसीतोर, मुन्ने ओन बिचचोम तल्कनेके ह्ळतोर, इंदके ओन ह्ळसि, “उदुदिस बिचचोम तल्कसेक मनुंदुर, ओर ईर मनकल गदा!” इंचि वरोंक-वरोर पूसकियालय दल्गत्तुर.

9 इचुर लोक्कुलक, “हो, ईर ओरे आंदुर,” इत्तुर. इकिचुर बारे, “आयोर रो! ओनसंतोर इंकावरोर आंदुर,” इंचि इत्तुर. गानि आ मनकल, “हिल्ले, ओन ननाने आंदुर,” इंचि इत्तोर.

10 अस्के ओर लोक्कुलक, “अय्ते नीवा कळ्कुन बोर दिस्सानाल कीतोर?” इंचि ओन पूसकीतुर.

11 अस्के आ मनकल, “येसु पोरोलतोर वरोर मनकल बुर्दा कीसि, ना कळ्कुंक होकतोर, होकसि, ‘सिलोम सेरचुने कळ्कुन नोर्कुन,’ इंचि इत्तोर. होंचि नोरतन अय्ते, नावा कळ्क दिसालय दल्गतां,” इंचि ओर जवाब हीतोर.

12 लोक्कुलक, “आ येसु बगा मंतोर?” इंचि पूसकीतस्के, “नाकु एर्का हिल्ले,” इंचि आ मनकल इत्तोर.

येसु बेस कीता गुड्डिन पारिसिल्क चौकसि कीतुर

13 पजा आ लोक्कुलक, मुन्ने गुड्डि मत्ता मनकन पारिसिल्कुनेके पीसि ओतुर.

14 येसु बद रोज अय्ते बुर्दा कीसि, कळ्क दिसवोना कळ्कुंक होकसि कळ्क दिस्सानाल कीतोर, अद रोज नोमकेम मत्ता.

15 तत्तस्के, आ मनकन, “नीवा दिसवा कळ्क बल्हा दिसालय दल्गतां?” इंचि पारिसिल्कगुडा पूसकीतुर. अस्के आ मनकल, “ओर नावा कळ्कुंक बुर्दा होकतोर, पजा होंचि नोरतस्के, नावा कळ्क दिसालय दल्गतां,” इंचि इत्तोर.

16 ओर वेहतद केंजसि इच्चुर परिसिल्क, “ओर मनकल नोमकेम रोञ्जुन नोमा हिल्लोर, अदुनहाटी ओर पेनदागटाल वायाहिल्लोर,” इंचि इत्तुर. इंकिच्चुर बारे, “गानि वरोर पापि मनकल इसंटा अदुबतामाता चिन्ह बल्हा हृप्सा परंतोर?” इंचि इत्तुर. इल्हा ओरद-ओर्के अर्राका ओर रोंड गेंक आतुर.

17 पजा परिसिल्क आ गुड्डितनमताल बेस आता मनकन, “ओर नीवा कळ्कुन बेस कीतोर, अय्ते मिमे ओना बारेमते बतल इतिन?” इंचि इंकुदि मल्का पूसकीतुर. अय्ते आ मनकल, “ओर वरोर पेनदा कबुरतोर आंदुर,” इंचि इत्तोर.

18-19 आ मनकल गुड्डिड मतोर, इंदके मर्रा ओना कळ्क दिसालय दल्गतां, इत्ता पोल्लेतुन यहूदि पेदुदाल्क इदवेरादाका गुडा नम्मा हिल्लुर. अदुनहाटी ओर आ मनकना तल्लुर-बाबोन केयतुर. केय्ति, “ई मी मर्रांना? पुट्टस्केटाल गुड्डिडा पुटतोर इंचि मिमेट इतिर? अय्ते मरि ईर इंदके बल्हा ह्ळा परसंतोर?” इंचि पूसकीतुर.

20 अस्के ओना तल्लुर-बाबो, “ईर मावा मर्रा आंदुर, ईर पुट्टनेकेन गुड्डिडा पुटतोर, इद माकु एरपाटे.

21 गानि इंदके ईर बल्हा ह्ळा परसंतोर मोरु तेळियो, इंका ईन ह्ळानाल बोर कीतोर मोरु तेळियो. इंदके ईर सतता बारेमते वळ्कनलायक आतोर, मिमेट ओने पूस कीम्पु, ओरे वेहंतोर!” इंचि इत्तुर.

22 यहूदि पेदुदाल्कुंके वेरियसि ओना तल्लुर-बाबो अल्हा इत्तुर. बारित्ते येसुए किरिस्तु आंदुर इंचि बोर अय्ते ओप्कुंतोर, ओन दर्मासात्रम कराहना लोताल पेचाहमळ जर्गता, इंचि ओर मुन्नेन उंदि आसि मत्तुर.

23 अदुनहाटीगे आ तल्लुर-बाबो, “इंदके ईर सतता बारेमते वळ्कनलायक आतोर, मिमेट ओने पूस कीम्पु,” इंचि इत्तुर.

24 अदुनहाटी परिसिल्क, गुड्डिटनमताल दिस्सानाल आता मनकन मसंदि मल्का केय्ति, “ई मनकल पापि इंचि माकु एर्के, अदुनहाटी पेनदुक कदर हीम,” इंचि इत्तुर.

25 अस्के गुड्डिटनमताल दिस्सानाल आता आ मनकल, “ओर मनकल पापि आंदुरो, आय्योरो नाकु एका हिल्ले. गानि मुन्ने नाकु कळ्क दिस्साकौंदु, इंदके दिसंतां, इद मात्रम नाकु एका,” इंचि इत्तोर.

26 अयना परिसिल्क मर्रा ओन, “ओर नीकुन बतल कीतोर? ओर नीवा कळ्क दिस्सानाल बल्हा कीतोर?” इंचि पूसकीतुर.

27 अय्ते गुड्डिटनमताल दिस्सानाल आता आ मनकल, “दीनकन्ना मुन्नेन नना मीकु वेहतन, गानि मिमेट केंजा हिल्लिर. अय्ते मर्रां-मर्रां बारि पूस कीसतिर? मीकुगुडा ओना सिस्युल्क आयानद मंतना?” इंचि इत्तोर.

28 अस्के परिसिल्क, “निमेन ओना सिस्युन आदिन, मोमोट मूसाना सिस्युल्कुम आंदुम.

29 पेन मूसानतानि वळ्कता इंचि माकु एरपाट मंता. गानि ई मनकल बगाटाल वातोर? माकु बतले एरपाट हिल्ले,” इंचेके ओन तेराहत्तुर.

30 पजा आ मनकल इल्हा वळ्कालय दल्गतोर, “इद वेल्लेन इचंत्रम आयना पोल्ले आंद. ओर बगाटाल वातोर मीकु बतले एरपाट हिल्ले. अय्नागानि ओर मात्रम नावा दिसुवा कळ्कुन दिस्सानाल कीतोर.

31 पेन पापि मनकालोरा पोल्लेतुन केंजो, गानि बोर अय्ते दान मोळ्कसेक दाना इच्चा परकारम ताकंतोर ओना पोल्लेतुन मात्रम पेन केंजंता, इंचि मनाकु एरपाट मंता.

32 इद दुनिया पुट्टस्केटाल अय्ते इदवेरादाका, वरोर मनकल, पुट्टनेकेन गुड्डिडा पुटतोरना कळ्कुन दिस्सानाल कीतोर इत्ता पोल्ले मनम बस्केने केंजा हिल्लोम.

33 ईर मनकलगिंटा पेनदागटाल वातोर आयाकोटे, इसोंटव बवे कबाहक किया परा कोन्नेर,” इंचि ओर्के वेहतोर.

34 इव पोल्लें केंजसि परिसिल्क, “निमे अय्ते पुरागा पापमते पुट्टिस-बेरस्तोन आदिन. निमे माकु कराहतिना?” इंचेके आ मनकन पेचाहचि गेदुमत्तुर.

निजम गुड्डिडक बोर?

35 आ मनकन पेचाहचि गेदुमत्तुर इंचि येसु केंजतोर. केंजसि, आ मनकंक कलियसि, “निमे मनकना रूपमते पुट्टोन पोर्रो विस्वासम इरतिना?” इंचि ओन पूसकीतोर.

36 अय्ते आ मनकल, “नना ओनापोर्रो विस्वासम इरनाहाटी ओर बोर आंदुर, नाकु वेहा सामि!” इंचि येसुन पूसकीतोर.

37 अस्के येसु, “निमे ओन हळ्तिन, ओर नीतानि इंदके वळ्कसंतोर,” इंचि वेहतोर.

38 इद पोल्ले केंजसि, “नना विस्वासम कीतन सामि,” इंचि ओर येसुना काल्क मोळ्कतोर.

39 अस्के येसु, “नना इद दुनियाते न्यायम कियालय वातन. गुड्डिडक कळ्क दिस्सागोटालय आनि बोर अय्ते, ‘मोमोट अनि ह्ळा परंतोम’ इनकुंतुर, ओर्के ओर गुड्डिडक इंचि हृप्सालय नना वातन,”* इंचि इत्तोर.

40 अगा मचि ओना इव पोल्लें केंजता इच्चुर परिसिल्क, “अय्ते मोमोटगुडा गुड्डिडक इतिना मरि?” इंचि पूसकीतुर.

41 अस्के येसु, “मिमेटगिंटा गुड्डिडर्क आयानय्ते मिहगा पापम मना कोनवळ. गानि मिमेट, ‘मोमोट बेस ह्ळा परंतोम’ इतिर. अदुनहाटी मीलोप्पो पापम मय्सि मनंता,” इंचि वेहतोर.

10

बेसता मेहानोर येसे आंद

1 येसु इल्हा वळ्कालय दलगतोर, “नना निजम-निजम वेहासेक, बोर अय्ते गॉरेना पोदिते होळियनेके, गलमाताल होळियका ग्रे पोरॉटाल दुनकिसि होळियंतोर, ओर दोंगल आनि दोसकुनानोर आंदुर. 2 गानि बोर अय्ते गलमाताल होळियंतोर, ओर गॉरे मेहानोर आंदुर.

3 गॉरे मेहानोनहाटी गलमातगा कावेल कीसेक मनानोर गिल्कोम तेंडांतुर. गॉरे ओना लेंग केंजंतां. ओर ओना गॉरेन उंद-उंदाना पोरोल पीसि केय्सि, अबुन पलाते ओतोर.

4 अन्नि गॉरेन पलाते ओसि, ओर अबुना मुन्ने-मुन्ने दांतोर. गॉरे ओना पज्जो-पज्जो दांता. बारित्ते अव ओना लेंगुन एरपाट कीतां.

5 गानि एरपाट हिलवोना पज्जो अव होन्नों, ओनागटाल लक्कु वित्तंतां. बारित्ते अव ओना लेंगुन एरपाट किय्यो,” इंचि ओर्क वेहतोर.

6 येसु इद उदाहरन लोकलकुंक वेहतोर. गानि येसु बदुना बारेमते वळ्कतोर इत्तद ओर्क अर्तम आयाहिल्ले.

7 अदुनहाटी येसु मसंदि मल्का ओर्क इल्हा वेहतोर. “नना निजम वेहासेक केंजट, गॉरे होळियाना गलमा ननेन आंदुन.

8 नाकन्ना मुन्ने वातोर अंतोरे दोंगाल्क, दोसकुनानोर आंदुर. गानि गॉरे ओरा पोर्लें केंजा हिल्लें.

9 गलमा ननाने आंदुन. बोर अय्ते नहगटाल लोप्पो नेंगंतोर, ओन नना पिसागोटंतन. ओर लोप्पो-पलाते होनुळ-वायुळ कीतोर, तिनालय ओन्क मेता दोर्केंता.

10 दोंगाल्क सिराप दोंगा किय्यालय, हळ्कालय, नासडेम किय्यालये वांतुर. गानि नना नावा गॉरेकु पिस्वर हियालय वातन. अदगुडा पुरागा पिस्वर हियालय वातन.

11 बेस मेहानोन ननाने आंदुन. बेस मेहानोर, गॉरेनाहाटी ओर ओना जीवा हीतोर.

12 गानि ब्रूतिक मेहालय वातोर, ओर निजम मेहानोर आयोर. मेहनेके ओन्क तोडेल्लिगिंटा दिस्सानय्ते, गॉरेन अग्गेन होळसि बेकेनो वित्तंतोर. बारित्ते अव गॉरे ओनव आयो. अस्के आ तोडेल्लि वासि गॉरेन पोरॉ अरंता आनि गॉरे बारे सिल्लर-सिल्लर आंता.

13 ओर ब्रूतिक वातोर इंचि अल्हा वित्तंतोर. ओन्क गॉरेना पिकिर हिल्ले. अदुनहाटी ओर वित्तंतोर.

14-15 गानि नना बेस मेहानोन आंदुन. बल्हा अय्ते बाबाल नाकुन एरपाट कीतोर, नना बाबान एरपाट कीतन, अल्हेन नावा गॉरेन नना एरपाट कीतन, अव नाकुन एरपाट कीतां. नना नावा गॉरेनाहाटी जीवा हीतन.

16 इद पोदिदतव आयवा गॉरेगुडा नहगा मंतां. नाकु अबुनगुडा तरानद मंता, अवगुडा नावा लेंग केंजंन. अस्के अन्नि उंदे मंदा आसि मंतां आनि अबुना मेहानोरगुडा वरोरे मनांतोर.

17 नना हासि मर्रा जीवाते तेदंतन इंचि नना नावा जीवा हीसंतन, इदुनहाटीगे नावा बाबाल नाकुन वेल्लेन पावरम कीतोर.

18 नावा जीवातुन नहगटाल बॉरे तेंडकुन्नुर, नावा जीवातुन नना कुदूदे हीतन. नावा बाबाल नाकु आदेस हीताहेका नावा जीवातुन हियनद, हीसि मर्रा मल्लिस तेंडकुनना अदिकारम नाकु मंता,” इंचि येसु इत्तोर.

19 इव पोल्लेनहेदाल मसंदि मल्का यहुदिल्क वरोनद वरोंक अर्राका वेंरे-वेंरे आतुर.

20 ओराव्टेटाल वेल्लेटोर, “ओन्क देय्यम पीसि ओर पिस्सल आतोर, मिमेट ओना पोर्लें बारि केंजातिर?” इंचि इत्तुर.

21 गानि इच्चुर बारे, “इव पोर्लें देय्यम पीतीनां आयो. देय्यम बस्केनना कळ्क दिसवोना कळ्कुकुन दिस्सानाल किया परंतना?” इंचि इत्तुर.

यहुदिल्क येसुना विरोद कीतुर

22 पीनि कालम वासि मल्ता. येस्सलेम सहरते गुळिते होळियाना हानुक* इनना पंडुगु मत्ता.

23 अय्ते गुळितगा येसु सुलेमान इनना पंदिरतगा तिरियसेक मत्तोर.

24 अस्के, इच्चुर यहुदि लोकलकुंक येसुना सट्टु आसि, “निमे इका बच्चुं रोजकु माकुन मर्ममते इरंतिन? निमे गिंटा किरिस्तुन आयानय्ते माकु कुल्ला-कुल्ला वेहा,” इंचि पूसकीतुर.

* 10:22 हानुक इत्ते, वेल्गुल्लुना पंडुगु इंचि अर्तम. इद पंडुगु बारि कीतुर इत्ते, एनकटा कालमते वेंरे-वेंरे देसेलकुनोर अद गुळितुन अगविर कीसि मत्तुर. गानि मसंदि मल्का गुळितुन पवित्र कीसि, किरिस्तु पुरटका मुन्ने 165 वा वसाति अद गुळिते पवित्र कबाहकुन सुख्व कीतुर. इदुने हानुक इत्तुर.

25 अस्के येसु ओर्क इल्हा जवाब हीतोर, “नना मीकु मुन्नेन वेहतन, गानि मिमेट नम्मा हिल्लिर. नावा बाबाना पोरोल्ले नना कियना कबाहके नावा बारेमते गवाइ वेहचंतां.

26 गानि मिमेट नावा गौरैना मंदातोर आथिर. अदुनहाटी मिमेट नापोरौ विस्वासम कीसेक हिल्लिर.

27 नावा गौरै नावा लैगुन केजंतां. नावा गौरैन नना एरपाट कीतन, अव नावा पज्जो-पज्जो वांतां.

28 नना अवुंक बस्केळक पिस्सना पिस्वर हीतन, अव बस्केने नासडेम आयौ, नावा कयदाल अवुन बोरै गुंजकुना परौर.

29 बारित्ते अवुन नाकु, नावा बाबाल हीतोर. नावा बाबाल अंटोरकन्ना पेदूदोड आंदुर. अदुनहाटी बाबाना कयदाल अवुन बोरै गुंजकुना परोर.

30 बाबल, नना मोमोट इव्वुरोम उंदे आंद,” इंचि इत्तोर.

31 अस्के मरुदि मल्का यहदिल्लक येसुन हक्कालय बंडां पेरतुर.

32 अय्ते येसु, “नावा बाबाल नाकु वेहताप नना वेल्लेन बेसता कबाहक मीकु कीसि ह्पिस्तन. अय्टेडाल बद कबळहाटीं नाकुन बंडाने तनालय हळसतिर?” इंचि ओर्कुन पूसकीतोर.

33 अस्के ओर, “निमे कीता बेसता कबाहकुनाहाटीं नीकुन बंडाने तन्नोम. गानि निमे पेनदा अपमानम कीतिन. अचोने आयका निमे मनकन आसिगुडा नीवद निमे पेन इंचि वेहकुंतिन, अदुनहाटीं मोमोट नीकुन बंडाने तंतोम” इत्तुर.

34 अस्के येसु ओर्क इल्हा जवाब हीतोर, “मीवा मूसाना नियमते, ‘मिमेट पेनकु आदिर इंचि नना इत्तन,’ इंचि इचचुर लीडकुंन पेन इत्तद, रासि हिल्लेना?❖ मंता.

35-36 दर्मासात्रम बस्केने तप्पु वेहो. ओक्कला, पेन दाना पोल्ले, बोर्क-बोर्क अय्ते दोर्कतनो, ओर्कुन पेनकु इंचि इत्तय्ते, नाकुन बाबाल पेरसि इद दुनियाते लोहचीतस्के, ‘नना पेनदा मर्रिन’ इल्हा इंचि इत्ते, नना पेनदा अपमानम कीतन इंचि मिमेट बल्हा इतिर?

37 नावा बाबाल कियना कबाहक नना कियार्कोटे, नाकुन नम्मट.

38 गानि नना अव कबाहकुन कीतन इंचि, नाकुन नम्मकोन्ना, नना कियना कबाहकुनपोरौ अयना विस्वासम इरंट. अस्के, बाबाल ना लोप्पो, नना बाबाना लोप्पो मंतोम इंचि मीकु तेळियार,” इंचि येसु इत्तोर.

39 अस्के ओर मरुदि मल्का येसुन दोर्बा पियालय हळतुर, गानि ओर ओरा कयदाल तपिचकुंचि अगटाल होत्तोर.

40 येसु मर्रा योर्दन बेरैटा हळ्बेरा, बगा अय्ते मुन्ने येहान बापतिस्मा हियुंदुर, अदे जेगाते हौंचि अग्गेन मत्तोर.

41-42 अस्के ओनगा वेल्लेन मंदि वासि, “बापतिस्मा हियना योहान इचत्रम आयनव बवे कबाहक किय हिल्लोर. गानि ई मनकना बारेमते ओर बतल अय्ते वेहतोरो, अव अन्नि निजम आतां,” इंचि ओरद-ओरे वळ्कालय दल्गतुर. पजा अगा वेल्लेन मंदि येसुनपोरौ विस्वासम कीतुर.

11

येसुना दंतगाड लाजर हांतोर

1 लाजर पोरोलतोर वरोर मनकल बिमार अर्सि मत्तोर. ओर ओना मरियम आनि मार्ता इनना अक्काहकुनतोनि बेतानि इनना नाटे मनुंदुर.

2 मुन्ने उंदि मल्का उंदि मुरतळ, सामिना काल्कुंक अत्तर निय होकसि दाना केल्लुने उसुमता, अद इदे मरियम आंद. ई बिमार अरता लाजर दाना तम्मुर आंदुर.

3 अदुनहाटी अव रौड अक्काहक, “सामि, नीवा पावरमगल्लोड वरोर, बिमारते मंतोर,” इंचि येसुंक कबुर लोहांतां.

4 अद कबुर केजसि येसु, “लाजस्क अद बिमारि ओन हळ्किसि ओयालय वाया हिल्ले, गानि पेनदा पेदातनमतुन हुप्सालय वाता. इदुनहेंदाल पेनदा मर्रिक कदर दोर्कार,” इंचि इत्तोर.

5 येसुंक मार्ताल, दाना अक्कल आनि लाजर ईर इत्ते पावरम.

6 लाजर बिमारते मंतोर इत्ता कबुर तेळियिनागानि येसु बद नाटे अय्ते मत्तोर, अदे नाटे इंका रौड रोजकु आगतोर.

7 पजा येसु, “वट, मनम यहदिया राज्येम मल्लिसि दाकोम,” इंचि ओना सिस्स्युल्लुकुन इत्तोर.

8 गानि सिस्स्युल्लुक, “रब्बी, कोन्नि रोजकु मुन्नेन अगट्टा यहदि पेदूदालक नीकुन बंडाने तंचि हक्कालय हळतुर. अयना निमे मर्रा अग्गेन दांतिना?” इंचि येसुन इत्तुर.

9 अस्के येसु, “पोदूदाला पन्नेड गंटां मन्नोंगां? ई वेलाते ताकानोर दुनियाता वेलगुन हळ्सेक ताकतोर, इंचि ओना काटुक बतल दल्गो ओर हिळ्ळु अररौ.

10 गानि नर्काटा वेलाते ताकानोना लोप्पो वेलगु मन्नो, अदुनहाटी ओना कादुक बतलन्ना दल्लिगसि ओर हिल्लु अर्रा परंतोर,” इंचि ओर्क वेहतोर.

11 इव पोल्लें आता पजा मर्रा येसु, “मना दंटागाड लाजर निद्रा होत्तोर, गानि ओन नना निद्रताल तेहालय दांतन,” इंचि सिस्स्युकुन इत्तोर.

12 अस्के सिस्स्युक, “सामि, ओक्कला ओर निद्रा होंचि मनानयते बेस आंतोर,” इंचि इत्तुर.

13 येसु लाजरना हामुरता बारेमते वळ्ळतोर. गानि सिस्स्युक अयते लाजर निजम निद्रा होंचि आराम कीसंतोर इंचि इनकुत्तुर.

14 अदुनहाटी येसु ओर्क, “लाजर हासोत्तोर,” इंचि कुल्ला-कुल्ला वेहतोर.

15 वेहचि, “हासोत्तस्के नना ओनगा मना हिल्लेन. इद मीहाटीगे जर्गता, इंचि नना कूस मंतन. दीनहेंदाल मिमेट नापोर्रो विस्वासम कीकिट. वट! इंदके मनम ओनगा दाकोम,” इंचि इत्तोर.

16 अस्के, “दट! येसुनतोनि हायालय मनमगुडा दाकोम,” इंचि एमडालकुनाल वरोर तोमल इनना सिस्स्युड कळ्ळमता सिस्स्युकुन इत्तोर.

हातोर्कुनगुडा जीवा अरहना ताकत येसुनगा मंता

17 बेतानि नाटे एवत्तस्के, लाजरन्न बौदाते ताससि नाल्लु रोजकु आता, इंचि येसुकु तेळियता.

18 बेतानि नार येस्सलेम सहरताल दग्गेर-दग्गेरा मूड किलो मीटर्क लक्कु मंता.

19 तम्मुर हासोत्ताहेंका वेल्लेन दुक्कमते मनना मार्ता आनि मरियमुंक दैरनेम हियालय वेल्लेत्तोर यहुदिल्क वासि मत्तुर.

20 येसु वासंतोर इंचि मार्ताकि तेळियतस्के ओन्क कलियालय अद एदुर होत्ता. गानि मरियम मात्रम लोने मत्ता.

21 मार्ताल येसुक कलियसि, “सामि, निमे गिंटा इगे मंचि मत्ते, नावा तम्मुर हायाकोन्नेर.

22 गानि इंदके अथना बतल आयो. निमे पेनदुन बतल तल्कते अद, नीकु पेन हीता, इंचि नाकु एरपाट,” इंचि इत्ता.

23 अस्के येसु, “नीवा तम्मुक मर्रा जीवा अर्रता,” इंचि इत्तोर.

24 पजा मार्ताल, “हो सामि, हातोर अंटोर्क जीवा अर्रना आकिरता रोजुने, ओर मर्रा जीवाते तेदानुर इंचि नाकु एरपाट मंता,” इंचि इत्ता.

25 अद केंजसि येसु, “हातोर्कुन तेहानोन आनि पिस्वरतुन ननाने आंदुन. नापोर्रो विस्वासम कीतोर, हायिनागानि मर्रा जीवाते तेदांतुर.

26 जीवाते मननेके नापोर्रो विस्वासम इर्रनोर अंटोर्क बस्केने हामुर वायो. इद पोल्लेतुन निमे नम्मतिना मार्ता?” इंचि दान पूसकीतोर.

27 अस्के अद, “हो सामि, पेनदा मर्रिन निमेन आदिन, इंचि नना नम्मंतन. इंका इद दुनियाते वायना मत्तोर किरिस्तुनगुडा निमेन आदिन,” इंचि इत्ता.

28 इच्चोन वळ्ळिसि अद अगटाल पेय्सि होंचि, दाना अक्कल मरियमुन सपुडदाका पक्कक केयता. केय्सि, “गुरु वातोर, ओर नीकुन केयसंतोर,” इंचि वेहता.

29 मार्ताना पोल्ले केंजता केंजमळे मरियम बिराना तेदसि येसुनगा होत्ता.

30 येसु इंका नाटे होळिया हिल्लोर. मार्ताल ओन्क बगा अयते कलियतनो, अदे जेगाते मत्तोर.

31 मरियमुंक दैरनेम हियालय दानतोनि लोते बोर अयते मत्तुरो, आ यहुदिल्क मरियमुन कुस्कुने तेदसि होननेके हळ्ळसि, “अद लाजरना बौदातगा होंचि अळता बारे,” इन्कुंचि ओरगुडा दाना पज्जेन होत्तुर.

32 येसु मत्ता जेगातगा मरियम एवसि, ओन हळ्ळता. हळ्ळसि ओना काल्कुनपोर्रो अरसि, “सामि, निमे इगे मंचि मत्ते ना तम्मुर हायाकोन्नेर,” इंचि इत्ता.

33 मरियम आनि दानतोनि वातोर अंटोर यहुदिल्कुना अळ्ळ हळ्ळसि, येसुकु बादा अनपिस्ता. मनसुने ओर वेल्लेन दुक्कमते मत्तोर.

34 पजा येसु, “ओन मिमेट बगा इरतिर?” इंचि पूसकीतस्के, “वासि हळ्ळा सामि!” इंचि इत्तुर.

35 हळ्ळसि येसु अळतोर.

36 अस्के यहुदिल्क, “हळ्ळट, लाजर इत्ते ओन्क बच्चोन पावमो!” इंचि इत्तुर.

37 गानि इच्चुर लोकुल्क, “इर मनकल, वरोर गुडिंडेक कळ्ळ दिस्सानाल कीतोर अयते, लाजरन्न हामुरताल कापाळा पराकोन्नेरा?” इंचि इत्तुर.

हासोत्ता लाजरस्क येसु जीवा अरहंतोर

38 येसुकु मर्रंदे मल्का मनसुने बादा अनपिस्ता. पजा ओर लाजरना बौदातगा होत्तोर. अद बौदा उंदि पडालेह्का मत्ता. दाना सर्रैक अड्डम उंदि बंडा दोळ्ळिसि मत्ता.

- 39 पजा येसु, “अद बंडातुन तेंडट,” इंचि इत्तोर. गानि हासोत्तोना अक्कल मार्ताल, “सामि, ओर हासि नालुं रोजकु आसता. अदुनहाटी ओना सेत्ता इरगा गब्बु पीसि मंदगोम!” इंचि इत्ता.
- 40 अस्के येसु, “निमे विस्वासम कियानय्ते पेनदा महिमातुन हळकिन, इंचि नना नीकु वेहा हिल्लेना?” इंचि दान इत्तोर.
- 41 अदुनहाटी ओर आ बंडातुन तेंडतुर. पजा येसु पोर्रो हळसेक, “बाबा, निमे ना पारतना केंजताहाटी, नीकु दन्यवाद.
- 42 निमे बस्केळ्के नावा पारतना केंजतिन इंचि नाकु एरके. गानि नाकुन निमेन लोहतिन इत्तादुन, ना सुट्टु निलसि मत्ता लोकुल्क नम्मुगोम इंचि ओराहाटीगे नना ई पोल्ले वळ्कतन,” इंचि इत्तोर.
- 43 इल्हा वळ्किसि येसु, “ए लाजर, पलातुक पेय्मि वा!” इंचि लगांचि केयतोर.
- 44 अस्के हासोत्ता लाजर पलाते वातोर, अस्के ओना कय्क-काल्क हामुर कपिडते हट्टिस मत्तां, ओना मोकोमगुडा उंदि सेल्लाते हट्टिस मत्ता. पजा येसु, “ओना कट्टुकु लेहिचि ओन होना हीम्टु,” इंचि इत्तोर.

येसुन हळ्कालय यहदिल्क पिलान कीतुर
(मत्तयाल 26:1-5; मरकुस 14:1-2; लूकाल 22:1-2)

- 45 येसु कीता अद कबळतुन हळसि, मरियमुनगा वाता यहदिल्कुनाल वेल्ले मंदि यहदिल्क, येसुन नम्मुतुर.
- 46 गानि ओराव्हेटाल इच्चुर लोकुल्क मात्रम, परिसिल्कुनगा होंचि येसु बतल-बतल कीतोर अदुन वेहतुर.
- 47 अदुनहाटी पेर्मांलोकं, परिसिल्क कलियसि उंदि पेद्दा पंचादि उपिस्तुर. उपिच्चि, “ओर मनकल अय्ते वेल्लेन अद्बूतामाता चिन्हां कीसि ह्पिचंचंतोर. अय्ते मनम बतल कीकोम?
- 48 ओर कियानदुंनता मनम इल्हेन हळसेक मत्ते, अंतोर ओने नम्मिसि ओन राजाल कीतुर. पजा ओर समकारता सिपाइल्क वासि मना गुळितुन, मना लोकुल्कुन नासडेम कीसि पोहांतुर,” इंचि वळ्कतुर.
- 49 ओरव्हे वरोर कयपाल इनानोर मत्तोर. अद वर्सा ओर पेद्दा पेर्मांल मत्तोर. ओर, “मीकु बतले तेळियोना!
- 50 देसेमता अंतोर लोकुल्क नासडेम आयनदानकन्ना, लोकुल्कुनाहाटी वरोर मनकल हाते, बेस आयोना!” इंचि इत्तोर.
- 51-52 सिराप यहदि लोकुल्कुना पायदाहाटीगे आयो गानि, पूरा दुनियाते बेके-बेकेनो सिल्लर आसि मत्ता पेनदा लोकुल्कुन उंदि कियालय, येसु ओना जीवातुन हीतोर इत्ता पोल्लेतुन ओर वेहतोर. इद पोल्ले ओर ओना सतता विचारमताल वळ्का हिल्लोर, गानि अद वर्सा ओर पेद्दा पेर्मांल मत्तोर इंचि बविस्यवानि कीतोर.
- 53 इल्हा अद रोजुनाल येसुन हळ्कालय यहदि पेद्दाल्क पिलान कीतुर.
- 54 अदुनहाटी येसु अस्केटाल यहदिल्कुन नड्डुम अंतोर्क दिस्सेक वेलियाकोंदुर. पजा ओर येस्सलेम सहर होळसिसि बय्लि जेगाक दग्गेर मनना एप्राइम इनना नार होत्तोर. होंचि अगा ओना सिस्युल्कुनतोनि मनालय दल्गतोर.
- 55 अस्के यहदिल्कुना दाटसि होनना पंडुगु दग्गेर्क एवसि मत्ता. अदुनहाटी ओरा सततुन सुद्द कीकुनना रिवाज कियालय पंडुगुंनना मुन्नेन वेल्लेन लोकुल्क नाहकुनाल येस्सलेम होत्तुर.
- 56 ओर अंतोर येसुन प्हकसेक मत्तुर. गुळिते नित्तिसि, “मीकु बतल अनपिच्चेक, ओर ई पंडुगुनाहाटी वांतोरा, वायोरा?” इंचि वरोर्क-वरोर पूसकियुंदुर.
- 57 अचोने आयका पेर्मांलोकं, परिसिल्क, येसुन दोर्का पियनाहाटी, “येसु बगा मंतोर इत्ता संगति बोर्कन्ना तेळियते, माकु वासि वेहाट हळ्वाट!” इंचि आदेस हीसि मत्तुर.

12

बेतानिया नाटे मरियम येसुक अत्तर निय होकंता

- 1 दाटसि होनना पंडुगुंनना हांर रोजकु मुन्नेन येसु बेतानिया इनना नाटे एवतोर. येसु बोन अय्ते हामुरताल जीवाते तेहतोरो आ लाजर ई बेतानियातेन मसुंदुर.
- 2 अगा येसुनाहाटी नर्कटा गाटो तयार कीतुर. मार्ताल गाटो वाटता. लाजरगुडा गाटो तिनानोरोतिन उदुदिस मत्तोर.
- 3 अस्के मरियम, जटामासि इनना मराता एक्को दराता सगोम लीटर अत्तर निय तच्चि, येसुना काल्कुनपोर्रो वळियता. वळियसि, दाना केल्लुने ओना काल्कुन उसुमता. अस्के अद नियदा गब्बु लोनांता विचचका होत्ता.
- 4-5 गानि ओना सिस्युल्कुनाल इस्कारियोत नाटेनोर यहदल इननोर वरोर मत्तोर. ई यहदले पज्जो, येसुन दोकाते पीसि हियानोर आंदुर. ओर, “अर्रेरे! ई अत्तर नियदुन मूड न्हुकुना एंडि स्पेक* अम्मिसि, आ स्पेन गरिब लोकुल्कुंक हियानायोना?” इंचि इत्तोर.

* 12:4-5 एंडि स्पेक एंडि एंडि स्पेता विल्ला, दग्गेर-दग्गेरा उंदि रोजुना कलितचो मत्ता. इगे मूड न्हुकुना स्पे इत्ते, वरोर मनकना एडादिमेळता कृति आंता.

6 ओन्क गरिब लोकुकुकुना पर्वा मंता इंचि अल्हा इना हिल्लोर. गानि ओना दोंगा बुदिदहेंदाल, ओनगा कोत्तना संचि मननेके, आ संचिते वाटता कोत्तानाल ओर दोसकुनुंदुर. अदुनहाटीगे ओर अल्हा वळकतोर.

7 अस्के येसु, “नना हायना रोजु दगोर एवताहाटी नाकुन तयार कियालय अदुन होळसीम.

8 गरिब लोकुकुक बस्केळक मीतोने मनांतुर, गानि नना मीतोनि बस्केळक मनोन,” इंचि इत्तोर.

9 अचचोटोन येसु अगा मंतोर इंचि तेळियतस्के, वेल्लेन यहुदि लोकुकुक, सिराप येसुन ह्ळालये आयो गानि, येसु हामुरताल जीवाते तेहता आ लाजस्नगुडा ह्ळालय अगा होत्तुर.

10-11 ई लाजस्नहेंकेन वेल्लेन मंदि यहुदिल्क ओर्कुन होळसि येसुनपोरों विस्वासम इरतुर, अदुनहाटी पेद्दा पेर्मालोर लाजस्नगुडा हक्कना पिलान कीतुर.

येसु वेल्लेन कदरते येस्सलेम सहरते होळियंतोर

(मत्तयाल 21:1-11; मरकुस 11:1-11; ल्काल 19:28-40)

12-13 इंकुंदि रोजु, येसु येस्सलेम वासंतोर इंचि, पंडुगंक वाता लोकुकुकुक तेळियता अयते, वेल्लेन मंदि लोकुकुक कजूर मराकुना कोम्मना-कोम्मां पीसि ओन्क कलियालय एदुर होत्तुर. होंचि, “होसन्ना!† सामिना पोरोल्ते वायना इसाएलता राजाना वेल्लेन दन्यवाद आयि, जय जोहार!” इंचि मोत्कतुर.

14-15 दर्मसास्त्रमते रासि मत्ता पोल्ले पूरा आयगोम इंचि येसु उंदि लेय्या गाडदि पोरो उदिदस सहरतेके वासेक मत्तोर. दर्मसास्त्रमते रासता पोल्ले इल्हा मंता:

“सियोनता लोकुकुकुनिटा‡ वेरियमटु, ह्ळोट, मीवा राजाल गाडदि पोरो उदिदस वासतोर.”*†

16 इव गटमां जर्गनेके येसुना सिस्थलुकुक बतले तेळिया हिल्ले. गानि येसु हामुरताल जीवाते तेदसि महिमाते स्वर्गम होत्तस्के, जर्गता अन्नि गटमां, दर्मसास्त्रमते रासि मत्तापे जर्गतां, लोकुकुकगुडा ओनतोन अल्हेन कीतुर. इंचि ओर्क अर्तम आता.

17 येसु लाजस्न बोंदाताल केय्पि जीवा अरहतदुन ह्ळता लोकुकुक, ओर ह्ळतदुना बारेमते गवाइ वेहतुर.

18 येसु ई अदुबतामाता चिन्ह हुपिस्तोर इंचि लोकुकुक केंजतुर, अदुनहाटी ओर ओन्क कलियालय होत्तुर.

19 पजा परिसिल्क, “मना पिलानकु बता कबळक ओज्जा हिल्लें. ह्ळोट, पूरा दुनियंता ओना पज्जो अरसि होंचंता,” इंचि ओरद-ओरे वळकालय दलगतुर.

येसु ओना हामुरता बारेमते वेहांतोर

20 पंडुगुने मोळकालय वाता लोकुकुकुनाल इचचुर युनानि लोकुकुकS मत्तुर.

21 ओर गालिल राज्येमाता बेतसेदा नाटेना, पिलिपनगा वासि, “महाराज, माकु येसुन कलियाना मंता,” इंचि इत्तुर.

22 इद पोल्ले पिलिप, अंदरियल इनानोंक वेहतोर. पजा पिलिप आनि अंदरियल इचचुर कलियसि येसुक वेहातुर.

23 अस्के येसु इल्हा वेहालय दलगतोर, “मनकना रूपमते पुटतोन नना, इंदके नावा महिमातुन हुपसना वेला दगोर्क एत्ता.

24 नना निजम-निजम वेहासेक, वजि पेडे बूमिंते अरिसि हासोन्नाकोटे अद उंदे मंनता. गानि अद हासोचि मोल्का वाते मात्रम पेद्दा बेरिसि वेल्लेन पेडेकुन तयार कीता.

25 अल्हेने, बोरे आयिर! इद दुनियाते ओर ओना जीवातुन पावरम कीतोर, ओर ओना जीवातुन पोळगोटकुंतोर. गानि बोरे अयते इद दुनियाते ओना जीवाता पर्वा किययोर, ओर ओना जीवातुन बस्केळक पिस्सना पिस्वरहाटी कापाळसि ईरंतोर.

26 बोरे नावा सेवा कीतन इंतोर, ओर नावा पज्जो ताकना. बारित्ते नना बगा मंनंतोने, अगा नावा सेवा कियानोरगुडा मना पीता. अल्हेने बोरे नावा सेवा कीतोर, नावा बाबाल ओन्क कदर हीतोर.

27 इंदके नावा जीवा तकलिपते मंता. नना बतल इंदकन? बाबा, इद तकलिपता वेलाताल नाकुन तप्सा, इंचि इंदकना? इनोन. बारित्ते नना इद वेलाहाटीगे वातन.

28 बाबा! नीवा पोरोल्क निमेन कदर हीम,” इंचि येसु इत्तोर. अल्हा इतस्के स्वर्गमताल उंदि अल्किर, “नना नावा महिमाता कदरतुन दीनकन्ना मुन्ने हीतन, मरां इंका हीतन,” इंचि केंजावाता.

29 अद अल्किरतुन केंजसि अगा नितिसि मत्ता इचचुर लोकुकुक, “मब्बु उस्मसंता रो!” इंचि इत्तुर. इंचिचचुर बारे, “आयो, पेनदा दूता ओनतोन वळकता,” इंचि इत्तुर.

30 अस्के येसु, “अद अल्किर नाहाटी आयो, मीवाहाटी वाता.

31 इंदके इद दुनियाता न्यायम कियना वेला एवता. इद दुनियापोरों राज्येम कियना अदिकारिन पलाते पेचाहचि गोदमना वेला इंदके वाता.

† 12:12-13 होसन्ना दीना असल अर्तम मुन्ने “कापाळा” मत्ता. गानि इंदके ई पोल्तेता वापर पेनदा स्तुति कियालय कीतुर. ‡ 12:14-15 सियोनता लोकुकुकुनिटा येस्सलेमाता लोकुकुकुनिटा. * 12:14-15 जकर्याह 9:9 § 12:20 चुनानि लोकुकुक ग्रीक लोकुकुक.

32 बस्के अय्ते नाकुन ब्रुमिताल पोरोळ्ळक तेहमळ जर्गतनो, अस्के अंतोर्कुन नाहेके इङ्कुतन,” इंचि इल्लोर.

33 इल्हा वळ्ळिकसि येसु, ओन्क बसोंटा हामुर वायनद मंता इल्लदुन वेहतोर.

34 अस्के लोकुल्लक, “किरिस्तु बस्केळ्ळक जीवातेन मनंतोर, इंचि मोमोट मूसाना नियमते केंजतोम. अय्ते, मनकना रूपमते पुटतोन ब्रुमिताल पोरोळ्ळक तेहांतुर, इंचि निमे बल्हा वेहा परंतिन? ई मनकना रूपमते पुटतोर बोर आंदुर?” इंचि येसुन पूसकीतुर.

35 अस्के येसु, “वेलगु मीतोनि इंका जेरासेप मनंता. हीकट मीकुन मुच्चका मुन्नेन, वेलगुने मिमेट ताकसेके मंट. बारित्ते हीकटते ताकानोर, ओर बगा दांतोर ओनद ओन्के तेळियो.

36 मीकु इद वेलगुना संतानम आयानद मल्ले, मिहगा वेलगु मननेकेन मिमेट दानपोरो विस्वासम ईरट,” इंचि येसु ओर्क वेहतोर. वेहचि ओर्क दिसाकोटा ओरागटाल होल्लोर.

यहुदिल्लक येसुनपोरो विस्वासम ईर

37 लोकुल्लकुना मुन्ने येसु वेल्लेन अद्रुबतामाता चिन्हें कीतोर. अयना ओर लोकुल्लक येसुनपोरो विस्वासम इरा हिल्लुर.

38 दीनहेंदाल, यसायाह इनना पेनदा कब्रुतोर, एनकटा रासता पोल्ले, पुरागा आता. अद पोल्ले इल्हा मल्ला: “सामि! मोमोट वेहता कब्रुतुरन बोर नमतुर? पेनदा ताकततुन बोर्क हुपिचमळ जर्गता?”*

39 ओर विस्वासम इरा पराहिल्लुर. बारित्ते, यसायाहल इंकुंदि जेगाते इल्हा रासतोर:

40 “ओर ओरा कळ्ळुकुन दिसाकोटा कीतोर आनि ओरा मनसुन बंद कीतोर. अदुनहाटी ओर कळ्ळुकुने हळा परसेक हिल्लुर, मनसुनाल ओर्क तेळियसेक हिल्ले. दीनहेंदाल ओर नाहेके तिरियुर, नना ओर्कुन बेस किय्योन.”*

41 यसायाहल येसुना महिमातुन हळताहेकेन ओना बारेमते ओर इव पोल्लें वेहतोर.

42 अयनागानि वेल्ले मंदि यहुदि अदिकारिल्लक येसुनपोरो विस्वासम इरतुर. अन्टे यहुदि पेद्रुदालकगुडा मल्लुर. गानि परिसिल्लुकुंक तेळियते, ओर्कुन दर्मसास्त्रम कराहना लोते होळिया हिच्युर इला वेंरेक, ओर कुल्ला-कुल्ला ओपुक्नाकोंदुर.

43 बारित्ते, ओराहाटी पेनदाहेंदाल दोर्कना कदरकन्ना, लोकुल्लकुनहेंदाल दोर्कना कदरे ओर्क एक्को पावरम.

44 अस्के येसु वरगोय्शि, “बोर अय्ते नापोरो विस्वासम इरतोर, ओर सिराप ना पोरिन आयो गानि, नाकुन लोहचीतोन पोरोगुडा विस्वासम इरतोर.

45 अल्हेन बोर अय्ते नाकुन हळांतोर, ओर नाकुन लोहचीतोनगुडा हळांतोर.

46 नापोरो विस्वासम इरनेर ओर बोरे आथिर, हीकटते मनानायो, इंचि नना इद दुनियाते वेल्लुनेल्लेका वातन.

47 बोरे आथिर, ओक्कला नावा पोल्ले केंजसिगुडा अचुन परकारम ताकाकोट, ओना न्यायम नना किय्योन. बारित्ते नना इद दुनियाते न्यायम किय्यालय वाया हिल्लेन, गानि इद दुनियातोर्कुन पिसागोटलय वातन.

48 बोर अय्ते नाकुन हय्साका नावा पोल्लेन पिच्योर, ओना न्यायम कियनाहाटी वेंरे उंदि मंता. अद नना मीकु कराहता पोल्ले आंद. आकिर रोचुननाड ओना न्यायम नावा पोल्ले किय्यार.

49 बारित्ते नना नावा मनसुंक वाताप वळ्ळा हिल्लेन, गानि नना बतल वळ्ळकना, बतल वेहना, इंचि नाकुन लोहचीता बाबाले नाकु आदेस हीतोर.

50 ओना आदेस बस्केळ्ळक पिस्सना पिस्वरताहेके ओता इंचि, नाकु एका मंता. अदुनहाटी बाबाल नाकु बल्हा वेहना इंचि वेहतोर, अल्हेन नना मीकु वेहचंतन,” इंचि ओर्क वेहतोर.

13

येसु ओना सिस्युल्लकुना काल्क नोरतोर

1 इद दुनियातुन होळसि पेनबाबानगा मल्लिस होनना वेला दमर्गेक एला इंचि, येसुंक दाटसि होनना पंडुगुंक्ना मुन्नेन तेळियता. इद दुनियाते मनना ओना लोकुल्लुकुन ओर वेल्लेन पावरम कीतोर. अचोने आयाका अद पावरमतुन आकिरदाका ओरपोरो हुपिचचेकेन मल्लोर.

2 येसु, ओना सिस्युल्लक नर्कटा वेलाते गाटो तिनालय उदुदिस मल्लुर. गानि गाटो तिन्नका मुन्नेन देय्यम, इस्कारियोत नाटेना सिमोन इनानोना मर्रि यहुदन लोप्यो वासि, येसुंक दोका हियालय ओन एक्किसता.

3 पेनबाबाल अन्नि अदिकाराल्लक येसुना कय्दुक हीतोर, इंका ओर पेनदागटाल वातोर, पेनदागेन मल्लिस दांतोर इल्लद अन्नि ओन्क एरपाटे मल्ला.

4 अदुनहाटी ओर गाटो तिनालय उदुदिस मल्लागटाल तेदतोर. तेदसि, केरसि मल्ला अंगितुन तेंडतोर. तेंडसि उंदि सेल्लातुन नडिक हुटतोर.

5 पजा उंदि गमेल्लाते एर पीसि सिस्युल्कुना काल्क नोरसेके, नडिक हटसि मत्ता सेल्लाते उस्मालय दल्गतोर. 6 अल्हा कीसेके ओर सिमोन पन्ननगा वातोर. अस्के पन्नु, “निमे नावा काल्क बारि नोरसंतिन सामि?” इंचि येसुन पूसकीतोर.

7 अस्के येसु, “नना कियानद नीकु इंदके अर्तमायो, गानि मुन्ने-मुन्ने नीके तेळियार,” इंचि इत्तोर.

8 पजा पन्नु, “निमे नावा काल्क बस्केने नोरमा,” इंचि इत्तोर. अस्के येसु, “ननागिटा नीवा काल्क नोरकांटे, निमे नावोन आया परिन,” इंचि वेहतोर.

9 अस्के सिमोन पन्नु, “अथे सिराप नावा काल्के आयो, नावा कय्कुन, नावा तल्लातुनगुडा नोरर सामि!” इंचि इत्तोर.

10 पजा येसु, “बोर अथे एर तुंगतोर, ओर बेस साप मनंतोर. ओर सिराप काल्क नोरकुत्ते साल्. अल्हेन मिमेट बेस साप मतिर, गानि मिहागटाल अंतोर बेस साप हिल्लिर,” इंचि वेहतोर.

11 ओन्क दोका हियानोर बोर इंचि, ओन्क एपाट मत्ता. अदुनहाटी ओर, “मिहागटाल अंतोर बेस साप हिल्लिर,” इंचि इत्तोर.

12 ओरां अंतोरा काल्क नोरमळ आता पजा, येसु अंगि केरसि, मुन्ने उद्दिस मत्ता जेगाते होंचि उद्दोर. उद्दिस इल्हा वळ्कालय दल्गतोर, “नना मीकु बतल कीतन, मीकु अर्तम आतना?”

13-16 मिमेट नाकुन गुरु, सामि इंचि केयंतोर. नना गुरु, सामिन आंदुन, अदुनहाटी मिमेट इनानद बरोबरे. नना गुरुन, सामिन आसिगुडा मीवा काल्क नोरतन. अथे मिमेटगुडा वरोना काल्क वरोर नोरसेके सेवा कियना. नना मीकु निजम-निजम वेहासेक, वरोर दासि मनकल ओना मालकुंकनना पेद्दा आयोर. अल्हेन वरोर कबुरतोर ओन लोहतोनकनना पेद्दा आयोर. नना बल्हा अथे कीतनो, अल्हेन मिमेटगुडा कियना इंचि, इद उंदि उदाहरन हूपिस्तन.

17 इंदके इव पोल्लें मीकु तेळियतां. अदुनहाटी मिमेट इवुन पीसि ताकतिरित्ते, पेन मीकु आसिवांद हीता.”

येसु ओन्क दोका हियानोना बारेमते कुद्दु वेहांतोर

(मत्तयाल 26:20-25; मरकुस 14:17-21; लुकाल 22:21-23)

18 “नना मी अंतोरा बारेमते वळ्कसेक हिल्लेन. नना बोर्कुन अथे पेर्कुत्तन, ओरा बारेमते नाक बेस एपाट. गानि, ना हारि तित्तोरें नाकु अड्डम आतोर, इल्हा दर्मसास्त्रमते रासि मत्ता पोल्ले पुरागा आयना इंचि इल्हा जर्गपीता.

19 इल्हा जर्गतस्के, ओन ननाने आंदुन, इंचि मिमेट विस्वासम कियनाहाटी, इव पोल्लें जर्गका मुन्नेन मीकु वेहासेक मंतन.

20 नना निजम-निजम वेहासेक, नना लोहतोन, बोर अथे स्विकार कीतोर, ओर नाकुन इंका स्विकार कीतोर. नाकुन स्विकार कियानोर, ओर नाकुन लोहचीतोनगुडा स्विकार कीतोर,” इंचि येसु इत्तोर.

21 इव पोल्लें वळ्कड आतस्के येसुंक मनसुने बादा अनपिस्ता. पजा ओर, “नना निजम-निजम वेहासेक, मीवा लोपोटाल वरोर नाकुन दोकाते पीसि हीतोर,” इंचि इत्तोर.

22 येसु बोना बारेमते वळ्कतोरों इंचि तेळियका, सिस्युल्क वरोना मोकोम वरोर हळ्कुत्तोर.

23 येसुना सिस्युल्कुनाल येसु बोन अथे पावरम कियुंदुरो, ओर येसुना दग्गेरेन उद्दिस मत्तोर.

24 अथे सिमोन पन्नु, “येसु बोना बारेमते इंचंतोरों पूस कीम,” इंचि ओन्क कय सयगे कीतोर.

25 अस्के आ सिस्युड इंचिचो येसुनेके जर्गिसि येसुना रोमबोच्चेतगा तला इरसि, “ओर बोर आंदुर सामि?” इंचि पूसकीतोर.

26 अस्के येसु, “नना ई हारि तुकडातुन कुसिटे मुळ्हाचि बोनकथे हीतन, ओर आंदुर,” इंचि जवाब हीतोर. पजा हारि तुकडातुन कुसिटे मुळ्हाचि इस्कारियोत नाटेना सिमोनना मारि यहुदांक हीतोर.

27 यहदल हारि तुकडा एतता एतमळे, ओन देय्यम पीता. अस्के येसु यहदुन, “निमे कियनद बतलो, अद बिराना कीम,” इंचि इत्तोर.

28 गानि येसु ओन अल्हा बारि इत्तोर इत्ता संगति मात्रम अगा तिनालय उद्दिस मत्तोर्कुंक बोर्के अर्तम आयाहिल्ले.

29 कोत्तना जोरा यहदानगेन मनुंद, अदुनहाटी पंडुगुंक अक्सरम मत्ता बतलन्ना सामान अस्सि तर्रांलय वेहतोर बोर, इंचि इच्चुर इनकुत्तोर. इंचिचुर बोर, अवेटाल इच्चुं गरिब लोकलकुंक हीम इंचि वेहतोर आंद, इंचि इनकुत्तोर.

30 पजा यहदल हारि एत्कुंचि, बिराना पत्ताते होत्तोर. अस्के वेल्लेन नर्का आसि मत्ता.

येसु ओना हामूरता बारेमते वळ्कंतोर

(मत्तयाल 26:31-35; मरकुस 14:27-31; लुकाल 22:31-34)

31 यहदल पत्ताते होत्तस्के, येसु इल्हा वेहालय दल्गतोर. “मनकना रूपमते पुटतोंक नाकु, महिमा दोर्कना वेला इंदके एत्ता. नाकु जर्गना अन्निटवुनहेंदाल पेनदुक महिमाता कदर दोर्कार.

32 नावाहेंदाल पेनदुक महिमाता कदर दोर्कानथे, पेन नाकु दाना कदर हिथ्यार. अद आल्सेम कियाकांटा बिरानेन हीता.

33 नावा पिलाल्कनित्ता! नना इंका गडसेम मीवातोनि मंनंतन. पजा मिमेट नाकुन पहककिर. यहुदिलकुना पेद्दाल्कुंक, नना बगा दांतन, अगा मिमेट वाया परिर, इंचि बल्हा नना वेहतनो, अल्हेन मीकुगुडा वेहचंतन.

34 अदुनहाटी नना मीकु उंदि पूना आदेस हीसंतन, मिमेट वरोंक-वरोर पावरम कीम्ट. नना मीकून बल्हा पावरम कीतन, अल्हेन मिमेटगुडा वरोंक-वरोर पावरम कीम्ट.

35 मीवा वरोनद वरोर पावरम कियमळतुन हळसि, मिमेट नावा सिस्युल्क आदिर, इंचि अंटोर लोक्कुंक तेळियसि दांता,” इंचि येसु वेहतोर.

36 पजा सिमोन पत्रु, “निमे बेके दांतिन सामि?” इंचि पूसकीतोर. अत्ये येसु, “नना होनानगा, निमे इंदके वाया परिर. गानि नना होतंतका पज्जोटाल वाकिन,” इंचि इत्तोर.

37 गानि पत्रु, “इंदके नना नीतोनि बारि वाया परीन सामि? नीवाहाटी नना नावा जीवा हियालयगुडा तयार मंतन,” इंचि इत्तोर.

38 अस्के येसु, “बतल! निमे नावाहाटी जीवा हीतिना? नना नीकु निजम-निजम वेहासेक, निमे मूड मल्कां, नाकुन एरपाट कियोन, इंचि इंदकिन, अस्केन गोगोड कूसार,” इंचि इत्तोर.

14

पेनबाबानहेके होनना हरि येसुए

1 इंका येसु, “मिमेट मीवा मनसुन कस्टमते वाटमट. पेनदापोर्री विस्वासम इरंट, इंका ना पोरोगुडा विस्वासम इरंट.

2 नावा बाबाना लोते वेल्लेन अर्री मंतां. ओक्कला हिलाकोटे मंचि मत्ते, मीवाहाटी जेगा तयार कियालय होंचंतन इंचि, नना मीकु वेहचि मननेन.

3 नना होंचि अबुन सदूरतंका, मल्लिस वासि मीकून ओतन. अस्के नना मनानगेन, मिमेटगुडा मंदकिट.

4 नना होनना हरि अत्ये मीकु एर्का मंतां,” इंचि सिस्युल्कन इत्तोर.

5 अस्के तोमल, “निमे बेके होंचंतिनो माकु अत्ये एरपाटे हिल्ले सामि! असोर्टस्के, माकु नीवा होनना हरि बल्हा तेळियंता?” इंचि इत्तोर.

6 पजा येसु, “हरि, सत्तेम, आनि पिस्वर ननाने आंदुन. नाकुन होळसि बाबानगा बोरे एव्वा परोर.

7 नना बोन आंदुन, इंचि मिमेट एरपाट कीसि मत्ते, नावा बाबान इंका मिमेट एरपाट कीसि मननेर. इंदकेटाल मिमेट ओन एरपाट कीतिर, ओन हळतिरगुडा,” इंचि वेहतोर.

8 अस्के पिलिप, “सामि, माकु बाबान हुपिस्ते, अचोने सालु,” इंचि येसुन इत्तोर.

9 अस्के येसु ओन्क इल्हा वेहतोर, “नना इच्चुं रोजकुनाल मीवातोने मंतन, अयना निमे नाकुन एरपाट किया हिल्लिना पिलिपु? नाकुन हळतोर, ओर बाबान हळतोर. अयना, माकु बाबान हुप्सा, इंचि निमे बल्हा इंचंतिन?

10 नना बाबाना लोप्पो, बाबाल नावा लोप्पो मंतोर. इदुन निमे विस्वासम कीसेक हिल्लिना? नना वेहना पोल्ले ना इच्चटा नना वेहसेक हिल्लेन, गानि नावा लोप्पो मनना नावा बाबाल, ओना कबाहकुन नाहेंदाल कीकुंचंतोर.

11 नना बाबाना लोप्पो, बाबाल नावा लोप्पो मंतोर इत्ता पोल्लेपोर्री मिमेट विस्वासम इरंट. हिलाकोटे नना कियना कबाहकुनहेंदाल अयना नाकुन विस्वासम कीम्ट.

12 नना मीकु निजम-निजम वेहासेक, बोरे अत्ये नाकुन नमंतोर, ओरगुडा नना कियनसोटा कबाहक कियानुर. अचोने आयका नना कियना कबाहकुंकनना पेद्दा-पेद्दा कबाहक कियानुर. बारित्ते नना नावा बाबानाहेके होंचंतन.

13 अदुनहाटी, मिमेट नावा पोरोल्ले बतल तल्किना, नावा बाबांक महिमा वायानाहाटी नना अदुन कीतन.

14 ओक्कला मिमेट ना पोरोल्ले बतल तल्किना, अद नना कीतन.”

पवित्र आत्मा हीतन इंचि येसु पोल्ले हीतोर

15 “मिमेटगिंटा नाकुन पावरम कीति, नना वेहता आदेसकुन पीसि ताकट.

16 अस्के नना बाबांक विनंति कीतन. बाबाल मीवाहाटी बस्केळ्ळक मीवातोनि मनालय इंकावरोर सहायम कियानोन हीतोर.

17 आ सहायम कियानोर इत्ते, पवित्र आत्मा मीकु सत्तेमतुन हुप्संता. दुनियातोर दानहेके हळसेक हिल्लुर, दान एरपाट कीसेक हिल्लुर. अदुनहाटी अद दुनियातोरके दोर्का. गानि मिमेट दान एरपाट कीतिर. बारित्ते अद मीवातोनि मंता आनि पजा मीवा लोप्पेन मननार.

18 नना मीकून दिक्कु हिलवोरलेहका होळसि होन्नोन, नना मिहगा मल्लिस वांतन.

19 इंका कोन्नि रोजकु आता पज्जो, दुनियातोर नाकुन हळा पसर, गानि मिमेट नाकुन हळा परकिट. बारित्ते नना जीवातेन मंनंतन, मिमेट इंका जीवातेन मंदकिर.

20 अल्हा जर्गतस्के, नना बाबाना लोप्पो, मिमेट ना लोप्पो, नना मीलोप्पो मंतन इंचि मीकु तेळियार.

21 बोर अय्ते नना वेहता आदेसकुन स्विकार कीसि अवन पीसि ताकंतोर, ओर नाकुन पावरम कियानोर आंदुर. बोर अय्ते नाकुन पावरम कीतोर, ओन नावा बाबालगुडा पावरम कीतोर. पजा ननागुडा ओन पावरम कीसि, नना कुद्दु ओन्क दिस अरकन,” इंचि येसु वेहतोर.

22 पजा इक्कारियोत नाटेनोर आयका, इंकावरोर यहदल, “सामि, निमे माके बारि दिस अरकिन? दुनियातोकुक बारि दिस्सिन?” इंचि पूसकीतोर.

23 अस्के येसु ओन्क जवाब हीतोर, “नाकुन पावरम कियानोर अंतोर नना वेहता पोल्लेनपोरी ताकंतुर, आनि नावा बाबाल ओर्कुन जीवा कीतोर. असंटोनागा मोमोट होंचि ओनालोप्पो जेगा पीतोम.

24 नाकुन पावरम कियवोर, ओर नावा पोल्लेनपोरी ताकोर. मिमेट केंजना पोल्ले नावां आयों, गानि नाकुन लोहचीता बाबानव आंदु.

25 इव पोल्ले नना मीवातोनि मननेकेन वेहतन.

26 अय्नागानि, बाबाल नावा पोरोल्ते लोहना सहायम कियानोर, इत्ते पवित्र आत्मा, मीकु अन्नि पोल्ले करहार. अचोने आयका, नना मीकु वेहता अन्नि पोल्ले अद मीकु मति कीसि हिय्यार.

27 नना मीकु सांतितुन हीसि होंचंतन. दुनिया हियानसोटा सांति आयो, गानि नना नावा सांतितुन मीकु हीसंतन. अदुनहाटी मिमेट मीवा मनसुन कस्टमते वाटमट, वेरिया हियमट.

28 नना लक्कु होंचंतन, गानि मरी तिरियसि मीहेके वांतन, इंचि नना मीकु वेहचि मत्तन, अदुन मिमेट केंजतिरे गदा! अय्ते, मिमेट नाकुन निजम पावरम कियानय्ते, नना बाबानाहेके होंचंतन इंचि वेहतस्के मिमेट कूस आसि मंदकित. बारिल्ले बाबाल नाकन्ना पेद्दोड आंदुर.

29 इव अन्नि पोल्ले निजम आयनुं अस्के, मिमेट विस्वासम कियगोम इंचि, नना इव पोल्ले जर्गका मुन्नेन वेहतन.

30 इंका मीतोनि एक्को वळ्कोन. बारिल्ले दुनियापोरी राज्येम एलाना अदिकारि वासेकेन मंतोर. वासि अयना नावापोरी ओन्क बतले अदिकारम हिल्ले.

31 अयना, नना बाबान पावरम कीतन इत्ता पोल्ले, दुनियाक तेळियगोम इंचि, बाबाल नाकु हीता आदेस परकारमे नना कीतन. सेरे तेदत! मनम इगेटाल दाकोम,” इंचि येसु इत्तोर.

15

येसु वेलितसंतोर, विस्वासुक पंगानसंतोर

1 येसु इल्हा वेहतोर. “निजम अंगुर वेलितसंतोन ननाने आंदुन. नावा बाबाल बारे अंगुर तोटातुन बेस हळुकुनानोर आंदुर.

2 नावा पंगानाल बव पंगांक अय्ते कायां हादोंगो, अवन ओर नरक्रिस पोहांतोर. आनि हादाना पंगान बारे, इंका बेस हादगोम इंचि अवनुना कोस्सन कत्रिचंचंतोर.

3 दीनकन्ना मुन्ने नना मीकु वेहता पोल्लेहेंदाल मिमेट साप आतिर.

4 मिमेट नावातोनि बस्केळक कलियसि मंतु, अस्के ननागुडा इंका मीवातोनि बस्केळक कलियसि मनंतन. पंगा वेलिक अंटिस मनाकोटे दान्क कायां हादों, अल्हेन मिमेटगुडा नावातोनि कलियसि मनाकोटे बेसता कबाहक किया परिर.”

5 “ननाने अंगुर वेलितसंतोन आंदुन, मिमेट बारे पंगानसंतोर आदिर. बोर अय्ते नातोनि कलियसि मनंतुरो, नना बोरतोनि कलियसि मनंतो, ओर वेल्लेन बेसता कबाहक कीतुर. नाहगटाल वैरे आसि मंचि, मिमेट बतले किया परिर.

6 बोर अय्ते नावातोनि कलियसि मनंतुरो, ओर्कुन कबळक ओज्जुवा पंगान पोहताप पोहचियमळ जर्गता. पजा अव पंगां वत्तुतस्के, अवन जमा कीसि तडमिटे वाटसि बोळसंतुर.

7 मिमेट ना लोप्पो आनि नावा पोल्ले मीलोप्पो मनानय्ते, मीकु गावाले मत्तद बतल तल्किना, अद मीवाहाटी कियमळ जर्गता.

8 मिमेट वेल्लेन बेसता कबाहक कियानय्ते नावा बाबांक वेल्लेन महिमा दोर्कता. दीनहेंदाल मिमेट नावा सिस्युल्क इंचि दिस अरतिर.

9 नावा बाबाल नाकुन बल्हा पावरम कीतोर, अल्हेन नना मीकुन पावरम कीतन. मिमेट नावा पावरमते निलसि मंतु.

10 नना नावा बाबाल वेहता आदेसकुनपोरी ताकसेके, ओना पावरमते निलसि मंतन. अल्हेन मिमेटगुडा नना वेहता आदेसकुनपोरी ताकतिरिल्ले, नावा पावरमते निलसि मनांतिर.

11 नावा कुसि मीलोप्पो मनना, आनि मीवा कुसि पुरागा आयना इंचि, नना मीकु इव पोल्ले वेहतन.”

12 “नना मीकुन बल्हा पावरम कीतनो, अल्हेन मिमेटगुडा वरोंक-वरोर पावरम कीकुट, इदे नावा आदेस आंदु.

13 वरोर मनकल ओना दंटागानाहाटी ओना जीवा हियमळकन्ना पेद्दा पावरम बद्दे आयो.

14 नना हियना आदेसकुनपोर्रो गिटा मिमेट ताकानय्ते, मिमेट नावा दंटातोर आंदिर.

15 इंदकेटाल नना मीकुन दासुल्क इंचि केयोन. बारित्ते मालक बतल कीतोर अद ओना दासुंक बतल तेळियो. गानि नना अय्ते मीकुन दंटातोर इंचि केयंतन. बारित्ते नावा बाबाल नाकु वेहता अन्नि पोल्ले मीकु वेहतन.

16 नाकुन मिमेट पेरा हिल्लिर, गानि मीकुन नना परेतन. परसि, मिमेट बेसता कबाहक कीसेक बेस पलम हियगोम, इंचि नना मीकुन निलाहतन. अल्हा कीते, मिमेट नावा पोरोल्ले बाबान बतल तल्किनागानि, अद मीकु दोर्कता.

17 मिमेट वरोक-वरोर पावरम कीकुट, इद मीकु नावा आदेस आंदु.”

दुनियातोर मीकुन हय्सुर

18 “ओक्कला दुनियातोर मीकुन हयसाकोटे, मीकनना मुन्ने ओर नाकुन हयसा हिल्लुर, इंचि मीकु एर्के.

19 मिमेट दुनियातोरक नच्चताप मनानय्ते, ओर मीकुन पावरम कीसि मन्नेर. गानि मिमेट दुनियातोरक नच्चताप मंचेके हिल्लिर. नना मीकुन इद दुनियाताल परेतन. अदुनहाटी दुनियातोर मीकुन हय्सुर.

20 वरोर दासुड ओना मालकुंकनना पेदुदोड आयोर, इंचि नना दीनकनना मुन्ने वेहता पोल्लेतुन मिमेट मति इर्कुट. ओर नाकुने तकलिप कीतुर अय्ते, मीकुनगुडा तकलिप कीतुर. ओर नावा पोल्ले परकारम ताकानय्ते, मीवा पोल्ले पोरोगुडा ताकंतुर.

21 नाकुन लोहचीतोन ओर एरपाट किय्युर, अदुनहाटी ओर मीकुन नावा पोरोलहाटी इव अन्नि तकलिप कीतुर.”

22 “उंदि वेला नना वासि ओरतोनि वळ्काकोटा मंचि मत्ते, ओरपोर्रो पापम मना कोनवळ. गानि इंदके मात्रम ओर्के ओरा पापमताल तपिचकुनालय हरि हिल्ले.

23 नाकुन हयसवोर, ओर नावा बाबान इका हयसोर.

24 वेरे बोर किया हिल्लोर असोटा, अदू बूतामाता कबाहक नना कियाकोटा मंचि मत्ते, ओरपोर्रो पापम मना कोनवळ. गानि इंदके ओर नना कीता अदू बूतामाता कबाहकुन हळसिगुडा, नाकुन, नावा बाबान हयसेक हिल्लुर.

25 नाकुन हयसाकोटा मनालय बतले कारनम हिलाकोन्ना ओर नाकुन हय्सुर, इंचि ओरा दर्मासन्त्रमते रासि मंता. अद पोल्ले पुरागा आयानाहाटीगे इल्हा जर्गता.

26 गानि बाबानाहेदाल नना लोहना सहायम कियानोर, इत्ते बाबानगटाल वायना सत्तेम आत्मा, बस्के अय्ते मिहगा वायार. अद मीकु नावा बारेमते गवाइ वेहंता.

27 नना सेवा सुस्व कीतस्केटाल मिमेट नातोनि मत्तिर, अदुनहाटी मिमेटगुडा नावा बारेमते गवाइ वेहंतिर.”

16

1 “मिमेट विस्वासमताल पजोळ्क आयामन्नि, इंचि मीकु इव पोल्ले वेहतन.

2 विस्वासम कियवा पेदुदाल्क मीकुन दर्मासन्त्रम कराहना लोहकुनाल पेचंत्तुर. इका मीकुन हळ्कना हरेक मनकल, नना पेनदा सेवा कीसंतन, इंचि इनकुनना कालम वायाना मंता.

3 बाबाल आनि नना बोर आंदुम, ओर्के तेळियो, अदुनहाटी ओर मीकुन अल्हा कीतुर.

4 अद कालम वातस्के, नना वेहता पोल्ले मीकु मति वायाना इंचि, इव पोल्ले नना मीकु वेहचंतन. इव पोल्ले नना मीकु मुन्ने वेहा हिल्लेन, बारित्ते नना मीतोने मत्तन.”

पवित्र आत्माता कबाहक

5 “नना अय्ते इंदके नाकुन लोहतोनागा मल्सि होंचंतन. गानि निमे बगा दांतिन इंचि मीवा लोपोटाल वरोरगुडा नाकुन पूसकीसेक हिल्लिर.

6 नना इव पोल्ले मीकु वेहताहेका, मिमेट वेल्लेन दुन्नकमते मंतिर.

7 अयना नना मीकु निजम-निजम वेहासेक, नना मिहागटाल होल्ते, मीके पायदा आयार. बारित्ते नना होनाकोटे सहायम कियानोर मिहगा वायोर. नना होनानय्ते ओन मिहगा लोहंतन.

8 ओर वातस्के पापम बारेमते, सत्तेम बारेमते आनि न्यायम बारेमते लोकुल्कुन ओप्संतोर.

9 ओर नापोर्रो विस्वासम इर्का पापम कीतुर, इंचि सहायम कियानोर ओर्के हुप्संतोर.

10 नना बाबानाहेके होंचंतन, मर्रा मिमेट नाकुन हळ्ळा परिर. अदुनहाटी सहायम कियानोर सत्तेमता बारेमते लोकुल्कुंक तेळियागोदिसि वेहंतोर.

11 इका इद दुनियापोर्रो राज्येम एलाना अदिकारिना न्यायम अय्ते मुन्नेन आसि मंता. अदुनहाटी सहायम कियानोर न्यायमता बारेमते लोकुल्कुंक तेळियागोदिसि वेहंतोर.

12 मीकु वेहालय नहगा इका वेल्लेन पोल्ले मंतां, गानि अजुनंता इंदके ओर्सकुना परिर.

13 गानि सत्तेम आत्मा वातस्के, अद मीकु पूरा सत्तेमतुन हुप्सार. अद दाना मनसुंक वाताप वळ्को, गानि बतल अथे अद बाबानगटाल केंजता, अदे वेहंता. इंका मुन्ने जर्गना बारेमतेगुडा वेहंता.

14 अद नाहगटाल तेंडकुचि, वासि मीकु वेहंता. अल्हा कीसेके अद नाकु कदर हीता.

15 बव अथे बाबानवो, अव अन्नि नावां आंदु, अदुनहाटीगे, अद नाहगटाल तेंडकुचि, वासि मीकु वेहंता, इंचि नना मीकु वेहतन.

16 इंका जेरासेप आते, मिमेट नाकुन हळा परिर, पजा इंका जेरासेपुंक, मिमेट नाकुन मरां हळकिर,” इंचि येसु सिस्युल्कुंक वेहतेर.

दुक्कम कुसिते मारियंता

17 इद पोल्ले केंजसि, ओना इच्चुर सिस्युल्क वरोंक-वरोर पूसकीसेक, “इंका जेरासेप आते, मिमेट नाकुन हळा परिर, पजा इंका जेरासेपुंक, मिमेट नाकुन मरां हळकिर, बारित्ते नना बाबानगा दांतन, इल्हा मनाकु येसु बारि वेहचंतोर मरि?

18 इंका जेरासेप आते इनना पोल्लेक अर्तम बतल? असल ओर इनानद बतलो मनाकु अर्तमे आसेक हिल्ले,” इंचि वळ्कुकुनालय दल्यातुर.

19 सिस्युल्क ओन पूसकीतुर इंचि येसुंक तेळियता. अस्के येसु ओर्क इल्हा वेहतेर, “इंका जेरासेप आते, मिमेट नाकुन हळा परिर, पजा इंका जेरासेपुंक, मिमेट नाकुन मरां हळकिर, इत्ता नावा पोल्लेता बारेमते मिमेट वरोंक-वरोर बतां पूस कीकुंचितिर?

20 नना निजम-निजम वेहासेक, मिमेट मोल्कुचि-मोल्कुचि अळकिर, गानि दुनियातोर कुसिते मनातुर. मीकु दुक्कम वासि अळकिर, गानि मीवा दुक्कम कुसिते मारियंता.

21 उंदि मुरतळ दाना एरपूराणा वेला एवतस्के, नोपि वासि वेल्लेन दुक्कमते मनंता. गानि दान्क पेडालो-पेगिडो पुटतस्के, उंदि जीवा दानहेंदाल इद दुनियाते वाता इत्ता कुसिते, मुन्ने बोगांच्ता तकलिपकु मरां दान्क मतिगुडा मन्नों.

22 इदगुडा अल्हेन! इंदके दुक्कम वांता, गानि नना मीकु मरां कलियंतन अस्के, मिमेट वेल्लेन कूस आकिर. अद कुसितुन मिहागटाल बोरे तेंडकुना पसर.

23 अद रोज मिमेट नाकुन बदे तल्किर. गानि नना निजम-निजम वेहासेक, मिमेट नावा पोरोल्ते बाबान बतल तल्किनागानि ओर मीकु अदुन हीतोर.

24 इदवेदाका मिमेट ना पोरोल्ते बतले तल्का हिल्लिर. तल्कट मीकु दोकार, अस्के मीवा कुसि पूरा आथार.”

25 “इव पोल्ले नना मीकु उदाहरनकु हीसि वेहतन. गानि मुन्ने इंका बस्केने उदाहरनकु हीसि वेहोन. बाबाना बारेमते बल्हा मत्तद अल्हा कुल्ला कीसि वेहना वेला वायनद मंता.

26 अद रोज मिमेट नावा पोरोल्ते ओन तल्ककिट. अस्के नना मीवाहाटी बाबांक विनंति कीतन इंचि मीकु वेहासेक हिल्लेन.

27 बारित्ते मिमेट नाकुन पावरम कीतिर, नना पेनदागटाल वातन इत्ता पोल्लेतुन विस्वासम कीतिर, अदुनहाटी कुद्दु बाबाले मीकुन पावरम कीसंतोर.

28 नना बाबानगटाल इद दुनियाते वातन. इंदके मरां इद दुनियातुन होळसि बाबानाहेके होंचंतन,” इंचि येसु वेहतेर.

29 अस्के सिस्युल्क, “हळा! इंदके निमे उदाहरन हीसि वळ्कसेक हिल्लिन, कुल्ला-कुल्ला वळ्कसंतन.

30 नीकुन बोरे बतल पूसकियना अब्बरम हिल्ले. नीकु अन्नि तेळियंता इंचि माकु एकां मंता. दीनहेंदाल, निमे पेनदागटाल वातिन, इंचि मोमोट विस्वासम कीतोम,” इंचि येसुन इत्तुर.

31 अस्के येसु, “इंदके अथना मिमेट विस्वासम कीतिरा?

32 हळाट, नाकुन वरोने होळसि, मिमेट बेकेटोर हेके आसि बोना लोन ओर होनना वेला वायनद मंता, अद वासे मंता. अथना नना वरोन हिल्लेन, नातोनि बाबाल मंतोर.

33 नाहगटाल मीकु साति दोर्कि, इंचि इव पोल्ले मीकु वेहतन. दुनियाते मीकु तिप्पल्क-कस्टाल्क वाययुं, गानि नना दुनियाता ताकततुन गेल्सतन, अदुनहाटी मिमेट बेस देरनेमते मंटा,” इंचि येसु वेहतेर.

17

येसु सतताहाटी पारतना कीतोर

1-4 इव अन्नि पोल्ले वेंहमळ आतस्के, येसु पोरोर स्वर्गमताहेके हळसेक इल्हा पारतना कियालय दल्यातोर. “बाबा, अंतोर लोकुकुनपोरोर निमे नाकु अदिकारम हीतिन. दीनहेंदाल निमे बोर्कुन अथे नाकु हीतिनो, ओर्क अंतोर्क नना बस्केळ्क पिस्सना पिस्वर हीकन. निमे वरोने सत्तेम पेनदुन आदिन, बोर अथे नीकुन, निमे लोहता येसु किरिस्तुन एपाट कीतुरो ओर्के

आ बस्केळ्ळक पिस्सना पिस्वर दोर्कता. निमे नाकु बव कबाहक अय्ते कियालय हीतिनो, अवुन पुरागा कीसि, नना बूमिपोरें नीवा महिमा कीतन. इंदके नावा वेला एव्ता. अदुनहाटी निमे नाकु कदर हीते, नना नीवा महिमा कीतन.

5 बाबा, दुनिया पुट्टका मुन्ने नना नीतोनि मननेके बसोंटा महिमा मत्तानो, असोंटा महिमा इंदकेगुडा नी मुन्ने हीम.”

येसु ओना सिस्त्रुल्कुनाहाटी पारतना कीतोर

6 “ई दुनियाताल निमे नाकु हीता लोक्कुंकुंक, नना नीवा पोरोल्लतुन हुपिस्तन. ओर बस्केळ्ळक नीवोर्के आंदुर. ओर्कुन निमे नाकु हीतिन. ओर नीवा पोलेलेपोरें ताकतुर.

7 निमे बतल अय्ते नाकु हीतिनो, अव अन्नि निहेंदाले दोर्कतव इंचि इंदके ओर्क तेळियता.

8 बारित्ते बव पोलेलें अय्ते निमे नाकु हीतिनो, अवुन नना ओर्क एविचतन. ओर अवुन ओप्कुत्तुर. नना निजम निहागटाले वातन, नाकुन निमेन लोहतिन इंचि ओर विस्वासम कीतुर.

9 ईराहाटीगे नना पारतना कीसंतन. दुनियाताहाटी आयो. निमे बोर्कुन अय्ते नाकु हीतिनो, ओर नीवोरे इंचि ओराहाटीगे नना पारतना कीसंतन.

10 नहगा मनना अन्नि पोलेलें नीवंगें आंदुं, नीवां अन्नि पोलेलें नावां आंदुं, अवुनहेंदाल नाकु महिमा दोर्कता.

11 इंदकेटाल नना इद दुनियाते मनोन. नना निहगा वासंतन. गानि ईर ई दुनियाते मनंतुर. पवित्र बाबा! इंदके मनम उंदि आसि मत्ताप, ईरगुडा उंदि आसि मनालय, निमे नाकु हीता नीवा पोरोल्लता ताकतते ईरकुन कापाळा.

12 नना ई दुनियाते ईरतोनि मननेके, निमे नाकु हीता नीवा पोरोल्लता ताकतते ओर्कुन कापाळतन. सिराप, दर्मसास्त्रमते रासता पोलेले पूरा आयनाहाटी बोर अय्ते नासडेम आयना मत्ता ओन होळसि, वेरे बोरे नासडेम आया हिल्लुर, नना ओर्कुन कापाळतन.

13 नना इंदके निहगा वासंतन. गानि नावा आनंदम ओरा लोप्पो पुरागा आयना इंचि, इव पोलेलें नना इद दुनियाते मननेकेन वेहंतन.

14 नीवा पोलेले नना ईरकु वेहतन. नना इद दुनियातोण आयोन. अल्हेन ईरगुडा इद दुनियातोर आयुर. अदुनहाटी ई दुनियातोर ईरकुन हय्सेक हिल्लुर.

15 निमे ईरकुन इद दुनियाताल ओम इंचि नना पारतना कीसेक हिल्लेन, गानि पेद्दा देय्यमताल* ईरकुन कापाळा इंचि पारतना कीसंतन.

16 नना ई दुनियातोण आयोन, अल्हेन ईरगुडा ई दुनियातोर आयुर.

17 नीवा पोलेले सत्तेम आंद, नीवा सत्तेमते ओर्कुन पवित्र कीम.

18 बल्हा अय्ते निमे नाकुन ई दुनियाते लोहतिन, अल्हेन नना ईरकुन दुनियाते लोहंतन.

19 नीवा सत्तेमते ओर पवित्र आयगोम इंचि, नावद ननेन उंदि पवित्र मोक्कुनलेह्का आतन.”

अंदोर विस्वासुल्कुनाहाटी येसु पारतना कीतोर

20 “नना सिराप ईराहाटीगे पारतना कीसेक हिल्लेन, गानि बोर अय्ते ईर वेहना पोलेलेतुन केंजसि नापोरें विस्वासम ईरंतुर, ओराहाटीगुडा नना पारतना कीसंतन.

21 बाबा! बल्हा अय्ते निमे नहगा, नना निहगा उंदि आसि मंतोमो, अल्हेन ओरगुडा उंदि आसि मननाहाटी पारतना कीसंतन. नाकुन निमेन लोहतिन, इंचि दुनियातोर विस्वासम कियना इत्ते, ओरगुडा मनाटे उंदि आयापीता.

22-23 निमे ना लोप्पो मंतिन, नना नी लोप्पो मंतन. निमे नाकु हीता कदरतुन नना ओर्क हीतन. मनम इंदके बल्हा उंदि आसि मंतोमो, अल्हेन ओरगुडा उंदि आसि मंदना. अल्हा मत्तेने, नाकुन निमे लोहतिन आनि नाकुन पावरम कीताप ओर्कुनगुडा पावरम कीसतिन, इंचि दुनियाक एरपाट आयापीता.”

24 “बाबा! बोर्कुन अय्ते निमे नाकु हीतिनो, ओर निमे नाकु हीता कदरतुन हळानाहाटी, नना बगा मत्ते अगा ओरगुडा मनना इंचि, नना पारतना कीसंतन. बारित्ते इद दुनिया पुट्टका मुन्ने निमे नाकुन पावरम कीतिन.

25 बाबा! निमेन नीतिमंतुण आदिन. ई दुनिया नीकुण एरपाट किय्यो. गानि नना एरपाट कीतन. अल्हेन नाकुन निमेन लोहतिन इंचि ई सिस्त्रुल्क एरपाट कीतुर.

26 ना पोरोटा नीवा पावरम ओरा लोप्पो मननाहाटी आनि ननागुडा ओरा लोप्पो मनना इंचि, नीवा पोरोल्लतुन ओर्क एरपाट कीसतिन. इका मुन्नेगुडा एरपाट कीसि हीसेक मनंतन,” इंचेके येसु पारतना कीतोर.

18

येसुन दोकाते पीसि ओतुर

(मत्तयाल 26:47-56; मरकुस 14:43-50; लूकाल 22:47-53)

* 17:15 पेद्दा देय्यमताल इत्ते, कोरेब इना देय्यमता कय्दाल.

1 इव पोल्ले वळ्कमळ आतंका, येसु ओना सिस्स्युल्कुनतोनि, किद्रोन इनना कुरेटा लोद्दि दाटसि हब्बेटा बाजुंक होत्तुर. अगा ज्यत्तुन मराकुना तोटा मत्ता, आ तोटाते येसु, ओना सिस्स्युल्क होळियत्तुर.

2 येसु ओना सिस्स्युल्कुनतोनि अद तोटाते वेल्लेन मल्कां वासि मत्तोर. अदुनहाटी ओन्क दोका हियना यहदांकगुडा अद जेगा एपाट मत्ता.

3 अय्ते यहदल सिपाइल्कुना गेंगुन, पेद्दा पेर्मांलोर, परिसिल्क लोहता गुळितगा कावेल कियानोर्कुन पीसि अगा वातोर. ओरतोनि दिव्ती, कंदिलि, लडाइ कियना विषें मत्तां.

4 ओन्क बतल जर्गनद मंता इत्तदुन एपाट कीसि, येसु मुन्नेळ्क होत्तोर. होचि, “मिमेत बोन पहकसतिर?” इंचि ओर्कुन पूसकीतोर.

5 अस्के ओर, “नासरेत नाटेना येसुन पहकसंतोम,” इंचि जवाब हीत्तुर. पजा येसु, “ओन ननाने आंदुन,” इंचि इत्तोर. येसुंक दोका हियना यहदलगुडा ओरतोनि निलासि मत्तोर.

6 येसु ओर्कुन, “ओन ननाने आंदुन,” इंचि इत्तस्के, ओर पजोळ्क जरगिसि बूमिपोर्री अरत्तुर.

7 येसु, “मिमेत बोन पहकसतिर?” इंचि मरां उंदि मल्का पूसकीतोर अय्ते ओर, “नासरेत नाटेना येसुन पहकसंतोम,” इंचि इत्तुर.

8 अस्के येसु, “ओन ननाने आंदुन इंचि वेहतन गदा! ओक्कला मिमेत नाकुन पहकानय्ते, ईरकुन होना हीम्टु,” इंचि इत्तोर.

9 बारित्ते, “निमे नाकु हीतोरव्टेडाल, नना वरोनिंका तप्सोना हि्य्या हिल्लेन,” इंचि ओर इत्ता पोल्ले पुरागा आयगोम इंचि अल्हा इत्तोर.

10 सिमोन पत्रु इन्ना सिस्स्युनाग उंदि पेद्दा कसेर मत्ता. ओर अद कसेटे वरोन हीतोर अय्ते, पेद्दा पेर्माना वरोर जीतागाना तिना केव नेमसि अरता. आ जीतागान पोरोल मल्कोसि.

11 गानि येसु, “नीवा कसेर दाळोतगा” इर्रा. नावा बाबाल नाकु हीता तिप्पलता वाटिते नना उना मन्निआ?” इंचि पत्रुन इत्तोर.

12-13 अस्के अगा वाता सिपाइल्कुना गेंग, ओरा दरोगाल आनि गुळितगा कावेल कियानोर येसुन दोर्कापीसि दोह्चि वाटतुर. दोह्चि वाटसि, मोट्टा मोदाला ओन हन्ना इनानोणा ओत्तुर. ई हन्नाल कयपा इनानोणा मामाल आंदुर. अद वर्सा ई कयपाल पेद्दा पेर्मांल मत्तोर.

14 “लोकुल्कुनाहाटी वरोर मनकल हाते बेसे,” इंचि यहदि पेद्दाल्कुना मुन्ने वळ्किसि मत्तोर, ओर ईर कयपाल आंदुर.

पत्रु येसुना बारेमते आबद्दम वळ्कंतोर

(मत्तयाल 26:69-70; मरकुस 14:66-68; लूकाल 22:55-57)

15 येसुन अल्हा पीसि होननेके सिमोन पत्रु आनि इंकावरोर सिस्स्युड, येसुन पज्जे होत्तुर. आ सिस्स्युड पेद्दा पेर्माना एर्कांतोर मत्ताहेंका, पेद्दा पेर्माना दाराते येसुनतोनि ओरगुडा होत्तोर.

16 गानि पत्रु पलाते गलमातगेन नित्तिसि मत्तोर. अदुनहाटी पेद्दा पेर्मांक एर्का मत्ता आ सिस्स्युड पलाते वासि, गलमातगा देक्रेकहाटी मत्ता मुरतदुन पूस कीसि, पत्रुन लोप्पो केय्चि तत्तोर.

17 गलमातगा देक्रेकते मत्ता आ पासि कबळ कियाना मुरतळ, “निमेगुडा आ मनकना सिस्स्युल्कुनाल वरोन आदिन गदा!” इंचि पत्रुन पूसकीता. अय्ते पत्रु, “नना आयोन,” इंचि इत्तोर.

18 अद वेलाते वेल्लेन पीनि मत्ता. अदुनहाटी सेवाकुल्क आनि गुळितगा कावेल कियानोर, तडमि मासि, सेका कासेके मत्तुर. अगा पत्रुगुडा ओरतोनि नित्तिसि आरसेक मत्तोर.

पेद्दा पेर्मांल येसुन सवाल पूसकियमळ

(मत्तयाल 26:59-66; मरकुस 14:55-64; लूकाल 22:66-71)

19 पजा पेद्दा पेर्मांल येसुन, ओना सिस्स्युल्कुना बारेमते आनि ओना कराहमळ बारेमते पूसकीतोर.

20 अस्के येसु, “नना अंतोरा मुन्ने कुल्ला-कुल्ला वळ्कतन, यहदिल्व अंतोर जमा आयना दर्मासास्त्रम कराहना लोहकुने, गुळिने नना बस्केळ्क कराहतन. नना मक्किचि बतले वळ्का हिल्लेन.

21 अयना इद सवाल नाकुन बारि पूसकीसतिन? नना वेहतदुन केंजतुर्कुन पूस कीम, ओर्क एपाटे नना बतल वेहतन,” इंचि जवाब हीतोर.

22 येसु अल्हा इत्तस्के, दग्गरा नित्तिसि मत्ता वरोर गुळितगा कावेल कियानोर, “पेद्दा पेर्मांक इल्हेन जवाब हीतिना?” इंचि येसुना सेंपापोर्री तंतोर.

* 18:11 दाळोतगा नडिक उंदि संचि मनता अष्टे कसेर इर्रु. इद पोल्ले आदिलाबाद गोडिताल येततद आंद. ☆ 18:14 योहान 11:50

23 अस्के येसु, “नना वळकतव्टे बतलन्ना तप्पु मत्ते इगे अंटोर्क वेहाट. गानि नना वळकतद निजम आते, नाकुन तनंतरि बारि?” इंचि पूसकीतोर.

24 पजा आ हन्नाल, दोह्चि मननेकेन येसुन कयपा इन्ना पेद्दा पेमानिके लोहचीतोर.

पत्रु आबद्दम वळकता वळकुळे गोगोड कुसंता

(मत्तयाल 26:71-75; मरकुस 14:69-72; ल्काल 22:58-62)

25 सिमोन पत्रु तडामितगा सेका कासेके मत्तस्के, अगा मत्तोर इच्चुर लोकुकल ओन, “निमेगुडा ओना सिस्स्यल्कुनाल वरोन आदिन गदा?” इंचि पूसकीतस्के, “नना आयोन,” इंचि पत्रु आबद्दम वळकतोर.

26 पत्रु बोना केव्दुन अय्ते नर्कतोर, ओना जीवातोर वरोर, पेद्दा पेमानगा सेवा कीसेक मत्तोर. ओर पत्रुन, “अद रोजु जय्तुन मराकुना तोटाते नीकुन नना, ओनतोन हळतन,” इंचि इत्तोर.

27 मर्रागुडा पत्रु, “नना आयोने आयोन,” इंचि आबद्दम वेहतोर. ओर अल्हा इत्ता इन्वळे, गोगोड कूसता.

पिलातुस इन्ना राज्यपालना मुन्ने येसुन निलाहंतुर

(मत्तयाल 27:1-2,11-31; मरकुस 15:1-20; ल्काल 23:1-25)

28 पजा हक्केरेन येसुन ओर कयपानगटाल रोम सरकारता राज्यपालना राजवाडाते ओतुर. अस्के रिवाज परकारम अपवित्र आयाकोंटा मनालय आनि दाटसि होनना पंडुगुना गाटो तिनगोम, इंचि ओर राजवाडाते नेगा हिल्लुर.

29 अदुनहाटी रोम सरकारता राज्यपाल पिलातुस, पलाते ओरगा वासि, “ई मनकनपोर्री मिमेटे बद कसूर ताससंतरि?” इंचि ओर्कुन पूसकीतोर.

30 अस्के ओर, “ईर कसूर क्रियाकोंटे मंचि मत्ते, मोमोट इन नीकु अप्पजेप्पा कोन्नेरम,” इंचि जवाब हीतुर.

31 “अल्हा अय्ते ओन ओसि, मीवा सतता नियम परकारम मिमेटे ओना न्यायम कीम्पु,” इंचि पिलातुस इत्तोर. अस्के यहुदिल्लक, “हामुर सिक्सा हियना अदिकारम सिराप, रोम सरकारस्के मंता,” इंचि इत्तोर.

32 अद अल्हा बारि जर्गता इत्ते, येसुंक बसोंटा हामुर वायनद मंता इंचि येसु कुद्दु वेहता पोल्ले पुरागा आयनाहाटी अल्हा जर्गता.

33 पजा पिलातुस ओना राजवाडाते होंचि येसुनलोपो केया वेहतोर. केय्मि, “निमे यहुदिल्लकुना राजाना?” इंचि पूसकीतोर.

34 अस्के येसु, “ई पोल्ले नी इच्चटा निमेन इंचतिना? हिलाकोंटे नावा बारेमते नीकु बोरेन्ना वेहतुरा?” इंचि पिलातुसुन पूसकीतोर.

35 अय्ते पिलातुस, “नाकुन निमे यहुदि इनकुंचतिना? कुद्दु नीवा लोकुकल आनि ओरा पेर्मालोर नीकुन नाकु अप्पजेपतुर. निमे बतल कीतिन?” इंचि जवाब हीतोर.

36 अस्के येसु, “नावा राज्येम ई दुनियाक संबदिस्तद आयो. ओक्कला नावा राज्येम ई दुनियाक संबदिस्तद आसि मत्ते, नाकुन यहुदि पेद्दाल्लुकुंक अप्पजेपकोटा नावा सेवाकुल्लक लडाइ कीसि मन्नेर. गानि इंदके नावा राज्येम ई दुनियाक संबदिस्तद आयो,” इंचि जवाब हीतोर.

37 अस्के पिलातुस, “अल्हा अय्ते निमे राजाना?” इंचि इत्तोर. अय्ते येसु, “निमेन इंचतिन नाकुन राजाल इंचि! नना अय्ते सत्तेम बारेमते गवाइ वेहालय पुटतन. इद कारनमहाटीगे नना ई दुनियाते वातन. सत्तेमते ताकाना हरेक मनकल, नावा अल्किरतुन केंजंतोर,” इंचि वेहतोर.

38 अद केंजसि पिलातुस, “सत्तेम इत्ते बतल?” इंचि येसुन पूसकीतोर. अल्हा पूस कीसि, पलाते यहुदिल्लकुनगा होत्तोर. होंचि, “नाकु ईना लोपो अय्ते बतले कसूर दिस्सेक हिल्ले.

39 गानि दाटसि होनना पंडुगुना रोजु, एडादिक उंदि मल्का, जेलने मत्तोन वरोन होळसना, इंचि मीवा उंदि रिवाज मंता. अय्ते मीवाहाटी नना ई यहुदिल्लकुना राजान होळसमळ मीकु इस्टमेना?” इंचि ओर्कुन पूसकीतोर.

40 अस्के ओर वरगेयसेके मर्रा, “मान्नि ओन होळसमा, मावाहाटी बरब्बान होळसा,” इंचि इत्तुर. ई बरब्बल इनानोर, पेद्दा दोगल मत्तोर.

19

येसुंक हामुर सिक्सा हीतुर

1 अस्के पिलातुस येसुन दोर्कापीसि पोट्टे देब्बां तना वेहतोर.

2 सिपाइल्लक बारे, उंदि हाहकुना वेलितुन किरिस्टम कीसि, येसुना तल्लक तासतुर. तासि ओन्क नेळि पडि रंगुना कपडिं केराहतुर.

3 केराहता पजा, “यहुदिल्लकुना राजांक जय” इंचेके ओना सेपापोर्री तंतुर.

4 पिलातुस मसंदि मल्का पलाते पेय्सि, “हुळाट, ओन्क सिक्सा हियालय, नाकु ओनालोप्पो बतले कसर दोर्काहिल्ले, इद मीकु तेळियना इंचि नना ओन मीहिके पलाते तचचंतन,” इंचि वेहतोर.

5 पजा येसु हाह्कुना किरिटम, नेळि पडि रंगुना कपडि केरसि पलाते पेयस्तोर. अस्के पिलातुस, “हुळाट ई मनकन,” इंचि ओर्कुन इत्तोर.

6 येसुन हळसि, पेद्दा पेर्मांलोर आनि गुळितगा कावेल कियानोर, “ओन कूसुनपोर्पो वेलाड वाटा, ओन कूसुनपोर्पो वेलाड वाटा,” इंचि वरगेयतुर. अस्के पिलातुस ओर्कुन, “ओन ओसि मिमेटे कूसुनपोर्पो वेलाड वाटट, नाकु ओनालोप्पो बदे कसर दोर्काहिल्ले,” इंचि इत्तोर.

7 अद केंजसि यहुदिल्क इल्हा जवाब हीतुर, “माकु उंदि नियम मंता. ओर, नना पेनदा मरिन, इंचि इत्तोर. अदुनहाटीं मावा नियम परकारम ओर हायमळे गावाले,” इत्तुर.

8 ओर अल्हा इन्मळतुन केंजसि, पिलातुस वेल्लेन वेरियतोर.

9 अस्के पिलातुस येसुन मरां राजवाडाते ओसि, “निमे बगाटाल वातिन?” इंचि पूसकीतोर. गानि येसु बतले जवाब हिया हिल्लोर.

10 अदुनहाटीं, पिलातुस येसुन, “निमे नातोनि बारि वळकसेक हिल्लिन? नीकुन होळसियना आनि कूसुनपोर्पो वेलाड वाटना अदिकारम नाके मंता, इंचि नीकु एर्का हिल्लेना?” इंचि पूसकीतोर.

11 अस्के येसु, “पोर्पो मनना पेन आ अदिकारम नीकु हीता, अचोने! हिलाकोटे नीकु नावापोर्पो बतले अदिकारम हिल्ले. अदुनहाटीं, नाकुन नीवा कय्दुक अप्पजेपतोंके एक्को पापम दलगंता,” इंचि इत्तोर.

12 अस्केटाल पिलातुस, येसुन होळसालय वेल्लेन कोसिस कीतोर. गानि यहुदिल्क, “ओक्कला निमे ओन होळसियानय्ते, निमे कैसर* राजाना दंतातोनि आयिन. इंका नना राजान इंचि इना हरेक मनकल, महाराजाना विरोदमते वळकतोर आंतोर,” इंचेके वरगेयालय दलगतुर.

13 अब पोल्ले केंजसि, पिलातुस येसुन मरां पलाते तत्तोर. तच्चि, न्यायम कियनेके उद्दना कुर्सिते उद्दतोर. अद कुर्सि मनना जेगातुन, इब्रानि बासाते, गब्बाता† इत्तुर.

14 अद रोज, दाटसि होनना पंडुरुना तयारि कियना रोज आंद. अस्केळक, पन्नेड एगसि मत्ता. अस्के, “इद हुळाट, मीवा राजाल!” इंचि पिलातुस यहुदिल्कुन इत्तोर.

15 अस्के यहुदिल्क, “ओन लक्कु ओम, ओन लक्कु ओम! ओसि कूसुनपोर्पो वेलाड वाटा,” इंचि वरगेयालय दलगतुर. अय्ते पिलातुस, “बतलु! नना मीवा राजान, कूसुनपोर्पो वेलाड वाटकना?” इंचि ओर्कुन पूसकीतोर. अस्के पेद्दा पेर्मांलोर, “माकु कैसर राजान होळसिसि वेरे बोरे राजाल हिल्लोर,” इंचि वरगेयतुर.

16 पजा पिलातुस, येसुन कूसुनपोर्पो वेलाड वाटालय ओरा कय्दुक अप्पजेपतोर अय्ते, ओर येसुन ओतुर.

येसुन कूसुनपोर्पो वेलाड वाटंतुर

(मत्तयाल 27:32-44; मरकुस 15:21-32; लुकाल 23:26-43)

17 येसु ओना कूसुन कांजसेक, “तला बोरेसेम” इना जेगातगा होतोर. इब्रानि बासाते, अद जेगातुन गोलगोता इत्तुर.

18 अगा ओना काल्क-कय्कुंक मोल्लां कोह्लिकिसि ओन कूसुंक वेलाड वाटतुर. येसुन नड्डुम इरसि ओना रौंड बाजकुंक इंकिव्बुर्कुन कूसुंक वेलाड वाटतुर.

19 अस्के पिलातुस, “नासरेत नाटेना येसु, यहुदिल्कुना राजाल,” इल्हा उंदि बल्लापोर्पो कसर रासि, येसुना कूसुंक कोह्ला वेहतोर.

20 येसुन वेलाड वाटता जेगा सहरकु दगरेा मत्ता. अद बल्लापोर्पो इब्रानि, लाटिन आनि युनानि बासाते रासि मत्ता. अदुनहाटीं वेल्लेटोर यहुदिल्क, आ कसरतुन हदवुंदुर.

21 पजा यहुदि पेद्दा पेर्मांलोर पिलातुसनाग होंचि, “यहुदिल्कुना राजाल इंचि रासमा. दान जेगाते, नना यहुदिल्कुना राजान, इंचि ओर इत्तोर, इल्हा रासा,” इंचि वेहतुर.

22 अस्के पिलातुस, “नना रासतन! रासतन. अचोने!”

23 सिपाइल्क येसुन कूसुनपोर्पो वेलाड वाटतंका, ओना कपडिं तेंडकुत्तुर. तेंडकुचि, वरो-वरोक उंदि-उंदि हिस्सा वायना हिसाबते, नालुं पाल्क कीतुर. ओना अंगितुनगुडा तेंडकुत्तुर. अद अंगि पोर्पोटाल हिळ्दुका पोळ्ळुंक-पोळ्ळु कुट्टु वाटाकेन मत्ता.

* 19:12 कैसर इद राजाना पोरोल अयो. रोम सरकारते अन्वितकन्ना पेद्दा पदवि आंद. † 19:13 गब्बाता इत्ते बंडां तारता जेगा इंचि अर्तम.

24 अदुनहाटी सिपाइल्क, “दीन मनम हराहमन्नि, गानि सिट्टिं वाटकोम. अस्के अद बोर्क दोर्कतनो हळकोम,” इंचि ओर-ओरे इनकुत्तुर. “ओर नावा कपडिन हिस्सां कीसि, नावा अंगिहाटी सिट्टिं वाटंतुर,”* इंचि दर्मसास्त्रमते रासि मत्ता पोल्ले पुरागा आयनाहाटी अल्हा जर्गता. सिपाइल्कगुडा अदुनहाटीगे अल्हा कीतुर.

25 येसुन वेलाड वाटता कूसुना दग्गेरा, येसुना यावल, ओना यावाना हेलड, कोल्पाना मुत्तो मरियम, आनि मगदलेनि नाटेना मरियम इव निलसि मत्तां.

26 येसु, ओना यावल आनि ओर बोन अय्ते पावरम कीतोर आ सिस्सुड, ओना दग्गेरा निलसि मत्तद हळसि, येसु ओना यावन, “यावा, ईर हळा नीवा मरि!” इंचि वेहतोर.

27 पजा आ सिस्सुनहेके हळसि, “इद हळा, नीवा यावल!” इंचि वेहतोर. अस्केटाल आ सिस्सुड दान ओना यावल इंचि लोन ओतोर.

येसु जीवा होळसंतोर

(मत्तयाल 27:45-56; मरकुस 15:33-41; लकाल 23:44-49)

28 पजा, ओर बद्द कबळहाटी वातोर, अद कबळ पूरा आता, इंचि ओर एरपाट कीसि, दर्मसास्त्रमते रासि मत्तद पूरा आयनाहाटी, “नाकु दूपा आसंता,”* इंचि इत्तोर.

29 अगा उंदि अळका मत्ता, अव्ते मुरगिसि होत्ता अंगुर पंडिना पानकम मत्ता. ओर अद अळकाते दूदि मुळाहतुर आनि हिस्सोप इनना मराता कोम्मक कळाह्चि, येसुना तोळदागा ओतुर.

30 येसु आ मुरगिसोत्ता अंगुर पंडिना पानकमता रसि हळसि, “पूरा आता,” इंचि इत्तोर. अल्हा इंचि, हिळु तला वराहचि जीवा होळसतोर.

31 अद नोमकेम आनि दाटसि होनना पंडुगुना तयारि कियना रोज मत्ता. अद रोजुने पीनगुल्क कूसुनपोरों वेलाड मनमळ यहदिल्लुकुंक इस्टम हिल्ले. अदुनहाटी यहदि पेद्दाल्क पिलातुसनगा वासि, “ओरा काल्कन उराहचि, सेत्तातुन हिळु रेहा वेहा,” इंचि पूसकीतुर.

32 अस्के सिपाइल्क वासि, येसुनतोनि कूसुनपोरों वेलाड वाटसि मत्ता इव्वुरा काल्कन उराहतुर.

33 पजा ओर येसुनगा वासि हळतस्के, येसु हासे मत्तोर, इंचि ओना काल्क उराह हिल्लुर.

34 गानि ओराव्टेटाल वरोर सिपाइ येसुना संका हिळु, गोकाते कोहकतोर. अय्ते कोहकता कोहकुळे नेत्तुर आनि एर पोंगता.

35 अदंता बोर अय्ते हळतोर ओर, मिमेटगुडा विस्वासम कियगोम इंचि ओना गवाइ वेहतोर. ओर वेहता गवाइ निजम आंद. ओर सल्लेम वेहचंतोर इंचि ओन्क एरपाट.

36-37 “ओना बोक्कानाल उंदि बोक्किंका उंंगो,” इंकुंदि जेगाते, “ओन कोहकतोनहेके हळानुर”* इंचि दर्मसास्त्रमते रासि मत्ता पोल्ले पुरागा आयगोम इंचि, इल्हा जर्गता.

येसुन बोंदाते तासंतुर

(मत्तयाल 27:57-61; मरकुस 15:42-47; लकाल 23:50-56)

38 अवंता आतंका, अरिमताइ नाटेना योसेप इनानोर, पिलातुसनगा होंचि, “येसुना पीनगुन हीम,” इंचि पूसकीतोर. पिलातुस ओम इत्तस्के ओर येसुना पीनगुन ओतोर.‡

39 उंदि मल्ला नर्कटा वेलाक वासि येसुंक कलियता निकोदेमसगुडा योसेपुनतोनि वातोर. ई निकोदेमस, दग्गेर-दग्गेरा मुष्ये (30) किलोना “बोलम” आनि “अगर” इनना गमागमा गब्बु वायना वस्तुक पीनगुंक होकालय पीसि वातोर.

40 ओर इव्वुर कूळसि, यहदिल्लुकुना गति कियना रिवाज परकारम, आ गमागमा वायना वस्तुकुनंता येसुना मेंदुल्क होकतुर. होकसि, येसुना पीनगुन उंदि पूना पोळ्गु कपिडते हुटतुर.

41 येसुन कूसुंक वेलाड वाटता जेगाक दग्गेरेन उंदि तोटा मत्ता. आ तोटाते उंदि पूना बोंदा मत्ता, अद बोंदाते अदवेरदाका बस्केने बोन्दे पीनगुन ईरि हिल्लुर.‡

42 अद बोंदा दग्गेरा मत्ता, अचोने आयाका अद यहदिल्लुकुना दाटसि होनना पंडुगुना तयारि कियना रोज मत्ता. अदुनहाटी ओर येसुन अदे बोंदाते इत्तुर.

* 19:24 बजन सहिता 22:18 * 19:28 बजन सहिता 69:21 * 19:36-37 निर्गमन 12:46; गिनति 9:12; बजन सहिता 34:20

‡ 19:38 ई योसेपगुडा येसुना वरोर सिस्सुडे, गानि ओर यहदि पेद्दाल्कुकुं वेरियसि, लोप्पो-लोप्पो विस्वासम कियंतुर. § 19:41 अद बोंदाते अदवेरदाका बस्केने बोन्दे पीनगुन ईरि हिल्लुर यहदिल्लुकुं बोरन्ना हाते, ओन बूमिते पोक्का तब्बि बोंदा तासुर. उंदि बंडातुन तुलाह्चि अव्ते ओना पीनगुन इत्तुर.

20

येसु जीवाते तेदांतोर

(मत्तयाल 28:1-8; मरकुस 16:1-8; लुकाल 24:1-12)

1 वारमता मोदाटा रोजु, इत्ते अथारमनाडु, मुसामुसा हीकट मननेकेन, मगदलेनि नाटेना मरियम बोदातगा होत्ता. अगा अद, बोदा हर्दुक अड्डम इरसि मत्ता बंडा तेंडसि मत्ताप हळता.

2 अदुनहाटी अद मरियम, सिमोन पत्रुनगा आनि येसु बोन अथे पावरम कियुंदुरो आ सिस्युनगा विच्चि होंचि, “सामिना पीनगुन बोदाताल बोरो तेंडसि ओतुर, अदुन बगा इरतुरो, माकु तेळियो,” इंचि वेहता.

3 अद वेहतद केंजसि, पत्रु आनि आ इंकावरो सिस्युड बोदातेके होनालय पेय्स्तुर.

4 ओर इव्वर वितसेके होननेके, आ इंकावरो सिस्युड पत्रुंनगा मुन्ने विच्चि, बोदातगा एवतोर.

5 अगा एवसि, ओर पलाताले माळकिस हळतोर, अथे ओन्क सिराप येसुंक हुटसि मत्ता कपडिं दिसतां. गानि ओर लोप्पो मेगा हिल्लोर.

6-7 पजा सिमोन पत्रुगुडा अगा एवतोर. लोप्पो होळियसि, येसुंक हुटसि मत्ता कपडिन हळतोर. गानि येसुना तल्लक हुटसि मत्ता कपिड मडता कीसि, वेरे जेगाते मत्तद ओन्क दिसता.

8 पजा, बोदातगा मुन्ने एव्ता सिस्युडगुडा लोप्पो होळियसि, हळसि विस्वासम कीतोर.

9 अदवेरदाकागुडा, “येसु हासि तप्पाकोटा मर्रा जीवाते तेदंतोर,” इंचि दर्मसास्त्रमते रासि मत्ता पोल्ले ओर्क तेळिया हिल्ले.

10 पजा ओर सिस्युल्क ओरा लोहकुने मल्लि होत्तुर.

मगदलेनि मरियमुंक येसु दिसंतोर

(मरकुस 16:9-11)

11 मगदलेनि नाटेना मरियम मात्रम बोदाता पलाते निलसि अळसेके मत्ता. अळसेके-अळसेकेन अद लोप्पो माळकिस हळता.

12 अस्के, तेल्लटा कपडिं केरता रोंड पेनदा दूतां दान्क दिसतां. अव येसुना सेत्तातुन इरतागा उंदि बारे तल्लाताहेके, इंकुंदि बारे काल्कुनहेके उदिदिस मत्तां.

13 आ दूतां, “बाई, निमे बारि अळसतिन?” इंचि पूसकीतस्के, “नावा सामिना मेंदुलतुन बोदाताल बोरो बेकेनो ओसि इरतुर, नाकु एरपाट हिल्ले,” इंचि मरियम इत्ता.

14 अल्हा इंचि अद पजोळक तिरियता. अस्के अगा येसु निलसि मत्तद दान्क दिसता. गानि ओर येसु इंचि, अद एरपाट क्रिया हिल्ले.

15 अस्के येसु, “बाई, निमे बारि अळसतिन? बोर्कुन पहकसतिन?” इंचि मरियमुन पूसकीतोर. अस्के मरियम ओन, ओर टोटाक कावेल मनानोर बारे इन्कुंचि, “महाराज, निमे गिंटा सामिना पीनगुन इगोटाल ओथानय्ते, अदुन बगा इरतिन नाकु वेहा नना होंचि तरकुंतन,” इंचि इत्ता.

16 अथे येसु, “मरियम,” इंचि दान केयतोर. अस्के मरियम ओनहेके तिरियसि हळसि, दाना इब्रानि बासाते, “रबोनि*” इंचि इत्ता.

17 अस्के येसु, “इदवेरदाका नना बाबानगा होना हिल्लेन. निमे नाकुन इट्टुमा, गानि नावा तम्मुहकुनगा होंचि इल्हा वेहा: नना नावा बाबाल आनि मीवा बाबाल, इंका नावा पेन आनि मीवा पेनदागा पोरो होंचंतन, इंचि ओर्क वेहा,” इंचि दानकु वेहतोर.

18 अस्के मगदलेनि नाटेना मरियम सिस्युल्कनगा होंचि, “नना सामिन हळतन, ओर मीकु इव पोल्ले वेहा इत्तोर,” इंचि ओर्क येसु वेहता पोल्ले वेहता.

19 अदे रोजु इत्ते वारमता मोदाटा रोजु, पोळ्द अरंना वेलाक, सिस्युल्क अंतोर, यहदि पेदुदाल्कुना वीरेंक, तल्पुंक तालम वाटसि, उंदि अरति जमा आसि मत्तुर. अचानक, येसु ओरा नड्डुम वासि निल्लिसि, “मीकु सांति दोर्कि,” इंचि इत्तोर.

20 अल्हा वळ्ळिसि, येसु ओर्क ओना कयकुंक आनि पक्काक मत्ता देब्बा हुपिस्तोर. सामिन हळसि ओर वेल्लेन कुसिते निडिस होत्तुर.

21 येसु मर्रा उंदि मल्का ओर्कुन, “मीकु सांति दोर्कि. बाबाल नाकुन ई दुनियाते लोहताप, ननागुडा मीकुन ई दुनियाते लोहंतन,” इंचि इत्तोर.

22 अल्हा वेहचि, “पवित्र आत्मा येतद,” इंचि ओरपोरो उहकुतोर.

23 उह्किसि, “मिमेट बोना पापालक मापि कीतिरो, ओरा पापालक मापि आंतां, मिमेट बोरा पापालक अथे मापि किथियो, ओरा पापालक मापि आयो,” इंचि ओर्क वेहतोर.

* 20:16 रबोनि रबोनि इत्ते इब्रानि बासाते गुरु इंचि अर्तम.

तोमांकु येसु दिसंतोर

(मार्कुस 16:14-18; लूकाल 24:36-49)

24 येसु वासि मत्तोर अस्के, ओना पन्नेड सिस्स्युलुकुनाल वरोर, तोमल ईर एमडालुकुनाल वरोर आंदुर, ई सिस्स्युड मनाहिल्लोर.

25 अदुनहाटी सिस्स्युलुकु, “मोमोट सामिन हळतोम,” इंचि ओन्क वेहतुर. गानि तोमल, “नना कुदुदु ओना कय्कुंक कोहकता पुनकुन हळसि, आ पुनकुने नना वेलु ईरुवा, इंका गोकति कोहकता बरातगा कय ईरुवा, नना विस्वासम किय्योन,” इंचि इत्तोर.

26 ओर अल्हा इंचि एनिमिदि रोञ्जुक आता पजा, सिस्स्युलुकु मर्रा अदे लोते तल्पुंक तालम वाटसि जमा आसि मत्तुर. ई मल्का ओरतोनि तोमालगुडा मत्तोर. तल्पुंक तालम वाटसि मननेकेगुडा येसु ओरा नड्डुम वासि निल्लोर. निलसि, “मीकु साति दोर्कि,” इंचि इत्तोर.

27 पजा येसु तोमान, “तोमा, नावा कय्दा पुनकुने नीवा वेलु ईरि हळ्ळा. नीवा कय हाहिचि, नावा पक्काक मनना गोर्का बरति नीवा कय ईरा. निमे अनमानमते मन्मा, विस्वासम कीम,” इंचि वेहतुर.

28 अस्के तोमल, “ना सामि, ना पेनदुना,” इंचि तोमल येसुंक जवाब हीतोर.

29 पजा येसु ओन, “निमे नाकुन हळसि विस्वासम कीतिन. गानि बोर नाकुन हळ्ळाकोन्ना विस्वासम कीतोर, ओर आसिर्वाद दोर्कतोर आंद,” इत्तोर.

इद पुस्तकम रासता उदुदेसम

30 सिराप इवे आयका, सिस्स्युलुकुना मुन्ने येसु वेरे इंका वेल्लेन अदुबूतामाता चिन्हे कीसि हुपिस्तोर. इवनि ई पुस्तकमते रासमळ जर्गाहिल्ले.

31 गानि येसे किरिस्तु, ओरे पेनदा मरि, इंचि मिमेट विस्वासम कीसि ओना पोरोल्ले पिस्वर दोर्किचुकुननाहाटी, इवनि रासमळ जर्गता.

21

गालिल सेरवुनगा येसु वातोर

1 इवंता आता पज्जो, येसु मसंदि मल्का सिस्स्युलुकुंक तिबेरिया समुद्रमता* ओड्डुंक सिस्स्युलुकुंक दिसतोर. अद इल्हा जर्गता:

2 अगा सिमोन पत्रु, एमडालुकुनाल वरोर तोमल, गालिल राज्येमता काना नाटेना नतेनल, जब्दिना मर्क आनि येसुना इंका इव्वुर सिस्स्युलुकु जमा आसि मत्तुर.

3 अस्के सिमोन पत्रु, “नना जिम्मां पियालय दांतन,” इंचि ओर्कुन इत्तस्के ओर, “मोमोटगुडा नीतोनि वांतोम,” इंचि, होचि डोंगाते उदतुर. गानि अद नर्कामेड ओर्क उर्दिका जिम्मा दोर्काहिल्ले.

4 अद रोञ्जु पंगा आयनेके येसु वासि ओड्डुनगा निलसि मत्तोर. गानि ओना सिस्स्युलुकु, ओन येसु आंदुर इंचि एरपाट किया हिल्लुर.

5 अस्के येसु, “मिहगा इचुंगना जिम्मां मंतंगा, पिलालकनिटा?” इंचि पूसकीतोर. अय्ते ओर, “उर्दिका हिल्ले,” इंचि इत्तुर.

6 अस्के येसु ओर्क, “डोंगाता तिना बाञ्जुक ओल्ला वाटट, अस्के मीकु जिम्मां अरतां,” इंचि वेहतोर. येसु वेहतापे ओर ओल्ला वाटटुर. अस्के हळ्ळाट! ओर ओल्लातुन ओड्डुंक इग्गा पराहिल्लुर, अचोने वेल्ले जिम्मां ओल्लाते अरतां. 7 अस्के येसु बोन अय्ते पावरम किय्युदुरो आ सिस्स्युड, “ओर सामिए आंदुर,” इंचि पत्रुक वेहतोर. अय्ते सिमोन पत्रु, ओर अल्हा वेहतदुन केंजता केंजमळे तेंडसि मत्ता कपडिं केरसि समुद्रमते दुकतोर.

8 ओड्डु वेल्ले लक्कु मनाहिल्ले. दमगेर-दमगेरा रौंड नुक्कुना कूटां लक्कु मत्ता बारे. अदुनहाटी कळमता सिस्स्युलुकु, जिम्माने निडिस मत्ता ओल्लातुन इग्गिसेक अदे डोंगाते वातुर.

9 ओर ओड्डुंक एवतस्के, रेय्सि हळ्ळे, अगा ओर्क इचुं हारि आनि तडमि पोरो वाटसि, इचुं जिम्मां दिसतां.

10 अस्के येसु, “मिमेट इंद-इंदके पीता जिम्मानाल इचुं जिम्मां हीके पीसि वटु,” इंचि ओर्कुन इत्तोर.

11 अदुनहाटी सिमोन पत्रु डोंगाते एक्किसि ओल्लातुन एताल ओड्डुंक इग्गतोर. अद ओल्लाते नूटा एबै मूड पेदुदा-पेदुदा जिम्मां निडिस मत्तां. अचोने वेल्ले जिम्मां निडिस मनिनागानि अद ओल्ला हरां हिल्ले.

12 पजा येसु, “वटु, वासि नास्ता कीम्टु,” इंचि ओर्कुन केयतोर. सिस्स्युलुकुंक, ओर सामि इंचि एरपाट आताहाटी, “निमे बोन आदिन?” इंचि पूसकियालय बोनके हिम्मत आयाहिल्ले.

* 21:1 तिबेरिया समुद्रम ई तिबेरिया समुद्रमतुन गालिल समुद्रम इंचिगुडा इत्तुर.

13 अस्के येसु वासि, आ हारिन, जिम्मान येतसि ओर्के हीतोर.

14 येसु हासि मर्रा जीवाते तेदता पज्जो, इल्हा सिस्स्युल्कुंक ओर दिसमळ, इद मळोव मल्का आंद.

येसु पत्रुक अदिकारम हीतोर

15 अंदोरा तिनूळ आतास्के येसु सिमोन पत्रुन, “योहानुना मर्रा सिमोन, ईर अंदोरकन्ना निमे नाकुन एक्को पावरम कीतिना?” इंचि पूसकीतोर. अस्के सिमोन, “हो सामि! नना नीकुन पावरम कीतन इंचि नीकु एर्के मंता,” इंचि इत्तोर. “अय्ते निमे नावा गोर्रि पोरिह्कुन मेहा,” इंचि येसु पत्रुक वेहतोर.

16 रोंडो मल्का, “योहानुना मर्रा सिमोन, निमे नाकुन पावरम कीतिना?” इंचि येसु पूसकीतस्के, “हो सामि! नना नीकुन पावरम कीतन इंचि नीकु एर्के मंता,” इंचि पत्रु इत्तोर. “अय्ते निमे नावा गोर्रिन बेस मेहा,” इंचि वेहतोर.

17 येसु मळोव मल्का पत्रुन, “योहानुना मर्रा सिमोन, निमे नाकुन पावरम कीतिना?” इंचि पूसकीतोर. “योहानुना मर्रा सिमोन, निमे नाकुन पावरम कीतिना?” इल्हा मळोव मल्का येसु पूसकीताहाटी, पत्रुक दुक्कम वासि, “हो सामि! नीकु अय्ते अंता एरपाट मंता. नना नीकुन पावरम कीतन इंचिगुडा नीकु एरपाटे मंता,” इंचि पत्रु इत्तोर. अस्के येसु, “अय्ते निमे नावा गोर्रि मेहा.

18 नना निजम-निजम वेहासेक, निमे लेयोन मत्तिन अस्के, नीवा कपडि निमे हदुरकुनिदिन. नी इस्टमाता जेगातगा होनिदिन. गानि नीवा मातिरतनमते, निमे नीवा कय्क हाहते, बोरो वेरेतोर वासि नीवा कपडि हदुरनुर नीकु इस्टम हिल्लुवा जेगाते नीकुन पीसि ओयनुर,” इंचि वेहतोर.

19 पत्रु बसोंटा हामुर हासि, पेनदुक महिमा हियनुरो, इदुन ओन्क हृप्सालय येसु अल्हा वळकतोर. अल्हा वळकता पजा, “नावा पज्जो ताका,” इंचि ओन्क वेहतोर.

20 पत्रु पजोळ्क मल्सि हळतस्के, येसु बोन अय्ते पावरम कियुंदुरो आ सिस्स्युड, बोर अय्ते पंडुगुना गाटो तिननेके वेल्लेन दग्गेर उद्दिस, सामि, नीकुन बोर दोकाते पीसि हीतोर इंचि, पूसकीता आ सिस्स्युड, ओना पज्जो वायनद ओन्क दिसतोर.

21 ओन हळसि पत्रु, “ईनद बता संगति सामि?” इंचि येसुन पूसकीतोर.

22 अस्के येसु, “नना मल्सि मर्रा वायनदाका ओर पिस्सि मनगोम इंचि नाकु इस्टमातस्के, ओना बारेमते नीकु बतल गावाले? निमे नावा पज्जो ताका,” इंचि पत्रुक वेहतोर.

23 दानहेंदाल, आ सिस्स्युड हायोर इत्ता पोल्ले, कळमता विस्वासुल्कुना नड्डुम पैलाचि होत्ता. गानि आ सिस्स्युड हायोर इंचि येसु इना हिल्लोर. ओर सिराप “नना मल्सि मर्रा वायनदाका ओर पिस्सि मनगोम इंचि नाकु इस्टमातस्के, ओना बारेमते नीकु बतल गावाले?” इंचि इत्तोर.

आकिरता पोल्ले

24 ई सिस्स्युडे इव पोल्लेना बारेमते गवाइ वेहचि, रासतोर. ईना गवाइ निजम आंद इंचि मनाकु एरपाटे मंता.

25 वूमिपोर्री येसु कीतव इंका वेल्लेन पोल्ले मंतां. आ उंदुदि पोल्लेतुन रासते, रासता पुस्तकाल्कुन इर्रायल दुनियाते जेगा हाला पर्री बारे, इंचि नाकु अनपिचचंता.

प्रेरित्लुकु प्रेरित्लुकुना कबाहक

इद पुस्तकमता बारेमते गिचचो परिचयम

रासतोना पोरोलः डाक्टर लूका

रासता कालमः इसवि सन 60-63

प्रेरित्लुकुना कबाहक इनना ई पुस्तकमतुन लूकाल इनना येसुना वरोर सिस्स्युड रासतोर. प्रेरित इत्ते 'पेन लोहचीता सिस्स्युल्क' इंचि अर्तम. दीनकनना मुन्ने ईर उंदि पुस्तकम रासतोर, अदुन पोरोल लूकाल रासतद बेसता कबुर. अथे मुन्नेटा पुस्तकमते लूकाल येसु सामि हासि तेदसि मरां स्वर्गमते तिरियसि होननदाकाटा संगति रासतोर. इद पुस्तकमते बारे येसु सामि स्वर्गमते तिरियसि होला पज्जे पवित्र आत्माताहेंदाल ओना सिस्स्युल्क येसुना बारेमता बेसता कबुरतुन येस्सलेम, यहूदिया, सामरिया आनि पूरा दुनियाते तिरियसि बल्हा वेहतुर, वेहाना टाइमते ओर्कु बसंटा कस्टालक वातां, बता-बता कबाहक कीतुर, ओर बल्हा पिस्तुर, इदुना बारेमते रासतोर. इद पुस्तकम इत्ते, तियपिलुस पोरोलता वरोर बेस विस्वासि सायाबुंक रासता सिट्टि आंद. बगा बतल मंता

गवाइहाटी तयार आयमळ 1:1-26

येस्सलेमते येसुना बारेमते गवाइ 2:1-8:3

यहूदिया आनि सामरिया एरियाने येसुना बारेमता गवाइ 8:4-12:25

पोल्लुसना सेवा कबळ 13:1-28:31

लूकाल रासता इंकुंदि पुस्तकमता परिचयम

1 नावा पावरमगल्ला तियपिलुस,* नना मोदाटा पुस्तकमते सुखनाल येसु बतल-बतल कीतोर, बतल-बतल कराहतोर अदुना बारेमते रासतन.

2 अचोने आयका येसु पेर्कुता प्रेरित्लुकुंक पवित्र आत्माहेंदाल आदेस हीसि, मरां स्वर्गमते तिरियसि होननदाका पूरा पिस्वरता बारेमते नना रासतन.

3 येसु हासोंचि तिरियसि तेदतस्के, "नना पिस्सि मंतन," इंचि प्रेरित्लुकुंक गाट्टिगा रूजुव कीसि हुपिस्तोर. ओर नल्लै रोजकुनदाका ओर्क दिस्सेक, पेनदा राज्येम बारेमते वेहासेक मल्लोर.

4 उंदि मल्ला ओरतोनि कलियसि मननेके येसु, "येस्सलेम सहर होळसिसि होनमट. नावा पेनबाबाल हीता पोल्लेता बारेमते नना मीकु मुन्नेन वेहचि मत्तन, अद पूरा आयानदाका एदुर हळसेक मंट.

5 बारित्ते, योहान एतोनि बापतिस्मा हीतोर, गानि मीवा बापतिस्मा कोन्नि रोजकुंक पवित्र आत्माताहेंदाल आयार," इंचि ओर्कुन इत्तोर.

पेन येसुन जीवाते मननेकेने स्वर्गमते ओता

6 पजा अंतोर प्रेरित्लुकु उंदि जेगाते जमा आतुर. अस्के येसुन, "सामि, निमे इदे वेलाते इझाएल देसेमता लोकुल्लुकुंक ओरा राज्येम मरां हीतिना?" इंचि पूसकीतुर.

7 अस्के येसु ओर्कुन, "अद सिराप पेनबाबांके तारिक आनि वेलाता निरनायम एतना अदिकारम मंता. दान एरपाट कियमळ मीवा कबळ आयो.

8 गानि पवित्र आत्मा मीपोरों वातस्के मिमेट येस्सलेम सहर, पूरा यहूदिया एरिया, सामरिया एरिया अल्हेने बूमिता आकिरदाका नावा गवाइ आयना ताकत मीकु वायार," इंचि इत्तोर.

9 येसु इल्हा इतस्के, ओर हळसेक मननेकेन ओन स्वर्गमते तेहाचि ओयमळ जर्गुता. ओर्क दिस्साकोटा उंदि मबु तेर्प अड्डम वासि ओन मुचुचुता.

10 ओर पोर्कोळक तेदिस होननेके अगा मल्ला प्रेरित्लुकु मबुनहेके उंदेतीर हळसेक मल्लुर. अस्केने इब्वुर तेल्ला कपडिं केरतोर ओरगा वासि नित्तिसि,

11 "ए गालिल लोकुल्लुकुनिटा, मिमेट इल्हा नित्तिसि मबुनहेके उंदेतीर बारि हळसेक मंतिर? येसुन मिहागटाल स्वर्गमते तेहकुंचि ओयमळ जर्गुता गदा! अथे बल्हा मिमेट ओन स्वर्गमते होननेके हळतिरो, अल्हेने ओर मरां तिरियसि वांतोर," इंचि इत्तुर.

* 1:1 तियपिलुस ईर वेल्ले कदर मल्ला विस्वासि आंदुर. ई पोरोल्क अर्तम पेनदा पावरमतेर.

यहुदाना जेगाते इंकावरोन पेरमळ

- 12 पजा प्रेरितुल्लुक जयतुन मराकुना गुट्टातगटाल नोमकेम रोजुनचचो लक्कु† मत्ता येस्सलेम सहरते मल्लिस वातुर.
- 13 ओर अगा वासि, बद मिदूदेते मनुंदुरो अदे मिदूदेता पोरोटा अरति होतुर. अगा पत्रु, योहान, याकोब, अंदरियल, पिलिप, तोमल, बरतलमय, मत्तयाल, अल्पिना मरि याकोब, सिमोन (जिलोति), याकोबुना मरि यहुदल ईर मत्तुर.
- 14 ईरतोनि इच्चंग मुर्ताहक, येसुना यावल मरियम, ओना तम्मुहक ईर अंतोर उंदे मनसुने पारतना कीसिके मनुंदुर.
- 15 उंदि रोजू नूटा इरवै (120) विस्वासि दादालोरा नड्डुम पत्रु नित्तिसि,
- 16 “नावा विस्वासुल्लुकुनिटा! दाविद राजाल पवित्र आत्माहेंदाल दर्मसास्त्रमते रासि मत्ता पोल्लेतुन मुन्नेन इंचि मत्तोर, अद इंदके यहुदाना हेंदाल पूरा आता. ई यहुदाले येसुन पियानोकुक मुन्ने अरतोर.
- 17 यहुदल मना लोपोटोर वरोर मत्तोर, मनातोनि कलियसि सेवा क्रियालय आसर आतोर,” इंचि इत्तोर.
- 18 तपु कबळ कीसि कमांचता कोतताने यहुदल उंदि बूमि अस्तोर. अदे बूमिते बोकबोर्ले अरताहेंका पीर पय्सि ओना पूरा पोदुहकंता पलाते पेयसतां.
- 19 इदु येस्सलेम सहरते मत्तोर्कु अंतोर्क तेळियता. दानहाटी ओरा बासाते आ नेदुन हकलदामा, इत्ते नेत्तुरता नेलि* इल्हा पोरोल अरता.
- 20 पत्रु मर्रा इल्हा इत्तोर,
- “ओना लोन पाडासि दांता, अबुने मनालय वरोरगुडा पिस्सोर.
ओना पेदूदातनम, इंकावरोर्क दांता.”*[†]
- इल्हा बजन संहिताते रासि मंता.
- 21-22 “अदुनहाटी येसु सामि बच्चु रोजुकु मनातोनि कलियसि होंचेके-वासेके मत्तोर, इत्ते योहानुना बापतिस्मातगटाल अयते येसुन मना नड्डुमताल स्वर्गमते तेहाचि ओयनदाका बोर अयते मनातोनि मनुंदुर ओरव्हेटाल वरोन पेरते बेस मंनता. येसु हासि मर्रा जीवाते तेदतद ओर मनातोनि गवाइ हियमळ गावाले,” इंचि इत्तोर.
- 23 दानहाटी इव्वुर मनकालोर्कुन मुन्ने तत्तुर. अव्हेटाल वरोर योसेप, ईन बरसब्बा इनुंदुर, इंका ईन युसतुस इंचिगुडा एरपाट कियुंदुर. इंकावरोर मत्तिया.
- 24-25 अस्के प्रेरितुल्लुक पारतनाते, “सामि! निमे अंतोरा मनसुन एरपाट कीतिन, यहुदल अयते ओन्क हीता कबळतुन होळसिसि ओर होनना जेगाते होत्तोर. गानि निमे ईर इव्वुरा लोपोटाल प्रेरित इंचि नीवा सेवा क्रियालय बोन पेरकुत्तिन माकु हुप्सा,” इंचि तल्लकतुर.
- 26 अस्के ओर ओराहाटी सिट्टिं वातुर अयते सिट्टि मत्तियाना पोरोलते पेयसता. अस्के पदाकोंडु मंदि प्रेरितुल्लुकुने आ मत्तियालगुडा कलियतोर.

2

पेनदा आत्मा विस्वासुल्लुकुना पोरोरै रेयमळ

- 1 पेंतेकोस्त पंडुगु* रोजुने अंतोर विस्वासुल्लुक उंदि जेगाते जमा आसि मत्तुर.
- 2 अस्के उंदे मल्ला मबुनाल पेदूदा वळि-दुमारम लेहका वाता. ओर अंतोर उदुदिसि मत्ता लोन दाना सप्पुडतोनि पूरा निडिस होत्ता.
- 3 अस्के तळमितालेसी पोत्तना नाल्के ओर्कु दिसतां, अव अगा मत्तोर पोरोरै उंद-उंदि रेयतां.
- 4 ओर अंतोर पवित्र आत्माते निडिस होत्तुर, आ आत्मा ओर्कु वळकाना बलम हीता परकारम ओर वे-वेरै बासाने वळकमळ सुख कीतुर.
- 5 अद वेलाते, मबुना हिळ मत्ता वेल्लेने देसेल्लुकुना यहुदि विस्वासुल्लुक येस्सलेमते मत्तुर.
- 6 आ सप्पुड केंजतस्के ओर उंदगा जमा आतुर. ओर अंतोर ओरा संतम बासाते वळकनद केंजसि इंचंनम आतुर.
- 7 अस्के ओर इंचंनम आसि, “ईर वळकानुर अंतोर गालिल एरियातोरै गदा,
- 8 अरे मनम अंतोरम मना संतम बासातेन केंजसंतोम गदा! इद बल्हा मरि?
- 9 मनम पारति, मेदी, एलामि, मेसोपोटामिया, यहुदिया, कप्पुदुक्रिया, पुंतुस, आसिया

† 1:12 नोमकेम रोजुनचचो लक्कु अद कालमते नोमकेम रोजुने उंदि क्रिस्तोमिटरकान्ना एक्को तिरियाकोंदुर.

* 1:19 मत्तयाल 27:5-8 * 1:20

बजन संहिता 69:25 * 2:1 पेंतेकोस्त पंडुगु पूना पंटा पेयसतस्के यहुदि लोकुल्लक इद पंडुगु कीतुर.

10-11 पुरारिया, पंपुलिया, ई जेगानाल, इजिप्त देसेमताल, कुरेनि सहर दग्गेरा मत्ता लिबिया देसेमताल, रोम सहरताल वाता यहूदिलकुम, यहूदि मतम पीतोरम. क्रेति, अरब देसेमताल वाता अंतोरम पेनदा इचंन्रमाता पेदूदा कबाहकुन मना-मना संतम बासाने केंजसेके मंतोम,” इंचि इत्तुर.

12 ओर अंतोर इचंन्रम आसि, “इद बतल आसंता” इंचि तेळियका वरोंक वरोर तल्लकुर.

13 गानि बेरेतोर अय्ते, “ईर अंगुर पंडिना पूना कल्लु उंचि मंतुर,” इंचि ओर्कुन कारेड्डाल्क कीतुर.

लोकुल्लुकुन मुन्ने पशुना बासन

14 अस्के पत्रु पदाकोंडु मदितोनि नित्तिसि, लोकुल्लुकुंक अंतोर केंजा होनानाल जोरते वळकालय दल्युतोर. यहूदियाता दादालोरिटा, येस्सालेमते मनानोरिटा, नना वेहानद मीकु तेळियमळ गावाले. इंचि मिमेट अंतोर नावा पोल्लेतुन बेस केव दोस्सि केंजट.

15 मिमेट इनकुत्ताप ईर कल्लु उंचि रिम्मां आया हिल्लुर. इंदके हक्केटां तोम्मिद एगसंतां.†

16 गानि इय्यला इगे मिमेट हळता गटनना बारेमते योएल इनना पेनदा कबुरतोर इल्हा जर्गता इंचि मुन्नेने वेहचि मत्तोर, अद इल्हा मंता:

17 पेन इंता गदा,

“आकिर रोजकुने नना अंतोर लोकुल्लुकुनपोर्रीं, नावा आत्मातुन कुम्मरिचंतन.

अस्के मीवा मर्क-मियाहक बविस्थवानि कियानुर,

मीवा लेय्युर्क दर्सनाल्क हळानुर, आनि मात्रालोर कलां हळानुर.

18 आ रोजकुने नना मुरतळ मांडसा इनाकोटा,

अंतोर नावा दास-दासिहकुनापोर्रीं,

आत्मातुन कुम्मरिचंतन आनि ओर बविस्थवानि कियानुर.

19 नना मब्बुने इचंन्रमाता कबाहक हुप्संतन.

बुमिपोर्रीं चिन्हां इत्ते, नेत्तुर, तडमि, मब्बुनसॉटा पोया हुप्संतन.

20 पेनदा आ बच्चोनों पेदूदा, बेसता रोज वायाका मुन्ने,

पोळ्द हीकटा, वेडसि बारे नेत्तुरलेहका आंता.

21 अस्के बारे अय्ते पेनदा पोरोल एतंतोर,

ओर्कुन पापाल्कुनाल पिसागोटमळ जर्गता.”*‡

22 इस्त्राएल लोकुल्लुकुनिटा, इव पोल्लें केंजट. पेन‡ नासरेत नाटेना येसुनाहेंदाल पेदूद-पेदूदा कबाहक, इचंन्रमाता कबाहक आनि चिन्हां मीवा मुन्ने हुपिचि, पेन लोहतोर ईर आंदुर इंचि रूजुव कीता, इद मीकु एरपाटे.

23 पेनदा उंदि पिलान आनि तेळ्वि परकारमे येसुन मीवा कय्दे हियमळ जर्गुता. मिमेट सेड्डा मनकालोर्कुना सायता पीसि ओन कूस पोर्रीं मोल्लां कोह्किसि हक्कतिर.

24 गासि येसुन पेन हामुटाल अलग कीसि मर्रा जीवाते तेहाता, अदुनहाटीं हामुर ओन इर्रा पराहिल्ले.

25 ओना बारेमते दाविद राजाल इल्हा इत्तोर,

“नना पेनदुन बस्केळ्ळक, नावा मुन्नेन हळसेक मत्तन,

नाकुन कस्टाल्कुनाल पिसागोटालय अद नावा तिना बाजूंक मंता,

26 इंचि नावा मनसु आनंदमते मंता, नावा तोड्डिड कुसिते वळ्कसेके मंता.

इचोने आयका नावा मेंदुलगुडा आसेते मंता.

27 निमे नावा आत्मातुन नरकमते होळसियिन,

निमे नीवा पवित्र मनकन, कळियसि होना हिथ्यिन.

28 निमे नाकु पिस्सना हरिं हुपिस्तिन, नीवा लोप्पो नाकुन आनंदमते ईरतिन.”*‡

29 अय्ते नावा विस्वासुल्लुकुनिटा! नना मीवा मुन्ने एनकटा मनकल दाविद राजाना बारेमते विस्वासमते वेहा परांतन, ओर हातोर, ओन बौंदा दोस्तुर. ओना बौंदा इदवेरदाकागुडा मना नड्डुम मंता.

30 ओर पेनदा कबुरतोर मत्तोर. ओना वंसमताल वरोन राजगदूदेपोर्रीं उप्संतन इंचि पेन ओट्टुट तिचि पोल्ले हीता, अद ओन्क एरपाटे मत्ता.

† 2:15 हक्केटां तोम्मिद एगसंतां अद कालमते यहूदिल्लुकु पदि एगनदाका पेनदा बक्तिते मंतूर, कल्लु उनाकोंदूर. ‡ 2:21 योएल 2:28-32 † 2:22 पेन पेन बाबल, मरिं (येसु), पवित्र आत्मा इव मूड इंका उंदे पेन आंद. * 2:28 बजन संहिता 16:8-11

- 31 दानहाटी मुन्ने बतल जर्गनद मंता अदुन एरपाट कीसि, ओन नरकमते होळसिया हिल्ले ओना मेंदुल कळियसि होना हिल्ले, इंचि वेहचि मत्तोर. इत्ते किरिस्तु हासि मरा जीवाते तेदतदुना बारेमते वेहता पोल्ले आंद.
- 32 आ येसुन पेने मरा जीवा तेहता इंचि मोमोट अंतोरम गवाइ मंतोम.
- 33 इंदके पेन येसुन दाना तिना बाजूंक उपिस्ता. पवित्र आत्मातुन हीतन इंचि पेन पोल्ले हीसि मत्ता अद ओन्क दोर्कता. येसु अदे पवित्र आत्मातुन वळियतोर, अदुन मिमेट हूळसेक, केंजसेक मतिर.
- 34-35 बारित्ते दाविद राजाल स्वर्गमते होना हिल्लोर, गानि दीना बारेमते ओर कुद वेहतोर:
“पेन नावा सामिनतोनि इत्ता गदा, नना नीवा पगातोर्कुन नीवा काल्कुनगा तरनदाका,
निमे नावा तिना बाजूंक उदसि मन.”*[†]
- 36 “अदुनहाटी इस्त्राएलता अंतोर लोकुलक बेस एरपाट कीकुनना पोल्ले बतल इत्ते मिमेट बा येसुन अय्ते कूस पोरोर् मोल्लं कोहकिस हळकतिरो, पेन ओन सामि आनि किरिस्तु कीता,” इंचि पत्रु वेहतोर.
- 37 इव पोल्ले केंजनेके ओरा गुडें दडेल इत्तां. अस्के ओर, “दादालोरिटा, इंदके मोमोट बतल कीकोम?” इंचि पत्रुन आनि अगा मत्ता प्रेरितुलकुन पसकीतुर.
- 38 अस्के पत्रु, “मिमेट कीता पापालक मापि आयगोम इंचि मनसु मारसकुंचि पेनदाहेके तिरियट, मिमेट अंतोर येसु किरिस्तुना पोरोलते बापतिस्मा एतट. अल्हा कीतिरित्ते मीकु पवित्र आत्माता वरम दोर्कता.
- 39 इ पोल्ले मीहाटी, मीवा पिलालकुनाहाटी आनि बोर अय्ते लक्कु मत्तोर्कुन मना सामि आता पेन, दग्गेरा केयता ओरा अंतोराहाटी हीता.” इंचि ओर्कु वेहतोर.
- 40 पजा पत्रु, इंका वेल्लेने पोल्लेनहेंदाल गवाइ हीसि, “ई युगमता कराब लोकुलकुनाल मिमेट जेगतां मंटु,” इंचि विनंति कीतोर.
- 41 अस्के बोर अय्ते ओना पोल्लेन ओफ्कुत्तुर, ओर अंतोर बापतिस्मा एततुर. इल्हा ओर अंतोर कलियसि मूड वेय्कुना मंदि आतुर.
- 42 ओर अंतोर, प्रेरितुलकुना कराहमळते, कूळमळते, हारि उरुहमळते Sआनि पारतना कियमळते उंदि आसि मनुंदुर.

विस्वासुलक कलियसि मनमळ

- 43 प्रेरितुलक तीराता इंचंत्रमता कबाहक, चिन्हां किय्युंदुर. अदुनहाटी अंतोर पेनदा कदर कियालय दलग्गुर.
- 44 विस्वासुलक अंतोर उंदासि कलियसि मनुंदुर. बोनगा बतल मनिनागानि दान अंतोर तुसकुनुंदुर.
- 45 अचोने आयका ओरा सम्सारमतुन, सामानतुन अम्मिसि अवरम मत्तोर्कुंक तूसि हिंयुंदुर.
- 46 रोज गुळिते उंदि मनसुने जमा आय्युंदुर. ओर लोन-लोन हारि उराहचि, आनंदमते पीटि बतले अन्समन्स हिलाकोटा अंतोर कलियसि गाटो तिनुंदुर.
- 47 ओर रोज पेनदा स्तुति किय्युंदुर, अंतोर ओरतोनि कूस मत्तुर. पापमताल मुक्ति दोर्कतोर्कुन, सामि विस्वासुलकुने कल्पुंदुर.

3

कुंठि बेस आतोर

- 1 उंदि मल्का पिथ्यटा पारतना वेलाक इत्ते मूड एगनेके पत्रु आनि योहान गुळिते होंचेके मत्तुर.
- 2 अस्के इच्चुर लोकुलक पुट्टस्केटाल कुंठि मत्तोन वरोन तेहकुंचि तत्तुर. गुळिते होना-वाया कियानोर्कुन बिच्चम तल्कागोम इंचि ओन ओर रोजु गुळिता सक्कगा इनना गलमातगा उपिच्चि ईरुंदुर.
- 3 पत्रु आनि योहान गुळिते होळियानद हूळसि ओर ओर्कुन बिच्चम तल्कतोर.
- 4 अस्के पत्रु योहानुनतोनि ओनाहेके उंदेतीर हूळसि, “माहेके हूळा” इंचि इत्तोर.
- 5 पजा ओराहेंदाल बतलन्ना दोर्कार बारे इंचि आसेते, ओराहेके हूळसेक मत्तोर.
- 6 अस्के पत्रु, “नना अय्ते एंडि बंगारालक मत्तोन आयोन, गानि नहगा बतलय्ते मंतनो अदे नीकु हीतन, नासरेत नाटेना येसु किरिस्तुना पोरोलता बलमते नित्तिसि ताका,” इंचि इत्तोर.
- 7 पजा ओर ओना तिना कय पीसि तेहता तेहामळे ओना काल्कुने, टोंगराने ताकत वाता.
- 8 अस्के ओर दुनकिसि तेदसि ताकालय दलग्गतोर, ताकसेके, दुन्किसेके, पेनदा स्तुति कीसेके ओरतोनि गुळिते होत्तोर.
- 9 ओर ताकानदुन आनि पेनदा स्तुति कियमळतुन अंतोर लोकुलक हूळतुर.

* 2:34-35 बजन संहिता 110:1 S 2:42 हारि उरुहमळ अंतोर कलियसि गाटो तिलता पजा, पेन मनाहाटी हाता इत्ता पोल्लेतुन मति कियानाहाटी हारि तुकडा कीसि तिनुंदुर.

10 ईर गुळिता सककगा इनना गलमातगा बिचचम तलुकुकुनानोर इंचि लोकुकल एरपाट कीकुलतुर. ओर बेस आतद हळसि, इद बल्हा आता इंचि अंतोर वेरियसि इचंत्रमते अरतुर.

पत्रु पेनदा पोलेल्ले वेहतोर

11 आ कुंटी मनकल पत्रु आनि योहानुन पीसि नित्तिसि मत्तोर. ओर सुलेमान राजाना पंदिरतगा मत्तस्के अंतोर लोकुकल इचंत्रम आसि आ जेगातगा विचि वातुर.

12 ओर्कुन हळसि पत्रु इल्हा वळकालय दलगतोर. “ए इन्नाएलता लोकुकुनिटा, मिमेट जर्गतदुन हळसि इल्हा बारि इचंत्रम आसि माहेके हळसेक मंतरि? मोमोट मावा ताकतते, मावा बकितते ईन ताकानाल-तिरियानाल किया हिल्लोम.

13 अब्राहाम, इसाक आनि याकोबुना पेन, इत्ते मना एनकाटोरा पेन, दाना सेवक येसुक कदर हीता. गानि मिमेट ओन दोर्कापीसि हळकालय हीतिर. अथना पिलातुस ओन होळसियाना विचारम कीतस्के मिमेट ओन होळसियामनि इत्तिर.

14 पवित्र आनि नीतिमंतुड* मत्ता येसुन ओपुकुन्ना हिल्लिर, गानि वेरेंतोर जीवां तेंडाना पापि मनकन गावाले इत्तिर.

15 मिमेट लोकुकुकुं बस्केळक पिस्साना पिस्वरता हरि हूपसानोन हळकतिर, गानि पेन ओन हातोरावेटाल मर्रा जीवा अरहता, दीना मोमोट गवाइ मंतोम.

16 मोमोट येसुन नम्मुताहाटी* ओना पोरोलतेन ईर कुंटी बेस आतोर. ई मनकन मिमेट हळतिर, एरपाट कीतिर. येसुना पोरोटा विस्वासमतेन ई मनकल पुरागा बेस आतोर. इदंता मी मुन्नेन जर्गुता.”

17 “नावा दादालोर तम्मूहकनिटा! मिमेट आनि मीवा राज्येम कियानोर बतल कीतिरो अद मीकु तेळियवा हेंकेन कीतिर इंचि नाकु र्कें.

18 येसु किरिस्तुक तकलिप अर्रापीता इंचि पेन दाना कबुरतोर्कुना हेंदाल मुन्नेन वेहचि मत्ता, अद इंदके पूरा आता.

19 दानहाटी मिमेट मनसु मासंकुचि पेनदाहेके तिरियसि वाते, मीवा पापालक पाय्शि दांता. अस्के मीकु पेनदा मुन्ने आत्मिक सातिता वेला वायार.

20 पेन मुन्नेटाले तयार कीसि इरता येसु किरिस्तुन मीहाटी लोहार.

21 गानि पूरा दुनियातुन मोदाटालेसी बेस कीतन, इंचि पेन वेल्ले मुन्नेने पवित्र कबुरतोरहेंदाल वेहचि मत्ता. अद कालम वायनादाका किरिस्तु स्वर्गमतेन मनंतोर.”

22-23 “पेन मीवा लोपोटाले वरोन नावसोंटा पेनदा कबुरतोन लोहार, ओर वेहतापे मिमेट ताकाना, बोर अयते ओर वेहताप ताकोर, ओर वेहताप ताकानोरवेटाल वेरें आसि नासडेम आंतोर, इंचि मूसाल वेहचि मत्तोर.

24 अचोने आयका, सामबेल आनि ओना पज्जो वाता पेनदा कबुरतोर अंतोर इव रोजकुना बारेमते वळुकुतुर.

25 ‘नीवा वंसमतोराहेंदाल बूमि पोरोटोर्के अंतोर्के आसिर्वाद दोर्केता’ इंचि पेन अब्राहामुनतोनि इत्ता. मिमेट अयते आ करार कीता एनकाटोरा आनि पेनदा कबुरतोरा पिलालक आदिंर.

26 पेन ओना सेवक येसुन मर्रा जीवा अरहतस्के, मीकुन कराब हरदाल तापिचि आसिर्वाद हियनाहाटी मोदाला मीहेके लोहता,” इत्तोर.

4

पत्रुन, योहानुन पंचादिता मुन्ने निलाहमळ

1 पत्रु आनि योहान लोकुकुकुनतोनि वळकसेके मननेके पेर्मालोर्के, गुळिता कावेल कियानोरा दरोगाल आनि सदुकिर ओरगा वातुर.

2 येसु बल्हा अयते हातोर लोपोटाल मर्रा जीवाते तेदतोर, अल्हेने हातोर मर्रा जीवाते तेदंतुर इंचि पत्रु आनि योहान लोकुकुकुकुं करामळतुन हळसि ओर्कु इरगा होंग वाता.

3 पजा ओर ओर्कुन पीतुर गानि पोळ्दु होत्ता इंचि इंकुंदि रोजुनदाका ओर्कुन जेलने बंद कीसि इरतुर.

4 गानि बोर अयते ओरा पोलेल्ले केंजतुरे, ओरावेटाल वेल्लेन मंदि येसुनपोर्रा विस्वासम कीतुर. विस्वासम कीतोरा लोपोटाल मांडसा दग्गेर-दग्गेरा हेय्युं वेयकुनदाका आतुर.

5 इंकुंदि रोजु यहुदि पेदु दालक, राज्येम कियानोर आनि दर्मसास्त्रम कराहना गुरूक* येस्सलेमते जमा आतुर.

6 इका पेदु दा पेर्माल हन्नाल ओना जीवातोर कयपाल, योहान, सिंकंदर आनि ओना लोतुर अंतोर अगा मत्तुर.

7 ओर पत्रुन आनि योहानुन ओरा नड्डुम निलाहचि, “मिमेट बद ताकतते, बोना पोरोलते इव कबाहक कीतिर?” इंचि ओर्कुन पूसकीतुर.

* 3:14 पवित्र आनि नीतिमंतुड पिसागोटनोर (बोर पिसागोटनोर वायानोर मत्तोर ओना बारेमे ई पोलेल्ले वेहचि मत्ता ओर येसु किरिस्तु आंतुर.)

* 4:5

दर्मसास्त्रम कराहना गुरू ईर दर्म नियमते मनना पोलेल्ले कराहंतुर.

8-9 अस्के पत्रु पवित्र आत्माते निडसि इल्हा वळकालय दल्गतोर. ए लोकलुकुनपोर्रो राज्येम कियानोरिता अल्हेने पेद्दाल्कुरिता! इथ्याला वरोन कुंठिन बेस कीताहेंके, ओर बल्हा बेस आतोर, इंचि माकुन तल्कसेक मंतर.

10 अय्ते मीकु अंतोर्क आनि इझाएलता लोकलुकुक, नासरेत नाटेना येसु किरिस्तुना पोरोलतेन ई मनकल बेस आसि मी मुन्ने नित्तिसि मंतर इंचि तेळियमळ गावाले. मिमेट, मीवा लोकलुक, येसु किरिस्तुन क्रूस पोरोर् मोल्लां कोहकिसि हळ्कतिर गानि पेन ओन हातोर लोपोटाल मर्रा जीवाते तेहता

11 “मिमेट लोन दोहालय कबळ्क वायो इंचि पोहता बंडे, इंदके लोतुक अक्सरमाता बंडा आता, इंचि दर्मसास्त्रमते रासि मंता. अंदे बंडा ई येसु आंदुर.”

12 येसुना पोरोल तप्पा मब्बुना हिळ्ळ मनानोरा बोना पोरोले मनाकुन पापमताल पिसागोट्टो, इंका बोरे मनाकुन पिसागोट्टोर,” इंचि वेहतोर.

13 ओर पत्रुन आनि योहानुन हळसि इस्कुल करियबोर, सादा मनकालोर आंदुर इनकुत्तुर, गानि ओरा दैरेनेम हळसि इचंत्रम आतुर. अस्के ईर येसुनतोन मत्तोर आंदुर इंचि ओर्कुन एरपाट कीतुर.

14 बेस आता कुंठि ओरतोन नित्तिसि मत्तद हळसि ओर्कु अड्डम बतल वळका पराहिल्लुर.

15 अदुनहाटी ओर पत्रुन आनि योहानुन इगोटाल पलाते होंट इंचि इत्तुर आनि वरोंक-वरोर विचारम कियालय दल्गतुर गदा,

16 ई मनकालोर्कुन मनम बतल कीकोम? येस्सलेमते मनानुर अंतोर्क ईर कुंठिन बेस कीता चिन्ह एरपाटे, अदुन मनम निजम आयो इंचि इना परोम.

17 गानि इद पोल्ले एक्को लोकलुकुक तेळियामान्नि इत्ते ओर्कुन मनम, मिमेट येसुना पोरोल इंका बोना मुन्ने एतमट, इंचि वेराहकोम, इत्तुर.

18 अस्के ओर्कुन मर्रा केय्सि, “मिमेट येसुना पोरोलते बतले वळ्कमट, बतले कराहमट,” इंचि आदेस हीतुर.

19 गानि पत्रु आनि योहान, “पेनदा पोल्ले केंजाका मीवा पोल्ले केंजमळ इद पेनदा मुन्ने न्यायामेना? मिमेटे वेहाट.

20 बदायते मोमोटो हळतोम, केंजतोम अदुन वेहाकोंटा मनमळ मावातोनिया आया परो,” इंचि इत्तुर.

21 अगा जर्गुतदुन हळसि, अंतोर लोकलुक पेनदा स्तुति कियालय दल्गतुर. अदुनहाटी लोकलुकुना वेंके ओर्क सिक्सा हियाका, ओर्कुन मर्रा वेराहचि होळसीतुर.

22 बोर मनकल अय्ते चमत्कार आसि बेस आतोर, आ मनकल नल्पै वर्साना पोरोर् मत्तोर.

पत्रु आनि योहान विस्वासलुकुना गाल्सि वातुर

23 पत्रुन, योहानुन होळसीतस्के ओर ओरा दंतातोरगा वापस वासि, पेद्दा पेर्मालोर्क, यहुदि पेद्दाल्क इत्ता पोल्ले अंता ओर्कु वेहतुर.

24 ओर वेहतद केंजसि, ओर अंतोर कलियसि उंदे पेद्दा आवाजते पेनदुक पारतना कियालय दल्गतुर. “सामि! मब्बु, बूमि, समुदम आनि अबुना लोपो बतल अय्ते मंता, अबुन निमेन पुटिस्तिन.

25 नीवा पवित्र आत्माताहेंदाल नीवा सेवक, मावा एनकटा पेद्दा मनकल दाविद राजाना तोळ्दाल निमे इल्हा वेहतिन गदा, वेंरे जाति लोकलुक बारि लोल्लिं कीतुर? लोकलुक वट्टिदे अक्सरम हिल्ला पिलानकु बारि कीसेके?

26 ई बूमिपोर्रा राजालोर पेनदुक अड्डम लडाइहाटी तयार आतुर. राज्येम कियानोर अंतोर उंदि आसि, पेनदुक आनि दाना किरिस्तुक अड्डम, आतुर.”

27 “निजमे, निमे पेरकुंचि लोहचीता नीवा पवित्र सेवक येसुना विरोदमते हेरोद आनि पुंतुस पिलातुसगुडा वेंरे जातितोरतोन, इझाएल लोकलुकुनतोन कलियसि उंदि आतुर.

28 बारित्ते नीवा ताकत नीवा इच्चते इल्हा जर्गना इंचि निमे मुन्नेने निरनायम कीतिन. अल्हेने जर्गसि पूरा आता.

29 अदुनहाटी, सामि! इंदके ओर वेराहसेक हळ्ळा, नीवा पोल्ले दैरेनेमते वेहालय सेवाकुलुकुक बलम हीम.

30 रोगाल्क बेस कियालय, नीवा पवित्र सेवक येसुना पोरोलते चिन्हां, इचंत्रमता कबाहक किया परालय नीवा कय हाहचि बलम हीम,” इंचि पारतना कीतुर.

31 पारतना कीतारित्ते, ओर जमा आसि मत्ता जेगा मेदुलता, ओर अंतोर पवित्र आत्माते निडिसोचि पेनदा पोल्ले वेरियाकोंटा वेहालय दल्गुतुर.

विस्वासलुक उंदि आसि मनुंदुर

32 विस्वासुल्क अंटोर उंदि मनसु, उंदि जीवा आसि मत्तुर. बोरन्ना आयि बदे सोम्मु, इद नावद इंचि इनाकोदुर, गानि बोनगन्ना बतलन्ना मत्ते दान तुसकुनुंदुर.

33 येसु सामि हासि मर्रा जीवाते तेदतोर, इंचि ओना पेददा ताकतते प्रेरित्कुल गवाइ हियुंदुर. इल्हा ओर अंटोरपोर्री पेनदा कुर्पा मत्ता.

34-35 ओरा लोप्पो बोनके बतल तक्को मनाहिल्ले. बूमि, लोहकु मत्तोर, अबुन अम्मिसि वाता कोत्तन तच्चि प्रेरित्कुलुकुं हियुंदुर. बोन्क बच्चोर गरज मंता अच्चोर तुसि हियुंदुर.

36 साइप्रस दीबिते पुटता योसेप इनना लेवि वंसमतोर वरोर मत्तोर. ओन्क प्रेरित्कुल बरनाबास इंचि पोरोल दोस्तुर. बरनाबास इत्ते “अंटोर्कुन समत कियना मनकल” इंचि अर्तम.

37 ओर ओना नेलितुन अम्मिसि वाता कोत्तन अंता प्रेरित्कुलुकुं हीतोर.

5

हनन्या आनि सपीरा

1 हनन्या पोरोलतोर वरोर मनकल अल्हेने ओना मुत्तो सपीरा, ईर इव्वुर कळसि ओरदे इच्चो बूमितुन अमत्तुर.

2 वाता कोतानाल इच्चुं कोत्तां इरकुत्तोर इंचि ओना मुत्तोक एर्के मत्ता, कडमता कोत्तां ओसि प्रेरित्कुलुकुं हीतोर.

3 अदुन हळसि पत्रु, “हनन्या! निमे बूमि अमता कोत्तानाल इच्चुं कोत्तां इरकुत्तिन. अय्ते पवित्र आत्मातोनि आबद्दम वळकालय नीवा मनसुने देय्यम बारि होळियता?

4 आ बूमि अम्मका मुन्ने नीवदे मत्ता गदा! अम्मुत्तंकागुडा वाता कोत्तन पोर्री नीवदे अदिकारम मत्ता. अय्नागानि पेनदुक इस्टम हिलवद कबळ कियालय नीवा मनसुने बल्हा वाता? निमे मनकलोरतोनि आयो गानि पेनतोनि आबद्दम वळकतिन,” इंचि इत्तोर.

5 ई पोल्ले केंजतारित्तेन हनन्याल हिळु अर्सि जीवा होळसतोर. अचोने आयका ई पोल्ले केंजतुर अंटोर्क पेददा वर्रे दलगता.

6 अस्के लेय्युर्क तेदसि ओन्क कपडि हट्टिस* पलाते ओसि बौदा दोस्तुर.

7 दग्गेर-दग्गेरा मूड गंटां आतंका ओना मुत्तो लोप्पो वाता. अगा बतल जर्गुता दान्क तेळिया हिल्ले.

8 अस्के पत्रु अद वातद हळसि, “मीवा बूमि इच्चोट्टके अमतिरा वेहा!” इंचि तलकतस्के, “आ इच्चोट्टके अमतोम,” इंचि अद इत्ता.

9 पत्रु दान मर्रा, “मिमेट इव्वुर सामिना आत्माता परिकसा बारि हळालय दलगतिर? हळ्हा नीवा मुय्दोन बौदा दोसतोर गलमातगेन एवतुर, ओर नीकुन इंका अल्हेने ओयानुर.” इंचि इत्तोर.

10 ओर अल्हा इत्ता इन्मळे अद ओना काल्कुन मुन्ने अर्सि अल्हेन जीवा होळसीता.† पजा दाना मुय्दोन बौदा दोस्ता लेय्युर्क लोप्पो वासि हळतस्के अद मूरतळ हासि दिसता. ओर दान इंका तेहकुचि ओसि दाना मुय्दोना पक्काते बौदा दोस्तुर.

11 अस्के येस्सलेमता कलिसियातोर अंटोर, ई पोल्ले बोर अय्ते केंजतुरो ओर अंटोर बागा वेरियतुर.

प्रेरित्कुना कय्दे इचंत्रमता कबाहक

12 अल्हेने प्रेरित्कुना कय्दाल वेल्ले चिन्हां, इचंत्रमता कबाहक लोकुल्कुना मुन्ने आयुंदुं. विस्वासुल्क अंटोर गुळिते सुलेमान राजाना पंदिरतगा बस्केळक उंदि मनसुने जमा आयुंदुर.

13 अविस्वासुल्क ओरतोनि कलियालय वेरियुंदुर, गानि विस्वासुल्कुना बेस कदर कियुंदुर.

14 अयना वेल्लेन मंदि मुर्ताहक-मांडसा सामिन विस्वासम कीसि ओरगा वासि कलियुंदुर, इल्हा एक्कोते एक्को मंदि बेरस्सेक होत्तुर.

15 प्रेरित्कुना कबाहकन हळसि लोकुल्क बिमार मत्तोर्कुन कटुल्कुने, केत्तिने पत्रु होनना हर्दांगा तच्चि ईर्सुदुर. पत्रु होननेके ओना नीडाय्ना बिमारतोर पोर्री अरते ओर बेस आयनुर इंचि लोकुल्कुना आसे मनंदु.

16 अचोने आयका येस्सलेम सहरता पक्का पीसि मत्ता नाहकुनाल वेल्लेदुर बिमार मत्तोर्कुन, देय्याल्क पीतोर्कुन अगा पीसि वायुंदुर. ओर अंटोर प्रेरित्कुना कय्दे बेस आयुंदुर.

प्रेरित्कुन जेलने वाटमळ

17 अस्के पेददा पेर्माल, ओनातोनि मत्ता सदुकिर्क, प्रेरित्कुन हळसि ओरा मनसु मसुलुंदु.

18 अदुनहाटी प्रेरित्कुन पीसि जेलने वाटतुर.

* 5:6 कपडि हट्टिस अद कालमते हाता मनकन कपडि हट्टिस बौदा दोस्तुर. † 5:10 अल्हेन जीवा होळसीता हनन्याल आनि सपिरल बूमि अमता कोत्तां पूरा हीतोम इंचि आबद्दम वळकतुर इंचि सिक्सा दोर्कता.

- 19 गानि अदे नर्का उंदि पेनदा द्ता वासि जेलना तल्पु तेंडसि ओर्कुन पलाते ओता.
- 20 ओसि, “होंट, गुळिते नित्तिसि ई पना पिस्वरता अन्नि पोल्ले अंटर लोकुकुकुं वेहाट्,” इंचि ओर्कु वेहाता.
- 21 पेनदा द्ता वेहतद केंजसि ओर पोळ्दु पेय्शतंका गुळिते होंचि लोकुकुकुं कराहलय दलग्गुतुर. हीके, पेद्दा पेर्माळि आनि ओना दंटातुर, इस्नाएलता अंटर पेद्दालुकुन पंचादिते केय्शि, प्रेरित्कुकुन जेलनाल तायालय लोहतुर.
- 22 गानि सिपाइल्क जेलने होंचि हळतस्के अगा प्रेरित्कुकु मना हिल्लुर, अदुनहेंके ओर मल्लिसि वासि,
- 23 “जेलता तल्पुकुकु अय्ते तालम वाटसि मत्ता. सिपाइल्कगुडा गलमानगा नित्तिसि मत्तद मोमोट हळतोम, गानि तल्पु तेंडसि लोपो हळतस्के लोपो बोरे मना हिल्लुर,” इंचि वेहतुर.
- 24 गुळितगा कावेल कियानोरा अदिकारि आनि पेद्दा पेर्माळोर इद केंजसि, “इंदके बतल आयार” इंचि वेल्ले विचारम कियालय दलग्गुतुर.
- 25 अस्के बोरो वरोर मनकल वासि, “हळट, मिमेट जेलने वाटतुर गुळितगा नित्तिसि लोकुकुकुं येसुना पोल्ले कराहसेक मंतुर.” इंचि वेहतोर.
- 26 अस्के आ अदिकारि, गुळिता कावेल कियानोर्कुन पीसि गुळितगा होत्तोर. होंचि, लोकुकुकु मापोर्रे बंडां हुक्सि हळकानुर इत्ता, वेंरिते ओर्कुन बतले बल्मि कियाकोटा पंचादितगा तल्लोर.
- 27 ओर्कुन पीसि तल्लिचि पंचादिता मुन्ने निलाहतोर. अस्के पेद्दा पेर्माळि ओर्कुन,
- 28 “ई येसुना पोरोलते कस्हमत इंचि मोमोट मीकुकु कडक आंदेस हिग्यिना गानि मिमेट पूरा येस्सलेम अंता ओना पोरोलते कराहतुर. अचोने आयाका ओन मोमोटे हळकतोम इंचेके मावा पोर्रे तल्पु दोसालय हळसेक मंतिर,” इंचि इत्तोर.
- 29 अदुनहाटी पन्नु, कळमता प्रेरित्कुकु, “माकुकु मनकालोरा पोल्ले आयो, गानि पेनदा पोल्ले केंजा पीता.
- 30 मिमेट येसुन कूस पोर्रे वेलाड वाटसि हळकतिर गानि मावा पेद्दालुकुना पेन ओन हामुरताल मर्रां तेहता.
- 31 हामुरताल तेहचि ओने पेन, राजाल आनि पिसागोटनोर इंचि निलाहता. मावा इस्नाएलता दादालोर्कुं क मनसु मार्सकुनालय, पापालुकुनाल मापि कियालय पेनदा तिना बाजुकु ओन कदर हीसि उपिस्ता.
- 32 इव अन्नि पोल्लेनहाटी मोमोट गवाइ मंतोम. पेनदा पोल्ले केंजसि ताकानोराहाटी पवित्र आत्मागुडा गवाइ मंता,” इंचि इत्तुर.

गमलियेल पेद्दा पंचादिता लोकुकुकुन सांत कीतोर

- 33 ओरा पोल्ले केंजसि, आ पंचादिता पेद्दालुकुकुं होंग वासि ओर्कुन हळकना विचारम कीतुर.
- 34 गानि पंचादितगा गमलियेल पोरोलतोर वरोर परिसि, ओर मूसाना नियमता गुरूजिगुडा मत्तोर, ओन अंटर कदर कियुंदुर. ओर तेदसि प्रेरित्कुकुन गडसेम पलाते ओयालय वेहतोर.
- 35 ओर्कुन पलाते ओतस्के, ओर पंचादिता मुन्ने, “मावा इस्नाएलता लोकुकुकुनिटा! मिमेट ओर्कुन बतल कीतोर इंचितोर, बेस विचारम कीसि कीम्टु.
- 36 बारिले कोन्नि रोजुकु मुन्ने तियुदास पोरोलतोर वरोर मनकल, ‘नना पेद्दोन’ इंचि वेहकुत्तोर. ओना पज्जो नालुं न्हुकुना मंदि इंका मत्तुर. गानि ओन हळकतुर, अस्के ओना पज्जो ताकानोर अंटर बेंदोर-हेके पायसि होत्तुर.
- 37 अद आता पज्जो सिरगंतिता वेलाते गालिलि एरियाता यहदल इनानोर वातोर. ओर इंका वेल्लेने लोकुकुकुन ओनाहेके कीकुत्तोर गानि ओन इंका हळकतुर. ओना पज्जो ताकानोर अंटर बेंदोर-हेके पायसि होत्तुर.
- 38 अदुनहाटी इंदके इंका नना मीकुकु वेहसेक मंतन, मिमेट पीतोर्कुन बतले कियमट, ओर्कुन होळसीम्टु. ओरां विचाराल्क, ओरां कबाहक मनकानव मनानय्ते मायसि दांतां.
- 39 गानि पेनदाहेंदाल मनानय्ते दान मिमेट आपा परिर, मिमेट आपालय हळते मात्रम पेनदुकु अड्डम आंतिर,” इंचि इत्तोर.
- 40 अस्के पंचादितोर, गमलियेलना पोल्ले केंजतुर. पजा प्रेरित्कुकुन लोपो केय्शि ओर्कुन पोर्टेते तन्ना वेहचि, येसुना पोरोलते बग्गेन वेहमट इंचि वेहचि होळसीतुर.
- 41 प्रेरित्कुकुन होळसीतस्के, येसुना पोरोलताहाटी मोमोट देब्बां तिल्लोम, इंचि बेस आनंदमते पंचादिताल पेय्शि होत्तुर.
- 42 रोज गुळितगा, लोन-लोन होंचि, येसु इरे किरिस्तु आंदुर इंचि पेनदा बेसता कबुर वेहामळ, कराहमळ होळसा हिल्लुर.

6

एडुरकुन पेर्कुनमळ

1 इल्हा विस्वास्लुकु वेल्लेन बेस्सेक होत्तुर. अय्ते अवे रोजकुने युनानि बासा वळकाना यहदिलुकु, इब्बानि बासा वळकाना यहदिलुकुनतोनि, “रोज हिग्यिना गाटोता बारिमते मावा मुंडामोस्ता मुरताहकुनहेके बेस हळसेक हिल्लिर,” इंचि जगडम दोस्तुर.

2 अस्के आ पनॅड मंदि प्रेरित्लुक अंटेर विस्वासुलुकुन उंदगा केय्मि, “पेनदा पोल्लें कराहमळ पक्कक इरसि गाटो पंचि तासेक मनमळ मावाहाटी बेस आयो.

3 अदुनहाटी नावा विस्वासुलुकुनिटा! मिमेट मीवळेटाले बेस कदर, बुद्दि आनि पवित्र आत्माते निडिस मत्ता एडुर मांडसातुन पेरुकुट. मोमोट ओर्कुन ई कबळ पोरो ईरातोम.

4 अस्के पारतना, पेनदा पोल्लें कराहना मावा सेवा कबळ आगाकोटा जर्गसेक मनता.” इंचि वेहतुर.

5 इद पोल्ले अंटेर्कुंक नचुत्ताहेंका ओर विस्वासमते, पवित्र आत्माते निडिस मत्ता स्टिपन इनानोन पेरतुर. ओन वरोने आयका पिलिपुस, परकोरस, निकानोर, तिमोन, परमिनास आनि अंताकिया नाटेना निकोलस (ईर ओना जाति होळसि यहुदि जातिते वातेर) पोरोलतोर्कुन पेरतुर.

6 पजा ईर एडुरकून प्रेरित्लुकुना मुन्ने निलाहतुर. अस्के प्रेरित्लुक ओरपोरो कय इरसि पारतना कीतुर.

7 इल्हा पेनदा पोल्ले वेल्लेन मंदिक एवसेक होता. येस्सलेमते विस्वासुलुकुगुडा वेल्लेन आतुर. अचोने आयका वेल्लेन मंदि यहुदि पेर्मालोर्कगुडा विस्वासमते वातुर.

यहुदिल्क स्टिपनुन पोरो एकरेवुलक वेहांतुर

8 पेनदा कुपाते, ताकतते निडिस मत्ता स्टिपन लोकुलुकुना मुन्ने पेद्दा-पेद्दा इचंत्रमता कबाहक, चिन्हां कियुंदुर.

9 गानि स्वतंत्रम दोर्कुता यहुदि लोकुलुकुना* दर्मसास्त्रम कराहना लोताल इचचुर लोकुलुक वासि स्टिपनुनतोनि जगडम दोसकुलतुर. आ लोकुलुकुने कुरोनि, सिंकंदरिया इनना सहरकुने मनना यहुदि लोकुलुक आनि किलिकिया, आसिया इनना एरियान पीसि मनना यहुदिल्कु मत्तुर.

10 गानि वळकानाहाटी पवित्र आत्मा स्टिपनुंक तेल्चि हीता. अदुनहाटी आ लोकुलुक ओना पोल्लेंक अडुडम वळका पराहिल्लुर.

11 पजा आ यहुदि लोकुलुक वेतेतोर्क तेळियाकोटा इचचुर लोकुलुकुंक लंचम हीसि, स्टिपन, मूसानद आनि पेनदा अपमानम आयना पोल्लें वळकानेके मोमोट केंजतोम, इल्हा आबदुदम वळकालय वेहतुर.

12 अल्हेने ओर आगाटा लोकुलुकुन, यहुदि पेद्दालुकुन, दर्मसास्त्रम कराहना गुल्लुकुनगुडा एक्किस्तुर. अस्के ओर स्टिपनुन दोर्कापीसि यहुदिल्कुना पेद्दा पंचादिते तल्लुर.

13 अथे आ पंचादिते लंचम तित्ता गवाइदार्क निलसि, “ई मनकल पवित्रमाता जेगा इते गुळिता बारेमते इंका मूसाल वेहता नियमता बारिमते तप्पुड पोल्लें बस्केळक वळकसेक मनांतोर.

14 बारित्ते, नासरेत नाटेना येसु इद गुळितुन कूलाह्चि नासडेम कियानुर आनि मूसाल वेहता रीति-रिवाजकुन बदलांचनुर, इंचि वेहनेके मोमोट केंजतोम” इल्हा गवाइ हीतुर.

15 अस्के अगा पंचादिते उद्दिदस मत्ता अंटेर लोकुलुक स्टिपनुनहेके बागा हळतुर. अथे ओर्कु स्टिपनुना मोकम पेनदा दूताता मोकमलेहका दिसता.

7

स्टिपनुना बासन

1 पजा पेद्दा पेर्मांल, “ईर वेहना पोल्लें निजमेना?” इंचि स्टिपनुन पूसकीतोर.

2 अस्के स्टिपन ओर्कु इल्हा वेहालय दल्लुतोर, “नावा दादालोर आनि बाबानसोंटा पेद्दालुकुनिटा! नना वेहनद केंजट. मना एनकटा पेद्दा मनकल अब्राहाम मातरल मेसोपोटामिया देसेमतुन होळसि हारान इनना सहरते हेराका मुन्नेन पेन दाना महिमाते ओन्क दिसता.

3 दिस्सि, निमे नीवा देसेमतुन, नीवा जीवातोर्कुन होळसिसि नना नीकु हुपिचना देसेमते होन, इंचि ओन्क वेहता.

4 अस्के अब्राहाम कसदिल्कुना देसेम होळसि हारान एरियाते होंचि मनालय दल्लुतोर. ओना बाबाल हासोत्तंका पेन ओन अगटाल इंदके मिमेट मनना ई देसेमते लोहता.

5 अयना पेन इगे ओन्क अळगुमेड बूमिगुडा हिथ्या हिल्ले. गानि ओन्क संतानम हिल्लुवा रोजकुनेगुडा पेन, ई देसेमतुन, ई बूमितुन नीकु हीतन, नीवा पज्जोटाल वायाना नीवा वंसमतोर्कुंक हीतन, इंचि ओन्क पोल्ले हीता.”

6 “अचोने आयका पेन ओनातोनि, नीवा वंसमतोर वेरे देसेमते होंचि मनांतुर, अगाटा लोकुलुक नीवा वंसमतोर्कुन नालुं नुहकुना वर्सानदाका गुलामगिरिते इरसि, वेल्ले तकलिप हीतुर.

7 गानि बोर अथे नी वंसमतोर्कुन गुलामगिरिते इरांतुरो ओर्कु नना सिक्सा हीतन, पजा नीवा लोकुलुक अगटाल पेय्सि वासि इद जेगाते नाकु पूजा कियानुर, इंचि वेहता.”

* 6:9 स्वतंत्रम दोर्कुता यहुदि लोकुलुक यहुदिल्कुना गुलामगिरिताल पेय्यता यहुदि लोकुलुक. ईरद वेरे उंदि दर्मसास्त्रम कराहना लोन मत्ता.

8 “पजा पेन अब्राहामुनतोनि कतना* इनना उंदि करार कीता. अदुनहाटी अब्राहामुंक इसहाक पुटतस्के ओर एनमिदि रोजकुनोर मनानेकेन ओना कतना कीतोर. इल्हेन इसाकुंक याकोब पुटतोर. पजा याकोबुंक पन्नेडु मंदि मर्कु पुटतुर. ईरद अंतोरदगुडा कतना आता. इल्हा ई पन्नेड मंदि मर्कुनाले मुन्ने इझाएलता पन्नेड वंसाल्कु तयार आतां. ईर ई पन्नेड वंसाल्कुना मोदोल मनकालोर आतुर.”

9 “याकोबुना मर्कु ओराष्टेटाल योसेप इनानोन पोरो अळदुर. अदुनहाटी ओर ओन इजिप्त देसेमते गुलामगिरि कियालय अमतुर, गानि ओना पेन ओन्क सायता मत्ता.

10 ओन अन्नि कस्टालकुनाल दक्किस्ता. इंका पेन ओन्क बेस बुद्धि हीता. पेन हीता बुद्धितोनि ओर इजिप्त देसेमता पिरोन राजाना मनसु गेल्सकुत्तोर. पजा इजिप्त देसेमता पिरोन राजाल ओना देसेमपोरो, ओना राजवाडानपोरो अदिकारि इंचि इरतोर.”

11 “अचचोटेन कनान आनि इजिप्त देसेमते पेददा करवु अर्सि लोकुल्क इरगा कस्टालकुने अरतुर. इंका मना एकटा पेदु दाल्कुंक तिनालय बतल दोर्काकोटा आता.

12 इजिप्त देसेमते गाटो मंता इंचि तेळियतस्के याकोब मना एकटा पेदु दालकुन अगा मोटाटा-मोदाटा मल्का लोहचीतोर.

13 ओर रौडो मल्का होतस्के योसेप ओना बारेमते ओना दादालोर-तम्मुहकुंक वेहतोर. अस्केन पिरोन राजांकगुडा योसेपना कानदानता बारेमते एरपाट आता.

14 अस्के योसेप ओना बाबाल याकोब आनि कानदानता अंतोर्कुन इत्ते पूरा डेब्वै हेय्युर मंदितुन इजिप्तते केया लोहतोर.

15 अस्के याकोब इजिप्त देसेमते होतोर. अग्गेन याकोब आनि मना अंतोर एकटा पेदु दाल्क इंका हातुर.

16 पजा ओरा पीनगुल्कुन इझाएल देसेमता सेकेम इनना सहर ओसि. अगा हामोर इनना मनकना मर्कुनहैदाल नगदि कोत्तां हीसि अब्राहाम उंदि बौदा अस्सि मत्तोर, अदे बौदाते ईरदगुडा गति कीतुर.”

17 “अब्राहामुंक पेन हीता पोल्ले पूरा आयना वेला दग्गेर्क एत्ता, अस्के इजिप्त देसेमते मना लोकुल्क वेल्लेन आतुर.

18 कोन्नि रोजकु आतारित्ते योसेपुन बारेमते बतले एरपाट हिलुवा बोरो वरोर दुस्त मनकल इजिप्त देसेमता राजाल आतोर.

19 ओर राजाल मना लोकुल्कुंक वेल्ले तकलिप हीतोर. मना लोकुल्कुना पिलाल्क पिसा मन्नि इंचि ओर्कुन पलाते पोहचियालय वेहतोर.”

20 “अदे कानमंते मूसाल पुटतोर. पेनदा नदरते आ पेडल सक्कगा मत्तोर. आ पेडल मूड नेल्क ओना बाबाना लोते मत्तोर.

21 पजा बस्के अयेते आ पेडन ओना तल्लुर-बाबो पलाते होळसीतुरो अस्के पिरोन राजाना मिय्यड ओन तेहकुंचि ओसि, दाना मरिनलेसी पोस कीता.

22 मूसांक इजिप्त देसेमता बेसता विदुदे कराहमळ जर्गता. मूसाल पोल्लेने आनि कबळते रौडुने इंका बेस हुसार मत्तोर.”

23 “ओर नल्चै वर्सानोर आतोर अस्के ओना लोकुल्कुंक इत्ते इझाएलना लोकुल्कुंक होंचि कलियना मनसु आता.

24 पजा अगा होततस्के इझाएल लोकुल्कुनाल वरोन मनकनपोरो इजिप्त देसेमता वरोर मनकल अन्यायम कियानद हळतोर. हळसि आ अन्यायम कियना इजिप्त मनकन हळ्किंसि आ इझाएल मनकन कापाळसि ओना बदला एततोर.

25 इझाएल लोकुल्कुन पिसागोटनाहाटी पेन ओन वाळकुंचंता इत्ता संगतितुन ओना लोकुल्क एरपाट कीतुर इंचि ओर इन्कुत्तोर, गानि अद ओर्क तेळिया हिल्ले.

26 इंकुंदि रोजु ओना लोकुल्कुनाले बोरो इव्वुर मनकालोर उँ अरनद हळसि ओर्कुन कल्पना उदुदेसमते, अरे मिमेट बसंटा मनकालोर आंदिर? दादल-तम्मुहक आसिगुडा, वरोनपोरो वरोर अन्यायम कीसंतिर! इंचि ओर्कुन इतोर.

27 अस्के ओना पक्कातोनपोरो अन्यायम कीसेके मत्ता मनकल मूसन पक्कक दोब्बिसि, माकुन जगडमताल पापसि, मावा न्यायम कियना अदिकारम नीकु बोर हीतोर?

28 निन्ने आ इजिप्त मनकन हळ्कुताप, नाकुनगुडा हळ्कतन इनकुंचंतिना?” इतोर.

29 इद पोल्ले केंजसि मूसाल इजिप्त देसेम होळसिसि मिदान देसेमते पोय्न्सि होतोर. अगा होंचि वरोर पराय देसेमतोनलेसी पिसालय दल्युत्तोर. अग्गेन मरमि आतोर, अस्के ओन्क इव्वुर मर्कु पुटतुर.

30 इल्हा नल्चै वर्सा आसि होत्तां. अयेते उंदि रोजु मूसांकु सिनाइ इनना गुट्टा दग्गेरा बय्लि जेगाते पोत्तना पोदाता लोपो उंदि पेनदा द्ता दिसता.

31 अदुन हळसि मूसांक इचंक्रम आता. दग्गेर्क होंचि बेस हळकोम इंचि मुन्नेळ्क अळगु वाटनपेडकु ओन्क पेनदा अल्किर केंजावाता.

32 पेन मूसनतोनि, नना नीवा एकटाटोरा तादो-बाबुरा पेनदुन आंदुन, इत्ते नना अब्राहाम, इसाक, याकोबना पेनदुन आंदुन, इंचि वळ्कुतोर. अस्के मूसाल इरगा वेरियकुत्तोर. ओन्क तला तेहचि पोरोळ्क हळना हिम्मत आयाहिल्ले.

* 7:8 कतना इद पदुदत मुसलमान आनि यहूदिल्कु लोकुल्क कीतुर.

33 अस्के पेन ओनु, निमे नित्तिसि मनना जेगा पवित्र जेगा आंदु, नीवा काल्कुना हेरपुहक तेंडा.

34 इजिप्त देसेमते मनना नावा लोकल्कुना तकलिप नना हळतन, ओरा अळमळ नना केंजतन. इंचि ओर्कुन कस्टाल्कुनाल तेंडानहाटी नना हिळु रेयतन. अये वा! इंदके नना नीकुन मर्रा इजिप्त देसेमते लोहंतन. इंचि इत्ता.✱

35 बा मूसन अये इझाएल लोकल्क, माकुन जगडमताल पापसि, मावा न्यायम कियना अतिकारम नीकु बोरे हीतेर? इंचि हय्साकोटा पकाक दोबसीतुरो, आ मूसाने पेन पोत्ताना पोदाते दिसता पेनदा दूताता हेंदाल ओरा राज्येम कियानोर आनि पिसागोटनोर इंचि लोहता.

36 इल्हा मूसाल, एर्रा समुद्रम आनि बय्लि जेगाते नल्पै वर्सनदाका इचंन्रमता कबाहक कीसेक, चिन्हां हुप्पिचेक आ लोकल्कुन इजिप्त देसेमताल पलातुक पेचाहचि तत्तोर.

37 ई, ओरे मूसाल आंदुर, बोरे अये इझाएलना लोकल्कुन, पेन मीहाटी मीवा लोप्पोटाले वरोन नावसोटा पेनदा कबुरतोन लोहंता, इंचि इत्तोर.✱

38 मना इझाएल लोकल्क बय्लि जेगाते मत्तस्के ओरतोनि कलियसि मत्तोर ईरे मूसाल आंदुर. इंका सिनाइ गुट्टापोर्रो पेनदा दूतातोनि ईरे मूसाल वळकुतोर. अचोने आयका पेन दाना पिस्वर हियना पोल्लेन मनाकु एवसानाहाटी बोन्क अये हीतानो ओर ईरे मूसाल आंदुर.

39 गानि मना एनकटा पेदूदाल्क मात्रम ओर वेहताप ताकालय तयार मना हिल्लुर. मर्रा ओरा मनसु इजिप्त देसेमताहेकेन तिरियता.

40 अस्के आ लोकल्क वरोर हास्न† इनानोनतोनि, माकुन इजिप्त देसेमताल पलाते तत्ता आ मूसांक बतल आतानो माकु बतले तेळियसेक हिल्ले. अदुनहाटी मावा मुन्ने ताकालय पेनकु तयार कीम, इंचि इत्तुर.

41 पजा ओर अंतोर कलियसि पेय्यातसंटा उंदि बोम्मा तयार कीसि, आ बोम्मक मोक्कुल्क हियालय दल्गुतुर. आ बोम्मातुन ओरे तयार कीता कुसिते दाना मुन्ने पेदूदा पंडुगु कीतुर.

42 दानहाटी पेन ओरा हेकेटाल मोक्कम तिराहकुचि, मब्बुने मनना पोडदुन, वेडसितुन, सुक्काना पूजा कियालय ओर्कुन कुल्ला होळसीता. इदुन बारेमते पेनदा कबुरतोर पुस्तकमते,

“ए इझाएल लोकुरिटा, मिमेट नल्पै वर्सनदाका,
बय्लि जेगाते मोक्कुल्क, पूजें नावाहाटी कीतिरा? हिल्ले.

43 मिमेट मोलेक इन्ना पेनदा डेरा आनि
मीवा रिपान‡ इन्ना सुक्का पेनदा बोम्मातुनगुडा मीवातोनि ओतिर.

मिमेट मोळ्कानाहाटी मिमेटे तयार कीकुल्ला अन्नि बोम्मां ओतिर.

अदुनहाटी नना मीकुन वेल्लेन लक्कु मनना,

बेबिलोन सहरकन्ना हब्बेर लोहांतन.”✱
इंचि रासि मंता.

44 मना एनकटा पेदूदाल्क केडाते मत्तस्के ओरगा उंदि गवाइता डेराS मत्ता. अद डेरा मूसाल तयार कीता डेरे आंदु, अद डेरा तयार कियका मुन्ने पेन मूसांक उंदि डेरता नमुना हुप्पिचि, अद मत्तापे तयार कीम, इंचि आदेस हीता.✱

45 मना एनकाटोरा मुन्नेटाल पेन पेचाहचि गेदुमता वेरे जातितोरा बूमितुन मना लोकल्क, जोसुवाल इन्ना वरोर मनकन मुन्ने अरहचि एतकुत्तुर. अस्केगुडा इद डेरा ओरगा मत्ता. अद डेरा दाविद राजाना कालमदाका ओरगेन मत्ता.

46 दाविद राजांक पेन आसिर्वाड हीता, अदुनहाटी ओर याकोबुना पेनदाहाटी* उंदि गुळि दोहाना इंचि आसे पडतोर.

47 गानि पेनदाहाटी गुळि अये सुलेमान राजाल दोहतोर.

48 बचचो बतल अय्नागानि पेन मनकल दोहता गुळिते मन्नो. बारित्ते इदुन बारेमते पेनदा कबुरतोर इल्हा रासतोर.

49 “पेन इत्ता, स्वर्गम नावा राजगद्दे† आंदु, ई बूमि नना काल्क ईर्ना पीटे आंदु,
अये मिमेट नावाहाटी बसोटा गुळि दोहा परातिर?

नावा आराम किय्थना जेगा बल्हा मंदार?

50 इव अन्नि नावा कये कीतेवे आयोंगा!”✱

✱ 7:34 निर्गमन 3:2-10 ✱ 7:37 ब्यक्तास्तिवर्न 18:15 † 7:40 हास्न ईर मूसाना दादाल आंदुर. ‡ 7:43 रिपान इद उंदि पेनदा पोरोल आंद. ✱ 7:43 आमोस 5:25-27 § 7:44 गवाइता डेरा इले इद डेरा ओरतोनि मत्ते पेन ओरतोनि मंता इंचि ओरा गवाइ. ✱ 7:44 निर्गमन 25:9; 25:40 * 7:46 याकोबुना पेनदाहाटी इद पोल्लेता जेगाते बवो-बवो बायबलकुने “याकोबुना लोकल्कुनाहाटी” इंचि मंता. † 7:49 राजगद्दे राजाल उदुना कुर्सितुन राजगद्दे इंतुर. ✱ 7:50 यसायाह 66:1-2

51 अरे पिस्सा लोकुरिटा, मीवा मनसु बारे बेरे जातितोरा मनसुन लेहका मंता, मीवा केव्क बारे पेनदा पोल्लेन केंजाकोटा डोप्पां अरसोत्तां. मिमेट बस्केव्क पवित्र आत्मातुन पक्काक दोबसेके, इंदके मिमेटगुडा मीवा एनकटा पेद्दालुकुनालेसी कीसंतिर.

52 मीवा पेद्दालुकु तकलिप हियाकोटा पेनदा कबुरतोन वरोनगुडा होळसा हिल्लुर. वरोर नीतिमंतुड वायानोर मंतोर, इंचि वेहानोर्कुन मीवा एनकटा पेद्दालुकु हक्कतुर. इंदके मिमेट बारे, ओर बा नीतिमंतुना बारेमते वेहचि मत्तुरो आ नीतिमंतुन दोकाते पीसि हक्कतिर.

53 पेनदा दूतानाहैदाल मीकु मूसाना नियम अय्ते दोर्कुता, गानि मिमेट दाना परकारम ताका हिल्लिर.

स्टिपनुन हक्कतुर

54 ओना पोल्लेन केंजसि पंचादिते मत्ता पेद्दालुकु वेल्ले होंगुकु वासि, ओनाहेके ह्ळसि पटपटा पलुकु कोर्कांलय दल्युतुर.

55 गानि पूरा पवित्र आत्मातोनि निंडिस मत्ता आ स्टिपन स्वर्गमताहेके ह्ळतोर. अस्के ओर पेनदा महिमाता वेल्गुन आनि पेनदा तिना बाजूक नित्तिसि मत्ता येसुन ह्ळतोर.

56 ह्ळसि, “ह्ळटा! स्वर्गम बय्थर आयानद आनि मनकना रूपमते पुटता पेनदा मर्री पेनदा तिना बाजूक नित्तिसि मत्तद नना ह्ळसंतन,” इंचि ओर इत्तोर.

57 अस्के आ मंदि केव्क मुक्कुचि, जोरसे वरगेयसेके अंतोर उंदेम ओनपोर्री वासि अरतुर.

58 ओन इग्गिसेक नाटेन पलाते ओसि बंडाने तनालय दल्युतुर. इद जर्गनदान ह्ळता गावाइदार्क ओरा कपडिं तेंडसि साऊल इनना वरोर लेय्योना कालुकुन मुन्ने इरतुर.

59 लोकुकुलक बंडाने तनानेके स्टिपन, “येसु सामि, नावा आत्मातुन निमे एतुकुन.” इंचि पारतना कीतोर.

60 पजा ओर टोंगरां ऊनसि, “हे सामि, ई पापम ईरापोर्री तासुमा,” इंचि जोरसे वरगेयसि, कळक मुचतोर. इल्हा साऊलगुडा ओना हामुरते पोत्तु आतोर.

8

विस्वासुलुकुकु कस्टालुकु वांता

1 अवे रोजकुनाल येस्लेमेता कलिसियातोरपोर्री पेद्दा कस्टालुकु वायालय सुस्व आता. प्रेरितलुकुन होळसि कळमातोर अंतोर विस्वासि लोकुकुलक यहुदिया, सामरिया एरियाता नाहकुने बेकेटोर हेके सिल्लर-सिल्लर आतुर.

2 बोरो इच्चुर विस्वासुलुकु स्टिपनुन गति कीसि ओनाहाटी वेल्ले दुक्कमते मत्तुर.

3 साऊल बारे कलिसियातोर्कुन तकलिप हियमळ सुस्व कीतोर. ओर लोन-लोन होंचि मुर्ताहक इनाका मांडसा इनाका अंतोर्कुन इग्गिसि ओसि जेलने वाटालय दल्युतोर.

4 गानि सिलर-सिलर आसि होत्ता विस्वासि लोकुकुलक मात्रम बगा-बगा अय्ते होत्तुरो अगा-अगा ओर लोकुकुलुकु पेनदा बेसता कबुर वेहुंदुर.

पिलिपुस सामरियाते होंचि येसुना बारेमते वेहांतोर

5 पिलिपुस इनना वरोर बकतुड सामरिया सहरते होंचि अगाटा लोकुकुलुकु किरिस्तुना* बारेमते वेहामळ सुस्व कीतोर.

6 पिलिपुस कीता चिन्हां ह्ळसि लोकुकुलक ओर वेहाना पोल्लेन मनसु ताससि केंजतुर.

7 वेल्लेन मंदिक् देय्यालुकु पीसि मत्तां, आ देय्यालुकु इंका इरगा मोत्कुचेके पलाते पेय्सि विततां. अचोने आयका अगा वेल्लेन मंदि कुंठोर्क, कय-कालुकु अरसोनना रोगमतोरगुडा मत्तुर, ओर अंतोरगुडा बेस आतुर.

8 अदुनहाटी अद सहरते आनंदमे आनंदम मत्ता.

9 अद नाटे सिमोन पोरोलतोर वरोर मनकल मनुंदुर. ओर होदें-मंत्रालुकुना बलमते इंचंनमाता कबाहक कीसि, नाके एक्को तेळियंता, इंचि वेहकुंचेके सामरिया सहरता लोकुकुलुकुन इंचंनमते अरहुंदुर.

10 सिन्नालुकु, पेद्दालुकु अंतोर, “पेनदा पेद्दा ताकत इत्ते ईर आंदुर,” इनकुंचि, ओना पोल्लेन केव ताससि केंजुंदुर.

11 बारित्ते ओर वेल्ले रोजकुनाल ओना मंत्रालुकुना बलमते अंतोर लोकुकुलुकुन इंचंनमते अरहचि मत्तोर. दानहाटीगे लोकुकुलुकु ओर बतल वेहिना नममुंदुर.

12 गानि पेनदा राज्येम आनि येसु किरिस्तुना पोरोलता बारेमते पिलिपुस वेहता बेसता कबुर केंजसि मुर्ताहक-मांडसा नम्मिसि बापात्समागुडा एततुर.

* 8:5 किरिस्तु इत्ते अबिसेवम आतोर, इंचि अर्तम.

13 कुद सिमोन इंका नम्मिसि बापतिस्मा एततोर. इल्हा ओर पिलिपुस बेके होलते हेके होंचेके ओनतोनो मनालय दलगुतोर. पजा पिलिपुस कियना चिन्हां, अद्बुताल्क हळसि इचंत्रमते अर्दुर.

सामरिया सहरते पत्रु आनि योहान

14 सामरिया सहरता लोकुल्क पेनदा पोल्लेन स्विकार कीतुर इंचि बस्के अयते येस्सलेमतो प्रेरित्लुकुंक तेळियतनो, अस्के ओर पत्रुन आनि योहानुन सामरिया एरियाक लोहचीतुर.

15 पजा ओर अगा वासि अगाटोर्कुंक पवित्र आत्मा दोर्कना इंचि पारतना कीतुर.

16 बारित्ते दीनकन्ना मुन्ने ओरा बोरापोरिन पवित्र आत्मा वाया हिल्ले. ओर्कु सिराप येसु सामिन पोरोलते बापतिस्मा दोर्कुंता अचोने.

17-18 पजा पत्रु आनि योहान ओरापोर्री कय इरता इर्कडे ओर्कु पवित्र आत्मा दोर्कुंता. इदुन सिमोन हळसि, प्रेरित्लुकुनगा होततोर.

19 होंचि, “नना मीकु कोलतां हीतन, गानि नना बोनपोर्री अयते कय इरतनो ओन्क पवित्र आत्मा दोर्कागोट्टना ई बलमतुन नाकुगुडा हीम्टु,” इंचि इत्तोर.

20 अस्के पत्रु ओन, “निमे कोलताने पेनदा वरमतुन अस्सा परांतन इंचि इनकुत्तिन. अदुनहाटी नीवा कोलतां नीतोने नासडेम आंतां.

21 पेनदा नदरते नीवा विचारम बेसतद आयो, इंचि ई सेवा कबाहकुने नीकु पोत्तु हिल्ले, पालु हिल्ले.

22 निमे कराब विचाराल्क कियमळ होळसिसि मनसु मार्सकुंचि पेनदुक पारतना कीम. अस्के नीवा इसोटा विचाराल्कनहाटी नीकु मापि दोर्का पररं.

23 नना नीकुन बेस हळसंतन, नीवा लोपो वेल्लेन विसम निडिस निमे पुरागा तप्पुड कबाहकुनतोनो दोहाचि मतिन,” इंचि इत्तोर.

24 अस्के सिमोन, “मिमेट इत्तद बद्दे पोल्ले नापोर्री वायामान्नि इंचि मिमेट सामिक नाहाटी पारतना कीम्टु,” इंचि इत्तोर.

25 पजा पत्रु आनि योहान सामिना बारेमते बतल अयते केंजतुर, हळतुर अदुना गवाइ हीतुर. पजा सामि वेहता पोल्लेन वेहचि येस्सलेम मल्सि होनालय पेय्त्तुर. ओर होननेके सामरिया नाहकुने वेल्लेन जेगाने पेनदा बेसता पोल्लेन वेहचेके होत्तुर.

पिलिपुस आनि इतोपिया देसेमता मनकल

26 अस्के सामिनद उंदि पेनदा दूता पिलिपुसुंक वेहता गदा, “निमे तयार आसि, येस्सलेमताल बद्द हरि अयते गाजा सहरताहेके दांता, अदे हरि पीसि दक्खिनतेके होन्नु. आ हरि बख्लि जेगाताल दांता.”

27-28 पजा ओर तयार आसि होत्तोर. होननेके हर्दे ओन्क इतोपिया देसेमतोर वरोर आडिगुल्ला मनकल कलियतोर. ओर इतोपिया देसेमता रानि कंदाकेनगा कोताना लेक्का हळना पेद्दा अदिकारिनलेहका कबळ कियुंदुर. दाना पूरा कजाना ओना कय्दा हिडे मत्ता. ओर आरादानाहाटी† येस्सलेम वासि, मल्सि होननेके रतमते उदसि यसायाह इनना पेनदा कबुरतोना पुस्तकम हदविसेके मत्तोर.

29 अस्के पेनदा आत्मा, “निमे आ रतम दगर्क होंचि दानतोनि ताका,” इंचि पिलिपुसुंक वेहता.

30 अस्के पिलिपुस वितसि होंचि आ रतमतुन अंदकुत्तोर. रतमते उदिस मनना मनकल यसायाहल रासता पुस्तकम हदवानदुन हळसि, “निमे बतल अयते हदविसंतिनो अदुना अर्तम नीकु तेळियसेके मंतना?” इंचि ओर आ मनकल पूसकीतोर.

31 “इदुना अर्तम बतलो, बोरन्ना वेहुवद नाकु बल्हा तेळियंता?” इंचि आ मनकल इत्तोर. पिलिपुसुन रतम पोरोर् एक्किस् ओना पक्काते उद्दालय वेहतोर.

32 ओर आ पुस्तकमते बतल अयते हदविसेके मत्तोरो अद् इल्हा मंता:

“हळ्कालय ओयना गोर्रितालेसी ओन ओतुर,

गोर्रि दाना मेंदुलता बुरातुन कतरिचिनेके बल्हा सपुडदाका मंता,

अल्हेने ओरगुडा सपुडदाका मत्तोर,

ओना तोळ्दाल उंदि पोल्लेगुडा पेय्सा हिल्ले.

33 ओना अपमानम कीसि ओनपोर्री अन्यायम कीतुर,

बुमिपोर्रीटाल ओना पिस्वरतुन तेंडतुर, ओना वंसमतोर बोरे हिल्लुर.”☆

इल्हा रासि मत्ता.

† 8:27-28 आरादाना इत्ते निजम पेनदुक मोळ्कमळ. उदा. पाटां पारमळ, स्तुति कियमळ, पारतना कियमळ, बायबल हद्वमळ ई. ☆ 8:33 यसायाह 53:7-8

34 अस्के, “असल ई कबुरतोर बोना बारेमते वेहचंतोर? ओना सतता बारेमतेना, हिलाकोटे मरि इंका बोरन्ना वेरेतोना बारेमतेना? दया कीसि नाकु तेळियनाल वेहा,” इंचि आ आडिगुल्लोड पिलिपुसुन इत्तोर.

35 अस्के पिलिपुस, आ मनकल हदकुसेके मत्ता वचनाल्लुकुनाल मोदोल पीसि, येसुना बेसता कबुरदाका अग्नि ओन्क वेहतोर.

आडिगुल्ला मनकल बापतिस्मा एतंतोर

36 इल्हा हरि पीसि होननेके-होननेके ओर उंदि एर मत्ता जेगातगा एवतुर. अस्के एतुन हळसि, “हळा! इगे एर मंता. इंदके नाकु बापतिस्मा एतालय बतलन्ना तकलिप मंतना?” इंचि आ आडिगुल्ला मनकल इत्तोर.

37 †(निमे गिटा मनसुनाल पुरागा विस्वासम कियानयते बापतिस्मा एता परातिन, इंचि पिलिपुस वेहतस्के, ओर हां, येसु सामिए पेनदा मरि आंदुर इंचि अना विस्वासम कीतन, इंचि जवाब हीतोर.)

38 अस्के ओर रतमतुन आपालय वेहतोर. पजा पिलिपुस आनि आ आडिगुल्ला मनकल ईर इव्वुर एते रेयतुर. पिलिपुस आ मनकक बापतिस्मा हीतोर.

39 ओर एताल पलाते पेय्स्तस्के पिलिपुसुन सामिना आत्मा बेकेनो ओता. आ आडिगुल्लोड ओन मर्रा बस्केनो हळा हिल्लोर. अथना आ आडिगुल्ला मनकल आनंदमते ओना हरि पीसि ओर होतोर.

40 इल्हा पिलिपुस अजोतु इनना सहरते दिसतोर. पजा ओर होननेके हरि पीसि कलियता नाहकंता पेनदा बेसता कबुर वेहचेके कैसरिया सहरते एवतोर.

9

साऊलना मनसु मारियमळ

1 अदे वेलाते साऊल सामिनपोर्रो विस्वासम कियानोर्कुन हळकंतन इंचि बेदरिचेक मत्तोर. ओर पेदुदा पेर्मानगा होतोर.

2 होचि, “दमिस्क सहरते मनना दर्मासात्रम कराहना लोहकुनाल बोरन्ना सामि वेहा हरि पीसि ताकाना मुरतळ आधि मांडसा आधि दोर्कुते, ओर्कुन दोहाचि येस्सलेमते वापस तायाना अदिकारमता सिट्टि रासि हीम,” इंचि इत्तोर.

3 इल्हा ओर दमिस्क एरियाक दग्गेर एवतोर. अस्के उदेदम मब्बुनाल ओना सुट्टु उंदि वेलगु जग्गरा मेसंता.

4 अल्हा आता आयमळ ओर बुमिपोर्रो अरतोर. पजा ओन्क, “साऊल, साऊल निमे नाकुन बारि तकलिप कीसतिन?” इंचि इत्ताप उंदि अल्किर कैजावाता.

5 अस्के, “सामि! निमे बोन आदिन?” इंचि साऊल पूसकीतोर. अस्के, “निमे बोन अयते तकलिप कीसंतिनो नना आ येसुन आंदुन.

6 निमे इंदके तेदसि सहरतेके होन. बतल कियमळो अद नीकु अगा वेहमळ जर्गता,” इंचि इत्तोर.

7 ओनतोनि होचेके मत्ता मनकालोर्कु अल्किर अयते कैजतुर, गानि ओर्क अगा बोरे दिसा हिल्लुर. अदुनहाटी ओर म्कालोरलेसी वळकाकोटा अल्हे नित्तिसि मत्तुर.

8 अस्के साऊल बुमिपोर्रोटा ल तेदसि कळक उस्मिसि हळते अगा ओन्क बतले दिसा हिल्ले. पजा ओनतोनि मत्तोर ओना कय पीसि दमिस्कते ताकिच्चेके ओतुर.

9 मूड रोजकुनदाका ओर गुड्डोनेलेहका आसि मत्तोर. अचोने आयका ओर बतल तिना हिल्लोर, उन्ना हिल्लोर.

10 दमिस्कते हनन्याल इनना पोरोलतोर वरोर सिस्सुड मत्तोर. सामि ओन्क दर्सनम हीसि, “हनन्या!” इंचि केयतोर. अस्के ओर, “हां सामि,” इंचि इत्तस्के,

11 सामि ओन, “तेदा, तेदिस ‘सवरगा’ इनना हरदुक होन. अगा यहूदाना लोन मंता. ओना लोन तरसुस सहरताल वाता साऊल इनना वरोर मनकल मंतोर. अगा ओना बारेमते पूस कीम. ओर इंदके पारतना कीसेके मंतोर.

12 साऊल दर्सनमते, हनन्याल इनना मनकल ओनगा वासि ओन्क मर्रा कळक दिसगोम इंचि ओनपोर्रो कय तासताप हळतोर,” इंचि इत्तोर.

13 अस्के हनन्याल, “सामि, ई मनकल येस्सलेमते मनना नीवा पवित्र लोकुल्लुकुन बचचोना तकलिप कीता संगति नना वेल्लेन लोकुल्लुकुना तोळ्दाल कैजतन.

14 इग्गेगुडा नीवा पोरोल एताना हरेक विस्वासिन दोहाचि ओथना अदिकारम, पेदुदा पेर्मालोर्कुन हेंदाल एतकुचि वातोर,” इंचि वेहतोर.

15 अस्के सामि ओन, “नावा पोरोलतुन वेरे जातितोर नड्डुडुम, राजालोरा मुन्ने, इस्त्राएलता लोकुल्लुकुन मुन्ने वेहनाहाटी नना ईन नावा विष्ने इंचि पेर्कुल्लतन, अदुनहाटी निमे होन.

16 नावा पोरोल एतानाहाटी ओन्क बच्चोर कस्टालक अर्पा पीतानो नना कुद ओन्क हुपसंतन," इंचि इत्तोर.

17 अस्के हनन्याल अगटाल पेय्सी साऊल बद् लोते मत्तोर अद लोन होत्तोर. होंचि ओनपोर्पा कय ईर्सि, "साऊल दादा, निमे हरिं पीसि वायनेके नीकु दिसतोर ह्ळा! आ येसु सामिए नीकु मर्पा कळकु दिसगोम, निमे पवित्र आत्माते पुरागा निडिस होनगोम इंचि नाकुन लोहतोर," इल्हा वेहतोर.

18 अस्केने ओना कळकुनाल बतलो पोर्पांसटव रालसि, ओर ह्ळालय दल्युतोर. पजा तेदसि बापतिस्मा एततोर.

19 गाटो तित्तस्के ओन्क ताकत वाता. इल्हा ओर कोन्नि रोजकु दमिस्कते मत्ता सिस्स्युलुकुनतोनि अगगेन मत्तोर.

साऊल दमिस्कते येसुना बारेमते वेहांतोर

20 पजा ओर आल्सेम कियार्कोटा, "येसे पेनदा मर्पा," इंचेके यहूदि लोकलुकुना दर्मसास्त्रम कराहना लोहकुने होंचि येसुना बारेमते वेहालय सुख कीतोर.

21 अगा ओना पोर्ल्लें कैजतोर अंतोर इचंत्रमते अर्सि, "येस्सलेमते येसुन नम्मूतोर्कुन दोर्कापीसि ओर्कुन हक्कुता मनकल ईरे आयोरा? इंका इग्गेगुडा येसुन नम्मूतोर्कुन पीसि दोहाचि वाटसि पेद्दा पेर्मांलोरा मुन्ने ओयाना विचारमते वातोर गदा!" इंचि इनालय दल्युतोर.

22 गानि साऊलना कराहना तेल्चि मात्रम रोज-रोज बेरसेकेन होत्ता. अदुनहाटी दमिस्कते मनना यहूदिलुकुन, येसु सामिए किरिस्तु आंदुर, इंचि रूजव कीसि ओर्कुन वळकाकोटा कियुंदुर.

साऊलुन हक्कना पिलान

23 इल्हा वेल्लेने रोजकु आतारित्ते यहूदिलक साऊलुन हक्कना उपायम कीतुर.

24 गानि ओन हक्कालय नर्का-पियल सहरता गेटकुनगा यहूदिलक पोर्चादोसि मनना संगति साऊलुंक तेळियसि होत्ता.

25 अस्के साऊलना सिस्स्युलक नर्कटा वेलाते ओन उंदि तट्टाते उपिच्चि सहरता सुट्टु मत्ता ग्रे पोर्पोटाल वेलाड वाटसि हिळु रेहतुर.

येस्सलेमते साऊल

26 साऊल येस्सलेमते वातंका सिस्स्युलुकुनतोनि कलियसि मनालय ह्ळतोर. गानि सिस्स्युलक मात्रम ईर निजम सिस्स्युड आंदुरो आयोरो, इंचि विस्वासम हिलाका वेरियुंदुर.

27 बरनाबास मात्रम साऊलुन पीसि प्रेरित्लुकुनहेके वातोर. साऊल वायनेके हर्दे येसु सामिन बल्हा ह्ळतोर, येसु सामि ओनतोनि बल्हा वळकुतोर, दमिस्कते ओर येसु सामिना पोरोलता बारेमते बल्हा वेरियाकोटा वेहतोर, इव अनि पोर्ल्लें ओर्कु वेहतोर.

28 इल्हा साऊल ओरतोनि कलियसि-मेलियसि मसुंदुर आनि वेरियाकोटा येसु सामिना पोरोलता बारेमते वेहसेके येस्सलेमते तिरियुंदुर.

29 ओर युनानि बासा वळकाना यहूदिलुकुनतोनि सामिना बारेमते वळकुंदुर, चर्चा कियुंदुर. गानि ओर मात्रम ओन हक्कालय ह्ळतुर.

30 बस्के अथे इद संगति दादालोर्कुंक तेळियतनो अस्के ओर ओन मुन्ने कैसरिया ओतुर. पजा अगटाल ओना पुटता सहर तरसुसते लोहचीतुर.

31 इल्हा यहूदिया, गालिल, सामरिया एरियाता कलिसियानोर्कुंक कोन्नि रोजकु सांति मत्ता. आ कलिसियानोर सामिंकु वेरियसि बेस बक्तिंतोनि पिसुंदुर, पवित्र आत्मागुडा ओर्कु बेस प्रोत्साहन हियुंदु. अदुनहाटी ओर बेस ताकतवान आतुर. इल्हा ओर वेल्लेन आसेक होत्तुर.

32 पजा पत्रु देसेमंता तिरियसेक-तिरियसेक लुद्दा इना सहरते मनना पेनदा लोकलुकुनगा होत्तोर.

33 अगा ओर, लकवा बिमार आसि एनमिदि वर्सानाल कटल पीसि मत्ता आनियासु पोरोलता वरोर मनकंक कलियतोर.

34 अस्के, "आनियासु, येसु किरिस्तु नीकुन बेस कीतोर, निमे तेदसि नीवा कटलतुन हद्दा," इंचि पत्रु ओन इत्तोर. अस्केटद अस्केन आ मनकल तेदतोर.

35 अस्के लुद्दा आनि सारोन सहरकुने मनना वेल्ले लोकलुक आनियासुन ह्ळसि सामिनहेके तिरियतुर.

हासोत्ता मुरतळकु पत्रु जीवा अरहंतोर

36 यापा सहरते उंदि विस्वासि मुरतळ मसुंदु, दाना पोरोल तबिता. तबिता इत्ते युनानि बासाते, दोरकस, इत्ते तल्लुर दुपिचि अर्तम. अद मुरतळ बस्केळक बेसता कबाहक कीसेके, गरिबोर्कुंक दान-दर्मम कीसेके मसुंदु.

37 पत्रु लुद्दा सहरते मत्ता रोजकुनेन अद बिमार अर्सि हासोत्ता. अस्के दाना पीनगुंक एर दोस्सि मिद्देता पोर्पोटा अरति इरतुर.

38 लुददा नार यापा सहरकु दग्गेरेन मत्ता. अय्ते पत्रु अगा मंतोर इत्ता संगति सिस्सुल्लुकुं तेळियतस्के इव्वर मनकालोर्कुन ओनगा लोहचि, आलसेम कियाकोटा ओरहेके वायालय विनंति कीतुर.

39 अस्के पत्रु बिराना तयार आसि ओरतोनि होत्तोर. ओर अगा एव्ता-एव्वुडे ओन मिद्दे पोर्रोटा अरंति ओतुर. अगा ओर होत्तस्के अगा मत्ता मुंडामोस्ता मुर्ताहक, दोरकस अवनतोनि मननेके कुट्टा अंगिं आनि कपडिं पत्रुकु हपिचेचेके ओन सुट्टु आसि अळालय दलग्तां.

40 गानि पत्रु अवन अंतोर्कुन पलाते लोहचि टोंगरां ऊनसि पारतना कीतोर. पजा पीनगुनहेके तिरियसि, “तबिता, तेदा!” इंचि इत्तोर. अस्के अद पत्रुन हळसि तेदिस उदुता.

41 पजा अद दाना काल्कुनपोर्रो नित्तालय कय हीसि सहायम कीतोर. पेनदा लोकुल्लुकुन, मुंडामोस्ता मुर्ताहकन केय्ति जीवाते मत्ता तबितान ओर्कु हपिस्तोर.

42 ई संगति पूरा यापा सहरअंता तेळियसि, वेल्ले लोकुल्लुक सामिन नम्मुकुत्तुर.

43 आयंका पत्रु यापा सहरतेन सिमोन इनना वरोर तोलकुन कबळ कियानोनगा वेल्लेन रोजकु आगतोर.

10

पत्रु आनि कुरनेलियुस

1 कैसरिया सहरते कुरनेलियुस पोरोलतोर वरोर मनकल मनुंदुर. ओर इटलि इनना पोलिस दलमते नूर मिल्ट्री पोलिसुल्लुकुन पोर्रो दरोगाल मत्तोर.

2 कुरनेलियुस बेस नीतिमंतुड मत्तोर. ओर, ओना लोतोरगुडा पेनदुक वेरियुंदुर. ओर गरिब लोकुल्लुकुं वेल्ले सहायम कियुंदुर. बस्केळक पेनदुक पारतना कीसेके मनुंदुर.

3 ओर उंदि रोज पियल मूड एगना पारतना कियनेके दर्सनमते उंदि पेनदा दूता ओनगा निजम वासि, “कुरनेलियुस!” इंचि ओन केयताप हळतोर.

4 अस्के कुरनेलियुस वेर-वेरियसेक पेनदा दूताहेके हळसि, “नीकु बतल गावाले वेहा,” इंचि इत्तोर. अस्के पेनदा दूता, “नीवा पारतनां पेन कैजता. गरिबोर्कुंकि निमे कियना सहायमतुन पेन हळता.

5 निमे इंदके इच्चुर मनकालोर्कुन यापा सहर लोहचि सिमोन पोरोलता मनकन (ईन पत्रुगुडा इंतुर) निहगा केया.

6 ओर सिमोन इनना वरोर तोलकुन कबळ कियानोना लोते मंचंतोर. ओना लोन समुद्रम ओड्डुंका मंता.” इंचि ओन इत्ता.

7 इल्हा ओनतोनि वळकसेके मत्ता पेनदा दूता अगटाल होत्ता होनमळे, कुरनेलियुस ओना लोन कबळ कियाना जीतागाहकुनाल इव्वर जीतागाहकुन आनि पेनदुक वेरियानोर अल्हेने ओन्क बेस सेवा कियना वरोर पोलिसुन, इल्हा मुव्वुर्कुन केयतोर.

8 पत्रा अगा बतल अय्ते जस्रगतो, अद पूरा वेहचि ओर्कुन यापा सहरकु लोहचीतोर.

पत्रु पेनदा दर्सनम हळतोर

9 इंकुंदि रोजु ओर यापा सहर दग्गेरा एवतस्के पिय्यटा वेलाकु पारतनाहाटी पत्रु मिद्देपोर्रो होत्तोर.

10 अस्के ओन्क कर्वेसि मत्ताहेंका बतलन्ना तिनकन बारे इंचि अनपिस्ता. गाटो वेसेकेन मत्ता अचचोटेन ओर उंदि दर्सनम हळतोर.

11 अद दर्सनमते, मब्बु बय्यर आसि, पोर्रोटाल बतलो उंदि वस्तु हिळु वायनद ओर हळतोर. अद उंदि पेद्दा सेदरलेहका मंता. दाना नालुं मूलां पीसि हिळु रेयताप ओर हळतोर.

12 अष्टे नालुं काल्क मत्ता अन्नि तीरकुना जिवरासी, बेंगाना जिवरासी आनि मब्बुने परियना पिट्टें मत्तां.

13 अस्के पत्रुक उंदि अल्किर, “पत्रु, तेदा! अवन हळ्किस तिन,” इंचि कैजावाता.

14 गानि पत्रु, “मान्नि सामि, नावा पिस्वरते नना बस्केने मूसान नियम परकारम तिनूमा इत्तद, अपवित्रमातद तिडि तिना हिल्लेन,” इंचि इत्तोर.*

15 पजा अद अल्किर, “पेन सुद्द कीतद बतले वस्तु आयि, दान निमे असुद्द इंचि इनुमा,” इल्हा रोंडो मल्का ओन्क कैजावाता.

16 इल्हा मूड मल्कां जर्गुता. पजा अद सेदरतसोंटा वस्तु बिराने पोर्रोळ्क मब्बुनहेके तिरियसि होत्ता.

17-18 पत्रु आ हळता दर्सनमता अर्तम बतल आयावच्चु इंचि विचारम कीसेकेन मत्तोर, अद हळा! कुरनेलियुस लोहता मनकालोर सिमोनूना गुयमाकुल्लुकुनगा वासि, “पत्रु इनानोर इदे लोते मंचंतोरा?” इंचि पूसकीतुर.

19 पत्रु इंकागुडा अदे दर्सनमता बारेमते विचारम कीसेके मत्तोर. अचचोटेन पेनदा आत्मा, “ह्ळा, मुक्खुर मनकालोर नीकुन पहकसंतुर.

20 अय्ते तेदा, हिळ्ळ रेय्सि मनसुने बतले अनमानम इर्राकौटा ओरतोनि होन्नु. ओर्कुन ननाने लोहतन,” इंचि ओन इत्ता.

21 अस्के पत्रु हिळ्ळ रेय्सि ओरगा होंचि, “मिमेट बोन अय्ते पहकसंतितोर ओर ननाने आंदुन. अय्ते मिमेट हीके बारिक वातिर?” इंचि प्सकीतोर.

22 अस्के आ मनकालोर, “माकुन उंदि पोलिस दलमता दरोगाल कुरनेलियुस इनानोर लोहतोर. ओर बेस नीतिमंतुड आनि पेनदुक वेरियसि ताकाना मनकल आंदुर. यहदि जातिता लोकुल्लकुने ओर बेस पोरोल होत्तोर. नीकुन ओना लोन केया वेहचि, नीहेंदाल ओन्क पोल्ले वेहालय उंदि पवित्र पेनदा दूता ओन्क वेहता,” इंचि इत्तुर.

23 पजा पत्रु ओर्कुन लोपो केय्सि ओर्कुन हेडमितोरलेसी ह्ळकत्तोर. इल्हा इंकुदि रोजु तयार आसि ओरतोनि होत्तोर. होननेके यापा सहरता इचचुर विस्वासुल्कगुडा ओनतोनि होत्तुर.

24 इंकुदि रोजु ओर अंतोर कैसरिया सहरते एवतुर. अगा कुरनेलियुस ओना जीवातेर्कुन आनि दग्गेटा दंटातेर्कुन केय्सि ओना एदुर ह्ळसेक मत्तोर.

25 पत्रु लोपो होळियतस्के कुरनेलियुस ओना कालुकुनपोर्गे अर्सि ओना कालक मोळकतोर.

26 गानि पत्रु ओन तेहचेके, “अरेरे! नित्ता, ननागुडा नीलेसी वरोन मनकने आंदुन,” इंचि इत्तोर.

कुरनेलियुस दरोगान लोन पत्रु

27 पजा पत्रु कुरनेलियुसुनतोनि वळकसेके-वळकसेके लोपो होत्तोर. अस्के अगा ओर वेल्लेने मंदि जमा आसि मत्तद ह्ळतोर.

28 ह्ळसि, “मीकु उंदि पोल्ले अय्ते एरपाटे, अद बतल इत्ते, यहदि मनकल वेरे जातिता मनकनगा होनमळ, ओनतोनि बेसता संबंदम इरमळ यहदि रीति-रिवाजकुने बेस आयो. गानि पेन मात्रम, नना बोने मनकन पास्कामान्नि, बोने अपवित्र इना मन्नि इंचि नाकु हुपिस्ता.

29 अदुनहाटी नाकुन मिमेट केयतस्के नना बतले विचारम कियाकौटा मीतोनि पेय्सि वातन. अय्ते मिमेट नाकुन बारि केयतिर नाकु वेहाट,” इंचि पत्रु ओर्कुन इत्तोर.

30 ओर अल्हा प्सकीताहाटी कुरनेलियुस, “मूड रोजकु मुन्ने* इदे वेलाकु पियल मूड एगानेके नना नावा लोनु पारतना कीसेके मत्तन, अस्के उंदेदम तलातला मेर्सना कपडिने वरोर मनकल नावा मुन्ने वासि निततोर.

31 नित्तिसि, ‘कुरनेलियुस, नीवा पारतना पेन केंजता, गरिबोर्कुंक निमे कियना सहायमत्तुन पेन ह्ळता.

32 अदुनहाटी यापाते बोनना लोहचि पत्रुन केया लोहा. ओर समुद्रम ओड्डुन्गा सिमोन इन्ना तोलकुन कबळ कियानोन लोन आगसि मंतोर,’ इंचि इत्तोर.

33 अदुनहाटी नना बिराना नीकुन केया लोहतन, निमे इगे वासि बच्चोरो बेस आता. इंदके नीकु पेन बतल वेहतनो अव अन्नि केंजालय मोमोट अंतोरम इगे पेनदा मुन्ने जमा आतोम,” इंचि वेहतोर.

पत्रुना बासन

34 अस्के पत्रु वळकमळ सुख कीतोर. ओर इत्तोर, “पेन हरेक मनकन उंदेतीर ह्ळंता इंचि इंदके नाकु निजम तेळियता.

35 दुनियाता अन्नि देसेल्कुना लोकुल्लक ओर बोर्न्ना आयिर, ओर पेनदुक वेरियसि नीति कबाहक कियानय्ते पेन ओनपोर्गे कूस मनता.

36 येसु किरिस्तु अंतोरा सामि आंदुर. ओनहेंदाल पेन दाना सांतिता बेसता कबुर इसाएलता लोकुल्लुकुंक हीता, अद कबुर इदे आंदु.

37 बापतिस्माता बारेमते योहान वेहमळ सुख कीता पजा, गालिलते उंदि गटना सुख आता. इद गटनाता बारेमते पूरा यहदिया एरियंता पैलांचता संगति मीकु एरपाटे मंता.

38 नासरेत नाटेना येसुन पेन पवित्र आत्मातोनि अबिसेकम कीसि[†] अदूबूतामाता ताकत हीता. पेन ओनतोनि मत्ताहेंका, ओर अंतोराहाटी बेसता कबाहक कियुंदुर, देय्याल्कुना मुक्थाना कय्दा हिळ्ळ मत्तोर्कुन बेस कीसेके तिरियुंदुर, इद मीकु एरके.

39 येस्सलेम, यहदिया देसेमते ओर कीता अन्नि कबाहकुन मोमोट प्रेरित्लुकुम, कळ्ळुकुने ह्ळतोम. इंका ओर ओन कूसुनपोर्गे वेलाड वाटसि ह्ळकतुर.

40 गानि पेन मात्रम ओन मूड रोजकुने मर्रा जीवाते तेहाचि दिस्सानाल कीता.

* 10:30 मूड रोजकु मुन्ने युनानि लोकुल्लुकुना नालु रोजकु मना लेक्काते मूड रोजकु आंता. † 10:38 अबिसेकम कीसि राज्येम ताकसना अदिकारम हीसि ओन्क निय होकमळ.

41 अंटोर लोकुकल ओन हळ्वा हिल्लुर. गानि पेन माकुन मुन्नेन गवाइदार्क इंचि पेर्कुत्ता. अदुनहाटी मोमोट ओन हळ्ळोम. ओर हासि तेदतारित्ते मोमोट ओनतोनि कलियसि तिल्लोम, उट्टोम.

42 जीवाते मत्तोर्कुंक, हासोत्तोर्कुंक न्यायम क्रियाओर इंचि पेन इनि पेर्कुत्ता. इदुना बारेमते लोकुकुकुंक बेसता पोल्ले क्राहना, गवाइ वेहना इंचि ओरे माकु आदेस हीतोर.

43 येसुनपोर्गे विस्वासम ईरना हेरेक मनकंक येसुना पोरोलते पापालक मापि आंतां, इंचि अंटोर पेनदा कब्रुतोरक गवाइ हीसि मत्तुर.”

वेरे जातितोर पोर्गे पवित्र आत्मा रेयता

44 पन्ना वळ्ळमळ सुस्व मनैकेने पेनदा बेसता पोल्ले केंजसेक मत्तुरा अंटोरपोर्गे पवित्र आत्मा रेयता.

45 पवित्र आत्माता वरम वेरे जातितोर पोर्गेगुडा वळियतदुन हळ्ळसि पन्नुनतोनि वाता कतना आता विस्वासुल्लुकुंक इचंन्रम आता.

46-47 ओर अंटोर्कुन ओर्कु तेळियवा बासाने पेनदा स्तुति कीतद केंजतुर. अस्के, “मनाकु दोर्कताप ईर्कगुडा पवित्र आत्मा दोर्कता. ईर एते बापतिस्मा एता मन्नि इंचि बोर्नना अड्डम वळ्ळकानोर मंतुरा?” इंचि पन्नु इत्तोर.

48 इल्हा पन्नु, येसु किरिस्तुना पोरोलते ओर्कु बापतिस्मा हियालय आदेस हीतोर. इदंता आता पजा कोन्नि रोजकु पन्नु ओरतोनि मननाहाटी अंटोर कलियसि पन्नुक विनंति कीतुर.

11

पन्नु येस्सलेमते मल्सि वांतोर

1 वेरे जातितोरगुडा पेनदा पोल्लेतुन ओष्कत्तुर इत्ता संगति, प्रेरितुल्लुक आनि यहदिया एरियाते मत्ता दादालोर केंजतुर.

2-3 गानि बस्के अयते पन्नु येस्सलेमते वातोर अस्के, इचचुरकतना आता विस्वासुल्लुक, “निमे वेरे जातितोरा* लोहकुने होंचि ओरतोनि गाटो बारि तिल्लिन.” इंचि ओनतोनि जगडम दोस्तुर.

4 अस्के पन्नु बतल अयते जस्रुतनो अद बल्हा मत्तद अल्हे ओर्कु ई परकारम तेळियागोटिसि वेहतोर.

5 “नना यापा सहरते पारतना कीसेक मननेके उंदि दर्सनम हळ्ळतन. अद दर्सनमते, पेद्दा सेदरत्सोटा उंदि वस्तुन नाल् मूलां पीसि मब्बुनाल हिळ्ळु रेहानद हळ्ळतन. अद हिळ्ळु रेम्पि नना मत्तागेन वाता.

6 नना दान लोप्पो बेस हळ्ळतस्के नाकु अयते बूमिपोर्गे मनना नाल् कालुकुना जिवरासी, केडा जिवरासी, बेंगना जिवरासी आनि मब्बुने परियाना पिट्टे दिसतां.

7 अस्के नाकु, पन्नु तेदा, अबुन हळ्ळिसि तिन, इंचि वेहताप उंदि अल्लिकर केंजावाता.

8 अस्के, मन्नि सामि, मूसान नियम परकारम तिनूमा इत्तद, अपवित्रमातद नना बस्केने तिना हिल्लेन, इंचि इत्तन.

9 अदे अल्लिकर मब्बुनाल रोंडो मल्का, पेन सुदद कीतद बतले वस्तु आयि, निमे दान असुदद इंचि इनुमा, इंचि केंजावाता.

10 इल्हा मूड मल्कां आता. पजा अदुन मर्गे पोर्गेळ्ळक तेहाकुंचि मब्बुनहेके ओयमळ जर्गता.”

11 अस्केने नाकुन केम्पि ओयालय कैसरियाताल वाता मुव्वुर मनकालोर नना मत्ता लोतागा वासि निल्लुर.

12 बतले अनमानम क्रियाकौटो ओरतोनि पेम्पि होन. इंचि पेनदा आत्मा नाकु वेहता. ईर हास्स विस्वासि दादालोरगुडा नावातोनि वातुर. मोमोट अंटोरम माकुन केया वेहता मनकना लोते होळियतोम.

13 आ मनकल माकु वेहतद बतल इत्ते, ओर उंदि पेनदा दूतातुन ओना लोते निल्लिसि वळ्ळकतदुन हळ्ळतोर. आ पेनदा दूता, यापाते मनकालोर्कुन लोहचि पन्नु इनना सिमोनन केयकुन.

14 ओर नीकु, नीवा लोतोर्कगुडा मुक्ति बल्हा दोर्कता, अदुन बारेमते वेहांतोर इंचि वेहता.

15 नना वळ्ळमळ सुस्व कीतारित्ते पवित्र आत्मा मुन्ने मनापोर्गे बल्हा रेयतनो अल्हेन ओरापोर्गे इंका रेयता.

16 अस्के, योहान एततोनि बापतिस्मा हीतोर, गानि मीकु पवित्र आत्माते बापतिस्मा हियमळ जर्गता. इंचि सामि इत्ता आ पोल्ले नाकु मति वाता.

17 येसु किरिस्तुन मनम सामि इंचि विस्वासम कीतस्के मनाकु हीता वरमे ओर्कु इंका हीता. अयते पेनदुक अड्डम तिरियानोन नना बोन आंदुन?

18 ई पोल्ले केंजसि ओर अंटोर सपुडदाका आतुर. पेन वेरे जातितोर्कगुडा पिस्वर दोर्किचुकुननाहाटी मनसु मार्सकुनना वरम हीता, इंचि पेनदा स्तुति कीतुर.

अंतकिया सहरते पेनदा बेसता पोल्ले एवता

* 11:2-3 वेरे जाति इत्ते युनानि बासाते कतना आयवा लोकुल्लुक.

- 19 स्टिपन हासोत्ता पज्जो वेल्लेन कस्टालक वातां, अदुनहाटीं लोकुलक सिल्लर आसि हिके-हेके पायसि होत्तुर. आ लोकुलक पिनिंके, साइप्रस, अंताकिया इना सहरकुने होंचि अगा सिराप यहुदिलुकुंके पेनदा बेसता पोल्ले वेहचेके मत्तुर.
- 20 ई विस्वासुलुकुनाले इच्चुर विस्वासुलक साइप्रस आनि कुरेनि इना सहरतोर मत्तुर. ओर अंताकियाक होंचि येसु सामिना बेसता कबुर युनानि लोकुलुकुंकगुडा वेहत्तुर.
- 21 सामिना ताकत ओरतानि मत्ता इंचि वेल्लेटुर लोकुलक विस्वास कीसि सामिनहेके तिरियतुर.
- 22 बस्के अय्ते ई कबुर येस्सलेमता कलिसियातोकं तेळियता, अस्के ओर बरनाबासुन अंताकियाक लोहत्तुर.
- 23 ओर अगा होंचि अगाटा लोकुलुकुनपोरों पेनदा कुपीं हळसि इरगा कूस आतोर, सामिनतानि बस्केळताहाटीं पूरा मनसुनाल बेस विस्वासमते नित्तिसि मनना, इंचि ओर्क अंतोर्क दैरेनेम हीतोर.
- 24 ओर बेस मनकल मत्तोर, अचोने आयका विस्वासम आनि पवित्र आत्माते निडिस मत्तोर. इल्हा वेल्लेन मंदि सामिन नम्मिसि विस्वासुलक आतुर.
- 25 पजा बरनाबास साऊलुन पहकालय तरसुस इना सहर होतोर.
- 26 अगा ओन दोर्किचुकुंकि अंताकियाक पीसि वातोर. अगा ओर इच्चुर अगाटा कलिसियातोकं कलियसेके, वेल्लेन लोकुलुकुंक कराहसेके मत्तुर. इल्हा ओर इच्चुर उंदि एडादिमेड अंताकियातेन मत्तुर. अय्ते मोट्टा मोदाना सिस्युलुकुन "किरिस्तुनोरः" इंचि इन्मळ ई अंताकियातेन जर्गुता.
- 27 अवे तुलुकुने इच्चुर पेनदा कबुरतोर येस्सलेमताल अंताकियाक वातुर.
- 28 ओरव्ते वरोर अगबुस पोरोलतोर मत्तोर. ओर पवित्र आत्माते निडिस, पूरा दुनियाते उंदि पेद्दा कर्वु अरानद मंता, इंचि वेहतोर. इद् कर्वु कलादियुस इना राजाना कालमते अरिसि मत्ता.
- 29 अस्के अंताकियाते मत्ता अंतोर सिस्युलक ओरा-ओरा एलवान परकारम यहुदियाते मनना विस्वासुलुकुंक सहायमहाटीं बतलना लोहना इंचि निरनायम एततुर.
- 30 ओरा निरनायमनुसार सहायमहाटीं जमा कीता सोम्मुन ओर बरनाबास आनि साऊलना कय्दे यहुदियाते मनना पेद्दालुकुनहेके लोहचीतुर.

12

हेरोद राजल पन्न जेलने वाटंतोर

- 1 अवे रोजकुने हेरोद अग्रिपा राजाल कलिसियानाल इच्चुर मंदितुन तकलिप कियालय सुस्व कीतोर.
- 2 ओर योहानुना दादल याकोबुना तल्लातुन कसेटे कोय्से हळ्का वेहतोर.
- 3 ओर कियना कबाहक यहुदि लोकुलुकुंक बेस अनपिस्ता इन्कुंचि हेरोद राजाल पन्न इका दोर्का पीतोर. (इद गटना होयवा पिडिता हारिना पंडुगुना* रोजु जर्गुता.)
- 4 दोर्कापीसि जेलने वाटतोर. पजा तेपाक नालुर सिपाइलक ओनगा कावेल कियना इंचि, पदाहास सिपाइलुकुना कय्दे ओन अप्जेपतोर. दाटसि होनना पंडुगु† आतारिते पन्न न्यायम कियालय लोकुलुकुना मुन्ने थायाना विचारम हेरोद राजाना मनसुने मत्ता.
- 5 इल्हा पन्न ओर जेलने वाटसि इरतोर. गानि ओनाहाटीं कलिसियातोर मात्रम आगाकोंटा उंदेतीर पेनदुक पारतना कीसेके मत्तुर.

पन्न जेलनाल पेयसंतोर

- 6 हेरोद राजाल पन्न पलाते पीसि वायना उंदि रोज मुन्ने, नर्काटा वेलाक पन्न इच्चुर सिपाइलुकुना नड्डुम निदा होंचेके मत्तोर. सिपाइलक ओन रोंडु गोल्सुकुने बेडी वाटसि इरतुर. पलाते तल्पुनगा कावेल कियानोर जेलता कावेल कीसेके मत्तुर.
- 7 अचानक सामिनद उंदि पेनदा दूता अगा दिसता. आ अरंता पूरा वेल्गुनतोनि निडिस होत्ता. आ पेनदा दूता पन्न मेलाहचि, बिराना तेदा! इंचि ओन तेहाता. ओना कय्कुना बेडी लेंगसि हिळु अरतां.
- 8 अस्के, बिराना तयार आसि हेरपुहक केर्रा, इंचि पेनदा दूता ओन्क वेहता. अस्के अद वेहतापे ओर कीतोर. पजा पेनदा दूता, नीवा सेदर मुचकुंचि नावा पज्जो वा, इंचि इत्ता.
- 9 ओर पेनदा दूता पज्जो-पज्जो होंचि जेलनाल पलाते अय्ते पेयसतोर, गानि पेनदा दूता बतल अय्ते कीसंतोने अद अंता निजमे जर्गुसंता इंचि ओर इनकुना हिल्लोर. ओर उंदि दर्सनम हळसंतन बारे इत्ताप अनपिस्ता.

† 11:23 कुर्पा इते उंदि परकारमता आसिवांद इत्ताप. ‡ 11:26 किरिस्तुनोर येसुनपोरों विस्वास कीसि ओर वेहताप ताकाना लोकुलुकुन किरिस्तुनोर लोकुलक इत्तुर. * 12:3 होयवा पिडिता हारिना पंडुगु इद यहुदि लोकुलुकुनद उंदि पेद्दा पंडुगु अंद. † 12:4 दाटसि होनना पंडुगु यहुदि लोकुलुकु गुलामगिरिताल पेयसतस्के कीता पंडुगु अंद. इद मार्च-एप्रिल मेलाते कीतुर.

10 पजा ओर मोदाटोन आनि ओना पज्जोटा कावेल कियानोन दाटसि सहरकु होनना कचिचि तल्पुनगाहकु वातुर. अस्के आ तल्पु ओराहाटी दानद अदे पेयस्ता. अस्के ओर दान दाटसि पलाते पेय्सि होत्तुर. इचचोन लक्कु होतंका अचानक आ पेनदा दूता ओन होळसि होत्ता.

11 पजा पत्रुक तेल्चि अरता. अस्के निजमे! सामिए ओना उंदि पेनदा दूतातुन लोहचि नाकुन हेरोद राजाना कय्दाल तप्पिस्तोर. यहुदि पेद्दाल्क नाकुन बतल-बल्हा कियाना इचि विचारम कीसके मत्तुरो, अब अन्निटावुनालगुडा सामिए नाकुन पिसागोटोर, इचि इन्कुत्तोर.

12 इंदता तेळियता पजा ओर मरियम इनना सुरतटा लोन होत्तोर. ई मरियम योहान (ईन मरकुसगुडा इंतुर) इनानोना यावल आंद. अगा वेल्लेन मंदि उंदगा जमा आसि पारतना कीसके मत्तुर.

13 पत्रु पलाताल तल्पुन तंतस्के तल्पु तेंडालय स्दा इनना उंदि दासि पेगिड वाता.

14 पत्रुना लेंग एपाट कीसि अद वेल्ले आनंदमते तल्पु तेंडाकोटिन मल्सि लोपो वित्ति, “पत्रु तल्पुनगा नित्तिसि मंतोर,” इचि वेहता.

15 अस्के, नीकु पिसा पीताना? इचि अगा मत्तोर इत्तुर. अद वेहनद निजमे इचि बचचोनो वेहता. अस्के ओर, अद ओना पेनदा दूता आयावच्चु, इचि इत्तुर.

16 अथना पत्रु तल्पुन अल्हेन तंचेके मत्तोर. पजा तल्पु तेंडतस्के पत्रुन हळसि ओर्कु इचंन्रम आता.

17 अस्के पत्रु ओर्कुन सपुडदाका मंटा इचि कय्दे सय्ये कीसि वेहतोर. सामि ओन जेलनाल बल्हा पलाते तत्तोर, इद ओर्कु पूरा समजाचि वेहतोर. पजा, ई संगति याकोबुंक (येसुना तम्मुर) आनि कळमता विस्वासुल्कुंक वेहाट, इचि वेहचि अगटाल ओर इंकुंदि वेरे जेगाते पेय्सि होत्तोर.

18 पंग आतास्के, पत्रु बेके होत्तोर, बतल आता? इचि सिपाइल्क पेद्दा गाबर आतुर.

19 हेरोद राजाल ओन पहकतोर. गानि पत्रु ओन्क बग्गेन दोर्का हिल्लोर. अस्के ओर कावेल इरता सिपाइल्कुन पूस कीसि ओर्कुन हळ्कना आदेस हीतोर. हेरोद राजाल यहुदियाताल कैसरियाते वासि मनालय दल्गुतोर.

हेरोदना हामुर

20 हेरोद राजाल सूर आनि सैदा सहरकुना लोक्कुनपोर्रो वेल्ले होंग आसि मत्तोर. ओर अंतोर उंदि आसि ओनतोनि वळकालय होत्तुर. राजाना वरोर बेस दग्गेटा सेवक बलासतुस इनानोन मुन्ने अरहचि, माकु सांति गावाले, इचि ओन्क विनंति कीतुर. बारित्ते ईरा देसेमतोर्कु तिनालय तिडि राजाना देसेमताले दोर्कुंदु.

21 निरनायम कीरता रोजु हेरोद राजाल, राजाल केराना कपडिं केरसि ओना राजगद्देपोर्रो उदसि लोक्कुंकुंका बासन हियालय दल्गुतोर.

22 अस्के लोक्कुल्क, “इद अय्ते पेनदा लेंग आंदु, मनकानद आयो,” इचि वरगेयालय दल्गुतुर.

23 अस्के राजाल पेनदा कदर कियाकोटा पोंगसोत्तोर. अदुनहाटी अस्केटद अस्केने सामिनद उंदि पेनदा दूता ओन बिमार अरहता आनि ओर पुळ्कु अरसि हासि होत्तोर.

24 गानि पेनदा पोल्ले मात्रम पैलांचेके होत्ता. अब पोल्ले केंजसि वेल्लेन लोक्कुल्क विस्वासमते वातुर.

25 बरनाबास आनि साऊल ओरा सेवा कबळ पूरा कीसि येस्सलेमताल वापस अंताकिया होत्तुर. होननेके मरकुस इनना योहानुनगुडा पज्जो पीकुंचि होत्तुर.

पौलुस मोदाटा पय्नेम पेय्संतोर

13

(13:1–14:28)

बरनाबासुन आनि पौलुसुन बेस कबळताहाटीं पेरमळ

1 अंताकिया सहरता कलिसियातोरव्टे इच्चुर पेनदा कब्रतोर आनि कराहनोर मत्तुर. ओर बोर इत्ते, बरनाबास, सिमोन ईन निगर (इत्ते कर्नेटोर) गुडा इनुंदुर, कुरेनि सहरता लुकियुस, साऊल, गालिल एरियाता राजाल हेरोद अंतियासुनतोनि बेर्सता मनाहेम ईर आंदुर.

2 उंदि रोज ओर ओक्कापोद्दु मंचि सामिक आरादना कीसके मननेके पवित्र आत्मा ओर्कुन, “नना बद कबळताहाटीं बरनाबासुन आनि साऊलुन पेरकुत्तनो, अदुन कियानाहाटीं ओर्कुन अलग कीम्टु,” इचि इत्ता.

3 अस्के ओर ओक्कापोद्दु मंचि पारतना कीसि ओरापोर्रो कय इरसि ओर्कुन लोहचीतुर.

पौलुस आनि बरनाबास साइप्रस दीबिते दांतुर

4 पवित्र आत्माहेंदाल ओर्कुन लोहतारित्ते ओर सिलुकिया सहरते होत्तुर, अगटाल उंदि डोंगाते उद्दिस साइप्रस दीबेहेके पेय्स्तुर.

5 पजा अदे दीबेते मनना सलमीस इनना सहरते एवतारित्ते, यहूदिलुकुना दर्मसास्त्रम कराहना लोहकुने होंचि पेनदा पोल्ले वेहालय दलग्गुर. योहान (ईन मरकुसगुडा इन्दुर) ओर्कु सहायम कियालय ओरतोनि मत्तो.

6 पजा ओर पूरा दीबेतुन तिरियसेक पापूस इनना नाटे एवतुर. अगा ओर्कु वरोर यहूदि जातिता मंत्रगाड आनि पेनदा आबद्दम कबुरतोर कलियतोर. ओन पोरोल बार-येसु.

7 अगा वरोर सिरगु पौलस इनना तेल्विता अदिकारि मत्तोर, ओनतोने बार-येसु मत्तोर. आ अदिकारि पेनदा पोल्ले केंजंतन इंचि बरनाबासुन आनि साऊलुन ओनगा केयतोर.

8 गानि एलिमल इनना मंत्रालुकुनोर (युनानि बासाते बार-येसुना पोरोल एलिमल मत्ता), बरनाबास आनि साऊलुक अड्डम आसि आ अदिकारि विस्वासम कियामान्नि इंचि आपालय हळतोर.

9 अस्के साऊल (ईन पौलस इका इन्दुर) पवित्र आत्माते निडिसि, एलिमलनाहेके उंदेतीर हळसेक,

10 “अरे! दोका हियानोना, अन्नि तीरकुना नडेह कियाना बुद्दिदे निडिसि मत्ता देख्यमता मरिना! अन्नि नीति पोल्लेक अड्डम तिरियना पगातोने आंदिन. सामिना निजम पोल्लेतुन बदवेरदाका आबद्दम वळ्कसेक मनांतिन?

11 इंदके हळा! सामि नीवा पोर्री कय तेहातोर, निमे गुड्डिन आंतिन. कोन्नि रोजकुनदाका पोळ्दुनगुडा हळ्काकोटा आंतिन,” इंचि इत्तोर. इत्तस्केने एलिमलना कळ्कु मागुर-मागुर आतां. हिरि हीकट आसि दिसाकोटा आतां, अस्के, नाकुन बोर्नना कय पीसि ओयगोम, इंचि ओर हीके-हेके पहकालय दलग्गुर.

12 एलिमलुक अल्हा आतदुन हळसि, सामिना बारेमते वेहता पोल्ले केंजसि इंचत्रम आसि, आ अदिकारि सामिन विस्वासम कीतोर.

पिसिदिया एरियाता अंताकियाते पेनदा कबुर वेहमळ

13 आयका पौलस ओना दंटातोरतोनि पापूस सहरताल डोंगाते उदसि, पंपुलिया एरियाते मनना पिरगा सहरते होत्तुर. अगा होत्तारित्ते योहान ओर्कुन होळसिसि येस्सलेम मल्सि होत्तोर.

14 हेके पौलस आनि बरनाबास पिरगा सहरताल तिरियसेके पिसिदिया एरियाते मनना अंताकिया सहरते एवतुर. नोमकेम रोजुने यहूदिलुकुना दर्मसास्त्रम कराहना लोते होंचि उदतुर.

15 अगा मूसाना नियम आनि पेनदा कबुरतोर रासतव पुस्तकालुकुन हदुवतुर. हदवुत्तस्के दर्मसास्त्रम कराहना लोता अदिकारिलुक पौलसुन आनि बरनाबासुन, “दादालोरिता! लोकुकुकुंकराहनाहाटी मिहगा बदाना प्रोत्साहन कियाना पोल्ले मत्ते करहट,” इंचि पूसकियालय लोहत्तुर.

पौलसना बासन

16 अस्के पौलस नित्तिसि, लोकुकुकुन सपुडदाका कियालय कय तेहाचि वळ्कालय दलग्गुर, इम्प्राएलता लोकुरिता आनि पेनदुक वेरियना वैर जातितोरिता, केंजट.

17 ई इम्प्राएल लोकुकुकुना पेन, मना एनकटा पेदुदालुकुन पेर्कुलता. ओर इजिप्त देसेमतोरा कयदा हिळ्ळ बस्के अय्ते मत्तुरो, अस्के ओर्कुन पेदुदा कीसि, दाना पेदुदा बलमतोने आ देसेमताल पलाते तत्ता.

18 मना पेदुदालुक पेनदा पोल्ले केंजाकोदुर, अय्नागानि दग्गेर-दग्गेरा नल्चै वर्सनदाका पेन ओर्कुन बव्लि जेगाते ओर्सकुलता.

19-20 कनान देसेमता एडुं जातिन नासडेम कीसि, अद बूमि इम्प्राएल लोकुकुकुंकराहना, इद मीवा बूमि, इंचि हीता. इव अन्नि आयालय नालुं न्हुकुना एबै वर्सा दलग्गतां. पजा सामवेल पोरोलता पेनदा कबुरतोर वायानादाका पेन ओर्कुं बच्चुरो न्यायम कियानोर्कुन हीता.

21 आयका वरोर राजाल गावाले इत्ताहाटी, पेन ओर्कु बेंजामिनना वंसमतोर कीस इननोना मरि साऊलुन हीता, ओर नल्चै वर्सा राज्येम कीतोर.

22 मर्रा साऊलुनगटाल राज्येम तेंडसि दाविदुंक हीता. दाविदुना बारेमते पेन इल्हा गवाइ वेहता, “यिस्सल पोरोलतोना मरि दाविद, नना इनकुत्ताप नाकु दोर्कतोर, नना वेहतव अन्नि ओर पूरा कीतोर,” इंचि वेहता.

23 “येन हीता पोल्ले परकारम ईना वंसमताले इम्प्राएल लोकुकुकुंकराहना मुक्ति हियानोर इंचि येसुन, पेन लोहता.

24 येसु वायाका मुन्ने, बापतिसमा हिमना योहान इम्प्राएलता अटोर लोकुकुकुन, मन्सु मार्सकुचि बापतिसमा एतट,” इंचि वेहतोर.

25 योहान ओना कबाटुन पूरा महना वेलाते, “नना बोन इंचि मिमेट इनकुंचितरि? मिमेट बोनय्ते एदुर हळसतिय, ओन नना आयोन. ओर नावा पज्जो वायानुर, नना ओना कालुकुना हेर्पुहक तेंडना लायक इका हिल्लेन,” इंचि इत्तोर.

26 मावा दादालोरिता, अन्नहामुना बंसमतोरिता आनि पेनदुक वेरियना वेरे जातितोरिता! मुक्ति हियना बेसता कबुरतुन पेन मनागा लोहचीता.

27 येस्सलेमते मनानुर आनि ओरा अदिकारिलक येसुन एरपाट किया हिल्लुर. बारा-वारम नोमकेम रोजुने पेनदा कबुरतोरता पोल्ले हदबुंदुर, गानि अदुन एरपाट कियवा, येसुन हब्लिकिसि आ पेनदा कबुरतोरता पोल्लेन पूरा कीतुर.

28 हामुर सिक्सा हियनलायक बतले तप्पु येसुनलोप्पो दोर्काकोन्नागानि ओन हब्लिकोम इंचि पिलातुस राज्यपालुक विनंति कीतुर.

29 येसुन बतल-बतल कियानुर इंचि रासि मत्तानो, अव अन्नि पूरा आतस्के ओन कूसुनपोरौटाल हिळु रेहचि बौदा दोस्तुर.*

30 गानि पेन ओन हामुरताल मर्रा तेहता.

31 तेहतारित्ते, गालिल एरियाताल येस्सलेमदाका ओनतोनि होत्तोक्कु वेल्लेने रोजकुनदाका ओर दिस्सेक मत्तोर. इंदके लोकुकुना मुन्ने येसुना गवाइ इंचि ओरे मंतुर.

32 पेन मना पेदुदालुकुं मुन्नेने पोल्ले हीसि मत्ता. अदे पोल्लेता कबुरतुन मोमोट मीक वेहासेक मंतोम.

33 इल्हा पेन येसुन हामुरताल मर्रा तेहाचि, मना पेदुदालुकुं मुन्नेने हीता पोल्ले, इंदके मनाहाटी निजम आता. इदु, बजन सहितता रौंडो बजनते इल्हा रासि मंता:

“निमे नावा मर्रिन आदिन, इय्यला नना नीकु बाबोन आतन.” *

34 पेन ओन हातोरता लोप्पोटाल तेहता, ओर मर्रा बस्केने कळियसि होन्नोर.

“नना दाविदुक तप्पाकोटा हीतन इत्ता पवित्रमाता आसिर्वाद नीकु हीतन,”*

इंचि इत्ता.

35 अल्हेने इंकुंदि बजनते,

“नीवा पवित्र मनकन कळियसि होना हिथ्यिन.” *

इंचि इत्तोर.

36 “दाविद पेनदा इच्चा मत्तापे ओन्क हीता सेवा-कबाटन ओना कालमते महाचि हातोर. हातस्के ओना पेदुदालुकुन बगा बौदा दोस्तुरो, अग्गेन ओन इंका बौदा दोस्तुर ओर कळियसिगुडा होत्तोर.

37 गानि पेन तेहातोर मात्रम कळियसि होना हिल्लोर.”

38 अदुनहाटी मावा दादालोरिता! मिमेट दीन तेळियगोटकुंतु. येसुनाहेंदाले मीवा पापालुकुन पेन मापि कीता इंचि मोमोट वेहासेक मंतोम.

39 मूसाना नियम हेंदाल मीकु पापालुकुनाल मापि दोर्को, गानि येसुना पोरो विस्वास इर्रानुर अंतोर्क ओरा पापालुकुनाल मापि दोर्कता.

40 अदुनहाटी पेनदा कबुरतोर रासता पोल्ले मीपोर्रो वायाकोटा उसारते मंटु, इंचि पेन इल्हा इत्ता:

41 “नावा पोल्लेतुन पास्कानोरिता हुळ्ळट, इचंन्रम आसि, हासि दांतिट.

बारित्ते, मीवा रोजकुने नना इसौटा कबळ कीतन गदा,

अदुना बारैमते बोरे वेहिनागानि मिमेट विस्वासम किथ्यिर,”*

इंचि पेन वेहता.

42 पौलुस, बरनाबास दर्मसास्त्रम कराहना लोताल पलाते पेयसतस्के, “इव पोल्ले वायाना नोमकेम रोजुने इंका एकको माकु वेहाटु,” इंचि लोकुकुक ओरतोनि विनंति कीतुर.

43 वेल्लेटुर यहदिलुकु अल्हेने यहदि जातिते वाता वेरे जातितोर, पौलुस, बरनाबासुना पज्जो होत्तुर. ओर, लोकुकुकुनतोनि वळकसेके, “बस्केळक पेनदा कुर्पाते मंटु,” इंचि ओर्कु वेहतुर.

44 इंकुंदि नोमकेम रोजुने सामिना पोल्ले कैजालव, पूरा नाटेनोर इत्ताप जमा आतुर.

45 अचो वेल्ले मदितुन हळसि यहदिलुकुना जीवा मसुल्ला, अदुनहाटी ओर पौलुसना पोल्लेक विरोद कीसि ओन बदनाम कियालय दलगतुर.

46 गानि पौलुस आनि बरनाबास वेरियाकोटा, मीकु पेनदा पोल्ले मुन्नेने वेहना अब्सरम मत्ता, गानि मिमेट दान हयसका, बस्केळक पिस्सना पिस्वरक लक्कु आताप हुपिस्तिर. अदुनहाटी इंदके मोमोट यहदि आयवोरहेके दांतोम.

47 बारित्ते पेन माकु इल्हा आदेस हीता:

“सामि लोकुकुकुन बल्हा पिसागोटतोर इदु पोल्ले निमे दुनियंता वेहगोम इंचि,

नना नीकुन वेरे जातितोरहाटी वेडसि हुप्सानोन कीतन,”*

* 13:29 बौदा दोस्तुर अद कालमते गुदुटतुन तुलाहचि सौर कीसि, अन्ने पीनगु दोस्तुर. * 13:33 बजन सहिता 2:7 * 13:34 यसायाह 55:3

* 13:35 बजन सहिता 16:10 * 13:41 हबककुक 1:5 * 13:47 यसायाह 49:6

इंचि इत्तोर.

48 ई पोल्ले केंजसि वेरे जातितोर वेल्ले कूस आसि, सामिना पोल्लेता कदर कियालय दलगुत्तुर. बचटुकुन अय्ते बस्केळ्ळक पिस्सना पिस्वरताहाटी पेन पेरकुत्तनो, अचट्टुर येसुनपोर्रो विस्वासम कीत्तुर.

49 इल्हा सामिना पोल्ले पूरा एरियाता लोकुकुळ्ळक तेळियता.

50 गानि यहुदिले लोकुकुळ्ळक मात्रम निजमाता पेनदुन आरादना किय्यानव सहरता कदरगल्ला वेरे जातिता मुर्ताहकुन, पेदुदालुकुन एक्किस्तुर. अस्के ओर पौलस, बरनाबासुन पक्का तकलिप कीसि ओर्कुन आ एरियाताल पलाते पेचाहत्तुर.

51 ओर इच्चुर ओरा कालुकुना दुब्बा अग्गेन दुल्पिसि ओरापोर्रो विरोद हुप्पिचि इकोनिया सहरते पेय्सि होत्तुर.

52 गानि अंताकियाता विस्वासुळ्ळक पवित्र आत्माते पूरा निडिस आनंदमते मत्तुर.

14

पौलसु आनि बरनाबास इकुनियुम सहरते सेवा कीत्तुर

1 इल्हा पौलसु आनि बरनाबास इकोनिया सहरते यहुदिलुकुना दर्मसास्त्रम कराहना लोते होत्तुर. अगा पेनदा पोल्ले बेस वेहत्तुर. अदुनहाटी यहुदिलुकु आनि युनानि जातितोर वेल्लेदुर लोकुकुळ्ळक येसुनपोर्रो विस्वासम कीत्तुर.

2 गानि विस्वासम कियवा यहुदिलुकु, विस्वासुळ्ळकनतोनि जगडम कियालय वेरे जातितोकुन एक्किस्तुर.

3 अय्नागानि पौलसु आनि बरनाबास अगा वेल्लेने रोजकु आगिसि मत्तुर. सामिना कुर्पाता बारेमते वेरियाकोटा वेहचेके मत्तुर. ओर वेहना पोल्ले निजम इंचि गवाइ हुप्सालय सामि ओरा कय्दाल चिन्हां, इचत्रमता कबाहक हुप्सुंदुर.

4 गानि हेके सहरते वरोनद वर्रोकु अर्राकोटा आता. इच्चुर यहुदिलुकुनहेके, इच्चुर बारे प्रेरितलुकुनहेके आत्तुर.

5 वेरे जातितोर आनि यहुदिलुकु ओरा अदिकारिलुकुनतोनि कलियसि पौलसुन आनि बरनाबासुना कदर रेहचि बंडां हुक्कालय तयार आत्तुर.

6-7 इद पोल्ले पौलसुंक आनि बरनाबासुंक एर्का आता. अदुनहाटी ओर लुकावनिया जिल्लाते वितत्तुर. अद जिल्लाता लिसरा, दिरबे सहरते आनि दग्गेता नाहकुने होंचि पेनदा बेसता कबुर वेहुंदुर.

पौलसु आनि बरनाबासु लुच्चाते सेवा कीत्तुर

8 लिसराते वरोर कुंटी मनकल उदिस मत्तोर. ओर पुटतगाटाल बस्केने ताका हिल्लोर.

9 पौलसु वेहना पोल्ले ओर केंजसेके मत्तोर. अस्के पौलसु ओन उदेतीर हळसि, ई कुटिन लोपो बेस आयना विस्वासम मंता, इंचि इनकुत्तोर.

10 अस्के पौलसु ओन, “तेदसि बेस नित्ता,” इंचि लगांचि इत्तस्के, ओर एगरिसि तेदसि ताकालय दलगुत्तोर.

11 लोकुकुळ्ळक पौलसु कीतदुन हळसि, लुकावनिया बासाते, “पेनकु मनकना रूपमते मनागा रेय्सि वातां,” इंचि लगांचि इत्तुर.

12 ओर बरनाबासुन, जेयसु पेन, इत्तुर. *आनि पौलसु वळ्ळकानते पेदुदा मत्तोर इंचि ओन, हिरमेष पेन,† इत्तुर.

13 जेयसु पेनदा गुळ्ळि, नाटुकु मुन्ने मत्ता. दाना पेर्माल, लोकुकुळ्ळकनतोनि कलियसि, पौलसु आनि बरनाबासुनाहाटी मोक्कु हियालय कोंदां, पुंगाहकुना दुम्मे पीकुंचि सहरते नेंगना गलमानगा तत्तोर.

14 गानि ओर इल्हा कीतदु केंजसि, प्रेरित बरनाबासु आनि पौलसु ओरां कपडि हराहकुत्तुर.‡ लोकुकुळ्ळक लोपो वितसि,

15 “ए लोक्कुरिटा, मिमेट इल्हा बारि कीसतिर? मोमोटगुडा मीलेसीटा मनकालोरमे. मिमेट वट्टि पोल्लेन होळसि, जीवाते मनना पेनदाहेके तिरियट. अदे पेन मब्बुन, बूमितुन, समुद्रमतुन आनि अय्ते मत्तव अन्निटवुन पुटिस्ता. इंचि अदे पेनदा बेसता कबुर वेहालय मोमोट वातोमे.

16 मुन्नेटा कालमते पेन, अन्नि जातिना लोकुकुळ्ळकन ओरा इस्तमाताप ओर्कुन मोळ्ळा हीता.

17 गानि मीकु मब्बुनाल पिर्से हीता, कालमनुसार पंटा पंडिस्ता, तिनालय गाटो हीसि, मीकुन आनंदमते इरसि, ‘ननाने निजम पेनदुन आंदुन’ इंचि दाना बेसता कबाहकुनाहेदाल मीकु हुपिस्ता,” इंचि वेहत्तोर.

18 अच्चोन वेहिनागानि वेल्ले तिप्पलते ओर्क मोक्कु हियालय वातोकुन आपा परत्तुर.

19 आयंका पीसिदियाता अंताकिया सहरताल, इकोनिया सहरताल इच्चुर यहुदिलुकु वात्तुर. वासि लोकुकुळ्ळकन ओरा बाजुंक कीकुंचि, पौलसुनपोर्रो बंडां हुक्कुर. ओर हातोर इनकुंचि ओन सहरता पलाते इग्गिस ओत्तुर.

20 पजा सिस्युळ्ळक ओनगा वासि सुट्टु नितत्तुर. अस्के पौलसु तेदिस सहरते होत्तोर. मर्रा इंकुंदि रोज बरनाबासुनतोनि दिरबे सहरते होत्तोर.

* 14:12 जेयसु पेन युनानि लोकुकुळ्ळकना मोदोल पेन. † 14:12 हिरमेष पेन युनानि लोकुकुळ्ळकना वेरे पेनकुं कबुर हियना पेन. ‡ 14:14 कपडि हराहकुत्तुर पेन्दुकु विरोदमते बद्दना पोल्ले केजते यहुदिलुकुकुळ्ळक होंग वासि कपडि हराहकुंदुर.

पय्नेम महाचि पौलुस अंताकिया सहरकु मल्लिस वायमळ

21 पजा पौलुस आनि बरनाबास दिरबे सहरता लोकुल्लुकुंके पेनदा बेसता कबुर वेहचि, वेल्लेटोर्कुन सिस्स्युल्लुकु कीतुर. पजा लिस्सरा, इकोनिया, पीसिदियाता अंताकिया सहरते मल्लिस होलतुर.

22 अगा होंचि, “पेनदा राज्येमते होनना इत्ते तिप्पल्लक वांतां, दानाहाटी विस्वासमते गट्टियासि मंडु,” इंचि वेहचि दैरनेम हीतोर.

23 पजा ओर, अगाटा हरेक कलिसियाने पेद्दाल्लुकुन निलाहतुर. ओराहाटी ओक्कापोद्दु मंचि पारतना कीसि, ओर बा सामिनपोरों अय्ते विस्वासम कीतुर, आ सामिक अप्पजेपतुर.

24 आयंका ओर पिसिदियाताल पंपुलिया एरियाते होलतुर.

25 अगा होंचि, पिरगा सहरते पेनदा बेसता पोल्ले वेहचि अतलिया सहरते होलतुर.

26 अगटाल डोंगा उदसि सिरियाता अंताकियाते मल्लिस होलतुर. बद कबळ अय्ते ओर पूरा कीतुरो, अद कबळ पेनदा कुर्पाते अदे जेगाताल सुख कीसि मत्तुर.

27 अगा होत्तरित्ते, ओर कलिसियातोर्कुन जमा कीसि, पेन ओरा कय्दे बल्हा पेद्दा-पेद्दा कबाहक कीता, वेहतुर. वैरे जातितोर्कुनगुडा विस्वासम कियालय पेन बल्हा हरी कीता, इंचि वेहतुर.

28 आयंका सिस्स्युल्लुकुनतोनि वेल्लेन रोजकु ओर अगा मत्तुर.

15

येस्सलेमते उंदि पंचादि

1 पजा यहूदियाताल इच्चुर लोकुल्लक अंताकियाक वासि, “मूसाना नियम परकारम मीवद कतना आयाकोटे मीकु मुक्ति दोर्का परों” इंचि अगाटा दादालोर्कुंके कराहलय दलगुतुर.

2 ओर लोकुल्लक कराहता पोल्ले पौलुसुंके, बरनाबासुंके नच्चा हिल्लें. अदुनहाटी ओरा नड्डुम वेल्लेन लोल्लिं आतां. अय्ते ई लोल्लिंके समदानम पूस कियानहाटी पौलुस, बरनाबास आनि इच्चुर विस्वासुल्लक येस्सलेम होंचि अगाटा प्रेरितुल्लुकुंके, पेद्दाल्लुकुंके कलियना इंचि निरनायम कीतुर.

3 पजा अगाटा कलिसियातोर्कुन सार्ला कीतुर. अय्ते ओर पिनिके, सामरिया इनना एरियानाल तिरियसेक येस्सलेम होलतुर. होननेके वैरे जातितोर ओरा मनसु बल्हा मार्सकुल्लतुर, अदुन बारेमते वेहासेक होलतुर. इल्हा ओर अगाटा दादालोर्कुन इरगा कूस कीतुर.

4 ओर येस्सलेम एवतस्के, अगाटा कलिसियातोर्कुन, प्रेरितुल्लक, पेद्दाल्लक ओर्कुंके बेस आनंदमते कलियतुर. पजा पौलुस आनि बरनाबास पेन ओरतोनि मंचि बता-बता कबाहक कीता, अदंता वेहतुर.

5 अस्के परिसिल्लुकुनाल इच्चुर विस्वासुल्लक तेदसि, “वैरे जातितोरद कतना तप्पाकोटा आये पीता, मूसाल वेहता नियम परकारम ओर ताके पीता,” इंचि इत्तुर.

6 अस्के ई पोल्लेन बारेमते विचारम कियालय प्रेरितुल्लक आनि पेद्दाल्लक उंदगा जमा आतुर.

7 बच्चोने जेम विचारम कीतारित्ते पत्रु तेदतोर. तेदसि, “नावा दादालोरिता, वैरे जातितोर नावा तोळ्दाले पेनदा बेसता कबुर केंजसि विस्वासमते वायाना इंचि, वेल्लेन रोजकु मुन्ने पेन मना अंतोर नड्डुमताल नाकुन पेर्कुत्ता. इद संगति मीकु अंतोर्के एर्के मंता.

8 मनकालोर्कुना मनसुन एरपाट कियाना पेन, बल्हा मनाकु पवित्र आत्मातुन हीता, अल्हेने ओर्कुंके इंका हीसि ओरतोनि कलियसि मत्ता संगति मनाकु वेहता.

9 ओर विस्वासम कीताहेंका पेन ओरा मनसुकुन इंका बेस कीसि, ओर्कुंके, मनाकु बतले बेदबावम इरा हिल्ले.

10 अय्ते मरि, मनमगुडा मना पेद्दाल्लकगुडा कांजा परंवा काडितुन मिमेट सिस्स्युल्लुकुना हट्टनपोरों ताससि, मीकु पेनदा परिकसा हळानंद मंताना?

11 येसु सामिना कुर्पाते मनाकु मुक्ति दोर्केता इंचि मनम नम्मंतोम गदा! अल्हेन ओर्कुंकेगुडा मुक्ति दोर्केता इंचि विस्वासम मंता.” इंचि इत्तोर.

12 अस्के बरनाबास आनि पौलुस, पेन ओर्कुंकेन वैरे जातितोर लोप्पो लोहचि ओराहेंदाल बसंटा चिन्हां, इचंन्रमता कबाहक कीता, अदुन ओर वेहालय दलगुतुर अय्ते अंतोर लोकुल्लक सपुडदाका आसि ओरा पोल्ले केंजालय दलगुतुर.

13 ओरा वळकुमळ आतारित्ते याकोब इल्हा वळकालय दलगुतोर. नावा दादालोरिता, नना वेहनंद केंजट.

14 पेन मोट्टा मोदाला वैरे जातितोर पोरों दाना दया हुपिच्चि ओरागटाल इच्चुर्कुन दाना लोकुल्लुकुन लेहका बल्हा कीकुत्ता, इदुना बारेमते सिमोन पत्रु मनाकु वेहचि मत्तोर.

- 15 पेनदा कबुरतोर वेहता पोल्ले इंका इद गटनकु कलियंतां. अव पोल्ले इल्हा रासि मंतां:
- 16 “नना तिरियसि वासि दाविदना अरसोल्ता राज्यमतुन मर्रा निल्हंतन,
दाना नासडेम आता मुक्का-मुक्कातुन कल्पिसि अद मुन्ने मत्ताप मर्रा कीतन.
- 17 अस्के पेकुत्ता वेरे जातितोर आनि मिगिल्सि मत्ता अन्नि वेरे जातिनोर,
पेनदुन पहकानुर, इव पोल्ले पेन वेहता.*
- 18 पेन कुद इदुन बारेमते वेल्लेन रोजकु मुन्ने वेहचि मत्ता.”
- 19 अदुनहाटी नावा विचारम बतल मंता इत्ते, मनसु मार्सकुंचि पेनदाहेके तिरियता आ वेरे जातितोर्कुन मनम तकलिप कियामन्नि.
- 20 गानि बोम्मांक मोळ्ळकतदुन तिनामन्नि, व्यबिचारम कियामन्नि, गोंदके पिसकिसि हक्कता जिवरासिता हव्वि, नेत्तुरतुन तिनामन्नि इचि ओर्क मनम रासि लोहकोम.
- 21 बारित्ते ओर एनकाटाल मूसाल वेहता नियमतुन, अन्नि सहरकुने वेहासेक अल्हेन हरेक नोमकेम रोजुननाड दर्मासन्त्रम कराहना लोते हद्विसि वेहासेक मंतुर, इत्तोर.

वेरे जाति विस्वासि लोकुकुंक उंदि सिट्टि

- 22 पजा प्रेरितुल्क, पेदुदाल्क आनि कलिसियातोर अंतोर कलियसि, अगाटा विस्वासुल्कुनाल इच्चुर लोकुल्कुन पेरसि पौलस आनि बरनाबासुनतोनि अंताकियाक लोहना निरनायम कीतुर. पजा बरसब्बान* आनि सिलासुन ईर इव्वुर्कुन पेरतुर. ईर इव्वुरगुडा विस्वासुल्कुनाल मुख्य मनकालोर मत्तुर.
- 23 ओर होननेके ओरा कय्दे उंदि सिट्टि हीतुर, अद सिट्टिते इल्हा रासि मंता.
अंताकिया, सिरिया, किलिकिया सहरकुने मनना अंतोर वेरे जाति विस्वासुल्कुंक, येस्सलेमते मनना मीवा पेदुदाल्क आनि प्रेरितुक्कुना हेंदाल जोहार.
- 24 मावा पावरमगल्ला दादालोरिता, माकुन पूस कियाकोटैन महागटाल इच्चुर लोकुल्क मिहगा वासि ओरा मनसुंक वाताप वळ्ळिसि मी मनसुने अनमानम पुट्टिट्टिचि मीकु तकलिप हीतुर इत्ता संगति मोमोट केंजतोम.
- 25 अदुनहाटी मना पावरमगल्ला बरनाबास आनि पौलसुनतोनि, पेकुत्ता इच्चुर लोकुल्कुन मीहेके लोहना इचि मोमोट अंतोरम कलियसि निरनायम कीतोम.
- 26 मना अंतोरा किरिस्तु येसु सामिना पोरोलहाटी बरनाबास आनि पौलस ईर ईरा जीवातुन इंका हियालय तयार आता मनकालोर आंदुर.
- 27 अय्दे मोमोट सिट्टिते रासता अन्नि पोल्ले यहदल आनि सिलास ओर ओरा तोळ्दाल मीकु वेहना इचि ओर्कुन मीहेके लोहसेक मंतोम.
- 28-29 बोम्मांक मोळ्ळकतदुन मिमेट तिनमट, गोंदके पिसकिसि हक्कता जिवरासिता हव्विन, नेत्तुरतुन तिनमट, व्यबिचारमताल लक्कु मंट. इंसंटा अवसरमाता नियमकुंक तप्पा इंका वेरे बद्दे बर्वु मीपोर्री वाटा मन्नि इत्ता पोल्ले पवित्र आत्माकु आनि माकु बेस अनपिस्ता. मिमेटगिंटा इव पोल्लेनाल लक्कु मत्ते मीके बेस आयार. मीकु अंतोर्क जोहार.
- 30 इल्हा रासि ओर्कुन अगाटाल साला कीतंका, ओर पजा अंताकियाक एवतुर. एव्विसि, अंतोर विस्वासुल्कुन जमा कीसि अद सिट्टितुन ओरा कय्दे हीतुर.
- 31 सिट्टिते रासि मत्ता प्रोत्साहन हियना पोल्ले हद्विसि ओर्क अंतोर्क वेल्लेन कुसि आता.
- 32 यहदल आनि सिलास, ईर इव्वुरगुडा पेनदा कबुरतोर आंदुर. अदुनहाटी अगाटा विस्वासुल्कुनतोनि वेल्लेनजेम वळ्ळिसि ओर्कुन विस्वासमते गट्टिगा कीसि ओर्कु प्रोत्साहन हीतुर.
- 33 इल्हा यहदल आनि सिलास कोन्नि रोजकु अगा मत्तुर. पजा अंतोर विस्वासुल्क जमा आसि, ओर्कुन बोर अय्दे अंताकियाक लोहतुरो ओराहेके वापस येस्सलेम होनालय सांतिते साला कीतुर.
- 34 गानि सिलास अंताकियातेन मनना विचारम कीतोर.†
- 35 पजा पौलस आनि बरनाबास कोन्नि रोजकु अंताकियातेन आगतुर. अगाटा वेल्लेन लोकुल्कुनतोनि कलियसि सामिना पोल्ले कराहसेक, बेसता कबुर वेहासेक मत्तुर.

पौलसनद रौंडो पय्नेम

(15:36-18:22)

पौलस, बरनाबास वेरे-वेरे आंतुर

* 15:17 आमोस 9:11-12 * 15:22 बरसब्बा इन यहदल इचिगुडा इंतुर. † 15:34 इद वचनम कोन्नि पांडु तिपिने हिल्ले.

36 इच्चूं रोजकु आतारिल्ले, “मनम सामिना पोल्लें बव-बव सहरकुने वेहतोमो अव अनि सहरकुने मर्रा दाकोम. पेनदुन नम्मुकुत्ता पजा अगाटा विस्वासुल्कुना पिस्वरकु बल्हा बतल मंतांगो ह्ळसि वाकोम,” इंचि पौलुस बरनाबासुन इत्तोर.

37 अय्ते बरनाबासुंक मरकुसुन (ईन योहानगुडा इत्तुर) इंका पज्जेके ओयाना मनसु मत्ता.

38 गानि, पेनदा कबळ्ते आकिरदाका कलियसि मनाकोटा नड्डुमे पंपुलिया एरियाताल ह्ळसि वापस होत्ता मरकुसुन पज्जो ओयमळ पौलुसुंक नच्चा हिल्ले.

39 इल्हा ओर इव्वुर नड्डुम वेल्लेन पोल्लें आसि ओर वै-वै आतुर. अस्के बरनाबास मरकुसुन पीकुचि डोंगाते उद्दिदस साइप्रस इनना दीबिक होत्तोर.

40 पजा पौलुस ओनतोनि मननाहाटीं सिलासुन पेरकुचि अगटाल होत्तोर. अय्ते अगाटा विस्वासुल्कुना पौलुसुंक आनि सिलासुंक पेनदा कुर्पा दोर्कानाहाटीं पारतना कीसि ओर्कुन पेनदा कय्दे अप्पजेपतुर.

41 अस्के ओर सिरिया, किलिकिया इनना एरियानाल तिरियसेके अगाटा कलिसियानोर्कुंक कलियसि पेनदा विस्वासमते बेस एदगानाहाटीं ओर्कु बेसता पोल्लें वेहासेक होत्तुर.

16

पौलुसुंक तिमोति कलियंतोर

1 पजा पौलुस मर्रा दिरबे इनना सहर होंचि अगटाल लिसरा इनना सहर होत्तोर. ह्ळ्हा! अगा तिमोति पोरोलतोर वरोर सिस्सुड मत्तोर. ओना तल्लुर यहदि जातिता उंदि विस्वासि मुरतळ आंद. गानि ओना बाबाल वैर जातितोर (युनानि जातितोर) मत्तोर.

2 लिसरा, इकोनिया सहरकुने मनना विस्वासुल्कु ओन बेस मनकल इन्दुं.

3 अय्ते पौलुस, तिमोतिन ओना पज्जेके ओयाना विचारम कीतोर. गानि अद एरियाते मनना अंटोर यहदि लोक्कुंक, तिमोति वैर जातितोना (युनानि जातितोना मर्रा) मर्रा इंचि एर्का मत्ता, अदुनहाटीं यहदिल्लुकुंक समादानम आयना इंचि पौलुस तिमोतिना कतना क्रियागोटतोर.

4 अस्के ओर येस्सलेमता प्रेरित्लुकु आनि पेद्दालक वेहता पोल्लेन सहर-सहर होंचि वेहचि, अव पोल्लेन परकारम ताकना इंचि वेहासेक होत्तुर.

5 इल्हा अगाटा कलिसियानोरा विस्वासम गट्टिगासि इंका वेल्लेन लोक्कुलक विस्वासमते वासि रोज-रोज वेल्लेन मंदि आतुर.

पौलुसुन मेसिडोनिया एरियाते केयमळ

6 ओर्कुन पवित्र आत्मा, ‘आसिया एरियाते पेनदा पोल्ले वेहा मन्नि’ इंचि इत्ताहाटीं ओर अदे एरियाता पुगारिया, गलातिया एरियानाल होत्तुर.

7 पौलुस आनि तिमोति मूसिया एरियाता गेट्टुदाका एवत्स्के ओर बितुनिया एरिया होनना कोसिस कीतुर. गानि येसुना आत्मा अगा इंका होन्ना हिया हिल्ले.

8 अय्ते ओर मूसियाताल त्रोआस सहरते एव्तर.

9 अदे नर्का मेसिडोनिया एरियातोर वरोर मनकल, निमे मेसिडोनियाते वासि, मावा सहायम कीम, इंचेक विनंति कीसेके मत्तोर. इल्हा पौलुस दर्सनमते ह्ळ्हतोर.

10 ओन्क इल्हा दर्सनम आतारिल्ले, आ लोक्कुंक पेनदा बेसता पोल्लें वेहालय पेन माकुन केयता इल्हा इनकुचि मोमोट अस्केन मेसिडोनिया होनानद विचारम पक्का कीतोम.*

लिदिया मुरताटद मनसु मारियमळ

11 इल्हा मोमोट त्रोआस सहरताल डोंगाते समुद्रम हरि पीसि सवरगा सुमात्राके सहरते एव्ति, इंकुंदि रोजु नियापुलिस इनना सहर होत्तोम.

12 पजा अगटाल पिलिपिया इनना सहर होत्तोम. अद मेसिडोनिया एरियाता मुक्य सहर आंदु. अगा रोमि लोक्कुलक मनुंदुर. अद सहरते मोमोट कोन्नि रोजकु मत्तोम.

13 उंदि नोमकेम रोजुने, यहदिल्लुकुना पारतना कियाना जेगा, सहरता पलाते बैर्ड ओड्डुंक मंदार इंचेके मोमोट होत्तोम. अगा पारतनाकु वासि मत्ता मुर्ताह्कुनतोनि उद्दिदस वळकसेके मत्तोम.

* 16:10 इगटाल ई पुस्तकमतुन रासता लकलगुडा पौलुसुनतोनि कलियतोर.

14 अवन लोप्पो उंदि लिदिथा पोरोलता मुरतळ मत्ता. अद तुयतीरा सहरतद आंद. दान्क पेनदापोरों वेल्लेन विस्वासम मत्ता. अद वेल्लेन दराता नेडि पंडि रंगुना कपडिं अम्मंदु, अद बेस मनसु दोस्सि मावा पोल्लें केंजसेके मत्ता. पौलसु वेहना पोल्लेन बेस केंजालय सामि दाना मनसुन तयार कीतो.

15 अद आनि दाना लोते मत्तोर अंटोर बापतिस्मा एततारित्ते अद, “मिमेटिंगिटा नाकुन पेनदा निजम विस्वासि मुरतळ इंचि इनकुनानय्ते नावा लोन वासि आगत,” इंचि माकुन विनंति कीता. अस्के मोमोट दाना लोन होत्तोम.

पौलसु, सिलासु जेलने अरंतु

16 उंदि मल्का मोमोट पारतना कियाना जेगातेके होंचेके मत्तोम, अस्के माकु उंदि दासि पेगिड कलियता, दाना लोप्पो बविस्य वेहाना आत्मां मत्ता. अद लोक्कुक्क ओरा बविस्य वेहचि दाना मालकुक्कुक्क वेल्लेन दनम संपलिच्चि हियुंदु.

17 अद, “ई मनकालोर अन्निकन्ना पेदूदा पेनदा सेवाकुल्क आंदुर. ईर मीकु मीवा पापमताल मुक्ति दोर्कना हर्दा बारेमते वेहासेक मंतुर,” इंचि वरगेयसेके पौलसु आनि मावा पज्जो वाता.

18 अद वेल्ले रोजकुनाल इन्हेने वेहासेक मत्ता अय्ते पौलसु परेसान आतोर. अदुनहाटीं ओर पज्जोळ्ळ तिरियसि, “येसु किरिस्तुना पोरोलते नना नीकु आदेस हीसेक मंतन, ई पेगिटाल पेय्छि होन,” इंचि आ आत्मातुन इत्तोर. अस्के आ आत्मा पेगिटाल बिराना पलाते पेय्छता.

19 पज्जा आ पेगिटाल मालकुक्कुक्क दोर्कना दनम दोर्काकोटा आताहेंके ओर पौलसुन आनि सिलासुना दोर्कापीसि, इग्गिसेके नड्डुम सहरते अदिकारिल्लुकुना मुन्ने ओतुर.

20 रोमि अदिकारिल्लुकुना मुन्ने ओसि, “ईर यहूदि लोक्कुक्क आंदुर. मावा नाटेने वेल्ले तकलिप कीसंतुर.

21 ईर वेहना रीति-रिवाजकुन परकारम ताकमळ मावा रोमि लोक्कुक्कुना नियमकुना विरोदमते मंता,” इंचि इत्तुर.

22 लोक्कुक्कुना मंदागुडा पौलसु आनि सिलासुना विरोदमते तिरियतुर. रोमि अदिकारिल्लुकु, पौलसु आनि सिलासुना कपडिं हराहचि ओर्कुन दुड्डुकुने तनना आदेस हीतुर.

23 ओर्कुन पक्का तंतारित्ते जेलने वाट्सि, ओरपोरों कडक पहारा इराना इंचि जेलना अदिकारिक आदेस हीतुर.

24 ओन्क इल्हा आदेस दोर्कतारित्ते ओर्कुन जेलना लोपोटा अरति वाट्सि, ओरां कालकुन उंदि मोट्टुंकु बोल अरहचि दोहोतोर.

25 नळजाम नर्काटा वेलाते पौलसु, सिलासु पेनदा स्तुति पाटां पारसेके, पारतना कीसेक मत्तुर. जेलने मत्ता वेरेंतोर केंजसेके मत्तुर.

26 अस्के उंदेदम बूमि इल्हा कदुलता गदा, जेलना पुनादि कदुलसि जेलनव अन्नि तल्पुक उंदे मल्का कुल्ला आतां. जेलने मत्ता अंटोरा बेडीं लेंगसि होत्तां.

27 जेलना अदिकारि निद्राताल तेदसि हळतस्के जेलना तल्पुक कुल्ला दिसतां. अदुन हळसि, जेलने मत्तोर अंटोर पेय्छि वित्तुर बारे, इनकुंचि, ओनाद ओर कोहककुंचि हांतन इंचि कसेर तेहोतोर.

28 गानि पौलसु, “मोमोट अंटोरम इग्गेने मंतोम, नीवद निमेने नुकसान कीकुनमा,” इंचि जोरते वरगेयतोर.

29 अस्के वरोनतानि वेडसि ताथा वेहचि आ अदिकारि बिराना लोप्पो होत्तोर. वनकुसेक पौलसु, सिलासुना कालकुनपोरों अरतोर.

30 पज्जा ओर्कुन पलाते तच्चि, “दादालोरिता, पापालकुनाल मुक्ति दोर्कालय नाकु बतल किया पीता?” इंचि प्सकीतो.

31 अस्के, “निमे येसु सामिना पोरों विस्वासम इर्रां, नीकु, नीवा लोते मत्तोर अंटोर्क मुक्ति दोर्कता,” इंचि ओर इत्तुर.

32 ओर ओन्क, ओना लोते मत्ता अंटोर्क पेनदा पोल्लें वेहतुर.

33 अस्के जेलना अदिकारि अदे नर्का अदे वेलाते ओर्कुन अगटाल ओसि, ओरां पुनकुन नोरतोर. पजा आल्लेसम कियकोटा ओर, ओना लोते मत्तोर अंटोर बापतिस्मा येततुर.

34 पौलसु, सिलासुन ओर ओना लोन पीसि ओसि ओर्कुं गाटो दोस्तोर. इंदके पेनदापोरों विस्वासम इरताहेंके ओर, ओना लोते मत्तोर अंटोर इरगा कूस आतुर.

35 पंगुतारित्ते रोमि अदिकारिल्लुकु, ओर्कुन होळसीम्टु इंचि जेलना अदिकारिक वेहालय इच्चुर सिपाइल्लुकुन लोहतुर.

36 जेलता अदिकारि, “मीकुन होळसगोम इंचि रोमि अदिकारिल्लुकु सिपाइल्लुकुन लोहचीतुर, इंदके मिमेट सांतिते पेय्छि होंटु,” इंचि पौलसुन इत्तोर.

37 अस्के पौलसु, “मोमोट इंका रोम देसेमता रहिवासिल्ले आंदुम. अयनागानि ओर मावा बतले तप्पु हळकेने माकुन लोक्कुक्कुना मुन्ने तंतुर, जेलने वाटसीतुर. इंदके सपुडदाका बोर्कुं एरपाट हिलाकोटा माकुन होळसियालय हळसंतुर, गानि इल्हा आयापर्रों. माकुन होळसानद मत्ते ओर कुद इग्गे वासि होळसियिरकांटी,” इंचि इत्तुर.

38 सिपाइल्क होंचि रोमि अदिकारिल्लुकुंक इद संगति वेहचीतुर. पौलुस, सिलास ईर रोम देसेमता रहिवासिल्क आंदुर इंचि रोमि अदिकारिल्लुकुंक तेळियतारित्ते ओर इरगा वेरियतुर.

39 आयंका रोमि अदिकारिल्क वासि ओर्कुन मापि तल्किसि पलाते ओतुर. ओर्क विनंति कीसि इद सहर होळसि होनालय वेहतुर.

40 पौलुस, सिलास जेलनाल पलाते पेय्मि लिदियाना लोन होतुर. विस्वासि दादालोकुक कलियसि, ओर्कु प्रोत्साहन हीसि अगटाल पेय्मि होतुर.

17

तेसलोनि सहरते पौलुस आनि सिलास

1 पजा ओर अंपिपुलि आनि अपुलोनिआ सहरकंता तिरियसेके-तिरियसेके तेसलोनि सहरते एवतुर. अगा यहुदिल्कनद उंदि दर्मसास्त्रम कराहना लोन मत्ता.

2 पौलुस ओना अलवट परकारम यहुदिल्कना दर्मसास्त्रम कराहना लोतागा होतोर. होंचि मूड नोमकेमकुन दाका ओरतोनि दर्मसास्त्रमता बारेमते चर्चा कीतोर.

3 अगा ओर, किरिस्तुना हायमळ आनि हामुरताल तिरियसि तेदमळ बचचोनो अवसरम मत्ता, इत्ता संगतितुन दर्मसास्त्रमताल हदिवेसि ओर्कु बेस तेळियागोटिस वेहतोर. पजा बा येसुना बारेमते अयते नना मीवा मुन्ने वेहसेक मंतनो आ येसे किरिस्तु आंदुर, इंचि ओर्कु वेहतोर.

4 इल्हा इच्चुर लोकुकुकुंक निजम अनपिच्चि ओर पौलुस, सिलासुनहेके कलियतुर. पेनदुक वेरियना वेल्लेटुर युनानि लोकुकुल्कगुडा ओरतोनि कलियतुर. अचोने आयका वेल्लेन बेस पोरोल होता मुर्ताह्कगुडा ओरतोनि कलियसि मत्तां.

5 गानि यहुदिल्कुकुंक मात्रम मंटा अरसेक मत्ता. ओर इच्चुर बदमासुल्कन जमा कीसि सहरते लोल्लिं कीतुर. बल्हा कीसन्ना गानि पौलुस, सिलासुन लोकुकुल्कना मुन्ने तायागोम इंचि ओर यासोन इनानोना वरोन लोतपोर्रीं होंचि अरतुर.

6 पौलुस, सिलास ओर्कु दोर्का हिल्लुर अयते यासोन आनि इच्चुर दादालोकुंन सहरता अदिकारिल्लुकुन मुन्ने इग्गिस ओतुर. ओसि, “ईर मनकालोर पूरा दुनियातुने हिळु-पोर्रीं कीतुर, इंदके इग्गेगुडा वातुर.

7 ईरकु यासोन ओना लोन मनालय जेगा हीतोर. ईर अंतोर कैसर* राजाना नियमकुंक अड्डम कबळ कीतुर. अचोने आयका ओर, इंकावरोर राजाल मंतोर ओना पोरोल येसु आंद,” इंचि वेहांतुर.

8 इद पोल्लेतुन केंजसि अगा मत्ता लोकुकुल्क आनि सहरता अदिकारिल्क इरगा होंगुंक वातुर.

9 पजा यासोन हेंदाल आनि कळमातोरहेंदाल दंडगु तेंडकुचि, रासकुचि ओर्कुन होळसीतुर.

बिरिया इनना सहरते पौलुस आनि सिलास

10 पजा बिराना नर्काटद-नर्केन दादालोर पौलुस, सिलासुन बिरिया इनना सहर लोहचीतुर. ओर अगा एवतारित्ते यहुदिल्कना दर्मसास्त्रम कराहना लोते होतुर.

11 तेसलोनि सहरता यहुदिल्कुकुन्ना इगेटा यहुदिल्क बचचोरो बेस मत्तुर. ईर पौलुस वेहना पोल्लेन बेस मनसु ताससि केंजुदुर. हरेक रोजु दर्मसास्त्रमतुन हदिवेसि पौलुस वेहना पोल्लें निजमेना इंचि बेस अर्तम कीकुनुंदुर.

12 इल्हा वेल्लेन मंदि यहुदिल्क विस्वासम कीतुर. यहुदिल्कन लेहकने बेस कदर मत्ता युनानि मुर्ताह्क-मांडसागुडा विस्वासम कीतुर.

13 गानि बस्के अयते पौलुस, पेनदा पोल्लें बिरिया सहरतेगुडा होंचि कराहचंतोर इंचि तेसलोनि सहरता यहुदिल्कुकुंक तेळियतनो, अस्के ओर अगा वासि लोल्लिं कियमळ, लोकुकुल्कुकुंक एकरेखुल्क वेहमळ सुख कीतुर.

14 अदुनहाटी दादालोर पौलुसुन बिराना समुद्रम ओड्डुनहेके लोहचीतुर. गानि सिलास, तिमोति मात्रम अग्गेन आगतुर.

15 पौलुसुनतोनि बोर अयते होत्तुरो ओर पौलुसुन एतेंस इनना सहरदाका अरहतुर. पौलुसुन हेंदाल, सिलास, तिमोति बिराना ओनगा वायागोम, इंचि इत्ता आदेस पीकुचि ओर अगटाल मल्सि बिरिया सहरकु वातुर.

एतेंस सहरते पौलुस

16 पौलुस, एतेंस सहरते सिलास आनि तिमोतिना एदुर हळसेक मत्तस्के, अद सहर बोम्मानतोनि निडिस मत्तद हळसि ओना मनसुने बागा दुक्कम वाता.

17 दानहाटी ओर रोज-रोज दर्मसास्त्रम कराहना लोहकुने होंचि यहुदिल्कुकुनतोनि आनि पेनदुक वेरियना वेरे जाति लोकुकुल्कुकुनतोनि चर्चा कियुंदुर. अचोने आयका चौकुल्कुकुने होंचि बोर दोर्कुते ओरतोने चर्चा कियुंदुर.

* 17:7 कैसर इद राजाना पोरोल आयो. रोम सरकारते अन्तिकुना पेददा पदवि आंद.

18 अस्के इच्चुर इपिकुरि आनि स्तोइकि[†] इनना एकको तेल्वि मत्ता लोकुकल्क ओनतोनि जगडम दोसकुत्तुर. अब्टेताल इच्चुर, “ई पिचुर-पिचुर वळकानोर बतल वेहांतन इंचंतोर?” इंचि इत्तुर. इकिच्चुर बारे, “ईर अये वेरे जातितोरा पेनदा बारेमते कराहनोर दिसंतोर” इंचि इत्तुर. पौलुस येसुना बारेमते आनि ओर हासि मरा जीवाते तेदतदन बारेमते कराहंदुर इंचि ओर अल्हा इत्तुर.

19 आयंका ओन पीसि अरियपगुस[‡] इनना पंचादिते ओसि, “निमे कराहना ई पूना पोल्ले बतांगो माकु तेळियानाल वेहा.

20 इंका निमे माकु मोमोट बस्के केंजुवा, तेळियवा पोल्ले वेहचंतिन. ई पोल्लेना अर्तम बतलो माकु तेळियागोट्टिस वेहा.” इंचि विनंति कीत्तुर.

21 एतैस सहरता लोकुकल्क आनि बैरेटागटाल वासि अगा मनना पलाता लोकुकल्क, बस्केळक बतलन्ना पूनद केंजालय आनि दाना बारेमते चर्चा कियमळ तप्पा इंका वेरे बतले कबळ कियाकौंदुर.

22 अस्के पौलुस, अरियपगुस इनना पंचादिते नित्तिसि इल्हा वळकालय दलगुतोर. एतैसता लोकुरिटा! मिमेट अन्नि तीरकुने पेनदा कदर कीसंतरि इत्ता संगति नाकु दिस्संता.

23 नना मीवा सहरअंता तिरियसि मिमेट मोळकना अन्नि वस्तुकुन हळतन. अचोने आयका, “एरपाट हिलवा पेनदाहाटी” इंचि रासि मत्ता उंदि गदूदेतुन इंका नना हळतन. अये मीकु एरपाट हिलाकोन्ना मिमेट मोळकना आ पेनदा बारेमतेन नना मीकु वेहंतन.

24 इद दुनियातुन, इद दुनियाते मनना अन्निटवुन पुटिस्ता पेने, बूमि आनि स्वर्गमता सामि आंद. अदुनहाटी मनकालोर तयार कीता गुळिने अद मननो.

25 दानगा बतले तक्को हिल्ले. इंका अदे अंतोर्क ऊपिरि, पिस्वर आनि गावाले मत्तव अन्नि वस्तुक हीता. अये असोटा पेनदुक मनकना कय बतल हि्या परंता?

26 पेन वरोर मनकन तयार कीता. आ वरोर मनकनतोनि ई दुनियंता निडिस मननाहाटी अन्नि जातिना लोकुकल्कन तयार कीता. इंका ओराहाटी उंदि वेला, ओर मनना जेगांक गेट्टुक्कु, इल्हा पेने कीता.

27 मनकालोर पेनदुन पहकागोम इंचि दाना मनसु मत्ता. ओक्कला पहकिस-पहकिस दान ओर दोकाबेटकुनानुर. अयना अद मनागटाल बोर्के लक्कु हिल्ले.

28 मनम दानतोने पिस्सेक मंतोम, दानतोने तिरियसेक मंतोम, अद मंता इंचे मनम मंतोम. इचोने आयका, मनम दाना पिलाल्क आंदुम, इंचि मीवा लोप्पोटोरे इच्चुर पाटां रासाना लोकुकल्कगुडा वेहातुर.

29 “अये मनम पेनदा मर्कुम आसिगुडा, मनकल ओना तेल्विनुसार तयार कीता एंडि, बंगारम आनि बंडाता बोम्मानलेहका पेन मनंता इंचि बस्केने इननायो.

30 मुन्नेटा लोकुकल्कना पेनदा बारेमते तेल्वि तक्को लेक्कनहेंका पेन ओर्कुन हळसिगुडा हळवाप कीता. गानि इंदके मात्रम दुनियाता अंतोर लोकुकल्क मनसु मार्सकुननाहाटी आदेस हीसंता.

31 अद पेर्कुत्ता मनकनाहेंदाल, इद दुनियाते मनना हरेक मनकना न्यायम नीतिते कियानाहाटी पेन उंदि रोजुन पिक्स कीता. अचोने आयका अद पेर्कुत्ता मनकन हातोराबेटाल मरा जीवा अरहचि अंतोर मनकालोर्कुंक अद हीता पोल्लेतुन र्जुव कीता.”

32 बस्के अये लोकुकल्क, हातोराबेटाल मरा जीवाते तेदतोर इत्ता पोल्ले पौलुसुना तोळ्दाल केंजतुरो, अस्के इच्चुर लोकुकल्क ओन कव्तर. गानि इंका इच्चुर मात्रम, “निमे वेहना पोल्ले मरा बस्केनना केंजंतोम,” इंचि इत्तुर.

33 अस्के पौलुस पंचादिताल पेय्सि होतोर.

34 इच्चुर लोकुकल्क विस्वासम कीसि पौलुसुंक कलियतुर. ओराबेटाल वरोर दियोनुस इनानोर मत्तोर, ओर अरियपगुस पंचादिता मंबर मत्तोर. अचोने आयका दामेरा इनना पोरोलतद उंदि मुरतळ ओरतोनि मत्ता, इंका वेरे लोकुकल्कगुडा मत्तुर.

18

कुरिति इनना सहरते पौलुस

1 पजा पौलुस एतैस सहर होळसिसि कुरेंति सहरते होत्तोर.

2 अगा ओर अकविला इनना पोरोलता यहूदि मनकंक कलियतोर. ई अकविलाल पुंतुस इनना एरियाते पुटतोर. रोम सहरते मनना अंतोर यहूदिल्लुकुन कलादिथुस राजाल पेय्सि होंटु इंचि आदेस हीतोर. अदुनहाटी ओर इटलि एरियाताल ओना मुत्तो पिरिसकिलानतोनि कुरिति वातोर. अये पौलुस ओर्क कलियालय होत्तोर.

† 17:18 इपिकुरि आनि स्तोइकि इद इब्बर मनकालोरा पोरोल आंद, ईर वेहता हरपीसि तაკानोर्कुन इपिकुरि आनि स्तोइकि इंचि इत्तुर. ‡ 17:19 अरियपगुस इद उंदि पंचादि पोरोल आंद.

3 पौलसुनद आनि अकविलानद इव्वरद इंका डेरां निलाहना दंदे मत्ता. अदुनहाटी पौलस ओरगा वासि आगतोर. ओर अंदोर कलियसि कबळ कियालय दलगुत्तर.

4 ओर होरेक नोमकेम रोजुननाड यहदिल्कुना दर्मसास्त्रम कराहना लोहकुने होंचि युनानि, यहदि लोक्कुलकुनतोनि चर्चा कीसि ओर्कु बेस तेळियागोदिस वेहुंदुत्तर.

5 सिलास आनि तिर्मोति मेसिडोनिया एरियाताल वातस्के, पौलस ओना पूरा वेला पेनदा पोल्ले कराहमळतेन तासुंदुत्तर. इंका यहदिल्कुनतोनि वळकिसि, येसे किरिस्तु आंदुर, इंचि वेहचि गवाइ हियुंदुत्तर.

6 गानि यहदि लोक्कुलक पौलसुन हयसा हिल्लुर. ओना अपमानम कीतुर. अस्के पौलस ओना कपडि दुल्हसेके ओर्कुन, “मीवा नेत्तुर मीवा तल्लापोरॉ अरि. अव्टे नावद बतल दोसेम हिल्ले. इंदकेटाल नना वेरे जातितोर हेके दांतन,” इंचि इत्तोर.

7 इल्हा पौलस दर्मसास्त्रम कराहना लोताल पेय्से दाना बाजुंक मनना तीतु-युसतुस पोरोलता वरोर वेरे जाति बक्तुना लोन होत्तोर.

8 यहदिल्कुना दर्मसास्त्रम कराहना लोतुक अदिकारि मत्ता वरोर क्रिसपुस पोरोलता मनकल, ओना लोतोर अंदोर सामिना पोरोरॉ विस्वासम कीतुर. अचोने आयका कुरेंति सहरतोर वेल्लेदुर लोक्कुलक पौलसुना पोल्ले केजसि, सामिनपोरोरॉ विस्वासम इर्सि, बापतिस्मा एत्तुर.

9 उंदि नकां सामि दर्सनमते पौलसुंक इल्हा वेहतोर, “निमे वेरियाकॉटा वळकसेक होन, सपुडदाका मनमा.

10 इद सहरते नावा वेल्लेन लोक्कुलक मंतुर, ननागुडा नीवातोनि मंतन. नीवा पोरोरॉ बोरे कय तेहुर नीकुन बोरे तकलिप किय्युर,” इत्तोर.

11 इल्हा पौलस एडादि नरादाका अग्गेन मंचि ओर्कु पेनदा पोल्ले कराहतोर.

पौलस गल्लिया इनना राज्यपालुन मुन्ने

12-13 गल्लिया पोरोलतोर वरोर अकाया इनना एरियाक राज्यपाल मत्तोर, अस्के यहदिल्क अंदोर उंदि आसि, पौलसुंक अड्डम तिरियतुर आनि ओन कोरटते पीसि वासि, “ई मनकल नियम परकारम हिल्लुवा पदतकुने पेनदुन आरादना कियालय लोक्कुलकुंक वेहासेक मंतोर,” इंचि इत्तुर.

14 पौलस वळकालय आतोर अचचोटेन गल्लिया राज्यपाल यहदिल्कुनतोनि, “मिमेट वेहना पोल्ले बदाना तप्पु कीतदुन बारेमते, हिलाकॉटे पेदुदा अन्यायमता बारेमते आसि मत्ते, नना मीवद केजालय अर्तम मनवड.

15 गानि इद केस, पोल्ले, पोरोल्क आनि मीवा दर्मसास्त्रमता बारेमते मंता. अदुनहाटी दीन मीवद मिमेटे नेमाहकुंदु. इसॉंटा केसकुना न्यायम नना किय्योन,” इंचि इत्तोर.

16 इल्हा इंचि गल्लियाल ओर्कुन कोरटताल पलाते पेचाहतोर.

17 पजा यहदिल्क, दर्मसास्त्रम कराहना लोतुक अदिकारि मत्ता सोस्तिनेस पोरोलतोन पीसि, कोरटता मुन्नेन तंतुर. अयनागानि गल्लियाल मात्रम जर्गनदाना बारेमते विचारम किया हिल्लोर.

पौलस सिरिया एरियाता अंताकिया सहरते मल्सि वांतोर

18 पौलस वेल्लेन रोजकुनदाका अग्गेन कुरेंति सहरते मत्तोर. आयका अगा मत्ता विस्वासुलकुन होळसि, मोळककुत्ता परकारम पौलस किरिया सहर होंचि केलक कोरियकुत्तोर. पजा ओनतोनि पिरिसकिला आनि अकविला* ईरकुन पीकुचि सिरिया एरियाक होनना डोंगाते उदुदिस इपीसि सहर होत्तोर.

19 इल्हा ओर इपीसि सहरते एवतुर. पजा पौलस पिरिसकिल्लन आनि अकविलान अग्गेन होळसतोर. ओर वरोरे दर्मसास्त्रम कराहना लोते होंचि यहदिल्कुनतोनि चर्चा कियालय दलगुत्तर.

20 आयंका ओर अंदोर, ओन इंका इच्चुं रोजकु अग्गेन मननाहाटी विनंति कीतुर गानि ओर, मनोन, इत्तोर.

21 गानि अगटाल पेयसका मुन्ने, “ओक्कला पेनदा मनसु मनानयते नना मिहगा मरॉ वांतन,” इंचि ओर इत्तोर. पजा इपीसिताल डोंगाते उदुदिस पेयसतोर.

22 पजा ओर कैसरिया सहरते एव्सि, अगटाल येस्सलेम सहर होत्तोर. अगा होंचि अगाटा कलिसियातोर्कुंक कलियसि जोहार कीतोर, पजा अगटाल अंताकिया सहर होत्तोर.

पौलसुना मूडो पय्नेम

(18:23-21:16)

अप्पुलोस इनानोर इपीसि सहरते

* 18:18 पिरिसकिला आनि अकविला ईर इव्वर मुत्तो-मुय्यो आंदुर.

23 अगा इच्चुं रोजकु मत्तारिल्ले मर्रा ओर गलातिया आनि पुगरिया एरियाताल अंटोर सिस्स्युलुकुना विस्वासम गट्टिगा कीसेके तिरियतोर.

24 अच्चोटेन अप्पुलोस इनानोर वरोर यहुदि मनकल इपीसि सहरते वातोर. ओर सिक्ंदरिया इनना सहरते पुटतोर. ओर वेल्लेन तेल्चि मत्ता मनकल मत्तोर. ओन्क दर्मसास्त्रम पुरागा तेळियुंदु.

25 ओर सामि वेहता हर्दा बारेमते करियसि मत्तोर. ओर येसुना बारेमते कराहनेके वेल्ले कुसिते बल्हा मत्तद अल्हेन बरोबर कराहुंदु. गानि बापतिस्माता बारेमते अय्ते सिराप योहानुना बापतिस्माता बारेमतेन एराटा मत्ता.

26 अय्ते ओर यहुदिलुकुना दर्मसास्त्रम कराहना लोते होंचि वेरियाकोटा वळकालय सुस्व कीतोर. उंदि मल्का ओर वळकानेके पिरिसकिला आनि अकविला ई इव्वुर ओना पोल्ले केंजतुर. केंजसि ओन दग्गेक केयकुंचि ओन्क पेनदा हर्दा बारेमते इंका बेस तेळियागोट्टिस वेहतुर.

27 अय्ते अप्पुलोस अकाया इनना एरियाक होनना विचारम कीतोर. अस्के दादालोरगुडा ओन्क बेस दैरेनेम हीतुर. अचोने आयका अकाया एरिया पीसि मनना सिस्स्युलुकुक, ईन बेस दग्गेर कीकुंदु, इंचि उंदि सिट्टि रासतुर. ओर अगा एवतारिल्ले, पेनदा कुपहिंदाल विस्वासमते वाता लोकुलुकुक वेल्ले सहायम कीतोर.

28 बल्हा इल्ले, अंटोर लोकुलुकुना मुन्ने यहुदिलुकुनतानि जिदुदुने चर्चा कियुंदु. इंका दर्मसास्त्रमते, येसु सामिप किरिस्तु आंदुर, इंचि ओर्क हूपिच्चि दान रूजुव कियुंदु.

19

पौलुस आनि पवित्र आत्मा तेळियवा सिस्स्युलुकु

1 अप्पुलोस कुंरेंति सहरते मननेके, पौलुस वेरे-वेरे नाहकु तिरियसेके इपीसि सहरते वातोर. अगा ओन्क इच्चुर सिस्स्युलुकु कलियतुर.

2 “मिमेट विस्वासमते वातस्के मीपोरें पवित्र आत्मा वाताना?” इंचि पौलुस ओर्कुन पूसकीतोर. अस्के, “मोमोट अय्ते पवित्र आत्मा मंता इंचिगुडा केंजा हिल्लोम,” इंचि आ सिस्स्युलुकु इल्लुर.

3 पजा, “अय्ते मरि मिमेट बोना बापतिस्मा एततिर?” इंचि पौलुस पूसकीतस्के, “योहानुना बापतिस्मा एततोम,” इंचि ओर वेहतुर.

4 अस्के, “योहान अय्ते पापालुकुनाल मनसु मार्सकुनना बारेमता बापतिस्मा हियुंदु. इंका ओर लोकुलुकुक, ओना पज्जोताल वरोर वायानोर मंतोर, ओनपोरें, इल्ले येसुनपोरें विस्वासम कीम्टु, इंचि वेहुंदु,” इंचि पौलुस इल्लोर.

5 इद केंजिस ओर येसु सामिना पोरोल्ले बापतिस्मा एततुर.

6 पजा बस्के अय्ते पौलुस ओरापोरें कय इरतोर अस्के ओर अंटोरपोरें पवित्र आत्मा रेयता. ओर वेरे-वेरे बासाने वळकालय, बविस्यवानि कियालय दल्लुतुर.

7 ओर अंटोर कलियसि पन्नेडु मंदि मत्तुर.

8 आयंका पौलुस मूड नेल्लुकुनदाका यहुदिलुकुना दर्मसास्त्रम कराहना लोते होनुंदु. वेरियाकोटा ओरतानि चर्चा कीसि पेनदा राज्येमता बारेमते ओर्कु तेळियागोट्टिस वेहुंदु.

9 गानि ओरेंटे इच्चुर जिदुदि मनकालोर मत्तुर. ओर विस्वासम किया हिल्लुर. अचोने आयका लोकुलुकुना मुन्ने पेन वेहता हर्दा बारेमते रोता-रोता पोल्ले वळकसेक मत्तुर. अदुनहाटी पौलुस, सिस्स्युलुकुन ओना पज्जो केयकुतोर. आ लोकुलुकुन अग्गेन होळसि रोज तरन्नुसना मिट्टिंग बंगलाते होंचि चर्चा कियुंदु.

10 रोडु वर्सनदाका इल्ले ताकसेके मत्ताहाटी आसिया एरिया पीसि मनना अंटोर यहुदि आनि युनानि लोकुलुकु पेनदा पोल्लेतुन केंजतुर.

इसकिवा पोरोलता पेद्दा पेर्माना मर्कु

11 पौलुसना कयदाल पेन पेद्दा-पेद्दा अद्बूतामाता कबाहक कीसेक मत्ता.

12 इंका लोकुलुकु पौलुस इटता दस्तिगुड्डान, ओना सेल्लान रोगम मत्तोरगा ओते ओरा रोगालकंता होनुंदु, देय्याल्क इंका होळसि विल्लुंदु.

13-14 इच्चुर यहुदि लोकुलुकु, सट्टु-मट्टु एरियाने देय्याल्क पीसि मत्तोर्कुन मंत्रालुकुना बलमते बेस कीसेके तिरियुंदु. इसकिवा इनना वरोर यहुदि पेद्दा पेर्माना एडुर मर्कु मत्तुर. ओर इल्ले कियुंदु. अय्ते उंदि मल्का ओर सामि येसुना पोरोल येत्सि, “पौलुस बोना बारेमते अय्ते वेहचंतोरो आ येसुना पोरोल्ले आदेस हीसंतन, पलाते पेयसा” इंचि देय्याल्कुकुन इल्लुर.

15 अस्के आ देय्यम, “येसु अयते नाकु एरके, इंका पौलुसगुडा नाकु एरके. मरि मिमेट बोर आंदिर?” इंचि ओर्कुन पुसकीता.

16 पजा आ देय्यम पीसि मत्ता मनकल ओरापोर्री अरसि, ओर्कुन इरगा तंतोर. अदुनहाटी ओर इरगा देब्बां दल्लिसि नेत्तुर पोंगनेकेन अद लोताल कपडिं केर्रांकोटेन पेय्सि विततुर.

17 इद संगति इपीसिते मनना अंतोर यहूदिल्लुकुक, युनानि लोकुल्लुकुक तेळियता. अदुनहाटी ओर अंतोर इरगा वेरियतुर. येसु सामिना पोरोलता कदर बेसैके होत्ता.

18 इल्हा बोर लोकुल्लुक अयते विस्वासुल्लुक आतुरो, ओर कीता तप्पुकुन अंतोरा मुन्ने ओप्कुनालय दलग्गुर.

19 होदें-मंत्राल्लुकु कियानोर वेल्लेटुर लोकुल्लुक ओरा पुस्तकाल्लुक उंदगा जमा कीसि अवन अंतोरा मुन्ने बोळ्ळस्तुर. पजा आ पुस्तकाल्लुकुना दरा लेक्का कीते एबै वेय्कुना (50,000) एंडि कोत्तानचचोर मत्ता.

20 इल्हा सामिना पोल्ले बेस मजबुत आसेके नालु मूलां पैलांचेके होत्ता.*

पौलुस पिलान कीतोरा

21 इदंता जर्गुता पज्जो, पौलुस मेसिडोनिया, अकाया इनना एरियानाल येस्लेम होनना पिलान पवित्र आत्माता सहायमतोनि कीतोरा. अगा होत्ता पज्जो, बल्हा कीसि अयना रोम सहरतुन ह्ळ्हापीता, इंचि इत्तोर.

22 दानहाटी ओर तिमोति आनि इरास्तुस पोरोलता इव्वुर सेवाकुल्लुकुन मेसिडोनिया एरियाते लोहचीतोरा. ओर कुद बारे इंका इच्चुं रोजकु आसिया एरियातेन आगतोर.

इपीसि सहरते जगडाल्लुक

23 अब रोजकुने पेन वेहता हर्दा बारेमते वेल्लेन लोल्लिं आतां.

24 देमेत्रि पोरोलतोर वरोर कमसालोड मत्तोर. ओर अर्तेमि* इनना पेनदा गुळितालेसीटव एडिता गुळिं तयार कीसि अम्मुकुनुंदुर. दीनहेंदाल ओनगा कबळ कियानोर्क रिक्कम हिलाकोटा कबळ दोर्कुंदु.

25 आ कमसालोड, ओनगा कबळ कियानोर्कुन आनि ओनालेसी कबळ कियाना इंका वेरोतोर्कुन अंतोर्कुन जमा कीसि ओर्कु इल्हा वेहतोर, “दादालोरिता! मीकु अयते एपाटे गदा, ई दंदाहेंदाल मनाकु बेस कोतां दोर्कतां.

26 ई पौलुस इपीसि सहरता आनि दगोर-दगोरा पूरा आसिया एरियाता लोकुल्लुकुक, ‘मनकल कीता पेनकु निजम पेनकु आयो,’ इंचि ओर्क एकरेवुल्लुक वेहसेके ओर्कुन बदलांचतोर. इद संगतितुर मिमेट ह्ळ्ळितिर आनि केजतिर गुडा.

27 दीनहेंदाल मना दंदाक मत्ता बेस पोरोल बदनाम आंता. मना पेदूदा पेन अर्तेमिना गुळिता इलवागुडा दांता. इचोने आयका सिराग आसिया एरियातेन आयो गानि पूरा दुनियाता अंतोर लोकुल्लुक मोळ्ळकनसोंटा ई पेनदुक मत्ता पेदूदातनमगुडा हिलाकोटा आंता,” इंचि इत्तोर.

28 इसोंटा पोल्ले केंजसि ओर इरगा होंगुंक वासि, “इपीसितोरा पेन अर्तेमि अन्नि पेनकुंक्कना पेदूदा पेन आंद,” इंचि वरगोयालय दलग्गुर.

29 अदुनहाटी सहरते लोल्लि आता. पजा लोकुल्लुक मेसिडोनिया एरियाताल वाता गयुस आनि अरिसतरकुस पोरोलतोर इव्वुर्कुन दोर्का पीतुर. ईर इव्वुरगुडा पौलुसनतोनि कलियसि पय्नेम कियुंदुर. अयते लोकुल्लुक अंतोर उंदि आसि ओर्कुन पीसि नाटकम बंगलातगा जोरसे इग्मिसेक पीसि विततुर.

30 पौलुस लोकुल्लुकुना मुन्ने होनना इनकुत्तोर गानि सिस्सुल्लुकु ओन होना हिया हिल्लुर.

31 आसिया एरियाता इच्चुर अदिकारिल्लुक पौलुसना दंदातोर मत्तुर, ओरगुडा, “निमे नाटकम बंगलाते होंचि दोकाते अरमा,” इंचि कबुर लोहचि ओन्क विनंति कीतुर.

32 अस्के बोरो बतलो, बोरो बतलो इल्हा पेदूदा लोल्लि कियालय दलग्गुर. वेल्ले मंदिक अयते ओर अगा बताहाटी जमा आतुर अदगुडा एर्का हिल्ले.

33 यहूदि लोकुल्लुक सिकंदर पोरोलतोन वरोर मनकन मंदिताल पेरसि मुन्ने निलाहत्तुर. सिकंदर कय ऊपसि-ऊपसि लोकुल्लुकुक समजांचलय ह्ळ्ळितोर.

34 गानि ओरगुडा वरोर यहूदि मनकल आंदुर इंचि तेळियतारित्ते ओर अंतोर रोंडु गंटानदाका उंदे आवाजते, “इपीसितोरा पेन अर्तेमि अन्नि पेनकुंक्कना पेदूदा पेन आंद,” इंचि वरगोयसेके मत्तुर.

35 अस्के सहरता अदिकारि मंदितुन सांत कीतोरा. सांत कीसि, “अरे इपीसि लोक्किरिता, बेस पोरोल होत्ता अर्तेमि पेनदा गुळितुन आनि स्वर्गमताल अरता दाना पवित्र बंडा बोम्मातुन बेस कापाळना सहर इपीसि सहर आंद, इद पोल्ले दुनियाकंता एपाटे मंता.

* 19:20 व्यवस्ताविवरन 18:10-14 * 19:24 अर्तेमि इद मूरत्तळ पेन आंद. दीन युनानि लोकुल्लुक मोळ्ळकंत्तुर.

- 36 इद पोलेलेतुन बोरे हिल्ले इन्नोर. अदुनहाटी मिमेट सांत मंट, विचारम कियाकौटा गाबर आसि बतले कियमत.
- 37 ईर मनकालोर अयते मना पेनदा गुळिताल बतले दोंगा किया हिल्लुर. मना पेनदा अपमानमगुडा किया हिल्लुर. अयनागानि मिमेट ईरकुन इगो पीसि वातिर.
- 38 ओक्कला देमेत्रिसुंक आनि ओनतोनि कलियसि कबळ कियानोकुकु गिटा बोरादन्ना विरोदमते बतलन्ना वेहनद मनानयते कोरटकुना तल्पुकु कुल्ले मंतां, अगा ओर वरोनपोर्री वरोर तल्पुकु-दोसेलक वेहकुना परांतुर. ओरां कैजालय अगा अदिकारिल्लकुगुडा मंतुर.
- 39 अयना इका बतलन्ना वेंरतदुन बोरेमते वळकानद मनानयते दाना पयसला मना पंचादिते किया वच्चु.
- 40 इयाला इगो बतल अयते जर्गतनो दीनद पूरा दोसेम मना तल्लापोर्रिन अरनलायक मंता. इद जर्गुता गटना बेसताहाटीगे जर्गुता इंचि रूजुव कियालयगुडा मनागा बतले हिल्ले.” इंचि इत्तोर.
- 41 इल्हा इत्ता पजा ओर पंचादि मारता इंचि वेहतोर.

20

पौलस मेसिडोनिया दांतोर

- 1 लोल्लिंअंता मगता पज्जो पौलस सिस्युलुकुन केय्सि, ओर्क बेस प्रोत्साहन हीसि ओर्कुन होळसि मेसिडोनिया एरियाक होतोर.
- 2 मेसिडोनिया एरियाताल होननेके आ एरिया पीसि मनना विस्वासुलुकुकु प्रोत्साहन हियानसोंटव बच्चोनो पोलेलें ओर्क वेहासेके होतोर. पजा ओर अकाया एरियाते* एवतोर.
- 3 अगा पौलस मूड नेल्लक मत्तोर. अगटाल डोंगाते उद्दिदिस सिरिया एरियाते होनना विचारम कीतोर, गानि अचचोटेन यहदि लोकुकुकु ओन हळकाना पिलान कीसंतुर इंचि तेळियतस्के ओर मर्रा मेसिडोनिया एरियाक मल्लिस होनना निरनायम कीतोर.
- 4 बिरिया सहरता पिरूस इनानोना मर्री सोपन्नु, तेसलोनि सहरता अरिसतरकुस आनि सेकुंदल, दिखे सहरताल गयसु, आसिया एरियाताल तुकिकुस आनि तोरोपिमस, इका तिमोति. ईर अंतोर आसिया एरिया एवनाल पौलसुनतोनि मत्तुर.
- 5 ईर अंतोर मुन्ने होंचि त्रोआस सहरते मावा एदुर हळसेक मत्तुर.
- 6 गानि मोमोट पिलिपिया सहरताल होयवा पिंडिता हारिना पंडंगु होत्तारित्ते डोंगाते उदिस पेयसतोम. त्रोआस सहरते ओर्कु होंचि कलियालय माकु हेय्युं रोजकु दल्यतां. अगा मोमोट एडुं रोजकु मत्तोम.

वरोर लेय्या पेडांक पौलस जीवा अरहंतोर

- 7 आयंका मोमोट वारमता मुन्नेटा रोजुं हारि उरहालय उंदगा जमा आतस्के पौलस लोकुकुकुनतोनि वळकालय दल्यतोर. ओन्क इंकुंदि रोजु पयनेम होनना मत्ताहाटी ओर नळजाम नर्कादाका वेहतोर.
- 8 मोमोट जमा आसि मत्ता पोर्रीटा अंतरम पोर्री वेल्लेने वेडसिं मत्तां.
- 9 अगा युतुकुस पोरोलतोर वरोर लेय्या पेडल किडकिते उद्दिदिस मत्तोर. पौलस वेल्लेनजेम वळकसेक मननेके ओन्क इरगा निद्रा वासि मडोव अंतरमताल डोलसि हिळ्ळ अरतोर, ओनगा होंचि तेहतारित्ते ओर हासि मत्तोर.
- 10 पौलस हिळ्ळ रेय्सि ओन रोमबोचचेक अदमुकुंचि, “वेरियमट्ट, इंदके ओनालोपो जीवा मंता,” इंचि इत्तोर.
- 11 आयंका पौलस पोर्री होतोर. हारिना तुकडां कीसि तिचि पंगायनदाका ओरतोनि वळकसेक मत्तोर. पजा अगटाल पेय्सि होत्तोर.
- 12 लोकुकुकु आ लेय्या पेडन जीवाते ओना लोन ओतुर, अदुनहाटी ओर्कु बच्चोरो बेस अनपिस्ता.

त्रोआस सहरताल मितुलेन सहर होनना पयनेम

- 13 मोमोट पौलसुन अग्गेन होळसि डोंगाते उदिस मुन्नेन अस्सुस सहरतेके होत्तोम. पौलस कुद अस्सुसदाका ताकसि वासि अगा माकु कलियंतन इंचि वेहतोर.
- 14 ओर अस्सुस सहरते माकु कलियतस्के, ओन डोंगाते एकिचकुंचि मोमोट मितुलेन सहरते होत्तोम.
- 15 अगटाल पेय्सि इंकुंदि रोजु मोमोट, कियस इनना दीबेता मुन्नेळ्ळक एवतोम. मर्रा इंकुंदि रोजु सामोस इनना दीबेतुन दाटसि होत्तोम. मर्रा इंकुंदि रोजु आतारित्ते मोमोट मिलेतुस इनना सहरते एवतोम.
- 16 बल्हा कीसन्ना गानि पेंतेकोस्त पंडुगुंक येस्सलेम सहरते मनगोम इंचि पौलस गाबर आसेक मत्तोर. अदुनहाटी आसिया एरियाते वेल्ले रोजकु आगिसि वेला बरबाद कियमळ इस्टम हिलाका, इपीसिते आगाकौटा मुन्नेळ्ळक पेय्सि होनना विचारम कीतोर.

* 20:2 अकाया एरिया दीन युनन देसेम इंचिगुडा इंतुर. † 20:7 वारमता मुन्नेटा रोजु यहदिलुकुना केलेंडरते वारमता मुन्नेटा रोजु सनेरम पोळ्ळ होंचि सुख आंता. अयनायम पोळ्ळ होंचि मारता.

पौलस इपीसि सहरता पेदूदालकुन केया वेहांतोर

17 पौलस इपीसि सहरता कलिसिया पेदूदालकुन कबुर लोहचि ओर्कुन मिलेतुस सहरते ओनगा केयतोर.

18 ओर अंटोर वातारित्ते पौलस ओरतोनि इल्हा वळकालय दलगतोर. “नना आसिया एरियाते वातस्के, मोदाटा रोजुनाल मीवातोनि उंदि-उंदि निमसम बल्हा मलतन, इद मीकु एरपाटे मंता.

19 यहूदिलुकुनाहेंदाल नाकु बचचोनो कस्टालक वातां. अयना, नना मनसुनाल गरिब आसि अळसेके सामिना सेवा कीतन.

20 मीवा बेसताहाटी अवसरम मलता बदे पोल्ले आयि वेहालय नना बस्केने पजोळक आया हिल्लेन. नना अव पोल्ले अंटोर लोकलुकुना नड्डुम, लोन-लोन होंचि वेरियाकोंटा कराहतन, इद संगति मीकु एर्के मंता.

21 पापालुकुनाल मनसु मार्सकुंचि पेनदाहाटी पिस्सट, अल्हेने मना येसु सामिना पोर्रो विस्वासम कीम्टु इंचि नना यहूदिलुकुन, युनानि लोकलुकुन गवाइ हीसि वेहुंदुन.

22 इदके पवित्र आत्मा वेहाताप कियना इंचि नना येस्सलेम सहर होंचंतन. गानि अगा होत्तारित्ते नावद बतल आंतो नाकु एर्का हिल्ले.

23 उंदि पोल्ले मात्रम नाकु एरपाट मंता. अद बतल इत्ते, अनि सहरकुने जेल, कस्टालक नावाहाटी एदुर हळसंतां इंचि पवित्र आत्मा नाकु वेहासेक मंता.

24 नाकु नावा जीवाता पिकिर हिल्ले. नना अयते सिराप येसु सामिनहेंदाल नाकु दोर्कुता आ पंदेमलतन, सेवतुन पूरा कीतन. अद बतल इत्ते, पेनदा कुर्पाता बारेमते बेसता पोल्लेना गवाइ वेहामळ आंद.”

25 नना मी अंटोरतोनि कलियसि मंचि मीकु पेनदा राज्यमता बारेमते कराहसेक तिरियतन. मीवाव्हेटाल बौरगुडा नाकुन मर्रा बस्केने हळ्या पर्रिर इंचि नाकु एर्के.

26 दानहाटी इय्याला नना वेहासेक मंतन गदा, मीवा लोप्पोटाल बोरन्ना आयिर, हासोले दान्क जबाबदारी नना आयोन.

27 बारित्ते नना पेनदा पूरा इच्चालतन मीकु वेहालय बस्केने पजोळक होना हिल्लेन.

28 पवित्र आत्मा मीकुन मीवा कलिसियातोरपोर्रो कोहानोन-मेहानोन लेहका पेर्कुत्ता. अद मंदातुन पेन कुदूदु दाना मर्रिना नेत्तुर हीसि असकुत्ता. अदुनहाटी मीवद मिमेट अल्हेने मीवा जिम्मेदारिते मनना मंदातुनगुडा मिमेट बेस कापाळसेके मंट.

29 नना होत्तारित्ते कतरनाक तोडेल्लिनसंटा मनकालोर मीवा नड्डुम वासि मीकु नुक्सान कीतुर इद नाकु एरपाट मंता.

30 अचोने आयका मीवा लोप्पोटाले इच्चुर इसंटा मनकालोर पेयसंतुर गदा, ओर सिस्स्युलुकुन ओरा पज्जो इगुकुनालय आबदुदम पोल्ले वळकांतुर.

31 अदुनहाटीगे मिमेट हुसारते मंट. मूड वर्सनदाका वरो-वरोकु, नर्का-पियल अळसि-अळसि जेगर्ता मननाहाटी वेहमळते नना बस्केने पजोळक होना हिल्लेन इद मति ईरंट.

32 इदके नना मीकुन पेनदा कय्दे आनि दाना कुर्पाता कबुरता कय्दे अप्पजेपंतन. मीकुन बेस बेरसागोटना ताकत अद कबुरते मंता. पेन पवित्र कीता अंटोर लोकलुकुना लोप्पो मीकुनगुडा वारसदार किया पर्रता.

33 नना बस्केने बोनेहेंदाले एंडि-बंगारम हिलाकोंटे बेसता कपडि गावाले इंचि आसे पडा हिल्लेन.

34 नना नावा कय्कुनतोनो कबळ कीसि नावा अवसरालकु आनि नातोनि मलता नावा दंटागाहकुना अवसरालकु तीरस्ता संगति मीकु कुद एरपाटे मंता.

35 वेल्लेन कस्टम कीसेके नादान मत्तोर्कुन मनम बल्हा सहायम कियगोम इत्ता संगतितुन नना मीकु नावा हेरेक कबळताल कीसि हुपिस्तन. “एतकुनळकनना हियमळतेन एक्को सुकम मंता,” इंचि कुदूदु येसु सामि इत्ता पोल्लेतुन मतिते इरमळ बचचोनो अवसरम मंता, इंचि इत्तोर.

36 इल्हा इंचि ओर टोंगरां ऊनसि, अंटोरतोनि कलियसि पारतना कीतोर.

37 अस्के ओर अंटोर इरगा अळसेके बेस पावरमतोनि पौलसुक कलियसि ओन बुरतुर.

38 मिमेट मर्रा ना मोकम बस्केने हळ्या पर्रिर, इंचि पौलस इत्ता पोल्लेताहेंदाल ओर अंटोर लोकलुकुन बागा दुक्कम वाता. पजा ओर अंटोर, ओन डोंगादाका साल्वा कीतुर.

21

येस्सलेम सहरता पय्नेम

1 ओर माकुन साल्वा कीतस्के मोमोट डोंगा उदसि सवरगा कोस इनना दीबिक होत्तोम. अगटाल इंकुदि रोजु सदास इनना दीबिक आनि अगटाल पतरा इनना सहर होत्तोम.

2 अगा माकु पिनिके इनना एरियाक होनानद उंदि डोंगा दोर्कुता अयते मोमोट अंटे उदसि पेयसतोम.

3-4 बस्के अयते माकु साइप्रस दीबि दिसालय दलगता अस्के मोमोट दान मावा डेमा बाजुंक होळसि सिरिया एरियाहेके तिरियतोम. सूर सहर सिरिया एरियाते मलताहेंका डोंगाते मलता माल सूर सहरते रेहानद मलता. पजा मोमोटगुडा अगनेन रेयतोम.

अगा माकु सिस्वयुल्क कलियतुर अये ओरतोनि मोमोट एडुं रोजकुनदाका आगतोम. ओर पवित्र आत्माहेंदाल, निमे येस्सलेम होनमा, इंचि पौलसुन इत्तर.

5 वारम आता पज्जो अगटाल मोमोट मावा पय्नेम पेय्सतोम. अगाटा विस्वासुल्क ओरा मुतोहक, पिलाल्क अंटोर सहरता पलाते समुद्रम ओड्डुनदाका मातोनि वातुर. अगा मोमोट टोंगरां ऊनसि पारतना कीतोम.

6 ओर माकुन साल्ना कींताका मोमोट डोंगा एकतोम, ओर ओरा लोहकुने वापस होत्तुर.

7 सूर सहरताल डोंगाते उदसि पय्नेम कीसेके मोमोट पोलेमा इनना सहरते वासि रेयतोम. अगाटा विस्वासुल्कुंक कलियसि ओरतोनि मोमोट उंदि रोज मत्तोम.

8 *इंकुंदि रोजु मोमोट अगटाल पेय्से कैसरिया सहर होत्तोम. अगा होंचि मोमोट, पिलिपुस पोरोलता पेनदा सेवाकुना लोन आगतोम. ई पिलिपुस येस्सलेम सहरते गाटो पंचि दोसनाहाटीं पेस्ता एडुर लोपोटाल वरोर मत्तोर.

9 ओक्क नालुं मरमिं आयवा मियाहक मत्तां. अयेत अव नालुंगुडा बवियवनि वेहुंदुं.

10 मोमोट अगा कोन्नि रोजकु आगसि मत्तोम, अस्के यहुदिया एरियाताल वरोर पेनदा कबुरतो वतोर ओन पोरोल अगबुस.

11 ओर मावा दमर्गेक वासि पौलसुना नडिता पट्टा तेंडकुंचि, ओना कय्क-काल्कून दोहकुंचि, “इद पट्टा बोन्द अयेत आंदो ओन येस्सलेम सहरते यहुदि लोक्कुल्क इल्हेन दोहाचि वैरे जातितोर्कुंक अप्पजेपंतुर, इंचि पवित्र आत्मा वेहासेक मंता,” इत्तोर.

12 इद केंजातारित्ते मोमोट आनि अगटा लोक्कुल्क, निमे येस्सलेम सहर होनमा, इंचि विनंति कीतोम.

13 अस्के, “इल्हा अळसि-अळसि नावा मनसुन कमजोर बारि कीसंतिर? नना येस्सलेम सहरते सिराप दोहांतुर इंचि आयो गानि, येसु सामिना पोरोलहाटीं हायालयगुडा तयार मंतन,” इंचि पौलस इत्तोर.

14 मोमोट बच्चोन वेहिनागानि ओर केंजवाहेंका, पेनदा इच्चा मत्ताप जर्गिकांटी, इंचि मोमोट सपुडदाका आतोम.

15 इल्हा कोन्नि रोजकुन पजा मोमोट मावा तयारि कीसि येस्सलेम सहर होत्तोम.

16 मावातोनि कैसरिया सहरतोर इच्चुर सिस्वयुल्क इंका वातुर. ओर माकुन साइप्रस दीबेतोर वरोर मनकल मनासोनना लोन ओतुर. मोदोलता विस्वासुल्कुनाल ओर वरोर सिस्वुड आंदुर. माकु ओनागेन आगनद मत्ता.

पौलस याकोबुंक कलियंतोर

17 मोमोट येस्सलेम सहर एवतस्के अगाटा विस्वासुल्क वेल्लेन आनंदमते माकुन कल्पुकुत्तुर.

18 इंकुंदि रोजु पौलस माकुन अंटोर्कुन पीसि याकोबुंक* कलियालय होत्तोर. अगा येस्सलेम सहरतोर अंटोर विस्वासि पेदुदाल्क मत्तुर.

19 मोदाला पौलस ओर्क अंटोर्क जोहार कीतोर. पजा पेन ओन दाना सेवाते वाळकुंचि यहुदि आयवोरा लोप्पो बता-बता कबाहक कीता, अव उंदि-उंदि कबळता बारेमते ओर्क वेहतोर.

20 पौलस वेहतद केंजसि पेदुदाल्क अंटोर पेनदा स्तुति कीतुर. पजा पौलसुन, “दादा, बच्चोने वेय्कुना मंदि यहुदिल्कु इगे विस्वासुल्क आतुर इत्ता संगति निमे हळसेकेन मंतिन. ओर अंटोर मूसाना नियमतुन बेस पीसि ताकसेक मंतुर.

21 गानि, मूसाना नियमतुन पीसि ताकमट, मर्कुनद कतना कियमट इंका यहुदिल्कुना रीति-रिवाजकुन होळसीम्टु इंचि वैरे जातितोरा नड्डुम मनना यहुदिल्कुंक निमे कराहितन इंचि बोरो इगे वेहतुर.

22 अयेत इंदके बतल कीकोम मरि? निमे इगे वातिन इत्ता संगति ओर्कु बल्हैना तेळियंते.

23 अदुनहाटीं निमे मोमोट वेहताप कीम. महगा मोक्कु मोळ्ळकुत्तोर नालुर मनकालोर मंतुर.

24 निमे ईरकुन नीतोनि ओम. ओरतोनि कलियसि नीवदगुडा सुदिदकरन कीकुन. अचोने आयका ओरा तल्ला कोरियनाहाटीं कर्सुक कोलां इंका निमेने हीम. इल्हा कीतिन इत्ते नीवा बारेमते केंजतद अंता वट्टि आबदुदमे. इंका निमे मूसाना नियम परकारमे ताकसंतिन इंचि ओर्कु तेळियसि दांता.

25 मोमोट अयेत वैरे जातिता विस्वासुल्कुंक दीनकन्ना मुन्नेन उंदि सिट्टि रासि अयेत, बोम्पांक मोळ्ळकतदुन तिनमट, गोंदके पिसकिसि हक्कता जिवासािना हळ्विं, नेत्तुर तिनमट, बोगमतनमताल लक्कु मंट, इल्हा रासि लोहतोम,” इंचि इत्तुर.*

26 इल्हा पौलस आ नालुं कुन पीसि इंकुंदि रोजु ओरतोनि कलियसि ओरगुडा सुदिदकरन कीकुत्तोर. पजा अगटाल येस्सलेमता गुळिते होंचि, पुरागा सुदिदकरन आयगोम इत्ते बच्चुं रोजकु एदुर हळ्ळसेक मनापीतानो अदुन बारेमते पेर्मालोर्कुंक वेहतोर. अचोने आयका आकिरता रोजकुने ओनतोनि वाता हरेक मनकंक ओना सतताहेंदाल मोक्कु हियापीता इंचिगुडा वेहतोर.

* 21:8 प्रेरित्लुकुना कबाहक 6:1-6 * 21:18 याकोब इ याकोब येसुना तम्मुर आंदुर. इंका ईर येस्सलेम कलिसियाता पेदुदा मनकल आंदुर. * 21:25 प्रेरित्लुकुना कबाहक 15:20

27-28 एडुं रोजकु पूरा आयानवे मल्लां, आसिया एरियाताल वाता इचचुर यहदिलक पौलसुन गुळिते हळतुर. ओर अंटोर लोकुकुंक पौलसुना बारेमते एकरेबुलक वेहचि ओन पीतुर. पजा वरगेयसि, “इसाएलता लोकुरिटा, मिमेट अंटोर माकु सहायम कीम्ट. ईर मनकल अनि एरियाने तिरियसि मना इसाएलता लोकुकुना विरोदमते, मूसाना नियमता विरोदमते आनि ई गुळिता विरोदमते लोकुकुंक करारहसेक मंतोर. अचोने आयका इंदके युनानि लोकुकुन गुळिते केथ्से तच्चि पवित्रामाता गुळितुनगुडा हेव्हाहतोर,” इंचि इलतुर.†

29 (तोरोपिमस पोरोलतोर वरोर इपीसिता मनकन पौलसुनतोनि तिरियनेके लोकुकुलक हळसि मलतुर, ओने पौलस गुळिते ततोर बारे इनकुलतुर.)

30 अस्के पूरा सहरअंता गजबज आता. लोकुकुलक अंटोर विच्चि वासि उंदगा जमा आतुर. पौलसुन दोर्कापीसि गुळिताल पलाते इगिसि ओसि, बिराना तल्पुक वाटतुर.

31 लोकुकुलक ओन हळकना विचारम कीसेक मननेकेन रोमि पोलिसि दलमता सिपाइलुकुना अदिकारिक, पूरा येस्सलेम सहरते लोल्लि आता इंचि कबुर तेळियता.

32 अस्के ओर बिराना इचचुर सिपाइलुकुन आनि दरोगालोर्कुन पीसि पौलसुन तनना यहुदिलकनहेके पेयसतोर. सिपाइलुकुना अदिकारि, सिपाइलुकुन हळतारिते यहुदिलक पौलसुन तनमळ आपतुर.

33 पजा आ सिपाइलुकुना अदिकारि पौलसुनगा होंचि ओन पीसि गोल्सुकुने दोहनाहाटी आदेस हीतोर. आयका ओर लोकुकुलक, ईर बोर आंदुर, ईर बतल कीतोर? इल्हा पूसकीतोर.

34 अस्के इचचुर लोकुकुलक उंदीतर, इकिचचुर लोकुकुलक इंकुदि तीर वेहालय आतुर. इल्हा वेल्लेन लोल्लि आसि निजम बतल ओन्क तेळिया पराहिल्ले. अदुनहाटी ओर पौलसुन किल्लाते ओयालय आदेस हीतोर.

35-36 पौलस पायरिनगळक एवतस्के वेल्लेन मदि लोकुकुलक, “ओन हळकट, ओन हळकट,” इंचेके उंदीतर मोत्कुंचेके इरगा लोल्लि कियालय दलगुतुर. अदुनहाटी सिपाइलुकुंक ओन ओरा बुजालुकुन पोर्री तेहकुंचि किल्लाता लोपो ओया पीता.

37 सिपाइलुकु पौलसुन किल्लाता लोपो ओयका मुन्ने, “नना नीतोनि बतलनना वळका परातना?” इंचि पौलस सिपाइलुकुना अदिकारिन पूसकीतोर. अस्के आ सिपाइलुकुना अदिकारि, “अब्बा! नीकु युनानि बासागुडा वळका वांताना?

38 अस्के मरि कोन्नि रोजकु मुन्ने रोम सरकासंक विरोद कीसि, नालुं वेय्कुना आतंकवादिर्कुन बय्लि जेगाते केथ्से ओता इजित देसेमता मनकन निमेन गदा?” इंचि पौलसुन पूसकीतोर.

39 अस्के, “नना किलिकिया एरियाता उंदि बेस पोरोल होल्ता तरसुस सहरता यहुदि मनकन आंदुन. नना नीकु विनंति कीतन, ई लोकुकुलकनतोनि नाकुन वळका हीम,” इंचि पौलस इलतोर.

40 सिपाइलुकुना अदिकारिनहेंदाल वळकाना अदिकारम दोर्कतस्के पौलस पायरिनपोर्री नितिसि लोकुकुलक कय हुपिच्चि सपुडदाका मनालय सथे कीतोर. लोकुकुलक सपुडदाका आतास्के पौलसु इन्नानि बासाते वेहालय दलगुतोर.

22

पौलसुना बासन

1 “दादालोरिटा आनि पेदुदालुकुनिटा, नाकु मीवा मुन्ने इचचुर वळकानद मंता अदुन केंजट.” इंचि पौलस वळकालय दलगुतोर.

2 ओर इन्नानि बासाते वळकानदुन केंजसि लोकुकुलक इंका इचचो सपुडदाका आतुर.

3 “नना यहुदि मनकन आंदुन. नना किलिकिया एरियाता तरसुस सहरते पुटतन. इदे येस्सलेम सहरते बेसंतन. इंका गमलियेल इनानोना कयदा हिळु मंचेके ओनहेंदाल बेस सदवु करियतन. अचोने आयका मना पेदुदालुकुना नियमक, रीति-रिवाजक मलताप बेस टेरनिंग दोर्कुता. मिमेट बल्हा अस्के इय्याला पेनदाहाटी मीवा बक्तितुन हुपिच्चितोर, अल्हेन ननागुडा हप्सुदुन.

4 नना पेनदा हर्रि पीसि ताकाना लोकुकुलकन बचोचोनी तकलिप कीतन, दीनहेंदाल इचचुर लोकुकुलकना जीवां इंका होत्तां. मुरतळ-मांडसा इनाकोटा अंटोर्कुन पीसि जेलने वाटुदुन.

5 पेदुदा पेर्माल आनि अंटोर यहुदि पेदुदालक नावा ई कबळहाटी गवाइ मंतुर. अचोने आयका दमिस्क सहरते मनना यहुदि दादालोर्कुंक सिट्टिं रासि दमिस्क सहर होनालय पेयसतन. अगा होंचि पेनदा हर्रि पीसि ताकानोर्कुन दोर्कापीसि येस्सलेमते तच्चि, ओर्कुं सिक्सा आयगोम. इदे नावा उदुदेसम मलता.”

पौलस ओना मनसु मारियता संगति वेहांतोर

† 21:27-28 यहुदिलुकुना गुळिते केर जातितोर्कुन होममा इला जेगाते होल्ते ओर्कुन हळुकुदुर.

6 इल्हा नना दमिस्क सहर होनालय पेयसतन. नना दमिस्क सहर दग्गेक एवतन बारे! अस्के पियल वेलाक मब्बुनाल उंदेदम उंदि पेद्दा वेलगु नावा सुट्टु जग्गरा मेसता.

7 नना अल्हेन ब्रमिपोर्रो हिल्ल अरतन. अस्के उंदि अल्किर, “साऊल, साऊल! निमे नाकुन बारि तकलिप कीसतिन?” इंचेके नाकुन इत्ता.

8 अस्के, निमे बोन आदिन सामि? इंचि नना पूसकीतस्के, “निमे बोन अथे तकलिप कीसतिनो आ नासरेत नाटेना येसुन आंदुन,” इंचि आ अल्किर इत्ता.

9 नावातोनि मत्तुर ओर अद वेलगुन हळतुर गानि नावातोनि वळकता अल्किर मात्रम ओर्क केजा वाया हिल्ले.

10 पजा, अथे नना बतल कीकन सामि? इंचि पूसकीतस्के, “निमे तेदसि दमिस्क सहरते होन. बव कबाहक अथे कियालय नना नीकुन पेरकुत्तनो अव कबाहक अगा नीकु वेहमळ जर्गाता.” इंचि सामि नाकु वेहतेर.

11 आ जग्गरा वेल्गुन हळसि नावा कळकु दिस्साकोटा आतां. अदुनहाटी नावा दंटातुर नाकुन कय पीसि दमिस्क सहरते ओतुर.

12 अगा हनन्याल पोरोलतोर वरोर मनकल मत्तोर. ओर मूसाना नियम परकारम ताकुंदुर. अगाटा अंटेर यहूदिल्क इंका ओन बेस मनकल इनुंदुर.

13 ओर नाहेके वासि, नावा दग्गेरा नित्तिसि, “साऊल दादा! नीवा कळकु मर्ग दिस्सीकांटी,” इंचि इत्तोर. ओर अल्हा इत्ता इन्मळे नावा कळकु दिसालय दलगतां. नना ओन हळतन.

14 पजा ओर नाकुन, “मना एनकटा पेद्दाल्कुना पेन दाना इच्चातुन एरपाट कियालय, नीतिमंतुड आता दाना सेवकुन हळालय, ओना तोळ्दा पोल्लेन केंजालय नीकुन पेर्कुत्ता.

15 निमे बतल अथे हळतन, बतल अथे केंजतिन अदुना बारेमते दानाहेंदाल अंटेर लोकुल्कुना मुन्ने गवाइदार आंतिन.

16 अथे इंदके आलसेम बारि कीसतिन? तेदसि बापतिस्मा एतसि, सामिना पोरोलते पारतना कीम, अस्के ओर नीवा पापालकुन नोरीतोर,” इंचि इत्तोर.

17 आयंका नना येस्सलेम तिरियसि वासि गुळिते पारतना कीसेके मत्तन, अस्के अल्हेन दर्सनम हळतन.

18 दर्सनमते मननेकेन नना सामिन हळतन, अस्के, “बिराना तेदसि येस्सलेम सहरताल पेय्सि होन, नावा बारेमते निमे वेहाना गवाइतुन ओर ओफ्कुनुनर,” इंचि सामि नाकु वेहतेर.

19 अस्के नना इतन. “सामि! यहूदिल्कुना दर्मसास्त्रम कराहना हरेक लोते होंचि नीपोर्रो विस्वासम कियानोर्कुन दोकांपीसि ओर्कुन जेलने वाटता संगति आनि तंता संगति आ लोकुल्कुंके बेस एरपाटे मंता.

20 अचोने आयका नीवा गवाइदार स्टिपनुन हक्कनेके, हक्कानटे नावदगुडा कय मत्ता, इंचि ह्पिचचेक, ओन हक्कानोरा कपडिना काबेल कीसेक नना अग्गेन नित्तिसि मत्तन.

21 अस्के सामि नाकुन, निमे होन, नना नीकुन वेल्लेन लक्कु वेरे जातितोरा लोप्पो लोहंतन,” इंचि इत्तोर.

पौलसुन यहूदिल्कुना पेद्दा पंचादिता मुन्ने निलाहंतुर

22 इद पोल्ले वेहनदाका यहूदि लोकुल्क पौलसुना बासन केंजतुर, पजा जोरसे वरगेयसि, “ई मनकल जीवाते मनमळ बेस आयो. इंसटा मनकन ई ब्रमिपोर्रोताल हिलाकोटा कीम्पु,” इंचि इत्तुर.

23 ओर जोर-जोरसे वरगेयसेक मत्तुर, अंगिपोर्रो केर्ता कोटकुन तेंडसि विसिरसेके मत्तुर, इंका मब्बुनहेके दुब्बा तेहासेक मत्तुर.

24 अस्के सिपाइल्कुना अदिकारि पौलसुन किल्लाते ओयानाहाटी आदेस हीतोर. “लोकुल्क ओना विरोदमते इल्हा बारिक वरगेयसंतुर, कारनम बतल आंद तेळियनाहाटी, ओन पोटेटे देब्बां तंचि-नंचि पूस कीम्पु,” इंचि वेहतेर.

25 गानि बस्के अथे पौलसुन पोटेटे देब्बां तनालय दोहचेके मत्तास्के, “तपु कीतोर इंचि निरनायम पेय्सका मुन्नेन वरोन रोम रहिवासिन पोटेटे देब्बां तनमळ मीवाहाटी न्यायामेना?” इंचि अगा नित्तिसि मत्ता वरोर दरोगान पौलसु पूसकीतोर.

26 अल्हा इत्तद केंजसि आ दरोगाल सिपाइल्कुना अदिकारिनाग होंचि, “मिमेट इद बतल कीसतिरि? ईर रोम रहिवासि अले,” इंचि ओन इत्तोर.

27 अस्के आ सिपाइल्कुना अदिकारि पौलसुनगा वासि, “नाकु वेहा, निमे रोम रहिवासिन आंदिना?” इंचि पूसकीतस्के, “आ” इंचि पौलसु इत्तोर.

28 पजा, “नना रोम रहिवासि आयानाहाटी वेल्लेन कोत्तां कर्स कीतन,” इंचि आ सिपाइल्कुना अदिकारि इत्तस्के, “नना अथे पुटत्स्केटाले रोम रहिवासिन आंदुन,” इंचि पौलसु इत्तोर.

29 पजा ओन पूसकियालय हळसेक मत्ता सिपाइल्क बिराना पजोळ्क आतुर आनि सिपाइल्कुना अदिकारिगुडा, रोम देसेमता वरोन रहिवासिन दोहाचि वाटतोम, इंचि वेल्ले वेरियकुत्तोर.

30 यहदि लोकल्क पौलसुनपोर्री बारि दोसेम दोस्तुर. निजम बतलो पलाते अरगोम इंचि सिपाइल्कुना अदिकारिना मनसुने मत्ता. अदुनहाटी सिपाइल्कुना अदिकारि इंकुंदि रोज़, पेदुदा पेर्मांलोकुंन आनि यहदिल्कुना पेदुदा पंचादितोकुंन जमा आयालय आदेस हीतोर. अंतोर जमा आतास्के पौलसुन पेचाहचि ओरा मुन्ने तच्चि निलाहतोर.

23

1 पौलस पेदुदा पंचादितगा जमातोकुंन उंदेतीर हळसि, “नावा दादालुरिटा! नना, इय्यालादाका पेनदा मुन्ने बेसता मनसुने पिसतन,” इंचि इत्तोर.

2 अस्के हनन्याल इनना पेदुदा पेर्मांल, “ओना तोडिड पोर्री तन्नाटु,” इंचि पौलसुना पक्काते नित्तिसि मत्तोकुंन आदेस हीतोर.

3 अस्के पौलस ओन, “ए चुना होकता गुरेतसंतोना! पेन नीकुन तनता. बारिलते, निमे दर्मसास्त्रमता नियम मत्ताप नावा न्यायम कियालय उदतिन, गानि दानकु अड्डम नाकुन तनालय आदेस बल्हा हीतिन?” इंचि इत्तोर.

4 अस्के पक्काते नित्तिसि मत्तुर, “निमे पेनदा पेदुदा पेर्माना अपमानम कीसंतिना?” इंचि इत्तुर.

5 “दादालुरिटा, ईर पेदुदा पेर्मांल आंदुर इंचि नाकु एरपाट मनाहिल्ले. बारिलते, ‘नीवा अदिकारिनाहाटी सेड्डा पोल्ले वळका मन्नि,’ * इंचि नियमते रासि मंता,” इल्हा पौलस इत्तोर.

6 अगा यहदिल्कुना पंचादिते उदिदेसि मत्ता लोकल्कुने इच्चुर सदुकिर आनि इच्चुर परिसिल्कु मंतुर इंचि पौलसुंक तेळियतस्के, ओरा मुन्ने जोरसे वरगेय्मि, “दादालोरिटा! नना परिसिन आंदुन. नावा तादल-बाबोगुडा परिसिल्कु आंदुर. हातोर मर्री जीवाते तेदांतुर इत्ता ओरा आसेतुन नना विस्वासम कीताहाटी मीवा मुन्ने निल्लि मंतन,” इंचि इत्तोर.

7 ओर इल्हा इत्तारिलते परिसिल्कु आनि सदुकिर लोप्पो लोल्लि आसि, ओर अलग-अलग आतुर.

8 बारिलते, हातुर मर्री जीवाते तेदुर, पेनदा दूतां हिल्लें, आत्मां हिल्लें इल्हा सदुकिर इत्तुर. गानि परिसिल्कु बारे इव आनि मंतां इंचि इत्तुर.

9 अगा वेल्ले लोल्लिं आतां. अगा उदिदेसि मत्ता परिसि दर्मसास्त्रम कराहना गुर्लुकुनाल इच्चुर तेदिदि, “माकु ईना लोप्पो बतल तप्पु दिस्सेक हिल्ले. ईनतोनि बदाना आत्मा हिलाकोटे बदाना पेनदा दूता वळकिस मंदार,” इंचि इत्तुर.

10 इल्हा ओरा लोप्पो इच्चोर लोल्लिं आतां गदा, पौलसुन हक्कानुर बारे इंचि सिपाइल्कुना अदिकारि वेरियतोर. पजा, “पौलसुन ओरागटाल अलग कीसि किल्लाते पीसि ओम्ट,” इंचि सिपाइल्कुंक आदेस हीतोर.

11 अदे नर्का सामि पौलसुनगा वासि, “पौलसुन निमे वेरियमा. बल्हा निमे येस्सलेमते नावा गवाइ हीतिन, अल्हेने रोम सहरते इंका नीकु नावा गवाइ हियनद मंता,” इंचि इत्तोर.

पौलसुन हक्कना पिलान

12 इंकुंदि रोज़ हक्केरे पौलसुन हक्कालय यहदिल्कु पिलान कीसि, ओन हक्कवा मोमोट तिन्नोम-उन्नोम, इंचि ओट्टु तित्तुर.

13 इल्हा पिलान कीतोर् नल्पै मंदिकन्ना एक्को मत्तुर.

14 ओर पेदुदा पेर्मांलोकुंनगा आनि यहदि पेदुदालुकुनगा होंचि, “मोमोट बच्चोरदाका पौलसुन हक्कोम, अच्चोरदाका मोमोट बतले तिन्नोम-उन्नोम इंचि गट्टिगा ओट्टु तित्तोम.

15 अदुनहाटी इंदके मिमेट आनि यहदिल्कुना पेदुदा पंचादितोर कलियसि सिपाइल्कुना अदिकारिनागा होंटु. अगा होंचि, पौलसुन, इंका बेस पूसकियानद मंता, ओन महगा लोहचीम, इंचि तेडियागोटसि वेहाट. ओर मिहगा एव्का मुन्नेने ओन हक्कालय तयारते मंनंतोम,” इंचि इत्तुर.

16 गानि पौलसुन हक्कालय कोरसंतुर इंचि पौलसुना हेलटा मर्रि केंजतोर. अस्के ओर किल्लाते होंचि पौलसुंक पूरा वेहतोर.

17 वेहत्तारिलते पौलसु वरोन दरोगान केय्मि, “ई लैय्येन सिपाइल्कुना अदिकारिनागा ओम, ईर ओन्क बतलो वेहंतोर अले,” इंचि इत्तोर.

18 अस्के दरोगाल सिपाइल्कुना अदिकारिनागा ओसि, “जेलने मनना पौलसुन ईन मीहेके तायालय नाकुन विनति कीतोर. ईर नीकु बतलो वेहंतोर अले,” इंचि इत्तोर.

19 पजा आ सिपाइल्कुना अदिकारि ओना कय पीसि, बोरे हिल्वगा ओसि, “वेहा, नावातोनि बतल वळकानद मंता?” इंचि पूसकीतोर.

20 अस्के लेय्योड, “यहुदिल्क उंदि आसि, पौलसुन इंका बेस गट्टिगा पूसकियाना बहानाते नाडि यहुदिल्कुना पेद्दा पंचादिते केयागोटनाहाटी, नीकुन विनंति कीतुर.

21 गानि निमे ओरा पोल्लें कैजमा. बारित्ते, नल्यैकन्ना एक्को लोकुकल पौलसुन हक्कवा मोमोट तिन्मो-उन्नोम इंचि ओट्टु तित्तुर. निमे ‘ओन ओम्टु’ इंचि आदेस हियानद एदुर ह्ळसंतुर,” इंचि वेहतोर.

22 वेहतस्के, आ सिपाइल्कुना अदिकारि, “निमे नाकु इव पोल्लें वेहतिन इंचि बोर्के वेहमा,” इंचि आ लेय्योन लोहचीतोर.

पौलसुन पिलिक्स राज्यपालनगा लोहमळ

23 अस्के आ सिपाइल्कुना अदिकारि ओना इव्वर दरोगालोर्कुन केय्यि, “रोंडु न्हक्कु सिपाइल्क, डेब्बे मंदि गुरािल्कुनपोरें उद्दिस होनानुर, रोंड न्हक्कु गोर्का पियानोर्कुन नर्कांटां तोम्मिद एगानेके कैसरिया सहरते होनालय तयार ईरट.

24 पौलसुन ओयालय गुरािल्कुन तयार ईरट. ओन बेस कापाळसि पिलिक्स राज्यपालनगा ओम्टु,” इंचि वेहतोर.

25 ओर उंदि इल्हा सिट्टिटे रासतोर.

26 “महाराज पिलिक्स राज्यपाल नीकु, कलादियुस लूसियाना हेंदाल जोहार.

27 यहुदिल्क ई मनकन पीसि हक्कसेक मत्तुर, गानि ईर रोम रहिवासि इंचि नना कैजतस्के सिपाइल्कुन पीसि होंचि ओरागटाल ओन पिसागोटतन.

28 ओना तपु बतल आंदु, इदुन एरपाट क्रियालय ओन ओरा पेद्दा पंचादिते ओतन.

29 अगा ओर, ओनपोरें तपुक दोसतव अन्नि ओरा दर्मसात्राल्कुना हेंदाले मत्तां. अदुनहाटी ओन हक्कनसोंटा हिलाकोटे ओन जेलने वाटानसोंटा तपु ओनगा दिसा हिल्ले.

30 गानि ओन बोरो हक्कना मंता इंचि नाकु तेळियतस्के, ओन बिराना नीहेके लोहचीतन. ओनपोरें तपु दोस्सानोर बोर अयते मंतुर ओर नीवा मुन्ने वासि ओना तपु बतलो नीकु वेहगोम इंचि ओर्क आदेस हीतन,” इंचि सिट्टिटे रासतोर.

31 सिपाइल्कुंक बल्हा आदेस हीतोर, अल्हेने पौलसुन पीसि नर्कटद-नर्केन अतिपत्रि सहरते ओतुर.

32 इंकुंदि रोजु गुरािल्कुनपोरें होनानोर्कुन ओनतानि होनालय होळसि, कळमातोर किल्लाते तिरियसि वातुर.

33 ओर कैसरिया सहरते एवतारित्ते राज्यपालुंक सिट्टिटे हीसि पौलसुन ओना मुन्ने निलाहतुर.

34 राज्यपाल सिट्टिटे हद्दिवसि, “निमे बद एरियातोन,” इंचि पौलसुन पूसकीतोर. ओर किल्लिक्रिया एरियातोर इंचि तेळियतारित्ते,

35 “नीवा पोर्से तपु दोस्सानुर इगे वातारित्ते नीवा न्यायम कीतन,” इंचि ओर इत्तोर. पजा पौलसुन, हेरोद राजाना किल्लाते मनना जेलने इर्सि, ओना पहारा कीम्टु, इंचि आदेस हीतोर.

24

पिलिक्स राज्यपालना मुन्ने पौलसुन निलाहमळ

1 हेय्युं रोजकु आतारित्ते हनन्याल इना पेद्दा पेर्माल, इच्चुर यहुदि पेद्दाल्कुन, तिरतुल्लुस पोरोलतोर वकिलुन पीकुंचि कैसरिया सहरते वासि, राज्यपालुना मुन्ने पौलसुना विरोदते केस कीतोर.

2 राज्यपाल पिलिक्स, पौलसुन केयतारित्ते, तिरतुल्लुस इना वकिल पौलसुनपोरें तपु दोस्सि इल्हा इनालय दलगतोर, “राज्यपाल सायाब, नीवाहेंदाल मोमोट वेल्ले रोजकुनाल सांतिते मंतोम, नीवा तेल्विहेंदाल मावा देसेम सुदुरांचेके मंता.

3 दीन मोमोट अन्नि जेगाने, अन्नि तीरकुने, पूरा मनसुने ओप्कुंतोम.

4 नना नीकु वेल्लेने पोल्लें वेहिचि तिप्पल क्रियोन, गानि मावां रोंड पोल्लें कैजा इंचि विनंति कीतन.

5 ई मनकल जगडाल्क पुटिच्चानोर, दुनियाते मनना अंतोर यहुदिल्कुंक होंग वायागोटनोर आनि ईर नासरेत पाटिंता* लीडर आंदुर.

6 मावा गुळितुनगुडा हेडहसेक मत्तोर, गानि ईन मोमोट दोर्का पीतोम. (मावा नियम मत्ताप ईना न्यायम कीतोम इंचि मोमोट ह्ळतोम,

7 †गानि सिपाइल्कुना अदिकारि लूसियाल वासि जबरदस्तिते ईन महागटाल इग्गिस ओतोर.

8 तपु दोस्सनुर मीवा मुन्ने वायना इंचि आदेस हीतोर.) मोमोट ईना पोर्से बव तपुक अयते दोसतोम अव अन्नि निजमा-आबद्दमा निमेने पूस कीसि ह्ळ्हा, पूसकीते नीकु पूरा तेळियसि दांता,” इंचि इत्तोर.

9 अस्के यहुदिल्कुगुडा ओनाहेके आसि, इवन्नि पोल्लें निजमे, आंदु इंचि इनालय दलगतुर.

* 24:5 नासरेत पाटिं येसु नासरेत नाटेने बेसंतोर, अदुन्हेके येसुनपोरें विस्वासम कियवोर, विस्वासम कीतोर्कुन नासरेत पाटिं इंचि सिडांचुंदुर. विस्वासम कीतोर येसे किरिस्तु आंदुर इंचि नम्मुंदुर. † 24:7 इद वचनम कोन्नि पांडु लिपिने हिल्ले.

10 पजा राज्यपाल, पौलसुन वळकालय सयगे कीतस्के पौलसु इल्हा वळकालय दल्युगोर. “निमे वेल्लेने वर्सानाल ई देसेमते न्यायम कीसेक मतिन इंचि तेळियता. अदुनहाटी नीवा मुन्ने नना कुसिते नावा पोल्ले वेंहंतन.

11 नना येस्सलेमते पेनदुन मोळकालय होंचि पन्नेंडु रोजकुंकुनना एक्को आयाहिल्ले, इद पोल्ले निजमे इंचि नीकु तेळियार.

12 नना गुळिते बोनतोने लोल्लि कीतद ईर हळा हिल्लुर, दर्मसास्त्रम कराहना लोहकुने आयि, सहरते आयि, लोकुल्लुकुनतोनि जगडम पुटिस्तदगुडा ईर हळा हिल्लुर.

13 इदके नीवा मुन्ने, नावापोर्रो दोस्ता तप्पुकुन ईर निजम कीसि हुप्सा पर्र.

14 गानि उंदि पोल्लेतुन नीवा मुन्ने नना ओप्कुंतन. नना पेनदा हर्दे ताकसि, मना पेदुदालुकुना पेनदा सेवा कीतन. आ हर्दुन ईर तप्पुड पार्ति इंतुर. मूसाना नियमते, पेनदा कबुरतोर नियमते रासतव अन्नि पोल्लेनपोर्रो नना विस्वासम कीतन.

15 नीतिते ताकानोर, नीतिते ताकवोर इव्वुरगुडा हातोर लोप्पोटाल मर्रा जीवाते तेदांतुर इंचि ईर आसे इराता, ननागुडा पेनदापोर्रो आसे इरंतन.

16 अदुनहाटी नना पेनदा मुन्ने आयि, लोकुल्लुकुना मुन्ने आयि, बस्केळक बेस मनसुने ताकालय हळंतन.”

17 नना वेल्लेने वर्सानाल येस्सलेमते हिलाका मत्तन, गानि इदके मावा गरिब लोकुल्लुकुनाहाटी दान-दर्मम एविच्चि हियालय आनि गुळितगा पेनदुक मोक्कु हियालय वासि मत्तन.

18 नना गुळितगा सुद्दिकरन कीकुंचि, दंडकालक महानेके नाकुन हळतुर. अस्के अगा वेल्ले मंदि मना हिल्लुर, लोल्लि मनाहिल्ले.

19 गानि आसियाताल वातुर इच्चुर यहदिलक अगा मत्तुर. नावदगिटा बतलन्ना तप्पु मंचि मत्ते, ओर नीवा मुन्ने वासि, नापोर्रो तप्पु दोस्सि मन्नेर.

20 हिलाकोटे, नना यहदि पंचादिते निल्लिस मत्तास्के नावद बतल तप्पु दोर्कुतानो, अदन्ना इगो मत्तोर वेहिरकांटी.

21 “हातोर मर्रा जीवाते तेदांतुर,” इंचि ओरा मुन्ने नना जोरते इत्तन. इद उंदे पोल्लेताहेंदाल नावा न्यायम मीवा मुन्ने जर्गसेक मंता, इंचि पौलसु इतोर.

22 पिलिक्सुंक, पेनदा हर्दा बारेमते बेस एरपाट मत्ता. अदुनहाटी न्यायम कियानद आपसि, “सिपाइलुकुना अदिकारि लुसियाल वातारित्ते नीवा पोल्लेता पयसला कीतन,” इंचि इतोर.

23 पजा, “ईन दोहाकोटा जेलते इर्रा, ईना दंटातुर बतलन्ना हियालय वाते ओर्कुन आपमा,” इंचि दरोगांक आदेस हीतोर.

पिलिक्सुना मुन्ने पौलसु

24 कोन्नि रोजकु आतारित्ते पिलिक्स ओना यहदि जातिता मुत्तो दुरसिल्लानतोनि अगा वातोर. पजा पिलिक्स पौलसुन केया लोहतोर. अय्ते, येसु किरिस्तुनपोर्रो विस्वासम इर्रा बारेमते पौलसु ओर्कु वेहतोर.

25 गानि बस्के अय्ते, सत्तेमते बल्हा ताकाना, बल्हा ओप्केते मनना, पेन दुनियातोर न्यायम आकिरते बल्हा कियरय इव पोल्लेना बारेमते पौलसु पिलिक्सुनतोनि चर्चा कीतोर, अस्के पिलिक्स वेरियसि, “इंदके निमे होन, वेला दोर्कतस्के नना नीकुन मर्रा केयंतन,” इंचि पौलसुन इतोर.

26 पौलसु कोत्ता हियानुर बारे इंचि पिलिक्स आसे पळसि ओन ऊके-ऊके केय्सि ओनतोनि वळकुंदुर.

27 रौडु वर्सा इल्हेने पेय्छि होलतारित्ते पिलिक्सना जेगाते पुरकियुस पेसतसु पोरोलतोर राज्यपाल आतोर. पिलिक्स होनना वेलाते, यहदिल्लुकुन कूस कियानाहाटी पौलसुन जेलतन इतोर.

25

पौलसु कैसर राजनगा विनंति कीतोर

1 पेसतसु राज्यपाल कैसरिया सहरते वासि, मूड रोजकु आतारित्ते, अगटाल येस्सलेम सहरते होतोर.

2 अगा पेदुदा पेर्मालोर आनि यहदि पेदुदालक वासि पेसतसु राज्यपालना मुन्ने पौलसुनपोर्रो तप्पु दोस्तुर.

3 पौलसुन नड्डुम हरदेन हव्वना विचारम मत्ताहाटी, “मावा पोर्रो दया कीसि ओन येस्सलेमते लोहचीम इंचि पेसतसु राज्यपालन ओर विनंति कीतुर.”

4 अस्के पेसतसु इतोर, “पौलसु कैसरिया सहरता जेलते मंतोर, नना बिराना अगा दांतन.

5 अदुनहाटी मिहागटाल यहदि पेदुदालकन नावातोनि लोहचीम्टु. आ मनकानद बतलन्ना तप्पु मत्ते, ओना तप्पुन मिमेट हुप्सा पर्रातिर,” इंचि इतोर.

6 पेसतसु राज्यपाल एनमिदि पदि रोजकु ओरतोनि मंचि, कैसरिया सहरते वापस होतोर. इंकुदि रोजु कोरटते न्यायम कियाना जेगातगा उद्दिदस पौलसुन तायालय आदेस हीतोर.

7 पौलस वातारित्ते, येस्सलेमतल वाता यहुदिल्कु ओना सुट्टु निततुर. ओनपोर्रे पेद्दा-पेद्दा तप्पुक दोस्तुर, गानि उंदिका तप्पु निजम कीसि वेहा पराहिल्लुर.

8 अस्के, “नना यहुदिल्कुना दर्मासन्नमता नियमकुना अड्डम बतले कबळ किया हिल्लेन, गुळितगा बतले तप्पु कबळ किया हिल्लेन, कैसर राजांक अड्डम बतले वळका हिल्लेन,” इंचि पौलस इत्तोर.

9 पौलस अल्हा इत्तस्के, यहुदिल्कुन कूस कियालय, “इव पोल्लेना न्यायम येस्सलेमते नावा मुन्ने आयागोम इंचि नीवा मनसु मंताना,” इंचि पेसतुस पौलसुन पूसकीतोर.

10 अस्के पौलस इल्हा जवाब हीतोर, “इंदके नना कैसरना कोरटगा नित्तिसि मंतन, इग्गेने नावा न्यायम आयापीता. यहुदिल्कुना विरोदमते नना बतल तप्पु किया हिल्लेन इंचि नीकुगुडा बेस एपटा मंता.

11 ओक्कला नना तप्पु कीतोन आसि, नावा तप्पु हामुर सिक्सालायक मनानय्ते, नना हायालय तयार मंतन. गानि बव पोल्लेन पोर्गेटाल अय्ते लोकुकल नापोर्रे तप्पु दोस्सेक मंतुरो, अव पोल्ले ओक्कला आबद्दम पेयसानय्ते, नाकुन बोरे ओरा कय्दे हिया परर. नावा न्यायम इग्गे आयाकोटे, कैसर राजाना मुन्ने आयागोम इंचि कोरसंतन.”

12 जवाबुने पेसतुस ओना पंचादिते उदता पेद्दाल्कुनतोनि वळिकसि, “निमे कैसर राजानगा न्यायमताहाटी विनंति कीतिन अय्ते ओनागेन दाकिन,” इंचि इत्तोर.

पौलसुन अग्रिपा राजाना मुन्ने केयमळ

13 कोन्नि रोजकु आतारित्ते, अग्रिपा राजाल* आनि ओना हेल्ड बर्निका, पेसतुस राज्यपालुंक कलियालय कैसरिया सहरते वातुर.

14 ओर इब्जुर वेल्लेने रोजकु अगा मत्तुर. मत्तस्के, पेसतुस राज्यपाल पौलसुना न्यायमता बारेमते अग्रिपा राजांक इल्हा वेहतोर. मुन्नेटा पिलिक्स राज्यपाल, वरोर मनकन इग्गेने जेलने इरसि होत्तोर.

15 नना येस्सलेमते मत्तास्के, पेर्मालोर्क आनि यहुदि पेद्दाल्क ओनपोर्रे तप्पु दोस्सि, ओन्क सिक्सता आदेस हियालय नाकुन इत्तुर.

16 अस्के नना ओर्कुन इल्हा इत्तन, “बदवेरदाका अय्ते तप्पु कीता मनकल, तप्पु दोस्तोरा मुन्ने नित्तिसि, ओना तप्पुना बारेमते वळ्करो, अदवेरदाका ओन्क सिक्सा हियना रोमि लोकुल्कुना रिवाज हिल्ले,” इत्तन.

17 अल्हा इत्तस्के, ओर लोकुकल नावातोनि इग्गे वातुर. नना आल्सेम कियाका, इंकुदि रोजु न्यायम कियाना जेगाताग उद्दिस, आ मनकन तायालय आदेस हीतन.

18 ओनपोर्रे तप्पु दोस्सानुर नित्तिसि ओना तप्पुक वेहतुर, गानि नना इनकुत्ताप बदे तप्पु ओनपोर्रे वेहा हिल्लुर.

19 सिराप ओर ओरा दर्मता बारेमते आनि येसु पोरोलता वरोर हासोत्ता मनकना बारेमते ओरा लोल्लि मत्ता. गानि पौलस मात्रम हासोत्ता येसु जीवाते मंतोर इंचि इंतोर.

20 इसीटा पोल्लेन बल्हा न्यायम कीकन इंचि नाकु तेळियाकोद्दु. अदुनहाटी नना, “इव पोल्लेना पय्सला कियालय येस्सलेम दातिना?” इंचि ओन पूसकीतन.

21 अस्के पौलस इत्तोर, “नावा न्यायम कैसर राजानगा आयागोम, अदवेरदाका इग्गेने जेलते मंनतन,” इंचि विनंति कीतोर. अदुनहाटी नना ओन कैसरनगा लोहनदाका ओर इग्गेने मन्निर, इंचि आदेस हीतन.

22 अस्के अग्रिपा राजाल, “आ मनकल इनना पोल्ले नाकु कैजना मनसु मंता,” इंचि पेसतुसुनतोनि इत्तोर. “अल्हा अय्ते, ओना पोल्ले नाडि कैजकिन,” इंचि पेसतुस इत्तोर.

23 इंकुदि रोजु अग्रिपा राजाल आनि बर्निका बेस सोक आसि वातुर. सिपाइल्कुना अदिकारिल्लक, सहरता पेद्दा मनकालोर्कुनतोनि कूळसि पंचादि कियाना जेगाते ओर होत्तुर. अस्के, पौलसुन पीसि वट्टु, इंचि पेसतुस आदेस हीतारित्ते, पौलसुन तत्तुर.

24 अस्के पेसतुस राज्यपाल इत्तोर, “अग्रिपा राजाल आनि इग्गे जमा आता लोकुरिता! ई मनकन मिमेट हळसतिर, येस्सलेमतोर आनि इग्गेटर वेल्लेटोरगुडा यहुदिल्क नहगा वासि, ईन जीवाते इरमळ बेस आयो, इंचि वरगोयसेक विनंति कीतुर.

25 गानि इर हामुटा सिक्सालायक बतले तप्पु कियवाप नाकु दिसता. ओर कुद कैसर राजाना मुन्ने न्यायम आयागोम इंचि विनंति कीतोर, अदुनहाटी ईन कैसर राजानहेके रोमते लोहना विचारम कीसेक मंतन.

26 गानि ईना बारेमते कैसर राजांक बतल रासाना नाकु तेळिया हिल्ले. अदुनहाटी ईना पोल्ले कैजता पजा, बदन्ना पोल्ले नाकु रासालय दोकार बारे इंचि मीवा मुन्ने ईन तत्तन, कास कीसि अग्रिपा राजाना मुन्ने तत्तन.

* 25:13 अग्रिपा राजाल पेरित्कुना कबाहक 12:1 वचनमते मनना हेरोद राजाना मरि, ई अग्रिपाल आंदुर.

27 जेलते मत्ता मनकना बारेमते ओना तप्पु बतले वेहवा, उंदे मल्का ओन कैसर राजानगा लोहमळ नाकु बेस दिस्सो,” इंचि इत्तोर.

26

पौलुस अग्रिपा राजाना मुन्ने गवाइ वेहंतोर

1 “इंदके नीवा पोल्ले वेहा परांतिन,” इंचि अग्रिपा राजाल पौलुसुन इत्तोर. अस्के पौलुस, नना वळकंतन, इंचि वेहालय ओना कय तेहचि वळकुमळ सुस्व कीतोर.

2 अग्रिपा राजा! यहुदिल्क नावापोर्रो बव पोल्लेना बारेमते अथे तप्पु दोस्तुरो, अव अन्नि पोल्लेन नीवा मुन्ने वेहालय नाकु मोका दोर्कता इंचि नना कूस आसेक मंतन.

3 कास कीसि, यहुदिरा रीति-रिवाजकु, ओरा विचाराल्कुना बारेमते नीकु बेस एरपाट मंता. अदुनहाटी दया कीसि नावा नना वळकाना पोल्लेन बेस केजा इंचि विनंति कीतन.

4 नना सिन्ना मत्तस्केटाल नावा लोकुल्कुनतोनियेस्सलेमते मत्तन. अदुनहाटी नावा ताकमळ, नावा पिस्वर बल्हा मत्ता अंतोर यहुदिल्कुंक एरपाटे मंता.

5 (यहुदिल्क मोदोटाले नाकुन एरपाट कीतुर. अदुनहाटी नावा बारेमते गवाइ वेहाना ओरा मनसु मत्ते, मावा दर्मता रीति-रिवाजकुन अंतोर्कन्ना एकको नोमानोन ननाने इंचि ओर वेहा परांतुर) मावा दर्मतां रीति-रिवाजकुन, परिसिल्कु अंतोर्कन्ना एकको नोमंदुर, अवने नना वरोन परिसिन आंदुन. इदुन यहुदिल्कु बेस एरपाट कीतुर. ओर इनकुत्ते इद पोल्लेता गवाइगुडा हिया परांतुर.

6 पेन मावा एनकटा पेद् दाल्कुंक पोल्ले हीसि मत्ता, अदे पोल्ले निजम इंचि नना आसे पडतन. अदुनहाटीगे, इंदके नावा न्यायम आयना मंता.

7 अदे पोल्ले पूरा आंता इत्ता आसेते, मावा पन्नेडु गोत्राल्कुना इम्नाएल लोकुल्क पूरा मनसुने नर्का-पिय्यल उंदेतीर पेनदा सेवा कीसंतुर. इदे बरोसा इरताहाटी राजा, यहुदिल्क नावापोर्रो दोसेम दोस्तुर.

8 अयना, पेन हातोर्कुन मर्रा तेहंता इत्ता पोल्लेपोर्रो मीवा लोप्पोटाल बोनके विस्वासम बारि हिल्ले?

9 मुन्ने ननागुडा, नासरेत नाटेना येसुना पोरोलता विरोदमते वेल्लेने कबाहक किय्याना इंचि विचारम कीसि मत्तन.

10 येस्सलेमते नना अल्हा कीतनगुडा. पेर्मांलोर्कुनाहेंदाल अदिकारम दोर्किचकुंचि, वेल्लेटुर पेनदा लोकुल्कुन नना जेलने वाटतन. पेनदा लोकुल्कुन हक्कानेके, हक्कट इंचि नना ओप्कुनुंदुन.

11 हरेक दर्मसास्त्रम कराहना लोते, ओर येसुना अपमानम किय्यानादाका, ओर्कुन नना तिप्पल्क किया वेहुंदुन. ओरापोर्रो नाकु इचचोर होंग वायुंदु गदा, ओर्कुन तकलिप कियालय नना पलाते सहरकुनेगुडा होनुंदुन.

पौलुस ओर हळता दर्सनम बारेमते वेहांतोर

12 अल्हेने उंदि मल्का नना पेर्मांलोर्कुनाहेंदाल अदिकारम एक्कुचि दमिस्क सहर होंचेके मत्तन.

13 होननेके पिय्यल आता नना हर्देने मत्तन, अस्के मब्बुनाल उंदि पोळ्दुंकन्ना एकको वेलगु नावा आनि नातोन मत्तोर्रा सुट्टु मेसंता.

14 मेसंतस्के मोमोट अंतोरम हिळु अरतोम. अस्के नाकु उंदि अल्किर केजावाता, अद इब्बानि बासाते नाकुन इल्हा इत्ता, “साऊल, ए साऊल, नाकुन निमे बारि तकलिप कीसंतिन? मुल्कि पोरोर् कादे तंते नीके कस्टम,” इंचि केजावाता.

15 अस्के, “सामि निमे बोन आदिन?” इंचि नना पूसकीतन. सामि इत्तोर, “निमे बा येसुनथे तकलिप कीसंतिन ओने नना आंदुन.

16 गानि इंदके निमे तेदसि, काल्कुनपोर्रो नित्ता. नावा बारेमते निमे हळता पोल्लेन अल्हेन नना नीकु हुप्सना पोल्लेन लोकुल्कुंक गवाइ वेहालय, नावा सेवक इंचि नीकुन निलाहंतन.

17 नना नीकुन नीवा यहुदिल्कुनगा आनि यहुदि आयवोरगा लोहांतन, अल्हेन ओरागटाल नीकु कापाळंतन.

18 ओर्कुन हीकटाल वेल्गुमहेके, देय्यमता अदिकारमताल पेनदाहेके तिरियना हर्दि हुप्सालय नीकुन लोहसेक मंतन. ओर अल्हा तिरियते, ओरा पापालक मापि आंतां, अल्हेने नापोर्रो बोर अथे विस्वासम कीसि पवित्र आतुरो, ओरतोन ओर्कु वारसाहक्क दोर्कार,” इंचि येसु नाकु वेहतोर.

19 अदुनहाटी अग्रिपा राजा! पोरोटाल नाक हुपिस्ता दर्सनम हळसि, अद आदेस परकारम ताकतन.

20 आयंका, मुन्ने दमिस्क सहरतोर्कुंक, पजा येस्सलेमते मनानोर्कुंक, यहुदियाता पूरा एरियाते मनानोर्कुंक आनि वेरे जातितोर्कुंकगुडा मनसु मार्सकुंचि पेनदागा वट्ट. वासि, मनसु मार्सकुत्तोर लायकता बेसता कबाहक कीसि हुप्सट, इंचि वेहतन.

21 इदे कारनमहेदाल यहदिल्क नाकुन गुळिते पीसि हळ्कालय हळ्सेक मत्तूर.

22 गानि इदवेरदाका पेन नाकुन सहायम कीता. अदुनहाटीं नना इग्गे नित्तिसि सिन्नाल्क, पेदुदाल्क अंतोर मुन्ने गवाइ हीसेक मंतन. बव पोल्लें अय्ते आयानव मंतां इंचि पेनदा कबुरतोर आनि मसाल मुन्नेन वेहतूर, अब पोल्लें तप्पा नना वें बतले वेहोन.

23 अब पोल्लें बव इत्ते, किरिस्तुंक तकलिष्कु बोगांचा पीता आनि हातोरा लोप्पोटाल ओर मोदाला मर्रा जीवाते तेदसि, यहदिदिकुंक, यहदि आयवोर्कुंक वेलगुना बारेमता पोल्लें वेहंतोर, इंचि पौलुस इत्तोर.

पौलुस अग्रिपा राजाना मनसुन तिराहलय हळतोर

24 इल्हा ओर वेहासेक मननेके पेसतुस वरगेयसि, “पौलुस निमे पागल आतिन. एक्को करियतदे नीकुन पागल कीसंता,” इंचि इत्तोर.

25 अस्के पौलुस इल्हा इत्तोर, “पेसतुस महाराज, नना पागल आया हिल्लेन, निजमतुन नना बेस बुद्धिदेते वेहासेक मंतन.

26 ई पोल्लें मूलाते मक्किंसि कीतव आयों. इवन्नि पोल्लें अग्रिपा राजांक बेस तेळियसे मंतां, इंचि नाकु विस्वासम मंता. अदुनहाटीं वेरियाकोटा ओना मुन्ने वळ्कसेक मंतन.

27 अग्रिपा राजा! पेनदा कबुरतोर रासतवुन विस्वासम कीतिना, कियिना? निमे विस्वासम कीतिन नाकु एरपाटे,” इत्तोर.

28 अस्के, “बिरानेन नाकुन किरिस्तुनोन कियालय हळसंतिना?” इंचि अग्रिपाल पौलुसुन इत्तोर.

29 अस्के “बिरानेन आयि, आल्सेमते आयि, सिराप निमेने आयो, इय्याला इग्गे केंजानोर अंतोर, इव बेडी होळसि, कळमता आनि पोल्लेने नावालेसीं आयना इंचि पेनदुक पारतना कीसेक मंतन,” इंचि पौलुस इत्तोर.

30 अल्हा इत्तस्के, अग्रिपा राजाल, ओना हेल्ड बर्निका, राज्यपाल आनि ओरतोनि उद्दिस मत्तूर अंतोर तेदतूर.

31 अगटाल पलाते पेय्सि ओर-ओर इल्हा वळ्कालय दल्गुतूर, “हामूर सिक्सालायक हिलाकोटें जेल सिक्सालायक ई बतले तपु किया हिल्लोर,” इंचि इत्तूर.

32 पजा, “कैसूर राजाना मुन्ने नावा न्यायम आयगोम इंचि, ईर इनाकोटा मंचि मत्ते, ईन होळसालय कुदुरवळ,” इंचि अग्रिपा राजल पेसतुसुन इत्तोर.

27

पौलुसुन इटलि एरियाता रोम सहरते लोहमळ

1 आयंका माकुन डोंगाते उद्दिस, इटलि एरियाते लोहाना निरनायम कीतूर. कीसि, पौलुसुनतोनि इच्चुर जेलने मत्तुर्कुन, अगस्तुस* दलमता युलियुस पोरोलता दरोगाना कय्दे अप्पजेपतूर.

2 अद्रमुतियुम सहरता डोंगाते मोमोट उदतोम, अड डोंगा आसिया एरियाता ओइडू पीसि मत्ता नाहकुनाल पेयसता. मेसिडोनिया एरियाता तेसलोनि सहरतोर अरिसतरकुस[†]गुडा मावातोनि मत्तोर.

3 इंकुंदि रोजु मोमोट सिदोन सहरतगा एवतोम. अगा एवतस्के युलियुस दरोगानकु पौलुसुनपोरों दया वाता. अदुनहाटीं पौलुसुना दंटागाहक ओन अवरिचगोम इंचि, “निमे होंचि नीवा दंटागाहकुंक कलियसि वा,” इंचि दरोगाल पौलुसुन इत्तोर.

4 अगटाल मोमोट पेयसन्हेके वळि माकु एदूर मत्ताहाटीं साइप्रस दीबेता वळि वायवा बाजुनाल पेयसतोम.

5 मर्रा मोमोट किलिकिया आनि पंपुलिया एरिया दग्गेटा समुद्रम दाटसि, लुकिया एरियाता मूरा इनना सहरतगा रेयतोम.

6 अगा सिंकंदरिया सहरताल इटलि एरियाक होनालय डोंगा तयार मत्ता. माकुन ओयना दरोगाल अद डोंगाते उपिस्तोर.

7 वळि माक एदूर मत्ताहाटीं, मेल्लगा-मेल्लगा बच्चंगो रोजकुनदाका वेल्ले कस्टमते कनिदुस सहरकु दग्गेरा एवतोम. एदूर वळि माकुन मुन्ने होना हियुवाहाटीं, मोमोट क्रेति दीबेता ओइडू साटने, सलमोने इनना जेगा पक्का पीसि दाटतोम.

8 अदुन दाटसि, समुद्रमता ओइडुनाल वेल्ले तकलिपेन डोंगातुन मुन्नेळ्क जर्पुसिके, डोंगा नित्तना बेसता जेगा, इनना जेगातगा एवतोम. अगटाल लसया सहर दग्गेरेने मत्ता.

9 पय्नेमते वेल्ले रोजकु आसि ओक्कापोदुदुना रोजगुडा[†] पेय्सि होत्ता. वातावरनम कराब मत्ताहाटीं डोंगातुन मुन्ने ओयालयगुडा वें मत्ता. अदुनहाटीं,

10 “दादालोरिता! मनम इगोटाल पेयसते वेल्ले तकलिप आंता इंचि नाकु अनपिच्चेक मंता. डोंगा आनि अबुने मत्ता सामानयते मुळ्यगारे गानि मना जीवां इंका होना परांता,” इंचि पौलुस डोंगाते मत्तोर्कुन इत्तोर.

11 गानि पौलुसुना पोल्लेतुन दरोगाल केंजाका, डोंगा ताकिचनोर आनि डोंगा मालकुना पोल्लेतुन एक्को विस्वासम कीतोर.

* 27:1 अगस्तुस ईर वरोर पेदुदा राजल मत्तोर, ओना पोरोलतेन दलमता पोरोल वाता. † 27:2 कुलुसि 4:10; फिलेमोन 1:24 † 27:9 ओक्कापोदुदुना रोज इद रोजने पेदुदा पर्नाल एडादिक उदि मल्का गुळिते होंचि ओनाहाटीं आनि अंतोरा पापाल्कंक मापि दोर्कनाहाटीं मोक्क हिंयूर. अद कालमते एते पय्नेमताहाटीं वातावरनम कराब मंता.

12 अद जेगा पीनि कालमते (इग्गमते) मनालय बेस मनाहिल्ले, अदुनहेके वेलेलेटुर लोकुकक, “बचचोन बिराना आया परते अचचोन बिराना क्रेति दीबिता पिनिक्स सहरतगा होंचि आगते बेस मंता,” इंचि इत्तुर. बारित्ते पिनिक्स सहरतगा डोंगां आगना उंदि जेगा इल्हा मंता: दक्खिन-पस्चिम आनि उत्तर-पस्चिमता हेंदाल होळिया वांता. पीनि कालमते अद जेगाते वळि दल्गो.

समुद्रमते तुपान तेदमळ

13 पजा दक्खिन बाजुनाल वळि मेल्लगा-मेल्लगा वासेके मत्तयते ओर इंदके मनम पिनिक्स सहरते एव्वा परांतोम इंचि इनकुत्तुर. अस्के ओर अगटाल लंगरः तेहकुंचि क्रेति दीबिता ओइडु साटने डोंगातुन होना हीतुर.

14 गानि गळसेम मत्तारित्ते दीबिता हेंदाल उंदि पेद्दा वळि दुमारम तेदता. दानु उत्तर-पूर्वी तुपान इंतुर.

15 मोमोट मत्ता डोंगा तुपान लोपो दोर्कता. आ तुपानता वळि एदुर मत्ताहाटी डोंगा मुन्नेळक होना पराहिल्ले. अस्के मोमोट वळि दोब्बुतेके डोंगा होन्किंकांटी इंचि दान अल्हेने होळसीतोम.

16 अल्हा मोमोट कौदा इनना सिन्ना दीबि साटने होननेके, डोंगाता पज्जो दोहचि इग्गिसि ओयना पडवनऽ वेलेन तकलिपने डोंगापोर्रां एक्किस्तोम.

17 पडवां पोर्रा एक्किस्तारित्ते, डोंगाते कबळ कियानोर बचचुंगो उपायालक कीसि डोंगातुन नोंडेने, सुट्टु इग्गिसि दोहहुर. सुरतिस इनना उस्के जेगाते डोंगा दिगाबडार इंचि आ वेंरेकु डोंगाता परदातुन रेहिचि, डोंगातुन वळिते होळसीतुर.

18 अस्के इंकुंदि रोजु वळि दुमारमते पक्का तकलिप आताहेंके ओर माल पोहचियालय दल्गुतुर.

19 मूडो रोजुने डोंगाता कबळक ओज्जना सामानगुडा ओरा कय्कुनेन पोहचीतुर.

20 पजा वेलेनेने रोजकु माकु पोळ्ळु, सुक्कां दिसा हिल्लें. तुपानते पक्का वळि वायुंदु, मोमोट पिस्सोम इंचि आसे होळसतोम.

21 वेलेने रोजकुनाल बोरे बतल तिना हिल्लुर. अस्के पौलुस ओरा नड्डुम नित्तिसि इल्हा इत्तोर. दादालोरिता! नावा पोल्लें कैजसि क्रेति दीबिताल पेयसका मंचि मत्ते, मनाकु ई तिप्पल वायाकोनवड, नुक्सानगुडा आयाकोनवड.

22 अल्हा आथिनागानि मीकु विनंति कीतन, मिमेट दैरेनेम इर्राट. मीवा लोप्पोटाल बोनेद जीवा होन्ने गानि डोंगाता मात्रम नुक्सान आंता.

23-24 बारित्ते, बद अयते नावा पेन, नना अदे पेनदा सेवा कीतन दाना द्दा निन्ने नर्का वासि, “पौलुस निमे वेरियमा, नीकु कैसर राजाना मुन्ने तपकौटा नित्तना मंता, हळा! नीतोनि डोंगाते मत्तुर अंतोर्कुनगुडा पेन पिसागोटता,” इंचि इत्ता.

25 अदुनहाटी दादालोरिता! दैरेनेम इर्राट. पेन नाकु बल्हा वेहता अल्हेने आया, इंचि नाकु विस्वासम मंता.

26 गानि बल्हा अयन मनम बदनना दीबितागु उस्केते होंचि हिरकंतोम, इंचि इत्तोर.

27 पडनालुं रोजकु आथिना, मोमोट अद्रिया समुद्रमता एते हीके-हेके वळिक तिरियसेक मत्तोम. तिरियसेक मननेके नळजाम नर्काटा वेलाकु मनम बदनना ओइडुंक एवतोम बोरे इत्ताप डोंगा ताकसानोर्कुंक अनपिस्ता.

28 ओर समुद्रमता लोतु कहतुर अयते अगा न्टा इर्रवै प्टकु मत्ता. इंका इचचुर लक्कु होत्ता पजा मर्रा कहतुर अयते अस्के टोबै प्टकु मत्ता.

29 अस्के, बंडाना लोपो डोंगा हिरकार बोरे इंचि वेरियसि, ओर डोंगाता पज्जोटा बाजुंक नालुं लंगकुं वाटसि बस्के पंगांता इंचि हळसेक मत्तुर.

30 डोंगा ताकसानोर्कु अगटाल वित्ताना मत्ताहाटी, “डोंगाता मुन्नेटा बाजुंक लंगकुं वाटंतोम,” इंचि बोकिचि पडवां रेहतुर.

31 अस्के पौलुस, “इर्रगिता डोंगाते मनाकोटे मिमेट इंका पीस्सिर,” इंचि सिपाइल्लुकुना अदिकारिन आनि सिपाइल्लुकुन इत्तोर.

32 अस्के सिपाइल्लुक, पडवां दोहता नोंडेने नेमाहचि पडवन एते अरहतुर.

33 पंगायना वेलाते पौलुस अंतोर्कुन गाटो तिननाहाटी विनंति कीसि इल्हा इत्तोर, “तुपान मंगंता इंचि मिमेट एदुर हळ-हळसि, इय्यळक पडनालुं रोजकु आसंता. उपासम मंतिर, बतले तिना हिल्लिर.

34 अदुनहाटी मिमेट गाटो तिंदु इंचि विनंति कीसेक मंतन. तित्तने मिमेट जीवाते मनांतिर. मीवा लोप्पोटाल वरोनदगुडा तल्लाता उंदि केल्लदगुडा नुक्सान आयो,” इंचि इत्तोर.

35 अल्हा वेहिचि, अंतोरा मुन्ने ओर हारि पीतोर. पेनदुक दन्यवाद कीसि, हारितुन तुकडां कीसि तिनालय दल्गुतोर.

36 ओन हळसि, अंतोर्क हिम्मत वाता, ओरगुडा तिनालय दल्गुतुर.

‡ 27:13 लंगर डोंगा आगतगा बेके जर्जकोटा मनालय आनि पय्नेम कियनेके मेल्लगा-मेल्लगा ताकालय कचिचद उंदि कौका मंता दाने लंगर इंतुर.

§ 27:16 इग्गिसि ओयना पडवन वेलेलेटुर उदसि होनानद पेद्दा डोंगा मत्ता, डोंगा मुळगानयते पलाते पेयालय पडवा मनुंदु, अद पडवा डोंगाता पज्जो दोहचि मनुंदु.

37 डोंगाते मोमोट अंटोरम रौडु नुहकुना डेब्बै हास्र (276) मंदि मल्लोम.

38 ओर पीरनिडा गाटो तिल्लारित्ते, डोंगाते मल्लव गोहकुन समुद्रमते पोहचि डोंगातुन अल्लकगा कीतुर.

डोंगा पय्यळ

39 पंगातारित्ते ओर्कु समुद्रमता ओड्डु दिसता, गानि अद बद देसेम इचि एरपाट किया हिल्लुर. कुरदुरते डोंगातुन इदे ओड्डुंक दल्लिच्चि इरकोम इचि विचारम कीतुर.

40 ओर लंगर्कुना नोडें नेमाहचि, अवन समुद्रमते होळसि, अस्केने पतवारकुंक* दोहाचि मल्ला नोडेंगुडा ओदोल कीतुर. ओदोल कीसि डोंगातुन वळि मुन्नेळ्ळ अयि इचि परदां एक्किचि डोंगातुन ओड्डुनहेके ओयालय दल्लुतुर.

41 गानि बगा अयते रौड समुद्राल्ळ कलियंतां, असोटा जेगातगा डोंगा होत्ता. अगा डोंगाता मुन्नेटा बाजु उस्केकु दल्लिसि, मुन्नेळ्ळ जर्गाकोटा दिगाबळता. पज्जोटा बाजु बारे जोरते वायाना तडां दल्लिसि डोंगा पय्यालय आता.

42 अस्के कैदिल्लु बोरे ईतारिं वित्ता मन्नि इचि सिपाइल्ळ ओर्कुन हळ्वना विचारम कीतुर.

43 गानि दरोगांक पौलसुन पीसागोटनद मल्ला, अदुनहाटी ओरा पिलानतुन आपिसि ओर्कु इल्ला आदेस हीतोर, “बोर्क अयते ईता वांता, ओर मुन्नेने डेयसि ओड्डुंक पेयसट.

44 कळमत्तोर बारे बल्लां आनि डोंगाता उरंमता तुकडनपोरौ उदुदिस पेयसट,” इचि इत्तोर. इल्ला बोर्क बतल आयाकोटा अंटोर ओड्डुंक पेयसटुर.

28

माल्टा दीबेते पौलसु

1 इल्ला मोमोट ओड्डुंक पेयसतारित्ते, अद माल्टा इनना दीबे इचि माकु तेळियता.

2 आ दीबेते मनना लोकुल्ळ मावा पोरौ वेल्ले दया हुपिस्तुर. पिर्कु, इरगा पीनि मल्लाहेंके, तडमि माससि माकुन बेस दगोरा केयकुत्तुर.

3 पौलसु जमा कीता कट्टेना हेरकितुन तडमिते वाटसेके मल्लोर. अस्के उंदि नय तरासु तळमि सेकाकु हेरकिताल पेय्सि ओना कयदुक हुटकुत्ता.

4 तरासु कयदुक वेल्लाड अरसि मल्लद हळसि दीबेता लोकुल्ळ बरौक-वरोर इल्ला इत्तुर, “निजमे, ईर तप्पाकोटा बोनो गानि हळ्वतोर. ईर समुद्रमताल अयते पिस्सि पेयसतोर गानि न्यायम मात्रम ईन पिस्सा हियानाल हिल्ले,” इचि इत्तुर.

5 गानि पौलसु आ तरासुन तळमितेन दुल्पिसि वाटतोर. ओन्कुगुडा बतल आयाहिल्ले.

6 ओना मंदुल तोयार हिलाकोटे ओर उंदे मल्ला हिळ्ळ अरसि हायानुर इचि लोकुल्ळ हळ्वसेक मल्लुर. वेल्लेनजेम आयिनागानि ओन्क बतले आयाहिल्ले. अस्के ओरा मनसु मार्सकुंचि, “ईर अयते बदो पेन आंदुर,” इचि इत्तुर.

7 आ दीबेता पेदुदा अदिकारि पबलियसु इनानोना बूमि दगैरेने मल्लां. ओर माकुन केय्सि ओसि मूड रोजकुनदाका हेडमितोर्कुन हळ्वकुत्ताप बेस हळ्वकुत्तोर.

8 पबलियसुना बानकु एडकि वासेके मल्ला. अल्लेने नेत्तुर बयलि दोस्सि, कटुलते मीडिसि मल्लोर. पौलसु ओनगा लोप्पो होचि पारतना कीसि, ओनपोरौ कय इरसि बेस कीतोर.

9 अल्ला आतद हळसि आ दीबेते बिमार अरिं मल्ला कळमतोरगुडा अगा वासि बेस आतुर.

10 ओर माकुन वेल्ले कदर कीतुर. मोमोट अगटाल पेयसनेके माकु बतल-बतल गावाले मल्ला अवन्नि डोंगाते तच्चि इरतुर.

पौलसु माल्टा दीबेताल रोम सहरताहैके होनमळ

11 मूड नेल्ळ आतारित्ते सिक्ंदरिया सहरताल वाता डोंगाते मोमोट पेयसतोम. आ डोंगा पीनि कालम पेयसनदाका माल्टा दीबेताम आगसि मल्ला. डोंगाता मुन्नेटा बाजुंक एमडाल्लुकुना पेनकुना बोमाम्मा रेहचि मल्ला.

12 मोमोट सरकुस सहरते एय्सि, अगा मूड रोजकु मल्लोम.

13 अगटाल मोमोट तिरियसि रेगियुम सहरते एवतोम. इंकुंदि रोजु दक्खिन बाजुनाल वळि तेदता. अस्के मर्रा उंदि रोजु अगटाल पेय्सि पुतियुलि सहरते वातोम.

14 अगा माकु इच्चुर विस्वासुल्ळ कलियतुर. ओर माकुन ओरतोनि एडु रोजकु मंटु इचि इत्तुर. इल्ला मोमोट रोम सहरते एवतोम.

* 27:40 पतवार डोंगा ताक्केक मनानेके दान हीके-हेके तिराहनाहाटी स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळ्ळ एते मनंता.

15 बस्के अयेते रोम सहरता विस्वास्कुंक मोमोट वासेक इंचि तेळियता, अस्के ओर माकु कलियालय अप्पियुस हाट्टमदाका वातुर. इका आगाना मूड जेगा इनना नारदाका वातुर. ओर्कुन हळसि, पौलुस पेनदुक दन्यवाद कीतोर, ओना दैरनेम बेरस्ता.

16 मोमोट रोम एवतारित्ते वरोर सिपाइना पहारते पौलुसुक मनालय अलग उंदि लोन दोर्कता.

पौलुस रोम सहरता यहदिल्कुंक कलियंतोर

17 मूड रोजकु आता पजा पौलुस अगाटा यहदि पेद्रुदाल्कन केयतोर. ओर उंदगा जमा आतारित्ते पौलुस ओरतोनि इल्हा वळकालय दलगुतोर, “दादालोरिता, मना लोकुल्कुन आयि मना एनकटा पेद्रुदाल्कुना रीति-रिवाजकुन आयि नना बतले किया हिल्लेन गानि नाकुन येस्सलेमते रोम लोकुल्कुना कय्दे यहदिल्कु पीसि हीतुर.

18 रोमि अदिकारिल्क नावा चौकसि कीतारित्ते नाहेके हामुर सिक्सातसोंटा बतले तप्पु मनाहिल्ले. अदुनहाटी ओर नाकुन होळसीतोम इत्तुर.

19 गानि, ‘ईन होळसियामन्नि’ इंचि यहदिल्क इत्तुर. अदुनहाटी, ‘कैसर राजानगा नावा न्यायम आयागोम,’ इंचि नना विनिति कीतन, अचोने. इगे नना नावा लोकुल्कुनपोरो दोसेम दोसालय वाया हिल्लेन.

20 इं पोल्लेन मीतोनि कलियसि वळकालय मीकुन केयतन. वरोर वायाना मंतोर इत्ता आसेते, इम्प्राएल लोकुल्क बोनद एदुर हळसेक मत्तुर, ओर वातोर इंचि नना विस्वासम कीताहाटीगे नाक बेडी अरतां,” इंचि पौलुस इत्तोर.

21 अस्के यहदि पेद्रुदाल्क पौलुसुन इल्हा इत्तुर, “नीवा बारेमते यहदिया एरियाताल बतले सिट्टि दोर्काहिल्ले. अगटाल वायाना दादालोरगुडा नीवा बारेमते बतल वेहा हिल्लुर, नीवा बारेमते बदे कराब पोल्लेगुडा इना हिल्लुर.

22 गानि अन्नि जेगाने नासरेत पारिटितोर विरोदतेन वळकानद माकु एर्का मंता. अथना नीवा विचारम बतल मंता, इद मोमोट नीवाहेंदाले केंजंतोम,” इंचि इत्तुर.

23 अस्के ओनतोनि कलियालय उंदि रोजु पक्का कीतुर. पक्का कीता रोजुने ओर आगसि मत्ता लोतगा यहदिल्कु वेल्लेटुर जमा आतुर. पौलुस हक्केटाल अयेते पोळ्द होननदाका पेनदा राज्येम बारेमते ओर्कु गवाइ वेहतोर. अल्हेने मूसाना नियमताल आनि पेनदा कबुरतोर रासता पुस्तकाल्कुनाल येसुना बारेमते ओर्कु तेळियागोट्टिसि वेहतोर.

24 ओर वेहता पोल्ले इच्चुर्कु नच्चुतां, इच्चुर्कु नच्चुवा ओर विस्वासम किया हिल्लुर.

25 पजा ओरद-ओर्के वरोन पोल्ले वरोंक अर्रांका, अगटाल तेदसि होनालय आयानेके पौलुस इंकुदि पोल्ले इत्तोर, पवित्र आत्मा यसायाह इनना पेनदा कबुरतोनाहेंदाल, मीवा एनकटा पेद्रुदाल्कुनतोनि वेहता पोल्ले निजमे आंद, अद इल्हा मंता:

26 “निमे लोकुल्कुनगा होंचि इल्हा वेहा,

मिमेट बस्केळ्ळक केंजसेके मनंतिर, गानि अर्तम कीकुन्निर.

मिमेट बस्केळ्ळक हळसेक मनंतिर, गानि एरपाट किथ्यिर.

27 बारित्ते ई लोकुल्कुना मनसु गट्टिगा आता,

ओर केळ्कुने तक्को केंजांतुर, ओर ओरा कळ्ळक मुच्चुत्तुर.

अल्हा कियाकोटे ओर कळ्कुने हळसि मन्नेर,

केळ्कुने केंजसि मन्नेर, मनसुने एरपाट कीसि मन्नेर,

नावाहेके तिरियसि मन्नेर, नना ओर्कुन बेस कीसि मन्नेर.”*

28 अदुनहाटी, मुक्ति हियना कबुरतुन पेन वेरे जातितोरगा लोहता. ओर अदुन केंजंतुर, इंचि मिमेट एरपाट कियगोम.

29 पौलुस इव पोल्ले इत्तारित्ते यहदिल्कु वरोंकु वरोर वरगेयसेके अगटाल पेय्छि होत्तुर.

30 अगा किरायता लोते पौलुस पूरा रोंड वर्सनदाका मत्तोर. बोर कलियालय वायिनागानि ओर्कुन बेस हळंदुर.

31 वेरियाकोटा, आगाकोटा पेनदा राज्येम बारेमते वेहंदुर, येसु किरिस्तुना बारेमते कराहंदुर.

रोम रोमि विस्वासुल्कुनाहाटीं पौलसना सिट्टि

इद सिट्टिता बारेमते गिचचो परिचयम

रासतोना पोरोलः पौलस

रासता कालमः इसवि सन 58

पौलस इद सिट्टि रासाका मुन्ने रोम सहरते होना हिल्लोर. अदुनहाटी इद सिट्टि रासि अगाटा विस्वासुल्कुं ओर ओना सतता परिचयम वेहचंतोर. अयना अगाटा विस्वासुल्कुनाल इच्चुर विस्वासुल्क ओन्क एरपाट मत्तुर. अयते पौलसुं ओरगा होंचि कोन्नि रोजकु ओरतोनि मंचि, ओर्क येसु किरिस्तुना बारेमता बेसता कबुर वेहचि पजा अगटाल इसपानिया इनना देसेम होना पिलान मत्ता.

दुनियाते मनना अन्नि जातिना लोकुल्क उंदचचोने पापम कीसि मंतुर. पेनदा मुन्ने निलतना इत्ते अंतोरगुडा नीतिमंतुल्क आयापीता, अस्केन पेनदा मुन्ने नित्ता परांतुर. बोर अयते येसु किरिस्तुनपोरों विस्वासम ईरंतुर पेन ओर्कुन नीतिमंतुल्क कीसि, पूना पिस्वर हीता. बचचोन तकलिष्क-कस्टालक वायिनागानि ओपेके पीसि मनालय येसु किरिस्तु ओना पवित्र आत्माहेंदाल ताकत हीतोर.

इद सिट्टिता आकिर-आकिरते, मना पिस्वर पेनदा सेवाहाटीगे मंदना, विस्वासुल्क अंतोर पावरमते बेस कलियसि मंदना, मना दंटाता विस्वासुल्क हरिं तप्सि होनाकोटा ओर्कुन बेस ह्ळकुनना. इल्हा अंतोर विस्वासुल्क कलियसि पिस्ते वेल्लेन सांति-समादानम दोर्कता. इसोंटा पोल्ले पौलस रासतोर.

बगा बतल मंता

परिचयम आनि मुख्य उद्देसम 1:1-17

यहदिर्क, यहदि आयवोर्क इव्वुर्कगुडा मुक्ति अवसरमे 1:18-3:20

यहदिर्क, यहदि आयवोर्क इव्वुराहाटी पेनदा मुक्तिता हरिं 3:21-4:25

किरिस्तुना लोप्पो पूना पिस्वर 5:1-8:39

पेनदा पिलानते इस्राएल लोकुल्क 9:1-11:36

किरिस्तुन विस्वासम कीतोर बल्हा पिसगोम 12:1-15:13

मुन्नेटाहाटी पिलानकु आनि जोहार 15:14-16:27

पौलस रोमि विस्वासुल्कुं सतता परिचयम कीतोर

1 नना पौलस, येसु किरिस्तुना दासुन* आंदुन. नना मीकु इद सिट्टि रासेक मंतन. येसु किरिस्तुना कबाहक क्रियालय पेन नाकुन प्रेरित† इंचि पेरता. पेरसि दाना बेसता कबुर वेहालय लोहता.

2 पेनबाबाल हीतन इत्ता इदे बेसता कबुरता बारेमते पेनदा कबुरतोर मुन्नेने पवित्र दर्मसास्त्रमते रासि इरतुर.

3 इद बेसता कबुर, मनकना रूपमते पुटसि वाता पेनदा मरिना बारेमते मंता. ओर दाविद राजाना वंसंमते पुटतोर.

4 गानि मना सामि येसु किरिस्ते पेनदा मरिं आंदुर इंचि हृप्सालय पेन दाना पवित्र आत्माता ताकतहेंदाल ओन हातोर लोपोटाल मर्रा जीवाते तेहता.

5 अंतोर लोकुल्क ओन विस्वासम क्रियना, ओर वेहताप ताकना इंचि पेन नावापोरों कुर्पा हुपिच्चि नाकुन येसुनहेंदाल प्रेरित इंचि निलाहता.

6 येसु किरिस्तुना लोकुल्क आयनाहाटीं केयतोरव्ते मिमेटगुडा मंतरि.

7 रोम सहरते मनना मीकु अंतोर्क ई सिट्टि रासि नना बतल वेहासेक इत्ते, पेनदुक मिमेट इत्ते वेल्लेन पावरम. इंका अद मीकुन दाना पवित्र लोकुल्क आयालय केयता. मना पेनबाबाल आनि येसु किरिस्तु सामिनहेंदाल मीकु कुर्पा, सांति दोर्किं.

पौलस पेनदुक पारतना कीतोर

8 मोदाला नना मीकु वेहानद बतल इत्ते, मीवा विस्वासम बारेमते पूरा दुनियाक तेळियसि होल्ता. इदुन मति कीसेक मीवा अंतोराहाटीं येसु किरिस्तुनहेंदाल पेनदुक दन्यवाद कीतन.

9 पेनदा मरिना बारेमता बेसता कबुरतुन वेहासेक, नावा पूरा मनसुनाल नना पेनदा सेवा कीसेक मंतन.

* 1:1 दासु इन्कु क्लि, बृति, वेला बतल मन्ने, बस्केळ्क मालकुना सेवा कीसेके मनांतोर. † 1:1 प्रेरित इचुर्कुन पेरसि किरिस्तुना बारेमते वेहालय लोहचीतोकुंन प्रेरितुल्क इचि इंतुर.

10 नना पारतना कियानस्के बस्केळक मीकून मति कीतन. दीनकु आ पेने गवाइ मंता. पेनदा इच्छा मत्ते, ई मल्का अयना मिहगा वायना हारिं दोर्कि इंचि इल्हागुडा नना पेनदुक पारतना कीसिक मंतन.

11 सामिनाहेंदाल नाकु दोर्कता आत्माता वरालकुन मीतोनि पंचकुनना इंचि नावा इच्छा मंता. दीनहेंदाल मिमेट पेनदा बकित्ते गट्टिगा बेसिक्रि, अदुनहाटी नना मिहगा वायालय हळसतन.

12 इत्ते, मीकु-नाकु मनालोपो मत्ता विस्वासमताहेंदाल मनम वरोंक-वरोर प्रोत्साहन कीकुनना इंचि नावा मनसु मंता.

13 विस्वासलकुनिटा! नना मीकु वेहानद बतल इत्ते, यहदि आयवा लोकलकुंक बेसता कबुर वेहिचे ओर्क सहायम कीतन, अस्के ओर ओरा विस्वासमता पिस्वरते बेस बेसितूर. अल्हेन मिमेटगुडा मीवा विस्वासमता पिस्वरते बेस बेसना इंचि नना ऊके-ऊके मिहगा वायालय हळदुन, गानि इदवेरादाका बतलनना-बतल अड्डम वासेक मत्ता, इद पोल्ले मीकु तेळियना इंचि नना वेहासेके मंतन.

14 युनानि बासा, युनानि रीति-रिवाजकु तेळियतोर, तेळियवोर लोकलकुंक आनि करियतोरक, करियवोर्क इल्हा अटोर्के पेनदा पोल्ले वेहना जिम्मेदारि नावा पोरिन मंता.

15 अदुनहाटी रोम सहरते मनना मीकगुडा नना बेसता कबुर वेहालय तयार मंतन.

16 विस्वासम कियना अटोर्कुंक, इत्ते मुन्ने यहदिलकुंक पजा युनानि लोकलकुंक मुक्ति हियालय ई बेसता कबुरते पेनदा ताकत मंता. अदुनहाटी नना पेनदा बेसता कबुर वेहालय सिग्गु अर्रीन.

17 बारित्ते पेनदा मुन्ने मनकल नीतिमंतुड बल्हा आंतोर इत्ता पोल्ले बेसता कबुर मनाकु वेहंता. सुस्वनाल आकिरदाका विस्वासमतेन इद आया परंता. “नीतिमंतुलक विस्वासमतोनि पिस्संतूर,” इंचि दर्मसास्त्रमते रासि मंता.

अंतोर पापम कीतोर आंदुर

18 बेसता कबुर अंतोर लोकलकुंक एविचचना अक्सरम बारि मंता इत्ते, सत्तेम हर्दे ताकवा लोकलक कराब कबाहक कीसि सत्तेमतन दबांचि इरतूर. निजम पेन हिल्ले इत्ताप ताकसि, तपुड कबाहक कीतूर. अदुनहाटी पेन ओरपोरों स्वर्गमताल दाना होंगुन हुप्संता.

19 निजमाता पेन दाना गुनालकुन अंतोर लोकलकुना मुन्ने हुपिस्ताहाटी इव अनि पोल्ले ओर्क एर्के मंतां.

20 बल्हा इत्ते, इद दुनिया पुटत्सकेटाल पेन तयार कीता दुनियातुन हळते, दाना बस्केने दिसुवा गुनम, बस्केळक मनना ताकत मनाकु दिसंता. अदुनहाटी पेनदुन एरपाट किय्योम इंचि मनकालोर इना पसर.

21 ओर पेनदुन अयते एरपाट कीतूर, गानि पेनदुन बल्हा अयते तलसकुनागोम अल्हा तलसकुनुनर इंका दाना कदरगुडा किय्यूर. अल्हा किय्यका ओर अट्टि विचारालक कीसि ओरा मनसुने हीकटा कीकुलतूर.

22 “मोमोट तेल्विगल्लोरम,” इंचि वेहकुंचि ओर बुदिद हिल्वोरलेसी आतूर.

23 बस्केळक नासडेम आयाकोंटा मंदना महिमागल्ला पेनदुन ओर मोळकका, दाना जेगाते नासडेम आयना मनकानव, पिट्टेनव, जिवरासिनव आनि तरासुनलेहका बेंगना जिवरासिना बोम्मां कीसि मोळकालय दलग्ता.

24 अदुनहाटी ओरा मनसुने मत्ता बोगम विचारालकुन पूरा कीकुनालय पेन ओर्कुन होळसीता. अस्के ओर वरोना मेंदुल वरोंक कदर हिलाकोंटा बोगमतनालक कीतूर.

25 पेनदा बारेमता सत्तेम पोल्ले आबदुतम आंद, इल्हा इन्कुंचि ओर्कुन तयार कीता पेनदुन मोळकका, अद तयार कीतवुन पेन इंचि मोळकालय दलग्ता. गानि अबुन तयार कीता पेने बस्केळताहाटी तलसकुननालायक मंता, आमीन.

26 अदुनहाटी पेन ओर्कुन ओरा मनसुंक वाता सिग्गु हिल्ला कबाहक कियालय होळसीता. अस्के मुर्ताहक मुय्दुरतोनि मीडानद होळसि, मुर्ताहकुनतोनि मुर्ताहके मीडसि बस्केने ओप्वा कबाहक कियालय दलग्ता.

27 अल्हेने मांडसागुडा ओरा मुत्तोहकुनतोनि मीडानद होळसि, मांडसातोनि मांडसा मुत्तो-मुय्दोनेलेहका मीडसि बोगमतनम कियालय दलग्ता. इसोंटा बोगमतनम कीताहाटी ओर्क ओरा पिस्वरते रोगालक-तकलिप वासि सिक्सागुडा दोर्कता.

28 पेनदा सत्तेमता पोल्लेतुन ओर एरपाट कियालय हळा हिल्लूर. अयते ओर बद कबळ कियमळ बेस आयो, अदे कबळ कियालय पेन ओर्कुन होळसीता.

29 ओरा लोपो अनि तीरकुना कराब कबाहक, पगा, आसि, सीडातनम निडिस होता. चुगली कियमळ, कळक पोतमळ, हळकमळ, जगडालक कियमळ, विरोद कियमळ, नळेह कियमळ इसोंटा गुनम निडिस ओर इंकावरोना बारेमते कराब विचारम कियानोर आतूर.

30 इंकावरोन तेंडसि पोहानोर, पेनदुन हय्सवोर, गर्रा कियानोर, पोंगुळ वळकानोर, कराब पोल्ले पुट्टिचचनोर, तल्लूर-बाबोना पोल्ले केंजवोर;

31 बुदिद हिल्वोर, हीता पोल्लेपोरों ताकवोर, जीवा नोयवोर, दया हिल्वोर आतूर.

32 इसौंटा मनकालोर्कुंक पेनदाहेंदाल हामुरता सिक्सा तप्पो इंचि ओर्क एरपाट मंचिगुडा ओर इल्हे ताकंतुर. अचोने आयका अल्हा ताकानोर्कुन “बेस ताकसेक मंतिट,” इंचि मेचकुंतुर.

2

मिमेटगुडा पापि लोकुल्लक आंदिर

1 अरे तप्पु दोसना लोकुरिटा, मिमेट बोरन्ना आम्ट! मिमेटगुडा अदे तप्पु कियानोर आंदिर. अदुनहाटी इंकवरोन पोरोँ मिमेट तप्पु दोसमट. इल्हा वैरेतोरपोरोँ तप्पु दोस्सि, मीवद मिमेटे “दोसिक” इंचि हपिचकुतिर. दानहाटी वैरेतोरपोरोँ तप्पु दोस्सि मिमेट तपिचकुना परिर.

2 इसौंटा तप्पु कबाहक कियानोरद पेन सत्तेमते न्यायम कीसि, ओर्क दगता सिक्सा हीता, इंचि मनाकु एरपाटे.

3 अयते मिमेटे वेहाट! बव कबाहकुनहेंका मिमेट वैरेतोरपोरोँ तप्पु दोस्सतिरो, अवे कबाहक मिमेट कीसि, पेनदा सिक्साताल तपिचकुंतोम इन्कुंचतिरा?

4 हिलाकोटे दाना दया, ओपेके आनि मापितुन गम्मत इन्कुंचतिरा? निजम बतले इत्ते, मिमेट मनसु मासकुनना इंचि पेने मीवापोरोँ दया हुपिस्ता, इद मीकु तेळियोना?

5 गानि गाट्टि मनसु, हेंडुतनमहेंका बस्केने मिमेट मनसु मासा हळिर. इल्हा कीसि मीवा सिक्सातुन मिमेटे बेरसागोटसंतिर. बस्के अयते पेन दाना होंगुन मीपोरोँ हुपिचि, मीकु सिक्सा हिच्यार अस्के लोकुल्लक दाना सत्तेमता न्यायमतुन हळानुर.

6 आ रोजुने पेन हरेक मनकना न्यायम ओर कीता कबाहकुन हळसि कीता.

7 बोर अयते बस्केळक बेसता कबाहक कीसेके, पेनदाहेंदाल कदर, दोसेम हिल्वा पिस्वरतुन दोर्किचकुनालय हळंतुरो पेन ओर्क बस्केळक पिस्सना पिस्वर हीता.

8 गानि बोर अयते सत्तेमते ताकाकोँटा तप्पुड कबाहक कीसेके सतताहाटी पिस्संतुर, ओरपोरोँ पेन होंग आसि सिक्सा हीता.

9 तप्पुड कबाहक कियना हरेक मनकंक तिप्पल्लक, दुक्काल्लक वांतां. अटे मोदाला यहुदिल्लकुंक, पजा युनानिर्कुंक.

10 गानि अवे रोजुकुने बेसता कबाहक कीसेके ताकानोर्कुंक पेदुदातनम, कदर, सांति दोर्कार. अटे मोदाला यहुदिल्लकुंक पजा युनानिर्कुंक.

11 बारित्ते पेन मोकम हळसि कबळ किय्यो.

12 मूसाना नियम एरपाट हिल्वोर पापम कीते, मूसाना नियम परकारम सिक्सा आयाकोन्ना गानि सिक्सा अयते तप्पो. बोर अयते मूसाना नियम एरपाट मंचि पापम कीतुर, ओर्क मूसाना नियम परकारमे सिक्सा आंता.

13 बारित्ते, सिराप मूसाना नियम केंजानोर पेनदा मुन्ने नीतिमंतुल्लक आयुर, गानि मूसाना नियम केंजसि दान परकारम ताकानोर पेनदा मुन्ने नीतिमंतुल्लक आंतुर.

14 यहुदि आयवोर्कुंक मूसाना नियम तेळियो. गानि ओक्कला ओरा मनसु मूसाना नियमते वेहताप मनानयते, ओर्क मूसाना नियम तेळियाकोन्ना गानि मूसाना नियम परकारम ताकतापे आंता.

15 मूसाना नियमकु ओरा मनसुने रासि मंतां इंचि ओर कियना कबाहके हुप्संतां. दीनकु ओरा पिस्वरगुडा गवाइ मंता. बारित्ते ओर तप्पुड कबळ कियनेके ओरा मनसे “इद तप्पु” इंचि दोसेम दोसंता. अल्हेने बेस कबळ कियनेके ओरा मनसे ओर्क “इद बेस” इंचि वेहंता.

16 नना वेहना बेसता कबुर परकारम, बोर्क तेळियाकोँटा मनकालोर्क कीता कबाहकुन पोरोँटाल, अद रोजुने पेन येसु किरिस्तुनाहेंदाल लोकुल्लकुना न्यायम किय्यार.

यहुदिल्लक आनि ओरा नियम

17 अयते इंदके मीवद मिमेट, “मोमोत यहुदिल्लक” इंचि वेहकुतिर, मूसाना नियमपोरोँ विस्वासम ईरतिर, “मोमोत पेनदुक वेल्ले दगेटोर्कुम” इंचि पेदुदातनम वेहकुतिर,

18 मिमेट मूसाना नियम करियसि मंतिर इंचि पेनदा इच्चा बल्हा मंता आनि बेस हारि बद्दु इंचि मीकु तेळियोता.

19 मिमेट इल्हा इतिर गदा, “गुडिङ्कुनलेसी मनानोर्कुंक हारि हुप्संतोम, हीकटा पिस्वर पिसानोर्कुंक वेल्गुनलेसी मंनंतोम.”

20 मूसाना नियमते रासि मत्ता पोल्लेंगे सत्तेम आनि तेल्चि हियानव इंचि मीकु तेळियोताहाटी, “मुर्कालोर्कुंक बुदिद वेहानोरम, पिलाल्लकुंक कराहनोरम,” इंचि मिमेट इनकुतिर.

21 अयते मरि वैरेतोर्कुंक कराहना पोल्लें मीवद मिमेटे बारि कराहकुनिट? “दोगातनम कियमट” इंचि कराहचि मिमेटे दोगातनम कीतिर.

22 बोगमतनम कियामन्नि इंचि कराहचि, मिमेटे बोगमतनम कीतिर. बोम्मांक मोळ्ळाक मन्नि इंचि कराहंतिर, गुळिते होंचि दोसकुंतिर.

23 महगा मूसाना नियम मंता इंचि पेद्रु दातनम वेहकुंतिर गानि नियमते ताकका पेनदा कदरगुडा किच्यिर.

24 “मीवा इस्रोटा कबाहकुनहेंका यहुदि आयवोरा नड्डुम पेनदा अपमानम आंता,”* इंचि दर्मसास्त्रमते रासिगुडा मंता.

25 मिमेटे मूसाना नियम परकारम ताकानय्ते, कतना* कीतद मीकु पाय्दा आंता. गानि मिमेटेगिटा मूसाना नियम परकारम ताकाकोटे मिमेटे कतना कीसिगुडा बतल पाय्दा हिल्ले.

26 बोरेन्ना कतना कियवोर गिटा मूसाना नियम परकारम ताकते, ओर कतना कियाकोन्नागानि पेनदा नदरते कतना कीतोना लेककतेन वांतोर.

27 मूसाना नियम मिहगा मंचि दाना परकारम कतना आसिगुडा मिमेटे नियम परकारम ताकसेक हिल्लिर. अदुनहाटीं बोरेद अय्ते कतना आयाहिल्ले, यहुदि आयवोर, मूसाना नियम मत्ताप ताकानोर मीपोरें दोसेम दोस्सनु.

28 सिराप यहुदि जातिते पुटतोर, पलाताल कतना आतोर ईर निजम यहुदि मनकालोर आय्थर.

29 बोरे अय्ते पेनदा इच्चा मत्ताप ताकंतुर ओरे निजम यहुदिल्क आंदुर. मूसाना नियम परकारम पलाताल आतदे कतना आयो, गानि पेनदा आत्माहेंदाल मनसु मारियता मनकालोरे निजम कतना आता यहुदिल्क आंदुर. इसंटा मनकालोर लोकुकुन्ना कदरतुन आयो गानि पेनदा कदरतुन पहकंतुर.

3

हीता पोल्लेताल पेन पजोळ्ळक होन्ने

1 इड केंजसि, “अय्ते यहुदि आसि बतले पायदा हिल्लेना? कतनाकु इच्चोगुडा विलवा हिल्लेना?” इंचि मिमेटे इनकुंतिर बोरे.

2 विलवा अय्ते वेल्लेने मंता. अद बल्हा इत्ते, पेन दाना पोल्लेन* मोट्टा मोदाला यहुदिल्कुंके हीता.

3 यहुदिल्कुना लोपो पेनदा पोल्ले केंजवोर इच्चुर मत्तुर. ओर अल्हा मत्तुर इंचि पेन विस्वासमतद आयो इनकुंचितिरा?

4 अल्हा आयापर्रें. लोकुल्क अंतोर आबददम वळकानोर आयिना, पेन मात्रम बस्केळ्ळक निजम मनंता. बारित्ते दर्मसास्त्रमते,

“निमे वळकते नीवा पोल्ले निजम इंचि दिस अरंता,

निमे न्यायम कियनेके नीवा पोल्ले गेल्संता,”

इंचि रासि मंता.*

5 मना तप्पुड कबाहकुन हळसि पेन बच्चोरो नीतिमंतुड इंचि एकां आंता. इल्हा आतास्के पेन मनाकु सिक्सा हीसि अन्यायम कीसंता इंचि मनम इनकुना परंतोम. (इद नना मनकना विचारम मत्ताप वळकसंतन.)

6 गानि अल्हा इनकुनमळ तप्पु आंद, अल्हा गिंटा पेन कीते, अद दुनियातोर नाययम बल्हा किच्यार?

7 अचोने आयका, “मावा तप्पुड कबाहकुनहेंदाल पेने सत्तेमतद इंचि तेळियसि दाना कदरगुडा वेल्लेन आसेके अय्ते, पेन माकुन पापिक बल्हा इना परंता?” इंचिगुडा इच्चुर लोकुल्क लोल्लि कीतुर.

8 इल्हा कियानोर, “पापम कीते बेस जर्गसेक गदा! अय्ते दट पापम कीकोम,” इंचिगुडा इंतुर. इंका इल्हा मोमोटे कराहतोम इंचि इच्चुर लोकुल्क मापोरें दोसेमगुडा दोसंतुर. गानि अल्हा कियानोर अंतोकुंक, पेन दाता सिक्सा हीता.

पापम हिलाकोटा बोरे हिल्लुर

9 सेरे! अय्ते मनम यहुदिल्कुम, यहुदि आयवोरकन्ना बेसतोर्कुमा? असले आयोम. बारित्ते यहुदिल्क आयिर, युनानिक आयिर. अंतोर पापम कीतोरे इंचि नना मीकु मुन्नेन वेहचि मत्तन.

10 दर्मसास्त्रमतेगुडा इदुना बोरेमते इल्हा रासि मंता गदा:

“बोरे नीतिमंतुड हिल्लोर, वरोरगुडा हिल्लोर.

11 निजम तेळियतोर बोरे हिल्लुर, वरोरगुडा हिल्लोर.

पेनदुन पहकानोर बोरे हिल्लुर.

12 अंतोर पेनदा निजम हरदाल तप्पि तप्पुड हर्दुक होत्तुर.

कबळक ओज्जनलायक बोरे हिल्लुर,

बेसता कबळ कियानोर बोरे हिल्लुर, वरोरगुडा हिल्लोर.*

* 2:24 यसायह 52:5 * 2:25 कतना यहुदि आनि मुसलमान लोकुकुनद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इसंटा रिवाज कीते पेनदातोनि करार कीताप इंचि ओर नम्तुर. * 3:2 पोल्ले मूसाना नियमते मनना अनि पोल्ले इत्ते दर्मसास्त्रमते मत्तव अनि पोल्ले. * 3:4 बजन सहिता 51:4 * 3:12 बजन सहिता 14:1-3

13 ओरा तोळ्दाल पेयसना पोल्लेँ,
बोदा कुल्ला मत्ते पीनगुना गब्बु बल्हा वांता अल्हा मंतां.
ओरा तोळ्दाल पेयसना पोल्लेँ, इंकावरोन मुळाहनव आंदुं.*

तरासुना विसम वरोन बल्हा हक्कंता,
अल्हेन ओरा पेदविनाल पेयसना पोल्लेँ तकलिप कियानव आंदुं.*

14 ओरा पोल्लेँ सापनेम आनि कयमुलतोनि निडिस मंतां.*

15 ओर बस्केळ्ळक इंकावरोन हळ्कालय हळसेक मनांतुर.

16 ओर बगा अय्ते दांतुर अगा नासडेम कीसि दुक्कमतुन हीसि दांतुर.

17 सांति बगा दोर्कंता अद हरि ओर्क एरपाट हिल्ले.*

18 ओरा कळ्ळकुना मुन्ने पेनदा वें हिल्ले.”*

19 मूसाना नियम परकारम बोर अय्ते ताकंतुर ओराहाटीगे मूसाना नियम मंता, इद मनाकु एरपाटे. अयना पेन न्यायम कियनेके दुनियातोर् अंतोर, इत्ते यहुदिल्क आयिर् यहुदि आयवोर आयिर्, अंतोर पेनदुक लेक्का हियमळे, बोरे तपिचकुना पप्प.

20 मूसाना नियमता कबळताहेंदाल मनम अंतोरम पापिकेँ इंचि तेळियंता अचोने. गानि अय्ते वेहचि मत्ताप ताकसि पेनदा मुन्ने बोरे नीतिमंतुलक आयुर.

पेन मनकालोर्कुन नीतिमंतुलक कीता

21 गानि इंदके मूसाना नियमते रासि मत्ता पोल्लेँगे कियवा मनकालोर्कुन नीतिमंतुलक कियनाहाटी पेन इंकुंदि हरि तयार कीता. अद हरदा बारेमते, मूसाल आनि पेनदा कबुरतोर् पोल्ले हीसि मुन्नेन दर्मसास्त्रमते रासि इरतुर.

22 अद हरि बतल इत्ते, बोरे आयिर् येसु किरिस्तुनपोर्ी विस्वासम इरते पेन ओर्कुन नीतिमंतुलक कीता. इव्ते कुलम, जाति इल्हा बतल हिल्ले.

23 बारित्ते अंतोर लोकुलक पापम कीसि, पेनदाहेंदाल दोर्कना कदरताल लक्कु आतुर.

24 गानि येसु किरिस्तु लोकुलकुन पापालकुनाल इळबळिस्तोर. इल्हा पेन दाना कुर्पांति येसु किरिस्तुन विस्वासम कियानोर्कुन अटोर्कुन नीतिमंतुलक कीता. दीनाहाटी मनम पेनदुक बतल हियना अय्सरम हिल्ले.

25-26 मना पापालकुना सिक्सातगा मोक्कु आयालय पेन येसुन लोहता. येसु किरिस्तु मना पापालकुनाहाटी मोक्कु आतोर् इंचि मनम विस्वासम कीसि ओक्कुनगोम. दीनहेंदाल येसुनपोर्ी विस्वासम कीतोर्कुन पेन नीतिमंतुलक कीता. इदवेरदाका बोर अय्ते पापम कीतुरो, ओर्क सिक्सा हियाकोंटा पेन ओक्के पीसि मत्ता. इल्हा अद नीतिमंतुड इंचि हुपिस्ता.

27 अदुनहाटी मनम पेदिदिकेम कियामन्नि. मनम पुन्नेम कबाहक कीतोम इंचि पेन मनाकुन नीतिमंतुलक कीतना? हिलाकोंटे मूसाना नियमपोर्ी ताकताहेंकेना? विस्वासम कीताहेंकेन मनम नीतिमंतुलक आतोम.

28 मूसाना नियमते मत्ताप ताकताहाटी पेन मनाकुन नीतिमंतुलक इना हिल्ले, गानि येसु किरिस्तु सामिनपोर्ी विस्वासम कीताहेंकेन नीतिमंतुलक इत्ता.

29 अय्ते दीना अर्तम मिमेटे विचारम कीसि वेहाट. पेन सिराप यहुदिल्कुनदेना? यहुदि आयवोर्कुनद आयोना? पेन यहुदि आनि यहुदि आयवोर, इव्वुरदगुडा आंद.

30 अद बल्हा इत्ते, पेन उंदे आंद. कतना आतोर् आयिर्, कतना आयवोर आयिर्, इव्वुर्कुनगुडा पेन ओरा विस्वासमहेंदाले नीतिमंतुलक कीता.

31 “अल्हा अय्ते, विस्वासम कीताहेंकेना मनाकु मूसाना नियमता अक्केर हिल्ले, इनकुंचितिरा?” अल्हा आयो. विस्वासमहेंदाले मूसाना नियमते मनम बेस ताका परंतोम.

4

अब्राहामुना विस्वासम

1 इंदके मना एनकटा पेदुंदा मनकल अब्राहामुना बारेमते मनम बतल इनकोम? ओर नीतिमंतुड बल्हा आतोर्?

2 ओक्कला अब्राहाम कीता बेसता कबाहकुनहेंकेना पेन ओन नीतिमंतुड इंचि मत्ते, गरा कियालय ओनगा बतलन्ना कारनम मंचि मनवळ, गानि पेनदा मुन्ने ओर अल्हा किया परोर.

3 दर्मसास्त्रम बतल वेहांता इत्ते, “अब्राहाम पेनदुन विस्वासम कीतोर्, ओना विस्वासमतुन हळसि पेन ओन ‘नीतिमंतुड’ इंचि वेहता.”*

4 कबळ कियानोंक दोर्कनद कृलि आंद, दान इनाम इन्नर. ओर कबळ कीतोर, इंचि अद ओन्क दोर्कता.

5 गानि पेनदा मुन्ने बोरे मनकल बेसता कबाहक कीसि नीतिमंतुड आयोर. पापिकुंनगुडा मापि कियना पेनदापोरों विस्वासम इरतेने, अद ओन नीतिमंतुड कीता.

6 कबाहक कियाकोन्नागानि, पेन बोर्कुन अयते नीतिमंतुल्क इता, ओर आसिर्वाद दोर्कतोर आंदुर इंचि दाविदगुडा इंतोर. अद इल्हा मंता:

7 “बोरा तप्पु कबाहकुन पेन मापि कीता, बोरा पापालकुन मुच्चुता,
ओर पेनदा आसिर्वाद दोर्कतोर आंदुर.

8 बोरा पापालकुना लेक्का पेन पिच्यो, ओर आसिर्वाद दोर्कतोर आंदुर.”

9 अयते, इसोटा आसिर्वाद सिराप कतना आतोर्कुनाहाटीगेना मरि कतना आयवोरहाटीगुडा मंताना? हो, इव्वुराहाटीगुडा मंता. बारित्ते मना एनकटा पेद्रा मनकल अब्राहामुन पेन ओना विस्वासमतुन हळसि नीतिमंतुड इंचि ओपुकुत्ता, इल्हा मनमे वेहांतोम गदा!

10 अयते पेन अब्राहामुन बस्के नीतिमंतुड इंचि इत्ता? कतना आतारित्तेना, कतना आयाका मुन्नेना? कतना आयाका मुन्नेन ओन नीतिमंतुड इंचि इत्ता.

11 अब्राहामुना कतना आयाका मुन्नेन ओर पेनदुन विस्वासम कीतोर. अदुनहाटी पेन ओन नीतिमंतुड इत्ता. नीतिमंतुना एरपाटता चिन्ह इंचि अब्राहामुं कतना किया पीता. अदुनहाटी विस्वासम कियानोर अंतोर कतना आयाकोन्नागुडा नीतिमंतुल्क आसि मंतुर. अदुनहाटी ओर, अंतोर विस्वासुल्कुना बाबोनलेसी मंतोर.

12 कतना आतोर्क अंतोर्कगुडा अब्राहाम मातिर दादले. गानि सिराप कतना आता इंचि ओर्क अब्राहाम मातिर दादल आया हिल्लोर. अब्राहामुना कतना आयाका मुन्ने ओना विस्वासम बल्हा मत्ता, अल्हेन ओर्कगुडा विस्वासम मत्ता इंचि अब्राहाम ओर्क मातिर दादल आतोर.

13 “मीकुन ई दुनियाता वारसदारक कीतन,” इंचि पेन अब्राहाम आनि ओना वंसमतोर्क पोल्ले हीसि मत्ता. अब्राहाम मूसाना नियमते वेहताप ताकतोर इंचि पेन ओन्क पोल्ले हिया हिल्ले. गानि पेनदापोरों ओर विस्वासम कीसि नीतिमंतुड आतोर इंचि पेन ओन्क ई पोल्ले हीता.

14 ओक्कला मूसाना नियम परकारम ताकतोर, पेन हीता पोल्ले परकारम वारसदारक आयानयते, विस्वासम इनना पोल्लेक बतले विलवा मन्नो, पेन हीता पोल्लेकगुडा अर्तम मन्नो.

15 पेन नियमकु हीतस्के अबुन पीसि ताका पीता. ताकाकोटे पेन सिक्सा हीता. गानि नियमकु हिलाकोटे अबुन नेम्हना सवालगुडा वायो.

16 अदुनहाटी पेन अब्राहामुना वंसमतोर्क अंतोर्क हीता पोल्ले विस्वासम कीतोर्कुं क दाना कुर्पाताहेंदाले दोर्कता. इद सिराप मूसाना नियम परकारम ताकानोर्कुंके आयो गानि अब्राहामुनलेसी विस्वासमते ताकानोर अंतोराहाटी मंता. ओर मना अंतोरा बाबल आंदुर.

17 “नना नीकुन वेल्ले लोकुल्कुना बाबो कीतन,”* इंचि पेन अब्राहामुना बारोमते इत्ता पोल्ले दर्मसास्त्रमते रासि मंता. पेनदा मुन्ने अब्राहाम मना अंतोर्क बाबोनलेसीगे मंतोर. हातोर्कुन पेन मर्रा जीवाते तेहंता. हिल्वदुनगुडा पुट्टीचंता असोटा पेनदुन अब्राहाम विस्वासम कीतोर.

18 अब्राहामुं क पिलाल्क आयना आसे हिलाकोन्ना, ओर पेनदापोरों विस्वासम कीतोर. अदुनहाटी पेन ओन वेल्ले लोकुल्कुना बाबो कीता. “नीवा वंसंमताहेंदाल लेक्का हिल्वा लोकुल्क आंतुर,” इंचि पेन वेहता परकारमे जर्गता.*

19 अस्के अब्राहामुना वयम नूर वर्सा मत्ताहाटी ओना मेंदुल कमजोर आसि मत्ता. अल्हेने ओना मुत्तो सारांकुं पिलाल्क आयाना वयम दाटसि होत्ता. इव्वनि एरपाट मनिनागानि ओर विस्वासमते कमजोर आयाकोटा गट्टिगा मतोर.

20 अब्राहाम पेन हीता पोल्लेपोरों बस्केने अनमानम किया हिल्लोर, गानि पेनदा विस्वासमते गट्टिगा आसि दाना महिमा कीतोर.

21 पेन ओन्क हीता पोल्ले, अद पूरा किया परांता इंचि अब्राहामुं क पुरागा बरोसा मत्ता.

22 इद पोल्लेताहाटीगे, “पेन ओन नीतिमंतुड इत्ता.”*

23 विस्वासमहेंदाल नीतिमंतुड कीता पोल्ले सिराप ओनाहाटीगे हिल्ले.

24 गानि अद मनाहाटीगुडा मंता. हातोरव्टेटाल येसु सामिन मर्रा जीवाते तेहता पेनदुन मनम विस्वासम कीतोम, इंचि अद मनाकुनगुडा नीतिमंतुल्क इता.

25 मना पापालकुनाहाटी हायालय, पेन येसुन वेंतोर कयदे अप्पजेपता, आनि मनम पेनदा मुन्ने नीतिमंतुल्क आयालय ओन मर्रा हातोर लोप्पोटाल जीवाते तेहाता.

5

पेनतोनिसल्लेमते मनमळ

1 इल्हा, मना विस्वासमहेंदाल पेन मनाकुन नीतिमंतुल्क कीता. अदुनहाटीं सामि येसु किरिस्तुनाहेंदाल, पेनतोनिसल्लेमते मनमळ साति मंता.

2 इंदके मनम पेनतोनिसल्लेमते पिस्सना पिस्वरगुडा पेनदा कुर्पातेन दोर्कतद आंद. अचोने आयाका पेनदा महिमाता वेलगुने मनम उंदि रोज मनांतोम इत्ता आसेते वेल्लेन कूस मंतोम.

3 इच्चोने आयाका, विस्वासम कीताहेंका मनाकु तिप्पल्क वायिनागानि वेल्ले कुसिते मनंतोम. बारित्ते तिप्पल्क वातेने ओपके पुट्टंता.

4 इल्हा ओपके पीसि मत्ते मनालोप्पो बेसता गुनम वांता. बेसता गुनम मनाकु मुक्ति हियाना आसे पुट्टिचंता.

5 इद आसे मनाकुन नाराज किय्यो, बारित्ते पेन दाना पवित्र आत्मातुन मना पिस्वरते हीसि, अद मनाकुन वेल्लेन पावरम कीता इंचि हुपिस्ता.

6 बस्के अय्ते मनद मनम पिसागोटकुना पराकोटा आतोम, असोटा वेलाते मना पापि लोक्कुलकुनाहाटीं किरिस्तु ओना जीवा हीतो.

7 वरोर नीतिमंतुनाहाटीं बोरेन्ना जीवा हिच्यालय तयार मनमळ वेल्लेने कस्मट, गानि वरोर बेसता मनकनाहाटीं बोरेन्ना जीवा हिच्यालय तयार आया परांतुर आयावच्च.

8 गानि मनम इंका पापमतेन मत्तोम, अस्केने किरिस्तु मनाहाटीं जीवा हीतो. इदुना हेंदाल पेन मनपोरो बच्चोन पावरम कीता इंचि दिसंता.

9 येसु सामिना नेत्तुरहेंदाल पेन मनाकुन नीतिमंतुल्क कीता. अदुनहाटीं पेनदा होंगुनाल मनाकुन तप्पाकोटा ओनाहेंदाले पिसागोटमळ जर्गता.

10 उंदास्के मनम अंतोरम पेनदा पगातोरमे मत्तोम. अल्हा मननेकेगुडा अद दाना मरिना जीवातुन हीसि मनाकुन दाना दामेर्क कीकुत्ता. इंदके अय्ते मनम पेनतोनिसल्लेमते मनम. अदुनहाटीं किरिस्तुना पिस्वरताहेंदाल अद मनाकुन आकिर सिक्साताल तप्पाकोटा कापाळंता.

11 सिराप इच्चोने आयो गानि मना सामि येसु किरिस्तुनाहेंदाल मनम पेनतोनिसल्लेमते मर्रा कलियतोम, अदुनहाटीं मनम वेल्लेन कुसिते मंतोम.

आदाम आनि येसु

12 इद दुनियाते पापम आदामुनाहेंदाल वाता. पापमताहेंदाल हामुर वाता. दुनियाता अंतोर लोक्कुलकुगुडा पापम कीतुर, अदुनहाटीं अंतोर्के हामुर वाता.

13 मूसाना नियम वायका मुन्नेन इद दुनियाते पापम मत्ता. गानि अस्के मूसाना नियमकु मनवाहेंका पापमतेन पेन लेक्का किया हिल्ले.

14 अय्नागानि आदामुनस्केटाल अय्ते मूसाना कालमदाका मनकालोरपोरो हामुर राज्येन कीसेकेन मत्ता. आदाम पेनदा पोल्लेपोरो ताका हिल्लोर. लोक्कुल पेनदा पोल्लेपोरो ताकका ओनालेसी पापम किया हिल्लुर, अय्नागानि लोक्कुल हायुंदुर. ईर आदाम इत्ते मुन्ने वायाना किरिस्तुना चिन्हालेसी मंतोर.

15 गानि पेनदा वरम आनि आदामुना पापम, इव रोंड पोल्लेन नड्डुम मात्रम वेल्लेन परक मंता. वरोर कीता पापमहेंदाल वेल्लेन मदिक हामुर वाता. गानि दानकन्ना एक्को पेनदा वरम* आनि कुर्पा मंता. ई कुर्पा येसु किरिस्तुनाहेंदाल वेल्लेन मदिक दोर्कता.

16 पेन हीता वरम आनि आदाम कीता पापमता पलम, इव रोंड पोल्लें उंदेतीर हिल्लें. बारित्ते आदामुना पापम अंतोरपोरो सिक्सातुन तत्ता. गानि मनम वेल्लेन पापाल्क कीसिगुडा पेन हीता वरमनाहेंदाल नीतिमंतुल्क आतोम.

17 आदाम कीता पापमताहेंदाल अंतोर हामुरता कय हिळु मंतुर. गानि इंकावरोर इत्ते येसु किरिस्तुनाहेंदाल बोर्क अय्ते पेनदा वरम आनि कुर्पा दोर्कता, ओर्क अंतोर्क पेनदुक नचचना नीति पिस्वर दोर्कता.

18 इल्हा आदाम कीता पापमताहेंदाल अंतोर लोक्कुलकु सिक्सा दोर्कता. अल्हेने इंकावरोर इत्ते येसु किरिस्तु कीता बेस कबाटाहेंदाल, पेन अंतोर्क नीतिमंतुल्क आयालय उंदि हरि तयार कीसि ओर्क बस्केळ्ळ पिस्सना पिस्वर हीता.

19 वरोर आदाम पेनदा पोल्ले केंजवाहेंका वेल्लेन लोक्कुल पापिक आतुर. अल्हेन इंकावरोर मनकल इत्ते येसु किरिस्तु पेनदा पोल्ले केंजताहेंका, वेल्लेन लोक्कुल नीतिमंतुल्क आंतुर.

* 5:15 पेनदा वरम मना पापाल्क मापि आतां. इत्ते पेन मनाकु उंदि पेदुदा इनाम हीता.

20 लोकुकल बल्हा इरगा पापम कीसेक होंचंतुर अदुन ओर्क ह्पसनाहाटी मूसाना नियम वाता. गानि लोकुकल बचचोन वेल्ले पापम कीसेक होलतुर अचोने वेल्ले कुर्पा पेन कीसेक होता.

21 इल्हा बारि आता इत्ते, बल्हा पापम हामुरताहेंदाल राज्येम कीसेक मल्ला, अल्हेन पेनदा कुर्पागुडा सल्लेमतोनि मना सामि येसु किरिस्तुनहेंदाल बस्केळ्ळक पिस्सना पिस्वरताहाटी राज्येम कीता.

6

पापमहेंदाल हामुर आनि किरिस्तुनहेंदाल पिस्वर

1 अय्ते मरि बतल इनकोम! पेन मनापोर्रो वेल्लेने कुर्पा कियाना इंचि पापम कीसेकेन दाकोमा?

2 बस्केने कियामन्नि. पापि गुनालकुनाल उंदि मल्ला मनम बस्केळ्ळाहाटी वैरे आसि हासोत्ताप आतोम. मर्रा असोटा पापि गुनालकुने बल्हा पिसकोम?

3 मनम अंतोरम येसु किरिस्तुनतोनि कलियतोम इंचि ह्पसालय बापतिस्मा एततोम. अस्केने मनम ओनतोनि हाताप आतोम. इद संगति मीकु तेळियोना?

4 बापतिस्माहेंदाल मनम येसु सामिनतोनि हासि बोदा दोसताप आतोम. बल्हा अय्ते पेनबाबाना महिमाता ताकतते किरिस्तु हामुरताल मर्रा जीवाते तेदतोर, अल्हेने मनमगुडा बापतिस्मा एतसि पूना पिस्वरते ताका परांतोम.

5 बारित्ते मनमगिटा ओना हामुरते ओनतोनि उंदि आते, ओना मर्रा जीवाते तेदमळ्ळतेगुडा मनम ओनतोनि तप्पाकोटा उंदि आंतोम.

6 मना पडना पिस्वर येसुनतोनि कूसुनपोर्रो हाता, अदुनहाटी पापमतोनि निडिस मल्ला मना गुनम नासडेम आसि होता. इंदके मनम पापमता अदिकारमते हिल्लोम इद मनाकु एपाटे.

7 बोर अय्ते पडना पिस्वरतुन हाताप होळ्ळसीतोरो, ओर ओना पापालकुनाल मुक्ति दोर्किसि नीतिमंतुड आतोर.

8 ओवकला मनम किरिस्तुनतोनि हायानय्ते ओनतोने मनम पिसंतोम इंचि मनाकु विस्वासम मंता.

9 किरिस्तु हामुरताल मर्रा जीवाते तेदतोर, ओर मर्रा बस्केने हायोर. अचोने आयका हामुरता ताकत ओन बस्केने बतल किया पर्रो, इद मनाकु एपाटे.

10 पापमता अदिकारमतुन ओळिच्चनाहाटी ओर उंदे मल्ला हातोर. गानि ओर इंदके पिस्सना पिस्वर मात्रम पेनदाहाटी पिस्सेक मंतोर.

11 इल्हा मिमेटगुडा पापमताहाटी हातोरलेह्का मंचि, पेनदाहाटी येसु किरिस्तुने जीवाते मंतोम इनकुंत.

12 अदुनहाटी रोंड रोजकु पिस्सना मीवा पिस्वरते पापमता राज्येम वायाकोटा जेगर्ता मंतु. इंका दाना सेड्डा आसेनाल लक्कु मंतु.

13 मीवा मेंदुलतुन सेड्डा कबाहक कियालय पापमता कय्दुक हियमट. अल्हा कियाकोटा, “मनम हामुरताल जीवाते तेदतोरम,” इद पोल्लेतुन मति कीसि, मीपोर्रो पेनदुक अदिकारम हीम्टु आनि मीवा मेंदुलतुन नीति कबाहक कियानाहाटी पेनदुक अप्पजेप्पट.

14 अस्के मिमेट मूसाना नियमता कय्दा हिळ्ळ हिल्लिर गानि पेनदा कुर्पाते पिस्सेक मंतिर इंचि मीपोर्रो पापम दाना अदिकारम ताकसो.

सल्लेमता सेवा कियना

15 इंदके पेनदा कुर्पा मनाकु दोर्कताहाटी मनम मूसाना नियमता कय्दा हिळ्ळ हिल्लोम, अय्ते इंदके मनम पापम कीकोमा मरि? अल्हा बस्केने कियामन्नि.

16 सेवा कीतन इंचि मीवद मिमेट ओप्कुत्ते मिमेट बा मालकुनगा अय्ते सेवा कीसतिरो, ओन्क मिमेट निजमे दासुल्क आंतिर. इद पोल्ले मीकु तेळियोना? मिमेट पापमता दासुल्क आते अद मीकु हामुरता हरि ह्प्यंता. गानि मिमेट पेनदा पोल्ले केंजते अद मीकुन नीतिमंतुलक कीता.

17 मुन्ने मिमेट पापमता दासुल्के मत्तिर, गानि मीकु एत्ता पेनदा पोल्लेन मिमेट बेस केंजसि, करियसि इंदके अबुन पीसि ताकसतिर. इंचि पेनदुक नना दन्यवाद कीतन.

18 इंदके पेन मीकुन पापमता कय्दाल होळ्ळसीता इंचि मिमेट सल्लेमता कबाहक कियालय पेनदा दासुल्क आतिर.

19 इव पोल्लेन अर्तम कीकुनना ताकत मीकु हिल्ले इंचि नना उंदि उदाहरन हीसि मीकु वेहासेके. दीनकन्ना मुन्ने मिमेट मीवा मेंदुलतुन रोता कबाहक, तप्पुड कबाहक कियालय अप्पजेपसि मत्तिर. दानहेंदाल वेल्लेन पापम आता. अल्हेने इंदके मिमेट मीवा मेंदुलतुन सल्लेमता कबाहक कियालय अप्पजेप्पट, अस्के मिमेट पेनदा पवित्र लोकुकल आकिट.

20 मिमेट बस्के अय्ते पापमकु दासुल्क आसि मत्तिर अस्के मीपोर्रो नीतिता कबाहक कियालय दबाव मनाहिल्ले.

21 अयना मिमेट कीता कबाहकुनाहाटी इंदके मीकु सिग्गु वासंता. मिमेट अव कीतस्के मीकु बतल इनाम दोर्कता? अव कबाहकुनाहेंदाल सिराप हामुरे दोर्कुंदु.

22 गानि इंदके पेन मीकुन पापमता कय्दाल होळसीताहेंका मिमेट दाना दासुल्क आतिर. अदुनहाटी इंदके मीकु दोर्कना इनाम बतल इत्ते, पेन मीकुन दाना पवित्र हर्दें ताक्किचि, आकिरते बस्केळ्क पिस्सना पिस्वरताहेंके ओता.

23 पापि कबाहकुना कूलि इंचि मनाकु हामुर दोर्कता. गानि पेन मनाकु मना सामि येसु किरिस्तुनहेंदाल वरम इंचि बस्केळ्क पिस्सना पिस्वर हीता.

7

मरमिना उदाहरन

1 विस्वासुल्कुनिटा, नना मूसाना नियम तेळियसि मत्तोरतोनि वळ्कसेक मंतन. वरोर मनकल जीवाते मत्ताचुं रोजके ओनपोर्रो मूसाना नियमता अदिकारम मंता इंचि मीकु तेळियोना?

2 सरे, उंदि उदाहरन वेहांतन. मूसाना नियम परकारम उंदि मुरतळ दाना मुय्दो पिस्सि मत्ताचुं रोजके अद ओना मुत्तो आसि मंता. गानि दाना मुय्दो हासोत्ते, मूसाना नियम परकारम अद मुरतळ मुय्दोचुं संबंदिस्ता नियमताल इळबळंता.

3 दाना मुय्दो जीवाते मननकेन अद वेरे बोनतोना मरमि आते, दान बोगमतनम कीता मुरतळ इतुर. गानि दाना मुय्दो हासोननय्ते मात्रम आ नियमताल अद पलाते अरंता. अद वेरे मरमि अयनागानि दान बोगमतनम कीता इंचि इन्नुर.

4 अय्ते विस्वासुल्कुनिटा, इल्हेन मिमेटगुडा बस्के अय्ते किरिस्तुनतोनि हातिर अस्के मूसाना नियमताल इळबळतिर. इंदके बोरे अय्ते हातोरेव्टेताल मरं जीवाते तेदतोर आ किरिस्तुनतोनि मिमेट कलिया परंतिर. दीनहेंदाल मनम पेनदा सेवाताहाटी बेसता कबाहक किया परंतोम.

5 मुन्ने मनम मना इस्ट परकारम ताकुंदुम अस्के मना मेंदुलतुन मनालोप्पो मत्ता पापि आसें वाळकुनुंदु, मूसाना नियम मनाकु तेळियतस्के आ आसें इंका बेरस्सेक होल्तां. दीनहेंदाल मनाकु हामुर दोर्कता.

6 मनम बद नियमते अय्ते दोह्चि वाटताप मत्तोमो, आ मूसाना नियमताहाटी इंदके मनम हासि, अवेटाल पलाते अरतोम. दानहाटी मनम आ रासि मत्ता पडना नियम परकारम इंदके पिस्सेक हिल्लोम. गानि पेनदा आत्मा हुपिस्ता पूना हर्दुन एपाट कीसि अद वेहताप ताकसेके दाना सेवा कीसंतोम.

मूसाना नियम आनि पापम

7 अय्ते मूसाना नियम तप्पु इंचि नना वेहसेक इन्कुंचितिरा? अल्हा असले आयो. ओक्कला मूसाना नियम हिलाकोटा मंचि मत्ते, असल तप्पु बतलो नाकु बस्केने तेळियाकोनवळ. ओक्कला मूसाना नियम, “बैरेतोर दानपोर्रो आसे पळमा,” इंचि वेहाकोटा मंचि मत्ते, आसे पळमळ तप्पु इंचि नाकु तेळियाकोनवळ.

8 गानि पापम, मूसाना नियमते मत्ता आदेसकुन वाळकुंचि नावा लोप्पो अन्नि तीरकुना तप्पुड आसें पुटिस्ता. मूसाना नियम हिलाकोटे पापमकु जीवा हिलवापे.

9 दीनकन्ना मुन्ने मूसाना नियमतुन एपाट कियाकोटेन पिस्सेक मत्तन. गानि बस्के अय्ते मूसाना नियमते मत्तव अन्नि आदेसकु* नाकु तेळियतां, अस्के नावा लोप्पो पापम कबळ कियालय दल्लिसि, नना पेनदा मुन्ने हासोत्ताप आतन.

10 बद आदेस अय्ते नाकु पिस्वर हियानद मत्ता, अदे आदेस नाकु हामुर हीता.

11 पापम मोका हळसि आदेसतुन वाळकुत्ता, नाकु दोका कीता. पजा अदे पापम नावा पिस्वरतुन नासडेम कीता.

12 गानि मूसाना नियम पवित्रमातद आंद. अवेटे रासि मनना आदेसाल्कगुडा पवित्र, नीतितव आनि बेसतव आंदु.

13 अल्हा अय्ते आ पवित्रमाता बेस आदेसकुनाहेंदाले नाकु हामुर वाता इंचितिरा? अल्हा असले आयो. आ पवित्रमाता आदेसकुन वाळकुंचि पापम नाकु हामुरतुन हीता. अल्हा कीसि अद दाना असल रूपमतुन हुपिस्ता. पापम इत्ते बच्चोन कतरनाक आंद इंचि आ आदेसकुनाहेंदाल नाकु पुरागा तेळियनाहाटी अल्हा आता.

मनकना परिस्तिती

14 बारित्ते मूसाना नियम पेनदाग्टद आंद इंचि मनाकु एपाट मंता. गानि नना पापि आसेने निडिस मत्ताहेंका पापमता सेवा कियनाहाटी अम्मूळ होत्तोन आंदुन.

15 नना बतल कीसंतनो नाके तेळियसेक हिल्ले. नना बतल अय्ते कियगोमो, अद बारे कीसेक हिल्लेन आनि बद अय्ते कियमन्नी, अदुन बारे कीसंतन.

16 नना बतल अय्ते कियमन्नी अदुने नना कियानय्ते, मूसाना नियम बेसतद इंचि नना ओप्कुंतन.

17 गानि कियामन्नि इत्ता कबाहकुन कियानोन नना आयोन, नाकुन अल्हा किया वेहानद नावा लोप्पो मनना पापम आंद.

18 नावा लोपोबो बदे बेसता पोल्ले हिल्ले इंचि नाकु एरपाटे मंता. बद अय्ते बेसतदो अदे कियना इच्छा नाकरगुडा मंता, गानि अल्हा कियना परसेक हिल्लेन.

19 बव अय्ते बेसता कबाहको अवे नना कियना इनकुंतन, गानि अव नना किय्योन. बव तप्पुड कबाहक अय्ते कियना आयो इंचि इनकुंतनो, अवे तप्पुड कबाहक नना कीतन.

20 गानि नना बव कबाहक अय्ते कियानायो अवे कबाहक कियानय्ते, आ कबाहक कियानोन नना आयोन गानि नावा लोपोबो मनना पापम आंदु नाकुन किय्या वेहानद.

21 अदुनहाटीं नना बस्के अय्ते बेसता कबाहक कियालय हळंतन, अस्के नावा लोपोबो मनना कराब गुनाल्क अल्हा कियालय नाकुन आपंतो.

22 पेन हीता नियमते नावा मनसु वेल्लेन कूस मंता.

23 गानि नावा मेंदुलपोरों मात्रम इंकुंदि बदो वैरे नियम अदिकारम ताकिस्ताप नाक दिस्सेक मंता. आ नियम, नावा बुदिदते मनना मूसाना नियमतोनि लडाइ कीसि नाकुन पापमता कय्दे अप्पजेपसंता.

24 अय्यो, नना बच्चोन गोसाते मंतन! हामुरता कय्दा हिळु मनना नावा ई पापि मेंदुलताल नाकुन बोरो होळसा परंतोर?

25 मना सामि येसु किरिस्ते नाकुन होळसा परंतोर, नना पेनदुक दन्यवाद कीतन. नना मनसुनाल अय्ते पेनदा नियमतेन ताकाना इनकुंचंतन, गानि नावा मेंदुलते मनना कराब गुनाल्क नाकुन पापि कबाहक किय्या वेहचंतो.

8

पेनदा आत्माता ताकलते पिसमळ

1 अदुनहाटीं बोरो अय्ते येसुन नामिसि ओनतोन कलियतुर, ओर्क पेन सिक्सा हिच्यो. बारित्ते येसुन विस्वासम कीतोर, ओरो ओरो बुदिदे मत्ताप आयो गानि आत्मा वेहताप ताकंतुर.*

2 बारित्ते पेनदा आत्माता नियम येसु किरिस्तुनाहेंदाल मनाकु पूना पिस्वर हीता. मनाकुन पापम आनि हामुरता नियमताल तपिस्ता.

3 मनकालोरो बुदिदे पापमता कय्दा हिळु मत्ताहेंका मनम मूसाना नियमतुन केंजाकोटा मत्तोम. अदुनहाटीं अद नियम मनाकुन पिसागोटा पराहिल्ले, अदुन पेने पिसागोटा परता. अद बल्हा इत्ते, पेन दाना मरिन इद बूमिते लोहचीता. ओरो मनकालोरो पापाल्कुन तेंडसि पोहनाहाटीं, मनकाना मेंदुलते मारियतोर. अदे मेंदुलते ओरो मना पापाल्कुना सिक्सातुन ओनपोरों एतकुरतोर.

4 अल्हा बारि इत्ते, मूसाना नियमते रासि मत्ता आदेसकु मनाहेंदाल पूरा आयना इंचि. दीनहेंदाल इंदके मनम मना मनसुक वाताप पिस्सेक हिल्लोम गानि पवित्र आत्मा वेहताप पिस्सेक मंतोम.

5 पापि गुनाल्कुना मनकल, पापि विचाराल्के कीसेक मनंतोर, गानि पेनदा आत्मा वेहताप ताकाना मनकल आत्माकु गावाले मत्ता विचाराल्के कीसेक मनंतोर.

6 इंका बोरो मनकल अय्ते पापि गुनाल्कुने पिस्सेक मनंतोर, ओना हामुर तपो. बोरो मनकल अय्ते आत्मा वेहताप कीतोर, ओन्क पिस्वर, सांति दोर्कता.

7 बल्हा इत्ते, पापि गुनमता मनकल पेनदुक पगातोर आंदुर. इसोंटा मनकल पेनदा नियमते ताका हिल्लोर, आनि ताकोरगुडा.

8 पापि गुनाल्कुने पिस्सना मनकल पेनदुन कूस किय्या परीं.

9 गानि मीवा लोपोगिंटा पेनदा आत्मा मत्ते, मिमेट पापि गुनाल्कुने पिस्सेक हिल्लिर गानि आत्मा वेहताप पिस्सतिर. बोना पिस्वराते अय्ते किरिस्तुना आत्मा हिल्ले, ओरो किरिस्तुना मनकल आयोर.

10 मीवा लोपोगिंटा किरिस्तु मनानय्ते, मीवा मेंदुल पापम कीताहाटीं हासि होत्ता, गानि पेन मीकुन सत्तेमतोर कीताहाटीं, मीवा आत्मा बस्केळक पिस्सि मंता.

11 येसु किरिस्तुन हातोरव्टेडाल मरी जीवाते तेहता पेनदा आत्मा ओक्कला मीलोपो मनानय्ते, मीवा नासडेम आसि होनना मेंदुलतुनगुडा, मीलोपो मनना दाना आत्माहेंदाल जीवाते इरंता.

12 अदुनहाटीं विस्वासुल्कुनिटा, मनम मना पापि गुनाल्कुंक बाकि मत्ताप, अव वेहताप पिस्सना अवकैर हिल्ले.

13 बारित्ते मिमेट पापि गुनाल्कुने पिसानय्ते तप्पाकोटा हांतिर. गानि आत्माता सहायमतोनि मीवा पापि गुनाल्कुन हक्कानय्ते मिमेट पिस्सतिर.

14 बोरो अय्ते पेनदा आत्मा वेहताप ताकंतोर, ओरो अंतोर पेनदा मर्क-मियाहक आंदुर.

15 पेन मीकुन मरी दासुल्क कीसि वेराहलय दाना आत्मातुन हिद्या हिल्ले. गानि अद मीकुन दाना मर्क-मियाहक इनालय तयार कीता. दानहेंदाल मनम पेनदुन, “बाबाल,” इंचि केया परंतोम.

* 8:1 इद वचनम कोन्नि पांडु लिपिने हिल्ले.

16 इंका पेनदा आत्मा मना आत्मातोनि कलियसि, मनम पेनदा मर्क-मियाहकुम इंचि गवाइ हीसेक मंता.

17 मनम पेनदा मर्क-मियाहक आताहाटी वारसदाकगुडा आंदुम. पेनदा वारसदाक आताहेंका किरिस्तुनोनिगुडा मनम वारसदाक. मनम ओनतोनि कलियसि ओना महिमाते पोल्तु आंतोम इनकुनानय्ते, ओना तकलिपतेगुडा पोल्तु आयापीता.

मनाकु पेनदा महिमाता वेलगु दोर्कता

18 नना मीकु इद बारि वेहचंन इत्ते, मनाकु इंदके तकलिपकु, दुक्कालक वांतंगे, गानि वायाना कालमते पेन दाना महिमाता वेलगुन हीसि बच्चोन मनाकु कदर हिद्यार, दाना मति कीते इंदकेटा तकलिपकु बग्गेन दलगों इंचि नना इनकुंचंतन.

19 पेन दाना मर्क-मियाहकुंक हीता कदरतुन बस्के हूपार इंचि अद पुट्टिस्तव अन्निटवे वेल्लेन आसेते एदुर हळसेक मंतां.

20 बारित्ते पेन पुट्टिस्तव अन्निटव अबुना इच्चा परकारम बत्तक ओज्जाकोटा आया हिल्लें, गानि पेने दाना इच्चा परकारम अबुन बतक ओज्जाकोटा कीता.

21 इंचि पेन पुट्टिस्तव अन्निटव नासडेम आयालय मंतां. अदुनहाटी आ नासडेमताल तप्पिसि, पेनदा मर्क-मियाहकुनोतोनि कलियसि पेनदा महिमा आयाना स्वतंत्रमतुन दोर्किचकुनालय पूरा दुनियंता आसेते एदुर हळसेक मंता.

22 उंदि मुरतळ एपरूना वेलाते नोप्पि तेदसि बल्हा तनलाळता, अल्हेने इद दुनियंता इदवेरादाका तनलाळसेक मंता, इद मनाकु एरपाटे.

23 पेन पुट्टिस्तवे आयाका, पेनदाहेंदाल मोदाटा पलम इंचि आत्मा दोर्कतोरम मनमगुडा, दाना मर्क-मियाहक आयालय मना कराब मेंदुलतुन होळसिसि पूना मेंदुल बस्के दोकार इंचि तनलाळसेक मंतोम.

24 मुक्ति दोर्कता इंचि इसोटा आसेते मनम मना परंतोम. गानि मनम बद आसेते अय्ते मंतोम, अद आसेतुन मनम मना कळकुने हळसेक मननेके, अद आसे बल्हा आया परंता? बतल अय्ते मनाकु दोर्कता, अदुन एदुर हळसेक बोर्नना मनांतुरा? मन्तुर.

25 गानि बतल अय्ते मनाकु दोर्काहिल्ले, अदुना आसे पळानय्ते मात्रम मनम वेल्लेने ओपेक्ते, विस्वासमते एदुर हळसेक मनांतोम.

26 पारतना बल्हा कियमळो तेळियवस्के पवित्र आत्मा मनाकु सहायम कीता. मनाकु इनावायो असोटा पोल्लेन पवित्र आत्मा मनाहाटी पेनदागा तनलाळसेक विनंति कीसिक मंता.

27 मना मनसुने मलता विचारालकुन पेन बेस एरपाट कीता. अल्हेन आत्माता विचारालक बतल दानकु बेस एरपाट. अदुनहाटी पेनदा लोकुलकुंक गावाले मलतदुनहाटी पवित्र आत्मा विनंति कियनेके पेनदा विचारम मलतापे कीता.

28 बोर् अय्ते पेनदुन पावरम कीतुर, बोर्कुन अय्ते पेन दाना पिलान मलतापे केयता, ओर्क बसोटा परिस्तिती वायिना, पेन आ परिस्तिती ओरा बेसताहाटीगे कीता इत्ता पोल्ले मनाकु एरपाटे.

29 बारित्ते “बोर्-बोर् नापोरों विस्वासम कीतुर” इंचि पेन मुन्नेटाले एरपाट कीसि मलता. दाना मरिं येसु, ओर अंतोरा दादाल आयगोम इंचि पेन ओर्कुन येसुनसंतोर आयानाहाटीं पेरता.

30 बोर्-बोर्कुन अय्ते पेन पेरता ओर्कुन दाना हर्द ताकालय केयता. इंका बोर्-बोर्कुन दाना हर्द ताकालय केयता ओर्कुन नीतिमंतुलक कीता. इल्हा नीतिमंतुलक कीतोर्कुंक वेल्लेन कदरगुडा हीता.

31 इव अन्नि पोल्लें केंजंतका मनाकु उंदि विचारम तप्पाकोटा वांता, अद बतल इत्ते, पेने मना सायतक मलतस्के मनाकु अड्डम तिरियनाहाटीं पगातोर बोर् मनांतोर?

32 पेन दानकु मलता वरोर मरिंनगुडा मनाहाटी हीता. वरोरे मरिं इंचि पज्जो-मुन्ने किया हिल्ले, अच्चोन बेस पेन आंदु. असोटेस्के दाना मरिंनतोनि कळमातव अन्निगुडा मनाकु हिद्योना? तप्पाकोटा हीता.

33 कुदुदु पेने मनाकुन पेरसि नीतिमंतुलक कीता. अय्ते मनापोरों दोसेम दोस्सानोर बोर् आंदुर?

34 अय्ते मरि मनाकु सिक्सा तप्पो इंचि बोर् इना परांतुर? सिराप पेने इना परंता. गानि येसु किरिस्तु मनाहाटी हातोर अस्के पेने ओन मर्रा जीवाते तेहाचि दाना तिना बाजुंक उपिस्ता. इंदके ओर अगा मनाहाटी पेनतोनि विनंति कीसंतोर.

35 अय्ते मनाकु बदे तिप्पल आयि, लोकुलकुना विरोद, दुक्कम, कर्वु, कपडिं दोर्काकोटा आयमळ, दोकाता जेगाते मनमळ आयि, कसेहक-गोकनि हळ्कमसोटा वेला वायिनागानि इवन्नि येसु किरिस्तुना पावरमताल मनाकुन लक्कु किया परां.

36 बारित्ते, “मोमोट नीवोर्क आताहाटीं रोज-रोज लोकुलक माकुन हळ्कालय हळ्हांतुर, मोक्कु हियालय मोळकुता गॉर्नलेसीं मावा पिस्वर मंता,” इंचि दर्मासाम्त्रते रासि मंता.

37 इवन्नि तकलिप वायिनागानि, मनाकुन पावरम कियना किरिस्तु मनातोनि मत्ताहेंका मनमे गेलसंतोम.

38 बारित्ते नाकु इंदके पुरागा तेळियसोत्ता. अद हामुर आयि, पिस्वरे आयि, पेनदा दूतांगे आयि, देय्यालक-बूतालक आयि, इद कालम आयि, वायना कालम आयि, बवे सक्तिं आयि,

39 ब्रूमिता लोप्पोटव आधिं, ब्रूमि पोर्रोर्टव आधिं. पेन पुट्टिस्तव बवे आधिं मना सामि येसु किरिस्तुनाहेंदाल मनापोर्रो मत्ता पेनदा पावरमताल लक्कु किया पर्री.

9

यहुदिलकुनपोर्रो पौलस होंग आंतोर

1-3 नावा यहुदि लोक्कुलक पेनदाल बल्हा लक्कु आसि मंतुर मरि? ओर अल्हा आताहाटी मनसुने नाकु वेल्लेन दुक्कम, बादा अनपिच्चंता. नना किरिस्तुना मनकन इंचि इदु पोल्ले निजम वेहचंतन, आबदुदम आयो. नावा लोप्पो मना पवित्र आत्मागुडा इद निजम इंचि गवाइ हीसंता. पेन नाकु सापनेम हीसि, नाकुन किरिस्तुनाल लक्कु किथ्यिना बेसे! नावा मनसु मात्रम नावा इसाएल लोक्कुलक पिसगोम इंचि मंता.

4 पेनदा मर्क-मियाहक आयाना हक्क इसाएलना वंसंमते पुटतोरदे* आंद. पजा बय्लि ब्रूमि ते मत्तस्के पेनदा महिमा पेदुदा वेल्गासि इसाएलना वंसंमतोर्के दिसता. करार्क ओरतोने कीता, मूसाना नियम्कुगुडा ओर्के हीता, मोळ्ळकाना बेस रिवाजकु हीता, अचोने आयका ओर्के पोल्लेगुडा हीता.

5 एनकटा पेदुदालक अब्राहाम, इसाक आनि याकोब ईरगुडा ईर्रो आंदुर. अचोने आयका येसु किरिस्तुगुडा मनकन रूपमते ईरा वंसंमतेन पुटतोर. अन्निन ताकसना अदिकारम मत्ता पेने ई येसु किरिस्तु आंदुर. अव अन्नि बस्केळ्ळ ओने तल्सकुन्नि. आर्मीन.

6 पेन इसाएलना वंसंमतोर्के हीता पोल्ले तपता इंचि नना इंचेक हिल्लेन, गानि इसाएल देसेमते पुटतोर अंतोर इसाएलना वंसंमतोर आयुर इंचि नना वेहचंतन.

7 अचोने आयका अब्राहामुना वंसंमतोर अंतोरगुडा ओना निजम पिलालक इंचि मनम इनानायो. बारित्ते इदुना बारेमते दर्मसास्त्रमते, “सिराप इसाकुना वंसंमतोरे नीवा वंसंमतोर इंचि लेक्का कियमळ जर्गता,”* इल्हा रासि मंता.

8 दीना अर्तम बतल इत्ते अब्राहामुना वंसंमते पुटतोर अंतोर पेनदा मर्क-मियाहक आया पस्स. गानि पेन हीता पोल्ले परकारम बोरे अय्ते पुटतुर ओरे अब्राहामुना निजम मर्क-मियाहकुना लेक्काते वांतुर.

9 अब्राहामुंक पेन हीता पोल्ले इल्हा मत्ता, “इत्ता वेलाक नना मर्रा मल्लिस वांतन, सारालां वरोर मर्रिन कनंता.”*

10 आ मर्रि इत्ते मना एनकटा पेदुदा मनकल इसाक आंदुर. ओर रेबेका इनानदानतोनि मर्रमि आतोर अस्के अद नेला तप्पि एमडालकुन कंता.

11-12 गानि आ पिलालक पुट्टका मुन्नेन, ओर बद्दे मंचि-सेड्डा किय्यका मुन्नेन पेन रेबेकांकु, “मुन्ने पुट्टना पेडल पज्जो पुट्टनोना सेवा कियानुर,”* इंचि वेहचि मत्ता. पेन मनकालोर्कुन ओर कीता कबाहकुन पोर्रोटाल केयो, गानि दाना इच्चा मत्ताप ओर्कुन केयंता, इंचि मनाकु दीनहेंदाल तेळियता.

13 दीना बारेमते दर्मसास्त्रमते, “नना याकोबुन कीतच्चोन पावरम, एसावुन किया हिल्लेन,”* इंचि रासि मंता.

14 इदुन केंजसि मनम बतल इंदकोमा मर्रि? पेन अन्यायम कीता इंदकोमा? असले आयो.

15 बारित्ते, “नना बोनपोर्रो दया हुपिच्चन, बोनपोर्रो दया कीकन, बोनपोर्रो दया हुपिच्चन, बोनपोर्रो दया कीकन, अद नावा इस्टम मत्ताप नना कीतन,”* इंचि पेन मूसांक वेहचि मत्ता.

16 इल्हा बोनपोर्रो दया किय्यना इंचि पेने निरनायम कीता. इद मनकना कय्दे हिल्ले. दान दोर्किच्चकुननाहाटी मनम बच्चोन कस्टम किथ्यिना एर्तमे.

17 पेन पिरोन राजानतोनि इत्ता पोल्ले दर्मसास्त्रमते इल्हा रासि मंता: “नावा ताकततुन नीवाहेंदाल हुप्संतन अस्के नावा पोरोल पूरा दुनियामेळ तेळियसि होन्नार. इदुनहाटीगे नना नीकुन राजाल इंचि निलाहतन.”*

18 दीनहेंदाल मनाकु बतल तेळियंता इत्ते, पेन अद इनकुत्तोन पोर्रो दया कीता, अल्हेने अद इनकुत्तोन कटकलमरि कीता.

19 इसॉटस्के, “पेन अय्ते अद इनकुत्तापे ई दुनियाते किया गोट्टंता. अयना मावा पोर्रेन बारि दोसेम दोसंता?” इंचि मिमेट नाकुन इनकिर.

20 गानि मनका, पेनदुन मल्लिस पूसकियानोन निमे बोन आंदिन? “निमे नाकुन इल्हा बारि तयार कीतिन?” इंचि अळका बस्केनना कुम्मन पूस कीतना?

* 9:4 वंसंमते पुटतोरदे यहुदि लोक्कुलक. * 9:7 उत्पत्ति 21:12 † 9:9 साराल इद अब्राहामुना मुत्तो आंद, इद गोडमुरादि मत्ता. * 9:9 उत्पत्ति 18:10-14 * 9:11-12 उत्पत्ति 25:23 * 9:13 मलाकी 1:2-3 * 9:15 निर्गमन 33:19 ‡ 9:17 पिरोन पिरोन राजाल इरागा कटकलमरि मत्तोरे, इंचि पेन ओन इंका कटकलमरि कीता. कटकलमरि मत्तोने पेन कटकलमरि कीता अंतोर्कुन आयो. * 9:17 निर्गमन 9:16

21 उंदे तोळि मुद्दाताल सगोम बेस सिंगारम अळकां, इंका सगोमताल सादा अळकां तयार कियना अदिकारम वरोर कुम्मांकु हिल्लेना? तप्पाकोटा मंता.

22 अल्हेने पेनदुकगुडा अद इनकुत्ताप कियना अदिकारम मंता. गानि नासडेम आसि होनानोर्कुन नासडेम कीसि पोहका ओप्के पीसि मत्ता.

23 पेन अल्हा ओप्के पीसि बारि मत्ता इत्ते, पेन दाना महिमा आनि दया बच्चोने बेसतद इंचि बोर लोकुकुक अयते हुप्सना मत्ता, अद ओर्कुन मुन्नेन पेरता.

24 मनम अंतोरम पेन पेरता लोकुकुळे. गानि पेन सिराप मना यहुदिल्लुकुनाले पेरॉ हिल्ले, यहुदि आयवोर लोप्पोटालगुडा पेरता.

25 यहुदि आयवोरा बारेमते पेन होसे पोरोलता पेनदा कबुरतोना पुस्तकमते इल्हा वेहता:

“मुन्ने नना बोर लोकुकुकुन अयते नावा लोकुकुक इंचि इना हिल्लेन,

इंदके ओर्कुन नना नावा लोकुकुक इंचि केयकन.

इंका दीनकन्ना मुन्ने बोर्कुन अयते नना पावरम किया हिल्लेन,

ओर्कुन नना पावरम कीकन.”

इल्हा पेनबाबाल रासा वेहतोर. अचोने आयका,

26 “मिमेत नावा लोकुकुक आयिर इंचि नना बगा अयते इत्तनो,

अग्गेन मिमेत जीवाते मनना पेनदा मर्क-मियाहक आतिट इंचि इनानु,”*

इल्हा रासि मंता.

27 इंका यसायाह इनना पेनदा कबुरतोरगुडा इस्राएल लोकुकुकुना बारेमते बतल इत्तोर इत्ते,

“इस्राएल लोकुकुक समुद्रमते मनना उस्केलेसी लेक्का परवच्चुर मंतुर.

अयना पेन हियना सिक्साताल इच्चुरे पिस्संतुर.

28 बारित्ते ई दुनियाते मनना

अंतोर लोकुकुकुन पेन बिरानेन सिक्सा कियानद मंता, अद पुरागा कीता,”*

इंचि वेहतोर.

29 अचोने आयका,

“अन्निटकन्ना ताकतवार पेन ओक्कला मनाहाटी,

मना वंसमतोरव्टेताल इच्चुकुन होळसाकोटा मंचि मत्ते,

मनम सदोम, गमोरा नहकुना लोकुकुकुनालेसी नासडेम आसि मन्नेरम,”*

इल्हागुडा यसायाहल मुन्नेन वेहचि मत्तोर.

बेसता कबुर आनि यहुदिल्लुक

30 अयते मनम इंदके बतल इनकोम? यहुदि आयवोर पेनदा मुन्ने नीतिमंतुलक आयालय हळा हिल्लुर गानि येसु ओराहाटी कीतदुन ओर विस्वासम कीतुर इंचि पेन ओर्कुन नीतिमंतुलक कीता.

31 इस्राएल लोकुकुकु बारे मूसाना नियमते वेहताप ताकसि नीतिमंतुलक आंतोम इंचि इनकुत्तुर. गानि ओर अल्हा नीतिमंतुलक आया हिल्लुर.

32 बारित्ते ओर किरिस्तुन विस्वासम कियका बेसता कबाहक कीसि नीतिमंतुलक आयालय हळतुर. इंचि येसु किरिस्तु इस्राएल लोकुकुकुनाहाटी ओरा हरदे, दल्लिसि हिळ् अरहना बंडालेसी^S मंतोर.

33 इदुना बारेमते दर्मासास्त्रमतेगुडा इल्हा रासि मंता:

“हळाट, सियोनते* नना उंदि बंडातुन इरसंतन,

अद बंडा इच्चुर्क दलंगता, इंकिच्चुर बारे दान्क दल्लिसि हिळ् अरंतुर.

बोर अयते दानपोरों विस्वासम इरंतुरो, ओरद बस्केने सिन्नातनम आयो.”*

इंचि रासि मंता.

10

1 विस्वासुल्कुनिटा! नावा इस्राएल लोकुकुकुकु पेन मुक्ति हिथ्यि इंचि नावा वेल्लेन मनसु मंता. अदुनहाटी नना पेनदुक पारतना कीसेकेन मंचंतन.

* 9:26 होसे 1:10

* 9:28 यसायाह 10:22-23

* 9:29 यसायाह 1:9

S 9:32 हिळ् अरहना बंडाइद वचनमते हिळ् अरहना बंडाता

अर्तम येसु सामि आंदुर.

* 9:33 सियोन इद येसुलेम सहरता पडना पोरोल आंद.

* 9:33 यसायाह 8:14; 28:16

2 पेनदा सेवा कियना इंचि ओर्क वेल्लेन जिद्दु मंता, इदुन नना कुद्दु हळतन. गानि पेनदा सेवा कियना निजम हरि ओर्क तेळियो.

3 बारित्ते पेने लोकुकुकुन नीतिमंतुल्क कीता इत्ता संगति ओर्क तेळियका, सतता नियमताहेंदाल नीतिमंतुल्क आंतोम इंचि ओर इनकुत्तुर. इल्हा ओर पेन हुपिस्ता हर्दुन ओपुकुना हिल्लुर.

4 गानि येसुनपोर्री विस्वासम कियानोर अंतोर नीतिमंतुल्क आयानाहाटी किरिस्तु मूसाना नियमता आकिरि आंदुर.

पेन अंतोर्कुन पिसागोटंता

5 दर्मसास्त्रमते मूसाल बतल रासतोर इत्ते, “बोर अत्ते दर्मसास्त्रमते मत्ताप ताकसि नीतिमंतुड आयालय हळंतुर, ओर उंदि नियमगुडा तप्पाकोंटा ताका पीता, अस्केन ओर अवुनहेंदाल नीतिमंतुड आंतोर.”*

6-8 मिमेट, “माकु पेनदा पोर्ल्ले कराहलासि स्वर्गमते होंचि किरिस्तुन इदु बूमिपोर्री बोर तरा परांतोर, हिलाकोंटे हातोरव्टेटाल किरिस्तुन जीवाते तेहचि तरालय बोर दांतोर?” इंचि इनकुनमट. गानि विस्वासम कीसि नीतिमंतुड आयनोरा बारेमते दर्मसास्त्रम बतल वेहंता इत्ते, “पेनदा पोर्ल्ले निहागेन मंता, नीवा मनसुना लोप्पो आनि नीवा तोळ्देन मंता.” मोमोट मीकु वेहता पोर्ल्ले इवे आंदुं.

9 अद बल्हा इत्ते, नीवा पिस्वरते, येसुए नावा सामि इंचि निमे तोळ्दाल ओपुकुंचि, ‘ओन पेन हातोरव्टेटाल मरा जीवाते तेहता,’ इंचि निमे नीवा मनसुनाल विस्वासम कीते, पेन नीकु मुक्ति हीता.

10 बारित्ते मनम मनसुनाल विस्वासम कीतोम इंचि मनाकुन पेन नीतिमंतुल्क कीता. तोळ्दाल ओपुकुतोम इंचि मनाकु पेन मुक्ति हीता.

11 दर्मसास्त्रमतेगुडा इल्हा रासि मंता: “ओनपोर्री विस्वासम कियानोर बोरे आयिर, पेनदा मुन्ने ओनद बस्केने सिन्नातनम आयो.”*

12 पेनदापोर्री विस्वासम ईर्नोर बोरे आयिर, ओर यहदि आयिर, युनानिर आयिर अंतोर उंदे, अंतोर्कुंक ओर वरौरे सामि आंदुर. ओना पोरोल एतसि पारतना कियना अंतोर्कुंक ओर वेल्लेन आसिवांद हीतोर.

13 “सामिना पोरोल एतसि पारतना कियनोर ओर बोर्नना आयिर पेन ओन पिसागोटंता,”* इंचि दर्मसास्त्रमते रासतद मंता.

14 बोर अत्ते किरिस्तुनपोर्री विस्वासम कियानुर? बोर अत्ते ओर्क वेहानोर हिल्लुर, ओर ओना पोरोल बारि एतनुर? बोर अत्ते ओना बारेमते केजा हिल्लुर ओर बल्हा विस्वासम कियानुर? बोर अत्ते ओर्क वेहानोर हिल्लुर, ओर बल्हा केजानुर.

15 अल्हेने पेन बोर्कुने लोहाकोंटे ओरगा होंचि ओर बल्हा वेहा परांतोर? असले वेहा परोर. दीना बारेमते दर्मसास्त्रमते इल्हा रासतद मंता: “बेसता कबुरतुन पीसि वायना लोकुकुकुन हळते बच्चोने कुसि आंता!”* इंचि रासि मंता.

16 गानि इम्नाएल लोकुकुक अद बेसता कबुरतुन केजसिगुडा अंतोर विस्वासम कियानुर. बारित्ते, “ए सामि! मोमोट वेहता कबुरतुन बोर नम्मुतुर?”* इंचि दीना बारेमते दर्मसास्त्रमते यसायाहल रासतोर.

17 इल्हा किरिस्तुना बारेमता बेसता कबुरतुन बोर्नना वेहतेने केजांतुर, केजतेने विस्वासम कियानुर परांतुर.

18 अयना नना उंदि पोर्ल्ले पूसकीतन, इम्नाएलतोर इद कबुरतुन केजा हिल्लुरा? तप्पाकोंटा केजतुर. इदुना बारेमते इल्हा रासतद मंता:

“ओरा लेंग दुनियंता केजा होत्ता, ओरा पोर्ल्ले दुनियाता मूला-मूलादाका एत्ता,”*

इंचि दर्मसास्त्रमते रासि मंता.

19 अयना इंकुंदि पोर्ल्ले पूसकीतन, इम्नाएल लोकुकुक कबुर केजतस्के अद ओर्क तेळियतना तेळिया हिल्लेना? तप्पाकोंटा तेळियता. मूसाना नियमते मुन्नेन रासि मत्ताप,

“विलवा हिल्लुवा यहदि आयवोर्कुन नना पावरम कीसि,

मीकु कळ्क पोत्तानाल कीतन.

अल्हा कीसि नाकुन एरपाट कियवा यहदि आयवोरहेंदाल,

मीकु होंगु वायनाल कीतन,”*

इंचि पेन इम्नाएल लोकुकुकुन इत्ता.

20 पजा

“नाकुन पहकवोर नाकुन दोर्किचुकुत्तुर.

नाकुन पूसकियवोर्कुंक ननाने कुद्दु दिसतन,”*

इल्हा पेन वेहता पोर्ल्लेतुन दैर्नेम कीसि यसायाहलगुडा रासतोर.

21 गानि इम्नाएल लोकुकुकुना बारेमते पेन बतल इत्ता इत्ते,

“ना पोल्ले केंजाकोंटा मर्लाबळता लोकुल्कुनाहाटी,
नना दिन्नम एदुर हळसेक मत्तन,*”
इंचि पेन वेहता पोल्लेतुन यसायाहल रासतोर.

11

पेन दाना लोकुल्कुन होळसो

1 अय्ते मरि, पेन दाना इस्राएल लोकुल्कुन होळसीता इत्तापा? हिल्ले. बारित्ते ननागुडा इस्राएल मनकने आंदुन. नना अब्राहामुना वंसम आनि बेजामिन* गोत्रमतोन आंदुन.

2-3 पेनदुक मोदोलताले तेळियसि मत्ता. दाना इस्राएल लोकुल्कुन अद होळसा हिल्ले. एलिया इनना पेनदा कबुरतोना बारेमते दर्मसास्त्रमते बतल रासि मंता मीकु तेळियोना? ओर इस्राएल लोकुल्कुनपोरों तप्पुक दोस्सेके इल्हा इत्तोर, “ए सामि, ई लोकुल्क अय्ते नीवा कबुरतोर्कुन हळक्तुर, नीकु मोक्कु हिय्यना गदूदेन्ता कूलाहतुर. नना वरोने पिस्सि मंतन. इंदके नाकुनगुडा हळ्कालय हळसंतुर,*” इंचि इत्तोर.

4 गानि पेन ओन्क बसोंटा जवाब हीता मीकु मति मंतना? “अल्हा इनकुनमा! बाला इनना पेनदुक बस्केने मोळ्कवसोंटा एडुं वेय्कुना मंदितुन नावाहाटी नना वेंरे कीसि इरतन,*” इंचि पेन ओन्क वेहता.

5 अल्हेने इंदकेगुडा पेनदा कुपहिंदाल इचचुर लोकुल्कुन दानाहाटी वेंरे कीसि इरता.

6 ओरा बेसता कबाहकुन हळसि पेन ओर्कुन पेरा हिल्ले, गानि अद दाना कुपहिंदाले ओर्कुन पेराता. ओक्कला अल्हा जर्गकोंटा मंचि मत्ते, दाना कुर्पा निजम कुर्पा मनाकोनवड.

7 इल्हा इस्राएल लोकुल्क बदन अय्ते मनसु तासि पहकसेक मत्तुरो, अद ओर्क दोर्काहिल्ले. गानि पेन पेरकुत्तोर्कुंक मात्रम अद दोर्कता. कळमतोर बोर अय्ते मत्तुर, ओर पेनदा पोल्ले केंजाकोंटा ओरा मनसुन गळसु कीता.

8 दर्मसास्त्रमतेगुडा इल्हेन रासि मंता:

“पेन ओर्कुन निद्रा मत्ताते वाटसीता,* कळ्क मंचिगुडा हिलवाप कीता.

केळ्क मंचिगुडा हिलवाप कीता, इदवेरदाकागुडा ओरा गति इल्हे मंता.*”

9 इदुना बारेमते दाविद राजालगुडा दर्मसास्त्रमते इल्हा इत्तोर,

“ओर तिनूळ-उनुळ कियना वेलाते, उंदि गत्तरा वाताप ओर्क तकलिप वायि.

तकलिप वासि ओर हिळ्ळ अरि, ओरा पापालकुना सिक्सा ओर बोगांचिर.

10 ओरा कळ्कुंक हीकट वाताप आसि, निजम बतलो ओर्क दिसाकोंटा आयि.

ओरा नडिं कस्टालकुना मोता कांजा पराका, बस्केळ्ताहाटी गूनि आसि होन्नि,*”

इंचि इत्तोर.

11 अय्ते नना इंकुंदि पोल्ले पुसकीतन. इस्राएल लोकुल्क पुरागा तेदा पराकोंटा हिळ्ळ अरतुरा? अरी हिल्लुर. गानि ओर पापम कीतुर इंचि ओर्क दोर्कना मुक्ति, यहुदि आयवोर्क दोर्कता. दीन हळसि यहुदि लोकुल्कुना कळ्क पोत्तागोम इंचि पेन अल्हा कीता.

12 यहुदि लोकुल्क किरिस्तुन हय्सका पापम कीतुर अय्ते दुनियाते मनना वेंरे जातितोर्क पेन वेल्लेन आसिवांद हीता. यहुदि लोकुल्कुंक नुकसान आताहेंका यहुदि आयवोर्क पायदा आता. इल्हा यहुदि लोकुल्कुंक नुकसान आताहेंकेन अंतोर्क पायदा आता अय्ते, मिमेटे विचारम कीम्ट, ओक्कला ओरगिंटा किरिस्तुनहेके पुरागा तिरियानय्ते दुनियाते मनना वेंरे जातितोर्क बचचोन वेल्ले आसिवांद दोर्कार!

यहुदिल्क विस्वासमते वांतुर इत्ता पौलुस आसे

13 इंदके यहुदि आयवोरव्टेताल मिमेट बोर अय्ते विस्वासमते वातिर, मीक वेहानद बतल इत्ते, पेन नाकुन प्रेरित इंचि मीवाहाटी पेराता. अदुनहाटी नना कियना सेवा बचचोनो बेसतद इंचि वेल्लेन कूस मंतन.

14 इल्हा कीतिनना मीकु आता पायदातुन हळसि नावा यहुदि लोकुल्कुना कळ्क पोत्सि ओराव्टेताल गिचचुरन्ना विस्वासमते वायानुर इंचि नावा आसे.

15 अद बल्हा इत्ते, इस्राएल लोकुल्क पेनदाल लक्कु आताहेंका दुनियातोर पेनदुक दग्गोरा आतुर. इस्रोटस्के इस्राएल लोकुल्कगुडा पेनदुक दग्गोरा आंतुर इनकुट, अस्के इद पोल्ले वरोर हातोंक मरा जीवा अरतापे आयोना!

* 10:21 यसायाह 65:2 * 11:1 बेजामिन इस्राएलतोर पनेड गोत्रालकुनाल उंदि गोत्रम आंद. * 11:2-3 1 राजा 19:10-14 * 11:4 1 राजा 19:18 * 11:8 यसायाह 29:10 * 11:8 थ्यवस्ताविक्वन 29:4 * 11:10 बजन सहिता 69:22-23

16 ओक्कला अब्राहाम आनि एनकटा पेद्दाल्क पवित्रमातोरे आते, ओरा पिलाल्कगुडा पवित्रमातोरे आंदुर. ओक्कला मराता हिह्कुगिंटा पवित्रमातव आते, मराता कोम्मंगुडा पवित्रमातवे आंदुर.

17 यहुदिल्क इत्ते पेन पोस कीता जय्तुन मराता कोम्मनसंतोर आंदुर. मिमेट यहुदि आयवोर इत्ते केडाते पुटसि-बेर्सता जय्तुन मराता कोम्मनसंतोर आदिर. पेन पोस कीता मराताल सगोम कोम्मन रेब्बिस पोहताप पेन दान नमुवा यहुदिल्कुन पोहचीता. पोहचि, केडाते पुटसि-बेर्सता जय्तुन मराता कोम्मन तच्चि रेब्बिस पोहता कोम्मना जेगाते अंटा वाटताप मीकुन ओरव्हे कल्पता. अल्हासि पेन पोस कीता मराता हिह्कुनाल मीकु ताकत दोर्कसंता.

18 बस्केळ्ळ आधि, हिह्कुनाले कोम्मांक ताकत दोर्कता, कोम्मानाल हिह्कुंक आयो इदुन मति ईरंट. अदुनहाटी 'रेब्बिस पोहता कोम्मांकन्ना मोमोटे बेसतोरम" इंचि पोंगमट.

19 इदु केंजसि, "माकुन अंटा वाटालये कोम्मन रेब्बिस पोहता," इंचि मिमेट इंदके इनकुंचितेर बारे!

20 मिमेट इनानद निजमे! गानि उंदि पोल्ले मति ईरंट, ओर पेन पोरो विस्वासम कियवाहेंका पेन ओर्कुन कोम्मन नर्किसि पोहताप पोहचीता. मिमेट बारे किरिस्तुनपोरो विस्वासम कीतिर इंचि पेनतोनि कलियसि मंतिट. अदुनहाटी वाट्टिदे पोंगसेके तिरियाकोटा पेनदुक वेरियसि मंटु.

21 बारित्ते पेन सतागा पोस कीता मराता कोम्मनसोटा यहुदिल्कुने रेब्बिस पोहता अय्ते, मिमेट अय्ते केडाते पुटसि-बेर्सता मराता कोम्मनसंतोर, विस्वासमते कमजोर आते मीकुन असले होळसो.

22 नना वेहानद बेस केंजट. मिमेट पेनदा दयातुन, दाना होंगुन बेस एरपाट कीम्ट. बोर अय्ते विस्वासमताल पजोळ्ळ आतुर, ओरापोरो पेन होंग हुपिस्ता. गानि मिमेट विस्वासमते ताकसेकेन मंतिर इंचि मीवापोरो पेनदा दया मंता. हिलाकोटे मीकुनगुडा कोम्मन नर्किसि पोहताप तेंडसि पोहंता.

23 नर्किसि पोहता कोम्मनसोटा यहुदि लोक्कुल ओक्कला मरा पेनदापोरो विस्वासम कीते, नर्किसि पोहता कोम्मन मरा अंटा वाटताप पेन ओर्कुन मरा दानतोनि कल्पकुंता. बारित्ते पेन अल्हा किया परंता.

24 मिमेट अय्ते केडाते पुटसि-बेर्सता जय्तुन मराता कोम्मनसंतोर आदिर. यहुदिल्क बारे पेन पोस कीता जय्तुन मराता कोम्मनसंतोर आंदुर. अयना मीकुन पेन दाना लोक्कुले कल्पकुंता अय्ते, यहुदिल्क पेनदागा मरा मलिसि वायानय्ते अद ओर्कुन मरा अल्कगा कल्पकुंता परंता.

पेन इस्राएल लोक्कुलुन पिसागोटंता

25 विस्वासल्कुनिटा, "मोमोटे तेल्विगल्लोरम" इंचि मिमेट पोंगामान्नि. अदुनहाटी इस्राएलतोरा बारेमता उंदि मर्मम मीकु वेहना इनकुलतन. अद बतल इत्ते, पेनदा विचारम परकारम, यहुदि आयवोर बचटुर लोक्कुल अय्ते विस्वासमते वायनद मंता ओर अंतोर किरिस्तुनपोरो विस्वासम कियनदाका इस्राएलता इच्चुर लोक्कुल पेनदा पोल्ले केंजाकोटा गळसु आसि मनानुर.

26 गानि दाना पजा अंतोर इस्राएल लोक्कुलुन पेन पिसागोट्टार. इदुना बारेमते इल्हा रासि मंता:

"पिसागोटनोर सियोनताल वायानुर,

ओर याकोब वंसंमतोर्कुन तप्पुड हरदाल तिराहचि बेसता हर्दुक तरांतोर,

27 नना ओरा पापालकुन मापि कीसि, ओरतोनि कीता करारतुन पूरा कीतन,"*[†]

इंचि पेन इत्ता पोल्ले दर्मसास्त्रमते रासि मंता.

28 वेल्लेटोर इस्राएल लोक्कुल किरिस्तुना बारेमता बेसता कबुरतुन नमुवाहेंका इंदके ओर्कुन पेन बेसता कबुरता पगातोरे इंता. दीनहेंदाल मीकु मात्रम पायदा आता. गानि अब्राहाम, इसाक, याकोब ई एनकटा पेद्दाल्कुंक हीता पोल्ले परकारम यहुदिल्क इंदकेगुडा पेनदा पावरमगल्ला लोक्कुले आंदुर.†

29 बारित्ते वरम हियमळता बारेमते आधि, दग्गेर्क केयकुनना बारेमते आधि, पेन बस्केने पजोळ्ळ आयो.

30 यहुदि आयवोर मिमेट, मुन्ने पेनदा पोल्ले केंजाकोदिर. गानि इंदके यहुदिल्क पेनदा पोल्लेतुन केंजवाहेंका पेन मीकुन दग्गेरा कीसि मीवापोरो दया कीता.

31 अल्हेने इंदके यहुदिल्क पेनदा पोल्ले केंजसेक हिल्लुर. अदुनहाटी पेन मीवापोरो दया कीता. इदे कुपहिंदाल उंदि रोजु ओरपोरोगुडा पेन दया कीता.

32 बारित्ते, पेनदुक अंतोर लोक्कुलुनपोरो दया कियानद मंता. अदुनहाटी पेन यहुदिल्कुन, यहुदि आयवोर्कुन अंतोर्कुन दाना पोल्ले केंजाकोटा, गळसु कीसि इरता.

33 ओहो, मावा पेनदा दनम, बुदिदे आनि तेल्वि बच्चोन पेद्देद आंद! अद बल्हा न्यायम कीता, बस्के कीता, इदुन बारे एरपाट किया परीर. दाना हरी बोर्के तेळियो.

* 11:27 यसायाह 59:20-21; 27:9 † 11:28 पेन पेद्दाल्कुंक हीता पोल्ले उलयति 12:2-3 वचनाल्कुने रासि मंता.

34 दर्मसास्त्रमते इल्हा रासि मंता:

“पेनदा विचाराल्कुन बोर एपाट किया परंतोर? पेनदुक बोरन्ना बुदिदे वेहा परंतोर?*

35 हिलाकोटे बोरन्ना पेनदुक बाकिक हीतोर मंतोरा, दान मर्रा तिरियसि तल्कालय?* हिल्ले.”

36 दुनियाते मनानव अन्नि पेनदागटाले वातां, अन्नि अदे पुटिस्ता, दुनियाते मनानव अन्नि दानाहाटीगे मंतां. युगा-युगाल्कुनदाका दानदे महिमा आयि, आमीन.

12

मीवा पिस्वरतुन पेनदुक अप्पजेप्पट

1 अत्ते विस्वासल्कुनिटा! पेन मनापोर्री कीता दयातुन मति कीसि, नना मीकुन बतिमलाडसि विनति कियानद बतल इत्ते, मिमेट मीवा पिस्वरतुन पवित्र इरसि, पेनदुक नचनसौटा मोक्कु हीताप मी पिस्वरतुन जीवाते मननेकेन अप्पजेप्पट. इल्हा कीतेन मिमेट पेनदा निजम सेवा कीसि तलस्कुत्ताप आंता.

2 मिमेट इद दुनियातोर पिसताप पिस्सामान्नि गानि मिमेट मीवा मनस् मार्सकुंचि पेनदुक नचचना पिस्वर पिस्सट. अस्के पेनदा इच्चा बतलो एपाट कीतिर. एपाट कीसि, “अद इच्चा वेल्लेन बेसतद, कुसि हियानद, बतले तप्पु हिल्लवद,” इंचि मीकु तेळियंता.

3 पेन दाना कुर्पाते नाकुन सेवक इंचि निलाहता, दानहाटी नना मीकु वरोर-वरोक बतल वेहसेक इत्ते, पेन मीकु तूसि हीता विस्वासमता लेक्का परकारमे वळ्ळकना अचोने, दानकन्ना एक्को विचारम कियमट.

4 मना मेंदुल उंदे गानि दान्क कय्क, काल्क, कळ्ळक, केळ्ळक, तोड्डिड, मोसोर तल्ला इवन्नि मंतां. इवन्नि उंदे कबळ किय्यका, वैरे-वैरे कबाहक कीतां.

5 अल्हेन मनमगुडा वेल्लेन मंदि अयनागानि किरिस्तुनतोनि कलियसि उंदे मेंदुललेहका मंतोम. इंचि मनम कय्क-काल्कुनलेहका उंदे मेंदुलक अंटिस मंचि वरोक-वरोर बेस कलियसि मंतोम.

6 पेन मनापोर्री कुर्पा हुप्पिचि मनाकु वरोर-वरोक उंद-उंदि वरम हीता. आ वरमतुन एपाट कीसि मनम पेनदा सेवा किय्युळ गावाले. ओक्कला बोनकन्ना पेनदाहेदाल कबुर तच्चि वेहना वरम दोर्कते, ओर ओना विस्वासमता लेक्कातेन अद कबळ कियगोम.

7 सेवा कियना वरम दोर्कतोर ओर विस्वासमते सेवा कियगोम, पेनदा पोल्ले कराहना वरम दोर्कतोर ओर विस्वासमते पेनदा पोल्ले कराहना कबळ कियगोम.

8 कराहचि दैरेनेम हियना वरम दोर्कतोर कराहचेके दैरेनेम हीसेक होनना, दानम किया परानोर ओर पूरा मनसुनाल दानम कियगोम, लीडर आसि लोकुल्कुन ताकसना वरम दोर्कतोर जिम्मेदारिते ओर्कुन ताकिचगोम आनि दया कियना वरम दोर्कतोर ओर कुसिते दया कियगोम.

9 लोकुल्कुंक हुप्सना इंचि पावरम कियमट, निजम पावरम कीम्ट. तप्पु कबाहकुन हय्समट, बस्केळ्ळक बेस कबाहक कीसेक मंट.

10 उंदि कुट्टंबतोरलेसी वरोक-वरोर बेस पावरम कीकुंट, वरोक-वरोर कदर हियनेके, मनाकन्ना एक्को इंकावरोक कदर हीम्ट.

11 कबळते बस्केने लंडु कियमट, पेनदा सेवा कियनाहाटी मीवा जीवा बस्केळ्ळक उसार ईरंट.

12 पेन हीता आसेते मिमेट बस्केळ्ळक कूस मंट. तिप्पल्क वायिनागानि पजोळ्ळक होनाकोटा ओर्सकुंट. बस्केळ्ळक पारतना कीसेके मंट.

13 पेनदा लोकुल्कुंक अवसरम अरतस्के मिहगा मत्तद ओर्क हीसि सहायम कीम्ट, बोरन्ना विस्वासल्क मी लोन वातस्के ओरा सेवा कियालय बस्केळ्ळक तयार मंट.

14 मीकु तकलिप हियानोर्कुंक आसिवांद हीम्ट. आसिवांद हीम्ट गानि सापनेम हियमट.

15 कुसिते मननोरतोनि मिमेटगुडा कुसिते मंट, अळानोरतोनि मिमेटगुडा अळट.

16 अंतोरतोनि बेस कलियसि मंट, पोमाडिंगि वेहकुन्मट. कदर हिल्ला लोकुल्कुनतोनि बेस कूळसि मंट, मोमोते तेल्विगल्लोरम इनकुनमट.

17 बोरन्ना मीकु तकलिप हीते, मिमेट ओर्क तकलिप हीसि बदला येतमट. अंतोरा नदरते बद बेसो, अदे कियना विचारमते बस्केळ्ळक मंट.

18 कुदुरतच्चोन अंतोरतोनि बेस कलियसि सांतिते मनना कोसिस कीम्ट.

19 “बदला येतना कबळ नावद आंद, मिमेट बदला येतमट,”* इंचि पेन वेहता पोल्ले पुस्तकमते रासि मंता. अदुनहाटी नावा पावरमगल्ला विस्वासुल्कुनिटा, मिमेट बदला येतमट, ओरा बदला पेन येतंता, ओर्कुन पेनदुक होळसीम्ट.

20 अल्हा पगा येतनदानकन्ना

“मीवा पगातोर कर्बुने मत्तस्के ओर्के गाटो दोस्सट,
दूपाते मत्तस्के एर हीम्ट.

अल्हा कीते, अय्यो! मोमोट बच्चोन पेद्दा तप्पु कीतोम,

इनकुंचि ओरद-ओर्के सिग्गु वांता.”*

21 मीवा कय्दाल सेड्डा कबाहक आयाकोटा उसारते मंड, बेसता कबाहक कीसि सेड्डा कबाहकुन ओळिच्चट.

13

अदिकारिना कय्दा हिळ्ळ मंदना

1 इदु दुनियापोर्रो मननव अन्नि अदिकाराल्क पेनदाहेंदाले वातव आंद, इंदके राज्येम कियनोर्कगुडा पेने अदिकारम हीता. अदुनहाटी राज्येम कियनोर वेहाताप अंदोर बेस केंजिस ताका पीता.

2 बारित्ते, अदिकारि वेहाताप ताकवोर, पेन निलाहता पद्दतकुंक विरोद कीताप आंता. अल्हा ताकवोर ओनद-ओर सिक्सा दोर्किच्चुंतोर.

3 बेसता कबाहक कियानोंकु अदिकारिना वें मन्नो, तप्पु कबळ कियानोंक अदिकारिना वें मंता. अदुनहाटी अदिकारिक वेरियाकोटा मंदना इत्ते, मिमेट सलेमते ताकट. अस्के ओर मीकुन मेच्चुकुंतोर.

4 मीवा बेसताहाटीगे अदिकारिल्क पेनदा सेवाकुल्कुनलेसी कबळ कीसेक मंतुर. ओबकला मिमेटगिंटा बतलन्ना तप्पु कीते ओर मीकु सिक्सा हीतुरे, इंचि मिमेट ओर्के वेरियसि मना पीता. तप्पु कबळ कियानोर्कुंक सिक्सा हियनाहाटीगे पेन ओर्कुन निलाहता.

5 अदुनहाटी मिमेट सिक्साताल सिराप तपिच्चुकुनालय आयो गानि, मना आत्मातुन कूस ईरलय ओर वेहाताप ताका पीता.

6 देसेमतुन ताकसना अदिकारिल्क पेनदा सेवकुल्के आंदुर. अदुनहाटी मिमेट ओर्के कर दोहसेक मंतरि.

7 सरकाक्क बतलय्ते हियना मंतांगो अव हीसीम्ट, कर दोहनद दोहट्ट, तासिल दोहनद दोहट्ट, अदिकारिल्कुंक वेरियसि मनना इत्ते ओर्के वेरियट, बोर्के कदर हियना मंता ओर्के कदर हीम्ट.

8 मिमेट इंकावरोन पावरम कीम्ट, पावरम कियमळ तप्पा बोर्के आयि बदे पोल्लेता बाकि मनमट. अल्हा मत्तोर मूसाना नियमतुन पालन कीताप आंतोर.

9 अदुनहाटी, “बोगमतनम कियमट, बोर्कुन हक्कमट, दोंगातनम कियमट, इंका वरोनदुनपोर्रो आस्ति कियमट,”* इंचि आदेसकुने रासि मंता. इंका बवन्ना वेरे नियमकु मत्ते, अव अन्निगुडा उंदे पोल्लेते कलियंतां, अद बद पोल्ले इत्ते, “नीवद निमे बच्चोन पावरम कीकुंतिनो अचोने वेरेतोर्कुनगुडा पावरम कीम.”*

10 वेरेतोरपोर्रो पावरम ह्पिचनोर, ओरा नुकसान किय्योर. अदुनहाटी पावरमता पोल्लेने, दर्मसास्त्रमता पोल्लेने निजम आंतां.

11 मिमेट इवनि तप्पाकोटा कियना. मनाहाटी दुनियाताल मुक्ति हियना पेनदा वेला वेल्लेन दगोरा एत्ता. मनम सामिन विस्वासम कीता आ वेलाकन्ना, इंदके मना मुक्ति दगोरा मंता. अदुनहाटी मिमेट निद्रताल तेदाना वेला वाता. तेदसि वेलातुन एरपाट कीसि ताकट.

12 इंदके हीकट मारालय आसि, पोळ्द पेय्सालय आता. अदुनहाटी हीकटते कियानसोंटव कराब कबाहकुन होळसिसि वेलगुने कियानसोंटा बेसता कबाहकुन मना जीवाते एतकुनक्रोम.

13 पोद्दला ओप्पनालायक मनम ताकाना. अदुनहाटी लावारिस तिरिया मनि, कराब पाटि कियामनि, रिम्मा वायानव उनामनि, बोगम कबाहक कियामनि, जगडाल्क कियामनि, इंकावरोन पोर्रो कळ्ळ पोत्ता मनि, गानि मनम बेसता हर्दे ताकाना.

14 इत्ते, सामि येसु किरिस्तुना पोल्लेन मना जीवाते, मना मनसुनाल एतकुनना. मना मनसुने कराब गुनालकुंक हरि हियमट.

14

इंकावरोना कदर कीम्ट

1 बोर अय्ते विस्वासमते कमजोर मंतोर, ओन्क बेस कदर हीसि मीलोपो कल्पट. गानि ओनतोनि बद् बेसतद्, बद् बेसतद् आयो इंचि वळ्कसेक मनमट.

2 तिममळ बारेमते केजट. विस्वासमते मनानोरव्टेटाल इच्चुर बारे, “तिननव बवय्ते मंतांगो, आन्नि तिनावच्चु,” इंचि इंतुर, गानि विस्वासमते पुंन वातोर इच्चुर बारे, “हव्वि तिनामान्नि, सादा कुसिर तिनमळे बेस,” इंचि इंतुर.

3 हव्वि तिनानोर आयि, तिनवोर आयि, ओर इव्वुर्कुन पेन दाना मनकालोर इंचि पेर्कुत्ता. अदुनहाटी हव्वि तिनानोर तिनवोन पास्कमनि, हव्वि तिनवोर तिनानोनपोर्रो तप्पु दोस्सामान्नि.

4 इकावरोना जीतागान हळसि, “निमे बेस कबळ कीसंतिना हिल्लेना” इंचि वेहानद् मीक्कु अक्सरम हिल्ले. अद् कबटा लेक्का ओना मालके हळांतोर. पेन दाना मनकालोर्कुन गट्टिगा निल्हा परांता, अदुनहाटी असोटा विस्वासुल्क गट्टिगेन निल्लंतुर.

5 बोरो-बोरो बदाना उंदि रोजुन आन्नि रोजकुंकनना बेसता रोजु इंतुर. इंका बोरो बारे आन्नि रोजुकु उंदेतीर समानमे इंचि इंतुर. बोरो आयिर मी मनसुने बद् बेसतद् इंचि अनपिस्ते अल्हेन कीम्पु.

6 बोरोना बदाना उंदि रोजुन आन्नि रोजकुंकनना बेसता रोज इंचि नोमते, सामिनाहाटीगे नोमंतोर. आन्नि तिनानोरगुडा सामिनाहाटी तितोर आनि पेनदुक दन्यवाद कीतोर. बोर अय्ते तिन्नोर ओरगुडा सामिनाहाटी तिनाकोटा मंचि पेनदुक दन्यवाद कीसेके मनांतोर.

7-8 मनालोपो बोरो आयिर, संतम ओनाहाटीगे इंचि पिसोर, सामिनाहाटी पिस्संतोर. हायिनागानि सामिनाहाटीगे हांतोर. इल्हा मनम हायिना, पिस्सिना सामिना लोकुल्कुमे आंदुम.

9 जीवाते मत्तोर आयि, हासोत्तोर आयि, अंतोर्कुंक सामि आसि मनना इंचि किरिस्तु हासि मरा जीवाते तेदतोर.

10 अदुनहाटी विस्वासमते गट्टिगा हिलुवा विस्वासिर आयिर, विस्वासमते गट्टिगा मत्ता विस्वासिर आयिर, निमे ओरापोर्रो तप्पु बारि दोस्सतिन? ओर्कुन बारि पास्कंतिन? बारित्ते मनद् अंतोरद् उंदि रोज पेनदा राजगद्देता मुन्ने न्यायम आयना मता.

11 दीना बारेमते पेनदा पुस्तकमते इल्हा रासि मंता:

“नना ओट्टु तिंचि वेहासेक मंतन, अंतोर लोकुल्क नावा मुन्ने टोंगरां ऊनसि,
ननाने पेन इंचि एरपाट कियानुर.”*

इंचि मंता.

12 अदुनहाटी मनम अंतोरम पेनदा मुन्ने नित्तिसि मना लेक्का हियापीता.

इंकावरोन पापमते अरहमट

13 इंदकेटाल मनम वरोना पोरो वरोर तप्पु दोस्सामान्नि. इच्चोरे आयाका, दंटाता विस्वासिन विस्वासमताल तपिचचना कबाहक, पापमते अरहना कबाहक मिमेट कियमट, दीन मति ईरंट.

14 नना येसु सामिनतोनि कलियसि मंतन इंचि आन्नि तिडिं नाकु ओज्जंतां, इदु नना एरपाट कीकुत्तन. गानि बोर्क अय्ते बदाना तिडि ओज्जाकोटे, ओर अदुन तिनाकोटा मत्तेने बेस मंता.

15 निमे तिनानवुन हळसि, पूना विस्वासुल्कुना मनसु नाराज आसि पेनदुन होळसीते, नीवा लोपो पेनदा पावरम हिल्ले इत्तापे. असल ओराहाटीगुडा किरिस्तु हातोर, गानि निमे नी गाटोताहेंदाल ओर्कुन नासडेम कियमा.

16 इत्ते, “नना बेस कीसंतन, बिल्कुल तप्पा हिल्लेन इनकुत्तिन,” गानि इंकावरोना नदरते निमे तप्यंतन. दीनहेंदाल नीवदे बदनाम आंता. इंचि तिनूळ-उनुळते जेगर्ता मन्नु.

17 पेनदा राज्येम, इत्ते मना पिस्वर पोरो किरिस्ते राज्येम कियना. दाना राज्येम इत्ते तिनमळ-उनमळता पोलेल्लेंगे अचोने इंचि इनकुनमट गानि पेनदा मुन्ने सत्तेमते पिसमळ, पवित्र आत्माहेंदाल दोर्कना सांति, आनंदमते मनमळ आंद.

18 इल्हा किरिस्तुना सेवा कीतीन पेन मेच्चुंकता, लोकुल्कुना नड्डुमगुडा ओनकु कदर दोर्कता.

19 अदुनहाटी मनम बस्केळ्ळक सांति दोर्कानव आनि विस्वासमते बेर्सना कबाहक कीकोम.

20 तिडिहाटी पेनदा कबळतुन नासडेम कियमट. आन्नि तिडि बेसतवे गानि बदाना तिडि बोनकनना इस्टम हिलाकोटे, दान मनम तिंचि ओन विस्वासमताल हिळु अरहमळ मनद् तप्पे आंद.

21 हव्वि तिनमळ आयि, अंगुर कल्लु उनमळ आयि, इंका बतलान्ना आयि पूना विस्वासुल्कुंक इस्टम हिलाकोटे, निमे इव अन्निनाल लक्कु मत्तेने बेस मंता.

22 इवुना बारेमते मीवा विस्वासम बल्हा मंतानो, अद् मीक्कु आनि पेनदुके एरपाट मनगोम. बोर मनकल अय्ते ओना विस्वासमतुन पीसि “तप्तन-हेळतन” इंचेके अनमानम कियाकोटा मनांतोर, ओर वेल्लेन आसिवाद् दोर्कतोर आंदुर.

23 गानि अनमानम कीसेक तिनानोर, पेनदा मुन्ने तप्पु कीतोना लेक्कतेने वांतोर. बारित्ते ओर पेन पोरोँ विस्वासम कियका तिचेके मंतोर. पेन पोरोँ विस्वासम कियवा कबाहक, ओन पापमते अरहंतां.

15

विस्वासमते कमजोर मत्तोर्कुंक सहायम कियना

1 अदुनहाटीं, विस्वासमते गाट्टेगा मत्तोल्म मनम सिराप मनाकु सुकम हियना कबाहके कियकोटा विस्वासमते कमजोर मत्तोर्कुना कबाहकुन हळसि ओप्के पीसि मंदगोम.

2 मना दंटातोर्कुना बेसताहाटीं ओरा विस्वासम बेर्सना इंचि ओर्कुन कूस ईरना लायक मनम मनमळ गावाले.

3 किरिस्तु इद बूमिपोरोँ वातस्के ओनद ओरे कूस कीकुनालय वायाहिल्लोर. गानि, “पेनबाबा, नीकुन अपमानम कीतोरा अपमानम नाक आया पीता.”* इंचि किरिस्तुना बारेमते दर्मसास्त्रमते रासि मत्ताप जर्गता.

4 दर्मसास्त्रमते मुन्नेटाले रासि मत्तद उंदि-उंदि पोल्ले मनाकु कराहनाहाटीगे मंता. अदुन करियते मनम ओप्के पीसि दैरेमते पिस्सा परांतोम इत्ता आसे दोर्कंता.

5 अदुनहाटीं मिमेट येसु किरिस्तुना विचारम मत्ताप, अंतोर कूळसि मंदालय पेन मीकु दैरेमते, ओप्के हियिकांटी.

6 इल्हा मिमेट अंतोर उंदे मनसु, उंदे लेंग आसि मना सामि येसु किरिस्तुना पेनबाबन तल्सकुना परांतिर.

7 किरिस्तु मीकुन बल्हा ओक्कुत्तोर, अल्हेने मिमेटगुडा विस्वासमते कमजोर मत्तोर्कुन पेनदुक महिमा दोर्कना इंचि ओक्कुंद.

8 नना वेहानद बतल इत्ते, एनकटा यहदि पेदुदालकुंक पेन पोल्ले हीसि मत्ता, अद पोल्ले निजम आयाना इंचि, कतना आतोरा लोप्पो किरिस्तु सेवक आसि वातोर. इद पोल्लेतुन मर्गमट.

9 अचोने आयाका यहदि आयवोरगुडा पेन ओरापोरोँ कीता दयाताहाटीं दान तल्सकुनना इंचि किरिस्तु वातोर. बजन संहिताते इल्हा मंता:

“नना यहदि आयवोरतोनि कलियसि, नीकुन तल्सकुंतन.”*

10 इंका इल्हागुडा रासि मंता.

“ए यहदि आयवोरिता, पेनदा लोकुल्कुनतोनि मिमेटगुडा कूस आम्द.”

11 मराँ इल्हागुडा रासि मंता:

“ए यहदि आयवा लोकुरिता, मिमेट सामिन तल्सकुंद, पूरा देसेमतोर ओन तल्सकुंद.”*

12 मराँ यसायाहल रासतोर:

“यिस्साना वंसंमताल वरोर पुट्टानुर, ओर अन्नि जातिनोरपोरोँ राज्येम कियानुर,

इंका अंतोर ओनपोरोँ आसे ईरनुर.”*

13 मिमेट विस्वासम कीताहाटीं, मीकु आसे हियना पेन अन्नि तीरकुना कुसि, सांति हियिकांटी. इल्हा पवित्र आत्माता ताकतहेंदाल मीवा आसे बेरस्सेक होंदोर.

14 विस्वासुल्कुनिटा! मीलोप्पो वेल्ले बेसतनम आनि तेल्चि मंता. अदुनहाटीं मिमेट वरोँक-वरोर बुद्दि वेहकुना परांतिर इंचि नाक पुरागा बरोसा मंता.

15-16 पेनदा कुपहेंदाल यहदि आयवोरा नड्डुम येसु किरिस्तुना सेवक आसि पेर्मनालेसी बेसता कबुर वेहालय नाकु अदिकारम दोर्कंता. अदुनहाटीं कोन्नि पोल्ले मीकु मति कीसि हियना इंचि मीकु दैरेमते रासतन. ना मनसुने बतल मंता इत्ते, यहदि आयवोर पवित्र आत्माहेंदाल पवित्र आयाना आनि पेन ओर्कुन ओक्कुनालायक कियना.

17 येसु किरिस्तुना लोप्पो कलियसि मंचि, इल्हा पेनदा सेवा कीसेके इंचि नना वेल्लेन कुसिते मंतन.

18-19 यहदि आयवोर नना वेहता पोल्लेन केंजतुर, नना कीतव चिन्हां आनि इंचंत्रमता कबाहकुन हळतुर. केंजसि, हळसि ओर किरिस्तुनपोरोँ विस्वासम इत्तुर. इल्हा नना पवित्र आत्माता बलमते येस्सलेम सहरताल इल्रिकुम एरिया एवनदाका किरिस्तुना बेसता कबुरतुन वेहतन. अदुनहाटीं किरिस्तुनाहेंदाल कीता पोल्लेगें नना दैरेमते वेहतन. इवुंक तप्पा वेरे बवे पोल्ले वेहोन.

20 किरिस्तुना पोरोल बगा अयते केंजा हिल्लुर अगा होंचि नना बेसता कबुर वेहना इंचि नावा मनसु तनलाळसेक मंता. गानि इंकावरोर दोहता पुनादिपोरोँ लोन दोहमळ इस्टम हिल्लाहेंका, इंकावरोर वेहता नाहकुने होंचि वेहमळ नाकु इस्टम हिल्ले.

21 गानि दर्मसास्त्रमते इल्हा रासि मंता:

“ओना बारेमते बेसता कबुर एरपाट हिल्लोर ओन हळानुर.

ओना बारेमते केंजबोर, ओर्क तेळियार.”*

पौलुस रोम सहरते होलतो

- 22 इल्हा बेसता कबुर एववागा नना होनगोम इत्ता विचारमतेन मनुंदुन, अदुनहाटी नना मिहगा वाया पराहिल्लेन.
- 23 गानि इंदके, हीदा एरियाने येसु किरिस्तुना बेसता कबुर वेहना कबळतुन महतन, इगे बतल कबळ हिल्ले. अल्हेने वेल्लेने वर्सानाल मिहगा वांतन इंचि नावा जीवा तनलाळसेक मंता.
- 24 अदुनहाटी नना स्पेन देसेम होननेके मिहगा वांतन इंचि आसे पळसंतन. मीवातोनि कोनिन रोजकु मंचि नावा मनसु निडता पजा नाकुन अगटाल मुन्नेटा पयनेमताहाटी साल्ना कीम्टु.
- 25 गानि इंदके नना पेनदा लोकलुकुक सेवा कियालय येस्सलेम दांतन.
- 26 बारित्ते मेसिडोनिया, अकाया एरियातोरे विस्वासुलक संदा वाटसि, येस्सलेम सहरते मत्ता पेनदा लोकलुकुनाल बोर अयते गरिब मंतुरो ओर्क सहायम कियना इंचि विचारम कीसि नाक हीतुर.
- 27 ओर इल्हा कीसि कूस मत्तुर, इल्हा कियमळे गावाले. बारित्ते यहूदि आयवोर्क पेनदा लोप्पो कलियालय आसिर्वाद दोर्कता, ओर यहूदि लोकलुकुक अक्सरम मत्तवुना सेवा कियमळ गावाले.
- 28 अदुनहाटी जमा कीता कोलतन नना बेस ओसि ओर्क अप्पजेपंतन, पजा अगटाल होननेके मीकु कलियसि स्पेन देसेम दांतन.
- 29 नना मिहगा वातस्के मनम अंतोरम किरिस्तुना आसिर्वादे निंडांतोम इंचि नाकु एरपाटे.
- 30-31 विस्वासुलकुनिटा! मना येसु किरिस्तु सामिनाहेंदाल आनि पवित्र आत्माता पावरमहेंदाल मीकु बतल विनंति कीसेक इत्ते, यहूदिया एरियाते मनना अविस्वासि लोकलुकुना कय्दाल नना पिस्सना आनि येस्सलेमते नना कियना सेवातुन पेनदा लोकलुक ओप्कुनना, इंचि मिमेट नावाहाटी उंदि मनसुने पेनदुक पारतना कीम्टु.
- 32 मनम पारतना कीताप पेनदुक इस्टम मत्ते, नना मिहगा वासि कोनिन रोजकु मीवातोनि कुसिते मनंतन.
- 33 सांति हिच्यना पेन मीवा अंतोरतोनि मन्निकांटी. आमीन.

16

विस्वासुलुकुक पौलुस जोहार वेहतोर

- 1 मना विस्वासि अक्कल पीबे इनानद बच्चोरो बेसतद आंद. अद किकिरया नाटेना कलिसियाते सेवा कीसेक मंता.
- 2 अद वेल्लेटोर्क सहायम कीता, अल्हेने नाकागुडा सहायम कीता. अद मिहगा वायानय्ते, पेनदा लोकलुक ओप्पनालायक मिमेट दान बेस हळकुंटु. अल्हेने दान्क बतलनना अक्सरम मत्ते सहायम कीम्टु.
- 3 पिरिसकिला आनि दाना मुय्दो अकविलांक नावाहेंदाल जोहार वेहाट. ओर नावातोनि येसु किरिस्तुना सेवा कियानोर आंदुर.
- 4 ओर नाकुन पिसागोटनाहाटी ओरा जीवातुन हियालयगुडा तयार मत्तुर. नना ओर्क दन्यवाद कीतन. सिराप ननाने आयो गानि यहूदि आयवोरा अन्नि कलिसियानोरगुडा दन्यवाद कीतुर.
- 5 ओरा लोतगा जमा आयाना कलिसियातोर्कगुडा नावाहेंदाल जोहार वेहाट. आसिया एरियाते अंतोर्कनना मुन्ने किरिस्तुन विस्वासम कीतोरे ना दंटागाल इपेनितुस इननोंक, नावा जोहार वेहाटु.
- 6 मीवाहाटी वेल्ले कस्टपळतद मरियमुंक नावा जोहार वेहाटु.
- 7 अंदरिनिकुस आनि युनियास ओर नावा जीवातोरे आंदुर, ओर नातोनि जेलने मत्तुर, ओर प्रेरितुलुकुना लोप्पो पोरोल पेयसतोरे इंचि अंतोर ओर्कुन एरपाट कीतुर, ओर नाकनना मुन्नेने किरिस्तुन विस्वासम कीतुर, ओर्क नावा जोहार वेहाट.
- 8 सामिन लोप्पो ना पावरमगल्ला अपलितुसुंक जोहार.
- 9 मावातोनि कलियसि किरिस्तुना सेवा कियानोर उरबानुसुंक नावा जोहार, अल्हेने नावा पावरमगल्ला इस्तुकुसुंकगुडा नावा जोहार वेहाट.
- 10 किरिस्तुनलोप्पो तकलपि वायिनागानि होळसाकोटा इमानदारते मत्ता अपिलेस इननोंक नावा जोहार. अरिस्तुब्लुसना लोतोर्कुकगुडा जोहार वेहाट.
- 11 नावा जीवातोरे हेरोदियोकु जोहार वेहाट. नरकियसुना लोतोरे बोर अयते सामिन विस्वासम कीतुर ओर्क जोहार वेहाट.
- 12 तिस्रेना आनि तिस्रेसा इनना अक्काहक सामिनाहाटी कस्टपळतां, अवुंक जोहार वेहाट. नावा पावरमगल्ला परसिस इनना अक्कलगुडा सामिनाहाटी वेल्ले कस्टपळता, दान्क जोहार वेहाट.
- 13 बोनय्ते पेन पेरकुत्ता, आ स्पुस इननोंक आनि ओना यावल इत्ते नावा यावानसोर्ट, ओर्क नावाहेंदाल जोहार वेहाट.

14 असुकिरितुसुंक, पिलगोनिक, हिरमेसुंक, पत्रुबासुंक आनि हिर्मोसुंक जोहार वेहाट, ओरतोनि मनना विस्वासुलुकुंकगुडा जोहार.

15 पिलोलोगसुंक, युलियंक, नेरयसुंक आनि ओना हेलडुक जोहार वेहाट, उलुम्पासुंक आनि ओरतोनि मनना पेनदा लोकुकुकुंक जोहार.

16 मिमेट वरोंक वरोर कलियतस्के पवित्र पावरमते जोहार कीम्टु. किरिस्तुना अन्नि कलिसियानाहेंदाल मीकु जोहार.

17 विस्वासुलुकुनिटा! इच्चुर लोकुकुलक मिमेट करियता पोल्लेन हेळाहलय ई पोल्लेक विरोदमते वैरे पोल्लें वेहचि मीलोप्पो वरोनद-वरोंक अर्राकोंटा कीतुर. असंटोरतोनि उसारते मंचि, ओर्के लक्कु मंटु इंचि नना मीकु विनंति कीसेक मंतन.

18 असंटोर मना सामि किरिस्तुना सेवा किच्युर, गानि ओरा पीटाहाटी सेवा कीतुर. ओरा तिच्यटा पोल्लेनाहेंदाल सीदा-सादा लोकुकुलुकुन मुळहंतुर.

19 बेसता कबुरता पोल्लें मत्ताप मिमेट ताकसेक इंचि अंटोर केंजतुर, अदुनहाटी नना वेल्ले कुसिते मंतन. मिमेट बेसता पोल्लेनहाटी बुदिदतोर आसि मंटु, सेडुडा पोल्लेनहाटी लक्कु मंटु इंचि नना मीकु वेहासेक मंतन.

20 मनाकु सांति हियना पेन बिराने देय्यमतुन मीवा कालुकुनगा तच्चि जारसि पोहंता. मना सामि येसु किरिस्तुनद मीवापोरों कुर्पा मन्निकांटी, आमैन.

21 नावातोनि कलियसि किरिस्तुना सेवा कियानोर तिमोतिनाहेंदाल मीकु जोहार. नावा जीवातोर लुकियुस, यासोन आनि सोसिपत्रु ईराहेंदाल मीकु जोहार.

22 पौलुस वेहाताप इद सिट्टिटुन नना तेरतियुस इननोन रासतन, सामिना लोप्पो मीकु अंटोर्क जोहार.

23-24 नाकुन, कलिसियातोकुन हेडमितोरलेसी बेस हळना गयुसनाहेंदाल मीकु जोहार. इद नाटेना कोल्लना व्यवहार कियानोर, इरास्तुसना हेंदाल मीकु जोहार. अल्हैने कवारतुस दादानाहेंदाल मीकु जोहार.

25-27 येसु किरिस्तुना बारेमते नना वेहता बेसता कबुर परकारम, पेन मीकुन विस्वासमते इंका गट्टिगा किया परांता. इद बेसता कबुर एनकटा कालमताल मर्ममते मत्ता. गानि इंदके पेनदा कबुरतोर रासता पुस्तकालुकुना हेंदाल मर्ममते मत्ता बेसता कबुरतुन बच्यारा कियालय माकु वेहता. अंटोर लोकुकुलक इद कबुरतुन विस्वासम कीसि, पेनदा पोल्लेने ताकाना इंचि पेन आदेस हीता. आ बस्केळक मनना उंदे तेल्विगल्ला पेनदुन, मनम येसु किरिस्तुनाहेंदाल बस्केळक महिमा कीकोम. आमीन.

1 कुरेंति

कुरेंति विस्वासुल्लुकुंक पौलसना मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 56

कुरेंति सहरता विस्वासुल्लुकुनाहाटी इपीसि सहरताल प्रेरित पौलस इद सिट्टि रासतोर. किरिस्तुना बेसता कबुर वेहालय रोडो मल्ला वातस्के, ई कुरेंति सहरते कलिसिया सुस्व कीतोर. अगा कोन्नि रोजकु मंचि अगटाल होला पजा, अद कलिसियाते वेल्लेने समस्यां तयार आतां. अव समस्यांकु समादान वेहालय कुरेंति सहरता विस्वासुल्लुकुंक इद मोदाटा सिट्टि रासतोर. आ कलिसियातोर्कुंक वरोनद-वरोक अर्काकोटा आयमळ, पापम कबळ कियमळ इल्हा जर्गसेक मत्ता. इवन्निट्टुंक समादानम बेसता कबुरता हेंदाले दोर्का परंता इंचि पौलस रासतोर.

मनम किरिस्तुना मनकालोर्कुम इंचि वट्टिदे मनानायो, गानि किरिस्तुनलेसी ताकाना, पवित्र मनमळते बेस्सेके होंदना, वरोक-वरोर पावरम कियमळे पेद्दा पोल्ले आंद, इंचि रासतोर.

बगा बतल मंता

जोहार आनि परिचयम 1:1-9

कलिसियाते वरोनद वरोक अर्काकोटा आयमळ 1:10-4:21

कुटंबते कलियसि पिसमळ 5:1-7:40

किरिस्तुनोर आनि बोम्मांक मोळकानोर 8:1-11:1

कलिसियाते कलियसि पिसमळ आनि आरादना 11:2-14:40

किरिस्तु आनि ओना विस्वासुल्लुकु मर्रा जीवाते तेदमळ 15:1-58

यहूदियाता विस्वासुल्लुकुनाहाटी चंदा जमा कियमळ 16:1-4

सतता बारेमते आनि आकिर बोदा 16:5-24

जोहर

1 नना पौलसुन, किरिस्तु येसुना प्रेरित आयालय पेन नाकुन दाना मनसुनाल केयता. नावा आनि सोस्तिनेस दादानाहेंदाल जोहर.*

2 कुरेंति सहरते मनानोर किरिस्तु येसुनलोपो पवित्र आता पेनदा कलिसियातोर्कुंक, आनि वें-वें जेगाने मना सामि इत्ते, ओरा आनि मना येसु किरिस्तुना पोरोलते आरादना कियाना अंटोर बक्तुल्लुकुंक रासता सिट्टि,

3 मना पेनबाबाल आनि सामि येसु किरिस्तुनाहेंदाल कुर्पा, सांति दोर्कसेक मन्निकांटी.

पौलस पेनदुन दन्यवाद कीतोर

4 किरिस्तु येसुनलोपो मीक पेन हीता कुर्पाताहाटी, नना पेनदुन बस्केळक दन्यवाद कीतोर.

5-6 किरिस्तुना गवाइ मीलोपो गाट्टिगा मत्ता इंचि, मिमेट अन्नि तीस्कुने वळ्ळुकुमळते आनि बुद्दिदे निडिस होतिर.

7 अदुनहाटी मिमेट पेनदा बद्दे आत्माता वरमते तक्को हिल्लिर, मिमेट मना सामि येसु किरिस्तु मर्रा वायानद एदुर हळ्सेक मंतिर.

8 सामि येसु किरिस्तु मर्रा वायाना रोजुने मिमेट दोसेम हिलाकोटा मंदना इंचि पेन मीकुन आकिरदाका गाट्टिगा ईरंता.

9 पेन विस्वासम लायकतद आंद. अद दाना मरि मना सामि येसु किरिस्तुनतोनि कूळसि मनालय मीकुन केयता.

विस्वासुल्लुकुंक वरोनद-वरोक अर्काकोटा आयमळ

10-11 विस्वासुल्लुकुनिटा! मीलोपो जगडाल्क आसेक मंतां इंचि क्लोयेना लोतोर नाक वेहतुर. अदुनहाटी मिमेट अंटोर उंदे पोल्लेते ताकाट, मीलोपो वरोनद-वरोक अर्काकोटा मनमट, गानि मिमेट उंदे मनसुने, उंदे विचारमते कलियसि मंट इंचि नना मीक मना सामि येसु किरिस्तुना पोरोलते विनंति कीसेक मंतन.

12 नना वेहना पोल्ले इदे गदा, मीवळेटाल वरोर, “नना पौलसुनोन आंदुन,” इंकावरोर, “नना अप्पुलोसुनोन आंदुन,” इंकावरोर, “नना केपानोन आंदुन,” इंकावरोर, “नना किरिस्तुनोन आंदुन,” इंचि इतिर.

* 1:1 इद सिट्टि पौलस रासतोर, गानि सोस्तिनेस सिराप जोहर वेहतोर.

13 बतल, किरिस्तुन तसुक कीतिरा? पौलस कृसनपोर्रो मीवाहाटी जीवा हीतोरा? हिलाकोटे पौलसुना पोरोलते मिमेट बापतिस्मा एततिरा?

14 नना मिहागटाल क्रिसपुसुक आनि गयसुके बापतिस्मा हीतन, बेस आता ओर्क आयाका बोनके हिया हिल्लेन, पेनदुक दन्यवाद कीतन.

15 हिलाकोटे नावा पोरोलतेन बापतिस्मा एततिर इंचि बोरन्ना इंचि मन्नेर.

16 नना स्टिपनसना लोतोर्कगुडा बापतिस्मा हीतन, ईर आयाका इंका बोर्कन्ना नना हीतना, नाक एर्का हिल्ले.

17 बारित्ते किरिस्तु नाकुन बापतिस्मा हियालय लोहा हिल्लोर, गानि बेसता कखुरतुन वेहालय लोहोर. अदगुडा मनकना बुद्धि मत्ताप आयो, अल्हा वेहानयते किरिस्तु कृसनपोर्रो हाता ताकतद अर्तम मन्ने.

पेनदा ताकत आनि तेल्वि किरिस्तु आंदु

18 कृसता पोले वेहमळ इते नासडेम आयानोराहाटी मुर्कतनम आंदु, गानि पेन मनाकुन पिसागोता, अदुनहाटी पेनदा पोलेले मनाकु बलम आंदु.

19 इदुना बारेमते, दर्मसास्त्रमते इल्हा रासि मंता,

“तेल्विगल्लोर्कुना तेल्वितुन नासडेम कीतन,

उसारगल्लोर्कुना उसारतनमतुन पास्कतन.” *

20 अयते, बगा मंतोर तेल्विगल्लोड? बगा मंतुर दर्मसास्त्रम कराहना गुरूक? ई दुनियाता वाद-विवाद कियानोर बगा मंतुर? इद दुनियातोरा तेल्वि पेनदा मुन्ने मुर्कतनम आंद.

21 बारित्ते, पेनदा तेल्वितुन, दुनियाता लोकूलक ओरा सतता तेल्विते पेनदुन एरपाट किया हिल्लुर. मोमोट बदायते मुर्कतनमता कबुर वेहंतोमो, अदुना हेंदाल विस्वासम कीतोर्क मुक्ति दोर्कना, इदे पेनदुक बेस अनपिचंचता.

22 बारित्ते यहूदिलक अयते चिन्हां गावाले इंतुर, युनानि लोकूलक बारे तेल्वि पहकतुर.

23 गानि मोमोट अयते कृसनपोर्रो हाता किरिस्तुना पोलेलें वेहंतोम. इद यहूदिलकुंक विस्वासम किया परक्सोटा पोलेले आंद. आनि यहूदि आयवोर्कुंक मुर्कतनमतसोटा पोलेले आंद.

24 गानि पेन बोर्कुन अयते केयता, ओर यहूदिलक आयिर, युनानिर आयिर, ओराहाटी पेनदा ताकत, पेनदा तेल्वि किरिस्तु आंदुर.

25 बारित्ते पेनदा मुर्कतनम इत्ते, मनकालोर्कुना तेल्विकन्ना वेल्ले तेल्वितद आंद, पेनदा ताकत कमजोर इत्ते, मनकालोर्कुकन्ना वेल्ले बलमतद आंद.

26 विस्वासल्लुकुनिटा! विचारम कीम्टु, दुनियाता लेक्काते मिमेट तेल्वितोर आयिर, एक्को बलमतोर आयिर, पेद्दा लोतोर आयिर, अयनागानि पेन मीकून केयता.

27 बुद्धि मत्तोर्कुंक सिग्गु वायालय दुनियाते बुद्धि हिल्वोर्कुन पेन परेता. बलमता मनकालोर्कुंक सिग्गु वायालय, दुनियाते बलम हिल्वोर्कुन पेन परेता.

28-29 पेनदा मुन्ने बोरे मनकल पेद्दिकेम कियामान्नि इंचि दुनियाते बतले हिल्वोर्कुन, हय्सवोर्कुन, बतले कबळक ओज्जुवोर्कुन, पेन परेता.

30 पेनदाहेंदाले येसु किरिस्तुनलोप्पो मीवा पिस्वर मंता, किरिस्तुनाहेंदाल मनाकु तेल्वि, नीति, पवित्र आतोम आनि पापमता सिक्साताल पिसतोम.

31 अदुनहाटी, “पेद्दिकेम कियानोर बोरे आयिर, सामि ओनाहाटी बतलयते कीतोरो, अयते ओर पेद्दिकेम कियामोम,” इंचि दर्मसास्त्रमते रासि मंता.

2

कृसनपोर्रोटा किरिस्तुना बारेमते बेसता कबुर

1 विस्वासल्लुकुनिटा! नना मिहागा वातस्के, नावा पेद्दा पोलेलेने हिलाकोटे पेद्दा तेल्विते पेनदा बारेमते गवाइ वेहा हिल्लेन.

2 गानि नना मीवा नड्डुम मननेके कृसुक वेलाड वाटता येसु किरिस्तु आयाका इंका वैरे बद्दे पोलेले वळकोन इंचि निरनायम कीसि मत्तन.

3 नना मिहागा मननेके मेंदुले कमजोर आसि मत्तन. वेल्ले वैरेंते वनुकसेके मत्तन.

4 नावा वळकमळ आनि नना वेहता कबुर, नावा तेल्विता पोलेलेने मनाहिल्ले, गानि पेनदा आत्मा आनि ताकतते निंडसि मत्ता.

5 अदुनहाटी मीवा विस्वासम मनकालोर्कुना तेल्वि परकारम आयो गानि पेनदा ताकत परकारम मनागोम.

पेनदा तेल्वि

6 मोमोट इद दुनियाता हिलाकोटे इद दुनियाते नासडेम आयाना अदिकारिल्कुना तेल्वि वेहोम, गानि विस्वासमते गट्टिगा मत्तोर्कुके तेल्वि वेहंतोम.

7 मोमोट मर्ममते मक्किचि मत्ता पेनदा तेल्वितुन वेहंतोम, अद बूमि पुट्टका मुन्नेने मावा पेदू दातनमहाटी पेन तयार कीसि इरता.

8 ई तेल्विता बारेमते दुनियाता अदिकारिल्कुंक बोर्के तेळिया हिल्ले, ओर्क गिंटा तेळियसि मत्ते, महिमागल्ला सामि येसु किरिस्तुन कूसुनपोर्रो मोल्लां कोहका कोन्नेर.

9 गानि दर्मसास्त्रमते,

“कळ्कुने बोरे हळवव, केळ्कुने बोरे केंजवव,

बोरा मनसुने वायवव पोल्ले, दानपोर्रो पावरम कियानोराहाटी पेन तयार कीसि इर्ता,”

इचि रासि मंता.✧

10 गानि पेन दाना आत्माताहेदाल अबुन मनाकु हुपिस्ता. बारित्ते अद आत्माकु अन्नि एरपाटे, पेनदा मर्ममगुडा एरपाटे.

11 वरोर मनकना विचाराल्क मनकना आत्मा आयका इंका बोर एरपाट कीतोर? अरहेने पेनदा विचाराल्क पेनदा आत्मा आयका इंका बोरे एरपाट किय्योर.

12 इंदके मनाकु दुनियाता आत्मा दोर्काहिल्ले, पेन हीता पोल्ले तेळियालय पेनदा आत्मा मनाकु दोर्कता.

13 माक इव पोल्ले मनकना तेल्विते कराहतव आयो गानि पेनदा आत्माते कराहतव आंदुं, अवे पोल्लेन मीक तेळियागोट्टिसि वेहंतोम.

14 बोनगा अये पेनदा आत्मा हिल्ले ओर पेनदा आत्माता पोल्लेन ओष्कुन्नेर. ओनकु अव मुर्क पोल्ले अनपिचचंतां. बारित्ते अव पोल्ले पेनदा आत्मातेने तेळिया परांतां, अदुनहाटी ओनकु तेळिया पर्रां.

15 बोनगा अये पेनदा आत्मा मंता, ओर अन्नि अर्तम किया परांतोर, गानि ओना बारेमते वैरे मनकल बोरे अर्तम किया पर्रां.

16 इदुन बारेमते,

“सामिना मनसु बोनकु तेळियंता, ओनकु बोर करहा परांतुर?

गानि किरिस्तुना मनसु मनागा मंता,

इचि दर्मसास्त्रमते रासि मंता.”✧

3

पेनदा दासुल्कुना विचारम अलग-अलग मंदनायो

1 विस्वासुल्कुनिटा! पेनदा आत्मा मत्तोर्कुनतोनि वळ्कताप मीवातोनि वळ्का पर्रांहिल्लेन. पेनदा आत्मा हिल्ला दुनियातोरलेसी आनि किरिस्तुनलोप्पो इंदकेगुडा पिलाल्कुनसंतोरे इचि मीवातोनि वळ्कतन.

2 नना मीक पाल उहतन, गाटो तिहा हिल्लेन; बारित्ते मिमेट गाटो तिना पराकोदिर, गानि इंदकेगुडा मिमेट गाटो तिना परानालायक हिल्लिर.

3 बारित्ते इंदकेगुडा मिमेट मेंदुल्ला इच्चा मत्तापे ताकसेक मंतिट. इंकावरोना पोर्रो कळ्क पोत्तना, जगडाल्क कियाना गुनम मंता. अये मिमेट मनकना इच्चाते ताकानोर आयिरा? दुनियाता लोकुल्कुनलेसी ताकसेक हिल्लिरा?

4 मिहगटाल वरोर, “नना पौलुसनोन आंदुन”, इंकावरोर, “नना अप्पुलोसनोन आंदुन” इचि इंतिर. इल्हा मिमेट दुनियातोरलेसी पेनदुन एरपाट कियवोर आतिरा बतला?

5 अप्पुलोस बोर आंदुं? नना पौलुसनोन बोन आंदुं? मोमोट इव्वरमगुडा पेनदा सेवाकुल्कुमे. पेन माक बतल अये कबळ अप्पेपता, अदुन वेहतोम, मिमेट विस्वासम कीतिर.

6 नना पेळे वाटतन, अप्पुलोस एर दोस्तोर, गानि दान बेसांगोटनद पेने आंदुं.

7 इत्ते, पेळे वाटनोर आयिर, एर दोस्सानोर आयिर इर पेदुदोर आयुर, गानि दान बेसांगोटनद पेने पेदुदेदि आंदुं.

8 वरोर वाटनोर, वरोर एर दोस्तोर, इल्हा ओरा-ओरा कबळता इसाबते ओर्क बूति दोर्कार.

9 मोमोट पेनतोनि कलियसि कबळ कियानोर्कुम आंदुम, मिमेट पेनदा नेलितसंतोर, पेनदा लोतसंतोर आदिर.

10 नाक पेन हीता कुर्पाहेदाल, वरोर बेसता मिस्त्रिनलेसी पुनादि दोहतन, दानपोर्रो इंकावरोर रदुदा दोस्सेक मंतोर, इल्हा वरोर-वरोर दानपोर्रो दोस्सानोर बल्हा रदुदा दोस्सेक मंतोर, ओर बेस हळसि दोसना.

- 11 येसु किरिस्ते पुनादि आंदुर. ओर दोहता पुनादि आयाका, इंका बोरे वेंरे पुनादि दोहा पर्र.
- 12 बोरेन्नागिंटा बंगारम, एंडि, एक्को दराता बंडां, कट्टे, जाडि, बुस्सिते पुनादि दोहना मत्ते,
- 13 किरिस्तु मरा वायाना रोजुने अंतोरा कबळ दिसंता. बारित्ते अद रोज ओर तळमितोनि वांतोर, बोरे बतल कबळ कीतोर इंचि तळमिते परिकसा कियमळ जर्गता.
- 14 अद पुनादिपोर्रो दोहता कबळ निल्सि मनानय्ते, ओनकु इनाम दोर्कता.
- 15 बोन्दनना गिंटा ओर कीता कबळ वेसि होते, ओनकु नुकसान आंता. ओर अय्ते पिस्संतोर गानि तळमिताल पेयसताप पिस्संतोर.
- 16 मिमेट पेनदा गुळि आंदिर, पेनदा आत्मा मीलोप्पो मनंता, इद मीक तेळियोना?
- 17 बोरेन्नागिंटा पेनदा गुळितुन नासडेम कियानय्ते, पेन ओन नासडेम कियार. पेनदा गुळि पवित्र मनंता, अद मिमेटे आंदिर.
- 18 बोरे आयिर ओनद-ओरे पसांचकुनामनि. बोरेन्नागिंटा मिहागटाल ई दुनियाते नना तेळ्वितोन इनकुनानय्ते, पेनदा नदरते तेळ्वितोर आयालय, मोदाला मुर्कनलेसी आयापीता.
- 19 दुनियाता तेळ्वि पेनदा मुन्ने मुर्कतनमतद आंद. बारित्ते, “पेन तेळ्वितोर्कुन ओरा उस्सारतनमता लोपो पसांचंता,”* इंचि दर्मसास्त्रमते रासि मंता.
- 20 आनि मरा, “तेळ्वितोर्कुना विचाराल्क एर्तम आंदु इंचि पेनदुक् एरपाटे,”* इंचिगुडा दर्मसास्त्रमते रासि मंता.
- 21 अदुनहाटी नना ईना हेंदोन, नना ओना हेंदोन इंचि मनकालोर्कुना पोर्रो पेद्दिरकेम कियामनि, अन्नि मीवंगे आंदु.
- 22 चौलुस आयिर, अप्पुलोस आयिर, केपाल आयिर, दुनिया आयि, पिस्वर आयि, हामुर आयि, ताकाना कालमता पोल्लें आयि, वायाना कालमता पोल्लें आयि, अन्नि मीवंगे आंदु.
- 23 मिमेट किरिस्तुनोर आंदिर, किरिस्तु पेनदोड आंदुर.

4

पेनदा मर्ममता देक्रेक कियानोर

- 1 अदुनहाटी मोमोट किरिस्तुना सेवाकुलकुम आनि पेनदा मर्ममता देक्रेक कियानोरम आंदुम इंचि मीक तेळियमळ गावाले.
- 2 अल्हने पेनदा मर्ममता देक्रेक कियानोर विस्वासम कियानालायक मनमळ गावाले.
- 3 गानि नाकुन मीवाहेंदाल आयि हिलाकोटे लोकुलकुना पंचायतता हेंदाल आयि, विस्वासमते मंतोरा हिल्लोरा इंचि परिकसा कीसि हळ्मळ गावाले इद नावाहाटी सिन्ना पोल्ले आंद. नावद ननाने न्यायमगुडा किय्योन.
- 4 नहगा बतले दोसेम दिस्सेक हिल्ले, गानि नना दोसेम हिल्वोन आयोन. पेने नाकुन परिकसा कीसि हळ्मता.
- 5 अदुनहाटी न्यायम कियाना वेला वायाका मुन्ने बोने न्यायम कियमट, सामि वायानाल एदुर हळ्मट. ओर हीकटते मक्किस् मत्ता पोल्लेन वेल्गेने तरंतोर, मनसुने मत्तवुन पलाते अरहंतोर. अस्के पेन अंतोर्कुन मिमेट बेस कीतिट इंचि मेचुकुता.
- 6 विस्वासुलकुनिता! नना मीवाहाटी अप्पुलोसना आनि नावा उदाहरन हीसि वेहतन. बारित्ते “दर्मसास्त्रमते रासता पोल्लेंक हब्बेर होनमत” इंचि मंता. इदुन पोर्रोटाल मिमेट वरोन बेसतनमते, इंकावरोन विरोदमते पेद्दिरकेम कियमट.
- 7 बारित्ते नीकुन आनि इंकावरोन बोरे अलग हळ्मंतु? निहगा मत्तव अन्नि पेन हीतवे गदा, अय्ते इवन्नि नावांगे बोरे हिया हिल्लुर इत्ताप बारि पेद्दिरकेम कीतिन?
- 8 ओहो! मीक गावाले मत्तव अन्नि पूरा आतां, मिमेट अय्ते सिरमंत आसि होत्तिर, मोमोट हिलाकुना मिमेट राजुल्लु आतिट. गानि मिमेट निजमे राजुल्लु आसि मत्ते मोमोटगुडा मीवातोनि राज्येम किय्येम.
- 9 गानि बोर्क अय्ते हामुर सिक्साता आदेस हियमळ जर्गता, असंतोरालेसी, प्रेरितुल्लु आता मनाकुन पेन अंतोर्कुकन्ना आकिरते इरता, इंचि नाकु अनपिचंचंता. बारित्ते, मनम पेनदा दूतानाहाटी, दुनियाताहाटी, मनकालोराहाटी सिराप तमासा हुप्सानोर आसि मंतोम.
- 10 मोमोट किरिस्तुनाहाटी मुर्कालोरम आंदुम, गानि मिमेट किरिस्तुना लोप्पो तेळ्वितोर आंदिर. मोमोट बलम हिल्वोरम आंदुम, गानि मिमेट बलम मत्तोर आंदिर. मिमेट कदर मत्तोर आंदिर, गानि मोमोट कदर हिल्वोरम आंदुम.
- 11 इदवेरादाका मोमोट कवुनि-दूपाते मंतोम, केर्नालय कपळि हिल्लें, देब्बां तिचेके मंतोम, लोन-दारा हिलाका मंतोम.
- 12 मावद मोमोट कबळ कीसेक मंतोम. माकुन तेराहनोर्कुन, आसिवांद हीतोम. ओर माकुन तकलिप कीतुर, गानि मोमोट सहन कीतोम.
- 13 ओर मावा अपमानम कीतुर, मोमोट दयाते वळ्ळंतोम. इदवेरादाकागुडा दुनियाता नदरते मोमोट कचरालेसी, मैलालेसी मंतोम.

14 नना मीक सिग्गु वायागोम इंचि इव पोल्ले रासेक हिल्लेन, गानि नावा पावरमगल्ला पिलाल्कुनसंतोर इंचि तेळियागोट्सि वेहासेक मंतन.

15 मिहगा किरिस्तुना बारेमते कराहनोर पदि वेष्कुना गुस्लक मंदानुर, गानि मिहगा वेल्लेटुर बाबुर हिल्लुर. बारित्ते मुन्ने ननाने किरिस्तु येसुना बेसता कबुर तलतन, अदुन मिमेट विस्वासम कीतिर इंचि ननाने मीवा बाबोनसंतोन आंदुन.

16 अदुनहाटी मिमेट नावालेसी ताकट इंचि विनंति कीसेक मंतन.

17 इदे पोल्ले वेहनाहाटी नना पावरम कियानोर आनि सामिना लोप्पो नावा विस्वासमगल्ला मरिनसंतोर तिमतिन मिहगा लोहतन. नना किरिस्तु येसुना बकितते बल्हा ताकसेक मंतानो, अल्हेने अन्नि जेगाना कलिसियाने नना कराहना बोदाता बारेमते ओर मीक मति कीसि हीतोर.

18 नना मिहगा वासेक हिल्लेन इंचि इच्चुर लोकल्क पेद्दिरकेम कीसेक मंतुर.

19 गानि सामिना मनसु मनानयते नना बिराने मिहगा वांतन, अस्के पेद्दिरकेम कियानोरा पोल्लेन आयो गानि ओर्क बच्चोर ताकत मंतनो हळंतन.

20 बारित्ते पेनदा राज्येम पोल्लेने आयो गानि दाना ताकतते मंतता.

21 मीक बतल गावाले? नना मिहगा कट्टे पीसि वाकाना, हिलाकाँटे पावरमते, मेल्ताटा आत्माते वाकाना?

5

विस्वासुल्क बोगमतनम कियामनि

1 मीवा नड्डुम वरोर बोगमतनम कीतिर इंचि नाक केंजावाता. ओर ओना बाबोना मुत्तो इत्ते सिन्ना यावान इरकुत्तोर अले! इसोटा तप्पुड कबळ अविस्वासुल्कगुडा किय्युर.

2 इदुनाहाटी मीक दुक्कम आया मत्ता, गानि मिमेट पेद्दिरकेम कीसेक मंतरि. असंतोन मीवा लोप्पोटाल पेचाहचि गेटुमगोम.

3 नना मिहागटाल मेंदुल्ले लक्कु मंतन, गानि आत्माते मीवातोनि मंतन. आत्माते मीवातोनि मत्ताहाटी ओनद नना मुन्नेने न्यायम क्रीतन.

4 बस्के अयते मिमेट येसु सामिना पोरोलते उंदगा जमा आसि उदतिर, अस्के आत्माते अगा मंतन, अल्हेने मना सामि येसुना ताकत मीवातोनि मंतता.

5 असोटा तप्पुड कबळ कियानोना मेंदुल्लुन नासडेम कियालय पेद्दा देय्यमता कट्टे अप्पजेप्पना. बारित्ते, ओक्कला ओर पस्चातापम कियानयते, सामि वायाना रोजुने ओना आत्मा पिस्सार.

6 मिमेट पेद्दिरकेम कियमळ बेस आयो, इच्चुर पुल्लाटा पिडि वेल्लेन पिडिते कल्पते, पूरा पिडितुन पुल्लगा कीता अद मीक एपाटे मंता.

7 पळाना पुल्लाटा पिडितसंतोन तेंडसि पोहाचि मिमेट पूना पिडि मुद्दा आया परांतरि, बारित्ते मिमेट निजमे पुल्लाटोर आयवाहाटी, येसु किरिस्तु मना दाटसि होनना पंडुगुना गोरि पोरिनलेसी मोक्कु आतोर.

8 अदुनहाटी मनम पळाना पुल्लाटा पिडितसोटा कराब कबाहक्कुने, दुस्त गुनाल्कुने आयो गानि इमानदारता, सत्तेमता पुल्लगा आयवा हारिनसोटा पंडुगु कियमळ गावाले.

9 नना मुन्ने रासि लोहाता सिट्टिते, बोगमतनम कियानोरतोनि कलियसि मनमट इंचि रासि मलतन.

10 इदुना अर्तम बोगमतनम कियानोरतोनि, आस्ति कियानोरतोनि, दोंगा कीसि तिनानोर्कुनतोनि, बोम्मांक मोळकानोर्कुनतोनि कलियसि मनमामनि इत्ताप आयो. इल्हा इनानयते मरि दुनियातुने होळ्सा पीता.

11 नना इनना पोल्ले बतल इत्ते, मीवा लोप्पोटाल बोर्न्ना ओनद ओर विस्वासिन इतोर, गानि ओर बोगमतनम कियमळ, आस्ति कियमळ, बोम्मान मोळकमळ, अपमानम कियमळ, रिम्मा आयमळ, दोंगा कीसि तिनमळ इसोटा गुनम ओनालोप्पो मनानयते ओनतोनि कलियसि मनमट, ओनतोनि गाटो तिनमट इंचि रासि मलतन.

12 विस्वासम कियवोरा न्यायम नना बारि कीकन? बोर अयते विस्वासमते मंतुर, ओरा न्यायम मिमेट किय्यिरा?

13 विस्वासम कियवोरा न्यायम पेने कीता. अदुनहाटी आ बोगमतनमतोन पेचाहचि गेटमट.

6

विस्वासुल्कुना नड्डुम जर्गना न्यायाल्क

1 बस्के अयते मीलोप्पो जगडम आंता, आ जगडमता न्यायम कियालय मिमेट पेनदा लोकुल्कुनगा होनाका विस्वासम कियवोरगा होंचि न्यायम कियाना हिम्मत बारि कीतिर?

2 पेनदा लोकुक आकिर वेलाते दुनियाता न्यायम कीतुर, इद मीक एरपाट हिल्लेना? मिमेट पूरा दुनियाता न्यायम कीतिर अय्ते, इव सिन्ना-सिन्ना पोल्लेना न्यायम कियानालायक हिल्लिरा?

3 मिमेट पेनदा दूनगुडा न्यायम कीतिर इंचि मीक एरपाटे मंता. अय्ते रोजता पिस्वरते जर्गानव सिन्ना-सिन्ना पोल्लेन न्यायम मिमेट क्रिया परिरा?

4 मीवा लोपोगिंगा इल्हा जगडालक मनानय्ते, बोर अय्ते कलिसियाता पोल्ले बतले तेळियवोर मंतुर, असंतोरगा न्यायम क्रिया वेहालय बारि दांतिर?

5 मी विस्वासुकुना नड्डुम न्यायम कियानालायक तेल्विगल्लोड वरोरगुडा हिल्लोरा? मीक सिग्गु वायगोम इंचि इल्हा इंचेके मंतन.

6 वरोर विस्वासि इंकावरोर विस्वासिक अड्डम न्यायम कियालय पंचादिता दांतोर, अदगुडा विस्वास कियवोरा मुन्ने.

7 निजम इत्ते मीलोपो लोल्लिं कियमळे तप्पु आंद. दानकन्ना अन्यायम ओर्सकुनमळ बेस आयोना? नुकसानतुन ओप्कुनमळ बेस आयोना?

8 अल्हा कियवा, मिमेट तप्पु कबळ कीतिर, अन्यायम कीतिर, अदगुडा मीवा दंटा विस्वासुकुके कीतिर.

9-10 अन्यायम कियाना लोकुक पेनदा राज्येमते वारसदार आयुर इंचि मीक तेळियोना? मिमेट दोकाते अरमत. व्यबिचारम कियानोर, बोम्मांक मोळ्कानोर, बोगमतनम कियानोर, मांडसा मांडसातोनि बोगमतनम कियानोर, मुरतळ मुरतळतोनि बोगमतनम कियानद, दोंगातनम कियानोर, आस्ति कियानोर, कल्लु उनानोर, तेराहनोर, इंकावरोन मुळाहनोर पेनदा राज्येमता वारसदार आयोर.

11 मुन्ने मीवा नड्डुम इच्चुर इल्हे मत्तिर. गानि मिमेट येसु किरिस्तुना पोरोलते आनि पेनदा आत्माते नोकुचि, पवित्र आसि नीतिमंतुक आतिर.

मैदुलतुन पेनदा महिमाताहाटी वाळकुंट

12 नना बतलन्ना क्रिया वच्चु, गानि अव अन्नि पायदातव आयो. नना बतलन्ना क्रिया वच्चु, गानि नना अबुना कय्दा हिळ्ळ मुन्नोन.

13 गाटो पीटाहाटी, पीर गाटोताहाटी मंता इंचि मिमेट इंतिर, गानि पेन इव रोंडुन इंका नासडेम कीता. मैदुल बोगमतनम कियालय आयो सामिनाहाटी मंता, सामि मना मैदुलताहाटी मंतोर.

14 पेन दाना ताकततोनि सामिन हामुरताल जीवाते तेहता, अल्हेने मनाकुनगुडा हामुरताल जीवाते तेहंता.

15 मीवा मैदुलक किरिस्तुना मैदुलता उंदि बागाल्क आंदुं इंचि मीक एरपाट मंता गदा! एरपाट मत्तस्के नना अबुन ओसि बोगमदाना मैदुललेसी कीकाना? बस्केने किय्योन.

16 बोर अय्ते बोगमदानतोनि मीडंतोर, ओर दानतोनि उंदि मैदुल आंतोर. "ओर इच्चुर उंदि मैदुल आंतुर" इंचि दर्मसास्त्रमते रासि मंता.*

17 गानि बोर अय्ते सामिनतोनि उंदि आंतोर, ओर ओनतोनि आत्माते उंदि आंतोर.

18 व्यबिचारमताल लक्कु मंट. मैदुलता पलाताल वायना पापाल्क अच्चोर बतल किय्यो, गानि बोर अय्ते व्यबिचारम कीतोर, ओर ओनादे मैदुलक अड्डम पापम कीतोर.

19 मीवा मैदुल पवित्र आत्माता गुळि आंद, अद पेनदाहेंदाल मीलोपो वासि मंता, ई मैदुल मीवद आयो, इंचि मीक तेळियोना?

20 बारित्ते पेन मीकून दरा दोस्सि अस्कुत्ता, अदुनहाटी मिमेट मीवा मैदुलताहेंदाल दाना महिमा कीम्प्ट.

7

मर्मिना बारेमते

1 अव पोल्लेने बारेमते मिमेट नाक रासि मत्तिर. नना मीक वेहासेके, मांडसा बदनना मुरतटुन इट्टाकोटेन ओनाहाटी बेस मंता.

2 गानि व्यबिचारम जर्गामनि इंचि हरेक मांडसक मुत्तो गावाले, हरेक मुरतळ्ळ मुय्दो गावाले.

3 मुय्दो ओना मुत्तोना हक्कु पूरा कियमळ गावाले, मुत्तो दाना मुय्दोना हक्कु पूरा कियमळ गावाले.

4 मुत्तोक दाना मैदुलपोरों अदिकार हिल्ले गानि दाना मुय्दोक अदिकार मंता, अल्हेने मुय्दोक ओना मैदुलपोरों अदिकार हिल्ले गानि मुत्तोक मंता.

5 अदुनहाटी मिमेट वरोंक-वरोर अलग मनमट. गानि कोन्नि रोजकु पारतना कियालय अलग मनकोम इंचि मिमेट इक्वुर इनकुत्ते, अलग मंट. दाना पजा मर्रा कलियसि मंट. बारित्ते, कुदता मनसुन आपकुना परवस्के देय्यम मीकुन पट्टुने अरहालय हळंता.

6 नना वेहानद आदेस आयो, गानि अल्हा कीते मीके बेस मनंता.

7 अंदोर लोक्कुक नावालेसी मनागोम इंचि नाक अनपिचंचंता. गानि हरेक मनकंक पेनदाहेंदाल अलग-अलग वरम दोर्किस मंता, बोनको बंदो तीरनद, इंका बोनको इंकुदि तीरनद वरम दोर्किस मंता.

8 मरमिं आयवोर्कुक आनि मुंडा मोस्तवुंक नना वेहसेक मंतन, ओर नावालेसी मरमिं आयाकुंटा मत्तेने ओराहाटी बेस.

9 गानि ओरगिंटा कुदता मनसुन आपा पराकोटे मरमिं आयिर. बारित्ते मेंदुल्ला इच्चा आसि तनलाळसेक मनना दानकन्ना मरमिं आयमळ बेस.

10 गानि बोरां अय्ते मरमिं आतां, ओर्क नावद आयो, सामिना आदेस मंता, मुत्तो दाना मुय्दोन होळसा मनि.

11 अदगिंटा होळसानय्ते, अद इंकावरोनतोनि मरमिं आयाकोटेन मंदना, हिलाकोटे दाना मुय्दोनतोनि मर्रा सांतिते कलियसि मंदना. मुय्दो ओना मुत्तोन होळसिया मनि.

12 इंदके कळमतोराहाटी नना वेहसेक मंतन, पेन आयो. बोनदन्ना विस्वासि दादाना मुत्तो पेनदुन विस्वासम किय्यो, गानि दानकु ओनातोनि मनालय पसंद मत्ते, ओर दान होळसा मनि.

13 अल्हेने ओक्कला बदनना विस्वासि अक्कना मुय्दो विस्वासम किय्योर, गानि ओर दानतोनि कूस मंतोर, अय्ते अद ओन होळसा मनि.

14 बारित्ते अविस्वासि मुय्दो, विस्वासम कीता ओना मुत्तोनतोनि मंचि पवित्र आतोर. अल्हेने विस्वासम कियवा मुत्तो, विस्वासम कीता दाना मुय्दोनतोनि मंचि पवित्र आसि दांता. अल्हा आयाकुंटा मंचि मते मीवा पिलाळक पवित्र आयाकोन्नेर, गानि ओर इंदके पवित्र मंतोर.

15 अय्नागानि अविस्वासि मुत्तो आयि मुय्दो आयि ओक्कला ओर होळसंतन इनानय्ते होळसिरकांटी. इद पोल्लेतुन विस्वासम कियाना दादल आयि अक्कल आयि आपामन्नि. बारित्ते, पेन मनाकुन सांतिते पिसालय केयता.

16 ए मुरतदुना,* नीवा विस्वासम कियवा मुय्दोन पिसागोटतिन इंचि नीकु बतल एरपाट? ए मांडसातुना,† नीवा विस्वासम कियवा मुत्तोन पिसागोटतिन इंचि नीकु बतल एरपाट?

पेन बारि केयतनो अदुनहाटीगे पिस्सट

17 गानि बल्हा अय्ते मीकुन सामि निलाहतोर, बल्हा अय्ते मीकुन पेन केयता, अल्हेने मिमेट मंट. इद अन्नि कलिसियाने नावा नियम आंद.

18 अद बल्हा इत्ते, पेनदुन विस्वासम कियाका मुन्ने कतना कीसि मनानय्ते, अदुन मकिच्चा मनि. पेनदुन विस्वासम कियाका मुन्ने कतना कियाकोटा मत्ते, ओर कतना कीकुन्ना मनि.

19 कतना कियाना, कियाकुन्ना बतल आयो, गानि पेनदा आदेसते ताकमळे पेदू दा पोल्ले आंद.

20 हरेक मनकन ओर बल्हा मननेके पेन ओन केयतनो, अल्हेने ओर मनागोम.

21 निमे गिंटा दास आसि मत्तस्के पेन केयते, निमे अदुना पिक्किर कियमा. गानि अव्टेडाल इळबळाना मोका वाते, दाना पायदा एता.

22 बारित्ते, दास आसि मत्तस्के निमे सामिन विस्वासम कीतिन, अव्टेडाल इळबळतिन. इळबळतस्के सामिन विस्वासम कीतिन अय्ते किरिस्तुना दास आतिन.

23 पेन मीकुन दरा दोस्सि अस्कृत्ता, दानहाटी मनकालोरा दास आयमट.

24 विस्वासुल्कुनिटा! पेन मीकुन केयतस्के बल्हा मत्तिरो, अल्हेने दानतोनि कलियसि मंट.

25 मरमिं आयवडुना बारेमते सामि नाकु बतले आदेस हिया हिल्लोर, गानि नावा मनसुना पोल्ले मीक वेहसेक मंतन. सामिना दयाहेंदाल, नना दान बरोसा कीतन.

26 इंदकेटा तकलिपकुनाहाटी मनकल बल्हा मंतोर अल्हेने मत्ते बेस इंचि नना इनकुंचेके मंतन.

27 नीकु मुत्तो मत्ते अदुन होळसाना कोसिस कियमा, मुत्तो हिलाकोटे मरमिं आयना विचारम कियमा.

28 निमे मरमिं कीकुत्ते बतल पापम आयो, लेय्या पेगिळ मरमिं कीकुत्ते अदगुडा बतल पापम आयो. अय्नागानि बोर अय्ते मरमिं आंतुर, ओरा पिस्वरते तकलिपकु वांतां. असोटा तकलिपकुने अर्रांनयो इंचि नना कोरसंतन.

29 विस्वासुल्कुनिटा! नना वेहानद बतल इत्ते, वेला तक्को मंता. अदुनहाटी इंदकेडाल मुन्ने बोन्क मुत्तो मंता, ओर मुत्तो हिल्वाप मंदना.

* 7:16 ए मुरतदुना इगे दीना अर्तम, विस्वासम कीता मुत्तो. † 7:16 ए मांडसातुना इगे दीना विस्वासम कीता मुय्दो.

30 अळानोर मत्ते, अळवोर लेहका मंदना, आनंदमते मत्तोर आनंदमते हिल्ल्वाप मंदना, सामानकु अस्सानोर बतले हिल्ल्वाप मंदना.

31 इद दुनियाते मनम बतलयते कीतोम दाना लोपेते मंदनायो. बारिल्ले दुनियातव अन्नि नासडेम आयानव आंदुं.

32 मिमेट बदे पोल्लेते पिकिर किया मनि इंचि नना इनकुंचेके मंतन. मरमिं आयवोर पेनदुन बल्हा कूस इर्रीना इंचि पेनदा पोल्लेना पिकरते मंतोर.

33 गानि मरमिं आता मनकल ओना मुत्तोन बल्हा कूस इर्रीना इंचि दुनियाता पोल्लेने पिकरते मंतोर.

34 अदुनहाटी ओरा मनसु रौंडु तीस्कुने कबळ कीता. अल्हेने मरमिं आयवा मुरतळ पेनदुन बल्हा कूस कियाना इंचि मेंदुल्ले आनि आत्माते पवित्र मंचि पेनदा पोल्लेना पिकरते मंतता. गानि मरमिं आता मुरतळ मुय्दोन बल्हा कूस इर्रीना इंचि दुनियाता पिकरते मंतता.

35 नना मीवा पायदाताहाटीगे इद पोल्ले वेहासेक मंतन, मीकुन पसांचालय आयो. गानि मिमेट सत्तेमते ताकसि, उंदि मनसुने पेनदा सेवाते मंदुं.

36 बोरन्नागिटा, “मना मिद्यटा‡ लेय्यातनम होंचेके मंता, दाना अपमानम आयाका मुन्ने मरमिं कियमळ गावाले,” इंचि इनकुनानय्ते मरमिं कीसि हिथ्थिरकांटी, अद पापम आयो.

37 गानि ओर ओक्कला मरमिं कीसि हियमळ अक्सरम हिल्ले इंचि मनसुनाल निरनायम कियानय्ते, अद दाना इच्चान आपापते दानक मरमिं कियवा बेसे कीतोर.

38 बोर अय्ते ओना मिद्यटा मरमिं कीतोर, ओर बेसे कीतोर. अल्हेने बोर अय्ते ओना मिद्यटा मरमिं किया हिल्लोर ओर इंका बेसे कीतोर.

39 मुय्दो पिस्सि मत्तचचोरजेम मुत्तो मुय्दोनतोनि होळसाकौटा मंतता, गानि ओरगिंटा हायानय्ते अद बोनतोनना सामिन विस्वासम कीतोनतोनि मरमिं आया परांता.

40 गानि अद इंकावरोनतोनि मरमिं आयाकौटा मत्तेने बेस इंचि नना इनकुंचेके मंतन, अल्हेने नावा लोपो मनना पेनदा आत्माता हेंदाले नना मीक वेहासेक इंचि इनकुंचेके मंतन.

8

मोळ्कता उपारम

1 इंदके, बोम्मनगा मोळ्कता उपारमता बारेमते वेहंतन, मनम अंटोरम तेल्वितोर्कुम इंचि मनाकु एरपाटे मंता. तेल्विता हेंदाल गारां बांता, गानि पावरम बक्किततुन बेसांगोटंता.

2 बोरन्नागिंटा नाक पूरा तेळियंता इंचि इनकुनानय्ते, ओन्क बतलय्ते तेळियमळ गावाले, अद इंदकेगुडा तेळिया हिल्ले.

3 गानि बोरन्नागिंटा पेनदुन पावरम कीते, पेनदुक ओर एरपाटे.

4 अदुनहाटी बोम्मनगा मोळ्कता उपारमतुन तिनना बारेमते नना मीक वेहंतन, दुनियाते मनना बोम्मने पेन हिल्ले. पेन उंदे मंता, अद आयाका इंका वेंरे पेन हिल्ले.

5-6 अय्नागानि स्वर्गमते आयि, बूमिपोर्री आयि पेनकु, सामि इंचि इनानव वेल्लेने मंतां. गानि मनाकु उंदे पेन, ओर मना बाबो आंदुर. ओनाहेंदाले इवन्नि तयार आतां, मनम ओनाहाटीगे मंतोम. अल्हेने सामि वरोर आंदुर. ओर येसु किरिस्तु आंदुर. पेन, ओनाहेंदाले इवन्नि तयार कीता, मनमगुडा ओनाहेंदाले पिस्सि मंतोम.

7 गानि अंटोर विस्वासुल्कुक ई तेल्वि हिल्ले. इच्चुर मोदाटाले बोम्मन मोळ्किसि मत्ताहाटी, अगा मोळ्कता उपारमतुन तितुर. अदुनहाटी ओरा कमजोर मनसु कराब आसि दांता.

8 गाटो मनाकुन पेनदा दग्गेक ओयो. मनम तिनाकुन्ना मनद नुकसान आयो, तिनना बतल पायदा आयो.

9 मिमेट बदन्ना उपारम तितिर आयावच्चु गानि उंदि पोल्ले मति इर्राट, मीवाहेंदाल विस्वासमते कमजोर मत्तोर पापमते अर्रीनायो.

10 बारिल्ले निमे तेल्विता मनकन, निमेने गुळिते* बोम्मनगा मोळ्कता उपारमतुन तिनानय्ते, वरोर कमजोर विस्वासि अदुन हळत्सके, गुळिते मोळ्कतवुन तिनालय ओना मनसु आयोना?

11 ओनाहाटीगुडा किरिस्तु हातोर, इल्हा नीवा तेल्विहेंदाल, विस्वासमते कमजोर मत्ता विस्वासि पेनदागटाल लक्कु आंतोर.

12 इल्हा निमे नीवा दंटाता विस्वासुल्कुना विरोदमते पापम कीसि, कमजोर विस्वासिना मनसुन नोपिचि, किरिस्तुना विरोदमते तपुु कीतिन.

‡ 7:36 मिद्यटा एरां बोट्टु आता मिद्यड. * 8:10 गुळिते पेनकु मनना गुळि.

13 अदुनहाटी ओक्कला उपारमताहेंदाल नना नावा दंटाता विस्वासुल्कुन पापमते अरहानय्ते, नना बस्केने हळ्वि तिन्नोन. नावाहेंदाल ओर बस्केने पापमते अर्रा मनि.

9

प्रेरितुल्कुना अदिकाराल्क

1 नना दासतनमताल इळबळसि हिल्लेना? नना प्रेरितुन आयोना? मना सामि येसुन नना हळा हिल्लेना? सामिना लोप्पो नावा कबळता पलम मिमेट आयिरा?

2 नना वेंरे लोकुल्कुनाहाटी प्रेरित आयकोन्ना गानि मीवाहाटी अय्ते प्रेरितुने आंदुन. नना सामिन लोप्पो प्रेरितुन इंचि मिमेटे सिक्कालेसी निसान आंदिट.

3 बोर अय्ते नावातोनि वाद-विवाद कियालय हळांतुर, ओराहाटी इद नावा जवाब आंद.

4 माकु तिनना-उनना अदिकारम हिल्लेना?

5 कळमता प्रेरितुल्क, सामिना तम्मूहक आनि केपल (पत्र) ईर ओरा मुत्तोहकुन पीकुंचि तिरियताप मोमोटगुडा विस्वासि मुरतळतोनि मरमि आसि पज्जेके पीकुंचि तिरियना अदिकारम माक हिल्लेना?

6 हिलाकोटे पिस्वरहाटी कबळ कियाकोटा मनालय सिराप बरनाबास आनि नाके अदिकारम हिल्लेना?

7 बोर ओना संतम कोत्तां कर्स कीसि सिपाइना नौकरि कीतोर? बोर अंगुरता बगिचा कीसि अंगुर पंडि तिनाका मनंतोर? आनि बोर गोळकु-गोर्णे पोसकीसि अबुना पाल उनाका मनंतोर? बोरे मन्नोर.

8 नना मनकना रीतिते इल्हा इंचेके मंताना? हिल्ले.

9 “कळाते बंति तिराहनेके कोदांक मूस्का बुट्टि दोहा मनि.” इद पोल्ले सिराप कोदानाहाटीगे पेन वेहा हिल्ले, मूसाना नियमतेगुडा इल्हे रासि मंता.

10 मनाहाटीगुडा वेहता. बारित्ते ऊडानोर आसेतेन ऊडंतोर आनि बंति तिरहानोरगुडा पंटाते पाल गावाले इत्ता आसेतेन बंति तिरहंतोर.*

11 मोमोट मीलोप्पो बेस आत्माता विज्जां वीततोम. अय्ते माक अक्सरम मत्तवुन मिमेट हीते, अबुन एतमळ बतल तप्पु आंदा? तप्पु आयो.

12 वेंरेतोर्क गिंटा मीपोर्णे अदिकारम मत्ते, दानकन्ना एक्को माक अदिकारम मंता. गानि किरिस्तुना बेसता कबुरतुन वेहनेके नावाहेंदाल बतले अड्डम वायामान्नि इंचि मोमोट आ अदिकारम एताका आन्नि सहन कीसेक मंतोम.

13 मीक अय्ते एरपाटे मंता, गुळिगता सेवा कियानोर्कुंक गुळितगटाले गाटो दोर्कता. गद्देतगा सेवा कियानोर्कुंक अगा अरतवुनाल त्स दोर्कता.*

14 अल्हेने किरिस्तुना बेसता कबुर वेहानोर्कुंक, बोर अय्ते अद कबुर केंजसि विस्वास कीतुर, ओरा हेंदाले पिस्वर दोर्कागोम इंचि सामि हुकुम हीतोर.

15 गानि बोरन्ना नावा पेदिदरकेम एतम कियानादानकन्ना नाक हायमळे बेस अनपिचंचता. अदुनहाटी नना बोनाहेंदाले पिस्वरता पाय्दा एता हिल्लेन, मिमेट नावाहाटी इल्हा कीम्टु इंचिगुडा रासेक हिल्लेन.

16 नना बेसता कबुर वेहचि बतल पेदिदरकेम कीसेक हिल्लेन. बारित्ते इद नावा जिम्मेदारि आंद, नाक बेसता कबुर वेहमळे गावाले. ओक्कला वेहाकोटे नना बुळ्दि आकन.

17 नना ओक्कला नावा इच्चाताल इदुन कीते नाक इनाम दोर्कता. ना इच्चाताल कियानोन्नागानि दाना जिम्मेदारि पेन नाक अप्पजेपता.

18 अय्ते नावा इनाम बतल? नना बेसता कबुर वेहनेके नाक दोर्कना अदिकारम एताका बेसता कबुर पुक्कटते वेहमळ, इदे नावा इनाम आंद.

19 बारित्ते, नना बोना कय्दा हिळु हिल्लेन, अय्नागानि वेल्लेटोर्कुन किरिस्तुनगा पीसि वायाना इंचि नावद-नना अंतोरा दासुन आतन.

20 यहूदिल्कुन किरिस्तुनगा तर्नालय नना यहूदिल्कुनालेसी आतन. मूसाना नियमते ताकानोर्कुन किरिस्तुनगा तर्नालय मूसाना नियमते ताकाना अक्सरम हिलाकोन्ना गानि नियम पीसि ताकतन.

21 मूसाना नियम पीसि ताकबोर्कुन किरिस्तुनगा तर्नालय नियम हिल्वोरलेसी आतन. इत्ते पेनदा नियमतुन पासकंतन इंचि आयो, गानि किरिस्तुना नियम पीसि ताकानोन आंदुन.

22 विस्वासमते कमजोर मतोर्कुन किरिस्तुनगा तर्नालय, नना ओरालेसी आतन. बल्हैना आयि इच्चुरन्ना पिसागोम इंचि, बोर बल्हा मंतुर, ननागुडा ओरालेसी आतन.

* 9:10 किरिस्तुना सेवा कियानोर बोरागा सेवा कीतोर ओरागेन तिदना. * 9:13 लैय्वस्ता 6:16,26; व्यवस्ताविवरन 18:1-3

- 23 ओरतोनि बेसता कबुरा आसिवाँदते नाकगुडा त्स दोर्कना इंचि इवनि कीसेक मंतन.
 24 पंदेम वाटसि वितनेके अंतोरे वित्तंतुर, गानि इनाम वरोके दोर्कता इंचि मीक एपाटे मंता. मिमेटगुडा वितनेके इनाम दोर्कनालेसी वित्तंत.
 25 कर्सानोर अंतोरे बेस करियसि ओरद-ओर तयारते मंतंतुर, अदगुडा नासडेम आयाना किरिटम दोर्किचुकुनालय इवनि कीतुर. गानि मनम अथे बस्केने नासडेम आयवा किरिटम दोर्किचुकुनालय कीतोम.
 26 अदुनहाटी नना बंद जेगातगळक अथे वित्तना, अगळक बेस वित्तंतन, ननागुडा पिळ्ळिकलते गुद्सेक लडांचंतन, वळ्ळिते लडांचताप आयो.
 27 नना ना मेंदुल्लतुन आपकुंचि इरंतन. नना वैरेतोर्कुंक बेसता कबुर वेहचि, नावा लोप्पेने तक्को मत्ते नना बाता कबळतोत आयोन.

10

बोम्मना पूजा कियमत

- 1 विस्वासुल्कुनिटा! इद पोल्ले मीक तेळियका मनमळ नाक इस्टम हिल्ले. अद बतल इत्ते, मना एनकटा तादो-बाबुर अंतोरे मबु तेपेता हिळु मंचि समुद्रमता नड्डुमताल ताकतुर.
 2 इल्हा ओर मबु तेपे हिळु, समुद्रमता नड्डुम मत्ताहेंदाल ओर अंतोरे मूसाना बापतिस्मा एततालेसी आता
 3-4 ओर अंतोरे उंदे आत्माता गाटो तित्तुर, उंदे आत्माता एर उट्टुर. पेन ओर्क बंडाताल एर हीता. अद बंडा इत्तेने किरिस्तु अंतुर, ओरे ओरतोनि ताकुंदुर.
 5 गानि पेन ओरव्टेताल वेल्लेटुर लोकुल्कुनपोर्गे कूस मनाहिल्ले. अदुनहाटी ओर अंदे बाय्लि जेगाते हातुर.
 6 बल्हा अथे मना तादो-बाबुर पेनदुक इस्टम हिल्ला पोल्लेने ताकतुर, अल्हा मनम ताका मनि इंचि इव पोल्ले मनाकु उदाहरनलेसी वेहतां.
 7 ओरागटाल इच्चुर बोम्मां कीसि मोळकतुर, अल्हा मिमेट बोम्मांक मोळकाना आयो. ओरा बारेमते, “लोकुल्क तिनालय, उनालय उदतुर आनि तेदसि एगारालय दलगतुर,” इंचि दर्मसास्त्रमते रासि मंता.
 8 ओरागटाल इच्चुर बोगमतनम कियुंदुर. अदुनहाटी ओराव्टेताल उंदे रोजते इरवे मूड वेय्कुना मंदितुन हळ्कमळ जर्गता. मनम ओरालेसी बोगमतनम कियामनि.
 9 ओरागटाल इच्चुर पेनाद पट्टु हळुंदुर, ओर तरासकु कस्किसि हातुर. मनम ओरालेसी किरिस्तुना पट्टु हळ्का मनि.
 10 ओरागटाल इच्चुर गुल्गुंदुर, नासडेम कियाना दूता हेंदाल ओर नासडेम आतुर. ओरालेसी मिमेट गुल्गमट.
 11 मना तादो-बाबुर्क जर्गता पोल्ले उंदि उदाहरनलेसी मंचि, मनम आकिर युगमते एवताहाटी मनाकु तेळियागोम इंचि रासमळ जर्गता.
 12 बोरे अथे नना विस्वासमते गट्टिगा नित्तिसि मंतन इंचि विचारम कीतोरो, ओर विस्वासमताल अरामनि इंचि कापाळकुनना.
 13 अंतोर्क वायानसोँटवे परिकसां मीक वातां, दानकन्ना एक्को परिकसां मीक वाया हिल्लें. गानि पेन विस्वासमगल्लद आंद. अद मीतोनि आया परवसोँटा एक्को परिकसाने अरी हिय्यो, परिकसां वाते मिमेट सहन कियोगोम इंचि अव्टेताल पेयसना हारिगुडा पेन कीता.

सामिना उपारम आनि बोम्माना उपारम

- 14 अदुनहाटी नावा पावरमगल्ला विस्वासुल्कुनिटा! बोम्मना पूजेनाल लक्कु मंतु.
 15 मिमेट बुदिदमंतुल्कु आंदिर इंचि नना वेहसेक मंतन. नना वेहाना पोल्लेन मिमेट कुद निरनायम एत.
 16 मनम दन्यवाद कीसि, उंदे गिलासते अंगुर पानकम उट्टस्के, किरिस्तुना नेत्तुर मना अंतोराहाटी हीतोर इंचि हूपिच्चेक मंतोम. मनम उंदे हारितुन तुकडां कीसि तित्तस्के किरिस्तुना मेंदुल मना अंतोराहाटी हीतोर इंचि हूपिच्चेक मंतोम.
 17 मनम अंतोरम उंदे हारिता तुकडां तित्ताहाटी, मनम वेल्लेटुर मंचिगुडा उंदे मेंदुललेसी मंतोम.
 18 इस्त्राएल लोकुल्कुनहेके हळ्काट! गद्देपोर्गे मोक्कु हीतवुन तित्तस्के, गद्देपोर्गे मोक्कु मावा अंतोराहाटी इंचि हूपिच्चेक मंतुर.
 19 नना बतल वेहसेक इत्ते, बोम्मांक मोळकता गाटोक बतल हिल्ले, बोम्मन लोप्पुगुडा बतल हिल्ले.
 20 इच्चोरे गदा, बोम्मांक मोळकानोर, देय्याल्कुंक मोळकसेक गानि पेनदुक आयो. अदुनहाटी मिमेट देय्याल्कुनतोनि पोल्तु आयमळ नाक इस्टम हिल्ले.
 21 मिमेट सामिना गिलासतद आनि देय्यमता गिलासतद इल्हा रौडुनद उन्ना परिर, अल्हेने सामिना उपारम आनि देय्यमता उपारम रौडुने पोल्तु आया परिर.

- 22 इल्हा कीसि मनम सामिक होंग वायानाल कीतोम. मनम पेनदुकन्ना बलवंतलुकुमा? आयोम.
- 23 अन्नि मनाहाटी बेसे आंदुं, गानि अन्नि कबळतव आयों. अन्नि मनाहाटी बेसे आंदुं, गानि अन्नि बक्विते एद्दनाहाटी बेस आयों.
- 24 बोरे आयिर ओना पायदातुने ह्ळ्ळा मनि, इंकावरोना पायदातुनगुडा ह्ळ्ळना.
- 25 हाटुमताल बवन्ना हाव्विं अस्सि तिनावच्चु. तिनकना, तिना मन्निआ इचेके मीवा मनसुन सवाल कियमत.
- 26 बारित्ते, “बूमि, बूमि पोरोटव अन्नि सामिनवे आंदुं” इंचि दर्मसास्त्रमते रासि मंता.
- 27 बोर्न्ना विस्वासम कियबोर मीकुन गाटोक केयानय्ते, मीक होनना मनसु आते, होंट. अगा होला पजा, बतलय्ते मीक तिनालय हीतोर अदुन मनसुने बतले सवाल कियाका तिट्ट.
- 28 गानि मीकुन बोर्न्ना, “इद बोम्मनगा मोळकतद आंद,” इंचि इनानय्ते, वेहतोनाहाटी आनि बेस बुद्धिदाहाटी तिनमत.
- 29 इत्ते, “बेस बुद्धिदे” मीवद आयो गानि मुन्नेटोना बेस बुद्धिदा बारमते इचेके मंतन. मीवाहाटी इंकावरोन बारि वेहा हिश्यना.
- 30 नना दन्यवाद कीसि गाटो तितन अय्ते, दन्यवाद कीताहाटी बदनाम बारि आयाना?
- 31 अदुनहाटी मिमेट उनमळ, तिनमळ बतल कियाना गानि पेनदा महिमाताहाटीगे कियाना.
- 32 यहुदि लोकुकुकुंक, युनानि लोकुकुकुंक आनि कलिसियातोकुकुंक अड्डम आयाना लायक मनमत.
- 33 ननागुडा ओर पिसागोम इंचि, नावा पायदा ह्ळ्ळाका, वेल्लेटुर लोकुकुकुना पायदाताहाटी, अन्नि पोल्लेने अंटोकुन कूस इरतन. बारित्ते ओर्क मुक्वि दोर्कगोम.

11

आरादनातस्के मुर्ताहक तल्ला मुचमळ

- 1 नना किरिस्तुनलेसीं ताकतन, मिमेटगुडा नावालेसीं ताकट.
- 2 अन्नि पोल्लेने नाकुन मिमेट मति कीसेक मंतिट, नना मीक कराहचि अप्पजेपता पोल्लेने ताकसेके मंतिट, इंचि नना मीकुन तलसकुंचेके मंतन.
- 3 गानि मीक इद पोल्ले तेळियमळ गावाले, किरिस्तु, मांडसाता तल्लातालेसीं आंदुर, मांडसा मुरताहकुना तल्लातालेसीं आंदुर, पेन किरिस्तुना तल्लातालेसीं आंदुर.
- 4 बोर्न्ना मांडसा पारतना कियानेके, हिलाकोटे बविस्यवानि कियानेके तल्लातुन मुचुकुनानय्ते ओर तल्लातुन* अपमानम कीतोर.
- 5 गानि बदना मुरतळ पारतना कियानेके हिलाकोटे बविस्यवानि कियानेके दाना तला मुचुकुनाकोटे, अद दाना तल्लाता अपमानम कीताप आनि गुंडु कीताप आंद.
- 6 बदन्ना मुरतळ ओक्कला तल्लातुन मुचुकुनाकुंटे दाना केल्लुकुन कतरिचकुनना. अद केल्लुकुन कतरिचकुनमळ, हिलाकोटे गुंडु कीकुनमळ इद सिग्गु पोल्ले आंद इंचि अनपिस्ते, अद तल्लातुन मुचुकुनना.
- 7 मांडसा ओना तल्लातुन मुचमळ बेस आयो, ओर पेनदा रूपम आनि महिमा आंदुर, गानि मुरतळ अय्ते मांडसाता कदर आंद.
- 8 बारित्ते, मांडसा मुरतटाल वायाहिल्लोर, गानि मुरतळ मांडसाताल वाता.
- 9 मांडसा मुरतटहाहाटी तयार कियमळ जर्गाहिल्ले, गानि मुरतळ मांडसाताहाटी तयार कियमळ जर्गता.
- 10 अदुनहाटी पारतना कियानेके पेनदा दूतां ह्ळ्ळेक इंचि मुरतळ, मांडसाता अदिकारमता कयदा हिळ्ळ मंतन इंचि हुप्सालय दाना तला मुचुकुनमळ गावाले.
- 11 अय्दनागानि पेनदा लोप्पो मांडसा हिल्ला मुरतळ मंदा पर्री, मुरतळ हिल्ला मांडसा मंदा पर्री.
- 12 बारित्ते, मुरतळ मांडसाताल तयार आता, अल्हेने मांडसा मुरतटाल पुटसेक मंतोर, गानि इवान्नि पेनदाले तयार आसेक मंता.
- 13 अय्ते, मिमेटे विचारम कीम्ट्ट, मुरतळ तला मुचुकुनवा पेनदा पारतना कियमळ बेसे ना?
- 14 मांडसा तल्लाता केल्लक बेसिंगोटकुनमळ ओनाहाटी सिग्गु होनना पोल्ले आंद, इद मीक एरपाटे मंता.
- 15 गानि मुरतळ दाना केल्लक पोळगु बेसिंगोटकुते दानकु कदर आंद. दाना तल्लातुन मुचुकुनालय पेन दानकु केल्लक हीता.
- 16 इदुना बारमते बोर्न्ना लोल्लि कियानय्ते, ओनकु तेळियाना गदा, मावा इसोटा रीति आयो, कलिसियातोरदगुडा इसोटा रीति आयो.

पेनदा उपारम

* 11:4 तल्लातुन तल्लातुन इत्ते किरिस्तुन.

- 17 मिमेट कलिसियाने जमा आयमळ पाय्दा आयो गानि नुकसाने आंता. अदुनहाटीं नना मीवा पेदुदातनम कीसेक हिल्लेन.
- 18 बस्के अथे मिमेट कलिसियाते जमा आतिर, अस्के मीक वरोनद-वरोक अरंका अलग आसेक मंतिट इंचि नना मोदाला केजतन, इदुन नना नमंतनगुडा.
- 19 मीलोपो अलग आयमळ बेसे. बारित्ते बोर निजमते पिस्संतोर, ओर दिस्सि अरंतोर.
- 20 मिमेट सामिना उपारम तिनालय जमा आतिर, गानि अदुन सामिना उपारम इन्नु.
- 21 बारित्ते मिमेट तिनानस्के वरोक मुन्ने वरोर, बोनद ओरे तितिर. अदुनहेंदाल बोरो कवुनि मंनंतुर, बोरो रिमंनंतुर.
- 22 मीक तिनालय-उनालय लोन हिल्लेना? हिलाकोटे पेनदा कलिसियातोर्कुन हय्साकुंटा आनि गरिबोर्कुना इज्जत पोगोटांलय आतिर? इंदके मीकुन नना बतल इनकन? इदुनाहाटीं मिमेट बेस कीतिर इनकना? बस्केने इन्नोन.
- 23 बारित्ते, सामिनाहेंदाल इव पोल्लेन नाक दोर्कतां, अबुन नना मीक अप्पजेपतन. येसु सामिन बद रोज अथे पीसि हिथ्याना मत्ता अद नकां उंदि हारि एततोर,
- 24 पेनदुक दन्यवाद कीसि, हारितुन उराहतोर, उराहचि ओर्क हीसेक, “इद मीवाहाटीं नावा मेंदुल आंद, नावा मतिताहाटीं इल्हेने कीम्टु,” इंचि वेहतोर.
- 25 इल्हा अद तित्ता पजा, अंगुर पानकमता गिलास एतसि, “इद पानकम नावा नेत्तुरते पूना करार आंद, इदुन बस्के अथे उंटीर अस्के नावा मति कियाना,” इंचि वेहतोर.
- 26 बारित्ते, मिमेट बस्के-बस्के अथे इद हारितुन तितिर, अंगुर पानकम उंटीर, अस्के सामिना हामुरतुन ओर मल्लिस वायानादाका वेहंतोर.
- 27 अदुनहाटीं बोर अथे सामिक इस्टम हिल्ला रीतुने ताकसि, हारितुन तितोर, अंगुर पानकम उंटोर, ओर सामिना मेंदुल आनि नेत्तुरता दोस्सि आंतोर.
- 28 इंचि हरेक मनकल कुद बल्हा मंतोर इंचि ओनद ओर परिकसा कीसि हळकुत्ता पजाने हारितुन तिनमळ गावाले आनि अंगुर पानकम उनमळ गावाले.
- 29 बारित्ते सामिना मेंदुल बारेमते तेल्पिचकुनाका तिनमळ-उनमळ कीते, ओर ओना पोरोंने सिक्सा तरकुंतोर.
- 30 अदुनहाटीं मीलोपो वेल्लेटुर कमजोर आतुर, बिमार्क आतुर, वेल्लेटुर हासिगुडा होत्तुर.
- 31 गानि मनम कुद बल्हा मंतोम इंचि परिकसा कीसि हळते, पेन मनाकु सिक्सा हिथ्यो.
- 32 गानि मनाकु दुनियातोरतोनि सिक्सा आयामान्नि इंचि सामि मनाकुन बेस पोल्ले वेहचि सुदरांचंतोर.
- 33 अदुनहाटीं विस्वासुकुनिटा! सामिना उपारम तिनालय जमा आतस्के अंतोर वायानाल एदुर हळसि, कळसि तिट्ट.
- 34 बोरन्नागिटा कवुनि मत्ते लोने तिचि वाथिर. इल्हा कलियमळता हेंदाल सिक्सा तपंता. कळमता पोल्लेन बारेमते नना वातस्के वेहंतन.

12

पवित्र आत्मा हिथ्यना वरमकु

- 1 विस्वासुकुनिटा! आत्माता वरालकुना बारेमते मीक तेळियका मनमळ नाक इस्टम हिल्ले.
- 2 मिमेट पेनदुन विस्वासम कियाना मुन्ने, वळ्कवा बोम्मान मोळ्कानाहाटीं मीक बल्हा वेहते, मिमेट अल्हे ताकिदिर.
- 3 अदुनहाटीं पेनदा आत्माते वळ्कानोर बारे आयिर, “येसु सापनेम दलगतोर आंदुर,” इंचि इन्नु. अल्हेने पवित्र आत्माते ताकवोर बारे आयिर, “येसु सामि आंदुर,” इंचि इन्नु.
- 4 वरमकु वरे-वरे मनना गानि पवित्र आत्मा उंदे आंद.
- 5 सेवागुडा वरे-वरे तीरकुना मनना गानि सामि वरोर आंदुर.
- 6 वरे-वरे तीरकुना अदुबूतामाता कबाहक मनना गानि ओरा लोपो कबाहक कियालय दैरनेम हिथ्याना पेन उंदे आंद.
- 7 अंतोर विस्वासुकुंक पाय्दा आयगोम इंचि मा अळेटाल हरेक मनकानगा पेनदा आत्मा हिथ्यमळ जर्गता.
- 8 बल्हा इत्ते, अदे आत्माताहेंदाल वरोर बुदिदता पोल्लेन वेहंतोर, अदे आत्माताहेंदाल इंकावरोर तेळ्विता पोल्लेन वेहंतोर.
- 9 अदे आत्माताहेंदाल वरोर विस्वासमते गट्टिंगा मंनंतोर, अदे आत्माताहेंदाल इंकावरोक बिमार्क बेस कियाना वरम हिथ्यमळ जर्गता.
- 10 अद आत्मा बोर्को-बोर्को अदुबूतामाता कबाहक कियानद ताकत, बोर्को बविस्वयानि कियानद, बोर्को आत्मान लोपो तेडा बतल हळानद, बोर्को वरे-वरे बासां वळकानद आनि इंका बोर्को बासाना अर्तम वेहना वरम हीता.
- 11 गानि इवन्नि अद उंदे आत्मा दाना इस्टम वाताप वरोक-वरोक तुसि हीसि कबाहकुन पूरा कीता.

मेंदुल उंदि, दाना बागाल्क वेल्लेने

12 मना मेंदुल उंदे गानि अवने बागाल्क वें-वें मंतां. अवन्नि बागाल्क वेल्लेने मनना गानि उंदे मेंदुलत्व आंद, अल्हेने किरिस्तुगुडा मेंदुललेसी मंतोर.

13 बारित्ते, मनम अंतोरम यहूदिल्क आयिना, युनानि आयिना, दासुल्क आयिना, दासुल्क आयाकोन्ना उंदे आत्माहेंदाल, उंदे मेंदुल आयालय बापतिस्मा एततोम, मना अंतोर्क उंदे आत्मा उहमळ जर्गता.

14 अदुनहाटी मेंदुलते सिराप उंदे बागम हिल्ले गानि वेल्लेने बागाल्क मंतां.

15 ओक्कला, काल गिंटा, “नना कय आयोन, अदुनहाटी मेंदुलता बागम आयोन,” इंचि इनकुनिना गानि अद मेंदुलता बागामे आंद.

16 अल्हेने केव गिंटा, “नना कळ आयोन, अदुनहाटी मेंदुलता बागम आयोन,” इंचि इनकुनिना गानि अद मेंदुलता बागामे आंद.

17 ओक्कला, पूरा मेंदुल कळे आसि मत्ते, बगाटाल केंजसि मननेम? पूरा मेंदुल केव्चे आसि मत्ते, बगाटाल मूस्किसि मननेम?

18 अदुनहाटी पेन दाना इच्चा मत्ताप, हरेक बागमतुन मेंदुलते बगा-बगा इरानो अगा इर्ता.

19 अव अन्नि गिंटा उंदे बागम मंचि मत्ते, मेंदुल बगा मनवळ?

20 अदुनहाटी बागाल्क वेल्लेने मंतां, गानि मेंदुल उंदे आंद.

21 इंदके कळ कय्दुन, “नीवातोनि नाक कबळ हिल्ले,” इंचि इना पर्री. आनि तला काल्कुन, “नीवातोनि नाक कबळ हिल्ले,” इंचि इना पर्री.

22 गानि मेंदुलते कमजोर मत्ताप दिस्सानव बागाल्के मनाकु वेल्ले अक्सरमतव आंद.

23 मना मेंदुलते बव बागाल्कुनय्ते तक्को कदरतव इनकुंतोमो अवुने मनम एक्को कदर कीतोम, अव बव अय्ते सिंगारम हिल्वव अव इंका एक्को सिंगारम आंतां.

24-25 गानि मुन्नेटाले सिंगारम मत्ता बागाल्कुन सिंगारम कियाना अक्सरम हिल्ले, गानि बवय्ते बागाल्क कदर हिल्लेंगों अवुंक एक्को कदर दोर्कमळ गावाले. अव बागाल्क सिन्ना-पेद्दा बतल इनाका उंदांक-उंदि रंदि कियमळ गावाले, इंचि पेन इल्हा मेंदुल तयार कीता.

26 अदुनहाटी ओक्कला मेंदुलतद उंदि बागम नोते, दानतोनि अव अन्नि बागाल्कुंक नोता. ओक्कला उंदि बागमकु कदर दोर्कते, अव अन्नि बागाल्क कूस आंतां.

27 अल्हेने मिमेट अंतोर कलियसि किरिस्तुना मेंदुल आंदिर, हरेक मनकल आ मेंदुलता बागाल्क आंदिर.

28 कलिसियाता लोप्पो पेन मोदाला प्रेरितुल्कुन, ओरा पज्जो पेनदा कबुरतोर्कुन, ओरा पज्जो पेनदा पोल्लें कराहनोर्कुन, ओरा पज्जो अदुबूतामाता कबाहक कियानोर्कुन, ओरा पज्जो बिमार्कुन बेस कियानोर्कुन, ओरा पज्जो सहायम कियानोर्कुन, राज्येम ताकसानोर्कुन आनि वें-वें बासां वळ्कानोर्कुन निलाहता.

29 इत्ते, अंतोर प्रेरितुल्क आयुर, अंतोर पेनदा कबुरतोर आयुर, अंतोर पेनदा पोल्लें कराहनोर आयुर, अंतोर अदुबूतामाता कबाहक कियानोर आयुर,

30 अंतोर्क बिमार्क बेस कियाना वरम दोर्काहिल्ले, अंतोर वें-वें बासां वळ्कानोर आयुर, अंतोर अव पोल्लेना अर्तम वेहा पर्र,

31 मिमेट पेद्दा-पेद्दा वराल्कुना आसेते मंट, इवे आयाका इव्कन्ना बेसता हर्हि वेहंतन.

13

पावरम कियमळ अन्निक्कना बेस पोल्ले आंद

1 नना मनकालोर्क आनि पेनदा द्तां वळ्कना बासां वळ्कतेगुडा, नावा लोप्पो पावरम हिलाकोर्ते, नना टंग-टंग इनना इत्तोळतसंतोन हिलाकोर्ते गल-गल इनना गज्जेनसंतोन आंदुन.

2 काल गिंटा बविस्यवानि वेहना वरम मनना, अन्नि मर्माल्कु आनि तेल्विता पोल्लें तेळियना, गुट्टान जर्पनचो पूरा विस्वासम मनना गानि नावा लोप्पो पावरम हिलाकोर्ते नना बतले कबळतोन आयोन.

3 नावा पूरा दनमतुन गिंटा गरिबोर्कुं तूसि हिथ्यिना, बेसता कबुर वेहनाहाटी नावा मेंदुल बोळ्कसालय हिथ्यिना, नावा लोप्पो पावरम हिलाकोर्ते बतल पाय्दा मनो.

4 पावरमते ओप्के मंता, दया मंता. पावरम इंकावरोन पोर्री कळ्क पोत्ता हिथ्यो, पावरम पोमाडेंगि किया हिथ्यो, पेद्दिरकेम किया हिथ्यो.

5 रीति हिल्वा कबाहक किया हिय्यो, नाके पाय्दा गावाले इंचि इना हिय्यो, सिडांचा हिय्यो, बोरन्ना तकलिपकु कियाना अदुन मनसुने इरां हिय्यो.

6 कराब कबाहकुने कूस आया हिय्यो, गानि सत्तेमते कूस आंता.

7 पावरम अन्नि पोल्लें सहन किया वेहंता, अन्नि पोल्लेनपोर्रो विस्वासम किया वेहंता. अन्नि पोल्लेनपोर्रो आसे इरां वेहंता, अन्नि पोल्लेने ओपेकेते इरंता.

8 पावरम बस्केने मारो. गानि बविस्वयवनि वेहना वरम मारंता, वें-वें बासां वळकना वरम आगसि दांता, मर्मम तेल्लिचकुनना तेल्लि मत्ते अदगुडा कबळ किय्यो.

9 बारित्ते मना तेल्लि पुरागा हिल्ले अल्हेने बविस्वयवनि वेहना वरम पुरागा हिल्ले.

10 गानि बस्के अत्ते अन्निन पुरागा कियाना पोल्ले वायार, अस्के पुरागा हिल्वद मायसि दांता.

11 नना सिन्ना-पेडन मत्तस्के, सिन्ना-पेडनलेसी वळकुंदुन, सिन्ना-पेडनलेसी विचारम कियुंदुन, सिन्ना-पेडनलेसी मनसु मत्ता, गानि पेदुदागा आतारिते सिन्ना-पेडनलेसी वळकना पोल्लें होळसीतन.

12 इंदके मनाकु अदुदमते हळताप मागुर-मागुर दिस्सेक मंता, गानि आयंका ओना मुन्ने नित्तिसि हळंतोम. इंदके नाक पुरागा तेळियो, नावा बारेमते पेनदुक पुरागा तेळियंता. ओर वाता पजा, नाकगुडा पुरागा तेळियंता.

13 इंदके विस्वासम, आसे, पावरम इव मूड पोल्लें बस्केळक मनानवे आंदुं, गानि इवेटाल पावरम अन्निक्नना पेदुदा पोल्ले आंद.

14

वें-वें बासां आनि बविस्वयवनि

1 पावरम इद मीवा लक्से मन्निकाटी. आत्माता वराल्कन पहकाटु, बविस्वयवनि वेहना वरम पहकसेकेन मंदु.

2 बारित्ते, तेळियवा बासाते वळकानोर, ओर मनकालोर्कुनतोनि आयो गानि पेनतोनि वळकंतोर. ओर मर्ममता पोल्लें पेनदा आत्माताल वळकंतोर, अव पोल्लें मनकालोर्कुक तेळियो.

3 गानि बविस्वयवनि वेहानोर, मनकालोर्कुना बक्तितुन बेसांगोटालय, दैरेम हियालय, सांतिते मनालय वेहंतोर.

4 वें-वें बासाते वळकानोर, ओनदे बक्तितुन बेसांगोटंतोर. गानि बविस्वयवनि वेहानोर, कलिसियातोर बक्तितुन बेसांगोटंतोर.

5 मिमेट अंतोर वें-वें बासाते वळकगोम इंचि नना इनकुंतन. गानि दीनकन्ना एक्को बविस्वयवनि वेहमळे बेस इंचि इनकुंतन. बारित्ते वें-वें बासाते वेहानोर, कलिसियातोर्कुन बक्तिते बेसांगोटालय ओरा बासाते वेहाकोटे बतल पाय्दा हिल्ले. अदुनहाटी वें-वें बासाने वेहानदाकन्ना बविस्वयवनि वेहमळे एक्को पाय्दातद आंद.

6 विस्वासुल्कुनिटा! नना मिहगा वासि पेन नाक हीता पोल्लेन वेहकन, तेल्लिवा पोल्लेन वेहकन, बविस्वयवनि वेहकन, कराहकन अस्के मीक पाय्दा आयार. अवुन होळसिसि वें-वें बासाते वेहते मीक बतल पाय्दा आयार?

7 अल्हेने त्रीला आनि तरास बुरांते जीवा हिल्ले. अयनागानि अवुन बरोबर नेकिचाकोटे, बतल नेकसेक मंता इंचि बल्हा तेळियंता?

8 तूताकोमता आवाज बरोबर पेसाकोटे लडाइ कियालय बोर तयार आंतुर?

9 अल्हेने मिमेटगुडा वेंतोर्क तेळियना पोल्लेते वेहाकोटे, मीवा पोल्ले ओर्क बल्हा तेळियार? मिमेट वळिते वळकताप आंता.

10 दुनियाते बच्चुंगो तीरकुना बासां मंतां, गानि अर्तम हिल्वद बदे बासा हिल्ले.

11 अदुनहाटी अद बासाता अर्तम नाक तेळियाकोटे, नना वळकानोनतोनि वें देसेमतोन आंतन, ओर नावाहाटी वें देसेमतोर आंतोर.

12 अल्हेने मिमेटगुडा पेनदा आत्माता वराल्कुने निडिस मतिट, अवुनाहेंदाल कलिसियातोर्कुना बक्ति बेसना कोसिस कीम्टु.

13 अदुनहाटी वें-वें बासाते वळकानोर, दाना अर्तम वेहाना ताकत हीम इंचि पारतना कियाना.

14 बारित्ते, ननागिंटा वें-वें बासाते पारतना कीते, नावा आत्मा पारतना कीता गानि नावा बुदिद कबळ किय्यो.

15 अत्ते नाक बतल कियमळ गावाले? नना नावा आत्माते पारतना कीतन, नना नावा बुदिदतेगुडा पारतना कीतन. नना नावा आत्माते पाटा पारंतन, नना नावा बुदिदतेगुडा पाटा पारंतन.

16 ओक्कला निमे सिराप आत्माते दन्यवाद कियानयते, नीवा पोल्ले तेळियवोर अगा उदुदुता मनकल आमीन इंचि बल्हा इनानुर? निमे बतल वळकतिन ओनकु तेळिया हिल्ले.

17 निमे अत्ते पेनदुक बेस दन्यवाद कीतिन, गानि इंकावरोना बक्ति बेसालय अद कबळ किय्यो.

18 मी अंटोर्कन्ना एक्को वें-वें बासाने वळकना वरम नाक मंता, अदुनहाटी नना पेनदुक दन्यवाद कीतन.

19 गानि कलिसियातोकुनतोनि वें-वेंरे बासाते पदि वेय्कुना पोल्लें वळ्कनदानकन्ना, ओर्क कराहलय तेळियना बासाते हेय्यु पोल्लें ना बुद्दिदेते वेहामळे नाक बेस.

20 विस्वासुल्कुनिटा! मिमेट तेळिचेते सिन्ना-पिलाल्कुनालेसी मनमट, गानि पेद्दा मनकालोकुनालेसी मंट. कराब पोल्लेने सिन्ना-पिलाल्कुनलेसी तेळियवाप मंट. विचारम कियमळ्ते पेद्दोरागलेसी मंट.

21 दर्मसास्त्रमते, “नना तेळियवा बासाने वळ्कानोकुना हेंदाल, पराया लोकुल्कुना तोळ्दाल, ईरतोन वळ्कंतन, अघ्नागानि ईर नावां केंजुर,” इचि पेन वेहंता.

22 अदुनहाटी तेळियवा बासाते वळ्कमळ, विस्वासुल्कुनाहाटी आयो, गानि विस्वासम कियवोराहाटी चिन्ह आंद. बविस्वयानि वेहमळ विस्वासम कियवोराहाटी आयो, गानि विस्वासम कीतोराहाटी चिन्ह आंद.

23 ओककला कलिसियातोर उंदगा जमा आतस्के, अंतोर तेळियवा बासाते वळ्कालय दल्यते, मीलोप्पो बासा तेळियवोर, अविस्वासि वायानयते, ओर मीकुन पागल आतुर इचि इंतुर.

24 गानि मिमेटगिटा तेळियना बासाते बविस्वयानि वेहते, बोर्नना विस्वासम कियवोर हिलाकोटे तेळियवोर मनकल मिहगा वासि केंजेते, ओना तप्पुक ओन्क तेळियसि, ओर पापमतुन एरपाट कीकुंतोर.

25 ओना मनसुने मक्किस् मत्त्व पूरा दिसंतां. अदुनहाटी ओर बोक्बोर्ले अर्सि पेनदुन मोळ्कंतोर आनि “निजमे पेन मीलोप्पो मंता,” इचि ओप्कुंतोर.

आरादना कियाना तरिका

26 विस्वासुल्कुनिटा! इंदके बतल कियाना? बस्के अय्ते मिमेट जमा आंतिर, अस्के वरोर पाटा पारालय, वरोर कराहलय, वरोर पेनदा पोल्ले बैय्यरा कीसि वेहालय, वरोर वेंरे बासाते वळ्कालय, वरोर वेंरे बासाता अर्तम वेहालय तयार मनंतुर. इवन्नि कलिसियातोकुना बक्ति बेर्सनाहाटी आयमळ गावाले.

27 वेंरे-वेंरे बासाते वळ्कना मते, इब्जुर हिलाकोटे एककोते-एक्को मुब्जुर वरोन पजा वरोर वळ्किर आनि वरोर दाना अर्तम तेळियागोटिस वेहिर.

28 गानि अर्तम तेळियागोटिस वेहानोर गिटा हिलाकोटे, वेंरे बासाते वळ्कना मनकल कलिसियाते चुपचाप मंचि ओना मनसुने पेनतोन वळ्कना.

29 पेनदा कब्रुतोर इब्जुर हिलाकोटे मुब्जुरे वेहिर, कळमतोर वेहता पोल्लेन परिक्सा कीसि हळिर.

30 गानि उद्दिदस मत्तोरव्टेताल बोर्कन्ना अदे वेलाते पेनदा पोल्ले दोर्कसि अदुन वेहंतन इनकुनानयते, मुन्नेटाल वेहासेक मत्तोर चुपचाप उद्दना.

31 मिमेट अंतोर करियना, अंतोर सांतिते मंदना इचि वरोर-वरोर बविस्वयानि वेहा परांतिट.

32 पेनदा कब्रुतोर ओरा आत्मातुन ओर इनकुत्ताप तिरहा परांतुर.

33 बारित्ते पेन गळबळ कियानद आयो, सांति हियना पेन आंद. अन्नि कलिसियाना पेनदा लोकुल्क इल्हे मनंतुर.

34 कलिसियातोर जमा आतस्के मुर्ताहक चुपचाप मंदना, बारित्ते अबुंक वळ्कना अदिकार हिल्ले. गानि कय हिळ्ळ मंदना आदेस मंता. इल्हा दर्मसास्त्रमतेगुडा रासि मंता.

35 अबुंक बतलन्ना करियना इच्चा मत्ते, लोन होल्ता पजा अब अबुना मुय्दुकुन पूसकियाना. बारित्ते कलिसियाते मुरतळ पूसकियमळ इत्ते सिग्गु होनना पोल्ले आंद.

36 बतल! पेनदा पोल्ले मिहगाटाले पेय्सतना? सिराप मिहागळ्के वाताना?

37 बोर्नन्नागिटा, “नना पेनदा कब्रुतोन” हिलाकोटे, “नना पेनदा आत्मा मत्तोन” इचि इनकुनानयते, नना मीक रासता पोल्लें सामिना आदेसाल्क आंदु इचि ओन्क तेळियाना.

38 गानि बोर्नन्नागिटा इदुन ओप्कुनाकोटे, ओनगुडा ओप्कुनमट.

39 अदुनहाटी विस्वासुल्कुनिटा! बविस्वयानि वेहालय तयार मंट, वेंरे बासाते वेहते ओन आपमट.

40 गानि अन्नि पोल्लें बेस उंदान पज्जो उंदि जर्गिकांटी.

15

किरिस्तु जीवाते तेदमळ

1 विस्वासुल्कुनिटा! नना मीक वेहता बेसता कब्रुतुन मरा उंदि मल्का मति कीसि हीसेक मंतन. अद बेसता कब्रुतुन ओप्कुत्तिर, अबने गट्टेगा निल्सिगुडा मंतिर.

2 नना वेहता बेसता कब्रुतुन मिमेट होळसाकोटा पीसि मत्ते पेन मीकुन पिसागोटंता. हिलाकोटे मीवा विस्वासम कियमळ एर्तम आंता.

- 3 अदुनहाटी अन्निकन्ना मुन्ने नहगा एवता पोल्लेतुने मिहगा एविस्तन. अद बतल इत्ते, दर्मसास्त्रमता पोल्ले मत्ताप, किरिस्तु मना पापाल्कुनाहाटी हातोर,
 4 बौदा दोस्तुर, दर्मसास्त्रमते रासताप मूडो रोजुने जीवातेगुडा तेदतोर.*
 5 जीवाते तेदतस्के केपांक* दिसतोर, पजा पन्नेडु प्रेरितुल्कुंक दिसतोर.
 6 अद आता पजा, हेय्यु नुहकुंकन्ना एक्को विस्वासुल्कुंक उदे मल्का दिसतोर. ओरागटाल वेल्लेटुर इदवेरदाकागुडा जीवाते मंतुर, गानि इच्चुर हातुर.
 7 मर्रा याकोबुंक दिसतोर, दाना पजा अंतोर प्रेरितुल्कुंक दिसतोर.
 8 नना नेलां निडका मुन्नेन पुट्टोनलेसी अंतोर्कन्ना आकिरते नाकुगुडा दिसतोर.
 9 बारित्ते, नना अंतोर प्रेरितुल्कुन लोप्पो सिन्नोन आंदुन, नना पेनदा कलिसियातोकुंन तिप्पल्क कीतोन आंदुन. अदुनहाटी प्रेरित इनना लायकगुडा हिल्लेन.
 10 गानि इंदके बतलयेते मंतानो, पेनदा कुर्पाहेंदाले मंतन. अद कुर्पा नाक एर्तम आयाहिल्ले. नना कळमता प्रेरितुल्कुंकन्ना एक्को कस्टम कीतन. अघ्नगानि निजम इत्ते नना किया हिल्लेन, पेनदा कुर्पा नावातोनि मत्ता, अदे कीता.
 11 अदुनहाटी नना पेनदा पोल्ले वेहना, ओर वेहना मोमोट अंतोरम उंदे पोल्ले वेहंतोम. अदुन मिमेट विस्वासम कीतिर.

मनम जीवाते तेदमळ

- 12 किरिस्तु हातौरा लोप्पोटाल जीवाते तेदतोर इंचि मोमोट गिटा कबुर वेहानय्ये, हातोर मर्रा जीवाते तेदुर इंचि मीवा लोप्पोटोर इच्चुर इंतुर. अल्हा बारि इंतुर?
 13 हातोर मर्रा जीवाते तेदाकोंटे, किरिस्तुगुडा हासि जीवाते तेदा हिल्लोर.
 14 किरिस्तु गिंटा जीवाते तेदाकोंटे, मोमोट वेहाना बेसता कबुर एर्तमे, मीवा विस्वासमगुडा एर्तमे आंद.
 15 अचोने आयाका, किरिस्तु हातौरा लोप्पोटाल जीवाते तेदतोर इंचि मोमोट मीक वेहंतोम. हातोर गिंटा जीवाते तेदाकोंटे, पेन किरिस्तुनगुडा जीवाते तेहा हिल्ले इंचि तेळियंता. अदुना हेंदाल मोमोट पेनदा बारेमते आबदुम गवाइ वेहाताप आंता.
 16 अल्हेने हातोर गिंटा जीवाते तेदाकोंटे, किरिस्तुगुडा जीवाते तेदा हिल्लोर.
 17 किरिस्तु गिंटा जीवाते तेदाकोंटे, मीवा विस्वासम एर्तम आंद आनि मिमेट इदवेरदाका पापमतेन पसांचि मतिर.
 18 अल्हा अय्ये, किरिस्तुन विस्वासम कीसि हातोरगुडा नासडेमताल पिसा पर्राहिल्लुर.
 19 सिराप इद बूमिपोर्रांटा पिस्वरहाटीगे किरिस्तुनपोर्रां मना आसे इरते, मना गति अंतोर मनकालोकुंकन्ना एक्को गोसातद आयार.
 20 गानि निजम बतल इत्ते, किरिस्तु हामुरताल जीवाते तेदतोर. ओर अय्ये विस्वासुल्क हासि होत्तुर, ओरवेटाल जीवाते तेदतोर ओर मुन्नेटोर आंदुर.
 21 बल्हा अय्ये वरोर मनकनहेंदाल हामुर वाता, अल्हेने वरोर मनकनहेंदाल हातोर मर्रा जीवाते तेदमळगुडा वाता.
 22 बारित्ते, आदामुन लोप्पो अंतोर हासि दांतुर, किरिस्तुनलोप्पो अंतोर जीवाते तेहमळ जर्गार.
 23 हेरक मनकल वरोन पजा वरोर, मोदाला किरिस्तु जीवाते तेदतोर, किरिस्तु मर्रा वाता पजा ओना लोकुल्क जीवाते तेदांतुर.
 24 अदुन पजा, पूरा सरकार, पूरा अदिकार आनि ताकत इव अन्निन किरिस्तु नासडेम कीसि पेनबाबाना कय्ये राज्येम अप्पजेप्पंतोर. अस्के बूमिता आकिर आयार.*
 25 बारित्ते, किरिस्तु ओना पगातोकुंन काल्कुना हिळ्ळु थायनादाका, ओर राज्येम कियमळ गवाले.
 26 हामुर अन्निकन्ना आकिर पगातद आंद, अदुनगुडा नासडेम कीतोर.
 27 बारित्ते, पेन अन्निन किरिस्तुना काल्कुना हिळ्ळु इरता. अन्निन इंचि इत्ते, पेनदुन होळसिसि अन्निन इंचि बरोबर एर्का आंता.
 28 अन्निन ओना अदिकारमते इरता पजा, पेन अन्निन ताकिचगोम इंचि मर्रा कुद दाना अदिकारमते आंतोर. बारित्ते पेने अन्निन ताकिचंता.
 29 मर्रा जीवाते तेदाकोंटे, हातौराहाटी येसुना पोरोलते बापतिस्मा एततुर, ओर बतल कियानुर? हातोर गिंटा जीवाते तेदाकोंटे ओराहाटी बापतिस्मा बारि एताना?
 30 बस्केळ्ळक मना जीवातुन बारि डेंजरते इर्राना?
 31 विस्वासुल्कुनिटा! मिमेट मना सामि येसु किरिस्तुना लोप्पो विस्वासमते गट्टिगा मत्ताहाटी, नना मीवा बारेमते पेद्विरकेम वेहकुंचेके मंतन. अदुनहाटीगे नावा हामुरतुन रोज हळसेक मंतन.

32 इषीसि सहरतगा, नना केडा जिवासासनसोटा मनकालोर्कुना रीतिते लडांचतन, अय्ते बतल पाय्दा आता? हातोर गिंटा तेदाकोटे, दर्मसास्त्रमते रासि मत्ताप, “नाळि अय्ते हायानदे मंता, अदुनहाटी तिनकोम-उनकोम,” इंचि मन्नेम.✽

33 गानि हातोर मरा जीवाते अर्म्स इंचि इनानोरा हेंदाल दोकाते अरमट. “कराब लोक्कुना दंटा, बेस ताकानोर्कुन हेडहंता.”

34 अदुनहाटी नीतिते ताकसि उसारते मंटु, पापम कियमट. मीलोप्पो बच्चुदुरो पेनदुन एपाट कियवोरगुडा मंतुर, मीक सिगु वायागोम इंचि इद पोल्ले वेहसेक मंतन.

जीवाते तेदता मेंदुल

35 गानि बोरन्ना, “हातोर जीवाते बल्हा तेदंतोर? जीवा अरता पजा मेंदुल बल्हा मनंता?” इंचि पूसकिया परांतुर.

36 ए बुद्दि हिल्वोना! निमे बूमिते एदता पेळे, मुन्ने हासि, पजाटाल मोलियंता.

37 निमे एदतद, मोल्का आयो, पेळे आंद. अद गोह्कुना पेळे आयावचचु, इंका बदाना पेळे आयावचचु.

38 गानि पेन दाना इचातीर दान्क रूपम हीता. वेरे-वेरे पेडेक, वेरे-वेरे रूपम हीता.

39 गानि अन्नि मेंदुलक उंदेतीर मन्नों, मनकना मेंदुल वेरे, जिवासासिना मेंदुल वेरे, पिट्टेना मेंदुल वेरे, जिम्माना मेंदुल वेरे मंता.

40 स्वर्गमते मनानोर्क मेंदुल मनंता अल्हेने बूमिपोरों मनानोर्कगुडा मेंदुल मनंता. गानि स्वर्गमतोरा मेंदुलता वेल्गु वेरे, बूमि पोरीटोरा मेंदुलता वेल्गु वेरे मनंता.

41 पोळ्दुना वेल्गु वेरे, वेळिसता वेल्गु वेरे, सुक्काना वेल्गु वेरे. सुक्काना वेल्गु उंदानद-उंदांक परक मनंता.

42 हातोर मरा जीवाते तेदमळगुडा इल्हे मंता. कळियसि होनना मेंदुलतुन बूमिते दोसंतोम, गानि बस्केने कळियसि होनवा मेंदुल मरा जीवाते तेदंता.

43 मेंदुल बूमिते दोस्सनेके दाना कदर मन्नों, गानि अद मरा जीवाते तेदानेके दानकु वेरेने कदर दोर्कता. मेंदुल बूमिते दोस्सनेके दानकु ताकत मन्नों, गानि अद मरा जीवाते तेदानेके वेल्लेने ताकतते तेदंता.

44 बूमिते दोसतद मना दिस्सना मेंदुल आंदु, मरा जीवाते तेदानद आत्माता मेंदुल आंदु, अल्हेने दिस्सना मेंदुल मंता, आत्माता मेंदुलगुडा मंता.

45 दर्मसास्त्रमते इदुना बारेमते, “मोट्टा मोदाटा जीवाता मनकल आदाम आतोर” इंचि रासि मंता. आकिर आदाम, इत्ते किरिस्तु, पिस्वर हियना आत्मा आतोर.

46 गानि आत्माता मेंदुल मोदाटद आयो, दिस्सना मेंदुले मोदाटद आंद. दाना पजाने आत्माता मेंदुल वांता.

47 मोदाटा मनकल बूमिता तोळिते तयार आतोर, गानि पजाटाल वायाना मनकल स्वर्गमताल वातोर.✽

48 तोळिताल तयार आतुर अंतोर मनकालोर्क, तोळिता मनकनलेसीगे आतुर. स्वर्गमता मनकालोर्क, स्वर्गमतालेसीगे मंतुर.

49 मनम बल्हा अय्ते तोळिते तयार आतोना रूपम एततोम, अल्हेने स्वर्गमताल वायानोना रूपमगुडा एतंतोम.

50 विस्वासुल्कुनिटा! नना वेहानद बतल इत्ते, हळ्वि, नेत्तुरता मेंदुलक पेनदा राज्येम दोर्का परों, आनि कळियना मेंदुलक, कळियवा मेंदुलतागा अदिकार दोर्का परों.

51 केंजाट, नना मीक मर्ममता पोल्ले वेहसेक मंतन. अद बतल इत्ते, मनम अंतोरम हायोम, गानि मना रूपम मारियंता.

52 इदंता, उंदि सेकंदतेन, कळु रेप्पा तंतचचोरजेमनेन जर्गता. आकिरता तुताकोम उह्कुळा उह्कुळे, हातोर अंतोर बस्केने नासडेम आयाकोंटा मननाहाटी मरा जीवाते तेदानुर आनि मना रूपम बारे मारियंता.

53 बारित्ते, कळियसि होनना मेंदुल बस्केने कळियसि होनवा मेंदुललेसी, आनि हायना मेंदुल बस्केने हायाकोंटा मनना मेंदुललेसी मारिया पीता.

54 बस्के अय्ते कळियसि होनना मेंदुल, कळियसि होनवा मेंदुलते मारियंता आनि हायना मेंदुल हायवा मेंदुलते मारियंता, अस्के दर्मसास्त्रमते रासि मत्ताप, “पेन हामुरतुन मिंगिस वाटता” इंचि रासि मत्ता पोल्ले पूरा आंता.

55 “ए हामुरतुना! निमे माकुन बगा गेल्लितन? ए हामुरतुना, नीवा कस्कना कोंडि बगा मंता?” इंचि रासि मंता.

56 हामुरता कोंडि पापम आंद, पापमता ताकत म्सासा नियम आंद.

57 मना सामि येसु किरिस्तुनाहेंदाल पेन मनाकुन गेल्सागोटंता. अदुनहाटी पेनदुक दन्यवाद.

58 नावा पावरमाल्ला विस्वासुल्कुनिटा! सामिना लोप्पो मीवा कस्टम एतंम होन्ने इंचि मीक एपाटे मंता. अदुनहाटी मिमेट विस्वासमते हीके-हेके आयाकुंटा, गट्टेगा निल्लिस मंटु, सामिना कबळते इंका एक्को बेस्सेके होंटु.

16

येस्सलेमता कलिसियातोरहाटी चंदा

1 येस्सलेमता पेनदा लोकलकुनाहाटी चंदा जमा कियाना बारेमते, बल्हा अयते गलातिया एरियाता कलिसियातोरक वेहतानो, अल्हैने मिमेटगुडा कियाना.

2 नना वाता पजाने चंदा जमा कियमट, गानि मीववटेडाल हरेक मनकल ओना कमाइता इसाबते वारमता मोदाटा रोज* इच्चुक कोतां जमा कीसि ईट.

3 नना वाता पजा, मिमेट बोर्कुनयते इद कबळताहाटी पेरातिरो, ओर्क नना सिट्टिं हीसि, ओरा कयदेने मिमेट जमा कीता चंदा येस्सलेम लोहचीतन.

4 ओक्कला नना होनमळ कुदुरते, ओर नावातोनि वांतुर.

पौलसना पय्नेम होनना विचारम

5 नाक मेसिडोनिया एरियाते होनना मंता, मेसिडोनियाताल पजा मिहगा वांतन.

6 मिहगा वासि, आया परते कोन्नि रोजकु हिलाकोटे पूरा पीनि कालम मीवातोनि मनंतन. दाना पजा नाक बेके होनना मंता, हेके सालां कीम्ट.

7 बारित्ते, मेसिडोनियाते होनानेके नड्डुम आगसि मीक कलियमळ नाक इस्टम हिल्ले. सामिना इच्चा मते, मीवातोनि कोन्नि रोजकु मंदना इंचि नावा आसे मंता.

8 गानि इंदके, पेंतेकोस्त पंडुगुनदाका इपीसि सहरतेन मनंतन.

9 बारित्ते, इगे बेसता कबळ कियालय, नाक उंदि पेद्दा मोका दोर्कता, इंका विरोद कियानोरगुडा वेल्लेटुरे मंतुर.

10 तिमोति मिहगा वातस्के ओर मीवा नड्डुम दैरनेमते मननाल हळट. ओरगुडा नावालेसी सामिना सेवा कीसेक मंतोर.

11 अदुनहाटी ओन बोरे सिन्गगा हळ्वा मन्नि, ओन सातिते नहगा लोहट. मिहगाटा विस्वास्कुनतोनि ओर वायानुर इंचि नना एदुर हळसेक मंतन.

12 अप्पुलोस दादान, विस्वासि दादालोर्कुनतोनि होन इंचि नना बच्चुंगो मल्कां बतिमलाडसि वेहतन, गानि इंदके मिहगा वायाना विचारम ओनद हिल्ले, पजा मोका दोर्कतस्के वायानुर.

13 इंदके मिमेट उसारते मंट, विस्वासमते गट्टिगा मंट, दैरनेमते मंट, बलमगल्लोर्के आसि मंट.

14 मिमेट कियाना कबाहक अन्नि पावरमतेन कीम्ट.

15 विस्वास्कुनिटा! स्टिपनसना लोतोर्कुना बारेमते मीक एपाटे मंता, ओर अकाया एरियाते मोदाला विस्वासम कीतुर. ओर पेनदा लोकलकुना सेवा कियालय ओरद-ओर अप्पजेपकुत्तुर.

16 मिमेटगुडा असंतोरा आनि ओरालेसी सेवा कियानोरा पोल्ले केंजसि ताकट इंचि बतिमलाडसंतन.

17 मिहागटाल मिमेट वायाकोन्ना गानि स्टिपनस, पुरतुनातुस, अकयकुस नहगा वातुर. ओर वाताहाटी मिमेट वाताप आता. इंचि नना वेल्ले कूस आतन.

18 ओर वातुर इंचि नावा जीवक आनि मीवा जीवक सांति दोर्कता. अदुनहाटी इस्तोर्कुन कदर हीम्टु.

आकिरता जोहर

19 आसिया राज्यमते मनना कलिसियातोर मीक जोहर वेहतुर. अकविला, ओना मुत्तो पिरिसक्लिआ आनि ओरा लोतागा जमा आयाना कलिसियातोरगुडा सामिना पोरोलते मीक जोहर वेहतुर.

20 इग्गोटा अंतोर विस्वास्कु मीकून जोहर कीसेक मंतुर. मिमेट वरोंक-वरोर पवित्र पावरमते कलियसि जोहर वेहकुंट.

21 नना पौलसुन, नावा कयदे जोहर इंचि मीक रासेक मंतन.

22 बोरेन्नागिंटा सामिन पावरम कियार्कोटा मत्ते, ओन्क सापनेम दल्गि. “मारानाता” इत्ते, मा सामि वा.

23 सामि येसुना कुर्पा मी तोळ मन्निकांटी.

24 येसु किरिस्तुना लोपोटा नावा पावरम मीवा अंतोरतोनि मंदना. आमेन.

* 16:2 वारमता मोदाटा रोज इगे वारमता मोदाटा रोज इत्ते, अय्यारम.

2 कुरेंति

कुरेंति विस्वासुल्लुकुं पौलुसना रोंडो सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 57

कुरेंति कलिसियातोरक पौलुस रासतद इद रोंडो सिट्टि आंदु. आबददम करहानोरा इच्चुर गुम्लुकुनाहेंदाल पौलुस आनि कुरेंति कलिसियातोरानु नड्डुम समस्या तयार आता. इच्चुर विस्वासुल्लुकुं गूडा पौलुसुना पोर्लेलें केजाकोटा आतुर इंचि पौलुसुं क तेळियता.

अदुनहाटी पौलुस इद सिट्टि मेसिडोनिया सहरताल रासतोर. कलिसियाते बचोर तकलिप वायिना विस्वासुल्लुकुं किरिस्तुनलोपो गट्टिगा निल्लिस मननाहाटी दैरेनेम हियालय रासतोर. निजम पेनदा सेवा कियानोर बल्हा मनागोम इंचि तेडियागोटसि वेहालय रासतोर. अल्हेने इच्चुर विस्वासुल्लुकुं आबददम करहानोरा पोर्लेलें केजसि पौलुसुन विरोद कियुंदुर, अदुनहाटी पौलुस ओना सतता अधिकारमतुन पीसि ओर्क इस सिट्टि रासतोर.

बगा बतल मंता

जोहर आनि परिचयम 1:1-11

कुरेंतिते पौलुस आनि कलिसिया 1:12-7:16

यहूदियाता विस्वासुल्लुकुनाहाटी चंदा जमा कियमळ 8:1-9:15

पौलुस प्रेरित आंदुर इंचि रूजुव कीसि हुप्संतोर 10:1-13:10

आकिरता बोदां 13:11-13

जोहर

1 पेनदा इच्छाताहेंदाल किरिस्तु येसुना प्रेरित आतोन नना पौलुसुन आनि मना तम्मुर तिमोति ओक्कला कुरेंति सहरते मंदना कलिसियातोरक अल्हेने अकाया एरियाता अंतोर पवित्र लोक्कुल्लुकुं सिट्टि रासेक मंतोम.*

2 मना पेनबाबाल आनि सामि येसु किरिस्तुनाहेंदाल मीक कुर्पा, सांति दोर्कसेके मनि.

पौलुस पेनदुन दन्यवाद कीतोर

3 मना सामि येसु किरिस्तुना पेनबाबाल दयागल्लोड अल्हेने अन्नि तीरकुना सांति हियाना पेन आंदुर, अदुनहाटी ओन्क दन्यवाद आयि.

4 मनम इकावरोंक सांति हियागोम इंचि पेन मनाकु अन्नि तकलिपकुने सांति हीसेक मंता. बोर अयते तकलिपते मंतुर, पेन मनाकु हीता सांतितुने मनम ओर्क हिया परगोम इंचि दाना इच्चा मंता.

5 बारितते मनम किरिस्तुनाहाटी बचोर एक्को तकलिप अर्तोम, अच्चोर एक्को किरिस्तुनहेंदाल मनाकु सांतिगूडा बेस्सेके दांता.

6 मीक सांति आनि मुक्ति दोर्कागोम इंचे मोमोट तकलिप बोगांचेके मंतोम. माक सांति दोर्कता इत्ते, अद मीवा सांतिताहाटीगे आंद. इदुनहेंदाल बद तकलिपतुन अयते मोमोट ओर्सकुत्तोम, मिमेटगूडा अदे तकलिपतुन ओप्केते ओर्सकुना परांतरि.

7 मावा तकलिपते मिमेट बल्हा कलियसि मंतिरो अल्हेने मावा सांतितागूडा मिमेट कलियसि मंतिर. अदुनहाटी मीवा बारेमते मावा आसे गट्टिगा मंता.

8 विस्वासुल्लुकुनिटा! आसिया एरियाते[†] माक वेल्लेने तकलिप वाता, अद तकलिप मोमोट आपकुना परवचो मत्ता, मोमोट पिसंतोम इंचिगूडा इनकुना हिल्लोम. अद पोर्लेले मीक तेळियसि मनागोम इंचि वेहासेक मंतोम.

9 निजमे, माक हामुरता सिक्सा दोर्कता इंचि इनकुंचेके मत्तोम, गानि कुद मनापोरें[†] मनम बरोसा इरामन्नि, हातोर्कुन तेहाना पेन पोर्[†] बरोसा इरमळ गावाले इंचि इल्हा जर्गता.

10 पेने माकुन इच्चोर पेदुदा हामुरता गंडेमताल पिसागोटता, पिसागोटसेक मंता, मुन्नेगूडा माकुन पिसागोटसेक मनंता इंचि माक अदुन पोर्[†] आसे मंता.

* 1:1 इद सिट्टितुन पौलुस वरेंरे रासतोर, सिल्वानुस आनि तिमोति ओनतोन जोहर इंचि वेहत्तुर. † 1:8 आसिया एरिया अस्केटा आसिया एरिया इत्ते, इदकेटा तुर्कि देसेम आंद.

11 वेल्लेटोरा पारतनाहेंदाल पेन मापोर्री दया हृपिच्चि माकुन पिसागोटता, अदुनहाटी वेल्लेटुर लोकुकक माहेंदाल पेनदुक दन्यवाद कीसेक मंतुर. अय्ते मिमेटगुडा अंतोर कूळसि माहाटी पारतना कीसि माक सहायम कीम्टु.

पौलसना पय्नेमता पिलान बदलांचमळ

12 मोमोट दुनियाते मननेके कास कीसि मीवा नड्डुम मननेके, पेनदुक इस्टामाताप पवित्र आनि सत्तेमते मत्तोम, अद मनकना तेल्विते आयो गानि पेनदा कुर्पातोनि मत्तोम इंचि मावा मनसु गवाइ वेहासेक मंता. इद मावाहाटी पेद्रिकेमता पोल्ले आंद.

13-14 मिमेट हदविते मीक, तेळियाना पोल्लेगे मोमोट रासेक मंतोम, अव आयाका वेरे बवे पोल्ले मीक रासेक हिल्लोम. आनि आकिरदाका मिमेट अवुन कबुल कीतिर इंचि नाक आसे मंता. अचोने आयाका सामि येसु वायाना रोजुने मोमोट मीपोर्री पेद्रिकेम कीताप, मिमेटगुडा मापोर्री पेद्रिकेम कीकिट.

15-16 इद बरोसाता हेंदाले नना मोदाला मिहगा आगिसि, मिहागटाल मेसिडोनिया दांतन. मर्रा मेसिडोनियाताल मल्सि वायानेकेगुडा मीकु रोंडु पायदां आगयोम इंचि मिहगा आगंतन. पजा अगटाल मिमेट नाकुन यहुदिया एरियाताहाटी साल्रा क्रिया परांतरि इंचि इनकुचेके मंतन.

17 नना इव पिलानकु बतले विचारम क्रियाकेने कीतोर इचेके मंतरा? दुनियाता लोकुककुनालेसी उंदि मल्ला “हो” इंचि इंकुंदि मल्ला “हिल्ले” इंचि इनानोन आयोन.

18 पेन विस्वासमगल्लद आंद, अल्हेन मोमोटगुडा “हो” आनि “हिल्ले” इल्हा रोंडु पोल्ले वळकोम.

19 बारित्ते, नना, सिल्वानुस आनि तिमोति मोमोट मीवा नड्डुम पेनदा मर्रि येसु किरिस्तु आंदुर इंचि वेहतोम. येसु किरिस्तु “हो, हिल्ले” इल्हा रोंडु पोल्ले वळकोर गानि ओर बस्केळक “हो” इंचे इंतोर.

20 पेनदा अन्नि पोल्ले येसुनगा पूरा आतां. अदुनहाटी मनम आमीन इंचि पेनदा महिमा कीतोम.

21 मीवातोनि अबिसेकम कीसि, किरिस्तुनलोप्पो गट्टिगा निलाहनोर पेने आंद.

22 पेन मनापोर्री सिक्का वाटता अल्हेने गेरंटितालेसी मनालोप्पो दाना पवित्र आत्मातुन इरता.

23 मीकुन इंका नोपिचमळ नाक इस्टम हिल्ले, अदुनहाटी नना इदवेरादाका मिहगा कुरैति सहर वाया हिल्लेन. इद पोल्ले निजम इंचि ना मनसुन हळना पेने गवाइ मंता.

24 मीवा विस्वासम पोर्री अदिकारम हुप्सना इंचि मोमोट वेहासेक हिल्लोम, मिमेट विस्वासमते गट्टिगा निल्सि मंतिट, मीवा आनंदमते मोमोटगुडा मीवा तोळ मनंतोम.

2

1 नना मिहगा वासि मीक मर्रा दुक्कम वायागोटोन इंचि मनसुने इनकुत्तन.

2 बारित्ते नना मीकुन दुक्कम कीति, नाकुन बोर आनंदम कियानुर? मीक तप्पा बोरे कियूर!

3 नना अगा वातस्के नाक बोराहेंदाल अय्ते कुसि आयाना मंता, ओरा अंतोराहेंदाल नाक दुक्कम आयामनि इंचि नना मुन्ने अद सिट्टि* रासि लोहतन. नाक मी बारेमते विस्वासम मंता, नावा कुसि मीवा अंतोरदगुडा कुसि आंद.

4 नना नावा मनसुनाल वेल्ले दुक्कमते, बादते अळसेके अद सिट्टि रासि मीक लोहतन. नना मीक दुक्कम कियालय आयो गानि मीवापोर्री नावा पावरम बच्चो वेल्ले मंता, अद मीक तेळियगोम इंचि नना रासि मलतन.

तप्पु कीतोन मापि कियाना

5 बोर्नान्गिटा दुक्कम हियानय्ते, ओर सिराप नाकुने दुक्कम हीतोर इत्ताप आयो, तक्को-एक्को मीक अंतोर्कगुडा हीतोर. इदुना बारेमते नना दीनकन्ना एक्को बतल वेहोन.

6 असंतोनाहाटी मिमेट वेल्लेटुर हीता सिक्सा साल आंता.

7 अदुनहाटी ओन्क इंका सिक्सा हियाका, मापि कीसि, समजांचट. अल्हा कियाकोटे ओर इंका एक्को रंदि कीसेक मनंतोर.

8 अदुनहाटी मिमेट ओनपोर्री एक्को पावरमतुन हुस्पट इंचि मीक विनति कीसेक मंतन.

9 मिमेट नना वेहता अन्नि पोल्लेने ताकंतिरा, ताकिरा इंचि मीकुन परिकसा कीसि हळालयगुडा अद सिट्टि रासतन.

10 मिमेट बोन्नना मापि कीति ओन ननागुडा मापि कीतन, नना बतलयते मापि कीतानो किरिस्तुना मुन्ने मीवाहाटी मापि कीतन.

11 मापि कियाकोटे देय्म बस्केनना तकलिप हिच्या परांता. बारित्ते दाना गुनम बसोंटदो मनक एरपाटे मंता.

* 2:3 पौलस कुरैति कलिसियातोकं मूड सिट्टि रासतोर, रोंडो सिट्टि दोकाहिल्ले, अद सिट्टि इत्तेने गायब आता सिट्टि आंद.

पूना करारता सेवाकुलक

- 12 नना बस्के अथे किरिस्तुना बारेमता बेसता कबुर वेहालय त्रोआस सहरते होतनो, अस्के सामिनाहेंदाल नाकु हरि पुरता.
- 13 ना तम्मुर तीतु अगा कलिया हिल्लोर, अथे ना मनसुक सांति दोर्काहिल्ले. अदुनहाटी दांतन इंचि ओर्कु वेहचि, मेसिडोनिया एरियाते पेय्सि होतन.
- 14 पेनदुक दन्यवाद आयि! अद किरिस्तुनलोपो मनाकुन बस्केळक गेल्सागोटसेक ओता आनि गमा-गमा गब्बुनसोंटा दाना तेल्विंतुन मनाहेंदाल अग्नि जेगाने पैलांचंता.
- 15 बारित्ते मुक्ति दोर्कानोरा लोपो आनि नासडेम आयानोरा लोपो मनम पेनदाहाटी किरिस्तुना बेसता गब्बु आंदुम.
- 16 नासडेम आयानोराहाटी हामुर गब्बुलेसी मंतोम आनि मुक्ति दोर्कानोराहाटी पिस्वरता बेसता गब्बुलेसी मंतोम. इसोंटा कबळ कियानालायक बोर मंतुर?
- 17 बोर अथे पेनदा पोल्ले वेहचि सतता पायदा कीकुतुर, असंटा वेल्लेटोरवेट्टाल मोमोट हिल्लोम. गानि मोमोट सततेम मनसुने, किरिस्तुना अदिकारमते पेनदा पोल्ले वेहासेक मंतोम. माकुन लोहता पेन माकुन हळसेक मंता इंचि माक एरपाट मंता.

3

पूना करारता सेवाकुलक

- 1 मावद मोमोटे मरा पेद दातनम वेहकुचेके मंतोम इनकुंचितिरा? हिलाकोटे वेरेतोर्कु अक्सरम मत्ताप माकगुडा मीवाहाटी सिपारिस सिट्टि मिहगा तरमळ, मिहागटाल एतमळ अक्सरमा?
- 2 मावा सिट्टि अथे मिमेटे आंदिर, अद मावा मनसुने रासि मंता, अदुन अंतोर एरपाट कीतुर, हदवंतुर.
- 3 निजमे, मिमेट माहेंदाल हीता किरिस्तुना सिट्टि आंदिर इंचि अंतोर्क दिस्सेक मतिट. अद साइते आयो गानि जीवाते मंदना पेनदा आत्माते रासि मंता, अद पर्पु बंडनपोरों आयो गानि मनकना मनसुनपोरों रासि मंता.
- 4 किरिस्तुनाहेंदाल माकु पेनदापोरों इसोंटा बरोसे मंता.
- 5 मावद मोमोटे बदाना पोल्लेता विचारम कियानालायक हिल्लोम, गानि इवुन कियाना बलम पेने माकु हीसेक मंता.
- 6 पेन माकुन पूना करारता सेवक आयाना लायकगुडा कीता. अद करार मूसाना नियमते रासि मत्ताप आयो गानि, पेनदा आत्माताहेंदाल मंता. मूसाना नियम हामुरतेके ओता गानि पवित्र आत्मा पिस्वरताहेके ओता.

पूना करारता महिमा

- 7-8 पर्पु बंडनपोरों पेन दाना नियमकुन रासि मूसांक हीता, अस्के अखुन ओर इम्राएल लोकुकुकु हियनेके ओना मोकम पेनदा महिमाता वेल्गुने निडिसि मत्ता. गानि अद वेल्गु तक्को आयानेकेगुडा ओर ओना मोकमतुन हळा पराहिल्लुर. इल्हा हामुरताहेके ओयाना मूसाना नियमता महिमाता वेल्गु इचचोर मत्ता अथे, पेनदा आत्माता महिमाता वेल्गु इका बचचोर पेददा मनंता.
- 9 बारित्ते सिक्साहेके ओयाना मूसाना नियमे अचचोर महिमाता वेल्गुने मत्ता, अथे मनकालोर्कुन नीतिमंतुलक कियाना नियमते दानकन्ना इका बचचोर महिमाता वेल्गु मंदार.
- 10 इंदकेटा महिमाता वेल्गु, मुन्नेटा महिमाता वेल्गुकन्ना बचचोरो एक्को मंचि अद हिल्ले इत्ताप आता.
- 11 तक्को आसेके होनानदुना महिमाता वेल्गु इचचोन मत्ते, इका बस्केळक मनानदुना महिमाता वेल्गु बचचोन वेल्ले मंदार!
- 12 अदुनहाटी इदे आसेता हेंदाल मनम बचचोरो दैरेनेमते वळकंतोम.
- 13 इम्राएल लोकुकुकु तक्को आयाना महिमाता वेल्गुन हळा मनि इंचि मूसाल ओना मोकमपोरों मुस्कु वाटकुन्दुर, गानि मनम ओरालेसी मुस्कु वाटकुन्नेम.
- 14 इम्राएल लोकुकुकुना मनसुक गट्टिगा आसि होत्तां. इव रोजकुनेगुडा बस्के अथे ओर पळाना नियम हदवंतुर, अस्के अदे मुस्कु ओरा मनसुन मुचंता. सिराप किरिस्तुनपोरों विस्वासम इरते, किरिस्तुए ओरा मुस्कुन तेंडा परांतोर.
- 15 निजमे, इंदकेगुडा मूसाना पुस्तकम हदवंतुर अथे मुस्कु वाटताप अव पोल्लेना अर्तम तेळियो.
- 16 गानि बस्के अथे ओरा मनसु सामिनहेके तिरियार, अस्के सामि ओरा मुस्कु तेंडसि ओर्क तेळियाना बुद्दि दिव्यानु.
- 17 सामि अथे आत्मा आंदुर. बगा अथे सामिना आत्मा मंता, अगा बोना कयदा हिळ हिल्लोम.
- 18 मनम अंतोरम अद मुस्कुन तेंडसि पोहतोम, इंदके अदुदमते हळताप सामिना महिमाता वेल्गुन हळसेक मंतोम. ओना आत्मा मनालोपो मत्ताहाटी ओनालेसीगे मनम मारियसेके मंतोम.

4

पौलसना सेवाता बारेमते

- 1 पेन मापोर्रो दया कीसि, दाना पोल्ले वेहाना इद सेवा माक हीता, अदुनहाटी मोमोट दैनेमते वेहांतोम.
- 2 सिगु होनानव आनि मक्किस् कियाना कबाहकून मोमोट होळसीतोम. इंकावरोन दोका हियमळ आयि, पेनदा पोल्लेतुन उलटा-पल्टा कीसि वेहमळ आयि इसोंटा कबाहक किय्योम. गानि पेनदा मुन्ने सत्तमे पोल्लेतुन वेहाना हेंदाल, मोमोट बसंटरम इंचि हरेक मनकंक ओरा मनसुने तेळियंता.
- 3 मना बेसता कबुरगिंटा मुस्कु वाटताप मनानयते, अद नासडेम आयानोराहाटीगे मंता.
- 4 किरिस्तु पेनदा रूपम आंदुर, ओना महिमाता बेसता कबुरता वेल्गुन हळा मनि इंचि ई दुनियातोर पेन विस्वासम कियवोरा मनसुन हीकट कीसि पोहता.
- 5 अदुनहाटी येसु किरिस्तु सामि आंदुर, ओनाहेंदाले मोमोट मी सेवाकुलकुम आंदुम इंचि प्रचार कीतोम, गानि मावा बारेमते मोमोट प्रचार कीकुन्नोम.
- 6 बारित्ते, “हीकटताल वेल्गु आयि” इंचि पेने इत्ता. मनम येसु किरिस्तुना मोकमते दिस्सना पेनदा महिमाता तेल्चितुन एरपाट कियगोम इंचि मनाकुन इदे वेल्गुने मना मनसुने मेसिंगोटा.
- 7 मनालोपो मंदना इद वेल्गु पेदुदा दनमलेसी* मंता. गानि ई दनमतुन तोळिता अळकातसोंटा मना मेंदुलकुने पेने इरता. इदुनहेंदाल ई वेहा परवचो ताकत मनद आयो गानि पेनदाहेंदाल मंता इंचि माकु तेळियंता.
- 8 माकु नालु मूलानाल आपत्ति अयते वांतां, गानि आपत्तिते अर्सि होन्नोम, वेल्लेने मलकां गाबर आंतोम, गानि आसे हिल्वाप मननोम.
- 9 लोकुलक तकलिप अयते कीतुर गानि पेन माकुन होळसो. पगातोर हिल्ल अरहंतुर गानि नासडेम आयोम.
- 10 येसुना पिस्वर मावा मेंदुल्ले दिस्सागोम इंचि येसुना हामुटुन बस्केळक मा मेंदुल्ले पीसि तिरियंतोम.
- 11 येसुना पिस्वर मावा हायाना मेंदुल्ले दिस्सागोम इंचि मोमोट पिस्सि मंचिगुडा बस्केळक येसुनाहाटी हामुरता कयदे मनंतोम.
- 12 अदुनहाटी मावा लोपो हामुर, मीलोपो पिस्वर कबळ कीता.
- 13 दर्मसास्त्रमते, “नना विस्वासम कीतन, अदुनहाटी वळकतन” इंचि रासि मत्ताप मोमोट विस्वासम कीतोम, अदे विस्वासमता आत्मा मावा लोपो मंता इंचि मोमोट वळकतोम. बारित्ते अदे विस्वासमता आत्मा मावा लोपो मंता.
- 14 बारित्ते, सामि येसुन जीवाते तेहता पेने मोमोट येसुना लोपो कलियसि मत्ताहाटी माकुनगुडा जीवाते तेहंता आनि मीवातोनि माकुनगुडा दाना मुन्ने निपसंता इंचि माक एरपाटे मंता.
- 15 पेनदा कुर्पा वेल्लेदुर लोकुलकुनगा एवसि, दाना महिमा कियालय एक्कोते-एक्को दन्यवादाळक वेहाना पारतनां बेसिंगोम इंचि इवान्नि मीवाहाटी मंतां.
- 16 अदुनहाटी मोमोट दैनेम होळसोम. मावा मेंदुल पलाताल जिगि हिलाकोंटा आसेके मंता, गानि लोपो मंदना आत्मा मात्रम रोज पुनगा आसेके मंता.
- 17 बारित्ते, माकु गळसेमताहाटी वायाना तकलिपकु, मावाहाटी मोमोट विचारम किय्योम अचोर अक्सरम आतव आनि बस्केळक मंदना महिमातुन तयार कीतां.
- 18 अयते इंदके मोमोट दिस्साना वस्तुकुन पोर्रो आयो, गानि दिस्सुवा वस्तुकुन पोर्रो नदर वाटतोम. दिस्सना वस्तुकु गळसेम मनंतां, दिस्सुवा वस्तुकु बारे बस्केळक मनंतां.

5

मावा स्वर्गमता लोन

- 1 बूमिपोर्रो मंदना लोतालेसी मावा मेंदुल मंता. अद लोन नासडेम आतस्के माकु मनालय स्वर्गमते लोन मंता, अद बस्केळक मंदना लोन मनकल तयार कीतद आयो, गानि पेने कीता इंचि माकु एरपाटे मंता.
- 2 इंदकेटा लोतसोंटा मेंदुल्ले मोमोट नेर्बळतोम, अदुनहाटी स्वर्गमता लोतुन केरानाहाटी वेल्ले तनलाळंतोम.
- 3 बारित्ते इदुन केर्तस्के मोमोट कुळकें दिस्सोम.
- 4 मोमोट इद बूमिपोर्रोटा मेंदुल्ले मत्तचोरजेम बवुने तन्लाळसेक मनंतोम, इद मेंदुल्लुन होळसीयगोम इंचि आयो, गानि हायाना मेंदुल बस्केळक पिस्साना मेंदुल्ले मारियागोम इंचि मोमोट कोरसेक मंतोम.
- 5 इदे मेंदुलाहाटी पेन माकुन तयार कीता. इद गोरंटी इंचि मावा लोपो पवित्र आत्मातुन हीता.
- 6 अदुनहाटी बस्केळक दैनेमते मनंतोम. मोमोट मेंदुल्ले मत्तचोरजेम सामिनगटाल लक्कु मंतोम इंचि माकु एरपाटे मंता.
- 7 बारित्ते मोमोट हळसि आयो गानि सामिनपोर्रो विस्वासम कीसि ताकतोम.
- 8 मोमोट दैनेमते मनंतोम, मेंदुल्लुन होळसिसि सामिनतोनि मनमळे बेस इनकुंतोम.

* 4:7 दनम इगे दनम इते पेनदा तेल्चि. विस्वासुलकुंक अप्पजेपता बेसता कबुर.

9 अदुनहाटी मोमोट इद मेंदुल्ले मनना, मनाकोन्ना, सामिक इस्टाम वाताप ताकमळे मावा उदुदेसम.

10 बारित्ते मनक अंटोर्क किरिस्तुना न्यायम कियाना राजगदूदे मुन्ने नित्ताना मंता. मनागटाल हरेक मनकंक मनम कीता बेसता कबाहक आयि, कराब कबाहक आयि अबुना हिसाबते इनाम हिलाकोटे सिक्सा दोर्कता.

मोमोट किरिस्तुना राजदुतकुम

11 पेनदुक वेरियसि बल्हा पिस्सना इद माक तेळियंता, अदुनहाटी इदुन मोमोट लोकुकुक वेहांतोम. मोमोट बसंटरम इंचि मावा बारेमते पेनदुक पूरा एपाटे. इव पोल्लें मीवा मनसुना लोप्पोगुडा एपाट आता इंचि नावा आसे मंता.

12 मोमोट बेसतोकुम इंचि मरी मी मुन्ने वेहकुंचेके हिल्लोम, गानि इच्चुर लोकुकक मनसुने मत्ता पोल्लें आयाका पलाताल दिस्साना पोल्लेना बारेमते पेदिरकेम कीतुर, ओराहाटी मावा बारेमते वेहालय मीक जवाब गावाले इंचि वेहासेक मंतोम.

13 माकुन गिंटा बोरन्ना पिस्सालोर इंचि इत्ते, पेनदाहाटीगे आतोम. बोरन्नागिंटा माकुन बेसता बुदुदितोर इंचि इत्ते मीवाहाटीगे आतोम.

14 किरिस्तु अंटोराहाटी हातोर इंचि मोमोट विस्वासम कीतोम. इंका मावा अंटोरा पळाना पिस्वरगुडा हाता इंचि विस्वासम कीतोम. अदुनहाटी किरिस्तुना पावरम माकुन ओप्केते इरसेक मंता.

15 अद बल्हा इत्ते, इंदकेटाल पूना पिस्वर पिसानोर ओर सतताहाटी आयो गानि ओराहाटी बोर अथे हासि जीवाते तेदतोर ओनाहाटी पिसागोम, अदुनहाटीगे ओर अंटोराहाटी हातोर.

16 अदुनहाटी इंदके मोमोट मनकना विचारम मत्ताप हळना आयो. मोमोट किरिस्तुनगुडा मनकना विचारम मत्ताप हळसि मत्तोम, गानि इंदके ओन अलग नदरते हळ्यांतोम.

17 बल्हा इत्ते, इंदके बोर अथे किरिस्तुने मंतोर, ओर पूना मनकल आतोर. पळाना पिस्वर होत्ता, पूना पिस्वर सुख आता.

18 इवनि पोल्लें पेनदाहेंदाले मंतां. पेने मनाकुन किरिस्तुनाहेंदाल दानतोनि कल्पिसि माकु कल्पना सेवा अप्पजेपता.

19 अद बल्हा इत्ते, लोकुकुकना पापालक लेक्का पिथ्याकेन, ओर्कुन किरिस्तुना हामुरताहेंदाल दानतोनि कल्पता. इल्हा कल्पना पोल्लेतुन लोकुकुकुनगा ओयालय माकुन निल्लाता.

20 अदुनहाटी मोमोट किरिस्तुना राजदुतकुम आंदुम. मावाहेंदाल पेन मीक वेहासेक मंता इनकुंदु. मिमेट पेनतोनि कलियसि मंदना इंचि किरिस्तुनाहेंदाल मोमोट मीक विनंति कीसेक मंतोम.

21 मनम किरिस्तुनाहेंदाल पेनदा लोप्पो नीतिमंतुलक आयागोम इंचि मना बदलाते मना पापालकुनाहाटी पापम कियवा किरिस्तु मोक्कु आतोर.

6

1 मोमोट पेनतोनि कलियसि कबळ कियानोकुम आताहाटी मीक विनंति कीसेक मंतोम, मीक दोर्कता पेनदा कुर्पातुन एर्तम आया हियमटु.

2 बारित्ते पेनदा दर्मासन्नमते, “बेसता वेलाते नना नीवा पोल्ले केंजतन, मुक्तिता रोजुने नना नीकु सहाय्यम कीतन,” इंचि रासि मंता. हळ्याट, बेसता वेला इदे आंद, इदे मुक्तिता रोजु आंदु.

3 मावा सेवाते बतले तप्पु जर्गामनि इंचि, बदे पोल्लेते इंकावरोक अड्डम ताकोम.

4 गानि अनि पोल्लेने मोमोट पेनदा बेसता सेवाकुलकुम आंदुम इंचि हुपिचचेक मंतोम. ओप्केते, बादाने, कस्टालकुने, तकलिपकुने,

5 देब्बां तिनमळते, जेलते होनमळते, मावा विरोदमते लोल्लिं आयमळते, कस्टम कियमळते, निद्रु हायमळते, उपासमते,

6 पवित्र मनमळते, तेल्लिचे, ओर्सकुनमळते, दयाते, पवित्र आत्माते, कपटम इर्का पावरम कियमळते,

7 सत्तमे पोल्लेते, पेनदा ताकतते, नीतिता आयदार्क तिना कय्दे, रोड्डा कय्दे पीसि,

8 इंकावरोर माकुन कदर हिथिना-हिथ्याकोन्ना, बेसतोर इन्निना-इन्नाकोन्ना, माकुन नळेह कियानोर इंचि इंतुर गानि मोमोट सत्तेमतोकुम आंदुम.

9 एपाट कियवोरालेसी मनना, अंटोर एपाट कीतुर. हायानोरालेसी मनना, जीवाते मंतोम. माकु सिक्सा हियाना गानि मोमोट हाया हिल्लोम.

10 मोमोट दुक्कमतोगुडा बस्केळ्ळक आनंदमते मनंतोम, मोमोट गरिब मनिनागानि वेल्लेटोकुन पेनदा लोप्पो सिरमंतुलक कीतोम. महगा बतल हिलाकोन्ना गानि अनि मत्तापे मंतोम.

11 कुरेति सहरतोरिटा! मोमोट अनि पोल्लें मीक कुल्लम-कुल्ला वेहतोम, मीहाटी मावा मनसु कुल्ला मंता.

12 मोमोट मीकुन लक्कु इरसेक हिल्लोम, गानि मिमेटे मावा दग्गेरा वायालय हळसेक हिल्लिर.

13 मोमोट कीतापे मिमेटगुडा मीवा मनसुन कुल्ला कीम्टु. इद नना मीकुन नावा पिलालक इंचि वेहासेक मंतन.

विस्वासुल्क, अविस्वासुल्क उंदि आया पर्ख

14 विस्वासम कियवोरतोनि मिमेट जोडि आयमटु. बारित्ते नीतितद आनि नीति हिल्वद इव बल्हा कलिया परांतां? वेल्गु आनि हीकट बल्हा दंटा आया परंता? आया पर्ख.

15 किरिस्तु आनि देय्यम उंदि बल्हा आया परांतर? विस्वासिक अविस्वासिनतोनि बता पोल्तु?

16 बोमामाक, पेनदा गुळिकु बाता संबंदम? बारित्ते मनम अय्ते जीवाते मनना पेनदा गुळि आंदुम. पेनदा दर्मसास्त्रमते, “नना ओरा लोपोपो मनंतन, ओरतोनि तिरियंतन, नना ओरा पेन आसि मनंतन, ओर नावा लोकुल्क आयानुसु,” इंचि रासि मंता.

17 पेन इल्हागुडा इंता गदा, “विस्वासम कियवोरागटाल पेयसट, अलग आम्टु, सापसुतरा हिल्वा वस्तुकुन इटमट, अस्के नना मीकुन ओपुकंतन.

18 नना मीवा बाबान आकन, मिमेट नावा मर्क-मियाह्क आकित इल्हा पेद्दा सक्तिमंतुड पेन इंता,” इंचिगुडा रासि मंता.

7

1 पावरमगल्लोरिता! पेन हीता इव पोल्ले मनकगुडा दोर्किसे मंतां, अदुनहाटी मनम मना मेंदुल्क, आत्माक अंदिस मत्ता मुक्तिनु नोसिं साप कीकोम, पेनदुक वेरियसि पूरा पवित्र आसेके दाकोम.

2 मीवा मनसुने मावाहाटी जेगा हीमटु. मोमोट बोनतोने अन्यायम किया हिल्लोम, बोने बोकिच्चा हिल्लोम, बोनाहेंदाल गलत पायदा एता हिल्लोम.

3 नना इल्हा इंचि बतल मीवापोर्रो तप्पु दोस्सेक हिल्लेन. मिमेट मावा मनसुने मतिट, मोमोट हायिना, पिस्सिना मीवातोने मंतांम इंचि नना मुन्नेने वेहतन.

4 नना मीवातोनि बतले मक्किचाकोंटा वेहासेक मंतन, नाक मीपोर्रो एक्को पेद्दिरकेम मंता. नना सांतिने निडतन. मावा आन्नि तकलिपकुनेगुडा नना वेल्ले कुसिते मंतन.

पौल्स कूस आयमळ

5 मोमोट मेसिडोनिया एरियाते वातस्केगुडा मावा मेंदुल्क सुकम दोर्काहिल्ले, गानि नालु मूलानाल तकलिपके-तकलिपकु मनुंदु, पलाताल जगडाल्क आनि लोपोटाल वेंते निडिसि मत्तोम.

6 अयना गानि कमजोर मत्तोर्कुंक दैरेनेम हिथ्याना पेन तीतुन महगा लोहकि माक दैरेनेम हीता.

7 सिराप ओर वाताहेंकेन आयो गानि मीहेंदाल ओनकु दोर्कता आ दैरेनेमता हेंदालगुडा. ओर नावापोर्रो मत्ता मीवा इच्चाना बारेमते, दुक्कमता बारेमते, जोसता बारेमते वेहतोर. अदुनहाटी नना इंका एक्को आनंदमते मंतन.

8 नना सिट्टि रासि मीकुन दुक्कमते अरहतन. मुन्ने ननागुडा दुक्कमते मत्तन गानि इंदके हिल्लेन, अद दुक्कम गळसेमताहाटीगे मत्ता.

9 इंदके नना आनंदमते मंतन, मीकुन दुक्कमते अरहतन इंचि आयो, गानि मीवा दुक्कमता हेंदाल मिमेट मनसु मार्सकुत्तिर इंचि. इवन्नि पेनदा इच्चा मत्तापे आतां इंचि मीक माहेंदाल बतले नुकसान आयाहिल्ले.

10 बारित्ते पेनदाहेंदाल वायाना दुक्कम, मनसु मार्सकुनागोटिसि मुक्तिताहेके ओंता, ई दुक्कमते नाराज हिल्ले. गानि ई दुनियाता दुक्कम हामुरताहेके ओंता.

11 निजम हळते, पेनदाहेंदाल वाता दुक्कम बक्तिते मनालय मीकुन बच्चोने बदलांचता. मीलोपो बच्चोने जोस, सत्तेमतेम इंचि हुपुसमळ, अन्यायमता विरोद कियमळ, वेंते मनमळ, नाकु कलियानाहाटी मीवा जीवा बागाने तन्लाळमळ, सेवाता इच्चा, तप्पु कीतोनि सिक्सा कियमळ. इवन्नि पोल्लेने मीलोपो तप्पु हिल्ले इंचि मिमेट निजम कीसि हुपिस्तिर.

12 नना मुन्ने लोहता सिट्टिरेते, बोर तप्पु कीतो? बोन्क अन्यायम जर्गता? इंचि इराहाटी रासा हिल्लेन. गानि पेनदा मुन्ने मिमेट माकुन बच्चोने बेस हळकुत्तिर इद मीक तेळियागोम इंचि रासि मत्तन.

13 अदुनहाटी माक सांति दोर्कता. मीवा अंटोराहेंदाल तीतुना जीवा कूस आसि आनंदम आतोर. ओना आनंदम हळसि मोमोटगुडा वेल्लेने आनंदम आतोम.

14 नना ओनतोनि मीवा बारेमते पेद्दिरकेम वेहकुत्तन. मोमोट मीक वेहतव आन्नि पोल्ले निजमे आंदु. अदुनहाटी तीतुना मुन्ने नावा पेद्दिरकेम निजम कीसि हुपिस्तिर, नाकुन सिग्गु होननाल किया हिल्लिर.

15 मिमेट अंटोर तीतु वेहताप नावा आदेसतुन केंजतिर, वेंते, कदर हीसि ओनकु कलियतिर. इद मति वातस्के मुन्नेटकन्ना इंका एक्को ओना पावरम मीवाहाटी बेसैता.

16 आन्नि पोल्लेने मीपोर्रो नाक बरोसा मंता, इद नावाहाटी कुसिता पोल्ले आंद.

8

गरिब विस्वासूल्क एक्को दानम कियमळ

- 1 विस्वासूल्कुनिटा! मेसिडोनिया एरियाता कलिसियातोर्कुंक पेन कीता कुर्पाता बारेमते मीक वेहसेक मंतोम.
- 2 अद बल्हा इत्ते, ओरापोर्रो वेल्लेने तकलिपकुना परिकसां वातां, ओर वेल्लेने कूस आनि गरिब आसि मत्तुर. अयना गानि लोक्कुक्क हिथ्याना सहायम वेल्लेन बेसंता.
- 3 ओरा बारेमते ना गवाइ इदे गदा, ओर बचोर हिथ्या प्तूर अचोने आयो गानि, दानकन्ना एक्को कुसिते हीतुर.
- 4 पेनदा लोक्कुक्कन सहायम कियाना सेवाते माकुनगुडा कलियालय दया कीम्टु इंचि ओर मावातोनि ऊके-ऊके वेल्ले विनंति कीतुर.
- 5 मोमोट आसे पळसि मत्ता दानकन्ना एक्को ओर कीतुर. ओरा पिस्वरंता पेनदाहाटी हीतुर, आनि पेनदा इच्चा मत्ताप मावाहाटीगुडा हीतुर.
- 6 इल्हा सहायम कियमळ मुन्ने तीतुए मीलोप्पो सुस्व कीतोर, अयते अदुन महना कबळगुडा किथ्यिर इंचि ओन विनंति कीतोम.
- 7 मिमेट विस्वासमते, पोल्लेने, तेल्चिते, अन्नि तीस्कुने कोसिस कियमळते आनि मावा पोरो मिमेट कियाना पावरमते बेसेक मंतिट. अल्हेने दानम कियाना कबळतेगुडा बेसेक होंदना.
- 8 नना मीक आदेस हीसेक हिल्लेन, गानि कळमता विस्वासूल्क इद कबळते उसारते मंतुर, ओराचोचोन मिमेटगुडा निजम पावरम कीसेक मंतरा इंचि परिकसा कीसि हळसेक मंतन.
- 9 मना सामि येसु किरिस्तुना कुर्पा बचोर पेद्रुदाद मीक एरपाटे मंता. ओनागा अन्नि मचिगुडा मीवाहाटी गरिब आतोर. ओना गरिबतनमताहेंदाल मिमेट दनवंतुल्क आयना इंचि ओर अल्हा आतोर.
- 10-11 इगे नना वेहाना पोल्ले इदे गदा, नीरटाल कोत्तां जमा कीसि हियमळ मोदाला मिमेटे सुस्व कीतिर, अद कबाटुन महमळ मीक बेस मंता. बारित्ते, कोत्तां जमा कियाना इंचि बल्हा अयते मीवा इच्चा मत्ता, अल्हा मिमेट हिथ्या पतंच्चो जमा कीसि अद कबाटुन पूरा कीम्टु.
- 12 कोत्तां हिथ्याना इंचि मीवा इच्चा मत्ते, मिमेट बचोचोन हीतिट, अद पोल्ले आयो गानि, मिमेट पूरा मनसुनाल हीते पेन अदुन ओप्कुंता.
- 13 इंकावरोना बर्वुन अल्कगा कियानाहाटी मिमेट बर्वु कांजना इंचि नना इंचेक हिल्लेन गानि इव्वुर समानम मंदना.
- 14 इंदकेटा वेलाते मिहगा अन्नि मंता, अयते हिल्लोरा अक्सरालकुने कबळक वायमळ गावाले. पजा उंदि वेला मिहगा हिल्लस्के ओर मीवा अक्सरालकुने कबळक वायमळ गावाले, इल्हा इव्वुरगुडा समानम आतिर.
- 15 इदुना बारेमते दर्मसास्त्रमते,
“वेल्ले जमा कीतोनागा, वेल्ले मिग्ला हिल्लें,
तक्को जमा कीतोनागा, तक्को होन्ना हिल्लें,”
इंचि रासि मंता.

तीतु आनि ओना दंटातुर

- 16 मी बारेमते ना मनसुने मत्ता इच्चातुन, पेन तीतुना मनसुनेगुडा पुटिस्ता. अदुनहाटी पेनदुक नना दन्यवाद कीतन.
- 17 मोमोट तीतुन मीहेके लोहालय विनंति कीतस्के ओर अद पोल्लेतुन ओप्कुंकि कुद कुसिते मिहगा वायालय तयार आतोर.
- 18 अल्हेने तीतुनतोनि अन्नि कलिसियाने बेसता कबुरतुन वेहालय पोरोल पेयस्तोर वरोर दादनगुडा लोहसेक मंतोम.
- 19 अचोने आयका, इद चंदातुन मोमोट येस्सलेम ओयानेके ओन मातोनि लोहना इंचि कलिसियातोर पेरतुर. मोमोट सामिना महिमाताहाटी आनि मावा सहायम कियाना जिद दिस्सनाहाटी इद चंदा ओसेक मंतोम.
- 20 ई जमा कीता चंदाता जिम्मेदारि मावा पोरो मत्ताहाटी, माकुन बारे तपु इनामन्नि इंचि उसारते ताकसेक मंतोम.
- 21 सिराप पेनदा मुन्नेने तपु हिल्लवाप आयो, गानि मनकालोरा मुन्नेगुडा तपु हिल्लवाप मंतोम.
- 22 अल्हेने ओरतोनि मोमोट इंकावरोन मना दादन लोहासेक मंतोम. आ दादन मोमोट बचुंगो मल्कां परिकसा कीसि हळतोम, ओर वेल्लेने पोल्लेने बेस मंतोर. ओर मीवापोर्रो वेल्लेने बरोसा कीताहाटी, मीक इंका वेल्लेने सहाय्यम कियाना ओना इच्चा मंता.
- 23 ओक्कला बोर्नना तीतु बोर आंदुर? इंचि प्सकीते, ओर नावा दंटातोर, नावातोनि कलियसि मीवा सेवा कियानोर आंदुर, इंचि वेहट. इंका विस्वासि दादालोरा बारेमते प्सकीते, ओर कलिसियातोर लोहचीतोर आनि किरिस्तुना कदरगल्लोर आंदुर, इंचि वेहट.

24 अदुनहाटी मिमेट ओर्कुन बचचोन पावरम कीतिट इंचि कलिसियाता मुन्ने हुप्सट, अल्हेने मीवा बारेमते मोमोट पेदिदरकेम वेहकुत्तद निजम कीसि ओर्कु हुप्सट.

9

कुसिते दानम हियाना इंचि पौलस वेहमळ

1 इंदके यहुदिया राज्येमा पेनदा लोकुकुनाहाटी कियाना ई सेवाता बारेमते मीक रासाना अक्सरम हिल्ले.

2 बारित्ते सहाय्यम कियालय मिमेट बस्केळक तयार मंतिर नाक एरपाटे मंता. नना मीवा बारेमते, अकाया एरियाता लोकुकुळ उंदि वर्साताल चंदा हियालय तयार मंतुर इंचि मेसिडोनियाता लोकुकुकुंके पेदिदरकेमते वेहुंदुन. इद केंजसि वेल्लेटुर लोकुकुळ चंदा हियालय तयार आतुर.

3 नना मीवा बारेमते पेदिदरकेम वेहता पोल्लें एर्तम आयामान्नि इंचि ई दादालोर्कुन लोहसेक मंतन, नना वेहतापे मिमेट चंदा तयार कीसि इरंट.

4 मिमेट अल्हा तयार कीसि इर्काकोटे, मेसिडोनियातोर बोरन्ना नावातोनि वासि तयार हिल्वद हळते, मीवापोर्पो बरोसा कीताहाटी मावा सिग्गु होनना वेला वायार. मीवदगुडा सिग्गु दांता इनमळ अक्सरम हिल्ले.

5 अदुनहाटी मिमेट चंदा हीतोम इंचि मोदाले पोल्ले हीसि मत्तिर. अयते आ चंदा मिमेट तयार कीसि इरंट इंचि बतिलमालाडालय ई दादालोर्कुन मुन्नेने मिहगा लोहमळ नना अक्सरम इनकुत्तन. ओर वाता पजा जबरदस्तिते आयो गानि, मीवा मनसुनाल हियमळ गावाले.

6 इद पोल्ले मति इरंट: इचचुन वीततोर इचचुने पंटा कोय्यंतोर, वेल्ले वीततोर वेल्लेने पंटा कोय्यंतोर.

7 अदुनहाटी गुल्गामान्नि, जबरदस्ति कियामान्नि हरेक मनकल बल्हा हीतन इंचि विचारम कीतोर, अल्हेने हिय्याना. अल्हा आनंदमते हियानोन पेन पावरम कीता.

8 मिमेट अन्नि बेसता कब्बाहक कियालय, मीक अक्सरम मत्तव अन्नि मिहगा बस्केळक मंदालय, पेन दाना दयाते अव अन्निन हिया परांता.

9 इदुना बारेमते दर्मसास्त्रमते,

“ओर गरिबोर्कुंक अन्समन्स कियाका हीतोर,
ओना नीति बस्केळक निल्लिस मंता,”*
इंचि रासि मंता.

10 अदुनहाटी वीतानोंकु पेन विज्जां हीता, तिनालय तिंडि हीता. अद मीक वेल्ले विज्जां हीतस्के मीवा नीतिता पलम बेरसंता.

11 मिमेट बस्केळक अन्समन्स कियाकोटा हियालय पेन मीकुन अन्निटवुने गट्टिगा कीता. अल्हेने मिमेट मावा कय्दे चंदा लोहतित इंचि वेल्लेटुर पेनदुक दन्यवाद कियानुर.

12 मिमेट कियाना सहाय्यमा सेवाहेंदाल पेनदा लोकुकुना अक्सरालक पूरा आंतां, अचोने आयाका ओराहेंदाल पेनदुक वेल्ले दन्यवाद आसेक मंता.

13 बारित्ते मिमेट इद सेवा कीसि, किरिस्तुना बेसता कबुरतुन ओष्कुंचि अद मत्ताप ताकसेक मंतिर. अचोने आयाका पेनदा लोकुकुकुंक, वेरे अंदोर्कुंक मीवा मनसुनाल सहाय्यम कीसेक मंतिर. इदुन हळसि ओर पेनदा महिमा कीतुर.

14 मीवापोर्पो पेनदा कुर्पा वेल्लेने मंता, अदुनहाटी ओर मीकुन हळना इंचि तनलाळसेके ओर मीवाहाटी वेल्लेने पावरमते पारतना कीतुर.

15 पेन हीता वेहा परवचो वरमताहाटी दानकु दन्यवाद आयि.

10

पौलस ओना सेवाता बारेमते वेहमळ

1 नना पौलसुन, मीवातोनि मननेके सिन्नागासि मंनंतन, गानि लक्कु मननेके वेरे हिलाकोटा मंनंतन इंचि इचचुर इंतुर. नना मीकु किरिस्तुना सादा-सिंपल आनि मेत्तटा गुनमता हेंदाल विनंति कीसेक मंतन,

2 नना वातारिते बोर अयते माकुन, “दुनियातोरालेसी ताकसेक मंतुर” इंचि इनकुंतुर, ओरतोनि नाक कडक वळ्ळकाना वेला वायामान्नि इंचि विनंति कीसेक मंतन.

3 निजमे, मोमोट दुनियातोरालेसी मंतोम, गानि दुनियातोरालेसी लडाइ किय्योम.

4 मोमोट लडाइ कियाना विश्ने दुनियातोरसंटाव आय्यो, गानि किल्लान क्लाहनाहाटी पेनदाहेंदाल ताकततव आंदुं.

5 इवुनाहेंदाल मोमोट पेनदुन एरपाट कियालय बलां अयते आपतां, अबुन अन्निन नासडेम कीतोम, ओरां अनि विचाराल्कुन मिळाहचि किरिस्तुना इच्चा मत्ताप ताकानाल कीतोम.

6 मिमेट किरिस्तुना पोल्लेते पुरागा ताकालय आतस्के, किरिस्तुना पोल्ले केजवोर अंटोर्कुन मोमोट सिक्सा हियालय तयार मंतोम.

7 मिमेट सिराप मुन्ने मत्ववुन मीवा कळकुने हळसेक मंतिट. मीक गिंटा बोर्कन्ना ओनद-ओन्क नना किरिस्तुनोन आंदुन इंचि बरोसा मनानयते बल्हा ओर किरिस्तुनोर आंदुर, अल्हेने मोमोटगुडा किरिस्तुनेर्कुम आंदुम इंचि ओन्क तेळियगोम

8 मीकुन नासडेम कियालय आयो गानि, मीकुन बेसांगोतालय सामि माक अदिकारम हीतोर इंचि नना इंकागुडा पेद्दिदरेकेम वेहकुनिना नाक सिग्यु हिल्ले.

9 नना बारि वेहसेक इत्ते, नावा सिट्टिना हेंदाल नना मीकुन वेराहसेक मंतन इंचि मीक अनपिचचमन्नि.

10 बारित्ते, “ओर सिट्टिने अयते मजबुत आनि कडक पोल्ले रासतोर, गानि मेंदुल्ले कमजोर मंतोर, पोल्लेगुडा बेस पेयसों,” इंचि इच्चुर इंतुर.

11 अल्हा इनानोर्क इद पोल्ले तेळियि: मोमोट हिल्वस्के सिट्टिने बल्हा रासि वळ्ळंतोमो अल्हेने मोमोट मीवातोनि मलत्स्के ताकंतोमगुडा.

12 बोर-बोर अयते ओरद-ओरे पेद्दातनम वेहकुंतुर, गानि मोमोट ओरालेसी वेहकुन्नोम, ओरा लोपो तुलना किय्योम. ओर वरोनद वरोर कहकुचेके मंतुर, वरोनद-वरोर तुलना कीकुंचेके मंतुर. इद पेद्दा मुर्कतनम आंद.

13 मोमोट अयते मावा अदिकारता पलाते बस्केने होन्नोम, गानि पेन माक हीता गेट्टुना लोपोने मंचि मोमोट पेद्दिदरेकेम कीतोम. इदे गेट्टुन लोपो मिमेट मंतिट.

14 मोमोटे मोदाला मिहगा किरिस्तुना बेसता कबुर तल्लोम. अदुनहाटी मोमोट पेन हीता सेवातुन गेट्टुना लोपोने मंचि पेद्दिदरेकेम कीतोम.

15 वेंतेर कीता कबळतुन मोमोटे कीतोम इंचि पेद्दिदरेकेम किय्योम. बल्हा-बल्हा मीवा विस्वासम बेसैके दांता, अल्हा-अल्हा मावा सेवा मना गेट्टुना लोपोने मीवाहाटी पैलांचेके दांता इंचि आसे मंता.

16 इंकावोर कबळ कीता एरियाते होंचि पेद्दिदरेकेम कियाका, मोमोट बोर होनवा एरियाते होंचि बेसता कबुर वेहंतोम.

17 गानि दर्मासन्नमते, “बोर अयते पेद्दिदरेकेम कीतोर, ओर सामि कीता कबळतुन पीसे पेद्दिदरेकेम किय्यिर,”* इंचि रासि मंता.

18 बोर अयते ओनद-ओरे मेचकुंतोर ओर कबळतोर आयोर, गानि सामि बोनयते मेचकुंतोर ओर कबळतोर आंदुर.

11

पौलुस आनि अब्दुदम वेहाना प्रेरित्तुक

1 नना इच्चुर बुदिद हिल्वोनलेसीं वळिकना गानि नाकुन ओर्सकुंट, अल्हेने मिमेट नाकुन ओर्सकुंचेकेन मंतिट.

2 मीवा बारेमते नना आसेते मंतन, इद आसे नावा लोपो पेनदाहेंदाले मंता. बारित्ते ओना वरोरे मंदना मांडसाता कय्दे हियालय, मरमि आयवा पवित्र लेय्याटालेसीं मीकुन किरिस्तुना कय्दे अप्पजेप्पना इंचि नाक मंता.

3 गानि तरास चालाकिते हव्वान पसांचतापे, किरिस्तुनतोनि इमानदार, पवित्र मंदना मीवा मनसुनगुडा लक्कु किय्यार इंचि नना वेरियंतन.

4 बारित्ते बोरन्नागिंटा मिहगा वासि, मोमोट वेहवासोंटा वेंरे येसुना पोल्ले मीक वेहते, हिलाकोंटे बदन्ना मुन्ने मिहगा हिल्वसोंटा आत्मा दोर्कते, हिलाकोंटे इंका बदन्ना मुन्ने मिमेट ओक्कुन्वसोंटा बेसता कबुर वाते, अदुन मिमेट कुसिते ओक्कुतिर.

5 नना पेद्दा-पेद्दा प्रेरित्तुकुंकन्ना सिन्नोन इंचि इनकुंचेक हिल्लेन.

6 नना वळ्ळकमळते कमजोर मनिनागानि तेळ्विते हिल्लेन. इदुन मोमोट अनि पोल्लेने, अनि तीस्कुने मीक हपिस्तोम.

7 मीक पेनदा बेसता कबुर पुक्कटते वेहतन, मीक पेद्दातनम वायागोम इंचि, नावद नना सिन्नातनम कीकुल्लतन, इद बतल पापम कीताना?

8 मीवा सेवा कियालय नना वेंरे कलिसियानाहेंदाल मदत एतसि ओर्कुन लुटांचतन.

9 नना मिहगा मलत्स्के, नावा अब्सराल्कुन पूरा कियालय बोनपोरों बर्वु आसि मना हिल्लेन. मेसिडोनिया एरियाताल वाता विस्वासि दादालोर नावा अब्सराल्कुन पूरा कीतुर. इदवेरादाका नना बदे पोल्लेते मीपोरों बर्वु आया हिल्लेन, इंका मुन्नेगुडा आयोन.

10 किरिस्तुना सल्लेम नावा लोपो मंता, अदुनहाटी अकाया एरियातोर बोरे नावा इद पेद्दिदरेकेमतुन विरोद किया पंर.

11 नना मिहगाटाल मदत एता हिल्लेन इत्ते, मीपोर्री नाक पावरम हिल्ले इत्तापा बतल? असले आयो! मीकुन नना बचचोन पावरम कीतन अद पेनदुक एरपाट.

12 ओर बतलयेते कीसेक मंतुर अदे कबळ मोमोट कीसेक मंतोम इंचि बोर अयेते पेदिदरेकेम वेहकुंचेके मंतुर, ओर्कुन कमजोर कियानाहाटी नना बतलयेते कीतन, अदे कीसेक मनंतन.

13 बारित्ते इसोटा लोकुकलक आबद्दम प्रेरितुकलक आंतुर. ओर आबद्दम वळकंतुर, ओर इंकावरोन पसांचना कबळ कीतुर, ओर किरिस्तुना प्रेरितुकलकनालेसी मनंतुर.

14 इवने इचंत्रम बतल हिल्ले, देय्यमगुडा वेल्गु हिय्याना पेनदा दूतालेसी आंता.

15 अदुनहाटी देय्यमता सेवाकुलकगुडा सत्तेमते ताकाना सेवाकुलकनलेसी मारियते इद पेद्दा पोल्ले आयो, गानि आकिरते ओर कियाना कबळता इसाबते सिक्सा आथार.

पौलुस किरिस्तुना प्रेरित आताहाटी तकलिप अरमळ

16 नना मर्रा वेहसेक मंतन, नाकुन बोरे मूर्कुड इनकुनमट्ट, मिमेटगिंटा नाकुन मूर्कुडे इनकुनानयेते बतल आयो, अल्हेने ओप्कुंट, इदुनहेंदाल नाकगुडा इचचुर पेदिदरेकेम कियालय दोकार.

17 नना इंदके वेहना पोल्ले सामिना विचारम मत्ताप आयो, गानि वरोर मूर्कुड वेहताप वेहासेक मंतन.

18 वेल्लेटुर लोकुकलक ओर कीता पोल्लेन पोर्रीटाल पेदिदरेकेम वेहकुंतुर, ननागुडा अल्हेने वेहकुंतन.

19 मिमेट अयेते बुदिद मत्तोर आदिर, अदुनहाटीगे बुदिद हिल्लोरा पोल्लेन कुसिते ओर्सकुंचेके मंतर.

20 अचोने आयाका, ओर मीकुन गुलाम किथ्यिना, लुटांचना, मीवा पायदा येताना, ओरद-ओरे पेद्दा कीकुन्निना, मीकुन सेंपापोर्री तनिना इवनि मिमेट ओर्सकुंचेके मंतर.

21 नाक सिग्गु वायाना पोल्ले बतल इत्ते, ओर कीताप मोमोट किया हिल्लोम. गानि बोरे आथिर पेदिदरेकेम कियालय दैरेम कीते, ननागुडा मूर्कुनालेसी दैरेमते पेदिदरेकेम कीतन.

22 ओरद-ओर इब्रि जातितोर्कुम इंचि इंतुर, ननागुडा इब्रि जातितोने. ओर इस्राएल मनकालोर्कुम इंतुर, ननागुडा इस्राएल मनकने. ओर अब्राहामुना वंसमतोर्कुम इंतुर, ननागुडा अब्राहामुना वंसमतोने.

23 ओर किरिस्तुना सेवाकुलक आंदुरा? नना ओर्कन्ना एक्को किरिस्तुना सेवा कियानोन आंदुन इंचि पिस्सनलेसी इंचेके मंतन. ओर्कन्ना एक्को कस्टम कीतन, ऊके-ऊके जेलंक होनुंदुन, देब्बां तिनुंदुन, बचचुंगो मलकां हायाना वेला वासि मत्ता.

24 नना हेय्युं मलकां यहुदिल्लुकुना कयेदे मुप्पे तोम्मिद पोट्टे देब्बां तित्तन.

25 मूड मलकां नाकुन दड्डुने तंतुर, उंदि मलका बंडाने तंतुर, मूड मलकां नावा पय्येमते डोंगां पैतां, उंदि मलका नर्का-पल्लिं पिथ्यल-पोळ्दु समुद्रमते मत्तन.

26 ऊके-ऊके पय्येमते होनुंदुन. बेरहकुना दोका, दोंगाल्लुकुना दोका, नावा लोकुकलकनाहेंदाल दोका, वेंर जातितोरहेंदाल दोका, सहरते दोका, बय्लि जेगाते दोका, समुद्रमते दोका, विस्वासुल्लुकुम इंचि नळेह कियाना मनकालोर्कुना हेंदालगुडा नाक दोका मत्ता.

27 नना मेहनतते, कस्टमते मत्तन. बचचुंगो मलकां निद्रु हिलाकोटा मनमळते, कर्वुने-दूपाते, उपासम, पीनिते मत्तन, कपडिं हिलाका मत्तन.

28 इचचोरे आयाका, अन्नि कलिसियाना पिक्किर नाकुन रोज परेसान कीसेक मनुंदु.

29 बोर्नना विस्वासि विस्वासमते कमजोर आते, ननागुडा कमजोर आताप नाक अनपिचोना? बोर्नना मनकल इंकावरोन विस्वासमताल अरहानयेते नाक होंग वायोना?

30 नाकु गिंटा पेदिदरेकेम कियाना मत्ते, नना किया पर्खा कबाहकुना बारेमते पेदिदरेकेम कीतन.

31 नना वळकानद आबद्दम आयो इंचि सामि येसुना पेनबाबांक एरपाटे मंता. ओन्क बस्केळक दन्यवाद आयि.

32 नना दमिस्क सहरते मत्तस्के, अरितास राजाना हेंदाल ओना राज्यपाल नाकुन पियालय सहरते पहारा कीसेक मत्तोर.

33 गानि अस्के नाकुन इचचुर उंदि तट्टाते उपिचि गूरेता किळकिताल हब्बेर रेहतुर. इल्हा नना ओना कयदाल पिस्तन.

12

पौलुसना दर्सानालक

1 नना पेदिदरेकेम कीते नाक बतल पायदा दोर्को, गानि पेदिदरेकेम किया पीसेक मंता. सामि नाक हीता दर्सनम आनि हुपिस्ता मर्ममता पोल्लेन बारेमते वेहतन.

2 किरिस्तुन विस्वासम कीतोर वरोर मनकल नाक एपाट. पडनालुं वर्साना मुन्ने पेन ओन मूडो स्वर्गमदाका पीसि ओता. अस्के ओर मेंदुल्ले मत्तोरा, मना हिल्लोरा नाक तेळियो. पेनदुके तेळियंता.

3-4 आ मनकल मेंदुल्ले मत्तोरा, मना हिल्लोरा? अद नाक तेळियो, पेनदुके तेळियंता. गानि इच्चोर एपाट गदा, ओन पेन सुकमता जेगाते ओता. मनकक वेहालय अदिकारम हिल्वसोटव पोल्ले अगा ओर केंजतोर.

5 इसौटा मनकना बारेमते नना पेद्दिदरेकम वेहकुतन. गानि ना बारेमते नावा कमजोरिन तप्पा, इंका बवे पोल्लेन बारेमते पेद्दिदरेकम वेहोन.

6 नना पेद्दिदरेकम वेहतेगुडा, निजम वेहताहाटीं नाकुन मूर्कुड इनावायो. गानि नना अल्हा वेहोन. बारित्ते नना कीता कबाहकुन हळता दानकन्ना आनि वेहता पोल्लेन केंजता दानकन्ना एक्को मान नाक हिश्यामनि.

7 नाक हूपिस्ता मर्ममता पोल्ले वेल्लेने मत्ताहाटीं नावा लोप्पो पेद्दिदरेकम वायामनि इंचि पेन नावा मेंदुल्ले उंदि हापु इरता. अद नाकुन दबांचि इरालय देय्यमता दूतालेसीं कोहकसेके मंनता.

8 अद हापु नहागटाल तेंडा इंचि, मूड मलकां सामिन विनंति कीतन.

9 गानि सामि नाकुन, “नावा कुर्पा नीकु सालांता, बारित्ते मिमे कमजोर मत्तस्केन नावा ताकत कबळ कीता,” इंचि जवाब हीतोर. अदुनहाटीं नना कमजोर मत्तस्के किरिस्तुना ताकत नाकु तोळ आयागोम इंचि वेल्लेने कुसिते पेद्दिदरेकम कीसेक मंनत.

10 नना कमजोर आतस्केने, किरिस्तुना लोप्पो गट्टिगा मंनतन. अदुनहाटीं कमजोर आयिना, अपमानम आयिना, कस्टम आयिना, सताव आयिना आनि आपल्लि वायिना नना कुसिते मंनतन.

कुरेंतित्ता कलिसियाताहाटीं पौलसना पिकिर

11 मीवा बल्मितेन नना मुर्कनलेसीं पेद्दिदरेकम कीसेक मंनत. नना कदरलायक हिल्लेन आयावचु, गानि पेद्दा-पेद्दा प्रेरित्कुंकनना बदे पोल्लेते तक्को हिल्लेन, अदुनहाटीं मिमेट नावा पेद्दिदरेकम किया मत्तिर.

12 मीवा नड्डुम नना ओक्केते मत्तन, नावाहेंदाल चिन्हां, इंचंनमता कबाहक, पेनदा पेद्दा-पेद्दा कबाहक जर्गताहाटीं ननागुडा निजम प्रेरित्तुने इंचि दिसंता.

13 वेरे कलिसियांकनना मिमेट बद पोल्लेते तक्को मत्तिट? सिराप इदे गदा, नना मीपोरों बर्वु आसि मना हिल्लेन, इदे नावा तप्पु, नावा तप्पुन मापि कीट्टु.

14 इंदके नना मूडो मलका मिहगा वायालय तयार मंनत, इंदकेगुडा नना मीपोरों बर्वु अरहोन. बारित्ते पिलाळक तल्लुर-बाबोनहाटीं दनम संपालिचचुर गानि, तल्लुर-बाबो पिलाळकुनाहाटीं दनम संपालिचचंतुर. अदुनहाटीं नाक मीहेंदाल बतल मनि, मिमेटे गावाले.

15 नना मीवा आत्माता पायदाताहाटीं नना इरगा कुसिते कर्स कीतन, अवसरम अरते नना कुदुदु कर्स आंतन. नना मीकुन वेल्ले पावरम कीतन इंचि मिमेट नाकुन तक्को पावरम कीतिरा?

16 नना अथे मीपोरों बर्वु वाटा हिल्लेन गानि, “पिलान कीसि माकुन बोकिचोर” इंचि मिमेट नाकुन इना वचु.

17 नना मिहगा लोहता लोक्कुलनाल बोरा हेंदालनना कपटमते नना पायदा एततना?

18 नना तीतुन मिहगा होन इंचि विनंति कीसि, ओनतोनि वरोर दादानगुडा लोहतन. तीतु कपटमते मीहेंदाल बतलनना पायदा एततोर? अल्हा एतोर. नना आनि तीतु इक्वरोम उंदे आत्माते, उंदे रीतुने ताकंतोम.

19 महगा तप्पु हिल्ले इंचि हुप्सालय इवनि मोमोट मीक वेहसेक मंतोम इंचि मिमेट इनकुंचितिर आयावचु, गानि आयो. मोमोट अथे पेनदा मुन्ने किरिस्तुना अदिकारमते वळ्ळंतोम. पावरमगल्लोरिता! इवनि पोल्ले मीवा विस्वासम बेसंनहाटींगे वेहसेक मंतोम.

20 बारित्ते नना मिहगा वातास्के, मिमेट इनकुत्ताप नना मीक दोर्का परीन आयावचु इंका नना इनकुत्ताप मिमेट मंदक होननिर. बोर्क एपाट, मीलोप्पो जगडालक, कळक पोतमळ, होंग, सतता पायदा, अपमानम, पेद्दिदरेकम, चुगली, लोल्लिं इसौटवगुडा दिस अरानुं इंचि नना वेरियसेक मंनत.

21 अल्हेने नना मर्रां वाता पजा, इच्चुर विस्वासुलक कराब कबाहक, बोगमतनम, लंजेतनम इसौटा पापालकुनाल मनसु मार्सकुनाकुंटे नाक वेल्ले दुक्कम आयार. अचोने आयाका पेनदा मुन्ने नावा सिग्गु होनना वेला वायारो बतल इंचिगुडा वेरियतन.

13

पौलसना आकिरता पोल्ले

1-2 नना रोंडो मलका मिहगा वासि मत्तस्के, पापम कियमट इंचि वेहचि मत्तन. इंदके नना मिहागटाल लक्कु मंनत गानि, मर्रां उंदि मलका अदे पोल्लेलुन नना वायाका मुन्ने मीक वेहसेक मंनत. नना मूडो मलका वातस्के, बोअर अथे मुन्ने पापम कीट्टु,

इंदकेगुडा कीसिकेने मंतुर ओर्कु, अल्हेने कळमतोर अंटोर्क सिक्सा तप्पो. बारिलते दर्मसास्त्रमते, “हरेक पोल्लेतुन निजम कियालय इव्वुर हिलाकोटे मुव्वुर गवाइदार्कुना अब्बरम मनंता,^{७*}” इंचि रासि मंता.

3 किरिस्तुनाहेंदाल वळकंतोर इतदुना बारिमते, मिमेट आनवल बतल इंचि पूसकीतिर. किरिस्तु मीहाटी कमजोरि आयो गानि मीलोप्पो ताकत आसि मनंतोम.

4 बारिलते, किरिस्तु कमजोर आसि मत्तस्के ओन कूसुनपोर्रो मोल्लां कोक्किसि वेलाळ वाटतुर, अयना गानि पेनदा ताकतते ओर मर्रां तेदसि जीवाते मंतोर. मोमोटगुडा ओनालेसीगे कमजोर मंतोम, गानि मोमोट मीवाहाटी पेनदा ताकतते किरिस्तुनतोनि जीवाते मनंतोम.

5 मिमेट नाकुन परिकसा कीसि हळना दानकन्ना, मिमेट विस्वासमते मंतरा हिल्लिरा, मीवद-मिमेट परिकसा कीसि हळ्वाट. अस्के येसु किरिस्तु मीलोप्पो मंतोर इंचि अनपिच्चोना? अल्हा अनपिच्चाकोटे मिमेट ओना लोकुल्क आयिर इनकुंटु.

6 नावा आसे मंता, मिमेट परिकसा कीसि हळते, मोमोट निजमे किरिस्तुना प्रेरितुल्कुम इंचि मीक अनपिच्चंता.

7 ओक्काला मोमोट निजम प्रेरितुल्कुनालेसी मीक दिस्साकोन्नागुडा, बतल सत्तेम मंता अदे कियाना इंचि मीहाटी पेनदुक पारतना कीसेक मंतोम.

8 मिमेट सत्तेमते ताकते दानकु विरोद मोमोट किर्योम, गानि सत्तेमताहाटीगे सहायम कीतोम.

9 मोमोट कमजोर मत्तोरालेसी दिस्साना गानि बतल आयो, मिमेट ताकतते मत्ते माक आनंदम आंता. इल्हा मिमेट ताकतते बेसेक हौंदना इंचि, मोमोट पारतना कीसेक मंतोम.

10 अदुनहाटी सामि मीकुन नासडेम कियालय आयो गानि, गार्टिगा निलाहलय नाक अदिकारम हीतोर. नना मिहगा वातस्के नावा अदिकारमते मीतोनि कडक वळकना वेला वायामान्नि इंचि, मिहागटाल लक्कु मनेकेने इव पोल्लें रासेक मंतन.

11 विस्वास्कुनिटा! नना आकिरते वेहानद इदे गदा, कुसिते मंटु. मीवा गुनम बेस इर्राट, वर्रोक्-वरोर दैरनेम हीम्दु, उंदि मनसुने मंटु, सांतिते मंटु, अस्के पावरम आनि सांति हियाना पेन मीवातोनि मनंता.

12 मिमेट वर्रोक्-वरोर कलियतस्के पवित्र पावरमते जोहार कीम्दु.

13 इग्गोटा पवित्र लोकुल्क अंटोर मीकु जोहर वेहासेक मंतुर.

14 सामि येसु किरिस्तुना कुर्पा, पेनदा पावरम आनि पवित्र आत्माता तोळ मी अंटोरतोनि मन्निकांटी.

गलातिया

गलातिया विस्वासुल्लुकंक पौलसना सिट्टि

इद सिट्टिटा बारेमते गिचचो परिचयम

रासतोना पोरोल: पौलस

रासता कालम: इसवि सन 48-55

इद सिट्टि गलातिया इनना एरियाते मनना विस्वासुल्लुकंक पौलस रासतोर. इद एरिया दक्किन आसियाते वांता. इद सिट्टि पौलस गलातियाते मनना विस्वासुल्लुकंक बारि रासतोर इत्ते, अगाटा विस्वासुल्लुक तप्पुड बोदां केंजसि निजम विस्वासमताल लक्कु आतुर. ओर्कुन मरा निजम विस्वासमते तरानाहाटी पौलस इद सिट्टि रासतोर.

पौलसुन प्रेरित इंचि बोर मनकालोर पेर्ण हिल्लुर गानि कुद्दु पेने ओन येसु किरिस्तुना कबळहाटी पेरता. पौलसना उद्देसमगुडा यहूदि आयवोर लोप्पो होंचि किरिस्तुना बारेमता बेसता कबुर वेहनद मत्ता.

इद सिट्टिटे पौलस इंका इल्हा रासतोर गदा, दुनियातोर अंटोर पापम कीसि पेनदा पावरमताल लक्कु आतुर. गानि येसु किरिस्तुनपोरो विस्वासम कीसि मरां पेनदुक दगैरा आयावच्च. येसु किरिस्तुन पोरोटा विस्वासमहेंदाल पेनदा पावरम मनकंक दोर्कता. दीनहेंदाल ओरा कबाह्कगुडा बेस जर्गतां.

बगा बतल मंता

जोहार आनि परिचयम 1:1-10

पौलस प्रेरित आंदुर इंचि रूजुव कीसि हुप्संतोर 1:11-2:21

पेनदा कुर्पाता बारेमता बेसता कबुर 3:1-4:31

विस्वासुल्लुकुना जिम्मेदारि 5:1-6:10

आकिरता बोदां 6:11-18

गलातियाता विस्वासुल्लुकंक पौलसुनहेंदाल जोहार

1 नना येसु किरिस्तुना वरोर प्रेरितुन* आंदुन, नावा पोरोल पौलस. नना प्रेरित इंचि मनकालोरहेंदालो हिलाकोटे बोरो वरोर मनकल नाकुन कीताहेंका आया हिल्लेन, गानि कुद्दु येसु किरिस्तु आनि ओन हामुरताल मरां जीवाते तेहता आ पेनबाबाले नाकुन केयतोर.

2 इद सिट्टि गलातिया इनना एरियाते मनना कलिसियानोर्क, इत्ते मीवाहाटीगे नना नावातोनि मनना दादालोरहेंदाल रासतन.

3 मना पेनबाबाल आनि मना सामि येसु किरिस्तुनहेंदाल मीकु कुर्पा, सांति दोर्कि.

4 मनम मनना ई पापि दुनियाताल मनाकुन पिसागोटना इंचि मना पेनबाबाना इच्चा मत्ता. अदुनहाटी येसु किरिस्तु मनाहाटी ओना जीवा हीसि पेनबाबाना इच्चातुन पूरा कीतोर.

5 दुनियाता लोकुल्लुक युगा-युगाल्लुकुनदाका ओनदे कदर किथ्यिर, आमीन.

निजमाता बेसता कबुर उंदे आंदु

6 बद पेन अयते येसु किरिस्तुना कुर्पाहेंदाल मीकुन दगैरा कीकुत्ता, असोंटा पेनदुन इच्चोन बिराना होळसिसि, बदो वेरे बेसता कबुरतेके तिरियतिर. इदुन केंजसि नाकु वेल्लेन इचंत्रम आसांत.

7 असल निजम बतल इत्ते, वेरे बदे बेसता कबुर हिल्ले. गानि इच्चुर लोकुल्लुक मंतुर ओर मीकुन गयबते कीसि किरिस्तुना बारेमता बेसता कबुरतुन बदलांचलय हळसंतुर.

8 ओक्कला मोमोट आयि स्वर्गमताल वाता पेनदा द्ता आयि, मोमोट मीकु वेहता बेसता कबुर तप्पा इंका वेरे कबुर वेहानय्ते, असंतोर्कुन पेन नासडेम कीसि पोहि.

9 मोमोट मीकु मुन्ने वेहता पोळ्ळेतुन इंकुदि मल्का वेहचतोम बेस केंजट. बोरै आयिर, मिमेट मुन्ने नम्मुता बेसता कबुर तप्पा वेरे कबुरगिंटा वेहानय्ते पेन ओन नासडेम किथ्यि.

* 1:1 प्रेरित इद पोरोलक "पेन लोहचीतोर" इंचि अर्तम. येसु पन्नेड मंदितुन पेरकुत्तोर ओर प्रेरितुल्लुक आंदुर.

10 अरते नना इंदके लोकुकल नाकुन मेचुकुनगोम इंचि हळसंतना मरि पेनदा आसिवांद दोर्कगोम इंचि हळसंतना? हिलाकोटे लोकुकुकुन कूस कियानसंतोना? ओक्कला नना लोकुकुकुन कूस कियानसंतोना आसि मत्ते किरिस्तुना सेवाकुन आयाकोन्नेन.

पौलूस वेहना बेसता कबुर पेनदागटाल वाता

11 विव्वासुकुनिटा, नावा पोल्ले बेस केंजट! नना वेहता बेसता कबुर मनकनहेंदाल आयो, इद मिमेट मतिते तासकुंद.

12 इंका इद नाकु बोर मनकालोरहेंदालगुडा दोर्काहिल्ले आनि बोर मनकल नाकु कराह हिल्लोर. इदु नाकु कुदुदु येसु किरिस्ते कुल्ला कीसि वेहतोर.

13 नना यहुदि रिवाजते पिसनेके नावा पिस्वर बल्हा मत्ता मीकु एरपाटे. अस्के नना पेनदा कलिसियातुन इरगा तकलिप कीतन, ओर्कुन नासडेम कियालय बस्केळ्ळ ओरा पज्जो अरसि मनुंदुन.

14 यहुदिल्लुकुना रीति-रिवाजकुने ताकमळते नना नावा वय्सुनोर्कन्ना उंद अळ्ळु मुन्नेन मनुंदुन. नावा तादो-बाबुरहेंदाल दोर्कता रीति-रिवाजकुन पोर्री ताकमळ नाकु वेल्लेन इस्टम मत्ता.

15 गानि पेन मात्रम नना यावाना पटि मननेकेन नाकुन पेरता. पजा दाना कुपाते नाकुन केय्पि, दाना मरि येसु किरिस्तुना बारोते तेळियागोटिसि वेहता.

16 अदुनहाटी नना यहुदि आयवा लोकुकुकुन लोपो होंचि दाना मरिना बारोमता बेसता कबुरतुन वेहा परतन. इल्हा जर्गतस्के नना बोरे मनकंक होंचि कलिया हिल्लेन बोने बतल प्सकिया हिल्लेन.

17 नाकन्ना मुन्ने आता प्रेरितुकुकुन कलियाना इंचि येस्सलेमगुडा होना हिल्लेन. दाना बदुल, अस्केटद अस्केन नना अरब इनना देसेम होंचि, पजा दमिस्क सहरतेन मल्सि वातन.

18 पजा मूड वर्सा आतंका नना केपांक* कलियालय येस्सलेम होंचि, ओनतोनि पदहेन रोजकु मत्तन.

19 गानि याकोब इनना सामिना तम्मुक तप्पा इंका बोरे प्रेरितुकुन कलिया हिल्लेन.

20 नना पेनदा मुन्ने निल्सि वेहचंतन, बतल अरते नना मीकु रासेक मंतन, अव्टे गिचचोगुडा आबदुदम हिल्ले.

21 पजा नना सिरिया, किलिकिया इनना एरियाने होततन.

22 गानि यहुदिया एरियाते मनना कलिसियानोर अरते नाकुन बस्केने हळ्हा हिल्लुर.

23 ओर नाकुन एरपाट कियाकोन्ना, “बोर मनकल अरते मना लोकुकुकुन मुन्नेटा कालमते तकलिप कीसि नासडेम कियालय हळंदुर, ओर इंदके किरिस्तुना बारोमता बेसता कबुरतुन वेहचंतोर,” इंचि वेरतोर वळ्ळकानेके मात्रम केंजतुर.

24 इल्हा इंचेके ओर नावाहेंदाल पेनदुन तल्सकुनुंदुर.

2

पौलूसना पोल्लेन प्रेरितुकुन ओप्कुतुर

1 पजा पडनालु वर्सा आतंका नना मर्रा येस्सलेम होततन. अस्के नातोनि बरनाबास मत्तोर. मोमोट होननेके नातोनि तीतु इनानोनगुडा पीसि ओतन.*

2 नाकु अगा तप्पाकोटा होनापीता इंचि पेन वेहचि हुपिस्ताहाटी नना होततन. पेनदाहाटी नना कीता कस्टम एर्तम आयानायो इंचि यहुदि आयवोर्क नना वेहता बेसता कबुरतुन अगटा लीडकुन बाजुक केय्पि ओर्क वेहतन.

3 नातोनि मत्ता तीतु युनानि मनकल आंदुर. अयना ओना कतना कियनाहाटी ओर लीडर्क जबरदास्ति किया हिल्लुर.

4 गानि मावा लोपो इचुर लोकुकुन विव्वासुकुनलेसी आसि मक्किस् होळियतुर. येसु किरिस्तु माकुन यहुदिल्लुकुना नियमाल्लुकुना गुलामगिरिताल पलाते पेचाहत्तदुन चुपचाप हळ्ळिसि, माकुन मर्रा गुलामगिरिते अरहचि नासडेम कियना उदुदेसमते ओर वातुर.

5 गानि येसु सामिना बेसता कबुरता सत्तेम बस्केळ्ळ मीलोपो मनना इंचि मोमोट मात्रम ओरा पोल्लेन असले नम्मा हिल्लोम.

6 अगा मत्ता लीडर्क, नना वेहतव्टे बवे पोल्ले कल्पा हिल्लुर. पेनदा मुन्ने अंतोर समानेम. अदुनहाटी ओर लोकुकुकुन बचोर पेदुदोर्क अयना बेसे, नाकु बतल पिकिर हिल्ले.

7-9 गानि कतना आतोर्कुंक बेसता कबुर वेहना जिम्मेदारि पेन पत्रुक हीतापे, कतना आयवोर्कुंक बेसता कबुर वेहना जिम्मेदारि पेन नाकु हीता, इंचि याकोब, केपाल* आनि योहान ई पोरोल होत्ता पेदुदा मनकालोर तेलपिचुकुतुर. यहुदिल्लुकुनाहाटी प्रेरित इंचि पेन पत्रुन पेरसि ओन्क बेस हिम्मत हीता. अल्हेन नाकगुडा अंदे पेन यहुदि आयवा लोकुकुकुनाहाटी प्रेरित इंचि सेवा

* 1:18 केपा पत्रुन केपा इंचिगुडा केय्दुदुर. * 2:1 प्रेरितुकुना कन्नाहक 15:2 * 2:7-9 केपाल ई पत्रु आंदुर.

कियालय हिम्मत हीता. पेन नाकु हीता आसिर्वादतुन मतिते इरसि ओर नाकुन, बरनाबासुन ओपुकुलतुर. पजा ओर बारे यहुदिल्कुनगा मोमोट बारे यहुदि आयवा लोकुल्लकुनगा होनना इंचि ओर निरनायम कीतुर.

10 ओर माकु उदे पोल्ले वेहतुर, अद बतल इत्ते मोमोट अगा होत्तस्के गरिब लोकुल्लकुंक सहायम कियना इंचि. नाकगुडा अदे कबळ कियना आसे मत्ता.

पौलुस पत्रुक विरोद कीतोर

11 कोन्नि रोजकुंक केपल अंताकिया सहरते वातोर. अगा वातस्के ओर उंदि तपु कीतोर. अदुनहाटी ओर कीतद तपु इंचि ओन्क मोकोम मुन्नेन वेहतन.

12 असल बतल आता इत्ते, याकोबनगटाल इच्चुर यहुदि विस्वासुल्क केपानगा (पत्रु) वातुर. आ लोकुल्क वायनदाका केपल यहुदि आयवा विस्वासुल्कुनतोनि कलियसि तिनुड-उनुळ कियुंदुर. गानि बस्के अयते ओर वातुर, अस्केटाल मात्रम कतना आता लोकुल्लकुंक वेरियसि, केपल यहुदि आयवा विस्वासुल्कुनाल लक्कु आतोर.

13 इंका ओर कियनद हळसि वेरे यहुदि विस्वासुल्कगुडा अल्हे कियालय दलगतुर. अचोने आयका बरनाबासगुडा ओरव्टेन कलियतोर.

14 पजा ओर बेसता कबुरता सत्तेमतुन एरपाट कीसि ताकसेक हिल्लतुर इंचि नाकु तेळियतस्के नना केपन, “निमे यहुदि जातितोन आसिगुडा यहुदिल्कुना रीति-रिवाजकुन पीसि ताकसेक हिल्लिन. असोटस्के यहुदि आयवोर्कुन यहुदिल्कुना रीति-रिवाजकुन पीसि ताकालय बारि जबरदस्ति कीसतिन?” इंचि अंतोर मुन्नेन पुसकीतन.

15 बोर्कुन अयते मना यहुदिल्क पापिक इंचि इंतुर आ जातिते मनम पुट्टा हिल्लोम, मनम पुट्टस्केटाल यहुदिल्कुमे.

16 अयना मूसाना नियमतुन पीसि ताकते आयो, गानि येसु किरिस्तुन विस्वासम कीतेन वरोर मनकल नीतिमंतुड आंतोर इंचि इंदके मनाकु एरपाट मंता. अदुनहाटी येसु किरिस्तुन विस्वासम कीताहेका नीतिमंतुल्क आयगोम इत्ता उदूदेसमते मनम यहुदिल्क येसुनपोरी विस्वासम कीतोम. बारिल्ले मूसाना नियमतुन पीसि ताकतोर बोरे मनकल नीतिमंतुड आयोर.

17 नीतिमंतुल्क आयनाहाटी नियमाल्कुन पीसि ताकका, मनम किरिस्तुन विस्वासम कीतोम. इंचि इच्चुर यहुदिल्क मनाकुन पापिक इंचि इनकुंतुर. इत्ते बतल किरिस्तु पापम किया वेहालय वातोर? अल्हा असले आयो.

18 यहुदिल्कुना बव नियमकुन अयते नना होळसीतनो, अवे नियमकुनपोरी मरी ताकानयते नना मूसाना नियमाल्क तपतोने आंतन.

19 इत्ते मुन्ने नना मूसाना नियम परकारम ताकसेके पिसालय हळुंदुन, गानि बस्केळ्ळ अवुन पीसि ताका पराकोंदुन. इंदके पेनदाहाटी पिस्सना इंचि अवुनंता होळस्तन. दीना अर्तम बतल इत्ते यहुदिल्कुना रीति-रिवाजकुनाहाटी नना हाताप आतन.

20 नाकुन किरिस्तुनतोनि कूसुनपोरी वेलाड वाटमळ जर्गता इत्ते, इंदके नावा पळाना पिस्वर हासोत्ता. गानि नावा लोप्पो किरिस्तु जीवाते मंतोर. इंदके नावा ई मेंदुल्लते मनना जीवा, नाकुन बचचोने पावरम कीसि नावाहाटी ओना जीवातुन हीता पेनदा मरिनपोरी नना विस्वासम कीताहेका दोर्कतद आंद.

21 पेनदा कुर्पातुन नना बिलवा हिल्ले इंचेक हिल्लेन. गानि मूसाना नियम परकारम ताकसि मनकालोर नीतिमंतुल्क आयानयते मनाहाटी येसु किरिस्तु हायना अब्बरम मनाहिल्ले मरि.

3

विस्वासम कियानोके पेनदा आसिर्वाद दोर्कता

1 ए गलातिया एरियाता लोकुरिटा, मिमेट निजमे बुदिद हिल्वोर आदिर. येसु किरिस्तुन कूसुनपोरी बारि वेलाळ वाटतुर? दाना अर्तम बतल? इंदता नना मीकु बेस तेळियानाल वेहचि मत्तन. असल मीकुन तपुड हर्दुक तिराहतोर बोरे?

2 इंदके मिमेटे वेहाट, मूसाना नियम परकारम ताकताहेका मीकु पवित्र आत्मा दोर्कतना मरि किरिस्तुना बारेमता बेसता कबुरपोरी विस्वासम इरताहेकाना?

3 पवित्र आत्माता सहायमतोनि सुस्व कीता मीवा पूना पिस्वरतुन मिमेट मीवा बलमतेन पुरागा कियालय हळसतिरा? मीकु गिचोगुडा बुदिद हिल्लेना?

4 बेसता कबुरताहेका मिमेट वेल्लेन तिप्पल्क अरतिर, अदंता एतमिना? नना मात्रम ओष्कुन्नोन.

5 पेन मीकु दाना पवित्र आत्मातुन हीसि मीवा नड्डुम पेद्दा-पेद्दा अद्बूताल्क कीता. अद बल्हा? मिमेट मूसाना नियम परकारम पिस्सतिट इंचा? हिल्ले. मिमेट किरिस्तुना बारेमता बेसता कबुर केंजसि दानपोरी विस्वासम कीतिर इंचि अल्हा कीता.

6 दर्मसास्त्रमते वेहाताप, अब्राहाम पेनदा पोल्ले केंजसि विस्वासम कीतोर, ✧ इंचि पेन ओन नीतिमंतुड इत्ता. इदगुडा अल्हेन आंद.

- 7 अदुनहाटी बोर अय्ते पेनदापोरों विस्वासम ईरतोर, ओरे अब्राहामुना निजमाता वंसमतोर आंदुर, इद मीकु तेळियगोम.
- 8 यहुदि आयवोर अंटोर्कुन पेन ओरा विस्वासमतुन हळसि नीतिमंतुल्क कीता इंचि दर्मसास्त्रमते रासि मंता. इदुना बारमेते पेन अब्राहामुंक, “अन्नि जातिनोर्कुंक नीवाहेंदाले आसिर्वाद दोर्कता,”* इंचि मुन्नेन वेहचि मत्ता.
- 9 इंचि अब्राहामुनलेसी पेनदा पोल्लेपोरों बोर अय्ते विस्वासम ईरतोर, ओन्के अब्राहामुंक दोर्कताप पेनदाहेंदाल आसिर्वाद दोर्कता.
- 10 गानि बोर अय्ते मूसाना नियमतुन नम्मिसि मनंतोरो, ओन्क सिराप सापनेमे दोर्कता. बारित्ते, “मूसाना नियमते रासि मत्ता अन्नि नियमकुन अन्नि वेलाते बरोबर पीसि ताकवोर अंटोर्क पेनदा सापनेम दल्गता,*” इंचि दर्मसास्त्रमते रासतद मंता.
- 11 दीनहेंदाल इंदके मनाकु तेळियता गदा, मूसाना नियमतुन पीसि ताकानोर बोरे पेनदा मुन्ने नीतिमंतुड आयोर. बारित्ते, “पेनदुन विस्वासम कीसि नीतिमंतुड आतोर पिसनुर,”* इंचि दर्मसास्त्रमते रासि मंता.*
- 12 इगे मूसाना नियम आनि विस्वासमकु बतले संबंदम हिल्ले. बारित्ते, “बोर अय्ते अबुन पीसि ताकंतोर, ओर अबुनतोने पिसंतोर,”* इंचि दर्मसास्त्रमते रासि मंता.
- 13 “मराकु वेलाड वाटता हरेक मनकल सापनेम दल्गतोर,”* इंचि दर्मसास्त्रमते रासतद मंता. अदुनहाटी मूसाना नियमहेंका मनाकु दल्गता सापनेमतुन किरिस्तु कुदुदु येतकुत्तोर. इल्हा किरिस्तु सापनेम दल्गतोर आसि मनाकुन आ सापनेमताल कापाळतोर.
- 14 अब्राहामुंक पेन हीता आसिर्वाद येसु किरिस्तुनहेंदाल यहुदि आयवोर्कगुडा दोर्कना इंचि किरिस्तु मनाकुन पिसागोटतोर. दीनहेंदाल मनम ओनपोरों विस्वासम कीसि पेन हीता पोल्ले परकारम पवित्र आत्मातुन दोर्किच्छुना परंतोम.

मूसाना नियम आनि पेनदा पोल्ले

- 15 अय्ते विस्वासुल्कनिडा! मना रोजता पिस्वरताल उंदि पोल्ले नना मीकु वेहांतन. अद बतल इत्ते, मनकालोरा नड्डुम आता करारतुनगुडा, “इद करार ताको, हिलाकोटे इदुन बदलांचा पीता,” इंचि मनम इना परोम.
- 16 अल्हेन अब्राहाम आनि ओना वंसमतोनतोनि पेन कीता करारता बारमेते मंता. गानि दर्मसास्त्रमते, “वंसमतोर्क” इंचि रासि हिल्ले. अगा अल्हा रासि मंचि मत्ते वेल्लेन मंदिताहाटी आसि मनवळ. गानि अल्हा रासाकोटा वरोनाहाटी इत्ताप, “नीवा वंसमतोन्क” इंचि रासि मंता. आ वरोर इत्ते किरिस्तु आंदुर.
- 17 इंदके इदुन बेस केंजाट! नालु न्ह्हुकना मुपै वर्साना पज्जो वाता मूसाना नियम, पेन मुन्नेन कीसि मत्ता करारतुन बल्हा बदलांचा परंता? बदलांचा परो. अदुनहाटी अद इंदकेगुडा ताकसंता.
- 18 ओक्कला वारसान हक्क गिटा मूसाना नियमतुन पीसि ताकताहेंका दोर्कता इनानय्ते, अद पेन हीता पोल्ले परकारम दोर्कतद आयो. गानि अब्राहामुंक अय्ते अद पेन हीता पोल्ले परकारमे दोर्कता.
- 19 अय्ते मरि पेन मूसाना नियमकु बारि हीता इंतरि? पेन अब्राहामुनतोनि उंदि करार कीता. अद करार परकारम ओना वंसमताल वरोर वायनद मत्ता. ओर वायनजेम पापम इत्ते बतल मनाकु तेळियनाहाटी पेन अव नियमकु हीता अचोने. पेन ई नियमकुन दाना दूतानहेंदाल मूसाना कय्दुक हीता. बारित्ते मूसाल पेन आनि लोकुल्कुनाहाटी नड्डुम मनकल मत्तोर.
- 20 इव्वुर्कुन कल्पालय नड्डुमतोना अक्सरम मंता. गानि इगे पेन सीदा अब्राहामुनतोनि करार कीता.

मूसाना नियमते पिस्वर हिल्ले

- 21 अय्ते मरि मूसाना नियमकु पेन हीता पोल्लेना विरोदमते मंतंगा? असले हिल्लें. ओक्कला मूसाना नियमकु पिस्वर हियानव अय्ते, मनम अबुनतोने नीतिमंतुल्क आसि मन्नेरम.
- 22 गानि दर्मसास्त्रम अय्ते, “पूरा दुनिया पापमते दोह्चि मंता,” इंचि वेहांता. अल्हा बारि आता इत्ते, हीता पोल्ले परकारम दोर्कना आसिर्वाद, येसु किरिस्तुनपोरों विस्वासम कीतोर्के दोर्कना इंचि.
- 23 गानि येसु किरिस्तुनपोरों विस्वासम कियना कालम वायका मुन्ने मनम मूसाना नियमकुने दोह्चि वाटताप मत्तोम. इंदके बोर मनकल अय्ते अव नियमकुने दोह्चि वाटताप मंतोरो, ओर येसु किरिस्तुनपोरों विस्वासम कीसि अव नियमकुनाल पलाते अरं परंतोर इंचि पेन मनाकु हुपिस्ता.
- 24 इत्ते मनम किरिस्तुनपोरों विस्वासम कीसि नीतिमंतुल्क आयना इंचि, ओर वायनदाका मूसाना नियमकु मनाहाटी वरोर बेस ऊळगेम कियानोन लेह्का मनाकुन किरिस्तुंक दगेरा कियना कबळ कीसेक मत्ता.
- 25 इंदके किरिस्तुन विस्वासम कियना कालम वाता, अदुनहाटी मनाकु मूसाना नियमता कय्दा हिळु मनना अक्सरम हिल्ले.
- 26 येसु किरिस्तुनपोरों विस्वासम कीताहेंका मिमेट अंतोर इंदके पेनदा पिलाल्क आतिर.

* 3:8 उत्पत्ति 12:3 * 3:10 ध्यवस्ताविवरन 27:26 * 3:11 पेनदुन विस्वासम कीसि नीतिमंतुड आतोर पिसनुर पेनदापोरों विस्वासम इरसि बोर अय्ते नीतिमंतुड आंतोर, ओन्के बस्नेळक पिस्सना पिस्वर दोर्कार. * 3:11 हबक्कुक 2:4 * 3:12 लैव्यवस्ता 18:5 * 3:13 ध्यवस्ताविवरन 21:23

- 27 अद बल्हा इत्ते, बोर अय्ते किरिस्तुना पोरोल्ते बापतिस्मा येतंतुरो, ओर अंतोर किरिस्तुने कलियसोत्तुर.
 28 इंदके यहदि, युनानि, जीतागाड, मालक, मांडसा, मुरतळ इल्हा बतले परक हिल्ले. किरिस्तुने मिमेट अंतोर उंदे.
 29 मिमेट किरिस्तुना लोकुल्क आतिर, इत्ते अब्राहामुना वंसमतोर आंदिर. दीनहेंदाल पेन अब्राहामुंक हीता पोल्ले परकारम, पेन ओन्क हियना आसिवांदता वारसदार्कगुडा आंदिर.

4

मनम दासुल्क आयोम पेनदा मर्कुम

- 1 नना वेहानद बतल इत्ते, वारसदार बदवेरादाका सिन्ना पेडल मनंतोर, अदवेरदाका ओर लोता मालक आसिगुडा जीतागानलेसी मनंतोर.
 2 इत्ते, बाबो निरनायम कीता वेला एवनदाका ओर ओन कापाळनोरा आनि दनमता देकरेक कियानोरा कयदा हिळु मनंतोर.
 3 अल्हेने मनमगुडा सिन्ना पेडनलेसी तेळियवोर्कुम मत्तस्के, दुनियाता नियमकुने दोहचि वाटताप अबुना दासुल्क आसि मत्तोम.
 4 गानि बस्के अय्ते पेन निरनायम कीता वेला एवता, अस्के दाना मर्रिन ई दुनियाते लोहता. ओर मूसाना नियम परकारम ताकानोरा लोप्पो उंदि मुरतटा पीटे पुटतोर.
 5 बारित्ते, मनम पेनदा पिलाल्क आयना इंचि, मूसाना नियमकुने दोहचि वाटताप मत्ता मनाकुन लेहलाये पेनदा मर्रि वातोर.
 6 मनम पेनदा पिलाल्क आताहाटी अद मनालोप्पो दाना मर्रिना आत्मातुन लोहता. अद आत्मा मनालोप्पो मंचि पेनदुन, “बाबा! बाबा!” इंचेके केयसेक मंता.
 7 अदुनहाटी मिमेट इंदके दासुल्क आयिर, गानि पेनदा मर्क आंदिर. मिमेट मर्क आताहाटी पेन मीकुन दाना वारसदार्कगुडा कीता.

पेनदुन एरपाट कीसि ताकाना

- 8 दीनकन्ना मुन्ने मिमेट निजम पेनदुन एरपाट किया हिल्लिर, अदुनहाटी आट्टे पेनकुना कयदा हिळु मत्तिर.
 9 गानि इंदके पेनदुन एरपाट कीतिर. निजम हळते पेने मीकुन एरपाट कीता. अदुनहाटी मिमेट दुनियातां अंगळमतव रीति-रिवाजकुने पजोळ्क बारि होंचतिर? मर्रा मीकु अबुना कयदा हिळे मनना मंताना?
 10 मिमेट रोजकु, नेलां, कालाल्क, वर्सा इवुन नोमसेक मंतिर.
 11 नना मीवाहाटी कीता कस्टम वट्टिदे आंता बारे इंचि नाकु मीवा बारेमते वें वस्सेक मंता.
 12 विस्वासुल्कुनिटा, नना मीलेसी नियमकुन नोमवोन आतन, मिमेटगुडा नावालेसी आम्प, इंचि मीकुन विनंति कीसेक मंतन. इदवेरादाका मिमेट नापोरें बतले अन्यायम किया हिल्लिर.
 13 मुन्नेटा मल्का नना वातस्के, ना जीवा बेस मनाहिल्ले, अस्के मीकु किरिस्तुना बेसता कबुर वेहतन. अद मीकु एरपाटे.
 14 ना जीवा बेस हिल्लेका मीकु कस्टम आयिनागानि मिमेट नाकुन सिन्ना हळा हिल्लिर, बेस हळतिर. नाकुन पेनदा द्तालेसी, येसु किरिस्तुनलेसी बेस हळतिर.
 15 नना निजम वेहंतन, अद बेलाते ना सेवाहाटी नाक कळ्दा अक्सरम मंचि मत्ते, कळु इंका तेंडसि हियालय मिमेट तयार मत्तिर. अच्चेन नावापोरें पावरम किथिंदिर इंचि नना वेहा परांतन, अय्ते अद कुसि इंदके बेके होत्ता?
 16 नना मीवातोनि निजम वळकताहाटी मीकु पगातोनि आताना?
 17 आबद्दम पोल्लें कराहनोर मीकुन ओरा पट्टुने अरहालय वेल्लेन कोसिस कीसेक मंतुर. ओरा अद कोसिस मीवा बेसताहाटी आयो गानि मिमेट ओरा लोप्पो कलियसि मंचि मावाहेंदाल अलग आयना इंचि ओरा विचारम मंता.
 18 नना मिहगा मनिना, हिलाकुना गानि बस्केळ्क बोर्नना बेसता पोल्लें कराहते वेल्लेने कुसिते ओना पज्जो होनना.
 19 ना पिलाल्कनिटा, मीकु बदवेरादाका किरिस्तुनलेसी गुनम वायोनो अदवेरदाका, एरपूरैके बल्हा नोप्पि वांतंगो अल्हेने नना मीवाहाटी मर्रा उंदि मल्का तकलिप अरसेक मंतन.
 20 मीवा बारेमते नना बतल कीकन नाक तोससेक हिल्ले. अदुनहाटी इंदके नना मिहगा वासि, मीतोनि वें तरिकाते वळकना इंचि नावा आसे मंता.
 21 मूसाना नियमते ताकंतोम इननोर्कुन नना पूसकीतन, अवने बतल रासि मंता मीकु एरपाट मंताना?
 22 अब्राहामुंक इब्बुर मर्क मत्तुर, वरोर दासिदानकु पुटतोर, इकावरोर बारे ओना मरमिना मुत्तोक पुटतोर, इंचि दर्मसास्त्रमते रासि मंता.
 23 दासिदानकु पुटता पेडल इस्माइल, मनकना विचारमताल पुटतोर. आनि मरमिना मुत्तोक पुटता पेडल इसाक बारे पेन हीता पोल्ले परकारम पुटतोर.

24 इव पोल्लें उंदि उदाहरनलेसीं मंतां. इव रोंड मुल्लोहकु इत्ते, पेन लोकुकुननतोनि कीता रोंड करारकुनालेसीं मंतां. उंदि करार इत्ते सिनाइ गुट्टाता* करार आंदु, ई करारता हेंदाल पुटता पिलाल्क, हाजिरानालेसीं दासुल्क आतुर.

25 हाजिरा अरब देसेमता सिनाइ गुट्टालेसीं मंतां इनकुंट, हाजिरा आनि दाना मर्कगुडा सिनाय गुट्टातगा हीता आ नियमकुना कट्टा हिळे मंतुर, अदुनहाटी हाजिरा इत्ते इंदकेटा येस्सलेमतोरलेसीं आंद.

26 गानि स्वर्गमता येस्सलेम बारे मरमिना मुल्लो सारानालेसीं मंता, अद मना विस्वासुल्कुना तल्लुर आंदु.

27 दर्मसास्त्रमते इल्हा रासि मंता:

“गोड्डुमुर्ग मुरतटुना! निमे बोर्कुन कना हिल्लिन, निमे कूस आम.

एरपूराना तकलिप आयवादाना, निमे कुसिते केया.

बारिल्ले मुय्दो मत्ता मुरतळकन्ना, मुय्दो होळसीता मुरतळके वेल्लेट्टर पिलाल्क मंतुर.”*

28 अदुनहाटी विस्वासुल्कुनिटा, मनम मनकल विचारम कीताप आयो गानि पेन करार कीताप इसाकुनालेसीं दाना मर्क आतोम.

29 अस्के मनकना विचारमते पुटतोर, पेन करार कीता परकारम पुटतोन बल्हा तकलिप कियुंदुरो अल्हेने इंदकेगुडा जर्गसेक मंता.

30 गानि दर्मसास्त्रमते बतल रासि मंता? “दासिदानकु पुटता मर्रिक, मरमिना मुल्लोंक पुटता मर्रिनतोनि वारसान हक्क दोर्का परो. अदुनहाटी दासिदान दाना मर्रिन पलाते पेचहट!” इल्हा रासि मंता.

31 अदुनहाटी विस्वासुल्कुनिटा, मनम दासिदानोर्कुम आयोम गानि मरमिना मुल्लोना पिलाल्कुम आंदुम.

5

यहुदि आयवोर्क कतनाता अक्सरम हिल्ले

1 मनम नियमकुना लोपो दासुनलेसीं मनान्नि इंचि किरिस्तु मनाकुन अवेटाल इळबळिस्तोर. अदुनहाटी विस्वासमते गट्टिगा मंत, मिमेट नियमकुना बर्वु दासुल्कुनलेसीं मरां कांजमट.

2 केंजाट, नना पौलसुन मीकु वेहासेक मंतन, मिमेट कतना कीसि दर्मसास्त्रमता नियम मत्ताप ताकंतोम इनानये, मीकु किरिस्तुनाहेंदाल बतल पाय्दा आयो.

3 सिराप कतना कीकुल्लेने पेनदा मुन्ने नीतिमंतुड आंतन इंचि इनकुंचि कतना कीतोर मूसाना पूरा नियमकु मत्ताप ताका पीता, इंचि नना मीकु मरां उंदि मल्का वेहासेक मंतन.

4 मी लोपोटाल बोर अथे मूसाना नियम मत्ताप ताकसि नीतिमंतुल्क आंतोम इंचि इनकुंचेके मंतरि, मिमेट किरिस्तुनाल अलग आतिर, ओना कुर्पाताल लक्कु आतिर.

5 बारिल्ले मनम विस्वासमताहेंदाल पेनदा मुन्ने नीतिमंतुल्क आतोम इंचि आसे इरतोम. अदे आसेताहाटी आत्मा बलमते दाना एदुर हळसेक मंतोम.

6 येसु किरिस्तुनलोपो कतना कियिना, कतना कियाकोन्ना अद बाता कबळतद आयो, गानि पावरमते कबळ कियना विस्वासमे कबळतद आंद.

7 मिमेट मुन्ने बरोसाते बेस बेरस्सेक मतिर. गानि इंदके मीकुन बोरो आपसेक मंतुर, इंचि सत्तेम हर्द ताकसेक हिल्लिर.

8 इद आपाना कबळ मीकुन केयता पेनदद आयो.

9 वेल्लेने बेस पिडिते इच्चुर पुल्लाटा पिडि वाटते, पूरा पिडितुन पुल्लागा कीसि पोहंता इद मनाकु एरपाटे.

10 नना कराहता निजम पोल्लें मत्ताप मिमेट ताकतिर इंचि नाकु सामिनाहेंदाल पूरा बरोसा मंता. मीवा विस्वासमतुन तप्सानोर बोरना आयिर ओर्क तप्पाकोटा सिक्सा दोर्कता.

11 विस्वासुल्कुनिटा! ननागिंटा कतना कियना इंचि वेहासेक तिरियसि मत्ते, नाकुन यहुदिल्क वेल्लेन तकलिप कियाकोन्ने, येसु सामि कूसुनपरोर् हीता मोक्कुता हेंदाले बस्केळ्क पिस्सना पिस्वर मंता इंचि वेहताहेंकेन ओर्क होंग वाता.

12 मीकुन कतना कियागोम इंचि तिपल्क कियानोर, कुद आडिगुनलोरलेसीं आते बेस मंता.

पेनदा आत्मा वेहताप ताकाना

13 गानि विस्वासुल्कुनिटा! पेन मीकुन नियमकुना लोपोटाल इळबळिस्ता. अदुनहाटी नना वेहासेक मंतन, मिमेट मीवा पापि विचाराल्कुन पूरा कियालय मीकु विचारम वाताप ताकानायो गानि पावरमते वरोंक-वरोर सहायम कीसेक मंदना.

14 बारिल्ले मूसाना आन्नि नियमकु उंदे अदेसते कलियसि मंतां. अद बतल इत्ते, “मीवाद मिमेट बचचोन पावरम कीकुंतिर, अचोने पावरम इकावरोगुडा कीम्टु.”

* 4:24 सिनाइ गुट्टा इंदे गुट्टातगा इझाएल लोकुकुंक पेन पदि पोल्लें हीता. ☆ 4:27 यसायाह 54:1

15 गानि मिमेटगिटा नय्कु बल्हा उंदांक-उंदि कस्कसेक, इग्गिस तिचेके मनंतंगो अल्हा मनानय्ते उसारते मंटु! उंदि रोज मिमेट वरोनहेंदाल वरोर नासडेम आया परातिर.

16 नना वेहानद बतल इत्ते, पेनदा आत्मा मीकुन ताकिस्ताप ताकट, अल्हा ताकते मीवा मनसुना पापि विचाराल्कुनाल लक्कु मनातिर.

17 बल्हा इत्ते, मनकना पापि विचाराल्क, पेनदा आत्माता विचाराल्कुंक अड्डम मनंतां अल्हेन पेनदा आत्माता विचाराल्क मनकना पापि विचाराल्कुंक अड्डम मनंतां. इव रोंडुना विचाराल्क बस्केने कलियों. अदुनहाटी मिमेट बतल अय्ते कीतोम इतिर, अद किया परिर.

18 गानि मिमेट पेनदा आत्मा ताकिस्ताप ताकते, मिमेट मूसाना नियमकुना कय्दा हिळु हिल्लिर.

19-21 मनकना पापि कबाहक मनाकु एरपाटे मंतां. अव इव आंदुं: बोगमतनम, अपवित्र कबाहक, सिग्गु हिल्वा कबाहक, बोम्मा पूजें, होदें, वरोंक-वरोर हय्साकोटा मनमळ, जगडाल्क, कळ्ळ पोत्तमळ, होंग, नाके गावाले इनमळ, लोकल्लकुना नड्डुम पुटपाट कियमळ, वेरे गेंग तयार कियमळ, कल्लु उनमळ, विददुरतनम इसोंटव इंका वेल्लेन पोल्लें मंतां. इसोंटा कबाहक कियानोर पेनदा राज्यमते वारसदार आया पस्स. इद पोल्ले नना मीकु मुन्नेने वेहतन, अल्हेने इदकेगुडा वेहासेक मंतन.

22 पेनदा आत्माता कबाहक इल्हा मंतां: पावरम कियमळ, कुसिते मनमळ, सांतिते मनमळ, ओप्के पीसि मनमळ, दया कियमळ, मंचितनम, इमानदारते मनमळ, मेल्लगा मनमळ, बसोंटा परिक्सा वायिनागानि अय्ते अर्राकोंटा सततुन आपकुनमळ.

23 इल्हा ताकते इव्क अड्डम बदे नियम हिल्ले.

24 बोर अय्ते येसु किरिस्तुन विस्वासम कीतोर मंतुर, ओर ओरा पापि विचाराल्कुन, पापि आसेन कूसुनपोरें वेलाड वाटताप अव्वुंक लक्कु आतुर.

25 मनमगिंटा पेनदा आत्माते पिसानय्ते, आत्मा वेहतापे ताककोम.

26 इंकावरोर होंगुंक वायाकोंटा, गर्रा कियाकोंटा, कळ्ळ पोत्तकोंटा मनम मंदकोम.

6

वरोंक वरोर सहायम कीम्टु

1 गानि विस्वासुल्कुनिटा! मीलोप्पो बोरन्ना पापम कीते, पेनदा आत्माते तानानोर मिमेट होंगुंक वायाकोंटा ओनगा होंचि ओन बेस समजांचि, सत्तेम हर्दें तदु. अल्हेने मिमेटगुडा असोंटा परिक्साते अर्रामनि इंचि, उसारते मंटु.

2 मिमेट तकलिपते वरोंक-वरोर सहायम कीम्टु, अल्हा कीतेने किरिस्तु हीता नियमतुन पूरा किया परातिर.

3 बारिल्ले, बोरें आयिर पेद्दातनम हिलाकुना गानि पेद्दातनम हुप्संतुर, असंतोर ओरद-ओरे पसांचकुंचेके मंतुर.

4 हरेक मनकल ओना सतता कबाहकुन कुदूदु परिक्सा कीसि हळना, वेरेंतोना कबाहक बल्हा मंता इंचि हळना आयो. अस्के ओना कबाहक बेस मत्ते ओर सतता कबाहकुन हळसि कूस आयावच्चु.

5 बारिल्ले बोरें आयिर, ओना जिम्मेदारि ओरें एतमळ गावाले.

6 बोर अय्ते पेनदा पोल्ले करियतुर, ओर अनि बेसता वस्तुक ओन्क कराहतोंक पंचि हियमळ गावाले.

7 पेनदुक बतल तेळियो इंचि नाळेंम कीसि पसांचमट्टु, मिमेट बवय्ते वीतकिर, अवने कोयकिर.

8 बोर अय्ते ओना पापि गुनम वेहताप वीतंतोर, ओर नासडेमता पंटा कोय्यंतोर. गानि बोर अय्ते आत्मा वेहताप वीतंतोर, ओर आत्माताहेंदाल बस्केळ्ळ पिस्सना पिस्वरता पंटा कोय्यंतोर.

9 मनम उंदेतीर बेसता कबळ कीते, पेन निरनायम कीता वेला एवतस्के मनाकु दाना पाय्दा दोर्कता. अदुनहाटी मनम नेरबळाकोंटा बेस कबळ कियाना.

10 अय्ते मारि, मनाकु बल्हा मोका दोर्कते अल्हा अंतोराहाटी, एक्कोते-एक्को मना विस्वासुल्कुनाहाटी बेस सहायम कीकोम.

सिट्टिता आकिर पोल्लें

11 हळ्वाट, इद सिट्टि पेद्दा-पेद्दा अक्सराल्कुने नावा कय्दे मीकु राससंतन.*

12 नाल्गा मुन्ने नना बेसतोम इंचि हुप्सानोर, ओरें मीकुन कतना कियोगोम इंचि बल्मि कीतुर. इल्हा बारि कीतुर इत्ते, किरिस्तुना कूसताहेंका वायाना तकलिपताल तपिचुकुननाहाटी ओर इल्हा कीतुर.

13 बोर अय्ते कतना कीसि मंतुर, ओरगुडा मूसाना नियमते ताकुर. गानि ओर वेहताप मिमेट कतना कीते ओर्क पेद्दातनम दोर्कता इंचि, ओर मीकु इल्हा वेहांतुर.

* 6:11 पैलसु सिट्टि रसानेके कुद रसाकोदुर गानि इंकवरोनतोनि रसा वेहदुर. अद सिट्टि ओर रासतोर इत्ताप मनना इंचि आकिर पोल्लें मात्रम ओर कुद रासदुर. इल्हा ओनद उंदि रिवाज मत्ता.

14 गानि नना अय्ते, मना सामि येसु किरिस्तु कूसुनपोर्रो हातोर इंचि विस्वासम कीतन, दीन पोर्रेने नाकु पूरा विस्वासम मंता. आ कूसुनहाटीगे दुनियाता पोल्लें नाक कलियोँ, नावा पोल्लें ओर्क कलियोँ.

15 बारिल्ले कतना किथ्येना, कतना क्रियाकोन्ना बतल पायदा हिल्ले. पेन मनालोप्पो पूना पिस्वर हीता अदे पायदातद आंदु.

16 अदुनहाटी, बचुदुर अय्ते ई नियमते ताकंतुर अचट्टुकुंक आनि पेनदुन विस्वासम कीता अंतोर इम्राएल लोकुकुंक सांति, दया दोर्किंकांटी.

17 इंदकेटाल आबद्दम कराहना पोल्लें केंजसि मिमेट नाक मर्रा तकलिप हियमटु. येसु सामिना पोल्लें वेहताहाटीगे नना नावा मेंदुलपोर्रो देब्बाना बर्रा पीसि तिरियसेक मंतन.

18 विस्वासुल्लुनिटा! मना सामि येसु किरिस्तुना कुर्पा मी अंतोरतोनि मन्निंकांटी. आमीन.

इपीसि इपीसि विस्वासुल्कुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टिटतुन जेलने मत्तास्के रासतोर. पौलुस येसुना बारेमता बेसता कबुर वेहालय रोंडो मल्का पय्नेम होत्तास्के ओर ई इपीसि सहरतेगुडा होंचि मत्तोर. ओर ई सहरते मोदाला होत्तस्के वेल्ले रोजकु मनाहिल्लोर गानि ओना मडोव मल्का पय्नेम होत्तस्के अगा कोन्नि वर्सनदाका मत्ताप प्रेरितुल्कुना कबाहक पुस्तकमते मनाकु तेळियसि दांता.

पेनदा लोपो अंतोर विस्वासुल्कु उंदासि पेनदा उदूदेसमतुन एपाट कीसि पिसागोम, अल्हेने कलिसिया इत्ते उंदि मेंदुललेसी मंता. दान्क किरिस्तु तल्लालेसी मंतोर. अय्ते मनम विस्वासुल्कुम आ मेंदुलता बागाल्कुम आंदुम. मेंदुलता बागाल्क बल्हा उंदान्क-उंदि बेस कलियसि मंनंतंगो अल्हेन मनमगुडा मत्ते, पेन दाना उदूदेसम परकारम मनाकु पिस्वरतुन हीता. पेनदा पोल्लेतुन इपीसि सहरता विस्वासुल्कुंक वेहनाहाटी पौलुस इद सिट्टि रासतोर. अचोने आयाका वरोर विस्वासि किरिस्तुना लोपो बल्हा मनना, मुत्तो-मुय्दो, मालक-दासुड, तल्लुर-बाबो मर्क-मियाहक बल्हा मनना इवन्नि अवसरमाता पोल्लेगुडा पौलुस इद सिट्टिते रासतोर.

बगा बतल मंता

जोहार आनि परिचयम 1:1-2

किरिस्तु आनि कलिसिया 1:3-3:21

किरिस्तुन विस्वासम कीसि दुनियाते पूना पिस्वर पिसमळ 4:1-6:20

आकिरता बोदां 6:21-24

जोहार

1 नना पौलुसुन, पेनदा इच्चा परकारम, किरिस्तु येसुना प्रेरितुन आतन. इपीसि सहरते मनना किरिस्तु येसुन विस्वासम कियाना पेनदा लोकुल्कुंक नना इद सिट्टि रासेक मंतन.

2 मना पेनबाबानहेंदाल आनि सामि येसु किरिस्तुनाहेंदाल मीकु कुर्पा, सांति दोर्किकांटी.

किरिस्तुनाहेंदाल दोर्कांना आसिर्वांदाल्क

3 मना सामि येसु किरिस्तुना पेनबाबांक दन्यवाद. ओर किरिस्तुनाहेंदाल, मना बक्तिकु संबंदिस्त्व स्वर्गमते मनना अन्नि आसिर्वांदाल्क मनाकु हीसीतोर.

4 अद बल्हा इत्ते, मनम पेनदा नदरते पवित्र आनि दोसेम हिलाकोटा मंदना इंचि, पेन ई दुनियातुन पुट्सकामुन्नेन अद मनाकुन किरिस्तुना लोपो पेरकुत्ता.

5 पेनदा पावरमता पिलान परकारम, येसु किरिस्तुनाहेंदाल मनम दाना पिलाल्क आयाना इंचि अद मनाकुन मुन्नेन पेरता. ई पिलान पेनदा इच्चा परकारम मत्ता इंचि पेनदूक इल्हा कियमळते कुसि दोर्कता.

6 दाना पावरमगल्ला मरि मनाहाटी कीतदुन पीसि, अद मनापोर्री लेक्का परवच्चोन कुर्पातुन पुक्कटते कुम्मरिच्ता. अदुनहाटी मनम पेनदा महिमाता स्तुति कीकोम.

7 किरिस्तु ओना सतता नेत्तुरतुन पोंगागोटताहेंका मना पापाल्क मापि आसि मनाकु मुक्ति दोर्कता. इल्हा पेन दाना वेल्लेन कुर्पातुन मनापोर्री कुम्मरिच्ता.

8 अद मना बुद्दिक, तेल्विक हालानाल दाना दया हियमळ जर्गता.

9 पेन मुन्नेने निरनायम कीता, दाना इच्चा परकारम मत्ता मर्ममता पिलानतुन, मनाकु किरिस्तुनाहेंदाल कुल्ला कीसि वेहता.

10 अद बतल इत्ते, पेन दाना पिलान परकारम इन्कुत्ता वेला एवतस्के, स्वर्गमते मत्तव, बूमिपोर्री मत्तव अन्निगुडा उंदगा कीसि अवनु किरिस्तुना अदिकारम हिळु हियमळ गाबाले.

11 पेन अन्निटवुन दाना इच्चा मत्ताप पिलान कीसि ताकसंता. अदे पिलान परकारम मनाकुन पेनदा लोकुल्क इंचि मुन्नेने किरिस्तुना लोपो पेरमळ जर्गता.

12 मनम बोर अय्ते मुन्नेटाले किरिस्तुनापोर्री आसे इरतोम, दाना महिमातुन तल्सकुनागोम इंचि दाना विचारम मंता.

13 मीकु मुक्ति हीता बेसता कबुर सत्तेम आंद अदुन मिमेटगुडा केंजतिर. केंजसि किरिस्तुना लोकुलक आयानाहाटी ओनपोर्री विस्वासम इतिट. अस्के पेन हीता पोल्ले परकारम पवित्र आत्माता सिक्का मीपोर्री वाटमळ जर्गता.

14 पेन बोर्कुन अथे अस्कृता ओरा मुक्तिहाटी, दाना पवित्र आत्मातुन वारसान हक्कता उंदि इसारालेसी मनागा इरता. अदुनहाटी लोकुलक दाना महिमातुन तल्सकुंतुर.

इपीसि विस्वासुलुकुनाहाटी पौलसना पारतना

15-16 अदुनहाटी बस्केटाल अथे नना, सामि येसुना पोर्रीटा मीवा विस्वासम बारेमते आनि पवित्र लोकुलुकुन मिमेट बेस पावरमते ह्य्यातिर इतदुना बारेमते केंजतन, अस्केटाल नना नावा पारतनाते मीकुन मति कीसेके, मीवाहाटी पेनदुक बस्केळ्ळक दन्यवाद वेहासेक मंनंतन.

17 अचोने आयाका मना सामि येसु किरिस्तुना पेन, इत्ते महिमाते निडिस मत्ता पेन बाबल, ओना बारेमते मिमेट इंका बेस एरपाट कियानाहाटी ओना पवित्र आत्माहेंदाल मीकु बुद्दि आनि बेस तेल्लिचकुननाहाटी तेल्लि हिथ्यिर इचि पारतना कीसेक मंतन.

18 अल्हेने, पेन मीकुन बद आसेताहाटी केयता? दाना पवित्र लोकुलुकुं अद हिथ्याना वारसानहक्कताल दोर्काना महिमाता दनम बल्हा मंता? इदुना बारेमते तेळियानाहाटी मीवा मनसुना वेळसि एल्यागोट्टे.

19-20 अचोने आयाका किरिस्तुन हामुरताल मर्रा जीवाते तेहाचि स्वर्गमते दाना तिना बाजुंक उपिचनेके पेन दाना पेद्दा ताकततुन हुपिस्ता. अथे मनम किरिस्तुन विस्वासम कियानोरम उंदि आयालयगुडा अदे पेद्दा ताकत दानागा मंता. पेनदा ताकत बस्केन मारो, इदुन पेन मीकु तेळियागोट्टे इचि नना विनंति कीसेके मंतन.

21 इद कालमतेन आयो गानि, मुन्ने वायाना कालमतेगुडा किरिस्तुनलेसी कदर आनि अदिकारम मत्तोर बोरे मन्नेर. इल्हा किरिस्तु दुनियाते मनना राज्येम कियाना अदिकारिलक, वेरे अदिकारालक, कळकुंक दिस्सुवव अनि ताकतकु आनि इंका अन्निटवुंकनना पेद्दोड आंदुर.

22 पेन इव अन्निटवुन किरिस्तुना कालुकुना हिळु कीसि, इव अन्निटवुनपोर्री ओन्क अदिकारम हीता. हीसि ओरे अन्निटवुना मुक्यल आयागोम इचि ओन कलिसियाकु हीसीता.

23 कलिसियायोर इत्ते किरिस्तुना मेंदुल आंदुर. ओना मेंदुलतुन ओर अनि तीरकुने, अनि पोल्लेने पुरागा निह्चि अन्निटतुन पुरागा कियानोरगुडा ओरे आंदुर.

2

पेनदा दयातेन मुक्ति दोर्कता

1 मुन्ने मिमेट तप्पु कबाहक कीसि, पापालक कीसि आत्माते हासि मत्तिर. गानि मीकुनगुडा किरिस्तु जीवाते तेहातेर.

2 मिमेट मुन्ने इद दुनियायोर ताकाना रीति-रिवाजकुन पीसि ताकिदिर. पोर्री वळिते तिरियना देय्यालुकुना मुक्यल बल्हा ताकिस्ते अल्हा ताकिदिर. इंदकेळ्ळगुडा पेनदा पोल्ले परकारम ताकवोर लोप्पो अद आत्मा कबळ कीसेके मंता.

3 मनम अंटीरमगुडा मुन्ने मना मेंदुलता आसेन परकारम पिस्सुंदुम, मेंदुल आनि मनसुना इच्चां पुरागा कियानाहाटी कराब विचारालक कीसेके, ओरा नड्डुम ओरालेसी ताकतोरमे आंदुम. पेनदुन बरोसा कियवोरा गुनम मत्ताप मना गुनमगुडा मत्तहेंका, मनम पेनदुक होंग वायाना पिस्वर पिस्सेक मत्तोम.

4 गानि पेन बच्चोने दयागल्लद आंद, अद दाना पेद्दा पावरमते मनाकुन पावरम कीता.

5 मनम तप्पु कबाहक कीसि हासि मत्तास्के मनाकुन अद किरिस्तुनतोनि जीवाते तेहाता. पेन कुर्पा कीताहेंकेन मीकु मुक्ति दोर्कता.

6 अचोने आयाका किरिस्तु येसुनतोनि मनाकुन जीवाते तेहाचि, स्वर्गमते ओनतोनि मनाकुनगुडा उपिस्ता.

7 इंका किरिस्तु येसुन मनाहाटी लोहचि मनाकुन वेल्लेन पावरम कीता. इल्हा पेन मनापोर्री लेक्का हिल्वच्चोन कुर्पा कीता, इदुन वायाना कालमते अंटीर्क ह्यसानाहाटी पेन अल्हा कीता.

8 पेन कुर्पा कीताहेंकेन मिमेट किरिस्तुनपोर्री विस्वासम कीतिर. मीवा विस्वासमतुन पीसि मीकु मुक्ति दोर्कता. इंदता मीवा क्यदाल जर्गतद आयो गानि पेन हीता वरम आंद.

9 इद कबाहकुनाहेंदाल दोर्कतद आयो, अदुनहाटी बोरे पोंगुडतनम वेहकुना मन्नि.

10 बारिल्ले, पेने मनाकुन पुट्टिस्ता. मनम किरिस्तु येसुनलोप्पो बेसता कबाहक कियाना इचि अद मनाकुन पुट्टिस्ता. अव बेसता कबाहक बव आंदुंगो अबुन पेन मुन्नेने तयार कीसि इरता.

येसुना लोप्पो मनम अंटीरम उंदे आंदुम

11 मिमेट यहूदि आयवोर इंचि मीवा कतना आयाहिल्ले. गानि बोरद अयते कतना मनकानाहेंदाल आतानो, ओर मोमोट कतना आतोरम, इंचि वेहकुंतुर. मीकुन बारे, कतना आयवोर, इंचि कारेड्डालक कीतुर. अदुनहाटी मिमेट बल्हा मनिदिरो अदुन मति कीम्ट.

12 अद कालमते मिमेट किरिस्तुनलोपो कलियका मत्तिर, मिमेट इस्राएल लोकुकक आयवाहेंका मीकु पेनदा नियमालक दोर्का हिल्ले, काराक कियाना बारेमते पेन हीता पोल्लेताल मीकुन लक्कु इरमळ जर्गता. मिमेट इद दुनियाते बदे आसे हिल्लुवा, पेन हिल्लुवा पिस्वर पिस्सेक मत्तिट.

13 मुन्ने मिमेट पेनदागटाल लक्कु मत्तिर. गानि किरिस्तुना नेत्तुरहेंदाल इंदके मिमेट किरिस्तु येसुना लोपो पेनदुक दग्गेरा आतिर.

14 बारित्ते, यहूदिलक आनि यहूदि आयवा मना नड्डुम मनाकुन वेरे कियानाहाटी पगातद उंदि गूरे मत्ता, अदुन कूलाह्चि मनाकुन इव्वुकुन कल्पतोर किरिस्ते आंदुर. ओनाहेंदाले मनाकु सांति दोर्कता.

15 यहूदिकुन आनि यहूदि आयवोर्कुन इव्वुकुनगुडा उंदगा कल्पिसि वरोर पूना मनकन पुट्टिस्ताप, अटोर्कुन उंदि कीतोर. इल्हा वेरे-वेरे आसि पिसानोर्कुन कल्पतोर. इल्हा ओर्कुन कल्पानाहाटी ओर ओना मेंदुलुन हीसि आदेसाल्कुना बव अयते यहूदिलकुना नियमालक मत्तांगो, अबुन नासडेम कीतोर. आनि मनाकु सांतिनुन हीतोर.

16 पजा ओर ओना जीवा कुसुनपोर्रो हीसि मना नड्डुम मत्ता पगातुन नासडेम कीतोर. इल्हा वेरे-वेरे आसि मत्ता मनाकुन उंदि मेंदुल कीसि पेनदा लोपो कल्पतोर.

17 किरिस्तु इद दुनियाते वासि, पेनदागटाल लक्कु आसि मत्ता मीकु आनि दग्गेरा मत्ता ओर्कु सांतिता बेसता कबूरतुन वेहातोर.

18 बारित्ते ओनाहेंदाले मनम इव्वुरमगुडा उंदे पवित्र आत्माते पेनबाबानगा होना परांतोम.

19 अदुनहाटी मिमेट इंदके परायतोर, वेरे देसेमतोर आयिर, गानि पवित्र लोकुकुकुनतोनि दंताते कूळसि मननोर आनि पेनदा लोता लोकुकुक आदिर.

20 अचोने आयाका प्रेरितुलक आनि पेनदा कबूरतोर पुनादिपोर्रो येसु किरिस्तुन मूला बंडालेसी इसिं दोहता लोह्कु मिमेटे आदिर.

21 पूरा लोन ओनाहेंदाले तयार आंता आनि सामिना लोपो उंदि पवित्र गुळि आयालय बेरसेकेन होंचंता.

22 अठे मिमेटगुडा पेनदा आत्माहेंदाल पेनदुक मनालय उंदि आसि जेगा तयार कीसेक मत्तिर.

3

मर्ममते मत्वव पेनदा पोल्ले पलाते अरमळ

1 मिमेट यहूदिलक आयिर. अयनागानि मीकु किरिस्तु येसुना बारेमता बेसता कबूर वेहताहाटी नना पौलुस, जेलने बंद मंतन.

2 पेन दाना कुर्पाता बारेमते मीकु वेहना जिम्मेदारि नाकु हीता इंचि मिमेट केंजसे मंदकिट.

3 पेनदा सत्तेम मोदाला मर्ममते मत्ता, गानि अदुन इंदके पेन नाकु बैय्यरा कीसि हुपिस्ता. इदुना बारेमते मीकु नना मुन्ने गिचचो रासि मत्तन.

4 अदुन मिमेट हदुवकिर अस्के किरिस्तुना बारेमता आ मर्ममता पोल्ले नाक बल्हा तेळियांता इंचि मिमेट एरपाट कीकिट.

5 आ मर्ममता सत्तेमतुन पवित्र आत्माहेंदाल पेन दाना प्रेरितुलकुंक आनि दाना कबूरतोर्कुंक इंदके बल्हा वेहतानो, अल्हा अस्केटा कालमता लोकुकुकुंक वेहमळ जर्गाहिल्ले.

6 आ मर्ममता पोल्ले बतल इत्ते, यहूदि आयवोर लोकुकुक बेसता कबूर केंजसि किरिस्तु येसुनपोर्रो विस्वासम इरतुर, अदुनहेंदाल ओरगुडा यहूदि विस्वासुलकुनतोनि कलियसि येसुनगा दोर्काना हक्कुने वारसदाक आतुर. इल्हा ओर उंदि मेंदुलतोर आनि पेन हीता पोल्लेते हिस्सादाक आतुर.

7 पेन दाना कुर्पाता वरम परकारम अद नाकु हीता ताकतहेंदाले नना ई बेसता कबूर वेहाना सेवाकुन आतन.

8 पवित्र लोकुकुकुना लोपो नना अटोर्कुना सिन्नोन आंदुन. अयना पेन नापोर्रो कुर्पा कीता. अद बतल इत्ते, किरिस्तुनगा लेक्का हिल्लुवा आसिर्वादालक मंतां, अदुना बारेमते यहूदि आयवोरगा होंचि वेहना वरम पेन नाकु हीता.

9 अन्निटतुन पुट्टिस्ता पेन, मोदोलताल मर्ममते इसिं मत्ता दाना पिलानतुन बल्हा पुरागा कीता, इत्तदुना बारेमते हरेक मनकंक कुल्ला-कुल्ला कीसि वेहनाहाटी नाकुन पेरता.

10 इंदके पोर्रो वळिते राज्यम कियाना सक्तिंक आनि अदिकारम ताकिचानलुक पेन दाना बच्चुंगो तीरकुना तेल्वितुन कलिसियाहेंदाल हुप्संता.

11 मुन्नेटाले पेन इल्हा कियाना विचारमते मत्ता. इंदके मना सामि किरिस्तु येसुनाहेंदाल पुरागा कीता.

12 किरिस्तुनपोर्रो विस्वासम इरताहाटी, इंदके वेरियाकोटा दैरनेमते पेनदा दगोरा होना परीतम.

13 मीहाटीं नाकु आयाना तकलिपकुन हळसि मिमेट पजोळ्क आयमट इंचि मीकु विनति कीसेक मंतन. नना अरंना तकलिपकुनाहेंदाल मीके कदर दोर्कता.

मनसुने किरिस्तु मननाहाटीं पौलुसना पारतना

14 इदुनाहाटीं गें नना पेनबाबाना मुन्ने टोंगरां ऊनसि पारतना कीसेके मनंतन.

15 सिराप ओनाहेंदाले स्वर्गमते आनि बूमिपोर्रो मनना हरेक कुटंबकु पोरोल इरमळ जर्गता.

16 पेनबाबाल ओना वेल्लेन कदरगल्ला महिमाता दनमतुन पीसि, ओना आत्मतोनि मीवा पिस्वरतुन लोप्पोटाल इरगा गाट्टिगा किस्थिर इंचि पारतना कीसंतन.

17 दीनहेंदाल मीवा विस्वासम परकारम किरिस्तु मीवा मनसुने जेगा पीसि मनंतोर. अस्के मरा हिहकु बल्हा बूमिटे लोप्पोळ्क होंचि मरातुन गाट्टिगा पीसि मनंतंगे, अल्हेन मिमेटगुडा पेनदा पावरमता पुनादिपोर्रो हिहकुनलेसी गाट्टिगा निल्सि मंदकिट.

18 पेनदा लोकल्लुकुनतोनि मीकुगुडा किरिस्तुना पावरमता नेरवुन, पोड्रुगुन, एल्लुन आनि लोतुन तेल्लिचकुनना ताकत दोर्कि.

19 अचोने आयाका, मना तेल्लितोनि मनम तेल्लिचकुना पर्रीम, असोंटा किरिस्तुना पावरमतुन तेल्लिचकुंचि, पेनदा गुनमते पुरागा निडिस होंटु, इंचि पारतना कीसेके मंतन.

20 इंदके पेन मना पिस्वरता लोप्पो दाना ताकत परकारम कबळ कीसेकेन मंता. इचोने आयो, मनम तल्लकानदुंकना, मनम विचारम क्रियानादानकन्ना एक्को, अद मनालोप्पो कबळ क्रिय्या परता.

21 कलिसियाते किरिस्तु येसुनाहेंदाल बस्केळ्क पीळि-पीळिनदाका पेनदुके कदर दोर्कि, आमीन.

4

येसु सामिना लोप्पो अंतोर कलियसि मनना

1 मीकुन पेन दाना लोकल्लुकु आयानाहाटीं केयता, अय्ते दाना लोकल्लुकु बल्हा अय्ते पिसानो अल्हा मिमेट पिस्सट इंचि, सामिनाहाटीं जेल्लुकु होल्लोन नना मीकु विनति कीसंतन.

2 दीना अर्तम बतल इत्ते, मिमेट सादा सिपल मनना, बोर बतल इनिनागानि ओप्के पीसि मनना, वरोंक-वरोर ओर्सकुंचेके पावरमते पिस्सट.

3 पेनदा पवित्र आत्मा मीकुन सांतिते उंदि क्रीता. अय्ते आ सांतिता एकतातुन मिमेट बेस कापाळसि इराना कोसिसते मंटु.

4 अंतोर विस्वासल्लुकुनद उंदे मेंदुल आंद. अय्ते मनना पवित्र आत्मागुडा उंदे आंद. अल्हे अंतोर विस्वासल्लुकुनगुडा पेन उंदे आसेते पिस्सालय केयता.

5 मना अंतोरा सामि वर्रो, मनम अंतोरम उंदे विस्वासम कीतोम आनि बापतिस्मागुडा उंदे बापतिस्मा एततोम.

6 मनाकु अंतोर्क वर्रो पेनबाबाल मंतोर, ओरे मना अंतोरा पोर्रो मंतोर, ओर मना नड्डुम मंतोर, अंतोरा नड्डुम ओरे मंतोर.

पेन हियाना वराल्क

7 गानि किरिस्तु, वेरे-वेरे कबाहक क्रियानाहाटीं, मनावेटाल वरो-वरोंक ओना पूरा मनसुनाल उंद-उंदि विसेस कुर्पाता वरम हीतोर.

8 अदुनहाटींगे ओना बारेमते दर्मसास्त्रमते इल्हा रासि मंता:

“ओर पोर्रो एल्लु एक्किसि होल्लोर, जेल्लेन मल्लोर्कुन दोहचि ओतोर,

मनकालोर्कुंक वराल्क हीतोर.”*

इंचि रासि मंता.

9 ओर, “पोर्रो एक्किसि होल्लोर” इत्ता पोल्लेता अर्तम बतल? दीना अर्तम, ओर बूमिता हिळ्ळदाकागुडा रेय्सि वातोर इत्तापे गदा!

10 बोर अय्ते हिळ्ळ रेय्सि वातोर, ओर बतले तक्को मनाकोटा अन्निटतुन पुरागा क्रियानाहाटीं अन्नि मब्बुकुंकना एल्लु जेगाते एक्किसि होल्लोर.

11-12 ओर, पेनदा सेवाहाटीं पवित्र लोकल्लुकुन तयार क्रियालय आनि किरिस्तुना मेंदुललेसी मनना कलिसियातोर्कुन बेस बक्त्तिते, बरोसाते बेसिंगोटनाहाटीं, इच्चुर्कुन प्रेरितुल्क, इच्चुर्कुन पेनदा कबुरतोर, इच्चुर्कुन बेसता कबुर वेहानोर आनि इकिच्चुर्कुन बारे पास्टर आनि कराहनोर इंचि पेर्सि ओर्कु वराल्क हीतोर.

13 दीनहेंदाल मनम अंतोरम पेनदा मर्रिना पोर्रोटा विस्वासम आनि ओना बारेमता जानकारिते उंदासि मंनंतोम. इंका बद्दे पोल्लेते आयि किरिस्तु बल्हा अय्ते बतले तक्को हिलाकोटा मल्लोर, अल्हेने मनमगुडा मना परंतोम.

14 इल्हा मत्ते बतल आंता इत्ते, बोर अय्ते आबद्दम, तप्पुड बोदां कराहचि मनाकुन विस्वासमता हरदाल तप्पालय ह्ळ्ळंतुरो, असंतोरा पोल्लेने अर्राकॉटा, वळिक्क हीके-हेके आयाकॉटा मनंतोम. इल्हा मुन्ने मनम सिना पिलाल्कुमलेह्का आयोम.

15 इंका पावरमते निजम वळ्कसेक, मना तल्लालेसी मना किरिस्तुना बेसतनम मनालोपो बेर्सि, मनम हेक पोल्लेते ओनालेसी आयागोम.

16 मेंदुल्ले मनना कील्कु-नर्राल्कु मेंदुल्ला वैरे-वैरे बागाल्कुन बल्हा अय्ते उंदान्कु-उंदि अंटीच्चि इर्रांतगों, अल्हे किरिस्तुना मेंदुल आसि मत्तोर्कुन ओर अंटीच्चि इर्रांतोर. मेंदुल्ला हेक बागम, मेंदुलतोनि कलियसि अल्लुना कबाहक अव बरोबर कतिने मेंदुल बेस बरोबर मनंता. अल्हेने कलिसियातोरगुडा वरोन-वरोर पावरमते ह्ळ्ळसेक, ओर्क पेन हीता कबाह्कुन बरोबर कति, ओर पेनदापोर्रांटा बरोसाते बेस बेर्रांतुर.

पेन हियाना पूना गुनाल्कुने बेस एद्गट

17 अदुनहाटीं सामिना पोरोल्लते नना मीक्क विनंति कीसि वेहानद बतल इत्ते, यहुदि आयवोर बल्हा ओरा बत्तक ओज्जुवा विचाराल्कुन परकारम ताकंतुरो, अल्हा मिमेट इंदकेटाल मर्रां ताकमट.

18 ओरा विचाराल्क बत्ताके ओज्जाकॉटा आतां. ओर्कु तेल्वि तक्को मत्ताहाटीं ओरा मनसु बंडालेसी गट्टिपळसोत्ता. अदुनहाटीं ओर पेनदुन तेल्विचकुना हिल्लुर. इल्हा पेन हिथ्याना पूना पिस्वरताल ओर्कुन लक्कु कियमळ जर्गता.

19 ओर्कु सिग्गु इत्तद बतले हिल्लुवाहेंका अन्नि तीरकुना कराब कबाहक कियाना लालचतेन ओर कूस मनंतुर.

20 गानि मिमेट किरिस्तुना बारेमते करियतस्के इसॉटा पोल्लें करिया हिल्लिर.

21 मिमेट निजमे किरिस्तुना बारेमता पोल्लें केंजतिर. अचोने आयाका येसुना बारेमता सत्तेमतुन, बल्हा मत्तद अल्हे करियतिर.

22 अय्ते मीवा पडाना पिस्वरते मत्ता गुनाल्कुन इंदके तेंडसि पोहाट. अव गुनाल्क मीलोपो कराब कबाहक कियाना आसे पुट्टिचि मीक्कुन पाडगीसि पोहांता.

23 मिमेट बतल अय्ते करियतिरो अदुन पीसि, मीवा आत्माते पूना गुनाल्क वासि मिमेट बेस एद्गट.

24 पूना गुनाल्कुन पेन दानालेह्का सत्तेमते तयार कीता, पवित्र कीता. अदुनहाटीं मीवा पडाना गुनाल्कुन होळसिसि पेन हियाना पूना गुनाल्कुने ताकट.

पेनदा आत्माकु दुक्कम हियमट

25 मनम अंतोरम उंदे मेंदुल्ला वैरे-वैरे बागाल्क आताहाटीं, इंदकेटाल वरोनतोनि-वरोर आबद्दम वळ्कमळ होळसिसि, हेरक मनकल सत्तेमे वळ्कगोम.*

26 होंग आम्टु गानि, पापम कियमट. पोळ्द अर्राका मुन्नेन मीवा होंग सल्लारगोम.*

27 मीवा पिस्वरते देय्यमतुन होळिया हियमट.

28 बोर अय्ते मुन्ने दोंगातनाल्क कियंतुर, ओर इंदके अदुन होळसियना. सतता कय्कुने कस्टम कीसि, बेस तरिकाते कमांचना. अस्केन, अक्सरम मत्तोर्क ओर सहायम किया पर्रांतोर.

29 मीवा तोळ्दाल बस्केन कराब पोल्ले पेयसानायो. केंजानोर्कुं कुर्पा दोंकिंसि, ओरा बक्तिते पायदा वायाना बेसता पोल्लेगे पेयसगोम. ओरा अक्सरमतुन पीसि मिमेट वळ्काना.

30 मुक्तिता रोजुनदाका, "ईर ना लोकुल्क" इंचि पेन मीपोर्रां उंदि सिक्का तंचि इर्ता. अदुनहाटीं मिमेट दाना पवित्र आत्माकु दुक्कम वायाकॉटा पिस्सट.

31 मिहगा मनना हेळाहना गुनम, पगा, होंग, वरगोयना बुद्दि, अपमानम कियाना बुद्दि इसॉटा अन्नि कराब गुनाल्क-पोल्लेन मिहागटाल लक्कु कीम्ट.

32 वरोनपोर्रां वरोंक जीवा नोसि बेस दया ह्पिचचेक, पेन बल्हा किरिस्तुनाहेंदाल मीवा तप्पुकुन मापि कीता, अल्हेन मिमेटगुडा वरोना तप्पुक वरोर मापि कीम्ट.

5

पावरमते पिस्सट

1 मिमेट पेनदा पावरमगल्ला पिलाल्क आंदिर, अदुनहाटीं पेन कीताप मिमेटगुडा कीम्ट.

2 किरिस्तु मनाकुन पावरम कीसि मनाहाटीं पेनदा मुन्ने मोक्कु आसि, पेनदुक नच्चना गुगलेमलेसी ओनद ओर बलि आतोर. अंदे पावरमते मिमेटगुडा ताकट.

3 मीवा नड्डुम बोगमतनमता बारेमते, अन्नि तीरकुना अपवित्र पोल्लेना बारेमते इंका आस्तिक संबंदिस्ता पोल्लेना बारेमते आयि, बस्केने उदुदुलि जर्गानायो. बारित्ते पवित्र लोकुकल इसोंटवुना बारेमते उदुदुलिगुडा किय्युर.

4 अचोने आयका रोता पोल्ले, तेल्वि तक्को पोल्ले, कराब कारेड्डालक मिमेट कियानायो, मीकु अव सोबांचों. मीवा तोळ्दाल सिराप पेनदुक दन्यवाद इनना पोल्लेगे पेयसगोम.

5 बारित्ते, बोगमतनम कियानोर, अपवित्र मनकल हिलाकोटे लालचि मनकल (लालचि कियमळ इत्ते, बोम्माना पूजे कीतापे आता) ईरुकु बोके आयि, किरिस्तुना आनि पेनदा राज्येमते वारसाहक्क हिल्ले, इंचि मीकु तेळियसे मता.

6 उतुतुता पोल्ले वळ्किंस मीकुन बोर्नना पोक्कते अरहानायो हुळ्ळट. बारित्ते इसोटा कबाहकुनहेकेन पेन दाना आदेस परकारम ताकवोरपोर्रो होंग हूपसंता.

7 अदुनहाटी मिमेट इसोटा लोकुकुकुनतोनि पोत्तु कियमट.

वेलगुने पिस्सट

8 उंदास्के मिमेट हीकटते पिस्सेक मत्तिर. गानि सामिनपोर्रो बरोसा इरताहाटी इंदके मीकु पेनदा वेलगु दोर्कता. अदुनहाटी वेलगुने पिस्सानोरा संतानमलेहका ताकट.

9 वेलगुने पिस्सते सिराप अन्नि तीरकुना बेसतनम, नीतितनम आनि निजम इवे दिसंतां.

10 इंका बतल कीते सामिकु कुसि दोर्कार, इंचि सामिन कूस कियाना विचारमतेन बस्केळ्ळक मंट.

11 अचोने आयका, बताके ओज्जुवा हीकटता कबाहकुने मिमेट पोत्तु आयमट. गानि असोटा कबाहकुन पलाते अरहट.

12 बारित्ते मक्किंस कियाना ओरा कबाहकुना बारेमते वळ्ळकमळगुडा पेदुदा सिगलसेटे आंदु.

13 गानि इसोटा पलाते अरता अन्नि कबाहक्क वेलगुने दिस अरंतां. अन्निटवुन दिस्सानाल कियानद वेलगु आंद.

14 अदुनहाटीगे मरि,

“अरे निद्राते मनानोना, हातोराबेटाल तेदसि उदुदा.

किरिस्तुना वेलगु नीपोर्रो मेसंता, ”*

इंचि रासि मंता.

बुद्धिदेते ताकट

15 अदुनहाटी मिमेट बल्हा ताकंतिर? परमेकां कीसि हुळ्ळट. बुद्धिद हिल्वोनलेसी ताकमट, बुद्धिद मत्तोनलेसी ताकट.

16 इव रोजुकु बेसतव आयों, इंचि दोर्कता हेरक मोकातुन बेसताहाटी वाळ्ळकुंट.

17 अदुनहाटी सामिना इच्चा बतल मंतानो, बेस एरपाट कीसि ताकट, बुद्धिद हिल्वोरलेसी मनमट.

18 इरगा कल उंचि उंगसेके मनमट, कल रिम्माते मीहिदाल पापम जर्गा परंता. कल उंचेके मनानदानकन्ना पवित्र आत्माते निडिसि मंट.*

19 इंकावरोनतोनि वरोर बस्केळ्ळक बक्ति पाटां, पेनदुन तलसकुनना पाटां, पेनदा पाटां पारसेके, सामिन मीवा मनसुने बस्केळ्ळक मति कीसेके मंट.*

20 अन्नि पोल्लेनाहाटी, मना सामि येसु किरिस्तुना पोरोलते मना पेनबाबांक बस्केळ्ळक दन्यवाद कीसेके मंट.

21 मनसुने किरिस्तुना बैरै ईर्सि वरोक-वरोर लोंगिस मंट.

मुत्तो-मुय्दोंक कोन्नि आदेसाल्क

22 मरमि आता मुरताहकुनिटा, बल्हा अय्ते मिमेट सामिकु लोंगिस मंतिटो, अल्हेन मिमेट मीवा मुय्दुर्कुंकगुडा लोंगिस मंट.*

23 बारित्ते, किरिस्तु बल्हा कलिसियाता तल्लालेसी मंचेके कलिसियातुन ताकसंतोर, अल्हेन मीवा मुय्दो मीकु तल्लालेसी मंतोर. कलिसियातुन पिसागोटनोरगुडा किरिस्ते आंदुर.

24 कलिसियातोर अंटोर बल्हा किरिस्तुंक लोंगिस मनांतुर, अल्हेने, मुत्तोहकगुडा अन्नि पोल्लेने अबुना मुय्दुर्कुंक लोंगिस मनागोम.

25 अय्ते ए मरमि आता मांडसुरिटा! किरिस्तु बल्हा कलिसियातुन पावरम कीसि, दानाहाटी ओना सतता जीवातुन हीतोर, अल्हेन मिमेटगुडा मीवा मुत्तोहकुन पावरम कीम्टु.

26 अस्के दान किरिस्तु, पेनदा पोल्लेतोनि* सक्कगा साप नोर्सि पवित्र कीतोर.

* 5:14 रोम 13:11-12; यसायाह 60:1 * 5:18 नीतिवचन 23:31-32; गलातिया 5:21-25 * 5:19 कुलुसि 3:16 * 5:22 कुलुसि 3:18; 1 पत्रु 3:1; उपपत्ति 3:16 * 5:26 पोल्लेतोनि इगे पेनदा पोल्ले उंदि एतसोदट इंचि अर्तम कीकुनना.

27 अस्के अद पवित्र आनि दोसेम हिलाकौंटा आंता. पजा दान बदे कसुरता डाग हिलुवा, पापमता मच्चा हिलुवा इंका बदे तपु हिलुवा जगाजगा मेर्सना कलिसिया कीसि, ओना दगैरा निल्हाकुंतोर.

28 अल्हेने मुट्कुंगुडा ओर ओरा मेंदुलतुन बल्हा पावरम कीतुर, अल्हेन ओर ओरा मुत्तोह्कुन पावरम कियगोम. सतता मुत्तोन पावरम कियानोर, सतातुनगुडा पावरम कीतोर.

29-30 बोरे मनकल बस्केने ओना सतता मेंदुलतुन ह्यसाकौंटा मनाहिल्लोर. दान्क बदुल ओर दान बेस ऊळगेम कीतोर. अल्हेन कलिसियातोर मनम अंटराम किरिस्तुना मेंदुलता वै-वैरे बागाल्क आंदुम. अदुनहाटी किरिस्तु ओना कलिसियातुन बेस हळकुंतोर.

31 इदुना बारेमते दर्मसास्त्रमतेगुडा,

“इदुनहाटीगे वरोर मांडुसा ओना तल्लुर-बाबोन होळसि,

ओना मुत्तोनतोनि कलियसि मनांतोर, ओर इव्वुर उंदे मेंदुल आसि पिस्संतुर,”

इंचि रासि मंता.✽

32 इद अत्ये उंदि पेदुदा मर्मम आंद. अयना नना अत्ये किरिस्तु आनि कलिसियाता बारेमते वेहचंतन.

33 बल्हैना बेसे! मीवाव्टेटाल हरेक मांडुसा, मीवद मिमेट सतातुन बचचोन पावरम कीतिरो, अचोने मीवा मुत्तोनगुडा पावरम कीम्ट. अल्हेने मुत्तोगुडा मुय्दोना कदर कियगोम.

6

पिलाल्क, तल्लुर बाबो बल्हा मनना?

1 पिलाल्कुनिटा, सामिना पोल्ले परकारम, मिमेट मीवा तल्लुर-बाबो वेहताप ताकट, इदे मीवाहाटी बेस.

2-3 बारिल्ले, “मिमेट मीवा तल्लुर-बाबोना कदर कीम्ट, अस्के मीकु अन्नि बेसे जर्गता आनि बूमिपोर्री मीवा आव्सुगुडा बेरसंता,” इल्हा दर्मसास्त्रमते रासि मंता. पेन हियाना पोल्ले कलियसि मनना मोदाटा आदेस इदे आंद.✽

4 बाबालोरिता! मिमेट मीवा पिलाल्कुंक होंग वाया हियमट. दान्क बदुल सामि वेहता हरदुन, पोल्लेन ओर्क कराहसेके ओर्कुन बेस पोस कीम्ट.✽

मालक आनि दासुड बल्हा मनना?

5 दासुल्कुरिता! इद बूमिपोर्रीटा मीवा मालकुल्कुना पोल्लेपोर्री मंट. मिमेट किरिस्तुना कदर कीताप, ओरदगुडा कपटम हिलुवा मनसुनल कदर कीसेके ओर्कु वेरियसि ताकट.

6 सिराप लोकुल्क कूस आयगोम इंचि हुप्सालय सेवा कियानोरलेसी मिमेट कियमट. दानकु बदुल, पेनदा इच्चा परकारम किरिस्तुना सेवा कियाना दासुल्कुनलेसी मनसु तासि कबळ कीम्ट.

7 मिमेट कियाना सेवा मनकानद आयो गानि सामिना सेवा आंद इन्कुंचि कुसिते कीम्ट.

8 कबळ कियानोर दासुडे आयिर, दासुड आयवोर आयिर! ओर कियाना बेस कबळतुन पीसि ओन्क सामिनाहेंदाल इनाम दोर्कता, इद मिमेट मति इर्राट.

9 मालकु्रिता! मिमेट मीवा दासुल्कुन वेरहळ-बेदरिचुळ कियमट, ओर्कुन बेस हळकुंद. मीवा इव्वुरागुडा मालक स्वर्गमते मंतोर. ओर सिन्ना-पेदुदा हळोर, इद मति इर्कुंद.✽

पेन हीता आयुदाल्कुन वाळकुंद

10 आकिरते नना वेहानद बतल इत्ते, सामिनतोनि ओना पेदुदा ताकतते उंदासि मंट.

11 देय्यमता ताकतता मुन्ने वेरियाकौंटा नित्तालय मिमेट पेन हीता अन्नि आयुदाल्कुन* वाळकुंद.

12 मना लडाइ मनकालोरा विरोदमते आयका, हीकट राज्यमतुन ताकसानोरा विरोदमते, हीकट राज्यमता अदिकारिल्लुकुना विरोदमते, हीकट राज्यमते मनना सक्तिना विरोदमते आनि मब्बुने दिस्सना दुस्ट सक्तिना विरोदमते मंता.

13 इंचि आ सेड्डा रोजकु वातस्के वेरियाकौंटा नित्तालय मिमेट पेन हीता अन्नि आयुदाल्कुन पीकुंद. अस्के मिमेट कियानद अन्नि पुरागा कीसि आकिरदाकागुडा नित्तिसि मना परकिट.

14 अदुनहाटी मिमेट सत्तेमतुन नडि पट्टालेहका दोहिचि, नीतितुन इनुम अंगिलेहका† मेंदुल्क केरसि,✽

15 साति हियना बेसता कबुरतुन वेहना तयारिता हेरपुह्कुन कालकुंक केरसि तयारते मंट.✽

✽ 5:31 उपपत्ति 2:24 ✽ 6:2-3 निर्गमन 20:12; व्यवस्ताविवरन 5:16 ✽ 6:4 व्यवस्ताविवरन 6:7; नीतिवचन 3:11-12; नीतिवचन 19:18; नीतिवचन 22:6 ✽ 6:9 व्यवस्ताविवरन 10:17; 2 इतिहास 19:7 * 6:11 आयुदाल्क विसेरे. † 6:14 इनुम अंगि इत्ते लडाइ कियनैके मेंदुल्क कसंटे कोहकतस्के कसेरे होळियाकौंटा केरन्द उंदि इनुमता अंगि. ✽ 6:14 यसायाह 11:5; यसायाह 59:17 ✽ 6:15 यसायाह 52:7; नहम 1:15

16 इव अन्निकन्ना मुक्केमातद बतल इत्ते, लडाइ कियनेके मिहगा डालुनलेहका‡ विस्वासम मनगोम. अस्के देय्यमताहेंदाल पोतसेके वायना अन्नि बानाल्कुन मिमेट आपा परकित.

17 इका मुक्तितुन हेल्मेटलेहका§ तल्लक कळास्सि, आत्माता कसेर इत्ते पेनदा पोल्लेतुन कसेरलेहका कय्दे पीकुंट.☆

18 अन्नि वेलाने पवित्र आत्माते बस्केळ्ळक पारतनां, विनति कीसेके मंट. इका अंटोर विस्वासुल्कुनाहाटी आगाकोंटा बस्केळ्ळक पारतना कीसेके मंट.

19 इका नना बस्के-बस्के अय्ते पेनदा पोल्लें कराहलय तोड्डिड तेहांतन, अस्के-अस्के नाकुंदि बेसता कबुर दोर्कालय नावाहाटीगुडा पारतना कीम्ट. दीनहेंदाल नना पेनदा बेसता कबुरते मत्ता मर्ममतुन वेरियाकोंटा वैरेतोक वेहा परकन.

20 दीनाहाटीगे नना कयकुंक बेडी वाटसि मत्ता पेनदा कबुरतोन आतन. दीनहेंदाल नना बल्हा अय्ते वळ्ळागोमो अल्हा वळ्ळकालय नाकु दैरनेम दोर्कानाहाटीं पारतना कीम्ट.

21 तुकिकुस इनना वरोर पावरमगल्ला दादाल मंतोर. ओर सामिना वरोर बेस विस्वासमगल्ला सेवक आंटुर. नना इगे बल्हा-बतल मंतन इंचि अन्नि पोल्लें मीकु वेहानुर.

22 मावा परिस्तिती बल्हा मंता इद मीकु तेळियागोम आनि मी अंटोरा जीवांक दैरनेम, सांति दोर्कगोम, इंचि नना ओन मिहगा लोहतन.

23 अंटोर विस्वासुल्कुंक पेनबाबाल आनि सामि येसु किरिस्तुनहेंदाल, सांति आनि विस्वासमतोनि पावरम दोर्कि.

24 मना सामि येसु किरिस्तुन बोर अय्ते आगाकोंटा पावरम कीत्तुर, ओर अंटोरतोनि पेनदा कुर्पा हमेसा मन्निकांटी.

‡ 6:16 डाल लडाइ कियनेके मुन्नेटा सिगाइ कसेटे तंतस्के ओना कसेटुन आपालय कय्दे पियानद उंदि वस्तु. § 6:17 हेल्मेट तल्लक देन्बा द्वाकाकोंटा तासकुनना उंदि वस्तु. इद कालमते लोकुलक मोटोर सायकलते होन्नेके तासकुंतुर. ☆ 6:17 यसायाह 49:2; इब्रि 4:12

पिलिपिया

पिलिपिया विस्वासुल्लुकं पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टितुन जेलने मत्तास्के पिलिपिया कलिसियातोरक रासतोर. जेलनाल पेय्सि बेसता कबूर वेहना कबळतुन मर्रा सुख कियना इंचि ओना आसे. इंका पौलुस इल्हा रासतोर गदा, “येसु किरिस्तु बोगांचतसोंटा तकलिपकु आनि इंदके नना बोगांचनसोंटा तकलिपकु, येसु किरिस्तुनपोरों विस्वासम इरताहाटी मीकगुडा वायावचचु. असोंटस्के किरिस्तुनपोरों विस्वासम इरताहाटी दोर्कता तकलिपकुन पेनदा आसिर्वाद इनकुंद,” इंचि रासतोर.

पौलुस इद सिट्टि रासता इंकुदि कारनम बतल इत्ते, पिलिपियाते, “मूसाना नियमकु वेहताप ताकट, हिलाकोटे मीकु मुक्ति दोर्को,” इंचि तप्पुड बोदां कराहनोर मत्तूर. ओरा कराहमळ पौलुसुंक इस्टम हिलाका, “नय्कुनलेहका मुचनोरगटाल हुसारते मंट,” इंचि वेहालय पौलुस इद सिट्टि रासतोर. अचोने आयका कस्टाल्क, दुक्काल्क वायिनागानि किरिस्तु हुपिस्ता हरदेने अंतोर विस्वासुल्क कलियसि कुसिते ताकना इंचिगुडा पौलुस रासतोर.

बगा बतल मंता

जोहार आनि परिचयम 1:1-11

पौलुसना सतता परिस्तिती 1:12-26

किरिस्तुनतोनि पिस्सना पिस्वर 1:27-2:18

तिमोति आनि इपपरदिसुनाहाटी पिलानकु 2:19-30

पुगातोरगटाल जेगतां मनना बारेमते 3:1-4:9

पौलुस आनि पिलिपियाता ओना दंटागाहक 4:10-20

आकिरता बोदां 4:21-23

पिलिपिया कलिसियातोरक पौलुसना जोहार

1 पिलिपिया सहरते येसु किरिस्तुना लोप्पो मनना पेनदा अंतोर पवित्र लोकुल्लुकं, पेदु दाल्लुकं आनि अदिकारिल्लुकुनाहाटी नना पौलुस, नावा दंटातोर तिमोति, मोमोट येसु किरिस्तुना सेवाकुल्लुकुम इद सिट्टि रासेक मंतोम.

2 मना पेनबाबानाहेंदाल, मना सामि येसु किरिस्तुनहेंदाल मीकु कुर्पा, सांति दोर्किं.

पौलुसना पारतना

3 मीकुन नना बस्के-बस्के अयते मति कीतन, अस्के-अस्के पेनदुक दन्यवाद कीतन.

4-5 बेसता कबूर केंजसि विस्वासम कीता रोजुनाल अयते इदवेरदाकागुडा बेसता कबूरतुन वेहना नावा कबळते मिमेट नाकु तोळ मतिर. अदुनहाटी नना बस्के-बस्के अयते पारतना कीतन अस्के-अस्के वेल्लेन कुसिते मीवाहाटी पारतना कीतन.

6 मीवा नड्डुम इचोचो बेसता कबळतुन पेने सुख कीता. इद कबळ पुरागा आयनदाका, इत्ते येसु किरिस्तु मर्रा तिरियसि वायना रोजुनदाका पेने इद कबाटुन ताकिचचेक इरता इंचि नाकु पुरागा बरोसा मंता.

7 नना मीवा बारेमते इल्हा विचारम कियमळ बेसे आंद. बारित्ते, नना जेलने मत्तस्के आयि, बेसता कबूर वेहचि अवे मत्ता निजमतुन हुपिचि कापाळसेके तिरियतस्के आयि, इव अन्निटवुने पेनदाहेंदाल कुर्पा दोर्कता, अवुने नावातोनि मिमेटगुडा तोळ मतिर. अदुनहाटी मिमेट इत्ते नाकु वेल्लेन पावरम!

8 किरिस्तु येसुनलेसी ननागुडा मीकुन पावरम कीतन, इंचि नावा जीवा मीकुन हळानाहाटी बस्केळ्क तनलाळंता. दीनकु कुदुदु पेने गवाइ मंता.

9 मीवा पावरम बेस बेरस्सेक मनना, पेनदाहेंदाल मीकु बुद्धि, मंचि-सेड्डातुन एरपाट कियना तेल्चि बेरसना इंचि नना बस्केळ्क पेनदुक पारतना कीसेक मंनंत.

10 दीनहेंदाल मिमेट मंचि-सेड्डातुन एरपाट कीसि बेस पिस्वर पिसकिट. अस्के किरिस्तु वातस्के मिमेट अंतोरगुडा ओना मुन्ने नीतिमंतुल्क आनि दोसेम हिलवोर आसि निलकिट.

11 मीवा पिस्वरते येसु किरिस्तु मत्ताहाटी, मिमेट बस्केळक नीति कबाहके कीसेक मंदना. दीनहेंदाल पेनदा पोरोल, कदर वेल्लेन बेरस्सेक दांता.

बेसता कबुर बेर्सताहाटी पौलुसना कुसि

12 नावा विस्वासुल्कुनिता! मिमेट उंदि पोल्ले अर्तम कीकुंट, नावा पिस्वरते जर्गता अन्नि गटनां किरिस्तुना बारेमता बेसता कबुर बेरसालये सहायम आतां.

13 इल्हा जर्गताहेंकेन, किरिस्तुनाहाटीगे नाकुन जेलने वाटतुर इंचि राजवाडाते कावेल कियना अंटोर सिपाइल्कुंक आनि अगा मत्ता अंटोर लोकुल्कुंक तेळियसोल्ता.

14 इचोने आयका, नना जेलने मत्ताहेंका सामिनाहाटी वेल्लेन मंदि विस्वासुल्कुंक दैरनेम दोर्कता. ओर बोर्के वेरियाकोंटा वेल्लेन दैरनेमते किरिस्तुना बारेमता पोल्लेतुन वेहालय तयार आतुर.

15 अक्टेटाल इच्चुर कळक पोत्सि, नावा पोरोटा पगा तीरिचकुनालय किरिस्तुना बारेमते वेहचंतुर, इंका इच्चुर बारे बेस उदुदेसमते वेहचंतुर.

16 बेस उदुदेसमते वेहानोर, नावा पोरोटा पावरमहेंका अल्हा कीतुर. बारित्ते येसु किरिस्तुना बारेमता बेसता कबुर सत्तेम आंद इंचि हुप्सालये नना इगे मंतन इंचि ओर्क एरपाट मंता.

17 गानि नापोरो कळक पोत्सि, किरिस्तुना बारेमता पोल्लेतुन वेहना लोकुल्क मात्रम नना जेलने मननेके नाकु इरगा तकलिप आयागोम इंचि, ओरा सतता पायदाहाटी अल्हा कीसंतुर.

18 अयना बतल आयो. बेस उदुदेसमते आयि, कराब उदुदेसमते आयि, अद बल्हे आयि! किरिस्तुना बारेमतेन वेहमळ जर्गसंता इंचि नाकु वेल्लेन कुसि आसंता. आनि नना इल्हेन कुसिते मंतनत.

19 बारित्ते मीवा पारतनां अल्हेन येसु किरिस्तुना आत्माता सहायमतोनि नाकु वायना ई कस्ताल्के नाकुन तप्पाकोंटा पलाते पेचहांतां इंचि नाकु एरपाट मंता.

20 नाकु बसोटा परिस्तिति वायिना सिग्गु अर्नीन, नना इदवेरादाका दैरनेमते किरिस्तुना सेवा कीतन, अल्हेने इंदकेगुडा कीसेक मंतन. नना हायिना-पिस्सिना नावा पिस्वरताहेंदाल किरिस्तुना पोरोलतुन अंटोर कदर कियगोम इंचि नना वेल्लेन आसेते एदुर हळसेक मंतन.

21 बारित्ते नना पिस्संतन इत्ते किरिस्तुनाहाटीगे. नना हायिनागानि किरिस्तुनगेन दांतन इंचि हामुरगुडा नावा पायदातदे आंद.

22-23 इव रोंडुन नड्डुम नना इरगा अचाहताप आतन. नना पिस्सि मत्ते पेनदाहेंदाल इनाम दोर्कनलायक बेस कबळ किया परंतन. इल्हा नना हामुरतुन पेरकाना मरि पिस्वरतुन पेरकाना नाकु बतले तेळियसेक हिल्ले. नाक अयते इद मेंदुलतुन होळसि किरिस्तुनगेन होंचि मंदकन बारे अनपिच्चंता. बारित्ते इदे बच्चोनी बेस.

24 गानि नना मीवाहाटी, पिस्सि मनमळ वेल्लेन अक्सरम.

25 नना पिस्सि मंचि, मिमेट विस्वासमते बेस गाट्टि पळना इंका मीवा पिस्वरते मीकु बेस कुसि दोर्कनाहाटी सहायम कीसेके मीवातोने मनंतन इंचि नाकु पूरा बरोसा मंता.

26 इल्हा नना बस्के अयते मरां मिहगा वांतोने, अस्के सामि नावाहेंदाल बतल-बतल अयते कीतोर अवन केंजसि मिमेट येसु किरिस्तुन वेल्ले कदर हीकिट.

बेसता कबुरते वेहताप पिसालय पौलुसना विनंति

27 बद बतले आयि, मीवा पिस्वर मात्रम किरिस्तुना बेसता कबुरते मत्ताप मनना. अस्के बतल आंता इत्ते, नना मिहगा वायिना, वायाकोन्ना मिमेट अंटोर उंदे आत्माते गाट्टिगा बेस मंतरि आनि बेसता कबुरहाटी अंटोर कलियसि पिस्सेक मंतरि इंचि बैरोतारा हेंदाल नना केंजना.

28 बदे पोल्लेक आयि, बेसता कबुर वेहते तकलिप कियानोर्कुंक मिमेट वेरियमट, दैरनेमते मंट. मीवा दैरनेमतुन हळसि, मोमोट नासडेम आंतोम, पेन ओर्कुन कापाळंता इंचि तकलिप कियानोर्कुंक तेळियंता. इद पेनदा कबळे आंद.

29 सिराप किरिस्तुन विस्वासम कियालये आयो गानि ओनाहाटी तिप्पल्क अरालयगुडा पेन किरिस्तुनहेंदाल मीकु आसिर्वाद हीता.

30 नना अरता तिप्पल्कुन मिमेट हळतिर, इंदके केंजसतिर आनि मिमेटगुडा अदे तिप्पल्कुने मंतरि.

1 किरिस्तुनतोन कलियसि मीवा दैरेनेम बेर्सता, ओना पावरमहेंदाल मीकु समादानम दोर्कता, मिमेट ओना आत्मते उंदि आतिर, इंका ओना दया मीतोनि मंता.

2 इव अन्नि पोल्लेँ निजमे गदा! अत्ये मीवा अंतोरा विचाराल्क बस्केळ्क उंदे मन्निकांटी, मिमेट वरोंक-वरोर उंदच्चोने पावरम कीम्टु, मीवा अंतोरद उंदे मनसु, उंदे उद्देसम मनना. इल्हा पिसतिरित्ते नना निजमते पुरागा कूस मंनंत.

3 सतता पायदाताहाटी आयि, पेद्दातनम हुप्सालय आयि बदे कबळ कियमट. गानि वेंरेतोरा कदर कीसेके मनम कुद्दु ओरा मुन्ने सिन्नोड आसि मनना.

4 बोरें आयिर, सिराप सतता इस्टाल्कुना बारेमतेन आयो, गानि वेंरेतोरा बारेमतेगुडा विचारम कियगोम.

येसु सामिनलेसी सिन्नागासि पिस्सना

5 येसु किरिस्तुना गुनम मत्तापे मीवा गुनमगुडा मनना.

6 ओर अत्ये कुद्दु पेने आंदुर, अयना पेनदालेसी मनना विचारमगुडा किया हिल्लोर.

7 दान्क बदुल ओर ओनगा मत्ता अदिकाराल्कुन होळ्सीतोर. होळ्सीसि वरोर दासुनलेसी आसि मनकन रूपमते इद बूमिपोर्रो पुटतोर.

8 इल्हा मनकना रूपमते पुटसि ओनद ओर सिन्गा कीकुत्तोर. इच्चोने आयका पेनबाबाना इच्चातुन पूरा कियालासि कूसुनपोर्रो जीवातुनगुडा हीतोरे.*

9 अदुनहाटी पेन ओन अन्निटवुंकनना पेद्दोड कीसि ओना पोरोल्लुन अन्नि पोरोलीकनना पेद्दा कीता.

10 बारित्ते, मब्बुन पोरोटव, बूमि पोरोटव, बूमि हिळतव अन्नि येसुना मुन्ने टोंगरां ऊनसि ओन्के मोळ्काना.

11 इंका “येसु किरिस्ते सामि आंदुर,” इंचि हरेक नाल्के ओक्कुनगोम. इल्हा पेनबाबाक कदर दोर्कना इंचि अल्हा कीता.

इद बूमिपोर्रो वेडसीलेसी पिस्सट

12-13 अदुनहाटी नावा पावरमगल्ला विस्वासुल्कुनिटा! नना मीकु वेहनद बतल इत्ते, नना मीवातोनि मत्तस्के बस्केळ्क मिमेट नना वेहतापे ताकतित. इंदके नना मीवातोनि हिलाकोनना गानि अस्केटदानकनना एक्को जेगतांति सामिना आदेसकुन पीसि ताकट. पेनदा इच्चा परकारम बतलनना कीकुनगोम इंचि मीवा मनसुने वाता इत्ते, अद इच्चा पेने मीवा मनसुने वाटता. अदुन पूरा कियालय गावाले मत्ता ताकतगुडा मीकु पेने हीता. इंचि पेनदुन बेस कदर कीसेके, वेंरे कोद्दिगा पेन हीता मुक्ति परकारम मत्ता कबाहक कीसेके पिस्सट.

14 बद कबळ कियिनागानि गुल्गाकोटा, जगडम कियाकोटा कीम्टु.

15 अस्के मिमेट बतले दोसेम हिलवा बेस लोक्कुल्क आकित. तप्पुड कबाहक किययाना ई दुनियाता लोक्कुल्लुना नड्डुम आनि पापि लोक्कुल्लुना नड्डुम मिमेट बतले दोसेम हिलवोर आसि पेनदा मर्क-मियाहकुनलेसी मंदकित. इंका मिमेट हीकटते पिस्वर पिस्सना लोक्कुल्लुना नड्डुम पोल्तना वेडसीलेसी दिसकित.

16 पिस्वर हियना पेनदा पोल्लेतुन गट्टिगा पीसि ताकट. इदुना हेंदाल किरिस्तु वायाना रोजुने, मीवाहाटी नना कीता कस्टम, वितलाटा एर्तम आयाहिल्ले इंचि कुसिते वेहंतन.

17 पेनदा सेवा कियनाहाटी मिमेट उंदि मोक्कुनलेह्का आसि वेल्लेन तिप्पल्क अरसंतिर. इदंता मीकु पेनदापोर्रो वेल्लेन विस्वासम मत्ताहेंका आसता. अदुनहाटी इसोटा मीवा मोक्कुनतोन नावा जीवा हीसि नेत्तुर वारागिच्चालयगुडा नना पजोळ्क होन्नोन, गानि वेल्लेन कूस मंनंत.

18 इल्हा मिमेट इरगा कूस मंनु, मीवातोनि ननागुडा कूस मंनंत.

तिमोति आनि इपपरदिस ईर बेस सेवाकुल्क आंदुर

19 तिमोतिन मिहगा बिरानेन लोहकन इंचि नना सामि येसुनाहेंदाल आसे पळसंतन. ओर मीवा बारेमता कबुर नाकु वासि वेहनुर, अस्के नाकु इरगा कुसि आयार.

20 मीवा बेसताहाटी मनसुनाल चिंता कियानोर नहगा ओन्क तप्पा वेंरे बोरें हिल्लोर.

21 अंतोर ओर-ओरा कबाहकुने मुळ्गिसि मंतुर, येसु किरिस्तुना बारेमते विचारम कियानोर बोरें हिल्लोर.

22 गानि तिमोति असंतोर आयोर. वरोर मरि बाबनतोन कलियसि कबळ कीताप, ओर बेसता कबुर वेहना सेवते नावातोनि इमानदारिते कस्टपळतोर. ओना गुनम बसंतदो मीकु बेस एरपाट.

23 जेलनाल नाकुन होळ्सीतुरो, होळ्सीतुरो इद पोल्ले तेळियतारित्ते ओन नना मीहेके लोहकन इंचि आसे पळसंतन.

24 ननागुडा बिरानेन मिहगा वांतन, इंचि सामिनपोर्रो नाकु पुरागा बरोसा मंता.

* 2:8 पेद्दा-पेद्दा तप्पुक कीतुकुंके ई कूसता सिक्सा हीत्तु.

25-26 नाकु अक्सरम अरतस्के सहायम कियनाहाटी मिमेट इपपरदिसुन नाहेके लोहतिर. बेसता कबुर वेहनेके वरोर सिपाइन लेहका ओर नावा तोळ मत्तोर आंदुर, ओर नावा तम्मनुसंतोर आंदुर. गानि ओन मरा मीहेके लोहना इंचि नावा मनसु मंता. मीकुन ह्ळालय ओर इरगा गाबर आसंतोर. ओर बिमार अरता संगति मिमेट केजतिर इंचि ओन्क तेळियतस्के ओर वेल्लेन नाराज आतोर.

27 ओर बिमार अरिं हायानाल आसि मत्तोर इद निजमे! गानि पेनदा दया ओनपोर्रो मत्ताहेका ओन्क बतल आयाहिल्ले. ओर बिमारताल बेस आयाकोटा मंचि मत्ते, नावा दुक्कम इंका बेरसि मनवळ इंचि पेन नावा पोरोगुडा दया हूपिच्चि ओन बेस कीता.

28 अय्ते ओन मिहगा बल्हैना लोहना इंचि नना विचारम कीतन. ओर मिहगा वाते मिमेट ओन ह्ळसि कूस आकिट, अस्के नावा चिंतागुडा तक्को आंता.

29-30 मिमेट नावाहाटी क्रिया पर्वा सेवातुन ओर ओना जीवाक तेगिचि पूरा कीतोर. किरिस्तुना कबळतुन पूरा कियनाहाटी ओर हायालय आसि मत्तोर. अदुनहाटी ओर मिहगा वातस्के मावा दंटाता विस्वासि इंचि सामिना पोरोलते मिमेट ओन बेस कल्पकुंट. ओनालेसी सेवा कियना हरेक मनकना बेस कदर कीम्टु.

3

विस्वासमतेन नीतिमंतुल्क आया परांतुर

1 विस्वासुल्कुनिटा! आकिरते नना इंकुंदि मल्का वेहांतन, पेनदापोर्रोटा मीवा विस्वासमते मिमेट कूस मंट. रासता पोल्लेंगे ऊके-ऊके रासालय नाक बतल तकलिप आयो. बारित्ते इव पोल्लें मीकुन तप्पुड बोदानाल कापाळंतो.

2 अदुनहाटी तप्पुड कबाहक कियना नयकस्केल गुनमतोरगटाल जेगर्ता मंट. कतना* रिवाज कीतन नीतिमंतुल्क आंतुर इंचि ओर कराहंतुर.

3 गानि मनकालोरा कबाहकुनपोर्रो बरोसा इरताहेका मनाकु मुक्ति दोर्कता इंचि आयो. येसु सामि मनाकुन पिसागोटतोर इंचि ओन्क मनम बस्केळक कदर हींतोम. अदुनहाटी पेनदा आत्मा वेहताप दान मोळकानोरम मनमे निजम कतना आतोरम आंद, ओर आयुर.

4 बोर्नागिंटा सतता कबाहकुनपोर्रो बरोसा इरसि पोंगसेके तिरियानय्ते, नावा कबाहकुनपोर्रो बरोसा इरसि पोंगालय ओनकन्ना एक्को कारनाल्क नहगा मंता.

5 अद बल्हा इत्ते, नना पुट्टा एनिमिदि रोजकुंके नावा कतना आता, नना इम्राएल देसेमते पुट्टा पिच्चर यहदि जातितोन, बेजामिनना गोत्रमतोन आंदुन, मूसाना नियमकुन उंदि पोल्लेगुडा तप्पाकोटा पीसि ताकाना परिसिल्कुना गुंपुनोन आंदुन, इब्रानि कुंटबते पुट्टा इब्रानि मनकन आंदुन.

6 जोसने वासि, नना कलिसियातुन वेल्लेन तकलिप कियुंदुन. इंका मूसाना नियम परकारम नीतिते ताकमळते अय्ते नना बदे तप्पु किया हिल्लेन.

7 इव अन्नि पोल्लें नाकु वेल्लेन पायदातव इंचि नना मुन्ने इनकुनुंदुन. गानि इंदके किरिस्तु नावाहाटी कीतदुन मुन्ने, अव अन्नि एर्मे इंचि नाक तेळियसोत्ता.

8 अचोने आयाका, नावा सामि येसु किरिस्तुन एरपाट कीतदे पेद्दा पोल्ले आंद. कळमतव अन्नि अट्टि पोल्लेंगे, येसु किरिस्तुन दोर्किचकुनालय अव अन्निन नना लेक्का किय्योन कचरा इनकुंतन.

9 इंका किरिस्तुनतोन उंदि आसि मनमळे नावा उदुदेसम. मूसाना नियमपोर्रो बरोसा कीसि नीतिमंतुड आया पराहिल्लेन, गानि किरिस्तुनपोर्रो विस्वासम कीताहाटी पेनदा नदरते नीतिमंतुड आतन.

10-11 येसु किरिस्तुन आनि ओर हासि मरा जीवाते तेदता ताकततुन तेलपिचकुनना इंचि नाकु मंता. ओर बोगांच्ता तकलिपकु आनि हामुरतुनगुडा बोगांचि, ओनलेह्केन नाकु आयगोम. बल्हा अय्नागानि उंदि रोजु पेन नाकुन हामुरताल जीवाते तेहंता इंचि नावा आसे.

पेनदा इनामतुन दोर्किचकुनालय वित्सेक मनना

12 पोरो बव पोल्लें अय्ते रासतन, अव नावा पिस्वरते पूरा आतां इंचि वेहोन. अगा एवतन इंचि इनोन, गानि बगा एवालय अय्ते किरिस्तु नाकुन पीतोर, अगा एवालय नना वित्सेक मंतन.

13 विस्वासुल्कुनिटा! नना अगा एवतन इंचि विचारम किय्योन, गानि इद कबळ कीतन. पज्जे जर्गता पोल्लेन मति मरंम्सि, मुन्ने जर्गना पोल्लेन अंदकुनालय वित्सेक मंतन.

* 3:2 कतना यहदि आनि मुसलतन लोकुकुन्द उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इंसंटा रिवाज कीते पेनतोन करार कीताप इंचि ओर नम्मंतुर.

14 स्वर्गमतगा एवानोर्कुंके पेन बद इनाम हीतन इंचि केयता, अद इनामतुन येसु किरिस्तुनाहेदाल दोर्किच्छुकुनालय नना वित्सेक मंतन.

15 अदुनहाटी मना लोपोटाल विस्वासमते बेस बेसंतोरम मनम अंटोरम, इव अन्नि पोल्लेना बारेमते उंदासि मंदकोम. ओक्कला बद्दना पोल्ले बारेमते मीवद वैरे बतलन्ना विचारम मल्ले, अदुनगुडा पेन मीकु समजांचि वेहंता.

16 अय्नागानि मनम मात्रम पेन मनाकु इदवेरादाका हुपिस्ता सल्लेमतुन पीसे ताकसेक मनना.

17 विस्वासुल्कुनिटा! मिमेट अंटोर उंदासि, नना ताकतापे ताकट. इंका मोमोट वेहताप बोर अय्ते ताकसंतुरो, ओर्कुन हूळसि मिमेट करियट.

18 बारित्ते वेल्लेटुर लोकुकल किरिस्तु कूसुनपोर्री हातोर इत्ता पोल्लेक विरोदमते ताकसेक मंतुर. ओर किरिस्तुना कूसता पगातोर आंदुर. ओरा बारेमते नना मीकु बच्चुगो मल्लां वेहतन, इंदकेगुडा अळसेके वेहासेक मंतन.

19 आकिरते ओर नासडेम[†] आयानुर, ओरा पिस्वर पीटाहाटीगे. सिग्गु होनना कबाहक कीसेके ओर पेदूदातनम वेहकुंतुर. दुनियाता पोल्लेन पॉरेन ओरा मनसु मंता.

20 गानि मनम अय्ते ई दुनियाता लोकुकुकुम आयोम, मनम स्वर्गमता लोकुकुकुम आंदुम. अगाटाले मनाकुन पिसागोटानोर सामि येसु किरिस्तु वांतोर इंचि मनम ओना एदुर हूळसेक मंतोम.

21 अनित्तुन ओना कयदा हिळु ईरना ताकत ओनगा मंता. ओर वातस्के आ ताकततोने मना नासडेम आयाना इद मेंदुलतुन बदलांचि ओर हासि तेदतस्के ओन्क दोर्कतसोंटा महिमाता मेंदुललेसी कियानुर.

4

बस्केळ्ळ कूसिते मनना बारेमते पौलसु कराहंतोर

1 अदुनहाटी विस्वासुल्कुनिटा! मिमेट सामिना विस्वासमते गाट्टिगा मंट. मीकुन हूळगोम इंचि नावा जीवा बच्चोरो तनलाळसेक मंता. नावा पावरमतोर मिमेटे आदिर. किरिस्तु वातस्के, नना नावा कबळ महतन इंचि हुप्सानोर मिमेटे आदिर.

2 सुवादिया, सुंतुके अक्काहकुनिटा मिमेट येसु किरिस्तुनोर आदिर, अदुनहाटी मिमेट जगडालक होळसि सामिना लोप्पो उंदि मनसुने मनना इंचि नना विनंति कीसंतन.

3 नावा दंतातोना! अव रोंड मुर्ताहक जगडालक होळसि उंदासि मनालय निमे सहायम कीम इंचि नीकु विनंति कीसेक मंतन. बारित्ते किलेमेन्स आनि नावातोनि कबळ कियानोरतोनि कलियसि अव रोंड मुर्ताहक बेसता कबुर वेहालय वेल्ले कस्टपळतां. अल्हा कबळ कियानोरा पोरोलक पेनदागा मनना बस्केळ्ळक पिस्सना पिस्वरता पुस्तकमते रासि मंता.

4 मिमेट सामिना लोप्पो बस्केळ्ळक कूसिते मंट, नना मर्रा इदे पोल्ले वेहासेक मंतन मिमेट बेस कूसिते मंट.

5 मिमेट सादा-सिपलतोर इंचि अंटोर्क तेळियनाल पिस्सट, बारित्ते सामि वायाना वेला दग्गेरा मंता.

6 बदे पोल्लेक पिकिर कियमट, गानि अन्नि पोल्लेनहाटी पेनदुक पारतना कीसि मीवा अब्बरमतुन वेहाट, दय्यवाद कीसि दान तलकट.

7 अस्के बोर अर्तम किया परवसोंटा सांतितुन पेन मीकु हीता. मिमेट येसुनोर आताहाटी अद सांति मीवा मनसुन, विचारालुकुन बेस कापाळसि ईरता.

8 विस्वासुल्कुनिटा! आकिरते इंकुदि पोल्ले वेहानद मंता. अद बतल इत्ते, बव पोल्लें अय्ते सल्लेम, तल्लसकुननालायक मंता, अव पोल्लेना बारेमतेन विचारम कीसेक मंट. इत्ते, बरोसालायक पोल्लें, कदरलायक पोल्लें, नीतिता पोल्लें, पवित्र पोल्लें, कूसिता पोल्लें, सोबांचना पोल्लें इवे पोल्लेना बारेमते विचारम कीसेके मंट.

9 मिमेट नावाहेदाल करियसि दोर्किच्छुकुता पोल्लें, केजता पोल्लें, आनि हूळता कबाहक इव मत्ताप ताकट. अस्के सांति हिथना पेन मीकुन कापाळता.

पिलिपिया कलिसियातार्क पौलसुना जोहार

10 मिमेट मर्रा उंदि मल्ला नावा बारेमते विचारम कीसि नाक सहायम कीतिर. अदुनहाटी नना सामिना लोप्पो वेल्लेन कूस मंतन. इल्हा सहायम कियना इंचि मिमेट मुन्नेन विचारम कीसि मत्तिर, गानि मीकु मोका दोर्काहिल्ले.

11 नाकु बदनदो अब्बरम मंता इंचि नना इल्हा इंचेक हिल्लेन. बारित्ते बसोंटा परिस्तिती वाथिनागानि कूसितेन पिसमळ नना करियतन.

12 बतले हिलवस्के बल्हा पिस्सना, मत्तस्के बल्हा पिस्सना इद इंका नाक तेळियता. बसोंटा वेला वाथिना, बसोंटा परिस्तिती वाथिना, कर्वेसि मनिना, पीर निडिस मनिना, वेल्ले मत्तस्के बल्हा मनना, तक्को मत्तस्के बल्हा मनना इव अन्नि नना करियतन.

† 3:19 नासडेम नासडेम इत्ते, नरकमते बस्केळ्ळक पोतना तळमिंते मंचि तनलाळसेक मनमळ.

- 13 किरिस्तु नाक ताकत हीसेक इंचि, बसोंटा परिस्तिति वायिनागानि नना अन्नि किया परांतन.
- 14 बतलन्ना आयि, मिमेट नावा तकलिपते सहायम कीतिर, बेस कीतिर.
- 15 नना सुखुने बेसता कब्रु वेहचि मेसिडोनिया इनना मीवा एरियाताल होत्तन. अस्के मिमेट पिलिपियाता विस्वासुल्क तप्पा, वैरे बदे कलिसियातोर नाक सहायम किया हिल्लुर. इद पोल्ले मीकु एरपाटे.
- 16 इल्हेने नना बस्के अयते तेसलोनि सहरते मत्तन, अस्केगुडा अक्सरम मत्तस्के नाक मिमेट वेल्लेन मल्कां सहायम कीतिर.
- 17 नाक मीहेंदाल सहायम गावाले इंचि आयो, गानि मिमेट कियना बेसता कबाह्कुनहेंका मीकु पेनदाहेंदाल आसिर्वांद दोर्कसेकेन मनना इंचि नावा विचारम मंता.
- 18 नहगा अन्नि मंतां, नाक बचचोर अयते गावाले दानकन्ना एक्को मंतां. मिमेट इपपरदिसुनतोनि लोहता सहायम नाक दोर्कता. अवुनतोनि नावा अक्सराल्क अन्नि तीरतां. बल्हा अयते मोक्कु हीतारित्ते पेन दाना गब्बु एतंता, अल्हेने मिमेट लोहतवुन पेन कुसिते एतकुंता.
- 19 नना सेवा कियना पेनदागा मनाकु गावाले मत्तादुंकन्ना एक्को संपत्ति मंता. अदुनहाटी मनाकु बतल अक्सरम मनिनागानि, मनम किरिस्तु येसुना लोकुल्क आताहाटी पेने दाना महिमाहेंदाल अदुन पूरा कीता.
- 20 मना पेनबाबान युगा-युगाल्कुनदाका स्तुति कीकोम. आमीन.
- 21 येसु किरिस्तुन विस्वासम कीतोर अंटोर पेनदा लोकुल्कुंक नावा जोहार. इगे नावातोनि मत्तोर विस्वासुल्कगुडा मीकु जोहार वेहसेक मंतुर.
- 22 इग्गेटा पेनदा लोकुल्क अंटोर, कास कैसर राजांक सेवा कियानोर विस्वासुल्क मीकु जोहार वेहसेक मंतुर.
- 23 मना किरिस्तु येसु सामिना कुर्पा मीवा आत्मातोनि मन्निकांटी.

कुलसि कुलसि विस्वासुल्लुकुंक पौलसुना सिट्टि

इद सिट्टिता बारेमते गिचचो परिचयम

रासतोना पोरोल: पौलसु

रासता कालम: इसवि सन 60

इद सिट्टि कुलसि सहरता विस्वासुल्लुकुनाहाटी येसुना प्रेरित पौलसु रासतोर. इद कुलसि सहर आसिया एरियाते वांता. इगोटा विस्वासुल्लुकु पौलसुनाहेंदाल आयो, गानि कुलसि सहरतोर वरोर इपप्रास इनानोना हेंदाल विस्वास कीतुर.

अगाटा कलिसियाते इच्चुर लोकुल्लुकु आबदुदम कराहनोर मंतुर इचि इपप्रासुनाहेंदाल पौलसुंकु तेळियता. ओर तप्पुड बोदा वेहंदुर आनि रीति रिवाजकु, पदुदतकु मत्ताप ताकतेने मुक्ति दोर्कता इचि करहंदुर.

अदुनहाटी पायदा हिल्लव दुनियाता रीति रिवाजकु, पदुदतकु कराहानोरा पोल्ले केंजमत इचि वेहालय पौलसु इद सिट्टि रासि विस्वासुल्लुकुनागा लोहतोर. अल्हेने मिमेट वरोंक-वरोर पावरम कीम्ट, विस्वासमते गट्टिगा मंट, किरिस्तुना पोल्लेते बेस्सेके होंट इचिगुडा वेहतोर.

बगा बतल मंता

जोहार आनि परिचयम 1:1-8

किरिस्तुना स्वभावम आनि कबळ 1:9-2:19

किरिस्तुनतोनि पिस्सना पूना पिस्वर 2:20-4:6

आकिरता बोदां 4:7-18

जोहार

1-2 पेनदा इच्चाताल किरिस्तु येसुना प्रेरित आतोना नना पौलसुन आनि तम्मुर तिमोतिनाहेंदाल, कुलसि सहरते मंदना पवित्र अल्हेने किरिस्तुनलोप्यो विस्वासमलायक कलिसियाता लोकुल्लुकुंक इद सिट्टि रासेक मंतन. मना पेनबाबानाहेंदाल मीक कुर्पा, साति दोर्किकांटी.

दुन्यवादता पारतना

3 मोमोट मीवाहाटी बस्केळक पारतना कीसेके, मना सामि येसु किरिस्तुना पेनबाबांक दुन्यवाद कीसेके मंतोम.

4 बारिल्ले, किरिस्तु येसुना पोरोटा मीवा विस्वासम आनि अंतोर पेनदा लोकुल्लुकुन मिमेट कियाना मीवा पावरमता बारेमते केंजतोम.

5 मीवाहाटी स्वर्गमते उंदि आसे इसि मंता इचि, अदुना बारेमते मिमेट मुन्नेने बेसता कबुरता सत्तेम पोल्लेते केंजतिर.

6 अदे बेसता कबुर मिहगा वासि, पूरा दुनियाते पैलाचि लोकुल्लुकुना पिस्वरतुन बदलांचेके मंता. अल्हेने बस्के अये अदुन मिमेट केंजतिर, केंजसि पेनदा निजम कुर्पातुन एरपाट कीसि स्विकार कीतिर, अस्केटाल अद मीवा पिस्वरतुनगुडा बदलांचेके मंता.

7 आ बेसता कबुर मावा पावरमगल्ला इपप्रासुनाहेंदाल मिमेट करियतिर. ओर मावातोनि कलियासि कबळ कियानोर आनि मीवाहाटी किरिस्तुना विस्वासमलायक सेवक आंदुर.

8 पवित्र आत्माते मत्ता मीवा पावरमता बारेमते ओर माक वेहतोर.

9 अदुनहाटी मोमोट अव पोल्ले केंजतस्केटाल, मिमेट पूरा आत्माता तेल्विते, बुद्धिदेते दाना इच्चा मत्ताप निडागोम इचि बस्केळक पारतना कीसेके मंतोम.

10 इदुनहेंदाल, मिमेट अन्नि तीस्कुने सामिन कूस कियालय मीवा पिस्वर दानकु इस्टमाताप मंता, मीक हरेक बेसता कबळते पलम दोर्किसि, पेनदा तेल्विते बेस्सेके दातिट.

11 दाना महिमाता अन्नि तीरकुना बलमतोनि मीकुन गट्टिगा कीता, अदुनहाटी अन्नि तीरकुना ओप्के, ओसंकुनमळ इद मीक आनंदमतोनि दोर्कता.

12-13 अदुनहाटी पेनबाबांक मिमेट दुन्यवाद कीम्ट. ओर मनाकुन वेलगुने मंदना पेनदा लोकुल्लुकुना वारसानहक्कुते तूस एताना लायक कीतोर. मनाकुन हीकटता कयदाल इळबळिच्चि ओना पावरमगल्ला मरिना राज्यमते होळाहतोर.

14 ओना मरिनाहेंदाले मनाकु मुक्ति दोर्कता, इले ओनाहेंदाल पापाल्लुकुनाला मापि दोर्कता.

किरिस्तुक अन्निनपोरो अदिकारम मंता

15 ओर दिस्सबसोंटा पेनदा रूपम आंदुर, ओर दुनिया पुट्टका मुन्नेटाले मत्ताहाटी, दुनियाते पुटतकुने अन्निनपोरों पेदूडोड आंदुर.

16 बारिल्ले, स्वर्गमते आयि, बूमिपोरों आयि, दिस्सानव आयि, दिस्सुव आयि, राजगदुदें आयि, सरकार आयि, पेदूदालक आयिर, आदिकारिलक आयिर इव अन्निन ओनतौनि, ओनाहेंदाल आनि ओनाहाटी पुट्टिचमळ जर्गता.

17 पुट्टिस्ता अन्निने ओर मोदाटोर, ओनाहेंदाले अन्नि निल्लिसि मंता.

18 मेंदुललेसी मंदना कलिसियाकु ओर तल्ला आंदुर. अन्नि पोल्लेने पेदूदोड आयागोम इंचि हातौरा लोप्पोटाल मोट्टा मोदाला तेदतोर ओर आंदुर. ओर मोदेल आंदुर.

19 बारिल्ले ओनालोप्पो पेनदा गुनम पूरा निडसि मत्तेने बाबो कूस मनंतोर.

20 कूसुनपोरों किरिस्तु पोंगागोटता नेत्तुरताहेंदाल, बूमिपोरों आनि स्वर्गमते मंदना अन्नि वस्तुकुन ओनतौनि कल्पिसि ओरा नड्डुम सांति मनागोम इंचि पेनदा इच्चा.

21 दीनकन्ना मुन्ने मिमेट पेनदागटाल लक्कु मत्तिर, कराब कबाहकुनाहेंदाल दाना पगातोर आसि मत्तिर.

22 इंदके मीकून पेनदा मुन्ने पवित्र, डाग हिलाकोटा, दोसेम हिलाकोटा निल्हागोम इंचि ओर ओना हामुरहेंदाल मीवा मेंदुला हव्वितुन ओना मेंदुले कल्पकृतोर.

23 गानि मिमेट विस्वासमते हीके-हेके आयाकुंटा गट्टिगा निल्लिसि मंटु, मिमेट केंजता बेसता कबुरता आसेतुन होळसमत. अद बेसता कबुर मब्बुन हिळता अंतोर लोकुलकुंक वेहमळ जर्गसिक मंता. अदे सेवा कियानाहाटी नना, इत्ते पौलसुन पेनदा सेवक आतन.

कलिसिया बेर्सानाहाटी पौलस तकलिप अरमळ

24 किरिस्तुना मेंदुलतसोंटा कलिसियाताहाटी बवयते बादां तकको मत्तां. अव बादन नावा मेंदुलताहेंदाल पूरा कीसेके मंतन, अदुनहाटी इंदके मीवाहाटी बवयते नावा दुक्कालक मंतां अकुने नना आनंदमते मंतन.

25-26 पेनदा पोल्लेतुन मीकु पूरा वेहानाहाटी पेन नाक अप्पजेपता जिम्मेदारिहेंदाल नना कलिसियाता सेवकुन आतन. अद पोल्ले वेल्लेन कालालकुनाल, पीळि-पीळिनाल मर्ममते मत्ता, गानि इंदके दाना पवित्र लोकुलकुंक तेळियागोटता.

27 यहदि आयवोरा लोप्पो इद मर्ममता महिमाता विलुवा बतल आंद मना लोकुलकुंक तेळियाना इंचि पेन इनकुत्ता. मीवालोप्पो महिमाता आसे आसि मनना किरिस्ते आ मर्मम आंद.

28 हरेक मनकन किरिस्तुनलोप्पो पूरा कीसि पेनदा मुन्ने निल्हागोम इंचि, मोमोेट किरिस्तुना बारेमते हरेक मनकंक कडकते वेहांतम, हरेक मनकंक पूरा तेळित्ते करहंतोम.

29 इदुनहाटी किरिस्तुना पूरा ताकत नावा लोप्पो गट्टिगा कबळ कीसेके मंता, दानाहेंदाल नना मनसु दोस्सि बागा कस्टम कीसेके मंतन.

2

1 मिमेट नाकुन हळाकोन्ना गानि मीवाहाटी, लोदिकिया सहरते मंदना विस्वासुलकुनाहाटी आनि कळमता अंतोर विस्वासुलकुनाहाटी नना वेल्लेन कस्टम कीसेके मंतन, इद मीक तेळियाना इंचि नावा इच्चा मंता.

2-3 इद कस्टम बारि कीसेके इत्ते, मिमेट मीवा विस्वासमते दैरेमते मनना, मिमेट पावरमते वरोंक-वोर कलियसि मंदना, मीक पूरा बुद्धिदेता पूरा दनम दोकेना, पेनबाबाना मर्मम इत्ते किरिस्तुना लोप्पो मर्किक्स मत्ता बुद्धि, तेळित्ता कजानातुन एपाट कियाना.

4 बोरन्ना तियट्टा पोल्लेनतौनि मीकून पसांचामन्नि इंचि नना इद वेहासेक मंतन.

5 नना मेंदुल्ले मिहागटाल लक्कु मंतन, गानि आत्माते मिहागोन मंतन. मीवा रोजता पिस्वर आनि किरिस्तुनलोप्पो मंदना मीवा गट्टि विस्वासम हळसि नाक वेल्लेन कुसि आसेक मंता.

किरिस्तुनलोप्पो निडिसि मंतिर

6 इंदके मिमेट किरिस्तु येसुन सामि इंचि स्विकार कीतिर, अयते ओर बल्हा वेहतोर अल्हेने ताकाटु.

7 मराता हिहकुनलेसी मिमेट किरिस्तुनलोप्पो होळियसि होंटु, बेस्सेके होंटु. मीक कराहतालेसी विस्वासमते गट्टिगा आसेके होंटु, बस्केळ्ळक पेनदुक दन्यवाद कीसेके मंटु.

8 मिमेट जेगताते मंटु! बोरन्ना वासि मीकून दुनियाता तेळि पोल्लें, एर्तम दोका हिद्यना पोल्लें वेह्चि पसांचा परांतुर, अव पोल्लें मनकालोर्कुना रीतिरिवाजकुनालेसी, दुनियाते एनकटा कराहता पोल्लेनलेसी मंतां गानि किरिस्तुना पोल्लेनलेसी हिल्लें.

9 बारिल्ले पेनदाव अन्नि गुनालक किरिस्तुना मेंदुल्ले मंतां.

- 10 अंटोर राज्येम कियानोर्कुनपोरोँ, अदिकारकुनपोरोँ किरिस्तु तल्लासेसी मंतोर, ओनालोपो मिमेट पूरा आतिर.
- 11 मीवा मेंदुल्ला पापालक पायताहाटीँ ओनालोपो मीकुन कतना कियमळ जर्गता. अद कतना कयदे कीतद आयो गानि किरिस्तुनलोपो कीतद आंद.
- 12 अचोने आयाका, मिमेट बापतिस्मा एताहेंका किरिस्तुनतोनि बोंदा दोस्ताप आतिट. हातोरव्हेटाल ओन जीवाते तेहाता पेनदा सक्ति पोरोँ मिमेट विस्वासम इरताहाटीँ ओनतोनि जीवातेगुडा तेदतिट.
- 13 मिमेट तपु कबाहक कीतिर, यहूदि आयवोर मत्तिर, अदुनहाटीँ आत्माते हासि मत्तिर. गानि पेन मना अग्नि पापालकुन मापि कीसि किरिस्तुनतोनि मीकुन जीवाते तेहता.
- 14 नियमकुना पुस्तकम मनाकु विरोदमते मत्ता, गानि पेन किरिस्तुन कुसुनपोरोँ मोल्लां कोह्किसि अद पुस्तकमताल मनाकु विरोदमते मत्ता पोल्ले तेंडसि पोहता.
- 15 इल्हा राज्येम कियानोर्कुंक आनि अदिकारकुंक पेन ताकत हिलाकोटा कीता. कीसि किरिस्तु कुसुनपोरोँ जीवा हीसि गेल्सताहाटीँ ओरा अंटोरा मुन्ने तमासा आसि सिग्गु हिलाकोटा आता.
- 16 अदुनहाटीँ मीवा तिन्ना-उन्ना बारेमते आयि, पंडुगुना बारेमते आयि, अमासा हिलाकोटे नोमकेम रोजुना बारेमते आयि बोर्कुने मीवा न्यायम किया हियमट.
- 17 इवन्निगुडा मुन्ने वायाना निजम पोल्लेना नीडा आंद, आ निजम पोल्ले किरिस्तु आंदुर.
- 18 बोरन्ना सतागा सिन्नातनम हुपिचुकुनानोर, दूताना पूजा कियानोर, हळता पोल्लेनपोरोँ, ओना मनसुना पालतु पोल्लेनपोरोँ पेद्दिरेकेम कियानोना हेंदाल मीवा पेनदा इनामतुन तपिचुकुना हियमट.
- 19 असोटा मनकल पूरा मेंदुल्ला कील्कुन, नरालकुन उंदि कीसि, पेनदाहेंदाल मेंदुल्लुन बेसांगोटना तल्ला, इत्ते किरिस्तुन पीसि मन्नेर.
- 20-21 गानि इंदके मिमेट दुनियाता पोल्लेनाल किरिस्तुनतोनि हासि होत्तिर, अय्ते “अद इटमट, अदुन तिन्मट, अदुन पियमट” इंचि दुनियातोरालेसी नियमकुने बारि ताकसेक मतिट?
- 22 इवन्नि पोल्ले वाळकुत्तारित्ते नासडेम आसि होनना वस्तुकुनलेसी मंतां, बारित्ते अव सिराप मनकना नियमाल्क आनि कराहमळक संबंदिस्तव आंद.
- 23 इव नियमकुने मना मनसुनाल तयार कीता बक्ति कियालय, सिन्नातनम हुपिचुकुनालय, मना मेंदुल्लुन तीरता कस्टम कीकुनालय बुद्दि अय्ते मंता, गानि मना मेंदुल्ला कराब इच्चान आपालय इव बतल कबळक ओज्जों.

3

- 1 मिमेट किरिस्तुनतोनि जीवाते तेदसि मंतिट, किरिस्तु स्वर्गमते पेनदा तिना बाजूक उदसि मंतोर, अय्ते अगाटा पोल्लेन दोर्किचुकुनना कोसिस कीमट.
- 2-3 इंदके मीवा पडाना पिस्वर हासि होत्ता आनि मीवा पूना पिस्वर किरिस्तुनतोनि पेनदा लोपो मक्किचि मंता. अदुनहाटीँ मिमेट बूमिपोरोँटा पोल्लेने आयो गानि स्वर्गमता पोल्लेने मनसु इरंट.
- 4 मनाकु पिस्वर हीता किरिस्तु बस्के अय्ते मर्रा दिस्सानुर, अस्के मिमेटगुडा ओनतोनि ओना महिमाते दिस्किर.
- पळाना पिस्वर आनि पूना पिस्वर**
- 5 अदुनहाटीँ बूमि पोरोँटव मना कराब गुनाल्क इत्ते बोगमतनम, कराब विचाराल्क, जोसते मनमळ, इंकावरोनद आसे पडमळ, आस्ति कियमळ इद अय्ते बोम्मांक मोळकता लेक्कतेन वांता. इव अग्निन हळ्किस पोहाट.
- 6 इवुनाहाटीँगे पेनदा होंग दाना पोल्ले केंजवोरा पोरोँ वांता.
- 7 मिमेटगुडा मुन्ने आ पिस्वरते पिसानस्के, ओरालेसीगे ताकिदिर.
- 8 गानि इंदके मिमेट होंग आयमळ, गुल्गमळ, पगा पियमळ, अपमानम कियमळ, तोळ्दाल कराब पोल्ले वळ्कमळ इवन्निन होळसीमट.
- 9 मिमेट वरोँक-वरोर आबदूदम वळ्कमट, बारित्ते मीवा पडाना गुनमतुन आनि दाना कबाहकुन तेंडसि पोहतिर.
- 10 इंदके पूना पिस्वर पिसमळ सुख कीतिर, मनाकुन पुटिस्ता पेनदा गुनम मत्ताप, मिमेट तेल्चि दोर्किचुकुनालय पून्गा तयार आसेक मंतिट.
- 11 इवने युनानि आयिर, यहूदि आयिर, कतना कीतोर आयिर, कतना कियवोर आयिर, केडाते मनानोर आयिर, स्कूति जातितीर्क आयिर, दासुड आयिर, दासुड आयवोर आयिर ईरा लोपो बतल तेडा हिल्ले. किरिस्तु अग्निने, अंटोर लोपो मनंतोर.

12 पेन मीकुन पवित्र आनि पावरमगल्ला लोकुकुनलेसीं पेर्कुत्ता. अदुनहाटीं दया कियमळते, पायदा कियमळते, सिन्नागासि मनमळते, सादा-सिपल मनमळते ओष्के पीसि ताकट.

13 सामि मीवा तप्पुकुन मापि कीतोर, अय्ते मिमेटगुडा वरोना तप्पुकु वरोर मापि कीम्टु. मीलोपो बोनकन्ना इकावरोन पोर्री बतलान्ना तप्पु दोस्साना मल्ले, ओर ओष्केते वरोनद वरोर तप्पुकुन मापि कीकुंट.

14 अचोने आयाका मिमेट अंटोर उंदासि पावरमते दोहताप मंटु.

15 मीवा मनसुने किरिस्तुना सांतिता राज्येम ताकिकांटी, इदुनहाटीगे मीकुन उंदि मेंदुल आसि केयमळ जर्गता. पेनदुक बस्केळ्ळक दन्यवाद कीम्टु.

16 किरिस्तुना पोल्ले मीलोपो निडिसि मान्निकांटी, मिमेट पूरा तेल्चिते वरोंक-वरोर करहट, तेळियागोट्टिस वेहाट्टु, पेनदुक दन्यवाद कीसेके मना मनसुनाल बजनकु, कीर्तनकु, पाटां पारसेके होंट्टु.

17 अचोने आयाका, पोल्ले आयि, कबळ आयि बतल किट्टियेना मिमेट सामि येसुना पोरोलतेन कीम्टु. ओनाहेंदाले पेनबाबांक दन्यवाद कीम्टु.

पूना पिस्वरते मनमळ

18 मरमि आता मुरताह्कुनिटा! मिमेट पेनदुक नच्चानालायक मीवा मुय्दुकुना पोल्लेपोर्री ताकट.

19 मुय्दुकुनिटा! मीवा मुलतोह्कुन पावरम कीम्टु, अवनतौनि कडकते मनमट.

20 पिलाल्कुनिटा! मिमेट अन्नि पोल्लेने मीवा यावल-बाबाल वेहताप ताकट, इल्हा ताकते सामिक आनंदम आंता.

21 बाबोरिटा! मिमेट मीवा पिलाल्कुन चिड-चिड कियमट, अल्हा कीते, ओर निरास आंतुर.

22 दासुकुनिटा! मिमेट अन्नि पोल्ले ई दुनियाते मनना मीवा मालकुलक वेहताप कीम्टु. मिमेट कियानद मनकालोर्कुन कूस कियाना दासुनलेसीं हुप्सालय आयो गानि बेस मनसुने, पेनदा वैरेंते कीम्टु.

23-24 मिमेट बतल्यते कीतिर मीवा मनसुनाल कीम्टु, मिमेट मनकालोर्कुनाहाटीं आयो गानि सामिनाहाटीं कीसेके मंतिट. मिमेट सामि किरिस्तुना सेवा कीसेके मंतिट. अदुनहाटीं ओनाहेंदाल मीकु वारसानता इनाम दोर्कता, इद मीकु एरपांटे मंता.

25 पेन बोने मोकम हूळसि न्यायम किट्टयो, बोर अय्ते तप्पु कीतोर, दाना सिक्सा ओनकु दोर्कता.

4

1 मालाकुलकुनिटा! स्वर्गमते मीकुगुडा वरोर मालक मंतोर, इदुन मति ईसि मिमेट मीवा दासुकुनतौनि न्यायमते, बेदबाव हिलाकोटा ताकट.

पारतना कियालय वेहमळ

2 मिमेट बस्केळ्ळक पेनदुक पारतना कीसेके मंटु. दानकु दन्यवाद कीसेके जेगतांति मंटु.

3 नना किरिस्तुना मर्ममता पोल्ले वेहताहाटीं जेल्लते मंतन, इदे पोल्लेतुन मोमोट अंटोर्क वेहानाहाटीं पेन माकु मोका हिट्टिये इंचि मावाहाटीगुडा पारतना कीम्टु.

4 नाकु बल्हा वेहाना मंता अल्हेने नना इद कबुरतुन बेस तेळियागोट्टिस वेहानाहाटीं पारतना कीम्टु.

5 विस्वासम कियवोरोतौनि बेस तेल्चिते ताकट, मोका दोर्कतस्के ओर्क बेसता कबुर वेहाना पायदा तप्पाकोटा एतट.

6 हेरक मनकंक बेस जवाब हिंया वायमळ गावाले इंचि मीवा पोल्ले बस्केळ्ळक कुपतिं आनि होळ्वोर वाटते रूसि मत्ताप मना पीता.

आकिरता पोल्ले

7 पावरमगल्ला तुकिक्कुस दादल विस्वासमलायक सेवक आंदुर. ओर नावा बारोमते अन्नि पोल्ले मीक वेहांतोर, ओर नावातौनि कलियसि सामिन लोपो सेवा कियानोर आंदुर.

8 ओर मावा बारोमते अन्नि पोल्ले मीक तेळियागोट्टिस मीवा मनसुकुंक दैरेनेम हिंयाना उदुदेसमते नना ओन मीहेके लोहतन.

9 नना ओनतौनि मीवा लोपोटोरे विस्वासमलायक, पावरमगल्ला उनेसिम दादानगुडा लोहतन, ओर इग्गेटव अन्नि पोल्ले मीक वेहानुर.

10 नावातौनि जेल्ले मनना अरिसतरकुस पोरोलतोर दादल मीक जोहार वेहासेक मंतोर, अल्हेने बरनाबासुना दगेटा दादाल मरकुस इनानोरगुडा मीक जोहार वेहासेक मंतोर. (नना मीक मुन्नेने वेहताप, मरकुस मिहगा वाते ओन बेस हूळट.)

11 यूसुत्स इनना येसुगुडा मीक जोहार वेहासेक मंतोर, कतना आतोरार्वेटाल सिराप ईर मुळ्वुरे पेनदा राज्येमताहाटीं नावातौनि कबळ कीसेक मंतुर, ईराहेंदाल नावा जीवाक सांति दोर्कसेक मंता.

12 किरिस्तु येसुना दासुड इप्रसास ईर मीवा लोपोटोरे आंदुर, मीक जोहार वेहासेक मंतोर. मिमेट पेनदा इच्चा मत्ताप पुरागा आसि, विस्वासमते गट्टिटगा निळिसि मनागोम इंचि ओर बस्केळ्ळक मीवाहाटीं जोर हीसि पारतना कीसेके मंतोर.

13 मीवाहाटी, लोदिकिया आनि हियरापोलि सहरता विस्वासुल्कुनाहाटी ओर वेल्लेने मेहनत कीसेके मंतोर इंचि, इद पोल्लेक नना ओना गवाइ मंतन.

14 पावरमगल्ला डाक्टर लूकाल आनि देमास ईर मीक जोहार वेहासेक मंतुर.

15 लोदिकियाता विस्वासुल्कुंक आनि नुंपा अब्कांक अल्हेने दाना लोतागा जमा आयाना कलिसियातोकुक नावा जोहार वेहाट.

16 इद सिट्टिटुन मिमेट हदुव्ता पजा, इदुन लोदिकिया सहरता कलिसियातोक लोहचि, अगागुडा हदवा वेहाट आनि लोदिकियाताल वाता सिट्टिटुन मिमेटगुडा मीवा कलिसियाते हद्विसि वेहाट.

17 अल्हेने अरकिपुसुंक, “सामि नीकु अप्पजेपता सेवातुन तप्पाकोटा पूरा कीम,” इंचि वेहाट.

18 नना पौलसुन, नावा क्यदेन रासि मीकु जोहार वेहासेक मंतन, नना जेलते मंतन इंचि पारतनाते मति कीम्ट. पेनदा कुर्पा मीवातोन मन्निकांटी. आमेन.

1 तेसलोनि

तेसलोनि विस्वासुल्कुंक पौलसना मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 50-54

तेसलोनि सहर मेसिडोनिया एरियाता राजदानि मत्ता. अगा यहूदि आयवोर मनुंदुर, गानि ओर यहूदि मतमतन नम्मंदुर. पौलसनाहेंदाल अगागुडा विस्वासुल्क तयार आतुर. पौलस वेहता बेसता कबुरतन लोकुल्कु विस्वासम कीसंतुर इंचि यहूदिल्क पौलसुन विरोद कियालय दलगतुर. अदुनहाटी पौलस तेसलोनि सहर होळसि एतेंस सहरते होल्लोर. अगाटाल विस्वासुल्कुना परिस्तिति कन्कुनालय तिमोतिन मरां तेसलोनि सहरते लोहतोर. ओर वापस वासि अगाटा विस्वासुल्कुना परिस्तिति पौलसुंक वेहतोर.

पौलस अगाटा परिस्तिति केंजसि कूस आतोर. पजा तेसलोनि सहरता विस्वासुल्क, दैरनेमते आनि विस्वासमते गट्टिगा मंदालय ओर्क इद मोदाटा सिट्टि रासि लोहतोर.

अल्हेने किरिस्तु बस्के मल्सि वायानुर, ओर वायाका मुन्ने हाता विस्वासुल्कुनद बतल आंता? इसोंटा पोल्लें इद सिट्टिते रासि मंतां.

बगा बतल मंता

जोहार आनि परिचयम 1:1

दन्यवाद आनि स्तुति कियमळ 1:2-3:13

किरिस्तु वेहताप पिस्साना बारेमता बोदां 4:1-12

किरिस्तु मरां वायना बारेमते समजांचि वेहामळ 4:13-5:11

आकिरता पोल्लें 5:12-22

आकिरता बोदां 5:23-28

जोहार

1 नना पौलस, सिल्वानुस* आनि तिमोति मोमोट इद सिट्टि मीक तेसलोनि सहरते मंदना कलिसियातोरहाटी रासेके मंतोम. † मिमेट पेनबाबाल आनि सामि येसु किरिस्तुनतोनि कलियसि मंतिट इंचि मीक पेनदाहेंदाल कुर्पा, साति दोर्किंकांटी.

तेसलोनि कलिसियातोर विस्वासम

2 मोमोट पारतनाने मीवा मति कीसेके, मी अंतोरहाटी पेनदुक बस्केळ्क दन्यवाद कीतोम.

3 मिमेट विस्वासमते कियाना कबाटुन, पावरमते कियाना मीवा कस्टमतुन अल्हेने सामि येसु किरिस्तुनापोरोटा आसेते ओके पीसि मत्तादुन मोमोट मना पेनबाबाना मुन्ने बस्केळ्क मति कीसेके मंतोम.

4 विस्वासुल्कुनिटा! पेन मीकुन पावरम कीसि पेर्ता इंचि माक एरपाटे मंता.

5 बारित्ते, मोमोट वेहता बेसता कबुर सिराप पोल्लेनतोने आयो गानि ताकतते, पवित्र आत्माते आनि पूरा गट्टि विस्वासमते मिहगा वाता. मोमोट मीवा नड्डुम मंचेके बल्हा ताकतोम मीक एरपाटे मंता.

6 मिमेट वेल्ले दुक्कमते मत्तस्केगुडा पवित्र आत्मा हियना कुसिते बेसता कबुरतुन केंजतिर. मिमेट मावालेसी, सामिनलेसी ताकालय सुस्व कीतिर.

7 इल्हा मिमेट अकाया आनि मेसिडोनिया राज्यमता विस्वासुल्क मीकुन हळसि ताकालय, मिमेट ओर्क उंदि उदाहरनलेसी आतिर.

8 बारित्ते मीहेंदाल सामिना पोल्ले सिराप मेसिडोनिया आनि अकाया राज्यमतेन एवता इंचि आयो गानि पेनदापोरोटा मीवा विस्वासमता बारेमते अन्नि जेगाने तेळियसि होत्ता. अदुनहाटी मोमोट मीक वेहाना बतल अब्बरम हिल्ले.

9 बारित्ते मोमोट मिहगा वातस्के, मिमेट माकुन दगोरा कीसि बल्हा बेस हळतिर, ओर मावा बारेमते वेहासेक मंतुर. अल्हेने मिमेट बोम्माना पेनकुन होळसिसि, जीवाते मनना निजम पेनदा सेवा कियालय बल्हा मलतिर इंचि वेहासेक मंतुर.

* 1:1 सिल्वानुस सिल्वानुस इले सिलास आंदुर, ओन्क रॉडु पोरोली मत्तां.

† 1:1 इद सिट्टि पौलस रासतोर, सिल्वानुस आनि तिमोति ओनतोनि जोहार वेहतुर.

10 पेन येसुन हातोरव्हेटाल तेहता. इंदके स्वर्गमताल दाना मर्री येसु मल्सि वायानदुन एदुर हळसेक मंतरि, इंचि इव पोल्ले अंटोर्क वेहासेक मंतर. वायाना पेनदा होंगुनाल ओरे येसु मनाकुन पिसागोटंतर.

2

तेसलोनि सहरते पौलुसना सेवा

- 1 विस्वासुल्कुनिटा! मोमोट मिहगा वातद एर्तम आयाहिल्ले इंचि मीक एरपाटे मंता.
- 2 गानि दीनकन्ना मुन्ने पिलिपिया सहरते माकुन बदनाम कीसि वेल्लेन दुक्कम हीतुर. लोकुल्क माकुन बागाने विरोद कीतुर. विरोद किथ्यिनागानि पेनदा बेसता कबुर मीक वेहालय पेन दैरेनेम हीता, इदगुडा मीकु एरपाटे मंता.
- 3 बारित्ते मावा बोदा गलतितेनो, कराब विचाराल्कुनेनो, पसांचना उदुदेसमते वेहतद आयो.
- 4 गानि पेन माकुन दाना बेसता कबुरता लायक कीसि, बेसता कबुरतुन वेहालय माक अप्पजेपता. अदुनहाटी मावा मनसुन परिक्सा कीसि हळना पेनदुन कूस कियालय वेहंतोम गानि मनकालोर्कुन कूस कियालय पेनदा पोल्ले वेहोम.
- 5 बारित्ते मोमोट मीकुन बस्केने बुदुगिचचना पोल्ले वळ्का हिल्लोम. अल्हेने मावा आस्तिताहाटी मीकुन नळेह किया हिल्लोम, दीनकु पेने गवाइ मंता, इंचि मीक एरपाटे मंता.
- 6 इचचोरे आयाका, मोमोट अय्ते किरिस्तुना प्रेरितुल्कुम इंचि मीपोर्री मावा अदिकारम ह्पिस्तोमे, गानि मिमेट आयि, वेंटेओर आयि, इंका बोनाहेंदाले आयि पेदुदातनम दोर्किचकुनालय मोमोट हळ्वा हिल्लोम.
- 7 तल्लुर दाना पिलाल्कुन बल्हा अवरिचकुंतनो, अल्हे मोमोटगुडा मीकुन बेस हळकुत्तोम.
- 8 अदुनहाटी मीपोर्री इचचोर पावरम मंता गदा, मोमोट मीक सिराप पेनदा बेसता कबुरे आयो, मावा जीवागुडा हियालय तयार मत्तोम. मिमेट अचचोर पावरमंतोर आसि मत्तिट.
- 9 विस्वासुल्कुनिटा! मावा कस्टम, तकलिप मीक मते मंदार. मोमोट मीक बोनके बर्वु आयामन्नि इंचि नर्का-पिय्यल कबळ कीतोम. अल्हा कीसेके पेनदा बेसता कबुर मीक वेहचि मत्तोम.
- 10 मी विस्वासुल्कुना नड्डुम मोमोट बल्हा पवित्रते, सत्तेमते, दोसेम हिलाकॉटा मत्तोम, इदुना मिमेटे गवाइ मत्तिट, पेनगुडा गवाइ मंता.
- 11-12 पेन मीकुन दाना राज्येमते आनि दाना पेदुदातनमते कलियालय केयता, अदुनहाटी दानकु नचचनालायक मिमेट ताकट इंचि वेहोतम. बाबाल बल्हा ओना पिलाल्कुन अवरिचकुंतोर अल्हेने, मोमोट मीक हरेक मनकंक तेळियागोट्टिस वेहासेके, दैरेनेम हीसेक, विनति कीसेके मत्तोम, इद मीक एरपाटे.
- 13 बस्के अय्ते पेनदा पोल्ले मावाहेंदाल मिहगा एव्ता, अस्के अद मनकालोराहेंदाल वातद आयो, गानि पेनदाहेंदाल वाता निजम पोल्ले आंद इंचि मिमेट केजसि ओक्कत्तिर. अदुनहाटी मोमोट पेनदुक बस्केळ्ळक दन्यवाद कीतोम. मीवा विस्वासुल्कुना नड्डुम पेनदा पोल्लेगुडा कबळ कीसेके मंता.
- 14 अद बल्हा इत्ते, विस्वासुल्कुनिटा! यहुदिया राज्येमते येसु किरिस्तुनलोप्पो मत्ता पेनदा कलिसियातोरलेसी मिमेट ताकसेक मत्तिट. बारित्ते बल्हा मिमेट मीवा देसेमतोराहेंदाल तकलिप बोगांच्चिरो, अल्हेने ओर ओरा यहुदिल्कुनाहेंदाले तकलिप बोगांच्चुतुर.
- 15 ओरे सामि येसुन आनि पेनदा कबुरतोर्कुन हळ्कतुर. ओर माकुन पलाते दोबतुर. पेन ओरतोनि कूस हिल्ले. ओर अंटोर लोकुल्कुना विरोदमते मंतुर.
- 16 पेनदा पिसागोटमळ बारेमते यहुदि आयवोर्कुनतोनि वळ्कते, ओर माकुन आपंतुर. इल्हा कीसि बस्केळ्ळक ओरा पापाल्कुन निहकुंतुर. गानि आकिरते पेनदा होंग ओरपोर्री रेयंता.

पौलुस ओर्क मर्रा कलियंतन इनकुनमळ

- 17 विस्वासुल्कुनिटा! गडसेमताहाटी मोमोट मिहागटाल लक्कु आतोम, गानि मनसुनाल लक्कु आया हिल्लोम. मर्रा मोमोट वेल्लेने आसेते मीवा मोकम हळना इंचि बचचोरो कोसिस कीतोम.
- 18 बारित्ते माक मिहगा वायागोम इंचि मंता. नना पौलुस, बचचुंगो मल्कां कोसिसगुडा कीतन, गानि देय्यम माक अड्डम आयुंदु.
- 19 मावा आसे आयि, मावा कुसि आयि, मना येसु सामि मर्रा वायानस्के ओना मुन्ने मावा पेदुदातनमता किरिटम आयि! बतल आंद? मिमेट आयिरा?
- 20 हो, मावा पेदुदातनम, मावा कुसि मिमेटे आदिर.

3

तिमोतिन लोहमळ

- 1 अदुनहाटी, इंका सहन कियमळ मातोनि आया परांका, एतेंस सहरोहें होंचि ओटिंगा मंदना विचारम कीतोम.
- 2-3 किरिस्तुना बेसता कबुरतुन मावातोनि कलियसि वेहानोर पेनदा दासुड तिमोति तम्सुन मिहगा लोहतोम. मीक बसोंटा तकलिप वाथिनागानि पजोळ्ळक-मुन्नेळ्ळक आयाकोंटा विस्वासमते गट्टिंगा मंदना इंचि ओर मीकु समजांचि वेहंतोर. बारित्ते इसोंटा तकलिपकु बोगांचालये पेन मनाकुन निलाहता इंचि मीक एरपाटे.
- 4 मोमोट मीवातोनि मत्तस्के, इसोंटा तकलिपकु वांतां इंचि मुन्नेने वेहतोम. अल्हेने जर्गता, अद मीक एरपाटे.
- 5 अदुनहाटी नना आगा परांहिल्लेन. पट्ट हळानोर मीवा पट्ट हळतोर बतला, मोमोट कीता कस्टम एर्तम आताना बतला इंचि, मीवा विस्वासमतुन कन्कुनालय नना तिमोतिन लोहतन.
- 6 गानि तिमोति इंदके मिहागटाल महगा, मीवा विस्वासम आनि पावरमता बारेमते बेसता कबुर पीसि वातोर. मोमोट बल्हा मीकून हळालय बागा तनलाळंतोम, अल्हेने माकून हळालय मिमेटगुडा मावा बस्केळ्ळक मति कीर्तित इंचि वेहतोर.
- 7 अदुनहाटी विस्वासकुनिति! मोमोट तकलिपते, दुक्कमते मनिनागानि मीवा विस्वासमताहेंदाल, मीवा बारेमते माकु सांति दोर्कता.
- 8 बारित्ते मिमेट सामिन लोप्पो गट्टिंगा निल्सि मत्ते, मोमोट जीवाते मत्तापे.
- 9 मीवाहेंदाल मोमोट मना पेनदा मुन्ने वेल्ले कुसिते मंतोम. अदुना बारेमते मीवाहाटी मोमोट पेनदुक वेल्लेने दन्यवाद कीतोम.
- 10 मोमोट मीकून हळसि, मीवा विस्वासमते तक्को मत्तदुन पूरा कियाना इंचि नर्का-पिय्यल पेनदुक पारतना कीसेके मंतोम.
- 11 इंदके मना पेनबाबाल आनि मना येसु सामि, मोमोट मिहगा वायालय हरीं तयार कियिरकांटी.
- 12 मोमोट मीकून पावरम कीताप, मिमेटगुडा मीलोप्पो वरोंक-वरोर पावरम कियालय, अंतोर लोकुकुकुनतोनि पावरम बेसांलय सामि मीक सहायम कियिरकांटी.
- 13 बस्के अय्ते मना सामि येसु ओना अंतोर पवित्र लोकुकुकुनतोनि वांतोरो, अस्के मनम पेनबाबाना मुन्ने पवित्रते दोसेम हिलाकोंटा मनालय मना मनसुकुन गट्टिंगा कियिरकांटी, आम्रीन.

4

पेनदुन कूस कियाना पिस्वर

- 1 विस्वासकुनिति! बल्हा पिसते पेनदुन कूस ईरा परांतोम इंचि मिमेट मावाहेंदाल करियतिर, अल्हेने मिमेट पिस्सेकगुडा मंतिट, इंकागुडा मुन्ने अल्हेने पिस्सेक होंट इंचि विनंति कीसेके मंतोम आनि येसु सामिना लोप्पो तेल्लिचि वेहासेक मंतोम.
- 2 मोमोट येसु सामिनाहेंदाल बव-बव आदेसकु हीसि मत्तोम, अव मीक एरपाटे.
- 3 बारित्ते मिमेट बोगमतनमताल लक्कु मत्ते पवित्र मनतिर, इदे पेनदा इच्चा आंद.
- 4 मीवा लोप्पोटाल हरेक मनकल ओना मेंदुल्लुन* ओपके पीसि, पवित्र, कदर कियानालायक मनमळ गावाले.
- 5 लालचते मनानोर पेनदुन एरपाट किय्युर, असंतोरतोनि इल्हा मनमळ आयापर्रां.
- 6 दीना बारेमते बोरें आयिर दंटाता विस्वासिन पसांचामन्नि, पसांचते सामि ओर्क सिक्सा हीतोर इंचि मोमोट मीक मुन्नेने गट्टिंगा वेहतोम.
- 7 बारित्ते पेन मनाकुन पवित्र मनालय केयता, कराब मनालय आयो.
- 8 अदुनहाटी बोर अय्ते इद पोल्लेतुन पास्कंतोर, ओर मनकन पास्कोर गानि मीक पवित्र आत्मा हियना पेनदुन पास्कंतोर.
- 9 इंदके वरोंक-वरोर पावरम कियमळ मिमेट पेनदाहेंदाले करियतिर. अदुनहाटी दादाल-तम्मुह्कनालेसी मिमेट वरोंक-वरोर पावरम कीम्टु इंचि रासनद अव्वरम हिल्ले.
- 10 मिमेट मेसिडीनिया राज्यमते मनना अंतोर विस्वासकुन पावरम कीसेके मंतिट. गानि विस्वासकुनिति! मिमेट इंका एक्को पावरम कीम्टु इंचि मोमोट विनंति कीसेके मंतोम.
- 11 मोमोट मीक आदेस हीताप, सांतिते पिस्सना, बोना कबाहक ओरें कियाना, बोना कयकुने ओरें कबळ कियाना कोसिस कीम्टु.
- 12 इल्हा मत्ते मिमेट विस्वासम कियवोरा मुन्नेगुडा कदरलायक मनतिर, बोना पोरोने बर्बु आयिर.

सामिना मर्रां वायमळ

* 4:4 मेंदुल्लुन इगे मेंदुल्लुन इत्ते मुत्तोनि इंचि अर्तम.

13 विस्वासुल्लुकुनिटा! हातोर बाबरेमते मीक तेळियाकॉटा मनमळ माक इस्टम हिल्ले. बदे आसे हिल्वोर दुक्कमते मनंतुर, गानि ओरालेसी मिमेट मनमट.

14 बारित्ते येसु हासि मरा जीवाते तेदतोर इंचि मनम विस्वासम कीतोम, अल्हेने बोर अयते येसुन विस्वासम कीसि हातुर, ओर्कुन पेन येसुनतोनि पीसि वायार.

15 सामिना पोल्ले परकारम मोमोट मीक वेहानद बतल इत्ते, सामि मरा वायानस्के मनम पिस्सि मनिनागानि, हाता विस्वासुल्लुकुनका मुन्ने सामिनगा होना परीम.

16 बारित्ते सामि स्वर्गमताल हिळु रेयानुर अस्के पेद्दा आवाजते आदेस हियमळ, पेद्दा द्दाता पोल्लेते आनि पेनदा तूताकोमता आवाज कियमळ जर्गता. अस्के बोर अयते किरिस्तुनलोप्पो हातुर, ओर मुन्ने जीवाते तेदानुर.

17 पजा ओरतोनि पिस्सि मत्ता मनाकुनगुडा, मब्बु तेर्पेनपोरों वळिते किरिस्तुनतोनि कलियालय तेहकुचि ओयमळ जर्गता. इल्हा मनम बस्केळक सामिनतोनि मनंतोम.

18 अदुनहाटी इव पोल्लेनाल वरोंक-वरोर दैरेनेम हीसेक मंटु.

5

सामि वायानाहाटी तयारते मंटु

1 विस्वासुल्लुकुनिटा! अव गटाना जर्गना वेला, कालमता बाबरेमते मोमोट मीक रासाना अक्सरम हिल्ले.

2 बारित्ते नर्कटा वेलाते दोंगल बल्हा अचानक वांतोर, अल्हेने सामि वायाना रोजुगुडा मनता इंचि मीकु एरपाटे.

3 बस्के अयते लोकुल्लक, “मोमोट सांतिते मंतोम, माक वें हिल्ले,” इंचि वेहासेक मनंतुर, अस्केने पीटि मंदना मुरतळकु बल्हा नोप्पि तेदतां अल्हा, पीळा ओरपोरों अचानक वांता. ओर बल्हा कियिनागानि पिस्सुर.

4 गानि विस्वासुल्लुकुनिटा! अद रोजु दोंगानलेसी अचानक मीपोरों वायालय मिमेट बारे हीकटते हिल्लिर.

5 मिमेट अंतोर वेल्यु आनि पोद्दलता पिलाल्क आदिर, मनम नर्का आनि हीकटतोरम आयोम.

6 अदुनहाटी मनम वेरेंतोरालेसी मीडसि मनमळ आयो गानि तेल्चिते, उसारते मंदकोम.

7 मीडानोर नर्कळक मीडंतुर, रिम्मा आयानोर नर्कळके रिम्मा आंतुर.

8 गानि मनम पोद्दलतोरम आताहाटी सांतिते मंदकोम. मना चातितुन कापाळना कच्चिता अंगिलेसी विस्वासम आनि पावरमते ताककोम. मना तल्लक टोपिलेसी मुक्तिता आसे इरकोम.

9 बारित्ते पेन मनापोरों होंग हुप्सालय आयो, गानि मना येसु किरिस्तु सामिनाहेंदाल मुक्ति दोर्किच्चुनालय मनाकुन निलाहता.

10 मनम हाथिना, पिस्सिना किरिस्तुनतोनि मंदना इंचि ओर मनाहाटी जीवा हीतोर.

11 अदुनहाटी, मिमेट इंदके कीसेके मंतिट अल्हेने वरोंक-वरोर दैरेनेम हीम्पु, वरोन-वरोर विस्वासमते निलाहट.

आकिरता पोल्ले

12-13 विस्वासुल्लुकुनिटा! बोर अयते मीवा नड्डुम कस्टपळसि, सामिना हर्दे मीकुन मुन्ने अर्सि ताकिचेके कराहंतुर, ओर्क मिमेट कदर हीम्पु. ओर कियाना बेसता कबाहकुनाहाटी पावरमते ओर्क एक्को मान-मर्यादा कीम्पु, वरोंक-वरोर बेस सांतिते मंटु, इंचि मीकु विनंति कीतन.

14 मावा विस्वासुल्लुकुनिटा! लंडोर्कुंक समजांचि वेहाट, वेरियानोर्कुंक दैरेनेम हीम्पु, कमजोर मत्तोर्कुंक सहायम कीम्पु, अंतोरतोनि ओक्तेते मंटु इंचि मोमोट मीक तेळियागोट्सि विनंति कीसेके मंतोम.

15 मीलोप्पो बोरन्ना सेड्डातनमता बदला सेड्डातनम कियकॉटा हळकुंट. गानि बस्केळक वरोंक-वरोर आनि अंतोराहाटीगुडा बेस कियालय कोसिस कीम्पु.

16 बस्केळक कुसिते मंटु.

17 बस्केळक पारतना कीसेके मंटु.

18 अन्नि परिस्तितिने मिमेट पेनदुक दन्यवाद कीम्पु, बारित्ते मिमेट येसु किरिस्तुनलोप्पो इल्हे मंदना इंचि पेनदा इच्चा मंता.

19 पवित्र आत्माता वेलगुन पिस्सुमट.

20 पेनदा कब्रुतोरु पोल्लेन पास्कमट.

21 गानि अन्निदुन परिक्सा कीसि हळ्हाट, बव बेसतवो अबुन पीसि मंटु.

22 अन्नि तीरकुना कराब पोल्लेनाल लक्कु मंटु.

23 सांति हियना पेने कुद मीकुन पुरागा पवित्र किथ्यिकांटी, मावा येसु किरिस्तु सामि मर्रा वायानादाका मीवा आत्मातुन, जीवातुन, मेंदुलतुन दोसेम हिलाकोटा कापाळिकांटी.

24 मीकुन केयता पेन विस्वासमगल्लद आंदु, अद अल्हेने कीता.

25 विस्वासुल्कुनिटा! मावाहाटी पारतना कीम्टु.

26 अंटोर विस्वासुल्क, वरोक-वरोर कय कल्पिसि पवित्र पावरमते जोहार कीम्टु.

27 इद सिट्टि अंटोर विस्वासुल्क केंजानाल हाद्विसि हृप्सा इंचि नना सामिना अदिकारमते वेहासेक मंतन.

28 मना सामि येसु किरिस्तुना कुर्पा मीपोर्री मन्निकांटी. आमेन.

2 तेसलोनि

तेसलोनि विस्वासुल्कुंक पौलसना रोंडो सिट्टि

इद सिट्टिटा बारेमते गिचचो परिचयम

रासतोना पोरोल: पौलस

रासता कालम: इसवि सन 50-54

इद सिट्टि पौलस रासतद आंदु. पौलस तेसलोनि सहरता विस्वासुल्कुंक मोदाटा सिट्टि रासता कोन्नि रोजकुना पजा, अगटा विस्वासुल्कुना लोप्पो पूना परिस्तिती सुख आता. अद बतल इत्ते, “सामि मल्सि वायाना रोजु वाता” इंचि रासतदुन ओर बचचुंगो तीरकुना अर्ताल्कु तेंडालय दल्गतुर. इच्चुर लोकुल्कुनद सामिना न्यायम सुख आता इंचि ओरा विचारम मत्ता. अदुनहाटी दुनिया मुळगाना वेला दगैरेने मंता इंचि कबळ कियार्कोटा, ओर लंडु आसि मनुंदुर.

इसोंटा तप्पुड विचाराल्क, ओरा मनसुनाल तेंडसि पोहालय पौलस तेसलोनि सहरता विस्वासुल्कुंक रोंडो सिट्टि रासतोर. अल्हेने, “सामि मल्सि वायाना रोजु वाता” इंचि इच्चुर इनुंदुर, अद पोल्ले ओर्क बेस तेळियागोम इंचि पौलस इद सिट्टि रासतोर.

बगा बतल मंता

जोहार आनि परिचयम 1:1-2

स्तुति आनि आदेसाल्क 1:3-12

किरिस्तु मर्रा वायाना बारेमते समजांचि वेहामळ 2:1-17

किरिस्तु वेहताप पिस्साना बारेमता बोदां 3:1-15

आकिरता बोदां 3:16-18

जोहार

1-2 नना पौलस,* सिल्वानुस आनि तिमोति मोमोट इद सिट्टि मीकु तेसलोनि सहरते मंदना कलिसियातोर्कुंक रासेक मंतोम. मना पेनबाबाल आनि सामि येसु किरिस्तुनाहेंदाल कुर्पा, सांति दोर्किंकाटी.

तेसलोनि विस्वासुल्कुना विस्वासम आनि पिस्वर

3 विस्वासुल्कुनिटा! मीवा विस्वासम वेल्ले बेरस्सेक मंता, मिमेट वरोन-वरोर कीकुनना पावरम वेल्ले बेरस्सेक मंता. अदुनहाटी मोमोट बस्केळ्ळक मीवा बारेमते पेनदुक दन्यवाद कियमळ गावाले. इदे बरोबर मंता.

4 अचोने आयाका मिमेट तकलिपकुन, बादन ओप्के पीसि पेनदा लोप्पो गट्टिगा विस्वासमते निल्सि मंतर. अदुनहाटी मोमोट मीवा बारेमते पेनदा कलिसियाने पेदुदातनम वेहकुंचेके मंतोम.

5 इद पेनदा सल्लेम न्यायमता रूजुव आंदु. मिमेट पेनदा राज्यमते होननालायक आयागोम इंचि इवन्नि बादां अरसेक मंतर.

6 बोर अयते मीकुन तकलिप कीतुर, दानकु बदूल पेन ओर्क तकलिप हियमळ न्यायमे आंद.

7 बस्के अयते सामि येसु ओना बलमगल्ला दूतनतोनि पोल्तना तळमिटे स्वर्गमताल दिस्सानुर, अस्के तकलिपते मत्तोर्कुंक आनि माकु सांति हियानुर.

8 बोर अयते पेनदुन एपाट किय्युर, बोर अयते मना सामि येसुना बेसता कबुरतुन पीसि ताकुर, ओर्क पेन सिक्सा हिट्यार.

9 ओर सामिना मुनेटाल आनि ओना ताकतता महिमाताल लक्कु आसि ओर्क बस्केळ्ळक मनना नासडेमता सिक्सा आयाार.

10 बस्के अयते येसु सामि मर्रा वायानुर अस्के ओना पवित्र लोकुल्कुनाहेंदाल महिमा एतंतोर आनि विस्वासम कीतुर अंतोराहेंदाल ओर पेदुदातनम दोर्किंच्कुंतोर. बारित्ते मोमोट वेहता गवाइतुन मिमेट विस्वासम कीतित.

11 इदुनहाटी, मना पेन मीकुन बताहाटी अयते केयता अदुनलायक मिमेट मनालय, अन्नि बेसता कबाहक पूरा कियालय आनि विस्वासमतव पूरा कबाहक पेनदा ताकततोनि पूरा आयालय मोमोट मीवाहाटी बस्केळ्ळक पारतना कीसेके मंतोम.

12 इल्हा मना पेन आनि मना सामि येसु किरिस्तुना कुर्पातुन पीसि, मीवाहेंदाल मना येसु सामिना पोरोल्क कदर दोर्काना आनि ओनहेंदाल मीक कदर दोर्काना.

* 1:1-2 इद सिट्टि पौलस रासतोर, सिल्वानुस आनि तिमोति ओनतोनि नमस्कारम वेहदु.

2

सेड्डा पोल्ले जर्गतां

1 विस्वासुल्कुनिटा! इंदके मना सामि येसु किरिस्तु मरा वायाना बारेमते, आनि मनम जमा आसि ओनतोनि कलियाना बारेमते मीक विनंति कीसेके मंतोम.

2 अद बतल इत्ते, सामि मल्लिस् वायाना रोजु वाता इचि मिमेट आत्माताहेंदाल* आयि, पोल्लेताहेंदाल आयि, मावाहेंदाले सिट्टिट वाता इत्ताप आयि मीक केंजा वाते, मीवा मनसुन हीके-हेके आया हियमट, वेरियमट.

3 बोरे आयिर बदे रीतुने मीकुन दोका किया हियमट; बारित्ते मुन्ने वरोना पोल्ले वरोर केंजाकोटा आयाना कालम वायार, पजा पेनदा पोल्लेतुन विरोद कियाना नासडेमता मरि दिस्सानुर, दाना पजाने किरिस्तु मरा वायाना रोजु वायार.

4 आ नासडेमता मरि, पेन इचि इनानवुन अन्निन, मनकालोर मोळकानवुन अन्निन विरोद कीसि, ओनद ओरे पेदूदोन इचि वेहकुंतोर. ओर पेनदालेसी पेनदा गुळिते होंचि उदूदानुर, आनि ननाने पेनदुन इचि वेहकुनानुर.

5 नना मीवातोनि मत्तस्के इव पोल्ले वेहतन, मीक मति हिल्लेना?

6 पेनदा पोल्लेक विरोदमते तिरियानोर ओना वेला वातारित्तेन दिस्सानुर, इंदके ओन बतल आपसेके मंतानो मीक एरपाटे मंता.

7 पेनदा पोल्लेतुन विरोद कियानोना मर्ममता ताकत इंदकेगुडा कबळ कीसेकेन मंता; गानि दान आपानोन पक्कक कियानादाका पेन ओन आपसेकेन मंता.

8 बस्के अयते पेनदा पोल्लेतुन विरोद कियानोर दिस्सानुर, अस्के येसु सामि ओना तोळ्दा ऊपरते ओन हक्किसि, ओर वायानेके दिस्सना वेलगुने ओन नासडेम कियानुर.

9 पेनदा पोल्लेतुन विरोद कियानोर वायमळ इत्ते, देय्यमतदे उंदि कबळ आंदु, ओर वासि आबदूदम पोल्लेने देय्यमतव अन्नि ताकतकुनतोनि चिन्हां, इचंन्रमता कबाहक कियानुर.

10 पजा कराब कबाहक कीसि नासडेम आयानोर्कुन अन्नि तीस्कुने पसांचंतोर. बारित्ते बद सत्तेमतुन अयते पावरमते ओपकुचि मत्ते मुक्ति दोर्किस मनवळ, ओर अदुन ओपकुन्ना हिल्लुर.

11 अदुनहाटीं ओर आबदूदमतुने विस्वासम किय्यिर इचि पेन ओरा लोपो गयबेत कियाना सक्तितुन लोहंता.

12 बचुदुर अयते सत्तेम पोल्लेतुन विस्वासम कियवा, कराब कबाहकुने कूस आंतुर, ओर अंतोर्क पेन सिक्साता आदेस हिय्यार.

13 सामिना पावरमगल्ला विस्वासुल्कुनिटा! मिमेट पवित्र आत्माताहेंदाल पवित्र आसि, सत्तेमते विस्वासम ईरिं पिसालय पेन मीकुन मुन्नेने पेरता. अदुनहाटीं माकु मीवा बारेमते पेनदुक बस्केळ्ळक दन्यवाद कियमळ गावाले.

14 इल्हा मिमेट मना सामि येसु किरिस्तुना महिमातुन दोर्किचकुनना इचि, पेन मोमोट वेहता बेसता कबुरताहेंदाल मीकुन केयता.

15 अदुनहाटीं विस्वासुल्कुनिटा! गट्टिगा निल्लिस मंटु, मावा तोळ्दाल पेयसता पोल्लेहेंदाल, सिट्टिटाल बव रीति-रिवाजकु अयते मीक कराहतोम अवुन पीसि ताकट.

16 मना सामि येसु किरिस्तु आनि पेनबाबाल मनाकुन पावरम कीसि, ओना कुपहेंदाल बस्केळ्ळक मनना सांति, बेसता आसे हीतोर.

17 मीवा हरेक बेस कबळते, हरेक पोल्लेते पेन मीकुन गट्टिगा किय्यिकांटी, इंका मीवा मनसुने सांति हिय्यिकांटी.

3

माहाटी पारतना कीम्टु

1 विस्वासुल्कुनिटा! मीक आकिरते वेहानद बतल इत्ते, सामिना पोल्ले मीलोपो पैलांचतापे, वेरितोरा लोप्पोगुडा बिराना पैलांचि पेदूदातनम दोर्कनाहाटी पारतना कीम्टु.

2 अल्हेने अंतोर लोकुल्क विस्वासुल्क आयुर, अदुनहाटीं तेडा आनि दुस्ट लोकुल्कुनाल पेन माकुन पिसागोट्टि.

3 गानि सामि विस्वासमगल्लोड आंदुर; ओर मीकुन देय्यमतता कयदाल कापाळसि गट्टिटिगा निलाहंतोर.

4 मोमोट आदेस हीताप मिमेट ताकसेके मतिट. मुन्नेगुडा अल्हे ताकतिर इचि सामिन लोपो माक मीवा बारेमते बरोसा मंता.

5 सामि मीवा मनसुकुन पेनदा पावरमते अल्हेने किरिस्तुना गट्टि ओपकेते ताकसा परांतोर.

जिम्वेदारिते कबळ किय्याना

6 विस्वासुल्कुनिटा! बोरे अयते लंडु आसि मंतुर, मोमोट वेहता रीति-रिवाज परकारम ताकसेक हिल्लुर, असोटा हरेक मनकानाल लक्कु मंटु इचि मना सामि येसु किरिस्तुना पोरोलते मीक आदेस हीसेक मंतोम.

* 2:2 आत्माता बविस्यवानि.

- 7 मोमोट मीवातोनि मत्तस्के लंडु आसि मना हिल्लोम, अदुनहाटी मालेसी बल्हा ताकाना इंचि मीक कुद एरपाटे मंता.
- 8 मोमोट बोनगागुडा पुक्कटता गाटो तिना हिल्लोम, मी लोप्पोटाल बोनके बर्वु आयामन्नि इंचि नर्का-पिय्यल कबळ, कस्टम कीसि गाटो तिल्लोम.
- 9 माक मीपोरो बर्वु आयाना अदिकारम हिल्ले इत्ताप आयो, गानि मिमेटगुडा मावालेसी मंदना इंचि मीक हुप्सालय मोमोट कबळ कीसि तिल्लोम.
- 10 मोमोट मीवातोनि मत्तस्के, “बोर्कन्नागिटा कबळ क्रियानद हिलाकोटे, ओर गाटो तिनामन्नि” इंचि आदेस हीसि मत्तोम.
- 11 गानि मिहगा इच्चुर लोक्कुलक लंडोर्क मंतुर, ओर बतले कबळ किय्युर, सिराप इंकावरोना जोलिक होनना कबाहक कीसेके मंतुर इंचि मोमोट केंजतोम.
- 12 असोटा लोक्कुलक चुपचाप कबळ कीसि ओरा पिस्वरता कमाइ कियिरकांटी, ओर्क मोमोट सामि येसु किरिस्तुना पोरोलते आदेस हीसि, बुद्दि वेहंतोम.
- 13 विस्वासुल्कुनिटा! मिमेट बेसता कबाहकुने नेरबळताप मनमट.
- 14 बोरन्नागिटा इद सिट्टिंते रासता पोल्लेन केंजसि ताकाकोटे, ओनपोरो नदर इराट, ओनकु सिग्गु वायागोम इंचि ओनतोनि दंटा पियमट.
- 15 अयना ओन पगातोन्लेसी हळमट, गानि तम्मुनालेसी ओन्क वें वेहाट.
- आकिरता पोल्लें
- 16 कुद सांति हियना सामि, बस्केळ्क अन्नि तीस्कुने मीक सांति हिय्यिर, बस्केळ्क मी अंतोरतोनि मन्निरकांटी.
- 17 नना पौलसुन आंदुन, नावा कयदेने मीक जोहार रासेक मंतन. अन्नि सिट्टिंते इद नावा आनवल आंद, नना इल्हे रासंतन.
- 18 मना सामि येसु किरिस्तुना कुर्पा मी अंतोरतोनि मन्निकांटी.

1 तिमोति तिमोतिकु पौलसना मोदाटा सिट्टि

इस सिट्टिता बारेमते गिचचो परिचयम

रासतोना पोरोलः पौलस

रासता कालमः इसवि सन 64

इद सिट्टि पौलस ओना मरिनसोटा तिमोतिकु रासतोर. इपीसि सहरते मनना विस्वासुलुकुन पेन हूपिस्ता हरदाल तपसनाहाटी तप्पुड बोदा कराहनोर वेल्लेन लोकुकल्क तयार आतुर. अयते आ तप्पुड बोदानाल अगटा विस्वासुलुकुन बल्हा तपिचचना, ओर्कुन विस्वासमते बल्हा गट्टिगा किय्याना, इंका ओर अंतोरतोनि बल्हा कलियसि-मेलियसि बक्विते मनना. इसॉटव वेल्लेन पोल्लेन पौलस इद सिट्टिते रासि तिमोतिकु हिम्मत हीतोर.

पेन उंटे आंद. इंका पेनदाल लक्कु आता अंतोर लोकुकुकुन मर्रा पेनतोनि कल्पानोरगुडा वरारे आंदूर. औरे मनकना रूपमते पुटता पेनदा मर्री येसु किरिस्तु. अंतोर लोकुकुकुना पापालक मापि आयनाहाटी येसु कुद्दु कूसुनपोर्री ओना जीवातुन हीतोर. इचोने आयका अंतोर विस्वासुल्क वरैतोरतोनि बल्हा मान-मर्यादाते मनना, पेन हूपिस्ता हर्दे बल्हा ताकाना इल्हा वेल्लेन पोल्लेन तिमोतिकु इद सिट्टिते पौलस रासि लोहतोर.

बगा बतल मंता

जोहार आनि परिचयम 1:1-2

कलिसिया आनि अगाटा अदिकारलुकुना बारेमते समजांचि वेहामळ 1:3-3:16

तिमोतिकु ओना कबाह्कुना बारेमते समजांचि वेहामळ 4:1-6:21

तिमोतिकु पौलसना जोहार

1 इद सिट्टि पौलसुनद आंद. मनम बोनपोर्री अयते आसे पडसि मंतोम, आ किरिस्तु येसु आनि मनाकुन कापाळाना पेनदा आदेसताहेंदाल नना किरिस्तु येसुना प्रेरित* आतन.

2 विस्वासमते नावा निजम मर्री आता तिमोतिकु इद सिट्टि रासतन. मना पेनबाबानाहेंदाल आनि मना सामि येसु किरिस्तुनहेंदाल नीकु कुर्पा, दया आनि सांति दोर्कि.

तप्पुड बोदानाल जेगर्ता मनना बारेमते

3 नना मेसिडोनिया राज्यमे होननेके नीकु नना विनंति कीसि वेहतन. दाना परकारम निमे इपीसि सहरते मन्नु. निमे अगा मत्ते, बोर अयते सत्तेमकु बदल वरै बोदां कराहंतुर, ओर्कुन अल्हा कराहकोटा आपा.

4 पुट्टिचि वेहना कतां, वंसालुकुना जोली ओर होळसियालय आदेस हीम. बारित्ते अबुनहेंदाल वाद-विवादकु आंतां विस्वासमहेंदाल जर्गना पेनदा पिलानगुडा पुरागा आयो.

5 ई आदेसता उद्देसम, पवित्र गुंडेताल, मनसुना बेस पोल्लेताल आनि निजम विस्वासमताल पुट्टना पावरम आंद.

6 इच्चुर लोकुकल्क इवनाल तपिप्सि वाट्टि पोल्ले वळ्कालय दल्गतुर.

7 ओर वेहना पोल्लेना अर्तम बतलो ओर्के तेळियाकोन्ना, गट्टि विस्वासमते ओर, मूसाना नियमालुकुना गुस्लक आयाना इनकुंचंतुर.

8 मूसाना नियमकुने मत्ताप बरोबर ताकानयते, अद मंचिदे इचि माकु एरपाटे.

9 इंका इव नियमकु नीतिमंतलुकुनाहाटी रासमळ जर्गाहिल्ले. गानि अब अयते, नियमकुन पीसि ताकबोराहाटी, आदेसकुन पीसि ताकबोराहाटी, बक्वि कियवोर आनि पापि लोकुकुकुनाहाटी, अपवित्र आनि सत्तेमते ताकबोराहाटी, तल्लुर-बाबोन ह्क्कानोराहाटी, मनकालोर्कुन ह्क्कानोराहाटी,

10 बोगमतनम कियानोराहाटी, मांडसा-मांडसातोनि बोगमतनम कियानोराहाटी, मनकालोर्कुन दोर्कापीसि अम्मनोराहाटी, आबद्दम वळ्कानोराहाटी, तप्पुड गवाइ वेहानोराहाटी इंका सत्तेम पोल्लेन आबद्दम कियानोराहाटी ई मूसाना नियमकु मंतां.

11 तलसकुननालायक पेनदाहेंदाल वाता महिामाय बेसता कब्रतुन नना कराहना इचि नाकु अप्पजेपमळ जर्गता.

पौलसुनपोर्री पेनदा दया मंता

* 1 प्रेरित इद पोरोकल "पेन लोहचीतोर" इचि अर्तम. येसु पन्नेड मदितुन पेरुकुत्तोर औरे प्रेरितुल्क आंदूर.

12 मना सामि येसु किरिस्तु नाकु बलम हीतोर अदुनहाटी नना ओन्क दन्यवाद कीतन. इंका नाकुन विस्वासम लायकतोर इन्कुचि ओना सेवाताहाटी निलाहतोर.

13 मुन्ने नना बदनाम कियंदुन, तकलिप हियंदुन, तेंडसि पोहचि वळ्ळुंदुन. अयना नाकु सामिना दया दोर्कता, बारित्ते नना कियानद बतलो तेळियका, अविस्वासमते अल्हा कीतन.

14 मना सामिना कुर्पा नाकु वेल्लेन दोर्कता. अचोने आयका, येसु किरिस्तु ओनगा मनना विस्वासम आनि पावरमगुडा नाकु हीतोर.

15 पापिर्कुन पिसागोटनाहाटी येसु किरिस्तु इद दुनियाते वातोर. ई पोल्ले सत्तेम आनि पूरा ओपुकुननालायक मंता. अंटोर्कन्ना पेद्दा पापिन नना आंदुन.

16 अयनागानि येसु किरिस्तु नापोरों दया हुपिस्तोर. अल्हा दया हुपिचिचि, मुन्ने बोर अयते बस्केळ्ळक पिस्सना पिस्वर दोर्कना इंचि ओनपोरों विस्वासम कीतुरो, ओर्क ओना अंतेम हिल्लुवा सहनमतुन हुपिचनाहाटी उंदि उदाहरनता रूपमते नावसोंटा पापिन इरतोर.

17 बस्केळ्ळक मनना राजाल, बस्केने नासडेम आयवोर, बस्केने दिस्सोर असोंटा मावा उंदे पेनदुक पीळि-पीळिनदाका कदर, पेदातनम दोर्कि. आमीन.

तिमोतिना जिम्मेदारि

18-19 कोको तिमोति! पेनदा कबुरतोर नीवा बारेमते मुन्ने बव पोल्ले अयते वेहचि मत्तुरो, आ पोल्लेना परकारम, निमे नीवा विस्वासमतुन गाट्टिगा पीसि, मनसुना बेस पोल्ले पीसि वरोर बेस सिपाइलेहका लडाइ कीसेके मनना इंचि नना नीकु आदेसतुन अप्पजेपसंतन. बारित्ते मनसुना पोल्लेतुन हय्सका वेल्लेन मंदि लोकुल्क, उंदि डोंगा रोंडु तुकडां आसोताप, ओर ओरा विस्वासमतुन नासडेम कीकल्लुत.

20 विस्वासमतुन नासडेम कीकल्लुतोरवेटाल हुमिनयस आनि सिक्कंदर ईर इव्वुर मंतुर. पेनदुन बदनाम कियकोटा बल्हा मनना इत्ता पोल्ले करियना इंचि नना ईर्कुन देय्यम्क अप्पजेपतन.

2

मूर्ताहक-मांडसताहाटी नियमकु

1 अन्तिकन्ना मुन्ने नना नीकु विनंति कीतन गदा, पेनदुक विनंति कियनेके, पारतना कियनेके, वरोनाहाटी वरोर पारतना कियनेके, दन्यवाद कियनेके अंतोर लोकुराहाटी कियगोम.

2 मनम राजालोराहाटी आनि पेद्दा-पेद्दा अदिकारिल्लुकुनाहाटी पारतना कियगोम. अल्हा कीते मनम आरामते, सांतिते आनि पेनदुक नचचना कदरगल्ला पिस्वर पिसा परांतोम.

3 इल्हा कियमळ मंचिद आंद. मनाकुन कापाळना पेनदा नदरतेगुडा इदे ओपुकुननालायक मंता.

4 लोकुल्क अंटोर्कुंक मुक्ति दोर्कना आनि निजमतुन एपाट कियना इंचि पेनदा इच्चा मंता.

5 बारित्ते पेन उंदे आंद. इंका मनकन आनि पेनदुन कल्पालय नड्डुमगुडा वरोरें मंतोर. ओरगुडा वरोर मनकले. ओरे किरिस्तु येसु आंदुर.

6 अंतोर लोकुल्कुंक मुक्ति अस्सि हियनाहाटी ओर सततुन कुदुवा इरसि ओनद ओर अप्पजेपकुल्लोर. मंचि वेलापोरें ओना गवाइ हीतोर.

7 इदे गवाइतुन वेहनाहाटी, नाकुन प्रचार कियानोर प्रेरित इंचि पेरमळ जर्गता. इंका यहुदि आयवोर्कुंक विस्वासम आनि सत्तेमता बारित्ते कराहनोर इंचि निलाहमळ जर्गता. नना निजम वेहचंतन, आबदुदम वेहासेक हिल्लेन.

8 अदुनहाटी पारतना कियना अन्नि जेगाने मनसुने बतले होंगु-जगडम इर्रांकोटा पवित्र कक्कु पोर्रां तेहचि मांडसा पारतना कियना इंचि नावा इच्चा मंता.

9-10 अल्हेने मूर्ताहकुना हेंदाल नना कोरानद बतल इत्ते, अव सादा-सिपल कपडिं पोंडसि, साप मनसुने मनगोम. इंका बेस कबाहक कीसि पेनदा बेस बक्ति कियनावुनलेसी मनगोम. गानि बंगाराल्क, डिस्को पूसाना दुम्मे वाटकुचि, वेल्लेन दराता कपडिं केरसि, रका-रकाल्लुना जेडां वाटसि सिंगाराल्क अर्रांनायो. बारित्ते मूर्ताहकुंक अदे बेस.

11 मुरतळ सिराप सांतिते कय हिळु मंचि अन्नि करियगोम.

12 उंदि मुरतळ, मांडसक कराहमळ, ओनपोरों अदिकारम ताकिचमळता बारेमते, नना ओपुकुन्नोन. मुरतळ सिराप चुपचाप मनगोम.

13 बारित्ते पेन मोदाला आदामुन कीसि पज्जोटाल हव्वान कीता.

14 इचोने आयका, आदाम पसांचा हिल्लोर गानि मुरतळ पसांचि पापमते अरता.

15 गानि अद ओक्कला विस्वासम, पावरम, पवित्र आनि ओप्केते पिलाल्क कंचेके तल्लुना जिम्मेदारि पूरा कियानय्ते, दानकु तप्पाकोटा मुक्ति दोर्कार.

3

कलिसियाता अदिकारिल्क बल्हा मनना?

1 ओक्कला बोरेन्ना मनकल कलिसियाता पेद्दा मनकल आयना मनसु इरते, ओर तप्पाकोटा बेस कबळ कियना इनकुंतोर, इत्ता पोल्ले मात्रम निजम आंद.

2 पजा आ पेद्दा मनकना पिस्वरते बतले दोसेम मननायो. ओर उंदे मुरतटा मुय्दो आयगोम, ओर ओप्के पीसि मनानोर आयगोम, ओर विचारम कीसि ताकानोर आयगोम, अंतोर ओना कदर कियनालायक ओर मनगोम, ओर वैरेतोर्कुन बेस हळकुनानोर आयगोम आनि वैरेतोर्क करारहनालायकगुडा मनगोम.

3 इंका ओर कल्लु उनानोर, मर्लाबळानोर, जगडम कियानोर मनामन्नि गानि मेत्तटा मनसुनोर मनगोम. ओन्क कोत्तना लालच मनामन्नि.

4 ओर ओना सतता कुटुंब बारेमता अन्नि जिम्मेदारि बेस हळकुनानोर मनगोम, ओना मर्क-मियाहक ओना देकरेकते मंचेके ओना बेस कदर कियनोर मनगोम.

5 बारित्ते वरोर मनकंक ओना कुटुंबता देकरेक किय्युडे तेळियाकोटे, ओर पेनदा कलिसियाता देकरेक बल्हा किया परांतोर?

6 इंका ओर पूने-पूने विस्वासमते वातोर आयामन्नि, बारित्ते असंतोक्कु गर्रा वासि देय्यम्क दोर्कानसोटा सिक्साता आदेस ओन्क दोर्कार.

7 इचचोने आयका वेरे लोकुल्लुकुना विचाराल्कगुडा ओना बारेमते बेस मनगोम. अल्हा मनाकोटे ओर सिग्गु पोळगोट्टुकुचि देय्यमता कय्दुक दोर्का परांतोर.

कलिसियाता सेवक

8 कलिसियाता सेवाकुल्लुकुगुडा अल्हेन कदरलायक मनना. ओर रौंड नाल्केनोर इत्ते चुगली कियानोर मनामन्नि, ओर्कु कल्लु उनना अलवट मनामन्नि, ओर तप्पु कबाहक कीसि संपादिचनोर मनामन्नि.

9 ओर विस्वासम बारेमता मर्ममतुन मनसुना बेस पोल्ले वेहताप तेल्पिचकुचि दान गट्टिगा पीसि मनानोर आयगोम.

10 ईरा गुनम बसंतदो तेळियनाहाटी ईरदगुडा परिकसा येतगोम. परिकसाते ओरगा बतले दोसेम दोर्काकोटे, ओर्कुन कलिसियाता सेवक इंचि कबळ किया हियना.

11 इल्हेने मुर्ताहकगुडा अंतोर कदर हियनलायक मनगोम. अबुनगा वैरेतोर्कुन अपमानम कियना गुनम मनामन्नि. गानि बेस ओप्केते अन्नि पोल्लेने विस्वासम कियनलायक अबु मनगोम.

12 कलिसियाता सेवाकुल्लुकु उंदे मुत्तो मनगोम. ओर ओना सतता मर्क-मियाहक आनि ओना संसारमतुन बेस ताकसानोर आसि मनगोम.

13 बारित्ते बोर अय्ते सेवक इंचि कबळ कीतोर ओर बेस कदर दोर्किचकुना परांतोर. अचोने आयका किरिस्तु येसुना पोर्रो मनना ओना विस्वासमते ओन्क वेल्लेन दैरेनेम दोर्कता.

मना विस्वासमता मर्मम

14-15 नाकु निहगा बिराना वायना आसे मंता. गानि ओक्कला नाकु वायालय आल्सेम आते, पेनदा कुटुंबते, इत्ते जीवाते मनना पेनदा कलिसियाते वरोर मनकल बल्हा मनगोम इत्ता पोल्ले नीकु एरपाट आयगोम इंचि इद सिट्टि रासेक मंतन. बारित्ते कलिसिया निजमता निटड गुंजा आनि पुनादि आंद.

16 मना बक्तिता सत्तेमता मर्मम वेल्लेन पेद्देद, इव्टे बतले अनमानम हिल्ले: किरिस्तु मनकना रूपमते पुटतोर, ओनगा बतले दोसेम हिल्ले इंचि पवित्र आत्मा वेहता, पेनदा दूतांक ओर दिसतोर, ओना बारेमते दुनियाता अन्नि देसेल्लुकुना लोकुल्लुकु प्रचार कियमळ जर्गता, दुनियातोर ओनपोर्रो विस्वासम इरतुर आनि पेनदा कदरते ओन मर्ग स्वर्गमते तेहामळ जर्गता.

4

तप्पुड बोदानाल जेर्गता!

1 वायना रोजकुने, इचचुर लोकुल्लुकु दोका हियना आत्माना बोदां आनि देय्यमता पोल्लें केंजसि ओरा विस्वासमतुन होळसंतुर, इंचि पवित्र आत्मा किलियर वेहंता.

2 बोरा बोदां अय्ते काचाहता सलाकिते बोळिसि हासोचि मंतां, असोटा दोका हियानोर आनि आबद्दम वळकना मनकालोराहेंदाल इल्हा जर्गता.

- 3 मरमि आयामन्नि इंचि ओर कराहंतुर, इंका बव वस्तुक अय्ते पेन दाना विस्वासुल्कुनाहाटीं आनि निजमतुन एरपाट कियनोराहाटीं दान्क दन्यवाद हीसि तिनालय कीता, अव कोन्नि वस्तुकुन तिनामन्नि इंचि ओर कराहंतुर.
 4 गानि पेन कीता अन्नि वस्तुक बेसतवे आंद. पेनदुक दन्यवाद कीसि तिल्ले बवे वस्तुक मन्नि इननालायक मन्नों;
 5 बारिल्ले पेनदा पोल्ले आनि पारतना अद वस्तुन पवित्र कीता.

किरिस्तुना बेस सेवक आयगोम

- 6 ओक्कला निमे इव आदेसकुन विस्वासुल्कुंक कराहनय्ते, निमे विस्वासम कियना बव पोल्ले आनि सत्तेम बोदानापोरों ताकंतिनो अवनहेंदाल बेरसता, येसु किरिस्तुना वरोर बेस सेवक आकिन.
 7 बक्ति हिल्लव अल्हेन तयार कीसि वेहना कतानाल मंट. बस्केळ्ळक बक्ति पिस्वरते मुन्नेळ्ळक ताकाना कोसिसते मंट.
 8 बारिल्ले भेंदुलताहाटीं कियना टेरनिंगते गोडच्चेन पायदा मंता. गानि पेनदा बक्ति कीते, अव्टे अन्नि तीरकुना पायदा मंता. इंदकेटा पिस्वर आनि मुन्नेटा पिस्वरहाटीं पेन हीता पोल्ले अव्टे कलियसि मंता.
 9 ई पोल्ले पुरागा ओप्कुननालायक आनि विस्वासम कियनलायक मंता.
 10 इदुनाहाटीं गें मनम बागा कस्टपळसेके, पोराटम कीसेके मुन्नेळ्ळक ताकसेके मंतोम. बारिल्ले मनम मना आसे, बस्केळ्ळक जीवाते मननद आनि अंतोर लोकुल्कुन कापाळना पेनदापोरों इरतोम, विसेस कीसि दान विस्वासम कियानोर्कुन पिसागोटना पेनदापोरों इरतोम.
 11 इवे पोल्ले कियालय आदेस हीसि अंतोर्क करहा.
 12 नीवा लेख्यातनमहेंदाल बोरे नीकुन सिन्नागा हळानायो. गानि वळ्ळुकुमळ्ळते, ताकमळ्ळते, पावरम ह्पसमळ्ळते, विस्वासमते, पवित्र मनमळ्ळते विस्वासुल्क नीकुन हळसि करियगोम, अल्हा मन्नु.
 13 नना बदवेरदाका अय्ते वायोनो अदवेरदाका निमे अंतोर नड्डुम दर्मसास्त्रमतुन हदसुसेके, प्रचार कीसेके, कराहसेके मन्नु.
 14 पेदुदाल्क नीपोरों कय्क ईसि पारतना कियनेके, बविस्यवानि कियानोर वेहता आ वरम नीकु दोर्कता. अद वरमतुन निमे वाळ्ळुकुन, दान मति मर्गुमा.
 15 इवे पोल्लेन निमे नीवा मनसुने ईसि अवुना परकारमे ताकसेक मन. अस्के निमे बक्तिते बेस बेर्सनद अंतोर लोकुल्कुंक दिस अर्स्ता.
 16 निमे नीवा पिस्वर बारेमते आनि निमे वेहना पोल्लेन बारेमते वेल्ले जेर्गताते मन. अल्हा मत्तिनिल्ले, नीवद निमे कापाळकुंतिन, नीवा पोल्ले केंजानोर्कुनगुडा कापाळ्ळतिन.

5

बोनतोनि बल्हा वळ्ळकना बारेमते कोन्नि पोल्ले

- 1 पेदुदा वयम मनकन तेराहाताप वळ्ळुकुमा, गानि ओन नीवा बाबाल इन्कुचि ओन्क तेल्लिचि वेहा. सिन्नेर्कुन तम्मुर इन्कुचि ओरतोनि व्यवहार कीम.
 2 अल्हेन पेदुदा वयम मुर्ताह्कुन यावह्क इन्कुचि आनि सिन्ना वयम मुर्ताह्कुन हेलाह्क इन्कुचि पुरागा पवित्र मंचेके अवुंक तेल्लिचि वेहा.
 3 बव मुर्ताह्क अय्ते निजम मुंडामोसि मंतां, अवुना निमे कदर कीम.
 4 ओक्कला बदुदना मुंडामोस्ता मुरतळ्ळक मर्क-मियाह्क आयि, तंगमर्क-मियाह्कगिटा मत्ते, मोदाला ओर बेस बक्तिते ताकसेके सतता कुटुंबतुन पोस कियमळ करियगोम. पजा सतता तल्लुर-बाबो ओराहाटीं कीता मंचितनमता स्नम तिरिचनाहाटीं, ओर्क मंचितनमत्तुन मलाहचि हियगोम. बारिल्ले इल्हा कियमळ पेनदुक नचचनलायक मंता.
 5 बद मुरतळ अय्ते निजमते मुंडामोसि, बोरे दिक्कु हिलाका उंदे मंता, अद मुरतळ दाना आसे पेनदापोरों ईसि, नर्का-पल्ही पेनदुक विनीति, पारतनां कीसेके मंता.
 6 गानि बद मुरतळ अय्ते सिराप सुकमता आसेते पिसंता, अद मुरतळ पिस्सि मचिगुडा हाता लेक्कातेन वांता.
 7 इंचि बोरे तप्पुने दोर्काकोटा मननाहाटीं, इव पोल्लेना बारेमतेगुडा अंतोर विस्वासुल्कुंक आदेस हीम.
 8 ओक्कला बोरेन्ना ओना हेडमितीर्कुन बेस हळ्ळुकुनाकोटे, विसेस कीसि सतता लोतोर्कुन बेस हळ्ळुकुनाकोटे, ओर विस्वासमता कदर कियवोर आंतोर. अचोने आयका विस्वासम कियवोर्कना एक्को कराब मनकना लेक्काते वांतोर.
 9 मुंडामोस्ता मुरतटा वयसु अवै वसर्कीन्ना तक्को मनानय्ते, आ मुरतटा पोरोल मुंडामोस्ता मुरताह्कुना रजिस्टरते रासानायो. अचोने आयका आ मुरतळ मुन्ने वरोने मुय्दोन मरमि आसि मत्तद आयगोम.

10 इंका अद मुरतळ बेस कबाहकुने बेस पोरोल तरकुंचि मनगोम, मर्क-मियाहकुन पोस कीतद आयगोम, वाता हेळमितीरा सेवा कीतद आयगोम, पवित्र लोक्कुलकुना कालक नोरतद आयगोम, तकलिपने मतोर्कुंक सहायम कीतद आयगोम इंका अनि परिस्तितीने बेस कबाहक कियालय अप्पजेपतद आयगोम.

11 गानि लेय्यातनमते मुंडामोस्ता मुरताहकुना पोरोल अद रजिस्टरते रासमा. बारित्ते बस्के अय्ते अबुना मैदुलता इच्चां एक्को आसि, किरिस्तुनापोरोंटा विस्वासम तक्को आंता, अस्के अवुंक मरमि आयाना इच्चा आंता.

12 इल्हा अव अबुना मोदाटा निरनायमताल तपिचकुंचि सिक्सता आदेस तरकुंचां.

13 अचोने आयका लोन-लोन तिरियना अलवट अर्सिं लंडुंक हेडंतां. सिराप लंडुंक हेळमळे आयो, गानि हेकेटां-हीकीटां जोलीं केजंतां, वेरेंतोरा कबाहकुने कय कुचचंतां, बव पोल्ले अय्ते अव वळकना आयोनो, असोंटा पोल्ले वळकालय दल्यंतां.

14 अदुनहाटी लेय्यातनमते मुंडामोस्ता मुर्ताहक मरमि आसि, पिलालकुन कंचेके संसारम कियना इंचि नावा इच्चा मंता. अल्हा कीते पगातोर्कुंक तप्पुक दोसना मोका दोर्को.

15 नना इल्हा वेहना कारनम बतल इत्ते, कोन्नि मुर्ताहक हरि तप्पि देय्यम हय्दे ताकसंतां.

16 बदन्ना विस्वासि मुरतटा लोन ओक्कला मुंडामोस्ता मुर्ताहक मल्ले, अवुंक आ लोता विस्वासि मुरतळे कुदुद सहायम कियगोम, अबुना मोता कलिसियातोरपोरों वाटानायो. अस्के निजमते मुंडामोसि मल्ला मुरताहकुंक कलिसिया सहायम कियगोम.

17 कलिसिया ताकसानोरवेटाल बोर अय्ते बेस कलिसिया ताकसंतोरो, ओन्क वेल्ले कदर हियगोम. विसेस कीसि बोर अय्ते प्रचार कियालय, कराहलय कस्टपळंतोरो ओन्क रौड अंतालक कदर दोर्कुगोम.

18 बारित्ते, “बंति तिराहनेके कोंदाता मुस्किरकु मुस्का बुट्टि दोहामनि,”* आनि “बुतिगानकु बुति दोर्कना,”* इंचि दर्मसास्त्रम वेहंता.

19 कलिसिया ताकसाना पेदुदा मनकना पोरों बोरन्ना दोसेम दोसते, इव्वुर-मुव्वुरन्ना गवाइदार्क हिल्वद निमे अद दोसेमतुन नम्मूमा.

20 बस्केळ्ळ पापम कीसेक मनानोन अंतोरा मुन्ने तेरहा. अस्के कळमातोर अल्हा कियाकोटा वेंरेंते मनांतुर.

21 पेन, किरिस्तु येसु आनि पेन पेरेता पेनदा दूतन मुन्ने ईर्सिं नना नीकु गट्टिगा आदेस हीसेक गदा, बदे उंदि बाजुन पियाकोटा, सिन्ना-पेदुदा इनाकोटा निमे इव नियमकुन पीसि ताका.

22 कलिसियाता पेदुदा मनकल इंचि निलाहनाहाटी, बोन पोर्रेन गाबर आसि कय इरमा. वेरेंतोरा पापालकुने निमे पालिगाड आयमा. इंका नीवद निमे बस्केळ्ळ पवित्र ईर्कुन.

23 सिराप ऐ उंचेके मन्मा, नीवा पीर साप मननाहाटी, इंका वेरे बिमार्क ऊके-ऊके वायाकोटा मननाहाटी, अस्के-अस्के अंगुर पानकम उंचेके होन.

24 कोन्नि लोक्कुलकुना पापालक बय्यर दिस अरंतां, न्यायम जर्गनाहाटी अबुन मुन्ने तरांतुर. गानि कोन्नि लोक्कुलकुना पापालक मात्रम पज्जोत्तल दिस अरंतां.

25 इल्हेने बेस कबाहकगुडा बय्यर दिस अरंतां, बव बेस कबाहक दिस अरोंगों, अवगुडा वेल्ले रोजकु मक्किस्स मन्नों.

6

दासुलकुनाहाटी कोन्नि नियम्कु

1 बोर अय्ते दासि कबळ कीसेके मंतुरो, ओर अंतोर ओरा मालकुलकुन अनि तीरकुना मान-मर्यादालायक इनकुनगोम. अस्केने पेनदा पोरोल आनि कराहता पोल्ले बदनाम आयाकोटा मनंता.

2 इंका बोर दासुलकुना मालकुलक अय्ते विस्वासमते मंतुर, आ दासुलक ओरा मालकुलकुन, ‘ईर मना विस्वासि आंदुर’ इंचि ओन सिन्नाग हळानायो. मीवा सेवाता पायदा येतानोरगुडा मीवसोंटा पावरमगल्ला विस्वासुलक आंदुर. इंचि ओरद इंका एक्को सेवा कियना. इसोंटव पोल्ले निमे ओर्क कराहचि गट्टि दैरेम हीम.

आबदुदम बोदा आनि निजम दनमता आस्ति

3 इंका ओक्कला बोरन्ना ई पोल्ले तप्पा वेरे कराहनय्ते, अचोने आयाका मना सामि येसु किरिस्तुना निजम पोल्लेन पियाकोटा, ओर वेहता बक्तितुन ओप्कुनाकोटे,

4 ओर इरगा गरंति निडिस मंतोर, ओन्क बतले तेळियो. असंतोर लोल्लिं आनि पोल्लेन पीसि जगडालक कियना बिमार आसि मंतोर. दीनहेंदाल अय्ते कळ्ळ पोतमळ, जगडम, अपमानम, कराब अनमानालक तयार आंता.

5 आनि इसोंटोरा नड्डुम बस्केळ्ळ लोल्लिं-जगडालक आसेकेन मनंतां. इंका इसंटोरा बुद्धि हेळसोंचि, ओर निजमताल लक्कु आतोर आंद. अदुनहाटी ओर पेनदा बक्तितुन कमाइ कियना उंदि हरि इनकुंतुर.

- 6 पेनदा बक्ति समादानमते कियमळे पेद्दा दनम आंद.
 7 बारित्ते मनम ई दुनियाते वायनेके बतल तरा हिल्लोम, इगोटाल होननेकेगुडा बतले ओया परोम.
 8 अदूनहाटी मनगा तिनालय तिडि, केरालय कपडिं मत्ते, अव्टेन मनम समादानम मनना.
 9 गानि सिरमंत आंतोम इनकुनना लोकूलक कतरनाक परिकसाने, उरिने, अव्सरम हिल्वब वेल्लेन नुकसान कियनसोटा इच्चाने हिरकंतुर. असोटा इच्चां मनकालोकून हेळाहचि नासडेम कीतां.
 10 बारित्ते कोतन पोरोटा पावरम, अन्नि रकालकुना सेड्डातनालकुंक हरिं पुट्टिचंता. बचुटुरो लोकूलक ओरा इच्चान दोकिचकुननाहाटी विस्वासमताल तप्सोत्तुर आनि ओरा पिस्वरते वेल्लेन दुक्कमतुन संपादिचकुंतुर.

तिमोतिकु पौलसना आकिर आदेसकु

- 11 गानि निमे पेनदा बक्ति कियाना मनकन आदिन. इव अन्नि सेड्डातनालकुनाल लक्कु मंचेके नीतिते, बक्तिते, विस्वासमते, पावरमते, दैरनेमते आनि सादा-सिंपल पज्जो ताका.
 12 नीवा विस्वासमतुन दक्किचकुनालय बेस लडाइ कीसेके मन्नु, बस्केळ्ळक पिस्सना पिस्वरतुन गाट्टिगा पीसि ताका, इद पिस्वरहाटीगे नीकुन केयमळ जर्गता. ई मंचि पोल्लेतुन निमे वेल्लेन मदि गवाइदार्कुना मुन्ने ओक्कुत्तिन.
 13-14 अन्निटवुन जीवाते इरना पेनदा मुन्ने आनि पुंतुस पिलातुसना मुन्ने बेस गवाइ हीता किरिस्तु येसुना मुन्ने, नना नीकु आदेस हीसेक गदा, मना सामि येसु किरिस्तु मरा वायनदाका, निमे ई आदेसतुन बदे तप्पु डागु आनि दोसेम अंटाकोटा कापाळसेके इरां.
 15 राजुल्लुकुना राजु, सामिल्लुकुना सामि, अन्निनपोरो अदिकारम इरना आ आसिर्वाद दोर्कता, बरोबर वेलाकु ओन मनाकु हुसंतोर.
 16 ओन्क बस्केने हामुर हिल्ले. मनम बोरे होना पर्रोम असोटा वेल्लुने ओर मनंतोर. ओन इदवेरादाका बोरे हूळा हिल्लुर, बस्केने हूळा पसरगुडा. अंटावुंकनना बलमाता आ पेनदुके बस्केळ्ळक कदर दोर्कि. आमीन.
 17 ई दुनियाते मनना सिरमंत लोकूलक, गरा कियामन्नि. नासडेम आसि होनना दनम पोरो आसे इरकोटा, जीवाते मनना पेनदापोरो विस्वासम इराना. आ पेने मना आनंदमहाटी गावाले मत्तव आ अन्नि बेसतवुन इरगा हीता, इंचि ओर्क आदेस हीम.
 18 इचोने आयका इंका ओर्क आदेस हीम गदा, ओर बेस कबाहक कीसेक मनना, बेस कबाहक कीसे सिरमंत आयाना. मनागा मत्तदुनाल अव्सरम मत्तोंक, पंचि हियालय बस्केळ्ळक मनसुनाल तयार मनगोम.
 19 इल्हा कीसेके मत्ते, मुन्नेटा पिस्वरहाटी ओर उंदि बेस पुनादि तयार कीकुंतुर, आनि बस्केळ्ळक पिस्सना पिस्वर पिस्सेक मनंतुर.
 20 तिमोति, नीकु अप्पजेपतदुन निमे कापाळकुन. बक्ति हिल्ला कराब पोल्लेनाल लक्कु मन. इंका इदे “निजम तेल्वि” इंचि वेहना आबद्दम कतानाल लक्कु मन.
 21 इच्चुर लोकूलक असोटा पोल्लेन नम्मिसि विस्वासमताल तप्सोत्तुर. पेनदा कुर्पा बस्केळ्ळक नीतोनि मन्निकांटी.

2 तिमोति तिमोतिकु पौलुसना रोंडो सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 67

इद तिमोतिकु पौलुस रासता रोंडो सिट्टि आंदु. पेनदा बेसता कबुरतुन वेहताहेंका ओन्क जेलुंक होनापीता. जेलुंक होचि ओर वेल्लेन कस्टालक बोगांचेक मंतोर. जेलते ओर हायनाल आतोर. अयनागानि ओना मरिनसोंटा तिमोति सामिना विस्वासमते इकिचचो गट्टि पडना इंचि इद सिट्टि रासतोर.

इव आकिर रोजकु आंदु, इव रोजकुने निमे तप्पुड बोदां वेहानोरगटाल, बोगमतनम कियानोरगटाल इका सतता सुकालकुनाहाटीगे आसेते मनानोरगटाल जेगर्ता मन. बारित्ते इसोंटा लोकलुक ओर्क नचचुता पोल्ले वेहनाहाटी कराहोर्कुने हेळाहंतुर. अदुनहाटी पेनदा सत्तेम पोल्लेतुन वेहालय निमे बस्केळ्ळक तयारते मन. इल्हा पौलुस इद सिट्टि रासि तिमोतिकु दैरनेम हीतोर.

बगा बतल मंता

जोहार आनि परिचयम 1:1-2

स्तुति आनि किरिस्तु वेहताप पिस्साना बारेमते बोदां 1:3-2:13

तेल्पिच्चि वेहमळ आनि वें वेहमळ 2:14-4:5

पौलुसना सतता परिस्तिता 4:6-18

आकिरता बोदां 4:19-22

1 पेनदा इच्चाताहेंदाल किरिस्तु येसुना प्रेरित आता पौलुसना इद सिट्टि आंद. किरिस्तु येसुनपोरें विस्वासम इरते, बस्केळ्ळक पिस्साना पिस्वर दोर्कता इंचि पेन पोल्ले हीसि मत्ता, इदुना बारेमते वेहनाहाटी नाकुन लोहचियमळ जर्गता.

2 नावा पावरमगल्ला मरि तिमोतिकु नना रासतन. नीकु मना पेनबाबनहेंदाल, सामि किरिस्तु येसुनाहेंदाल कुर्पा, दया, सांति दोर्किंकांटी.

दन्यवाद आनि दैरनेम

3 नावा पारतनाने नीकुन बस्केळ्ळक मति कीसेके, ना तादो-बाबुरालेहका नना मनसुना पोल्लेते, बद पेनदद अत्ये सेवा कीसंतनो, अद पेनदुक दन्यवाद वेहचंतन.

4 नावाहाटी निमे पोगागोटता कांडेरतुन मति कीसि नना नर्का-पियल नीकु कलियाना इंचि इच्चा कीसंतन, इवटेन नावा आनंदम पुरागा आंता.

5 नीवा आ सत्तेम विस्वासम नाकु मति मंता. आ विस्वासम, मुन्ने नीवा काको लुइस आनि नीवा यावल युनिसनगागुडा मनुंदु, अदे विस्वासम निहगागुडा मंता इंचि नाकु बरोसा मंता.

6 इदुनहाटी नना नीकु मति कीसि हियानद बतल इत्ते, नना नीवा पोरो कय इरतस्के, पेनदाहेंदाल नीकु उंदि वरम दोर्कता. अद वरमतुन निमे बस्केळ्ळक एल्गिच्चि इरां.

7 बारित्ते मनाकु पेन हीता आत्मा मनाकुन पिरकिर्क किय्यका, मनालोप्पो अद बलम, पावरम आनि ओप्केतुन निहंता.

8 अदुनहाटी मना सामिना बारेमते आधि, ओनाहाटी जेलने मनना नावा बारेमते आधि वेरतोरक गवाइ वेहालय बस्केने सिग्गु अरमा. दानकु बंदुल, बेसता कबुरतुन वेहनाहाटी पेन हीता बलमते निमे नातोनि तकलिष्क सहन कियालय तयार मन्नु.

9 पेन मनाकुन कापाळसि, दाना पवित्र पोल्लेते केयता. इदंता मना कबाह्कनहेंदाल जर्गाहिल्ले गानि सिराप ओना पिलान परकारम आनि ओना कुपहिंकेन जर्गता. ई दया-मायातुन पेनबाबाल मनाकु ई दुनिया पुट्टका मुन्नेन किरिस्तु येसुनाहेंदाल हीतोर.

10 गानि इंदके इद पोल्ले, मनाकुन कापाळना किरिस्तु येसु वाताहेंका मनाकु तेळियसोत्ता. ई किरिस्ते हामुरतुन रदुद कीसि, बेसता कबुरताहेंदाल पिस्वरतुन आनि बस्केळ्ळक जीवाते मनानदुन पलाते अरहतोर.

11 इदे बेसता कबुरतुन प्रचार कियनाहाटी प्रेरित अल्हेन कराहनोर इंचि नाकुन निलाहमळ जर्गता.

12 इदुनाहाटीगे नना इद जेलते तकलिष्क बोगांचेक मंतन. अय्नागानि नना सिग्गु अर्रोँन. बारित्ते नना बोनपोर्रोँ विस्वासम इरतन ओर नाकु एर्र्के. इंका ओर नाकु बतल अय्ते अप्पजेपतोर्रोँ* अदुन, मल्सि वायाना आ रोजु वायनदाका कापाळा परांतोर इंचि नाकु बरोसा मंता.

13 किरिस्तु येसुना लोप्पो मनना विस्वासम आनि पावरमताहेंदाल निमे बव सत्तेम पोल्लेँ अय्ते नाहेकेटाल केंजतिनो, अबुन पीसि वैरेतोरहाटी मन्नु.

14 मनालोप्पो मनना पवित्र आत्माता बलमतोनि, नीकु अप्पजेपता मंचितनमतुन निमे कापाळकुन.

15 आसिया राज्येमते मनानोर अंतोर नाकुन होळसि होत्तुर इत्ता पोल्ले नीकु एरपाटे. अय्ते पुगिल्स आनि हिरमुगिनेसगुडा मंतुर.

16 नावा कय्कुंक बेडी वाटसि मंतां इंचि सिग्गु अर्रांकोटा, उनेसिपुस इनानोर, नाकु ऊके-ऊके कलियसि नाकु वेल्लेन डैरेनेम हीतोर. सामि ओना कुटुंबमपोर्रोँ दया हुप्सिरकांटी.

17 अचोने आयका ओर रोम सहरते वातस्के, नना दोर्कनदाका नाकुन मनसु तासि पट्कसेक मत्तोर.

18 नना इपीसि सहरते मननेके, ओर नाकु वेल्लेन रकाल्कुना सहायम कीतोर नीकु अय्ते बेस तेळियसि मंता. सामिना मल्सि वायाना आ रोजुने, ओनपोर्रोँ दया हुप्सालय पेन सहायम किय्थि इंचि नना कोरसेक मंतन.

2

येसु किरिस्तुना बेस सिपाइ आयना

1 ना मर्री तिमोति, किरिस्तु येसुनगा मनना कुपांति निमे बेस ताकतवर आम.

2 वेल्लेन मंदि लोकुल्कुना मुन्ने नाहेंदाल निमे केंजता पोल्लेन, बोर अय्ते वैरेतोर कर्राह परांतुर, असोटा विस्वासमलायक मनानोकुंक अप्पजेप्पा.

3 किरिस्तु येसुना वरोर बेस सिपाइनालेसी निमेगुडा तकलिष्क बोगांचा.

4 लडाइहाटी पेयसता बोरे सिपाइ वट्टि सम्मारम पोल्लेने हिरकोर. बारित्ते ओन्क अद नवकरि बोर अय्ते हीतोर ओन्क कुसि हियमळे ओना गुरि मंता.

5 अल्हेने वरोर कुस्ति अर्रांनोर नियमकुन पीसि कुस्ति अर्रांकोटे ओन्क किरिटम दोर्कां.

6 कस्टपळना कास्तकारि मनकंक, पंडता पंटाता मोदाटा पाल एतना अदिकारम मंता.

7 नना वेहना पोल्लेना बारेमते विचारम कीम, अन्नि पोल्लेँ तेळियानाहाटी सामि नीकु बुदिद हियानुर.

8 नना वेहता बेसता कबुर परकारम, दाविद राजाना वंसंमते पुटसि, हामुरताल मर्रा जीवाते तेदता येसु किरिस्तुन मतिते इर्रां.

9 इदे बेसता कबुर वेहताहाटी नना जेलुंक होत्तन. वरोर तप्पु कीतोना कय्कुंक वाटताप नावा कय्कुंक बेडी वाटतुर. गानि पेनदा पोल्ले मात्रम बेडिने दोह्चि हिल्ले.

10 अदुनहाटीगे नना, किरिस्तु येसुना लोप्पो दोर्कना मुक्ति पेन पेरतोकं, बस्केळक मनना दाना महिमातोनि दोर्कना इंचि बचचुं कस्टाल्क अयना सहन कीतन.

11 इद पोल्ले विस्वासम कियनलायक मंता, अद बतल इत्ते, ओक्कला मनम ओनतोनि हातोम इनानय्ते, ओनतोनि पिस्संतोमगुडा.

12 मनम ओर्रांकुंचेके मनानय्ते, ओनतोनि राज्येम इंका कीतोम. ओक्कला मनम ओन एरपाट किय्योन इनानय्ते, ओर इंका मनानुन एरपाट किय्योर.

13 मनम विस्वासमलायक मनाकोन्ना ओर मात्रम विस्वासमलायक मंतोर. बारित्ते ओनद ओर बस्केने एरपाट किय्योन इंचि इन्नोर.

पेन पेरता सेवाकुड

14 इव अन्नि पोल्लेँ निमे ओर्कुं मति कीसि हीसेक मन्नु. इंका केंजानोर्कुंन हेळाहनालायक बतले पायदा हिलुवा पोल्लेनाहाटी लोल्लिं कियामान्नि, इंचि ओर्कुंन सामिना मुन्ने निलाहचि दटांचि वेहा.

15 बस्केने सिग्गु होनाकोटा, पेनदा पोल्लेता सत्तेमतुन बरोबर कर्राहोनोलेसी पेन निल्हाता वरोर सेवाकुड आसि मनालय कोसिस कीम.

16 बक्ति हिलुवा वट्टि पोल्लेनाल तप्पिचुकुन, असोटा पोल्लेँ लोकुल्कुन हेळाहचि पेनदागटाल इंचिचो लक्कु कीतां.

17 असोटा लोकुल्कुना वळकमळ उंदि कुल्लिसि-कुल्लिसि पेद्दागा आयना पुन्नुलेहका मंतां. हुमिनयस आनि पिलेतुस असंतोरें आंदुर.

* 1:12 बद्द अय्ते नना ओन्क अप्पजेपतनो.

18 ओर इच्चुरगुडा सत्तेम हरदाल तप्सोचि, हासि मर्रा जीवाते तेदमळ आसोला इंचि इंतुर. इसोंटा पोल्ले वळ्किसि ओर इच्चुर लोकुलकुन विस्वासमतुन हेळाहचंतुर.

19 गानि पेन दोहता पुनादि बस्केळ्ळक नित्तिसि मनंता. अद पुनादिपोर्रो, “सामिक ओना लोकुलक बोर आंदुर, ओन्क एरपाटे,” आनि “सामिना पोरोल एताना हरेक मनकल, तप्पुड कबाहकुनाल लक्कु मनगोम,” इंचि सिक्का वाटसि मंता.

20 सिरमंतुलकुना लोहकुने सिराप एंडि-बंगारमता बोळिंमंनंतां इंचि आयो, अगा कट्टेटव आनि तोळितवगुडा बोळिंमंनंतां. अष्टे एक्को इलुवातवुन पेद्दा-पेद्दा कबाहकुनेन वाळकुंतुर आनि तक्को इलुवातवुन बारे बस्केळ्ळक वाळकुंतुर.

21 अदुनहाटी बोरन्ना मनकल इलुवा तक्कोतोर मनानय्ते, ओर पेद्दा-पेद्दा कबाहकुने वाळकुनना बोळिलेहकाटोर आयनुर. अस्के ओर पवित्र आसि ओना मालकुना कबळ्ळक ओज्जंतोर पजा अन्नि तीरकुना बेसता कबाहक कियालय ओर तयार मंनंतोर.

22 लेय्यातनमते वायाना कराब इचचानाल लक्कु मन. पवित्र मनसुने सामिक आरादना कीसेके मनानोरतोनि कलियसि नीतिते, विस्वासमते, पावरमते, सांतिते मनालय कोसिस कीम.

23 तेल्चि तक्को अल्हेन बेकार पोल्लेनाल लक्कु मन. नीकु अय्ते एरपाटे, असोंटा पोल्ले वाद-विवाद जगडाल्कुन पुटसंतां.

24 इका सामिना सेवाकुड बस्केने जगडम कियाकोंटा, अंतोरपोर्रो दया हुप्पिचानोर आयगोम, ओर कराहनालायक मनगोम, ओप्केते मनगोम.

25 नीवा विरोदमते वळकानोकुक सांत मनसुने तेळियागोट्टिस वेहा. सत्तेमता बारेमते तेल्पिचकुननाहाटी पेन ओर्कु मार मनसु हिय्यार.

26 अस्के ओर्कु बेस तेल्चि वासि, ओरा सतता इचचातुन दोर्किचकुननाहाटी देय्यमता कयदाल इळबळानुर. बारिल्ले देय्यम सतता इचचान दोर्किचकुननाहाटी ओर्कुन दोह्चि वाटसि इर्ता.

3

आकिर रोजकुना तकलिप्क

1 आकिर रोजकुने इरगा तकलिपकुना कालम वायाना मंता, इद मति इर्ता.

2 बारिल्ले अव रोजकुने मनकालोर सतता बारेमतेन विचार कीतुर, कोल्लन पावरम कीतुर, सतता बारेमते पेद्दा-पेद्दा पोल्ले वेहकुंतुर, गरति मंतुर, बदनाम कियानोर आंतुर, तल्लुर-बाबोना पोल्ले केंजुर, दन्यवाद वेहर, अपवित्र आंतुर,

3 दया-माया मन्नो, मापि कियाना मनसु मन्नो, वैरेतोर अपमानम कीतुर, ओप्केते मन्नु, ओरा जीवा नोय्यो, जिवरासिनलेहका कीतुर, बेसतदुन हय्युर,

4 पसांचंतुर, मंचि-सेड्डा विचारम किय्युर, सतता बारेमते पोंगुडतनम पोंगंतुर, पेनदा पावरमकन्ना सुकमतुने एक्को पावरम कीतुर,

5 पलाताल पेनदा बक्ति कीतापे दिसंतुर गानि आ बक्तिता बलमतुन मात्रम नम्मुर. इसंतोरगटाल लक्कु मन.

6 ई लोकुलकुने इच्चुर इसंतोर मंतुर गदा, बव मुर्ताहक अय्ते कमजोर मनसुने पापमता मोताते रका-रकालकुना आसेने निडिस पिस्सेक मंतां, अव मुरताहकुना लोहकुने होंचि अवुन ओराहेके कीकुंतुर.

7 इव मुर्ताहक बस्केळ्ळक करियसेकेन मंतां, गानि सत्तेम बतल अव तेल्पिचकुन्नो.

8 यन्नेस, यंजेस इनानोर मूसांक अड्डम तिरियतुर. ओरालेसीगे ई मनकालोरगुडा सत्तेमकु अड्डम तिरियंतुर. ई मनकालोरा बुदिद हेळसोंचि विस्वासमते हर्षि तप्पि मंतुर.

9 गानि ईर इका मुन्नेळ्ळक होना पसर. बारिल्ले मूसांक अड्डम तिरियता इच्चुर मनकालोर बल्हा तेल्चि तक्कोतोर इंचि अंतोर्क तेळियसि होत्ता, अल्हेन ईरा तेल्चि तक्कोतनमगुडा अंतोर्क तेळियसि होन्नार.

पौलसना आकिरता आदेस

10 गानि निमे नावा कराहमळतुन, ताकमळतुन, नना पिस्सना उद्देसमतुन, विस्वासमतुन, ओप्केतुन, पावरमतुन, नावा दैरनेमतुन,

11 नना अंताकिया, इकोनिया आनि लिसरा इनना सहरकुने बोगांचता तकलिप्क, नना अरता बादां, इव अन्नि नीकु एरपाटे मंतां. आयना इव अन्नि तकलिपकुनाल सामि नाकुन कापाळतोर.

12 किरिस्तु येसुना लोप्पो पेनदा बक्तिते ताकंतन इंचि इच्चा इराना अंतोर्क कस्टाल्क अय्ते वायानुगे.

13 गानि कराब कियानोर, मुळाहनोर, वैरेतोकुक दोका हीसिक, ओर दोकाते अरसेक इकिचचो कराब आंतुर.

14 गानि निमे बतल करियतिनो, बतल विस्वासम कीतिनो आनि अबुन निमे बोनहेंदाल करियतिन नीकु एरपाट मंता. अबुने उंदेतीर ताकसेक मन.

15 अचोने आयका, निमे सिन्नास्केटाल पवित्र दर्मासास्त्रमता पोल्लेन करियतोन आदिन. अव नीकु किरिस्तु येसुमपोर्रो विस्वासम इरते दोर्कना मुक्तितुन दोर्किचकुननाहाटी बुद्धि, तेल्वि हीतां.

16 दर्मासास्त्रमते रासि मनना पूरा पोल्लें पेन वेहाताहेंकेन रासतव आंदुं. अव पोल्लें कराहनाहाटी, तेळियागोट्टिस वेहनाहाटी, तप्पुन सुदरांचनाहाटी आनि नीतिमंतुलक आयानाहाटी टेरनिंग हियालय कबळक ओज्जंतां.

17 अद बल्हा इत्ते, दर्मासास्त्रमहेंदाल पेन दाना हरेक मनकन पुरागा दानालायक कीसि, अन्नि तीरकुना बेसता कबाहक कियनाहाटी, ओर्कुन तयार कीता.

4

1 पेनदा मुन्ने आनि जीवाते मत्तोरद, हातोरद न्यायम कियना किरिस्तु येसुना मुन्ने इंका ई दुनियाते ओना मरां वायमळतुन आनि ओना राज्यमतुन मुन्ने इरसि नना नीकु आदेस हीतन गदा, इद दुनियाते पेनदा मुन्ने, मरां वासि राज्येम कियानुर अस्के जीवाते मत्तोरद आनि हातोरद न्यायम कियना येसु किरिस्तुना मुन्ने, नना नीकु दटांचि वेहानद बतल इत्ते,

2 पेनदा पोल्लेतुन, टाइम दोर्किना दोर्काकोना प्रचार कियालय तयार मन, अन्नि तीरकुना ओप्केते ओर्कु कराहसेके, दटांच्सेके तेळियागोट्टिस वेहा.

3 नना इल्हा बारि वेहासेक इत्ते, बेस बोदातुन लोकुलक केंजुर असोटा कालम वायना मंता. ओर ओरा मनसुक वाताप ताकंतुर, ओरां दुर्दा केंवुक बतल अयते केंजमळ इस्टमो, असोटा पोल्लें कराहना गुस्लकुन सततातोनि कल्पकुंतुर.

4 ओर सत्तेम पोल्लेन केंजुर, तयार कीसि वेहना कतां केंजालय दांतुर.

5 गानि निमे बसोटा परिस्तिती वायिना, पजोळक होनाकोटा नित्तिसि मन. तकलिपक वाते सहन कीम, बेसता कबुरतुन वेहाना नीवा कबळतुन कीसेके, निमे कियना पेनदा सेवाता कबळ पुरागा कीम.

6 नना अयते पेनदुक मोक्कु हियना पट्टुनगड्क* एवतन. दुनियातुन होळसि होनना नावा वेला दगेर्क एवता.

7 सामिना पोरोटा विस्वासम बोरेमता लडाइते, नना लडाइ बेस कीतन, नना बेस वित्तुतन. नावा विस्वासमतुन नना कापाळकुत्तन.

8 नावाहाटी ईसि मत्ता नीतिता किरिटम, सत्तेमते न्यायम कियना सामि, ओर मल्लिस वातानाडु नाकु अदुन हीतोर. सिराप नाके आयो गानि, बोर-बोर अयते ओर दिस्सना रोजुन पावरमते एदुर हळसेक मंतुरो, ओर्कु अंटोर्कगुडा हीतोर.

तिमोतिकु पौलसना आकिर पोल्लें

9 बच्चोर बिराना आते अच्चोर बिराना निमे न्हगा वायाना कोसिस कीम.

10 बारित्ते देमासु इनानोर ई दुनियाता पावरमते नाकुन होळसि तेसलोनि सहर होत्तोर. क्रेसेंस इनानोर गलातिया एरियाते होत्तोर आनि तीतु इनानोर दलमतिया राज्येमते होत्तोर.

11 सिराप लूकाले नातोनि मंतोर. निमे वायनेके मरकुसुन नीतोनि पीसि वा. सेवा कबळते ओर नाकु वेल्लेन सहायम कीतोर.

12 तुकिकुस इनानोन नना इपीसि सहर लोहतन.

13 त्रोआस सहरते करपुस इनानोना लोन नना नावा कोट ईसि वातन. निमे वायनेके दान पीसि वा. अल्हेने नावा पुस्तकालक, विसेस कीसि तोलतोनि तयार कीता, हट्टिस मत्ता पुस्तकालकगुडा पीसि वा.

14 सिक्दर इनना कम्मरि नावाहाटी वेल्लेन कराब कबाहक कीतोर. ओर कीता कबाहकुन पीसि, सामिगुडा ओन्क अल्हे हियानुर.

15 मनम वेहाता पोल्लेंक ओर वेल्लेन अड्डम तिरियतोर. अदुनहाटी निमेगुडा ओनागटल जेगर्ता मन.

16 नावा न्यायम जर्निके, नना मोट्टा मोदाटा जवाब हीतस्के, नावाहेंदाल जवाब हियालय बोरे मना हिल्लूर. अंतोर नाकुन होळसि होत्तुर. ओर अल्हा कीतदुनहाटी पेन ओर्कुन लेक्का तल्काकोटोन बेस.

17 गानि नाहेंदाल बेसता कबुर अंटोर्क एव्वि, दान यहदि आयबोर अंतोर केंजगोम इंचि, सामि नाकु तोळ मंचेके नाकु बलम हीतोर. इल्हा नाकुन सिंहम तोळदाल कापाळतोर.

18 सामि मनना स्वर्ग राज्येमते नना होनालय, ओर नाकुन हरेक कराब कबाटाल कापाळनुर. ओनके बस्केळताहाटी पेदुदातनम दोर्कि. आमीन.

पौलस आकिरते अंटोर्क जोहार कीतोर

19 पिरिसकिला, अकविला आनि उनेसिपुस्सना लोतोर्कुक नावा जोहार वेहा.

* 4:6 पट्टु बलि पीटम.

20 इरास्तुस इनानोर कुरेंति सहरते आगतोर. तोरोपिमस इनानोर बिमार मत्ताहाटीं नना ओन मिलेतुस इनना सहरतेन होळसि वातन.

21 पीनि कालम वायाका मुन्नेन निमे इगे वायना कोसिस कीम. इबुलुस, पुदेंस, लिसुस, क्लवदिया आनि कळमातोर अंटोर दादालोर नीकु जोहार वेहचंतुर.

22 सामि नीवा आत्माकु तोळ मन्निर. सामिना कुर्पा नीकु तोळ मन्निकांटी.

तीतू तीतूंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

वेल्लेन देसेलकुने होंचि येसु सामिना बारेमता बेसता कबुरतुन कराहलय पेन पौलुसुंक आदेस हीता. पौलुस येस्सलेमते मननेके तीतू इनना वरोर लेय्योड ओनतोन मनुंदुर.

येसु सामि हासि मर्रा जीवाते तेदसि स्वर्गम होला पजा, दग्गेर-दग्गेरा मुषै वर्साना पज्जो पौलुस इद सिट्टि तीतूंक रासतोर. पौलुस आनि तीतू पेनदा बेसता कबुरतुन प्रचार कियालय केरेतु इनना सहर होत्तुर. केरेतु सहरते अंतोर विस्वासुल्क पूनोर्के मत्ताहेंका ओराहाटी पेददाल्कुन निलाहनेके बव पोल्लेना अब्सरम मंता अव आन्नि पोल्ले पौलुस इद सिट्टिते रासतोर. अचोने आयका अगा तप्पुड बोदां कराहना गुस्लकगुडा मत्तुर. ओरा बोदानाल सततुन कापाळकुंचेके ओर कराहना बोदान बल्हा आपाना इत्ता पोल्लेगुडा पौलुस इद सिट्टिते रासतोर.

पेनदुन विस्वासम कीता लोकुल्क बल्हा आनि बद तरिकाते पिस्वर पिस्सना इत्ता पोल्लेगुडा विस्वासुल्क कराहनाहाटी पौलुस तीतूंक इद सिट्टिते रासतोर. पेनदा इच्चा परकारम पिस्वर पिसानय्ते, पेनदाहेंदाल दोर्कना बस्केळ्क पिस्सना पिस्वर दोर्कता इत्ता मेन पोल्ले इद पुस्तकमते पौलुस रासतोर.

बगा बतल मंता

जोहार आनि परिचयम 1:1-4

कलिसियाता अदिकारिल्क 1:5-16

कलिसियाते बोन्क बद बोदा कराहना 2:1-15

बोदां आनि वेरे वेहमळ 3:1-11

आकिरता बोदां 3:12-15

पौलुस तीतूंक जोहार वेहांतोर

1 नना पौलुस, पेनदा दासुन आनि येसु किरिस्तुना प्रेरित *आंदुन. पेन पेरता लोकुल्कुना विस्वासमतुन बेसांगोटलय, ओर्क सत्तेमता बारेमते तेळियागोट्टिस वेहालय नाकुन लोहमळ जर्गता.

2 ई सत्तेम, बस्केळ्क पिस्सना पिस्वरता आसे पोरो निल्सि मंता. बस्केने आबदुदम वळ्कुवा पेन इदुन हीतन इंचि वेल्लेन मुन्ने पोल्ले हीसि मत्ता.

3 बरोबर गाबाले मत्ता वेलातेन पेन दाना पोल्लेन मनाकु वेहचि हुपिस्ता. इदे बेसता कबुरतुन वेहनाहाटी मनाकुन कापाळना पेन नाकु आदेस हीसि अप्पजेपता.

4 विस्वासमते नावा समानम मनना नावा मरि तीतूंक इद सिट्टि नना रासेक मंतन. पेनबाबनहेंदाल आनि मनाकुन पिसागोटनोर किरिस्तु येसुनहेंदाल नीकु कुर्पा, साति दोर्किंकांटी.

केरेतु दीबेते तीतू कियना कबाहक

5 क्रेति दीबेते, बव कबाहक अय्ते मय्सि मंतां, अव कबाहकुन सुदरांचनाहाटी आनि नना नीकु आदेस हीता परकारम निमे हेके सहरते पेददाल्कुन निलाहना इंचि नीकुन नना अगा होळसि वातन.

6 निलाहना पेददा मनकनपोरो बदे दोसेम मननायो, ओन्क उंदे मुत्तो मनगोम. ओना मर्क-मियाहक विस्वासुल्क आसि ओर सिग्गु हिल्वा कराब कबाहक कियानोर, बोना पोल्ले केंजाकोटा मनानोर इंचि ओरापोरो तप्पु मनमाम्नि.

7 बारिले आ अदिकारि पेनदा कबाटुन मुन्ने ताकसानोर आंदुर. अदुनहाटी ओनपोरो बदे दोसेम मननायो, ओर जिद्दि मनकल मनमाम्नि, ओर बिराना होंगुंक वायानोर आयाम्नि, ओर कल्लु उनामाम्नि, जगडालक कियाम्नि, तप्पुड कमाइ कियानोर आयाम्नि.

* 1:1 प्रेरित इद पोरोल्क "पेन लोहचीतर" इंचि अर्तम. येसु पन्नेड मंदितुन पेरकुत्तोर ओर प्रेरितुल्क आंदुर. इच्चुर्कन पेरसि किरिस्तुना बारेमते वेहालय लोहचीतीकुंन प्रेरितुल्क इंचि इंदुर.

8 गानि आ अदिकारि हेडमितोन बेस हळकुनानोर आयगोम, बेस कियमळतुन पावरम कियानोर आयगोम, मनसुना आसेन आपिसि पीसि मनानोर आयगोम, ओर सादा-सिपल मनागोम, पवित्र आनि सततुन आपकुंचि मनानोर आयगोम.

9 इका ओन्क कराहता सत्तेम पोल्लेतुन ओर विस्वासमते गट्टिगा पीसि मनगोम. अल्हा मत्तेने ओर लोकुकुकुंक सत्तेम पोल्ले वेहचि ओर्क कराह परीतोर आनि एदुर वळकानोरा तोड्डिं मुच्चा परीतोर.

10 बारित्ते विसेस कीसि कतना कीतीरवेटाल वेल्लेदुर लोकुकुकुंक मर्लाबळानोर, बतक ओज्जाकोन्ना वट्टिदे वळकानोर, दोका कियानोर वेल्लेन मंतुर.

11 ईरकुन वळकाकोटा कियमळे गावाले. बारित्ते ईर लोकुकुकुंक, बव पोल्ले अत्ये कराहना आयनो, अव पोल्ले कराहचि तप्पुड कमाइ कियनाहाटीं अन्नि कुटुंबालकुनंता पाळ कीतुर.

12 क्रेति दीबेतोर वरोर ओरा कबुरतोर, “केरतु दीबिता लोकुकुकुंक बस्केळ्ळक आबद्दम वळ्ळंतुर, केडा जिवरासिनसंतोर, लंडु आनि तिडितोर,” इंचि वेहतोर.

13 ओर वेहता गवाइ निजमे आंद. अदुनहाटीं आबद्दम बोदातुन नम्मना विस्वासुकुकुंक गट्टिगा वें वेहा. अस्केन ओर सत्तेम विस्वासमते गट्टिपळांतुर.

14 यहूदिल्कुना तयार कीता वेसुडिन पोरीं विस्वासम इर्राकोटा, सत्तेमताल तप्पोत्ता मनकालोरा आदेसकुनाल लक्कु मनांतुर.

15 मनसु पवित्र मत्तोर्कुंक अन्नि वस्तुक पवित्रे मनांतां, गानि हेळसोत्ता मनसु आनि पेनदापोरीं विस्वासम हिल्लोर्क मात्रम बतले पवित्र मन्नी. ओरा मनसु, मनसु वेहता पोल्ले इव रोंडगुडा हेळसोचि मनांतां.

16 पेन माकु एरपाटे इंचि ओर वेहांतुर, गानि ओरा कियना कबाहक हळते, ओर पेनदुन एरपाट किय्युर इतद दिस अरंता. ओर हयसवोर, वेहता पोल्ले केंजवोर आंदुर, ओर असल बदे बेस कबळ कियनालायक हिल्लुर.

2

बोन्क बद बोदा कराहना

1 निमे मात्रम बस्केळ्ळक सत्तेम बोदाकु ओप्पनालायक पोल्ले कराहा.

2 ओपकेते, इमानदार मनमळते, सततुन आपकुनमळते, विस्वासमते, पावरमते, दैरनेमते, ओर्सकुनमळते गट्टिगा मंडालय मातरलोर्कुंक कराहा.

3 अल्हेने मातरिहकुंक कराहा गदा, अवुना पिस्वर पवित्र लोकुकुकुना पिस्वरलेहाका मंदना. वेंरतोर पोरीं दोसेल्क दोस्साकोटा, कल्कु उनाकोटा, अव बस्केळ्ळक बेसता बारेमतेन कराहगोम.

4 अल्हेने अव लेध्या मुरताहकुंक, अवुना मुय्दुकुंन, पिलालकुन पावरम कियाना,

5 सततुन आपकुंचि पिस्साना, पवित्र मंदना, लोतुन आवरिचकुनना, दयाता गुनम मंदना, मुय्दोना पोल्लेपोरीं बेस मंदना, इंचि कराह. अल्हा कराहते, अवुनाहेंदाल पेनदा पोल्ले बदनाम आयाकोटा मनांता.

6 अल्हेने लेय्युकुंक जोर हीसि वेहा गदा, ओर सततुन आपकुंचि पिस्सिरकांटी.

7 बेस कबाहक कीसि निमे अन्नि पोल्लेने ओराहाटीं उंदि उदाहरनलेसी मन्नु. नीवा कराहमळ सत्तेम आनि लोकुकुकुंक बेस केंजनालायक मनगोम.

8 निमे कराहना बोदा इचचोन सत्तेम मनना गदा, अवटे बोरे तप्पु तेंडामन्नि आनि नीवा विरोदमते वळकानोर्कुंक मना बारेमते बतले तप्पु दोर्कका ओर्क सिग्गु वायगोम.

9 दासुकुकुंक कराहा गदा, बस्केळ्ळक ओर ओरा मालुकुकुना पोल्लेपोरीं मंदना आनि अन्नि परिस्तितीने मालुकुकुकुंक तिरियसि वळकाकोटा, ओर्कुन कूस कियाना.

10 इका मालुकुकुनगटाल दोंगातनम कियामन्नि गानि अन्नि पोल्लेने बेस विस्वासमलायक ओर मंदना. अल्हा मत्ते, मनाकुन कापाळना मना पेनदा बारेमता कराहमळतुक ओर इकिचो कदर तरानोर आंतुर.

11 बारित्ते अंतोर लोकुकुकुंक मुक्ति हियनाहाटीं पेन दाना कुर्पांतुन हुपिस्ता.

12 अद दया मनाकु, मनम पेनदुक नचुवा पिस्वर आनि सततुन आपकुंचि, इद दुनियाते बेस बक्तिने, सवरटा हर्द आनि पेनदुक नचचना पिस्वर पिसगोम, इंचि कराहता.

13 अचोने आयका मना कदरगळ्ळाना पेन आनि मनाकु मुक्ति हियना येसु किरिस्तु ओना महिमाते वांतोर इत्ता आ सक्कटा आसेतुन मनम एदुर हळसेक मंदना इंचेकगुडा कराहता.

14 इका किरिस्तु मनाकुन अन्नि तीरकुना तप्पुड कबाहकुनाल तपिचि, बस्केळ्ळक बेसता कबाहके कियगोम इंचि मनसु इर्राना ओना सतता लोकुकुकुंक मनम आयगोम इंचि, मनाकुन पवित्र कियनाहाटीं ओना सतता जीवातुन हीतोर.

15 इव अन्नि पोल्ले निमे पूरा अदिकारमते दटाचि तेळियागोदिस वेहा, कराहा. नीकुन सिन्गा बोने हळ्या हियमा.

3

पिसालय मंचि हर्हि

1 राज्येम कियानोरद आनि अदिकारिल्लकुना पोल्ले केंजसि ओर वेहताप ताकना, इंचि लोकल्लुक मति कीसि हीम. इंका कदरलायक मंदना हेरक बेस कबळ कियालय बस्केळक तयार मंदना.

2 बोर्कुने बदनाम कियानायो, बोरतोने जगडाल्क कियानायो, मेत्तटा गुनम मंदना आनि अंतोरतोनि सादा-सिंपलते कलियसि मंदना इंचि ओर्क वेहा.

3 मुन्ने मनमगुडा तेल्लि तक्कोतोरम, बोरदे पोल्ले केंजबोरम, वैरेतोर पोल्लेने मुळगुतोरम, वैरे-वैरे इच्चां आनि सुकाल्कुना गुलामगिरि कीसिके मत्तोम. इंका होंगु-पगाते निडिस मत्ता पिस्वर पिसुंदुम, कळकु पोत्तुमळ, वैरेतोर मनाकुन हयसाकोदुर, मनमगुडा वरोक-वरोर हयसाकोदुम.

4 गानि मनाकुन पिसागोटना पेनबाबाल ओना बेसतनम आनि पावरमते निडिस मत्ता दयातुन मनापोर्री हुपिच्चि,

5 मनाकुन कापाळतोर. मनम कीता नीति कबाह्कुनाहेका ओर मनाकुन कापाळा हिल्लोर गानि ओना सतता दयाहेदाले मनाकुन कापाळतोर. पूना रीतुने पुट्टना एर तुंगमळहेदाल आनि पवित्र आत्मा मनाकुन पूनगा कियमळहेदाल इल्हा आता.

6 ई पवित्र आत्मातुन, मनाकुन पिसागोटना येसु किरिस्तुनाहेदाल ओर मनापोर्री इरगा वळियतोर.

7 ओर इल्हा बारि कीतोर इत्ते, मनम ओना कुर्पाहेदाल नीतिमंतुल्लक आयगोम आनि बस्केळक पिस्सना पिस्वरता आसेते मनम ओना वारसदार्क आयाना इंचि.

8 इद पोल्ले निजम आंद. आनि निमे इव पोल्ले दटांचि वेहाना इंचि नावा इच्चा मंता. निमे दटांचि वेहेते, बोर अयेते पेनदून विस्वासम कीतुर, ओर जेरगतते मंचेके बेसता कबाह्क कीसिके मनांतुर. बारित्ते इव अन्नि मनकालोरहाटी बच्चोने बेस आनि पायदता पोल्ले आंद.

9 गानि अर्तम हिल्ला लोल्लिनाल, वंसाल्कुना बारेमता पोल्लेनाल, जगडाल्कुनाल इंका मूसाना नियमकुना बारेमता लोल्लिनाल निमे लक्कु मन. अव बतक ओज्जानव आयो, अवुनाहेदाल बतल पायदा इंका वायो.

10-11 अल्हा चुगली कीसि वैरे-वैरे कियालय हूळानोंक, उंदि-रोंड मल्कां दटांचा. केंजाकोटे, ओर मनकल हर्हि तप्पि पापम कीसंतोर, ओनद-ओरे दोस्सि इंचि हुपिचुकंतोर इंचि एपाट कीसि ओना दंटा होळसीम.

मतिते इरानालायक कोन्नि पोल्ले

12 बस्के अयेते नना, अरतिमास इनानोन हिलाकोटे तुकिकुस इनानोन निहगा लोहकन, अस्के बल्हा कीसि अयना निमे, निकोपोलिस सहरते नाकु वासि कलियना कोसिस कीम. बारित्ते पीनि कालमते नना अगोन मनंतन इंचि निरनायम येततन.

13 जेनास वकील आनि अपुलोसुक ओरा पयनेमते ओर्क बतले तक्को होनाकोटा हळकुचि, ओर्कुन सालां कीम.

14 अवसराल्कुन दोर्किचकुननाहाटी मना लोकल्लुकगुडा बेस कबाह्क कीसिके मनमळ करियगोम, अल्हा कीते ओर पलम हियानोरलेहका मनांतुर.

15 नावातोनि मनानोर अंतोर नीकु जोहर वेहचंतुर, इंका विस्वासमहेदाल मनाकुन पावरम कियानोर्कुगुडा जोहर. पेनदा कुर्पा मी अंतोरतोनि मान्निकाटी.

पिलेमोन पिलेमोनुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस जेलने मत्तस्के इद सिट्टि रासतोर. रोम सरकारता कैदिल्कुना लोपोटाल ओनेसिमस पोरोलतोर वरोर मत्तोर. ओर ओना मालक, इत्ते पिलेमोनागटाल वित्तिस मत्तोर. पौलुस जेलने मत्तस्के ओन्कु अगा ओनेसिमस कलियतोर, अस्के पौलुस ओनकु पेनदा पोल्ले वेहचि ओन विस्वासमते तत्तोर. पिलेमोन ओना सेवक ओनेसिमसुन माप कीसि, ओन वरोर दासुनलेसी आयो गानि वरोर विस्वासि तम्मुनलेसी मर्रा ओनगा ईरना इंचि पौलुस पिलेमोनुंक इद सिट्टि रासतोर.

बगा बतल मंता

जोहार आनि परिचयम 1-3

पिलेमोनना तारिप कियमळ 4-7

ओनेसिमसनाहाटी विनंति कियमळ 8-22

आकिरता बोदां 23-25

जोहर

1-2 नना पौलुस, किरिस्तु येसुना बारेमता बेसता कबुर वेहताहाटी कैदिन आसि जेलने मंतन. ना तम्मुनलेसी मनना तिमोतिनाहेंदाल ना पावरमगल्ला दंटातोर पिलेमोनुंक, मावा हेलड अपियांक, बेसता कबुर वेहानाहाटी मावालेसी लडाइ कियना अरकिपुसुंक, अल्हेने नीवा लोते जमा आयाना कलिसियातोरक इद सिट्टि रासेक मंतन.

3 मना पेनबाबानाहेंदाल आनि सामि येसु किरिस्तुनाहेंदाल मीकु कुर्पा, सांति दोर्किंकांटी.

पिलेमोनना पावरम आनि विस्वासम

4-5 पिलेमोन, सामि येसुना पोरींटा नीवा विस्वासम बारेमते, अल्हेने पेनदा लोकुल्कुनपोरीं निमे हुप्सना पावरम बारेमते नना केंजतन. अदुनहाटी नना पारतना कियनेके बस्केळक नीकुन मति कीसि पेनदुक दन्यवाद वेहंतन.

6 येसु किरिस्तुना अन्नि बेसता पोल्लेना तेल्चि, नीकु दोर्कताहाटी वैरतोरगुडा नी विस्वासमते पोत्तु आयागोम इंचि नना पारतना कीसिक मंतन.

7 तम्मा! निमे पेनदा लोकुल्कुन पावरम कीसि ओरा मनसुकुंक सांति हीतिन. अदुनहाटी नी पावरमहेंदाल नाकुगुडा वेल्लेन सुकम, सांति दोर्कता.

ओनेसिमसनाहाटी विनंति कियमळ

8-9 बद अब्सरमो अदुन कीम इंचि, किरिस्तुना पोरोलते नीकु वेहाना अदिकारम नाकु मंता. अयनागानि नना पौलुसुन, मातरन आसि किरिस्तु येसुनाहाटी जेलते मंचि, पावरमते नीकु विनंति कीसंतन.

10 ओनेसिमसुनपोरीं निमे दया हुप्सा इंचि नीकु विनंति कीसंतन. नना जेलते मननेके ओर पेनदुन विस्वासम कीसि नावा मर्रि आतोर.

11 मोदाला ओर नीकु बता कबळक ओज्जाकोंटा मत्तोर. गानि इंदके ओर मना इवुर्कुगुडा कबळक ओज्जंतोर.

12 अयते नना बचचोरो पावरम किय्याना ना मर्रिनसोटा ओनेसिमसुन नीहेके वापस लोहचंतन

13 बेसता कबुर वेहताहाटी नना जेलते मंतन. नीवा बदलिपोरीं ओनेसिमसुन नावा सेवा कति बेस मनंता इनकुंचि ओन नाहगेन ईराना विचारम कीसि मत्तन,

14 गानि निमे किय्याना इसोटा बेसता कबळ कुसिते कियगोम, बल्मितोनि जर्गामनि इंचि नीवा पोल्ले हिल्ला नना इल्हा कियमळ नाकु बेस दल्गाहिल्ले.

15 ओनेसिमसुन कोन्नि रोजकु निहागटाल लक्कु आसि मत्तोर, गानि बोर्क एरपाट! बस्केळताहाटी नीकु दगरेरा आयगोम इंचि अल्हा जर्गता बारे!

16 इंदकेटाल ओनेसिमसुन दासुनलेक्काते आयो गानि, दासुकनना एक्को, इत्ते नीवा दंटाता वरोर विस्वासि दादाना लेक्काते हळकुन. नना अयते ओन बचचोरो पावरम कीतन. गानि इंदके ओर सामिन विस्वासम कीसि, नीतोनि मनंतोर, निमेगुडा ओन नाकनना एक्को पावरम कीम.

17 ओक्कला निमे नाकुन सेवालोप्पो नीवा पालिगाड इनकुनानयते, नाकुन दग्गेरा कीकुत्ताप ओनगुडा दग्गेरा कीकुन.

18 ओर नीवद बतलन्ना नुकसान कीते, नीकु बतलन्ना बाकिगिटा मल्ले, नावा पोरोलते रासि इरा.

19 अदुन निहचीतन इंचि, नना पौलुस, नावा सतता कयदे रासि हीसेक मंतन. अल्हा हळते निमेन नाकु बाकि मंतन. इद नीकु वेहना अक्सरम हिल्ले.

20 अदुनहाटी नावा तम्मा! सामिना पोरोलते ओनेसिमुसना बारेमता विनतितुन ओप्कुचि, किरिस्तुना लोप्पो नावा मनसुंकु सांति हीम.

21 नना वेहतद निमे केंजतिन इत्ता बरोसाते इद सिट्टि रासेक मंतन. अचोने आय्का नना वेहतादानकन्ना निमे एक्को कीतिन इंचि नाक एर्के.

22 अल्हेने, नाहाटी मंदालय उंदि जेगा हळसि इरा. मिमेट किय्याना पारतनां केंजसि सामि नाकुन मिहगा लोहंतोर बारे इत्ता आसे नाकु मंता.

आकिरता जोहर

23 किरिस्तु येसुनाहाटी जेलने अरता एपप्रास इनानोर इग्गे नातोनि मंतोर, ओर मीकु जोहार वेहचंतोर.

24 अल्हेने नातोनि कलियसि कबळ कियाना मरकुस, अरिसतरकुस, देमास, ल्काल ईरगुडा नीकु जोहार वेहासेक मंतूर.

25 मना सामि येसु किरिस्तुना कुर्पा मीवा आत्मांकु तोळ मन्निकांटी, आमीन.

इब्रि इब्रि लोकल्लुकुनाहाटी रासता सिट्टि

इद सिट्टिता बारेमते गिचचो परिचयम

येसुना सिस्वयुल्क येसुना बारेमता बेसता कब्रुतुन दुनियाते होंचि वेहतुर. अदुनहाटी वेल्लेन यहुदिल्क येसुनपोर्रो विस्वासम कीतुर. पजा ओर बैरे लोकल्लुकुनाहेंदाल वेल्लेन तकलिपकु बोगांचतुर. अस्के, आ यहुदि विस्वासुल्क येसुनपोर्रोटा विस्वासमतुन होळसि मर्रा पळाना रीति-रिवाजकुन पीसि ताककोम इंचि विचारम कीतुर. इल्हा विचारम कियाना आ यहुदि विस्वासुल्कना दैरेनेमतुन बेसांगोटनाहाटी, येसुना वरोर बक्तुड ओर्क ई सिट्टि रासतोर.

पडाना नियम परकारम पेनदा बद इच्चा अयते पुरागा आया हिल्लेनो, आ इच्चातुन येसु किरिस्तु पुरागा कीतोर इत्ता पोल्ले, इद सिट्टिते वेल्लेन उदाहरन हीसि रासि मंतां. कास कीसि इद सिट्टिते मूड पोल्ले मनाकु दोर्कतां:

(1) येसु किरिस्तु पेनदा मर्रि आंदुर, ओर कुदुदु तकलिपकु बोगांचेके पेनदा इच्चातुन पुरागा कियालय तयार आतोर. ई येसु किरिस्तु इत्ते, पेनदा अन्नि दूतांकन्ना, पेनदा कब्रुतोर्कन्ना, मनकालोकुकन्ना बच्चोने पेदूदोड आंदुर.

(2) येसु किरिस्तुंक्नना मुन्ने मत्ता पेदूदा पेर्मालोरा लोपोटाल, येसु वरोरे बस्केळ्ळक जीवाते मनना पेदूदा पेर्मल इंचि पेन रूजुव कीसि हुपिस्ता.

(3) जिवरासिना मोक्कुल्क आनि रीति-रिवाजकु मनाकुन पापमताल पिसागोट्टंतां इंचि यहुदिल्क नम्मुंदुर, गानि सिराप येसु किरिस्तु वरोरे, पापमताल, हामुरताल, हामुरता वेंरताल पिसागोटा परंतोर इंचि इद सिट्टिते रासतद मंता.

बगा बतल मंता

किरिस्ते पेनदा मर्रि, वारसदार आनि महिमा आंदुर 1:1-3

किरिस्तु पेनदा दूतांकन्ना पेदूदोड आंदुर 1:4-2:18

किरिस्तु मूसाल आनि येहोसुंकन्ना पेदूदोड आंदुर 3:1-4:13

किरिस्तुना पेर्मलतनम अंटवुंकन्ना पेदूदेद आंद 4:14-7:28

किरिस्तुनाहेंदाल वाता करार अन्नि करास्कन्ना पेदूदेद आंद 8:1-9:22

किरिस्तुना मोक्कु अन्नि मोक्कुल्कुंकन्ना पेदूदेद आंद 9:23-10:39

किरिस्तु विस्वासमकन्ना पेदूदोड आंदुर 11:1-12:29

आकिरता बोदां आनि आदेसाल्क 13:1-25

येसु किरिस्तु पेनदा मर्रि आंदुर

1 वेल्लेन मुन्नेटा कालमते पेन बच्चुंगो मल्कां बच्चुंगो तीरकुने पेनदा कब्रुतोरहेंदाल मना तादो-बाबुरतोनि वळ्ळता.

2 गानि ई आकिरता रोजकुने बारे, पेन दाना मर्रिनाहेंदाल मनातोनि वळ्ळता. दाना मर्रिनाहेंदाले इद पूरा दुनियातुन तयार कीसि, ओन ई दुनियाता वारसदार इंचि निलाहता.*

3 आ मर्रि पेनदा महिमाता वेलगु आंदुर. इंका पेनदा गुनम आनि मर्रिना गुनम उंदेंतीर मंता. मर्रि ओना बलमगल्ला पोल्लेने ई दुनियातुन ताकिच्चेके मंतोर. ओर मना पापाल्लुकुंनता नोर्सि मनाकुन पवित्र कीतोर. पजा एत्तुने स्वर्गमते मंदना अन्निटकन्ना पेदूदा पेनदा तिना बाजुंक होंचि उदतोर.*

येसु पेनदा दूतांकन्ना पेदूदोड

4 इल्हा ओर पेनदा दूतांकन्ना वेल्ले बेस पोरोल आनि कदर दक्किचकुत्तोर.

5 बारित्ते, पेन दाना मर्रिना बारेमते,

“निमे नावा मर्रिन आंदिन, इय्याला ननाने नीकुन पुटिस्तन. * इंका नना ओना बाबोन आंदुन, ओर ना मर्रि आंदुर.”*

इंचि येसुन तप्पा बस्केने बदे दूतातुन पेन इना हिल्ले.

6 इदे आयवा, बस्केने अयते पेन दाना तोल्सूर मर्रिन भूमितगा तत्ता, अस्के, “पेनदा अन्नि दूतां ओन मोळ्ळिं,”* इंचि इत्ता.

7 पजा पेन दाना दूताना बारेमते वेहतस्के, “अद दाना दूतन वळिलेहका आनि दाना सेवकुलकुन पोत्तना तळमिलेहका कीता,”* इंचि वेहता.

8 गानि दाना मरिना बारेमते,
“पेनदुना, नीवा राजगद्दे बस्केळक निल्सि मनंता,
निमे नीतिते राज्येम कियानदुन आदिन.

9 सत्तेमतुन निमे पावरम कीतिन, सत्तेम हिलुवादान निमे हय्सिन.
अदुनहाटीगे नना, नीवा पेनबाबन, नीवा दंतातोरा लोपपोटाल नीकुन पेरसि,
वेल्ले आनंदमता निय होक्सि नीवा अबिसेकम* कीतन,”*
इंचि पेन इत्ता.

10 इच्चोने आयका, पेन दाना मरिना बारेमते,
“सामि! मोट्टा मोदाला बूमिक पुनादि दोहतोन निमेने आंदिन.
मब्बुकुन नीवा कय्दे तयार कीतिन.

11 अव अन्नि नासडेम आसि होनानुं, गानि निमे बस्केळक मनांतिन,
कपडिं पडन आसि हसोलाप, अव अन्नि पडानव आसि होनानुं.

12 निमे सेद्दरतुन आटमूट कीताप, अबुन आटमूट कीकिन.
अव कपडिनालेसी बदलांचनुं, गानि निमे मात्रम बस्केळक उंदेतीर मनानोन आदिन,
नीवा कालाल्क बस्केने मारो,”*
इंचि इत्ता.

13 मारो, “बदवेरदाका अय्ते नीवा पगातोर्कुन नीवा कालकुना हिळ्ळ तर्रो अदवेरदाका,
निमे नावा तिना बाजुंक उद्दिदसि मन्नु.* इंचि बद्दे दूतातुन बस्केने पेन इना हिल्ले.”

14 पेनदा अन्नि दूतां दाना सेवा कियाना आत्मांगे आयोंगा! बोर्क अय्ते पापाल्क मापि आसि मुक्ति दोर्कतनो ओर्कु सहायम कियानाहाटी पेन इवुन लोहांता.*

2

अन्निकन्ना मंचि मुक्ति

1 अदुनहाटी मनम केंजता सत्तेम पोल्लेनाल लक्कु आयामन्नि इंचि अबुनहेके मनम बेस लक्से हियगोम.
2 बारिल्ले, पेनदा दूतानाहेंदाल वेहता पोल्ले सत्तेम इंचि रूजुव आता,* अस्के आ पोल्ले परकारम कबळ कियका तप्पु कीतोर्कु आनि ताकुवोर्कु दग्गुता सिक्सा दोर्कता.
3 अय्ते इच्चोर पेद्दा मुक्तिता कबुरतेके लक्से इर्काफोटे, वायाना सिक्साताल मनम बल्हा तपिचकुना परीतोम? इद्दुना बारेमते मोट्टा मोदाला सामिए वेहतोर. अद कबुरतुन सामिनगटाल बोर अय्ते केंजतुरो, ओर अद कबुरतुन मनाकु तेळियागोटिस रूजुव कीतुर.

4 अचोने आयका पेनगुडा चिन्हां, इचंत्रमता कबाहक, तीराता अद्बूताल्क आनि पवित्र आत्माता वराल्क दाना इच्चा परकारम दाना बक्तुल्लुक हीसि, ई मुक्तिता बारेमते गवाइ हीसिक मत्ता.

येसु मनकना रूपमते मारियमळ

5 मुन्ने वायाना बद दुनियाता बारेमते मोमोट वेहचंतोम, आ दुनियातुन पेन दाना दूताना कय हिळ्ळ इर्ा हिल्ले.

6 इद्दुना बारेमते दर्मासस्त्रमते उंदंगा बोरो वरोर गवाइ वेहासेक इल्हा इत्तोर:
“मनकल इत्ते असल बोर आंदुर, ओना बारेमते निमे इच्चोन विचारम कीसंतिन.
हिलाकोटे निमे इच्चोर पिकिर कियानाहाटी,
असल मनकना रूपमते पुटतोर बोर आंदुर?

7 निमे ओन पेनदा दूतांकन्ना गिचचो सिन्नगा कीतिन,
गानि निमे ओन्क पेद्दातनम आनि कदरता किरिटम हीसि,
निमे नीवा कय्दा कबाहकुनपोर्ो ओन्क अदिकारम हीतिन,

* 1:7 बजन संहिता 104:4 * 1:9 अबिसेकम राजाल आसि राजगद्देपोर्ो उपिचका मुन्ने ओना अबिसेकम किया पीता. * 1:9 बजन संहिता 45:6-7 * 1:12 बजन संहिता 102:25-27 * 1:13 बजन संहिता 110:1; मत्तयाल 22:44; मरकुस 12:36; लूकाल 20:42-43 * 1:14 बजन संहिता 103:20-21 * 2:2 गलातिया 3:19

8 अन्नित्तुन ओना काल्कुनगा इरतिन.”*☆

इंचि इत्तोर. पेन अन्नित्तुनपोर्रो ओन्क अदिकारम हीता, ओना अदिकारमते हिलाकोटा बतातुने होळसा हिल्ले. गानि इंदके अन्नि ओना अदिकारमते मत्ताप दिस्सेक हिल्ले.

9 अयना जेयसेपताहाटी पेनदा दूताकन्ना सिन्नागासि मत्ता येसुन मनम हूळसंतोम. पेनदा कुपहिंदाल अंतोर मनकालोरहाटी ओर ओना जीवातुन हीसि हामुरता रसि हूळतोर. हामुरतुन सहन कीताहाटी पेन ओन्क पेद्दातनम आनि कदरता किरिउम केराहता.

10 पेन अन्नित्तुन सतताहाटी तयार कीता आनि सतागे अन्नित्तुन ताकिचचंता. आ पेन दाना महिमाता राज्यमते वेल्लेन मंदितुन सतता मर्क-मियाहक कीसि तर्रानाहाटी, दाना सतता मर्रि येसुन पेरता. मनाकु मुक्ति दोर्कगोम इंचि येसुन अद वेल्लेन तिप्पलुकुनतोनि ओन पुरागा कीता.

तम्मुर-हेलड इनालय येसु सिग्गु अर्रोरि

11 मनाकुन पवित्र किट्ट्याना येसु आनि पवित्र आतोरम मनम, वरोर बाबाना पिलाल्कुमे आंदुम. अदुनहाटी मनाकुन तम्मुरहक-हेलाहक इंचि वेहालय येसु सिग्गु अर्रोरि.

12 अदुनहाटी,

“नावा तम्मुरहक-हेलाहकुक नीवा पोरोल वेहकन,
कलिसियातोर मुन्ने नना नीकुन तल्सकुनकन,”*☆
इंचि ओर पेनदुन इत्ता पोल्ले दर्मसास्त्रमते रासतद मंता.

13 मर्रा,

“नना पेनदापोर्रो बरोसा इरतिन.” अचोने आयका,
“इग्गे नना, नाकु पेन हीता पिलाल्कुनतोनि मंतन,”*☆
इंचि दर्मसास्त्रमते रासतद मंता.

14-15 पेनदा पिलाल्क आता मनम, मँदुल रूपमते मत्ताहाटी येसुगुडा हरेक पोल्लेते मनालेहका आसि वातोर. मना पिस्वरता हामुरता वर्रि मनागा मत्ताहेका देय्यमता अदिकारम मनापोर्रो मत्ता. गानि येसु ओना हामुरताहेदाल, देय्यमता अदिकारमतुन नासडेम कीसि, मनाकुन हामुरता वर्रिताल इळबळिस्तोर.

16 पेनदा दूतांक सहायम कियालय येसु असले वायाहिल्लोर गानि अब्राहामुना वंसंमतोर्के सहायम कियालय वातोर.*

17 इदुनाहाटीगे येसुक अन्नि तीरकुने ओना तम्मुरहक-हेलाहकुनलेसी रूपम येतमळ अक्सरम मत्ता. इल्हा रूपम येतते ओर पेनदा मुन्ने सेवा कियाना वरोर दयागल्लोड आनि विस्वासमलायक पेद्दा पेमर्ल आंतोर. अस्केन ओर लोकुल्लुकुना पापाल्कुनाहाटी मोक्कु हिट्ट्या परंतोर.

18 ओर कुददु परिक्साते अर्रि तिप्पलक बोगांचि मंतोर, अदुनहाटी इंदके ओर अयते परिक्साते अर्रि तिप्पलक बोगांचंतुरो, ओर्कु ओर सहायम किया परंतोर.

3

येसु म्सांकन्ना पेद्दोड

1 अदुनहाटी, पवित्र विस्वासलुकुनिता! मुक्तिता पालिगाहक आयालय पेन मीकुन केयता. येसुन पेन पेद्दा पेमर्ल आनि प्रेरित आयालय लोहचीता इंचि मनम ओप्कत्तोम, अयते ओना बारेमते मिमेट विचारम कीमट्ट.

2 पेनदा पूरा कुटुंबमते म्सांल अन्नि कबाहकुने विस्वासमलायक मत्तोर, अल्हेने येसुगुडा ओन निल्लाता पेनदाहाटी विस्वासमलायक मत्तोर.

3-4 हरेक लोतुन दोहानोर बोर्नाना वरोर मनकल मनंतोर, गानि अन्निन तयार कीतोर मात्रम पेने आंदु, बल्हा अयते लोतुकन्ना लोन दोहानोंक एक्को कदर मंता, अल्हेने येसुगुडा म्सांकन्ना एक्को कदरगल्लोड इंचि पोरोल तरकूत्तोर.

5 वायाना कालमते पेन बतल-बतल अयते वेहाना मंतानो, अबुना गवाइ लोकुल्लुकुक वेहनाहाटी म्सांल, पेनदा पूरा लोतोरगा वरोर विस्वासमलायक सेवक आसि मत्तोर.

पेनदा लोकुल्लुकुना आरामता बारेमते

6 गानि पेनदा विस्वासमगल्ला मर्रि, किरिस्तु, पेनदा पूरा लोतोर अदिकारि आसि मत्तोर. मनमगिटा मना विस्वासम आनि आसेता बारेमते आकिरदाका इरगा गट्टिगा मत्ते, मनमगुडा पेनदा लोतोरम आसि मंतोम.

* 2:8 बजन सहिता 8:4-6

* 2:12 बजन सहिता 22:22

* 2:13 यसायह 8:17-18

* 2:16 मनम येसुन विस्वासम कीतोम इंचि, मनमगुडा अब्राहामुना वंसंमतोर्के आंदुम.

7-8 अस्के पवित्र आत्मा दर्मसास्त्रमते इल्हा इंता:

“मिमेट इय्याला पेनदा पोल्ले केंजानय्ते,
पेन वेहतद मोमोट केंजोम इंचेके,

इसाएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,
अल्हा मिमेट मीवा मनसुकुने मुजोरि कियमट.

9 अगा नल्चै वर्सनदाका नना कीता कबाहकुन हळसिगुडा,
मीवा पेद्दाल्क परमेका कीसि नावा पट्टु हळतुर.

10 अदुनहाटीं नना आ पीळिता लोकुल्कुनपोर्गे होंग पीसि,
‘ईरा मनसु बस्केळक नहागटाल तप्सोचि लक्कु मनंता,

ईर नावा हरदुन बस्केने एरपाट किया हिल्लुर,
इंचि ओर्कुन इत्तन.

11 अदुनहाटीं नना होंगुने, ‘ओर्कुन आराम दोर्कना जेगाते बस्केने होळिया हिद्योन,’
इंचि ओट्टु तिचि वेहतन.”*

इंचि इत्ता.

12 विस्वासुल्कुनिटा, जेगाता! जीवाते मंदना पेनदापोर्गेटा विस्वासमताल लक्कु कियागोट्टनसोटा कराब, विस्वासम हिलुवा मनसु, मीलोप्पो बोरागेन मनानायो.

13 गानि पापम मीलोप्पो वासि मीवा मनसु मुजोरि कियाकोटा मननाहाटी, “इय्याला” इन्ना वेला मनानेकेने दररोज वरोंक-वरोर दैरनेम हीसेक मंद.

14 बारित्ते, सुस्वने मनम इर्ता बरोसातुन मना पिस्वरता आकिरदाका गट्टिगा पीसि मत्तेन, मनम किरिस्तुना पालिगाहक आंतोम.

15 दीनकन्ना मुन्ने दर्मसास्त्रमते इल्हा वेहतद मंता:

“मिमेट इय्याला पेनदा अल्किर केंजानय्ते,
पेन वेहतद मोमोट केंजोम इंचेके,

इसाएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,
अल्हा मिमेट मीवा मनसुकुने मुजोरि कियमट.”*

इंचि रासि मंता.

16 पेनदा पोल्ले केंजसिगुडा दाना विरोदमते ताकतोर बोर आंदुर? मूसानतोनि कलियसि इजिप्त देसेमताल पलाते अरता आ अंटेर लोकुल्के गदा!

17 नल्चै वर्सनदाका पेन बोरा पोर्गे होंग पीसि मत्ता? पापम कीसि बय्लि जेगाते बोरा पीनगुल्क अय्ते अर्सि मत्तांगो, ओरा पोर्गेन आयोना?

18 “ओर्कुन आराम दोर्कना जेगाते बस्केने होळिया हिद्योन,” इंचि पेन बोरा बारेमते ओट्टु तित्ता? दाना पोल्ले परकारम बोर अय्ते ताका हिल्लुरो, ओरा बारेमतेन गदा!

19 इल्हा ओर्कुं विस्वासम हिलुवाहेंकेन, ओर आराम दोर्कना जेगाते होळिया पराहिल्लुर, इंचि मनाकु तेळियंता.

4

आराम दोर्कना जेगाते होळियमळ

1 आराम दोर्कना जेगाते होळियाना बारेमता पेन हीता पोल्ले, इदवेरदाकागुडा ताकसैके मंता. अद मना लोप्पोटाल बोनागटालन्ना तप्सोनामन्नि इंचि, मनम पेनदा वैरैते मंदकोम.

2 बारित्ते, ई आराम दोर्कना जेगाता बारेमता बेसता कबुर इसाएल लोकुल्कुंक एवताप मनकगुडा वेहमळ जर्गता. गानि ओर आ कबुरपोर्गे विस्वासम इर्गे हिल्लुर, अदुनहाटीं ओर्कुं दानद बतले पायदा आयाहिल्ले.

3-4 विस्वासम कीतोरम मनम, आ आराम दोर्कना जेगाते तप्पाकोटा होळियंतोम. बारित्ते एडोव रोजुना बारेमते इल्हा रासतद मंता:

“पेन अद कीता अन्नि कबाहकुनाल एडोव रोजुननाड आराम कीता,”

इंचि रासि मंता. अयना आ जेगातुन तयार कियाना कबळ, पेन दुनियातुन पुटिस्तस्केन पुरागा कीसि इर्ता. बारित्ते, विस्वासम इस्वोरा बारेमते पेन होंगुने इल्हा इत्ता:

“ओर्कुन आराम दोर्कना जेगाते बस्केने होळिया हिद्योन,
इंचि ओट्टु तिंचि वेहतन.”* इल्हा इत्ता.

5 आनि मर्ना, “ओर्कुन आराम दोर्कना जेगाते
बस्केने होळिया हिद्योन,”

इंचि इंकुदि मल्का इत्ता.

6 दीनकन्ना मुन्ने मना पेदूदाल्क बेसता कबूर परकारम ताकुवाहेंका ओर आराम दोर्कना जेगाते होळिया पर्राहिल्लुर. अयना अद आराम दोर्कना जेगाते इच्चूर लोकुल्क इंदकेगुडा होळियाना मंता.

7 अदुनहाटी, पेन उंदि रोजु इंकुदि रोज तयार कीसि इरता, अदुन “इय्याला” इंचि इंतुर. पेदूदाल्क हर्रि तप्ता वेल्लेन वर्साक, बल्हा अयते मुन्ने वेहताप,

“मिमेट इय्याला पेनदा पोल्ले केजानयते,
इय्याला पेन वेहतद मोमोट केजोम इंचेके,

इस्नाएल लोकुल्क बय्लि जेगातगा पेनदा पट्टु ह्वालय बल्हा मुजोरि कीतुरो,
अल्हा मिमेट मीवा मनसुकुने मुजोरि कियमट,”*

इंचि दाविदना बजन संहिता पुस्तकमते पेन वेहता.

8 ओक्कला जोसुवाल ओर्कुन आराम कियाना जेगाते ओसि मल्ले इंकुदि रोजुना बारेमते पेन मर्ना वळकाकोनवळ.

9 अदुनहाटी पेनदा लोकुल्क आराम कियाना रोजु इंका वायानदे मंता.*

10 बल्हा अयते पेन दाना कबाह्कन महाचि एडोव रोजु आराम कीता, अल्हेन दाना आराम कियाना जेगाते होळियानोरगुडा ओरा कबाह्कन महाचि आराम कियानुर.*

11 इस्नाएल लोकुल्क पेनदा पोल्ले परकारम ताकुवाहेंका ओर नासडेम आतुर, गानि मनम ओरालेसी आयाकोंटा, पेनदा पोल्ले परकारम ताकसेके अद जेगाते होळियाना इरगा कोसिस कियोगोम.*

12 बारिल्ले पेन वेहता ई पोल्ले, जीवा मल्लद आनि बलमगल्लद आंद, अद रौडु बाजकुनाल करा-करा मनना कसेरकन्ना एकको करा-करा मंता. अद बल्हा बोक्कनाल प्लगुन वेरे-वेरे कीता, अल्हेन आत्माताल जीवातुन वेरे कीता. इंका अद मनसुना विचाराळुकुन, अवुना उदूदेसालुकुना बारेमते बरोबर वेहा पर्रता.

13 इद दुनियाते मनानव बतांगे पेनदा नदरताल मक्किसि हिल्लें. मनम मना बारेमते लेक्का अप्पजेप्पना पेनदा मुन्ने अन्निगुडा कुल्ला-कुल्ला मंता.

येसु अंतोर्कन्ना पेदूदा पेर्मल

14 अंतोर्कन्ना पेदूदा पेर्मल, स्वर्गमते होत्ता पेनदा मर्रि येसु, मनातोनि मंतोर. अदुनहाटी अंतोरा मुन्ने ओप्कुत्ता मना विस्वासमतुन मनम गाट्टेगा पीसि मंदकोम.

15 मना पेदूदा पेर्मल येसुंकुगुडा मनालेसी पापम कियाना अन्नि परिकसां वातां, गानि ओर बस्केने पापमते अर्रा हिल्लोर. अदुनहाटी ओर मना कमजोरिन, दुक्कालुकुन तेल्लिचकुंतोर.

16 अयते वट! गाट्टेगा देरैनेम कीसि मनम पेनदा दयाता राजगदूदे दगोर्क दाकोम. दीनहेंदाल मनाकु अब्बरम मल्लस्के, मना सहायमहाटी ओना कुर्पा आनि दया दोर्कार.

5

पेदूदा पेर्माना कबाह्क

1 हेरक पेदूदा पेर्मन, लोकुल्क ओरा लोप्पोटाल पर्रातुर. लोकुल्कुना पापाल्क मापि आयानाहाटी लोकुल्कुनाहेंदाल ओर पेनदुक मोक्कुल्क हिद्ययना, सेसां* वाटाना कबळ कियालय ओन निल्लाहंतुर.

2 आ पेर्मलगुडा वेल्ले तीरकुने कमजोर मंतोर, अदुनहाटी तेळियका तप्पु कीतोर्कुन, हर्रि तप्पुत्तोर्कुन ओर दयाते ह्वा पर्रातोर.

3 अदुनहाटी ओर लोकुल्कुना पापाल्क मापि आयालय मोक्कु हीताप, ओना सतता पापाल्कुनाहाटीगुडा मोक्कु हियापीता.*

* 4:3-4 बजन संहिता 95:11 * 4:7 इब्रि 3:7-8; बजन संहिता 95:7-8 * 4:9 उत्पत्ति 2:2-3 * 4:10 उत्पत्ति 2:2 * 4:11

2 पत्रु 1:10-11 * 5:1 सेसां पर्रिक, कोलां, जोनां, वजि इवन्निन पेनदा गदूदेतगा जमा कीतुर, इदुने सेसा इंतुर. * 5:3 लैयवस्ता 16:6

4 बल्हा अय्ते मोट्टा मोदाटा पेद्दा पेर्मल आयानाहाटी पेन हास्नुन केयता, अल्हेन पेन केयवद बोरे मनकल ओनद ओरे पेद्दा पेर्माना कदरता जेगा येता पर्रोर.

5 अल्हेन किरिस्तुगुडा ओनद ओर पेद्दा पेर्मल आया हिल्लोर. गानि बद् पेन अय्ते ओन, “निमे नावा मर्रिन आंदिन, इय्याला नगाने नीकून पुटिस्तन,” इंचि इलतानो अंदे पेन ओन पेद्दा पेर्मल इंचि निल्लाहा.✱

6 अल्हेन, “निमे मेल्किसेदेकुनलेहका बस्केळ्ताहाटी पेद्दा पेर्मल आसि मंदकिन”✱ इंचि मसंदि जेगातेगुडा पेन ओन इत्ता.

7 येसु इद् बूमिपोर्री मनकना रूपमते मत्ता रोजकुने, ओन हामुरताल कापाळाना पेनबाबांक अळसि, मोल्कुचि विनंति-पारतनां कीतोर. अस्के ओना बकित्तुन पीसि पेन ओना पारतनातुन केंजता.

8 येसु कुद्दु पेनदा मर्रि आसिगुडा तिप्पल्क बोगांचेके, पोल्लेपोर्री ताकमळ इत्ते बतल, करियतोर.

9 इल्हा, ओन्क बल्हा अय्ते आयाना मत्ता अल्हा पुरागा आसि, ओना पोल्लेपोर्री ताकाना अंतोराहाटी ओर, बस्केळ्ताहाटी मुक्ति हियानोर आतोर.

10 इल्हा पेन ओन मेल्किसेदेकुनलेहका पेद्दा पेर्मल इंचि निलाहाता.

पेनदा मनमळता बारेमता तेल्वि बेर्साहिल्ले

11 ई मेल्किसेदेकुना बारेमते वेहकोम इत्ते वेल्लेन पोल्ले मंतां. गानि मिहगा केंजना मनसु हिल्लुवाहेंका, बेस तेळियागोट्टिस वेहमळ इत्ते वेल्लेन कस्टम.

12 अल्हा हळते इदवेरदाका मिमेट गुस्ल्क आया मत्ता. गानि इंदके मीके वेरे बोरन्ना वासि पेन हिय्यना मुक्ति बारेमता पोल्ले मर्रा कराहना अब्सरम मंता. मिमेट इदवेरदाकागुडा पाल उनानोरालेसीगे मंतिट, गाटो तिननालायक आया हिल्लित.

13 बारित्ते पाल उनना हरेक पेडल, ओर पसि पेडले मनंतोर. ओन्क नीति पोल्लेना बारेमते तेळियो.

14 गानि बोर अय्ते तेल्वि बेर्सि, मंचि-सेड्डातुन एरपाट कीसि अल्हा ताकतुरो, ओरे गाटो तिनानोरालेसी आतुर.

6

1 अस्के किरिस्तुना बारेमते सुस्वने करियता बोदाना बारेमते मर्रा-मर्रा वळकमळ होळसिसि, गिचचो मुन्नेळ्क होंचि पेद्दा बेर्सितोरालेक्ते दाकोम. मसंदि मल्का हामुरतेके ओयाना कबाहकुनाल मनसु मार्सकुन्मळ, पेनदापोर्री विस्वासम इरमळ,

2 बापतिस्मता बारेमते करियमळ, तल्लापोर्री कय इरमळ, हासि मर्रा जीवाते तेदमळ आनि बस्केळ्ताहाटी मनना न्यायम बारेमते करियमळ, इसाँटा किरिस्तुना बारेमते सुस्वने करियता बोदाना बारेमते मीकु मर्रा-मर्रा वेहाना अब्सरम हिल्ले.

3 अयना पेनदा इच्चा मत्ते इल्हागुडा कीकोम.

विस्वासमताल पजोळ्क आतोराना गति

4 बोर अय्ते पेनदुन विस्वासम कीसि पजा आ विस्वासमताल पजोळ्क आंतुर, ओर्कुन मनम बल्हा मर्रा मलाहकोम? बारित्ते ओर्क अय्ते ओरा पिस्वरते उंदि मल्का वेल्गु दोर्किस मत्ता,

5 ओर अय्ते स्वर्गमताल दोर्कना वराल्कुना रसि हळतुर, पवित्र आत्माते पालिगाहक आतुर, इंका पेनदा बेस पोल्लेनद आनि वायना कालमता ताकतता रसि हळतुर,

6 असंतोर पेनदा मर्रिन मर्रा अंतोरा मुन्ने कूसुनपोर्री वेलाड वाटसि ओन बदनम कीसंतुर. अदुनहाटी असंतोर्कुन पेनदा विस्वासमताल लक्कु आयानय्ते मर्रा मनसु मार्सकुननालायक कियमळ असल कुदरेन कुदरो.

7 विस्वासमताल पजोळ्क होत्ता ई लोक्कुलक, कराब बूमितसंतोर आंतुर. बारित्ते, बूमि दानपोर्री अरता पिरदा एतुंता उंचि, दान ऊळाना कास्तकरि मनकंक बेस पंटा हियानय्ते पेन दान्क आसिर्वाद हीता.

8 गानि अंदे बूमि ओक्कला हाहकु, हाहकुना पोदा पुट्टिचानय्ते अद कबळ्क ओज्जाकॉटा आसि पेनदा सापनेमलायक आंता. आकिरते दान बोळसि पोहमळ जर्गीता.

पेन बस्केने मति मर्गो

9 अय्ते नावा पावमगल्लोरिटा, मोमोट इंदके इल्हा वळकसंतोम. अयना मीहेंदाल मोमोट इवुंकन्ना बेस पोल्ले आसे पडसंतोम. मिमेट कियाना कबाहकुन हळसि, मीकु निजमे मुक्ति दोर्कता इंचि माकु बरोसा मंता.

10 बारित्ते, पेन अन्यायम कियानद आयो. दाना पोरोलते मिमेट कियाना बेस कबाहकुन, दाना पवित्र लोक्कुलकुनपोर्री मिमेट हुपिस्ता पावरमतुन आनि कीसेके मनना सहायमतुन अद बस्केने मति मर्गो.

11 मनम बद्नाहाटी अय्ते आसे पळसि एदुर हळसेक मंतोमो अद दोर्कनदाका, मी लोप्पोटा हरेक मनकल पुरागा गट्टि आसते आकिरदाका कोसिस कीसेके मनना इंचि मोमोट मनसुनाल कोरसंतोम.

12 अदुनहाटी मिमेट लंडोर्क आयमट. गानि बोर लोकुलक अयते विस्वासम आनि ओपकेहेंदाल पेन हीतन इत्तादुन दक्किचकुंतुरो ओरा अळगुने अळगु वाटसि मिमेट ताकट इंचि कोरसंतोम.

पेन हीता पोल्ले

13 पेन अब्राहामुक पोल्ले हीतस्के, ओट्टु तिनानाहाटी दानकन्ना पेद्दोड बोर हिलुवाहेंका अद दाना सतता ओट्टु तित्ता.

14 तिचि, “नना नीकु तपाकोटा आसिर्वाद हीतन, इंका नीवा वंसमतन वेल्लेन बेसिंगोट्टतन,”* इंचि इत्ता.

15 इल्हा अब्राहाम वेल्ले ओपकेते एदुर हळतोर इंचि पेन ओन्क हीतन इंचि पोल्ले हीतद ओन्क दोकुंता.

16 मनकालोर्क ओट्टु तिनानस्के, ओरकन्ना पेद्दोरद ओट्टु तितुर. ओरा हरेक जगडमता पैसला आ ओट्टु तिनाहेंदाले पक्का आंता.

17 पेन दाना पिलानतुन बस्केने मार्सो इत्ता संगति, अद पोल्ले हीतोर्कुंक बेस तेळियाना इंचि पेनदा इच्चा मंता. अदुनहाटी अद अल्हा ओट्टु तिचि दाना पोल्लेता गेरॉंटी हीता.

18 पेन हीता पोल्ले आनि ओट्टु, इव रौंडु बस्केने बदलांचो. इवुना बारेमते पेन बस्केने आबद्दम वळ्ळाक पर्री. मनम बद आसेहेके अयते होनालय पेयसतोमो, अद आसेहेके मनम इकिचचो गट्टि दैरनेमते होनना इंचि पेन अल्हा माकु रौंडु मल्लां गेरॉंटी हीता.

19 अद आसे इत्ते मना जीवाहाटी उंदि कोय्याता कुसितसोट्टद आंद. अद बेस गट्टिगा आनि मेसलाकोटा पीसि मंता. पेन मनना पवित्र जेगातगळ्ळक अद मनाकुन एव्सा पर्रीता.

20 अद जेगातगा येसु मनाहाटी मनाकन्ना मुन्नेन होळियतोर. होळियसि मेल्लिसेदेकुना रीतिते बस्केळ्ळाहाटी पेद्दा पेर्मल आतोर.

7

मेल्लिसेदेक पेर्मल आंदुर

1 ई मेल्लिसेदेक सालेम सहरता राजाल आनि अन्निटकन्ना पेद्दा पेनदा पेर्मल मतोर. अब्राहाम वरे राजालोरतोनि लडाइ कीसि ओर्कुंन गेल्लि, मल्लिस वायनेके मेल्लिसेदेक ओन्क कलियसि आसिर्वाद हीतोर.

2-3 अस्के अब्राहाम लडाइते गेल्लि तत्ता पूरा दनम-संपत्तितुन तस कीसि, पदोव तस मेल्लिसेदेकुंक हीतोर. मेल्लिसेदेक इनना पोरोल्कु अर्तम, “नीतिता राजाल” इंका इब्रानि बासाते सालेम इनना पोरोल्कु “सांति” इंचि अर्तम आंद. इत्ते ओन सुकमता राजाल इंचिगुडा इनावचु. मेल्लिसेदेकुना तल्लुर-बाबो बोर आंदुर, ओना तम्मुहक-तादालोर बोर आंदुर, ओना पुट्टु-हामुरता बारेमतेगुडा दर्मसास्त्रमते बतले रासि हिल्ले. पेनदा मरिनलेहका ओरगुडा बस्केळ्ळाहाटी पेर्मल आसि मंतोर.

4 ई मेल्लिसेदेक इत्ते बचोन पेद्दा मनकालो मनमे विचारम कियाना मंता. मना मोदोलता मनकल अब्राहाम पगातोरहेंदाल गेल्लसता बेसता मालुना पदिताल उंदि तस ओन्क हीतोर.

5 मूसाना नियमते उंदि आदेस मंता. अद बतल इत्ते, लेवि वंसमताल पेर्मालोर आतुर, वरे वंसमता लोकुलक ओर अब्राहामुना वंसमतोर आयिना ओरा तम्मुहक-तादालोर, ओरा कमयता पदिताल उंदि तस पेर्मल आतोर्कु हिश्युडे गावाले.*

6 गानि मेल्लिसेदेक लेविना वंसमतोर आयोर. अयनागानि मेल्लिसेदेक, बोन्क अयते पेन पोल्ले हीसि मत्ता आ अब्राहामुनाहेंदाल पदि तसकुनाल उंदि तस येतुंकुचि ओन्क आसिर्वाद हीतोर.†* दीनहेंदाल मेल्लिसेदेक पेद्दोड आंदुर.

7 इंदके पेद्दोड सिन्नोंक आसिर्वाद हीतोर इत्ता पोल्लेपोर्री बतले अनमानम हिल्ले.‡

8 लेविना वंसमताल पेर्मालोर आतोर पदिताल उंदि तस येतंतुर. गानि ओर अयते उंदि रोज हायना मनकालोर आंदुर. गानि बस्केळ्ळक पिस्सि मनना मेल्लिसेदेकगुडा पदिताल उंदि तस येतंतोर इंचि गवाइ वेहताप दर्मसास्त्रमते रासि मंता.

9 अल्हा हळ्ते, पदिताल उंदि तस येताना लेविगुडा अब्राहामुनाहेंदाल, पदिताल उंदि तस मेल्लिसेदेकुंक हीतोर इंचि इनावचु.

10 अद बल्हा इत्ते, अब्राहाम मेल्लिसेदेकुंक कलियसि पदोव तस हीतस्के, लेवि पुट्टा हिल्लोर, अयनागानि ओर ओना तादो-बाबो अब्राहामुना मेंदुल्ले जीवा पेळ्ळेतालेसी मत्तोर. *

येसु मेल्लिसेदेकुनसोटा पेर्मले

* 6:14 उत्पत्ति 22:16-17 * 7:5 लेविना बाबो याकोब आंदुर. ओनागटाले इब्राएलतोर अंदोर पुट्टुर. अब्राहाम याकोबना मातिर दादाल आंदुर.

† 7:5 गिनति 18:21-28 † 7:6 मेल्लिसेदेकुना कालमते लेवि पुट्टा हिल्लोर. * 7:6 उत्पत्ति 14:19-20 ‡ 7:7 मेल्लिसेदेक वयसुने

अब्राहामुंकन्ना पेद्दोड आंदुर. * 7:10 उत्पत्ति 14:18-20

11 मूसाना नियमते, लेविना वंसंमतोरे पेर्मालोर्क आयाना इंचि रासतद मंता. अयते ओर कियाना कबाहकुनहेंदाल लोकुल्क पुरागा नीतिमंतुल्क आया पर्सिं मत्ते, हास्ननसोंटोन वरोन पेर्मन पेन लोहचि मनवळ. गानि मेल्लिकसेदेकुना रीतिते वरोर पेर्माना अक्सरम बतल मत्ता?

12 बारित्ते पेर्माना कबळ मारियतस्के, मूसाना नियमगुडा मारिया पीता.

13 इवनि पोल्ले इंदके वेंरे कानदानते पुट्टा येसुना बारेमते वेहासेक मंता. ई कानदानते पुट्टोर बोरेगुडा मोक्कु हिश्यना जेगातागा सेवा क्रिया हिल्लुर.

14 मना सामि यहुदाना वंसंमते पुट्टोर. ई कानदानतोर पेर्मालोर आयाना बारेमते मूसाल बग्गेन बतल रासा हिल्लोर, इंचि अंतोर्क तेळियसे मंता.*

15 गानि मेल्लिकसेदेकुनसंतोर इंकावरोर पेर्मल वांतोर इतस्के, इद पोल्ले इंकिचो किलियर आंता.

16 उंदि कानदानतोर पेर्मालोर आयाना, इंचि मूसाना नियमते रासतद मंता. गानि येसु आ हिसाबते पेर्मल आया हिल्लोर. ओनगा बस्केळ्क पिस्सि मनना बलम मंता, अदे बलमते ओर पेर्मल आतोर.

17 बारित्ते, “मेल्लिकसेदेकुना रीतिते निमे बस्केळ्ताहाटी पेर्मल आसि मंदकिन,” इंचि ओना बारेमते दर्मसास्त्रमते रासतद मंता.

18-19 इल्हा, मूसाना नियमते रासि मत्ता आदेसाल्क लोकुल्कन नीतिमंतुल्क क्रिया परांहिल्ले. अद नियम कमजोर आसि बताके ओज्जाकोंटा आता इंचि, पेन दान पक्काक इरता. दाना जेगाते, पेन दानकन्ना मंचि आसेतुन इरता. इद आसेतुन पीसि मनम पेनदा दगोर्क होना परांतोर.

20-21 इंकुदि पोल्ले बतल इत्ते, हास्नना कानदानतोर ओट्टु तिनकोटेन पेर्मालोर आतुर. गानि येसु पेर्मल आयानेके पेन ओन इल्हा इत्ता: “निमे बस्केळ्ताहाटी पेर्मल आसि मंदकिन इंचि पेन ओट्टु तित्ता, अद दाना पोल्लेतुन बस्केने मार्सो,” इंचि रासतद मंता. इल्हा पेन ओट्टु तित्ताहाटी येसु पेर्मल आतोर.

22 अदुनहाटी इंदके पेनदा मुन्नेटा पडाना करारकन्ना, पूना करार बच्चोने बेसतद इंचि येसु गेरांटे आसि निल्लोर.

23 इंकुदि पोल्ले बतल इत्ते, वेल्लेटोर लोकुल्क पेर्मालोर आसि मत्तुर, गानि हामुर ओर्कु हमेसाताहाटी पेर्मल आसि मनालय अड्डम आता.

24 गानि येसुंक् बस्केने हामुर हिल्ले, इंचि ओना पेर्मलतनम बस्केळ्ताहाटी मंता.

25 अदुनहाटी येसु, ओनाहेंदाल बोरे अयते पेनदागा वांतुरो, ओराहाटी विनंति क्रियालय ओर बस्केळ्क जीवातेन मंंतोर. इल्हा येसु माकुन पुरागा पिसागोटा परांतोर.

26 येसु पवित्र मत्तोर, ओनगा बतले कसूर मनाहिल्ले, ओन्क बस्केने पापम अंटा हिल्ले, पापिल्कुनाल लक्कु मत्तोर. अदुनहाटी ओन स्वर्गमकन्ना एत्तु तेहामळ जर्गता. इसोंटा पेद्दा पेर्मले मनाहाटी बेस कुदंतोर.

27 वेंरे पेद्दा पेर्मालोर मुन्नेन सतता पापाल्क मापि आयगोम इंचि मोक्कु हीकुंतुर आनि पज्जोटाल वेंरे लोकुल्कुना पापाल्क मापि आयालय मोक्कुल्क हीतुर. इल्हा ओर दिन्म कियुंदुर. गानि किरिस्तु लोकुल्कुना पापाल्क मापि आयानाहाटी उंदे मल्का ओना मेंदुलतुन मोक्कु हीतोर. अदुनहाटी ओन्क वेंरे पेर्मालोरलेसी क्रियाना अक्सरम हिल्ले.

28 मूसाना नियम कमजोर मनकालोर्कुन पेद्दा पेर्मालोर इंचि निलाहंता. गानि मूसाना नियमकन्ना पज्जोटाल, ओट्टुनतोनि वाता आ पोल्ले, पेनदा मरिंन पेद्दा पेर्मल इंचि निल्हाता. आ मरिं अन्नि तीरकुने पुरागा मंतोर. ओर बस्केळ्ताहाटी पेद्दा पेर्मल आसि मंतोर.

8

येसु मना पेद्दा पेर्मल आंदुर

1 इदवेरदाका वेहासेक वाता पोल्लेता मेन पोल्ले बतल इत्ते, स्वर्गमते अन्निटकन्ना पेद्दा पेनदा तिना बाजुंक् राज्येम क्रियालय बोरे अयते उदिदिसि मंतोरो, ओरे मावाहाटी पेद्दा पेर्मल आतोर.*

2 कुददु पेने निल्हाता अन्निटकन्ना पवित्र जेगा आनि निजम डेराते येसु सेवक आसि पेनदा सेवा क्रीसेके मंतोर.

3 हरेक पेद्दा पेर्माना कबळ अयते पेनदुक् मोक्कु हियमळ, दानम वाटमळ आंद. अल्हने मावा पेद्दा पेर्मल येसुनगागुडा मोक्कु हियालय बतलन्ना मनमळ अक्सरम मंता.

4 मूसाना नियम परकारम दानम वाटानोर बूमिपोर्री वेल्लेन पेर्मालोर मंतुर. अदुनहाटी येसु बूमिपोर्री मंचि मत्ते, पेर्मलगुडा आयकोन्नेर.

5 पेनदा डेरा निल्हाका मुन्ने, “निमे गुट्टापोर्री नावातोनि मत्तस्के नना नीकु बद्द नक्से हूपिस्तनो, बरोबर अल्हेने नाहाटी डेरा निल्हा,” इंचि पेन मसांक वेहचि मत्ता. दीना अर्तम बतल इत्ते, पोर्री स्वर्गमते मंदना पेनदा डेराला नीडालेसीगे, इद्द बूमिटे पेर्मांलोर सेवा कियाना जेगा मनंता.*

6 गानि इंदके पेनदा पूना करारते माकुन कल्पानोर येसे आंदुर. इद्द करार, मुन्नेटा पडाना करारकन्ना बचचोनो बेस मंता. अद्द बल्हा इत्ते, पूना करारते पेन वेहता पोल्ले, मुन्नेटा पडाना करारते मत्ता पोल्लेकन्ना बचचोनो बेस मंता, इल्हा इद्द बूमिटे मनना पेर्मांलोकन्ना येसुंक वेल्ले बेस सेवा दोर्कता.

7 ओक्कला पडाना करारते बतले दोसेम हिलाकोटा मंचि मत्ते, पूना करारता अक्सरमे अर्राकोनवड.

8 गानि पेन दाना लोकुलकुनगा दोसेल्क दिसतस्के ओर्कुन इल्हा इत्ता:

“हुळ्ळट, नना इझाएल राज्येमतोनि आनि यहुदिया राज्येमतोनि,
पूना करार कियाना रोजकु वासेकेन मंता.

9 नना ओरा तादो-बाबुर्कुन कय पीसि इजिप्त देसेमतल पलाते तच्चि मत्तन.

अस्के ओरतोनि कीता करारलेहका इद्द पूना करार मन्यो.

नना ओरतोनि कीता करार परकारम ओर ताका हिल्लुर,
अदुनहाटी नना ओर्कुन लेक्का किय्योन.

10 गानि अव रोजकु दाटसोत्ता पजा,

नना इझाएल लोकुलकुनतोनि कियाना पूना करार इल्हा मनंता.

नना नावा नियमकुन ओरा मनसुल्कुने रासि, अवनु ओरा बुद्दिदेते इरानालायक कीतन.

नना ओरा पेनदुन आकन, ओर नावा लोकुलक आयानुर.

11 अद्द वेलाते सिन्नाल्क-पेद्दाल्क अंतोरे नाकुन एरपाट कीसि मनांतुर,

अदुनहाटी, पेनदुन एरपाट कीम्ट, इंचि लोता पक्कातोर्क आयि जीवातोर्क आयि,

ओर-ओरा नाटेनोर्क वेहना अक्सरम हिल्ले.

12 बारित्ते, ओर कियाना तप्पुड कबाहकुन नना दयाते मापि कीकन,

ओरा पापालकुन मरां बस्केने मति किय्योन,”*
इंचि रासतद्द मंता.

13 इदुन पेन “पूना करार” इत्ताहाटी मोदाटा करार कबळ्ळ ओज्जाकोटा आसि पडानद्द आसोत्ता. अद्द इंदके बिराने दिसाकोटा आयार.

9

बूमिपोर्रीटा आरादना आनि स्वर्गमता आरादना

1 इझाएल लोकुलकुतोनि कीता मोदाटा करारते, पेनदुन मोळकाना बारेमते नियमकु रासतद्द मत्तां. आ नियम परकारम मोळकानाहाटी इद्द बूमिटे उंदि डेरा मत्ता.*

2 अद्द डेरा इल्हा मत्ता. आ डेराला मुन्नेटा अररिते पोतसेके मनना पंतें इरालय उंदि दीसोडि आनि उपारमता हारि इरालय उंदि टेबल मनुंदु. अद्द अररतुन पवित्र जेगा इंतुर.

3 दीना पज्जो इंकुदि परदा मत्ता, अद्द परदाता पज्जोटा अररतुन अन्निटकन्ना पवित्र जेगा इंतुर.

4 अद्द अररिते गुगलेम वाटनाहाटी बंगारमतोनि तयार कीतद्द उंदि दूपम कुळका* आनि करारकुना संदगु मत्ता..* आ करारकुना संदगु पुरागा पिक्वर बंगारमता पालिसि हीसि मत्ता. आ संदगुने उंदि बंगारमता बुडिड मत्ता, अच्चे ‘मन्ना’ इरसि मत्ता* इंका आ संदगुने हास्नना दुडुडु मत्ता, अदुंक इग्गुर वासि मत्ता.* इंका अच्चे पेनदा करार्क रासि मत्ता बंडाता बल्लांगुडा मत्तां.*

5 आ संदगुना मूताता पोर्रीटा बाजुन “पापालक मापि कियाना जेगा” इंतुर. महिमाता वेल्गुने निंडिसि मत्ता रौंडु कस्ब* इनानवुना बोम्मां आ जेगापोर्री नीडा कीसि कावेल कीसेके मनुंदु. इव अन्निटवुना बारेमते तेल्लिचिचे वेहालय इंदके वेला हिल्ले.

* 8:5 निर्गमन 25:40 * 8:12 विर्मयाह 31:31-34 * 9:1 अद्द डेरा मसाना कालमते तयार कीतद्द आंद. † 9:4 दूपम कुळका इद्द वेल्लेन पेद्देद्द मत्ता. दूपम अच्चे पोर्रीटा बाजुने वाटुंदु, गानि लोप्पोगुडा सामान इरालय जेगा मनुंदु. * 9:4 निर्गमन 30:1-8 * 9:4 निर्गमन 16:33-34 * 9:4 गिनति 17:8-10 * 9:4 निर्गमन 34:28 ‡ 9:5 रौंडु कस्ब इदुन इब्रानि बासाते कस्बीम इंतुर. अक्कगुडा उंदि तीरता द्वांगे. पेन पापालकुन मापि कियाना जेगा इ संदगुना पोर्रीटा बाजुने मंता. अद्द बंगारमते मेलिसि मंता. पेर्मल पापालकुनाहाटी मोक्कु हीतस्के, नेल्लुरतुन अग्गेन पोगोगोट्टोरे. अस्के अदुन हळसि पेन लोकुलकुना पापालक मापि कीता.

6 इल्हा इवन्नि तयार कीता पजा, डेरालोप्पो मोळकाना जेगातगा पेर्मालोर होंचि रोज सेवा कीसिके मनुंदुर.

7 गानि इंकुंदि परदाता पज्जोटा अरंते, सिराप पेद्दा पेर्मल ओना सतता पापाल्कुनाहाटीं आनि लोकुल्क तेळियका कीता पापाल्कुनाहाटीं मोक्कु हियालय नेत्तुर पीसि, वर्साक उंदि मल्के दांतोर.

8 इवुनंता हळसि बतल अर्तम आंता इत्ते, बदवेरदाका अय्ते इसोंटा मोदाटा डेरा मनंतनो, अदवेरदाका अन्निटकन्ना पवित्र जेगाते होनालय हरि कुल्ला हिल्ले, इंचि पवित्र आत्मा वेहांता.

9 ई डेरा इत्ते, इंदकेटा कालमते जर्गनदुना बारेमता उंदि चिन्ह आंद. अगा हियना मोक्कुल्क, दानम वाटमळ इवंता मनकाना मनसुन पुरागा समादानम किय्यो.

10 अद बल्हा इत्ते, तिनूळ-उनुळ कियाना मोक्कुल्क, पवित्र आयाना कबाहक इव नियमकु सिराप पलाताल पवित्र आयानाहाटीं कबळक ओज्जंतां. गानि पेनदा पूना करार वातस्के इव बवे बतले कबळक ओज्जो.

येसूए कुद्दु मोक्कु आयमळ

11 गानि किरिस्तु पेद्दा पेर्मल आसि, माहाटी बेसता पोल्ले पीसि वातोर. ओर इंदके स्वर्गमते मनना अन्निटकुन्ना पेद्दोड आनि अन्नि तीरकुने पुरागा मनना डेराना सेवा कियालय होळियतोर. अद मनकानाहेंदाल कीदत आयो, इत्ते अद दुनियातद आयो.

12 ओर अगा एटिना नेत्तुरो, पेय्याना नेत्तुरो पीसि होळिया हिल्लोर. गानि ओना सतता नेत्तुरतुन पोंगागोटसि, उंदे मल्का आ अन्निटकन्ना पवित्र जेगातगा होळियतोर. अदुनहेंदाल मनम अन्नि पापाल्कुनाल बस्केळताहाटीं मुक्तितुन दोर्किचकुल्लोम.

13 मूसाना नियम परकारम, एटिं, कोंदाना नेत्तुर, कमरिस्ता पेय्याता बूळ्दि, मुट्टुने मत्तोरपोरों सल्लानय्ते अव सिराप ओरा मेंदुल्लुन पलाताले पवित्र कीतां.

14 गानि किरिस्तुना नेत्तुर, हामुरताहेके ओयाना कबाहक कियाना मना मनसुन अलुंकन्ना बचचोर सुद्द किय्यार! अद बल्हा इत्ते, बस्केळक मनना पेनदा पवित्र आत्माता बलमतोनि, बतले दोसेम हिल्ला येसु, पेनदा मुन्ने सतागा मोक्कु आतोर. बस्केळक जीवाते मंदना पेनदुन मनम मोळकाना इंचि येसु अल्हा कीतोर.

15 पडाना करारते मत्ता नियमकुन पीसि ताकुवाहेंका अस्केटा लोकुल्क पापम कीसि अद करारतुन नेम्हातुर. ओर्कुन ओरा पापाल्कुना सिक्साताल तप्पानाहाटीं किरिस्तु हासोतोर. इल्हा पेन अद केयता लोकुल्कुन पूना करारते कल्पंता. अद केय्ति मतोर्कुंक, दाना बस्केळक मनना वारसान हक्कुन हीतन इंचि केय्ति पोल्ले हीतानो, ओर्क अद दोर्कता. इल्हा किरिस्तु ई पूना करारते नड्डुमतोर आतोर.

16-17 वरोर मनकल ओना बूमि-जेगां बोन्क आयाना इंचि रासंतोर, ओर हातास्केन ओर रासि इरता कायदोम सेल्लांता. ओर पिस्सि मत्ताचुं रोजकु अद कायदोम सेल्लो. पेनदा करारगुडा इल्हे मंता.

18 इंचे मरि, मोदाटा करारगुडा नेत्तुर पोंगागोट्टुवा निल्ला पराहिल्ले.

19 अदुनहाटीं मूसालगुडा दर्मसास्त्रमते रासि मत्ता अन्नि आदेसकुन अंतोर लोकुल्कुंक वेहतोर अस्के, कुरा-एटिना नेत्तुरतुन येते कल्पिसि, जूपा इनना पोर्काताई कोम्माक गोरेंता एरा बुरा हुट्ति, दर्मसास्त्रमता पुस्तकाल्कुनपोरों आनि अंतोर लोकुल्कुनपोरों सल्लोर.

20 पजा, “पेन मीकुन बद आदेसकुना परकारम ताकट, इंचि वेहतानो, ई नेत्तुर अदे करारतद आंद,” इंचि वेहतोर.*

21 अल्हेने, मोळकाना डेरानो आनि मोळकानेके वाळकुनना अन्नि वस्तुकुन पोरोंगुडा मूसाल आ नेत्तुरतुन सल्लोर.

22 मूसाना नियम परकारम हळते, दग्गेर-दग्गेरा अन्निगुडा नेत्तुर सल्लिसे सुद्द कियमळ गावाले. नेत्तुर पोंगागोट्टाकोटा पापाल्कुंक मापि हिल्ले.*

येसुना हामुरताहेंदाल पापाल्क मापि आंतां

23 अदुनहाटीं स्वर्गमते मनना वस्तुकुनालेसी दिस्सानव मनकालोर तयार कीता ई नकलि वस्तुकुन, जिवरासिना मोक्कु हीसि पवित्र कियाना अवसरम अरता. गानि स्वर्गमते मनना वस्तुकुन पवित्र कियोगोम इत्ते, ई जिवरासिना नेत्तुरकन्ना इंका बचचोनो बेसता मोक्कुल्क हियापीता.

24 बूमिपोरों मनकालोर कीता अन्निटकन्ना पवित्र जेगा इत्ते, स्वर्गमते मनना निजम पवित्र जेगातसोंटा उंदि पोतवे आंद. बारिस्ते, मनकालोर कीता पवित्र जेगाते किरिस्तु होळिया हिल्लोर, गानि इंदके ओर मना अंतोराहाटीं सीदा स्वर्गमते होळियसि पेनदा मुन्ने विनंति कियालय निल्लिस मंतोर.

25 अचनेन आयका, एटा-एटा पेद्दा पेर्मल मोक्कु हियालय सतता नेत्तुर आयो गानि जिवरासिना नेत्तुर पीसि बूमिपोरोंटा अन्निटकन्ना पवित्र जेगाते होळियंतोर. अल्हा ऊके-ऊके सतता मोक्कु हियालय किरिस्तु स्वर्गमते होना हिल्लोर.

26 ओक्कला अल्हा ऊके-ऊके मोक्कु हियमळगिटा आसि मत्ते, दुनिया पुटतस्केटाल इदवेरदाका बच्चुंगो मल्कां किरिस्तुंक ओना जीवा हिय्या पियवड. गानि इद युगमता आकिरते, किरिस्तु सतता मोक्कु हीसि, पापमतुन नासडेम कियानाहाटी उंदे मल्का वातोर.

27 बल्हा लोकुकलक अंतोर उदि मल्का हासि दांतुर, पजा पेन ओरा न्यायम कीता, इंचि मुन्नेन निरनायम कीसि मंता,

28 अल्हेन किरिस्तु, वेलेलेटोरा पापालुकुन नासडेम कियानाहाटी उंदे मल्का ओना सतता जीवातुन मोक्कु हीतोर. ओर मसंदि मल्का मल्सि वायना मंतोर. अयते ई मल्का ओर पापमतुन नासडेम कियालय आयो, गानि ओनाहाटी बच्चोने ओप्केते बस्के वातोर इंचेके एदुर हळसेक मनानोर्कुन पिसागोटनाहाटी वायानुर.

10

1 मूसाना नियम अयते, मुन्ने बव बेस पोल्ले जर्गानव मंतागो, अबुना सिराप नीडे आंद, निजम रूपम आयो. अदुनहाटी एटा-एटा पर्मांतोर, आगाकौटा हिय्यना उंदे तीरकुना मोक्कुलक, पेनदा दग्गेर्क होनानोर्कुन पापमताल पुरागा पवित्र किया पर्रीं.

2 ओक्कला अल्हा आसि मत्ते, बक्तुलकुना मनसुलकुने, “मोमोट पापिर्क” इत्ता विचारम वायाकोनवळ आनि ओर सुदुद आसि मत्ताहाटी मोक्कुलक हियमळ आपिसि मन्नेर. 3-4 गानि एटिना नेत्तुर आयि, कौदाना नेत्तुर आयि, पापालुकुन बस्केने लक्कु किया पर्रीं. बारित्ते एटा-एटा ओर हिय्यना मोक्कुलक, ओर्क ओरा पापालुकुन मति कीसि हीसिकेन मंतां.

किरिस्तु मनाकुन पवित्र किया परंतोर

5 अदुनहाटीगे, किरिस्तु इद दुनियाते वातस्के पेनतोनि इल्हा इत्तोर:

“निमे मोक्कुलक आयि, दानाल्क आयिं कोराहिल्लिन,
गानि नाहाटी उदि मेंदुल तयार कीतिन.

6 कमुरबोलि आयिं, पापम मापि आयानाहाटी हीता मोक्कुलक आयिं,
नीकुन कूस किय्यो.”

7 अस्के किरिस्तु,

“पेनदुना! दर्मासस्त्रमते नावा बारेमते रासि मत्ता परकारम,

नीवा इच्चातुन पुरागा कियालय नना वातन.”*

इंचि इत्तोर.

8 पोर्रीं वेहताप, “मोक्कुलक, दानाल्क, कमुरबोलि आनि पापम मापि आयानाहाटी हिय्यना मोक्कुलक इवन्निगुडा निमे कोराहिल्लिन इव नीकुन कूस किय्यो,” इंचि पेनतोनि वेहतोर.

9-10 अल्हा वेहचि, “पेनदुना हळ्ळा! नीवा इच्चातुन पुरागा कियालय नना वातन,” इंचि इत्तोर. पेनदा इच्चातुन पुरागा कियानाहाटी येसु किरिस्तु ओना सतता मेंदुलतुन उंदे मल्का मोक्कु हीतोर. हीसि रौडो करारतुन सुख्व कियानाहाटी, मोदाटा करारतुन बंद कीतोर. इल्हा पेन मनाकुन पवित्र कीता.

11 मोदाटा करार परकारम, हरेक पर्मल सेवाताहाटी ओन्क रोजु गदूदे मुन्ने निल्ले पीता आनि हीता मोक्कुलके ऊके-ऊके हियापीता. गानि अव मोक्कुलक मात्रम बस्केने पापालुकुन लक्कु किया पर्रीं

12 गानि किरिस्तु अयते मना पापालुकुन लक्कु कियालय, हमेसाताहाटी उंदे मल्का ओना मेंदुलतुन मोक्कु हीतोर. हीसि पेनदा तिना बाजूंक होंचि उदिदेसि मंतोर.

13 इल्हा अस्केटाल, किरिस्तु ओना पगातोर्कुन पेन ओना काल्क इर्रांना कुत्तुलेसीं बस्के कीता इंचेके एदुर हळसेक मंतोर.*

14 बारित्ते, पवित्र आयानाहाटी पेन वेरे कीता मनासटोर्कुन, ओर सिराप उंदे मल्का मोक्कु आसि, हमेसाताहाटी आनि तीरकुने पुरागा कीतोर.

15-16 इदुना बारेमते इल्हा रासतद मंता:

“अव रोजकु दाटसि होल्ता पजा,

नना इम्माएल लोकुकुनतोनि कियाना पूना करार इल्हा मनंता.

अद बतल इत्ते, नना नावा नियमकुन ओरा गुंडेने रासि, अबुन ओरा मनसुलकुने वाटंतन,”

इंचि पेन वेहता. इल्हा पवित्र आत्मागुडा मनाकु दर्मासस्त्रमते गवाइ वेहता.*

17 अचोने आयाका,

“ओरा पापालुकुन आनि ओर कीता तप्पु कबाहकुन मर्रा बस्केने मति किय्योन,”*

इल्हागुडा पवित्र आत्मा वेहता.

18 पेन मावा अन्नि पापाल्कुन मापि कीता अय्ते, इंका मर्रा अबुनाहाटी मोक्कुलक हिय्यना अक्सरमे हिल्ले.

दैनैमते पेनदा दग्गेर्क दाकोम

19 अय्ते विस्वासल्कुनिटा, येसु मनाहाटी ओना नेत्तुरतुन पोंगागोटतोर. अदुनहाटी मनाकु इंदके आ पूनद, जीवाते मनना हरि पीसि पवित्र जेगाते होनना दैनैम वाता.

20 येसु ओना मैदुलताहैदाल परदातुन पक्काक कीताहाटी, मनम पेनदागा विस्वासमते होना परंतोम.

21 अचोने आयका, येसे मना पेद्दा पेर्मल आंदुर, ओर पेनदा लोकुल्कुनपोर्रा अदिकारि आंदुर.

22 अदुनहाटी मनम सत्तेम मनसुने, पुरागा विस्वासमते, इंका मना विवेकमतुन दोसेम हिलाकोटा कियानाहाटी मना मनसुनपोर्रा किरिस्तुना नेत्तुर सल्लि, इंका मैदुलतुन बेस साप एते नोर्सि पेनदा दग्गेर्क दाकोम.*

23 मनाकु बद पेन अय्ते पोल्ले हीतानो अद विस्वासमगल्लद आंद. अदुनहाटी मनम वैरेतोर मुन्ने ओप्फुक्ता आसेताल पजोळ्क आयाकोटा, गट्टि दैनैमते मंदकोम.

24 मनम वरोंक वरोर पावरम कियालय, बेसता कबाहक कियालय आनि बतल-बल्हा कीते बेस इंचि वरोंक-वरोर दैनैम हियालय विचारम कीकोम.

25 आरादनाहाटी उंदगा जमा आयाना जेगाते वायाकोटा मनमळ इच्चुर्कु अलवट आसि मंता. गानि मनम ओरलेहका मनामन्नि. मुक्केमाता पोल्ले बतल इत्ते, येसु सामि मसंदि मल्का वायाना रोजु दग्गेर्क वासंता, अदुनहाटी मनम अंतोरम उंदासि, वरोंक-वरोर दैनैम हीसेक मुन्ने अरकोम इंचि इंकिचो जिदिदते वेहासेक मंदना.

26 इव पोल्ले नना बारि रासेक इत्ते, सत्तेम इत्ते बतल मनाकु तेळियता. इल्हा सत्तेम तेळियसिगुडा तेळियवाप पापम कीसेके होत्ते, इव पापाल्कुनाहाटी मात्रम इंका बददे मोक्कु हिल्ले.

27 गानि दाना बदलते, बोर अय्ते पेनदा विरोदमते ताकतुरो ओराहाटी पेन सिक्ससाता आदेस हीसि, ओर्कुन बरा-बरा पोत्तना तळमिटे वाट्टिस बूळ्दि किय्यार इत्ता, वेरियानसोंटा पोल्ले मात्रम मिगिल्लिस मंतां.*

28 मूसाना नियमतुन विरोद कियाना मनकाना बारेमते, इव्वुर हिलाकोटे मुव्वुर गवाइदार्कुना पोल्ले केंजसि ओनापोर्रा दया कियाकोटेन ओन्क हामुर सिक्सा हीतुर.*

29 अय्ते, इंदके पेनदा मर्निन पास्काना मनकंक, बद नेत्तुरहैदाल अय्ते पवित्र कियमळ जर्गता आ पूना करारता नेत्तुरतुन, पवित्र आयो इंचि इनना मनकंक, कुर्पा हुप्साना पेनदा आत्मातुन पास्कानोंक, बच्चोन पेद्दा सिक्सा दोर्कारो, मिमेटे विचारम कीसि हूळट.

30 बारित्ते पेन इत्ता गदा,

“बद्दला येताना कबळ नावद आंद, ननाने बद्दला येतंतन,” आनि मर्रा,

“सामि ओना लोकुल्कुना न्यायम कीतोर,”*

इंचि इत्ता. इद पोल्ले मनाकु एरपाटे मंता.

31 जीवाते मंदना पेनदा कय्दे दोर्कना सिक्सा इत्ते, इरगेन वेरियानाल मनंता.

32 मिमेट बेसता कबुर केंजसि पेनदा वेलगुन दोर्किचकुत्ता आ एनकटा रोजकुन मति कीम्टु, अव रोजकुने बच्चुंगो तकलिपकु वातां, अयना मिमेट ओर्सकुत्तिट.

33 बस्के-बस्के अय्ते अंतोरा मुन्ने मीकुन रोता-रोता पोल्ले इंचि बदनाम कियमळ जर्गता. इंका बस्के-बस्केनो अय्ते, इसोंटा तिप्पल्क बोगांचनोरा तोळने मिमेट निल्लिर.

34 अचोने आयका बेसता कबुर वेहताहाटी जेलने अर्सि दुक्कमते मत्तोर दुक्कमते मिमेट कलियतिर. मीवा संपत्तितुन दोसकुंचि ओयिना गानि मिमेट कुसिते मत्तिट. बारित्ते दोसकुंचि ओतादानकन्ना बेसतद, बस्केळ्क मनानद संपत्ति पेन मीहाटी इत्ता इंचि मिमेट तेल्पिचकुत्तिर.

35 पेनदापोर्राटा मीवा विस्वासमतुन पीसि, मीकु वेल्लेन पेद्दा इनाम मंता. अदुनहाटी बतल आयिनागानि मिमेट विस्वासमताल पजोळ्क होनमट.

36 मिमेट दैनैमते सहन कियमळ अक्सरमे मंता, अल्हा मत्तेन मिमेट पेनदा इच्चातुन पुरागा किया परकिट आनि पेन मीकु बतल अय्ते हीतन इंचि पोल्ले हीतानो अद मीकु दोर्कार.

37-38 बारित्ते,

“बोर सामि वायानोर मंतोर, ओर बिरानेन वांतोर, ओर आल्सेम किय्योर.

ओर वायनादाका, नावापोर्रो विस्वासम कीता नीतिमंतुल्क विस्वासमतेन पिस्संतुर.

गानि ओराव्टेटाल बोरन्ना ना पोरोटा विस्वासमताल पजोळ्क आते, ओन नना मेच्चुकुन्नोन्, ”*[☆]

इंचि दर्मसास्त्रमते पेनदा पोल्ले रासतद मंता.

39 गानि मनम अय्ते, विस्वासमताल पजोळ्क आसि, नासडेम आयानोर लेसीटोरम आयोम. विस्वासम कीताहाटी मनम पेनदाहेंदाल पिंसांतोम.

11

विस्वासमते पिसतोरा बारेमते कोन्नि पोल्लें

1 विस्वासम इत्ते बतल? मनम आसे पळसि मत्तव पोल्लें मनाकु तप्पाकोटा दोर्कानूं आनि मना कळ्ळुंक दिस्साकोन्नागानि अब मंतां इत्ता गेरंटिए, विस्वासम आंद.

2 मना एनकटा पेद्दाल्कुनगा इसोटा विस्वासम मत्ता, अदुनहाटीगे पेन ओर्कुन मेच्चुल्ता.

3 विस्वासमहेंदाले, पेन इद दुनियातुन दाना पोल्लेतोने पुटिस्ता इत्ता पोल्ले, मनम तेल्पिचकुना परंतोम. दीना अर्तम बतल इत्ते, मनाकु इंदके दिस्सानव अनि पोल्लें, दिसुवा पोल्लेनाहेंदाल पेन कीता, *[☆] इंचि मनाकु तेळियता.

4 विस्वासमहेंदाले आदामना मरि आबेल, ओना दादाल काइनुकन्ना बच्चोने बेसता मोक्कु पेनदुक हीतोर. काइन बतल अय्ते हीतोर अदुन पेन मेच्चुना हिल्ले गानि, आबेलना मोक्कुन पेन मेच्चुंकि ओन नीतिमंतुड इंचि गवाइ हीता. आबेल अय्ते हातोर, गानि ओना विस्वासमहेंदाल मनम इदवेरदाकागुडा करियसेक मंतोम.*[☆]

5 विस्वासमहेंदाले हानोकुक हामुर वायाका मुन्नेन, उंदि रोज ओर गायप आतोर. बारित्ते पेन ओन तेहाकुंचि ओता. अदुनहाटी ओना जाळा बोनके दोर्काहिल्ले. पेन ओन स्वर्गमते ओयाका मुन्ने ओर पेनदुन कूस कीतोर इंचि ओना बारेमते दर्मसास्त्रमते रासतद मंता.*[☆]

6 विस्वासम हिल्वद पेनदुन बोरे कूस किया परं. पेनदागा वायाना हरेक मनकल, पेन निजमते मंता आनि दान हट्टु पीसि पहकानोक अद बेसता इनम हीता इंचि विस्वासम किया पीता.

7 विस्वासमहेंदाले नोहाल, कम्मुड वायाना मंता इंचि पेन ओन्क वें वेहतस्के ओर कम्मुडतुन बस्केने हळा हिल्लोर गानि, पेनदा पोल्लेक कदर हीसि, कम्मुड वायाका मुन्नेन ओना कुदंबतोर्कुन कापाळनाहाटी पेद्दा डोंगा तयार कीतोर. इल्हा ओर दुनियातोर अंतोर तप्तुर इंचि ओना विस्वासमहेंदाल पेन दुनियातोर्कुन दोसिल्क इंचि वेहता. ओना इदे विस्वासमहेंदाल ओर, पेनदा मुन्ने नीतिमंतुल्क आतोर लोप्पो कलियतोर.*[☆]

8 विस्वासमहेंदाले पेन अब्राहामुन, “नना नीकु हप्साना देसेमते होन, अगाटा पूरा जेगा नीकु हीकन” इंचि इत्तस्के, बेके होनना इंचि तेळियाकोन्ना गानि तेळियवा जेगाहेके होनालय पेयसतोर.

9 विस्वासमहेंदाले अब्राहाम, पेन ओन्क हीतन इंचि पोल्ले हीता देसेमते होंचि, पराइ देसेमतोनलेसी डेरा वाट्टिस पिस्सेक मत्तोर. ओनतोनि ओना मरि इसाक आनि इसाकुना मरि याकोब, ईरगुडा अद देसेमता वारसदार्क. ओरगुडा अगा डेरा वाट्टिस पराइ देसेमतोरलेसी पिस्सेक मत्तुर.

10 बारित्ते, कुददु पेने सारे पीसि, पुनादि दोह्चि, बस्केळताहाटी निल्हाता सहरते मनालय ओर विस्वासमते एदुर हळसेक मत्तुर.

11 विस्वासमहेंदाले अब्राहामुं ओना मुत्तो सारानतोनि कलियसि, मातिरतनमतेगुडा मरिन कनाना बलम दोर्कता. बारित्ते, ओन्क संतानम हीतन इंचि बद पेन अय्ते पोल्ले हीतानो, अद पोल्ले तप्पो इंचि ओर दानपोर्रो विस्वासम इरतोर.*[☆]

12 अदुनहाटी डुग-डुग मातरल आसि हासोत्तोनलेह्का मत्ता वरारे अब्राहामुं पेन, मब्बुने मनना सुक्कनच्चोन आनि समुद्रम ओड्डुंक मनना उस्केतच्चोन, लेक्का पस्वच्चो संतानमतुन हीता.*[☆]

13 पेनदापोर्रो विस्वासम इरतोर अंतोरगुडा दानपोर्रो विस्वासम इरसे हासोत्तुर. पेन हीतन इंचि पोल्ले हीतद ओर्कु दोर्काहिल्ले. गानि पेन हीतन इत्तादुन लक्कुटाले हळताप हळसि कूस आतुर. पजा मनम इद बूमिपोर्रो पय्नेम कीसेके वाता पराइतोरम इंचि ओप्कुत्तुर.

14 इसोटा पोल्लें बोर अय्ते वळ्ळंतुरो, ओर ओरा सतता देसेमतुन पहकसंतुर इंचि मनाकु अर्तम आंता.

* 10:37-38 हबक्कुक 2:3-4 ☆ 11:3 उत्पत्ति 1:1; योहान 1:3; बजन संहिता 33:6; 33:9 ☆ 11:4 उत्पत्ति 4:3-5; 4:10

☆ 11:5 उत्पत्ति 5:22-24 ☆ 11:7 उत्पत्ति 6:13-22; 7:1 * 11:11 विस्वासमहेंदाले अब्राहामुना मुत्तो साराव, मातिरतनमतेगुडा नेला तप्पि मरिन कंता. बारित्ते, दानक संतानम हीतन इंचि बद पेन अय्ते पोल्ले हीतानो, अद पोल्ले तप्पो इंचि अद विस्वासम कीता. इल्हा कोन्नि पडाना पांडु लिपिने रासि मंता.

☆ 11:11 उत्पत्ति 17:19; उत्पत्ति 21:1-2 ☆ 11:12 उत्पत्ति 15:5; उत्पत्ति 22:17; उत्पत्ति 32:12

15 ओक्कला, ओर होळसि वाता देसेमता बारेमते विचारम कीसि मत्ते, ओर्क ओरा होळसि वाता देसेम मल्सि होनना मोका दोर्किसि मनवळ. गानि ओर होळसि वाता देसेमता विचारमते मना हिल्लुर.†

16 दाना बदुलते ओर, होळसि वाता देसेमकन्ना एकको बेसता देसेम, इत्ते ओराहाटी पेन स्वर्गमते तयार कीसि इरता देसेमते होनना विचारमते मत्तुर. अदुनहाटी पेन, 'नना ओरा पेनदुन' इंचि इनालय सिग्गु अर्री.

17 विस्वासमहेंदाले, पेन अब्राहामुना पट्टु हळत्सके, ओर ओना वर्रीं मर्रीं इसाकुन मोक्कु हियालय तयार आतोर. पेन हीतन इंचि मत्ता पोल्लेतुन ओर विस्वासम कीसि मत्तोर.

18 अयना, "इसाकुनाहेंदाले नीकु दोर्काना वंसंम नावा लोकुल्क आयानुर," इंचि पेन अब्राहामुं मुन्नेन पोल्ले हीसि मत्ता. आयनागानि ईं इसाकुने अब्राहाम, पेनदुक मोक्कु हियालय तयार आसि मत्तोर.

19 बारित्ते, पेन हासोत्तोर्ककुगुडा जीवा अरहा परंता, इंचि ओर विस्वासम कीतोर. हातोन जीवाते तेहाचि हीतापे, पेन अब्राहामुं ओना मर्रींन हीतागुडा.*

20 विस्वासमहेंदाले इसाक, ओना याकोब, एसाव इनना इव्वुर मर्कुंक, वायाना कालमते ओर्कुं बल्हा जर्गार इंचि आसिवांद हीतोर.*

21 विस्वासमहेंदाले याकोब, जीवा होळसका मुन्ने, योसेपुना इव्वुर मर्कुंन वरो-वरोन केय्से, आसिवांद हीतोर आनि दुड्डुना पोर्रीं ऊनसि पेनदुन आरादना कीतोर.*

22 विस्वासमहेंदाले योसेप, इझ्राएल लोकुल्क इजिप्त देसेमताल पेय्सि होनानुर इंचि जीवा होळसका मुन्नेन वेहा परतोर. अचोने आयाका, अद देसेमताल पेय्सि होननेके ओना बोक्कनगुडा पीसि पेय्सना इंचि आदेस हीतोर.‡

23 विस्वासमहेंदाले, मूसाल पुट्टसके ओना तल्लुर-बाबो ओन मूड नेल्क मक्किचिचि इरतुर. "मावा पेडल सकक्गा मंतोर" इंचि तल्लुर-बाबो तेल्पिचकुत्तुर. अदुनहाटी "इब्रितोर्क पुटता अंतोर मांड्सा पिलाल्कून हक्कट" इंचि राजाल हीता आदेसुंन ओर वेरियाकोटा मत्तुर.*

24 विस्वासमहेंदाले मूसाल पेदुदा बेर्सतसके, पिरोन राजाना मिय्यटा मर्रींन इंचि वेहकुनालय ओप्कुना हिल्लोर.

25 दान्क बदुलते, पापमहेंदाल दोर्कना जेरॉसेपाटा सुकमते पिस्सनदानकन्ना, पेनदा लोकुल्कनतौनि कलियसि तिप्पल्क बोगांमळे बेस इन्कुत्तोर.

26 पेनदाहेंदाल दोर्कना इनामुनाहाटीं ओर उंदीतीर एदुर हळसेक मत्तोर. अदुनहाटी ओर इजिप्त देसेमता दनम-संपत्तिकन्ना, किरिस्तुनाहाटीं अपमानम सहन कियमळ्त्तुने पेदुदा दनम इन्कुत्तोर.

27 विस्वासमहेंदाले, इजिप्त देसेमता राजाल होंगुंक वायिनागानि, वेरियाकोटा मूसाल इजिप्त देसेम होळसीतोर. बोर्के दिसुवा पेन ओन्क दिसताप, ओर गट्टि दैरेनेमते मत्तोर.

28 इजिप्त लोकुल्कुना तोल्सुर मर्कुंन हक्कालय पेन लोहता दूता, इझ्राएलतोर मर्कुंन इट्टानाया इंचि, विस्वासम कीताहाटीगे मूसाल, गौर्ता नेत्तुरतुन लोता दारसाकक होकालय वेहचि, दाटसि होनना पंडुगुन सुस्व कीतोर.

29 विस्वासमहेंदाले, इझ्राएल लोकुल्क, वत्तुता बूमिपोर्रीं ताकताप, एर्रीं समुद्रमते ताकसेके होनना दैरेनेम कीतुर. ओरालेह्केन इजिप्त लोकुल्क कियालय हळतुर अय्ते, अव्टेन मुळ्गिसि हातुर.*

30 विस्वासमहेंदाले, इझ्राएल लोकुल्क यरिहो सहरता गुरे सुट्टु एडुं रोजकु तिरियतुर, अस्के आ गुरे कुलसि अरता.*

31 विस्वासमहेंदाले, यरिहो सहरता रहाब इनना वेस्या, तेळियाकोटा जाळा कियालय वाता इझ्राएलतोर्कुंन दाना लोते केय्से सांतिते सहायम कीता, अदुनहाटीं पेनदा पोल्ले केंजवा लोकुल्कनतौनि दाना नासडेम पेन किया हिल्ले.*

32 इंका नना बोरा-बोरा बारेमते वेहासेक मंदकन? गिदोन, बाराक, सम्सोन, इशताल, दाविद राजाल, सामवेलनसोटा पेनदा कबुरतोर. ईरा बारेमते वेहालय नाकु पुरसत हिल्ले.

33 विस्वासमहेंदाले इरव्टेताल इच्चुर लोकुल्क राज्यल्क गेल्सतुर, इच्चुर लोकुल्क सतेम कबाह्क कीतुर, इच्चुर लोकुल्क, पेन हीतन इंचि पोल्ले हीतदुन दोर्किचुकुत्तुर, इच्चुर लोकुल्क सिंहाना कतराताल पलाते अरतुर.

34 इंकिच्चुर लोकुल्क पोत्तना तडमितुन पिरहातुर, इच्चुर लोकुल्क तलवारकुना अय्दरताल तपिचुकुना परतुर, इंकिच्चुर बारे बलम हिल्वस्केगुडा बलमगल्लोर्क आतुर, लडाइने वीस्ल्लक आतुर आनि पराइ देसेमता सिपाइल्कुन गेट्टिंमसीतुर.

† 11:15 अब्राहाम बेबिलोन देसेमता ऊर इनना नाटु प्तोर. (उत्पत्ति 11:28) गानि कनान देसेमते वाता पज्जो, ओर ओना पुट्टा देसेम बस्केने तिरियसि होना हिल्लोर. इसाक, याकोब अद देसेमताल पोर्रिक्कन तत्तुर गानि अद देसेम होंचि अगा जेगा पिय्या हिल्लुर. * 11:19 उत्पत्ति 22:1-18 * 11:20 उत्पत्ति 27:27-40 * 11:21 उत्पत्ति 48:8-20 ‡ 11:22 नीबा वंसंमंतोर नालुं नूक्कना बर्सनदाका पगातोर कय्दा हिळ्ळु मंदारु इंचि पेन अब्राहामुं वेर्चि मत्ता. गानि ओर्कुंन तिप्पल्क कियानोर्क सिक्सा हीसि नावा लोकुल्कून अगटाल पेचाहिचि तरकन इंचि पेन वेहचि मत्ता (उत्पत्ति 15:13-14). पेनदा इदे पोल्लेतुन योसेप विस्वासम कीसि इल्हा इत्तोर (उत्पत्ति 50:24-25). * 11:23 निर्गमन 1:22; 2:1-2 * 11:29 निर्गमन 14:21-31 * 11:30 यहोसु 6:12-23 * 11:31 यहोसु 2:8-14

35 विस्वासमहेंदाले कोनि मुरताहकुंक, अवुना हासोला जीवातोक, मरी जीवा अर्सि वापस दोर्कतुर.

गानि इंकिचचुर मात्रम पेनदापोर्रीं विस्वासम इरताहाटी देब्बां तिचि-तिचि हासोतुर. हासि मरी जीवाते तेदतस्के, पेन माकु बेसता पिस्वर हिथ्यार इला आसेते, इगटा पिस्वरतुन दक्किचकुनालय पेनदुन होळसा हिल्लतुर.

36 इंकिचचुकुन बारे कारेड्डालक कीसेके पोदूटेने तंतुर, इंका गोलसुकुने दोह्चि जेलने वाटतुर.

37 सगोमतोकुन अथे बंडाने तंतुर, आरेने कोय्मि तुकडां कीतुर, ओरा पट्ट हळतुर, S तलवारकुने कोह्किसे हळकतुर. गरिब-कंगाल आसि दुक्कमते, एटि-गौरैना तोल्कु मुक्कुचि बेके-बेकेनो तिरियसेके मत्तुर. लोकुलक ओकुन बागेने तकलिप कीतुर.

38 दुनियाता लोकुलक, पेनदापोर्रीं विस्वासम इरतोरालायक मना हिल्लतुर. अदुनहाटी ओर उस्के बूमिने, गुट्टानपोर्रीं, पडाने, बंडा सौरिने मंचेके तिरियंतुर.

39 ईरा अंतोरा विस्वासमतुन हळसि पेन अथे ओकुन मेचकुत्ता. गानि पेन ओकुं बद आसिवांद अथे हीतन इंचि पोल्ले हीसि मत्तानो, अद आसिवांद मात्रम ओकुं दोर्काहिल्ले.

40 बारिल्ले अन्निटकन्ना बेसतद उंदि पोल्ले पेन मनाहाटी मुन्नेटाले तयार कीसि इरता. अद पोल्लेतुन मनाकु, ओकुं उंदे मल्का दोर्काना इंचि पेन अल्हा कीता.

12

पेन मना बाबाल आंदुर

1 इचोने मंदिता गवाइ, मब्बुनलेसीं मना सुदूट आताप मंतां. अदुनहाटी मनाकुन आपाना हरेक बर्वुन आनि अल्कगा पट्टुने अरहना पापमतुन होळसिसि, पेन मनाकु हूपिस्ता हरेद ओपेकेते वितकोम.

2 वितनेके मना नदर येसुनपोर्रीं इरकोम. मनालोपो विस्वासमतुन पुट्टिचानोर आनि दान पुरागा कियानोर ओरे आंदुर. मुने दोर्काना आनंदमहाटी येसु कूसुनपोर्रीं जीवा हियालयगुडा तयार आतोर. अगा ओन्क जर्गता अपमानमतुनगुडा लेक्का किया हिल्लोर. इंदके ओर पेनदा राजगदूदेता तिना बाजूंक उदूदिसि मंतोर.*

3 पापि लोकुलक ओना पोरींटा पगाते ओन बचोचोने तिप्पल्क-बादां कीतुर. गानि मिमेट दैरेनेम होळसि विस्वासमताल पजोळ्ळ आयामनि इंचि ओर अवान्नि ओर्सकुतोर. मिमेट ओना बारेमते विचारम कीम्टु.

4 मिमेट पापमतोनि लळांच्चेके, उंदि पोल्ले मति इराना. अद बतल इत्ते, येसु बल्हा ओना जीवातुन हीतोर, अल्हा मीकु मीवा नेत्तुर पोंगागोट्टाना अब्बरम अर्राहिल्ले.

5-6 मीकुन अंतोर्कुन मर्क-मियाहक इन्कुंचि, मीकु दैरेनेम हियानाहाटी पेन मीकु वेहता आ पोल्लेतुन पुरागेन मति मसंतिरा? "नावा मरिना, पेन हीता टेरनिगतुन, मामुल पोल्ले इनकुन्मा.

पेन नीकुन सुद्रांचनस्के, निमे दैरेनेम होळसमा, बारिल्ले, पेन बोन अथे पावरम कीतानो ओन्क टेरनिगगुडा हीता.

अचोने आयका, अद बोन अथे मरि इंचि इंतानो, ओन्क सिक्सागुडा हीता,"

इंचि रासतद मंता.*

7 पेन मीकुन दाना मर्क-मियाहकुनलेसीं हळंता. अदुनहाटी मीकु बस्के अथे तिप्पल्क वांतां, अस्के पेन मीकुन सुद्रांचनाहाटी टेरनिग हीसंता इंचि अदुन ओर्सकुंत. बारिल्ले मरि सुद्रांचनाहाटी ओन्क टेरनिग हियवोर बोर्न्ना बाबो मनंतोरा? 8 पेन दाना अंतोर मर्क-मियाहकुन सुद्रांचनाहाटी टेरनिग हीता. आ टेरनिगगिंटा मीकु दोर्काकॉटे, मिमेट दाना निजम मर्क आयिर.

9 मनाकुन पुट्टिस्ता मना बाबुर्क अथे मनम सुद्रांचनाहाटी टेरनिग हीतुर. अदुनहाटीं मनम ओरा कदरगुडा इरतोम. अथे मनम बस्केळ्ळ पिस्सि मननाहाटीं, मना आत्मांकु बाबो आता पेनदुक मनम बचोचोने वेल्ले लोंगिस मत्ते बेस? विचारम कीम्टु.

10 मनाकुन पुट्टिस्ता बाबुर्क, कोनि वर्सानाहाटी ओर्क तेळियताप, मनम सुद्रांचना इंचि टेरनिग हीतुर. गानि पेन मना बेसताहाटीं, मनाकुन दानालेहका पवित्र कियालय टेरनिग हीता.

11 इंदके इव टेरनिगकु येतनेके मनाकु कुसि अनपिचो, दुक्कम वांता. गानि बोर अथे ओर्सकुंचेके टेरनिग बेस मनसु तासि करियंतुरे, ओकुं सत्तेम, सांतिते निडता पिस्वर दोर्कता.

12 अदुनहाटीं, अरसोला मीवा कयकुन आनि ताकत हिल्ला मीवा टोंगरन मजबुत कीम्टु.*

13 मिमेट मीवा विस्वासमता ह्रदे सवरगा ताकाटु, ✨ अस्के बोर अथे विस्वासमते कुंठि आसि मंतोरो, ओर विस्वासमते इंकिचो कुंठि आयाकोटा गट्टि पळानुर.

विस्वासमते पिसानोर्क कोन्नि जेगर्ता

14 अंतोर मनकालोरतोनि सातिते कलियसि पवित्र मनना कोसिस कीम्ट, अल्हा मनाकोटे बोरे मनकल सामिनगा होना परोर.

15 पेनदा कुर्पाताल वरोरगुडा तप्पोनामन्नि इंचि जेगर्ता मंटु. अल्हा तप्पोंचि हेळतोर बोर्नना मी नड्डुम मनानथे, ओर कळमातोर्कुन हेळाहचि, पेनदाल लक्कु कीतोर. इदुन जरा जेगर्ता हळट. ✨

16 मीवा नड्डुम बोरे व्यबिचारम कियानोर हिलाकोटे, एसावुनलेसी नीति हिलुवा मनकल मनामन्नि. उंदि पूटाता गाटोहाटी ओर ओना जेस्टम पालुंक विलुवा हिय्याकोटा तम्मूंक अम्मुकुलतोर. ✨

17 पजा एसावुना गति बतल आता मीक अथे तेळियसे मंता. वारसान हक्कुनाहाटी बाबोनगा आसिर्वाद येतालय होततस्के, बाबो ओन्क आसिर्वाद हिय्या हिल्लोर. ओर अळसि-अळसि वेल्ले कोसिस कीतोर गानि ओन्क मनसु मार्सकुनालय मोका दोर्काहिल्ले. ✨

18-19 इस्राएल लोकुकल अथे कथे इट्टा परानाल मत्ता गुट्टातगा होतलुर. अद गुट्टा तळमिते पोतसेके मत्ता, हिर्-हीकाटा, वळि-दुमारम, अद गुट्टातगा मत्ता. गानि मिमेट अथे असोटा गुट्टातगा होना हिल्लिर. अद गुट्टातगा इस्राएल लोकुकल, तूताकोमता आवाज आनि पेनदा वळ्ळना पेद्दा लेंगुन केंजतुर. केंजसि, “मरां बस्केने इसोटा लेंग माकु केंजा वायामन्नि” इंचि पेनदुक विनंति कीतुर. ✨

20 बारित्ते, “इद गुट्टातुन, उंदि जिवरसि इट्टिना, दान बंडाने तंचि हळ्ळाना,” इंचि पेन आदेस हीसि मत्ता, अद आदेसतुन ओर सहन किया पराहिल्लुर. ✨

21 अगा जर्गता गटना इचोन वेरियानाल मत्ता गदा, अदुना बारेमते मूसालगुडा, “नना इरगा वेरियसि गजा-गजा आसंतन,” इंचि इतोर.

22 गानि मिमेट अथे सियोन गुट्टातगा वाटित. जीवाते मनना पेनदा, स्वर्गमते मनना येस्सलेम सहर इदे आंद. कुसिते उंदगा जमा आता, लेक्का हिल्लुवचोन पेनदा दूतानगा मिमेट वाटित.

23 नीतिमंतुड लोकुकुना आत्माना कलिसियातगा मिमेट वाटित. आ कलिसियातगा अंतोरा पोरोलीं रासि मंतां, अंतोर्क जेस्टम पालना अदिकारम मंता. अंतोर्कुन पेन दानतोनि मनालय पुरागा कीता. दुनियाते मनना अनिटवुना न्यायम कियाना पेनदागा मिमेट वाटित.

24 इका पूना करारता नड्डुमतोर आता येसुनगा मिमेट वाटित. आदामना मरिं आबेलना नेत्तुर इत्ते, ओना दादाना बद्दला येतालय पेनदुन केयताप मत्ता. ✨ गानि येसुना नेत्तुर अथे मीवापोरों सल्लि मीवा पापालुकुन मापि कीम इंचि पेनदुन केयताप मंता.

25 इद दुनियाते, लोकुकुकुं जेगर्ता मनालय पेन वेहतस्के, ओर पेनदा पोल्ले केंजा हिल्लुर. अदुनहाटीं ओर पेन हीता सिक्साताल तपिचकुना पराहिल्लुर. अथे इंदके मनम स्वर्गमताल वेहनोना पोल्लेतुन केंजाकोटे, पेन हिय्यना सिक्साताल बल्हा तपिचकुना परांतोम? अदुनहाटीं जरा जेगर्ता मंटु, बोर अथे वळ्ळसंतोरो ओना पोल्लेन पास्काकोटा, बेस केंजट.

26 अद कालमते पेन वळ्ळतस्के, दाना आवाजते, बूमिअंता गजा-गजा ऊंगता. ✨ गानि इंदके, “नना सिराप बूमितुने आयो गानि, मब्बुनगुडा मसंदि मल्का गजा-गजा उपांतन,” इंचि पेन पोल्ले हीता. ✨

27 “मसंदि मल्का” इनना पोल्लेता अर्तम बतल इत्ते, इद दुनियाते गजा-गजा आयानव बव अथे मंतांगो, अव अनि तयार कीतव आंद, अदुनहाटीं अव नासडेम आसि दांतां, गानि बव अथे गजा-गजा आयाकोटा मंतांगो, अव बस्केळ्ळ अल्हेन मंतां.

28 बोरे कदलिच्चा पस्वसोटा राज्येम मनाकु दोर्कसेक मंता. अदुनहाटीं मनम पेनदुक दन्यवाद वेहकोम. अचोने आयाका, दाना वेरें मनसुने ईर्सि दाना सेवा कीसेके, दान्क नच्चना आरादना कीसेके मंदकोम.

29 बारित्ते, मना पेन, बळ्ळि कीसि पोहना तळमिलेसीटद आंद. ✨

13

पेनदुन कूस कियमळ

✨ 12:13 नीतिवचन 4:26 ✨ 12:15 व्यवस्ताविकरन 29:18 ✨ 12:16 उत्पत्ति 25:27-34 ✨ 12:17 उत्पत्ति 27:36-38 ✨ 12:18-19 निर्गमन 20:18-21; व्यवस्ताविकरन 5:23-25 ✨ 12:20 निर्गमन 19:12-13 ✨ 12:24 उत्पत्ति 4:10 ✨ 12:26 निर्गमन 19:18 ✨ 12:26 हाथी 2:6; न्यायियो 5:4; बजन सहिता 68:8 ✨ 12:29 व्यवस्ताविकरन 4:24; व्यवस्ताविकरन 9:3; यसायह 33:14

1 मिमेट अंटोर उंदि लोतोरलेसी वरोंक-वरोर पावरम कीसेके मंटु.

2 वाता हेळमितोर बोरे आयिर, ओर्कुन बेस हळकुंट. इल्हा इच्चुर लोकुकल, एरपाट क्रियाकोन्नागानि पेनदा दून बेस हळकुत्तुर.

3 पेनदून विस्वासम कीताहाटी बोर अयते जेलने मंतुरो, ओरा मति कीतस्के, मिमेट कुदूदु ओरतोनि जेलने मत्ताप विचारम कीम्टु. अल्हेने, बोर अयते पेनदून विस्वासम कीताहाटी तिप्पल्क बोगांचेके मंतुरो, ओर्कुन मति कीतस्के मिमेट कुदूदु ओरतोनि तिप्पल्क बोगांचेके मत्ताप मति कीम्टु.

4 मरमिन आनि मुत्तो-मुय्दोना संबंदमतुन कदर कियाना, ओर वरोनपोर्रो विस्वासम कीसि बदनाम आयाकोंटा मंदना. व्यबिचारम कियानोर्कुन आनि बोगमतनम कियानोर्कुन पेन न्यायम कीता, इदून मतिते इरॉट. अदूनहाटी मुत्तो-मुय्दो वरोनपोर्रो वरोर विस्वासम कीसि बदनाम आयाकोंटा मंदना.

5 दनमताहाटी मिमेट आसे पडानायो. मिहगा बतल अयते मंता अय्टेन कूस मंटु. बारिते पेने कुदूदु इल्हा इत्ता:

“नना नीकुन बस्केने होळ्खोसोन, नना नीकुन बस्केने दिक्कु हिल्वोन क्रिय्योन,”*

इंचि वेहता.

6 “अदूनहाटी, मनम, पेन नाकु सहायम कियानद आंद,

नना असले वेरियोन, मनकल नाकुन बतल किया परांतोर?”*

इंचि देरनेमते इना परांतोर.

7 मीकु मोट्टा मोदाला पेनदा पोल्ले वेहता मीवा पेदूदाल्कुन मति कीम्टु. ओर बल्हा आक्किरदाका पेनदापोर्रो विस्वासम इरसि पिस्तुरो मति कीसि, अल्हेन मिमेटगुडा ताकट.

8 येसु किरिस्तु मुन्ने मत्तापे, इंदके आनि बस्केळ्ळाकागुडा मारियाकोंटा उंदेतीर मंतोर.

9 अदूनहाटी, वैरेतोर वासि कराहना रका-रकाल्कुना बोदां केंजसि मिमेट गयबेत आयमट. बोनेके बतल पायदा वायवा, तिदाना नियमकुन पीसि तनलाळसेक मत्ते मना मनसुंकु ताकत दोर्को, गानि पेनदा कुर्पतिन मनसुंकु ताकत वांता.

10 मनागा उंदि इसांटा गदूदे मंता गदा, आ गदूदेपोर्रोटा गाटो डेराने सेवा कियाना यहूदि याजकुल्कुंक तिनना अदिकारम हिल्ले.

11 बारिते, पापाल्क मापि आयानाहाटी मोळ्कालय, पेदूदा पेर्मल जिवरासिना नेल्लुरतुन अयते अन्नितकन्ना पवित्र जेगाते ओतोर, गानि जिवरासिना मेंदुल्लुन मात्रम डेराना पलाते बोळ्खसंतुर.*

12 अयते येसुगुडा, ओना नेल्लुरते लोकुकल पवित्र कियानाहाटी येस्सलेम सहरता पलाते तिप्पल्क बोगांचि जीवा होळ्खसतोर.

13 अदूनहाटी वट्टु! मनमगुडा येसुना पोर्रोटा अपमानमतुन मनापोर्रो येतकुंचि, येसुनालेसी तिप्पल्क बोगांचालय डेराना पलाते दाकोम.

14 इदु दुनियाते हमेसा मनालय मनाहाटी बदे सहर हिल्ले. गानि वायाना कालमते मनाहाटी तयार आयाना सहरते मनालय, आसेते मंतोर.

15 अदूनहाटी, येसु मनाहाटी कीतदून मति कीसि, बस्केळ्ळक मना तोळ्दाल पेनदा पोरोल येतसि, पारतना-दन्यवादाळ्कुना मोक्कुल्क हीसेक मंदकोम.

16 वैरेतोरहाटी बेस क्रियमळ्ळतुन आनि मिहगा मत्तवेटाल ओर्कु तूस हियमळ्ळतुन होळ्खसमट. इल्हा क्रियमळ्ळगुडा उंदि मोक्के आंद. दीनहेंदाल पेन कूस मनंता.

17 मीवा पेदूदाल्क वेहताप मिमेट ताकट. ओर्कु लोंगिस मंटु. मीवा जीवाता कावेल क्रियमळे ओरा जिम्मेदारि आंद. ओर्कु मीवा बारेमते, पेनदागा लेक्का हिथ्या पीता. ओर वेहताप मिमेट ताकते, ओरा कबळ ओर कुसिते कीतुर, हिलाकोंटे ओर दुक्कमते कबळ कीतुर. ओर दुक्कमते कबळ कियानयते मीकु बतल पायदा वायो.

18 माहाटी पारतना कीसेके मंटु. अन्नि तीरकुने मोमोट निजम बतल अदे कीसेके, बेस कदरते पिस्सेक मंतोर. इंका मावा बुदिदुगुडा सल्लेम मंता इत्ता बरोसा माकु मंता.

19 अचोने आयाका, नना मीकु विनंति कीसि वेहना पोल्ले बतल इत्ते, पेन नाकुन बच्चोन बिराना आते, अचोने बिराना मिहगा लोहना इंचि पारतना कीम्टु.

20-21 सांति हिथ्यना पेन दाना विचारम परकारम मिमेट क्रियालय, मीकु अन्नि तीरकुना बेसता पोल्ले हिथ्यि. येसु किरिस्तुनाहेंदाल मीवा पिस्वरते दान्क नच्चना पोल्ले जर्गि. किरिस्तु येसुना नेल्लुरहेंदाल पेन मातोनि बस्केळ्ळक मननाहाटी पूना करारतुन निल्लहाता. इदु पूना करार निल्लना इंचि पेन येसुन हामुरताल मर्रा जीवाते तेहाता. इल्हा येसु किरिस्तु मावा बेस मेहानोर आतोर. मनकालोर अंटोर बस्केळ्ळाहाटी ओन्के कदर हिथ्यिर. आमीन.

आकिरता पोल्लें

22 विस्वासुल्कुनिटा! मिमेट पेनदा बक्त्तिते इकिचचो गट्टि पळना इचि, इव इचचुं पोल्लें नना इद सिट्टिते मीहाटी रासतन. इवुन बेस सहन कीसेके केंजट इचि नना मीकु विनति कीसतन.

23 मना तम्मनुसोंटा तिमोति जेलनाल पेयसता पोल्लेतुन मिमेट तेल्लिचकुंटु. ओर ओक्कला नहगा बिराना वाते, नना ओनतोन, मीकु कलियालय वांतन.

24 मीवा लीडरकुंक आनि पेनदा अंटोर पवित्र लोक्कुंकुंक, नावा जोहार वेहाट. इटलि देसेमते मनना विस्वासुल्क मीकु जोहार वेहासेक मंतुर.

25 पेनदा कुर्पा मी अंटोरतोन बस्केळ्ळक मन्निकांटी. आमैन.

याकोब याकोब रासता सिट्टि

इद सिट्टिता बारेमते गिचचो परिचयम

रासतोना पोरोल: याकोब

रासता कालम: इसवि सन 45-50

याकोब येसु सामिना तम्मुर आंदुर. लोकुलक, पेनदा विस्वासुलकुन तकलिप कियुंदुर. अदुनहाटी विस्वासुलक वेरे-वेरे देसेमते पेय्सि होलतुर. ओर्क दैरेनेम हियालय याकोब इद सिट्टि रासतोर.

मीक तकलिप वाधिना आनंदमते ओपकेते अदुन ओर्सकुंदु, गरिब आथिर सिरमंत आथिर बेदबाव कियमट, इच्छाना पज्जो ताकसि पापम कियमट, विस्वासमते कबळ कीम्टु, नाल्केतुन आपट, पेद्दिदरकेम कियमट आनि विस्वासमते गाट्टिगा निल्सि मंटु इंचि विस्वासुलकुंक वेहतोर.

बगा बतल मंता

जोहार आनि परिचयम 1:1

विस्वासम आनि बुद्दि 1:2-8

गरिबतनम आनि दनम 1:9-11

पट्टु हळमळ आनि परिकसा 1:12-18

केंजमळ आनि कियमळ 1:19-27

बेदबावम कियमळ बारेमते 2:1-13

विस्वासम आनि बेस कबाहक 2:14-26

विस्वासि आनि ओना वळकमळ 3:1-18

विस्वासि आनि दुनिया 4:1-5:6

समजांचि वेहामळ 5:7-20

जोहार

1 नना याकोबुन, पेन आनि सामि येसु किरिस्तुना सेवकुन आंदुन. वेरे-वेरे देसेलकुने पैलांचि होंचि मत्ता पन्नेंडु गोत्रालकुनोर्कुंक* नना इद सिट्टि रासेके मंतन. मीक अंतोर्क जोहार.

परिकसां आनि आनंदम

2 नावा विस्वासुलकुनिटा, बस्के अश्ते मीवापोरेरी तीर-तीराता परिकसां वांतां, अस्के अद मीवा पूरा आनंदमता पोल्ले इनकुंदु.

3 बारित्ते विस्वासमता परिकसानाहेंदाले ओपके पुंता इंचि मीक एरपाटे मंता.

4 मिमेट ओपकेतुन दाना कबळ पूरा किया हीम्टु, अस्के मिमेट विस्वासमते गाट्टिगा, पुरागा आनि बवे पोल्लेने बतले तक्को हिलाकोटा आंतिट.

5 गानि मीवा लोप्पोटाल बोनकन्ना बुद्दि तक्को मत्ते पेनदुन तलकट, अस्के पेन हीता. बारित्ते अद बतले तप्पु दोस्साका, तलकतोर अंतोर्कुंक वेल्लेने हीता.

6 गानि अनमानम कियाका विस्वासमते तलकमळ गावाले. अनमानम कियानोर समुद्रमते वळिक वायाना एता तळानसंतोर आंदुर.

7-8 असंतोर रोंडु तीस्कुने विचारम कियाना मनकल आंदुर, ओर बदे हर्दे गाट्टिगा मननोर. अदुनहाटी सामिनाहेंदाल बतलन्ना दोर्कता इंचि इनकुना मन्नि.

गरिब आनि सिरमंतुड

9 गरिब विस्वासि, पेन ओनकु हीता पेद्दातनमता हेंदाल आनंदमते मंदना.

10 अल्हेन सिरमंत विस्वासि, पेन हीता सिन्नातनमता हेंदाल आनंदमते मंदना. ओर जाडि पुंगार राल्सि होत्ताप हासि दांतोर.

11 बारित्ते पोळ्दु पेय्संता अस्के एरीना एद्दिद मंन्ता, दानहेंदाल जाडि वतसि दांता, पजा दाना पुंगारहकु राल्सि होंचि सिंगारम हिलाकोटा आंता. अल्हेने सिरमंत मनकलगुडा ओना कमाइ कियाना विचारालकुनेन मुळ्गिसि मंचि नासडेम आसि दांतोर.

* 1:1 पन्नेंडु गोत्रालकुनोर्कुंक ईर यहदि विस्वासुलक आंदुर, ओरा देसेमताल पलाते एक्कोते-एक्को सिरिया आनि आसिया एरियाते मंचेके मल्लुर.

12 बोर अत्ये परिकसां वातस्के अबुन ओर्सकुंतोर, ओर आसिर्वाद दोर्कतोर आंदुर. बारित्ते परिकसाने गट्टिगा नित्तिसि मंचि बोर अत्ये पेनदुन पावरम कीतोर, ओनकु पिस्वरता किरिटम हीतन इंचि पेन पोल्ले हीसि मत्ता, अद ओनकु हिच्यार.

13 पेन परिकसां वाया हिच्यो अल्हेन बोर्कुने परिकसाने अरहो. अदुनहाटी बोर्कन्ना परिकसां वायानय्ते, पेनदाहेंदाले परिकसां वासेक मंतां इंचि इना मनि.

14 गानि हरेक मनकन, ओना लालच दानहेके गुंजकुंता. पजा पसांचि, ओन परिकसाते अरहता.

15 आयंका आ लालच नेला तप्सि एरपूरताप, पापमतुन कनंता आनि पापम बेरिं हामुरतुन पुटसंता.

16 नावा पावरमगल्ला विस्वासुल्कुनिटा! मिमेट पसांचकुनमट.

17 हरेक बेसता वरम आनि अन्निकन्ना बेसता इनाम पोर्गेटाले वांता, वेल्गुल्कुना पेनबाबानगटाल वांता, ओनालोपो बतले तेडा हिल्ले, ओर नीडातालेसी बदलांचानोर आयोर.

18 ओर पुटिस्तवुन लोपो मोट्टा मोदाटा पलम मनमे आयागोम इत्ता ओना सतता इचचातुन पीसि, सत्तेम पोल्लेताल मनाकुन पुटिस्तोर.

केंजमळ आनि केंजातप ताकमळ

19 नावा पावरमगल्ला विस्वासुल्कुनिटा, मिमेट इद पोल्ले तेल्लिचकुंट, हरेक मनकल केंजालय बिराना तयार मंदना, वळकालय ओपके मंदना आनि बिराना होंग वायाकॉटा मंदना.

20 बारित्ते मनकना होंग पेनदा नीति पोर्गे कबळ किय्यो.

21 अदुनहाटी मीलोपो मत्ता कराब पोल्लेन आनि दुस्ट मनसुन तेंडसि पोहारि, पेन मीवा मनसुने हीता बेसता पोल्लेतुन मिमेट पेदूदातनम हळकाळोटा पीकुंट. बारित्ते अद मीवा आत्मान पिसागोटनाहाटी बलमतद आंद.

22 अद पोल्ले सिराप केंजालये आयो गानि अद वेहेताप ताकानोर आम्ट. अल्हा ताकाकॉटे मीवद मिमेटे पसांचकुंतिर.

23-24 बारित्ते बोर अत्ये पेनदा पोल्ले केंजसि अदुना परकारम ताकोर, आ मनकल अदूदमते मोकम हळसि पलाते होत्ता पजा बल्हा मत्तानो इंचि बिराने मसंगसटोर आंदुर.

25 गानि बोर अत्ये मुक्कितता तपु हिल्ला नियम मत्ताप ताकंतोर आनि अदुन मरगोर, असंटोना कबळ लोपो पेनदा आसिर्वाद मनंता.

26 बोरन्नागिंटा ओनद-ओर बक्तुन इनकुंतोर गानि ओना नाल्केतुन आपकुन्नोर, अत्ये ओर, ओनद-ओरे पसांचकुंकेचेके मंतोर. ओना बक्ति एतमे आंद.

27 बोर अत्ये दिक्कु हिल्वोर्कुना, मुंडामोस्तवुना तकलिप लोपो सहायम कीतोर, इद दुनियाता कराब कबाह्कुनाल लक्कु मनंतोर, असंटोर मना पेनबाबाना मुन्ने दोसेम हिल्वोर पवित्र आंदुर.

2

बोनद बेदबाव कियामनि

1 नावा विस्वासुल्कुनिटा! मीवा विस्वासम मना महिमाता सामि येसु किरिस्तुनपोर्गे मंता, अदुनहाटी मीलोपो बेदबाव मनामनि.

2 बारित्ते, वरोर मनकल बंगारमता मुदूदा, एक्को दरातव कपडिं केरिं, इंकावरोर गरिब मनकल बौतल कपडिं केरिं पारतना कियाना लोते वातुर इनकुंट,

3 अस्के मिमेट एक्को दराता कपडिं केरिं वातोनहेके हळसि, “निमे इगे बेसता जेगाते उदूदा” इंचि वेहचि, गरिब मनकन, “निमे अगा नित्ता हिलाकॉटे नावा कालकुनगा उदूदा” इंचि वेहानय्ते,

4 मिमेट मीवा लोप्पेन बेदबाव कीताप आया हिल्लिरा? इंका दुस्ट विचारमते न्यायम कीतोर आया हिल्लिरा?

5 नावा पावरमगल्ला विस्वासुल्कुनिटा! केंजाट, ई दुनियाते बोर अत्ये गरिब मंतूर ओर्कुन विस्वासमते दनवंतुल्क कीतन इंचि, आनि दान पावरम कीतोर्कुंके दाना राज्यमते वारसदार्क कीतन इंचि, मुन्नेने पोल्ले हीसि मत्ता, अद हियालय ओर्कुन पेस्ता.

6 गानि मिमेट आ गरिब मनकन अपमानम कीतिर. मीपोर्गे अदिकारम ताकिचचेके, मीकुन कोरटते इग्गिसेक ओयानुर दनवंतुल्के गदा?

7 किरिस्तुना कदर हियना पोरोल मीक दोर्कता, अद पोरोलतुनगुडा अपमानम कियानुर ईर दनवंतुल्क गदा?

8 मिमेटगिंटा, “नीवद-निमे पावरम कीतापे पक्कातोर्कुंनगुडा पावरम कीम,” इंचि दर्मसास्त्रमते वेहेताप ताकानय्ते, मिमेट निजमे बेस कीसेक मतिट.

9 गानि ओक्कला मिमेट बेदबाव कियानय्ते, मिमेट पापम कीसेक मतिट, दर्मसास्त्रम मीकुन दोसिल्लक कीता.

10 बारित्ते बोर आथिर दर्मसास्त्रमतव अन्नि पोल्लेन पालन कीसिगुडा उदि पोल्ले तपते, ओर अन्नि पोल्लेने दोसि आंतोर.

- 11 बल्हा इत्ते, “बोगमतनम कियमट” इंचि पेन वेहता, आनि अदे पेन, “इंकावरोन हक्कमट” इंचिगुडा वेहता. निमे व्यबिचारम किया हिल्लिन गानि इंकावरोन हक्कतन, अय्ते निमे दर्मसास्त्रमता पालन किया हिल्लिन.
 12 बोरद अय्ते पापमताल इळबळिचना नियम परकारम न्यायम आयाना मंता. मिमेट ओरालेसीगे वळकट, कबळ कीम्ट.
 13 बारित्ते बोर अय्ते दया किय्योर, न्यायम कियाना रोज पेन ओनपोरों दया किय्यो. दया कियानोर न्यायमतुन गेल्संतोर.

विस्वासम आनि बेसता कबाह्क

14 नावा विस्वासुल्कुनिटा! बोरन्नागिटा नाक विस्वासम मंता इन्कुंचि, विस्वासम परकारम कबळ कियाकोटें, अद विस्वासम बता पाय्दातद असोटा विस्वासम ओन पिसागोटा परंतना?

15 बोरन्ना दादाल आयि, अक्कल आयि ओर्क केरालय कपडिं, तिनालय रोजता तिडि हिल्ले,
 16 अस्के मिमेट ओर्कुन, “सांतिते होंट, गरम कपडि केरंट, पीरमेड तिट्ट,” इंचि इनकिर. गानि ओरा मेंदुल्क अक्सरम मत्तव ओर्क हिथ्यिर, अय्ते दाना बता पाय्दा?

17 अल्हेने विस्वासम मत्ताप कबळ हिलाकोटें, आ विस्वासमगुडा हातापे आंद.

18 गानि बोरन्ना, “नीकु विस्वासम मंता, नाक बेसता कबळ मंता” इंचि इत्तोर इनकुंट. अस्के, “बेसता कबळ हिल्वा विस्वासम नाक हुप्सा, बेसता कबळताहेंदाल विस्वासम नीकु हुप्संतन” इंचि ओर इनानुर.

19 पेन उंदे मंता इंचि मिमेट विस्वासम कीतिर, बेसे आंद. गानि देय्याल्कुगुडा विस्वासम कीसि गजा-गजा वनकंतां.

20 अरे बुद्दि हिल्वा मनका! कबळ हिल्वा विस्वासम एतम इंचि, नीकु तेळियोना?

21 मना एनकटा बाबो अब्राहाम ओना मरिं इसाकुन मोक्कु हियालय गद्देपोरों इत्तोर, अय्ते पेन ओना कबळतुन हळसि, नीतिमंतुड इंचि ओन ओप्फुत्ताना हिल्लेना?

22 मिमेट हळसेक मंतिट, विस्वासम ओर कीता कबाह्कनतोन कलियसि मंता, अल्हेने विस्वासम ओना कबाह्कनाहेंदाल पूरा आता.

23 अय्ते, “अब्राहाम पेन पोरोरें विस्वासम कीतोर, अस्के पेन ओन नीतिमंतुड इत्ता,” इंचि दर्मसास्त्रमता पोल्ले पूरा आता. अल्हेने अब्राहाम पेनदा दंतातोर इंचि पोरोल दोर्किचकुत्तोर.

24 अदनुहाटी मनकल सिराप विस्वासम कीतेने आयो गानि बेसता कबाह्कनालगुडा पेन ओन नीतिमंतुड कीता.

25 अल्हेने रहाब इनाना वेस्यागुडा कबर्यालोर्कुन दाना लोते मक्किचि ईरिं, इंकुंदि हरदाल वापस लोहता. अद बेसता कबळ कीताहाटी नीति मुरतळ आता.

26 बल्हा अय्ते आत्मा हिल्वा मेंदुल हांतानो, अल्हेने कबळ हिल्वा विस्वासमगुडा हातापे.

3

नाल्के तळमितसोटद आंद

1 नावा विस्वासुल्कुनिटा! मिहागटाल वेल्लेटुर कराहनोर आयमट्ट, बारित्ते मनम कराहनोर्कुंक वेल्ले गट्टिगा न्यायम जर्गता इंचि मीक एरपाटे मंता.

2 मनम अंतोरम बच्चुंगो तप्पुक कीतोम, गानि बोर अय्ते वळ्कानेके उंदिगुडा तप्पु किय्योर, ओर अन्नि गुनाल्कुने पूरा मत्ता मनकल आंदुर आनि ओर ओना मेंदुलतुनगुडा पगमते दोहताप ईरा परांतोर.

3 गुर्म मना कय्दे ताकागोम इंचि दाना तोड्डिते कल्लेम दोसंतोम, अस्केने दाना पूरा मेंदुलतुन तिरहा परांतोर.

4 अल्हेने डॉंगन हळोट, अब वेल्लेने पेद्दागा मन्तां, वेल्ले वळिते ताकंतां, अन्नागानि अबुन ताकसानोर सिन्ना पतवार* हेंदाल बेके इत्ते हेके तिरहा परांतोर.

5 अल्हेने मना मेंदुल्ले सिन्ना नाल्के मंता, अद पेद्दा-पेद्दा पोल्लें पोंगंता. हळोट, सिन्ना मिन्गुरते पेद्दा केडा वेसि दांता.

6 मना नाल्केगुडा तळमितालेसीं मंता. दानगा अन्नि कराब पोल्लें निडसि मंतां. अद मना मेंदुल्ले मंचि पूरा मेंदुल्लुन बदनम कीसि मना पिस्वरते तडमि दोसंता. अद तडमि नरकमताल वांता.

7 बारित्ते अन्नि तीरकुना केडा जिवरासीं, पिट्टें, पुळकु आनि समुद्रमते मंदना जिवरासिन मनकल ओना कय्दे कीकुन्ना परांतोर, कीकुत्तोरगुडा.

8 गानि नाल्केतुन आपमळ बोनतने आयापरों. अद आग्वद, कराबतद आंद. दानगा हामुरता विसम निडसि मंता.

9 इदुनतने मनम मना सामि पेनबाबाना स्तुति कीतोम, आनि इदुनतने मनम पेन दाना रूपमते पुटिस्ता मनकालोर्कुन सापनेम हीतोम.

10 उंदे तोळदाल आसिर्वाद, सापनेम रोंडु पेयसंतां, नावा विस्वासुल्कुनिटा, इल्हा आयामन्नि.

* 3:4 पतवार डोंगा ताकसेक मनानेके दान हेके-हीके तिराहनाहाटी स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळ्ळु एते मनंता.

- 11 बतल, उंदे ऊटाताल उनाना एर, होव्वोर एर रौंडु पेयसंतंगां?
 12 नावा विस्वासुल्कुनिटा, अंजिर मराकु जयतुन पंडिं हादांतंगा हिलाकोटे अंगुर वेलिक अंजिर पंडिं हादांतंगा? हादों. अल्हेने होव्वोर एता ऊटाताल, उनाना एर पेयसा परीं.

देय्याल्कुना तेल्चि आनि पेनदा तेल्चि

- 13 मीलोपो तेल्चितोर, तेळियतोर बोर मंतोर? ओर ओना बेसता पिस्वर हेंदाल, तेल्चिते सीदा-सादा मंचि ओर कियाना कबाहकुन हुप्सना.
 14 गानि मीवा मनसुने वेल्लेने कूटा-कूटा, लालचता इच्चां निडिस मत्ते, नीवा तेल्चिता बारेमते पेद्दिरकेम कीसि, सत्तेमता विरोदमते पापम कियामन्नि.
 15 ई तेल्चि पोरोटाल रेय्सि वातद आयो, गानि दुनियातागटाल, मनकनगटाल आनि देय्यमतगटाल आंद.
 16 बल्हा इत्ते, बगा अयते कूटा-कूटा आनि लालचता इच्चां मनंतंगो, अगा आपत्ति आनि अन्नि तीरकुना कराब कबाहक मनतां.
 17 गानि पोरोटाल वायाना तेल्चि अद मोदाला अयते पवित्र मनंता, आयंका सांति हियानद, सीदा-सादा गुनमतद, इंकावरोना पोल्ले केंजालय तयारते मनानद, दया आनि बेसता कबाहक कियानद, अद बेदबाव कियवद, इमानदारते मनानद आंद.
 18 सांतितुन वरोक-वरोर कल्पानोर्क, सांतिता विज्जाता हेंदाल नीतिता पंटा दोर्कता.

4

मनालोपो जगडाल्क आयाना कारनम

- 1 मीलोपो लडाई, जगडाल्क, आयाना कारनम बतल? मीलोपो मंदना कराब आसेना लडाइताहेंदाले गदा.
 2 मिमेट इच्चा कीर्तिटि गानि अद मीक दोर्को, अदुनहाटीं मिमेट इंकावरोन हव्कतिर. गावाले इंचि इनकुंतिर गानि अद मीक दोर्को, मिमेट लडाई, जगडाल्क कीर्तिर. अयते मीक दोर्कवा कारनम बतल इत्ते, मिमेट पेनदुन तल्कसेक हिल्लिर.
 3 मिमेट तल्कतिर गानि मिमेट मीवा सुकमताहाटीं कराब आसेतेन तल्कतिर, अदुनहाटीं मीक दोर्को.
 4 विस्वासम हिल्वोरिटा! दुनियातोनि दंटा कियमळ इत्ते पेनदुक पगा आयमळ इद मीक तेळियोना? अदुनहाटीं बोर अयते दुनियातोनि दंटा कीतोर, ओर पेनदुक पगातोर आंतोर.
 5 दर्मसास्त्रमते वेहता पोल्ले एंमि इंचि मिमेट इनकुंचतिरा? बद पवित्र आत्मातुन अयते पेन मनालोपो इरता, अद मना नुकसान आयगोम इंचि कोरंतना?
 6 पेन अयते इंका एक्को कुर्पा कीता. अदुनहाटीं, “पेन पेद्दिरकेम कियानोर्कुंक विरोद कीता आनि सिन्नातनम आसि मनानोर्कुंक कुर्पा कीता,” इंचि दर्मसास्त्रमते रासि मंता.
 7 अदुनहाटीं पेनदा पोल्लेपोरीं ताकट, देय्यमकु एदुर तिरियट. अस्के अद मिहागटाल वित्तंता.
 8 मिमेट पेनदुक दग्गेरा वट, अस्के पेन मीवा दग्गेरा वांता. ए पापि लोकिरिटा! मीवा पापालकुन नोरीट. रौंडु मनसुकुने ताकानोरिटा, मीवा मनसुन साप इर्राट.
 9 पापि लोक्कुम इंचि दुक्कमते मंडु, अळट. मिमेट कव्वानद होळसिसि दुक्कमते मंडु, आनंदमते मनानद होळसिसि नाराजते मंडु.
 10 सामिना मुन्ने मिमेट सिन्नातनम आसि मंडु, अस्के मीकुन पेन पोरोळ्क तेहांता.

तप्पु दोसना अदिकार मीक हिल्ले

- 11 विस्वासुल्कुनिटा! वरोना-वरोर अपमानम कीकुनमत, बोर अयते ओना दंटातोन अपमानम कीतोर, ओनपोरीं तप्पु दोसंतोर, असोंटा मनक्ल दर्मसास्त्रमता अपमानम कीतोर, दानपोरीं तप्पु दोसंतोर. अयते निमे गिंटा दर्मसास्त्रमपोरीं तप्पु दोसते, निमे नियम परकारम ताकानोन आयिन गानि न्यायम कियानोनालेसीं आंतिन.
 12 दर्मसास्त्रम हियानद आनि न्यायम कियानद पेन उंदे आंद. दानके पिसागोटना आनि नासडेम किय्याना ताकत मंता, गानि निमे बोन आंदिन पक्कातोनपोरीं तप्पु दोस्सानोन?

मना पिस्वर पेनदा कय्दे मंता

- 13 केंजाट, “इय्याला हिलाकोटे नाडि पलाना सहरते होंचि, वसमिड मंचि, दंदा कीसि कमांचकोम,” इंचि मिमेट इंतिट.
 14 गानि नाडि बतल आंता मीक तेळियो, मीवा पिस्वर इत्ते गळसेम दिस्सि मरां दिसाकोटा आयाना मूळमतसोटद आंद.
 15 अदुनहाटीं मिमेट, “सामिना इच्चा मत्ते मनम जीवाते मंदकोम, इदो, अदो बदो उंदि कबळ कीकोम,” इंचि इनमळ गावाले.
 16 गानि इंदके मीवा पोल्लेने मिमेट गरति मनतिर, इसोंटा अन्नि तीरकुना गरां बेस आयो.

17 अदुनहाटी बोर अथे बेस कबळ कियाना इंचि तेळियसिगुडा ओर कियार्कोटे, ओनाहाटी अद पापम आंद.

5

दनवंतुल्कुंक वेहमळ

1 दनवंतुल्कुनिटा, केंजाट! मीपोर्रो वायाना गंडाल्कुनाहाटी वरगेयाट, अळट.

2 मीवा दनम नासडेम आंता, मीवा कपडिन सेदेल पीता.

3 मीवा बंगारम, एंडि सिल्लुम पीता. अद सिल्लुम मीक अड्डम गवाइ वेहचि, तळमितालेसी मीवा मेंदुल्लुन नासडेम कीता. मिमेट ई आकिर युगमतेगुडा दनम जमा कीसेक मंतरि.

4 हुळाट! मीवा नेदे कबळ कीता बूतिनोर्कुंक मिमेट बूति हिया हिल्लिर, अद बूति मीक अड्डम वरगेयसेक मंता, बूतिनोर्कुना अळमळ स्वर्गमते मंदना बलमगल्ला सामिना केव्कुंक केंजावाता.

5 मिमेट ई दुनियते अन्नि तीरकुना आरामते, सुकमते पिस्तिर आनि मिमेट हायना रोजुनाहाटी मीवा मनसुन बल्सागोटतिर.

6 नीतिमंतुनपोर्रो मिमेट दोसेम दोस्सि हक्कतिरगुडा. गानि ओर मीपोर्रो मर्लांबळा हिल्लोर.

ओपेकेते ताकाना

7 अदुनहाटी विस्वासुल्कुनिटा! सामि मर्रा वायानादाका ओपेके पीसि मंटु. बल्हा इत्ते, वरोर कास्तकरि मनकल ओना नेदा पिस्वरता पंटाहाटी मोदाटा पिर्रे आनि आकिरता पिर्रे वायानादाका ओपेकेते एदुर हूळांतोर,

8 अल्हेने सामि माल्सि वायना वेला दगोरा वासि मंता. अदुनहाटी मिमेटगुडा मीवा मनसुन गट्टिगा कीसि, ओपेकेते मंटु.

9 विस्वासुल्कुनिटा! वरोनपोर्रो वरोर चुगलीं वेहमट, अल्हा वेहातिर इत्ते मी पोर्रेनि दोसेम दोसमळ जर्गता. हुळाट, न्यायम कियानोर गलमातगा नित्तिसि मंतोर.

10 विस्वासुल्कुनिटा! सामिना पोरोलता बारेमते वेहता पेनदा कन्नुरतोर तकलिप बोगाचिगुडा ओपेकेते मत्तुर, मिमेटगुडा ओरालेसी मंटु.

11 हुळाट! बोर अथे ओपेके पीसि मत्तुर, ओर्कुन आसिर्वांद दोर्कतोर इंतोम. अय्युब* ओपेके पीसि मत्ताहेंका ओनक पेनदाहेंदाल आसिर्वादगुडा दोर्कता इंचि मिमेट केंजातिरे. इदुनहेंदाल पेन एक्को जीवा कियानद, दया कियानद आंद, इंचि तेळियंता.

12 गानि नावा विस्वासुल्कुनिटा! अन्निकन्ना पेद्दा पोल्ले बतल इत्ते, मिमेट स्वर्गमतद आयि, बूमितद आयि आनि बदे पोल्लेतद आयि ओट्टट तिन्मत. मत्ते मंता इंट, हिलाकॉटे हिल्ले इंट. इल्हा इत्ते पेन मीकु सिक्साता आदेस हिश्यो.

पारतनाता ताकत

13 मीवा लोप्पोगिंटा बोर्नना दुक्कमते मत्ते ओर पारतना कियाना, आनंदमते मत्ते पेनदा स्तुति कीसेक पाटां पाराना.

14 मीवा लोप्पोगिंटा बोर्नना बिमारते मनानथे, कलिसियाता पेद्दाल्कुन केयाना. ओर वासि सामिना पोरोलते ओनकु निय होकसि, पारतना किथ्थिर.

15 ओर विस्वासमते कीता पारतनाते बिमारतोर बेस आयानुर. सामि ओन बिमारताल तेहाचि निप्यंतोर, ओर पापम किथ्थिनागानि ओना पापमतुन मापि कीतोर.

16 अदुनहाटी मिमेट वरोना मुन्ने वरोर मीवा पापाल्कुन ओपेकुंट, वरोनाहाटी वरोर पारतना कीमटु, अस्के मिमेट बेस आकिट. नीति मनकना पारतनाते वेल्लेने ताकत मंता.

17 एलियाल्लगुडा† मनासोटा गुनमता मनकल मत्तोर, ओर पिर्रे वायामन्नि इंचि ऊके-ऊके पारतना कीतोर, अथे मूडुननरा वर्सनदाका बूमिपोर्रो पिर्रे वाया हिल्ले.

18 दाना पजा, पिर्रे वायागोम इंचि मर्रा पारतना कीतोर, अस्के मब्बुनाल पिर्रे वाता आनि बूमिपोर्रो पंटा पेयसता.

19 नावा विस्वासुल्कुनिटा! मीवा लोप्पोटाल बोर्नना सत्तेमता हरदाल तप्सि होनानथे, ओन इंकावरोर बोर्नना सत्तेमता हर्दे वापस तायाना.

20 ओनकु इद तेळियना गदा, बोर्नना सत्तेमता हरदाल तप्सि होत्ता पापि मनकन, सत्तेमता हर्दे वापस तायते ओर ओना जीवातुन हामुरताल पिसागोटतोर आनि ओना अन्नि पापाल्कुन मुच्चि हीतोर.

* 5:11 अय्युब अय्युब पोरोलता वरोर मनकना बारेमते पडाना नियमते रासि मंता. ओर पेनदा बेसता बक्तुड मत्तोर. † 5:17 एलियाल पडाना नियम मत्तस्के इर पेनदा पेद्दा कन्नुरतोर मत्तोर.

1 पत्र पत्र रासता मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पत्र

रासता कालम: इसवि सन 65-67

रोम राज्येमते वेर-वेर एरियाने पैलांचि, पराय देसेमतोरालेसी मत्ता विस्वासुल्कुनाहाटी पत्र इद सिट्टि रासतोर. ओर सामिना लोपो विस्वासमते गट्टिगा मत्ताहाटी लोकुल्कुनहेंदाल ओर्क वेल्ले तकलिपकु मत्तां, ओर दुक्कमते मत्तुर.

अदुनहाटी पत्र ओर्क दैरनेम हीसेक मंतोर. बोर अय्ते तकलिपकुन, दुक्कमतुन ओपके पीसि ओसंकुचेके विस्वासमते गट्टिगा मन्तुर, ओरापोर्री पेनदा दया बस्केळ्ळक मनंता. आनि सामि येसु किरिस्तु मल्सि वातस्के दाना पलम ओर्क दोर्कता, इंचि इद सिट्टिते रासतोर.

बाग बतल मंता

जोहार आनि परिचयम 1:1-2

पेनदा मुक्तिता बारेमते मति कीसि हियमळ 1:3-12

पवित्र पिस्वर पिस्सनाहाटी बोदा 1:13-2:10

तिपल्क वातास्के विस्वासुल्कुना जिम्मेदारिना बारेमते पोल्लें 2:11-4:19

गर्ग हिलाकोटा मनमळ आनि पेनदा सेवा कियमळ 5:1-11

आकिरता बोदां 5:12-14

पत्र विस्वासुल्कुंक जोहार कीतोर

1 नना पत्रुन, येसु किरिस्तुना प्रेरितुन आंदुन. रोम देसेमता पुंतुस, गलातिया, कप्पुदुकिया, आसिया आनि बितुनिया राज्येल्कुने पैलांचि होंचि, पराय देसेमतोर आसि मत्ता लोकुल्कुंक नना इद सिट्टि रासेके मंतन.

2 पेनबाबाल मीकुन मुन्नेन पेरसि निलाहतोर. अदुनहाटीगे, मिमेट येसु किरिस्तु वेहताप ताकगोम, ओना पोंगता नेत्तुरते मीवा पापालक पायसि होनगोम इंचि पवित्र आत्माताहेंदाल मीकुन पवित्र कीतोर. पेनदा कुर्पा, सांति मीक इरगा दोर्किकांटी.

बस्केळ्ळक पिस्सना आसे

3 मना सामि येसु किरिस्तुना पेनबाबाना दन्यवाद आयि! ओना वेल्ले दयाताहेंदाल मनाकुन पूना रीतुने पुटिचमळ जर्गता. अद बल्हा इत्ते, पेनबाबाल येसु सामिन हातोरा लोपोटाल मर्रा तेहाचि, मनाकु उंदि पिस्वरता आसे हीतोर.

4 इंका अद बस्केने नासडेम आयवद, तप्पु हिलवद आनि कर्गुवसोंटा वारसान हक्क स्वर्गमते मीवाहाटी इर्सि मंता.

5 आकिरि रोजकुने पेन अंटोर्कुंक हुप्सालय तयार कीसि इरता मुक्ति, मीकु दोर्कनाहाटी मीवा विस्वासम परकारम पेन मीकुन दाना बलमते कापाळसि स्वर्गमते इरसंता.

6 अदुनहाटी मिमेट इरगा कूस आम्ट. इंदके मीक गडसेमताहाटी बच्चुंगो तीरकुना परिकसां सहन किया पीता.

7 नासडेम आयाना बंगारमतुन तळमिटे करगागोटसि परिकसा कीतुर. गानि आ बंगारमकन्ना बच्चोरो विलुवाता मीवा विस्वासमतुनगुडा परिकसा एतमळ जर्गता. येसु किरिस्तु मर्रा वातस्के, मीकुन मेच्चुंकि पेदुदातनम आनि कदर दोर्काना कारनम आयगोम.

8 मिमेट येसुन ह्ळ्ळाकोन्ना गानि पावरम कीतिट; इंदके ओर दिसाकोन्ना ओन विस्वासम कीसि, पोल्लेने वेहा परवच्चोन आनंदमते आनि महिमाते निडिस मंतिर.

9 इल्हा मीवा विस्वासमता पलम इंचि मिमेट मीवा आत्मांकु मुक्ति दोर्किचेके मंतिर.

10 मीक दोर्कन्ना मत्ता कुर्पाता बारेमते बोर पेनदा कब्रतोर अय्ते बविस्वयानि कीसि मत्तोर, ओर इदे मुक्तिता बारेमते पूसकीसेके, पहकसेक मत्तुर.

11 किरिस्तु बल्हा तकलिप वासि हायनुर, दाना पजा बल्हा ओनकु स्वर्गमते कदर दोर्कार इंचि ओरा लोपो मनना किरिस्तुना आत्मा मुन्नेन वेहचि मत्ता. गानि इव पोल्लें बोना बारेमते, बस्के आयनुं इंचि पेनदा कब्रतोर पहकुंदुर.

12 इव पोल्लें ओरा पायदाताहाटी आयों गानि मीवाहाटी इंचि पेने ओर्क तेळियागोट्सि वेहचि हुपिस्ता. इदवेरादाका बदाय्ते बेसता कब्र वेहतुर, अद स्वर्गमताल लोहचीता पवित्र आत्माहेंदाले मीक वेहतुर. इव पोल्लेना बारेमते पेनदा द्तांगुडा बल्हा आंतानो इंचि ह्ळ्ळना इच्चाते मंतां.

पवित्र आम्ह

13 अदुनहाटी मिमेट बेसता बुद्धिदतोनि, हुसारेते मंद. येसु किरिस्तु मर्रा मल्लिस वातस्के मीक दोर्कना कुर्पाताहाटी पूरा आसेते मंद.

14 येसु किरिस्तुना बारेमते मीक तेळियवस्के मीलोपो मत्ता कराब अलवटकुना जोलिक होनाकोटा, पोल्ले वेहते केजाना पिलाळकुनालेसी मंद.

15 गानि बद् पेन अर्ये मीकुन केयता, अद् पवित्र मंता. अल्हेने मिमेटगुडा मीवा ताकमळते अन्नि तीरकुने पवित्र मंद.

16 बारित्ते दर्मसास्त्रमते, “नना पवित्र मंतन इंचि मिमेटगुडा पवित्र आम्ह,” इल्हा पेन इता.

17 हरेक मनकन सिन्ना-पेद्दा इनाकोटा ओरा कबाहकुन हळसि न्यायम कियाना पेनदुन मिमेटगिटा “बाबा” इंचि पारतना कीते, दुनियाते मतचोरजेम परायतेरम इंचि वेरेंते ताकाद्.

18-19 मीवा तादो-बाबुरागटाल ताकसेके वाता एर्तम पिस्वरतुन, नासडेम आथाना एंडि-बंगारम इळबळिचा हिल्ले, गानि दोसेम हिल्वद, मर्का हिल्वद गोर्रे पोरिनसोटा किरिस्तुना विलुवाता नेत्तरताहेंदाल मिमेट इळबळतिर, इदु मीकु एरपाटे मंता.

20 दुनिया पुट्टका मुन्नेन किरिस्तुन पेन पेरता, गानि मीवाहाटी इव आकिर रोजकुने ई दुनियाते वातेर.

21 ओनहेंदाल मिमेट पेनदापोर्रा बरोसा कीतिर. पेन ओन हातेरा लोपोटाल मर्रा जीवाते तेहाचि, ओन्क पेद्दातनम हीता. अदुनहाटी मीवा आसे आनि विस्वासम पेनदापोर्रा मंता.

22 मिमेट सत्तेमता हरि ताकसि मीवा आत्मातुन पवित्र कीकुत्तिर. अदुनहाटी मिमेट वरोंक-वरोर पावरम कीसेके मंतिट. अल्हेने इंदके मीलेसी विस्वासुळ आतोर्कुन मिमेट पूरा मनसुनाल पावरम कीम्द.

23 इंदके मिमेट पूना पिस्वरते पुटतिर, नासडेम आथाना पेडेहेंदाल आयो, गानि बस्केन नासडेम आयवद, बस्केळक जीवाते मनना पेनदा पोल्लेताहेंदाल, पूना पिस्वरते पुटतिर.

24-25 दर्मसास्त्रम इल्हा वेहता गदा,

“अंटेर मनकालोर जाडितालेसी मंतु,

ओरा अन्नि पेद्दातनाळक पुंगाहकुनालेसी मंतां.

जाडि वतंता, पुंगाहकु रालंतां.

गानि सामिना पोल्ले मात्रम पीळि-पीळिनदाका मंतां.” *

इदुने मीक बेसता कबुर इंचि वेहमळ जर्गता.

2

पेनदा लोकुळक इत्ते जीवाते मनना बंडानसंटेर

1 पेन बचोर दया कियानद आंद इंचि मिमेट अर्ये एरपाट कीतिट. अदुनहाटी अन्नि तीरकुना तप्पु कबाहक, अन्नि तीरकुना बोंकिचमळ, नडेह कियमळ, कळक पोतमळ, अन्नि तीरकुना अपमानम कियमळ इवुन होळसीम्द.

2-3 इंदके पुटता पसिबाला बल्हा पाल उन्नालय तनलाळता, अल्हेने मिमेटगुडा बेसता पाललेसी मनना पेनदा पोल्लेताहाटी तनलाळट. अल्हा तनलाळते मिमेट मुक्तिहाटी पेनदा पोल्ले परकारम बेरस्सेक दांतिट.

4 मिमेट जीवाते मंदना बंडातसोटा किरिस्तुनगा वट, मनकालोर्क ओन हयसा हिल्लुर गानि ओर पेनदा लोपो पेरकुत्तेर आनि विलुवातेर आंदुर.

5 मिमेटगुडा जीवाते मंदना बंडानलेसी पवित्र आत्माता लोन दोहचेक मंतिट. येसु किरिस्तुनाहेंदाल पवित्र आत्माता बक्तितुन मोक्कु हीताप पेनदुक ओपनालायक मनालय, मिमेट पवित्र पेर्मांलोरलेसी निलाहहुर आदिर.

6 बारित्ते दर्मसास्त्रमते पेन इल्हा इत्ता गदा:

“नना सियोन्ते सेंकुमूला बंडतसंटेन वरोन इरसेक मंतन,

ओन नना पेरतन, ओर वेल्ले विलुवातेर आंदुर.

ओनापोर्रा बोरे अर्ये विस्वासम इर्तेर, ओर बस्केने सिग्गुना पाल आयोर.”*

7 अदुनहाटी मिमेट विस्वासम कीतिर इंचि अद् बंडा मीक विलुवातद्, गानि बोरे अर्ये अदुन विस्वासम किय्युर, ओराहाटी दर्मसास्त्रम इल्हा वेहता गदा:

“बद् बंडातुन दोहानोर बतक ओज्जो इत्तुर,

अदे बंडा इंदके सेंकु मूलाता मोदोल बंडा आता.”*

8 इंका दर्मसास्त्रमते इल्हा मंता गदा,

“अद बंडा लोकलुकुकं दलंगता, इंका पर्पु बंडा ओकुंन हिळ्ळ अरहंता.✱

बारित्ते, ओर पेनदा पोल्लेने ताकवाहेंके, बंडा दलिंगसि हिळ्ळ अरंतुर.

ओर हिळ्ळ अरंनाहाटीगे इल्हा निलाहमळ जर्गता.”

9 गानि मिमेट अय्ते पेन पेरकुत्ता बसमतोर, राजुल्लुकुनसोंटा पेर्मालोकं, पवित्र राज्यमतोर, पेनदा लोकलुक आदिर. अदुनहाटी मिमेट दाना अदुबूतामाता कबाह्कन वेहाना इंचि मीकुन हीकटताल अदुबूतामाता वेल्गुने तत्ता.

10 मुन्ने मिमेट पेनदा लोकलुकगुडा मना हिल्लिर, गानि इंदके मिमेट पेनदा लोकलुक आतिर. मुन्ने मीपोर्रो पेनदा दया मनाहिल्ले, गानि इंदके मीवापोर्रो पेनदा दया मंता.

11 नावा पावरमगल्लोरिता, मिमेट वेरे देसेमतोर, वेरे नाटेनोर आसि मतिर. अदुनहाटी मी आत्माकु अड्डम मनानव दुनियातां अग्नि सेड्डा आसेनाल लक्कु मंटु इंचि विनंति कीसेके मंतन.

12 मिमेट अविस्वासुल्लुकुना नड्डुम मंतिट इंचि बेस ताकट. ओर मीकुन कराब लोकलुक इंचि बदनाम कियिनागानि मीवा बेस कबाह्कन हळसि, पेन वायाना रोजुने ओर इंका पेनदा कदर कियानुर.

अदिकारम मत्तोर्कुना पोल्ले केंजना

13-14 मिमेट सामिनाहाटी दुनियाते मनना अदिकारिल्लुकुना कय्दा हिळ्ळ मंटु. राजाल पेदुदोड इंचि ओना कय्दा हिळ्ळ मंटु. अदिकारिल्लुकुना पोल्ले केंजाट, बारित्ते बेसता कबळ कियानोर्कुंके मेच्चुकुनालय आनि कराब कियानोर्कुंके सिक्सा हियालय ओर्कुंन लोहमळ जर्गता.

15 बारित्ते, मीवा बेसता कबाह्कन हळसि, तेल्चि तक्को लोकलुकुना तोड्डि बंद कियाना इंचि पेनदा इच्चा मंता.

16 मिमेट बोना कय्दा हिळ्ळ हिल्वाप मना परांतिट गानि “बोना कय्दा हिळ्ळ हिल्लोम” इंचि मीवा मनसुंक वाताप कराब कबाह्कने ताकमट, पेनदा सेवाकुल्लुकुनलेसी ताकट.

17 अंतोरा कदर कियाना, मना दंतता विस्वासुल्लुकुन पावरम कियाना. पेनदुक वेरियसि ताकना, राजाना कदर इराना.

18 जीतागाह्कुनिटा, मिमेट मीवा मालकुंक पुरा कदर हीसेक ओरा कय्दा हिळ्ळ मंटु. सिराप बेसता गुनम, सादा सिपल मतोरहेकेन आयो गानि कडक मनना मालकुंनगा गुडा ओर वेहताप ताकट.

19 बारित्ते बोरे आयिर पेनदा लोपो ताकानेके तप्पु हिलाकोन्ना गानि देब्बां तिन्निना, तिप्पलक वायिना, ओप्के पीसि मनानय्ते अद मेच्चुकुना पोल्ले आंद.

20 निमे तप्पु कीसि देब्बां तिन्निन, ओप्के पीसि मत्तिन, अय्ते अय्ते नीकु बता पायदा वाता? गानि निमे ओक्कला बेसता कबाह्क कीसि देब्बां तिचि ओप्के पीसि मनानय्ते, पेनदुक नच्चानोन आंदिन.

21 इदुनहाटीगे मीकुन पेन केयता आनि किरिस्तु मीवाहाटी तकलिप अरतोर, मिमेट इंका ओना अळगुने अळगु वाटसि ओना पज्जो तकलिप अरिं ताकना इंचि उदि उदाहरनलेसी पेन मीकुन निलाहाता.

22 ओर बतले पापम किय्या हिल्लोर, ओना तोळ्दाल बस्केने बोकिच्चना पोल्ले पेय्सा हिल्ले.✱

23 ओन तेरहिना गानि दानकु बदुल ओर बोने तेरहा हिल्लोर. ओन बच्चोनो तकलिप कीतुर गानि दानकु बदुल ओर बोर्कुने बेदरिचा हिल्लोर, दानकु बदुल सत्तेमते न्यायम कियाना पेनदुक ओनद-ओर अप्पजेपतोर.

24 मनम पापालुकुनाहाटी हासि होंचि सत्तेमताहाटी पिसागोम इंचि येसु ओना मेंदुल्लुन क्रूस पोरो हीतोर. ओर तित्ता देब्बाना हेंदाल मना बिमार्क बेस आतां.

25 मुन्ने मिमेट हरि तप्ता गौरनलेसी तिरियसेक मत्तिर. गानि इंदके मीवा जीवातुन कापाळसि कोहानोन्गा मल्लि वातिर.

3

मुत्तो-मुय्दोना ताकमळ

1-2 अल्हेने मुत्तोह्कुनिटा, मिमेट मीवा मुय्दुरा कय्दा हिळ्ळ वेरेंते मंटु. ओक्कला ओर पेनदा पोल्लेते ताकाकोट, पोल्लेनेतोनि आयाकोन्ना मीवा पवित्र आनि सत्तेमते ताकानदुन हळसि विस्वासमते वायानुर.

3 मीवा केल्लुकुन तीरता जेडां वाटमळ, बंगारमता नगां केरमळ, एक्को दराता कपळिं पोंडमळ इसोंटा पलाताल दिस्सना सिंगारम कियमट.

4 गानि दानकु बदुल मीवा मनसुना गुनम सादा-सिपल, नासडेम आयवा सांत आत्माते सिंगारम कीमट. इसोंटद पेनदा मुन्ने बच्चोनो विलुवातद आंद.

5 एनकटा कालमते पेनदापोर्रो आसे इराना पवित्रमाता मुर्ताह्क बेसता गुनमते सिंगारिचुंदु आनि मुय्दोना पोल्लेते ताकुंदुं.

6 बल्हा अय्ते अब्राहामुना मुत्तो साराल ओन मालक इंचि केयुंदु, ओर वेहताप ताकुंदु, अल्हेने मिमेटगुडा बेसता कबाहक कीसेके बदे पोल्लेक वेरियाकोटा मत्ते, दाना मियाहक आंतरि.

7 अल्हेने मुय्दुकुनिटा! मीवा मुत्तोहकुंकगुडा मी अचोने पेनदा कुर्पाता वारसान हक्क मंता. गानि अवुंक मीलेसी ताकत हिल्ले. अदुनहाटी मिमेट मुत्तोहकुंक बेस कदर हीसि पिस्सट. अस्के मीवा पारतानाकु बतले अड्डम वायो.

येसुनाहाटी तकलिप अरंना

8 आकिरते, मिमेट उंदि मनसुने वरोक-वरोर पावरम कियमळते, उंदि लोतोरलेसी जीवा कियमळते, इंकावरोनहाटी जीवा नोयमळते, सादा-सिंपल मनमळते अंतोर उंदि आसि मंडु.

9 कराबता बदला कराबतोनि एतमट; तेराहतोर इंचि तेराहमट गानि ओर्क आसिर्वाद हीम्टु. बारित्ते मीक आसिर्वाद दोर्काना इंचि पेन मीकुन केयता.

10 दुर्मसास्त्रम वेहाताप,

“बोर अय्ते पिस्वरतुन मेचकुंचि, बेसता रोजकु हळंतन इंतोर,

ओर ओना नाल्केताल कराब पोल्ले,

ओना पेदिवनाल आबदुदम पोल्ले वळकमळ आपापीता.

11 ओर कराब कबाहकुन होळसिसि बेसता कबाहक कियाना,

ओर सांतितुन पहकिसि दान पीसि ताकाना.

12 बारित्ते सामिना नदर नीतिमंतुल्लकुना पोर्रो मंता,

ओरा पारतानातुन केव हीसि केजंतोर, गानि दुस्टुल्लकुंक सामि विरोद कीतोर.”*

13 ओक्कला मिमेट बेस कियानाहाटीगे जोसने मत्ते, मीकुन बोर हेळाहनुर?

14 ओक्कला मिमेटगिंटा नीति कबाहक कियानेके मीक कस्टाल्क वायिना, पेन मीक आसिर्वाद हि्य्यार. ओर वेराहते मिमेट वेरियमट, परेसान आयमट.

15 गानि मीवा मनसुने किरिस्तु मावा सामि इंचि ओनकु कदर हीम्टु. येसुना पोर्रोटा मीवा आसेता बारेमते बोरन्ना मीकुन पूसकीते, मिमेट सादा-सिंपल आनि मान-मर्यादाते बस्केळ्ळ वेहालय तयार मंडु.

16 गानि मिमेट किरिस्तुना लोप्पो बेस पिसमळतुन हळसि बोर अय्ते मीवा अपमानम कीतुर, असंटोर्क मीवा ताकमळतुन हळसि सिग्गु वायानाल मीवा विवेक बुद्दिदतुन बेस इर्सि ताकट.

17 ओक्कला बेसता कबाहक कीताहाटीगे तकलिप बोगांचमळ पेनदा इच्चा मत्ते, कराब कबाहक कीसि तकलिप बोगांचना दानकन्ना, इदे बेस.

18 बारित्ते अंतोरा पापाल्कुनाहाटी किरिस्तु उंदे मल्का हातोर. मनाकुन पेनदागा ओयालय वरोर नीतिमंतुड अनीतिमंतुनाहाटी हातोर. मेंदुलताल ओन हक्कतुर गानि आत्माते ओन जीवाते तेहमळ जर्गता.

19 ओर हातोरा आत्मानगा होंचि, दोहचि वाटताप मत्ता आत्मांकु पेनदा कबुर वेहतोर.

20 एनकटा नोहाना कालमते डोंगा तयार कियानेके लोकुल्क वायानुर इंचि पेन ओप्के पीसि एदुर हळसेक मत्ता, गानि लोकुल्क पेनदा पोल्ले केजा हिल्लुर. सिराप एनमिदि लोकुल्क पेनदुन नम्मिसि आ कम्मुळता एताल पिस्तर.

21 आ एताल पिस्ता आनवल इत्तेने बापतिस्मा आंद. बापतिस्मा एतमळ इत्ते मेंदुलता मुर्कि होनालय आयो गानि येसु किरिस्तु हासि मर्रा जीवाते तेदताहेदाल मनाकुन पिसागोटसि, विवेक बुद्दिदताहाटी पेनदुन विनंति कियाना करार आंद.

22 इदके येसु किरिस्तु स्वर्गमते होंचि पेनबाबाना तिना बाजुंक उदतोर. अगा पेनदा दत्तां, अदिकाराल्क, सक्तिं ओना कय हिळु मंतां.

4

विस्वासुल्लकुना मनमळ

1 बल्हा अय्ते किरिस्तु मेंदुलते मत्तस्के तकलिप बोगांचतोर, मिमेटगुडा ओनसोंटा मनसु इर्सि दान मीवा विषेलेसी वाळकुंदु. बारित्ते, बोर अय्ते तकलिप बोगांचंतोर, ओर पापमतुन होळसीतोर.

2 ओर वायाना रोजकुने मेंदुलता इच्चाना परकारम आयो गानि पेनदा इच्चा परकारम पिस्संतोर.

3 मोदाला मिमेट यहुदि आयवोरा इच्चाना परकारम बोगमतनम कियमळ, जोसते मनमळ, कल्लु उनमळ, पाँटि कियमळ, रिम्मा आयमळ, नियमकु विरोदमते ताकमळ, बतक ओज्जुवा बोम्मन मोळ्कमळ इल्हा किथिंदिर, इद वेल्लेने आता.

4 इंदके मिमेट असोंटा पेद्दा बोगमतनालकुने ओरतोनि कलियसेके हिल्लिर इंचि ओर इंचत्रम आसेक मंतुर. अदुनहाटी ओर मीकुन बदनाम कीसंतुर.

5 गानि हातेरा, पिस्तोरा न्यायम क्रियालय तयार मनना पेनदुक ओरा पिस्वरता लेक्का हियापीता.

6 मेंदुल्ले मत्तास्के न्यायम मनकालोरा इच्चातुन पीसि आयिनागानि, आत्मा मात्रम पेनदा इच्चा परकारम पिस्साना इंचि बोर अयते हासि मत्तुर, ओर्कगुडा बेसता कबुर वेहमळ जर्गता.

7 इंदके दुनियाते मनना अन्निटवुना आकिर रोजकु दग्गेरा एवतां. अदुनहाटी मिमेट पारतना क्रियानेके बेस विचारमते, तेल्चिते मंटु.

8 अन्निकन्ना पेद्दा पोल्ले बतल इत्ते, वरोंक-वरोर एक्को पावरम कीम्टु, अल्हा कीते वेल्लेने पापालकुन मापि क्रिया परकिर.

9 बतले गुल्गाकौटा वरोंक-वरोर हेडमितोरलेसी बेस हळकंडु.

10 अंटोर्क वें-वें वरम दोर्कता, अदुनहाटी वरोंक-वरोर सेवा क्रियालय पेनदा तीरतीराता कुर्पा दोर्कता बेसता दिवाजिनलेसी अदुन वाळकुंटु.

11 बोन्क अयते पेनदा पोल्ले वेहाना वरम दोर्कता, ओर पेन वेहतापे वळ्ळकना. बोर अयते सेवा कीतीर, ओर पेन हिद्य्यना बलमतेने क्रियाना. अन्नि पोल्लेने येसु किरिस्तुनाहेंदाल पेनदुके महिमा दोर्काना. महिमा आनि ताकत युगा-युगालकुनदाका पेनदादे आंद. आमीन.

12-13 नावा पावरमगल्लोरिता! मीवा परिकसा क्रियानाहाटी मीवापोरों तळमितसोंटा तकलिपकु वांतां, अस्के मिमेट “बस्केने जर्गवद जर्गना मंता” इंचि, परेसान आयमटु. गानि मोमोटगुडा किरिस्तुना दुक्कमते पोत्तु आतोम इंचि कुसिते मंटु. किरिस्तु मल्सि वासि ओना पेद्दातनमतुन हूपिस्तस्के मिमेट वेल्ले कूस आकिट.

14 मीकुन ओक्कला बोर्न्ना किरिस्तुना पोरोलताहेंदाल अपमानम कीते, मिमेट आसिर्वाद दोर्कतोरे आंदिर. बारित्ते पेनदा महिमाता आत्मा मीपोरों मंता.

15 गानि मीवा लोप्पोटोर बोरे आयिर, हळ्ळताहेंका, दोंगातनम कीताहेंका, तप्पुड कबळ कीताहेंका, वेंतेरा कबळते कय वाटताहेंका दुक्कम बोगांचा मनि.

16 ओक्कला मीलोप्पो बोर्न्ना किरिस्तुनोर आताहाटी तकलिपकु बोगांचनयते, ओर सिग्गु अर्नानायो, गानि किरिस्तुना पोरोल दोर्कताहाटी पेनदुक महिमा हियागोम.

17 बारित्ते न्यायम क्रियाना वेला एवता. पेन मनातोने न्यायम सुख कीता अयते, बोर अयते पेनदा बेसता कबुरतुन केंजुर ओरा गति बतल आयार?

18 ओक्कला नीतिमंतुके सुक्ति दोर्कळ कस्टम आयानयते, दुस्टुल्क आनि पापिलकुनद बतल आयार?

19 अदुनहाटी बोर अयते पेनदा इच्चा मत्ताप तकलिप अरसेक मंतुरो, ओर बेसता कबाहक कीसिके, मनाकुन पुटिस्ता विस्वासमल्ला पेनदुक ओरा आत्मानु अप्पजेप्पना.

5

पेनदा मंदा

1 मीलोप्पो बोर अयते पेद्दालक मंतुर, ओरालेसीगे ननागुडा पेद्दा मनकन, किरिस्तु बोगांचता तकलिपकुना गवाइतोम, ओर मल्सि वायानस्के ओना पेद्दातनमते कलियानोन आंदुन इंचि, नना आ पेद्दालकुंक वेहासेक मंतन.

2 मीवा जिम्मेदारिते मत्ता पेनदा मंदातुन पोस कीम्टु. इद कबळ बलमिते आयो गानि पेनदा इच्चा परकारम कुसिते कीम्टु, दोंगा कमाइताहाटी आयो गानि मनसुनाल कीम्टु.

3 मीकु अप्पजेपता मंदापोरों अदिकारम ह्प्साकौटा, ओरा मुन्ने उंदि उदाहरनलेसी मंटु.

4 इल्हा मत्तिर इत्ते अंटोर्ककन्ना पेद्दा कोहानोर किरिस्तु वायानुर अस्के, बस्केने कळियसि होनवसोंटा पेद्दातनमता किरिटम मीकु दोर्कार.

5 अल्हेने ए लेय्युरिता! मिमेटगुडा पेद्दालक वेहताप ताकट, वरोंक-वरोर सेवा क्रियानाहाटी सिन्नागासि मुन्ने ताकट. बारित्ते,

पेन गरा क्रियानोर्कुंक अड्डम तिरियंता,

गानि सादा-सिंपल मंचि ताकानोर्कुंक कुर्पा हीता.*

6 पेन मीकुन इनकुत्ता वेला वातारिते पेद्दा क्रियाना इंचि मिमेट दाना बलमगल्ला कयदा हिळु सिन्नागासि मंटु.

7 पेन मीवा रंदि कीता, अदुनहाटी मीवा अन्नि रंदि अदुनपॉरेन होळसीम्टु.

8 मीवा पगातद पेद्दा देय्यम बोन तिनकन इंचि सिंहमतालेसी वरगेयसेके नालुं मूलां तिरियसेक मंता, अदुनहाटी हुसारते, तेल्विते मंटु.

9 मिमेट विस्वासमते गट्टिगा मंचि, दान्क विरोद कीम्टु. दुनियाते मनानोर विस्वासुल्कगुडा इल्हेने तकलिप बोगांचेके मंतुर इद मीक एरपाटे मंता.

10 अन्नि तीरकुना कुर्पा कियाना पेन मीकुन किरिस्तुना लोप्पो दाना बस्केळ्क मनना पेद्दातनमहाटी केयता. मिमेट कोन्नि रोजकु तकलिपकु बोगांचतंका अदे पेन मीकुन दानलायक कीता, मीकु बलम हीसि निलाहंता.

11 दानादे राज्येम युगा-युगाल्कनदाका मन्निकांटी, आमीन.

आकिरता जोहार

12 विस्वासमगल्ला तम्मुर इंचि नना नम्मूता सिल्वानुसना कय्दे इद सिन्ना सिट्टिट रासतन. इदे पेनदा निजम कुर्पा आंदु, इव्ते मिमेट गट्टिगा निल्सि मंटु, इंचि नना मीकु इद सिट्टिते रासि तेळियागोट्टिस वेहासेक मंतन.

13 मीवा लेसीगे बेबिलोनते पेन पेरता लोकुल्क मंतुर, ओर मीक जोहार वेहासेक मंतुर. नावा मरिनसंतोर मरकुसगुडा मीक जोहार वेहासेक मंतोर.

14 मिमेट वरॉक-वरोर कय कल्पिसि पवित्र पावरमते जोहार कीम्टु. बोर अय्ते किरिस्तुने मंतुर मी अंतोर्क सांति दोर्कि.*

* 5:14 ग्रीक बासाते बुरमळ इंचि रासि मंता.

2 पत्र पत्र रासता रोंडो सिट्टि

इद सिट्टिता बारेमते गिचचो परिचयम

रासतोना पोरोल: पत्र

रासता कालम: इसवि सन 67

मोदाटा सिट्टि पत्र बोर्क अये लोहचि मत्तोर, ओर्के मरा इद रोंडो सिट्टि रासतोर. मरा बारि रासतोर इत्ते, मुन्ने लोक्कुल्लकुन्हेंदाल विस्वासुल्लकुंक तकलिपकु वायुंदुं, गानि इंदके परिस्तिती अल्हा हिल्ले, बदलांचता. अगाटा विस्वासुल्लकुना लोप्पोने तप्पुड बोदा कराहनोर पुटसि सत्तेम पोल्लेक हरि हिलाकोटा आसेके मत्ता.

अदुनहाटी विस्वासुल्लक तप्पुड पोल्लेने अर्राकोटा सत्तेमते, विस्वासमते गट्टिगा मंदना आनि पेनदा पोल्ले मत्ताप ताकाना इंचि पत्र इद रोंडो सिट्टि रासतोर.

बगा बतल मंता

जोहार आनि परिचयम 1:1-2

विस्वासिना दर्सनम 1:3-21

तप्पुड बोदां कराहनोर 2:1-22

किरिस्तुना आकिरता वायमळ बारेमते 3:1-18

जोहार

1 नना सिमोन पत्रून, येसु किरिस्तुना दासुन आनि प्रेरितुन आंदुन. बोर अये मना पेन आनि मुक्ति हियना येसु किरिस्तुना सत्तेमताहेंदाल मावालेसी विल्लवाता विस्वासम दोर्किचकुत्तुर, ओर्के इद सिट्टि रासेके मंतन.

2 पेन आनि मना सामि येसुना तेल्विहेंदाल मीकु कुर्पा, सांति वेल्लेने बेस्सेके मन्निकांटी.

पेन मनाकु अन्नि हीता

3 मना पिस्वर आनि बक्तिताहाटी पेन दाना ताकतताहेंदाल मनाकु बतल गावाले अव अन्नि हीता. मनम अदुन एरपाट कीताहाटी अव मनाकु दोर्कतां. अद मनाकुन दाना महिमा आनि बेसतनमहेंदाल केयता.

4 दुनियाते मनना कराब आसेनाल पुट्टना रोता गुनमताल तपिचकुंचि, मनम पेनदा बेस गुनमता हिस्सेदार्क आयाना इंचि अद मनाकु विल्लवाता पोल्ले हीता.

5 अदुनहाटी मिमेट अन्नि तीरकुना कोसिस कीम्टु गदा, विस्वासमते बेसता गुनाल्लक, बेसता गुनाल्लकुने तेल्वि,

6 तेल्विते सततुन आपकुनमळ, सततुन आपकुनमळते दैरेनेम, दैरेनेमते बक्ति.

7 बक्तिते दादल-तम्मुना कूळमळ, दादल-तम्मुना कूळमळते पावरम कल्पट.

8 ओक्कला इव अन्नि पोल्ले मीलोप्पो मंचि बेस्सेके होनानयेते, अव मीकुन मना सामि येसु किरिस्तुना तेल्विता बारेमते एक्को हुसार, बेस कबळलायक कीतां.

9 गानि बोनगा इव गुनाल्लक हिल्लेगो ओर गुड्डि आंदुर, लक्कुटा नदर हिल्लोर आंदुर. ओना पडाना पापाल्लुकुन पेन नोर्सि ओना सुदिंदकरन कीतदगुडा मति मगंतोर.

10 अदुनहाटी विस्वासुल्लकुनिटा! पेन मीकुन केयिसे पेरता इत्ता पोल्लेतुन पक्का कियालय बस्केळ्ळक आतच्चोन कोसिस कीम्टु, अल्हा कीति मिमेट बस्केने विस्वासमताल अरिं होन्निर.

11 इन्हा मिमेट मना सामि, मुक्ति हियना येसु किरिस्तुना बस्केळ्ळक मंदना राज्यमते वेल्ले कदरते होळिया परांतिट.

12 अदुनहाटीगे, इव पोल्ले मीक तेळियसि मनिना, मीकु दोर्कता सत्तेमते मिमेट गट्टिगा निल्लिसि मनिना, नना मीकु बस्केळ्ळक मति कीसि हीसेक मंनंतन.

13 नना इद मैदुलते मत्तच्चोरजेम मीक इवुन मति कीसि हीसि मीकुन हुसार कियमळे, बेस इनकुंतन.

14 बारित्ते, मना सामि येसु किरिस्तु नाकु हुपिस्ताप, नावा मैदुल्लतुन बिराने होळसंतन इंचि नाकु एरपाट मंता.

15 अदुनहाटी नना हासोत्तंकागुडा मिमेट इव पोल्लेन बस्केळ्ळक मति कियनलायक मिमेट आग्योगम इंचि नना कोसिस कीसंतन.

16 बारित्ते, मना सामि येसु किरिस्तुना ताकत आनि ओना मल्लिसि वायाना बारेमते मोमोट मीकु वेहतस्के, तयार कीसि वेहता कतन कल्पिसि वेहा हिल्लोम. गानि मोमोट ओना पेदुदातनमता वेलगुन कळ्ळकुने हळसि वेहतोम.

17 बस्के अथे पेनबाबानाहेंदाल कदर आनि महिमा दोर्कता, अस्के आ स्वर्गमताल, “ईर नावा पावरमगल्ला मरि आंदुर, इनतोनि नना आनंदमते मंतन,” इंचि उंदि अल्किर आ महिमाता वेल्लगुनाल केंजावाता.

18 स्वर्गमताल वाता आ अल्किरतुन केंजतस्के, मोमोट पवित्र गुट्टापोर्री येसुनतोनि मल्लोम.

19 मनाकु पेनदा कबुरतोरा पोल्लेपोर्री एक्को बरोसा अनपिस्ता. अद पोल्ले हीकटते एलगना वेळसिलेसी दिसंता. अदुनहाटी पंगातारित्ते हक्केटा सुक्का मीवा मनसुने एलगनदाका आ पोल्ले परकारम ताकते मीके बेस.

20 दुर्मसास्त्रमते मत्तव पेनदा कबुरतोरा पोल्ले ओरा सतता मनसुना विचारमतोनि रासतव आयौ, इदुन मिमेट मुन्ने एपाटा कियमळ गावाले.

21 बारित्ते बवे बविस्वयवार्नि मनकना इच्छाताहेंदाल वाया हिल्लें, गानि पवित्र आत्माते निंडता लोक्कुलेके पेनदाहेंदाल वळकुंदुर.

2

आबद्दम कराहनोर

1 अस्के बल्हा लोक्कुलकुना नड्डुम आबद्दम कबुरतोर मत्तुर, अल्हेने मीवा नड्डुमगुडा आबद्दम कराहनोर मंदानुर. नासडेम कियाना नियमकुन ओर मक्किसे पीसि वांतुर आनि बोर सामि अथे ओर्कुन अस्तोर, ओनगुडा ओर ओक्कुन्नुर. इल्हा ओरद-ओरे नासडेमतुन बिराना ओरापोर्री तरकुंतुर.

2 वेल्ले लोक्कुल ओरा सिगु हिल्ला कबाहकुन हळसि ओरालेहकेन कियानुर. ओरसंतोराहाटीगे सत्तेमता हरि बदनम आंता.

3 आबद्दम कराहनोर, आस्तिताहाटी तिथ्यटा पोल्ले वेहिच मीकून ओरा पायदाहाटी वाळकुंतुर. ओर्क हीता सिक्साता आदेस मुन्नेटाल मंता, ओरा नासडेम कूर्कसेके हिल्ले.

4 बारित्ते, बस्के अथे पेनदा दूतां पापम कीतां, अस्के पेन अबुनगुडा होळसा हिल्ले. न्यायमता रोजु वायानादाका अबुन नरकमते हीकटता पोक्काने वाटसि इरता.

5 अचोने आयाका पेन एनकटा कालमता दुनियातुनगुडा होळसा हिल्ले, अद कालमते बक्ति हिल्ला लोक्कुलकुना दुनियापोर्री पेद्दा कम्मुळतुन वायागोटता. गानि सत्तेमता पोल्ले वेहता नोहानतोनि एडुरकुन पिसागोटता.

6-7 अल्हेने सदोम, गमोरा सहरकुने लोत इनानोर वरोर नीतिमंतुड मत्तोर. ओर आ सहरता दुस्त लोक्कुलकुना दुस्त कबाहकुनाहेंका वेल्ले दुक्कमते मनुंदुर. अदुनहाटी पेन ओन सिक्साताल पिसागोटसि, आ सहरकुन बूद्धि कीसि पोहता. इल्हा बोर अथे बक्ति हिलाका पिसंतुर ओर्कु इसोटा सिक्सा वांता इंचि उदाहरनलेसी हुपिस्ता.

8 आ नीतिमंतुड ओरा नड्डुम मत्ताहाटी ओर कियाना रोता कबाहक हळसि, ओरा पोल्ले केंजसि, ओना जीवाक रोज-रोज इरगा बादा अनपिच्चुंदु.

9 इल्हा, बक्तिगल्लोर्कुन परिकसानाल बल्हा कापाळना आनि बक्ति हिल्लोर्कुन न्यायमता रोजुनदाका सिक्साते बल्हा वाटसि इराना इत्तद सामिक तेळियसे मंता.

10 कास कीसि, बोर अथे पापमते अल्हेन मेंदुलता आसेता अदिकारमते मंतुर, ओर इरगा गर्रा आनि जिद्दिदेते निंडसि मत्ताहेंका स्वर्गमकु संबंदिचि मत्तोर्कुनगुडा तेराहलय वेरियुर.

11 पेनदा दूतां अथे ओरकन्ना एक्को ताकत, बलम मत्तव आंदु, अथना सामिना मुन्ने ओरा बारेमते तेराहनसोटा पोल्ले वळ्किसि ओरपोर्री दोसेम दोस्सो.

12 गानि ईर ई लोक्कुल ओर्क तेळियवा पोल्लेना बारेमते तेराहसेक मनांतुर, दोर्कापीसि हळ्कानाहाटी पुटता बुद्धि हिल्ला जिवरासिनसंतोर ईर आंदुर. अबुनालेसी ईरगुडा नासडेम आंतुर.

13 ओरा तप्पुड कबाहकुन पीसि ओर्कु पलम दोर्कता. पोद्दला तिनूळ-उनुळ कियमळतेन वेल्लेन कुसि मंता इनकुंतुर. ओर मीवातोनि कलियसि गाटो तिननेकेगुडा अल्हेन कीसि ओर ओरा मजां येतसेके मनुंतुर. अदुनहाटी ओर मीवा नड्डुम उंदि डाग आनि कलंक आंदुर.

14 ओरा कळक बोगमतनमते निंडिस मंतां. ओर पापम कियका मन्ना पर्र. विस्वासमते गार्दिगा हिल्लोर्कुन नळेह कीसि पापमते अरहंतुर. ओरा मनसु आस्तिक अलवट आसि मंता. ओर सापनेमते मत्तोरा मर्क आंदुर,

15 ओर सवरटा हरदाल तप्सोत्तोर आंदुर, बोअरना मरि बिलाम इननोना हरि पीतुर. बिलामुंकु कराब कबाहकुना कूलि पसंद मत्ता.

16 गानि ओर कीता कराब कबाहकुनाहाटी ओनकु तेळियागोटिसि वेहमळ जर्गता. वळ्का वायवा उंदि गाडदि मनकना लेगुने आ पेनदा कबुरतोना मुर्कतनमतुन आपता.

17 ओर एर हिल्वा कुहिं आनि दुमारम तेहकुंचि ओयाना मब्बु तेर्पे आंदुर. ओराहाटी बस्केळ्ळ हीकट मनना उंदि जेगा तयार कीसि मंता.

18 ओर बत्तक ओज्जुवा पोंगुळ पोल्ले वळ्ळसेके मनंतुर, तप्पुड हरिं ताकानोरव्टेताल तपिचकुंचि इंदके-इंदकेने बेसता हर्दे वातोर्कुन, ओर ओरा मेंदुल्ला रोता आसेना हेंदाल बोगमतनमते अरहंतुर.

19 ओर कुदुदे कराब कबाहकुना दासुल्ळ आसि, इंकावरोन असोंटा गतिताल तेंडांतोम इंचि पोल्ले हीतुर. बारिल्ले वरोर मनकन बतलय्ते गेल्संतोर, ओर अदुना दासुड आसि मनंतोर.

20 ओरगिंटा मना सामि मुक्ति हियना येसु किरिस्तुना तेल्चिता हेंदाल दुनियाता कराब कबाहकुनाल पलाते अरतंका, मरी अवे कराब कबाहकुने हिरकिसि अबुना लोप्पोने ताकते, ओना गति मुन्नेटा गतिकन्ना आकिरता गति वेल्ले कराब मंता.

21 बारिल्ले ओर सत्तेमता हरदुन एरपाट कीसि, ओर्क हीता पवित्र आदेसताल तपि होनमळकन्ना, अद हरिं ओर्कु तेळियका मनमळे बेस मत्ता.

22 इद ओरा बारेमते, “नय अद कक्कुतदुन तिनालय मरी मल्लंता, बेस नोरता पदिद मरी बुदतिन पोर्लता,” इनना निजम सात्रम परकारम जर्गता.

3

येसु मरी वांतोर

1 पावरमगल्लोरिता! इद रोंडो सिट्टि नना मीक रासतन. इव रोंडु सिट्टिने मीवा पवित्र मनसुन जेगर्तते इर्राट इंचि नना मति कीसि हीतन.

2 अदुनहाटी मिमेट पवित्र पेनदा कबुरतोर मुन्नेने वेहचि मत्ता पोल्लेन अल्हेने प्रेरितुल्कुना हेंदाल वेहतव सामि आनि मुक्ति हियानोना आदेसकुन मति इर्रांगोम.

3 आकिर रोजकुने मीकुन कारेड्डाल्ळ कियानोर वायानुर, वासि ओर ओरा कराब इचचाना परकारम ताकानुर, इद पोल्ले मीक मुन्ने तेळियमळ गावाले.

4 इंका ओर वासि, “ओर मरी वांतोर इंचि हीता पोल्ले बतल आता? मावा एनकटा पेद्दाल्ळ अय्ते हासोत्तुर, दुनिया पुटस्केटाल अन्नि पोल्ले बल्हा मत्तव अल्हे मंता,” इंचि मीकुन पूसकीतुर.

5 इंका ओर, वेल्लेन वर्सा मुन्ने पेन दाना पोल्लेतोनि बूमितुन, मब्बुन एताल पुटिस्ता. पुट्टिचि एतुन वैरे कीसि निल्हाता, इद पोल्ले ओर्क तेळियसिगुडा मति मरंगतुर.

6 अद कालमता दुनिया कम्मुळ्ळे मुळगिसि एताहेंदाले नासडेम आता.

7 गानि इंदके मनना मब्बु, बूमितुन, अदे पोल्लेते तळमितोनि नासडेम कियाना रोजुनदाका कापाळसि इरसेक मंता. बक्ति हिल्लोरा न्यायम नासडेम आयाना रोजुनदाका अल्हेन मंता.

8 गानि पावरमगल्लोरिता! सामिनगा उंदि रोजु वेय वर्सानालेसी आनि वेय वर्सा उंदि रोजुनलेसी मंता इद पोल्लेतुन मति मरंगमटु.

9 सामि हीता पोल्ले पूरा कियालय ओर आल्सेम कीसेक मंतोर इंचि इचचुर इंतुर, ओर अल्हा आल्सेम कीसेक हिल्लोर. गानि बारे मनकल नासडेम आयार्कोटा, अंतोर्क ओरा मनसु मार्सकुनना मोका दोर्कना इंचि मीवा बारेमते ओर्सुकुचेके मंतोर.

10 गानि सामि मल्सि वायाना रोजु दोंगानलेसी वांता. अस्के मब्बु पेद्दा अवाजतोनि दिसार्कोटा आंता. मब्बुने मनानव अन्नि तळमिते कर्गिस दांता आनि बूमि, बूमिपोर्गे मत्तव अन्नि वेसि दांता.

11 इवनि नासडेम आयाना मंता, अदुनहाटी मिमेट पवित्र अल्हेन पेनदा पिस्वरते बल्हा मंदगोम, विचारम कीम्टु.

12 पेन वायाना रोजुनाहाटी मिमेट एदुर हळसेक मंतोर, अद बिराना वायाना इंचि कोरसेके मंटु. अद रोजु मब्बु तळमिते वेसि नासडेम आंता आनि अबुने मत्तव अन्नि बारे तळमि दगाडाकु कर्गिस दांता.

13 गानि पेन हीता पोल्ले परकारम मनम पूना मब्बु, पूना बूमिताहाटी एदुर हळसेक मंतोम. अगा सत्तेमे निल्सि मंता.

14 अदुनहाटी पावरमगल्लोरिता, मिमेट इवुनाहाटी एदुर हळसेक मंतित, अय्ते पेनदा मुन्ने सांतिते, डाग हिलाकोटा, दोसेम हिलाकोटा मनालय कोसिस कीम्टु.

15 मना सामिना ओप्के पीसि मनमळ मना मुक्तिहाटीगे इंचि इनकुंटु. सामि हीता बुदिद परकारमे मना पावरमगल्ला पौलसु दादल मीक इव पोल्ले रासतोर.

16 इवुना बारेमते ओर ओना अन्नि सिट्टिने रासतोर. गानि अव्टेताल इचुं पोल्ले तेळियालय वेल्लेन कस्टम मंता. करियवोर, उंदि पोल्लेते निल्सि मनवोर, वैरे दर्मसास्त्रमते मत्ता पोल्लेन कीताप इवुनगुडा कीतुर. अल्हा कीसि ओरा नासडेमतुन ओर तरकुंतुर.

17 अदुनहाटी पावरमगल्लोरिटा! मीक इव पोल्लें मुन्नेटाले एरपाट मंतां, नीति हिल्ला लोकुकुना तप्पुकुने हिरकिसि, मीवा गट्टिगा निल्सि मत्ता हरदाल तप्पिसि होनाकोटा हुसारते मंटु.

18 मना सामि मुक्ति हियना येसु किरिस्तुना कुर्पाते, तेल्विते मिमेट बेस्सैके होंटु. इंदके बस्केळ्ळक ओन्के पेद्दातनम दोर्किंकांटी, आमीन.

1 योहान योहान रासता मोदाटा सिट्टि

इद सिट्टिता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

येसुना वरोर प्रेरित योहान इद सिट्टि विस्वासुल्कुनाहाटी रासतोर. अदुनहाटी ओर येसुनतौनि मत्तास्केटा ओना अनुबवमतुन इद सिट्टिते रासि वेहतोर.

येसु किरिस्तु पुरागा पेन आनि पुरागा मनकलगुडा आंदुर. ओनापोरोरि विस्वासम इरतेने, मना पापालक मापि आसि मनाकु बस्केळक पिस्साना पिस्वर दोर्कता. पडाना रीति-रिवाज्कुन पीसि मनम ताका परोम, इंचि अबुनाहेंदाल मनाकु बस्केळक पिस्साना पिस्वर दोर्का पर्री.

बोर अथे किरिस्तुनपोरोरि विस्वासम कीतुर, ओर अंटोर वरोरक-वरोर पावरम कीसेके बेस कलियसि मंदना, अर्तम हिल्लुवा नियमाल्कुन होळसिसि किरिस्तु हूपिस्ता हरदेन ताकाना. इसोटा पोर्ल्लें इद सिट्टिते योहान रासतोर.

बगा बतल मंता

जोहार आनि परिचयम 1:1-4

वेल्लु आनि हीकटा 1:5-2:29

पेनदा पिलाल्क आनि देय्यमता पिलाल्क 3:1-24

सत्तेम आनि आबद्दम 4:1-6

पावरमता कबळ बतल 4:7-21

गेलसना विस्वासम 5:1-21

पिस्वर हिय्यना पोर्ल्ले

1 मोट्टा मोदोल्ताल बोर अथे मत्तोर, ओना बारेमते मोमोट मीकु वेहचंतोम. ओन मोमोट केंजतोम, ओन मावा कळ्ळुने हळतोम, मंचिगा हळसि मावा कय्कुने ओन इटतोम. पिस्वर हिय्यना पोर्ल्ले ओरे आंदुर.

2 आ बस्केळक पिस्साना पिस्वर हिय्यना पोर्ल्ले मोदाला पेनबाबानतौनि मत्तोर. ओन पेन मनकाना रूपमते मारियागोटसि बूमिते लोहाताहेंका मोमोट ओन हळतोम, इंचि गवाइ वेहांतोम. अल्हेने आ बस्केळक पिस्साना पिस्वरता बारेमता कबुर मीकु वेहांतोम.

3 मोमोट अथे पेनबाबानतौनि ओना मर्री येसु किरिस्तुनतौनि कलियसि उंदासि पिस्सेक मंतोम, अदुनहाटी मोमोट बतल अथे हळतोम, केंजतोम, अदुना बारेमते मीक्कुगुडा वेहासेक मंतोम. दीनहेंदाल मिमेटगुडा मातौनि कलियसि मनम उंदासि मंदकोम.

4 मिमेट मातौनि कलियसि मावा आनंदम पुरागा आयाना इंचि मोमोट इव पोर्ल्लें मीकु रासेक मंतोम.

पेन वेल्लु आंद

5 येसुनाहेंदाल मोमोट बद कबुर अथे केंजतोमो, अदे कबुर मीकु वेहांतोम. अद बतल इत्ते, पेन वेल्लु आंद, दानागा गिचचोगुडा हीकट हिल्ले.

6 ओक्कला मनम पेनतौनि कलियसि मंतोम इंचि वेहचि, हीकटते ताकानथे मनम आबद्दम वळ्ळंतोम, सत्तेमते ताव्कसेक हिल्लोम.

7 गानि पेन बल्हा वेल्लुने मंता, अल्हा मनमगुडा वेल्लुने ताकानथे, मनम वरोनतौनि वरोर कलियसि उंदासि मत्ताप मनंतोम. अस्के पेनदा मर्री येसुना नेत्तुर, मनाकुन मना अन्नि पापालकुनाल पुरागा बेस साप कीता.

8 ओक्कला मनमगिंटा, महगा बदे पापम हिल्ले इंचि वेहकुनानथे, मनद मनमे पसांचकुंचंतोम, मनालोप्पो सत्तेम हिल्ले.

9 गानि पेन नीति आनि विस्वासमगल्लद आंद. अदुनहाटी ओक्कला मनम मना पापालकुन दाना मुन्ने ओपकुनानथे, अद मना पापालकुन मापि कीसि, मनाकुन मना अन्नि तप्पुड कबाह्कुनाल बेस साप कीता.✧

10 ओक्कला, “मोमोट पापम किया हिल्लोम” इंचि मनम इनानथे, मनम पेनदुन आबद्दम हिळ्ळ अरहंतोम. दाना पोर्ल्ले मनालोप्पो हिल्ले.

2

येसु मना दंटातोर आंदुर

1 नावा पिलाल्कुनिटा! मिमेट पापम कियामनि इंचि नना इव पोल्ले मीकु रासेक मंतन. गानि ओक्कला बोरन्ना पापम कियानय्ते, मनाहेंदाल पेनबाबानतोनि वळ्कालय ओनगा वरोर सहायम कियानोर मंतोर, ओरे नीतिमंतुड येसु किरिस्तु आंदुर.

2 मना पापाल्क मापि आयाना इंचि ओर मनाहाटी मोक्कु आतोर. ओर सिराप मना पापाल्क मापि आयानाहाटीगे आयो, पूरा दुनियातोर पापाल्क मापि आयानाहाटी मोक्कु आतोर.

3 मनम ओक्कला ओना आदेसकुन पीसि ताकानय्ते, ओन मनम बेस तेल्लिचकुल्लोम इंचि मनाकु बरोबर तेळियंता.

4 बोर अय्ते, “नना पेनदुन तेल्लिचकुल्लतन,” इंचि इंतोर, गानि दाना आदेसकुन पीसि ताकोर ओर पोंगुळ आंदुर. ओनगा सत्तेम हिल्ले.

5 गानि बोर अय्ते पेनदा पोल्लेतुन पीसि ताकंतोर, ओनगा पेनदा पावरम निजमे पुरागा आता. दीनहेंदाले, मनम वरोनतोनि वरोर कलियसि उंदासि मंतोम इत्तद तेळियसि दांता.

6 बोर अय्ते, “नना पेनतोनि कलियसि पिस्सेक मंतन,” इंचि वेहंतोरो, ओर कुद्दु किरिस्तु पिसतसोंटा पिस्वर पिसागोम.

पूना तरिकाते पडाना आदेस

7 नावा पावरमगल्लोरिता! नना इंदके मीकु पूना आदेस रासेक हिल्लेन, मोदोताल मीकु तेळियसि मत्ता पडाना आदेसे आंदु.

8 अयना नना उंदि पूना आदेसतुन मीकु रासेक मंतन. इद किरिस्तुना लोप्पो, मीलोप्पो सत्तेमते मंता. बारित्ते हीकट माय्सि होनालय आसंता, सत्तेमता वेलगु अय्ते मेसैकेन मंता.

9 बोर अय्ते, “नना वेलगुने मंतन,” इंचि वेहकुंचि, ओना दंटा विस्वासिन हय्सोर, ओर इंकागुडा हीकटतेन मंतोर.

10 बोर अय्ते ओना दादन पावरम कीतोर, ओर वेलगुने निल्लिस मंतोर. ओनगा पापमते अरना लायकतद बदे पोल्ले हिल्ले.

11 गानि बोर अय्ते ओना दादन हय्सोर, ओर हीकटते मंतोर. हीकटतेन पिस्सेक मंतोर. हीकटहाटी ओना कळ्कु दिस्साकोंटा आताहाटी, ओर बेके होंचंतोरो ओनद ओन्के तेळियो.

12 नावा पिलाल्कुनिटा! किरिस्तुना पोरोलतेन मीकु मीवा पापाल्कुना मापि दोर्कुता. अदुनहाटीगे नना मीकु इव पोल्ले रासेक मंतन.

13 बाबोरिता! मोट्टा मोदोल्लाल मत्तोन मिमेट तेल्लिचकुल्लिर, इंचि नना मीकु रासेक मंतन. लेय्युरिता! मिमेट सेड्डातनमतुन* गेल्लसितर, इंचि नना मीकु रासेक मंतन. पिलाल्कुनिटा! मिमेट पेनबाबान तेल्लिचकुल्लिर इंचि नना मीकु रासेक मंतन.

14 बाबोरिता! मोट्टा मोदोल्लाल मत्तोन मिमेट तेल्लिचकुल्लिर, इंचि नना मीकु रासेक मंतन. लेय्युरिता! मिमेट गट्टिटपळ्ळितर. पेनदा पोल्ले मीलोप्पो निल्लिस मंता. मिमेट सेड्डातनमतुन गेल्लसितर, इंचि नना मीकु रासेक मंतन.

15 दुनियातुन आयि दुनियाते मनना वस्तुकुन आयि पावरम कियमत.† ओक्कला बोरन्नागिटा दुनियातुन पावरम कियानय्ते, ओनगा पेनबाबाना पावरम हिल्ले.

16 बारित्ते दुनियाते मननव इत्ते, मंदुल्ला इच्चा, कळ्कुना इच्चा आनि पिस्वरता गरा इव पेनबाबानगटाल वातव आय्यो. इव ई दुनियातवे आंदु.

17 ई दुनिया, दुनियाताल वाता इच्चां, इव रोंडगुडा माय्सि होनानुं, गानि बोर अय्ते पेनदा पोल्लेपोरें ताकंतोरो, ओर मात्रम बस्केळ्क पिस्सि मनानुर.

किरिस्तुना पगातोर

18 पिलाल्कुनिटा! इद आकिरता वेला आंद, किरिस्तुना पगातोर वायानुर इंचि मिमेट केंजसि मत्तिर. अल्हेने इंदके किरिस्तुना वेल्लेटोरे पगातोर वातुर. इदुनहेंदाल, इद आकिरता वेला आंद इंचि मनाकु तेळियंता.

19 ओर लोक्कुल्ल मना लोप्पोटाले पेयसतुर, गानि ओर मनोर्क आयूर. ओर निजमे मनोर्क आसि मत्ते मनातोनि मंचि मन्नेर. ओर बोरे मनोर्क आयूर इंचि मनाकु तेळियानाहाटी ओर अल्हा पेय्सि होत्तुर.

20 गानि मीवद अय्ते पवित्र मत्तोनहेंदाल अबिसेकम आता, अदुनहाटी मिमेट अंतोर सत्तेमतुन एपाट कीतिर.

21 मीकु सत्तेम तेळियो इंचि नना मीकु रासा हिल्लेन. मीकु सत्तेम एरपाटे मंता, इंका सत्तेमताहेंदाल बद्दे आबद्दम पोल्ले वायो इंचिगुडा मीकु तेळियसे मंता. अदुनहाटी नना मीकु रासतन.

* 2:13 सेड्डातनमतुन देय्यमतुन. † 2:15 दुनियातुन आयि दुनियाते मनना वस्तुकुन आयि पावरम कियमत दीना अर्तम बतल इत्ते, इद दुनियाताहेंदाल दोर्कना सुकम, दिस्तदुनना हळ्ळिसि आसे पडमळ, दुनियाते सुकम हिथ्याना वस्तुनाहाटीगे तन्लाडमळ. इसोंटा पोल्लेन पावरम कियाना मनकल पेनदुन पावरम कियोर इत्ताप.

22 बोर अय्ते, येसुन “किरिस्तु” इंचि ओप्कुन्नोरो, ओर असल आबद्दम वळकानोर आंदुर. ओरो किरिस्तुना पगातोर आंदुर. ओर बाबन, मरिन ओप्कुन्नोर.

23 बोर अय्ते मरिन ओप्कुन्नोर, ओर बाबोनगुडा ओप्कुन्नोर. मरिन ओप्कुनानोर बाबोनगुडा ओप्कुंतोर.

24 मोदोलताल मिमेट बतल अय्ते केंजतिरो, अदुन मीलोपो बस्केळताहाटीं इरांट. अल्हा इरानय्ते, मिमेट मरिं आनि बाबोनतोनि उंदासि मंदकिट्ट.

25 किरिस्तु मनाकु बस्केळ्ळक पिस्सन पिस्वर हीतन इंचि पोल्ले हीतोर, अद इदे आंद.

26 मीकून पसांचालय हळना लोक्कुना बारेमते नना इव पोल्ले मीकु रासेक मंतन.

27 गानि बद्दुनतोनि अय्ते मीवा अबिसेकम आता, अद मीलोपो निल्लिस मंनता. अदुनहाटीं बोर मीकु कराहना अवसरम हिल्ले. मीलोपो मनना अबिसेकम, मीकु अन्निटवुना बारेमते कराहंता. अद सत्तेम आंद, दाना कराहमळ आबद्दमतद आयो. अद मीकु बल्हा कराहंता, अल्हा मिमेट किरिस्तुना लोपो निल्लिस मंट.

28 अदुनहाटीं नावा पिलाल्कुनिटा! मिमेट किरिस्तुने निल्लिस मंट. अल्हा मत्ते, ओर बस्के अय्ते इद बूमिते मल्लिस वायानुर अस्के, मनम वें हिल्लोरम आसि ओर वातंका ओना मुन्ने सिग्गु वायाकोटा मंदा परकोम.

29 मिमेट ओक्कला किरिस्तु नीतिमंतुड इंचि तेल्लिचकुत्तोर आयानय्ते, सत्तेमता कबळ कियाना हरेक मनकल पेनदाहेंदाले पुदुतोर इंचिगुडा मीकु तेळियंता.

3

मनम पेनदा पिलाल्कुम आंदुम

1 हळट! पेन मनाकुन बचचोन वेल्ले पावरम कीता! अदुनहाटीं मनाकु पेनदा पिलाल्क इंचि पोरोल दोर्कता, आनि मनम आंदुमगुडा. गानि दुनियातोर पेनदुन एरपाट किय्युवाहेंका ओर मनाकुन तेल्लिचकुन्नु.

2 नावा पावरमगल्लोरिटा! इंदके मनम पेनदा पिलाल्कुम आंदुम. गानि वायाना कालमते मनम बल्हा बतल मंनंतोम इत्तद, इंका तेळिया हिल्ले. अय्नागानि, किरिस्तु मरिं मल्लिस वायानुर अस्के, ओर बल्हा मंतोर अल्हे ओन मनम हळ्ळांतोम. अस्के मनमगुडा ओनालेसीगे मंनंतोम इंचि माकु एरपाट मंता.

3 किरिस्तुनपोरॉ इसोटा आसे इराना हरेक मनकल किरिस्तु पवित्र मत्ताप कुदुदुगुडा पवित्र कीकुंतोर.

4 पापम कियाना हरेक मनकल, दर्मसास्त्रमता विरोदमते मंनंतोर. दर्मसास्त्रमता विरोदमते ताकमळ इत्तेन पापम आंद.

5 गानि पापाल्कुन लक्कु कियानाहाटींगे किरिस्तु वातोर इंचि मीकु एरपाटे मंता. ओनगा बतले पापम हिल्ले.

6 बोर अय्ते किरिस्तुना बक्विते निल्लिस मंनंतुर, ओर पापम कीसेके मन्नु. गानि बोर अय्ते पापम कीसेके मंनंतुर, ओर किरिस्तुन हळ्हा हिल्लुर, ओन एरपाटगुडा किया हिल्लुर.

7 पिलाल्कुनिटा! मीकून बोरो पसांचकोटा जेगतां मंट. बोर अय्ते सत्तेम कबाहक कीतोर, ओर किरिस्तुनलेसी नीतिमंतुडे आंदुर.

8 पापम कीसेके मनना हरेक मनकल देय्यमता बाजुनोर आंदुर. बारित्ते सुस्वनाले देय्यम पापम कीसेके वासंता. गानि देय्यमता कबाहकुन नासडेम कियानाहाटींगे पेनदा मरिं इद दुनियाते वातोर.

9 पेनदा संतानम आतोर बोरो आयिर, ओरा लोपो पेनदा गुनम मंनता. अदुनहाटीं ओर पापम किय्युर. ओर पेनदा संतानम आताहाटीं, ओर पापम किय्ये परं.

10 इदुन पीसे, पेनदा पिलाल्क बोर आंदुर, देय्यमता पिलाल्क बोर आंदुर? इत्तद तेळियसि दांता. बोर अय्ते सत्तेमते ताकुर, ओरा दादन पावरम किय्युर, ओर पेनदा संतानम आयुर.

वरोंक-वरोर पावरम कियाना

11 मनम वरोंक-वरोर पावरम किय्यागोम इनना ई बोदा, मिमेट सुस्वनेन केंजतद आंद.

12 मनम काइनुनालेसी मननायो. ओर देय्यमता बाजुनोर आसि ओना तम्मुन हळ्ळकतोर. ओर ओना तम्मुन बद कारनमते हळ्ळकतोर? बारित्ते, ओना तम्मुना कबाहक नीतितव मत्तां आनि ओना कबाहक बारे तप्पुनव मत्तां.

13 विस्वासुल्कुनिटा! मीकून दुनियातोर हय्युर, अस्के मिमेट इंचंनम आयमट.

14 मनम मना दंटाता विस्वासुल्कुन पावरम कीतोम. अदुनहाटीं मनम हामुरताल पेय्सि पिस्वरते वातोम, इंचि मनाकु एरपाट मंता. बोर अय्ते पावरम किय्योर ओर हातोनुलेसी मंतोर.

15 बोर अय्ते ओना दादन, तम्मुन हय्योर, ओर मनकन हळ्ळकानसंतोर आंदुर. मनकन हळ्ळकानोनागा बस्केळ्ळक पिस्सना पिस्वर मन्ने इंचि मीके अय्ते एरपाटे मंता.

16 किरिस्तु मनाहाटी ओना सतता जीवा हीतोर. दीनाहेंदाल, पावरम इत्ते बतल मनाकु तेळियता. अदुनहाटी मनम मना दंटा विस्वासुल्कुनाहाटी जीवा हियालय तयार मनगोम.

17 गानि बोनागान्ना वेल्लेन दनम-संपत्ति मंचि, ओना दादांको, तम्मुंको अवसरम मंता इत्तद तेळियसिगुडा ओना जीवा नोय्याकोटे, ओनागा पेनदा पावरम मंता इंचि बल्हा इनकोम?

18 अदुनहाटी नावा पिलाल्कुनिटा! मनम मना पावरम सिराप तोळ्दा पोल्लेनेन आयो गानि, सत्तेमते बेसता कबाहक कीसि पावरम हुस्साना.

19 अल्हा कीतेन, मनम सत्तेमता बाजुनोरम इंचि मनाकु एरपाट आंता. अस्के मनम वेरियाकोटा दैरेमते पेनदा मुन्ने नित्ता पर्रतोम.

20 मना मनसु मनापोर्रो दोसेम दोस्सिनागानि मना मनसुंकन्ना पेन बचचोनो पेदूदेद आंद, दान्क अन्नि तेळियंता.

21 पावरमगल्ला दंटातोरिटा! मना मनसु मनापोर्रो दोसेम दोस्साकोटे, पेनदा मुन्ने मनम दैरेमते मना पर्रतोम.

22 इंका दाना आदेस परकारम ताकसेके, अद कूस आयाना कबाहक कीसेके मत्ते, मनम बतल तल्किना अद मनाकु हीता.

23 दाना आदेस बतल इत्ते, मनम दाना मर्रि येसु किरिस्तुनपोर्रो विस्वासम इर्राना आनि ओना आदेस परकारम मनम वर्रोक्-वरोर पावरम कियाना.

24 बोर अय्ते पेनदा आदेस परकारम ताकंतोर, ओर पेनदा लोप्पो निल्सि मनंतोर, ओनालोप्पो पेन निल्सि मनंता. इल्हा, पेन मना पिस्वरते निल्सि मनंता इंचि, मनाकु हीता पवित्र आत्माहेंदाल, एरपाट आंता.

4

सत्तेमता आत्मा आनि आबदूदमता आत्मा

1 पावरमगल्लोरिटा! नहगा पेनदा आत्मा मंता इनना अंतोरपोर्रो विस्वासम कियमट. मोमोट पेनदा कबुरतोरम इंचेके, तप्पुड बोदां कराहनोर वेल्लेन मदि दुनियाते वेलियसंतुर. अदुनहाटी बरोसा किययाका मुन्ने आ वळ्कानोनगा मनना आत्मां पेनदागटाल वातावेना इंचि, परिरक्सा कीसि ह्ळुट.

2 पेनदा आत्मातुन मिमेट इल्हा एरपाट किय्याना; बद आत्मा अय्ते, “येसु किरिस्तु मनकना रूपमते वातोर,” इंचि ओपुंकुंता, आ हरेक आत्मा पेनदाहेंदाल वातद आंद.

3 गानि बद आत्मा अय्ते, येसु मनकना रूपमते वातोर इंचि ओपुंकुन्नो, अद आत्मा पेनदाहेंदाल वातद आयो. अद किरिस्तुना पगातोना आत्मा आंद. असोटा आत्मा वायाना मंता इंचि मिमेट मुन्नेन कैजसि मत्तिर, अद इंदके दुनियाते वासि मंता.

4 पिलाल्कुनिटा! मिमेट पेनदा हेंदोर आंदिर. मीलोप्पो मनना आत्मा, दुनियाते मनना आत्माकन्ना बचचोनो पेदूदेद आंद. अदुनहाटी आ आबदूदम कबुरतोर आत्मान मिमेट गेल्सतिर.

5 आबदूदम कबुरतोर आत्मां दुनियातव आंद, अदुनहाटी अव दुनियाता पोल्लेगे वळ्कंतां, दुनियातोर अयुना पोल्लें केंजंतुर.

6 गानि मनम पेनदा लोकुल्क आंदुम. पेनदुन एरपाट कियानोर, मना पोल्लें केंजंतुर. गानि पेनदुन एरपाट कियवोर, ओर मना पोल्लें केंजुर. इल्हा मनम, बद सत्तेमता आत्मा आनि बद आबदूदमता आत्मा इंचि परक एरपाट किया पर्रतोम.

पेन पावरम आंद

7 पावरमगल्लोरिटा! पावरम पेनदाहेंदाल वातद आंद. अदुनहाटी मनम वर्रोक्-वरोर पावरम कियगोम. पावरम किय्यना हरेक मनकल पेनदा संतानम आंदुर. ओर पेनदुन एरपाट कीतोर.

8 पेन पावरम आंद. अदुनहाटी बोर अय्ते पेनदुन पावरम किय्योर, ओर पेनदुन एरपाट किय्योर.

9 दाना मर्रिनाहेंदाल मनाकु बस्केळ्क पिस्साना पिस्वर दोर्कना इंचि पेन दाना वर्रोरे मर्रिन, इद दुनियाते लोहता. इल्हा पेन, मनापोर्रैटा दाना पावरमतुन मनाकु हुपिस्ता.

10 मनम पेनदुन पावरम कीतोम इंचि आयो, गानि पेने मनाकुन पावरम कीता. अदुनहाटीगे, पेन दाना मर्रिन मना पापालक मापि आयाना इंचि मोक्कु आयालय लोहता. इदे निजम पावरम आंद.

11 पावरमगल्लोरिटा! पेन मनाकुन इचचोन पावरम कीता अय्ते, मनमगुडा वर्रोक्-वरोर पावरम कियगोम.

12 पेनदुन बोर बस्केन ह्ळ्वा हिल्लुर. गानि मनम, वर्रोक्-वरोर पावरम कियानय्ते पेन मनालोप्पो मनंता आनि दाना पावरम मनालोप्पो पुरागा आंता.

13 इल्हा पेन मनालोप्पो मनंता, मनम पेनदा लोप्पो मनंतोम इंचि मनाकु एरपाट आंता. बारित्ते, पेन मनाकु दाना सतता आत्मातुन हीता.

14 दीन मनम ह्ळ्ळोम आनि मनम दीना साक्सि मंतोम, मना पेन बाबल दुनियाता पापालक पायिचालय ओना मर्रिन लोहतोर.

15 बोरन्ना ओक्कला, येसुए पेनदा मरिं इंचि ओप्कुनानयते, पेन ओनालोप्पो निल्सि मंन्ता, ओर पेनदा लोप्पो निल्सि मंन्तो.

16 पेन माकुन पावरम कीता इंचि इंदके तेलिचकुलतोम. माकु दानपोर्री विस्वासमगुडा मंन्ता. पेन पावरम आंद. अदुनहाटी बोर अयते पावरम कीतो, ओर पेनदा लोप्पो मंन्तो, पेन ओनालोप्पो मंन्ता.

17 मनालोप्पो पेनदा पावरम पुरागा आंता. अदुनहाटी पेन न्यायम कियाना रोजुने मनम वेरियाकोटा मना परकोम. बारित्ते किरिस्तु मत्तापे, मनमगुडा इद दुनियाते पिस्सेक मंन्तो.

18 पावरमते वें मन्न्तो. पुरागा आता पावरम, वेंतुन पोळागोट्टंता. वें सिक्साक संबंदित्ताद आंद, अदुनहाटी बोर अयते वेरियंतुरो, ओरगा इसोटा पावरम पुरागा आयापर्रो.

19 मनम पावरम कीतोम, बारित्ते मुन्ने मनाकुन पेन पावरम कीता.

20 ओक्कला बोरन्ना, “नना पेनदुन पावरम कीतन,” इंचि वेह्चि, ओना दादन हयसाकोटे, ओर आबद्दम मनकल आंदुर. बारित्ते ओर हळना ओना दादाने ओर पावरम कियुवस्के, हळवा पेनदुन ओर बल्हा पावरम किया परांतोर?

21 पेनदाहेंदाल मनाकु इदु आदेस दोर्कता.

बोर अयते पेनदुन पावरम कीतो, ओर ओना दादानगुडा पावरम कियाना.

5

1 येसु, किरिस्तु आंदुर इंचि बोरयते विस्वास कीतो, ओर पेनदा मरिं आंतोर आनि बोरयते पेनतोनि पावरम कीतो, ओर दाना मरिनतोनि इंका पावरम कीतो.

2 इल्हा मनम बस्के अयते पेनदुन पावरम कीतोम आनि दाना आदेसकुना परकारम ताकंतोम अयते, अस्के एपाट कीतोम गदा मनम पेनदा मर्कुनतोनिगुडा पावरम कीतोम.

3 पेनदा आदेसकुना परकारम ताकते, दानतोनि पावरम कीतोम इंचि एपाट आंता. दाना आदेसकु कटिनम (वसेम आयवसोत्तव) हिल्लें.

4 बारित्ते बोरयते पेनदा मरिं आंतोर, ओर दुनियातुन गेल्संतोर आनि मना विस्वासमहेंदाले दुनियापोर्री मनाकु गेल्लु दोर्कता.

5 येसु पेनदा मरिं इंचि बोरयते विस्वासम कीतो, ओर दुनियापोर्री गेल्संतोर.

6 मनागा एर आनि नेत्तुरतोनी वातो, ओर येसु किरिस्तु आंदुर. सिराप एतोनि आयो, एर आनि नेत्तुरतोनी. आनि ओना साक्सि हियानद आत्मा आंदु. बारित्ते आत्मे सत्तेम आंदु.

7 साक्सि हियनोर मुळ्वर आंदुर.

8 आत्मा, एर आनि नेत्तुर आनि इर मुळ्वरा साक्सि उंदे आंदु.

9 मनम मनकनहेंदाल हीता साक्सितुन मानांचंतोम अयते, पेनदाहेंदाल हीता साक्सि बच्चोर पेद्दा. बद साक्सि अयते पेन तना मरिंना बारेमते हीता. अदे साक्सि पेनदा साक्सि आंदु.

10 बोरयते पेनदा मरिनपोर्री विस्वास इरतो, ओर ओनालोप्पो पेनदा साक्सितुन इरतो. पेन इत्ता पोल्लेनपोर्री बोरयते विस्वास इरर, ओर पेनदुन आबद्दम कीतो. बारित्ते पेन तना मरिंना बारेमते हीता साक्सितुन ओर विस्वास किया हिल्लोर.

11 पेन मनाकु बस्केळ्ळक पिस्सना पिस्वर हीता, ई पिस्वर दाना मरिंन्गा मंन्ता. इदे पेनदा गवाइ आंद.

12 बोरयते पेनदा मरिंन स्विकार कीतो, ओनाकु ई पिसवर दोर्कता गानि बोनगा अयते पेनदा मरिं हिल्लोर, ओनगा ई पिसवर हिल्ले.

इंदके हामुर हिल्ला पिस्वर मनद

13 पेनदापोर्री विस्वास इरिनोरिता! बस्केळ्ळक पिस्सना पिस्वर मिहगा मंन्ता. दीन मिमेट्टु एपाट कीम्टु इंचि नना मीकु इव पोल्लें रासा मंन्त.

14 मना पेन पोर्री इदु विस्वास मंन्ता. मनमगिंटा दाना मनसु मत्ताप तल्कानयते अद मनद केंजंता.

15 आनि मनम बतलयते दान तल्कंतोम अद केंजंता, इदु मनाकु एपाट मंन्ता. दानहाटी मनम दान बतलयते तल्कंतोम, अव मनाकु दोर्कता इदिका मनाकु एपाट मंन्ता.

16 ओक्कला मना दंटा विस्वासासि हामुर हिल्ला पापम कियनेके हळानयते ओनाहाटी पारतना कियगोम. पेन ओना पापमताल पायिचंता. इत्ते बोरयते हामुरते होनानसोटा पापम कीतो ओनाहाटी आयो. इसोटा पापमगुडा मंन्ता दाना परिनाम हामुरे. नना मीकुन इसोटा पापमताहाटी पेनदुन तल्कागोम इंचेके हिल्ले.

17 अन्नि करब कबाहक पापमे आंदु. गानि अन्नि पापालक हामुरताहेके ओयो.

18 मनाकु एरपाट, बोरयते पेनदा मरिं आतोर, ओर पापम किय्योर. पेनदा मरिं ओना कापाळांतोर. आ देय्यम ओना बतल किया पर्रो.

19 मनाकु एरपाट मनम पेनदा हेंदोरम आंदुम. पूरा दुनिया आ देय्यम कय्दे मंता.

20 गानि मनाकु एरपाट मंता, पेनदा मरिं वासि, मनम निजम पेनदुन एरपाट कियागोम इंचि मनाकु तेल्वि हीतोर. बारित्ते मनम निजम पेनदुन एरपाट कियागोम इंचि. इत्ते, मनम पेनदा मरिं येसु किरिस्तुनलोप्पो मंतोम. पेनबाबाले निजम पेन आंदुर आनि बस्केळ्क पिस्सना पिस्वर ओरे आंदुर.

21 पिलाल्कुनिटा! मिमेट्ट मूर्तिनाल लक्कु मंट्ट.

2 योहान योहान रासता रौंडो सिट्टि

इद सिट्टिता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

येसुन नम्मुकुत्ता विस्वासुल्लुकु बद सत्तेमतुन पीसि ताकाना? येसु किरिस्तु मनकना रूपमते पुट्टिसि वायाहिल्लोर इचि वेहानोर वेल्लेन मदि मंतुर. अय्ते ओरागटाल बल्हा जेगर्ता मंदगोम? मनम कीता विस्वासमता पलम पुरागा दोर्कनदाका मुन्ने बल्हा पिस्साना? तप्पुड बोदां कराहना गुल्लुकुन एरपाट कीसि, ओरा बोदानाल लक्कु मनना. इसोटा पोल्लेना बारेमते योहान इद सिट्टिते रासतो.

बगा बतल मंता

जोहार आनि परिचयम 1-3

पावरम कियमळ बारेमता पोल्ले 4-6

तप्पुड बोदां कराहनोरागटाल जेगर्ता मंतु 7-11

आकिरता बोदां 12-13

वरोंक-वरोर पावरम कियमळ बारेमता पोल्ले

1-2 नना मीवा कलिसियाते बेस पोरोल होता मनकन आंदुन. पेन परता बाई आनि दाना पिलालकुंक,* इद सिट्टि रासेके मंतन. नना मीकुन पावरम कीतन. नना वरोने आयो, पेनदा सत्तेमतुन तेल्लिचकुत्तोर अंतोरे मीकुन पावरम कीतुर. बारित्ते, मनम सत्तेमतुन तेल्लिचकुत्तोम. अदुनहाटी अद सत्तेम मना पिस्वरतगा निल्लिस मंता आनि बस्केळ्ळे अद मनातोनि मंता.

3 पेनबाबानहेंदाल आनि पेनबाबाना मरि येसु किरिस्तुनहेंदाल कुर्पा, दया, साति इव सत्तेमते आनि पावरमते बस्केळ्ळक मनातोने मन्निकांटी.

4 पेनबाबाल मनाकु हीता आदेस परकारम, नीवा इच्चुर पिलाल्क, सत्तेमते ताकानदुन ह्ळसि नाकु वेल्लेन कुसि आसेके मंता.

5 अय्ते बाई! नना मीकु बतल विनंति कीसेके इत्ते, मनम वरोंक-वरोर पावरम कियाना. इदु पूना आदेस इचि नना मीकु रासेक हिल्लेन, गानि मुन्नेटाल मनगा मत्तादे आंद.

6 मिमेट सुस्त्रनाल बतल अय्ते कैजतिरो, अल्हेने वरोंक-वरोर पावरम कीमट्टु इचि पेन आदेस हीता. आ आदेसकुना परकारम ताकमळे पावरम कियमळ आंद.

तप्पुड बोदां कराहनोरागटाल जेगर्ता मंतु

7 येसु किरिस्तु मनकना रूपमते पुट्टिसि वायाहिल्लोर इचि वेह्चि पसांचनोर वेल्लेन लोकुल्लक इद दुनियाते पेयसतुर. इसंतोरे ह्ळ्ळा! पसांचनोर आनि किरिस्तुना पगातोर्क.

8 मोमोट कीता कबाहक, मीहेंदाल एतम आयाकोटा ह्ळकुंट. कीता कबाहकुना पुरागा इनम दोर्कानादाका जेगर्ता मंत.

9 किरिस्तु कराहता बोदा परकारम ताकाकोटा बोर अय्ते मुन्ने-मुन्ने दांतोर, ओर पेनतोनि कलिया हिल्लोर. गानि बोर अय्ते किरिस्तु कराहता बोदा परकारम ताकंतोर, ओनतोनि पेनबाबाल, मरि इच्चुरगुडा मनांतुर.

10 ओक्कला बोरन्ना मिहगा वासि, किरिस्तु कराहता बोदा तप्पा वेरे बोदा कराहनय्ते, ओन मी लोता लोपो वाया हियमट्टु, इंका ओन्क जोहारगुडा कियमट.

11 बारित्ते, बोर अय्ते असंतोन हेरा हीतोर, ओर ओना तप्पुड कबाहकुने कलियसि मत्तोना लेक्काते वांतोर.

आकिरता जोहार

12 इंका वेल्लेन पोल्लें मीहाटी रासाना इचि नावा मनसु मंता. गानि अबुन नना साइते कायदोमपोर्रो रासोन. बारित्ते, मिहगा वासि मीकुन कलियसि, मीतोने अन्नि पोल्लें वळ्ळकाना इचि मनसुने आसे पडसेक मंतन. अस्के मना कुसि इत्तदगुडा पुरागा आंता.

13 पेन परता मीवा अक्कना पिलाल्क, † मीकु जोहार वेहासेक मंतुर.

* 1:1-2 पेन परता बाई आनि दाना पिलालकुंक दीना अर्तम पेन परता कलिसियातोर. योहान इद सिट्टि इदे कलिसियाकु रासतोर. † 1:13 पेन परता मीवा अक्कना पिलाल्क योहान इदे कलिसियाताल इद सिट्टि रासि लोहातोर.

3 योहान योहान रासता मूडो सिट्टि

इद सिट्टिट्ता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

अद कालमते तप्पुड बोदां कराहनोर वेल्लेन मंदि वासि कलिसियातुन पाड किय्युंदुर. गानि अक्टेटाल इच्चुर सत्तेम बोदां कराहनोरगुडा मत्तुर. अय्ते कलिसियाते पेद्दा इंचि निल्ला मनकल, कलिसियाता कळमातोर्कुन आनि पलाताल कलिसियाते वायाना हेडमितोर्कुन बल्हा हळकुनना? इदुना बारेमते योहान रासतोर. तप्पुड बोदानोर्कुन एरपाट कीसि ओरागटाल लक्कु मनना आनि सत्तेम बोदां कराहनोर्कुं सहायम कियाना, इल्हा अंतोर्कुनगुडा कलिसियाता पेद्दा मनकल बेस हळकुनागोम इंचि योहान इद सिट्टित्ते रासतोर.

बगा बतल मंता

जोहार आनि परिचयम 1-4

गयेसुंक जोहार वेहमळ 5-8

दियुतिरपेसना बारेमते 9-10

देमेतिरयुसना बारेमते 11-12

आकिरता बोदां 13-15

योहानुनाहेंदाल गयेसुंक जोहार

1 नना योहानुन, कलिसियाते बेस पोरोल होल्ता वरोन मनकन आंदुन. नना बोन अय्ते निजमते पावरम कीतन आ गयसुंक इद सिट्टिट् रासेक मंतन.

2 पावरमगल्ला दंतातोना! निमे बक्त्तिते पेनतोनि बल्हा बेस मंचंतिनो, आन्नि पोल्लेनेगुडा निमे अल्हेने मन, नीकु बदे रोगम वायाकॉटा निमे बस्केळ्ळक सुकमते मनना इंचि नना पारतना कीसेके मंतन.

3 बारित्ते, गयसु निजमे सत्तेमते ताकसंतोर इंचि इच्चुर दादालोर निहागटाल वासि, नीवा बारेमते गवाइ वेहतुर. अदुन केंजसि नाकु वेल्लेन कुसि आता.

4 नावा पिलाळ्क सत्तेमते ताकसेक मंतुर, इत्ता पोल्ले नाकु वेल्लेन कुसितुन हीता. दीनकु तप्पा इंका बद्दे पोल्ले केंजसि नाकु इच्चोन कुसि आयो.

5 पावरमगल्ला दंतातोना! निमे एरपाट कियवोर निहागा वायिनागानि, वाता दादालोराहाटी निमे बतल अय्ते कीतिनो, अद निमे वेल्ले विस्वासमतोनि कीतिन.

6 ओर दादालोर नीवा पावरमता बारेमता गवाइ कलिसियाते वेहतुर. पेनदा लोकुळ्कुन बल्हा अय्ते साल्ता कीतुरो अल्हा, निमे ओरा सेवा कीसि साल्ता कियानय्ते, नीवाहाटी इंका बेस मंता.

7 बारित्ते ओर किरिस्तुना सेवाहाटी पेय्तुर आंद. विस्वासम कियवोराहेंदाल ओर बतले सहायम येतुर.

8 असोटा मनकालोर्कुंक मनम सहायम कीसि ओर्कुन बेस हळना. अस्के मनमगुडा सत्तेमताहाटी कबळ कियानोरा लेक्काते वांतोम.

दियुतिरपेस आनि देमेतिरयुस

9 नना कलिसियातोर्क उंदि सिट्टिट् रासि लोहतन. गानि कलिसियाते पेद्दा आयालय हळना दियुतिरपेस इनानोर नना वेहानदुन ओंक्कुचेक हिल्लोर.

10 अचोने आयका, कलिसियाते पूने वायाना विस्वासुळ्कुन ओर अय्ते बेस हळोर आनि हळकुंतोम इनानोर्कुनगुडा बेस हळ्हा हिय्योर. इंका बोर अय्ते बेस हळकुंतुरो ओर्कुन कलिसियाताल पलाते पेच्हांतोर. मावा बारेमते कराब-कराब पोल्ले वळ्ळंतोर, अदुनहाटी नना बस्के अय्ते वांतन, अस्के ओना बारेमते कलिसियाते अंतोर्क वेहांतन.

11 पावरमगल्ला दंतातोना! निमे ओनालेसी कराबता जोलिक होन्मा, सिराप बेस बतल अदे कीसेके मन. बेसता कबाहक कियानोर पेनदा मनकल आंदुर, सेड्डा कबाहक कियानोर पेनदा मनकल आयोर.

12 देमेतिरयुसना बारेमते अंतोरगुडा बेसतोर इंचि गवाइ वेहांतुर. पेनदा सत्तेमते ताकतोर इंचि सत्तेमता नदरतेगुडा ओर बेस मनकल आंदुर. ओर बेसतोर इंचि ननागुडा गवाइ हीतन, नावा गवाइ सत्तेम इंचि मीकु अय्ते एरपाटे मंता.

आकिरता जोहार

- 13 नीकु वेहालय नहगा इका वेल्लेन पोल्ले मंतां, गानि साइतोनि ई कायदोमते रासमळ नाकु इस्टम हिल्ले.
- 14 बिरानेन नीकु कलियना इंचि नना आसे पडसेक मंतन. कलियतस्के, मनम मोकोम मुन्नेन वळ्ळुकुनकोम.
- 15 पेन बाबल हिच्यना सांति बस्केळ्ळक नीतोनि मन्निकांटी. इग्गेटा नीवा दंटागाहक नीकु जोहार वेहासेक मंतुर. अगा मनना अंतोर दंटागाह्ळुकुं पोरोल येत्सि नावा जोहार वेहा.

यहदल यहदल रासता सिट्टि

इद सिट्टिता बारेमते गिचचो परिचयम

रासतोना पोरोलः यहदा

रासता कालमः इसवि सन 70-80

इद पुस्तकमतुन याकोबना तम्मुर यहदल रासतोर. येसु किरिस्तुना तम्मुरकुनाल ईर वरोर तम्मुर आंदुर.

उंदि मल्का पेनदुन विस्वासम कीता पजा पापम किथिना बतल आयो इंचि अगाटा आबदुदम कराहना गुस्लक विस्वासुलकुंक करहुंदुर. अदुनहाटी यहदल विस्वासमतुन कापाळनाहाटी आबदुदम कराहनोरा विरोदमते इद सिट्टि रासतोर.

बगा बतल मंता

जोहार आनि परिचयम 1-2

तप्पुड बोदां कराहनोरा नासडेम बारेमते कोन्नि पोल्लें 3-16

विस्वासमते गट्टिगा मनालय केयमळ 17-23

आसिर्वाद आनि दन्यवाद 24-25

जोहार

1 नना यहदुन, येसु किरिस्तुना सेवकुन आनि याकोबुना तम्मुर आंदुन. पेनबाबाल मीकुन केयिस पावरम कीतोर आनि येसु किरिस्तुना कय्दे कापाळसेक मंतोर, मी अंतोर्क नना जोहार कीतन.

2 मीक दया, सांति, पावरम वेल्लेन दोक्किंकाटी.

सत्तेमतुन कापाळमळ

3 पावरमगल्लोरिता! मनाक अंतोर्क दोर्कता मुक्तिता बारेमते मीकु रासाना इंचि इनकुंचेके मत्तन, गानि इंदके विस्वासमता बारेमते रासि दाना सत्तेमतुन कापाळनाहाटी मीक तेळियागोटसि वेहाना इंचि नाक अस्वरम अनपिस्ता. ई सत्तेमतुन पवित्र लोकुलकुंक बस्केळताहाटी उंदे मल्का हियमळ जर्गता.

4 बारित्ते चुपचाप इच्चुर लोकुलक मीलोपो होळियतुर, ओर पेनदा बक्तुलक आयूर. ओर पेनदा कुर्पातुन बिगडांचि पापमता कबाहक क्रियानाहाटी मना वरोर मालक सामि येसु किरिस्तुन ओप्कुन्नुर. असंतोर्क सिक्सा आंता इंचि मोदाटाले दर्मसास्त्रमते रासि मंता.

5 मीक इवन्नि पोल्लें मोदाटाले एरपाट मंतां, अयनागानि इव पोल्लें मीक मति कीसि हीतन इंचि इनकुंचेके मंतन. पेन दाना लोकुलकुन इजिप्त देसेमताल पेचाहता पजा बोर अय्ते दान विस्वासम क्रिया हिल्लुर, ओर्कुन नासडेम कीता.

6 अचोने आयाका, बवय्ते पेनदा दूतां अवनुना अदिकारमता जेगान इर्ग हिल्लें, अल्हेन अव जेगान होळ्सीतां, पेन अवुनगुडा न्यायम क्रियाना रोजुनहाटी हीकटते बस्केन नेम्मुवा गोल्सुलकुने दोहचि इर्ता.

7 अल्हेने सदोम, गमोरा सहरतोर, अल्हेन पकापीसि मत्ता सहरकुनोर व्यबिचारम कीतुर आनि परायतोर पज्जो अर्सि मत्तुर. इद उंदि उदाहरनलेसीं, ओर बस्केळक पोतना तळमिंते सिक्सा बोगांचेक मंतुर.

8 अल्हेने कलां* हळना लोकुलकगुडा मेंदुलतुन पापमते अरहंतुर, पेनदा अदिकारमतुन हय्सुर आनि स्वर्गमकु संबदिचि मत्तोर्कुना अपमानम कीतुर.

9 गानि पेनदा पेदुदा दूता मिकायेलगुडा बस्के अय्ते मूसाना पीनगुना बारेमते देय्यमतोनि लोल्लि कीता, अस्के अदुन बतले अपमानम आयानसोटा पोल्लें इना हिल्ले गानि, “पेने नीकुन तेरहिंकाटी” इंचि सिराप इचोने इता.

10 ई लोकुलकुंक बव पोल्लें अय्ते तेळियों अवनुन हय्सुर, गानि बुदिद हिल्ला जिवासािनलेसीं बव पोल्लें अय्ते ओर्क तेळियंतां अवनुनहेंदाले ओर नासडेम आंतुर.

11 अय्यो, बच्चोर गोसा आया! बारित्ते ओर काइन ताकता हर्दे ताकतुर, पायदाताहाटी बिलाम इनानोर कीता तप्पु कीतुर आनि कोरह बल्हा विरोद कीसि नासडेम आतोर, अल्हे ईरगुडा नासडेम आंतुर.

12 ईर, मिमेट कलियसि-मेलियसि तिदना बोजनालकुन हेळाहनोर आंदुर, इंका मीवातोनि उदिदिस सिग्गु हिलाकांटा तिचि पीर निहकुंतुर. ओर वळितोनि वित्ताना मब्बुनसंतोर आंदुर. आकि रालाना कालमते कायां हिलाका रौडु मल्कां हासि पीकिसि पोहता मराकुनसंतोर आंदुर.

* 1:8 कलां मनसुने इनकुनमळ गुडा कलागे आंदु.

13 ओर, समुद्रमता तडाने एतपोर्रो तेलाना कराब पोंगुरतालेसी सिग्गु हिल्वा कबाहक कियानोर आंदुर. ओर हरि तप्पि तिरियना सुक्कानसंटोर आंदुर. ओराहाटी बस्केन मारवा हिर-हीकट तयार कीसि मंता.

14-15 आदामनगटाल एडुंगो पीळितोर हानोक इनानोर ईरा बारेमते इल्हा बविस्वयानि कीतोर, “हळा, सामि वेय्कुना पवित्र लोकुकुनतोनो अंटोरा न्यायम कियालय वांतोर. ओर अंटोर बक्ति हिल्वा लोकुकुल ओर कीता अन्नि तप्पुड कबाहकुनाहाटी अल्हेन बक्ति हिल्वा पापि लोकुकुल सामिक विरोदमते वळकतव अन्नि पोल्लेनाहाटी ओर्क सिक्सा हियमळ जर्गता,” इंचि वेहतोर.

16 इसोटा लोकुकुल गुल्गसेक मनानोर, नसीब बरोबर हिल्ले इनानोर, ओरा इच्चां मत्ताप ताकानोर, पेद्दिदरकेम पोल्ले वळकानोर, सतता पाय्दाताहाटी तिय्यटा पोल्ले वळकानोर आंदुर.

विस्वासमते गट्टिगा मनालय केयमळ

17-18 पावरमगल्लोरिता! मना सामि येसु किरिस्तुना प्रेरितुल्लकु मीवातोन मुन्ने, “आकिर वेलाते बक्ति हिल्वा इच्चां मत्ताप ताकानोर, मीकुन सिडांचंतुर,” इंचि वेहतुर, इव पोल्लेन मिमेट मति कीम्टु.

19 ई लोकुकुल मीलोप्पो वरोनद-वरोक अर्काकोटा कीतुर, ईरा मनसुक वाताप ताकंतुर, ईरा लोप्पो पेनदा आत्मा हिल्ले.

20 गानि पावरमगल्लोरिता! पवित्र आत्माते पारतना कीसेके वेल्ले पवित्र विस्वासमते मीवद मिमेट बेसेक होंटु.

21 बस्केळक मनना पिस्वरताहाटी मना सामि येसु किरिस्तुना दयाता आसेते एदुर हळसेक पेनदा पावरमते निल्सि मंट.

22 बोर अय्ते विस्वासमतुन अनमानम कीतुर, ओरापोर्रो दया कीम्टु.

23 तळमिताल इग्गिस पिस्सागोटताप इच्चुकुन पिस्सागोट आनि वेल्लेटोरा पोरो वेंरैतोन मिमेट दया कीम्टु. गानि मेंदुल्ले कियाना पापालकुन मिमेट हय्समत.

24 पेन मीकुन तप्पुळ बोदानाल हिळ अर्काकोटा कापाळसि, दाना महिमाता मुन्ने आनंदमते आनि दोसेम हिलाकोटा निल्हा परांता,

25 अद उंदे पेनदुक, मनाकु मुक्ति हियानोर सामि येसु किरिस्तुनाहेंदाल, महिमा, पेद्दातनम, ताकत, अदिकारम मुन्नेटा कालमते मत्ताप इद कालमते आनि युगा-युगालकुनदाका मन्निकांटी, आमीन.

पेन हूपिस्ता पोल्ले योहानुंक पेन हूपिस्ता पोल्ले

इद पुस्तकमता बारेमते गिचचो परिचयम

रासतोना पोरोल: योहान

रासता कालम: इसवि सन 96

इद पुस्तकम येसु सामिना वरोर सिस्सुड योहान रासतोर. येसुन नम्मूताहाटी ओन पतमोस दीबिते मनना जेलने वाटतूर. ओर जेलने मननेकेन, वायाना कालमते जर्गाना पोल्ले येसु सामि ओन्कु हूपिस्तोर. अवे पोल्लेन योहान ई पुस्तकमते रासतोर.

अद कालमते लोकूलक येसुनपोर्री विस्वासम कीताहाटी, रोम सरकार वेल्ले तकलिप हियुंद, गानि कस्टालक, तिप्पलक अयते वायनुंगे, अयना बोर अयते आकिरदाका विस्वासमते गट्टिगा निल्सि मनांतोर, ओन्के पिस्वरता इनाम दोर्कता, इल्हा वेहचि येसु सामि आ तकलिपते मत्ता विस्वासुल्कुना विस्वासमतुन गट्टिगा कीतोर. येसु सामि मर्रा मल्सि वायानादाका बोर अयते विस्वासमते गट्टिगा मन्तूर, ओर्क पूना बूमि, पूना मब्बु, पूना येस्सलेम दोर्कता इंचि येसु सामिनाहेंदाल योहान ई पुस्तकम रासतोर.

बगा बतल मंता

जोहार आनि परिचयम 1:1-8

एडुं कलिसियानोर्क रासता सिट्टिं आनि अबुना मुक्य उद्देसम 1:9-3:22

एडुं सिक्कां तंचि मत्ता पुस्तकम 4:1-8:5

एडुं तूताकोम्कु 8:6-11:19

मासुल तरास आनि रोंडु जिवरासिं 12:1-13:18

तीराता दर्सनालक 14:1-15:8

पेनदा होंगुना एडुं वाटिं 16:1-21

बेबिलोनता नासडेम आनि देय्यमता ओडुमळ 17:1-20:10

आकिरता न्यायम 20:11-15

पूना स्वर्गम, पूना बूमि, पूना येस्सलेम 21:1-22:5

आकिरता बोदां 22:6-21

योहानुंक पेन हूपिस्ता पोल्ले

1 इव पोल्ले, वायाना कालमते बिरानेन जर्गानव आंदुं, इवुन येसु किरिस्तु ओना सेवाकुलकुंक वेहना इंचि पेन ओन्क अप्पजेपता. अस्के येसु ओना उंदि दूतातुन योहान इनना वरोन सेवाकुनगा लोहचि, ओन्क रासालय वेहतोर.

2 अस्के ओर पेनदा पोल्लेता बारेमते, येसु किरिस्तुना गवाइता बारेमते आनि ओर हळता अनि पोल्लेना बारेमते गवाइ वेहतोर.

3 पेनदाहेंदाल वाता ई वायाना कालमते जर्गना पोल्लेन बोर अयते हदवंतूर, केंजांतूर आनि अव्ते रासि मत्ता परकारम ताकंतूर ओर आसिवांद दोर्कतोर आंदूर. बारित्ते इव पोल्ले जर्गना वेला दग्गेर्क एवता.

योहान येसुना पोल्लेन एडुं कलिसियानोर्क वेहांतोर

4-5 आसिया राज्येमते मनना एडुं कलिसियानोर्क नना योहानुन बतल रासेक इत्ते, इंदके मनानद, मोदोलताल मत्तद आनि मुन्ने वायाना मंता आ पेनदाहेंदाल, दाना राजगद्देता मुन्ने मनना आ एडुं आत्मानाहेंदाल इंका विस्वासमलायक गवाइ मत्ता येसु किरिस्तुनाहेंदाल मीकु कुर्पा, सांति दोर्किंकांटी. येसु हातोरारव्टेताल जीवाते तेदता मोदाटा मनकल आंदूर. ओर ई बूमिपोर्रीटा राजालोरा राजाल आंदूर. मना अंटोर्कुन पावरम कियानोर आंदूर, इंका ओना नेल्लुरतुन पोंगागोटसि मनाकुन मना पापालकुनाल पाय्स्तोर.

6 मना पेनबाबाना पेद्दातनम, अदिकारम बस्केळक मननाहाटी ओर मनाकुन पेनदा राज्येमतोर आनि पेर्मालोर्क कीतोर. आमीन!

7 हळटाट, येसु किरिस्तु मब्बु तेर्पेतोनि वासेक मंतोर. अंतोर ओन हळानुर. ओरव्टे ओन कोहकतोरगुडा मंदानुर. दुनियातोर अनि बंसाल्कुना लोकूलक सातितुन तंचेके दुक्कम कियानुर. हो इल्हे आयार आमीन!

8 “ननाने अल्पा आनि ओमेगा* आंदुन. ननाने मोदाटोन, इंदके मनानोन, मर्ना वायानोन आनि अन्निटकन्ना सक्तिमंतुनगुडा ननाने आंदुन” इंचि पेन इत्ता.

किरिस्तुना दर्सनम

9 नना योहानुन मीवा दादान आंदुन. येसु बोगांसाता तिप्पल्कुने, राज्यमते आनि ओपेके पियमळते मीवातोनि दंटाते मंतन. नना पेनदा पोल्ले आनि येसुना बारेमते गवाइ वेहताहाटी पतमोस इनना दीबेत्ता बंद कीसि मंतन.

10 सामिना रोजुननाड, इत्ते अयतारम, नना पवित्र आत्माते निडिस मत्तन. नावा पज्जो तूताकोमता आवाजनसोंटा पेद्दा आवाज केंजावाता.

11 “निमे बतल अयते हळ्ळांतिन अदुन पुस्तकमते रासि, इपीसि, स्मुरना, पेर्गमम, तुयतीरा, सरदिस, पिलाडेलपिया आनि लोदिकिया इव एडुं कलिसियानोर्क लोहचीम” इंचि इत्ता.

12 अस्के, नातोनि बोर वळकसेक मंतोर इंचि हळ्ळालय पज्जो तिरियसि हळ्ळतन अयते, नाक बंगारमता एडुं दीसोडिं दिसतां.

13 अव एडुं दीसोडिन नड्डुम वरोर मनकना रूपमते पुटतोर मत्तोर. ओर पोडगु कपडि केरसि मत्तोर ओना सातिक बंगारमता पट्टा दोहचि मत्ता.

14 ओना तल्ला, ओना केल्लक तेल्ला गोर्रता बुरालेसी, बर्पुनलेसी तेल्लगा दिस्सेक मत्ता. ओना कळ्ळक तळमिता वेल्युनलेसी मत्तां.

15 ओना काल्क कोल्मिते वाटसि एर्गा आता इत्तोळ्ळेसी मेर्सेक मत्तां. ओना लेंग समुद्रमता वेल्लेने एता तळालेसी मत्ता.

16 ओर ओना तिना कय्दे एडुं सुक्कान पीसि मत्तोर. ओना तोळ्ळाल रौडु बाजुकुंक आयदार्क मत्ता कसेरलेसी पेय्सेक मत्ता. पियल आतस्के पोळ्ळु बल्हा मेर्सा अल्हा ओना तोड्डिं मेर्सेक मत्ता.

17 बस्के अयते ओन नना हळ्ळतन, अस्के नना हाताप आसि ओना काल्कुनगा अरतन. अस्के ओर ओना तिना कयदुन नापोर् इरसि, “निमे वेरियमा सुख आनि आकिर ननाने आंदुन, नना पिस्सि मंतन.

18 नना अयते हासि मत्तन गानि हळ्ळा, इंदके नना बस्केळ्ळाहाटी पिस्सि मंतन. हामुर आनि नरकमता चाबि नहागेन मंता.

19 निमे इद्वेरादाका हळ्ळाता पोल्लें, बव अयते जर्गसेक मंतांगो आनि मुन्ने जर्गानव अन्नि पोल्लें रासि इर्वा.

20 निमे नावा तिना कय्दे हळ्ळाता एडुं सुक्कां आनि बंगारमता एडुं दीसोडिना मर्ममता अर्तम इल्हा मंता; एडुं दीसोडिं इत्ते एडुं कलिसियां आंदु आनि एडुं सुक्कां इत्ते, उंदि-उंदि कलिसियाता उंदि-उंदि द्ता आंदु” इंचि इत्ता.

2

इपीसि कलिसियातोर्क पेनदा पोल्लें

1 इपीसि सहरता कलिसियाता दूताक इल्हा रासा. बोर अयते ओना तिना कय्दे एडुं सुक्कां पीसि मनांतोर, आनि बंगारमता एडुं दीसोडिन नड्डुम तिरियंतोर इव ओना पोल्लें आंदु.

2 निमे कियाना कबाहक, नीवा मेहनत आनि ओपेके नाक एरपाटे. अल्हेने निमे सेड्डा लोकल्लुकुन हय्सिन आनि बोर अयते “नना प्रेरिते” इंचि इनकुंतुर गानि ओरा परिकसा एतत्सेक ओर नीकु आबदुदम वळ्ळकतद दिसतुर.

3 निमे ओपेके पीसि मनांतिन. नावा पोरोलहाटी तकलिप अरसेक मंतिन गानि तकांचा हिल्लिन इंचि नाक एरपाटे.

4 गानि नीवा विरोदमते नाकु उंदि पोल्ले मंता. अद बतल इत्ते, निमे मुन्ने नाकुन बल्हा पावरम किथिदिनो अल्हा इंदके कीसेक हिल्लिन.

5 निमे बद परिस्तितीते अयते अरतिनो अदुन मति कीम. मनसु मार्सकुंचि मुन्ने कीता कबाहकुन मर्ना कीम. निमे गिंटा मनसु मार्सकुनाकुंते नना वासि नी वेडसितुन अद जागाताल तेंडसि पोहांतन.

6 अथना नी लोपो इद उंदि बेसता पोल्ले मंता अद बतल इत्ते, निमे निकोलिया लोकल्लुकुना कबाहकुन हय्सिन, अबुन ननागुडा हय्सोन.

7 पवित्र आत्मा कलिसियातोर्क बतल वेहांता अदुन, केळ्ळक मत्तोर बेस केंजिर. बोर अयते गेल्लांतोर नना ओन्क स्वर्गमते पेनदागा मनना पिस्वरता मराता पडि तिनालय हीतन.

स्मुरनाता कलिसियातोर्क पेनदा पोल्लें

8 स्मुरना सहरता कलिसियाता दूताक इल्हा रासा. बोर अयते मोदोल आनि आकिर आंदुर, बोर अयते हासि मर्ना जीवाते तेदतोर ओर बतल इंतोर इत्ते,

* 1:8 अल्पा आनि ओमेगा ग्रीक बासाते अल्पा सुखना अक्सरम आनि ओमेगा आकिरता अक्सरम आंदु.

9 “नीवा तिप्पल्क आनि गरिबतनम नाकु एरपाटे. (गानि निमे सिरमंतुने आंदिन) बोर अय्ते नीवा अपमानम कीतुर, मोमोटे यहदिल्क आंदुम इंचि इंतुर, गानि असल ओर आयूर. ओर देय्यमता दर्मसास्त्रम कराहना लोतुर आंदुर.

10 बव तिप्पल्क अय्ते नीकु वायानव मंतां अबुना बारेमते निमे वेरियमा. हुळाट! देय्यम मी अळेटाल इच्चुर लोक्कुलकुन जेलने वाटंता, मीवा विस्वासमता परिकसा पतालय अल्हा जगार. मीकु पदि रोजकु तिप्पल्क अरंपीता. हायाना वेला वायिनागानि मिमेट विस्वासमते गट्टिगा मंट. अस्के मीकु पिस्वरता किरिटेम हीतन” इंचि इत्ता.

11 पवित्र आत्मा कलिसियातोरक बतल वेहांता अदुन, केळ्क मत्तोर बेस केंजिर. बोर अय्ते गेल्सांतोर ओन्क रोंडो हामुरताहेंदाल बतल नुकसान आयो.

पेर्गममता कलिसियातोरक पेनदा पोल्लें

12 पेर्गममता सहरता कलिसियाता दूताक इल्हा रासा. बोर अय्ते रोंडु आयदार्कुना कसेर पीसि मनांतोर ओर बतल इंतोर इत्ते,

13 बगा अय्ते देय्यमता राजगदूदे मंता अग्गेन निमे मनातिन इंचि नाकु एरपाटे. अयना ना पोरोलते निमे निल्सि मतिन. नावा विस्वासमगल्ला सेवक अतिपान मीवा नड्डुमे देय्यम मनना जेगाते हळ्कतुर, अव रोजकुनेगुडा निमे नावा पोर्गोटा विस्वासमताल पजोळ्क होना हिल्लिन.

14 गानि नीवा विरोदमते नाकु कोन्लि पोल्लें वेहनद मंता. इस्राएल लोक्कुलकुन हिड अरहानाहाटीं बिलाम इनना कबुरतोर बालाक इनना राजांक बतल अय्ते कराहलोरो, अबुन पीसि ताकानोर मीवा नड्डुम मंतुर. बोम्मांक मोळ्कता वस्तुकुन तिनगोम, बोगमतनम कियगोम इंजि बिलाम करहंदुर.

15 अल्हेने मीलोपो इच्चुर लोक्कुलक निकोलियातुरा करहाताप ताकानुर मंतुर, ओर्कुन ननागुडा हय्सोन.

16 अदुनहाटीं मीवा मनसु मार्सकुंट. इल्हा कियाकॉटे नना बिरानेन मिहगा वासि, ना तोळ्दा कसेरतोने ओरतोनि लडाइ कीतन.

17 पवित्र आत्मा कलिसियातोरक बतल वेहांता अदुन, केळ्क मत्तोर बेस केंजिर. बोर अय्ते गेल्सांतोर ओन्क मक्किचि इरता मन्ना आनि उंदि तेल्ला बंडा हीतन. आ बंडापोर्गे उंदि पूना पोरोल रासि मंता अद बोन्क अय्ते दोकार ओन्के तेळियार.

तुयतीराता कलिसियाता दूताक पेनदा पोल्लें

18 तुयतीराता सहरता कलिसियाता दूताक इल्हा रासा. बोना कळ्क अय्ते पोततना तळ्मिलेसी मंतां, काल्क कोल्मिटे काचाहता इत्तोडिलेसी मंतां आ पेनदा मर्री इल्हा वेहांतोर:

19 निमे कियाना कबाहक, ना पोर्गोटा नीवा पावरम, विस्वासम, निमे कियाना सेवा, तिप्पल्कुने नीवा ओप्के, इव अनि नाकु तेळियसे. नीवा सुम्बना कबाहकुक्कन्ना इंदकेटा कबाहक एक्को बेस मंतां.

20 गानि नी विरोदमते नाकु उंदि पोल्ले वेहानद मंता. जेजेबेल इनना मुरहतव, नना पेनदा कबुरतदुन इंचि वेहकुचेके नावा सेवाकुलकुंक, बोम्मांक मोळ्कता वस्तु तिनगोम, बोगमतनम कियगोम इंचि कराहचि ओर्कुन पसांचेके मंता. असोंटा मुर्तादुन निमे निहगा मना हीसंतिन.

21 मनसु मार्सकुननाहाटीं नना दानकु मोका हीतन, गानि बोगमतनमताल मनसु मार्सकुनालय दाना इच्चा हिल्ले.

22 अय्ते हुळाट! नना दानु कटुल पिया गोदंतन, दानतोनि बोर अय्ते बोगमतनम कीतुर ओरगुडा असोंटा कबाहकुनाल मनसु मार्सकुनाकुंटे ओर्कुन बागा तिप्पल्कुने अरहंतन.

23 अद कराहता पोल्लेन पीसि ताकाना दाना पिलाल्कुन नना हळ्किसि पोहंतन. अस्के, बुदिदतुन आनि मनसुन एरपाट कियानोन ननाने आंदुन इंचि अनि कलिसियातोरक तेळियार. पजा मीकु वरो-वरोंक मिमेट कीता कबाहकुन पीसि, इनाम हीतन.

24 गानि तुयतीराते अद कराहताप ताकवोर कळ्मतोर मिमेट बोर अय्ते विस्वासिर मतिरो, मीक नना बतल वेहांतन इत्ते, मिमेट देय्यमता लोप्पोटा मर्ममतुन एरपाट किया हिल्लिर अदुनहाटीं नना मीपोर्गे इंका बर्वु वाटोन.

25 नना मल्सि वायनदाका सिराप मिहगा मनना विस्वासमतुन गट्टिगा पीसि मंट.

26 बोर अय्ते गेल्सि आकिरदाका नावा कबाहकुन कीतोर ओन्क नना अनि दुनियाता अनि देसेल्कुना लोक्कुलकुनपोर्गे अदिकारम हीतन.

27 कुम्मल कीता अळ्कन कच्चिता दुड्डुने तुकडां-तुकडां कीताप लोक्कुलकुनपोर्गे ओर राज्येम कीतोर. बाबानाहेंदाल नाकगुडा इसोंटेदे अदिकारम दोर्कता.

28 अल्हे ननागुडा ओन्क हक्केटा सुक्कातुन हीतन.

29 कलिसियातोरक पवित्र आत्मा बतल वेहांता अदुन, केळ्क मत्तोर बेस केंजिरकांटी.

3

सरदिसता कलिसियातोरकं पेनदा पोल्ले

1 सरदिस सहरता कलिसियाता दूताक इल्हा रासा. बोनगा अय्ते पेनदा एडुं सुक्कां आनि एडुं आत्मां मंतां ओर बतल इंतोर इत्ते, निमे क्रियाना कबाहक नाकु एएपाटे; नीवद निमे “जीवाते मंतन” इंचि इनकुंचितिन गानि असल इत्ते निमे हासि मंतिन.

2 निमे तेल्विते मन, पेनदा मुन्ने नीवा कबाहक पुरा आताप नाक दिस्सेक हिल्ले. अदुनहाटी, मथ्से मत्ता कबाहकुन पुरागा कीम. मायसि होनालय आता विस्वासमतुन गट्टिगा कीम.

3 अदुनहाटी केंजता बोदातुन निमे बल्हा ओफुकुत्तिनो अदुन मति कीम. मति कीसि अल्हे ताका आनि मनसु मार्सकुन. ओक्कला निमे जेगतां मनाकॉटे, नना वरोर दोंगानलेसीं वांतन, नना बद वेलाक निहागा वांतन, दाना पत्तागुडा नीकु दल्गो.

4 गानि सरदिस सहरता इचचुर विस्वासुल्क, ओरा कपडिक डाग अंटाकॉटा इरताप, ओरा ताकमळतुन बेस इरतुर. ओर तेल्ला कपडिं केरताप सत्तेमते नावातोनि ताकनुर; ओर अल्हा ताकना लायक मंतुर.

5 बोर अय्ते गेल्सांतोर, ओन्क इसांटा तेल्ला कपडिं केर्समड जगार आनि नना ओना पोरोलतुन पिस्वरता पुस्तकमताल तंचि पोहोन. अल्हेने नावा बाबाना मुन्ने आनि दूताना मुन्ने ओना पोरोलतुन ओपकुंतन.

6 पवित्र आत्मा सरदिसता कलिसियातोरकं बतल वेहांता अदुन, केक्क मत्तोर बेस केंजिरकांटी.

पिलदेलपियाता कलिसियातोरकं पेनदा पोल्ले

7 पिलाडेलपिया सहरता कलिसियाता दूताक इल्हा रासा. बोर अय्ते पवित्र आनि सत्तेमतोर मंतोर, ओर दाविदना अदिकारता चाबि इरंतोर, ओर तेंडता तल्पुन बोरें बंद क्रिया पर्रोर आनि ओर बंद कीता तल्पुन बोरें तेंडा पर्रोर, ओर बतल इंतोर इत्ते,

8 निमे क्रियाना कबाहक नाक एएपाटे, नीवा ताकत तक्को मंता गानि नावा पोल्लेता पालन कीतिन आनि नावा पोरोलतुन एतोन इंचि इना हिल्लिन. अदुनहाटी ह्ळा! नीवा मुन्ने उंदि तल्पु कुल्ला कीसि इरतन, अदुन बोरें बंद क्रिया पर्र.

9 ह्ळा! नना देय्यमता दर्मासन्त्रम कराहना लोता लोकुल्कुन निहागा वायागोटंतन, ओर “मोमोट यहुदिकं आंदुम इंचि इंतुर” ओर यहुदि आचुर गानि ओर आबदुदम वळ्कसेक मंतुर. नना ओर्कुन निहागा तायसि नीवा काल्क मोळ्का गोटांतन. अस्के नना मीकुन बचचोन पावरम कीतन इंचि ओर्कं तेळियंता.

10 निमे ओप्के पीसि नावा पोल्लेते ताकतिन अल्हेन, केंजतिनगुडा. अदुनहाटी ई दुनियाता लोकुल्कुना पट्ट ह्ळालय बतलयते परिकसा वायाना मंता, अब्बेटाल नीकुन कापाळंतन.

11 नना बिरानेन निहागा वांतन. नीवा किरिटमतुन निहागटाल बोरें गुंजा मन्नि इंचि, निहागा बतलयते विस्वासम मंता अदुन इंका गट्टिगा पीसि ताका.

12 बोर अय्ते गेल्सांतोर, ओन नना नावा पेनदा गुळिते बस्केने पलाते पेयसाकॉटा उंदि कंबालेसीं निपसंतन. नना ओनपोरें नावा पेनदा पोरोल, नावा पेनदागटा स्वर्गमताल हिल्ल वायाना पूना येस्सलेमता पोरोल आनि नावा पूना पोरोल रासंतन.

13 पवित्र आत्मा पिलदेलपियाता कलिसियातोरकं बतल वेहांता अदुन, केक्क मत्तोर बेस केंजिरकांटी.

लोदिक्रियाता कलिसियातोरकं पेनदा पोल्ले

14 लोदिक्रिया सहरता कलिसियाता दूताक इल्हा रासा. बोर अय्ते आमीन इननोर, विस्वासमगल्लोड, निजम गवाइ वेहानोर, इंका पेन तथार कीता अन्निटवुने मोदोल मनकल आसि मंतोर, इव पोल्ले ओनन आंदु.

15 निमे क्रियाना कबाहक नाकु एएपाटे, विस्वासमते निमे सल्लागा हिल्लिन गरम हिल्लिन. निमे सल्लागा हिलाकॉटे गरम मंचि मत्ते बेस आसि मनवळ.

16 निमे सल्लागा हिल्लिन, गरम हिल्लिन एचचगा मंतिन. अदुनहाटी नीकुन नना ना तोळ्दाल पलाते कक्कंतन

17 निमे अय्ते, “नना सिरमंतुन, नहागा अन्नि मंतां, नाकु बतल तक्को हिल्ले”, इंचि इनकुंचितिन. गानि नीकु इदु एएपाट हिल्ले गदा, निमे पेदुदा हेडसोत्तोन, गति हिल्लोन, गरिबोन, गुड्डिन, कुळ्कें मतिन इंचि.

18 अदुनहाटी, निमे विस्वासम लोप्पो निजम मत्ता मनकल आयानाहाटी नना नीकु उंदि उपायम वेहांतन अद बतल इत्ते, तळमिते सुदुद कीता बंगारम निमे नहागटाल एता. दानहेंदाल निमे सिरमंतुन आकिन. कुळ्कें मत्तद ह्ळसि सिगु होनामन्नि इंचि केरलिय तेल्ला कपडि नहागटाल एता. कळ्क बेस दिस्सनाहाटी कळ्कुने वाटालय मत्तु अस्सा.

19 बोन-बोन अय्ते नना पावरम कीतन, ओनकु गट्टिगा वेह्चि, सुद्रांचा गोदुदंतन. अदुनहाटी इरगा जोसुने मंचि मनसु मार्सकुन्नु.

20 ह्ळा, नना तल्पुनगा नित्तिसि तल्पुन टोक-टोक तंतस्के; बोर अय्ते ना लेंग केंजसि तल्पु तेंडांतोर, नना ओनगा लोप्पो दांतन, होंचि ओनतोनि कलियसि गाटो तितन, आनि ओर नातोनि तितोर.

21 बल्हा अय्ते नना गेल्लि नावा पेनबाबानतोनि ओना राजगद्देपोर्रो होंचि उदतन. अल्हे बोर अय्ते गेल्लांतोर ओन नना नातोनि नावा राजगद्देपोर्रो उपसंतन.

22 पवित्र आत्मा लोदिकियाता कलिसियातोरके बतल वेहांता इत्ते, केव्क मत्तोर बेस केंजिरकांटी.

4

पेन योहानुंक स्वर्गम हृपसंता

1 इव अन्नि आतस्के, स्वर्गमते उंदि तल्पु कुल्ला मत्तद नाकु दिसता. मोट्टा मोदाला नना केंजता आवाज तूताक्रोमता आवाजलेह्का मत्ता. अदे आवाज नाकुन, “निमे इगे पोरो वा, इव अन्नि आतस्के बव पोल्ले अय्ते जर्गानव मंतागो अबुन हृपसंतन,” इंचि इत्ता.

2 अस्केने नना पवित्र आत्माते निडतन. नाक स्वर्गमते राजगद्देपोर्रो बोरो वरोर उद्दिदिस मत्तद दिसतोर.

3 आ राजगद्देपोर्रो बोर अय्ते उद्दिदिस मत्तोर ओर यसब आनि मानिक इनना मेर्सना बंडालेसी दिस्सेक मत्तोर. आ राजगद्देता सुट्टु मरकत इनना मेर्सना बंडानलेसी उंदि सिंगिड दिस्सेक मत्ता.

4 राजगद्देता सुट्टु इरवै नालु राजगद्दे मत्तां. अव राजगद्देन पोरो इरवै नालुर एनकाटा पेद्दाल्क तेल्ला कपडिं केरसि उद्दिदिस मत्तूर. ओरा तल्लानपोर्रो बंगारमता किरिटाल्कु दोस्सि मत्तां.

5 आ राजगद्देताल पिडगु वाटाना वेलगु, उस्मना आवाज आनि पेद्दा लेंग पलाते पेय्सेक मत्ता. राजगद्देता मुन्ने तळमितव एडुं वेडसिं पोतसेके मत्तां. अव वेडसिं इत्ते, पेनदा एडुं आत्मा आंदुं.

6 राजगद्देता मुन्ने अदुदमतसोटा समदुम दिस्सेक मत्ता. आ राजगद्देता नड्डुम, सुट्टु नालु जीवाते मत्ता जिवरासी नित्तिसि मत्तां. अवुक पज्जो-मुन्ने कळके कळक निडिस मत्तां.

7 मोदोटा जिवरासि सिंहमतालेसी, रौडो जिवरासि कोदातलेसी, मूडो जिवरासिता मोक्रोम मनकनलेसी मत्ता. आनि नालुंगो जिवरासि गुब्बा डेगातलेसी दिस्सेक मत्ता.

8 जीवाते मनना नालु जिवरासिक हां-हां रेक्कां मंतां, अबुना मेंदुलता सुट्टु, लोप्पो कळके-कळक मंतां. अव पोद्दाला नर्का पल्ही आराम कियाकोटा उंदेतीर, “निमेने पवित्र, पवित्र, पवित्र, सामि पेनबाबाल, अन्निटकन्ना सक्तिमंतुन आंदिन. निमेने मुन्नेटाल मत्तिन, इंदके मंतिन, मुन्नेगुडा मनांतिन” इंचि इंचेक मत्तां.

9 बस्के अय्ते अव नालु जिवरासी, राजगद्देपोर्रो उद्दिदिस मत्ता बस्केळक जीवाते मनना पेनदा स्तुति, महिमा, दन्यवाद कीर्तां,

10 अस्के ओर इरवै नालुर पेद्दाल्क पेनदा मुन्ने टोंगरां ऊनसि ओरा तल्लानपोर्रो मत्ता किरिटाल्कुन हिळु ईर्सिं,

11 “निमेने ई दुनियाता अन्नि वस्तुक तयार कीर्तिन, इव अन्नि नीवा इच्चा परकारम तयार आतां. नीवा इच्चा परकारमे मंतां, निमेने मावा पेन, मावा सामिन आंदिन. महिमा, स्तुति आनि ताकत नीवदे आंदुं,” इंचि इंतूर.

5

एडुं सिक्कां तंचि हृटसि मत्ता पुस्तकम

1 पजा आ राजगद्देपोर्रो उद्दिदिस मत्तोना तिना कय्दे नाकु उंदि पुस्तकम दिस्ता. अद लोप्पो, पलाते रौडु पक्काने रासि मत्ता आनि दान्क एडुं सिक्कां तंचि गुंडुर्गा हृटिस मत्ता.

2 वेल्लेन ताकत मत्ता उंदि पेनदा दूतातुन नना अगा हळतन. पेद्दा आवाजते अद, “गुंडुर्गा हृटिस मत्ता पुस्तकमपोर्रोटा एडुं सिक्कान नेम्हाचि, दान विच्चनालायक बोर मंतोर?” इंचि इनालय दलगत.

3 गानि स्वर्गमते आयि, बूमिपोर्रो आयि, बूमि हिळु आयि अद पुस्तकमतुन विच्चिसि दाना लोप्पो हळना लायकतोर बोरे मनाहिल्लोर.

4 अद पुस्तकमतुन विच्चिसि हळनालायक बोरे दोर्कुवाहेंका नना इरगा अळतन.

5 अस्के “निमे अळमा. हळा! आ गुंडुर्गा हृटिस मत्ता पुस्तकमपोर्रोटा सिक्कान नेम्हाचि अदुन विच्चिसि हळनाहाटी दाविदना वंसंतोर, यहुदाना गोत्रमता सिंहम इंचि पोरोल होतोर वरोर, गेल्लि मंतोर” इंचि आ पेद्दाल्कुना अब्देटाल वरोर नाकुन इत्तोर.

6 अस्के आ राजगद्दे, जीवाते मनना नालु जिवरासी आनि पेद्दाल्कुना नड्डुम, मोक्कु हीतदुनलेसी उंदि गोर्रिं पोरी नित्तिसि मत्तद नना हळतन. दान्क एडुं कोहकु, एडुं कळक मत्तां. आ एडुं कळक इत्ते, पेन बूमिपोर्रो अन्नि दिक्कुल्लुकुने लोहाता दाना एडुं आत्मां आंदुं.

7 अद गॉरे पोरि, राजगदूदेपोरों उद्विदस मत्तोनागा वासि, ओना तिना कय्दे मत्ता पुस्तकमतुन तेंडकुत्ता.

8 बस्के अय्ते गॉरे पोरि आ पुस्तकमतुन तेंडकुत्ता, अस्के आ नालुं जिवरासि आनि इरवै नालुर पेदुदाल्क गॉरे पोरिना मुन्ने काल्कुनगा बोक-बोर्ले अर्सि मोळ्कतुर. ओर अंतोरा कय्दे उंद-उंदि टांबुरा आनि दूपमते निडिसि मत्ता बंगारमता कुळ्कां मत्तां. आ दूपमते निडिसि मत्ता कुळ्कां इत्ते, पेनदा लोकुल्कुना पारतनां आंद्.

9-10 पज्जो ओर अंतोरा उंदि पूना पाटा पारालय दल्गतुर, “निमे इद पुस्तकमतुन एतसि, दाना सिक्कान नेम्हाचि विचचनालायक मंतिन. बारित्ते, निमे मोक्कु आसि नीवा नेत्तुर कुदुवा दोस्सि हेरेक जातिताल, हेरेक बासानोरवेट्टाल, हेरेक लोकुल्कुनाल आनि हेरेक देसेमतोरवेट्टाल पेनदाहाटी अस्कुत्तिन. निमे ओळ्कुन पेनदाहाटी दाना राज्येमतोर आनि पेर्माळोर्क कीतिन. ओर बूमिपोरों राज्येम कीतुर.”

11 पजा नना अगा हळ्ळते, आ राजगदूदे सुट्ट, अव नालुं जिवरासिना सुट्ट आनि पेदुदाल्कुना सुट्ट पेनदा वेल्लेन दूताना लेंग केंजावाता. अव दूतां लेक्कुते लाकुल्क, कोट्टुने मत्तां.

12 “मन्कालोर इद गॉरे पोरिन हक्किस मत्तुर गानि, संपत्ति, बुद्दि, बलम, कदर, महिमा आनि स्तुतिता लायक इदे आंद,” इल्हा अव अन्नि दूतां पेदुदा आवाजते इंचेके मत्तां.

13 अचोने आयाका स्वर्गमते, बूमिपोरों, बूमि हिळ्ळ, समुद्रम आनि अळुने मनानव अन्निगुडा, “राजगदूदेपोरों उदुदनोनद आनि गॉरे पोरिनद, स्तुति, कदर, महिमा आनि बलम बस्केळ्ळाहाटी मन्किंकांटी,” इंचि इनानद नना केंजतन.

14 अस्के जीवाते मनना नालुं जिवरासी “आमीन” इत्तां. पजा पेदुदाल्क टोंगरां ऊनसि आरादना कीतुर.

6

गॉरे पोरि एडुं सिक्कान लेहमळ

1 पजा एडुं सिक्कानाल उंदि सिक्कातुन आ गॉरे पोरि नेम्हाचि विचचुता. अस्के जीवाते मत्ता आ नालुं जिवरासिनाल उंदि जिवरासि, पिडगु वाटते वायानसोंटा आवाजते, “वा” इत्तद नना केंजतन.

2 अस्के अगा नाकु उंदि तेल्ला गुर्म दिसता, दानपोरों वरोर बानम पीसि उद्विदस मत्तोर. ओन्क उंदि किरिटम हियमळ जर्गता. ओर लडाई गेलसतोर, अय्नागानि इंका गेलसना इंचि पेयसतोर.

3 गॉरे पोरि रोंडो सिक्कातुन नेम्हाचि विचचुता अस्के, जीवाते मत्ता आ नालुं जिवरासिनाल रोंडो जिवरासि, “वा” इंचि इत्तद नना केंजतन.

4 अस्के उंदि एर्गटा गुर्म पलाते पेयसानद नना हळ्ळतन. लोकुल्क वरोंक-वरोर हक्कुनना इंचि, अद गुर्मपोरों उद्विदस मत्तोन्कु, बूमिपोरोंटाल सांतिनुन येतकुनना अदिकारम हियमळ जर्गता. ओन्क उंदि पेदुदा कसेर हियमळ जर्गता.

5 बस्के अय्ते गॉरे पोरि मूडो सिक्कातुन नेम्हाचि विचचुता, अस्के मूडो जिवरासि, “वा” इत्तद नना केंजतन. पजा नाकु अगा उंदि कर् रंगुना गुर्म दिसता. आ गुर्मपोरों उद्विदस मत्तोना कय्दे उंदि तराजु मत्ता.

6 अचोटेन, जीवाते मत्ता आ नालुं जिवरासिना नड्डुमताल, “उंदि रोजुना बूतितचोचोन् कोत्ताने, उंदि किल्लो गोह्कु दोर्कता, इंका अचोने कोत्ताने मूड किल्लोना जेन्नां दोर्कता. गानि नियदुन, अंगुर पानकमतुन नासडेम कियमा,” इंचि उंदि लेंग केंजावाता.

7 गॉरे पोरि नालुंगो सिक्कातुन नेम्हाचि विचचुत्सके जीवाते मत्ता आ नालुं जिवरासिनाल नालुंगो जिवरासि, “वा” इत्तद नना केंजतन.

8 पजा नाकु अगा उंदि पस्पु रंगुना गुर्म दिसता. आ गुर्मपोरों उद्विदस मत्तोना पोरोल हामुर, ओना पज्जो-पज्जो नरकम वासेक मत्ता. ओन्क बूमिता नालुं बागाल्कुनाल उंदि बागमपोरोंटा लोकुल्कुन कसेरते, कर्नुने, बिमार्कुने आनि केडाता जिवरासिना हेंदाल नासडेम कियाना अदिकारम हियमळ जर्गता.

9 गॉरे पोरि हेय्युंगो सिक्कातुन नेम्हाचि विचचुत्सके, पेनदा पोल्ले लोकुल्कुंक वेहताहाटी आनि ओरा गवाइ वेहताहाटी मोक्कु हिय्यना गदूदे हिळ्ळ हक्किसि मत्तोर्कुना आत्मान हळ्ळतन.

10 आ आत्मां पेदुदा आवाजते, “ए सामि, पवित्र आनि सत्तेम मनानेन, माकुन हक्कता बूमिपोरोंटा लोकुल्कुना न्यायम निमे बस्के कीतिन? ओरा न्यायम कीसि मावा नेत्तुरता बदला बस्के एतातिन?” इंचि वरगेयालय दल्गतां.

11 पजा ओर्क अंतोर्क तेल्ला कपडिं हीसि, “मीकुन हक्कतापे मीवा दंटाता सेवाकुल्कुन आनि विस्वासुल्कुन हक्कना मंता, ओरा लेक्कांगुडा पुरागा आयानदाका मिमेट गळसेप आराम कीम्टु,” इंचि ओर्कु वेहतेर.

12 गॉरे पोरि हासंगो सिक्कातुन नेम्हाचि विचचुता, अस्के पेदुदा बुकंप आतद नना हळ्ळतन. अस्के पोळ्ळु कर् गोंगोळिलेसी कर्गा आनि वेळ्ळिसअंता बारे नेत्तुरलेसी एर्गा आता.

- 13 पेद्दा वळि दुमारम वाते तोया मराता पंडि बल्हा हिड अरीता, अल्हेने सुक्कां मब्बुनाल बूमिपोर्रो अरतां.
- 14 मब्बु उंदि कागदेम हुटताप हुटकुचि मायसोत्ता. अल्हेन हरेक गुट्टा, दीबि अबुना जागानाल जर्गतां.
- 15 अस्के बूमिपोर्रोटा राजालोर, अदिकारिल्क, सायाबुल्क, सिरमंतुल्क, ताकतवर्क, दासुल्क, दासुल्क आयवोर, इल्हा अंतोर लोकुल्क गुट्टाना बुयाराल्कुने, पेद्दा बंडा सौरिने होंचि मकतुर.
- 16 मक्किंसि गुट्टां आनि बंडानतोनि, “मापोर्रो अरिं, राजगद्देपोर्रो उद्दिदस मल्लोना नदरताल आनि गोर्रो पोरिना होंगुनाल माकुन मक्किचट.
- 17 बारित्ते, पेनदा होंग हप्सना कतरनाक रोजु एवता. ओरा मुन्ने बोर नित्ता परांतुर?” इंचि इनालय दल्यातुर.

7

1,44,000 लोकुल्कुक सिक्कां तनमळ

1 इवनि जर्गतारित्ते, बूमिता नालू मूलांक पेनदा नालू दूतां नित्तिसि मत्तद नना हळतन. अव बूमिपोर्रो आयि, समुद्रमते आयि आनि बवे मराकुन पोरो आयि वळितुन वायाकोंटा आपसि पीसि मत्तां.

2-3 अस्के मर्रा उंदि द्दातुन जीवाते मनना पेनदा सिक्कातुन पीसि पोळद पेयसनाहेंदाल पोरो वासेक मनानद हळतन. बव नालू दूतांक अय्ते, बूमितुन आनि समुद्रमतुन नासडेम कियाना अदिकारम हीसि मत्ता, अव नालू दूतन अद पेद्दा आवाजते, “बदवेरादाका अय्ते मोमोट पेनदा सेवाकुल्कुना कपालमपोर्रो सिक्कां तन्मो अदवेरदाका बूमितुन आयि, समुद्रमतुन आयि, अल्हेने मराकुन आयि नासडेम कियमट” इंचि इत्ता.

4 अस्के सिक्कां तंचि मत्तोरालेक्का केंजतन अय्ते, ओर उंदि लक्सा नल्चै नालू वेय्कु मत्तुर आनि अव्टे इझ्राएलना हरेक वंसमता लोकुल्क मत्तुर.

5-8 यहूदाना वंसमताल पन्नेंड वेय्कु लोकुल्कुक सिक्का तनमळ जर्गता. स्बेनना वंसमताल पन्नेंड वेय्कु, गादाना वंसमताल पन्नेंड वेय्कु, अस्सेरना वंसमताल पन्नेंड वेय्कु, नप्तालिना वंसमताल पन्नेंड वेय्कु, मनसेना वंसमताल पन्नेंड वेय्कु, सिमोनूना वंसमताल पन्नेंड वेय्कु, लेविना वंसमताल पन्नेंड वेय्कु, इसाकुना वंसमताल पन्नेंड वेय्कु, जबलूनना वंसमताल पन्नेंड वेय्कु, योसेपना वंसमताल पन्नेंड वेय्कु, बैजामिनना वंसमताल पन्नेंड वेय्कु, इल्हा पन्नेंड गोत्रालकुना लोकुल्कुक सिक्कां वाटमळ जर्गता.

राजगद्देता मुन्ने वेल्लेन लोकुल्क

9 अद आता पजा, पेनदा राजगद्दे आनि गोर्रो पोरिना मुन्ने तेल्ला कपडिं केरसि, कजूर मराता कोम्मां कय्दे पीसि हरेक जातितोर, हरेक बासातोर, हरेक लोकुल्क आनि अनि देसेल्कुनोर इल्हा लेक्कुते बोरे लेक्का परं अचचोन मंदितुन नना हळतन.

10 ओर अंतोर पेद्दा आवाजते, “राजगद्देपोर्रो उद्दिदस मनना मना पेनबाबानगा, गोर्रो पोरिना मुक्ति हियना सक्ति मंता” इंचि इनालय दल्यातुर.

11-12 अनि दूतां राजगद्दे सट्ट, पेद्दाल्क आनि जीवाते मत्ता आ नालू जिवरासिना सट्ट नित्तिसि मत्तां. अव अनि दूतां राजगद्दे मुन्ने बोक्-बोल्ले अरिं पेनदुन आरादाना कीसेके इल्हा इनालय दल्यातां, “आमीन, स्तुति, महिमा, तेल्वि, ताकत आनि दन्यवाद बस्केळताहाटी मावा पेनदावे आंदु, आमीन” इंचि इत्तां.

13 अस्के पेद्दाल्कुना अव्टेताल वरोर “तेल्ला कपडिं केरसि मन्नानुर ईर बोर आंदुर? ईर बगाटाल वातुर?” इंचि नाकुन पूसकीतोर.

14 अस्के, “नीकु एरपाटे महाराज,” इंचि नना ओन इत्तन. अस्के ओर, “ईर अंतोर वेल्ले तिप्पल्कुनाल पलाते वातोर आंदुर. ईर ईरा कपडिं गोर्रो पोरिना नेत्तुरते हुक्किंसि तेल्लगा कीतुर आंदुर.

15 अदुनहाटी ईर अंतोर इंदके पेनदा राजगद्दे मुन्ने मंतुर. नर्का-पिय्यल गुळितगा मंचि दाना सेवा कीतुर. राजगद्देपोर्रो उद्दिदस मनानोर ईरापोर्रो डेरा कीसि कापाळंतोर.

16 ईरकु इंदकेटाल बस्केने द्पा आयो, कर्वेसो, अचोने आयाका ईरकु पोळदुना एद्दिदहेंदाल दगळगुडा दलगो.

17 बारित्ते ईर अंतोर्कुन मेहानोर, राजगद्दे नड्डुम उद्दिदस मनना गोर्रो पोरि आंदुर. ओर ईरकुन पिस्वरता एता उटानगा ओतोर. पेन ओरा कळ्ळुना कंडेह्कुन पुरागा उसमंता,” इंचि वेहतोर.

8

एडुंगो सिक्कातुन विचचुमळ

- 1 गॅर्रे पोरि एडुंगो सिक्कातुन नेम्हाचि विच्चुतस्के स्वर्गमते सगम गंटादाका सुम-साम आता.
- 2 अस्के पेनदा मुन्ने नित्तिसि मननव एडुं दूतन नना हळतन. अवंक एडुं तूताकोम्कु हियमळ जर्गता.
- 3 अगा इंक्दि पेनदा दूता गद्देतगा वासि नित्तुता. दाना कय्दे बंगारमता गुगलेम कुळका मत्ता. दान्क राजगद्दे मुन्ने मनना बंगारमता गद्देपोर्रे अंतोर पेनदा लोकुल्लुकुना पारतनांतोनि गुगलेम वाटानाहाटीं वेल्लेन गुगलेम हियमळ जर्गता.
- 4 अस्के पेनदा दूताना कयदाल अद गुगलेमता पोया पेनदा लोकुल्लुकुना पारतनांतोनि पेनदागा एवता.
- 5 आ दूता दूपमता कुळकाते गद्देतगा मत्ता तळमितुन निहाचि अदुन बूमिपोर्रे पोहचीता, अदुनहेंदाल मब्बु गळ-गळा इंचेके उरमालय, मेसालय, बुकंप आयलय दलगता.

एडुं दूतां तूताकोम्कु उहकमळ

- 6 अस्के तूताकोम पीसि मत्ता अव एडुं दूतां तूताकोम्कु उहकालय तयार आतां.
- 7 मोदाटा दूता तूताकोम उहकता, अस्के नेत्तुर कलियसि मत्ता बंडां आनि तळमि बूमिपोर्रे अरता. अरतस्के बूमिता मूड बागाल्कुनाल उंदि बागम आनि मराकुना मूड बागाल्कुनाल उंदि बागम कर्विसोता. इंका पचचटा जाळिगुळा पुरागा वेसोता.
- 8 रोंडो दूता तूताकोम उहकता, अस्के तळमितोनि पोतसेके मत्ता उंदि पेद्दा गुट्टातसोंटद बतलो समुद्रमते वाटमळ जर्गता. दानहेंदाल समुद्रमता मूड बागाल्कुनाल उंदि बागम नेत्तुरलेसी आसोता.
- 9 अदुनहेंदाल समुद्रमते जीवाते मत्ता जिवरासिना मूड बागाल्कुनाल उंदि बागम जिवरासी हासोतां. आनि समुद्रमते मत्ता जहाजकुना मूड बागाल्कुनाल उंदि बागम नासडेम आता.
- 10 पेनदा मूडो दूता तूताकोम उहकता, अस्के मब्बुनाल डिव्ठितलेसी पोतसेके उंदि पेद्दा सुक्का बूमिपोर्रे अरता. अद सुक्का मूड बागाल्कुनाल उंदि बागम बेरेहक आनि एता उटानपोर्रे अरता.
- 11 अद सुक्काता पोरोल कयमुल. दानहेंदाल एता मूड बागाल्कुनाल उंदि बागम एर कयमुल आसोता. अद एर उट्टाहाटी वेल्लेन मनकालोर हासोत्तुर.
- 12 नालुंगो दूता तूताकोम उहकता, अस्के पोळ्दु, वेडसि आनि सुक्कां इवुना मूड बागाल्कुनाल उंदि बागम नासडेम आता. अदुनहाटीं अवनुना मूड बागाल्कुनाल उंदि बागम हीकट आता. पोद्दाला-नर्कागुडा मूड बागाल्कुनाल उंदि बागम हीकट आसोता.
- 13 पज्जो उंदि गुव्वा डेगातुन मब्बुन नड्डुमताल परियसेक वायनद हळतन अद जोरते इल्हा इनानद केंजतन: “इंदके मूड दूतां अवनुना तूताकोम उहकानदे मंता, अव अवनुना तूताकोम उहकतस्के बूमिपोर्रे मनना अटोर्क इरगा गोसा आयार! गोसा आयार! गोसा आयार!”

9

कपालमपोर्रे सिक्का हिलवोर्कु वायना गंडाल्कु

- 1 पजा हेय्युंगो दूता तूताकोम उहकता, अस्के मब्बुनाल उंदि सुक्का बूमिपोर्रे अरता. आ सुक्काक वेल्लेन लोत मत्ता पोक्काता चाबि हीतद नना हळतन.
- 2 आ सुक्का, लोत मत्ता पोक्काता तल्पुन तेंडता, अस्के पेद्दा बट्टिताल पेय्सना पोयालेहका आ पोक्काताल पोया पेय्सता. दानहेंदाल पोळ्दु, वळि हीकट आसोतां.
- 3 आ पोयाताल गोल्लाबामा पुळ्कु पेय्सि बूमिपोर्रे वातां. बूमिपोर्रेटा मिच्चोक बसोंटा ताकत मंतनो असोंटदे ताकत अवंक हियमळ जर्गता.
- 4 आ गोल्लाबामां, बूमिपोर्रेटा जाळितुन आयि, बवे पचचटा पोर्का, मराकुन आयि, नासडेम कियानायो. बोरा कपालमपोर्रे अयते पेनदा सिक्का तंचि हिल्लेनो सिराप ओर्कुने नासडेम कियाना इंचि वेहामळ जर्गता.
- 5 मनकालोर्कुन हक्काना अदिकारम अयते अवंक हिल्ले, गानि हेय्युं नेल्कुनदाका ओर्कुन तकलिपते अरहना अदिकारम हियमळ जर्गता. अवनुनहेंदाल आयाना तकलिप, मनकन मिच्चो कस्कुते बल्हा मंता अल्हा मत्ता.
- 6 अव रोजकुने लोकुल्लक हामुरतुन पहकंत्तुर, गानि ओर्कु हामुर दोर्को. हामुर कोरांतुर गानि ओर्कु हामुर दोर्को.
- 7 आ गोल्लाबामां, लडाइहाटी तयार कीता गुराल्कुनलेसी दिस्सेक मत्तां. अवनुना तल्लानपोर्रे बंगारमता किरिटम दोसताप मत्ता. अवनुना मोकालक मनकालोरा मोकाल्कुनलेसी दिस्सेक मत्तां.
- 8 अवनुना केल्लक मुरताहकुना केल्लुकुनलेसी मत्तां. अवनुना पल्लुकु सिंहमता पल्लुकुनलेसी मत्तां.
- 9 अव कच्चिता अंगि केरसि मत्तां. अवनुना रेक्काना आवाज अयते, लडाइ कियालय वित्तना वेल्लेन गुराल्कुना रताल्कुनलेसी मत्तां.

10 अवुंक मिचोनलेसीं तोकां, कोडिं मत्तां. मनकालोर्कुन हेय्युं नेल्कुनदाका तकलिपते अरहचि इराना ताकत, अवनुना तोकाने मत्ता.

11 वेल्लेन लोत पोक्काता दूता, अवुंक राजाल आसि मत्ता. इब्रानि बासाते दान अबदोन आनि ग्रीक बासाते अपुलोन इचि इंत्तर.

12 इद मोदाटा गंडम पेय्शि होल्ता. मुन्ने इंका रौडु गंडाल्कु वायानव मंतां.

हासंगो तूताकोम उहकमळ

13 हासंगो दूता तूताकोम उहकता, अस्के पेनदा मुन्ने मत्ता बंगारमता गदूदेता नालू कोहकुनाल उंदि लेंग नना केंजतन.

14 आ लेंग, तूताकोम पीसि मत्ता हासंगो दूतातुन, “परत इनना पेदूदा बेरेटगा दोहासि मत्ता नालू दूतन होळसीम,” इचि इत्ता.

15 अदे वेला, अदे रोजू, अदे नेला, अदे वर्साताहाटीं होळसालय पेन अवनुन तयार कीसि मत्ता. बूमिपोरोंटा लोकुकुना मूड बागाल्कुनाल उंदि बागम लोकुकुन हक्कानाहाटीं आ नालू दूतन होळसीयमळ जर्गता.

16 आ गुराल्कुनपोरों वायना सिपाइल्क लेक्काते पुरा इरवे कोटुकु मत्तर इत्तद नना केंजतन.

17 नना हळता दर्सनमते, आ गुराल्कुनपोरों उद्विदिस मत्तोर केरता कच्चिता अंगिं, तळमितलेसीं रगारगा, नेळि पंडि रंगुलेसीं आनि गंदकम रंगुनव मत्तां. अवनुना तल्लां सिंहमता तल्लानलेसीं दिस्सेक मत्तां. इंका अवनुना तोळ्दाल तळमि, पोया, गंदकम पेय्सेक मत्ता.

18 आ मूड गंडाल्कुनाहेंदाल इत्ते, गुराल्कुना तोळ्दाल पेय्सना तळमि, पोया, गंदकम इवनुनाहेंदाल बूमिपोरोंटा मूड बागाल्कुना लोकुकुनाल उंदि बागम लोकुकुन हक्किसि पोहमळ जर्गता.

19 आ गुराल्कुना ताकत अवनुना तोड्डिडेने, तोकाने मत्ता. अवनुना तोकांक तरास तल्लानलेसीं तल्लां मत्ताहाटीं, अव लोकुकुन कस्किसि ओर्कुन तिप्पल्क किय्युंदू.

20 अव गंडाल्कुनाहेंदाल अचचोन तिप्पल्क वायिनागानि बोर अय्ते हाया हिल्लुरो, ओर ओरा कराब कबाहकुनाल मनसु मार्सकुना हिल्लुर. ओर देय्याल्कुन इत्ते, वळ्का पर्वव, केंजा पर्वव, ताका पर्वव बंगारम, एंडि, रागि, बंडा, कट्टेतोनि तयार कीता बोम्मन मोळकसेकेन मत्तर.

21 अचोने आयका लोकुकुन हक्कमळ, होदें कियमळ, बोगमतनाल्क कियमळ, दोंगातनाल्क कियमळ इसोंटा कबाहकुनालगुडा मनसु मार्सकुना हिल्लुर.

10

पेनदा दूता आनि सिन्ना पुस्तकम

1 पजा, उंदि ताकतवर दूता मब्बु तेर्पेतुन मुचकुंचि स्वर्गमताल हिळु रेय्शि वायानद नना हळतन. दाना तल्लापोरों सिगिड मत्ता. मोकोम पोळ्दुनलेसीं आनि काल्क तळमिता कंबालेसीं मत्तां.

2 विच्चिसि मत्तद उंदि सिन्ना पुस्तकम दाना कय्दे मत्ता. अद दाना तिना कादुन समुद्रमपोरों, आनि रोड्डा कादुन बारे बूमिपोरों इत्ता.

3 पजा सिंहम मोत्कुत्ताप पेदूदा आवाजते मोतकुत्ता. अस्के एडुं मल्कां उस्मताप गडुडेल इंचि आवाज वाता.

4 आ एडुं मल्कां गडुडेल इत्ता आवाज वातस्के, अवनुन नना रासानदे मत्ता, अस्केने स्वर्गमताल उंदि लेंग, “एडुं मल्कां उस्मता आवाजताल केंजता पोल्लेन रासमा, अवनुन मक्किचि इर्रा,” इचि इत्तद नना केंजतन.

5 समुद्रमपोरों आनि बूमिपोरों काल्क इरसि नित्तिसि मत्ता दूता, स्वर्गमताहेके तिना कय हाहतद नना हळतन.

6 पजा अद दूता, बोर अय्ते स्वर्गमतुन आनि अट्टे मनना अन्निटवुन, बूमितुन आनि अट्टे मनना अन्निटवुन, समुद्रमतुन आनि अट्टे मनना अन्निटवुन तयार कीतोर, बस्केळ्ळक जीवाते मनना आ पेनबाबाना पोरोलते ओट्टु तिचि इल्हा इत्ता, “इंका आल्सेम आयो.”

7 गानि एडुंगो दूता दाना तूताकोम बस्के अय्ते उहकारो, अस्के पेन दाना सेवाकुल्कु आता कबुरतोर्कुंक वेह्चि मत्ता परकारम, दाना मर्ममता पोल्ले पुरागा आय्युं.

8 स्वर्गमताल वाता बद लेंगुन अय्ते नना केंजसि मत्तानो, अदे लेंग मर्रा नाकुन, “होन! होंचि समुद्रमपोरों आनि बूमिपोरों काल्क इरसि नित्तिसि मनना दूताता कय्दे, विच्चिसि मत्ता पुस्तकमतुन तेंडकुन,” इचि इत्तद नना केंजतन.

9 अस्के आ दूतातगा होंचि, “नीवा कय्दे मनना अद सिन्ना पुस्तकमतुन नाकु हीम,” इचि इत्तत. अस्के अद नाकुन, “इदे दीन पीसि तिन्नु. इद नीवा पीटुन अय्ते कयमुल कीता, गानि नीवा तोड्डुक् मात्रम तेनेलेसीं तिथ्यगा दलंगता” इचि इत्ता.

10 अस्के आ पुस्तकमतुन द्वाता कय्दाल तेंडकुंचि तित्तन. तित्तस्के अये ना तोड्दुक अद तेनेलेसी तिय्यागेन दल्याता गानि पीर मात्रम कयमुल आसोत्ता.

11 पजा आ द्ता नाकुन, “मसंदि मल्का निमे होंचि हरेक बासा वळकानोर्कुंक, राजुलकुंक, वेल्लेन लोकुलकुंक आनि दुनियाता अनि देसेलकनोर्कुंक, वायाना कालमते ओरपोरों बतल जर्गानद मंतांनो, अदुना बारेमते बविस्थवानि वेहा” इंचि इत्ता.

11

इव्वुर गवाइदार्क

1 पजा, कहाना पट्टितसोंटद उंदि पट्टिट हीसि बोरो नाक इल्हा वेहतोर, “निमे तेदसि, पेनदा गुळितुन आनि गद्देतुन कहा. इंचा गुळितगा बचचोर लोकुलक अये आरादना कीतुर ओर्कुन लेक्का.

2 गानि गुळिता पलाते दारातुन कहामा, अद यह्दि आयवोर्कुंक हीसि मंता. पवित्र सहरतुन नल्पे रोंडु नेल्लांदाका ओर जारातुर.

3 पजा नना नावा इव्वुर गवाइदारकुंक बविस्थवानि कियाना अदिकारम हीतन, ओर पोतां हुटकुंचि पन्नेड नुहकुना अरवै रोजकुनदाका बविस्थवानि कीतुर.”

4 आ इव्वुर गवाइदार्क इत्ते, बूमिपोरोंटा सामिना मुन्ने नित्तिसि मनना रोंडु जयतुन मराक आनि रोंडु दीसोडि आंदु.

5 ओक्कला बोरन्ना आ गवाइदार्कुनपोरों अन्यायम कियालय हळते, ओरा तोळ्दाल तळमि पेय्सि ओरा नुकसान कियालय हळना पगातोर्कुन बळ्दि कीसि पोहंता. अबुना नुकसान कियालय हळानोर्कुंक तप्पाकोटा इसोंटा हामुरे वायार.

6 आ गवाइदार्क बविस्थवानि कियाना रोजकुने ओक्कला पिर् वायानये अदुन आपाना अदिकारम ओर्कु हीसि मत्ता. अचोने आयाका ओर्कु बस्के अनपिस्ते अस्के, एतुन नेत्तुरते मार्समळ आनि बूमिपोरोंटा लोकुलकुंक तीरता तकलिप्क हियना अदिकारमगुडा ओर्कु हीसि मत्ता.

7 पेनदा बारेमते ओरा गवाइ वेहामळ आतस्के, लोत पोक्काताल उंदि जिबवासि पलाते पेय्सि वासि ओरतोनि लडाइ किय्यार. लडाइ कीसि ओर्कुन गेल्लि हक्कार.

8 ओरा पीनगुल्लु आ पेद्दा सहरता हर्द अरसि मंतां. इगेन ओरा सामिनगुडा कूसनपोरों वेलाड वाट्सि मत्तुर. वेर अर्तमते, अद सहरतुन सदोम आनि इजिप्त इंचि इंतुर.

9 मडुननरा रोजकुनदाका अनि जातिनोर, हरेक बासा वळकानोर, अंतोर लोकुलक, दुनियाता अनि देसेलकुनोर ओरा पीनगुल्लुकुन हळांतुर, गानि ओर्कुन बोदा मात्रम दोस्सा हिय्युर.

10 ओर इव्वुर कबुरतोरहेंदाल बूमिपोरों वेल्लेन तकलिपकु वासि मत्तां. अदुनहाटीं ओर हातुर इंचि बूमिपोरोंटा लोकुलक वेल्लेन कुसिते पंडगुल्लुकु कियानुर, वरोंक-वरोर इनामकु हीकुनानुर.

11 गानि मडुननरा रोजकुना पज्जो, पेनदाहेंदाल पिस्वरता ऊपिर वासि ओरव्टे नेगता. अस्के ओर तेदसि निततुर. अस्के ओर्कुन हळता लोकुलक इरगा वेरियतुर.

12 पजा स्वर्गमताल उंदि पेद्दा लेंग, “इगे पोरो वट्टु” इंचि इत्तद ओर इव्वुर गवाइदार्क केंजतुर. केंजसि उंदि मब्बु तेपेते कालियसि ओरा पगातुर हळानेंकेन स्वर्गमताहेके पोरो होततुर.

13 अचचोटन अदे वेलाते अगा पेद्दा बुकप आता, अद सहरता पदि बागालकुनाल उंदि बागम नासडेम आता. अद बुकपता हेंदाल एडु वेय्कुना लोकुलक हासि होततुर. आनि बोर अये पिस्सि मत्तुरो, ओर इरगा वेरियतुर, वेरियसि स्वर्गमते मनना पेनदा महिमा कीतुर.

14 रोंडो गंडम आसोत्ता. हळ्ळाट! म्दो गंडम बिरानेन वासेक मंता.

एडुंगो द्ता त्ताकोम उह्कमळ

15 एडुंगो द्ता त्ताकोम उह्कता, अस्के स्वर्गमते पेद्दा आवाज केंजवाता. अद आवाज, “दुनियाता पूरा राज्येम मना सामिनद आनि ओना किरिस्तुनद आता. युगा-युगालकुनदाका ओरे राज्येम कीतोर,” इंचि इत्ता.

16 अल्हा इत्तस्के, राजगद्देन पोरो उद्विदिस मत्ता आ इरवै नाल्तर पेद्दालक पेनदा मुन्ने कालकुनगा बोकबोर्ले अर्सि, पेनदुक आरादना कीतुर.

17 कीसि, “अन्निटकन्ना एक्को सक्तिमंतुन आता मावा पेनदुना! निमे मुन्ने मत्तिन, इंदकेगुडा मंतिन. इंदके निमे नीवा ताकततुन हुपिचिचि राज्येम कियालय सुस्व कीतिन. अदुनहाटीं मोमोट नीकु दय्यवाद कीतोम.

18 नीकून एएटा कियवा लोकुकल नीवा विरोद कीताहाटी नीकु होंग वाता. हातोरा न्यायम कियाना वेला इंदके एत्ता. अल्हेने नीवा सेवाकुलकुंक, नीवा पोल्लें वेहाना कबुरतोकुक, नीवा लोकुकुक, नीकु वेरियसि पिस्साना सिन्नालकुंक-पेदुदालकुंक इनाम हियाना वेला एवता. अचोने आयाका बूमितुन नासडेम कीतोकुन नासडेम कियाना वेलागुडा वाता,” इचि इत्तुर.

19 पजा स्वर्गमते मत्ता पेनदा गुळि कुल्ला आता. अये अगा पेनदा करारकुना संदुग दिस्ता. अस्के इरगा मेर्समळ, उस्ममळ, पिडगु वाटमळ, बुकंम आयमळ जर्गता पजा इरगा बंडां अरतां.

12

मुरतळ आनि उंदि पेदुदा मासुल तरास

1 अद आता पजा, स्वर्गमते नाकु उंदि पेदुदा चिन्ह दिस्ता. अद बतल इत्ते, उंदि मुरतळ पोडदुन कपिडलेसी पोंडसि मत्ता. दाना कालकुना हिळु वेळसि आनि तल्लापोरों बारे पन्नेड सुक्काना किरिटम मत्ता.

2 अद मुरतळ पीटे मत्ता. मुरतटा एएराना वेला वासि मत्ताहेका अद नोपिने तनलाळसेक मत्ता.

3 पजा स्वर्गमते नाकु इंकुंदि चिन्ह दिस्ता. अद बतल इत्ते, उंदि एर्राटा पेदुदा मासुल तरास मत्ता. दानकु एडु तल्लां, पदि कोहकु मत्ता. एडु तल्लानपोरों एडु किरिटालकु मत्तां.

4 अद तरास दाना तोकाते, मब्बुने मनना सुक्काना मूड बागालकुनाल उंदि बागम सुक्कान इग्गिस बूमिपोरों अरहता. एएरालय आसि मत्ता मुरतळ, एएरूतारित्ते, दाना पेळान मिगनाहाटी आ तरास, मुरतटा मुन्ने होंचि नित्तिसि मत्ता.

5 अद मुरतळ वरोर मर्रिन कंता. ओर अन्नि राज्येलकुनपोरों कच्चिता सलाकिलेसी कडक राज्ये कियानोर मत्तोरे. गानि आ पेळान पेनदागा, दाना राजगदुदेतगा ओयमळ जर्गता.

6 अस्के अद मुरतळ बय्लि जेगातेके वित्तुता. अगा दानाहाटी, पन्नेड नुहकुना अरवै रोजकुनदाका बेस हळकुननाहाटी पेन जेगा तयार कीसि मत्ता.

मासुल तरासतुन स्वर्गमताल पलाते गेटुममळ

7 पजा स्वर्गमते उंदि लडाइ आता. पेनदा मिकायेल इनना दूता, दाना दंटा दूतन पीसोंचि, मासुल तरास आनि दाना दूतानतोनि लडाइ कीता. अस्के मासुल तरासगुडा दाना दूतन पीसि मिकायेलनुतोनि लडाइ कीता.

8 गानि मासुल तरास, दाना दूतां लडाइ गेल्सा परा हिल्लें. अदुनहाटी स्वर्गमते मनालय अबुंक जेगा दोकाहिल्ले.

9 पजा अद मासुल तरासतुन आनि दाना दूतन बूमिपोरों दोब्बिसीयमळ जर्गता. अद तरास दाना दूतनतोनि कलियिस परा दुनियातुन पसांचेके मंता. इद मासुल तरासुन पडाना तरास, हिलाकोटे पसांचनुद, हिलाकोटे देय्यम इचि इत्तुर.

10 पजा स्वर्गमताल उंदि पेदुदा लेंग केंजावाता. अद इल्हा मत्ता, “मा पेनदा मुन्ने मावा विस्वासुलकुनपोरों नर्का-पियल बस्केळ्ळक दोसेम दोस्सेके मनानदुन हिळु बूमिपोरों दोब्बिसीयमळ जर्गता. अदुनहाटी पेन मनाकु हियाना मुक्ति, ताकत, राज्ये आनि दाना किरिस्तुना अदिकारम पलाते अरता.

11 गौरें पोरिना नेत्तुरताहेदाल, ओर वेहता गवाइ हेदाल देय्यमतुन गेल्सतुर. ओर्कु हामुर वायिनागानि ओर ओरा जीवाता पर्वा क्रिया हिल्लुर.

12 अदुनहाटी स्वर्गम आनि स्वर्गमते मनानोरिटा मिमेट कुसिते मंदु. गानि बूमिपोरों आनि समुद्रमते मनानोर्क मात्रम बचचोन गोसा वायार! बारित्ते देय्यमतगा वेल्ले टाइम हिल्ले इंचि दान्क तेळियसे मंता, अदुनहाटी अद वेल्लेन होंगुने मिहगा वाता,” इचि केंजावाता.

मुरतटुन तिप्पल्क कियमळ

13 बस्के अये अद तरासतुन बूमिपोरों दोब्बिसीतुर, अस्के अद तरास आ पेळान कंता मुर्ताटुन परेसान कियालय दान पज्जे दल्गता.

14 गानि दानाहाटी पेन तयार कीसि इरता जेगातगळ्ळक, अद तरासुनाल तपिचुकुचि परिथिसि होनालय पेन दानकु गदुदल रेक्कानसोंटव रोंडु रेक्कां हीता. दानहेदाल मडुननरा वर्सनदाका अद मुरतटुन बेस हळकुन्मळ जर्गता.

15 आ मुरतळ कम्मटे पोंगिस होनना इंचि तरास दाना तोळ्दाल बैरेडतालेसी एएरचेहता.

16 गानि बूमि आ मुरतळ्ळक सहायम कीता, तरास तेंडता एतुन अद मिगिसि वाटता.

17 इदुनहेदाल तरासुक मुरतळ पोरो बागा होंग वाता. अस्के तरास आ मुरतटा कळमता वंसमतोरतोनि, पेनदा आदेसकुनपोरों ताकानोरतोनि आनि येसुना गवाइ वेहानोरतोनि लडाइ कियालय होल्ता.

18 पजा अद तरास समुद्रमता उस्के पोरो होंचि नित्तुता.

13

समुद्रमताल रौंडु जिवरासी पेसमळ

1 पजा नना उंदि जिवरासि समुद्रमताल पेयसानद हळतन, दानकु पदि कोहकु, एंडु तल्लां मत्तां. कोहकुनपोर्रीं पदि किरिटाळकु मत्तां, तल्लानपोर्रीं पेनदुन अपमानम कियानव पोरोलीं रासि मत्तां.

2 नना हळता जिवरासि सितांगंडुनलेसीं मत्ता, दाना काल्क एडजुना काल्कुनालेसीं मत्तां आनि दाना तोड्डिड सिहमतता तोड्डिडलेसीं मत्ता. मासुल तरास दाना ताकत, दाना राजगद्दे आनि पेद्दा अदिकारम आ जिवरासिक हीता.

3 अद जिवरासिता एंडु तल्लानाल उंदि तल्लाक हायानसोंटा देब्बा दल्लिसि पुन्नु आसि मत्ता, गानि अद पुन्नु बेस आतद हळसि, दुनियातोर अंतोर इंचत्रम आसि दान पज्जो होनालय दल्लगतुर.

4 अद जिवरासिक मासुल तरास अदिकारम हीताहाटीं अंतोर मासुल तरासतुन मोळ्कालय दल्लगतुर. पजा ओर, “अद जिवरासितालेसीं बोरन्ना मंतुरा? दानतोनि बोरन्ना लडाइ किया परींतुरा?” इंचि अद जिवरासितुनगुळा मोळ्कालय दल्लगतुर.

5 अद जिवरासि पेद्दिदरकेमते आनि अपमानम कियाना पोल्ले वळ्कानाहाटीं पेन दानकु नल्लै रौंडु नेल्लांदाका अदिकारम हीता.

6 पजा अद जिवरासि, पेनदुन, दाना पोरोलतुन, दाना जागातुन, अल्हेने दानतोनि स्वर्गमते मनानोर्कुनगुडा अपमानम कियालय दल्लयाता.

7 दान्क पेनदा लोकुल्लकुनतोनि लडाइ कीसि ओर्कुन गेल्लसानद अदिकारम हियमळ जर्गता. इचचोने आयाका दान्क हरेक जाति, हरेक बासा, हरेक लोकुल्लक आनि दुनियाता अन्नि देसेल्लकुना लोकुल्लकुनपोर्रीं अदिकारम हियमळ जर्गता.

8 बूमिपोर्रीं मनना अंतोर इद दुनिया तयार आतागटाल, बोरा पोरोल्लक अय्ते, मोक्कु आता गोर्रीं पोरिना पिस्वरता पुस्तकमते हिल्लेंगो, ओर अद जिवरासितुन मोळ्कानुर.

9 बोर्क अय्ते केव्क मंता ओर बेस केंजिरकांटी.

10 जेल्लंक होनना मतोर, जेल्लेन अर्रीनुर. बोर अय्ते कसेटे हक्कतोर, ओनगुडा कसेटेन हक्कमळ जर्गर. इदुन पीसि पेनदा लोकुल्लकुना विस्वासम, ओप्के दिस अर्रीता.

बूमिताल पलाते तेंडता जिवरासि

11 पजा नना मर्र्दि जिवरासितुन बूमि लोप्पोटाल पोर्रीं वायानद हळतन, दान्क गोर्रीं पोरिनलेसीं रौंडु कोहकु मत्तां. अद मासुल तरासुनलेसीं वळ्कसेक मत्ता.

12 इद जिवरासि, हायानसोंटा देब्बा दल्लिसि बेस आता मोदाटा जिवरासिता पूरा अदिकारम दाना मुन्नेने वाळकुचि कबळ कियुंदु आनि बूमिपोर्रीं मनना अंतोर्कुन आ मोदाटा जिवरासितुन मोळ्कानाल कियुंदु.

13 अल्हेने लोकुल्लक हळ्ळानेकेन स्वर्गमताल बूमिपोर्रीं तळमि अरहंदु, इल्हा अरहचि अद पेद्दा-पेद्दा चिन्हां हृप्सुंदु.

14 मोदाटा जिवरासिता मुन्ने इद जिवरासिक चिन्हां हृप्सना अदिकार दोर्कता, अदुनहाटीं चिन्हां हृपिचचेक बूमिपोर्रीं मनना लोकुल्लकुन, “अद जिवरासिक अय्ते हायानसोंटा देब्बा दल्लिसि मत्ता, अद जीवाते मंता अदुना बोम्मा कीम्टु,” इंचि बोंकिचुंदु.

15 मोदाटा जिवरासिता बोम्मा वळ्कगोम इंचि बोम्माते जीवोत्रम वाटानद, आनि अदुन बोर अय्ते मोळ्कुर, ओर अंतोर्कुन हळ्कना अदिकार दीनकु हियमळ जर्गता.

16 अचोने आयाका अद, सिन्नु-पेद्दुदुर, सिरमंत-गरिब, दासुल्लक आयवोर, दासुल्लक ईर अंतोर्कुन ओरा तिना कयपोर्रीं हिलाकॉटे कपालमपोर्रीं उंदि-उंदि सिक्का वाटागोटाटा.

17 अद सिक्का इत्ते जिवरासिता पोरोल हिलाकॉटे दाना उंदि नंबर आंद. इल्हा सिक्का बोर्क अय्ते मन्नु ओनकु बतले अम्मावायो, आनि एतावायो.

18 इद पोल्ले तेळियगोम इत्ते बुद्दिद गावाले. बुद्दिद मत्ता मनकल जिवरासिना लेक्का किथिरकांटी. अद लेक्का वरोर मनकन हृप्संता आनि अद हासं नुह्कुना अरवै हासं आंद (666).

14

गोर्रीं पोरि आनि 1,44,000 लोकुल्लक

1 मर्रां नना सियोन इनना गुट्टापोर्रीं पेनदा गोर्रीं पोरि नित्तिसि मत्तद हळतन. अगा दानतोनि उंदि लक्सा नल्लै नालुं वेय्कुना (1,44,000) मंदि मत्तुर. ओरा कपालमपोर्रीं गोर्रीं पोरिना आनि दाना बाबाना पोरोल रासि मत्ता

2 नना स्वर्गमताल उंदि इसोंटा आवाज केंजतन गदा, अद पोंगाना एता वेल्लेन वर्दानालेसीं आनि बागा मब्बु उस्मानालेसीं मत्ता. अद आवाज टांबुरा नेकिसते बल्हा केंजा वांतनो अल्हे केंजा वासेक मत्ता.

3 आ उंदि लक्सा नल्चै नालुं वेय्कुना मंदि राजगदुदेता मुन्ने, नालुं जिवरासिना मुन्ने आनि पेदुदाल्कुना मुन्ने पूना पाटा पारसेके मत्तुर. बूमिपोर्रोटाएल पेन अस्कुत्ता लोकुकुलनाल ईर तप्पा बोरे आ पाटा पारा पराहिल्लुर.

4 ईर अंतोरगुडा मरमिं आयबोर, मुर्ताह्कुनाल लक्कु मंचि सतातुन पवित्र इरतोर आंदुर. गोर्रो पोरि बगा-बगा अय्ते होनुंदु ईर अंतोर दाना पज्जो-पज्जो होनानोर आंदुर. ईर अंतोरगुडा पेन आनि गोर्रो पोरिनाहाटी मोदाटा पलम आयगोम ईचि अस्कुत्तोर आंदुर.

5 ओरा तोळदाल बस्केन आबद्दम पोल्ले पेय्सा हिल्ले, ओर बेकसुर लोकुकुल आंदुर.

मूड दूताना आदेस

6 अद आता पजा नना पेनदा इंकुंदि दूतातुन मब्बुना नड्डुमताल परियसेक मननद हळतन, दानागा बूमिपोर्रो मनना अंतोर्क, हरेक जातितोर्क, हरेक बासा वळ्कानोर्क, अंतोर लोकुकुल आनि दुनियाता अनि देसेल्लुना लोकुकुल वेहालय बस्केळ्क पिस्सना पिस्वर बारेमता बेसता कबुर मत्ता.

7 अद दूता पेदुदा आवाजते, “पेन न्यायम कियाना वेला दग्गेक एवता. अदुनहाटी दानकु वेरियट, दाना महिमा कीम्ट. स्वर्गमतुन, बूमितुन, समुद्रमतुन आनि एता ऊटान तयार कीता पेनदा आरादना कीम्टु” ईचि इत्ता.

8 अद आता पजा इंकुंदि दूता वासि, “नासडेम आता, नासडेम आता, पेदुदा बेबिलोन सहर नासडेम आता, अद अनि जातिना लोकुकुल दाना बोगमतनमता होंग वायानसोंटा कल्लु उहता” ईचि इत्ता.

9-10 पजा इंकुंदि मूडोव दूता वासि, “बोरे आयिर अद जिवरासितुन आनि दाना बोम्मातुन मोळ्किसि, ओना कपालमपोर्रो आयि हिलाकोटे कयपोर्रो आयि दाना चिन्हाता सिक्का वाटकुंतोर, ओरगुडा तालिते वळ्थिसि मत्ता पेनदा होंगुना पिस्वर कल्लु उनानुर, उंचि पवित्र दूतन मुन्ने, गोर्रो पोरिन मुन्ने रमा-रमा पोत्तना तळ्मिते आनि गंदकमता सिक्साते अरानुर.

11 अल्हा ओर वेयनेके पेय्सना पोया बस्केळ्क पोरोर् तेदसेकेन मनंता. बोरे अय्ते आ जिवरासितुन आनि दाना बोम्मातुन मोळ्कतुर, दाना पोरोलता चिन्हाता सिक्का वाटकुंतुर ओर नर्का-पिय्यल तकलिपतेने मनंतुर,” ईचि इत्ता.

12 अदुनहाटी पेनदा आदेस परकारम ताकानोर आनि येसु सामिना पोरोर् विस्वासम कियाना पेनदा लोकुकुल तिप्पलकुने ओप्के पियमळे गावाले.

13 अस्के स्वर्गमताल उंदि आवाज, “इल्हा रासा, बोरे अय्ते सामिन विस्वासम कीसि हातुर, ओर इंदके नसिबतोर आंदुर,” ईचि नाक केंजावाता. “हो! निजमे, ओरा कस्टमताल ओर्क आराम दोर्कता. ओर कीता कबाहक ओरतोने दांतां,” ईचि आत्मा इत्तद केंजावाता.

बूमिपोर्रोटा पंटातुन कोयमळ

14 पजा नना हळतस्के, नाक तेल्ला मब्बु तेपे दिसता. आ तेल्ला मब्बु तेपेपोर्रो मनकना रूपमते पुटतोनलेसी वरोर उदुदिस मत्तोर. ओना तल्लापोर्रो बंगारमता किरिम आनि ओना कय्दे वेल्लेन करा-करा मत्ता उंदि हेटेळ मत्ता.

15 इका उंदि दूता पेनदा गुळिताल पेय्सि, मब्बु तेपेपोर्रो उदुदिस मत्तोन, “बूमिपोर्रोटा पंटा कोताक वासि अदुन कोय्याना वेला एवता अदुनहाटी निमे नीवा हेटेटे अद पंटातुन कोय्या” ईचि जोरसे वेहाता.

16 अस्के तेल्ला मब्बु तेपेपोर्रो उदुदिस मनानोर ओना हेटेळ तिरहातोर, तिराहचि बूमिपोर्रोटा पंटातुन कोयमळ जर्गता.

17 अस्के पेनदा इंकुंदि दूता स्वर्गमते मनना गुळिताल पेय्सता. दानागा गुडा वेल्लेन करा-करा मत्ता हेटेळ मत्ता.

18 अस्के गदुदेताल पेनदा इंकुंदि दूता वाता. अद दूताक तळमिता अदिकारम हीसि मत्ता. इरगा करा-करा मत्ता हेटेळ पीसि मत्तोन पेदुदा आवाजते, “बूमिपोर्रो मनना अंगुर पंडिना पंटा पंडता अदुनहाटी नीवा इरगा करा-करा मत्ता हेटेटे अंगुर गुत्ति कोय्या” ईचि इत्ता.

19 अस्के आ दूता दाना हेटेटे, बूमिपोर्रोटा अंगुर पंडिना गुत्ति कोय्सि, पेनदा होंगु इनना अंगुर पंडिना गानगुने वाटसीता.

20 पजा सहरता पलाते मत्ता गानगुनगा गानगु पियमळ जर्गता. अद गानगुताल नेत्तुर पोरोर् वाता. अद नेत्तुर इच्चोर पेय्सता गदा, गुरल्लुकुना मोसोटुन दोहाना पट्टानच्चोर एत्तु आनि मूड नुह्कुना किलोमिटर पोंगसेक होत्ता.

15

पेनदा होंगुने निडता बंगारमता एडुं वाटि

1 अस्के स्वर्गमते नना मसुदि पेदुदा इचंक्रमता चिन्ह हळतन. अद बतल इत्ते, एडुं दूतानगा, एडुं गंडाल्कु मत्तां. अव आकिरता गंडाल्कु आंदु. अव आता पजा पेनदा होंग सल्लारंता.

2 बोर अये आ जिवरासि, बोम्मा आनि दाना पोरोलता नंबरतोनि लडाइ कीसि गेल्लिस मत्तुर, ओर अंतोर पेनदा टांबुरां पीसि आ समुद्रमता ओड्डुनपोरों नित्तिस मत्तद नना हळतन

3 पेनदा सेवाकुड मूसाना पाटा आनि गोरिं पोरिना पाटा पारसेके ओर इल्हा इनुंदुर, “ए अन्निटकन्ना एक्को सक्तिमंतुन आता मावा सामि पेनदुना, नीवा कबाहक पेदुदेय आनि इचंत्रमतव आंदुं, निमे बस्केळ्ळक मंदना राजान आदिन, नीवा हरिं नीतितद, आनि सत्तेमतद आंदुं,

4 हे सामि सिराप निमेने पवित्र मंतिन, असोर्टस्के नीकु वेरियाकोटा, नीवा पोरोलता महिमा क्रियाकोटा बोर मना परांतोर? नीवा न्यायमत्तुन अंतोर हळतुर, अदुनहाटीं दुनियाता अन्नि देसेल्लुकुना लोक्कुलक निहगा वासि नीके मोळ्ळकानुर.”

5 अद आता पजा, गवाइता डेराता गुळितुन, स्वर्गमते कुल्ला कीसि मत्तद नना हळतन.

6 आ गुळिताल एडुं दूतां एडुं गंडाल्लुकुन पीसि पलाते पेयसतां, अव जगा-जगा तेल्लगा मेर्सना कपडिं केरसि मत्तां. अबुना सातिक बंगारमता पट्टां दोहाचि मत्तां.

7 अस्के आ नाल्तुं जिवरासिनाल उंदि जिवरासि, अव एडुं दूतांक, बंगारमता एडुं वाटिं हिता. आ वाटिने युगा-युगाल्ळक जीवाते मंदना पेनदा होंग निडिस मत्ता.

8 अस्के अद पूरा गुळि पेनदा महिमाता वेल्लुने आनि ताकतहेंदाल पोयातोनि निडिस होलता. पजा आ एडुं दूताना अव एडुं गंडाल्लुकु पूरा मारनदाका अद गुळि लोपो बोरे नेंगा परांहिल्लुर.

16

एडुं गंडाल्लुकु

1 अस्के गुळिताल उंदि पेदुदा आवाज आ एडुं दूतनतोनि, “होन्टु! पेनदा होंगुना अव एडुं वाटिन बूमिपोरों वळियटु” इत्तद नाकु केंजावाता.

2 अदुनहाटीं पेनदा मोदाटा दूता होंचि, दाना वाटितुन बूमिपोरों वळियसीता, अस्के अद जिवरासिता निसानि मत्तोर्कु आनि बोर अये दाना बोम्मातुन मोळ्ळुकुंदुर ओर्कु इरगा नोयाना लसा-लसा पुनकु आतां.

3 पेनदा रोंडो दूता दाना वाटितुन समुद्रमते वळियसीता, अस्के अद समुद्रम हाता मनकना नेत्तुरलेसीं आसोत्ता, पजा समुद्रमते मनानव अन्नि जिवरासि हासोत्ता.

4 पेनदा मडोव दूता दाना वाटितुन बैरह्कुने आनि एता ऊटान पोरों वळियसीता, अस्के अब्बे मत्ता पूरा ए नेत्तुरलेसीं आसोत्ता.

5 एतापोरों अदिकारम मत्ता पेनदा दूता इल्हा इनानद नना केंजतन, “ए पवित्र पेनदुना, निमे इंदके मंतिन, मोदालागुडा मत्तिन. निमे न्यायम क्रियाना पेनदुन, निमेने इवुना इल्हा न्यायम कीतिन.

6 बारित्ते ओर नीवा पवित्र लोक्कुलुकुन, नीवा कबुरतोर्कुन हळ्ळिसि ओरा नेत्तुर पोंगागोटुर. अदुनहाटीं निमे ओर्कु उनालय नेत्तुर हीतिन, ओर इदुना लायके मंतुर,” इंचि इत्ता.

7 अच्चोटेन मोक्कु हिथ्याना गदुदेताल, “ए पेनबाबा, सामि, निमेने अन्निटकन्ना सक्तिमंतुन आता पेनदुन आदिन. निमे क्रियाना न्यायमते निजम आनि सत्तेम मंता,” इंचि नाकु केंजावाता.

8 नाल्तुंगो दूता दाना वाटितुन पोडदुन पोरों वळियसीता, अस्के लोक्कुलुकुन दाना दगळते कर्वंगोटाना अदिकारम पोळ्ळुकुं हियमळ जर्गता.

9 कडक दगडाहेंदाल लोक्कुलक कर्विसोत्तुर, अस्के आ गंडाल्लुकुन पोरों अदिकारम मत्ता पेनदुन अपमानम कीतुर गानि ओर दाना महिमा क्रियानाहाटीं सतता पापाल्कुनाल मनसु मार्सकुन्ना हिल्लुर.

10 पेनदा हेय्युंगो दूता दाना वाटितुन आ जिवरासिता राजगदुदेपोरों वळियसीता. अस्के दाना राज्यमते पुरागा हीकट आता. पजा तिप्पल्लुकुं आगा परीका लोक्कुलक ओरा नाल्कें ओरे कोर्ककुनालय दल्लगुर.

11 ओर्क वाता तिप्पल्लुकु, ओर्क आता पुनकुन हेंदाल स्वर्गमते मनना पेनदा अपमानम कीतुर. गानि ओर कीता पापाल्कुनाल मनसु मार्सकुन्ना हिल्लुर.

12 पेनदा हांगो दूता दाना वाटितुन परात इनना पेदुदा बैरेटे वळियसीता. अस्के अद बैरेटा ए बोत्तिगा इनकिसि होलता, पोळ्ळु देयसना दिक्कुने मनना राजालोर्कुं हरीं आयगोम इंचि आ दूता अल्हा कीता.

13 पजा नना अद मासुल तरासता तोळ्ळाल, आ जिवरासिता तोळ्ळाल, पेनदा आबदुदम कबुरत्तोना तोळ्ळाल पन्नेत्सोटा मूड दुस्तात्मां पलाते पेयसानद हळतन.

14 इव चिन्हां हृषिस्ता देय्याल्लुकुना आत्मां आंदु. आत्मा अन्नितकन्ना एक्को सक्तिमंतुड आता पेनबावानतोनि आकिरता रोजकुने लडाइ कियानाहाटी, दुनियाता अंतोर राजालोर्कुन उंदि कियालय ओरगा होंचेके मंतां.

15-16 अव आत्मां आ राजालोर्कुन इब्रानि बासाते अरमिगदोन इनना जेगातगा कल्पतां. अदुनहाटी येसु, “हळ्हाट नना मिहगा दोंगानलेसीं वांतन, बोर अथे तेल्चिते मंचि, केराना कपडिन कापाळकुंतोर ओर आसिवादि दोर्कतोर आंद. बोरे आयिर अल्हा मनाकोटे मेंदुल कुळके दिस्सि लोक्कुल्लुना मुन्ने ओनद ओर सिग्गु पोगोटकुंतोर आंतोर” इचि वेहतोर.

17 पेनदा एडुंगो दूता दाना वाटितुन वळि पोरों वळियसीता, अस्के स्वर्गमते मनना गुळिता राजगदूदेताल पेदूदा आवाजते, “बोत्तिगा आता” इत्तद केजावाता.

18 अस्के मब्बु मेसालिय, गळ-गळा इचि उरमालय दलगता, पजा इद बूमिपोरों लोक्कुल्ल पटतस्केटाल अथे, बस्केने आयाहिल्ले असांटा पेदूदा बुकंप आता.

19 अस्के आ पेदूदा सहरता मूड तुकळां आतां. वेरे-वेरे देसेल्लुकुना सहरकंता कूल्सि अरतां. पेन दाना तलातला आयाना होंगुना अंगुर कल्दुन पेदूदा बेबिलोन सहरकु उहानाहाटी अद मति मर्गाहिल्ले.

20 दीबें अबुना जागाताल मायसोत्तां, गुट्टां बग्गेन दिसाकॉटा आतां.

21 मब्बुनाल एबै किलो वजन मत्ता बर्प बंडां लोक्कुल्लुनपोरों अरताहाटी लोक्कुल्लुंक इरगा तकलिप आसि, ओर पेनदा अपमानम कीतुर. अद तकलिप वेल्लेने कतरनाक मत्ता.

17

मुरतळ आनि एर्राटा जिबरासि

1 अस्के गंडाल्लुकुना एडुं वाटिं पीसि मत्ता दूतानाल उंदि दूता नाकुन, “हिवके वा! वेल्लेन एता जलनपोरों उदुदिस मत्ता बोगमदान्कु दोर्काना सिक्सा बंदो नीकु हुसंतन,

2 बूमिपोरोंटा राजालोर दानतोनि बोगमतनम कीतुर, दाना बोगमतनमता कल्दुन उंचि बूमिपोरोंटा लोक्कुल्ल रिम्मालोर आतुर.” इचि इत्ता.

3 नना पवित्र आत्माते निडतस्के, आ दूता नाकुन बय्लि जेगाते ओता. अगा पदि कोहकु आनि एडुं तल्लां मत्ता उंदि एर्राटा जिबरासिपोरों उंदि मुरतळ उदुदिस मत्तद नाकु दिस्ता. आ जिबरासिता मेंदुलमेड पेनदा अपमानम कियाना पोल्लेंगे रासि मत्तां.

4 अद मुरतळ नेडि पंडि रंगु आनि एर्रा रंगुना कपडिं केरसि मत्ता. इंका डिस्को पूसां, मोतीना दुम्मे वाटकुंचि मत्ता. अल्हेने दाना कय्दे बंगारमता वाटिं मत्ता. अद वाटिते दाना बोगमतनम कियाना अपवित्र वस्तु आनि दाना पापालक निडिस मत्तां.

5 दाना कपालमपोरों, “पेदूदा बेबिलोन, बोगामोताहकुना अल्हेन हय्सुवा वस्तुकुना तल्लुर” इचि मर्मते रासि मत्ता.

6 अद मुरतळ पेनदा लोक्कुल्लुना नेत्तुरतुन आनि येसु सामिना गवाइताहाटी जीवा हीतोर नेत्तुरतुन उंचि रिम्मा आतद हळसि नाकु वेल्ले इचंत्रम आता.

7 अस्के पेनदा दूता नाकुन, “निमे इचंत्रम बारि आतिन? नना इद मुरतळता आनि अद उदुदिस मत्ता पदि कोहकु आनि एडुं तल्लां मत्ता जिबरासिता मर्ममतुन वेहांतन,

8 निमे हळता जिबरासि मोदाला मत्ता गानि इंदके हिल्ले, अद वेल्लेन लोत पोक्काताल पेय्सि नासडेमते अर्रा. दुनिया पुटतस्केटाल बूमिपोरों मनानोर बोरा पोरोली अथे पिस्वरता पुस्तकमते रासि हिल्लें, ओर अद जिबरासितुन हळसि, ‘इद मोदाला मत्ता, इंदके हिल्ले गानि मर्रा वायानद मंता’ इचि इचंत्रम आयानुर.

9 इव पोल्लें तेळियगोम इत्ते तेल्चि-बुदुदि गावाले. अव एडुं तल्लां इत्ते, अद मुरतळ उदुदिस मत्ता एडुं गुट्टां आंदुं.

10 अल्हेने एडुर राजालोर इचिगुडा दाना अर्तम आंद. एडुर राजालोरवेटाल हेय्युर अथे अर्सात्तुर. इंदके वरोर मंतोर, इंकावरोर इदवेरादाका वायाहिल्लोर. ओर वातस्के ओन्क कोन्नि रोजकु राज्येम कियेये पीता.

11 मोदाला मत्ता इंदके हिल्ले इत्ता जिबरासि इत्ते, एनमिदो राजाल आंदु. ओरगुडा एडुर राजालोरसंतोर गानि ओरगुडा नासडेम आयानुर.

12 निमे हळता पदि कोहकु इत्ते, ओर पदि राजालोर आंदुर. आ राजालोर इदवेरादाका राज्येम ताकसा हिल्लुर गानि ओर्कु आ जिबरासितोनि उंदि गंटादाका राज्येम ताकसना अदिकारम हियमळ जर्गाता.

13 ओर अंतोर उंदि मनसु आसि ओरा ताकत, अदिकारमतुन अद जिबरासिक हीतुर.

14 ईर राजालोर गोंरे पोरिनतोनि लडाइ कियानुर. गानि गोंरे पोरि सामिल्लुकुना सामि, राजालोर राजाल आताहाटी, अद दाना केयतोर, पेरतोर आनि विस्वासुल्लुकुनतोनि कलियसि आ राजालोर्कुन गेलसंता,” इचि इत्ता.

15 अद आता पजा दूता नातोनि, “बोगामोतळ उदिदस मत्ता बव एता जलां अय्ते निमे हळतिन, अव जलां इत्ते, वै-वै लोक्कुलक, वै-वै लोक्कुलकुना मंदां, वै-वै देसेलकुनोर, वै-वै बासां वळकानोर आंदूर.

16 इंका निमे हळता जिबरासि आनि दाना पदि कोहकु, आ बोगमतनम कीता मुरतटुन हैयसों. दान दिक्कु हिल्लाकोटा कीसि दाना कपडि हिलाकोटा कीतां. दाना मेंदुलता हळ्विन तिचि, तळमिटे वाटसीतां.

17 बारित्ते पेनदा पोल्ले पुरागा आयानदाका, ओर अंटर राजालोर उदि मनसु आसि ओरा राज्येमतुन जिबरासिक हियना इंचि पेने ओरा मनसुने वाटता.

18 इंका निमे हळता मुरतळ इत्ते, दुनियाता राजालोरपोरों राज्येम कियाना पेद्दा सहर आंदु” इंचि वेहता.

18

बेबिलोनता नासडेम

1 अद आता पजा नना उंदि पेनदा दूतातुन स्वर्गमताल हिळु रेयसेक मत्तद हळतन, आ दूताक वेल्लेने अदिकारम हीसि मत्ता. दाना महिमाता वेल्लेने बूमिअंता जगगरा आता.

2 आ दूता पेद्दा आवाजते वरगेयसि, “हिळारता, बेबिलोन पेद्दा सहर हिळारता. इंदके अद देय्यालक, दुस्ट आत्मां मनना जागा आता. बताके ओज्जुवव आनि ह्यसुवा पिट्टें अगा जागा पीतां.

3 बारित्ते, दाना बोगमतनमता कल्लु आनि देसेलकुनोर उट्टूर. बूमिपोरोंटा राजालोर दानतोनि बोगमतनम कीतुर, अद बोगमतनम कीसि कमय कीता दनमताहेंदाल बूमिपोरों दंदा कियाना लोक्कुलक सिरमंतुलक आतूर” इंचि वेहता.

4 अस्के स्वर्गमताल इंकुंदि आवाज इल्हा केंजावाता गदा, “ना लोक्कुलकुनिटा दाना पापमते कलियमटु, दानपोरों वायना गंडालकु मीपोरों वायामनि इत्ते दानगटाल पलाते पेयसत.

5 दाना पापालकगुडा वेल्लेन आसि स्वर्गमदाका एवतां, पेनगुडा दाना तप्पुड कबाहकुन मति कीता.

6 अद मीतीने बल्हा कीतनो अल्हे मिमेटगुडा दानतोनि कीम्टु, अद कीता कबाहकुनाहेंदाल दानक रोंडु अंतालक हीम्टु. बद वाटिते अय्ते अद मीकु निहाचि हीता अदे वाटिते मिमेटगुडा रोंडु अंतालक निहाचि हीम्टु.

7 अद बल्हा अय्ते पेदिदरकेमते, सुकमते मत्ता, अल्हेने दानक तिप्पलक, दुक्कालक हीम्टु. बारित्ते अद दाना मनसुलकुने, नना रानिन आंदुन, मुंडामोस्तादान आयोन, इंका नना बस्केने तिप्पलकुने अर्रीन,” इंचि इनकुता.

8 अदुनहाटी हामूर, दुक्कम, कर्बु इवनि तकलिपकु उंदे रोजुने दानपोरों वायानुं, दाना न्यायम कियाना सामि पेनबाबाल दानकन्ना वेल्लेन बलम मत्तोर आताहाटी अदुन तळमिटे बोळिसि बूळिदि कियानुर.

9 बूमिपोरोंटा बोरे राजालोर अय्ते दानतोनि बोगमतनम कीसि सुकमते मत्तूर, आ राजालोर दानु वेयानद हळसि, सतता साति तंचेके अळानुर.

10 ओर दाना तकलिपकुन हळसि, वेरियसि वेल्लेन लक्कु होंचि नित्तिसि, “अय्यो पेद्दा सहर, ताकत मत्ता बेबिलोन, उंदे गंटालोपो मीपोरों पेनदा सिक्सा वासि अरता” इंचि इनानुर.

11 इं बूमिपोरों दंदा कियानोर, अद वेय्यनदुन हळसि, इंदके ओरा सामानतुन अस्सानोर बोरे हिल्लूर इंचि अळानुर, दुक्कम कियानुर.

12-13 अव सामान बव इत्ते, बंगारम, एंडि, डिस्को पूसां, मुच्यालकु, मेल्टा कपडिं, नेडि पंडि रंगुना कपडिं, रेसिम कपडिं, आनि रकालकुना गमागमा गब्बु वायाना कट्टें, एक्को दराता कट्टें, कच्चि, इत्तोडिता सामान, नुन्ना बंडाना टाइल्सकु, आनि तीरकुना मसालां, मसालाते वाटाना सेक्का, दालचिनि,* मसालां, ऊदु, अत्तरनिय्कु, अंगूर कल्लु, निय्कु, मैदा, गोहकु, गोडकु-कोंदा, एटिं-गोर्ले, गुराल्कु, रतालकु, दासुलकु, लोक्कुलकुना जीवां अम्मूंदूर, गानि इंदकेटाल इवुन बोरे अस्सूर.

14 नीकु इस्तामाता पंडि निहागटाल लक्कु होत्तां, ससि आता तिडि, नीकु सुकम दोर्कना वस्तुक नासडेम आतां. मर्रा अव निहागटोर्क बोर्के बस्केने दोर्कां.

15-17 इव वस्तुकुन अम्मिसि अद सहरताहेंदाल सिरमंतुलक आता आ दंदा कियानुर, दाना तिप्पलकुन हळसि वेरियसि लक्कु होंचि, “नेडि पंडि रंगुना आनि एर्रां रंगुना कपडिं, बंगारम, डिस्को पूसां, मुच्यालकुना दुम्मे वाटसि मत्ता पेद्दा सहरतना, उंदे गंटालोपो नासडेम आसोत्तिन इंचि बादा पळसेके अळतूर.” जहाजकु ताकसानुर, अय्ते उदिदस होनानुर, अय्ते कबळ कियानुर, अल्हेने समुद्रमताहेंदाल कोत्तां कमांचना हरेक मनकल दान नासडेम आयानद हळसि लक्कु होंचि नित्तांतूर.

18 अद सहर वेयाना पोया हळसि, “अद सहरतालेसी पेद्दा सहर बदाना मंताना?” इंचि इनानुर.

* 18:12-13 इदु उंदि मसालाते मनना उंदि सेक्का आंदु.

19 पजा ओर वेल्लेन दुक्कमते, ओरा तल्लनपोर्रो दुब्बा दोसकुंचि, दुक्कमते, अळसेके, वरगोयसेके, “अच्यो पेद्दा सहरतुना, समुद्रमते जहाजकु मनना हरेक मनकल नीहेंदाल सिरमंतुलक आतुर. गानि उंदे गंटालोप्पो निमे पुरागा नासडेम आतिन” इंचि इनालय दलंगतुर.

20 “ए स्वर्गमते मनानोरिटा, पेनदा पवित्र लोकुकुनिटा, प्रेरितुकुनिटा आनि पेनदा कबुरतोरिटा, अद सहर नासडेम आताहाटी कूस आम्पु, अद सहर मीकुन हर्रि तप्पिस्ता इंचि पेन दानकु दगता सिक्सा हीता” इंचि आ पेनदा दूता वेहता.

21 अस्के वेल्लेन बलम मत्ता उंदि पेनदा दूता, जोत्तातसॉटा पेद्दा बंडातुन तेहिच समुद्रमते वाटसि इल्हा इत्ता, “पेद्दा बेबिलोन सहरतुन नासडेम कियानाहाटी पेनगुडा इल्हे पोच्चंता, पजा अद मर्रा बस्केन दिस्साकॉटा आयार.

22 टांबुरा नेकसानोरा, पाटा पारानोरा, त्रीला उह्कानोरा, तूताकोम उह्कानोरा आवाज इंदकेटाल बस्केने नीवा लोप्पो केंजा वायो. निहगा कबाहक कियानोरगुडा इंदकेटाल बस्केने दिस्सुर. जोत्ता नोराना आवाज गुडा निहगा केंजा वायो.

23 इंदकेटाल नीवा लोप्पो पंतेना वेळसि बस्केने दिस्सो. मरमिने एगाराना-दुनकाना सप्पुड बस्केने केंजा वायो. बारित्ते निहगा दंदा कियाना लोकुकुल पूरा बूमिपोर्रो पेद्दालक मत्तुर, इंका निमे नीवा होदें-मंत्रालुकु कीसि अन्नि देसेलुकुनोक्कुन पसांचतिन.

24 निहगा पेनदा कबुरतोराने नेत्तुर, पेनदा लोकुकुना नेत्तुर अल्हेने वैरे लोकुकुना नेत्तुर दिस्ता” इंचि वेहता.

19

स्वर्गमते पेनदा स्तुति

1 अस्के स्वर्गमते वेल्लेन मंदिलेसी पेद्दा आवाजते, “हालेलुया! मुक्ति, महिमा आनि ताकत मा पेनदा कच्येन मंता,

2 अद कियाना न्यायम सत्तेमतद आनि नीतिगल्लद आंदु, बारित्ते बेबिलोन सहर बोगमतनम कीसि पूरा दुनियातुन हेळाहता. अदूनहाटी पेन दान्क सिक्सा हीसि दाना सेवाकुलुकुना बदला येतता,” इंचि इनानद केंजावाता.

3 मसंदि मल्का ओर, “हालेलुया! अद सहर वेय्याना पोया युगा-युगालुकुनाहाटी पेय्येकेन मंता,” इंचि इत्तुर.

4 अस्के आ इवै नात्तुर एनकटा पेद्दालक आनि आ नाल्तु जिक्वारी राजगद्देपोर्रो उद्दिदस मत्ता पेनदा कालुकुनगा टोगारं ऊनसि, “आमीन हालेलुया!” इंचि मोळ्ळकतुर.

5 अस्के राजगद्देताल उंदि आवाज, “ए पेनदुकु वेरियसि पिस्साना दाना सेवाकुरिटा, मिमेट सिन्ना-पेद्दा बोरे आम्पु, अंतोर पेनदा स्तुति कीम्पु,” इंचि इनानद केंजावाता.

6 पजा नाकु वेल्लेन मंदितालेसी आवाज, वेल्लेन एता तळाना आवाज आनि मब्बु उस्मताप आवाज केंजावाता. अद आवाज, “हालेलुया! सामि मना पेनबाबाल वेल्लेन सक्तिमंतुड आंदुर. ओरे राज्येम ताकिचेके मंतोर.

7 गोर्रो पोरिना मरमिं दगरेके एवतां, मरमिं आयालय मरमिना पेगिडगुडा तयारे मंता. अच्ये वट्ट, मनम आनंदमते, कुसिते दाना स्तुति कीकोम.

8 दान्क पोंडालय साप-सुतरा तेल्लाटा आनि मेर्सना मलमल कपडिं हीतुर. आ मलमल कपडिं इत्ते, पेनदा लोकुकुल कीता नीति कबाहक आंदु” इंचि वेहानद नना केंजतन.

9 पजा पेनदा दूता नाकुन, “गोर्रो पोरिना मरमिना गाटो तिनालय बोर्कुनच्ये केयमळ जर्गता ओरे आसिवांद दोर्कतोर आंदुर.” पजा, “इद पेनदा सत्तेम पोल्ले आंद, इदुन रासा,” इंचि मर्रा इत्ता.

10 पजा नना आ दूताता काल्क मोळ्ळकालय दाना कालुकुनपोर्रो अरतन अच्ये अद नाकुन, “निमे नाकुन मोळ्ळकमा. ननागुडा नीलेसी, नीवा दंटाता विस्वासुकुनलेसी येसुना बारेमता गवाइ वेहासेके सेवा कियानोने आंदुन. निमे सिराप पेनदुने मोळ्ळका. बारित्ते येसुना बारेमता गवाइ इत्तेने बविस्वयानिता आत्मा आंदु.”

तेल्ला गुर्रमपोर्रो उदमळ

11 अस्के स्वर्गम कुल्ला आसि मत्तद हूळतन, अगा नाकु उंदि तेल्ला गुर्रम दिस्ता. दानपोर्रो उद्दिदस मत्तोन्, विस्वासमगल्लोड, सत्तेमतोर इत्तुर. ओर नीतिते न्यायम कीसि लडाइ कीतोर.

12 ओना कळ्ळक पोत्तना तळमितालेसी मंतां, ओना तल्लापोर्रो वेल्लेन किरिटालुकु मत्तां. ओनापोर्रो उंदि पोरोलगुडा रासि मंता, आ पोरोलता अर्तम ओन्क तप्पा बोर्के तेळियो

13 ओर नेत्तुरते मुळहाता कपडिं केरसि मत्तोर. ओना पोरोल “पेनदा पोल्ले” आंद.

14 स्वर्गमते मनना सिपाइलक तेल्लगा साप-सुतरा मलमल कपडिं केरसि, तेल्ला गुर्राळुकुनपोर्रो उद्दिदस ओना पज्जो-पज्जो होंचेके मत्तुर.

15 अन्नि देसेल्कुनोर्कुन हळकनाहाटी ओना तोळ्दाल उंदि वेल्लेन करा-करा मत्ता कसेर पलाते पेयसंता. ओर आ देसेल्कुनापोर्रो कडक राज्येम ताकसंतोर आनि अन्निटकन्ना सक्किंतुड पेनदा होंगुना अंगुर रसमता गानगु पोक्कातुन जारांतोर.

16 ओना कपडि आनि तोडापोर्रो, “राजालोर्कुना राजाल, सामिल्कुना सामि,” इंचि रासि मंता.

17 अस्के पोळ्दुनपोर्रो उंदि दूतातुन निलसि मननद नना हळतन. अद मब्बुन पोर्रो परियना अन्नि पिट्टेन पेद्दा आवाजते, “वट! पेनदा गाटो तिननाहाटी जमा आम्ट,

18 मिमेट वाते, राजालोरा हळ्वि, सिपाइल्कुना हळ्वि, अदिकारिल्कुना हळ्वि, गुरािल्कुना हळ्वि, गुरािल्कु ताकसानोरा हळ्वि, दासुल्कुना हळ्वि, दासुल्क आयवोरा हळ्वि, इल्हा सिन्ना-पेद्दा अन्नि लोकुल्कुना हळ्वि तिनालय मीक्कु दोर्कता” इंचि इत्ता.

19 अस्के अद जिवरासि, दुनियाता राजालोर आनि ओरा सिपाइल्क गुरमपोर्रो उद्दिस मत्तोनेतोनि आनि ओना सिपाइल्कनतोनि लडाइ कियालय जमा आतद नना हळतन.

20 पजा अद जिवरासितुन आनि पेनदा आबद्दम कबुरुतो न दोर्का पियमळ जर्गता. ओर कीता चिन्हाना हेंदाल, अद जिवरासिता सिक्का तंचि मत्तुर्कुन आनि दाना बोम्मातुन मोळ्कानोर्कुन पसांचमळ जर्गता. ओर इव्वुर्कुनगुडा गंदकमते रमारमा पोतसेके मनना तळमि गुंडमते जीवाते मननेकेन वाटसीयमळ जर्गता.

21 कळमातोर्कुन बारे आ गुरमपोर्रो उद्दिस मत्तोना तोळ्दाल पेयसता कराकरा कसेटे हळ्कमळ जर्गता. पजा पिट्टे वासि ओरा अंतोरा हळ्विन पीरमेड तित्तां.

20

वेय वर्सानाहाटी देय्यमतुन दोहाचि इरमळ

1 पजा उंदि दूता, स्वर्गमताल हिल्लु रेय्सि वायनद नना हळतन. दानागा वेल्लेन लोत पोक्काता तालम कय्क आनि उंदि पेद्दा गोल्सु मत्ता.

2 पजा आ दूता, बद्दुन अये इबलीस, देय्यम इतुरो आ पळाना मासुल तरासतुन दोर्कापीसि वेय वर्सानाहाटी दोहाचि वाटता.

3 पजा, वेय वर्सा निंडनदाका वे-वेरे देसेल्कुनोर्कुन बोकिच्चा मन्नि इंचि आ दूता दान वेल्लेन लोत पोक्काते वाटसि बंद कीसि दानपोर्रो सिक्कां तंता. वेय वर्सा निंडतस्के जेरासेपताहाटी दान होळसा पिय्यार.

4 मर्रा राजगद्दे हळतन. अवनपोर्रो उद्दिस मत्तोर्कुन न्यायम कियाना अदिकारम हीसि मत्ता. इंका येसुना बारेमते गवाइ वेहताहाटी आनि पेनदा पोल्ले वेहताहाटी बोरा तल्लां अये कोयमळ जर्गता, बोर अये जिवरासितुन हिलाकोटे दाना बोम्मातुन मोळ्का हिल्लुरु आनि कपालमपोर्रो हिलाकोटे कय्दापोर्रो दाना चिन्ह वाटकुना हिल्लुरु असंतोरा आत्मान नना अगा हळतन. ओर मर्रा जीवाते तेदसि किरिस्तुनतोनि कलियसि वेय वर्सनदाका राज्येम कीतुर.

5-6 इदे मोट्टा मोदाटा हासि मर्रा जीवाते तेदमळ आंद. कळमातोर बोर अये हासि मत्तुरो, ओर इव वेय वर्सा निंडनदाका मर्रा जीवाते तेदा हिल्लुरु. इल्हा मोट्टा मोदाटा मर्रा जीवाते तेदतोर बोर अये मत्तुरो ओर पवित्र आनि आसिर्वाद दोर्कतोर आंदुर. ओरपोर्रो रोंडो हामुरता ताकत कबळ किय्यो. गानि ओर पेनदा आनि किरिस्तुना पेर्मांलोर आंतुर. आसि किरिस्तुनतोनि कलियसि वेय वर्सा राज्येम कीतुर.

देय्यमतुन तळमिते वाटमळ

7 वेय वर्सा आतारित्ते, दोहाचि मत्ता देय्यमतुन होळ्सीयमळ जर्गार.

8 अस्के आ देय्यम पलाते वासि, बूमिपोर्रो नाल्लु मूलाने मनना अन्नि देसेल्कुनोर्कुन इत्ते, गोग, मागोग इनना लोकुल्कुन नडेह कीसि लडाइहाटी जमा कीता. समुद्रमता अस्केलेसी लेक्का परवच्चोन लोकुल्क ओर मंतुर.

9 ओर पूरा बूमिअंता पैलांचि होत्तुर. पजा ओर पेनदा लोकुल्कुना डेरं आनि पेनदा पावरमगल्ला सहरता सुट्टु आतुर. गानि स्वर्गमताल तळमि हिल्लु रेय्सि ओर्कुन नासडेम कीसि पोहता.

10 अस्के, जिवरासितुन आनि आबद्दम कबुरुतोर्कुन बगा अये मुन्नेन वाटतुरो, अदे गंदकमतोनि बगा-बगा पोतसेके मनना तडमिते, ओर्कुन नडेह कियाना देय्यमतुन वाटमळ जर्गता. अगा ओर नर्का-पिय्यल युगा-युगाल्कुनाहाटी तडमि मंटाते तनलाळसेक मनांतुर.

हासि मत्तोर न्यायम कियमळ

11 पजा नना, उंदि तेल्लाटा राजगद्दे आनि दानपोर्रो उद्दिस मत्तोन हळतन. बूमि, मब्बु ओना मुन्नेटाल पेय्सि वित्तुतां. मर्रा अवंक बग्गेन जेगा दोर्काहिल्ले.

12 पजा, हासि मत्ता सिन्नालकुन-पेद्दालकुन अंतोर्कुन राजगद्देता मुन्ने नित्तिसि मत्तद नना ह्ळतन. पुस्तकाल्क विच्चिसि मत्तां. पजा इंकुंदि पुस्तकम विच्चुमळ जर्गता, अद पुस्तकम इत्ते पिस्वरता पुस्तकम आंद. पुस्तकाल्कुने रासि मत्ता पोल्लेन पोर्रोटाल, हासि मत्तोर् क्रीता कबाहकुन पीसि ओरा न्यायम कियमळ जर्गता.

13 अस्के समुद्रम, दानागा हासि मत्तोर्कुन अप्पजेपता. पातालम आनि नरकम, अबुनगा हासि मत्तोर्कुन अप्पजेपता. ओर क्रीता कबाहकुन पीसि ओरा अंतोरा न्यायम कियमळ जर्गता.

14 पजा पातालमतुन आनि नरकमतुन तळमिता सेरवुने वाटमळ जर्गता. ई तळमिता सेरवु इत्ते रोंडो हामुर आंद.

15 पिस्वरता पुस्तकमते बोरा-बोरा पोरोलीं अथे रासि मना हिल्लेंगों, ओर्कुन अंतोर्कुन तळमिता सेरवुने वाटमळ जर्गता.

21

पूना स्वर्गम, पूना बूमि

1 पजा नना उंदि पूना स्वर्गम, उंदि पूना बूमितुन ह्ळतन. बारित्ते, मोदाटा स्वर्गम, मोदाटा बूमि मायम आसि होल्ता, इंका समुद्रमगुडा मनाहिल्ले.

2 अस्के, पेनदागटाल पवित्र सहर पूना येस्सलेम, स्वर्गमताल हिळ् रेयानद नना ह्ळतन. मरमिना पेडानाहाटी, मरमिना पेगिड बल्हा तयार आंता, अल्हा अद सहर दिस्सेक मत्ता.

3 पजा राजगद्देतगटाल उंदि पेद्दा लेग इल्हा केंजावाता, “ह्ळ्याट, पेन इंदके मनकालोरा नड्डुम जेगा आता. अद ओरतोने मनंता. ओर दाना लोकुल्क आंतुर, अद कुद्दु ओरा पेन आसि ओरतोने मनंता.

4 अद ओरा कळकुना कांडेहकुन उस्मंता. मोदाटा पोल्ले मायसोतां, अदुनहाटी ओर्कु हामुर, दुक्काल्क, बादां, तिप्पल्क मन्नों,” इंचि केंजावाता.

5 अस्के राजगद्देपोर्री उदिस मत्तोर् ओर, “ह्ळ्याट! नना अन्निटवुन पूनाव कीसि वाटंतन” इंचि इत्तोर्. मर्रा ओर, “इव पोल्लें सत्तेम, विस्वासमलायकतव आंद, इवुन रासा,” इंचि नाकु वेहतोर.

6 पजा मर्सिद मल्का नाकु इल्हा वेहतोर, “इव पोल्लें पुरागा आतां. अल्पा आनि ओमेगा, मोदोल आनि आकिर ननाने आंदुन. दूपाते मत्तोर्कुंक नना पिस्वरता एता ऊटाताल एर पुक्कटते हीतन.

7 गेलसानोर अंतोर इव अन्निटवुना वारसदाक आंतुर. नना ओरा पेनदुन आंतन, ओर नावा पिलाल्क आंतुर.

8 गानि वेरियानोर, विस्वासम हिल्वोर, कराब कबाहक कियानुर, हक्कानुर, बोगमतनम कियानुर, होदें कियानुर, बोम्मान मोळकानुर आनि आबद्दम वळकानुर अंतोर, गंदकमते गबा-गबा पोतसेके मनना तळमिता सेरवुने अरानुर. इदु रोंडो हामुर आंद,” इंचि वेहतोर.

पूना येस्सलेम सहर

9 पजा, एडुं वाटिने आकिरता एडुं गंडाल्कुन पीसि मत्ता एडुं दूतानाल उंदि दूता नहागा वासि, “हिव्के वा! नना नीकु मरमिना पेगिटुन, इत्ते गोंरें पोरीना मुत्तोने ह्पसंतन” इंचि इत्ता.

10 अस्के आ दूता, नना पवित्र आत्माते निडिसि मन्नेके नाकुन उंदि पेद्दा एत्तु गुट्टापोर्री ओता. ओसि, पेनदागटाल पवित्र येस्सलेम सहर स्वर्गमताल हिळ् रेयानदुन नाकु ह्पिस्ता.

11 अद सहर पेनदा महिमाता वेल्गुने निडिसि मत्ताहेंका दाना कांति यसब इनना वेल्लेन दराता बंडालेसी मेर्सेक मत्ता.

12 अद सहर सुट्टु उंदि पेद्दा एत्तु ग्रे मत्ता. दान्क पन्नेड गल्मां मत्तां. पन्नेड गल्मानगा पन्नेड दूतां मत्तां. आ गल्मनपोर्री इस्राएल लोकुल्कुना पन्नेड वंसाळकुना पोरोली रासि मत्तां.

13 पोळ्द पेयसनहेके मूड गल्मां, पोळ्द अरंनहेके मूड गल्मां, दक्किनतेके मूड गल्मां आनि उत्तरतेके मूड गल्मां मत्तां.

14 अद सहर सुट्टु मत्ता ग्रे पन्नेड पूनादिनपोर्री निल्लिस मत्ता. आ पन्नेड पूनादिनपोर्री गोंरें पोरीना पन्नेड प्रेरितुल्कुना पन्नेड पोरोली रासि मत्तां.

15 नातोनि वळकता दूतातगा, अद सहरतुन, दाना ग्रेन आनि दाना गल्मन कहालय, बंगारमता उंदि सलाकि मत्ता.

16 अद सहर नालुं मूलाना आकारमते दोहाचि मत्ता. अद सहरता पोडगु आनि नेवुं समानम मत्ता. अद बंगारमता पट्टिते सहरतुन कहता, अस्के अद सहर 2,400 किलोमिटर पेयसता. सहरता एत्तु, नेवुं, पोळ्गु समानम मत्ता.

17 पजा आ दूता सहरता ग्रेतुन कहतस्के, आ ग्रे मनकना कृताते इत्ते दूताता कृतातेगुडा नूटा नल्पै नालुं कृतां मत्ता.

18 अद ग्रे यसब इनना एक्को दराता बंडाते दोहाचि मत्ता आनि अद सहर काचुनलेसीं मेर्सेना पिक्वर बंगारमते दोहाचि मत्ता.

19-20 अद सहरता पुनादि, रका-रकाल्कुना एक्को दराता बंडां वाटसि दोहाचि मत्ता. मोदाटा पुनादि यसब बंडाते, रोंडो पुनादि निल्लिमनि बंडाते, मूडो पुनादि यमुना बंडाते, नालुंगो पुनादि मरकत बंडाते, हेय्युंगो पुनादि गोमेद बंडाते, हाम्गो पुनादि

मानिक बंडाते, एडुंगो पुनादि पीतमनि बंडाते, एनमिदो पुनादि पेरोज बंडाते, तोम्मिदो पुनादि पुकराज बंडाते, पदो पुनादि लहसनि बंडाते, पदाकॉडो पुनादि दुग्रकांत बंडाते आनि पन्नेडो पुनादि याकृत बंडाते दोहाचि मत्ता.

21 आ पन्नेड गल्मां पन्नेड मुच्यालकुनतोनि तयार कीसि मत्तां. उंद-उंदि गल्मा उंद-उंदि मुच्येमतोनि दोहाचि मत्ता. सहरता हरिं, काचुनलेसी मेर्सना पिच्चर बंगारमते तयार कीसि मत्ता.

22 अद सहरते नाकु गुळि दिसा हिल्ले. बारित्ते अगाटा गुळि अन्निकन्ना सक्तिमंतुड आता पेनबाबाल आनि गॉरे पोरि आंद.

23 अद सहरते वेलगु हियालय पोळ्दु, वेडसिता अक्सरम हिल्ले, बारित्ते पेनदा महिमाता वेलगु अगा कांति हीता आनि गॉरे पोरि दाना वेळसि आंद.

24 अन्नि देसेलकुना लोकुक दाना वेडसिता वेलगुने ताकानुर आनि दुनियाता राजालोर अद सहरते ओरा पेदूदातनम पीसि वायानुर.

25 अद सहरते नर्का बस्केने आयो. अदुनहाटीं दाना गल्मां बस्केळक कुल्लाये मनंता.

26 अद सहरता लोप्पो अन्नि देसेलकुना लोकुक ओरा पेदूदातनम आनि कदर पीसि वांतुर.

27 गॉरे पोरिना पिस्वरता पुस्तकमते बोरा पोरोलीं अयते रासि मंतां, ओरे अद सहरते होळिया परांतुर. गानि अपवित्र लोकुक, पापि कबाहक कियानुर हिलाकॉटे आबदम वळकानुर अद सहरते होळिया परं.

22

पिस्वर हिय्यना बरेड

1-2 अस्के पेनदा दूता नाकु सक्कगा मिटकरा मनना पिस्वरता एर हिय्यना बरेटुन हृमिस्ता. अद बरेड पेनदा आनि गॉरे पोरिना राजगदूदेताल सुख आसि, अद सहरता पेदूदा हरदा नड्डुमताल पोंगसेक मनुंदु, अद बरेटा ओड्डुंक रोंडु पक्काने पिस्वर हिय्यना मराक मत्तां. अव मराक वर्साता हरेक नेलाते पन्नेड तीरकुना पंडि हादसेकेन मनुंदु, दुनियाता अन्नि देसेलकुना लोकुक अव मराकुना आकिने बेस आयुंदु.

3 अद सहरते वायना रोजकुने बस्केने सापनेम मन्नो. बारित्ते अगा पेनदा आनि गॉरे पोरिना राजगदूदे मनंता. अवुना सेवाकुलक पेनदा सेवा कियानुर.

4 ओर दाना मोकोम ह्ळांतुर. ओरा कपालमपोर्रीं पेनदा पोरोल रासि मनंता.

5 अगा हीकट बस्केने मन्नो. ओकुं पोळ्दु, वेडसि वेलगुना अक्सरम मन्नो. बारित्ते सामि पेनबाबाले ओकुं वेलगु हियानुर. युगा-युगालकुनदाका ओरे राज्येम ताकसंतोर.

6 पजा अद पेनदा दूता नातोनि, “इदवेरादाका बतल अयते वेहामळ जर्गता अव पोल्लें विस्वासमलायक आनि सत्तेम पोल्लें आंदुं, बव पोल्लें अयते बिराना जर्गमळ अक्सरम मंता, अव पोल्लेन दाना सेवाकुलकुंक हृप्सानाहाटीं, कबुरतोर आत्मान ताकसाना पेने दाना दूतातुन लोहता,” इंचि इत्ता.

येसु क्रिस्तु मर्रां वायमळ

7 इवन्नि आता पजा येसु सामि, “ह्ळाट! नना बिरानेन वासेक मंतन. इद पुस्तकमते वेहिचि मत्ता पोल्लेन परकारम बोर अयते ताकंतोर, ओरे आसिवांद दोकुंतोर आंद,” इंचि वेहतोर.

8 नना योहानुन, इव पोल्लें केजतन, हळतन. केंजुड, ह्ळुड आतस्के, अव पोल्लें वेहता दूताता कालक मोळकानाहाटीं दाना कालकुनपोर्रीं अरतन.

9 गानि अद नाकुन, “निमे नावा कालक मोळकमा, ननागुडा नीलेसी, नी दंटाता कबुरतोरलेसी, इद पुस्तकमते वेहिचि मत्ता पोल्लेन परकारम ताकानोरलेसीं पेनदुन मोळकानोने आंदुन. निमे सिराप पेनदुने मोळका,” इंचि इत्ता.

10 अद दूता मर्रां नातोनि, “इद पुस्तकमते वेहिचि मत्ता पोल्लें निजम आथाना वेला दग्रेरा एवता, अदुनहाटीं इद पुस्तकमतुन निमे मक्किचि इस्मा,” इंचि इत्ता.

11 “अन्यायम कीसिके मनानोर अन्यायम कीसिकेन मन्निरकांटी, हेळसोतोर ओर हेळसोचें मन्निरकांटी, नीतिमंतुड मत्तोर, ओर नीतिमंतुडे मन्निरकांटी, पवित्र मत्तोर, ओर पवित्र मन्निरकांटी,” इंचि इत्ता.

विस्वासुलकुनाहाटीं गवाइ

12 पजा येसु सामि, “ह्ळाट! नना बिरानेन वासेक मंतन. हरेक मनकंक ओर कीता कबाहकन पीसि, ओन्क इनाम हीतन.

13 ननाने अल्पा, ननाने ओमेगा आंदुन. ननाने मोदाटोन, ननाने आकिर आंदुन. इंका ननाने सुख कियानोन, ननाने महानोन आंदुन.

14 बोर अय्ते ओरा कपडिं हुक्सि बेस साप कीतुर ओर आसिर्वाद दोर्कतोर आंदुर. ओर्क पिस्वर हियना मराता पंडि तिनालय आनि आ गल्मताल सहरते होळियालय अदिकारम दोर्कार.

15 गानि नयकस्केल लोकुल्क, होदेगाह्कु, बोगमतनम कियानुर, हळकानुर, बोम्मांक मोळ्कानुर, आबद्दमतुन पावरम कियानुर, आबद्दम वळ्कानुर अंटोरगुडा सहरता पलातेन मनांतुर.

16 येसुन आंदुन. दाविदना वंसंमतोन ननाने आंदुन. हक्केटा मेर्सना सुक्कातुनगुडा ननाने आंदुन, इंचि इव पोल्लेना बारेमता गवाइ कलिसियातोरक वेहनाहाटी नावा उंदि दूतातुन मिहगा लोहतन” इंचि वेहता.

17 पेनदा आत्मा आनि मरमिना पेगिड, “हिव्के वा” इंचि वेहांता. केंजानोरगुडा, “वा” इंचि इन्निरकांटी. दूपा आसि मत्तोर बोर आथिर इद पिस्वर हियना एतुन पुक्कटते उन्ना वच्चु.

आकिरता पोल्ले

18 इद पुस्तकमते वेह्चि मत्ता वायाना कालमते जर्गना पोल्लेन केंजना हरेक मनकंक इल्हा गट्टिगा वेहासेक मंतन गदा, बोरन्ना इव पोल्लेन बतलन्ना एक्को कल्पानय्ते, इद पुस्तकमते रासि मत्ता गंडाल्कु पेनबाबाल ओनपोर्रो वायागोटनुर.

19 अल्हेने ओक्कला बोरन्ना, इद पुस्तकमते रासि मत्ता मुन्ने जर्गाना पोल्लेनाल, बदन्ना पोल्लेतुन तक्को किथ्यिना, इद पुस्तकमते वेह्चि मत्ता, पिस्वर हियना मरा आनि पवित्र सहरताल पेन ओना हिस्सातुन तेंडकुंता.

20 इव अन्नि पोल्लेना गवाइ हीता येसु सामि, “हो नना बिरानेन वासेक मंतन” इंचि वेहासेक मंतोर. आमीन! वा! येसु सामि वा!

21 पेनदा अंटोर लोकुल्कुनपोर्रो येसु सामिना कुर्पा मन्निकांटी! आमीन!